


God-are Jögoru
I'oho



The New Testament in the Omie language of Papua New Guinea

God-are Jögoru I'oho
The New Testament in the Omie language of Papua New Guinea
Nupela Testamen long tokples Omie long Niugini

copyright © 1991 Wycliffe Bible Translators, Inc.

Language: Ömie (Omie)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 11 Nov 2022 from source files dated 9 Oct 2020
a68769b4-6180-5825-a17e-676d8f6a7efa

Contents

MATTHEW	1
MARK	73
LUKE	119
JOHN	197
ACTS	251
ROMANS	325
1 CORINTHIANS	360
2 CORINTHIANS	393
GALATIANS	414
EPHESIANS	428
PHILIPPIANS	439
COLOSSIANS	447
1 THESSALONIANS	454
2 THESSALONIANS	461
1 TIMOTHY	465
2 TIMOTHY	474
TITUS	481
PHILEMON	485
HEBREWS	487
JAMES	513
1 PETER	522
2 PETER	531
1 JOHN	537
2 JOHN	545
3 JOHN	546
JUDE	547
REVELATION	550

MATTHEW

Iesuare hijo miono'o jiobe rovade jöhoje.

¹ Aveho Iesu Keriso-are hijo miono'o jiobe rovade jöhoje. Iesu hu David-are uje jiadeje. David hu Abraham-are uje jiadeje.

² Abraham hu Isaac-are vavue jiadeje. Isaac hu Jacob-are vavue jiadeje. Jacob hu Judah-are o Judah-are ö ömo'ömo jabesi vavue jiadeje.

³ Judah hu Perez o Zerah-mesi vavue jiadeje. Jabesi vëmoho Tamar jiadeje. Röhu Perez hu Hezron-are vavue jiadeje. Hezron hu Ram-are vavue jiadeje.

⁴ Ram hu Amminadab-are vavue jiadeje. Amminadab hu Nahshon-are vavue jiadeje. Nahshon hu Salmon-are vavue jiadeje.

⁵ Salmon hu Boaz-are vavue jiadeje. Boaz-are vëmoho Rahab jiadeje. Röhu Boaz hu Obed-are vavue jiadeje. Obed-are vëmoho Ruth jiadeje.

Röhu Obed hu Jesse-are vavue jiadeje. ⁶ Jesse hu a böröme David-are vavue jiadeje.

David hu Solomon-are vavue jiadeje. Solomon-are vëmoho Uriah-are dorue jiadeje. ⁷ Röhu Solomon hu Rehoboam-are vavue jiadeje.

Rehoboam hu Abijah-are vavue jiadeje. Abijah hu Asa-are vavue jiadeje. ⁸ Asa hu Jehoshaphat-are vavue jiadeje. Jehoshaphat hu Joram-are vavue jiadeje.

Joram hu Uzziah-are vavue jiadeje. ⁹ Uzziah hu Jotham-are vavue jiadeje. Jotham hu Ahaz-are vavue jiadeje. Ahaz hu Hezekiah-are vavue jiadeje.

¹⁰ Hezekiah hu Manasseh-are vavue jiadeje. Manasseh hu Amon-are vavue jiadeje. Amon hu Josiah-are vavue jiadeje.

¹¹ Josiah hu Jechoniah-are o hesi ö ömo'ömo jabesi vavue jiadeje. Evare majare Babylon rajohuro muorovo'i rueromo Israel rajoho tövëvoromo ujuoho va'oromo Babylon rëmारेजे.

¹² Tövëvo ujuoho va'oromo Babylon rëmारेजे maja hesi ijore evare Jechoniah hu Shealtiel-are vavue jiadeje. Shealtiel hu Zerubbabel-are vavue jiadeje.

¹³ Zerubbabel hu Abiud-are vavue jiadeje. Abiud hu Eliakim-are vavue jiadeje. Eliakim hu Azor-are vavue jiadeje. ¹⁴ Azor hu Zadok-are vavue jiadeje.

Zadok hu Achim-are vavue jiadeje. Achim hu Eliud-are vavue jiadeje. ¹⁵ Eliud hu Eleazar-are vavue jiadeje.

Eleazar hu Matthan-are vavue jiadeje. Matthan hu Jacob-are vavue jiadeje. ¹⁶ Jacob hu Joseph-are vavue jiadeje.

Joseph hu Mary-are barue jiadeje. Mary hu Iesuare vëme jiadeje. Iesuare jöho uvarueje: Böröme namiromo ajamuaje aho höjo.

¹⁷ Iesuare hijo miono'oho ëhi jiobe rovadeje. Abraham bëhoho jioromo hesi ujo ömo'ömo jiobe rovadoho ro David-arire ë vituoho jioromo bëhohu'o ujuhu'o aho'obëhe 14 jiadeje.

O David bëhoho jioromo hesi ujo ömo'ömo jiobe rovadoho ro Israel rajo tövëvoromo Babylon ujuoho va'are majare ë vituoho jioromo bëhohu'o ujuhu'o aho'obëhe 14 jiadeje.

O Israel rajo tövëvoromo ujuoho va'are majare jioromo ujo ömo'ömo jiobe ruejuvo böröme namiromo ajamuaje a rahade majare ë vituoho jioromo ujuoho aho'obëhe 14 jiadeje.

Iesu rahade jöhoje.

¹⁸ Röhu Iesu Keriso rahadoho aviëhije. Hesi vëme Mary'o Joseph'o masurovo'iröhëro uarovoromo arijareje. Bogo masurovoromo gemuoroho

arijē'e Mary-ro gavadeje God-are Aru'ahohuro uje bojamijë'ëro hu dē'e jiamu. ¹⁹ Hesi aemo'aeme Joseph-ro gavade hu dē'e jiamu gagorovo jōgoru ejaje aëro jië'ëro Mary nugö'ö'i uehorovadeje. Röhu Mary a nunire javoji bojami'iröhoho bijönimamu uvadeje: Iae na saginiëri ëhi ë'ejöjo. ²⁰ Ëhi uehorovojuvo nia'ovoro gavadeje Badare aneraëro rueromo uavavamu: David-are hije Joseph jaehu Mary masu'iranoho nadi juhuonivonëjo. Ëhesi bëhoho bogo aho ujoho bojami'i hesi God-are Aru'ahëro bojamamu dë'iraiej'e höjo. ²¹ Harihoho rahego hesi ihoho Iesu jumuvonëjo rabëni huro hesi aribövi jabesi sisëho mu'uvëhoromo maro rëmo'ië'e jiaje.

²² Röhu ë mue aho'o rovade hesi bëhoho ëhuro Badahu hesi jö majëhijaje a uavamu jajivadëhi ëhi jioröhego. ²³ Jajivoromo ëhi uvadeje: Aboridohuro dë'iraeromo harihe raho'a'ajëjo. Raho'iramu aëro hesi ihoho Emmanuel jumuvo'aruëjo. Emmanuel ë iho hesi bëhoho God-hu no'o jiaje jöhoje.

²⁴ Amo Joseph-ro niavë'ëro ri'öromo Badare anera hesi jöho eja-horomo hesi magonahoho masuvadeje. ²⁵ Masuromo röhu bogo hu'ohoho gemuoroho niavadeje u'emu harihoho rahego niavo'iröhëro. Amo harihoho rahamu Iesu jumuvadeje.

2

Sa'a gö rajo ariböviehu Iesu rajahi'i rovere jöhoje.

¹ Iae Iesu Bethlehem amore Judea sa'are ë rahadeje Herod sa'a a böröme jiadevare. Rahamu iae jiji adaho'amarue a masijohuro aruhe sa'a göre jioromo rovaroho ro Jerusalem amore suovovareje. ² Suorovoromo uëvareje: Jew rajo jemesi sa'a a böröme jioröhego rahade aharihoho dinö'e höjo. No aruhe sa'a göre raromoromo gavare hesi jijoho rojomamu garomo hu rajahi'i rovere höjo. ³ Ëjöhö heromo Herod sa'a a börömhuro dë sisërëromo uehore gö gö baejadeje Jerusalem amo rajo a ioro'iorohu'o. ⁴ Uehore gö gö baeromo huro Jew rajo priest masijohu'o jabesi jōgoru öri röjëhijarue ariböviohu'o uëvamu gemuoro gagovoruomadeje. Gagovamu uëvadeje: Böröme namiromo ajëmi'iröhe aho hu dinö'e raho'a'ajëjo. ⁵ Uavareje: Bethlehem amore Judea sa'are ë raho'a'ajëjo. Mami'e jö God-aro baeromo majëhinövade ahuro ëhi jajivoromo uvë'e höjo:

⁶ Bethlehem ja Judea sa'are javajoho

Judea sa'are a masijo jabesi nuniroho jasi ihoho bogo bise'oho jio'a'ajëjo.

Jasirire jioromo a böröme rue'a'ajëjo.

Rueromo nasi aribövie Israel rajoho muebejëvo'ajëjo.

⁷ Ëhi majahijamu hegorovo Herod-ro ë sa'a gö rajo a masijohuro ruejoro saginiëri jöe nugö'öromo uëvadeje: Ëjjijoho maja raburo aevoromo rojomamu gavarije höjo. Nadi ruëroho numëroho ue'i majaho ma-gemu uevego na hejöjo. ⁸ Majaho uavamu henugoromo uëvadeje: Rue Bethlehem amoro va'irarijoho aharihoho avoho nahobe jijihorëjo. Birohogoro rueromo dinö'e jiajoho uerego na he'iröjo na'o ë va'oromo hu rajahi'iode. ⁹ Ëhi uëvamu hegoro va'areje. Örire va'ihö gavareje mami'e ruhe sa'a göre gavare jije gemuoho jabesi nuninö urimo va'amu. Jijohuro urimo va'adoho va'o aharihehu

hijajire ë hesi simano bure namijadeje. ¹⁰ Namijamu ganugoromo bogo bise'lo vadu'oho nimorohareje. ¹¹ Nimorohoromo ë osare rumo va'oromo gavareje aharihoho hesi vëme Mary'o ë hijamu. Garomo sa'are ague aho raromoro hu rajahijareje. Rajahiromo inõmo inõmoho jiovoromo suvuore bamahareje. Gold o ridi'e inõme niõ'i göho frankincense göho myrrh ëhi i'imamareje.

¹² I'imamë'ëro nia'ovonõ'e hejare God-ro uëvamu: Bogave Herod-are öriroho vuonorõ'õ va'irarijë uëvamu hegorovo vuonorõ'õromo öri gönõ jabesi sa'are va'areje.

Joseph-hu Mary'o Iesu'o hu'iraejëvoromo ju'ebiro mo Egypt sa'are va'are jõhoje.

¹³ Va'amu Joseph-ro nia'ovoro gavadeje Badare aneraëro rovamu. Aneraëro rueromo uavavamu: Ri'õ aharihohu'o hesi vëmohu'o hu'iraejëvoromo ju'ebiro mo Egypt sa'aro va'ëjo. Va'o ëhuro jionëjo hujeji naro uavego rue'irane ë hesi bëhoho Herod-ro aharihoho ano'i naho'ië'e jiaje. ¹⁴ Ëhi uavamu hegorovo Joseph-ro ri'õromo jabumë hu'iraejëvoromo vahi'e ë amoho vuonugo'i Egypt va'adeje. ¹⁵ Egypt va'oromo ë hijuvo hejade uavavamu: Herod guomë'e hõ uavamu hegoro rovadeje. Ëmue aho'o rovade hesi bëhoho urimë'i Badahu uavamu hesi jõ majëhinövade aehu jajivadëhi ëhi jiorõhego. Badahu uavade jõho hesi surire jajivoromo ëhi uvë'eje: Nasi Harihoho uvamu Egypt jioromo rovë'e jõjo.

Asisõ'o inino bijuëmارة jõhoje.

¹⁶ Ëhi ë'areje röhu ë hesi urimoho Herod-ro gavade sa'a gö rajo masijoho bogo vejõ'oho rueruomamu gagorovo uvadeje: Sareremijare hõromo dë vörönimo avohadeje. Dë vörönimamu hesi aribövioho jõe bojëmiromo uëvadeje: Bethlehem-nõ va'oromo asisõ'o ininoho aho'o bijuëmorëjo. Magonahoho nadi vadune niõ'i iosiramë'oho nadi a'i asisõ'o ioro'ioroho aho'o bijuëmo barërejo. Mami'e sa'a gö rajohuro jije rojomamu gavare majaho uavamu hejë'ëro ëhuni vadune niõ'i bogo iosiramijë'e asisõ'oho bijuëmorõhego uëvadeje. Uëvamu iae va'oromo bijuëmoruomadeje. ¹⁷ Bijuëmamu ëhuro mami'e jõ God-aro baeromo majëhinövade ae Jeremiah-hu uëvadëhi ëhi jiadeje. ¹⁸ Jeremiah-ro ëhi uëvadeje:

No hejaruëjo Ramah amore uvavo'ego.

Hara'uoromo nivavo'ego.

Rachel-ro hesi ujo ömo'ömohuni nivavajëjo.

Hesi ujoho barëjahë'ëro aehu sanuamaruoho bogo ejajëjo.

Iesumëhu Egypt jioromo vuonorõ'õ rovere jõhoje.

¹⁹ Herod guomamu Joseph-ro Egypt hiromo nia'ovo'iraeromo gavadeje Badare aneraëro rueromo ²⁰ uavamu: Ri'õromo aharihohu'o hesi vëmohu'o hu'irae ömëvoromo Israel sa'aro vuonorõ'õ va'ëjo aharihu ano'i uehorovare aribövioho mami'e vuovë'e jiaje. ²¹ Ëhi majahijamu hegorovo Joseph-ro ri'õromo aharihohu'o vëmohu'o hu'irae ömëvoromo Israel sa'are vuonorõ'õ rovadeje.

²² Rueromo hejade uvavamu: Archelaus-ro hesi vavue Herod-are sionoho baeromo bövie namiromo Judea sa'aho muebejaje hõ uvamu hegorovo juhuonivoromo ë sa'aroho bogo hijadeje. A'i

nia'ovo'iraeromo hejade God-arire jõe rueromo majahijamu hegorovo Galilee sa'are va'adeje. ²³ Galilee sa'are va'oromo amo ihe Nazareth ë hijadeje. Nazareth hijade hesi bëhoho urimë'i jö God-aro baeromo majëhinövare ariböviohuro God-are surire jajivarëhi ëhi jioröhego. Jajiv-oromo ëhi uvareje: Aëro hesi jöho atoromo uvo'a'aruëjo: Hu Nazareth raje ae höjo.

3

Bapataeto vaejaje ae John-hu ëhi ë'ade jöhoje.

¹ Ëhi'amu John a bapataeto vaejëvaje ahuro Judea sa'a a rumo'ere Jordan jovo riröre hiromomo jöho majëhinövadeje. ² Majëhiromomo uënövadeje: Uehoro sisëho vuonugo'i uehoro mae baehëjo. Jemë iae ga'ië'aruëjo God-ro böröme namiroromo muebejëvego. Ëhi majëhinövadeje. ³ Ëaho John hesi jöho God-ro mami'e uavamu hesi jö baeromo majëhinövade ae Isaiah-ro God-are surire jajivoromo ëhi uvë'eje: Aëro a rumo'e sa'are hiromomo ma-darugo'o uvo'a'ajëjo: Badahu ruerohe öroho avohorego hu maro rue'irajo. Hesi öroho ahorirëro vajivorego hu maro juvo'irajo. John-hu ë'iröhe jöho mami'e ëhi jajivoromo uvë'eje.

⁴ Ëhi jajivoromo uvë'ëro ë aho John-ro camel mi uehu avoho'amë'e niögu sisëho ruohoromo mi sinehu avohë'e götaho dë'ahore ba'amonövadeje. O hesi ioho hu guajuguajue vuome ëhi ibe juvonövadeje. ⁵ Ëhi'ego Jerusalem amo rajoho Judea sa'a ioro'iorore raromarue aribövioho Jordan jovo bëhinö dinö'e dinö'e raromarue aribövioho ëho jaburo rueruomonövadeje. ⁶ Rueromo jabeti sisëho huruoh'ego John-ro Jordan jovore bapataeto vaejëvonövadeje.

⁷ Ëhi'oromo John-ro gavade Pharisee ariböviohu'o Sadducee ariböviohu'o aho'obëhe huro bapataeto vaejëvojoro rueruomamu gëgorovo uëvadeje: Sigobu aboji harihu'e jëvanovajëjo. Jemë rari uëvade höjo: God-are vöröehu rue'iröhire jioromo huruomoromo manö va'irarijoho eni jëvo'ajëjo. ⁸ Bogajo. Ijehu bajo mae raejajëhi ëhi mu mae vaerego no garomo uvo'irarëjo: Iae jemë uehoro sisëho vuonugo'i uehoro mae baejë'e jëvajëjo. ⁹ Röhu nadi uvorëjo: Abraham nosi bëhohuro jië'ëro ëhu'ëro no mae javuajëjo. Naro jemë uëvajëjo: Jemë Abraham-are ujo ömo'ömo jëvajoho ëho ma-bise'e höjo. God-ro nimo'ibejajo ave munëho ujuohoromo avohëvego araeromo Abraham-are ujo ömo'ömo jio'amo'ibejajo. Ëhuni nadi nimorohë'ioho ëhioho atorëjo. ¹⁰ Röhu tonëro ijoho bëhi'o huo'ö'ie'ajëjo. Di ijohuro bajoho bogo ma raejë'e jiego huo'öromomo vëniro huo'ie'ajëjo. ¹¹ Naro jovëremu bapataeto vaejëvaje höjo aëro garuomoröhego jemë öri sisëho vuonugo'i aevoromo öri mare jijihë'e jëvego. Röhu ae gö nasi ijönö rue'ie'ajëjo. Huro na iosiremiromomo börömoho höjo. Naehu hesi mu bise'o vaejahoromo höru sino ujuohahoromo hesi ijore va'ibejodoho o mu bise'o bise'e rabe vaejaho'ibejodoho röhu na ma-bise'e jëvajëjo. Ëahuro God-are Aru'ahohuro o vënerö bapataeto vaejëvo'ajëjo. ¹² Hesi ijo garanoho övore höjo. Ijo garanoho övore jië'ëro ioho tevoromo döro hijiohijiovoromo mevoromo i maho gagovoromo hesi iruno'e osare ë avoho bahi'i subueho sinoho ravemu ravaje vëniro huo'a'ajëjo.

John-hu Iesu bapataeto vaejade jöhoje.

¹³ Ëhi'amu Iesuro Galilee sa'are jioromo abuejadoho abo Jordan jovore höröjadeje John-ro hu bapataeto vaejöro. ¹⁴ Rovamu gagorovo John-ro nijio'iraeromo uavadeje: O-ajo. Jero na bapataeto vaejevo'ibejanëjo iae mae jio'ibejajo. Röhu jero rabëni nasi öriroho rovane höjo naro ja bapataeto vaejavojöro. ¹⁵ Ëhi uavamu hegorovo Iesuro uavadeje: Bogajo. Avevejö'e naehu uavajëhi ëhi ë'ëjo. Ëhi ë'ë'oho ëhuro God-hu nimaje muoho vae'ëjarëjo. God-hu nimaje mu noehu vae barëjë'oho iae mae höjo. Iae mae höjamu hegorovo John-ro ejahadeje.

¹⁶ Bapataeto vaejamu gagorovo Iesuro jovore jioromo rojo ionire namijadeje. Namijamu ö'idöho arorovadeje. Arorovamu Iesuro gavadeje God-are Aru'ahe guaho va'ënohuro ruvebiromo hesirire gerejamu. ¹⁷ Ëhi'amu ae aho'obëhe hejareje ö'idöre uvavamu: Ave aho nasi Harihu mabëhe höjo. Na hu garomo ëhuro nasi dë vövöbajo'oho nimorohevajëjo.

4

Iesuhu mu sisë vaejöro Satan-hu bijioho gavade jöhoje.

¹ Iae Satan-ro Iesure dëre bijioho garöhego God-are Aru'ahëro uavamu Iesuro a rumo'e sa'a göre ajiomadeje. ² Ajiomoromo ioho bogo ijë'e majae vahie ma-hibe va'amu majae aho'obëhe 40 barëjadeje. Majae aho'obëhe 40 barëjamu vadunëro hömadeje. ³ Hömamu dëre bijahuaje ahuro rueromo uavadeje: Ja God-are Harihe javë'oho ave munëho uëvego irae'amajo. ⁴ Irae'amajamu ruehuro uavadeje: Röhu God-are jöho jajivoromo ëhi uvë'e höjo: Aehu iemu uehorovë'oho bogo maho raromo'aruëjo. A'i God-hu jöe aho'o jövajohuro ëhuro mae raromo'aruëjo.

⁵ Ëhi'amu Satan-ro Iesu hu'irae baeromo God-are amo ihe Jerusalem ajiomoromo ajio ruhe God-are osa börömo hesi döre ba'ojio ë nugamu namijadeje. ⁶ Namijamu Satan-ro uavadeje: Ja God-are Harihe javë'oho jörö'örovëjo. Ëhesi bëhoho God-are surire jöho ëhi uvë'e höjo: God-ro hesi aneraho uë'iramu ja muebejavo'aruëjo. O hesi surire jö göho ëhi uvë'e höjo: Aneraho jaburo övore ma'enagonövo'aruëjo jasi hörure munëro bibejavojöëni. Ëhuni jörö'örovëjo. ⁷ Jörö'örovëjamu uavadeje: Röhu ave God-are surire jöhu'o ëhi uvë'e höjo: Nadi ri'öromo Bada jasi God hesi dëho ëma bijiohoromo uanëjo: God jero ëhi ëhi ë'ëjo.

⁸ Ëhi uavamu Satan-ro Iesu hu'irae baeromo dahoru ëgobövire ajiomadeje. Ajiomoromo a masijehu dinö'e dinö'e raromoromo muebe'amarue öri ari'oho sa'ae inömo inöme bövie bise'e ma-mabëhe jïë'ego aehu muebe'amaruöho ëho röjahi barëjadeje. ⁹ Röjahiromo uavadeje: Ëbövioho bise'oho aho'o jasi örire bojami'ejöjo. Jaehu ague ahoromo na rajehijë'oho iae na bojami'ejöjo. ¹⁰ Bojami'ejöjamu ruehuro uavadeje: Satan va'ëjo. God-are surire jöho uvë'e höjo: Bada jasi God gemu rajahiromo hesi muohemu gemu vaejahonëjo.

¹¹ Ëhi uavamu Satan-ro va'adeje. Va'amu aneraëro rueromo Iesu ajamijareje.

Iesuhu Galilee sa'are hiromo aevoromo hesi mu vaejade jöhoje.

¹² Ĕhi'amu Iesuro hejade uavavamu: John bapataeto vaejavuaje aho aëro guduamu bava'oromo savoji gagore ba'amë'e hōjamu hegorovo Galilee sa'are ajiomadeje. ¹³ Ajiomoromo Nazareth amore hiromo èho vuonugo'i abueromo Capernaum amore hijadeje. Capernaum amoho jovo e'u rirōreje Zebulun rajo Naphtali rajo jabesi òri ari'ere. ¹⁴ Iesuhu è sa'are hijade hesi bēhoho God-hu uavamu hesi jō baeromo majēhinōvade ae Isaiah-hu jajivadēhi èhi jiorōhego. Isaiah-ro God-are surire jajivoromo èhi uvadeje:

¹⁵ Zebulun rajo Naphtali rajo jabesi sa'aho jovo bōrōmore va'arue òroho Jordan ioro'ioro gōre sa'aho è sa'are Jew rajoho bogo a'i sa'a ioro'ioro rajehu è Galilee sa'are raromaruoho

¹⁶ è aribōvioho ramoramō'ere raromarue hōjo.

U'emu aji mabēhe iae garuomō'ajējo.

Jaruvoho ramoramō'ero vuovo òriro jijiharue hōjo.

U'emu ajoho rueromo jabesi òrire ajivēvo'ajējo.

Iesuhu èhi è'irōhego God-are surire jō jajivadēhi Iesuro èhi Galilee sa'are hiromo ajoho barovadeje.

¹⁷ Iesuro ajoho barueromo aevoromo jōho majēhiromo uēnōvadeje: Uehoro sisēho vuonugo'i uehoro mae baehējo. Jemē iae ga'iē'arujējo God-ro bōrōme namiromo muebejēvego.

Iesuhu uēvamu visu suovarue ae 4 jabuhu aevoromo hesi ijore ijore jijihare jōhoje.

¹⁸ Ĕhi'oromo iae Iesuro Galilee e'u rirōre juvadeje. Juvo'i gavadeje Simon hesi iho gōho Peter'o Andrew'o ò'o ò'o visue suovarue aëro jēv'èro viōho jovore ba'amamu. ¹⁹ Viōho jovore ba'amamu gēgorovo uēvadeje: Nasi ijoro ijoro ruehējo naro rōjēhijego jemēro bogo visuoho gagovo'i a'i ae magonahe gagovēvego nasinō jioruomō'irōhe hōjo. ²⁰ Ĕhi uēvamu hejē'i jaburo viōho èhi vuonugo'i aevoromo hesi ijore ijore jirehonōvareje.

²¹ Ĕhi'amu Iesuro va'i gavadeje ae gō ò'o ò'o James'o John'o Zebedee-are harihe niō'i boat gagore jabesi vavuohu'o gemuore arijamu. Ariromo jabesi viōho sigohijamu gēgorovo uvēvadeje: Ruehējo.

²² Ruehējamu hejē'i jaburo boat-ohu'o jabesi vavuohu'o è vuonugo'i aevoromo Iesure ijore ijore jirehonōvareje.

Iesuhu hesi jō majēhibe a ajēmibe juvade jōhoje.

²³ Ĕhi'amu Iesuro God rajahijarue osare osare God-are jō bēhoho rōjēhibe God-hu bōrōme namiromo ae muebejēvo'irōhe jō maho majēhibe guomo guome gō gō baejē'e aribōvioho avohēvobe èhi'obe Galilee sa'ae bōvioho juvo barējadeje. ²⁴ Ĕhi'obe juvamu huhu èhi è'ade jōho hebe va'adoho Syria sa'are raromarue aribōvioho jabu'o è jōho hebe va'oruomadeje. Hebe va'oromo aëro guomo guome gō gō vi'ehe gō gō baejē'e aribōvioho Satan-are aribōviehu dēre abue'amē'e aribōvioho simano sisērējē'e aribōvioho òvo hōru vuovēhē'e aribōvioho èhi jiē'e aribōvioho ujuohoromo jabesi sa'are jioromo ruenōvareje. Ujuoho rue'ego Iesuro ajēmi'ego marējēvonōvadeje. ²⁵ Ae aho'obēhe ave Galilee sa'are jioromo aruhe Amo 10 Jio'amaje Sa'are jioromo arue Jerusalem amo bōrōmore Judea sa'a ioro'iorore jioromo aruhe Jordan jovo ionī gōnō jioromo è ro tagavoromo Iesu rihironōvareje.

5

Iesuhu dahorure hiromo a jö majëhijadohoje.

¹ Rihromamu Iesuro gavade ae aho'obëhe tagavoromo raromamu gagoro dahorure ajiomadeje. Ajiomoromo sa'are hijadeje. Hijamu hesi ijore ijore jijiharue ariböviohuro rovamu gëgorovo ² aevoromo jöho røjëhiromo uëvadeje:

Huë mae jioruomaje aribövi jabesi jöhoje.

³ Ae rahu uvë'oho: No bogo eni javuë'ëro hesi God-ro ajamuijaje hö uvë'oho huë mae jioruomaje höjo

God-ro muebejëvego hesi aharire mae raromo'ië'ëro.

⁴ Huë vavaeni baejarue aribövioho huë mae jioruomaje höjo

God-ro huë sanue bojëmi'ië'ëgo.

⁵ Ma-taemo raromarue aribövioho huë mae jioruomaje höjo

God-hu uëvade bövioho bise'oho bae'ië'ëro.

⁶ God-are mu maemu ga'i nimo avoharue aribövioho huë mae jioruomaje höjo

God-ro mu maho nugö'öjëhego jabesi dë vövöbajo'o ho mae jëvo'ië'ëgo.

⁷ Ae göëni vavaenimarue aribövioho huë mae jioruomaje höjo

God-ro jabesi jöëni vavaenimo'ië'ëgo.

⁸ Dë vövöbajo'o ma-maemu jiaruoho huë mae jioruomaje höjo

God ga'ië'ëro.

⁹ Muorovo öri tugoho'i huë baerovarue öri jiovarue aribövioho huë mae jioruomaje höjo

God-ro uvo'ië'ëgo: Jabumë nasi aboji harihu'e hö uvo'ië'ëgo.

¹⁰ Mu mae vaejego aehu ma-jabu gemu i'u bojëmego baejaruoho huë mae jioruomaje höjo

God-ro muebejëvego hesi aharire mae raromo'ië'ëro.

¹¹ Jemëhu na uehorovevamu aehu sivëgoromo mu sisë vaejëvoromo ae sarerëmiromo jemesi jö sisë gö gö ëma atë'o ho huë mae jëvaje höjo. ¹² Dë sasohoromo nimoro avohorëjo ë hesi bëhoho God-hu suvuoro jemëni ö'idöre bamëhajoho böröme jië'e jiaje. Urimo jö God-aro baeromo majëhinövare aribövi jabesi örire jabu'o aëro ëhi gemuoho sisë vaejëvonövare höjo.

Sö'o iro'o jabesi uhu jöhoje.

¹³ Söehu rumorovego i marëjajëhi jemëro sa'are aribövioho ëhi ajëmego mae jioruomaje höjo. Jemëhu ëhi sön'öe ajëmijarujoho sö hesi rihu barëjë'o ho diehi'oromo röhu maho avohojöëni sisëgo ruruhö'öjarue höjo. Ruruhö'öromo ë döre jijiharue höjo.

¹⁴ O irehu ajivego gavaruëhi jemë sa'are aribövioho ëhi ajivëvo'irarijoho jëvajëjo. Ame hojire jië'o ho bogo gurihiroho jëvo'i ma-va'orahoro jëvo'ajëjo. ¹⁵ O iro buno'irajë'iroho hevö gagoroho bogo gurih'i ma-va'orahoro bamo'anuejo ae aho'obëhe ë osare raromaruoho ajivëvo'iröhego. ¹⁶ Ehesi bëhoho jemëro jemesi aji muoho ma-va'orahoro vaejego aëro ë garomo jemesi Vavue ö'idöre hijajoho rajahiruomoi'irajo.

Moses o jö God-aro baeromo majëhinövare a ioro'oro ë aribövi jabesi jögöru Iesuhu ejego marë barë'iröhohuni ëhuni rovade jöhoje.

¹⁷ Rõhu jö göho nadi uvorëjo: Naehu rovode hesi bëhoho Moses-hu bojamuade jögorohu'o jö God-aro baeromo majahuinövore a ioro'ioro jabesi jöhu'o Iesu naehu mu'u'irodoho höjo. Na bogo ëhunioho rovode höjo. A'i ë ariböviehu jajivare jöe aho'o naehu ejego marë barë'iröhohuni ëhuni rovode höjo. ¹⁸ Ave jöho na jö mae uë'ië'ajëjo. Ö'idö'o sa'a'o birivoromo jiohe va'iröhoho Moses-are jögoroho bogo iaroho bisemu vadu'oho sisërë'i jöe aho'obëhe ë hesi muoho marë barë'ajëjo. ¹⁹ Ëhuni ae rahu Moses-are jögoru masijohu'o inino mahu'o ahë'oho o ae göehu ahoröhego rjöhijë'oho ëhi jië'e a hesi ihoho God-are öri ari'eroho bogojio'ajëjo. A'i ae rahu Moses-are jögoru ejë'oho o ae göehu eröhego rjöhijë'oho ëhi jië'e a hesi ihoho God-are öri ari'ere böröme jio'a'ajëjo. ²⁰ Ëhuni naro jemë uëvájëjo: God-are jögoru öri rjöhijarue ariböviohu'o Pharisee ariböviohu'o jaburo Moses-are jöho ma'ënarue höjo. Rõhu jemëhu ë aribövi bogo iosirëmiromo God-hu nimaje mu bogo uhohu'o vaejë'oho God-are öri ari'eroho bogo mae bogo va'a'arujëjo.

Bogo dë vörönimo'iröhe jöhoje.

²¹ Jemë hejarije höjo uvavamu: Aëro a mamioho ëhi uëvare höjo: Nadi aho anonëjo. Jaehu a anë'oho aëro ja guduamavoromo court-ro baejavo va'a'aruëjo. Ëhi uvamu hejarije höjo. ²² Rõhu naro uëvájëjo: Ae rahu jaehu ae gö hesi örire dë vörönimë'oho aëro guduamavoromo court-ro baejavo va'o hesi höjo. O ae rahu jaehu jasi aemo'aemo sivoromo uavë'oho: Ja uehore bogojië'e ae javajë uavë'oho aëro guduamavoromo council masijo jabesi nunire baejavo va'o hesi höjo. O ae rahu jaehu ae gö agoromo uavë'oho: Ja simano bogojië'e ae javajë uavë'oho ëhuro ja vëni örire va'o hesi javajëjo. ²³ Ëhuni jasi suvuoro God-are maratuore bamahö'i ë namiromo uehorovoromo uvë'oho: O nasi aemo'aemohuro nasi jö sisëho uehorovaje hö uvë'oho ²⁴ suvuoroho maratu nuninö ëhuro bamo nugo'irögoro urimo va'oromo jasi aemo'aemohu'o sanu-amivoromo evare ijönö vuonorö'ö rueromo God-are öroro suvuoroho bamahonëjo.

²⁵ Aehu jasi jö sisë hesirire jië'ëro ja baejavoromo court-re va'ië'iroho jemë niö'iro örire va'arujëvaro jero ma-burëro sanu'e jöho majahinëjo. Sanu'e jö bogo majahijë'oho huro court gavaje a hesi övore bojami'ajëjo. Bojami'iramu court gavaje ahuro police bojami'iramu savoji gagore ba'amavo'iramu ë hi'a'anuëjo. ²⁶ Ëhi ma-hiemu hijuvo bojami'irane monioho aho'obëhe bojami barë'anuëjo. Iae na mae uëvájëjo.

Bogo goho'amo'iröhe jöhoje.

²⁷ Jemë hejarije höjo uvavamu: Urimo ëhi uëvare höjo: Nadi goho'amonëjo. ²⁸ Ëhi uvamu hejarije höjo. Rõhu naro uëvájëjo: Ae rahu magonaho garomo goho'amo'ië'ohuro ëhuro hesi simanore goho'amë'e höjo. ²⁹ Ëhuni jasi övo manörire nunehu mu sisë garomo ëhuro God uehorovanue mu vuonugo'ië'iroho nunoho jahoromo bu'önëjo. Inöme gemu boremi'öjë'oho ma-jianovo'i jasi sine aho'o vënire va'ë'oho ëho sisë höjo. ³⁰ Jasi övo manöhuromo mu sisë vaeromo God uehorovanue mu vuonugo'ië'iroho tarioromo bu'önëjo. Inöme gemu boremi'öjë'oho ma-jianovo'i jasi sine aho'o vënire va'ë'oho ëho sisë höjo.

Bogo vaboro nugö'ö'iröhe jöhoje.

³¹ Röhu ave jöhu'o uövuë'e höjo: Vaboro nugö'ö'ie'iroho suroro jajivoromo vaboroho bojamiromo evaro nugö'önëjo. Ëhi uövuë'e höjo. ³² Röhu naro uëvájëjo: Vaboroho bogo ma-juvë'e baruehu ëma nugö'öjë'o ho ëho huro magonaho hesi örire mu sisë vaejaje höjo. Ëhu'ëro ë magonahohuro ae gö masuvë'o ho bogo maho masu'i ëho goho'amarue muoho vae'a'ajëjo. O ae göehu nugö'öjädë magonaho masuvë'o ho goho'amarue muoho vae'a'ajëjo.

God-are öri ari'o iho o inömo iho bogo uvoromo darugo'e jö jövo'iröhe jöhoje.

³³ Jemë hejarije höjo uvavamu: Aëro a mamioho ëhi uëvare höjo: Darugo'e jö jövoromo mu vae'i mae uavë'o ho nadi ahonëjo. A'i diehi vae'i uavanëhi ëhi Badare nunoro vaenëjo. Ëhi uvamu hejarije höjo. ³⁴ Röhu naro uëvájëjo: Mu vae'i mae uavë'o ho nadi darugo'e jöho jövo'i ma-ahorirëro uanëjo. Nadi ö'idö ihoho uvoromo darugo'o ho jövonëjo God hu böröme jioromo ë hijaje jiaje. ³⁵ Nadi ave sa'a ihoho uvoromo darugo'o ho jövonëjo God-ro hesi höroho ë bamoromo hijaje jiaje. Jerusalem amo ihoho nadi uvoromo darugo'o ho jövonëjo böröme namijaje a hesi ame jiaje. ³⁶ Jasi simano ihoho nadi uvoromo darugo'o ho jövonëjo. Simano si'öre gemu namijöro uvë'o ho o simano ue rövë'e gemu namijöro uvë'o ho ja bogo mae bogo eni javo'ajëjo. ³⁷ Ëhuni nadi simano ihoho uvo'irögoro ae ma-uëréjo: Iae na ë'ejöjo. O bogo ë'ejöjo. Jöe ruëre numëre ëma jövë'o ho ëho hesi Satan-are jöho höjo.

I'u bogo mana bojami'iröhe jöhoje.

³⁸ Jemë hejarije höjo uvavamu: Urimo ëhi uëvare höjo: Ae göehu gö hesi nune gemu bijioho hisivë'o ho mana nune gemu bijioho hisivahonëjo. Ae göehu gö hesi ane gemu bu'uvë'o ho mana ane gemu bu'uvahonëjo. ³⁹ Röhu naro uëvájëjo: Aehu sisë vaejavë'o ho nadi nijio'iraerovonëjo. A'iro aehu a'isabi övo manörire anagë'iroho huotorovego a'isabi gönöhu'o anago'irajo. ⁴⁰ Aehu jasi niögu bae'i court-re baejavo va'ie'iroho jasi döre ba'amanue niögohu'o bojamego bae'irajo. ⁴¹ Rome muorovo'e aehu uavë'o ho: Ma-burëro ri'öromo nasi inömoho baejago va'oromo ëhuro bamë uavë'o ho jero huë baeromo ajamiromo bamojöro uavade röho ho iosiramiromo va'o numori'o bamahonëjo. ⁴² Aehu jasi örire böviëni bise'ëni ëninamë'o ho bojaminëjo. Ma-jahuri bae'i nimë'o ho nadi nijio'iraenëjo.

Nu huodaguarue aribövi huë baejëvo'iröhe jöhoje.

⁴³ Jemë hejarije höjo uvavamu: Urimo ëhi uëvare höjo: Jasi ae gemuho huë baenëjo. Ja'o muorovaje aho nue huodivonëjo. ⁴⁴ Röhu naro uëvájëjo: Jemë'o muorovarue aribövioho huë baejëvorëjo. Jemë mu sisë vaejëvarue ariböviohuni God-are öroro ëninamirëjo. ⁴⁵ Jemëhu ëhi ë'ë'o ho Vavue ö'idöre hijaje hesi aboji harihu'o mae jëvo'ajëjo. Ëhesi bëhoho Vavuehu maja ëni nugö'öjajoho bogo a mahuni gemu nugö'ö'i a mahu'o a sisëhu'o aho'o jabuni röromo nugö'öjaje höjo. ⁴⁶ O jemë huë baejëvarue aganohemu huë baejëvë'o ho rabëni uvorëjo: Ëhuni God-ro suorovo mabëhe bojamui'ajëjo. Jemë'o uehorovorëjo. Vajiohu'e tax baeruomaje aribövioho jabu'o ëhi jabesi aganoho huë

baejëvarue höjo. ⁴⁷ O jemëhu jemesi ö mueno'emu rajëhijë'oho rabëni nimorohoromo uvorëjo: No ae aho'obëhe iosirëmiromo mu ma-mabëhe vaejë'e javuajëjo. Jemë'lo uehorovorëjo. God-are jö bogo hejë'e aribövioho jabu'lo iae ëhi gemuoho ë'oromo jabesi ö mueno'ohemu rajëhijarue höjo. ⁴⁸ Ëhi jië'e jiaje jemesi Vavue ö'idöre hijajehu mu bövi bise'lo ma-mae vaejajëhi jemë'lo ëhi avoho vaerëjo.

6

Bogo aehu göjoro suvuoro bojëmi'iröhe jöhoje.

¹ God uehorovarue mu vaejë'iroho gavë'iajo. Nadi a nuniroho ë muoho vaerego ëhuro aëro jemë gë'irarëjo. A nunire vaejë'oho jemesi Vavue ö'idöre hijajohuro suvuoroho bogo mana bojëmi'ajëjo.

² Ëhi jië'e jiaje mae sisë bogojië'e a huë baeromo suvuoro bojëmi'iröho nadi sinemuoho nimorohoromo hëgöe huanovoromo uvorëjo: Suvuoro'e ae jevajoho ro gehëjo. Hesi döhemu mae jio'amaje aribövi jabesi mue höjo. Ëho jaburo God rajahjarue osare raromoromo o örire jijihoromo ëhi a nunire nimorohë'i suvuoroho i'imëmarue höjo aëro jabumë rajëhijöro. Röhu aveho na jö mae uëvajëjo. Jabesi iho döre jiajoho ëho jabu jabesi manaho mami'e ma-ioro'ioeremu bae barëjë'e höjo. ³ A'i jemëhu huë baeromo a ajëmijë'iroho övo maehu ae ajëmijë'oho nadi adoho huruoho majahi'i ⁴ jasi ma-saginiëri aho ajëminëjo. Ma-saginiëri ajëmijë'oho Vavue jaehu saginiëri vaejago gavajohuro jasi manaho iae bojami'ajëjo.

Diehi pari vae'iröhe jöhoje.

⁵ O jemëhu God-are örire jö atë'iroho ma-döhemu mae jioruomaje ariböviohu vaejaruëhioho nadi ëhioho vaerëjo. Jabumëro God rajahjarue osare o öri duvahore riravoromo parie vae'i nimoruomaje höjo aëro gëjöro. Röhu aveho na jö mae uëvajëjo. Jabesi iho döre jiajoho ëho jabu jabesi manaho mami'e ma-ioro'ioeremu bae barëjë'e höjo. ⁶ A'i jemëhu God-are örire jö atë'iroho jero jasi sivue osaro va'oromo ojoho tugohoromo parie vaejago jasi Vavue gurihoro hijajohuro he'irajo. Ëhi'oromo pari vaejë'oho jasi Vavue jaehu saginiëri vaejago gavajohuro jasi manaho iae bojami'ajëjo.

⁷ O pari vaejë'oho nadi ruëroho numëroho ma-atobe va'orëjo. Hesi God-are jö bogo hejë'e ariböviohuro uvoruomaje höjo: Nani noehu jö ëgobövi jaguromo majëhijë'oho ëhuro aru'aho masijohuro avoho he'a'aruëjo. ⁸ Jabuhu pari vaejaruëhioho nadi ëhioho ë'orëjo. Bogo pari vaejarue majare jemesi Vavuohuro jemesi huë vavaenoho huro urimo gavaje höjo. ⁹ Ehuni jemëro jöho nadi ëhioho jagu'irögoro a'i aviëhi jië'e jöho majahiromo parie vaerëjo. Uarëjo:

Nosi apajo. Ö'idöre hijanuoho

jero ae aho'obëhe nosi dë vövöbajo'oho avohahuego

noro ja gemu mae uehorovavo'irarëjo.

¹⁰ Jero böröme namiromo aho'obëhe muebejavuego

no jasi aharire gemu raromom'irarëjo.

Jasi aharire gemu raromoromo jaehu nimanuoho ruhe ö'idöre mae ejarahuëhi

ave sa'arohuro ëhi ejaho'irarëjo.

11 Nosi ioho jaruvo i'imamuijego no ue'ahego da'uaguajo.

12 Nosi sisêho uehorovoromo vuonugonêjo.

Ae gôehu no sisê vaejavuego noehu uehorovoromo vuonugaruêhi jero êhi ajamuinêjo.

13 Nadi vôrô'eroho ramuego rireromavuo'i

a'i ajamuinego A Sisêho bogo ruahô'ôjavuo'irajo.

14 Êhesi bêhoho jemêhu a jabesi sisê uehorovoromo vuonugê'oho êhuro jemesi Vavue ô'idôre hijajohuro jemesi sisêhu'o uehorovoromo vuonugo'ajêjo. 15 O a jabesi sisê bogo uehorovoromo vuonugê'oho jemesi Vavuohuro jemesi sisêhu'o bogo uehorovoromo vuonugo'ajêjo.

Bogo aehu gôjôro God uehorovo'i i vuonugo'irôhe jôhoje.

16 O jemêhu God uehorovo'i i vuonugê'iroho dôeremu mae jiê'e aribôviehu nu ano'e sisêrôvaruêhioho nadi êhioho ê'orêjo. Êhesi bêhoho dôeremu mae jiê'e aribôviehu i vuonugê'oho jabesi nu ano'oho ijumorovarue hôjo aêro gêjôro jabuhu i bogo ijaruoho. Rôhu aveho na jô mae uêvajêjo. Jabesi iho dôre jiajoho êho jabu jabesi manaho mami'e ma-ioro'ioremu bae barêjê'e hôjo. 17 O jaehu i vuonugê'oho jasi sine bôvie bise'e avohorovoromo ninugu'e jovêro simanoro otehoromo nu ano'oho u'orovonêjo. 18 Êhi ê'ê'oho aho bogo ga'a'aruêjo ja ioho vuonugê'e javo'iramu ga'i jasi Vavue gurihiro hijajohuro huro sivue ja ga'a'ajêjo. Jasi Vavue jaehu saginiêri vaejego gavajohuro jasi manaho iae bojami'ajêjo.

Ave sa'are bogo a'i ô'idôre inômo babaenemi'irôhe jôhoje.

19 Rôhu ave sa'aroho nadi inômoho aho'obêhe jemesi sinênioho avohoromo babaenemirêjo. Sa'aroho inômoho dê'irae'amaje hôjo. Majo majêro tarivo'amaje hôjo. Vajiohu'e aribôviêro osaho dadovoromo ujuoharue hôjo. A'i ô'idôro avoho babaenemirêjo. Ô'idôroho inômoho bogo dê'irae'amaje hôjo. Majo majoho bogo tarivo'amaje hôjo. Vajiohu'e aribôvioho bogo osaho dadovoromo ujuoharue hôjo. 20 Inômo inômoho nadi jemesi sinênioho gemu bahi'i God-are ôroro bojamego huro hesi ôri ari'ere bahi nugêho'irajo. Êhi jiê'oho majo majoho bogo tarivo'amo'ajêjo. Bogo dê'irae'amo'ajêjo. O vajiohu'e aehu ojo dadovoromo inômo ujuoho'irôhoho bogojio'ajêjo. 21 Jasi mae sisê din'ê jiajire jasi dê vövôbajo'oho ê gemu jio'a'ajêjo.

Sino haho'o hesi iroho nuni jiaje uhu jôhoje.

22 Jasi sino hesi iroho nunoho hôjo. Jasi nuni mae jiê'oho êhuro aji maro hi'a'anuêjo. 23 O jasi nuni sisê jiê'oho êhuro ja ramoramoro hi'a'anuêjo. Êhesi bêhoho naro uêromo ê'ajêjo: Jasi uehoro ramoramovavê'ohuro êhuro ramoramoro maro hi'a'anuêjo.

Monie iruno'e niôgu suhi'e ê hesi jôhoje.

24 Ae niô'i bôrômoho gemuoho jêvajêromo jabesi mu gemuore havoromo vaejê'oho bogo eni javo'ajêjo. Ja gôho nue huodivo'i gôho rajahi'anuêjo. O gôho mae uehorovo'i gôho bijônimo'anuêjo. Êhesi bêhoho God'o moni'o niô'i bôrômoho gemuoho jêvajêromo gemuore havoromo mu vaejê'oho bogo eni jêvo'ajêjo.

25 Êhuni uêvajêjo: Nadi uvorêjo: I jovo'o rabe ue'ahoromo bogo vuovo'i biririvoromo raromo'ejarêjo. O uho niôgu'o rabêro sino

haho'o'oho riogivo'ejarëromo nurunurumorëjo. Èhesi bëhoho ioho ma-bise'e jio'i jemëhu birivoromo raromarujoho ëho bërömo'ho hõjo. Uho niõgu'oho ma-bise'e jio'i sino haho'o jëvajo'ho ëho bërömo'ho hõjo. ²⁶ Rõhu ugehu dõre va'aruoho uehorovohëjo. Noehu ë'aruëhioho ugo'ho bogo ëhioho iruno'oho bivo'i o bogo gagovo'i o bogo ujuohoromo osaroho ro avoho bahijarue hõjo. Bogo ëhioho ë'oruomaje hõjo rõhu jemesi Vavue õ'idõre hijajohuro ugo'ho mio'amaje hõjo. Rõhu jabumë ma-bise'e jio'amo'i jemë masijo mae jëvajëjo. Èhuni hu jemë'o avo'avoho muebejëvo'ajëjo. ²⁷ O jemëhu uvë'oho: No diehi'oromo ave sa'aroho majae ëgo'o raromo'ejarë uvoromo nurunurumë'oho na ëhuro jemesi vuovo'irarije majaho iosiramiro'ho ruëhi ma-bisemu gö'o raromobe va'orëjo. Bogajo.

²⁸ O niõgënioho rabëni nurunurumaruje hõjo. Bëhoho bogohõjo. Je'ore resu resuehu diehi'oromo ri'amaruoho ëhu'o uehorovohëjo. Aehu mu vaeromo niõgu avoharuëhioho resu resuoho bogo ëhioho ë'arue hõjo. ²⁹ Bogo ëhioho ë'arue hõjo rõhu ave resu resuohuro ma-mabëhe kavuego garomo nosi dëho vuëvavuaje hõjo. Naro jemë uëvajëjo: A bëröme Solomon niõgu ma-mabëhe io'amonövadoho ëho ma-jianovo'i ave resu resuohuro ëhi ma-mabëhe mae kavuo'amaje hõjo. ³⁰ Jaruvëhi resu resuoho rijego nërëhi ëhi aëro jahoromo vëniro huo'amarue hõjo. Rõhu ëhi jië'e resu resuoho God-ro muebejigo marëromo kavuo'amaje hõjo. Resu resuoho ma-bise'e jio'amo'i jemë masijo mae jëvajëjo. Èhuni uvorëjo: Hu no'o avo'avoho muebejavuoromo uhe niõge i'imamui'ajëjo. Nurunurumarujoho God bogo ma uehorovaruje aribövie jëvajëjo. ³¹ Èhuni nadi uvorëjo: No i rabe jovo rabe i'ejarëjo. O niõgu rabe io'amo'ejarëromo nurunurumorëjo. ³² God-are jö bogo hejë'e rarumarue ariböviohuro ie jove bövie bise'e ëhuremu uehorovoruomaje hõjo. Rõhu jemëro nadi ëhioho ë'orëjo. Jemesi Vavue õ'idõre hijajohuro iae mae garomo uvajëjo: Jemë iëro jovëro rabëro ëhuro birivoromo raromarujëjo. ³³ Èhuni nadi ëhemuoho uehorovo'i a'i God-hu bëröme namiromo muebejëvaje muoho noehu vaejõro huhu nimaje muoho ëho nunoro bamorëjo. Èhi ë'ë'oho God-ro jemesi aru'ahoho muebejëvoromo rõhu ie jove niõge givae bövie bise'e ëhu'o romoromoro bojëmi'ajëjo. ³⁴ Èhuni nëröhunioho nadi nurunurumorëjo. Nëri evare ë maja hesi muoho uehorovo'arujëjo. Majae gemu hesi huë vavaene jaruvo majae gemu uehorovarujoho hõjo. Èhuni nëri hesiroho nadi nurunurumorëjo.

7

Bogo döro bamorovoromo a jabesi sisë mevo'irõhe jõhoje.

¹ Rõhu nadi döroho bamorovoromo a jabesi sisëho mevorëjo. Jabesi sisë bogo mevë'oho God'o jemesi sisëho bogo mevo'ajëjo. ² Jemë diehi jië'e uehoro baeromo mevarujëhi God-ro ëhi jië'e uehoro'ho baeromo mevëho'ajëjo. I'u'e mae bojamë'ohuro ëhuro i'u'e mae bae'a'arujëjo. O bisemu bojamë'oho bisemu bae'a'arujëjo. ³ Ja diehi'oromo ijo ugobajo'e biseharihehu isiare nunire namijajoho ga'i ijo bëröme'ho jasi nunire namijavajoho bogo gavanuëjo. ⁴ Jasi nunire ijo bëröme'ho tugohavë'oho ëhu'oho ja rabëni jasi aemo'aemoho uanëjo: È'ego na jasi nunire ijo ine namijavajoho jahahõjo. ⁵ Sareri ae javajëjo. Jasi nunire

ijo börömehu tugohavajoho jero urimo jahonëjo. Jahonugoromo evare avoho garomo ijo ino harihoho isiare nuniroho jahaho'anuëjo.

⁶ Röhu God-are inömo maho nadi öho mëmi'i jemesi nieniaho nadi mahu nuniroho ruruhö'örëjo. Ëhi ë'ë'öho jaburo önu bijö'ëro vaenu-goromo evare huotorovoromo jemë umijëvo'ajëjo.

Biririvoromo God ua ga'iröhe jöhoje.

⁷ Röhu biririvoromo God ua garëjo. Biririvoromo ua gavë'öho ujuoho'arujëjo. Biririvoromo nahorëjo. Nahë'öho biroho'arujëjo. Ojoho ano'anovorëjo. Ano'anovë'öho God-ro jiovëho'ajëjo. ⁸ Ae rahu ua gavë'öho ujuohoruomo'ajëjo. Nahë'öho birohoruomo'ajëjo. Ano'anovë'öho ojoho jiovëho'ajëjo. ⁹ Nasi jö hejarujoho ae gö vavu ömo'ömo'e jëvajëjo. Jemesi harihehu uëvë'iroho: Ie bojemego na ijö uëvamu hejë'öho na jemë sareramiromo munë bojämirëjo. ¹⁰ O uëvë'iroho jovo mie bojemego na ijö uëvamu hejë'öho na jemë sareramiromo sigobu sisëho bojämirëjo. Bogajo. Jemë i mae i'imami'arujëjo. ¹¹ Jemë sisë aribövie jëvajëjo röhu jemesi aboji harihu'o avoho suvuorëmi'irarije öroho iae gavaruje höjo. Jemë sisë jëvo'i ö'idöre hijaje jemesi Vavuoho mae jiaje jemëro biririvoromo uvorëjo: Hu maëro jië'ëro ae rahu ua gavë'öho suvuoro mabëhe bojamuinövo'ajëjo.

¹² Ëhi jië'e jiaje jemë ae göehu diehi vaejëvojöro nëgë'öho jemë'o ëhi jië'e muoho ae gö jabesi öroho vaejëvorëjo. Ëhi jië'e mu vaejë'öhuro ëhuro Moses-are surire jögorohu'o jö God-aro baeromo majëhinövare surire jöhu'o ë jö hesi bëhoho ejëho'arujëjo.

Ojo harihure rumo va'iröhe hesi jöhoje.

¹³ Röhu ojo harihoro rumo va'orëjo. Vëni'ere va'arue ojoho öroho börömëro jië'ëro ëhu'ëro ae aho'obëhe ë va'oruomaje höjo. ¹⁴ A'i maro raromoröhe ojoho öroho biseharihe jië'ëro hesi ae ma-gemuëro gemuëro birohoromo ë va'arue höjo.

Jö majahuijarue ae gö jabesi mure garomo uvo'ëjo: Sareri jöe majahui-jaruëjo. Ëhesi jöhoje.

¹⁵ Gavë'i raromorëjo. Aëro rueromo God-are jöho huotuhuotorovoromo majëhijego ejëhojööni uëvajëjo. Jabumë ma-döhemu sheep va'ëne jio'amo'i uhoho vörö'le mioho va'ëne jio'amajëjo. ¹⁶ Jabesi mure garomo uvo'a'arujëjo: Ëaribövioho God-are jö sareri'e majahuijarue aribövioho jioruomajëjo. Rihu'e grape bajo uro'ië'iroho ë ö'iremü uro'i bibë'e ijo sisëroho bogo uro'a'anuëjo. O meso böso uro'ië'iroho mesoremu uro'i bibë'e resu sisëroho bogo uro'a'anuëjo. ¹⁷ O ijo mahuro bajo mae rae'i ijo sisëhuro bajo sisë rae'amaje höjo. ¹⁸ Ijo maho bajo sisëho bogo rae'i ijo sisëho bajo maho bogo raejaje höjo. ¹⁹ Ije aho'obëhe bajo bogo ma raejë'öho huol'öromo vëniro ruruhö'öjarue höjo. ²⁰ Ëhu'ëro jië'ëro jabesi mure garomo uvo'a'arujëjo: Ëho jaburo bogo rae avohë'ëro God-are jöho bogo avoho majahuijarue höjo.

Bogo Bada ma-döëremu uvarue a'i Vavuehu nimaje mu vaejarue ariböviehu God-are öri ari'ere va'iröhe jöhoje.

²¹ Aehu na uevaruoho: Bada Bada uevaruoho ioro'iorohuremu God-are öri ari'eroho va'oruomo'ajëjo. Ioro'ioroho bogajo. A'i ae rahu nasi

Vavue ò'idòre hijaje aehu nimajoho èl'è'ohuro è ariböviohuremu èho va'oruomo'ajèjo. ²² Èmajaho rue'iramu ae aho'obèhe ueruomo'ajèjo: Bada Badajo. Noro jasi ihore God-are jòho majèhiromo Satan-are sisè aribövioho a dèroho rarovò'òjèvoromo mu masijoho aho'obèhe vae'amare hòjo. ²³ Vae'amare hò'iramu evare naro uè'ejòjo: Na jemè bogo gèvode hòjo. Bogo mae bogajo. Jemè mu sisè vaejaruje aribövie jèvaje èhuni rori'o va'ohèjo.

Simano ma'e ahu'o simano sisè'e ahu'o javu vaejare uhu jòhoje.

²⁴ Röhu naehu jövaje jò ae rahu ejehajoho èhi jiè'e a hesi jòho naro uhu'e majèhi'iè'ajèjo. Simano ma'e ae gemuèro javuoho munè'e sa'are vaejade hòjo. ²⁵ Vaejè'èro èni bórömèro jovo bórömèro buru bórömèro rueromo è javuoho anade hòjo. Anamu bogo buevade hòjo munè'e sa'aro vaejè'èro. Nasi jò ejehaje aho è simano ma'e aho va'ène hòjo. ²⁶ A'i naehu jövaje jò ae rahu heromo bogo ejehajoho èhi jiè'e a hesi jòho na majèhi'iè'ajèjo. Simano sisè'e ae gemuèro javuoho nie'ure vaejade hòjo. ²⁷ Vaejè'èro èni bórömèro jovo bórömèro buru bórömèro rueromo è javuoho anamu buevade hòjo. Buevoromo sa'are nemoromo garahörò'e baejade hòjo. Ahia mino'èjo.

²⁸ Èjòho Iesuro majèhi barèjamu è tagavare ariböviohuro heromo tiòromo uvoruomadeje: Hesi jòho darugo'e jò ma-mabèhe javavajèjo. ²⁹ Èhi uvoruomade hesi bèhoho jabesi jògoru òri røjèhijarue ariböviehu røjèhijarèhioho hu bogo èhioho majèhi'i a'i hesi birire baejè'èro jòho majèhijadeje.

8

Iesuhu sino jomo'e a ajamade jòhoje.

¹ Iae Iesuro dahorure abuejadeje. Abuejamu gagorovo ae aho'obèhe hu rihioromoruomadeje. ² Rihioromoro sino jomo'e ae gemuèro hu bihoromo ague aho hiromo uavadeje: Bada ja nasi sino avoheho'iranoho ja eni javajèjo. Èhuni jasi nimoromo ajemijè'ohuro iae ajemi'anujèjo. ³ Ajemi'anujèjamu Iesuro òvoho nugò'òromo sinoho rèhahoromo uavadeje: Iae na negajèjo ajami'iro. Marèjèjo. Marèjè uavamu gavè'i jomoho rireromoro hesi sinore sisè sisèho barèjadeje. ⁴ Sisè sisèho barèjamu gagorovo Iesuro uavadeje: Aveho hejèjo. Nadi aho uènèjo. A'i ma-va'iranoho jasi sinoho priest røjahijego gal'irajo. Èhi'oromo Moses-hu uòvuade èhi jiè'e suvuoro ho God-are òrobojamego aèro garomo uvo'irarèjo: Jasi sinore sisèho barèjè'èro iae mae javajèjo.

Iesuhu Rome rajo hesi mu vaejaje a avohade jòhoje.

⁵ Èhi'onugoromo Iesuro va'o Capernaum amore höròjadeje. Höròjamu Rome raje muorovo simano vaejaje ahuro rueromo uavadeje: ⁶ Bada nasi mu vaejahaje aho guomo guome jioromo vi'ehe sisè maro baeromo bogo vuodovè'e ma-ròhoremu raromajèjo. Na ja ajaminèjo o bogajo. ⁷ Bogajamu uavadeje: Iae na ja'o ò'oromo hesi sinoho ajami'ejòjo. ⁸ Ajami'ejòjamu rue simano vaejaje ahuro uavadeje: Bada iae mae hòjo rõhu na ae ma-bise'e jevoromo sisè jevè'e jae hu nasi osare ò'è'òho bogo maehu hòjo. A'i ma-jò'èro jòe jòvego nasi mu vaejahaje aho marè'irajo. ⁹ Ma-jò jòvego mu rovaje hesi òroho iae na

gavë'e jevajëjo. Èhesi bëhoho na nasi a masijo jabesi aharire jevë'ëro jabesi jöho ejëhoromo muoho vae'i muorovo aribövioho nasi aharire jëvë'ëro nasi jöho ejëhoromo muoho vaejarue höjo. Naehu muorovo ae gö uavë'oho: Va'ë uavë'iroho iae hu va'aje höjo. O muorovo ae gö uavë'oho: Rovë uavë'iroho iae hu rovaje höjo. O nasi mu ajemaje a uavë'oho: Mue ëhi ëhi vaejë uavë'iroho iae hu ëhi vaejaje höjo. Èhu'ëro jö jövego mu rovaje hesi bëhoho iae na gavë'e jevajëjo. Èhuni uavajëjo: Ma-jö'ëro jöe jövego marëjajo. ¹⁰ Èhi uavamü Iesuro heromo tiöjajedeje. Tiöromö hu rihromare aribövioho uëvadeje: Hu mabëhe uehorovevade höjo. Èhi jië'e aho na bogo birohë'e jevajëjo. Nosi Israel rajoho jabu'ö bogo ëhioho mae uehorovevaruëjo. Iae na mae jövajëjo. ¹¹ Èhuni uëvajëjo: Sa'a ioro'ioro raje ae aho'obëhe maja rojomajire beva'ajire jioromo God-are öri ari'ere va'oromo Abraham Isaac Jacob jabu'ö gemuore raromoromo ie ue'ahoruomo'ajëjo. ¹² A'i Israel raje God-are öri ari'ere va'ö raro'mö'iröhe röho jiëhajoho God-ro Israel rajo a ioro'ioroho babu'öjëvo'iramu ëho bogo va'i rori'ö ramoramoro va'a'aruëjo. Èdirö'ore ae aho'obëhe nierusuburu'e bamoromo ane ja'iho vuogigimoruomo'ajëjo. ¹³ Èhi uënuoromo Iesuro ë simano vaejaje aho uavadeje: Va'onëjo. Diehi jio'iröhego jaehu mae uehorovanëhi iae ëhi jiaho'ajëjo. Èhi uavamü gavë'i evare hesi aho marëjajedeje.

Iesuhu ae aho'obëhe jabesi sino ajëmade jöhoje.

¹⁴ Èhi'onuoromo Iesuro Peter-are osare va'adeje. Va'oromo gavadeje Peter-are jure magonahoho sine vörö'irae'ego röhere raromamu. ¹⁵ Raromamu gagorovo Iesuro magonaho hesi övoho rëhahamu vöröho u'uhadeje. Vöröho u'uhamu hegoro'vö magonahohuro ri'öromo Iesuni iruno'e avohahadeje.

¹⁶ Èhi'amu majae beva'amu gavë'i Satan-are a sisëhu dëre abue'amë'e aribövioho aho'ö aëro sö rovereje. Sö rovamu gagoro Iesuro jöe jövoromo ajëmiromo Satan-are aribövioho rarovö'öjëvadeje. O guomo guomo'e aribövioho aho'ö jabesi sinoho avohëvamu marëjëvadeje. ¹⁷ Èhi a ajëmade hesi bëhoho mami'e jö God-aro baeromo majëhinövade ae Isaiah-ro jajivoromo uvadeje:

Nosi guomo guomo hesi i'uoho huro nigemahuë'e höjo.

Nosi vi'ehoho rori'ö bava'ë'e höjo.

A ioro'iorehu Iesuarë ijore ijore jijiho'ia'amugo Iesuhu jö majëhijade jöhoje.

¹⁸ Èhi'oromo Iesuro gavade ae aho'ö hesi bëhire ruë numë tagavamü gëgorovo hesi ijorajo ömö'ömo'u uëvadeje: Ruerego no e'u ionü gönö va'irarëjo. ¹⁹ Èhi uëvamu Jew rajo jögoru öri röjëhijaje ae gemuëro rueromo Iesu uavadeje: Tisa ja dinö'e dinö'e va'ë'iroho na jasi ijore ijore juvonövo'ejöjo. ²⁰ Juvonövo'ejöjamü Iesuro ë aho uavadeje: Jero nasi ijore ijore juvo'i uevanuëjo röhu je'ö majehu sa'a gagore röho avohoromo mare raromaruoho iae jiajëjo. O je'ö ugehu iju vaeromo mare raromaruoho iae jiajëjo. A'i God-are A Ma naehu niavaje hijaje osaho bogojevajëjo. Nadü uvonëjo: Nörö'ö hibe juvë'oho mae hibe juvo'ejöromo nasiriroho ruenëjo. ²¹ Èhi'amu Iesuarë ijore ijore juvaje

ae göëro ri'öromo Iesu uavadeje: Bada uevego na nimo vuonorö'ö va'oromo nasi vavuoho guavo'iröjo. Guavoromo hujeji evare jasi ijore ijore juvo'iröjo. ²² Juvo'iröjumu Iesuro uavadeje: O-ajo. Jero nasi ijoro ijoro juvëjo. Vuonugego vuovo örire jijiharue ariböviohuro jabesi aribövioho guavo'amo'irarëjo.

Iesuhu uavamu jovo börömehu ruhosöjade jöhoje.

²³ Èhi'oromo Iesuro boat gagore ajio hijamu hesi ijorajo ömo'ömhuro hu'o ajio gemuore raromoromo va'areje. ²⁴ Va'ihö gavareje e'u döre buru börömo rueromo jovoho hasa'ego boat gagoho abo rarovamu. Abo rarovali röhu Iesu niavë'e jadeje. ²⁵ Iesu niavë'e jiamu gagorovo va'o ioromo uavareje: Bada ajamuëjo. Vuovavuo'ië'ajëjo. ²⁶ Vuovavuo'ië'ajëjumu uëvadeje: Jemë rabëni juhuonivarujëjo. Jemë God bogo ma uehorovarue aribövie jëvajëjo. Èhi uëngoromo ri'öromo burohu'o jovohu'o uëvadeje: Vuonugohëjo. Vuonugohëjumu jovoho u'uhoromo ma-jörume ruhijadeje. ²⁷ Ma-jörume ruhijamu gavë'i rueho jaburo uarovareje: Ave aho diehi jië'e ae höjo. Huhu uëvë'oho bogo aëremuoho ejaho'i burohu'o jovohu'o jabu'o hesi jöho ejaharue höjo.

Aru'aho sisë ae niö'i jabesi dëroho Iesuhu rarovö'öjëvade jöhoje.

²⁸ Èhi'onugoromo Iesumëro va'aroho va'o e'u ioni gönö Gadarene rajo jabesi sa'are va'o baboro bejareje. Baboro bejumu gavë'i ae niö'iro guavo'amarue juju gagore arijë'ëro rueromo Iesu birohareje. Röhu ë ae niö'ioho Satan-are a sisëro dëre abueruomë'ëro jië'ëro vörö ma'e jëvadeje. Èhuni ae aho'obëhe juhuonivareje ë örire jijihö'iröhoho. ²⁹ Èhi jië'e vöröho jëvë'ëro birohoro ma-darugo'o uvareje: God-are Harihoho ja rabëni sihusihuaguo'i rovane höjo. Noehu i'u bae'iröhe majaho bogo rovë'e na ja ëma öri'ahoro huë sisëho vi'ehoho bojamui'i rovane höjo. O diehi'avuo'i rovane höjo. ³⁰ Rovane höromo gavare aruhëre mahe aho'obëhe gemuoro ie ue'ahamu gagorovo ³¹ Iesu uavareje: Ja rarovö'öjavuogorovo uövüego no suorovo va'oromo aruhe mahu jabesi dëre va'o abuejarëjo. ³² Abuejarëjumu uëvadeje: Èhuro va'ohëjo. Va'ohë uëvamu hejë'i ë ae niö'i jabesi dëre jioromo suorovo va'oromo ruhe mahu jabesi dëre abueruomadeje. Abueruomamu ë mahohuro aho'obëhe baradore va'o rireromoromo e'ure siö ruruhö'ö va'oromo jove ue'ahoromo vuovadeje.

³³ Vuovamu gavë'i mahu muebejarue ariböviohuro huruomoromo amore va'oromo ae uëvareje: Aru'aho sisëhu dëre jëvade aho èhi marëjëvohijajo. O mue gö gö èhi èhi ruhijajo. ³⁴ Èhi majëhijamu ae aho'obëhe heromo Iesu biroho'i rueruomadeje. Rueromo garomo uavareje: Ave sa'aho vuonugo'i va'ëjo.

9

Övo hörue vuovahë'e a Iesuhu ajamade jöhoje.

¹ Èhi'amu Iesuro boat gagore ajiomoromo jovo döre va'adoho va'o hesi amore ravo'amadeje. ² Amore ravo'amamu gagorovo övo hörue vuovahë'ëro hesi maratuore raromaje aho aëro giojimo barovareje. Barovamu gagorovo Iesuro gavade jaburo hu mae uehorovamu gëgorovo övo hörue vuovahë'e aho uavadeje: Harihohajo. Ma-biririvëjo. Jasi sisëho uehorovoromo vuonugoromo mu'u barëjahë'e

höjo. ³ Mu'u barëjahë'e höjama hegoroovo jögoru öri röjëhijarue a ioro'iorohuro uehorovoromo uvareje: Asë'ëjo. Ave ahuro God-are ihoho ijumajëjo. ⁴ Èhi uvamu Iesuro gëromo uvadeje: Jabumë èhi uehorovaruëromo uëvadeje: Jemë rabëni uehoro sisëho baejarujëjo. ⁵ Jemë'o uehorovohëjo. Nani ja ae ëma ua'a'anuëjo: Jasi sisëho uehorovoromo vuonugahë'e hö ua'a'anuëjo. Ja èhi ua'ibejanëjo aho nunoho bogo ga'ibejarëjo ja mae o sarere jövä'e javego. Röhu ja bogo ëma ua'a'anuëjo: Ri'öromo nami juväjo hesi guomo guomoho bogo barëjago ja javojagojöëni. ⁶ Röhu ë bogo ëma jövo'ibejane jöho iae na jövo'ejöjo huro ejehoromo ri'ö nami juvego jemëro ë muoho garomo ëhuro ga'irarijago God-are A Maho naro sa'are hijajire evare sisë mu'uvaje darugoho baejë'e jevego. Èhi uënuigoromo röhu övo höru'e vuovahë'e aho uavadeje: Ri'öromo raromanue maratuoho banigojiomoromo baeromo jasirëro va'ëjo. ⁷ Va'ëjamu iae ri'öromo hesirëro va'adeje. ⁸ Va'amu gavë'i ë ariböviohuro juhuonivoromo uvoruomadeje: God-ro ma-ae uavamu mu böröme ë'ade höromo God rajahiruomadeje.

Iesuhu uavamu Matthew-hu aevoromo hesi ijore ijore juvade jöhoje.

⁹ Èhi'amu Iesuro va'adeje. Va'i gavade tax baejaje ae hesi ihoho Matthew hesi mu vaejaje osare hijamu gagorovo uavadeje: Rueromo nasi ijoro ijoro juvonövonëjo. Juvonövonëjamu hegoroovo ri'öromo aevoromo hesi ijore ijore juvonövadeje.

¹⁰ Èhi'amu Iesumëro Matthew-are osare ie ue'ahamu evare tax baejarue ae aho'o sisë aribövie aho'o ëho jaburo rueromo Iesu'o hesi ijorajo ömo'ömuo'u gemuoro ioho ue'ahareje. ¹¹ Ie ue'ahamu gëgorovo Pharisee ariböviohuro Iesuare ijorajoho uëvareje: Asë'ëjo. Jemesi börömoho rabëni tax baejarue ariböviohu'o sisë a ioro'iorohu'o gemuoroho hiromo ioho ijajëjo. Èhi jië'oho sisë höjo. ¹² Èhi jië'oho sisë hö uvavamu Iesuro hu'o hegoroovo ë Pharisee aribövioho uhu'e uëvadeje: Jemëhu nasi aribövi èhi uëvarujoho röhu guomo guomole ariböviohuremu doctor gavarue höjo mae jëvä'e aribövioho bogajo. ¹³ Va'oromo ave jö hesi bëhoho nahoromo bihororëjo. God-ro uvajëjo: Na negajëjo a huë bae'irarije muoho vaejoro mi suvuoroho bogajo. Naro sisë aribövioho nasinö jëvojoro uë'i rovode höjo ma-döemu mae jëvä'e aribövioho bogajo.

Bëhoho rabëni Iesuare ariböviehu i bogo vuonugare jöhoje.

¹⁴ Èhi'amu John-are ijore ijore jijiharue ariböviohuro rueromo Iesu uavareje: No'o Pharisee ariböviohu'o God uehorovo'i ie vuonugarue höjo. Noro èhi ë'arue höjo röhu jasi aribövioho rabëni bogo ëhioho ioho vuonugarue höjo. ¹⁵ Rabëni bogo ëhioho ioho vuonugarue höjamu hegoroovo Iesuro uëvadeje: Nasi ijore ijore jijiharue ariböviehu i bogo vuonugarue hesi bëhoho naro uhu'e uë'ië'ajëjo. Na jemëro uvarujëjo: I'o masuröhe a hesi söröre rueromo aemo'aemëro huë vavaene baeruomo'ajëjo. Bogo ëhioho ë'i iae ie ue'ahoruomo'ajëjo. Röhu majae ijönö i'o masuröhe aho aëro guduamo bava'iramu evare ioho vuonug'aruëjo. Avevejö'oho naro jabu'o hijë'ego jabu ioho bogo vuonug'aruëjo.

Jew rajehu gororovo'iröhe jögoru mamiohu'o Iesuhu barovade mu i'ohu'o bogo gemuore havo'iröhe jöhoje.

¹⁶ Ëhi uënuogoromo Iesuro uhu jöe gö'o majëhiromomo uëvadeje: Niögu i'ohu'o mamiohu'o bogo havo'anuëjo. Bogo havoromo niögu mami dadovadiroho niögu i'o hesi vituoho baeromo niögu mami hesi gagoroho bamoromo sigohi'anuëjo i'ohuro duduhivororomo ruho barovego böröme dadorovojöeni. ¹⁷ O wine jovo mi sino gagore bigu'ië'iroho jovo i'ohu'o mi sino mamiohu'o bogo gemuoroho havoromo jovo i'oho mi sino mamiroho bigu'anuëjo. Ëhi ë'ibejanëjo jovohuro gatovoromo ögohuro bibivoromo mi sinoho mamiëro jië'ëro tögömoromo dadorovego jovoho rova'ibejajo. A'i jovo i'oho mi sino i'o hesi gagoremu bigu'anuëjo. Bigu'iramu jovoho mi sinoho mae jio'amo'ajëjo.

Iesuhu magonahe niö'i Jairus-are abojohu'o magonahe gö'o ajëmade jöhoje.

¹⁸ Iesuro ëhi uëvamu gavë'i Jew rajo a böröme gemuëro rovadeje. Rueromo ague aho hiromomo Iesu uavadeje: Nasi aboje avevejö'e guomajëjo. Jero rueromo jasi övoho hesi sinoro bamego i'ovajo. ¹⁹ I'ovajamu hegorovo Iesuro ri'öromomo hu'o hesi ijorajo ömo'ömohu'o ë a hesi ijore va'areje.

²⁰⁻²¹ Örire va'amu gavë'i magonahe gemuëro jabu'o va'adeje. Ëmagonahoho manaero garorovade guomo guomoho bogo barë'i vadune aho'obëhe 12 baejë'ëro jië'ëro uehorovoromo uvadeje: Na Iesu ma-niöghuremu rehë'ohuro ëhuro marëjevo'ajëromomo Iesuare dejonö rueromo niögu viture rehadeje. ²² Rehëmu hegorovo Iesuro huotorovoromo magonahoho garomo uavadeje: Abojëjo. Nadi juhuonivo'i biririvëjo. Jero na mae uehorovevamu ëhuro ja marëjavë'e höjo. Marëjavë'e hö uavamu gavë'i marëjadeje.

²³ Marëjamu gagorovo Iesuro va'oromo ë a börömo hesi osare va'oromo gavade virikö vavaeni'e huosiharue aribövioho ë raromo'i ae aho'obëhe darugo'o nierusuburu'e bamamu gëgorovo ²⁴ uëvadeje: Ae aho'o va'ohëjo. Magonaho harihoho bogo guomo'i ma-niavajëjo. Ma-niavajëjamu hegoro rueho jaburo Iesu sivoromo ijo'ijahareje. ²⁵ Ijo'ijahamu huro ae aho'obëhe rarovö'öjëvonugoromo magonaho hesi osare va'oromo övoho baejamu i'ovoromo ri'öjadeje. ²⁶ Ëhi ë'ade jöho ë sa'aho aho'obëhe rumorovobe va'adeje.

Ae niö'i nuni tugorohëvadoho Iesuhu ajëmamu marëjëvade jöhoje.

²⁷ Ëhi'amu Iesuro ë amoho vuonugo'i örire juvo va'adeje. Örire juvo va'amu gagorovo nuni sisë'e ae niö'iro rihhiromoromo uvobe va'areje: David-are ujoho böröme javaje jero noni vavaenimëjo. ²⁸ Ëhi uvobe va'amu Iesuro osare va'adeje. Osare va'amu rue ae niö'iohuro rovareje. Rovamu gëgorovo Iesuro uëvadeje: Na jemë mae uehorovoromo uvarujëjo: Nörö ajamui'iröhoho eni höjo. Eni höjamu uavareje: Bada io'ajo. ²⁹ Io'ajamu Iesuro nunoho rehëhoromo uëvadeje: Ëhi jië'oho jemëhu uehorovarujëhi iae ëhi jiëho'ajëjo. ³⁰ Ëhi uëvamu gëgorovo nunoho marëjëvamu mae uherihareje. Mae uherihamu gagorovo Iesuro darugo'o majëhiromomo uëvadeje: Bogave aho uë'irarijëjo. ³¹ Ëhi uëvamu hegorovo ë ae niö'iohuro hö'öromomo va'oromo

Iesuare jöho bogo ejaho'i Iesuhu jabumë ajëmijade jöho majëhibe sa'ae bövioho jirehareje.

Iesuhu bitaro tövë'e a ajamade jöhoje.

³² Ëae niö'ioho jaburo ë osare jioromo hö'öjamu gavë'i aëro ae gemu hu'irae baeromo rovareje. Ëaho aru'aho sisë dëre jië'ëro jöromo'e jiadeje. ³³ Jöromo'e jiamu Iesuro ë aru'aho sisëho rarovö'öjamu aho aevoromo jöe jövadeje. Jöe jövamu hegorovo ae aho'obëhe tiöromo uarovareje: Asë'e ëhi jië'e muoho Israel sa'aroho bogo gavë'e javuajëjo. ³⁴ Ëhi uarovamu Pharisee ariböviohuro uëvareje: Sisë a börömohuro vöröho bojämijego ëhuro a dëre aru'aho sisëho rarovö'ö'amaje höjo.

Iesuhu ae aho'obëhe jabesi jöëni vavaenimade jöhoje.

³⁵ Ëhi'amu Iesuro God rajahjarue osare osare God-are jö bëhoho röjëhibe God-hu böröme namiro mo muebejëvo'iröhe jö maho majëhibe guomo guome gö gö baejë'e aribövioho avohëvobe ëhi'obe amo masijore ininore juvo barëjadeje. ³⁶ Juvoromo ganövade ae aho'obëhe tagavoromo huë vavaene baeromo sisë'i raromo'lego gëgorovo uvonövadeje: Ëaribövioho vëmu vavu rumo'e ö mahul'ëro raromanovaruë uvoromo jabesi jöëni vavaenimonövadeje. ³⁷ Jabesi jöëni vavaenimamu hesi ijorajo ömo'ömoho uhu'e uëvadeje: Ae aho'obëhe nasinö sö rue'iröhoho ëho mure iruno'e gagovo'iröhoho va'ëne höjo. Mure gagovo'iröhe iruno'oho bövi mae jio'i gagovarue aribövioho no ma-gemu gemu javuajëjo. ³⁸ Ëhuni mu Arijo'oho ëninamiromo uarego huro ae gö'o rëmö'öjego mure rueromo ajamuiromo iruno'oho gagovo'irarëjo.

10

Iesuare apostle 12 jabesi jöhoje.

¹ Ëhi'amu Iesuro hesi ijoraje 12-ho uëvadeje: Ruehëromo rovamu daruge bojëmiromo uëvadeje: Satan-are ariböviehu a jabesi dëre jio'amamu gëvë'oho rarovö'öjëvego suorovoromo va'irarëjo. Guomo guome gö gö baejë'e o sino haho'e u'uho'amë'e jiamu gëvë'oho avohëvego marëjëvo'irajo. ² Röhu hesi apostle aribövie 12 jabesi ihoho aviëhije. Urimo Simon hesi iho göho Peter'o hesi öho Andrew'o ëhi jëvadeje. Göho James'o John'o ö'o ö'o Zebedee-are harihohe jëvadeje. ³ Göho Philip'o Bartholomew'o jëvadeje. Göho Thomas'o tax baenövade ae Matthew'o jëvadeje. Göho James Alphaeus-are harihohu'o Thad-daeus'o jëvadeje. ⁴ Göho Simon hu Jew rajehu jabesi mueberovo'i nimade aho jiadeje. Göho Judas Iscariot jiadeje. Judas Iscariot hu ijönö Iesuni hiruëmiromo a jabesi övore bojëmi'iröhe aho jiadeje. Iesuare apostle 12 jabesi ihoho ëhi jio'amadeje.

Apostle 12 jabuhu va'oromo mu vaeröhego Iesuhu rëmö'öjade jöhoje.

⁵ Ëaribövie 12-ho jaburo mue vaebe jijihoröhego Iesuro rëmö'öromo uëvadeje: Va'irarijoho sa'a ioro'ioro rajo jabesiriroho Samaria sa'a rajo jabesi amoroho nadi va'orëjo. ⁶ A'i Israel rajo jabesiremu va'orëjo jabumë sheep-ëro öre sidövanovoromo ëma jijiharue jiaje. ⁷ Va'oromo uëbe jijihorëjo: Iae ga'ië'arujëjo God-ro böröme namiro mo muebejëvego. ⁸ Ëhi uëbe guomo guomo'e aribövioho ajëmibe vuovë'e aribövioho i'ovëvobe sino jomo'e aribövioho avohëvobe Satan-are

ariböviehu a dère jio'amè'oho rarovö'öjèvobe èhi'obe jijihorèjo. A ajèmi'irarije darugo God-arire baejarijoho bogo manaho bojamarije hõjo. Èhuni manaho nadi bae'i aho ma-ajèmibe jijihorèjo. ⁹ Gold ijo bajoho ajivè'e ijo bajoho rövè'e ijo bajoho göta esòroho nadi aegoromo ujuoho jijihorèjo. ¹⁰ A èninèmiromo ujuohoromo aego'irarije esòho nadi ujuohoromo jijihorèjo. Niögoho nadi göho ujuoho'i ma-gemu ruohoromo jijihorèjo. Höru guduoho nadi io'amoromo ijahoho nadi ujuohoromo jijihorèjo. Èhi jiè'e inómo inómoho nadi ujuoho jijihorèjo è hesi bëhoho ae rahu mu vaeromo i mana baejè'oho iae mae jiè'e jiaje.

¹¹ Va'irarijoho amo masijore o ininore suorovè'oho va'oromo a ma-maho nahorèjo. Nahoromo birohogorovo è a hesi osaro raromonövorèjo ijonö è amore jioromo va'iè'e jèvaje. ¹² Röhu osare rumo va'è'iroho jejèmiromo uènövorèjo: Huè mae baerèjo. ¹³ Huè mae baerèjamu hegorovo è osare raromarue ariböviehu uèvè'oho: Iae mae hõ uèvè'oho iae huè mae baeruomo'ajèjo. O bijönimè'oho uèrèjo: God-are huè ma jö uèvodoho vuonugajèjo. Èhu'èro bogo bae'a'arujèjo. ¹⁴ O di osaehu di amehu jemesi örire nu huodègoromo jö bogo ejèhè'oho uvorèjo: Jabesi muoho bövioho bise'oho sa'aho tohotohoho sisè höromo jabesi tohotohe jemesi hörure jiajoho riremomo va'orèjo. ¹⁵ Ave jöho na jö mae uèvajèjo: God-hu i'u bojèmi'iröhe maja rovè'iroho Sodom o Gomorrah amo rajo jabuhu i'u baeröhoho ma-jianovo'i a'i jemesi jö bogo eruomaje aribövioho jaburo i'u börömo maho baeruomo'ajèjo.

Aehu Iesuarie aribövi huè sisè bojèmi'iröhe jö Iesuhu jövadohoje.

¹⁶ Aveho hehèjo. Naro rëmö'öjègo jemè vaevè'e sheep harihunö'e vörö'e miehu jioruomajire va'iè'arujèjo. Èhuni va'oromo sigobehu a gagoro ma-burèro ju'ebiro mo va'ajèhi èhi gavè'i jijihorèjo. O ugo ma-maehu hesi iemu iromo ma-taemo hijajèhi èhi taemo raromobe va'orèjo. ¹⁷ Ae gèvè'iajo. Jaburo guduamo ujuohèvo va'oromo jögoru muebèjarue aribövi jabesi övore bojèmi'arujèjo. Jabuhu God rajahjarue osa göro göro hisuebijèvo'arujèjo. ¹⁸ Gavana o sa'are a masijo gö gö jabesi nunire rëmö'iramu nasi jöèni è riravoromo nasi jöho jabesi örire sa'a gö rajo jabesi örire majèhi'arujèjo. ¹⁹ Röhu jabuhu guduamo ujuohèvo va'amu a masijo jabesi nunire riravè'oho nadi uvorèjo: Na diehi jöho majèhi'ejöjo. O rabu jöe majèhi'ejöromo nurunurumorèjo. Rabèni hesi bëhoho jö majèhi'irarije majaho rue'iramu evare majare God-ro ajèmiromo jöho röjèhi'iramu majèhi'arujèjo. ²⁰ Bogo jemèhu jöho majèhi'irögoro a'i jemesi Vavu hesi Aru'ahohuro jöho simanore bojèmi'iramu jemèro jöho majèhi'arujèjo.

²¹ Röhu öhuro öho ae gö jabesi örire bojèminövo'arujèjo muo'amojöro. Vavuohuro aboji harihu'oho èhi gemuoho è'a'arujèjo. Aboji harihu'ohuro ri'öromo ae uè'iramu vèmu vavu'oho muo'amo'arujèjo. ²² Röhu jemèhu na uehorovevarujohuni ae aho'obèhe jaburo jemesi örire nue huodègoruomajèjo. Röhu ae rahu biririvoromo mae uehorovevobe va'ojuvo maja barè'iröhe maja rovè'iroho God-ro baejèvoromo manö bamèvo'ajèjo. ²³ Jemè amo göre raromamu aehu sisè vaejèvè'oho huruomoromo amo göro va'onövorèjo. Aveho na jö mae uèvajèjo. Jemè Israel sa'are amo göre göroho bogo va'o barèjè'e God-are A Maho na ö'ejöjo.

24 Jö hejaruje aribövioho jö röjehijaje aho na bogo iosiremiromo masi-joho jëvájëjo. O mu vaejeharuje aribövioho mu simano vaejaje aho na bogo iosiremiromo döroho jëvájëjo. 25 Ëhuni jö röjehijaje aho ae göehu huë vavaene bojemego naehu baejajëhi nasi jö hejaruje aribövieuho ìhi baejè'oho iae mae höjo. O mu simano vaejaje aho ae göehu huë vavaene bojemego naehu baejajëhi nasi mu vaejeharuje aribövieuho ìhi baejè'oho iae mae höjo. Ëhesi bëhoho agano muebejëvaje aho na aehu uevaroho: Ja Beelzebul a sisë jabesi böröme javajë uevarohuni ìhuni ìhi jië'e ariböviohuro jemë nasi agane jëvè'ego jö sisë bëhi mae uëruomo'ajëjo.

26 Jö sisëho ìhi uëruomo'ajëjo röhu nadi juhuonëmirëjo. Mue rabe gurihiro jiajoho aho'obëhe va'orahoro jio'a'ajëjo. Rabe rabe subivëhajoho aho'obëhe ma-samaro jio'a'ajëjo. 27 Ëhi jië'e jiaje naehu jöe rabe vahi'e saginiëri majëhijajoho ijönö maja'e ë jöho ma-va'orahoro majëhirëjo. O saginiëri hia'ire majëhijego hejarujoho ëho amo riroro majëhirëjo. 28 Röhu nadi uvorëjo: Ëariböviohuro anagu'o'ajëromo juhuonëmiromo jabesi jöho uehorovorëjo. Jemesi sino-hemu muo'amè'oho eni jëvo'i jemesi aru'aho muo'amè'oho bogo eni jioruomé'e jiaje ìhuni jabumë nadi juhuonëmi'i God juhuonamiromo hesi jöho uehorovorëjo. Huhu jemesi aru'ahohu'o sinohu'o vëni'e öri ari'ere babu'öjëvoromo ijumëvo'iröhoho hu eni jiajëjo. Ëaho juhuonamiromo hesi jöho uehorovorëjo. 29 A'i aho bövioho bise'oho nadi juhuonëmirëjo. Ëhesi bëhoho God-ro uvajëjo: Jemë iae masije jëvájëromo avo'avoho muebejëvaje höjo. Monie ma-bisemu bu'öromo ugo inine niö'i imo'arujëjo. Röhu jemesi Vavuoho bogo uvaje höjo: Ugoho ininego bogo muebe'ejöjo. Bogo ëhioho uvo'i ugoho muebe'amè'ego ugoho bogo gemu vadu'oho ëma vuovoromo ö'idöroho jioromo sa'aroho rireromo rovarue höjo. Vavuohuro gëvego rireromo rovarue höjo. 30 A'i jemë God-ro jemesi bövie bise'e aho'o mue-bejëhoromo röhu jemesi simano uoho ëhu'o adahëhoromo avo'avoho muebejëhaje höjo. 31 Ëhuni nadi juhuonivorëjo uge aho'obëhe jio'amajoho ëho ma-jianovo'i ae gemu gemu jemë masije jëvè'e jiaje.

Noehu Iesuarë jö a nunire huruoho majëhi'iröhe jö Iesuhu jövadohoje.

32 Ae rahu a nunire uvè'oho: Na Iesuarë ae jëvájë uvè'oho naro nasi Vavue ö'idöre hijaje hesi nunire uvo'ejöjo: Ëho nasi ae magonahe höjo. 33 O ae rahu a nunire uvè'oho: Na bogo Iesuarë aehu jëvájë uvè'oho naro nasi Vavue ö'idöre hijaje hesi nunire uvo'ejöjo: Ëho bogo nasi aehu magonahehu höjo.

Iesuhu rovè'ëro ëhu'ëro ae adovoromo göehu jöe gö göehu jöe gö uehorovarue jöhoje.

34 Nadi uvorëjo: Nöröhu rovade hesi bëhoho ajamuego sa'ae aho'obëhe iro muorovo'oho vuonugo'i ma-huë baerovoromo gemuoro raromo'iröhego rovade höjo. Na bogo ëhunioho rovode höjo. A'i naehu rovode hesi bëhoho naro nasi jöho majëhijego aëro heromo jöe gö gö uehorovoromo muorovo'iröhego rovode höjo. 35 Naehu rovode hesi bëhoho nasi jöhuni harihohuro vavuoho nue huodivo'i abojohuro vëmoho nue huodivo'i ajohuro ajoho nue huodivo'iröhego ìhuni rovode höjo. 36 A nu huodëgarue aribövioho jabesi agane gemuoho jioruomo'ajëjo.

³⁷ Ae rahu ja vavu o vëmu nuninö bamo'i na dejonö bamevë'oho nasi a ma jio'iranoho bogo eni javo'ajëjo. O ae rahu harihu o aboji nuninö bamo'i na dejonö bamevë'oho nasi a ma jio'iranoho bogo eni javo'ajëjo. ³⁸ Ae rahu ja bogo uvë'oho: Iesuare jöëni vi'ehe huë vavaene javoje rabe baeromo guomevë'oho iae hesi hö uvoromo bogo korosi hesi i'u banigojiomanovoromo nasi ijore ijore juvë'oho nasi ae jio'iranoho ja bogo eni javo'ajëjo. ³⁹ Ja jasi sinohuni uehorovoromo biririvoromo ave sa'are hi'i ehemu uehorovë'oho ijonoho guomo öriro va'a'anuëjo. O ja nasi jöëni guomë'oho ijonoho maro hi'a'anuëjo.

Mu ma vaejarue hesi mana bae'iröhe jöhoje.

⁴⁰ Jemëhu nasi jö majëhibe va'ë'iroho ae rahu jemë rajëhiromo baejëvë'oho ehuro na'o rajëhiromo baejevorumaje höjo. O ae rahu na rajëhiromo baejevë'oho ehuro remö'öjamu rovode ahu'o rajahiruomaje höjo. ⁴¹ Ae rahu uvë'oho: Ëaho jö God-aro baeromo majahuijaje ae höromo rajahiromo baejë'oho ehuro jö God-aro baeromo majëhiruomaje ariböviehu suvuro ujuoharue ëhi jië'e suvuroho God-are örire ujuohoruomo'ajëjo. O ae rahu uvë'oho: Ëaho ma-mae höromo rajahiromo baejë'oho ëhi jië'e a maehu suvuro ujuoharuëhi ëhi ujuohoruomo'ajëjo. ⁴² Ave jöho na jö mae uë'ië'ajëjo. Ave nasi ijorajoho ae ma-bise'ehu ö'amu aehu garomo uvë'oho: Ëaho Iesuare ijore ijore juvaje ae höromo ma-bisemu ajamiromo enatuore jovo baguso bojamiijë'oho ë aribövioho jaburo iae manaho ujuohoruomo'ajëjo.

11

Bapataeto vaejaje ae John-hu ae rëmö'öjamu rueromo Iesu jö ua gavare jöhoje.

¹ Iesuro hesi aribövie 12 jabesi örire jöho majëhinugoromo va'adoho ë bëhire jio'amaje amore amore jöho majëhibe bëhoho röjëhibe juvadeje.

² Iae John bapataeto vaejaje ahuro savoji gagore hiromo hejade uavamu: Kerisoro muoho ëhi vaejaje hö uavamu hegorovo hesi ijo-rajoho rëmö'öromo uëvadeje: Va'oromo ëhi ëhi Iesu ua garëjo. ³ Ua garëjamu va'oromo Iesu uavareje: No uvaruëjo: God-ro a böröme nugö'ö'iramu nosi örire rue'a'ajëjo. Na ja ë aho javajëjo. O na no muebe'ejarëjo ae göëro rueröhego. ⁴ Ëhi uavamu hegorovo Iesuro uëvadeje: Va'oromo diehi hejarujoho gavarujoho John majahirego he'irajo. ⁵ Uarëjo: Nöröro ae nuni sisë'oho ajëmijego mae uheriharue höjo. Höru sisë'oho ajëmijego mae jijiharue höjo. Jomo'e aho ajëmijego marëjëvoromo jabisirire sisë sisëho barëjëhaje höjo. Hia'i sisë'oho ajëmijego hia'e dadovoromo jöe hejarue höjo. Vuovë'e aho ajëmijego i'ovarue höjo. Bogo eni jië'e aribövioho ajëmiromo majëhijego God-are jö maho hejarue höjo. John ëhi majahirëjo. ⁶ Röhu John o ae rahu biririvoromo nasi örire mae uehorovevë'oho ë ahuro maho hi'a'ajëjo.

⁷ Maho hi'a'ajëjamu hegorovo vuonorö'ö va'areje. Va'amu gavë'i Iesuro ë hesi bëhire gagovare aribövioho John-are jöho majëhiromo uëvadeje: Urimë'ioho jemë rabe ga'irögoro John-hu a rumo'e sa'are hijajiroho ëho va'onövarije höjo. Ijo rudu burehu huosihego arue anume va'aje ëhi uehorovaje aho na John ëhi jië'e ae jiamu ga'i va'arije höjo. Bogajo. ⁸ O diehi jië'e aho ga'i va'arije höjo. Na John niögu mabëhe sanu'e io'amë'e ae jiamu ga'i va'arije höjo. Röhu ëhi jië'e

niögu ma io'amarue aribövioho bogo a rumo'e sa'aroho raromo'i a masijehu raromarue osaremu raromarue höjo. ⁹ Èhi jië'o ho jemë rabëni a rumo'e sa'aroho va'arije höjo. Na John jö God-aro baeromo majëhijaje ae jiamu ga'i va'arije höjo. Io'ajo. John iae hu èhi jië'e ae höjo. Röhu aveho hehëjo. Jö God-aro baeromo majëhinövare a ioro'ioroho iosirëmiromo John hu börömoho höjo. ¹⁰ Tae è a hesi jöho God-are surire èhi jajivoromo uvë'e höjo:

Ave aho God nasi jö bajuvaje aho höjo.

Ja va'ie'i roho naro hu urimo nugó'ö'iramu va'oromo ae uë'a'ajëjo jae hu va'irane öroho iogorahoröhego.

¹¹ Ave jöho na jö mae uë'ie'ajëjo. Ave sa'are raromobe rovere aho ae gemu vadu'oho John bogo iosiramiroho börömoho jië'e höjo. Al'i God-hu böröme namiromo muebejëvego hesi aharire raromarue a inino mahuro John iosiramiroho döroho jioruomajëjo. ¹² Urimo John bapataeto vaejavuaje aehu a jö majëhijadevare evare aëro aevoromo daruge aho'o bojamiromo biririvoromo öroho jiovobe rueruomë'e höjo èhuro God-ro böröme namiromo muebejëvego hesi aharire jëvoröhego. Jaruvoho èhi gemuho ë'oruomaje höjo. ¹³ Aevo'ioho Moses jögoru bojëmade ahuro God-hu böröme namiromo ae muebejëvo'iröhe jöho majëhijamu jö God-aro baeromo majëhibe rovere ariböviohuro èhi gemuho ë'obe rovaroho röhu ijo tugoho'ioho John-ro è jöho majëhijade höjo. ¹⁴ Röhu urimo majëhiromo uënövare höjo: God-hu böröme namiromo muebejëvego ga'irarije è hesi urimo ae gö rue'a'ajëjo. Èahuro Elijah-hu vaenövade mue gemuho barue'ajëjo. Jöho èhi majëhinövare höjo. Röhu jemë mae uehorovo'i nëgë'oho uvorëjo: Elijah-are mu barueröhego uövuare aho iae John höjo. ¹⁵ Ae rahu ja God-are jö hejanue ae javë'oho bëhoho nahoromo birohönëjo.

¹⁶ Röhu jaruvore raromaruje aribövi jemesi jöho uhu'e majëhi'ie'ajëjo. Amo ririre raromarue jö bijönimoruomaje asisö'oho jëvanovajëjo. Amo ririre raromoromo asisö'oho ioro'iorohuro ioro'ioroho uvëvoruomajëjo: ¹⁷ Noehu aninivoromo jemëni virikö huosihëharoho jemëro bijönimoromo bogo ejahuoromo javavarije höjo. Noehu aninivoromo huë vavaeni'e jö iaroho jemëro bijönimoromo bogo ejahuoromo nierusuburu'e bamarije höjo. ¹⁸ Èhesi bëhoho John-ro rueromo God uehorovoromo ma-hi'i ioho jovoho bogo inövade höjo. Èhi'onövadoho jemëro è jö bijönimarue asisö'oho va'ëne bijönëgamu John-are jöho bogo ejaho'i sisë'i uehorovoromo uvonövarije höjo: Aru'aho sisë dëre jië'ëro èhu'ëro ioho jovoho bogo ijaje höjo. ¹⁹ O God-are A Maho naro rueromo ioho jovoho ma-ijaje höjo. Èhi è'ajoho jemëro èhu'o bijönimoromo uvaruje höjo: Nörö gahëjo. Ioho mahunö'e iromo vörö'e jovemu ijaje höjo. Hu vajiohu'e tax baejarue ah'u'o a sisë ioro'iorohu'o èho jabesi aemo'aeme höjo. Jemëro John-are muohu'o nasi muohu'o bijönimaruje höjo röhu no God-are uehoro maho baej'ëro muoho vaejarue höjo. Èmuoho aëro garomo uvoruomo'ajëjo: God-are uehoroho iae mae höjo. Èhu'ëro muoho vaejare höjo.

Ame göehu göehu Iesu bogo ma uehorovare jö Iesuhu jövadohoje.

²⁰ Èhi uënuogoromo ame gö gö birëgadeje è hesi bëhoho urimë'i huhu a ajëmiromo darugo'e mu masijo vaebe è amore amore juvamu

jabuhu bogo huotorovoromo hu mae uehorovarohuni. Birëgoromo uëvadeje: ²¹ Chorazin'o Bethsaida'o amo rajohumë vaevë'o ho jemë sisëro revo hesi jëvájëjo. Naro darugo'e muoho jemesi amore vaejogo garomo rõhu nasi jöho bijönimaruje höjo. Naehu darugo'e mu jemesi amore vaejodoho Tyre amore o Sidon amore vaejogo ga'ibejarëjo mami gö'e jabesi sisëni huë vavaene baeromo niögu sisë io'amoromo uonëro buerovoromo uehoro sisëho vuonugo'i uehoro mae baeruomo'ibejajo. ²² God-hu i'u bojëmi'iröhe maja rovë'iroho Tyre o Sidon rajo jabuhu i'u bae'iröhoho ma-jianovo'i jemëro i'u börömo maho bae'a'arujëjo. Èhuremu uehorovorëjo. ²³ Röhu Capernaum amo rajohumë jemëro jemesi sivue uehorovoromo uvaruje höjo: Nosi ihoho ö'idöre ajiomo'ajëjo. Bogo ëhioho jio'i sa'aro be'a'ajëjo. Èhesi bëhoho naro darugo'e muoho jemesi amore vaejogo garomo rõhu nasi jöho bijönimaruje höjo. Naehu darugo'e mu jemesi amore vaejodoho Sodom amore vaejogo ga'ibejarëjo mu sisëho vuonugo'ibejarëjo ëhuro jabesi amoho bogo sisërë'i jaruvoho ëhi mae jio'ibejajo. ²⁴ God-hu i'u bojëmi'iröhe maja rovë'iroho Sodom rajo jabuhu i'u baeröhoho ma-jianovo'i jemëro i'u börömo maho bae'a'arujëjo. Èhuremu uehorovorëjo.

Iesuaro va'oromo nuho 'iröhe jöhoje.

²⁵ Iesuro ëhi uëngoromo evare God uavadeje: Apo ja ö'idörohu'o sa'arohu'o muebejanue ae javajëjo. Naro jasi örire huë mae uavajëjo. Rabëni hesi bëhoho jero gavane nuni ajil'e a masijohuro uvoruomamu: Nosi simanoho mae javuoromo bövie bise'e ga barëjë'e javuajë uvamu gëgorovo jero jasi jöho jabesi örire subivëhë'e javajëjo. A'i gavane bogo gavë'e ariböviohuro bogo döroho bamorovo'i jöho he'i nëgamu gëgorovo jero jasi jö bëhoho röjëhijë'e javajëjo. ²⁶ Apo iae mae höjo. Jero jasi nimoromo ë'ane höjo.

²⁷ God ëhi uanugoromo ë aribövioho uëvadeje: Nasi Vavuohuro jöe aho'o bojëmijë'e höjo muebe'irodego. Vavuohuro gemuëro Harihoho na avoho gevaje höjo. Harihoho naremuëremu Vavuoho avoho gavaje höjo. O Harihu naehu di aribövi röjëhi'i negë'ohuro ëhuro ë ariböviohuremu röjëhijego jabu'o Vavuoho gavarue höjo.

²⁸ Röhu jemë ae rahu sivohoromo i'u'e mu vaejamu u'uvëvë'ohu ruerego naro jemesi dë vövöbajo'oho sasohëho'iröjo. ²⁹ Na sanu'e mae jevë'e jiaje ëhuni nasi muoho banigojiomoromo nasi jöho henövorëjo. Èhi ë'ë'ohu jemesi dë vövöbajo'oho ma-mabëhe sasohëvo'ajëjo. ³⁰ Rabëni hesi bëhoho nasi muoho i'uhoho bogojio'i sase höjo.

12

Jew rajehu nuharue maja hesi jöhoje.

¹ Èhi'oromo Jew rajo jabesi nuho majaho rovamu gagorovo Iesumëro mure jijihareje. Jijihoromo hesi ijorajo ömo'ömohuro hömëvamu ioho babovoromo ue'ahobe va'areje. ² Babovoromo ue'ahobe va'amu gagorovo Pharisee ariböviëro Iesu uavareje: Asë'e jaruvoho nuho majae höjo. Jasi ijorajo ömo'ömehu i avoharuoho ëho nuho maja hesi jögoroho aharuëjo. ³ Aharuëjamu Iesuro uëvadeje: David nosi a böröme jionövade höjo. Röhu hu'o hesi ariböviohu'o jabumë hömëvamu

hegorovo huhu ë'ade jö God-are surire adaharijoho ëho diehi'oromo bogo avoho uehorovarujëjo. ⁴ David-ro God-are osa mare va'ade höjo. Va'oromo God-are nunire bahijare ioho hu'o hesi ariböviohu'o ue'ahare höjo. Ëioho bogo David'o hesi ariböviohu'o ue'aho'iröhoho jio'i hesi ma-priest-ëremu ue'aho'iröhe ie jiade höjo. Röhu jabuhu ue'aharohuro ëhuro jögoroho ahare höjo. Röhu ë hesi jöho bogojiade höjo. ⁵ Ave jöhu'o Moses-hu jögoru surire jajivadoho jemë diehi'oromo bogo avoho adaharije höjo. Nuho maja rovä'iroho priest ariböviohuro God-are osa börömo hesi muoho vaeromo ëhuro nuho maja hesi jögoroho ahoruomaje höjo. Röhu God-are osa börömo hesi muoho vaejaruëro jië'ëro ëhu'ëro jöho bogojiajëjo. ⁶ Naro jemë uëvajëjo: Mu i'ëro aviae rueromo God-are osa börömo hesi muoho iosiramijë'e höjo. Ëhuni nasi ariböviohu i babovoromo ue'aharuoho jöho bogohöjo. ⁷ God-are surire jöho jajivoromo uvë'e höjo: God-ro uvajëjo: Na negajëjo a huë bae'irarije muoho vaejoro mi suvuoroho bogajo. Ëjö hesi bëhoho avoho he'ibejarijëjo ave övo uno'e aribövioho bogo uë'ibejarijëjo: Mu sisë ë'ë'e jëvajëjo. ⁸ God-are A Maho naro nuho maja hesi jögoroho muebejaje höjo.

Övo guomahë'e a Iesuhu ajamade jöhoje.

⁹ Iesuro ëhi uënuqoromo va'adeje. Va'oromo Jew rajehu God rajahijarue osare rumo va'adeje. ¹⁰ Amo ë osare övo hitahi guomahë'e aho ë hijë'e jiadeje. Hijamu gagorovo aëro ë raromë'ëro uehorovoromo uvareje: Ë'ëgo noro Iesure jö sisëho nahoromo jögoru muebejarue aribövioho majëhijarëromo Iesu uavareje: Nuho majare a jabesi sino ajëmijë'oho na ëhuro no nosi jögoroho ahare höjo o bogajo. ¹¹ O bogajamu Iesuro uhu'e uëvadeje: Jemë ae gemu sheep gemu javë'oho röhu nuho majare guare beva'ë'oho na ja ajamiromo io bamonëjo o bogajo. Io'ajo. Nuho majaroho iae io bamo'anuejo. ¹² Röhu sheep-oho ma-jianovo'i aho börömo mae höjo. Ëhuni nuho majare a ajëmijë'oho iae mae höjo. ¹³ Iesuro ëhi uënuqoromo ë övo guomahë'e aho uavadeje: Jasi övoho nugö'öjëjo. Ëhi uavamu hegorovo övoho nugö'öjamu marëromo övo gö jiajëhi ëhi jiadeje. ¹⁴ Mae jiamu gagorovo Pharisee ariböviohuro va'oromo Iesu anoröhe jöho mevoruomadeje.

Iesu hu God-are mu vaejaje a mae jiaje jöhoje.

¹⁵ Iesu anoröhe jöho mevaruë uvamu hegorovo Iesuro ë amore jioromo va'adeje. Va'amu gagorovo ae aho'obëhe hu rihromareje. Rihromamu huro guomo guomo'e aribövioho aho'o ajëmamumu mae jëvadeje. ¹⁶ Mae jëvo'ëgo uënövadeje: Naehu jemë ajëmijode jöho bogave aho uë'irarijëjo. ¹⁷ Ëhi uënövade jö hesi bëhoho jö God-aro baeromo majëhinövade ae Isaiah-hu jajivadëhi ëhi jioröhego. Isaiah-ro God-are surire jajivoromo ëhi uvadeje:

¹⁸ Naehu baejël'ëro mu vaejaje aho gahëjo.

Nasi dë vövöbajo'e aho'o uehorovego dë mae jevaje aho aviae höjo.

Naro nasi Aru'ahoho hesirire bamahoejëjo.

Bamaho'iramu ae aho'obëhe dinö'e dinö'e raromaruoho huro nasi mu ma hesi jöho majëhi'ajëjo.

¹⁹ Hu bogo giagiavoromo darugo'oho uvo'a'ajëjo.

Aho hesi huëho amo riroho bogo he'a'aruëjo.

²⁰ Ijo adehu aho bu'öjanovo'ië'iroho hu bogo ahö'ö'ajëjo.

Irehu duorohanovo'ië'iroho bogo duoho'a'ajëjo.

Ëhi ë'obe va'ujuvo hujeji evare hesi mu mahuro ruahö'öjëvoromo dö maro jio'a'ajëjo.

²¹ Ëhi jio'iramu ae aho'obëhe dinö'e dinö'e raromaruohuro hu uehorovoromo uvoruomo'ajëjo: Iae huro gemuëro ajamui'ajëjo.

Iesuhu Satan-are aribövi a dëre jio'amamu rarovö'öjëvadoho hu bogo Satan-are darugoho baeromo ëhioho ë'adeje. Ëhesi jöhoje.

²² Ëhi'amu aëro ae gemu hu'irae baeromo rovareje. Ëaho Satan-are a sisëro dëre abo hijë'ëro ëhu'ëro nune tugohahoromo bitare tövahë'e jjadeje. Ëaho hu'irae baeromo rovamu gagorovo Iesuro a sisë dëre jiajoho rarovö'öjamu bitaroho nunoho mae jioromo jöe jövoromo uherihadeje. ²³ Ëhi ajamamu gagorovo ae aho'obëhe jiodudu'iraeromo uarovareje: Ave aho na hu a böröme David-are uje no ajamui'iröhe aho höjo. O rahu höjo. ²⁴ Ëhi atoruumamu hegorofo Pharisee ariböviohuro uëruomadeje: O bogo ëhi jië'e a maho jioromo ë'aje höjo. A'i Beelzebul aru'aho sisë jabesi börömhuro vöröho bojamego ëhuro a dëre aru'aho sisëho rarovö'ö'amaje höjo. ²⁵ Ëhi uëruomamu Iesuro gëromo uvadeje: Ëariböviohuro nasi jöho ëhi uehorovaruëromo uhu'e uëvadeje: Sa'ae gemuehu adovoromo jabesi arijo'arije muorovë'oho barërovo'ajëjo. Ame gemuehu o agane gemuehu adovoromo jabesi arijo'arije muorovë'oho bogo biririvo'i barërovo'ajëjo. ²⁶ Ëhuni Satan-ro ri'öromo hesi aribövi a jabesi dëre jio'amajoho rarovö'öjëvo'ibejajo ëhuro hesi ariböviohu'o muorovo'ibejajo hesi darugoho muoho uehoroho diehi'oromo biririvoromo nami'ibejajo. ²⁷ Röhu jemëro uvarujëjo: Sisë a börömhuro nörö vöröho bojamego hesi sisë aribövioho rarovö'ö'amaje höjo. Ëhi jië'oho na jemesi ariböviohuro sisë a börömo hesi vöröho baeromo rarovö'ö'amarue höjo. O diehi'oromo ë'arue höjo. Jaburo uë'a'aruëjo: Sarerivarujëjo. Aho bogo sisë a börömo hesi vöröho baeromo ëhioho ë'arue höjo. ²⁸ A'i naro God-are Aru'aho hesi darugoho baeromo raro'vamaje höjo. Ëhuni uvorëjo: God-ro aevoromo böröme namiromo nosi örire muebejavuajëro jië'ëro ëhu'ëro ë'ajëjo.

²⁹ Röhu aehu darugo'e a hesi osare rumo va'oromo hesi mae sisë ujuohaho va'ië'iroho bogo ëma ujuohaho va'irögoro urimo darugo'e aho guduumoromo tövonugoromo evare hesi inömo inömo ujuohaho va'a'ajëjo. Naro Satan ëhi ruahö'öjaje höjo.

³⁰ Ae rahu bogo nasi a jië'oho ëho huro na'o muorovaje höjo. O na bogo ajemiromo nasi aribövi gagovë'oho ëho huro arua anu-miae nugö'ö'amaje höjo. ³¹ Ëhuni uëvajëjo: Aehu mu sisë vaejë'oho God-are iho ijumarue jö sisë atë'oho aho'o God-ro uehorovoromo vuonugëho'ajëjo. A'i God-are Aru'aho hesi iho ijumë'oho ëhi jië'e jö sisëho God bogo uehorovoromo vuonugo'ajëjo. ³² God-are A Ma nasi jö sisë'i atë'oho God-ro uehorovoromo vuonugo'ajëjo. A'i God-are Aru'aho hesi jö sisë'i atë'oho ëho God bogo uehorovoromo vuonugo'ajëjo jaruvo majahu'o maja ijohu'o.

Aho jö jövajire heromo uvarueje: Ēa hesi dē vövöbajo'oho mae höjo ě aho sisē höjo. Ēhesi uhu jöhoje.

³³ Ijo bajo mae uro'i nagē'oho ijo ma hesi bajoho uro'a'anuējo. O ijo sisē javē'oho bajo sisē uro'a'anuējo. Ijoho bajoho garomo uvo'a'anuējo: Ēijoho mae höjo ěho sisē höjo. ³⁴ Sigobu aboji harihu'e jēvanovajējo. Ijo sisē va'ēne jēv'oho jemē diehi'oromo ijo bajo manō'e raeromo jö mae atorējo. Bogo eni jēvajējo. Uehoro maehu o uehoro sisēhu dē vövöbajo'ere rarovēvajoho ěhi jiē'e jöho jö'ero atarue höjo. ³⁵ A maho uehoro maēremu jēv'ero jö maemu atarue höjo. A sisēho uehoro sisēremu jēv'ero jö sisēmu atarue höjo.

³⁶ Naro jemē uēvajējo: Jö sisē rabe rabe ěma atē'oho mevēvo gēröhe majaho rue'iramu God-ro uē'a'ajējo: Ējöho rabēni atarije hö uē'iramu mana ua'a'arujējo. ³⁷ Ae gemu gemu jasi jöre garomo ua'a'ajējo: Ja a mae javajējo. O jasi jöre garomo ua'a'ajējo: Ja a sisē javajējo.

Ariböviehu Iesu bogo ma uehorovoromo huhu darugo'e mu vaejoro dinamare jöhoje.

³⁸ Ēhi jövamu hegorovo Jew rajo jögoru öri röjēhijarue ae gö gö o Pharisee ae gö gö ěho jaburo ri'öromo uavareje: Tisa no naguajējo ga'i jero darugo'e muoho vaejogo ěhuro uvo'iröhëro: Ja daruge God-aro baeromo muoho vaejanue höjo. ³⁹ Vaejanue höjamu uēvadeje: Sareri'e aribövi sisē jēvajējo. Magonahehu hesi baru vuonugo'i majuvajēhi jemëro ěhi God vuonugo'i mue gö gö uehorovaruje höjo. Jemē rabēni darugo'e muoho ga'i nimarujējo. Na ěhi jiē'e muoho bogo vae'i a'i jö God-aro baeromo majēhinövade ae Jonah-hu God-are mu börömo röjēhijade ěhi jiē'e muohuremu röjēhi'ejöjo. Mue gö gö bogajo. ⁴⁰ Jonah-are mu börömo hesi bēhoho jovo mi börömhuro Jonah nimu'öjamu abueromo hesi dëre hijade höjo. Hiromo majae niö'i gemu vahie niö'i gemu hesi uhure ěgubijiohamu höröjade höjo. Höröromo rovadēhi God-are A Maho naro sa'a gagore abo hiromo majae niö'i gemu vahie niö'i gemu hesi uhure höröromo rue'ejöjo. ⁴¹ Nineveh amo rajohuro ave jaruvore raromaruje ariböviohu'o gemu mae ri'öromo God-are nunire riravoruomo'ajējo. Riravo'iramu God-ro jabesi mu maho garomo jemesi mu sisēho garomo jemē uē'a'ajējo: Nineveh amo rajehu vaejare ěhi jiē'e mu maho bogo vaejē'ego ěhuni na uēvajējo: Jemē sisē'e aribövie jēvaje sisëro va'ohëjo. Ēhesi bēhoho ě Nineveh amo rajohuro mu sisē vaeruom'ëro hejare Jonah-ro God-are jöe majēhijamu hegorovo jabesi uehoro sisēho vuonugo'i uehoro mae baejare höjo. Jonah ma-bise'o jioromo jö majēhijadoho Nineveh amo rajohuro hesi jöho ejahare höjo. A'i naehu hu iosiramiromo börömo jioromo jö majēhijajoho jemē bogo ejeharuje höjo. Ēhu'ero jiē'ero mevo gēröhe majaho rue'iramu jemē sisērējēvo'ajējo. ⁴² O ěho majaho rue'iramu arue sa'a göre börömo vaenövade magonahohuro ave jaruvore raromaruje ariböviohu'o gemu mae ri'öromo God-are nunire nami'a'ajējo. Nami'iramu God-ro sa'a gö rajo magonaho hesi mu maho garomo jemesi mu sisēho garomo jemē uē'a'ajējo: Ēmagonahehu vaejade ěhi jiē'e mu maho bogo vaejē'ego ěhuni na uēvajējo: Jemē sisē'e aribövie jēvaje sisëro va'ohëjo. Ēhesi bēhoho ě sa'are börömo vaenövade magonahohuro hesi sa'aho vuonugo'i öri ěgoböviro rovide

höjo a böröme Solomon-hu nuni aji'e jö jövajoho he'iro. Solomon-hu ae ma-bisemu börömo jioromo jö majëhijajoho ë magonahohuro he'i nimade höjo. A'i naehu Solomon iosiramiro mo börömo mae jioromo jö majëhijajoho he'irarijoho jemë bijönëgajëjo. Èhu'ëro jië'ëro mevo gëröhe majaho rue'iramu jemë sisërëjëvo'ajëjo.

Satan-are a sisëhu a hesi dëre vuonorö'ö abueromo ijumahade uhu jö Iesuhu jövadohoje.

⁴³ Röhu Satan-are mu ajamijaje aru'aho sisëhuro ae gemu hesi dëre hi'a'ajëjo. Hiromo hörö va'a'ajëjo. Va'oromo jovo rumo'e sa'are va'oromo hi'iröhe röho naobe juvojuvo bogo birohogorovo ⁴⁴ uvo'a'ajëjo: Na vuonorö'ö va'oromo hijode sionore röhu maho ë hi'ejöjo. Èhi uvonugoromo vuonorö'ö va'oromo urimo hijade a hesi dëre abueromo ga'a'ajëjo dë vövöbajo'o ho gagemu jio'i bibivoromo iogorë'e ma-mabëhe osa va'ëne jio'iramu. ⁴⁵ Èhi jio'iramu gagorovo va'oromo Satan-are aru'aho sisë aho'obëhe söromo rue'a'ajëjo. Èurimore ro hijade aru'ahoho a sisë höjo. Ijore huhu sö ro vade ariböviohuro hu iosiramiro mo jabumë sisë bëhi mae jioruomajëjo. Èhu'ëro urimo sisë'i hijade aho ijönöho sisë bëhe hi'a'ajëjo. Jaruvore raromaruje aribövi sisëho jemë èhi sisërëjëvo'ajëjo.

Iesure vëmu ömo'öme o ö ömo'öme rahumë jëvaje jöhoje.

⁴⁶ Èhi jövamu evare hesi vëmohu'o ö ömo'ömo hu jaburo Iesu'o jöe ato'i nëgamu rueromo amonö riravareje. ⁴⁷ [Riravamu ae gemuëro ri'öromo Iesu uavadeje: Hë-ajo. Jasi vëmohu'o ö ömo'ömo hu ja'o jöe ato'i nimoromo amonö riravaruëjo.] ⁴⁸ Riravaruëjamu Iesuro uavadeje: Ja uehorovanuoho nasi vëmohu'o ö ömo'ömo hu aribövioho jioruomajëjo. ⁴⁹ Èhi uanugoromo hesi ijore ijore jijiharue aribövioho övëro röjëhijadeje ae aho'obëhe jaburo gëjöro. Hesi aribövioho röjëhiromo ae aho'obëhe uëvadeje: Aruëroho nasi vëmohu'o ö ömo'ömo hu jëvajëjo. ⁵⁰ Ae rahu nasi Vavue ö'idöre hijaje aehu nimajëhi èhi è'ë'o ho èhuro ë aribövioho nasi öe ma'ine vëme jioruomajëjo.

13

Aehu i ujo sa'a mare sa'a sisëre riremade uhu jöhoje.

¹ Èmajae gemuore Iesuro osare jioromo va'oromo nume jovo e'lu riröre abuejadeje. Abueromo God-are jö bëhoho röjëhi'i sa'aro hijadeje. ² Hijamu ae aho'obëhe ro tagavamu Iesu jovore boat gagore va'o hi'i ae aho'obëhe jovo riröre riravareje. ³ Riravamu Iesuro uhu jöe majëhiromo èhuro jöe aho'obëhe röjëhijadeje.

Röjëhiromo uëvadeje: Iae ae gemuëro i uje ujuohoromo mure riremö'i va'ade höjo. ⁴ Riremobe va'amu ujo ioro'ioroho örire rireromade höjo. Rireromamu gavë'i ugëro ro i barëjare höjo. ⁵ Ujo ioro'ioroho munë uhunö jië'e sa'are rireromade höjo. Rireromoromo ma-burëro ri'amade höjo sa'aho munë döro ma-bisemu jië'ëro. ⁶ Riromo dirumoho bogo ma io'amë'ëro majaëro rojomoromo anamu sahoriamade höjo. ⁷ Ujo ioro'ioroho bibë'e resu resu'e sa'are rireromade höjo. Rireromë'ëro bibë'e resuohuro riromo ujo maho baba'amade höjo. ⁸ Ujo ioro'ioroho sa'a mare rireromade höjo. Rireromoromo riromo bajoho rae'amade höjo. Uje gemu gemu röhu ioro'ioroho baje 100

rae'amo'i ioro'ioroho 60 rae'amo'i ioro'ioroho 30 rae'amade höjo. ⁹ Ae rahu ja God-are jö hejanue ae javë'oho bëhoho nahoromo birohonëjo.

Iesuhu rabëni uhu'e majëhinövade ë hesi jöhoje.

¹⁰ Èhi'amu Iesuare ijorajo ömo'ömhuro rueromo Iesu uavareje: Ja ae aho'obëhe jö majëhijë'iroho ja rabëni uhu'oho majëhijanue höjo. ¹¹ Rabëni uhu'oho majëhijanue höjamu uëvadeje: God-ro böröme namiromo aho'obëhe muebejaje jöho urimoho subivëhade höjo. Èsubivëhade jöho huro hesi suvuore jemë bojëmijë'e höjo jemëremu he'i a ioro'ioroho bogo heruomoröhego. ¹² Èhesi bëhoho aji'e jö javë'oho God-ro gö'o bojami'iramu baeromo bövi mae javo'ajëjo. O bogojavë'oho bisemu baejanoho God-ro ë uehoroho mu'uvaho'ajëjo. ¹³ Èhuni naehu uhu jöemu ë aribövi majëhijaje hesi bëhoho jabu gavaruoho bogo avoho gavarue höjo. Hejaruoho bogo avoho heromo simanoroho baejarue höjo. ¹⁴ Jabumë èhi jië'e aribövie jioruomajëjo. Jabesi jöho mami'e jö God-aro baeromo majëhinövade ae Isaiah-ro jajivoromo èhi uvë'e höjo:

Jemë hemu he'a'arujëjo

röhu bëhoho bogo avoho he'a'arujëjo.

Jemë gaemu ga'a'arujëjo

röhu bëhoho bogo avoho ga'a'arujëjo.

¹⁵ Èaribövi jabesi dë vövöbajo'oho i'uhëgaje höjo.

Hia'oho tugohëhë'e höjo.

Nunoho sigohijëhë'e höjo.

Bogo èhioho jëvo'ibejajo nunëro ga'ibejarëjo.

Hia'ëro he'ibejarëjo.

Dë vövöbajo'oho sasohoromo jöho bae'ibejarëjo

ëhuro jabumë huotorovoromo rue'ibejarëjo

naro avohëvego mae jëvo'ibejajo.

¹⁶ Isaiah-hu jajivadëhi aribövi ioro'ioroho èhi jioruomaje höjo. A'i jemë huë mae baejë'e jëvajëjo. Rabëni jemë nunëro garomo avoho gavaruje höjo. Hia'ëro heromo avoho hejaruje höjo. ¹⁷ Ave jöho na jö mae uë'ië'ajëjo. Jemë gavaruje muoho o hejaruje jöho urimë'i jö God-aro baeromo majëhinövare ariböviohu'o a ma ioro'iorohu'o aho'obëhe jaburo nimoruomade höjo garomo he'iro. Röhu bogo garomo bogo heruomade höjo.

I ujo sa'are riremade uhu jö Iesuhu huruoho majëhijadohoje.

¹⁸ Röhu aehu i ujo riremade uhu jö hesi bëhoho hehëjo. ¹⁹ God-hu böröme namiromo muebejëvaje jöho ae rahu hia'ëremu heromo bogo avoho hejamu gavë'oho a sisë börömhuro rovaje höjo. Rueromo gavaje God-are jöho i ujo va'ëne jabesi dëre jiego garomo baeniëhiromo rori'o bu'öjaje höjo. Ujo örire rireromamu ugehu i barëjare jö hesi bëhoho èhi höjo. ²⁰ O i ujehu munë uhunö jië'e sa'are rireromoromo riromo sahori'amade jö hesi bëhoho aëro God-are jöho heromo ma-burëro nimorohoromo jöho ejaharue höjo. ²¹ Ejahoromo jöho ma-döëremu baejë'ëro èhu'ëro majae ma-bunemu mae uehorovoromo garöhe God-are jö uehorovaruohuni aehu sisë vaejëvamü gavë'oho o huë vavaene rovamu gavë'oho ma-burëro vuonugarue höjo. ²² O ujehu bibë'te resu gemuore rireromade jö hesi bëhoho aëro God-are jöho hejarue höjo.

Heromo ave sa'a hesi muohuni nurunurumoromo o sarerivoromo uvarue hōjo: Inōme bōvie bise'e masije hōromo jabesi nuninō bamaruē hōjo. Bamoromo sa'arohemu uehorovaruohuro ēhuro God-are jō jabesi dēre jiajoho taemego jabumē bogo rae avoharuē hōjo. ²³ O ujehu sa'a mare rireromoromo baje 100 o 60 o 30 rae'amade jō hesi bēhoho aēro God-are jōho heromo avoho hejarue hōjo. Avoho heromo rae avoharuē hōjo. Ioro'iorohuro ioro'ioroho iosirēmiromomo mu ma-mabēhe vaejarue hōjo.

Resu sisēhu iruno'o ma hesi gemuore ri'amade uhu jōhoje.

²⁴ Iae Iesuro uhu jōe gō'o majēhijadeje. Majēhiromomo uēvadeje: Ae gemuehu ujo ma rieromoromo ē'adēhi God-ro bōrōme namiromomo hesi ōri ari'oho ēhi muebejaje hōjo. Ae gemuēro mure va'oromomo iruno'e ujo maho riremobe va'ade hōjo. ²⁵ Ēhi ē'ē'ēro ae aho'obēhe momorō'ōjē'e jiamu gagoro mu arijo'ohu'o muorovaje ae gemuēro mure rovide hōjo. Rueromomo i va'ēne resu sisēho i ujo riremadiere ē riremonugoromomo va'ade hōjo. ²⁶ Ēhi ē'ē'ēro iruno'ohu'o riromomo baje raejamu gavē'i resu sisēhu'o riromomo rae'amade hōjo. ²⁷ Resu sisēhu'o rae'amamu gagorovo mu arijo'o hesi mu vaejarue aribōviahuro rueromomo uavare hōjo: Asē'e ja ujo mae jasi mure riremone hōjo. Diehi'oromomo resu sisēhu'o rijade hōjo. ²⁸ Uēvade hōjo: Na'o muorovaje ahuro ē'ade hōjo. Ē'ade hōjamu uavare hōjo: Ēhi jī'ē'ohu'o na ja nagajējo no va'oromomo resu sisēho ravōjōro. ²⁹ Uēvade hōjo: Bogajo. Jemēro resue ravō'ihōromomo iruno'ohu'o ravō'amōjōēni bogo ēhioho ē'a'arujējo. ³⁰ Ēhuni iruno'ohu'o resuohu'o nugego ēhi gemu mae ri'irajo gagovo'irōhe majaho rue'irōhe hōjo. Ēmajaho rue'iramu iruno'e gagovarue aribōvioho naro uē'ejōjo: Urimo resuoho ravoromomo huhoho'amorējo vēniro huo'irarije. Amo evaro iruno'ohu'o gagovoromomo ujuoho va'oromomo nasi iruno'o osaro bahirējo.

Ijo hisue mustard-hu ēgovaje uhu jōhoje.

³¹ Rōhu uhu jōe gō'o majēhiromomo uēvadeje: Ijo hisu ihe mustard ujehu bōrōmoriromomo ēgovajēhi God-ro bōrōme namiromomo ae gō'o gō'o ēhi gagovoromomo muebejēvobe va'a'ajējo. Ae gemuēro mustard ijo hisu uje gemu baeromomo hesi mure ōjade hōjo. ³² Rōhu bajo ioro'ioroho majianovo'amō'i a'i ē mustard ujo biseharihe hōjo. Ēhi hōjo rōhu riromomo ēgovoromomo ijo hisu ioro'ioroho iosirami'amoromomo ijo va'ēne jiaje hōjo. Ijo va'ēne jiego ugēro rueruomomomo ē ijo hesi adore ijue vae'amarue hōjo.

I dē huaje osehu ire rumorovade uhu jōhoje.

³³ Ēhi majēhinugoromomo uhu jōe gō'o majēhiromomo uēvadeje: God-hu bōrōme namiromomo muebejēvaje ōroho aviēhi hōjo. I dē huaje osehu ire rumorovajēhi God-hu bōrōme namiromomo muebejēvaje muohuro sa'ae aho'o ēhi rumorovobe va'aje hōjo. Magonahe gemuēro ieho aho'obēhe gagovoromomo i dē huaje osoho i gemuore bamoromomo iohu'o buarohade hōjo. Buarohamu ē ioho aho'obēhe rumorovo barējade hōjo.

³⁴ Ējōho aho'obēhe Iesuro uhu'e majēhijamu rue gagovare aribōviahuro hejareje. Jōe aho'o ma-uhu'e gemu majēhinōvadeje. ³⁵ Ēhi uhu'e majēhijade jō hesi bēhoho urimo jō God-aro baeromomo

majëhinövade ae gemuëro Iesuhu vae'iröhe mu jöho God-are surire jajivoromo uvadeje:

Naro uhu'e majëhinövo'ejöjo.

Ö'idö sa'a bamadevare evare aeovoromo subivëhobe rovade jöho na jövonövo'ejöjo.

Resu sisë hesi uhu jö Iesuhu huruoho majëhijade jöhoje.

³⁶ Èhi'onugoromo gagovarue aribövioho rëmo'i osare va'adeje. Osare va'amu gagorovo hesi ijorajo ömo'ömohuro rueromo uavareje: I va'ëne resu sisëhu i mure ri'amade jöho huruoho majahuijego no hejarëjo.

³⁷ Hejarëjamu uëvadeje: Ujo ma riremado a hesi jö bëhoho uëromo ë'ode höjo: God-are A Maho nörö höjo. ³⁸ I mu hesi jö bëhoho uëromo ë'ode höjo: Sa'ae aho'obëhe dinö'e dinö'e jiobe va'ajëjo. I ujo hesi jö bëhoho naro uëromo ë'ode höjo: God-hu muebejëvego hesi aharire raromarue aribövie jioruomajëjo. I va'ëne resu sisë hesi jö bëhoho naro uëromo ë'ode höjo: A sisë börömo hesi aribövie jioruomajëjo.

³⁹ Mu arijo'o nu huodivoromo resu sisë hesi ujo riremado a hesi jö bëhoho naro uëromo ë'ode höjo: Satan höjo. I gagovo'iröhe maja hesi jö bëhoho naro uëromo ë'ode höjo: Ave sa'a bövi bise'o barë'iröhe majaho höjo. I gagovo'iröhe aribövi jabsi jö bëhoho naro uëromo ë'ode höjo: Anera aribövioho jioruomajëjo. ⁴⁰ Resu sisë gagovoromo vëniro huaruëhi sa'a bövi bise'o barë'iröhe majaho rue'iramu ëhi jio'a'ajëjo.

⁴¹ Èho majaho rue'iramu evare God-are A Maho naro nasi anera aribövioho rëmö'ö'iramu jabumëro rueroomo'ajëjo. Rueroomoromo mu sisë röjëhijarue o God-are jö ahare aribövi God-hu muebejëvajoho mevoromo ⁴² vëni börömehu ravajire ruruhö'öruomo'ajëjo. Èdirö'ore ae aho'obëhe nierusuburu'e bamoromo ane ja'iho vuogigimoruomo'ajëjo.

⁴³ Èhi ë'iramu evare mu mae vaejarue ariböviohuro jabsi Vavuehu muebejaje öri ari'ere raromoromo majaehu bamoromo ajivajëhi ëhi ajivoruomo'ajëjo. Ae rahu ja God-are jö hejanue ae javë'o ho bëhoho nahoromo birohönëjo.

Gurijë'e inömo mabëhe o nienia mabëhe ë inömo jabsi uhu jöhoje.

⁴⁴ Röhu God-hu böröme namiromo muebejëvaje jö göho uhu'e uë'ië'ajëjo. Ae gemuehu gurihi nugë'e inömo mabëhi birohoro mo ëhuremu gemu uehorovadëhi God-hu böröme namiromo muebejëvaje jö ëhuremu ëhi uehorovo'irarije jöho höjo. Ae gemuëro ae gö hesi mure juvo'i gavade höjo inömo ma-mabëhe gagovoromo gurihi nugë'e jiamu. Gurihi nugë'e jiamu gagorovo huro ujuohoromo röhu maho gurihi-romo duhade höjo. Duhonugoromo ë inömhuremu uehorovoromo nimorohë'i va'oromo hesi maho sisëho aho'o imo'amo barënu goromo ijo bajo bövi mae baeromo vuonorö'ö va'oromo gurihi nugë'e inömo ho bae'i ë muoho imade höjo.

⁴⁵ O aehu nienia mabëhe ëhemu uehorovadëhi God-hu böröme namiromo muebejëvaje jö ëhemu ëhi uehorovo'irarije jöho uhu'e uë'ië'ajëjo. Nienia imo'amaje ae gemuëro nienia mabëhe imo'amo'i nahobe juvade höjo. ⁴⁶ Nahujuvo nieniae gemu ma-mabëhoho birohade höjo. Birohonugoromo ë nieniahuremu uehorovoromo va'oromo hesi maho sisëho imo'amo barënu goromo ijo bajo bövi mae baeromo vuonorö'ö va'oromo ë nieniaho gemu imade höjo.

Viö uhu jöhoje.

⁴⁷ Röhu God-hu böröme namiromo muebejevaje jö göho uhu'e uë'ië'ajëjo. Aëro viö böröme jovo e'ure ba'amare höjo. Ba'amamu jovo maje ihe gö gö viöre aegade höjo. ⁴⁸ Aegoromo irijiomamugo evare jovo riröre bava'oromo raromare höjo. Raromoromo jovo majo maho suovoromo hevöre io'amo'i sisëho ruruhö'öjare höjo. ⁴⁹ Ejö hesi bëhoho ave sa'a hesi majaho barë'iramu ëhi jio'a'ajëjo. Aneraëro rueruomoromo a maho ëhi rëmo'i a sisëho mevoromo ujuohoromo ⁵⁰ vëni börömehu ravajire ë ruruhö'ö'aruëjo. Eëdirö'ore ae aho'obëhe nierusuburu'e bamoromo ane ja'iho vuogigimoruomo'ajëjo. Eëhi jio'a'ajëjo.

Jö mae göho mamie göho i'e ë hesi jöhoje.

⁵¹ Röhu naehu majëhijode jöho aho'o na jemë he barëjarije höjamu uavareje: Io'ajo. ⁵² Io'ajamu Iesuro uëvadeje: Eëhu'ëro God-are jögoru mami öri röjëhijaje ae rahu God-hu böröme namiromo muebejevaje jö i'ohu'o eëhu'o hejë'oho inömo mamiohu'o i'ohu'o hesi osare jiaje aho va'ëne jianovajëjo. Eëhi jï'e aehu inömo mamiohu'o i'ohu'o bahijaje osare jio'amajoho va'orahoro ujuoho rueromo röjëhijajëhi eëhi jï'e ariböviohuro God-are jö mamiohu'o i'ohu'o ae röjëhiruomo'ajëjo.

Iesure amo rajehu Iesu bijönimoruomade jöhoje.

⁵³ Eëhi jï'e uhu jöho majëhinugoromo Iesuro va'adeje. ⁵⁴ Va'oromo hesi amëro rovadeje. Rueromo hiromo God rajahijarue osare rumo va'oromo God-are jö bëhoho röjëhijadeje. Röjëhijamu hegorovo tiöjëvadeje. Tiöromo uvoruomadeje: Diehi'oromo simano maho baeromo darugo'e mu masijoho vaejaje höjo. ⁵⁵ Hu sarerivajëjo. Ma-ijo muemu vaejaje a hesi harihe höjo. Hesi vëmoho Mary höjo. Hesi ö ömo'ömoho James Joseph Simon Judas eëhi jio'amajëjo. ⁵⁶ Hesi ma'ino ömo'ömoho aho'o no'o gemu mae raromarue höjo. Eëhi jï'ë'oho diehi'oromo aviëhi jï'e muoho baejade höjo. ⁵⁷ Eëhi uvoromo nue huodivareje. Nue huodivamu gëgorovo Iesuro uëvadeje: Jö God-aro baeromo majëhijarue aribövioho dinö'e dinö'e va'ë'iroho aëro no mae uehorovavuarue höjo. A'i nosi sa'a raje agane gemuoho jemëremu bogo eëhioho uehorovavuarue höjo. ⁵⁸ Eëhi uënugoromo darugo'e muoho magemu gemu ë vaejadeje amo rajoho bogo ma uehorovaruego.

14

John bapataeto vaejaje a guomade jöhoje.

¹ Eëhi'amu Iesuhu mu börömo vaejaje jöho sa'a a böröme Herod-ro hejadeje. ² Herod-ro jöho heromo hesi mu vaejarue aribövioho uëvadeje: Eëho John bapataeto vaenövade aho höjo. Hu guomoromo ri'öj'e höjo. Guomoromo ri'öj'ë'ëro eëhu'ëro darugo böröme baeromo mu masijoho vaejaje höjo.

³⁻⁴ Röhu ë jö hesi bëhoho urimë'i Herod-ro hesi öe Philip-are vabore hesi ihoho Herodias gohoniahijadeje. Gohoniahijamu John-ro ri'öromo ua'i hijadeje: Eëmagonaho baejanoho eëho bogo maehu höjo. Eëhi ua'i hijamu Herod-ro ë magonaho hesi jöëni ae uëvamu John guduamoromo tövoromo savoji gagore ba'amareje. ⁵ Eëhi'amu Herod-ro John ano'i nimoromo röhu uvadeje: Ae aho'obëhe uvoruomaje höjo: John hu

jö God-aro baeromo majahuijaje ae hö uvarue höjo. Ëhi uvoromo ë aribövioho juhuonëmiromo bogo anadeje.

⁶ Ëhi'ojuvo Herod rahade majaho rovadeje. Herod rahade majaho rovamu Herodias-are abojohuro ae aho'obëhe jabesi nunire rueromo javavadeje. Javavamu Herod-ro garomo vuëvadeje. ⁷ Vuëvoromo magonahoho uavadeje: Ja rabe rabe nagë'o ho iae na bojami'ejöjo. God-ro ge'ego na mae uavajëjo. ⁸ Ëhi uavamu abojohuro va'o vëmehu nimade jöho heromo rueromo Herod uavadeje: Bapataeto vaejaje ae John-are sönöho tarioromo simanoho hevöro bamoromo avehuro baro bojemëjo. ⁹ Ëhi uavamu hegorovo rue a börömhuro huë vavaene baejadeje. Huë vavaene baejade höjo röhu urimo darugo'e jöho ë aribövi jabesi nuniro ë magonahoho mae uavë'ëro ëhu'ëro jöe bojëmiromo uëvadeje: Magonahehu nimajoho baro bojamihëjo. ¹⁰ Bojamihëromo ae rëmö'öjamu savoji gagore va'oromo John-are sönöho tarioromo ¹¹ simanoho hevöre bamonugoromo barueromo abojoho bojamijareje. Bojamamu huro bava'o vëmoho bojamadeje. ¹² Ëhi'amugo John-are ijore ijore jijiharue ariböviohuro rueromo sinoho bava'oromo guavareje. Guavonugoromo va'oromo Iesu majahijareje.

Iesuhu ae aho'obëhe 5,000 da'uojëhade jöhoje.

¹³ John bapataeto vaejëvaje a guomade jöho majëhijamu hegorovo Iesuro va'oromo boat-re ajio hiromo a rumo'e sa'are va'i va'adeje hu'o hesi ariböviohu'o sivue raromoröhëni. Ëva'aje jöho hegoro ae aho'obëhe jabesi amore jioromo va'oromo Iesuhu va'ajire sa'a hörëro ë va'oruomadeje. ¹⁴ Va'oruomamu Iesuro jovo döre boat-re va'adoho sa'are rueromo ravo'amoromo gavade ae aho'obëhe tagavë'e jiamu gëgorovo jabesi jöëni vavaenimoromo jabesi aribövioho guomo guomo'o ho ajëmijadeje.

¹⁵ Ëhi'ojuvo majae garobo'e bamamugo hesi ijorajo ömo'ömhuro rueromo uavareje: Aveho a rumo'e sa'ae höjo. O majae mami'e barëjë'e höjo. Ëhuni aribövioho rëmö'öjego amo göro göro va'oromo ie imo'amo'irarëjo. ¹⁶ Ie imo'irarëjamu Iesuro uëvadeje: Jabumë rabëni va'ojöräjo. Jemëro iruno'o ho da'uojëhirëjo. ¹⁷ Da'uojëhirëjamu uavareje: Iae mae höjo röhu aviae no ie övo gö mine visue niö'i ëhemu javuajëjo. ¹⁸ Ëhemu javuajëjamu uëvadeje: Baro bojemihëjo. ¹⁹ Ëhi uënugoromo huro aribövioho uëvadeje: Garasioro raromohëjo. Raromohëromo ie övo gö mine visue niö'i ujuoho rovaroho ëho huro ujuohoromo ö'idöho sioroho garomo God huë mae uavadeje. Huë mae uanugoromo ioho ato'atovoromo hesi ijorajo ömo'ömo ho i'imëmamu ujuohoromo ae aho'obëhe suvuorëmijareje. ²⁰ Suvuorëmijamu ae aho'obëhe ë ioho visuoho ue'ahamu da'uëgadeje. Da'uëgamu gagorovo ijorajoho jaburo vitu vituoho gagovoromo aegamu esöe aho'obëhe 12 irijiomamadeje. ²¹ Ëhi'areje. Ama'e aho'obëhe 5,000 rabu'e iohu'o visuohu'o ue'ahoruomadeje. Röhu magonahe asisö'e jabu'o ue'ahareje.

Iesuhu e'u döre hörehu va'ade jöhoje.

²² Ëhi'amu Iesuro hesi ijorajo ömo'ömo ho uëvadeje: Boat-oro ajio raromoromo e'u ioni gönö urimo va'ohego na a ioro'ioroho rëmö'öjöjo. ²³ Ëhi uëromo ae aho'obëhe rëmö'önugoromo parie vae'i

hesi sivue dahorure ajiomadeje. Ajiomoromo hesi sivue hijamu vahiro-madeje. ²⁴ Vahiromamu nume ijorajoho jaburo öri ëgoböviro jovo döre va'oruomamu evare burëro jabesi nuninö rueromo jovoho hasaromo boat-ohu'o babu'öjövobe va'adeje. ²⁵ Ëhi'ujuvo sisonuvo'ia'amu Iesuro jovo döre hörëro rovadeje. ²⁶ Jovo döre rovamu gagorovo ijorajoho jaburo jiodudu'iraeromo uvareje: Aru'ahëro rovajëromo juhuoniv-oromo jö'e dadovareje. ²⁷ Jö'e dadovamu hejë'i Iesuro uëvadeje: Nadi juhuonivo'i biririvohëjo. Na jevajëjo. ²⁸ Na jevajëjamu Peter-ro uavadeje: Bada ja javë'oho uevego na jovo döre ö'öjo. ²⁹ Ö'öjamu Iesuro uavadeje: Rovëjo. Rovëjamu hegorovo Peter-ro boat-re jioromo jovo döre abueromo Iesu biroho'i hörëro jovo döre va'adeje. ³⁰ Va'ihö gavade bure rovamu gagorovo juhuonivadeje. Juhuonivoromo jovo gagore abue'ia'amu gavë'i uvadeje: Bada ajemëjo. ³¹ Ajemëjamu hejë'i Iesuro övoho nugö'öromomo Peter ma'enoromo uavadeje: Mae uehorovevo avoho'ibejanëjo. Ja rabëni uehoro niö'ioho baejane höjo. ³² Ëhi uanugoromo jaburo niö'iro boat gagore ajiomamu gavë'i buroho barëjadeje. ³³ Buroho barëjamu gagorovo boat-re raromare ariböviohuro Iesu rajahiromomo uavareje: Iae mae-ëjo. Ja God-are Harihe javajëjo.

³⁴ Ëhi'onugoromo e'u ioni gönö rueromo Gennesaret sa'are ravo'amareje. ³⁵ Ravo'amamu gagorovo ë sa'a rajohuro Iesu garomo uvoruomadeje: Iae Iesu hö uvoromo ë sa'ae bövioho jöe nugö'öjamu guomo guomo'e ae aho'obëhe ujuoho rueruomadeje. ³⁶ Ujuoho rueromo ëninamiromomo uanövareje: Guomo guomo'e aribövioho uëvego ja niögu vituohuremu rëhego ëhuro guomo guomoho barë'amajo. Ëhi ua'ego ae rahu rëhë'oho marë'amonövadeje.

15

Pharisee ariböviehu God-are jö bogo avoho uehorovo'i jabesi a mami jö böröme hö uehorovare jöhoje.

¹ Ëhi'amu Pharisee ariböviohu'o Jew rajo jögoru öri röjëhijarue ariböviohu'o ëho jaburo Jerusalem jioromo rovareje. Rueromo Iesu uavareje: ² Jasi ijorajo ömo'ömoho nosi a mamiehu bojëmibe rovare jögoroho ahoruomaje höjo. Nosi a mamiehu ë'arëhioho jasi aribövioho jovoho övoho bogo ëhioho otehodivorovë'e ioho ma-ue'aharue höjo. Rabëni ëhioho ë'arue höjo. ³ Ëhi uavamu hegorovo Iesuro uëvadeje: Röhu jemë rabëni jemesi a mami jabesi muohuremu uehorovoromo ëhuro God-are jögoroho aharuje höjo. ⁴ Ëhesi bëhoho God-ro uëvade höjo: Jasi vëmu vavu'oho mae uehorovëvonëjo. O jöe gö'o uëvade höjo: Ae rahu jö sisë jövoromo vëmu o vavu hesi iho ijumahë'oho anego guomo'irajo. ⁵ Röhu jemëro ë jöho ahoromo ae röjëhiromomo uëvaruje höjo: Jaehu jasi vëmu vavu'o God-are nunire uëvë'oho: Nasi maho sisëho ujuohoromo jemë ajëmi'ibejodoho röhu aveho na God-are ihoro bamë'e jevajë uëvë'oho ⁶ nadi röhu maho huotorovoromo vavuho ajaminëjo. Ajamijë'oho sisë höjo. Vavu ajamijë'oho sisë hö uëvarujohuro ëhuro vëmu vavu'o mae uehorovëvo'irarijego God-hu bojëmade jöho jemëro aharuje höjo jemesi a mami jöho e'irovo. ⁷ Sareri sareri'e aribövie

jëvavjêjo. Jö God-aro baeromo majëhijade ae Isaiah-ro jemëhu ë'irarije jöho jajivoromo ëhi uvë'e höjo:

⁸ Ave ariböviohuro ma-jö'ëremu God na rajehi'i

dë vövöbajo'oho bogo nasi gemuoroho jio'i rori'o jioruomajêjo.

⁹ Jabumë a jabesi jögoroho ae röjëhiromomo uëruomaje höjo: Ëho God-are jöe jiaje ejahuorêjo.

Ma-a jabesi jögoroho ëhi röjëhiromomo ëhuro ma-döhemu God na rajehiruomaje höjo.

Ëjemesi jö Isaiah-hu jajivadoho iae mae höjo.

Bogo i ijaruohuro a'i uehoro sisë baejaruohuro ëhuro God-are nunire sisërëjavuaje jöhoje.

¹⁰ Iesuro ëhi uënuogoromo ae aho'obëhe uëvadeje: Ro gemuoro gagovohëromomo ro gagovamu uëvadeje: Ave uhu jö uë'ië'ajoho avoho heromomo bëhoho baerêjo. ¹¹ Rabe jö'ore va'ë'oho bogo ëhuro aho sisërë'amo'i a'i rabe jö'ore jioromomo suorovë'ohuro ëhuro aho sisërë'amaje höjo.

¹² Iesuro ëhi jövamu hejë'ëro hesi ijorajoho jaburo rueromomo uavareje: Jaehu ë jö majëhijamu Pharisee ariböviohu heromomo huë sisë baeromadoho na ja uehorovanuêjo. ¹³ Na ja uehorovanuêjamu Iesuro uëvadeje: Nasi Vavue ö'idöre hijaje a hesi aribövioho mure i maehu rijajoho va'ëne jioruomajêjo. Ëmure hesi ëma ri'amaje resu resuoho nasi Vavuohuro jaho'amoromomo ruruhö'ö'ajêjo. ¹⁴ Ëhuni ë resu resu va'ëne Pharisee aribövioho ëhi vuonugorêjo. Jaburo nuni sisë'e ariböviohuro öroho röjëhijanovarue höjo. Nuni sisë'e a göehu nuni sisë'e a gö öri röjahijë'oho jabumë niö'i guare bejëvo va'a'ajêjo. ¹⁵ Bejëvo va'a'ajêjamu Peter-ro Iesu uavadeje: Röhu jö'ore va'aje o jö'ore jioromomo suorovaje uhu jö hesi bëhoho huruoho majahuijêgo no hejarêjo. ¹⁶ Hejarêjamu Iesuro uëvadeje: Na jaruvoho ëhi jemë'o uehoroho bogojëvavjêjo. ¹⁷ Jemë rabëni bogo garomomo uvarujêjo: Rabe jö'ore va'ë'oho dëre abueromomo dëre jioromomo suorovoromomo bogo aho ijumëvë'e ma-gua gagore va'aje höjo. ¹⁸ A'i jö'ore jioromomo suorovaje jöhuro dë vövöbajo'ere jioromomo rojomoromomo jö'ore suorovaje höjo. Suorovoromomo ëhuro aho God-are nuniroho sisërë'amaje höjo. ¹⁹ Ëhesi bëhoho uehoro sisëhuro dë vövöbajo'ere jioromomo rojomego ëhuro ae muo'amoruomaje höjo. Goho'amoruomaje höjo. Öëro jijihanovoruomaje höjo. Vajiohëro ujuohoruomaje höjo. Ae sarerëmiruomaje höjo. Ae gö jabesi ihoho ijumoruomaje höjo. ²⁰ Ëhi jjië'e mu sisë vaejë'ohuro ëhuro aho God-are nunire sisërë'amaje höjo. A'i övo bogo eguë'e i ijë'oho bogo ëhuro aho God-are nuniroho sisërë'amaje höjo.

Israel rajo bogo a'i sa'a gö rajo magonahehu Iesu mae uehorovade jöhoje.

²¹ Ëhi'oromomo Iesuro ë sa'aho nugo va'adeje. Va'adoho va'o Tyre amo Sidon amo jiajinö sa'are ë rovadeje. ²² Rovamu iae Canaan sa'a rajo magonahëro ë sa'are hijë'ëro rueromomo Iesu uavadeje: Bada ja a böröme David-are ujoho javaje nani vavaenimoromomo ajeminêjo. Satan-are a sisëro nasi aboji hesi dë gagore abuejë'e höjo. Abuejë'ëro magonahoho sisë'i hijajêjo. ²³ Sisë'i hijajêjamu Iesuro bogo jöho uavadeje. Bogo jöho uavamu hesi ijorajo ömo'ömhuro rueromomo uavareje: Magonahoho uavego va'ajo. Hu ma-darugo'o uvobe nosi

ijore ijore rovajëjo. ²⁴ Rovajëjamu Iesuro uëvadeje: God-ro sa'are remö'øjade höjo naro rueromo bogo sa'a gö rajoho ajëmi'i a'i Israel raje sheep va'ëne subirö'ö'amë'ohemu ajëmi'irodego. ²⁵ Èhi uëvamu ë sa'a gö rajo magonahohuro ro Iesuarë bëhire ague aho hiromo uavadeje: Bada ajemijëjo. ²⁶ Ajemijëjamu Iesuro uehorovoromo uvadeje: Vëmu vavu'ehu jabesi aboji harihu'o urimo ajëmijaruëhi naro nasi sa'a rajohemu èhi urimo ajëmi'i rovode höjo. Èhi uvoromo ë sa'a gö rajo magonahoho uhu'e uavadeje: O-ajo. Noehu aboji harihu'o jabesi i ujuohoromo ö harihu mio'amë'oho ëho bogo maehu höjo. ²⁷ Bogo maehu höjamu hegoroovo magonahohuro uehorovoromo uvadeje: Iae na bisemu ioniro sa'a gö raje jevo'ego ëhuni bogo ajëmi'i jöho jövajëjo. Röhu noehu bogo rarovego öehu i ugobajo'o ue'aharuëhi nani Iesuro na'o èhi ejehoromo nasi abojoho ajami'ajëjo. Èhi uvoromo mana uhu'e uavadeje: Bada iae mae-ëjo röhu jabesi öhuro vavu jabesi maratuore jioromo rireromë'e i ugobajo'oho ue'aharue höjo. ²⁸ Ue'aharue höjamu Iesuro uavadeje: Asë'e naro ajamijöro uehoro ma-mabëhe barovane höjo. Èhuni jaehu nimanuëhi èhi ë'ejöjo. Èhi ë'ejöjamu gavë'i abojoho marëjahadeje.

Iesuhu ae aho'obëhe jabesi sino avohëhade jöhoje.

²⁹ Èhi'amu Iesuro va'adeje. Va'adoho va'o Galilee jovo riröre va'oromo dahorure ajiomoromo sa'aro hijadeje. ³⁰ Hijamu ae aho'obëhe maho jaburo höru sisë'e aho nuni sisë'e aho övo höru tövëhë'e aho bitaro tövëhë'e aho guomo guomo'e a ioro'ioroho aho'obëhe èhi ujuoho ruerumadeje. Ujuoho rueromo Iesuhu hijajire sa'are bahiruomadeje. Bahijamu huro avohëvamu mae jëvadeje. ³¹ Mae jëvamu ae aho'obëhe garuomadeje bitaro tövëhë'e aribövioho mae jioromo jöe atamu övo höru'e tövëhë'oho mae jëvamu höru sisë'e aribövioho mae jioromo jijihamu nuni sisë'e aribövioho mae jioromo uherihamu. Èhi'amu gëgorovo jabumë ae aho'obëhe tiöjëvadeje. Tiöromomo God Israel rajo muebejëvaje a hesi ihoho döro bamoruomadeje.

Iesuhu ae aho'obëhe 4,000 i da'uojëhade jöhoje.

³² Èhi'amu Iesuro hesi ijorajo ömo'ömoho uëvadeje: Ruehë uëromo rovamu uëvadeje: Ave ariböviohuni vavaenegajëjo. Jabumë na'o raromobe rovaroho majae niö'i gemu barëjë'ëro ëhu'ëro i ue'aho'iröhoho bogohöjo. Ma-dë gagëremu rëmö'øjë'oho na bijönegajëjo va'ego örire nune örijëvojëni. ³³ Èhi uëvamu rue ijorajoho jaburo uavareje: Iae èhi höjo röhu aveho ma-sa'aemu jië'e öri ari'ero ae aho'obëhe rovë'e höjo. Èhi jië'oho no dinö'e ioho birohoromo da'uojëhi'ëjarëjo. ³⁴ Da'uojëhi'ëjarëjamu uëvadeje: Ioho dimino'e jëvajëjo. Dimino'e jëvajëjamu uavareje: Ioho övo gö mine övo göre niö'i visu ininoho magemu gemu javuajëjo. ³⁵ Èhi uavamu hegoroovo Iesuro ae aho'obëhe uëvadeje: Sa'aro raromohëjo. ³⁶ Raromohëromomo ie övo gö mine övo göre niö'i ujuoho rovarohu'o visuohu'o ujuohoromo God huë mae uanugoromo ato'atovoromo hesi ijorajo ömo'ömoho i'imëmamu ae aho'obëhe suvuorëmijareje. ³⁷ Suvuorëmijamu ae aho'obëhe ue'ahamu da'uëgadeje. Da'uëgamu gagorovo ijorajoho jaburo vituoho gagovoromo esöe övo gö mine övo göre niö'i aegamu irijiomomadeje.

³⁸ Ama'e aho'obêhe 4,000 jaburo ë ioho visuoho ue'ahoruomadeje. Röhu magonahe asisö'e jabu'o ue'ahareje.

³⁹ Ëhi'amu Iesuro ë aribövioho rêmö'önugoromo boat-re ajio hiromo Magadan sa'are va'adeje.

16

Pharisee ariböviohu'o Sadducee ariböviohu'o jabuhu Iesu bogo ma uehorovoromo huhu darugo'e mu vaejöro dinamare jöhoje.

¹ Iae Pharisee ariböviohu'o Sadducee ariböviohu'o ëho jaburo rovereje. Rueromo Iesu guaro beva'ojöro nimoromo uavareje: God-are darugoho baeromo bogo gavarue muoho röjahuijego no gavarëjo huro ja ajamego muoho vaejanue javego o bogo. ² Ëhi uavamu huro uëvadeje: Jeniromoromo ö'idöho kavuego uvaruje höjo: Ö'idö kavua-joho vamae jio'iro ë'ajëjo. ³ O sue'oho uvaruje höjo: Ö'idö kavuoromo ramoramovajoho jaruvoho ëni buru'e rue hesi höjo. Jemëro ö'idöho uherihoromo kavuego garomo uvaruje höjo: Ëhesi bëhoho iae ëhi jio'ië'ajëjo. Röhu ave jaruvore rovaje muoho garomo ë hesi bëhoho bogo avoho garomo uvarujëjo: Iae God-are mu börömo nohovo rovajëjo. ⁴ Sarerile aribövi sisë jëvajëjo. Magonahehu hesi baru vuonugo'i majuvajëhi jemëro ëhi God vuonugo'i mue gö gö uehorovaruje höjo. Jemë rabëni darugo'e muoho ga'i nimarujëjo. Na ëhi jië'e muoho bogo vae'i a'i Jonah-hu God-are mu börömo röjëhijade ëhi jië'e muohuremu röjëhi'ejëjo. Mue gö gö bogajo. Ëhi uënuogoromo rëmo va'adeje.

Pharisee aribövi o Sadducee aribövi jabesi i dë huaje oso hesi uhu jöhoje.

⁵ Ëhi'amu Iesumëro e'u döre va'oromo ioni gönö rovereje. Rueromo ijorajoho jaburo gavareje rumonëgamu iruno'oho bogo ujuohë'e jëvamu. ⁶ Ëhi'amu Iesuro uhu'e uëvadeje: Jemë gavë'iajo. Pharisee aribövi o Sadducee aribövi jabesi i dë huo'amaje osohuro jemesirire rumorovo'ajëjo. ⁷ Rumorovo'ajëjamu rueho jaburo ë jöho mevoromo uarovareje: Noro ie bogo ujuoho rové'ëro ëhuni jövajëjo. ⁸ Ëhi uarovamu Iesuro gëromo uvadeje: Jabumë ëhi jië'e jöho ataruëromo uëvadeje: Mae uehorovevo avoho'ibejarijëjo. Jemë rabëni i bogojavuaje jöho atarujëjo. ⁹ Jemë rabëni avevejö'ohu'o bogo gavarujëjo. Naehu ie övo gö mine ujuohoromo ae aho'obêhe 5,000 i'imëmodoho ë i vitu vitu aegamu esöe dimino'e irijiomom'amadoho jemë ëhu'o rabëni bogo uehorovarujëjo. ¹⁰ O naehu ie aho'obêhe övo gö mine övo göre niö'i ujuohoromo ae aho'obêhe 4,000 i'imëmodoho ë i vitu vitu aegamu esöe dimino'e irijiomom'amadoho jemë rabëni bogo ëhu'o uehorovarujëjo. ¹¹ Jemë rabëni uvarujëjo: Ie bogojavuo'ego nöörö i jöe uehorovoromo majahuijajëjo. Bogo ë jöho uëromo ë'ode höjo. Röhu gavë'iajo. Pharisee aribövi o Sadducee aribövi jabesi i dë huo'amaje osohuro jemesirire rumorovo'ajëjo. ¹² Rumorovo'ajëjamu hegorovo ijorajoho jaburo uhu jö hesi bëhoho avoho uehorovoromo uvareje: O Iesu bogo i dë huo'amaje oso jöho majahuiromomo uövuade höjo: Gavë'iajo. A'i Pharisee aribövi o Sadducee aribövi jabesi jö sisëhuro nosiro rumorovojöeni ë jöho uhu'e majahuiromomo uövuade höjo: Gavë'iajo.

Iesu hu ëhi jië'e ae jiaje jö Peter-hu jövade jöhoje.

¹³ Iae Iesuro ajiomadoho Caesarea Philippi amo bëhinö sa'are rovadeje. Rueromo huro hesi ijarahö ömo'ömoho uëvadeje: God-are A Maho na rahuojevaje jöho ae aho'obëhe diehi atoruumaje höjo. ¹⁴ Diehi atoruumaje höjamu uavareje: A ioro'iorohuro uvoruomaje höjo: Ja John bapataeto vaejavuonövane ahuro rovë'e javajëjo. A ioro'iorohuro uvoruomaje höjo: Ja Elijah-ro rovë'e javajëjo. A ioro'iorohuro uvoruomaje höjo: Ja Jeremiah-ro o jö God-aro baeromo ae majëhinövane ae göëro rovë'e javajëjo. ¹⁵ Ëhi uavamu hegorovo Iesuro uëvadeje: Röhu jemë nasi jöho diehi ataruje höjo. ¹⁶ Diehi ataruje höjamu Simon Peter-ro ri'öromo uavadeje: Ja böröme namiromo ajamuijanue aho javajëjo. God hiemu hijaje a hesi Harihe javajëjo. ¹⁷ Hesi Harihe javajëjamu Iesuro Peter uavadeje: John-are harihoho Simon ja huë mabëhe baejë'e javajëjo. Bogo ma-aehu ë jöho röjahijamu jövo'irögöro nasi Vavue ö'idöre hijajöhuro röjahijë'ëro jövanuëjo. ¹⁸ Röhu na ave jöho ua'ië'ajëjo: Ja Peter javajëjo. Peter hesi bëhoho munë javajëjo. Röhu ave munëho bamo'ejöjo nasi ekaresiae aho'obëhe ë hesi döre gagovëvego bibivoromo riravo'irarijeko. Nasi ekaresiae aho'obëhe ëhi riravo'iramu vuovo hesi vöröho bogo ruahö'öjëvoromo ijumëvo'ajëjo. ¹⁹ Röhu naru Peter jasi örire darugoho bojami'ejöjo jero ojoho jiovëhego aëro God-are öri ari'ere ë va'oruomoröhego. Ja sa'are hiromo öri tugohë'oho jero ma-mae tugohö'iramu God'o ö'idöre hiromo avoho tugohö'ajëjo. O sa'are hiromo öri jiovë'oho jero ma-mae jiovo'iramu God'o ö'idöre hiromo avoho jiovo'ajëjo. ²⁰ Ëhi uaromo hesi ijarahöho aho'obëhe darugo'o uëvadeje: Nadi aho huruoho majëhiromo uërëjo: Nörö böröme namiromo a ajëmijaje aho höjo.

Iesuhu huë vavaeni baeromo guomoröhe jö jövadohoje.

²¹ Ëhi'onugoromo evare majare Iesuro aevoromo hesi ijarahö ömo'ömoho röjëhiromo uëvadeje: God-ro ëhi bamë'ëro ëhu'ëro na Jerusalem ajiomo'ejöjo. Ajiomo'iramu a duvaho ariböviohuro priest masijöhuro Jew rajo jögoru öri röjëhijarue ariböviohuro ëho jaburo vi'ehe huë vavaene bövie bise'e bojemi'aruëjo. Ëhi ë'oromo ae gö jabesi övore bojëmi'iramu anego'iramu guomoromo majae niö'li gemu hesi uhure ri'ö'ejöjo. ²² Ëhi uëvamu hegorovo Peter-ro Iesu rori'o hu'irae bava'oromo uavadeje: Bada bogajo. Ëhi jië'e huë vavaenoho bogo mae bogo bae'a'anuëjo. ²³ Ëhi uavamu hegorovo Iesuro huotorovoromo Peter uavadeje: Satan rori'o va'ëjo. Jero nasi muoho ahanuëjo. God-hu uehorovajëhioho ja bogo ëhioho uehorovo'i ma-aehu uehorovaruëhi jero ëhi uehorovoromo ëhuni ë jöho jövanuëjo.

²⁴ Ëhi uanugoromo hesi ijarahö ömo'ömoho uëvadeje: Ae rahuaro nasi ijore ijore juvo'i nimë'oho jasi sinehu nimajoho nadi uehorovo'i uvonëjo: Iesure jöëni vi'ehe huë vavaene javoje rabe baeromo guomevë'oho iae hesi hö uvoromo korosi hesi i'uoho banigojiomanovoromo nasi ijoro ijoro juvonövonëjo. ²⁵ Ja jasi sinohuni uehorovoromo biririvoromo ave sa'are hi'i ëhemu uehorovë'oho ijönöho guomo öriro va'a'anuëjo. O ja nasi jöëni guomë'oho ijönöho maro hi'a'anuëjo. ²⁶ Jaehu are jove sa'ae mae sisë aho'obëhe bae baerë'i röhu jasi arijo'arije ijumorovë'oho na ja ëhuro mae javo'ajëjo. Bogajo. Arijo'arije ijumorovë'oho diehi röhu maho avohorovo'iramu

mae javo'ajëjo. Öre bogohöjo. ²⁷ Röhu God-are A Maho naro nasi Vavu hesi ajohu'o nasi anera ömo'ömo'u'o gemu mae vuonorö'ö rue'ejöjo. Rueromo evare ae gemu gemu diehi jië'e mu vaejarije manaho ëhi bojëmibe va'ejöjo. ²⁸ Ave jöho na jö mae uë'ië'ajëjo. Jemë a ioro'iore ave riravarujoho bogo vuovë'e raromoromo ge'a'arujëjo God-are A Maho naro böröme namiromomo muebejëvo'i rue'iramu.

17

Iesuare nu ano'ehu ajivoromo gorosovade jöhoje.

¹ Ëhi uënuGOROMO majae aho'obëhe övo gö mine övo göre gemu barëjamu Iesuro Peter James o James-are öe John ëhi söromomo dahoru ëgobövire ajiomoromo jabesi sivue raromareje. ² Raromoromo ë ijorajoho jaburo gavareje Iesuare sino haho'e gorosovoromo hesi nu ano'oho majaehu bamajëhi ëhi jio'i hesi niögoho ajivo avohamu. ³ Ëhi ga'i gavareje Moses'o Elijah'o ëma jëvoromo jabu'o Iesu'o jöe atoruomamu. ⁴ Jöe atamu gëgorovo Peter-ro Iesu uavadeje: Bada no ave raromaruoho iae mae höjo. Ja nagë'oho naro javue niö'i gemu vae'amo'ejöjo jani gemu Moses-ni gemu Elijah-ni gemu. ⁵ Ëhi jövamu gavë'i ajivë'e suehuro rueromo aegëhadeje. Aegëhamu hejareje sue uhure uvavamu: Ave aho nasi Harihu mabëhe höjo. Na hu garomo nimorohevajëjo. Huhu jövaje jöho avoho herëjo. ⁶ Ëhi uvavamu hejë'i ë ijorajoho jaburo sisë maro juhuonivoromo sa'are rireromoromo nu ano'oho sa'are amoromo momorö'öjareje. ⁷ Sa'are momorö'öjamu Iesuro rueromo jabumë rëhëvoromo uëvadeje: Nadi juhuonivo'i ri'öhëjo. ⁸ Ri'öhëjamu hegoroovo ri'ö uheriho'i gavareje ae gö bogojio'i Iesu gemu namijamu.

⁹ Ëhi'onuGOROMO dahorure ruvebijë'i Iesuro uëvadeje: Jemëhu gavar-ijoho nadi aho majëhirëjo. U'emu God-are A Maho naro guomoromo ri'öjego evaro majëhirëjo. ¹⁰ Ëhi uëvamu rueho jaburo uavareje: Jew rajo nosi jögoru öri röjahuijarue ariböviohuro uövuaruue höjo: God-are a börömoho bogo ëma rue'i a'i urimo Elijah God-aro va'adoho iae vuonorö'ö rue'a'ajëjo. Rue'iramu God-are a börömoho ijore rue'a'ajëjo. Jögoru öri röjahuijarue aribövioho rabëni ë jöho majahuijarue höjo. ¹¹ Rabëni majahuijarue höjamu Iesuro uëvadeje: Io'ajo. Elijah-hu urimo rueromo bövi bise'o avoho'amo'iröhe jöho iae mae-ëjo. ¹² Röhu ave jöho naro jemë uhu'e uë'ië'ajëjo. Hehëjo. Elijah iae mami'e rovade höjo. Rovamu aëro hu bogo ma ga'irögoro jabuhu diehi nimarëhi ëhi hesi örire sisë vaeruomade höjo. Jabuhu hu sisë vaejarëhi God-are A Maho na'o ëhi sisë vaejevorumo'ajëjo. ¹³ Ëhi majëhijamu hegoroovo evare Elijah uëvaje hesi bëhoho uehorovoromo uvareje: John bapataeto vaejavuonövade a hesi jöho majahuiromomo ë'ajëjo.

Iesuhu Satan-are a sisë aharihu hesi dëre jiamu rarovö'öjade jöhoje.

¹⁴ Dahorure ruvebinuGOROMO ae aho'obëhe raromaruire ë rovareje. Rovamu gavë'i ae gemuëro rueromo ague aho hiromomo ¹⁵ Iesu uavadeje: Bada nasi harihohuni vavaenimoromo ajamijëjo. Hesi simanoho sisërëromomo sisë'i sisë'i hi juvaje höjo. Sisë'i sisë'i hiromomo vënire jovore ëma ravorovaje höjo. ¹⁶ Ëhuni jasi ijorajo jabesi örire barovode höjo. Barovamu ajami'iröhoho bogo eni jëvade höjo. ¹⁷ Bogo eni jëvade

höjama Iesuro uëvadeje: Asë'e ave jaruvore raromaruje aribövioho jemë bogo ma uehorovo'i jõe gö gö ëma uehorovaruje aribövie jëvájëjo. Na majae dimino'e jemë'oho hibe va'ejöjo. Majae dimino'e jemesi mu sisëho garomo ma-nunëro ga taemobe va'ejöjo. Jemesi mu sisëhuro na u'uvevájëjo. Ëharihoho avehuro barovego na gavöjo. ¹⁸ Barovamu gagorovo Iesuro Satan-are a sisëho birevamu aharihu hesi dëre jioromo hörö va'adeje. Hörö va'amu gavë'i aharihoho mae jiadeje.

¹⁹ Ëhi'amu Iesuare ijorajoho jaburemu rueromo Iesu uavareje: Diehi'oromo noehu aru'aho sisë rarovö'öjarocho bogo eni javuade höjo. ²⁰ Bogo eni javuade höjama Iesuro uëvadeje: Jemëro bogo ma uehorovë'ëro ëhu'ëro bogo eni jëvadeje höjo. Röhu ave jöho na jö mae ue'ië'ajëjo. Mustard bajoho inino mae jio'amajëjo. Mustard baje gemu ma-bise'ö jiajëhi ëhi uehoro mae ma-bisemu baeromo God mae uehorovë'öho ave dahorehu böviehu bise'ehu jemesi mu ahanovajoho uavë'oho: Rori'ö va'ë uavë'oho iae rori'ö va'a'ajëjo. Ëhi jië'e mu bövi bise'ö vaejë'öho eni jëvo'ajëjo. ²¹ [Amo ë aharihu hesi dëre jiade ëhi jië'e a sisë ae gö hesi dëre jiajoho rarovö'ö'ië'iroho i ue'aharujoho vuonugo'i God-are örire uehore aho'ö bojamiromo ëninamijë'ohuro ëhuro rarovö'ö'amo'arujëjo. Öri göho bogo'e höjo.]

Iesuhu guomoröhe jö röhu maho majëhijade jöhoje.

²² Ëhi'oromo Iesuare ijorajoho jaburo Galilee sa'are ë ro gemuoro gagovareje. Gagovamu gavë'i Iesuro uëvadeje: God-ro ëhi bamë'ëro hesi A Maho na a jabesi övore va'oromo ²³ anego'iramu guomo'ejöjo. Guomoromo majae niö'i gemu hesi uhure ri'ö'ejöjo. Ëhi majëhijamu heromo huë vavaene böröme baeruomadeje.

Iesumëhu God-are amo börömo hesi tax bojami'iröhe jöhoje.

²⁴ Ëhi ë'ië'ëro Iesu'ö hesi ijorajo ömo'ömo'hu'ö ëho jaburo Capernaum amore rovarëje. Rovamu God-are amo börömo hesi mu nigemo'iröhe tax moni baejarue ariböviohuro rueromo Peter uavareje: Na jasi a börömoho God-are amo börömo hesi tax-öho bojamijaje höjo. ²⁵ Bojamijaje höjama Peter-ro uëvadeje: Io'ajo. Io'a uënuogoromo osare va'amu gavë'i Iesuro urimo jöho jövoromo Peter uavadeje: Simon ja diehi uvanuëjo. Sa'ae dinö'e dinö'e raromoromo masijo vaejaruoho tax ihe gö gö ujuoho'ië'iroho rahumesi örire uëvego i'imëmarue höjo. Na jabesi ae gemuoho jabesi örire o ae gö jabesi örire uëvarue höjo. ²⁶ Uëvarue höjama Peter-ro uavadeje: Ae gö jabesi örire uëvarue höjo tax monie bojëmijöro. Ëhi uavamu Iesuro Peter uavadeje: Ëhu'ëro jië'ëro jabesi agane gemuoho tax-öho bogo vaejarue höjo. ²⁷ No God-are agane javuajëjo röhu no hesi ösa hesi tax-öho bogo bojëmi'ibejarëjo tax baejarue aribövioho huë sisë bae'ibejarëjo. Ëhuni iae bojëmi'ëjarëjo. Röhu jovo e'uoro va'oromo anuge ba'amoromo aevo'i jiomo'irane visuoho baeromo jö'öho tarivahonëjo. Tarivahoromo ga'a'anuëjo tax hesi ijo bajoho jö'ore jio'iramu. Ëho bava'oromo tax-öho jasirohu'ö nasirohu'ö bojëminëjo. jöhoje.

1 Ēhi'lamu evare Iesuare ijorajoho jaburo rueromo uavareje: God-hu bōrōme namiromo muebejavuajoho di ahuro a ioro'ioroho iosiramuiromo bōrōmoho javuajējo. 2 Bōrōmoho javuajējamu hegorovo Iesuro aharihoho uvamu rovadeje. Rovamu jabesi nunire hu'irae barueromo 3 uēvadeje: Ave jōho na jō mae uē'iē'ajējo. Jemē jemesi iho bōrōme jiojōro uehorovarujoho vuonugoromo huotorovoromo asisō'onō'e ma-taemo raromorējo. Jemē bogo ēhi ē'ē'ohō God-hu muebejaje ōri ari'erohō bogo va'o hesi jēvajējo. 4 Ae rahu dōre bamorovaruohō vuonugo'i ave aharihohō va'ēne ma-taemo raromē'ohō ē aribōviohuro God-hu bōrōme namiromo muebejēvaje a ioro'iorohō iosirēmiromo jabumē masijo mae jioruomajējo. 5 Ae rahu aviēhi jiē'e asisō'ohō gemu nasi ihore rajahiro mō baejē'ohō ēhuro na'o rajehiromo baejevoro-maje hōjo.

God uehorovarue mu ijumēharue aribōvi jabesi jōhoje.

6 Ae gōēro asisō'onō'e jōrume hiromo nasi ōrire mae uehorovevo'ajējo. Ēhi'o'iramū ae gōēro ē aho mu sisē rōjahiromo ēhuro na uehorovevaje muohō ijumaho'ajējo. Ijumahoromō ēhuro hu i'u sisēhō bae'a'ajējo. Mu sisē bogo rōjahijajevare evare ē mu sisē rōjahijaje a hesi sōnō'ahore aēro i'u'e munē hitahiohuro tōvoromō sō jovore ba'amego e'u ēgobōvire beva'oromō jove iromō guomō'ibejajo ēhō ma-jianovo'ibejajo. A'i ē mu sisē rōjahi'irōhe ē hesi i'uo hō bōrōmō bēhe bae'a'ajējo. 7 Sa'are aribōviohō aho'o vaevē'e jioruomajējo gōehu gō bijiohō gavego sisē vaerōhe muohō jiē'ego. Ēhi jiē'e muohō iae rue'a'ajējo. Rōhu ae rahu ē mu barovē'ohō vaevē'ohō sisērē'ajējo.

8 Jasi ōvehu o hōrehu mu sisē vaeromō God uehorovanue mu vuonugo'iē'irohō ōvohō o hōroho tarioromō bu'ōnējo. Ja ōve o hōre gemu javamū ijōnō va'oromō mare hijē'ohō ēhuro mae javo'ajējo. A'i ōve niō'i o hōre niō'i javamū ijōnō God-hu ramō'ōjamū ravemū ravaje vēnire va'ē'ohō ēhuro sisē bēhe javo'ajējo. 9 O jasi nunehū mu sisē vaeromō God uehorovanue mu vuonugo'iē'irohō nunohō jahoromō bu'ōnējo. Ja nune gemu javamū ijōnō va'oromō mare hijē'ohō ēhuro mae javo'ajējo. A'i nune niō'i javamū God-hu ramō'ōjamū vēni sisēre va'ē'ohō ēhuro sisē bēhe javo'ajējo.

Sheep subirō'ōjamū nahoromō birohade uhu jōhoje.

10 Rōhu gavē'i raromorējo. Asisō'o va'ēne ma-taemo raromarue aribōviohō bogave nue huodēgo'irarijējo. Rabēni hesi bēhohō jabumē muebejēvarue aneraho jaburo ō'idōre raromoromō nasi Vavue ō'idōre hijaje a hesi nuniro raromemū raromarue hōjo. 11 [God-are A Ma naehu rovode hesi bēhohō subirō'ō'amē'e aribōviohō sō rueromō maro nugo'amō'irodēni rovode hōjo.]

12 Rōhu ave uhu jō majēhi'iē'ajohō jemē diehi uehorovarujējo. Ae gemu sheep aho'obēhe 100 jio'i gemu sidōvoromō ēma juvē'ohō arijo'ohuro sheep ioro'iorohō 99 dahorure nugo'amō'i va'oromō subirō'ōjade sheep-ohō nahobe juvo'a'ajējo. Na mae-ējo. 13 Nahobe juvoromō birohē'ohō evare sheep ioro'iore 99 mae raromare jabesi jōēniohō ma-bisemū nimorohō'i a'i ē subirō'ōjade sheep gemu'ohuniohō nimorohō avohō'ajējo. Iae na mae uēvajējo. 14 Ēuhu jō hesi bēhohō asisō'o va'ēne jōrume raromarue aribōviohō rōhu gemu

sisëre va'ë'oho jemesi Vavue ö'idöre hijajohuro ëhi jië'oho bijönimaje höjo.

Ekaresia ae göehu mu sisë vaejavuego noehu diehi ë'iröhe jöhoje.

¹⁵ Ja'o hu'o God uehorovaruje öehu ri'öromo jasi örire sisë vaejavë'oho jasi sivue va'oromo jemë niö'iro ariromo hesi sisëho avoho majahijego hu he'irajo. Heromo huhu ejahë'ohuro ehuro jasi öho jasiro barue'anuëjo. ¹⁶ O bogo ejahë'oho va'oromo ae gö'o gemu o niö'i hu'iraejëvoromo ö hesi öroro vuonorö'ö va'onëjo. Ehesi bëhoho God-are surire jöho ëhi uvë'e höjo: Ae rahu ae gö hesi sisë a masijo jabesi nunire majëhijë'iroho ae niö'i o niö'i gemu gavare o hejare jö sisë gemuohuremu majëhijë'oho aëro heromo uvo'a'aruëjo: Iae maeëjo. Ehi jië'e mu sisëho vaejade höjo. Ehuni ae gö'o gemu o niö'i hu'iraejëvoromo ö hesi öroro va'oromo hesi jö sisëho mevego jabu'o heromo ja ajami'irarëjo. ¹⁷ O jabesi jöhu'o bogo ejëhë'oho va'oromo ekaresiaho ë a hesi sisëho huruoho majëhinëjo. O huhu ekaresia jabesi jö ëhu'o bogo ejëhamu gavë'iroho uvonëjo: Hu a gö va'ëne o vajiohu'e tax gagovaje aho va'ëne höromo nadi gavanovonëjo.

¹⁸ Ave jöho na jö mae uë'ië'ajëjo. Jemë sa'are raromoromo öri tugohë'oho jemëro ma-mae tugoho'iramu God'o ö'idöre hiromomo avoho tugoho'ajëjo. O sa'are raromoromo öri avoho jiovä'oho jemëro ma-mae jiovo'iramu God'o ö'idöre hiromomo avoho jiovo'ajëjo.

¹⁹ Röhu ave jöhu'o uë'ië'ajëjo. Jemë ae niö'i sa'are ariromo jöe gemuoro uehorovoromo ëninamijë'oho nasi Vavue ö'idöre hijajohuro ejëhoromo jemëhu ëninamijarijëhi iae ëhi vaejëho'ajëjo ²⁰ rabëni ae niö'i o niö'i gemu nasi ihore gemuore gagovë'oho naro ë dirö'ore jemë'o jevajëro jië'ëro.

Ae göehu ae gö hesi sisë bogo uehorovoromo vuonugade ë hesi uhu jöhoje.

²¹ Ehi'amu Peter-ro rueromomo Iesu uavadeje: Bada nasi öehu nasi örire mu sisë vae'i hijë'iroho na majae dimino'e uehorovoromo vuonugo'i hi'ejöjo. Na na vae 7 uehorovoromo vuonugo'i hi'ejöjo. ²² Ehi uavamu hegorovo Iesuro uavadeje: Na uavajëjo: Bogo vae 7 ëhemu a'i vae majae uehorovoromo vuonugo'i hi'a'anuëjo.

²³ Ehesi uhu jöho na uai'ë'ajëjo. Sa'a a börömo hesi mu vaejahaarue aribövi jabuhu moni bojami'iröhe suri suri ë sa'a a börömehu adahoromo ë'adëhi God-ro böröme namiromomo hesi öri ari'oho ëhi muebejaje höjo. ²⁴ Iae sa'a a böröme gemuëro hijade höjo. Hiromomo hesi mu muebejahaarue jabesi suri surioho aevoromomo adaho'amade höjo. Adaho'amamu ae gemuehu a börömo hesi örire 7 million kina bojami'iröhoho hu'irae barovare höjo. ²⁵ Barovamu a börömhuro gavade ë aho moni bojami'iröhoho bogo eni jiamu gagarovo hesi aribövioho uëvade höjo: Ehuni ave aho hesi vaborohu'o aboji harihu'ohu'o maho sisëho aho'obëhe ëhu'o jemëro ae gö imëvoromomo monioho mana baeromomo nasi öroro bojemirëjo. Ehi jië'oho ë mu vaejaje aehu na mana bojemego bae'ibejodëhi ë monioho naro bae'ejöjo. ²⁶ Ehi majëhijamu hegorovo ë ahuro ague aho hiromomo ëninamiromomo uavade höjo: Mabirivoromomo hiromomo muebejevonëjo. Iae na aho'o bojami barë'ejöjo.

27 Ëhi jövamu hegorovo rue a börömohuro huni vavaenimoromo uavade höjo: Iae mae-ëjo. Nadi ijoho bojeminëjo. Iae barëjajëjo. Va'onëjo.

28 Ëhi uavamu iae va'ade höjo. Va'ihö gavade ae gemu hu'o mue vaeromo a börömo hesi mu muebejahajoho jiamu gagorovo guduamade höjo 12 kina hesi örire bojami'iröhëro jjië'ëro. Gud-uamoromo huë husuovahoromo uavade höjo: Nasi monioho bojemi'ejëjo. 29 Bojemijëjamu ague aho hiromo ëninamiromo uavade höjo: Ma-biririvoromo hiromo muebejevonëjo. Iae na bojami'ejëjo. 30 Bojami'ejëjamu bogo ejahade höjo. Bogo ejaho'i guduamo bava'oromo savoji gagore ba'amade höjo hu ë hibe va'ojuvo ë monioho hesi örire bojami'iröhëgo. 31 Ëhi'amu gagorovo a börömo hesi mu muebejahaue a ioro'iorohuro garomo dë vörönëgoromo sisë maro vavaenëgade höjo. Vavaenëgamu va'oromo a börömoho huruoho majahiromo uavare höjo: Ëhi ëhi ë'ë'e höjo. 32 Ëhi ëhi ë'ë'e höjamu rue a börömohuro jöe nugö'öjamu ë mu muebejahaje ahuro rovade höjo. Rovamu a börömohuro uavade höjo: Nasi mu vaejanue aho sareri a sisë bëhe javajëjo. Jero uevë'ëro ëhuni jaehu moni bojemi'iranoho na uehorovoromo vuonugo barëjode höjo. 33 Naehu jani vavaenimodëhi ja rabëni jasi a göhunioho bogo ëhioho vavaenimane höjo. 34 Ëhi uanugoromo ë arijo'ohuro dë vörönimamu ae uëvamu hegoro mu vaejaje aho guduamo bava'oromo savoji gagore ba'amare höjo ë hibe va'ojuvo monie aho'obëhe bojami barë'iröhëgo.

35 Jöho ëhi jjië'ëro jemë ae gemu jemesi a ioro'ioro jabesi sisë bogo uhohu'o uehorovoromo vuonugë'oho nasi Vavue ö'idöre hijajohuro ë börömehue ë'adëhi jemesi örire ëhi ë'a'ajëjo.

19

Vaboro'o baru'o gemuoho jëvaje jöhoje.

1 Iesuro ë jöho majëhinugoromo Galilee sa'are jioromo va'adeje. Va'oromo Jordan beromo ioni göre Judea sa'are rovadeje. 2 Rovamu ae aho'obëhe mae rihimoruomamu huro guomo guomo'e aribövioho avohëvamu mae jëvadeje.

3 Ëhi'amu gagorovo Pharisee ariböviohuro rueromo Iesu guaro beva'ojöro uavareje: Vaboro nugö'ö'amo'iröhë jögoru hesi jöho no hel'i naguajëjo. Baruehu rabëni rabëni bijönimoromo vaboro nugö'öjë'oho na mae o sisë höjo. 4 Mae o sisë höjamu Iesuro uëvadeje: Röhu jemë ave jö adaharijoho rabëni bogo avoho uehorovarujëjo. God-are surire ëhi uvë'e höjo: Bövi bise'lo bamade ahuro aevoromo ahu'o magonahohu'o bamëvade höjo. 5 Bamëvoromo uëvade höjo: Ëhu'ëro jjië'ëro aëro vëmu vavu'oho rëmö'ö'i vaborohu'o gemu mae hi'a'ajëjo. Vaborohu'o hi'iramu jabumë niö'i jëvadoho röhu gemu jio'a'ajëjo. Ëhi uvë'e höjo. 6 Ëhu'ëro jjië'ëro ë ahu'o magonahohu'o bogo hahagu hahagu jio'i ma-gemu jëvo'ajëjo. God-hu mami'e gemuore havoromo muohadoho jemë ma-ae jëvaje nadi tarivorëjo. 7 Nadi tarivorëjamu uavareje: Vaboro nugö'ö'iröhoho sisë hö uövuanuoho röhu ëhi jjië'oho Moses-ro rabëni ave jögoroho bojamuade höjo: Vaboro nugö'ö'i nagë'oho nugö'ö'irane jöho suroro jajivoromo vaboroho bojamiromo evaro nugö'önëjo. 8 Nugö'önëjamu Iesuro uëvadeje: Jemë hia'i biriri'e aribövie jëvobe rovë'ëgo ëhuni baruehu vaboro nugö'ö'amo'irarije ë

hesi öroho Moses bogo tugohade höjo. Röhu ni'livadiroho ëhi jië'e muoho bogojiade höjo. ⁹ Röhu ave jöho na uë'ië'ajëjo. Vaboroho bogo ma-juvë'e baruehu ëma nugö'öromo magonahe gö masuvë'oho ëho bogo maho masu'i goho'amarue muoho vae'a'ajëjo.

¹⁰ Ëhi majëhijamu hegorovo hesi ijorajoho jaburo Iesu uavareje: Ja uövuanuoho: Baruehu vaboro masuvë'oho nadi ëma nugö'ö'amorë uövuanuëjo röhu ëhi jië'oho aehu magonaho masuvë'oho bogo maho jianovajëjo. ¹¹ Ëhi uavamu Iesuro uëvadeje: Magonaho bogo masu'i ma-raromë'oho ae aho'obëhe ëhi ë'ë'oho bogo eni jioruomo'ajëjo. God-hu darugo bojëmamu baeruomë'oho ë ariböviohuremu ëhi ë'ë'oho eni jioruomo'i a ioro'ioroho bogo eni jioruomo'ajëjo. ¹² Ëhesi bëhoho ae göëro göëro bëhe gö gö uehorovoromo magonahoho bogo masu'i ëma raromarue höjo. A ioro'ioroho rahare majare sinoho ëhi jëvë'ëro magonahoho bogo masu'i ëma raromarue höjo. A ioro'ioroho sinoho tarivëhë'ëro magonahoho bogo masu'i ëma raromarue höjo. A ioro'iorohuro God-hu böröme namiromo muebejëvaje hesi muoho uehorovoromo magonahoho bogo masu'i ëma raromarue höjo. Ae rahu ëhi jië'e mu vae'irarije darugo baejë'oho ëhi vaerëjo.

Iesuhu hesi övo asisö'o inino jabesi sinore bamëhade jöhoje.

¹³ Ëhi'amu gagorovo aëro asisö'oho sö ujuoho rueruomadeje Iesuro öve jabesi sinore bamëhoromo God uavego ajëmi'iröhego. Ujuoho rovamu gëgorovo Iesure ijorajo ömo'ömhuro birëgareje. ¹⁴ Birëgamu hegorovo Iesuro hesi ijorajoho uëvadeje: Nadi ahëvo'i uëhego rueruomajo. Ëhi jië'e asisö'o va'ëne jörume raromë'e aribövioho God-ro böröme namiromo muebejëvego hesi aharire raromoruomaje höjo. ¹⁵ Ëhi uëvë'ëro övoho jabesi simanore bamëhonugoromo va'adeje.

Bövi bise'o marohë'e a hesi jöhoje.

¹⁶ Ëhi'amu iae a i'e gemuëro rueromo Iesu uavadeje: Tisa na diehi jië'e mu maho vaeromo ëhuro ioro'ioemuoho maroho hi'ejöjo. ¹⁷ Maroho hi'ejöjamu uavadeje: Mu ma vae'irane jöho ja rabëni nasi öriroho ue gevanuëjo. God gemu a maho höjo. Röhu mare hi'i nagë'oho hesi jögoroho ejahonövonëjo. ¹⁸ Ejahonövonëjamu uavadeje: Diehi jië'e jögoroho uevanuëjo. Uevanuëjamu Iesuro uavadeje: Nadi aho anonëjo. Nadi goho'amonëjo. Nadi vajiohoho baenëjo. Nadi sareri'e jöho aho majëhinëjo. ¹⁹ Jasi vëmoho vavuoho mae uehorovëvonëjo. Jasi arijo'arije rajahirovanuëhi jasi ae gemuoho ëhi rajahinëjo. ²⁰ Rajahinëjamu uavadeje: Ejöho iae na e barëjë'e jëvajëjo. Ëhi ë'ë'e jëvajëjo röhu mu göho rabe vae'ejöjo ëhuro maro hi'irodoho eni jëvo'iröhe. ²¹ Ëhi uavamu Iesuro uavadeje: Maro hi'iranëro mae javojöro nagë'oho va'oromo jasi bövioho bise'oho imo'amoromo monioho baeromo inömo bogo eni jië'e aribövioho suvuorëminëjo. Ëhi ë'ë'oho bövie bise'e maho maho janioho ö'idöre jiaho'ajëjo. Ëhi'oromo rueromo nasi ijoro ijoro juvonövonëjo. ²² Ëhi uavamu hegorovo ruehuro hesi uehorovoromo uvadeje: Na bövie bise'e börömo mae jëvë'ëro suvuorëmi'irodoho na bogo eni jëvajëromo vavaenimoromo va'adeje.

23 Va'amu gagorovo Iesuro ijorajo ömo'ömo ho uévadeje: Ave jöho na jö mae uë'ië'ajëjo. Bövi bise'ö marohë'e aehu God-hu muebejaje öri ari'ere va'ë'öho ëhi jië'öho anoji'e mae jio'a'ajëjo. 24 Röhu avehu'ö uëvajëjo. Mi böromo anugo gagore nugö'öjë'öho ja bogo eni javo'ajëjo. Röhu ëhi ë'ë'öho samae jianovo'i bövi bise'ö marohë'e ariböviehu God-hu muebejaje öri ari'ere va'iröhoho ëho anoji'e mae höjo. 25 Anoji'e mae höjamu heromo tiötiovoromo uavareje: Ëhi jië'öho no diehi'oromo maroho va'ëjarëjo. No ae aho'obëhe bogo eni javuajëjo. 26 Bogo eni javuajëjamu Iesuro ërimëhoromo uévadeje: Io'ajo. Jemë aëro jëvë'ëro bogo eni jëvajëjo. A'i God-hu mue aho'obëhe vaejë'öho hu eni höjo.

27 Ëhi uëvamu hegorovo Peter-ro ri'öromö Iesu uavadeje: Aveho gavëjo. Noro bövie bise'e nosiroho vuonugo'i jasi ijore ijore jijihë'e javuajëjo. Ëhuni no manaho rabe bae'ëjarëjo. 28 Rabe bae'ëjarëjamu Iesuro uévadeje: Ave jöho na jö mae uë'ië'ajëjo. Maja i'öho rue'iramu God-are A Maho nari nasi ihoö dö maro jio'iramu nasi röho mare hiromö nasi aribövioho muebejëvo'ëjöjo. Muebejëvo'iramu evare nasi ijoraje 12-ho jemëro na'ö gemu mae arëto göro göro raromöromö Israel rajo nasi agane gö gö 12 jabesi muoho mevo ga'a'arujëjo. 29 Ö ae rahu javue öe ma'ine vavue vëme aboji harihu'e ö sa'ae nasi iho hesi jöëni vuonugo'amo'i va'ë'öho ëhi jië'e ariböviohuro bövi mae baeromö ijönö ma-ioro'ioremu maro raromö'arujëjo. 30 Ëhi höjo röhu a ioro'iore aho'ö nuninö jiaruöho dejönö jioruomö'i a ioro'iore dejönö jiaruöho nuninö jioruomö'ajëjo.

20

Ariböviehu grape ö'i bajo mure va'oromö mu vaejamu mu arijo'ehu mana diehi bojëmade uhu jö Iesuhu majëhijadohoje.

1 Sa'a arijo'e aehu hesi mu hesi öri muebejadëhi ö'idöre hijaje A Böromöhu hesi öri ari'öho ëhi muebejaje höjo. Sa'a arijo'e ae gemuëro sue'ö va'ade höjo ae baejego jaburo hesi grape ö'i bajo mure va'oromö mue vaejehoromö manaho baeruomörohëgo. 2 Va'ö ae birohëvoromö uëvade höjo: Muoho vaejehorego noehu a bojëmijaruëhi ëhi jië'e ajivë'e ijo baje gemu majae gemu hesi muohuni bojëmi'iröjo. Bojëmi'iröjamu uavare höjo: Iae mae höjo. Iae mae höjamu rue mu arijo'ohuro hesi mure rëmö'öjade höjo. 3 Ëhi ë'ë'ëro majae 9 o'clock jiamu gavë'i vuonorö'ö va'oromö gavade höjo a ioro'iorohö mu rumö'e market-re ëma riravamu gëgorovo 4 uëvade höjo: Jemë'ö nasi muoro va'ö mue vaerëjo. Suvuoro mae dimino'e jiajëhi na ëhi bojëmi'ëjöjo. 5 Bojëmi'ëjöjamu muro va'are höjo. Ëhi'amu maja ririrohu'ö maja huotorovadevarohu'ö huro market-re vuonorö'ö va'oromö ae gö gö jöe gemuöho uë'i hijade höjo. 6 Ëhi ë'ë'ëro majae beva'ia'amu gavë'i market-re va'oromö gavade a ioro'iorohö riravamu gëgorovo uëvade höjo: Majae bövioho jemë rabëni muoho bogo ë'ë'e ëma riravemu riravarujëjo. 7 Uavare höjo: Aho moni muoho bogo bojamuijë'ëro ëhuni ma-riravarujëjo. Uëvade höjo: Jemë'ö nasi muoro va'oromö mue vaejehorëjo.

8 Ëhi ë'ë'ëro majae barëjamu gagorovo mu arijo'ohuro hesi mu muebejahaje aho uavade höjo: Mu aribövioho uëvego rue'irarëjo. Rovego suvuorohö bojëmime va'onëjo. Ijönö ro aevoromö mu vaejare

aribövioho urimo manaho bojëmiromom evaro va'oro urimo majae göre göre mu vaebe rovere aribövioho bojëmibe va'oromom ijo tugoho'ioho urimo ro mu aevoromom vaejare aribövioho bojëminëjo. ⁹ Èhi'amu majae beva'ia'amu ro mu vaejare ariböviohuro ajivë'e ijo baje gemu gemu baeromomade höjo. ¹⁰ Èhi baeromomamu gavë'i urimo ro mu vaejare ariböviohuro uvare höjo: No gö'oro döre bae'ejare uvare höjo röhu jabu'oro ajivë'e ijo bajoho èhi gemuho baeromomade höjo. ¹¹ Èhi gemuho baeromomomom mu arijo'oho birevoromom ¹² uaruomomade höjo: Ijo tugoho'i ro mu vaejare ariböviohuro majae ma-bisemu mue vae'i noro sisonuvamu muoho aevoromom majae ni'oro huë vavaeni'e muoho vaebe va'ojuvo hujeji jeniromom vuonugare höjo. Röhu jero jabumë bojëmijanëhi no'oro èhi gemuho bojamuijanuëjo. ¹³ Bojamuijanuëjamu rue mu arijo'ohuro ae gemu uavade höjo: Isiajo. Na bogo sisë'ioho vaejavode höjo. Ja'oro uehorovëjo. Na mamie'oro uavode höjo: Ajivë'e ijo baje gemu bojami'ejöjamu hegoro jero uevane höjo: Iae mae höjo. ¹⁴ Èhuni jasi suvorocho baeromom va'ëjo. Nasi nimoromom naehu ja bojamijodëhi ave ijo tugoho'i ro mu vaejehade aho suvoro èhi gemuho bojamijajëjo. ¹⁵ Nasi moniëro jïë'ëro naehu baeromom rabe rabe negajoho è'ë'ohoro èho na mae höjo o sisë höjo. Na suvoro'e huë baejë'e ae jevajëjo röhu jero rabëni èho uehorovoromom aho nue huodëganuëjo. Èhi uavade höjo. ¹⁶ Röhu uhu jö bëhoro èhi höjo. Dejonö jiaruoho nuninö jioruomom'i nuninö jiaruoho dejonö jioruomom'ajëjo.

Iesuhu guomoröhe jö urimo vae niö'i majëhijadoho ijönö röhu maho majëhijade jöhoje.

¹⁷ Iae Iesuro Jerusalem amom börömore ajiomom'i va'adeje. Örire va'oromom huro hesi ijoraje 12-ho rori'oro sö va'oromom örire uëbe va'adeje: ¹⁸ Aveho hehëjo. No Jerusalem amom va'aruëjo. Va'oro è raromomomom God-ro hesi èhi bamë'ëro hesi A Maho naro priest masijo jabesi övore Jew rajo jögoru öri röjëhijarue a jabesi övore va'iramom baejevo'aruëjo. Baejevoromom nasi jöho mevo garomom uvoromom'ajëjo: Nörö sisë'e aego guomom'a'ajëjo. ¹⁹ Guomom'a'ajëromom na baejevoromom sa'a göre jioromom rovere aribövi jabesi övore bojëmi'iramom baejevoromom sivegoromom hisuebijevevoromom korosire anego'iramom guomevo'ajëjo. Guomoromom majae niö'i gemu hesi uhure ri'ö'ejöjo.

James'oro John'oro jabuhu masije rirarovo'iröhego jabesi vëmehu Iesu ua gavade jöhoje.

²⁰ Èhi'amu iae Zebedee-are harihe niö'i James'oro John'oro jabesi vëmohuro jabumë hu'iraejëvoromom rovideje. Rueromom ague aho hioromom Iesu uavadeje: Na ja ajamuinëjo o bogajo. ²¹ O bogajamu hegorovo Iesuro uavadeje: Ja diehi nagajëjo. Diehi nagajëjamu uavadeje: Na negajëjo jaehu böröme namiromom muebejavuë'iroho jero uëvego ave nasi harihu niö'iohuro ö'oro jasi bëhire masije rirarovoromom göhuro jasi övo manö göhuro jasi övo adonö èhi ari'iröhego. ²² Èhi uavamom hegorovo Iesuro ö'oro ö'oro uëvadeje: Iae èhi höjo röhu jemëhu ue gevaruje jö hesi bëhoro jemë bogo gavë'e èma uevarujëjo. Na gavajëjo ajuo'e jovo sisëro ajuemanovo hesi jio'ego. Èhi jïë'e huë vavaeni bae'irarijoho na jemë'oro eni jëvajëjo. Eni jëvajëjamu uavareje: Iae no eni javuajëjo. ²³ Èhi uavamom Iesuro uëvadeje: Iae mae höjo. Na

ajuemi'iröhe jovo sisëhuro jemë'o ajuëmi'ajëjo. Röhu nasi bëhire övo manö o övo adonö ari'irarije jö uë'irodoho ëho bogo nasirehu höjo. Nasi Vavuehu a rahumëni uvoromo nugade röhoëho ë aho jaburemu nasi bëhiroho ari'a'aruëjo.

²⁴ Ëhi'amu Iesuare ijorajo ioro'ioere 10-ho jaburo hejare uvavamu: Ö'o ö'o Iesuare bëhire böröme rirarovo'i uvare höjamu hegorovo jabesi örire dë vörönimoruomadeje. ²⁵ Dë vörönimoruomamu gëgorovo Iesuro hesi ijorajoho aho'obëhe uëvadeje: Ruehëromo rovamu uëvadeje: Iae jemë'o gavarujëjo. Sa'a ioro'ioero rajo jabesi a masijoho jaburo jabesi aribövioho ruahö'öjëvoromo jabumëremu masije riravarue höjo. O jabesi bëhire riravaruhuro ëhi taemëvoromo jöe bojëmijarue höjo. ²⁶ Sa'a ioro'ioero rajohuro ëhi ë'arue höjo. Röhu jemë nadi ëhioho döroho bamorovorëjo. A'i jemesi ae gemu rahu böröme nami'i nimë'oho ë aho a ioro'ioero jemë ajëminövo'iröhe ae jio'a'ajëjo. ²⁷ O jemesi ae gemu rahu nunire jio'i nimë'oho hu a ioro'ioero jemesi mu vaejëhonövo'iröhe ae jio'a'ajëjo. ²⁸ God-are A Ma naehu a ajëmi'i rovodëhi ëhi ë'orëjo. Naehu rovode hesi bëhoho bogo aëro na ajëmi'irarijigo rueli a'i naro ae ajëmiromo nasi arijo'arije bojamirovoromo guomorovoromo ëhuro ae aho'obëhe sisëhu tövëvajoho jiovo rëmö'ö'irodëni ëhuni rovode höjo.

Iesuhu Jericho amo vuonugoromo va'i nuni sisë'e ae niö'i ajëmade jöhoje.

²⁹ Ëhi'oromo Iesumëro Jericho amoho nugo'i va'amu ae aho'obëhe rihimoruomadeje. ³⁰ Röhu nuni sisë'e ae niö'i öri ionire arijë'e jiareje. Ariromo hejare uvavamu: Iesuro rova'ajë uvamu hegorovo madarugo'o uvareje: [Bada] David-are ujoho böröme javaje noni vavaenimëjo. ³¹ Vavaenimëjamu hegorovo ae aho'obëhe jaburo birëgoromo uëvareje: Jöe vuonugohëjo. Jöe vuonugohëjamu hejë'i röhu maho darugo ma'o uvareje: Bada David-are ujoho böröme javaje noni vavaenimëjo. ³² Vavaenimëjamu Iesuro va'adoho vuonugo'i ë namiromo uëvadeje: Avehuro ruehëromo rovamu uëvadeje: Naro diehi ajëmijöro nëgajëjo. ³³ Nëgajëjamu uavareje: Bada ajamuego no nune dadovoromo uheriharëjo. ³⁴ Uheriharëjamu Iesuro jabumëni vavaenimoromo nunoho rëhëhadeje. Rëhëhamu ma-burëro uherihoromo hesi ijore va'areje.

21

Iesuhu Jerusalem mabëhe rovade jöhoje.

¹ Iae Iesumëro va'o Jerusalem bëhire va'oromo Olives Dahorure Bethphage amo'ere ajio suorovareje. Suorovoromo Iesuro ijorajoho niö'i rëmö'öromo ² uëvadeje: Arue jemesi nunörire amohuro va'ohëjo. Va'o hörö'i ga'a'arujëjo donkey-oho harihohu'o benugë'e jio'iramu. Benugë'e jiego jiovoromo hu'iraejëvo ruerëjo. ³ O aehu jö uëvë'iroho uarëjo: Badaro ave mioho nimo'ego ëhuni hu'iraejëvo va'aruëre. Ëhi ua'iramu iae ma-burëro uë'a'ajëjo: Ëhi ë'ohëjo.

⁴ Röhu ëhi ë'iröhe mu hesi bëhoho God-are surire jö jajivarëhi ëhi jioröhego. Jö God-aro baeromo majëhinövade ahuro uëvadeje:

⁵ Jemëro Zion amo rajoho ëhi uërëjo:

Gahëjo. Jemesi börömohuro jemesi örire rovajëjo.

Hu sanu'e aëro jië'ëro donkey döre hiromo rovajëjo.
Donkey hesi harihure hiromo rovajëjo.

⁶ Amo Iesuro hesi ijarahoho rëmö'öjumu va'oromo Iesuhu uëvadëhi ëhi ë'areje. ⁷ Ëhi'oromo ë donkey niö'ioho vëmohu'o harihohu'o hu'iraëjëvo rueromo niögoho jabesi dejore ruahu'amo bahijamu gatorovo Iesuro ë ajio hijadeje. ⁸ Hijamu ae aho'obëhe a ioro'iorohuro niögoho örire ahahobe va'i a ioro'iorohuro ijo rude tarivo'amoromo ahahobe va'areje. ⁹ Iesure nuninö va'oruomadohu'o dejonö rueruomadohu'o ma-darugo'o uvoruomadeje:

Ave aho David-are ujoho böröme vaeromo rovajoho mabëhëjo.

Ave aho Badare ihore rovajoho mabëhëjo.

God mabëhëjo.

¹⁰ Ëhi'amu Iesuro Jerusalem amore höröjumu gavë'i amo raje ae magonahe aho'obëhe tiötiövoromo uëvareje: Ëho rahuo höjo. ¹¹ Rahuo höjumu Iesu'o rueruomade ariböviohuro uëvareje: Ëaho Galilee sa'are Nazareth amore hiromo jö God-aro baeromo majahuijaje aho höjo.

Iesuhu God-are amo börömore va'oromo ë'ade jöhoje.

¹² Ëhi'amu Iesuro God-are amo börömore va'adeje. Va'i gavade aëro bövie bise'e imo'amamu rarovö'öjëvadeje. Rarovö'öjëvoromo gavade aëro sa'a göre göre jioromo rovare aribövi jabesi ijo bajoho ujuohoi' amo börömo hesi ijo bajoho i'imëmamu gëgorovo jabesi mu maratuhohuotovö'öjëhoromo ugo imo'amarue aribövi jabesi arëtohu'o huotovö'öjëhadeje. ¹³ Huotovö'öromomo uëvadeje: God-are surire jajivoromo uvë'e höjo: God nasi osaho aëro uvoruomajajëjo: Ëho God-are örire jö ato'iröhe osaho höjo. Ëhi uvë'e höjo röhu jemëro mu sisë ë'l'ëro ëhuro ave osaho vajiohu'e ariböviehu gurihirovarue juju gagoho va'ëne höjo.

¹⁴ Ëhi uëvamu nuni sisë'e hörü sisë'e aribövioho God-are amo börömore rueruomamu Iesuro avohëvadeje. ¹⁵ Avohëvamu gatorovo priest masijohu'o jögoru öri röjëhijarue ariböviohu'o ëho jaburo gavare Iesuro ëhi jië'e mu masijoho vae'amamu hejare asisö'ëro uvo'i arijavamu: Ave aho David-are ujoho böröme vaeromo rovajoho mabëhë uvoruomamu hegorovo dë vörönimoruomadeje. ¹⁶ Dë vörönimoruomoromo Iesu uavareje: Arue asisö'ëhu jö sisë uvoruomajoho na ja hejanuëjo o bogajo. O bogajumu hegorovo Iesuro uëvadeje: Io'ajo. Iae na hejajëjo. God-are jöho surire jajivoromo uvë'e höjo: God jero asisö'ohu'o asisö'o inino mahu'o avohëvë'ego jasi ihoho mabëhe uvoruomaje höjo. Ësurire jöho rabëni bogo avoho gavarije höjo. ¹⁷ Ëhi uëngoromo Iesuro ë rëmoromo Jerusalem amore jioromo va'oromo Bethany amore höröromomo vahie gemu ë hijadeje.

Mesehu bajo bogo raejoro Iesuhu uavade jöhoje.

¹⁸ Hijë'ëro sisonuvamu gatorovo Iesuro Jerusalem amore börömore vuonorö'ö va'i va'adeje. Örire va'amu hömadeje. ¹⁹ Hömamu va'ihö gavade mesoho öri ionire namijamu gatorovo bëhire va'oromo gavadeje bajoho bogojio'i ma-hano rudu'emu jiamu. Ma-hano rudu'emu jiamu gatorovo mesoho uavadeje: Ijoho nadi bajoho raenëjo. Ëhi uavamu gatorovo mesoho ma-burëro sahorijadeje. ²⁰ Sahorijamu gatorovo Iesure ijarahoho jaburo tiöromomo uavareje: Diehi'ego mesoho ma-burëro sahorijajëjo. ²¹ Sahorijajëjumu Iesuro

uëvadeje: Ave jöho na jö mae uë'ië'ajëjo. Jemë bogo uehore niö'i bae'irögoro God gemu mae uehorovë'oho naehu meso avohode ëhi jië'e mu vaejë'oho eni jëvo'ajëjo. Röhu bogo ëhemuoho vae'i ave dahoru uavë'oho: Ri'öromo va'o jovo börömore bu'örovonë uavë'oho iae ëhi jio'a'ajëjo. ²² O rabe rabe God ua gavë'oho mae uehorovoromo uvë'oho: God-ro ajemi'ajë uvë'ohuro ëhuro iae bae'a'arujëjo.

Jew rajo a masijehu Iesu bogo ma uehorovoromo darugoho dinö'e baejane hö uavare jöhoje.

²³ Ëhi uëngoromo Iesuro God-are amo börömore ajiomadeje. Ajiomoromo God-are jö bëhoho ae röjëhijadeje. Röjëhijamu priest masijohu'o a duvaho ömo'ömohu'o ëho jaburo rueromo uavareje: Jaehu God-are amo börömore hiromo mue gö gö vaejanuoho diehi jië'e daruge javoromo o raro darugoho bojamijë'ëro ëhi jië'e muoho vaejanue höjo. ²⁴ Vaejanue höjamu Iesuro uëvadeje: Nasi darugo hesi jö ue gevarujoho na'o jemë jöe gemu uë gë'ië'ajëjo. Jemëhu mana uevë'oho naro jemë uë'ejöjo: Na ëhi jië'e darugohuro muoho vaejaje höjo. ²⁵ John-hu bapataeto vaejavuonövdahö ë darugoho dinö'e baejade höjo. Na God-ro o ma-aëro darugoho bojamijë'ëro ëhioho ë'onövade höjo. Ë'onövade höjamu rue a masijohuro Iesu diehi mana ua'iröhe jöho jabesi mevoromo uarovareje: Noehu uavë'oho God-ro John darugoho bojamijade hö uavë'oho Iesuro uö'a'ajëjo: Ëhi jië'oho jemë rabëni John bogo ma uehorovarije höjo. ²⁶ O noehu Iesu ua'iröhoho: Ma-aëro John uavamu ë'ade hö ua'iröhoho röhu ae aho'obëhe juhuonëmiromo bogo ëhioho ua'ejarëjo ë hesi bëhoho jaburo uvoruomë'ëro: John hu jö God-aro baeromo majahuinövade ae hö uvoruomë'ëro. ²⁷ Ëhi uarovoromo Iesu uavareje: Jaehu uö gövuanue jö hesi bëhoho no dadivavujëjo. Dadivavujëjamu hegoroovo Iesuro uëvadeje: Ëhi jië'oho jemëhu uevariye jöho na'o bogo uë'ejöjo: Na ëhi jië'e darugohuro muoho vaejaje höjo.

Harihu niö'ihu diehi ë'are uhu jö Iesuhu jövdahöje.

²⁸ Röhu ave uhu jö heromo diehi uehorovarujoho majehirego na he'iröjo. Iae ae gemu hu harihe niö'i jëvade höjo. Harihe niö'i jëvë'ëro vavuohuro va'oromo murioho uavade höjo: Jue'i jaruvo grape ö'i bajo muoro va'oromo mue vaejehonëjo. ²⁹ Vaejehonëjamu muriohuro ri'öromo uavade höjo: Na bijönegajëjo. Bijönegajë uanugoromo röhu ijönö avoho uehorovoromo mue vaejaho'i va'ade höjo. ³⁰ Ëhi'amu vavuohuro va'oromo ijorajoho jöe gemuoho majahiromo uavade höjo: Muoro va'oromo mue vaejehonëjo. Vaejehonëjamu ijorajohuro uavade höjo: Apo iae na va'ejö uaromo röhu bogo va'ade höjo. ³¹ Ëhi jië'oho di ahuro vavuehu nimadëhioho vaejade höjo. Vaejade höjamu uëvareje: Muriohurajo. Muriohurajamu Iesuro uëvadeje: Ave jöho na jö mae uë'ië'ajëjo. Vajiohu'e tax baejarue ariböviohu'o önö'e jijiharue magonahohu'o ëho jaburo jemë iosirëmiromo urimo God-are aharire va'oromo raromego huro jabumë muebejëvaje höjo. ³² Rabëni hesi bëhoho John-ro jemesirire rovade höjo öri maho röjëhijego ga'irarijego. Rovamu jemëro hu bogo ma uehorovo'irögoro vajiohu'e tax baejarue

ariböviohu'o önö'e jijiharue magonahohu'o ëho jaburo hu mae uehorovoruomade hõjo. Mae uehorovamu jemëro ëho garomo rõhu bogo avoho uehorovoromo huotorovoromo John ma uehorovarije hõjo.

Mu ariböviehu a bõrõmo hesi õ'i bajo mu mueberomo sisë ë'are uhu jõ Iesuhu jõvadohoje.

³³ Rõhu uhu jõe gö'o majëhi'ië'ajoho hehëjo. Iae sa'a arijo'e ae gemuëro mure grape õ'oho bivo'amade hõjo. Bivoromo ë muoho buore iromo rova'o rojomoromo õ'i bajo sa'ijovorõhe guaho umoromo mu javue dõro vaejade hõjo hesi mu ahuro ajio ë hiromo muoho atovorõhego. Ëhi avohoromo gavade eni jiamu gagorovo ae uëvade hõjo: Na va'ejõjo. Jemëro nasi muoho muebejehorëjo. Mueberomo õ'i bajoho raeromo mavego nasiroho bahi'i ioro'ioroho jemesi ujuohorëjo. Ëhi uënuGOROMO ri'õromo va'o sa'a göro ë hijade hõjo. ³⁴ Sa'a göro va'oromo hijuvo gavade õ'i bajo urarue majaho dunovamu gagorovo hesi mu vaejharue aribövioho uëvade hõjo: Va'irarijoho mu muebejarue aribövioho uërego nasi õ'i bajoho i'imëmego ujuoheho ruerëjo. ³⁵ Ujuoheho ruerëjamu hegorovo va'are hõjo. Va'oromo suorovamu gëgorovo mu muebejarue ariböviohuro guduamëvare hõjo. Guduamëvoromo göho hisuebi'i göho ano bamo'i göho munëro vajamijamu guomade hõjo. ³⁶ Ëhi'amugo mu arijo'ohuro mu vaejharue ae gö'o rëmö'õjade hõjo mure va'orõhego. Urimo mu vaejharue ae gemu gemu rëmö'õjè'ëro rõhu evaroho ae aho'obëhe rëmö'õjade hõjo. Rëmö'õjamu va'oromo mure suorovamu gëgorovo mu muebejarue ariböviohuro urimo rueruomamu ë'arëhi ëhi sisë vaejëvare hõjo. ³⁷ Sisë vaejëvamu ijo tugoho'i mu arijo'ohuro uvade hõjo: Arue mu muebejarue ariböviohuro nasi harihoho garomo uvo'a'aruëjo: Nõruare harihe hõ uvoromo ëhuni mae uehorovo'aruëjo. Ëhi uvoromo nugö'õjamu mure va'ade hõjo. ³⁸ Va'o hörõjamu garomo uarovare hõjo: Arue rovaje ahuro hesi vavu hesi sionoho bae hesi hõjo. Ëhuni ë'ego ano bamoromo hesi sa'aho nosi bæjarëjo. ³⁹ Ëhi uarovoromo ë aho mure jiamu guduamoromo rori'o bijimo bu'õromo anamu guomade hõjo. Ëhi'are hõjo.

⁴⁰ Ëhi jië'oho mu arijo'ohuro mure rovë'iroho mu muebejarue aribövi jabesi õriroho diehi'ëvo'ajëjo. ⁴¹ Diehi'ëvo'ajëjamu uavareje: Sisë jioruomo'ego ijumëvo barëromo muoho a maho bojëmi'ajëjo jaburo mueberõhego. Mueberomo majae eni jiego õ'i bajoho uroromo hesiroho i'imamirõhego. ⁴² Ëhi uëvamu hegorovo Iesuro uëvadeje: Ave uhu jõho God-are surire jajivoromo uvë'e hõjo:

Munë javue vae'irõgoro munë gemu bijõnimoromo vuonugare hõjo. Vuonugaroho jaruvoho ë munëhuro javuoho nigemo'ego bibivoromo mae namijajëjo.

Hesi Bada God-ro ëhi ë'ade hõjo.

Ëho noro garomo uvarue hõjo: God-ro mu mabëhe ë'ë'e hõjo.

Ëjõ God-are surire jajivamu adaharijoho jemë diehi'oromo ë hesi bëhoho bogo avoho bæjarije hõjo.

⁴³ Ëhu'ëro jië'ëro naro jemë uëvajëjo: Jemëhu God-are aharire raromoromo hesi mu muebebe rovarije muoho God-ro baeniëhiromo ae gö bojëmi'iramu jaburo hesi aharire raromoromo ë muoho mueberomo

rae avoho'aruëjo. ⁴⁴ [Röhu aehu ë munë döre bejë'oho ahoro ahoro bae'a'ajëjo. O ë munëhu a döre berovë'oho aho sa'ijovo barë'ajëjo.]

⁴⁵ Iesuro uhu jöe gö gö ëhi jövamu hegorovo priest masijohu'o Pharisee ariböviohu'o ëho jaburo garomo uvareje: Nosi jöe jöväjëromo ⁴⁶ guduamo bava'jë'oromo uvareje: Ae aho'obëhe uvoruomaje höjo: Iesu hu jö God-aro baeromo majahuijaje ae hö uvoruomaje hö uvoromo jabumë juhuonëmiromo vuonugareje.

22

Sörö bamamu aehu juahamare uhu jöhoje.

¹ Iae Iesuro röhu maho uhu jöe gö gö ae majëhijadeje. ² Majëhiromo uëvadeje: God-hu böröme namiromo muebejëvaje öroho aviëhi höjo. Sa'a a böröme gemuëro söröe baejade höjo hesi harihohuro masuromo iröhego. ³ Ëhi ët'ë'ëro hesi mu vaejharue aribövioho uëvade höjo: Va'irarijoho rueröhego naehu mami'e uëvode aribövioho uërego rue'irarëjo. Rue'irarëjamu uëvamu bijönimoruomade höjo. ⁴ Bijönimamu hegorovo sa'a a börömohuro mu vaejharue a ioro'ioroho uëvade höjo: Söröre rueröhego uëvodoho ëhi uërëjo: Jöe hehëjo. Nasi söröho eni jië'e höjo. Nasi mi masije ma-mabëhe naehu ma-je mio'amaje sanuovë'e mioho bjuëmoromo buvomoromo bahijë'e jevajëjo. Bövie bise'e eni avohë'e jevajëjo. Ëhuni rovego no ë söröho i'irarëjo. Ëhi uërëjo. ⁵ Ëhi uëvamu jöho bava'oromo majëhijamu ë ariböviohuro bogo ejëhë'e öre gö öre gö va'are höjo. Göëro hesi mure va'ade höjo. Göëro hesi moni muro va'ade höjo. ⁶ Ioro'iorohuro ë anu rovere aribövioho guduamëvoromo mu sisë vaejëvoromo muo'amare höjo. ⁷ Ëhi'amu ë sa'a a börömohuro dë vörönimade höjo. Dë vörönimamu muorovo aribövioho rëmö'öjamu jaburo ë anëgare aho muo'amoromo jabesi amoho bue'öjëhare höjo. ⁸ Bue'öjamu gagorovo a börömohuro hesi mu vaejharue aho uëvade höjo: Söröho eni jië'e höjo. Röhu rueromo sörö ihë uëvamu juahemijare ariböviehu rueromo sörö ijë'oho sisë höjo. ⁹ Ëhuni öri masijoro va'irarijoho va'oromo ae rahu rahu birohëvë'oho uëvego söröro rue'irarëjo. ¹⁰ Rue'irarëjamu hegorovo rue mu ariböviohuro örire va'oromo a sisëhu'o a mahu'o birohëvoromo aho'o sö ujuoho rovere höjo. Rueruomamu sörö osaho rarovade höjo.

¹¹ Rarovamu a börömohuro ë aribövioho gë'i osare rovade höjo. Rue'i gavade höjo ae gemu masuvarue sörö i'i io'amarue niögoho bogo ba'amë'e ma-hijamu. ¹² Ma-hijamu gagorovo uavade höjo: Isi-ajo. Masuvarue niögoho bogo ba'amë'e ja diehi'oromo ave osaroho rovine höjo. Osaroho rovine höjamu ruhuro jörumoraëjade höjo. ¹³ Jörumoraëjamu rue a börömohuro ri'öromo mu aribövioho uëvade höjo: Övo hörü'oho tövo'amoromo babu'öhego amonö ramoramore va'o hijajo. Ëdirö'ore ae aho'obëhe nierusuburu'e bamoromo ane ja'iho vuogigimoruomo'ajëjo. ¹⁴ Ëhesi bëhoho God-ro ae aho'obëhe ruejëro uëvaje höjo. Röhu ae ma-gemu gemu hesinö jëvojöro baejëvaje höjo.

Iesuhu guaro berovojöro aehu tax jö ua gavarohoje.

¹⁵ Ëhi'amu iae Pharisee ariböviohuro va'oromo jöe atoromo uarovareje: Ë'ego no Iesu sareramego hu guaro berovo'irajo. ¹⁶ Ëhi atonugoromo jabesi ijore ijore jijiharue a ioro'iorohu'o Herod-are

aribövi ioro'iorohu'o rëmö'öjama va'oromo Iesu sarerisareriamiromo uavareje: Tisajo. Iae no gavarue höjo ja a mae javè'ëro God-are mu örohemo röjahuijego. O aho bogo juhuonëmijego. Èhesi bëhoho jero no göromo ae böröme o bise'e javuajëromu jöe gö gö bogo röjahuijanue höjo. ¹⁷ Èhuni ave jöho ja diehi uehorovanuoho majahuijego no hejarëjo. Rome a börömhuro nosi sa'aho muebejego noro hu tax bojämijarue höjo. Noehu èhi è'aruoho na èhuro nosi jögoroho aharue höjo o bogajo. ¹⁸ Bogajamu Iesuro gëromo uvadeje: Jabumë sisë vaejevo'i ue gevaruëromu uëvadeje: Sareri aribövie jëvájëjo. Jemë rabëni na bijioho gevarujëjo. ¹⁹ Tax a bojëmijaruje ijo bajoho röjehihego na gavöjo. Gavöjama ijo bajoho barovareje. ²⁰ Barovamu garomo uëvadeje: Aveho rahuare nu ano'ohu'o ihohu'o jajivë'e höjo. ²¹ Jajivë'e höjama uavareje: Rome a börömo hesi höjo. Rome a börömo hesi höjama uëvadeje: Èhuni Rome a börömo hesiroho èho hesi öroro bojami'i God-aroho èho God-are öroro bojaminövorëjo. ²² Èhi uëvamu hegorovo tiöjëvamu Iesu è nugo'i va'oruomadeje.

Iesuhu guaro berovojöro vuovë'e ariböviehu ri'öruomoröhe jö Sadducee ariböviehu hu ua gavarohoje.

²³ Va'amamu gagorovo majae gemuore Jew rajo a masijo ioro'iorohuro rovareje. Jabumë Sadducee jö uehorovarue aribövie jioruomadeje. Sadducee ariböviohuro uehorovoromo uvoruomajeje: A vuovë'oho ijonöho bogo ri'ö'amo'i ma-ioro'iore gemu vuovo'ajëjo. Èhi uvoruomaje ariböviohuro rueromo Iesu guaro berovojöro sarerisareriamiromo uavareje: ²⁴ Tisa Moses-ro jögore jajivoromo uövuë'e höjo: Aboji harihu'o rumo'e vuovego diehi è'iröhe öroho aviëhi höjo. Aehu vaboro masuromo vaboroho aboji harihu'oho bogo vaejë'e baruehu guomo'i vaboro nugë'oho hesi öhuro vuojiroho masuromo èhuro guomade ö hesi ihoro ujoho vaejaho'ajëjo. Moses-are jögoroho èhi höjo. ²⁵ Èhi jië'ëro iae ae aho'obëhe 7 ma-ö ömo'ömëremu nosirire raromare höjo. Raromoromo muriohuro magonahoho masuvade höjo. Masuromo vaboroho aboji harihu'oho bogo vaejë'e baruoho guomade höjo. Guomamu hesi vaboroho dorue hijamu gagorovo ö göhuro vuojiroho masuvade höjo. ²⁶ Masuromo guomade höjo. Ö ömo'ömo ioro'ioroho èhi gemuoho è'obe rovare höjo. Ö ömo'öme 7 jabuhu è magonahe gemuoho masube rovaroho è magonahoho è aboji harihu'oho bogo vaejë'e aho ma-vuovëvobe rovade höjo. ²⁷ Vuovobe ruejuvo barëjama ijo tugoho'ioho è magonahoho hu'o guomade höjo. Èhi'are höjo. ²⁸ Èhi è'arohuni èhuni ave jöho no ua galië'aruëjo. Jero uvanue höjo: Vuovoromo ri'ö'ejarëjo. Èhuni vuovë'e ariböviehu ri'öruomoröhe majaroho ae 7 höjo röhu è magonahoho di ahu'o hi'a'ajëjo. Barue aho'obëhe masuvë'ego èhuni uavaruëjo.

²⁹ Èhi uavamu hegorovo Iesuro uëvadeje: Bogajo. God-are surire jöhu'o huhu mu vaeröhe darugohu'o jemë bogo avoho gavarujëro sisë'i uehorovoromu ue gevarujëjo. ³⁰ Èhesi bëhoho vuovë'ëro ri'öruomo'iröhe maja rovë'iroho vaboroho baruoho bogo masurovo'i aneraehu ö'idöre ma-raromaruëhi èhi raromo'aruëjo. Èhuni è magonahehu di ahu'o hi'iröhe jö ue gevarujoho bëhi rumo'e höjo. ³¹ Èjöho jemëro uvaruje höjo: Vuovë'e ariböviehu ri'ö'iröhe jöho sareri jöe höjo.

Ëho bogo sareri jöehu jio'i jö mae höjo. Ëhesi bëhoho vuovoromo ri'ö'iröhe jöho God-ro jemëni jövamu hesi surire jajivoromo uvë'e höjo: ³² Na Abraham Isaac Jacob ëhi muebejëvaje ae jevajëjo. Jemë rabëni ë jö hesi bëhoho bogo avoho baejarije höjo. God-hu Abraham Isaac Jacob muebejëvaje jö hesi bëhoho jabumë vuovoromo bogo ioro'ioremuoho barë'i va'o raromego muebejëvaje höjo. God bogo vuovoromo ioro'ioremu barëjë'e aribövioho muebejëvo'ibejajo. A'i hu vuovoromo va'o raromarue aribövioho iae muebejëvaje höjo. ³³ Iesuro Sadducee aribövioho ëhi uëvamu ae aho'obëhe heromo jöe barëjëvadeje.

God-hu bojamuade jöho diho börömoho jiajoho aehu Iesu ua gavadohoje.

³⁴ Ëhi'amu Pharisee ariböviohuro hejare uvavamu: Iesuro jö mae jövamu ëhuro Sadducee aribövioho jö mana majahi'iröhoho bogohö uvavamu hegoro gagovorovareje. ³⁵ Gagovorovonugoromo Jew rajo jögoru öri röjëhijaje ae gemuëro Iesure dëho bijioho ga'irögoro ri'öromomo uavadeje: ³⁶ Tisajo. God-hu bojamuijade jögore aho'o jio'amajoho di jöho börömoho höjo. ³⁷ Börömoho höjamu uavadeje: Jasi dë vövöbajö'e aru'ahe uehore aho'obëhe Bada jasi God ma-hu gemu bojaminëjo. ³⁸ Ëho jö börömo börömoho jië'ego ëho nuniroho höjo. ³⁹ O ë jö hesi bëhirohu'o iae gemuoho höjo. Jaehu jasi arijo'arije rajahirovanuëhi jasi ae gemuoho ëhi rajahinëjo. ⁴⁰ Dë vövöbajö'e aho'o God bojami'irane jöhu'o jasi ae gemuoho rajahi'irane jöhu'o bëhoho jëvajëjo. God-are surire jö Moses'o jö God-aro baeromo majëhinövare a ioro'iorohu'o jajivo'amaroho ëho ado sirino'o ho jio'amajëjo.

Böröme namiromomo ajamuaje a hesi jö Iesuhu röjëhi'i uë gëvadohoje.

⁴¹ Iae Pharisee ariböviohuro gagovoruumamu gavë'i Iesuro uëvadeje: ⁴² Böröme namiromomo ajëmi'iröhe a hesi jöho jemë diehi uehorovarujëjo. Hu rahuare ujoho höjo. Uavareje: Hu David-are ujoho höjo. ⁴³ David-are ujoho höjamu uëvadeje: Ëhi jië'o ho God-are Aru'ahoho rabëni uavamu David-ro böröme namiromomo ajëmi'iröhe aho Bada uavade höjo. ⁴⁴ Ëhesi jöho David-ro God-are surire jajivoromo uvë'e höjo: God Badaro nasi Bada uavade höjo:
Nasi övo manö rojo hijego
ja'o muorovarue aribövioho naro ruahö'öjëvego
hörëro vijuvo taemo'amo'irane höjo.

⁴⁵ Ëhesi bëhoho böröme namiromomo ajëmi'iröhe a hesi jöho David-ro jajivoromo uvë'e höjo: Bada höjo. Bada hö uvë'e jiaje ëhuni nadi uvorëjo: Böröme namiromomo ajamui'iröhe aho ma-David-are uje höjo. ⁴⁶ Ëhi uëvamu aehu Iesu mana ua'iröhoho bogo eni jëvadeje. Bogo eni jëvamu ijönö jöe gö gö ua ga'ië'aroho juhuonivoromo vuonugareje.

23

Pharisee ariböviohu'o Jew rajo jögoru öri röjëhijarue ariböviohu'o ëho jabuhu sareri'e mu vaejaruëhi aehu bogo ëhi ë'iröhego Iesuhu jövadohoje.

¹ Ëhi'amu Iesuro hesi ijorajo ömo'ömohu'o a ioro'iorohu'o aho'obëhe uëvadeje: ² Jew rajo jögoru öri röjëhijarue ariböviohu'o Pharisee ariböviohu'o ëho jaburo Moses-are sionoho baejë'e höjo. ³ Moses-are sionoho baejë'e jëvaje ëhuni mu jö rabe rabe uëvë'o ho ejëhoromo ëhi

vaenövorëjo. Al'i jabuhu ömaruëhioho nadi ëhioho ömorëjo. Rabëni hesi bëhoho jö majëhijaruëhioho muoho bogo ëhioho vaejarue höjo. ⁴ Aehu i'u'e inömo ujuoho va'oruomojöro buahore bahijëhoromo tövëhoromo va'ego bogo ajëmiromo övo namehu vitu banigojiomëharuëhi ë Pharisee ariböviohu'o jögoru öri röjëhijarue ariböviohu'o jaburo ëhi ë'arue höjo. I'u'e muoho aho'o ae bojëmiromo bogo mae bogo ajëmi'i ma-nunëremu gëvarue höjo. ⁵ Jabu mu rabe rabe vaejë'o'oho aëro gëjörö ma-döhemu vaeruomaje höjo. Ëhesi bëhoho jabumëro nimoruomaje höjo aëro gëromu uvoruomoröhego: Jabumëremu God mabëhe uehorovoruomaje höjo. Aëro ëhi uvoruomoröhego nëgego God-are jö'e suri surioho maua gagore bahiromo övo ahore varijore muoho taemoruomaje höjo va'orahoro jio'amego aëro garuomojöro. O God-are örire jö ato'i io'amarue niögure ö'i ëgobövie be io'amaruomaje höjo va'orahoro jio'amego aëro garuomojöro. ⁶ O sörö i'i va'ë'o'oho o God rajahjarue os-are va'ë'o'oho a masijehu raromaruire ë va'o raromo'i nimarue höjo. ⁷ O imo'amaruire va'ë'o'oho nimarue höjo ae aho'obëhe uvoruomoröhego: Jabumë a masijëro jijihajëromu rajëhiromo jejëmiruomoröhego. O nimarue höjo aëro jejëmiromo uëröhego: Tisajo. ⁸ Röhu ae göehu jemë döre bamëvoromo uëvë'o'oho: Tisa uëvë'o'oho ëhi jië'o'oho sisë höjo rabëni hesi bëhoho jemë ö ömo'ömëremu jëvo'i jemesi Tisaho na gemu jevë'ego. ⁹ O ave sa'are raromaru ariböviohu'o nadi döroho bamëvoromo uërëjo: Apajo. Ëhesi bëhoho ae gemu ö'idöre hijajoho ëho iae jemesi Vavu Börömo höjo. Ëhuni ëhi jië'e jöho nadi uërëjo. ¹⁰ O ae göehu jemë döre bamëvoromo uëvë'o'oho: Simano vaejanue aho javajë uëvë'o'oho ëhi jië'o'oho sisë höjo. Ëhesi bëhoho jemesi Simano Vaejaje Aho ma-gemu jevajëjo böröme namiromo ajëmijaje ahuro jevë'ëro. ¹¹ Al'i a masije jemesirire jioruomajoho ëhi jië'e ariböviohu'o mu ajëmi'iröhe aribövie jioruomajëjo. ¹² Ae rahu sivu uehorovoromo döre bamorovë'o'oho hesi ihoho abue'a'ajëjo. O ae rahu ba'obuerovë'o'oho hesi ihoho döro ajiomajëjo.

Pharisee ariböviohu'o Jew rajo jögoru öri röjëhijarue ariböviohu'o sisëre va'iröhe jö Iesuhu jövadohoje.

¹³ Vaevë'e jögoru öri röjëhijarue ariböviohu'o Pharisee ariböviohu'o jemë ma-döëremu muoho ömarujëro sisërëjëvo'ajëjo. Ëhesi bëhoho God-hu böröme namiromo muebejëvego hesi aharire raromoruomajiröhe öroho tugohëharue höjo aëro ë va'o raromojöëni. Jemë God-are ahariroho bogo va'o raromo'i nimarue höjo. O ae göehu God-are aharire va'o raromajia'amu gëvë'o'oho ahëvarue höjo.

¹⁴ [Vaevë'e jögoru öri röjëhijarue ariböviohu'o Pharisee ariböviohu'o jemë ma-döëremu muoho ömarujëro sisërëjëvo'ajëjo. Ëhesi bëhoho magonaho doru jabesi bövioho bise'o'oho ëma ujuohëharue höjo. Ëma ujuohëhoromo sarerivoromo pari ëgobövie jaguvarue höjo aëro gëromu uvojöro: Mu mae vaejaruëjo. Ëhi jië'e sareri'e muoho vaejarujego ëhuni God-ro i'u börömo mae bojëmi'ajëjo.]

¹⁵ Vaevë'e jögoru öri röjëhijarue ariböviohu'o Pharisee ariböviohu'o jemë ma-döëremu muoho ömarujëro sisërëjëvo'ajëjo. Ëhesi bëhoho jemëro jovo göre göre sa'a göre göre ae dinëmibe va'aruje höjo ma-ae gemuëro hesi muoho vuonugo'i Jew rajo muoho baeröhego. Ae

dinēmibe va'oromo gavaruje aho jemesi jōho ejēhoromo Jew rajo mu baejamu gavē'oho jemēro ē aho mu sisē rōjahijego mae hōromo vaeromo jemēhu sisē ē'oromo vēni'e ōrire va'arujoho ē ahuro jemē iosirēmiromo sisē bōrōmo bēhe ē'oromo vēni'e ōrire va'o hesi hōjo.

¹⁶ Vaevē'e nuni ramoramovē'e aribōvi jemēhu ae gō ōri rōjēhi'iē'arujoho sisērējēvo'ajējo. Ēhesi bēhoho jemēro ae ēma majēhiromo uēvaruje hōjo: Ae rahu darugo'e jō uvo'iē'oho God-are osa bōrōmo hesi iho uvoromo ae uēvē'oho: Na mue ēhi ēhi ē'ejō uēromo rōhu mu bogo vaejē'oho iae hesi hōjo. A'i God-are osa bōrōmore jio'amaje gold hesi iho uvoromo ae uēvē'oho: Na mue ēhi ēhi ē'ejō uēvē'oho iae ē muoho vae'a'anuējo. Bogo sarerivo'anuējo. ¹⁷ Nune ramoramovoromo simane sisē'i uehorovē'e aribōvie jēvajējo. Ēhi majēhijaruje hesi bēhoho nani jemēro uvaruje hōjo: God-are osa bōrōmo hesi ihoho bise'e jio'i God-are osa bōrōmore jio'amaje gold-ho iho bōrōme hōjo. Rōhu ē gold-ho bogo God-are osa bōrōmoroho jio'amo'ibejajo bogo God-are gold maho jio'amo'ibejajo. A'i ē gold-ho God-are osa bōrōmore jio'amē'ēro ēhu'ēro ēho gold maho hōjo. Gold-huro bogo God-are osa bōrōmoho iosiramiro mo iho bōrōmoho jio'i God-are osa bōrōmo hesi ihohuro gold ihoho iosiramiro mo bōvioho jiaje hōjo. ¹⁸ O jemēro jōe gō ēma majēhiromo uēvaruje hōjo: Ae rahu darugo'e jō uvo'iē'oho God-are maratu hesi iho uvoromo ae uēvē'oho: Na mue ēhi ēhi ē'ejō uēromo rōhu mu bogo vaejē'oho iae hesi hōjo. A'i God-are maratu dōre bahijahare suvuro hesi iho uvoromo ae uēvē'oho: Na mue ēhi ēhi ē'ejō uēvē'oho iae ē muoho vae'a'anuējo. Bogo sarerivo'anuējo. ¹⁹ Nuni ramoramō'e aribōvie jēvajējo. Nani jemēro uvaruje hōjo: God-are maratu hesi ihoho bise'e jio'i God-are maratuore jio'amaje suvuroho iho bōrōme hōjo. Rōhu ē suvuroho bogo God-are maratuoro ho jio'amo'ibejajo bogo God-hu ujuoho'irōhe suvuro maho jio'amo'ibejajo. A'i ē suvuroho God-are maratuore jio'amē'ēro ēhu'ēro ēho suvuro maho hōjo. Suvurohuro bogo God-are maratuoho iosiramiro mo iho bōvioho jio'i God-are maratu hesi ihohuro suvuro ihoho iosiramiro mo bōvioho jiaje hōjo. ²⁰ Aehu darugo'e jō ato'iē'iroho God-are maratu hesi iho darugo'o majēhijē'oho ē hesi bēhoho bogo maratu hesi ihohemu uvo'i maratuore jio'amaje suvuro hesi ihohu'o uvoromo ē'arue hōjo. ²¹ O ae rahu God-are osa bōrōmo hesi iho darugo'o majēhijē'oho ē hesi bēhoho bogo osa hesi ihohemu uvo'i osare hijaje A hesi ihohu'o uvoromo ē'arue hōjo. ²² O ae rahu ō'idō hesi iho darugo'o majēhijē'oho ē hesi bēhoho ō'idōre jiaje God-are rōho hesi ihohu'o ē hijaje a hesi ihohu'o uvoromo ē'arue hōjo. Ēhuro darugo'o majēhijaruje hōjo.

²³ Vaevē'e jōgoru ōri rōjēhijaruje aribōviohu'o Pharisee aribōviohu'o ma-dōēremu muoho ōmarujēro sisērējēvo'ajējo. Jemēro jemesi i jōgoru e avohoromo i'o buarohoromo ijarue rihu'e oso harihu harihue gō gō garue gō gō mevoromo 10 10 bahibe va'oromo gemu gemu God suvuro bojamijaruje hōjo. Ēhi jiē'e jōgoru ininoho ejaho avoharuje hōjo. Ēhi jiē'oho iae mae hōjo. Nadi vuonugorējo. Rōhu ēho ma-jianovo'i jō ioro'ioroho masijo jiajoho ēho bogo uehorovaruje hōjo. A ma-mae vaejēvo'irarije muoho a huē baejēvo'irarije muoho ahorire vaejēvo'irarije muoho ēho rumonimaruje hōjo. Nadi rumon-

imo'ibejarijëjo. ²⁴ Majo majo biseharihehu jemesi jovore beva'ë'oho io bu'öromo jovoho il'i majo börömo börömoho bogo avoho gav'e manimu'öjaruje höjo. Jö masijoho bogo uehorovo'i ma-jö ininohemu uehorovaruje höjo. Èhuro nunoho ramoramovëvego öroho sisë'i röjehijaruje aribövie jëväjëjo.

²⁵ Vaevë'e jögoru öri röjehijaruje ariböviohu'o Pharisee ariböviohu'o ma-döeremu muoho ömarujëro sisërëjëvo'ajëjo. Jemë hevöe enatue dönöhemu u'o'amaruje höjo. Gagonöho ae gö jabesi ie jove vajiohëro ujuohoromo aegë'ëro irijiomu'amë'e höjo. Èhu'ëro dönöho aje jio'i gagonöho va'inumu'e jio'amajëjo. Jemesi mu sisëho ëhi jianovajëjo.

²⁶ Pharisee jemë ae gemu gemu nuni ramoramo'e ae jëväjëjo. Urimo ae gö jabesi iohu'o jovohu'o vajiohehu ujuohoromo hevöre bahiromo enatuore oteharujoho vuonugorego hevö o enatu gagoroho va'inumoho bogojio'irajo. Èhi ë'ë'oho jemesi hevöhu'o enatuohu'o döhu'o uhohu'o ma-mae jio'amo'ajëjo.

²⁷ Vaevë'e jögoru öri röjehijaruje ariböviohu'o Pharisee ariböviohu'o jemë ma-döeremu muoho ömarujëro sisërëjëvo'ajëjo. Jemesi jöho uhu'e uë'ië'ajëjo. Vuovë'e sino bahi'amarue munëho aëro ajivë'e osëro buejaho'amarue höjo nu ano'e mae jio'amoröhego. Buejaho'amego dönöho ajivë'e mabëhe jio'amo'i gagonöho vuovë'e a jabesi ijo'ahohu'o sagohohu'o èhuremu jio'amajëjo. Jemë ëhi jië'e jëvanovajëjo. ²⁸ Döhemu mae jëvego aëro gëromo uvoruomaje höjo: Jemë a mae jëväjëjo. Al'i jemesi uhoho sareri sareri'e mu sisëmu vaejaruje jëväjëjo.

²⁹ Vaevë'e jögoru öri röjehijaruje ariböviohu'o Pharisee ariböviohu'o ma-döeremu muoho ömarujëro sisërëjëvo'ajëjo. Jö God-aro baeromo majëhinövare aribövi jabesi sino guavo'amare huoho avoho'amaruje höjo. Mu mae vaejare a mami jabesi huoho avohoromo muebejaruje höjo. ³⁰ Avohoromo mueberomo jemë uvaruje höjo: Nosi hijo miono'ehu raromare majaroho evaroho no'o javuo'ibejajo no jabumë bogo ajëmiromo God-are jö majëhijarue aribövioho muo'amo'ibejarëjo.

³¹ Iae mae-ëjo. Èhi atarujoho ëho jemëro huruoho majahuiromo uöromo ë'arujëjo: God-are jö majëhinövare a muo'amare aribövi jabesi ujo ömo'ömëro javuë'ëro jabesi öre gemuore jijiharue aribövie javuajëjo. ³² Jemë ëhi jië'e aribövie jëvë'e jiaje èhuni jemesi hijo miono'ehu mu sisë aevoromo vaebe rovarëhi jemesi nimarujoho jemë'o ëhi jië'e muoho vaebe jijihorëjo. Na ë hesi jöho bogo uë'ejëjo.

³³ Sigobe jëvo'amajëjo. Sigobu aboji harihu'e jëvo'amajëjo. Èhi jië'e mu vaejë'oho diehi'oromo vënoho garaedivorëjo. ³⁴ Èhuni aveho hehëjo. Jö God-aro baeromo majëhinövö'iröhe aribövioho simano ma'e aribövioho jö röjëhinövö'iröhe aribövioho Iesu naro rëm'ö'iramu ö'oruomo'ajëjo. Ö'iramu jemëro ioro'ioroho muo'amo'arujëjo. O korosire ano taemo'amo'arujëjo. Ioro'ioroho God rajahijaruje osare osare hisuebi'amo'arujëjo. O amo göre jio'iramu amo göre siho ujuoho va'onövö'arujëjo.

³⁵ Èhi ë'iramu èhuni ma-maemu jië'e aribövi aehu muo'amobe rovere ë hesi i'uhoho jemesi örire rue'a'ajëjo. Aevo'ioho aëro Abel a mae anoromo a ma ioro'ioroho muo'amobe ruejuvo ro ijo tugoho'ioho jemesi hijo miono'ohuro Barachiah-are harihe Zechariah anare höjo. God-are osa börömoho numëhi jio'i God-are suvuoro bahijarue maratuhoho ruhëhi jiamu Zechariah ë ririre anare höjo. ³⁶ Ave

jöho na jö mae uë'ië'ajëjo. God-are aribövi ëhi muo'amobe rovare ë hesi i'uoho aho'obëhe ave jaruvore raromaruje aribövioho jemëni rue'a'ajëjo.

Iesuhu Jerusalem amo rajëni vavaenimade jöhoje.

³⁷ Vaevë'te Jerusalem amo rajohumë jemëro jö God-aro baeromo majëhijarue aribövioho muo'amaruje höjo. God-hu jemëni rëmöl'øjaje aribövioho munëro vajëmijaruje höjo. Kököröko vëmehu harihu vivoju uhure nugo'amoromo diehehu aegëharuëhi naro jemë ëhi gagovëvoromo gemuore rëmo'i nimo'i hijode höjo röhu jemëro bijönimarije höjo. ³⁸ Èhuni ave jöho hehëjo. God-ro jemesi amoho vuonugego jemesi sivue jëvo'ië'ajëjo. ³⁹ Naro jemë'o hiromo va'iramu jemë nasi nu ano'ocho bogo ga'a'arujëjo hujeji na vuonorö'ó rue'iramu evare avoho geromo nasi jöho majëhiromo uvo'a'arujëjo: Badare ihore rovajoho mabëhëjo. Èhuremu uehorovorëjo.

24

Aehu God-are amo börömo dadovoruomo'iröhe jö Iesuhu jövadohoje.

¹ Èhi uëngoromo Iesuro God-are amo börömore jioromo va'amu gavë'i hesi ijorajo ömo'ömohuro ro bihoromo God-are amo hesi javue gö gö röjahi'amareje. ² Röjahi'amamu Iesuro uëvadeje: Ave öri ari'ocho aho'o jemë iae gavarujëjo. Röhu aveho na jö mae uë'ië'ajëjo. Ave munë javuoho aho'obëhe aëro dadovoruomo'iramu munëho ahoromo sa'aro ruvebi barë nahonahovo'ajëjo.

Huë vavaeni börömo rueröhe jö Iesuhu majëhijadohoje.

³ Èhi ë'ë'ëro Iesuro Olives Dahorure ajio hijadeje. Hijamu hesi ijorajoho jaburo sivue ajio hu'o raromoromo uavareje: Ave jöho majahuego no hejarëjo. God-are javu masijehu rireromo'iröhego uövuanoho ëho divare jio'a'ajëjo. O no mu rabe garomo uvo'ëjarëjo: Jero rue'ië'anuëjo. Rovego ave sa'aho bövioho bise'oho barë'ië'ajëjo.

⁴ Barë'ië'ajëjamu hegorovo Iesuro uëvadeje: Gavë'iajo. Aëro sarerëmi'iramu guaro rireromëvo va'a'ajëjo. ⁵ Ae aho'obëhe rueromo sarerëmiromo uë'a'aruëjo: Nöruare ihoro rovajëjo. God-hu uevë'ëro böröme namiromo ajëmi'irode aho na jevajëjo. Èhi uëromo ae aho'obëhe sarerëmi'iramu uvo'a'aruëjo: Mae-ëromo guaro rireromo'ajëjo. ⁶ Röhu he'a'arujëjo muorovo jöe ruenövo muorovonövo'iramu he'a'arujëjo. Èhi hejë'oho bogave gemu juhuonivo'irarijëjo. Öre gö bogojië'ëro ëhi jië'e mu sisëho iae jio'a'ajëjo. Röhu sa'aho bövioho bise'oho evaroho bogo barë'i hesi majae göro jio'a'ajëjo. ⁷ Sa'ae göëro göhu'o muorovonövo a masijo ioro'iorohuro ioro'iorohu'o muorovonövo'aruëjo. Sa'ae gö gö iruno'e bogojio'ajëjo. Sa'ae dinö'e dinö'e jiajoho hijiohijiovo'amo'ajëjo. ⁸ Èhi jië'e huë vavaenoho rue'iramu mu sisëho bogo burëroho barë'i magonahehu aevoromo raho'i hara'uajëhi ëhi aho aevoromo huë vavaene börömocho baëve va'oruomo'ajëjo.

⁹ Èhi'o'iramu evare aëro jemë guduamo ujuohëvo va'o a masijo jabesi övore bojëmi'aruëjo jaburo huë vavaene bojëmi'iröhego. O muo'amëvo'aruëjo. Sa'ae dinö'e dinö'e raromaruje aribövioho aho'obëhe jaburo uvoruomo'ajëjo: Jemëro na uehorovevaruje

hö uvoromo nue huodëgoruomol'ajëjo. ¹⁰ Èhi'o'iramu evare ae aho'obëhe nasi örire mae uehorovevaruoho vuonugol'i mue gö gö uehorovoruomol'ajëjo. Aemo'aemohuro aemo'aemoho sarerisareriëmiromo ae gö jabesi övöre bojëmi'aruëjo sisë vaejëvoröhego. Göëro göho nue huodivorovoruomol'ajëjo. ¹¹ Ae göëro göëro ri'öromo ae sarerëmiromo uë'a'aruëjo: Na jö God-aro baeromo majëhijaje ae jevajë uë'iramu ae aho'obëhe heromo mae höromo guaro rireromol'aruëjo. ¹² Mu sisë aho'o rumorovobe val'iramu gagorovo ae aho'obëhe göehu gö huë baerovarue muoho vuonugol'iramu sisërë'ajëjo. ¹³ Èhi ë'oruomol'ajëjo röhu ae rahu biririvoromo mae uehorovevobe va'ujuvo maja barë'iröhe maja rovë'iroho God-ro baejëvoromo manö bamëvo'ajëjo. ¹⁴ Röhu God-hu böröme namiromo muebejëvaje jö maho aëro sa'ae dinö'e dinö'e majëhibe va'oruomol'ajëjo ae aho'obëhe sama'e heruomoröhego. Jöho sa'ae aho'obëhe majëhi barë'iramu evare sa'a bövi bise'o barë'iröhe majaho rue'a'ajëjo.

Mu sisë bëhe rueröhe jöhoje.

¹⁵ Röhu Daniel jö God-aro baeromo majëhinövade ahuro mami'e God-are surire jajivoromo uövuade höjo: God-are osa ijumaje sisëhuro God-are osa maremu nami'a'ajëjo. Daniel-hu jajivadëhi ëhi ga'a'aruëjo ë sisëho God-are osare nami'iramu. Iesuro ëhi majëhijadeje. Èjö Iesuhu majëhijadoho adahoromo avo'avoho gare. ¹⁶ Amo Iesuro jö vituoho majëhiromo uëvadeje: Sisëhuro God-are osare namijego gagorovo ave Judea sa'are raromaruje aribövioharo huruomoromo dahoru'ero iojiorëne. ¹⁷ Ae rahu javu dönö haradare raromë'o'ho nadi abueromo osare inömoho va'o ujuoho'i ma-huruomoromo va'orëne. ¹⁸ O mure raromë'o'ho nadi vuonorö'ö va'o niögoho ujuoho'i mahuruomoromo va'orëne. ¹⁹ Röhu ë huë vavaeni rue'iröhe majaroho dë'e magonahohu'o aboji harihu'o inino jio'amë'e magonahohu'o jabumë vaevë'o'ho diehi huruomoruomol'ajëjo. ²⁰ Röhu God ua garëjo huro ajëmego ëhuro niohijo majaroho o nuho majaroho bogo huruomol'irarije höjo. ²¹ Rabëni hesi bëhoho evare majaroho huë vavaene bogo bise'o vadu'oho rue'a'ajëjo. Èhi jië'e huë vavaenoho urimo God-hu sa'a bövi bise'o bamadevaroho bogojio'be ruejuvo ro jaruvo majahu'o ëhi jië'e huë vavaenoho bogohöjo. O ijönöhu'o bogojio'i ë majaho gemu börömoho jio'a'ajëjo. ²² Èhuë vavaeni maja ëgöbövi jiajoho God bogo tarioromo bunemuoho bamo'ibejajo aho bogo biririvoromo raromol'ibejajo. A'i God-ro hesi baejëvade aribövioho uehorovëvoromo ë majaho tarioromo bunemu bamo'ajëjo.

²³ Èhi jiamu ae göehu uëvë'o'ho: Aveho ro gahëjo. O arueho va'o gahëjo. God-hu uavë'ëro böröme namiromo ajamui'iröhe aho aviae o aruae hö uëvë'o'ho nadi maho uehorovorëjo. ²⁴ Èhesi bëhoho rabëniajo. Ae aho'obëhe rueromo sarerëmiromo uëbe va'a'aruëjo: God-hu uevë'ëro böröme namiromo ajëmi'irode aho jevajëjo o jö God-aro baeromo majëhijaje ae jevajëjo. Sarerëmiromo ëhi majëhi'aruëjo. Majëhiromo bogo gavarue mu masijo masijoho vaenövo'aruëjo eni jëvego God-hu söjëvade ariböviohu'o sarerëmego rireromol'iröhego. ²⁵ Röhu hehëjo. Ijönö jioröhe jöho na urimo majëhijë'e jevajëjo.

²⁶ Ĕhu'e jiaje aehu uëvë'oho: Ĕhuro va'o garëjo. Aruae je'ore hijajë uëvë'oho nadi va'o garëjo. O uëvë'oho: Hu gurihiromo osaro hijajë uëvë'oho nadi maho uehorovorëjo. ²⁷ A'i baderehu aruhe baderivoromo ajivo va'o anume bu'öjego gavarujëhi God-are A Maho naro ëhi ma-va'orahoro rue'iramu ge'a'arujëjo. ²⁸ Sagohe dinö'e jiajire ë ugoho gagovoruomo'ajëjo.

God-are A Maehu rueröhe jöhoje.

²⁹ Röhu ë huë vavaeni majaho barë'iramu evare maja nunoho ramoramovoromo manaeroho duorohoromo jijoho sisërë'amoromo ö'idöre inömoaho' o arua anumiae va'o'amo'ajëjo. ³⁰ Ĕhi'o'iramu evare God-are A Ma nasi ajohuro ö'idöre ajivo'iramu ga'a'aruëjo. Ĕho garomo sa'are aribövioho aho'obëhe nierusuburu'e bamoromo ga'a'aruëjo God-are A Maho naro darugo'o aji'o börömo mae baeromo ö'idöre suere ruvebi'iramu. ³¹ Ruvebiromo hëgöho ma-darugo'o huo'iramu nasi aneraho rëmö'ö'ejöjo. Rëmö'ö'iramu ro God-hu söjëvade aribövioho gagovëvo'aruëjo. Arua anumiae sa'ae dinö'e dinö'e maja rojomajire beva'ajire jioruomajoho gagovëvo'aruëjo.

Mesehu gumutivego Jew rajo jabesi vama maja dunovaje uhu jöhoje.

³² Röhu meso hesi uhu jöho heromo bëhoho avoho uehorovorëjo. Gavaruje mesoho gumutivoromo rahego garomo evare jemë uvaruje höjo: Jew rajo nosi vama majaho iae dunovajëjo. ³³ Ĕhesi bëhoho jemë ga'irarije naehu uëvodëhi mue gö gö rovamu gavë'iroho uvorëjo: Ĕmajaho iae rovajëjo. ³⁴ Ave jöho na jö mae uë'ië'ajëjo. Ave jaruvore raromaruje aribövioho jemë bogo vuovo barëjë'iro evare naehu uëvaje muoho aho'obëhe rue'a'ajëjo. ³⁵ Ö'idöe sa'ae bövie bise'e barë'i nasi jöho gemu bogo barë'ajëjo.

Iesuhu vuonorö'ö rueröhe maja no bogo gavarue jöhoje.

³⁶ Röhu ë majaho divare jio'iröhoho aho bogo gavaruëjo. Ö'idöre raromarue anerahu'o Harihoho na'o bogo ga'i hesi Vavuohuro gemuëro gavajëjo. ³⁷ Röhu God-are A Ma naehu a nunire rue'ië'iroho a mami ae Noah-hu hijade majare jiadëhi ëhi gemuoho jio'a'ajëjo. ³⁸ Jovo börömo bëhe rojomoromo öri ari'e aho'o bae'iröhe majaho dunovamu evare aëro ie jove ue'ahobe masurovobe ëhi jië'e muohemu uehorovobe va'ojuvo evare Noah-mëro boat börömore rumo va'are höjo. ³⁹ Rumo va'amu gavë'i a ioro'iorohuro uvoruomade höjo: No mae raromaruëjamu evare jovo börömhuro rojomoromo jabumë aho'o baeniagëgo barë nahonahovade höjo. God-are A Ma naehu rue'ië'iroho ëhi jië'e muoho jio'a'ajëjo. ⁴⁰ Ĕmajaho rue'iramu evare ae niö'iro mure ariromo muoho vae'iramu gavë'i aneraëro göho bae'i göho ë vuonugo'aruëjo. ⁴¹ Magonahe niö'iro gemuoro ariromo ioho sa'ijovoromo avoho'iramu aneraëro göho bae'i göho ë vuonugo'aruëjo. ⁴² Ĕhi ë'iröhohuni ëhuni gavë'iajo. Jemesi Bada naehu rue'irode majaho jemë'o bogo gavarujëjo. ⁴³ Ave uhu jöhu'o avo'avoho uehorovohëjo. Vajiohu'e aehu vahi'e divare rueröhe majaho osa arijo'oho bogo gavade höjo. Ga'ibejajo gavë'i hiromo vajiohu'e a hesi öroho tugohahego osaho bogo dadovoromo inömoaho ujuoho'ibejajo. ⁴⁴ Osa arijo'ohuro

gavë'i hi'ibejajo mae jio'ibejajo. Jemë'o gavë'i raromorëjo. Jemë bogo uehorovë'e raromaruje majare evare God-are A Maho naro rue'ejöjo.

A börömo hesi mu aehu avoho o sisë'i mueberöhe jöhoje.

⁴⁵ Aehu hesi a börömo hesi muohemu uehorovë'i simano mae uehorovoromo mu vaejaje ëhi jië'e aho uehorovohëjo. Ëa hesi a börömo huro hu uavë'e höjo. Na va'lië'ajëjo. Jero nasi mu vaejarue a ioro'ioroho muebejëvonëjo. Muebejëvoromo majae eni jiego jabeti iruno'oho i'imëminövonëjo. I'imëminövonë uanugoromo va'ë'e höjo. ⁴⁶ Va'o hijuvo va'jahu ijonö vuonorö'o rueromo garöhe ë ahuro hesi muoho avoho vaejajo'iramu gagorovo huë mabëhe bojami'ajëjo. ⁴⁷ Huë mabëhe bojamiromo ua'a'ajëjo: Ja mu mae vaejanohuni ëhuni na mu börömo bamavo'ejöjo. Jero nasi sa'ae inömo inöme bövie bise'e aho'o muebejehonëjo. Mu avo'avoho muebejë'oho iae hu ëhi ua'a'ajëjo. ⁴⁸ A'i ë mu vaejahaje aho sisë jië'ohuro ëhuro uehorovoromo uvo'a'ajëjo: Nasi börömo ho örisanuovajëromo ⁴⁹ ri'öromo mu vaejarue aribövi ioro'ioroho muo'amoromo vörö'e jovo sisë ue'ahoruomaje ariböviohu'o gemuore hiromo ioho jovoho i'a'ajëjo. ⁵⁰ Ëhi'oromo bogo gavë'e uehorovë'e hi'iramu evare hesi börömo ma-majioho rue'a'ajëjo. ⁵¹ Rueromo sino haho'oho sisë maro ijumahoromo nugö'ö'iramu sisëro va'oromo sareri sareri'e ariböviohu'o hi'a'ajëjo. Ëdirö'ore ae aho'obëhe nierusuburu'e bamoromo ane ja'iho vuogigimoruomo'ajëjo.

25

Aborido ioro'iorehu sisë'i uehorovo'i ioro'iorehu avo'avoho uehorovare uhu jö Iesuhu jövadohoje.

¹ Nasi majaho rovego God-hu böröme namiromo a diehi muebejëvo'iröhe jöho naro uhu'e majëhi'lië'ajëjo. Iae magonaho aboride aho'obëhe övo gö mine övo gö mine raromoruomade höjo. Raromoro iroho gae ujuohoromo i'o masuvade aho birohö'i va'oruomade höjo. ² Röhu aboride övo gö mine simano sisë'i uehorovarue aborido ömo'öme jioruomö'i aboride övo gö mine ëho simano mae uehorovarue aboride jioruomade höjo. ³ Simano sisë'i uehorovarue aboridoho jaburo irore biguröhe jovoho bogo ujuohö'i irohemu ujuoho va'irögoro ⁴ simano mae uehorovarue aboridoho jaburo irore biguröhe huonore jovohu'o irohu'o ëhi ujuohoromo va'oruomade höjo. ⁵ Ëaboridoho övo gö mine övo gö mine jaburo va'oromo muebejuvo gavare i'o masuvade aho bogo vejö'oho rovamu gagorovo nunëhëgamu hegorovo momorö'öruomade höjo.

⁶ Momorö'öjuvo vahi riri'e aëro ma-darugo'o uvare höjo: Nosi aho rovajëjo. Ruehego va'oromo birohärëjo. ⁷ Ruehego va'oromo birohärëjamu hegorovo aborido ömo'ömhuro ri'öruomoromo jabeti iroho avoho'amare höjo. ⁸ Avohoromo simano sisë'i uehorovarue aboridoho jaburo simano mae uehorovarue aboridoho uëvare höjo: Jemesi jovoho gö bojamuihëjo. Nosi iroho duorohahuo'amajëjo. ⁹ Duorohajëjamu uëvare höjo: Bogajo. Jemë'o no'o biguvego barëjëni bogo bojëmi'ëjarëjo. Ëhuni va'oromo jemesi gö imohëjo. ¹⁰ Imohëjamu ë aboridoho jaburo jove imö'i va'oruomade höjo. Va'oruomamu i'o masuvade ahuro rovade höjo. Rovamu iro ma avohare aboridoho

jaburo ë ahu'o gemu mae osanö va'oruomade höjo masurovare söröho i'iröhëni. Osanö va'oruomamu ojoho tugohare höjo.

¹¹ Ojoho tugohamu magonaho ioro'iorohuro ijore rueruomade höjo. Rueruomoromo i'o masuvade ahuni uvare höjo: Asë'e asë'e oje jio-vahuego no ö'arëjo. ¹² Ö'arëjamu ruehuro uëvade höjo: Na jemë bogo gëvaje höjo. Iae na mae uëvajëjo. Èhi'are höjo. ¹³ Èhuni gavë'iajo na divare majare rue'irodoho jemë bogo gavë'e jëvaje.

Ae niö'i gemu jabesi a börömo hesi moni ujuohoromo diehi ë'are ë hesi uhu jö Iesuhu jövadohoje.

¹⁴ Röhu God-hu böröme namiromo muebejëvo'iröhe öri hesi uhu jö göho aviëhi höjo. Ae gemuëro öre gö va'irögoro hesi mu vaejaharue aribövioho uëvamu rovare höjo. Rovamu uëvade höjo: Na va'ejöjo. Jemëro nasi sa'aho bövioho bise'oho avoho muebejehorëjo. ¹⁵ Avoho muebejehorëromo mu ariböviehu mu böröme o bise'e vae'iröhoho eni jëvamu garomo èhi hesi monioho böröme o bise'e èhi ae gemu gemu bojamiibe va'ade höjo jaburo èho baeromo hesi muoho vaejahoröhego. A göho 5,000 kina bojami'i a göho 2,000 kina bojami'i a göho 1,000 kina èhi bojamijade höjo. Èhi i'imëminugoromo va'ade höjo. ¹⁶ Va'amu gavë'i 5,000 kina baejade ahuro ujuoho va'oromo mue vaeromo èhuro 5,000 kina gö'o döre baejade höjo. ¹⁷ 2,000 baejade aho hu'o mue vaeromo 2,000 kina gö'o döre baejade höjo. ¹⁸ Èhi'o'irögoro 1,000 kina baejade ahuro va'oromo guae umoromo hesi a börömo hesi ijo bajoho ë gurihi bahijade höjo.

¹⁹ Èhi'oromo raromobe va'ojuvo majae ëgobövie barëjamu jabesi a börömhuro vuonorö'ö rovade höjo. Rueromo uëvade höjo: Ruehego na gëvöjo nasi ijo bajoho diehi muebejehë'e jëvego. ²⁰ Èhi uëvamu 5,000 kina baejade ahuro 5,000 kina gö'o döre baejadoho èhu'o barueromo bojamiromo uavade höjo: Bada jero 5,000 kina bojemiiane höjo. Aveho gavëjo. Naro mue vaeromo 5,000 kina gö'o döre baejahë'e jevajëjo. ²¹ Baejahë'e jevajëjamu hesi a börömhuro uavade höjo: Mabëhëjo. Ja mue vaejehanue a ma-mae javajëjo. Naehu ijo baje ma-bisemu bojamamu avoho muebejehanohuni èhuni naro bövi mae bojami'ejöjo muebejeho'iranego. Rovego gemuoro nimoroho'irarëjo. ²² Gemuoro nimoroho'irarëjamu 2,000 kina baejade ahuro rueromo uavade höjo: Bada jero 2,000 kina bojemiiane höjo. Aveho gavëjo. Naro mue vaeromo 2,000 kina gö'o döre baejahë'e jevajëjo. ²³ Baejahë'e jevajëjamu hesi a börömhuro uavade höjo: Mabëhëjo. Ja mue vaejehanue a ma-mae javajëjo. Naehu ijo baje ma-bisemu bojamamu avoho muebejehanohuni èhuni naro bövi mae bojami'ejöjo muebejeho'iranego. Rovego gemuoro nimoroho'irarëjo.

²⁴ Gemuoro nimoroho'irarëjamu 1,000 kina baejade ahuro rovade höjo. Rueromo uavade höjo: Bada na mae garomo uvode höjo: Ja vörö'e aëro javë'ëro ae göehu ba'amaroho bivaroho ja ma-ijanue höjo. ²⁵ Èhi javë'e aëgo èhuni naro ja juhuonamiromo jasi 1,000 kina bava'oromo sa'a gagore gurihi bamode höjo. Aveho gavëjo. Jasi ijo bajoho aviae höjo. ²⁶ Aviae höjamu rue a börömhuro ri'öromo uavade höjo: Sareri mu bijöni'e a sisë bëhe javajëjo. Jero uvane höjo: Ae göehu ba'amaroho bivaroho nöröro ma-ijaje höjo. Jero èhi uvane höjo.

Na mae-ëjo. ²⁷ Èhuni ja nasi ijo bajoho baeromo avoho bahijarue aribövi jabesi övore bamo'ibejanëjo. Èhi è'ibejanëjo na rueromo nasiroho baeromo gö'o döre bamaroho èhu'o bae'ibejëjo. ²⁸ Èhuni jemëro 1,000 kina è ia hesiroho baeniahiromo 10,000 kina baejë'e aho bojamihtëjo. ²⁹ Èhesi bëhoho mu vae'irane suvuore javë'o ho God-ro gö'o bojami'iramu baeromo bövi mae javo'ajëjo. O bogojavë'o ho bisemu baejanoho God-ro baeniahi'ajëjo. ³⁰ Röhu è mu bogo vaejaje aho gud-uamoromo babu'öhego amonö ramoramore va'o hijajo. Èdirö'ore ae aho'obëhe nierusuburu'e bamoromo ane ja'iho vuogigimoruomo'ajëjo. Èhi uëvade højo.

Maja viture a ma a sisë mevavuo'iröhe jö Iesuhu jövadohoje.

³¹ Röhu jö göho God-are A Maho naro anerae aho'obëhe jabu'o gemu mae nasi aji'o rovë'iroho evare nasi aji'e röho mare ajio hi'ejöjo. ³² Hi'iramu sa'ae dinö'e dinö'e raromarue aribövioho jaburo rueromo nasi nunire gagovoruomo'ajëjo. Gagovoruomo'iramu sheep muebejaje aehu sheep o goat adovoromo hahagu hahagu nugo'amaruëhi naro è aribövioho èhi advëvoromo hahagu hahagu rëmo'ejöjo. ³³ Hahagu hahagu rëmoromo sheep ma va'ënoho nasi övo manö rëmo'i goat sisë va'ënoho nasi övo adonö rëmo'ejöjo. ³⁴ Rëmonugoromo a börömo ho naro övo manö riravarue aribövioho uë'ejöjo: Nasi Vavuohuro jemesi örire huë mabëhe bojëmijë'e jiaje jemesi röhoho ro baehëjo. Èröhoho urimo sa'a bövi bise'o bamadevare huro avoho nugëhobe rovë'e højo jemëro è hesi aharire raromo'irarijego. ³⁵ Rabëni hesi bëhoho urimo na hömevamu jemëro ie i'imemijarije højo. Na huë girihevamu jemëro jovoho bojëmijarije højo. Naro ame göro jioromo ö'amamu gegerovo uevariye højo: Nosi osaro ro hijëjo. ³⁶ Niögu rumo'e jevamu niögoho i'imemamu io'amode højo. Guomo guome baejevamu jemëro muebejarije højo. Savojo gagore hijamu jemëro rueromo gevariye højo. ³⁷ Gevariye hö'iramu rue aribövi mahuro ueruomo'ajëjo: Bada iae èhi højo röhu no divare gavare højo ja hömavamu ioho i'imamare højo. Divare gavare højo ja huë girihavamu jovoho bojamare højo. ³⁸ Divare gavare højo ja ame göro jioromo rovamu uavare højo: Nosi osaro ro hijëjo. Divare gavare højo niögu rumo'e javamu niögoho i'imamare højo. ³⁹ Divare gavare højo ja guomo guome baejavamu o savojo gagore hijamu no ö'oromo gavare højo. ⁴⁰ Èhi ue'iramu a börömo ho naro uë'ejöjo: Aveho na jö mae uëvajëjo. Nasi öe iho ma-bise'o jië'o ho mae avoharijohuro èhuro na'o mae avohevariye højo.

⁴¹ Èhi uënugoromo huotorovoromo nasi övo adonö riravarue aribövioho uë'ejöjo: I'ue bae'ië'e aribövie jëvaje rori'o va'ohëjo. Ravemu ravaje vëni'e öri ari'oro va'ohëjo. Èvënoho God-ro Satan'o hesi anera ömo'ömo hu'o èho jabuni avohëhë'e højo. ⁴² Rabëni hesi bëhoho na hömevadoho jemë ioho bogo i'imemijarije højo. Huë girihevadoho jemë jovoho bogo bojëmijarije højo. ⁴³ Ame göro jioromo ö'odoho jemë bogo uevariye højo: Nosi osaro ro hijëjo. Niögu rumo'e jevadoho jemë niögoho bogo i'imemarije højo. Guomo guomo baejevadoho o savojo gagore hijodoho jemë bogo ro muebejarije højo. ⁴⁴ Bogo ro muebejarije hö'iramu rue ariböviohuro ueruomo'ajëjo: Bada iae èhi højo röhu no divare gavare højo ja hömavamu o huë girihavamu o

ame göro jioromo rovamu o niögu rumo'e javamu o guomo guome baejavamu o savoji gagore hijamu garomo bogo ajami'i ma-nunëremu gavare höjo. ⁴⁵ Ma-nunëremu gavare hö'iramu naro uë'ejöjo: Nasi öe iho ma-bise'o jië'oho bogo ma avoharijohuro èhuro na'o bogo ma avohevariye höjo. ⁴⁶ Èhi uë'iramu è aribövioho sisëro va'oromo ma-ioro'ioremu i'ue baerumu'ajëjo. A'i aribövi mahuro maro va'oromo ma-ioro'ioremu raromoruomo'ajëjo.

26

Iesu ano'i mevare jöhoje.

¹ Èjöho majëhi barënugoromo Iesuro hesi ijorajo ömo'ömo ho uëvadeje: ² Iae jemë'o gavarujëjo majae niö'i hesi uhure evare God-hu Vörö Tugohade Sörö majaho rue'a'ajëjo. Rue'iramu aëro God-are A Maho na guduamevoromo a masijo jabetesi övore bojëmi'aruëjo korosire ano taemevoröhego.

³ Iesuro èhi jövo'irögoro röhu evare priest masijohu'o Jew rajo a duvaho ömo'ömohu'o èho jaburo priest börömo ihe Caiphas-are osa börömore è ro gagovareje. ⁴ Gagovoromo jöe mevoromo uarovareje: No diehi'oromo Iesu saginiëri guduamoromo ano'ejarëjo. ⁵ Sörö majaroho bogo guduamo'ejarëjo aëro göromo no'o muorovoruumojëni.

Magonahehu ridi'e oso Iesuare simanore otehade jöhoje.

⁶ Èhi'amu Iesuro Bethany amore rueromo sino jomo'e ae Simon-are osare ro hiromo ie ijadeje. ⁷ Ie ijamu gagorovo magonahe gemuëro munë huono mabëhe baeromo rovadeje. Èhuono gagore ridi'e osoho jiadeje. Huonore oso imarue hesi manaho bövi mae jiadeje. Magonahohuro è osoho barueromo Iesuare simanore otehadeje. ⁸ Simanore otehamu gagorovo Iesuare ijorajoho jaburo dë vörönëgamu uarovareje: Osoho rabëni ëma otehö'öjajëjo. ⁹ Ae gö jabetesi örire imo'ibejarëjo manaho bövi mae bae'ibejarëjo. Èmanaho baeromo bövi bise'o rumo'e aribövioho suvuorëmi'ibejarëjo. Èhi jië'oho iae mae jio'ibejajo. Röhu ëma otehö'öjade höjo. ¹⁰ Èhi atamu hegorovo Iesuro göromo uvadeje: Èhi jië'e jöho ataruëromo uëvadeje: Jemë rabëni magonahoho huë vavaenoho bojamijarujëjo. Mu mabëhe nasi örire vaejevë'e höjo. ¹¹ Bövi bise'o rumo'e ariböviohuro jemë'o raromobe jijih'o'aruëjo mae vaejëvojöro. A'i naro jemë'oho bogo hibe juvo'ejöjo èhi avohevojöro. ¹² Èmagonahehu oso nasi sinore bamehade hesi bëhoho nasi sinoho avohehade höjo èhuro aëro hure mae bamevoröhego. ¹³ Ave jöho na jö mae uë'ië'ajëjo. Sa'ae dinö'e dinö'e aehu nasi jö ma majëhibe jijihë'iroho è magonahehu è'ade jöhu'o majëhibe jijih'o'aruëjo aëro hu mae uehorovoruumoröhego.

Judas-hu Iesuni Jew rajo a masijo hiruëmade jöhoje.

¹⁴ Èhi'amu Iesuare ijoraje 12 röhu gemu hesi ihe Judas Iscariot-ro va'oromo priest masijoho uëvadeje: ¹⁵ Naehu Iesu jemesi övore bojëmijë'oho jemë ijo baje dimino'e bojemirëjo. Bojemirëjamu rueho jaburo ajivë'e ijo bajoho adahoromo 30 bojamijareje. ¹⁶ Bojamijamu evare Judas-ro aevoromo öre nahadeje Iesu jabetesi övore bojëmi'iröhëro.

God-hu Vörö Tugohade Sörö Iesumëhu ijare jöhoje.

¹⁷ I Dë Huaje Oso Rumo'e I ibe va'iröhe majaho aevoromo rovamü gägorovo Iesüare ijorajoho jaburo rueromo Iesu uavareje: Ja nagajoho no dinö'e va'oromo God-hu Vörö Tugohade Söröho avohaho'ëjarëjo. ¹⁸ Èhi uavamü uëvadeje: Jerusalem amo börömohuro va'oromo ë a hesi osaro va'oromo uarëjo: No röhahuijaje ahuro uvajëjo: Nasi majaho dunovajëjo. Èhuni naro jasi osare ö'oromo God-hu Vörö Tugohade Söröho nasi ijorajoho jabu'o gemü mae i'ejöjo. Èhi uarëjo. ¹⁹ Èhi uarëjamü rue ijorajoho jaburo Iesuhu uëvadëhi ëhi ë'oromo söröho avohareje.

²⁰ Èhi'amu vahiomadeje. Vahiromamü gägorovo Iesuro hesi ijoraje 12-ho jabu'o gemüore hijadeje ë ioho i'irovo. ²¹ Hiromö ioho ijë'i uëvadeje: Ave jöho na jö mae uë'ië'ajëjo. Jemë ae gemüero na bijönegarue aribövi jabesi övore bojëmi'anüëjo. ²² Bojëmi'anüëjamü hegorovo uehore gö gö böröme baeromo ae gemüero gemüero uavareje: Na bogo ëhioho ë'ejöjo. Na na mae uavajëjo. ²³ Mae uavajëjamü hegorovo uëvadeje: Naehu i hevöre ba'amo'ego hu'o gemüore ba'amaje ahuro ë mü sisëho vae'a'ajëjo. ²⁴ God-are surire jajivarëhi hesi A Maho na ëhi guomevo'ajëjo. Röhu na bijönegarue aribövi jabesi övore bojëmi'iröhe aho vavë'öho sisërë'ajëjo. Èaho bogo raho'ibejajo ëhuro mae jio'ibejajo. ²⁵ Mae jio'ibejajamü Judas Iesu bijönimarue a jabesi övore bojëmi'iröhe ahuro uavadeje: Na bogo ëhioho ë'ejöjo. Na mae-ëjo. Na mae-ëjamü uavadeje: Jero jasi jövanüëjo.

Sino'o kö'o aevoromo ijare jöhoje.

²⁶ Èhi'amu ioho ue'ahoromo Iesuro ioho baeromo God mae uanugoromo ato'atovoromo hesi aribövioho suvuorëmiromö uëvadeje: Baeromo ihëjo. Aveho nasi sine höjo. ²⁷ Èhi'onugoromo enatuore jovoho baeromo God mae uanugoromo bojëmiromö uëvadeje: Jemë ae aho'obëhe enatuore jovoho baeromo ihëjo. ²⁸ Aveho nasi köe höjo. Ae aho'o jemesi jöëni köho rovevoromö guomevo'ajëjo ëhuro sisëho mü'uvëhoröhego. Guomevo'iramü ëhuro God-hu müebejëvo'iröhe jögoroho marë'ajëjo. ²⁹ Röhu aveho hehëjo. Na ijoho ö'i bajo jovoho bogo i'ejöjo hujeji ëho majaho rovego evare jemë'o na'o nasi Vavuehu müebejaje öri ari'ere raromoromö ö'i bajo jovo i'öho ue'ahoröhëni. ³⁰ Èhi uënuogoromö God rajahjarue jöho ionugoromö suorovo va'oromö Olives Dahorure iojiomareje.

Peter-hu Iesu gavaje jö a subivëhoröhe jö Iesuhu majahijadohoje.

³¹ Iojiomoromö Iesuro hesi aribövioho uëvadeje: Jaruvo vahire ae aho'obëhe nasi örire mae uehorovevarujoho vuonugo'i remö va'a'arujëjo. Èhesi bëhoho God-are surire jöho jajivoromö uvë'e höjo: Sheep müebe'amaje aho God naro ano'ejöjo. Ano'iramü huhü müebe'amade sheep-öho jaburo arua anumiae va'o'amo'ajëjo. God-are jö jiajëhi ëhi remö va'a'arujëjo. ³² Remö va'iramü guomoromö ri'önugoromö naro urimö Galilee va'ejöjo. Jemë ijore ö'a'arujëjo. ³³ Èhi uëvamü Peter-ro ri'öromö uavadeje: Nani a ioro'ioroho jasi örire uehorovaruoho vuonugo'i ramo va'a'aruëjo röhu na bogo ëhioho ë'ejöjo. ³⁴ Bogo ëhioho ë'ejöjamü Iesuro Peter uavadeje: Èhi uevanüëjo röhu ave jöho na jö mae ua'ie'ajëjo. Jaruvo vahire kökörökoho bogo urimöho uvë'e jero urimö vae niö'i gemü ae uë'a'anüëjo: Na Iesu bogo

gavaje hōjo. ³⁵ Ēhi uē'a'anuējamu hegorovo Peter-ro uavadeje: O na bogo ēhioho ē'ejōjo. Aehu anegamu ja'o gemuore guomo'iē'iroho na bogo ēhioho majēhi'ejōjo. Bogo majēhi'ejōjamu ijorajo ioro'ioroho aho'o jabu'o ēhi gemuoho Iesu uaruomadeje.

Iesuhu Gethsemane sa'are hiromo God-are ōrire ēninamijade jōhoje.

³⁶ Ēhi'amū Iesuro ōri ari'o ihe Gethsemane hesi aribōviohu'o rovadeje. Rueromo uēvadeje: Avehuro raromohego na aruēre va'oromo God-are ōrire jōe jōvōjo. ³⁷ Ēhi uēnugoromo Peter'o Zebedee-are harihoho niō'i jabu'o sō ujuoho va'oromo huē vavaene bōrōme baeromo nurunurumadeje. ³⁸ Nurunurumoromo uēvadeje: Na sisē maro huē vavaene baejevajējo. Ēhuro guomevo hesi hōjo. Ēhuni nadi momorō'ō'i manune jioromo avoho mueberovē'e raromohējo. ³⁹ Ēhi uēnugoromo rori'o va'oromo sa'are behumoromo nu ano'o'oho sa'are amoromo God ēninamiromo uavadeje: Apo jasi ōrire ōre gō javē'o'oho i'ue huē vavaene nasi ōrire rovajoho ahego na bogo bae'irōjo. Rōhu naehu nimajoho nadi ē'i jaehu nimanuēhi ēhi ē'onējo.

⁴⁰ Ēhi ēninaminugoromo vuonorō'ō rueromo gavade hesi ae niō'i gemu momorō'ōjamu gēgorovo Peter uavadeje: Majae ma-bunemu nune jioromo na'o gemuoro mueberovē'e raromo'irarijoho jemē diehi'oromo bogo eni jēvajējo. ⁴¹ Nune jioromo mueberomo ēninamihego God-ro ajēmego Satan-ro bogo dinēmego ēhuro bogo bejēvo'irajo. Jemesi aru'ahoho mu mae vae'i nimo'i jemesi sino haho'o'oho u'uhē'e hōjo.

⁴² Ēhi uēnugoromo rōhu maho va'oromo ēninamiromo uavadeje: Apo ōre gō bogojavo'i i'uehu huē vavaenehu nasirire ruejōro nimē'o'oho iae ēhi ē'onējo. ⁴³ Ēhi uanugoromo vuonorō'ō rueromo gavade jabumē nunēhimo'amō'ego momorō'ōjamu gēgorovo ⁴⁴ rēmo'i vuonorō'ō va'oromo urimē'i vae niō'i ēninamijade jōe gemuoho rōhu maho ēninamijadeje. ⁴⁵ Ēninaminugoromo rueromo hesi aribōvioho uēvadeje: Jemē diehi'oromo nuhoromo ma-momorō'ōemu momorō'ōjarujējo. Gahējo. Majaho mami'e rovē'e hōjo. Aēro God-are A Maho na bijōnegarue aribōvi jabesi ōvore bojēmi'iē'ajējo. ⁴⁶ Ri'ōromo go va'ohego va'arējo. Gahējo. Na bijōnegarue a bojēmi'irōhe aho rovajējo.

Iesu guduamare jōhoje.

⁴⁷ Ēhi uēvamu gavē'i Judas rovadeje. Iesuarē ijoraje aho'obēhe 12 rōhu Judas hu'o jabesi ae gemuoho jiadeje. Judas rovamu ae aho'obēhe mae siravae kepatae ujuohoromo hu'o rueruomadeje priest masijohu'o Jew rajo a duvaho ōmo'ōmohu'o ēho jaburo rēmō'ōjē'ēro jiē'ēro. ⁴⁸ Rōhu ē hesi urimo ē sareri'e aho Judas-ro ē aribōvioho uēvadeje: Ga'irarije naro di aho dudōhamu gavē'o'oho uvorējo: Iae Iesu hōromo guduamorējo. ⁴⁹ Judas-ro ēhi uēvē'ēro huro rueromo maburēro ro Iesu uavadeje: Bada vaevē'ēromo dudōhadeje. ⁵⁰ Dudōhamu uavadeje: Isi jasi nimanue muoho vaejējo. Ēhi uavamu aēro rueromo Iesu guduamareje. ⁵¹ Guduamamu gagorovo ae gemu Iesuarē bēhire namijaduhuro hesi kaejōho jijōromo priest bōrōmo hesi mu vaejaje aho anoromo hia'o'oho tariō'ōjahadeje. ⁵² Tariō'ōjahamu gagorovo Iesuro uavadeje: Jasi kaejōho sionoro vuonorō'ō ba'amējo. Ae rahu kaejōehu o bijehu bunehu muorovē'o'oho kaejōhuro bijohuro bunohuro

muo'amëvo'iramu vuovëvo'ajëjo. ⁵³ O jaehu a ananue hesi bëhoho nani jero uvanuëjo: Nöröhu hesi Vavu ua gavë'oho bogo ajamiromo anerae aho'obëhe mae gemuore jioruomajoho rëmö'ö'iramu ruero-moromo na ajemi'aruëro ëhuni aho ananuëjo. ⁵⁴ Röhu naro hu ua ga'ibejjo God-are surire jajivarëhi muoho bogo ëhioho jio'ibejajo. Ëhuni ajemi'iröhe jöho Vavuoho bogo ua ga'ejjo.

⁵⁵ Iesuro ëhi uanugoromo ë rueruomade aribövioho uëvadeje: Aveho na bogo vajiohu'e anano'e aehu jevajëjo. Jemë rabëni sir-avaho kepataho ujuohoromo guduamevo'i rovarujëjo. Mami'e majae aho'o naehu God-are amo bërömore hiromo God-are jö hesi öri a rjöhinövodoho jemë evaroho bogo guduamevarije höjo. ⁵⁶ Röhu avevejjo'e vaejaruje mue aho'o hesi bëhoho urimo jö God-aro baeromo majëhinövare ariböviohuro God-are surire jajivoromo uvare höjo: Ëhi jië'e muoho jio'a'ajëjo. Jabuhu jajivarëhi ëhi jioröhego ëhuni ave muoho rovë'e höjo. Ëhi uëvamu hesi ijoraje aho'obëhe hu nugo'i huruomoromo va'areje.

Iesu Jew rajo a masijo jabesi nunire namijade jöhoje.

⁵⁷ Ëhi'amu gagorovo Iesu hu'irae ruero priest bëröme Caiaphas-are osare rovareje. Ruero gavareje jögoru öri rjöhijarue ariböviohu'o a duvaho ömo'ömo'u'o ë gemuoro gagovë'e jiamu. ⁵⁸ Iesu priest bërömo hesi osare barovamu Peter-ro arue riribövire Iesu rihioromoro priest bërömo hesi osare rovadeje. Ruero osare rumo va'oromo abo osa ririre ruë numë javue vae'i riroho ma-va'oraho nugarire ë va'oromo priest hesi mu vaeruomaje ariböviohu'o gemuore hijadeje diehi'aruoho garöhëni. ⁵⁹ Ëhi'amu priest masijohu'o a masijo ioro'iorohu'o ae nahareje sarerivoromo ëma huruoho majëhiromo uëröhego: Iesuro ëhi jië'e mu sisëho vaejamu gavare höjego heromo Iesu anego guomoröhego. ⁶⁰ Nahoromo bogo biröhareje. Ae göëro göëro ruero Iesure jö sarerivoromo majëhijaroho bogo eni jiobe va'ujuvo hujeji ae niö'iro ruero ⁶¹ jöe gemuoho majëhiromo uëvareje: Ëiahuro uvavohijajo: God-are amo bërömo dadovoromo majae niö'i gemu hesi uhure röhu maho vae barë'irodoho na eni jevajëjo. Ëjö sisëho uövamu hejare höjo.

⁶² Ëhi majëhijamu hegorovo priest bërömhuro ri'öromo Iesu uavadeje: Na ja jö mana uö'iranoho bogojavajëjo. Aehu jasi jö sisë majahuijaruoho na ëho mae o sarere höjo. ⁶³ Mae o sarere höjamu Iesuro jörume namijadeje. Jörume namijamu priest bërömhuro uavadeje: God birivoromo hijaje a hesi nunoro ave jöho ma-maemu uevego na hejjo. Bëröme namiromo ajamuijanue aho na ja javajëjo. Na ja God-are Harihe javajëjo. ⁶⁴ Javajëjamu uavadeje: Jaehu uevanuëhi iae ëhi jevajëjo. Röhu naro jemë ae aho'obëhe ave jöho uëvajëjo. U'emu jemëro ge'a'arujëjo God-are A Maho darugo eni jië'e A hesi övo manö hi'iramu. Ö'idöre jio'amaje suehu'o gemu mae ruvebi'iramu. ⁶⁵ Ëhi uavamu hegorovo rue priest bërömhuro hesi niögoho dadovoromo uëvadeje: Huro God-are ihoho ijumajëjo. A göho rabëni ruero hesi jöho huruoho majahuijöräjo. Iae no eni hejë'e javuajëjo. God-are iho ijumajoho jemë iae hejarujëjo. ⁶⁶ Ëhuni jemë

diehi uehorovarujëjo. Diehi uehorovarujëjamu uavareje: Jö sareri'e aego ano'iramu guomo'a'ajëjo.

⁶⁷ Èhi uanugoromo Iesuale nu ano'ere sabëro ödivoromo övo mugö mugöëro anoruomadeje. O övo hitahiëro anoromo ⁶⁸ sivoromo uavareje: Jero uvanuëjo: Na böröme namiromomo ajëmaje aho jevajëjo. Èhi jië'e javaje jöho God-aro baeromo huruoho majahuiromomo anagade a hesi ihoho uövuego no hejarëjo.

Peter-hu Iesu gavaje jö a subivëhade jöhoje

⁶⁹ Èhi'amu Peter-ro amonö aehu raromaruire ë hijadeje. Hijamu gagorovo mu ajamijaje magonahe gemuëro rueromo uavadeje: Ja'o Galilee sa'a rajo ae Iesu'o gemu mae javade höjo. ⁷⁰ Javade höjamu Peter-ro ae aho'obëhe jabesi nunire magonahoho sareramimoromo uavadeje: Jaehu jövanue jöho na dadivevo avohajëjo. ⁷¹ Èhi uanugoromo aribövioho ë rëmo'i ojo bëhire va'adeje. Va'amu magonaho göëro Peter garomo hesi bëhire riravarue aribövioho uëvadeje: Ave iaho Nazareth amo rajo ae Iesu'o gemu mae jiade höjo. ⁷² Jiade höjamu hejë'i Peter-ro röhu maho sareramadeje. Sareramimoromo uavadeje: God-are nuniro na mae uavajëjo. Èaho na bogo gavaje höjo. ⁷³ Èhi uavadoho ririvanovamu bëhire riravarohuro ro Peter uavareje: Iae mae-ëjo Iesuale aribövi jabesi ae gemuoho javajëjo. Jasi huëre heromo ëhuni uavaruëjo. ⁷⁴ Uavaruëjamu Peter-ro uëvadeje: Na jemë sarerëmijë'o ho i'ue baejöëni ëhuni na jö mae uëvajëjo. Èaho na bogo gavaje höjo. ⁷⁵ Bogo gavaje höjamu gavë'i kökörökoho uvadeje. Uvavamu hegorovo Peter-ro uehorovoromo uvadeje: O mami'e Iesuro uevade höjo: Kökörökoho bogo urimoho uvë'e jero urimo vae niö'i gemu ae uë'a'anuëjo: Na Iesu bogo gavaje höjo. Èhi uehorovoromo amonö hörö va'oromo sisë maro nivadeje.

27

Pilate-are nunire namijöro Iesu bava'are jöhoje.

¹ Iae sisonuvo'ia'amu gagorovo priest masijohu'o Jew rajo a duvaho ömo'ömo'u'o ë aribövioho aho'obëhe jaburo gagovoromo jöe mevoromo uarovareje: No ëhi ëhi ë'ëjarëjo Iesu guomoröhego. ² Èhi mevoromo eni jiamu gagorovo Iesu tövoromo bava'oromo gavana Pilate-are övore bamareje.

Judas-hu hesi arijo'arije anorovade jöhoje.

³ Èhi'amu Iesuni hiruëmiromomo a jabesi övore bojëmade aho Judas-ro gavade Iesuale jöho court-roho bejë'e jiamu gagorovo uvadeje: Na mae ë'ajë'i sisë ë'ë'e jevajëjo. Sisë ë'ë'e jevajë uvonugoromo ajivë'e ijo baje aho'obëhe 30 ujuohadoho vuonorö'ö ujuoho va'oromo priest masijohu'o a duvahohu'o bojëmi'ië'adeje. ⁴ Bojëmi'ië'oromo uëvadeje: Naro mu sisë ë'ë'e jevajëjo. Naro a mahuni jemë hiruëmiromomo hu jemesi övore bojëmijë'e jevajëjo anego guomoröhego. Èhi uëvamu uavareje: Èho bogo nosi muehu höjo. Jero jasi ganëjo. ⁵ Èhi uavamu hejë'i ijo bajoho God-are osare bu'önugoromo jabumë rëmo va'oromo ö'ëro sönöre benugoromo vioruhirovoromo guomadeje.

⁶ Ĕhi'amu priest masijohuro ijo bajoho ujuohoromo uarovareje: Ave ijo bajoho guomoröhe a hesi manaho höjo. Ĕhuni God-ni moni bahijaruire ě bahijĕ'oho sisĕ höjo. ⁷ Jöho mevonugoromo eni jiamu gagorovo ijo bajoho ujuohoromo sa'aho imareje sa'a ioro'iorore jioromo rovere aribövioho vuovĕvego ě guavo'amoröhĕni sa'a ihoho Rama Avoho'amaje A Hesi Sa'aho jiĕ'ĕro. ⁸ A guomoröhe manaho baeromo ě sa'aho imĕ'ĕro ĕhuni ě sa'aho Kö Rovade Sa'aho jumovaroho jaruvoho hesi ihoho ĕhije.

⁹ Röhu jö God-aro baeromo majĕhinövade ae Jeremiah-hu Iesuare mana ujuohoromo sa'a imoruumoröhego urimo uĕvadĕhi ĕhi ĕ'areje. Amo Jeremiah-ro uĕvadeje: Jabumĕ ajivĕ'e ijo bajoho aho'obĕhe 30 ujuohare höjo Israel rajohuro monie ĕmino'e hu imoröhĕni uvĕ'ĕro. ¹⁰ Ijo bajoho ujuohoromo Badahu na uevadĕhi ĕhi rama avoho'amaje a hesi sa'ahuni bu'öruomade höjo. Jeremiah-ro ĕhi uĕvadeje.

Pilate-hu jöe gö gö Iesu ua hejade jöhoje.

¹¹ Amo Iesuro gavanare nunire namijamu gavanaro uavadeje: Na ja Jew rajo jabesi a börömocho javajĕjo. Javajĕjamu Iesuro uavadeje: Ĕjöhö jero jasi jövanuĕjo. ¹² Jövanuĕjamu priest masijohu'o a duvahohu'o ĕho jaburo Iesuare jö sisĕho gavana huruoho majahijareje. Majahijamu Iesu bogo mana uavadeje. ¹³ Bogo mana uavamu Pilate-ro Iesu uavadeje: Rueho jabuhu jasi jö sisĕ aho'obĕhe majehijaruoho na ja hejanuĕjo o bogajo. ¹⁴ Bogajamu Iesuro jöho bogo mana majahijadeje. Bogo majahijamu rue a börömocho tiö avohadeje.

Iesu anego guomöjoro Pilate-hu uĕvade jöhoje.

¹⁵ Röhu God-hu Vörö Tugohade Sörö maja rovĕ'iroho savoji gagore raromarue aribövioho di aho jiovo nugö'öjoro aehu uvoruomĕ'oho Pilate-ro ě aho jiovo nugö'önövadeje. ¹⁶ Röhu ae gemu hesi jö sisĕ ae aho'obĕhe hemu hejaruoho ě aho savoji gagore hijadeje. Hesi ihoho Iesu Barabbas jiadeje. ¹⁷⁻¹⁸ Röhu Pilate-ro gĕromo uvadeje: Iesuare ihoho bövie jiĕ'ego ě ariböviohuro dĕ vörönĕgamu nasi övore bojĕmijare höjo. Bojĕmijare hö uvoromo gavade ae aho'obĕhe gagovorovĕ'e jiamu gĕgorovo uĕvadeje: Jemĕ nĕgajoho na di aho jiovoromo bojĕmi'ĕjĕjo. Na na Iesu Barabbas jiovo nugö'ö'ĕjĕjo. O na na Iesu göho Keriso hö uvarujoho jiovo nugö'ö'ĕjĕjo. ¹⁹ Ĕhi uĕnugoromo röhu Pilate-ro court-re hiromo jöho hejamu evare hesi vaborohuro jöe nugö'öromo uavadeje: Ĕaho sisĕ rumo'e ae jiage ĕhuni hesi öriroho nadi bövioho bise'oho ĕ'onĕjo. Jaruvo vahi'e naro niavoromo Iesu nia'ovoro garomo huĕ vavaene börömo bĕhe baejode höjo.

²⁰ Jöho ĕhi rovamu gavĕ'i Jew rajo priest masijohu'o a duvahohu'o ĕho jaburo ae aho'obĕhe biririvoromo dinĕmiromo uĕvareje: Jemĕro uvohĕjo: Barabbas jiovo nugö'ö'i Iesu anohĕjo. ²¹ Ĕhi uĕvamu Pilate-ro ae aho'obĕhe uĕvadeje: Ĕae niö'ioho jemĕ nĕgajoho na di aho jiovoromo bojĕmi'ĕjĕjo. Uavareje: Barabbas-ajo. ²² Barabbas-ajamu uĕvadeje: Ĕhi jiĕ'oho Iesu Keriso na diehi'ö'ĕjĕjo. Ae aho'obĕhe uvoruomadeje: Korosioro anego guomajo. ²³ Guomajamu uĕvadeje: Rabĕniajo. Diehi jiĕ'e mu sisĕ vaejĕ'e höjo. Vaejĕ'e höjamu ae aho'obĕhe ma-darugo ma'e uvo'i arijareje: Korosioro anego guomajo. ²⁴ Ĕhi uvamu hegorovo Pilate-ro gavade hu jö jövajoho bogo eni

jio'i aribövioho muorovo'ia'amu gëgorovo vuonugo'i jovoho baejadeje. Jovoho baeromo ae aho'obëhe jabesi nunire övoho eguadeje. Övoho eguoromo uëvadeje: Na övo uno'e ae jevajëjo. Ëia hesi kö rumo'e jevajëjo. Jemesi garëjo. ²⁵ Jew raje ae aho'obëhe uvoruomadeje: Iae mae-ëjo. Nosi övore nosi ujo jabesi övore ë ia hesi köho javuobe va'a'ajëjo. ²⁶ Köho javuobe va'a'ajëjamu Pilate-ro ejëhoromo Barabbas jiovo nugö'öjadeje. Barabbas jiovo nugö'ö'i Iesu hisuebijöro ae uëngoromo uëvadeje: Ave aho bava'oromo korosioro anohego guomajo.

Muorovo ariböviehu Iesu sivare jöhoje.

²⁷ Guomajamu rue gavanare muorovo ariböviohuro hesi osa börömore Iesu bava'oromo muorovo a ioro'iorohu'o gagovoromo Iesu ruë numë numareje. ²⁸ Numonugoromo hesi niögohojijövaho'i a masijehu kavuë'e niögu ëgo io'amoromo mu vaejarue ëhi jië'e niögohoj ba'amahareje. ²⁹ Ba'amahoromo a masijehu bosö didi'arue ëhi jië'e bosöho Iesuare simanore didi'ahareje. Röhu bogo inömo maho baeromo bosöho avohaho'i bibë'e ijo hisuoho ujuohoromo huoromo simanore ba'amahareje. Ba'amahonugoromo a masijehu inömo ma-mabëhe ma'eno raromaruëhi jië'e inömo övore bamahareje. Röhu bogo inömo maho bamaho'i ma-ijahemu övore bamahareje. Bamahoromo hesi nuninö ro ague aho raromoromo sivoromo uavareje: Jew rajo jabesi börömo vaevë'e hijanuëjo. ³⁰ Hijanuëromo sabëro ödivoromo ijahoho baeniahirromo hesi simanore anareje. ³¹ Ëhi sivoruomoromo niögu ëgohojijövaho'i hesi niögu maho io'amahoromo hu'irae bava'areje korosire ano taemo'i.

Iesu korosire ano taemare jöhoje.

³² Bava'oromo örire va'ihö gavare Cyrene amo raje ae gemu hesi ihe Simon rovamu gagorovo övëro bijimö'öromo uavareje: Ave a hesi korosioho baeromo va'ëjo. ³³ Baeromo va'ëjamu ejëhoromo baeromo jabumë aho'o va'aroho ajiomoromo sa'a ihe Golgotha nosi huëhu huotovë'oho simano gijo va'ëne sa'are ë ajio suorovareje. ³⁴ Suorovonugoromo wine jovohu'o ajuo'e jovohu'o buaroharoho Iesu bojamiareje hesi vi'ehoho bisemu u'uhoröhego. Bojami jamu i garomo juahëmadeje.

³⁵ Juahëmamu korosire ano taemareje. Ano taemoromo hesi niögohoj adovoromo ajajovoromo ujuohareje. ³⁶⁻³⁷ Röhu Iesuare jö sisë jajivaroho hesi simano namore korosire ano taemareje. Jajivoromo ëhi uvë'e jiadeje: Ave aho Iesu Jew rajo jabesi a börömo höjo. Ëhi'onugoromo sa'are raromoromo hu muebejareje. ³⁸ Ëhi'o'irögoro röhu aëro anano'e vajiohu'e ae niö'i jabu'o korosire ano taemëvoromo göho ruëhi Iesuare övo manö göho viëhi övo adonö ëhi amëvareje.

³⁹ Ëhi'amu aëro rova'ë'i uvene hijiohijivoromo sivoromo ⁴⁰ uvoruomonövadeje: Asë'e sareri ae javajëjo. Jero uvane höjo: Naro God-are osa börömo dadovoromo majae niö'i gemu hesi uhure röhu maho vae barë'ejöjo. Ëhi uvë'e javaje ëhuni ja God-are Harihe javë'oho jasi arijo'arije ajamirovoromo korosire javajöho ruvebijögo bogo guomavajo. ⁴¹ Jabuhu sivarëhi priest masijöho jögoru öri röjëhijarue aribövioho a duvaho ömo'ömoheho ëho jabu'o ëhi sivoromo uarovareje:

42 Ëahuro uövuade höjo: Naro a ioro'ioroho ajëmego marëjövaje höjo. Ëhi uövuade höjo röhu hesi sino ajamirovè'oho hu bogo eni höjo. Huro uövuade höjo: Israel rajo jemesi börömo na jevajëjo. Ëhuni nadi'ego hu korosire jioromo ruvebijego no garomo mae uehorovarëjo. 43 Röhu ave jöhu'o huro uövuade höjo: God-ro na muebejevaje höjo. Hu uvaje höjo: Na God-are Harihe jevajëjo. Ëhuni nadi'ego no ga'irarëjo God iaho nimoromo ajamijego o bogo ajamijego. 44 Ëhi uarovamu gavè'i hesi bëhire vajiohu'e ae niö'i korosi'o amëvare aho jabu'o ëhi sivoromo jöe gemuoho uavareje.

Iesu guomade jöhoje.

45 Ëhi'amu majae ririre öri ari'e aho'o ramoramovadeje. Ramoramovobe va'ojuvo majae huotorovamu ajivadeje. 46 Majae huotorovoromo ajivamu Iesuro Jew rajo jabesi jöëro ma-darugo'o uvadeje: Eliajo. Eliajo. Lema sabaktaniajo. Nosi jöehu huotovè'oho God nasi Böviohajo. God nasi Böviohajo. Ja rabëni remo va'ane höjo. 47 Remo va'ane höjamu bëhire riravare a ioro'iorohuro Elia uvavamu hegorovo uarovareje: Elijah-ni uvajëjo. 48 Ëhi uarovoromo ae gemuëro ma-burëro tutuvo va'oromo u'uh'è'e inömo barueromo nioga'i'e wine jovore ba'amoromo rumorovamu ioromo ijaho viture bijiohoromo Iesu bojami'ie'adeje. 49 Bojami'ia'amu a ioro'iorohuro uarovareje: Nadi'ego no ga'irarëjo Elijah-ro hu ajami'i rovego o bogo rovego. 50 Ëhi uarovamu Iesuro röhu maho jö'e dadovoromo guomadeje.

51 Guomamu God-are osa börömo ojo göho gagonö jiajoho niögehu tugoharoho arorovo ruvebijadeje. Sa'aho hijiohijiovamu munëho arorovo'amadeje. 52 Arorovo'amamu huoho tögömoromo jiororovo'amamu God-are aribövie vuovëvade ioro'ioroho aho'obëhe i'ovo'amadeje. 53 I'ovoromo suorovoromo Iesu ri'öjamu evare va'oromo God-are osa börömo jiaje amore va'o ae aho'obëhe jabesi nunire rueruomamu garumadeje.

54 Röhu Iesu guomamu gagorovo muorovo simano vaejaje ahu'o ë hesi ariböviohu'o riravoromo Iesu muebejarohuro gavare sa'aho hijiohijiovoromo mue gö gö jiamu garomo sisë maro juhuonivoromo uvareje: Iae mae-ëjo. Ave aho iae God-are Harihe jiade höjo. 55 Ëhi'amu magonahe aho'obëhe arue riribövire riravoromo Iesu diehi'aruoho garumadeje. Urimoho ë magonahoho jaburo Galilee jioromo Iesu ajamibe hesi ijore ijore rovareje. 56 Mary Magdalene o Mary göho James o Joseph jabesi vëmoho o Zebedee-are harihu jabesi vëmoho o magonaho ioro'ioroho ëhi jioruomadeje.

Iesuare sino munë gagore bamare jöhoje.

57 Iae majae garobo'e bamamu bövie bise'e eni jië'e ae gemu hesi ihe Joseph-ro rovadeje. Hesi amoho Arimathea jio'i hu'o Iesuare ijoraje jiadeje. 58 Ëhi jië'ëro huro va'oromo Pilate uavadeje: Uevego na Iesuare sinoho bae'iröjo. Bae'iröjamu Pilate-ro ae uëvadeje: Va'o sinoho ave aho babojamego bava'irajo. 59 Babojamamu Joseph-ro baeromo niögu i'ohuro numadeje. 60 Numoromo Joseph guomego hesi sino bamo'iröhego uvadire Iesuare sinoho ë bamadeje munë gage i'e ubuvè'ëro jië'ëro. Bamoromo munë börömo höhö barueromo ojoho

tugohonugoromo va'adeje. ⁶¹ Ĕhi'amu Mary Magdalene'o Mary göhu'o Iesu bamarire ë nunoho bamoromo ëhi arijareje.

Iesu bamarire atovare jöhoje.

⁶² Ĕmajaho Friday jiadeje. Friday jiamu momorö'öjè'ëro sisonu-vamugo Jew rajo priest masijohu'o Pharisee ömo'ömohu'o rueromo Pilate'o gagovoruumadeje. ⁶³ Gagovoromo Pilate uavareje: Gavanaajo. Iesu hu sareri sareri'e ae jiade höjo. No uehorovoromo uvaruëjo: Mami'e hu bogo guomë'e hijadevare evare sareramuiromo uövuade höjo: Guomoromo majae niö'i gemu hesi uhure i'ovoromo ri'ö'ejöjo. ⁶⁴ Ĕhuni ae uëvego huoho tugohoromo majae niö'i gemu ëhi atovo'irarëjo. Ĕhesi bëhoho no juhuoninaguajëjo Iesuare ijore ijore jijiharue ariböviohuro hure va'oromo hesi sinoho vajiohëro baeromo ae aho'o sarerëmiromo uëjöëni: Iaho guomoromo ri'öjè'e höjo. Ĕhi jië'e sareri'e jö atë'o'ho ëhuro urimo Iesuro mae uövuajëromo aribövioho ma-bisemu sisërërovaroho avevejö'oho ri'öjade jöho mae höromo börömo bëhe sisërërovo avoho'aruëjo. Ĕhuni huoho avoho tugohojöro naguajëjo. ⁶⁵ Tugohojöro naguajëjamu Pilate-ro uëvadeje: Muorovo aribövioho ujuoho va'ego atovo'irarëjo. Huoho diehi tugohoi' uehorovarujëhi ëhi tugoho garëjo. ⁶⁶ Ĕhi uëvamu va'oromo tugohoromo sivaëro badihi taemareje. Taemoromo muorovo aho ë nugo'amareje huoho atovoröhego.

28

Iesu ri'öjade jöhoje.

¹ Iae Jew rajo nuho majaho barëjamu nëröho hura börömo'ho sisonuvo'ie'adeje. Sisonuvo'ia'amu Mary Magdalene'o Mary göhu'o jaburo niö'iro Iesu bamaroho ga'i va'areje. ² Va'amu sa'aho hijio-hijiovadeje. Ĕhesi bëhoho Badare anerae gemuëro ö'idöre jioromo ruvebiromo Iesu bamoromo ojo tugohare munëho höhö bava'adeje. Bava'oromo ë munë döre hijadeje. ³ Amo anera hesi nu ano'oho baderivoromo ajivajëhi ëhi jiadeje. Hesi niögoho ajivoromo sa buso va'ëne jiadeje. ⁴ Ĕhi jiamu gagorovo muorovo aribövie munë muebejarohuro ëho garomo juhuonivoromo butubutumoromo sa'are rireromoromo vuovë'e ahuro momorö'öjanovadeje.

⁵ Ĕhi'amu magonahoho jaburo rovamu gagorovo anerahuro uëvadeje: Nadi juhuonivohëjo. Na gavajoho jemë korosire anamu guomade a hesi sinoho naharujëjo. ⁶ Hu aveho bogohöjo. Guomoromo ri'öröhëni uëvadëhi ëhi ë'ë'e höjo. Ro hesi sinehu raromade sionoho gahëjo. ⁷ Garomo ma-burëro va'oromo hesi ijorajo ömo'ömoho uërëjo: Iesu guomoromo ri'öjè'e höre. Huro urimo Galilee sa'are va'iramu jemëro ijore ö'oromo ga'a'arujëre. Ave naehu uëvaje jöho uehorovorëjo. ⁸ Ĕhi uëvamu hegorovo juhuonivë'i sisë maro nimorohoromo hure jioromo tutuvoromo Iesuare ijorajoho jöho majëhi'i va'areje.

⁹ Va'amu gavë'i Iesuro birohëvadeje. Birohëvoromo uëvadeje: Vaevë'e jëvajëjo. Vaevë'e jëvajëjamu rueromo hesi höroho gudu-amoromo rajahijareje. ¹⁰ Rajahijamu uëvadeje: Nadi juhuonivohëjo.

Va'oromo nasi ö ömo'ömoho uërëjo: Galilee sa'aro va'orëjo. Iae na ë ge'a'arujëjo. Ëhi uërëjo.

Iesuare sino atovare ariböviehu priest jö majëhijamu priest jabuhu nijio'irajëvade jöhoje.

¹¹ Ëhi uëvamu va'areje. Magonahoho jaburo va'irögoro muorovo a ioro'ioro Iesuare sino muebejarohuro amo börömore vuonorö'ö va'areje. Va'oromo priest masijoho uëvareje: No hu muebejaroho ëhi ëhi jiade höjo. ¹² Ëhi majëhijamu hegorovo priest masijohuro uëvareje: Jew rajo a duvahohumë ro gagovohëjo. Gagovohëjamu gagovorovoromo jöho mevoromo avohonugoromo ijo bajo böröme muorovo aribövioho suvuorëmiromo ¹³ uëvareje: Jemëro ae majëhiromo uënövorëjo: Vahi'e noro momorö'ö'i bogo gavamu Iesuare ijore ijore jijiharue ariböviohuro sinoho vajiohëro bava'ë'ëro ëhu'ëro Iesuare huoho gagemu höjo. ¹⁴ O momorö'öjarije jö gavanahu hejë'oho noro hu sanuami'ejarejo. Sanuami'iramu hu huë vavaenoho jemesi öriroho bogo bojëmi'ajëjo. ¹⁵ Ëhi uëvamu hegorovo rue muorovo ariböviohuro ijo bajoho ujuohoromo Jew rajo a masijehu ae majëhiröhego uëvarëhi ëhi majëhibe jijihonövareje. Ëhi majëhibe jijihonövë'ëro ëhu'ëro Jew raje ae aho'obëhe ë jöho atarueje.

Iesuhu hesi aribövi jabesi nunire rovade jöhoje.

¹⁶ Iae Iesuare ijoraje 11-ho jaburo Galilee sa'are va'oromo Iesuhu birohëvo'iröhëni uëvade dahorure ë iojiomareje. ¹⁷ Iojiomoromo hu garomo rajahijareje. Röhu ijorajo ioro'iorohuro uvareje: Na aveho Iesu höjo o ae gö höjo. ¹⁸ Ëhi'amu Iesuro bëhire rueromo uëvadeje: God-ro nasi örire daruge bojëmijë'e höjo mue aho'obëhe ö'idöre o sa'are jio'amajoho naro muebe'amo'irodego. ¹⁹ Ëhuni sa'ae dinö'e dinö'e va'oromo ae aho'obëhe ajëmibe jijihorego jabu'o nasi ijore ijore jijijho'irarëjo. Ëhi ajëmiromo Vavu hesi ihoro Harihu nasi ihoro God-are Aru'aho hesi ihoro bapataeto vaejëvobe jijihorëjo. ²⁰ Bapataeto vaejëvoromo naehu mu rabe rabe bojëmodoho ëho röjëhibe jijihorego jaburo nasi jöho ejeho'irarëjo. Ëhi ë'iramu naro jemë'o gemu mae juvemu juvobe va'iramu sa'ae bövie bise'e barë'ajëjo.

MARK

Bapataeto vaejaje ae John-hu jö majëhinövade jöhoje.

¹ God-are Harihe Iesu Kerisohu mu mae barovade jöho na jajivo'ie'e. Ëmu ma aevadoho ëhi jiadeje. ² Mami gö'e hu bogo rovadevare evare jö God-aro baeromo majëhinövade ae Isaiah-ro ë mu maehu sa'are rueröhe jöho God-are surire jajivadeje. God-hu Keriso-are örire jövade jöho jajivoromo uvë'eje:

Ave aho God nasi jö bajuvaie aho höjo.

Ja va'ie'iroho naro hu urimo nugö'ö'iramu va'oromo ae uë'a'ajëjo jaehu va'irane öroho iogoro'iröhego.

³ Aëro a rumo'e sa'are hiromo ma-darugo'o uvo'a'ajëjo:

Badahu rueröhe öroho avohorego hu maro rue'irajo.

Hesi öroho ahorirëro vajivorego hu maro juvo'irajo.

⁴ Ëhi ë'iröhego Isaiah-hu jajivadëhi iae ëhi John-ro ijönö rueromo a rumo'e sa'are ro hijadeje. Hiromo aribövioho rueruomo'ego bapataeto vaejëvoromo jöe majëhinövadeje. Majëhiromo uënövadeje: Uehoro sisëho vuonugo'i uehoro mae baeromo bapataeto vaehego God-ro jemesi sisëho uehorovoromo vuonugëhajo. ⁵ Ëhi'ego Jerusalem amo rajoho aho'obëhe o Judea sa'a ioro'iorore raromarue aribövioho aho'obëhe ëho jaburo rueromonövadeje. Rueromo jabesi sisëho huruoho'ego John-ro Jordan jovore bapataeto vaejëvonövadeje.

⁶ Röhu John niöge camel mi uehu avohë'e niögu sisëho ruohoromo mi sinehu avohë'e götaho dë'ahore ba'amoromo juvonövadeje. O hesi ioho hu guajuguajue vuome ëhi ibe juvonövadeje. ⁷ Röhu hu jöho ëhi uënövadeje: Ae gö nasi ijönö rue'ie'ajëjo. Huro na iosiremiromo börömoho höjo. Naehu hesi mu bise'o vaejahoromo uruho'amoromo höru sino jiovaho'ibejodoho o mu bise'o bise'e rabe vaejaho'ibejodoho röhu na ma-bise'e jevajëjo. ⁸ Na ma-jovëremu bapataeto vaejëvë'e jevajëjo. A'i ë ahuro God-are Aru'ahohuro bapataeto vaejëvo'ie'ajëjo.

Iesu bapataeto vaejamu Satan-hu dinamijade jöhoje.

⁹ John-ro ëhi jië'e muoho vaejamu Iesuro Galilee sa'are Nazareth amore jioromo rovadeje. Rueromo uavamu John-ro ë Jordan jovore bapataeto vaejadeje. ¹⁰ Bapataeto vaejamu gagorovo Iesuro jovore jioromo rojo ionire nami'i gavadeje ö'idöho arorovo'ego God-are Aru'ahe guaho va'ënohuro hesirire ruvebijamu. ¹¹ Ruvebijamu gavë'i ae aho'obëhe hejareje ö'idöre uvavamu: Ja nasi Harihu mabëhe javajëjo. Na ja garomo ëhuro nasi dë vövöbajo'ocho nimorohevajëjo.

¹² Ëhi uvamu gavë'i God-are Aru'ahohuro darugo'e jöho Iesure dë vövöbajo'ere bojamamu huro ri'öromo a rumo'e sa'a göre ajiomadeje. ¹³ Ajiomamu huro God-are jöho ahojöro Satan-ro hesi dëho bijioho ga'i hijadeje. Bijioho ga'i hijamu je'o mí sisë jioruomajinö ë hijadeje röhu aneraëro ajamareje. Ëhi'obe va'adoho majae 40 barëjadeje.

Iesuhu uëvamu visu suovarue ae 4 jabuhu aevoromo hesi ijore ijore jijihare jöhoje.

¹⁴ Ĕhi'amu aĕro John guduamo bava'oromo savoji gagore ba'amareje. Savoĵi gagore ba'amamu evare Iesuro Galilee sa'are aĵiomoromo God-are jĵo maho majĕhinĵvadeje. ¹⁵ Majĕhiromo uĕnĵvadeje: God-are maja bĵrĵmoho rovĕ'e hĵjo. Jemĕ iae ga'iĕ'arujĕjo God-ro bĵrĵme namiromo muebejĕvego. Ĕhuni uehoro sisĕho vuonugo'i God-are jĵo maho mae uehorovohĕjo.

¹⁶ Ĕhi'oromo iae Galilee e'u rirĵre juvadeje. Juvo'i gavadeje Simon'o Andrew'o ĵ'o ĵ'o visue suovarue aĕro jĕvĕ'ĕro viĵho jovore ba'amamu. ¹⁷ Viĵho jovore ba'amamu gĕgorovo uĕvadeje: Nasi iĵoro iĵoro ruehĕjo naro rĵjĕhijego jemĕro bogo visuoho gagovo'i a'i ae magonahe gagovĕvego nasinĵ jioruomo'irĵhe hĵjo. ¹⁸ Ĕhi uĕvamu hejĕ'i jaburo viĵho ĕhi vuonugo'i aevoromo hesi iĵore iĵore jirehonĵvareje.

¹⁹ Ĕhi'amu Iesuro ma-bisemu va'anovo'i gavadeje Zebedee-are harihe niĵ'i James'o John'o ĵ'o ĵ'o jabesi boat gagore ariĵamu. Ariromo jabesi viĵho sigohijamu gĕvĕ'i ²⁰ uvĕvadeje: Ruehĕjo. Ruehĕjamu hegorovo jaburo jabesi vavue Zebedee hesi mu vaeĵarue aribĵviohu'o gemu mae boat-re hijajoho vuonugo'i aevoromo Iesuare iĵore iĵore jirehonĵvareje.

Satan-are aru'aho sisĕ ae gemu hesi dĕre ĵiamu Iesuhu rarovĵ'ĵjade jĵhoje.

²¹ Ĕhi'oromo Iesumĕro rue Capernaum amore va'areje. Va'oromo God-are nuho majaho rovamu Iesuro God rajahĵarue osare va'oromo God-are jĵo bĕhoho rĵjĕhijadeje. ²² Rĵjĕhijamu heromo tiĵromo uvoruumadeje: Hesi jĵho darugo'e jĵo ma-mabĕhe javavajĕjo. Ĕhi uvoruomade hesi bĕhoho Jew rajo jĵgoru ĵri rĵjĕhijarue aribĵviehu rĵjĕhijarĕhioho hu bogo ĕhioho majĕhi'i a'i hesi birire baejĕ'ĕro jĵho majĕhijadeje.

²³ Jabumĕro ĕhi uvoruomamu rĵhu evare majare Satan-are a sisĕhu dĕre abuejĕ'e aho ĕ osare hijĕ'ĕro ma-darugo'o uvadeje: ²⁴ Iesu Nazareth rajoho ja rabĕni sihusihuaguo'i rovane hĵjo. Na ja iĵumavuo'iĕ'anuĕjo. Na iae ja gavajĕjo. Ja God-aro jioromo rovĕ'e a ma-maemu ĵiĕ'e ae javajĕjo. ²⁵ Ĕhi uavamu hejĕ'i uavadeje: Jĵho vuonugo'i hĵrĵjĕjo. ²⁶ Hĵrĵjĕjamu hejĕ'i uhure a sisĕhuro ĕ a hesi simanoho huotovahamu bijĵbijĵvoromo ĵvo'o hĵru'o aĵiomadeje. Ĵvo'o hĵru'o aĵiomamu a sisĕhuro jĵ'e dadovoromo hĵrĵromo va'adeje. ²⁷ Hĵrĵromo va'amu ĕ aribĵvioho aho'o tiĵjĕvadeje. Tiĵromo berohoromo uarovareje: Aveho mu rabe hĵjo. No bogo heĵarue jĵho jĵvajĕjo. Ĕiaho daruge baejĕ'ĕro ĕhu'ĕro huhu jĵo bojĕmijĕ'oho aru'aho sisĕho jabu'o eĵaharue hĵjo. ²⁸ Ĕhi'amu Iesuhu vaeĵaje mu hesi jĵho ĕ Galilee sa'are raromaruoho aho'o hebe va'areje.

Iesuhu guomo guomo'e ae aho'obĕhe aĵĕmade jĵhoje.

²⁹ Ĕhi'amu Iesumĕro God rajahĵarue osare ĕ jioromo va'areje. Va'oromo Iesuro James'o John'o gemu mae va'oromo Simon'o Andrew'o ariĵarue osare rovarĕje. ³⁰ Rĵhu Simon-are ĵure magonaho hesi sino haho'oho vĵrĵ'iraejamu rĵhore raromĕ'e ĵiadeje. Raromamu Iesuro osare rovamu gavĕ'i ĕ aribĵviohuro uavareje: Ave magonahoho guomo guome baejĕ'e hĵjo. ³¹ Baejĕ'e hĵjamu hegorovo Iesuro rueromo ĵvore ma'enoromo banigoĵiomadeje. Banigoĵiomamu sino haho'ere vĵrĵ'iraejadoho u'uhadeje. Vĵrĵho u'uhamu hegorovo magonahohuro ri'ĵromo iruno'e avohĕhadeje.

³² Avohëhë'ëro majae beva'amu gagorovo aëro guomo guomo baejê'e aribövioho aho'o Satan-are a sisëhu dëre abue'amê'e aribövioho aho'o êhi ujuoho rueruomadeje. ³³ Amo raje ae aho'obêhe rueromo Simon-are ojanore gagovoruomadeje. ³⁴ Gagovamu Iesuro guomo guome gö gö baejê'e ae aho'o jabesi sinoho avohëhoromo aru'aho sisëho aho'o a jabesi dëroho rarovö'öjêvonövadeje. Rarovö'öjêvoromo ë aru'aho sisëho uënövadeje: Jöe nugohëjo. Nadi nasi jöho huruohohëjo. Iesuhu êhi jiê'e jö jövade hesi bëhoho ë aru'aho sisëho jaburo gavê'ego hu êhi jiê'e ae jiamu garuomê'ego êhuni jövadeje.

Iesuhu Galilee sa'are jö majëhibe juvade jöhoje.

³⁵ Êhi ë'ë'ëro sisonuvo'i titimamugo Iesuro ri'öromomo va'o a rumo'e sa'are hiromomo ë parie vaejadeje. ³⁶ Parie vaejamu Simon-mëro Iesu nahobe rovereje. ³⁷ Nahobe rueromomo bihoromomo uavareje: Ae aho'obêhe ja nahavaruëjo. ³⁸ Nahavaruëjamu Iesuro uëvadeje: Ruehego no amo göre göre va'arëjo naro God-are jöho amo ioro'iorohu'o majëhi'irode höjo. Êhesi bëhoho na êhi ë'irodëro rovode höjo. ³⁹ Êhi uëngoromomo va'oromomo God-are jöho Jew rajehu God rajahijarue osare osare majëhibe Satan-are aru'aho sisëho a jabesi dëroho rarovö'öjêvobe êhi'obe Galilee sa'ae bövioho juvo barëjadeje.

Iesuhu sino jomo'e a ajamade jöhoje.

⁴⁰ Êhi'amu iae sino jomo'e ae gemuëro rueromomo ague aho hiromomo êninamiromomo uavadeje: Ja nasi sino avoheho'iranoho ja eni javajëjo. Êhuni jasi nimoromomo ajemijê'ohuro iae ajemi'anuëjo. ⁴¹ Ajemi'anuëjamu Iesuro huni vavaenimoromomo övoho nugö'öromomo sinoho rëhahoromomo uavadeje: Iae na negajëjo ajami'iro. Marëjëjo. ⁴² Marëjëjamu gavê'i jomoho rireromomomo hesi sinore sisë sisëho barëjadeje. ⁴³ Barëjamu gavê'i Iesuro hu nugö'öromomo darugo'e jöho uavadeje: ⁴⁴ Aveho hejëjo. Nadi aho uënëjo. A'i ma-va'iranoho jasi sinoho priest röjahego ga'irajo. Êhi'ego Moses-hu uövuade êhi jiê'e suvuoroho God-are öroro bojamego aëro garomomo uvo'irarëjo: Jasi sinore sisëho barëjê'ëro iae mae javajëjo. ⁴⁵ Êhi uavamumu rue ahuro Iesuarë jöho bogo ejaho'i va'oromomo Iesuhu ajamade jöho ae majëhibe juvadeje. Ae majëhibe juvamu ae aho'obêhe hebe va'amu Iesuro urimo ë'onövadëhi amore amore ma-va'orahoro juvo'ië'oromomo gavade ae aho'o hu ga'i tagavamumu gëgorovo vuonugo'i a rumo'e sa'are va'o hijadeje. Hi'ego ae aho'obêhe dinö'e dinö'e jioromomo hu ga'i ruenövareje.

2

Övo höru'e vuovahë'e a Iesuhu ajamade jöhoje.

¹ Êhi'amu iae majae gemu niö'i barëjamu gagoro Iesuro Capernaum amore vuonorö'ö rovadeje. Rovamu ae aho'obêhe hejare uvamu: Iesu hesi osare hijajë uvamu hegorovo ² rueromomo ë gagovoruomadeje. Gagovoruomamumu röhe aho'obêhe osaho ojanoho rarovo barëjadeje. Rarovo barëjamu huro God-are jöho majëhijadeje. ³ Majëhijamumu evare ae êhi niö'i êhi niö'i jaburo övo höru'e vuovahë'e aho maratuore giojimo barue'i a ioro'iorohuro ma-namijëho rovereje. ⁴ Rueromomo Iesuarë bëhire rue'ië'oromomo gavare ae aho'obêhe tagavoromomo röhohe rarovê'e jiamu gagorovo javu dönö ba'ojiomoromomo Iesuarë simano

namonö dadovareje. Dadovoromo maratuohu'o ëhi nume osare ba'amareje. ⁵ Ba'amamu Iesuro gavade ile rovere ariböviohuro hu ma uehorovoruomamu gëgorovo övo hörue vuovahë'e aho uavadeje: Harihëjo. Jasi sisëho uehorovoromo vuonugoromo mu'u barëjahë'e höjo. ⁶ Mu'u barëjahë'e höjamu hegoroovo Jew rajo jögoru öri röjëhijarue a ioro'iorohuro ë raromoromo jabesi simanëro uehorovoromo uvoruomadeje: ⁷ Asë'ëjo. Ave aho rabëni ëhi jië'e jöho jövajëjo. Ëhi jië'o'oho huro God-are ihoho ijumajëjo. Hu ma-ae höjo. Röhu huro ë aho uavajëjo: Naro jasi sisëho uehorovoromo vuonugoromo mu'u barëjahë'e jevajëjo. Ëhi jië'e muoho hesi God-ro gemuëro vaejaje höjo. Ma-aho bogajo. ⁸ Ëhi uehorovamu Iesuro hesi dë vövöbajol'ëro gëromu uvadeje: Jabumë ëhi uehorovaruëromu uëvadeje: Jemë rabëni uehore gö gö baejarujëjo. ⁹ Jemë'o uehorovohëjo. Ave övo hörue vuovahë'e aho nani ja ëma ua'a'anuëjo: Jasi sisëho uehorovoromo vuonugahë'e hö ua'a'anuëjo. Ja ëhi ua'ibejanëjo aho nunoho bogo ga'ibejarëjo ja mae o sarere jövë'e javego. Röhu ja bogo ëma ua'a'anuëjo: Ri'öromu jasi maratuoho banigojiomoromo nami juvëjo hesi guomo guomoho bogo barëjago ja javojagöjëni. ¹⁰ Röhu ë bogo ëma jövo'ibejane jöho iae na jövo'ejëjo huro ejehoromo ri'ö nami juvego jemëro ë muoho garomo ëhuro ga'irarijago God-are A Maho naro sa'are hijajire evare sisë mu'uvaje darugoho ëhu'o baejë'e jevego. Ëhi uënugoromo röhu övo hörue vuovahë'e aho uavadeje: ¹¹ Naro ja uavajëjo: Ri'öromu raromanue maratuoho banigojiomoromo baeromo jasi osahuro va'ëjo. ¹² Va'ëjamu hejë'i ruehuro ri'öromu maratuoho ma-burëro banigojiomoromo baeromo ae aho'obëhe jabesi nunire höröromu amonö va'adeje. Höröromu va'amu gagorovo ë ariböviohuro aho'obëhe tiö'i God rajahiromo uarovareje: Asë'ëjo. Ëhi jië'e mu börömoho urimoho no bogo gavare höjo.

Levi-hu Iesuarë ijore ijore juvoröhego Iesuhu uavade jöhoje.

¹³ Ëhi'amu iae Iesuro amore jioromo va'oromo röhu maho Galilee jovo e'u riröre va'adeje. Va'amu ae aho'obëhe ijore va'oromo hesi bëhire gagovoruomadeje. Gagovamu gagorovo jöho röjëhijadeje. ¹⁴ Röjëhi barënugoromo va'adeje. Va'i gavade tax baejaje ae hesi ihoho Levi Alphaeus-are harihoho hesi mu vaejaje osare hijamu gagorovo uavadeje: Rueromo nasi ijoro ijoro juvonövonëjo. Juvonövonëjamu hegoroovo ri'öromu aevoromo Iesuarë ijore ijore juvonövadeje.

¹⁵ Ëhi'amu Iesumëro Levi-are osare ie ue'ahamu evare tax baejarue ae aho'o sisë aribövie aho'o urimo Iesuarë ijore ijore jiji-honövë'ëro jië'ëro ëhu'ëro ëho jaburo rueromo Iesu'o hesi ijorajo ömo'ömohu'o gemuoro ioho ue'ahareje. ¹⁶ Ie ue'ahamu gëgorovo Pharisee aribövie Jew rajo jögoru öri röjëhijarue ariböviohuro gavare Iesuro sisë ariböviohu'o tax baejarue ariböviohu'o ëho jahu'o gemu mae ie ijamu gagorovo hesi ijorajo ömo'ömoho uëvareje: Asë'ëjo. Hu rabëni tax baejarue ariböviohu'o sisë a ioro'iorohu'o gemuoroho hiromo ioho ijajëjo. Ëhi jië'o'oho sisë höjo. ¹⁷ Ëhi jië'o'oho sisë hö uvavamu hegoroovo Iesuro hu'o heromo ë Pharisee aribövioho uhu'e uëvadeje: Jemëhu nasi aribövi ëhi uëvarujoho röhu guomo guomo'e ariböviohuremu doctor gavarue höjo mae jëvë'e aribövioho bogajo. Ëhesi bëhoho naro sisë

aribövioho nasinö jëvojöro uë'i rovode höjo ma-döemu mae jëvë'e aribövioho bogajo.

Bëhoho rabëni Iesuare ariböviehu i bogo vuonugare jöhoje.

¹⁸ Èhi'amu iae John-are ijore ijore jijiharue ariböviohu'o Pharisee ariböviohu'o èho jaburo God uehorovo'i ioho vuonugareje. Ioho vuonugamu aëro rueromo Iesu uavareje: John-are jö o Pharisee jabesi jö hejarue è aribövioho jaburo ioho vuonugarue höjo. Röhu jasi aribövioho rabëni bogo èhioho ioho vuonugarue höjo. ¹⁹ Rabëni bogo èhioho ioho vuonugarue höjamu hegoroovo Iesuro uëvadeje: Nasi ijore ijore jijiharue ariböviehu i bogo vuonugarue hesi bëhoho naro uhu'e uë'ië'ajëjo. Na jemëro uvarujëjo: I'o masu'iröhe a hesi söröre rueromo aemo'aemëro ioho vuonugo'aruëjo. Bogo èhioho jio'i a'i i'o masuröhe aehu jabu'o hijajevare evare ioho ue'aho'aruëjo. ²⁰ Röhu majae ijönö i'o masuröhe aho aëro guduamo bava'iramu evare ioho vuonugo'aruëjo. Avevejö'oho naro jabu'o hijë'ego jabu ioho bogo vuonugo'aruëjo.

Jew rajehu gororovo'iröhe jögoru mamiohu'o Iesuhu barovade mu i'ohu'o bogo gemuore havo'iröhe jöhoje.

²¹ Èhi uëngoromo Iesuro uhu jöe gö'o majëhiromu uëvadeje: Niögu i'ohu'o mamiohu'o bogo havo'anuëjo. Bogo havoromo niögu mami dadovadiroho niögu i'o hesi vituoho baeromo niögu mami hesi gagoroho bamoromo sigohi'anuëjo i'ohuro duduhivoromo mamioho ruho barovego dadovego gagoho böviræjëni. ²² O wine jovo mi sino gagore bigu'ië'iroho jovo i'ohu'o mi sino mamiohu'o bogo gemuoroho havoromo jovo i'oho mi sino mamiroho bigu'anuëjo. Èhi è'ibejanëjo jovohuro gatovoromo ögohuro bibivoromo mi sinoho mamiëro jië'ëro tögömoromo ioro'ioremu dadovego jovoho rova'o barë'ibejajo. A'i jovo i'oho mi sino i'o hesi gagoremu bigu'anuëjo.

Jew rajehu nuharue maja hesi jöhoje.

²³ Iae Jew rajo nuho majaho rovamu gagorovo Iesumëro mure jijihareje. Jijihoromo hesi ijorajo ömo'ömohuro ioho babovoromo ue'ahobe va'areje. ²⁴ Babovoromo ue'ahobe va'amu Pharisee aribövieho Iesu uavareje: Asë'e jaruvoho nuho majae höjo. Jasi ijorajo ömo'ömehu i avoharuoho èho nuho maja hesi jögoroho aharuëjo. Jabumë rabëni èhi jië'oho è'aruëjo. ²⁵ Èhi uëvamu Iesuro uëvadeje: David nosi a böröme jionövade höjo. Röhu hu'o hesi ariböviohu'o ie bogojëvoromo hömëvamu huhu è'ade jö God-are surire adaharijoho èho diehi'oromo bogo avoho uehorovarujëjo. ²⁶ Abiathar priest böröme jiadevare evare David-ro God-are osa mare va'ade höjo. Va'oromo God-are nunire bahijare ioho ujuohoromo vituoho i'i vituoho hesi aribövioho i'imëmamu ue'ahare höjo. Èhi jië'e ioho bogo aho ue'aho'i hesi ma-priest-ëremu ue'aho'iröhe ie höjo. Röhu jabuhu ue'aharohuro èhuro jögoroho ahare höjo. Röhu è hesi jöho bogojiade höjo. ²⁷ Èhi uëngoromo uëvadeje: God-ro nuho majaho bamë'e höjo ae ajamui'iröhëro. Bogo aho bamavuade höjo nuho maja hesi jöho e'iröhego. ²⁸ Èhu'ëro God-are A Maho naro nuho maja hesi jögoroho èhu'o muebejaje höjo.

3

Ōvo guomahē'e a Iesuhu ajamade jōhoje.

¹ Ĕhi'amu iae Iesuro God rajahjarue osare rumo va'adeje. Amo ě osare ōvo hitahi guomahē'e aho hijē'e jiadeje. ² Hijamu gagorovo aěro ě raromē'ěro Iesuare jō sisēho nahoromo uvareje: Iesuhu ě a hesi ōvo avohēhē'o ho noro a masijoho huruoho majēhiromo uē'ějarějo: Iesuro a ajamaje muoho vaeromo nuho maja hesi jōgoroho ahade hōjo. Ĕhi uvoromo jabuměro ma-hu gemu ěrimahareje ga'iro nuho majare huro ě a hesi ōvoho avohahego o bogo. ³ Ĕrimahamu Iesuro ōvo guomahē'e aho uavadeje: Ave a nunoro rovějamu rovadeje. ⁴ Rovamu hu bijōnimoromo ěrimaharuoho uěvadeje: Nosi jōgoroho diehi hōjo. Nuho majaroho na ae mae vaejěvo'ějarějo o sisě vaejěvo'ějarějo. I'ověvo'ějarějo o muo'amo'ějarějo. Ĕhi uěvamu rue aribōviohuro majōrumoraejareje. ⁵ Jōrumoraejamu Iesuro uvadeje: Ĕaribōvioho hia'i biriri'e aribōvie jioruomajě uvoromo huě vavaeni bōrōme baeromo dě vōrōnimamu uherihoromo ě aribōvioho gěvadeje. Gěnugoromo ōvo guomahē'e aho uavadeje: Jasi ōvoho nugō'ōjějo. Ĕhi uavamu hegorovo ōvoho nugō'ōjamu marějadeje. ⁶ Marějamu gagorovo rue Pharisee aribōviohuro suorovo va'oromo sa'are a bōrōme Herod nimarue aribōviohu'o gemu mae gagovoromo Iesu anorōhe jōho mevoruomadeje.

Ae aho'oběhe e'u rirōre raromare jōhoje.

⁷ Ĕhi'amu Iesuro hesi ijorajo ōmo'ōmohu'o gemu mae ě amore jioromo va'oromo Galilee e'u rirōre abuejadeje. Abuejamu ae aho'oběhe mae Galilee sa'are jioromo hesi ijore rueruomadeje. ⁸ Rueruomamu rue Jerusalem amore Judea sa'a ioro'iorore jioromo arue Idumea sa'are jioromo ruhe Jordan jovo ioro'ioro gōnō jioromo nume Tyre amo'o Sidon amo'o jiajinō ě ae aho'oběhe jioromo Iesuhu mu masijo vaejaje jōho hegorovo hesi ōrire rueruomadeje. ⁹ Rueruomamu gěgorovo Iesuro uvadeje: Ae aho'oběhe jioruomē'ěro nani jabuměro na tati-jiomevoruomajě uvoromo hesi ijorajo ōmo'ōmoho uěvadeje: Boat harihe avohehego na ě hi'irōjo. ¹⁰ Rōhu Iesuro hu tatijiomorōhe jō uehorovade hesi běhoho huro ae aho'oběhe avohěvamu mae jio'amě'lego guomo guomo'e aho aho'oběhe gōěro gō bijimō'ōbe iosiramirovobe rue'iě'areje hu rěhego mae jěvorōhego. ¹¹ O Satan-are aru'aho sisě a jabesi děre raromaroho ěho jabuhu Iesu gavě'iroho hesi nuninō behumorovo'amoromo ma-darugo'o uvonōvareje: Ja God-are Harihe javajějo. ¹² God-are Harihe javajě'ego Iesuro ě aru'aho sisěho uěnōvadeje: Jōe nugohějo. Na rahu jevajoho bogave aho huruoho majěhi'irarijějo.

Iesuhu hesi ijoraje aho'o 12 baejěvade jōhoje.

¹³ Ĕhi'onugoromo iae Iesuro dahorure ajiomoromo hesi baejěvo'i nimade aribōvioho uěvadeje: Ruehějo. Ruehějamu rovarěje. ¹⁴ Rovamu ae aho'oběhe 12 baejěvadeje hu'o gemu mae raromo jijihō'irōhego. O rěmō'ōjěgo hesi jōho ae majěhibe jijihō'irōhego. ¹⁵ O Satan-are aribōviehu a děre jioruomajoho uěvego suorovoromo va'oruomorōhego. ¹⁶ Rōhu baejěvade aribōvi jabesi ihoho ěhi jěvadeje. Simon baejadeje. Rōhu Iesuro iho gōho Peter jumuvadeje. ¹⁷ Rōhu

Zebedee-are harihe niö'i James'o John'o ö'o ö'o baejövadeje. Röhu Iesuro jabumë niö'i ihe Boanerges jumëgadeje. Jabesi jöho Boanerges iho bëhoho nosi jöho vajerehu anajëhi ëhi jëvë'e ae jëve. ¹⁸ Röhu Andrew Philip Bartholomew Matthew Thomas o Alphaeus-are harihe James o Thaddaeus o Simon ëhi baejövadeje. Röhu Simon hu Jew rajehu jabesi mueberovo'i nimade aho jiadeje. ¹⁹ O Judas Iscariot hu'o baejadeje. Judas Iscariot hu ijönö Iesuni hiruëmiromo a jabesi övore bojëmi'iröhe aho jiadeje.

Iesuhu Satan-are aribövi a dëre jio'amamu rarovö'öjëvadoho hu bogo Satan-are darugoho baeromo ëhioho ë'adeje. Èhesi jöhoje.

²⁰ Èhi'onugoromo Iesu va'oromo hesi osare hijadeje. Hijamu ae aho'obëhe mae röhu maho hu ga'i ro gagovamu ëhuro Iesu'o hesi ijorajo ömo'ömohu'o i ue'aho'iröhoho bogo eni jëvadeje. ²¹ Bogo eni jëvamu hesi aganohuro ëho heromo uvareje: Nani Iesuale simanoho sisërëjahë'e höromo hu guduamoromo hu'irae bava'i rovareje.

²² Èhi'amu Jew rajo jögoru öri röjëhjarue ariböviohuro urimo Jerusalem jioromo rovë'ëro atoromo uvonövareje: Iesu hu Beelzebul aru'aho sisë dëre jiajëjo. Sisë a börömohuro vöröho bojamijego ëhuro a dëre aru'aho sisëho rarovö'ö'amaje höjo. ²³ Rarovö'ö'amaje höjamu hegorovo Iesuro uëvadeje: Ruehego na jöe majëhijöjo. Majëhijöjamu rovamu uhu'e uëvadeje: Diehi'oromo Satan-ro hesi aru'aho sisëho rarovö'öjëvojöro uvarujëjo. ²⁴ Sa'ae gemuehu adovoromo jabesi arijo'arije muorovë'o ho ë sa'aho bogo biririvo'i barërovo'ajëjo. ²⁵ O agane gemuehu adovoromo jabesi arijo'arije muorovë'o ho ë aganoho bogo biririvo'i barërovo'ajëjo. ²⁶ Èhuni Satan-ro ri'öromo hesi ariböviohu'o muorovo'ibejajo hesi darugoho uehoroho muoho bogo biririvo'i barë'ibejajo.

²⁷ Röhu aehu darugo'e a hesi osare rumo va'oromo hesi mae sisë ujuohaho va'ie'iroho bogo ëma ujuohaho va'irögoru urimo darugo'e aho guduamoromo tövonugoromo evare hesi inömo inömoho ujuohaho va'a'ajëjo. Naro Satan ëhi ruahö'öjaje höjo.

²⁸ Ave jöho na jö mae uë'ie'ajëjo. Aehu mu sisë vaejë'o ho God-are iho ijumarue jö sisë atë'o ho aho'o God-ro uehorovoromo vuonugëho'ajëjo. ²⁹ A'i God-are Aru'aho hesi iho ijumë'o ho ëhi jië'e jö sisëho God bogo mae bogo uehorovoromo vuonugo'i ë mu sisë vaejë'o ho ë hesi i'uoho ma-ioro'iore gemu baerumo'ajëjo. ³⁰ Iesuhu ëhi uëvade hesi bëhoho ë ariböviohuro atoromo uvareje: Aru'aho sisëro Iesuale dëre abuejë'e höjo.

Iesuale vëmu ömo'öme ö ömo'öme rahumë jëvaje jöhoje.

³¹ Èhi'amu iae Iesuale vëmohu'o ö ömo'ömohu'o rovareje. Rueromo amonö riravoromo Iesuro ruejöro jöe nugö'öjareje. ³² Jöe nugö'öjamu Iesu ririre hi'i ae aho'obëhe ruë numë raromo rova'o rojomë'ëro uavareje: Hë-ajo. Jasi vëmohu'o ö ömo'ömohu'o ja ga'i nimoromo amonö ro riravarujëjo. ³³ Riravarujëmu uëvadeje: Jemë uehorovarujoho nasi vëmoho ö ömo'ömoho di aribövioho jioruomajëjo. ³⁴ Èhi uënuogoromo uherihoromo ruë numë raromo rova'o rojomarue aribövioho gëromo uëvadeje: Aveho gahëjo. Aruëroho nasi vëmohu'o ö

ömo'ömohu'o jëvajújo. ³⁵ Ae rahu God-hu nimaje mu vaejè'oho èhuro è aribövioho nasi öe ma'ine vëme jioruomajújo.

4

Aehu i ujo sa'a mare sa'a sisëre riremاده uhu jöhoje.

¹ Èhi'amu iae Iesuro röhu maho e'u riröre va'o hiromo jöho röjèhijadeje. Röjèhijamu ae aho'obèhe ro tagavamu Iesuro jovore boat gagore va'o hi'i ae aho'obèhe jovo riröre raromareje. ² Jovo riröre raromamu Iesuro uhu jöe majèhiromo èhuro jöe aho'obèhe röjèhijadeje. Röjèhiromo uëvadeje: ³ Jöe hehèjo. Iae ae gemuëro i uje ujuohoromo mure riremoli va'ade höjo. ⁴ Riremobe va'amu ujo ioro'ioroho örire rireromade höjo. Rireromamu gavè'i ugëro ro i barèjare höjo. ⁵ Ujo ioro'ioroho munë uhunö jì'e sa'are rireromade höjo. Rireromoromo ma-burëro ri'amade höjo sa'aho munë döro ma-bisemu jì'ëro. ⁶ Riromo dirumoho bogo ma io'amè'ëro majaëro rojomoromo anamu sahoriamade höjo. ⁷ Ujo ioro'ioroho bibè'e resu resu'e sa'are rireromade höjo. Rireromè'ëro bibè'e resuohuro riromo ujo maho baba'amade höjo. Baba'amamu maho bogo rae'amade höjo. ⁸ Ujo ioro'ioroho sa'a mare rireromade höjo. Rireromoromo riromo ègovoromo bajoho rae'amade höjo. Uje gemu gemu röhu ioro'ioroho baje 30 rae'amoli ioro'ioroho 60 rae'amoli ioro'ioroho 100 rae'amade höjo. ⁹ Èhi uënuGOROMO uëvadeje: Ae rahu ja God-are jö hejanue ae javè'oho bëhoho nahoromo birohonëjo.

Iesuhu rabëni uhu'e majèhinövade è hesi jöhoje.

¹⁰ Èhi uëvamu ijönöho ae aho'obèhe bogojio'i Iesuro hesi ariböviohu'o gemu mae hijadeje. Hijamu hesi ijorajo 12-hu'o hesi bëhire raromarue aribövi ioro'iorohu'o èho jaburo uhu jö hesi bëhoho ua gavareje. ¹¹ Ua gavamu Iesuro uëvadeje: God-ro böröme namiromo aho'obèhe muebejaje jöho urimoho subivèhade höjo. Èsubivèhade jöho huro hesi suvöore jemë bojëmijè'e höjo jemëremu he'irarijego. Èhu'ëro jemëro jö bëhoho he'i a ioro'ioro jabesi öriroho ma-uhu jöemu rovaje höjo. ¹² Jabuni ma-uhu jöemu rovaje hesi bëhoho è jöho God-are surire jajivoromo èhi uvè'e höjo: God-ro nimade höjo è ariböviohuro muoho ma-gaemu ga'i bogo avoho garuomoröhego. O jöho ma-hemu he'i bogo avoho heröhego. Garomo he'ibejarëjo jabumë huotorovoromo God-arinö va'ego èhuro hu jabesi sisèho uehorovoromo vuonugolibejajo.

I ujo sa'are riremاده uhu jö Iesuhu huruoho majèhijade jöhoje.

¹³ Èhi uënuGOROMO uëvadeje: Röhu naehu majèhijode uhu jöho jemë diehi'oromo bëhoho bogo hejarujëjo. Bogo hejarujöho diehi'oromo uhu jö ioro'ioro hesi bëhohu'o avoho herëjo. ¹⁴ Aehu mure ruruhö'öjade i ujo hesi bëhoho èho God-are jö a majèhijajoho uëromo è'ode höjo. ¹⁵ Ujo örire rireromamu ugehu i barèjare jö hesi bëhoho aehu God-are jö hejama gavè'oho Satan-ro ma-burëro rovaje höjo. Rueromo gavaje God-are jöho i ujonö'e jabesi dëre jiego garomo baeniëhiromo rori'o bu'öjaje höjo. ¹⁶ O i ujehu munë uhunö jì'e sa'are rireromoromo riromo sahoriamade jö hesi bëhoho aëro God-are jöho hejarue höjo.

Heromo ma-burëro nimorohoromo jöho ejaharue höjo. ¹⁷ Ejahoromo jöho ma-döëremu baejë'ëro majae ma-bunemu mae uehorovoromo garöhe God-are jö uehorovaruohuni aehu sisë vaejëvamu gavë'oho o huë vavaene rovamu gavë'oho ma-burëro vuonugarue höjo. ¹⁸ O ujehu bibë'e resu gemuore rireromade jö hesi bëhoho aëro God-are jöho heruomaje höjo. ¹⁹ Heromo ave sa'a hesi muohuni nurunurumoromo o sarerivoromo inöme börömo mae ujuoho'i o bövie bise'e ujuoho'i nimoromo ëhemu uehorovoromo ëho jabesi nuninö bamarue höjo. Bamoromo sa'arohemu uehorovaruohuro ëhuro God-are jö jabesi dëre jiajoho taemego jabumë bogo rae avoharue höjo. ²⁰ O ujehu sa'a mare rireromoromo baje 30 o 60 o 100 rae'amade jö hesi bëhoho aëro God-are jöho heromo ejahoromo rae avohoruomaje höjo ioro'iorohuro ioro'ioroho iosirëmiromomo mu ma-mabëhe vaejarue höjo.

Iro bueromo va'orahore bahijarue uhu jöhoje.

²¹ Röhu uhu jöe gö'o majëhi'ië'ajëjo. Jemë'o uehorovohëjo. Iro buno'iraeromo osare barovarue hesi bëhoho bogo hevö gagoroho o maratu ahariroho gurihi bamo'i va'orahoro bamo'iro ëhuni barovarue höjo. ²² Èho naro uëromomo ë'ajëjo: Nasi jöe rabe rabe gurihiro jiaje naehu jövaje hesi bëhoho ma-va'orahoro jioröhego jövajëjo. O rabe rabe subivëhaje naehu uëvaje hesi bëhoho ma-samaro jioröhego uëvajëjo. ²³ Ae rahu ja God-are jö hejanue ae javë'oho bëhoho nahoromo birohonëjo.

²⁴ Èhi uëngoromomo uëvadeje: Nasi jö hejarujoho avo'avoho uehorovonövorëjo. Uehore ma-bisemu bamë'oho ëhuro aji'e jöho ma-bisemu bae'a'arujëjo. O börömo bamë'ohuro ëhuro böröme bae'a'arujëjo. Röhu gö'o döre börömo bëhe bae'a'arujëjo. ²⁵ Aji'e jö javë'oho God-ro gö'o bojami'iramu bae'a'anuëjo. O bogojavë'oho bisemu baejanoho God-ro ë uehoroho mu'uvaho'ajëjo.

I ujehu sa'are jioromomo hesi ëma gurihiro rijaje uhu jöhoje.

²⁶ Röhu Iesuro uhu jöe gö'o majëhiromomo uëvadeje: I ujehu riromomo raejajëhi God-ro böröme namiromomo hesi öri ari'oho bövioho bise'oho ëhi muebejëvaje höjo. Èjöho naro majëhi'ië'ajëjo. Mu arijo'ohuro nani ujoho sa'are suovo ruruhö'öbe va'a'ajëjo. ²⁷ Va'oromomo vahiromomo'iramu niavoromomo sisonuvo'iramu ri'önövo'ajëjo. Èhi'obe va'iramu ë majae gemuore ujo suovo ruruhö'öjadohuro rëdijiomoromomo ri'amo'ajëjo. Èhi'ol'iramu mu arijo'ohuro ëho garomomo dadivoromomo uvo'a'ajëjo: Diehi'oromomo ë'ajëjo. ²⁸ Èhi uvo'a'ajëjo röhu hesi sa'aëro rihuoho bojamego i ujoho riromomo inovoromomo maho raejaje höjo. ²⁹ Maho raeromomo mavego evare arijo'ohuro ma-burëro tarivoromomo gagovoromomo avoho bahijaje höjo ë hesi bëhoho ë gagovarue majaho rovë'ego.

Ijo hisue mustard-hu ëgovaje uhu jöhoje.

³⁰ Röhu Iesuro jöe gö'o majëhiromomo uëvadeje: God-hu böröme namiromomo muebejëvaje öroho naro uhu'e bu'öromomo jemë'o na'o uehorovo'ejarejo. ³¹ Ijo hisu ihe mustard ujehu börömoromomo ëgovajëhi God-ro böröme namiromomo ae gö'o gö'o ëhi gagovoromomo muebejëvobe va'a'ajëjo. Mustard uje gemu sa'are öjë'iroho bajo ioro'ioro dinö'e

dinö'e jio'amajoho ëho ma-jianovo'amo'i a'i ë mustard ujoho bisehar-
ihe hõjo. ³² Ëhi hõjo röhu riromo ëgovoromo ijo hisu ioro'ioroho iosir-
ami'amoromo ëho bõrõmoho hõjo. Bõrõmoriromo adoho ëgovo'amego
ugëro rueromo gavarue sanu mae jiegorovo ijuoho ë vae'amarue hõjo.
Ëhi uëvadeje.

³³ Ëhi jië'e uhu jõho aho'obëhe Iesuro uëromomo ëhuro hesi jõho
majëhinövadeje. Jabumë diehi jië'e jö bae'irõhoho eni jëvë'o'ho ëhi
jië'e jõhuremu majëhinövadeje. ³⁴ Jõho bogo mae bogo samaroho
majëhi'i ma-uhue gemu majëhinövadeje. Majëhiromomo röhu hu'o
hesi ariböviohu'o jabesi sivue raromë'iroho jõho aho'o huruoho
majëhinövadeje.

Iesuhu uavamu jovo bõrõmehu ruhosõjade jõhoje.

³⁵ Iesuro boat-re hiromomo ëhi jië'e uhu jõho majëhinugoromo
võ'õromomu gagorovo hesi aribövioho uëvadeje: Ruehego no aruhe
e'u ioni gönõ va'arëjo. ³⁶ Va'arëjamu hegorovo ë Iesure ariböviohuo
ae aho'obëhe ë rëmo'i Iesuhu hijaje boat-re iojioromomo hu boat-
re baeromo va'areje. Bava'amu boat ioro'ioroho ëhu'o gemu mae
va'oruomadeje. ³⁷ Va'amu buru bõrõme e'ure rovadeje. Bure
rovamu jovohuro hasaromo boat-re ro nemoromo ruahoromo
abueromo irijioromomo diruvëvo'ië'adeje. ³⁸ Diruvëvo'ia'amu
gavë'i ijorajoho jaburo gavare Iesu mami'e boat dejonõ va'o
raromoromo simano dövæjaruohuro simane dövæeromo niavë'e jiamu
gagorovo ioromo uavareje: Tisa no vuovavuo'ië'ajëjo. Na ja nosi
jõënioho bogo uehorovanuëjo. ³⁹ Uehorovanuëjamu Iesuro ri'õromomo
burohu'o hasajaje jovohu'o uëvadeje: Vuonugohëjo. Vuonugohëjamu
buroho ahõ'õ'i jovoho u'uhoromo ma-jõrume ruhijadeje. ⁴⁰ Ma-
jõrume ruhijamu gagorovo hesi aribövioho uëvadeje: Jemë rabëni
juhuonivarujëjo. Urimë'i jemë bogo ma uehorovevobe rovarijoho na
jemë jaruvohu'o ëhi gemuoho ë'arujëjo. ⁴¹ Ëhi gemuoho ë'arujëjamu
sisë maro juhuonivoromo uarovareje: Ave aho diehi jië'e ae hõjo.
Huhu uëvë'o'ho bogo aëremuoho ejaho'i burohu'o jovohu'o jabu'o hesi
jõho ejaharue hõjo.

5

*Satan-are a sisë aho'obëhe ae gemu hesirire jioruomamu Iesuhu
rarovõ'õ'amade jõhoje.*

¹ Ëhi'onugoromo jabu'o Iesu'o va'aroho va'o e'u ioni gönõ Gerasene
rajo jabesi sa'are va'o baboro bejareje. ² Baboro bejamu gagorovo ae
gemuëro guavo'amarue juju gagore jioromo rueromo Iesu birohadeje.
Ëa hesi dëre Satan-are a sisëro abueruomamu simane huotorovë'e
jiadeje. ³ Simane huotorovë'ëro guavo'amarue juju gago jio'amajire
ë hinövadeje. Hi'ego aëro vajaëro ö'ëro rabëro tõvo'ië'oromo gavare
bogo eni jëvëmu vuonugareje. ⁴ Urimoroho aëro vajaëro övore
hõrure tõvo'ëgo övore ö'oho ruho tarivoromo hõrure vajaho ano
ahõ'õnövadeje. Ëhi'oromo vörõ'irae'ëgo aehu guduamoromo hu'irae ro
rõhore nugo'irõhoho bogo eni jëvonövadeje. ⁵ Majae vahie jö'e dadovë'i
munëro anorovë'i guavaruire hinõvo dahorure ajio hinövadeje.

⁶ Ĕhi'onövë'ëro ë ahuro rori'o öri ëgoböviro namiromo Iesu garomo tutuvo rueromo hesi bëhire ague aho hiromo ⁷ ma-darugo'o uvadeje: Iesu ja God dö mare hijaje a hesi Harihe javajëjo. Ja rabëni sihusihuego'i rovane hõjo. Na God-are nuniro uavajëjo: Nadi huë sisëho vi'ehoho bojemëjo. ⁸ Vi'ehoho nadi bojemijë uvade hesi bëhoho urimë'i Iesuro hu uavadeje: Aru'aho sisëho jero ë a hesi dëre hijanuoho vuonugo'i va'ëjo. Ĕhi uavë'ego ëhuni uvadeje. ⁹ Ĕhi uvamu hegorovo Iesuro uavadeje: Jasi ihoho rahuo hõjo. Rahuo hõjamu uavadeje: Nasi ihoho Siriehu Bimuvanovë'o'oho jevajëjo. Ĕhesi bëhoho no aru'ahe aho'obëhe dëre javuë'ego ëhuni ëhi jumegë'e hõjo. ¹⁰ Ĕhi uaromo Iesu ua'i hijadeje: Aru'ahoho nadi uëvego jabumë ave sa'are jioromo va'irarëjo.

¹¹ Röhu mahe aho'obëhe aruhe dahoru ahore gemuoro gagov-
oromo ie ue'ahamu gagorovo ¹² dëre sisë ariböviohuro Iesu uavareje: Uövuego no suorovo va'oromo aruhe mahu jabesi dëre va'o abue-
jarëjo. ¹³ Abuejarëjamu uëvadeje: Ĕhuro va'ohë uëvamu hejë'i ë sisë ariböviohuro ë a hesi dëre jioromo suorovo va'oromo ruhe mahu jabesi dëre abueruomadeje. Abueruomamu ë mahohuro va'o baradore rireromoromo e'ure siö ruruhö'ö va'oromo jove ue'ahoromo vuovadeje. Mahe aho'obëhe 2,000 rabu'e ëhi vuovo'amadeje.

¹⁴ Vuovamu gavë'i mahu muebe'amarue ariböviohuro huruomoromo amo bërömore amo ininore jõho majëhibe va'areje. Jõho majëhijamu hejë'i ae aho'obëhe rueruomadeje ga'iro diehi jiego. ¹⁵ Iesuaro rueromo gavareje aru'aho sisëhu dëre jioromo suorovo va'oruomade aho simanoho mae jio'ego niõge ba'amë'e hijamu. Urimoho ganövareje aru'aho sisë Siriehu Bimuvanovë'ohuro hesi dëre jioruomë'e ëhi hi'ego röhu evare majare gavareje ma-mae hijamu. Ĕhi gagorovo juhuonivoruomadeje. ¹⁶ Juhuonivamu Iesuhu mu vaejamu gavare ariböviohuro uëvareje: Sisë ariböviehu dëre abue'amade ahu'o mahohu'o ëhi jië'e muoho bihoruomohijajo. ¹⁷ Ĕhi majëhijamu ae aho'obëhe heromo Iesu uavareje: Ave sa'aho vuonugo'i va'ëjo.

¹⁸ Vuonugo'i va'ëjamu Iesuro boat-re ajiomoromo sionëro vuonorö'ö va'lië'adeje. Va'ia'amu gavë'i aru'aho sisë hesirire jioromo suorovo va'oruomade ahuro Iesu uavadeje: Na ö'oromo ja'o hi'i negajëjo. ¹⁹ Negajëjamu Iesuro uavadeje: Bogo rue'a'anuëjo. Sionëro jasi amëro va'oromo jasi aganoho uënëjo: Badaro huë baejevoromo ëhi mabëhe ajemijamu rovode hõjo. ²⁰ Ĕhi uavamu hegorovo rue ahuro va'oromo hesi sa'a ihoho Ame 10 Jio'amaje Sa'aho ë sa'are majëhibe juvoromo uënëvadeje: Iesuro ëhi mabëhe ajemamu rovode hõjo. Ĕhi majëhijamu hegorovo ae aho'obëhe jõe barëjëvadeje.

Iesuhu magonahe niö'i Jairus-are abojohu'o magonahe gö'o ajëmade jõhoje.

²¹ Ĕhi'amu Iesuro boat-re va'oromo anume e'u ioni gönö va'o ravo'amadeje. Ravo'amoromo e'u riröre namijamu ae aho'obëhe ruë numë gagovo rova'oromo ëhi riravareje. ²² Riravamu iae ae gemu hesi ihe Jairus-ro rovadeje. Jairus hu Jew rajehu God rajahijarue osa muebejaje ae jiadeje. Rueromo Iesu garomo hesi hõru bëhire ague aho hiromo ²³ dinamiromo uavadeje: Bësu guomo'ië'ajëjo. Rueromo jasi övoho hesi sinoro bamego i'ovoromo hijajo. ²⁴ Hijajamu hegorovo

Iesuro hu'o gemu mae va'adeje. Va'amu ae aho'obêhe tatijiomobe hu'o gemu mae êhi va'oruomadeje.

²⁵ Va'oruomamu iae magonahe gemuëro jabu'o va'adeje. Ëmagonahoho manaero garorovade guomo guomoho bogo barë'i êhi jiemu jioje va'adoho vadune aho'o 12 barëjê'e jiadeje. ²⁶ Doctor aho'obêhe gëromo êhuro vi'ehe sisë maro baenövadeje. Vi'ehe baeromo hesi ijo baje bu'ö barë'i rôhu bogo marë'i sisërêbe va'onövadeje. ²⁷⁻²⁸ Sisërêbe va'amu ë magonahohuro hejade uvoruomamu: Iesuro ae magonahe mabêhe ajamuijaje hö uvamu hejë'ëro uehorovoromo uvadeje: Na Iesu ma-niögohuremu rëhë'ohuro êhuro marëjevo'ajëromo ae aho'obêhe va'aruire ë va'oromo Iesuare dejonö rueromo niögoho rëhadeje. ²⁹ Niögoho rëhamu gavë'i magonahoho kö rovadoho ijoho bogo rovadeje. Ijoho bogo rovamu magonahohuro herovadeje mae jiavamu. ³⁰ Mae jiavamu Iesuro hejade a ajëmaje daruge gö hesirire jioromo va'ë'e jiavamu evare ma-burëro huotorovoromo ae aho'obêhe uëvadeje: Ja rahuaro nasi niögoho rëhane höjo. ³¹ Rëhane höjamu hegorovo hesi ijorajoho jaburo uavareje: Ja'o iae gavanuëjo ae aho'obêhëro ja tatijiomavo'ego. Êhi jië'oho ja rabëni uövuanuëjo: Ja rahuaro na rëhevane höjo. ³² Êhi uëvamu Iesuro arua anumiae uherihadeje ga'i di ahuro o di magonahohuro hu rëhë'e jiego. ³³ Uherihoromo gëvamu rue magonahohuro iae mae garomo uvadeje: Huro na ajemade hö uvoromo juhuonivoromo butubutumoromo rôhu ma-biririvoromo rueromo Iesuare höru bëhire ague aho hiromo diehi ë'ade jöho sama'e huruoho majahi barëjadeje. ³⁴ Majahi barëjamu Iesuro uavadeje: Abojëjo. Jero na mae uehorovevamu êhuro ja marëjavë'e höjo. Vaevë'e va'onëjo. Jasi guomo guomoho barëjavë'e jiaje ijono mae jionëjo.

³⁵ Iesuro êhi uavamu gavë'i ae göëro göëro Jairus-are osare jioromo rueromo Jairus uavareje: Jasi abojoho mami'e guomë'e höjo. Êhu'oho rabëni ja tisaho u'uoho bojamijanuëjo. ³⁶ U'uoho bojamijanuëjamu hegorovo Iesuro he bogo hejanovë'e Jairus uavadeje: Nadi juhuonivo'i God mae uehorovonëjo. ³⁷ Êhi uanugoromo Peter James o James-are öe John êho jaburo hu'o va'ojöro uë'i a ioro'ioroho nijio'iraejëvadeje. ³⁸ Nijio'iraejëvonugoromo jaburo va'oromo Jairus-are osare rovareje. Rueromo Iesuro gavadeje ae aho'obêhe gagovorovë'ëro garahörö'e baeromo ma-darugo'o nierusuburu'e bamoruomamu. ³⁹ Êhi'amu gagorovo osare va'oromo uëvadeje: Jemë rabëni garahörö'e baeromo nierusuburu'e bamarujëjo. Ëmagonaho harihoho bogo guomo'i manjavajëjo. ⁴⁰ Manjavajëjamu hegorovo rueho jaburo Iesu sivoromo ijo'ijahareje. Ijo'ijahamu gagorovo Iesuro ë aribövioho aho'obêhe amonö rarovö'öjëvonugoromo magonaho harihu hesi vëmu vavu'ohu'o hu'o rovare ae niö'i gemu jabu'o êhi søjëgoromo magonaho harihehu raromaje osare va'adeje. ⁴¹ Osare va'oromo magonaho hesi övore ma'enoromo hesi jöëro uavadeje: Tarita kumajo. Ëjëho huotovë'oho êho uaromo ë'adeje: Bësu naro ja uavajëjo: Ri'öjëjo. ⁴² Ri'öjëjamu hejë'i rue magonahohuro ma-burëro ri'öromo nami juvadeje hesi vadunoho aho'obêhe 12 jië'ëro. Juvamu gavë'i ae aho'obêhe hu garomo tiöjëvadeje. ⁴³ Tiöjëvamu gagorovo Iesuro ma-darugo'o uëvadeje:

Naehu vaejode muoho nadi aho huruohorëjo. Ëhi uëngoromo uëvadeje: Magonahoho ie bojamego ijajo.

6

Iesuare amo rajehu Iesu bijönimoruomade jöhoje.

¹ Ëhi'onugoromo Iesuro va'adeje. Va'oromo hesi amëro rue'li hesi ijorajoho jaburo hu'o gemu mae rovereje. ² Rueruomoromo Jew rajo jabesi nuho majaho rovamü Iesuro God rajahjarue osare va'oromo God-are jö bëhoho rjöhijadeje. Rjöhijamu ae aho'obëhe heromo tiöjareje. Tiöromö uvoruomadeje: Ëiahuro jöho dinö'e hejë'ëro jöväjëjo. Hu diehi'oromo ëhi jië'e simano maho bæjade höjo. Darugo'e mü masijoho diehi'oromo vaejaje höjo. ³ Hu sareriväjëjo. Ma-ijo muemu vaejaje ae höjo. Hu Mary-are harihe höjo. Hu James-are Joses-are Judas-are Simon-are öe höjo. Hesi ma'ino ömo'ömo ho aviae no'o gemu mae raromarue höjo. Ëhi uvoruomoromo nue huodivareje. ⁴ Nue huodivamu gëgorovo Iesuro uëvadeje: Jö God-aro baeromo majëhjarue aribövioho dinö'e dinö'e va'ë'iroho aëro no mae uehorovavuarue höjo. A'li nosi sa'a rajoho aganoho osae gemuore raromaruoho jemëremü bogo ëhioho uehorovavuarue höjo. ⁵ Ëhi uëromö hu darugo'e mü vae'iröhohö bogo eni jiadeje. Huro guomo guomo'e ae ma-gemu gemu jabesi sinore hesi övohö bamëhoromo sinohö avohëvamü marëjëvadeje. Ëhemü ë'adeje. ⁶ Röhu hesi amo rajehu hu bogo ma uehorovarohuni ëhuni tiöjadeje.

Iesuare ijoraje 12 jabuhu va'oromo mü vaeröhego Iesuhu rëmö'öjade jöhoje.

Ëhi'onugoromo va'adeje. Va'oromo amore amore jöho rjöhibe juvadeje. ⁷ Rjöhibe juvoromo hesi ijoraje 12-hö uëvadeje: Ruehëromö rovamü uëvadeje: Naro jemë rëmö'ö'ië'ajëjo jemëro nasi jöho ae majëhibe jijihö'irarijégo. Jemë ae niö'li niö'li ame göro göro va'orëjo. Jemëhu mü vae'irarijohuni nasi darugohö bojëmijajëjo ëhuro jemëro Satan-are a sisë gö gö a dëre jio'amë'ohö rarövö'ö'irarijégo. ⁸ Röhu va'ie'iroho ma-guduodemü ujuohorëjo. Iohö esöho ijo bajohö bövioho bise'ohö bogavëjo. ⁹ Ö höru guduohö io'amoromö niöge ma-gemu gemu io'amö'li nadi niö'li niö'ioho io'amorëjo. ¹⁰ Ëhi uëngoromo uëvadeje: Amo göre göre va'oromö aehu di osare raromöjörö uëvamü va'ö raromë'ohö ëhuremü raromonövorëjo ijönö ë amore jioromö va'ie'e jëvaje. ¹¹ Ö di amore ariböviehu jemesi örire nü huodëgoromö jö bogo ejëhë'ohö amohö nugo va'irögorö jabesi sa'a hesi tohotohe jemesi höru hitahire jiajohö sa'aro riremö va'ëgo ë amö rajohuro garomö uvo'irarëjo: No sisë ë'ë'e javuajëjo.

¹² Ëhi majëhijamu hegorovo ijorajö ömo'ömo huro va'oromö jö majëhibe jijihoromö uënövereje: Uehorö sisëhö vuonugö'li uehorö mae bæerëjo. ¹³ Ëhi jië'e jöho majëhibe Satan-are aribövi sisë aho'obëhe jabesi dëre jëvajohö rarövö'öbe öse guomo guomo'e a jabesi sinore otehoromö sinohö avohëvobe ëhi jië'e mü masijohö vaebe jijihareje.

John bapataeto vaejaje a guomade jöhoje.

¹⁴ Ēhi jiē'e mu masijoho vaebe jijihamu sa'a a bōrōme Herod-ro ē jōho hejadeje rabēni Iesuhu ē'aje jōho ae aho'obēhe dinō'e dinō'e vaerovē'ēro jiē'ēro. A ioro'iorohuro uvoruomadeje: Ēaho John bapataeto vaenōvade ahuro guomoromo ri'ōjē'e hōjo. Ēhu'ēro darugo bōrōme baeromo mu masijoho vaejaje hōjo. ¹⁵ A ioro'iorohuro uvoruomadeje: Iesu hu mami'e hijade ae Ēlijah-ro rovē'ēro ē'ajējo. A ioro'iorohuro uvoruomadeje: Jō God-aro baeromo majēhinōvare aribōvi ioro'ioro jiarēhi hu ēhi jiē'e aēro jiē'ēro ē'ajējo.

¹⁶ Ae gōēro gōēro Iesuarē jōho gō gō atavamu hegoro Herod-ro ae uēvadeje: Ēaho hu John hōjo. Urimo naro hesi sōnōho tarijahode hōjo rōhu hu guomoromo ri'ōjē'ēro hijajējo. ¹⁷⁻¹⁸ Rōhu ē jō hesi bēhoho urimē'i Herod-ro hesi ōe Philip-are vabore hesi ihoho Herodias gohoniahijadeje. Gohoniahijamu John-ro ri'ōromo ua'i hijadeje: Jasi vuojiri baejanoho ēho bogo maehu hōjo. Ēhi ua'i hijamu Herod-ro ē magonaho hesi jōēni ae uēvamu John guduamoromo tōvoromo savoji gagore ba'amareje. ¹⁹ Ēhi'amu ē magonahohuro John nue huodivoromo ano'i nimadeje. Ēhi nimoromo rōhu Herod-ro magonahoho ahamu ano'iē'adoho vuonugadeje. ²⁰ Herod-hu magonaho ahade hesi bēhoho huro uvadeje: John hu a ma-mabēhe hō uvoromo ēhuni John juhuonamiromo avoho mueberomo magonahoho ahadeje. Magonahoho ahoromo va'oromo henōvadeje John-ro God-are jōe majahi'ego. Jōe majahi'ego Herod-ro nurunurumo'ego hesi jōho he'i nimonōvadeje.

²¹ Ēhi'oromo John anojōēni magonahoho ahobe ruejuvo Herod rahade majaho rovamu evare magonahehu vae'i nimade majaho rovadeje. Ēhesi bēhoho Herod-ro sōrōe baeromo hu ajamiromo ē sa'a muebejarue aribōvioho muorovo mu muebejarue aribōvioho a masijo ioro'ioire Galilee sa'are raromaruoho ē a masijoho uēvadeje: Ruehego na sōrōe bojēmi'irōjo. Bojēmi'irōjamu rueruomadeje. ²² Rueruomamu ē magonaho hesi abojohuro rueromo javavadeje. Javavamu gagorovo Herod'o hesi ōrire rueruomade aribōviohu'o ē magonahoho garomo vuēvorovoromuomadeje. Vuēvorovoromo Herod-ro magonahoho uavadeje: Ja rabe rabe nimē'oho uevego bojami'irōjo. ²³ Naehu muebejaje ōri ari'o nimē'oho iae ēhu'o ririre tarioromo vituoho bojami'ejōjo. God-ro ge'ego na mae uavajējo. ²⁴ Ēhi uavamu ē magonahohuro va'oromo vēmoho uavadeje: Na rabe bae'ejōjo. Rabe bae'ejōjamu rue vēmohuro uavadeje: Uanējo bapataeto vaejaje ae John-are sōnōho tarioromo simanoho baro bojemējo. ²⁵ Ēhi uavamu hejē'i rue abojohuro ma-burēro vuonorō'ō rueromo a bōrōmoho uavadeje: Na negajoho avevejō'e ae uēvego bapataeto vaejaje ae John-are sōnōho tarioromo simanoho hevō dōre bamoromo baro bojemarējo. ²⁶ Ēhi uavamu hegoro rue a bōrōmohuro huē vavaene bōrōme baejadeje. Iae hu huē vavaene baejadeje rōhu urimo darugo'e jōho ē aribōvi jabesi nuniro ē magonahoho mae uavē'ēro ēhu'ēro huotorovoromo nijio'iraerōhoho hu bijōnimadeje. ²⁷ Bijōnimamu evare ae gemu ma-burēro nugō'ōromo uavadeje: Va'oromo John-are sōnōho tarioromo simanoho baruenējo. Baruenējamu savoji gagore va'oromo sōnōho tarioromo simanoho ²⁸ hevōre bamonugoromo barueromo abojoho bojamadeje. Bojamamu huro bava'o vēmoho bojamadeje. ²⁹ Ēhi'amu

John-are ijore ijore jijiharue ariböviohuro ë jöho heromo rueromo sinoho bava'oromo munë gagore bamareje.

Iesuhu ae aho'obëhe 5,000 da'uojëhade jöhoje.

³⁰ Iesure apostle ömo'ömohuro mu masije vaebe jijihë'ëro vuonorö'ö rueromo Iesu uavareje: No mucho ëhi ëhi vaeromo jöho ëhi ëhi majëhiromomo rovere höjo. Ehi jië'e jöho jabumëro Iesu majahi barëjareje.

³¹ Majëhi barëjamu gagorovo ruehuro gavade ae aho'obëhe rovë'i va'ë'i rovë'i va'ë'ëro hu'o hesi ariböviohu'o i ue'aho'iröhe o bövi bise'o vae'iröhe majaho bogojiamu gagorovo uëvadeje: Ruehego no a rumo'e sa'are nosi sivue va'o raromoromo jemëro ehuro ma-bisemu nuhorëjo.

³² Ehi uëngoromo jaburo boat-re ajio raromoromo a rumo'e sa'are jabesi sivue va'i va'areje.

³³ Va'i va'amu ae aho'obëhe gavare jabumë va'amu iae mae gëromomo uvoruomadeje: Eäribövioho Iesumëro boat-re va'aruë uvoromomo amo göre göre jioromomo sa'a hörëro ma-burëro va'oromomo Iesu'o hesi ariböviohu'o boat-re va'aruoho iosirëmiromomo jaburo jovo ioni gönö urimomo rueruomadeje.

³⁴ Urimomo rovamumu Iesuro ijönö ro höröromomo ravo'amoromomo gavade ae aho'obëhe tagavë'e jiamu gëgoromomo uehorovoromomo uvadeje: Vaevë'ëjo. Eäribövioho vëmu vavu'o rumo'e ö mahu'ëro raromanovaruë uvoromomo jabesi jöëni vavaenimadeje.

Jabesi jöëni vavaenimamumu evare jöe aho'obëhe röjëhijadeje. ³⁵ Jöe aho'obëhe röjëhijuvomo majae beva'ia'amu gagorovo hesi ijorajö ömo'ömohuro rueromomo uavareje: Aveho a rumo'e sa'ae höjo. O majae mami'e barëjë'e höjo.

³⁶ Ehuni ave aribövioho rëmö'öjego ave bëhire amomo masijore ininore va'oromomo ie imo'amo'irarëjo ue'ahoröhe.

³⁷ Ue'ahoröhe höjamu uëvadeje: Bogajo. Jemëro iruno'oho da'uojëhirëjo. Da'uojëhirëjamu uavareje: Asë'ëjo. Dinö'e ioho baeromomo da'uojëhijöro uvanuëjo. Na ja uvoromomo ë'anuëjo: No 200 kina javuë'ëro noro ëho bava'oromomo bu'ö barëromomo ioho imo'amoromomo ujuoho rueromomo ehuro da'uojëhi'ëjarë uvoromomo o diehi uvoromomo jövanuëjo.

³⁸ Jövanuëjamu uëvadeje: Ioho dimino'e jëvajëjo. Va'oromomo gahëjo. Va'oromomo gahëjamu va'oromomo adaho garomomo vuonorö'ö rueromomo uavareje: No ie aho'obëhe övo gö mine o visue niö'i ëhi javuajëjo.

³⁹ Ehi uëvamumu hegoromomo ruehuro ae aho'obëhe uëvadeje: Va'oromomo hahagu hahagu gagovoromomo ëhi garasiohuro raromobe va'ohëjo.

⁴⁰ Va'ohëjamu rue ariböviohuro va'oromomo ë 50 50 o 100 100 hahagu hahagu gagovoromomo ëhi garasi rövë'e mabëhire raromobe va'areje.

⁴¹ Raromobe va'amu gagorovo ie övo gö mine visue niö'i ujuoho rovaroho ëho Iesuro ujuohoromomo ö'idöho sioroho garomomo God huë mae uavadeje. Huë mae uanugoromomo ioho ato'atovoromomo hesi ijorajö ömo'ömohomo i'imëmijadeje ae aho'obëhe suvuorëmijöro.

Ehi'oromomo visue niö'i taritarivoromomo i'imëmijadeje jaburo ehuro suvuorëmijöro.

⁴² Ehi'amu ae aho'obëhe ë ioho visuoho ue'ahamumu da'uëgadeje.

⁴³ Da'uëgamu gagorovo ijorajoho jaburo i vitu vituoho visu vitu vituoho aegamumu esöe aho'obëhe 12 irijiomomo'amadeje. ⁴⁴ Ehi'areje. Iesuro ie övo gö mine visue niö'i ujuohoromomo suvuorëmijamumu ama'e aho'obëhe 5,000 ë ioho ue'ahoruomadeje.

Iesuhu e'u döre hörehu va'ade jöhoje.

45 Ĕhi'amu gav'eli Iesuro ijorajo ōmo'ōmoho uēvadeje: Boat-oro ajio raromoromo e'u iono gōnō Bethsaida amoro urimo va'ohego na a ioro'ioroho rēmō'ōjōjo. 46 Ĕhi uēvamu hegoroovo hesi ijorajoho jaburo boat-re iojioromoro va'oruomamu Iesuro parie vae'li dahorunō ajiomadeje. 47 Ajiomoromo parie vaejumu vahiromadeje. Vahiromamu nume ijorajoho jaburo ōri ēgobōviro jovo dōre va'oruomo'li Iesuro ruhe sa'are hesi sivue hijadeje. 48 Hi'li gavadeje burēro jabesi nuninō rue'ego ijorajoho jaburo jovoho sisē'li sisē'li huo'ōbe va'oruomamu. Ĕhi'ojuvo sisonuvo'liē'adeje. Sisonuvo'ia'amu Iesuro abueromo jovo dōre hōrēro va'adeje. Va'oromo jabumē iosirēmiliē'adeje. 49-50 Iosirēmiliē'amu ijorajoho jaburo gavareje hu jovo dōre juvamu gagorovo uvareje: Aru'ahēro juvajēromo jiodudu'iraeromo jō'e dadovareje. Jō'e dadovamu hejē'li uēvadeje: Nadi juhuonivo'li biririvohējo. Na jevajējo. 51 Na jevajē uēnugoromo boat gagore ajiomoromo jabu'o gemu mae hijamu buroho barējadeje. Buroho barējumu ē aribōvioho dadivēvadeje. 52 Ĕhesi bēhoho Iesuhu mami'e i da'ujēhade hesi bēhoho bogo avoho baejareje jabesi uehoroho bogo eni jiē'ēro.

Iesuhu Gennesaret sa'are hiromo guomo guomo aribōvi ajēmade jōhoje.

53 Ĕhi'amu e'u iono gōnō rueromo Gennesaret sa'are ravo'amoromo boat-oho ijo bunore be nugareje. 54 Rōhu ravo'amamu gav'eli evare ae aho'obēhe Iesu garomo uvoruomadeje: Iae Iesu hō uvoromo 55 ē sa'ae bōrōmoho ma-burēro jijihoromo aevoromo guomo guomo'e aribōvioho giojimo ujuoho rueromo henōvare uvavo'ego: Iesu ē dirō'ore hijajē'ego ē va'onōvareje. 56 Iesuhu amo masijore ininore o dinō'e dinō'e rovē'iroho guomo guomo'e aribōvioho giojimo ujuohoromo aehu gago-varue ōri ari'ere ē ro bahinōvareje. Bahinugoromo Iesu ēninamiromo uanōvareje: Guomo guomo'e aribōvioho uēvego ja niōgu vituohuremu rēhego ēhuro guomo guomoho barē'amajo. Ĕhi ua'ego ae rahu niōgu rēhē'oho ēhuro marē'amonōvadeje.

7

Pharisee aribōviehu God-are jō bogo avoho uehorovo'li jabesi a mami jō bōrōme hō uehorovare jōhoje.

1 Iae Pharisee aribōviohuro Jew rajo jōgoru ōri rōjēhijarue aribōviohuro urimo Jerusalem jioromo rovē'ēro jiē'ēro Iesu jiajire ro gagovoromadeje. 2 Gagovoromo gavareje Iesure ijorajo ōmo'ōmohuro Pharisee rajo jabesi jōgoroho ahoromo jovoho ōvoho bogo otehodivorovoromo sisēho u'ovē'e ioho ma-ue'ahamu.

3 Ĕhesi bēhoho Pharisee aribōviohu'o Jew rajo a ioro'iorohu'o ioho bogo ēma ue'aharueje. A'li urimo Jew rajo a mamiehu jō bojēmibe rovarēhi ēhi'oromo jovēro ōvoho otehodivorovoromo uvoruomajeje: Nosi sinore sisēho u'ovahuēl'ēro God-are nunire mae javuajēromo evare ioho ue'aharueje. 4 O i imo'amarue ōri ari'ere jioromo ujuoho rovē'iroho uvoruomajeje: Sisē hōromo jovēro otehodivoromo u'o'amoromo uvoruomajeje: Avevejō'oho ē ioho iae mae u'ovē'e hōromo evare ue'aharueje. Ĕhi'oromo a mami aribōviehu bojēmibe rovarē jōgoroho aho'obēhe jabumēro ejēhoromo enatue ramae gō gō [i

ijarue röhe] ähi u'ol'amoromo uvoruomajeje: Äinömo inömo hesi sisëho u'ol' bar'e'ego God nimorohajëjo. Ähi'arueje.

⁵ Ähi'aruëro jii'ëro ë Pharisee ariböviohu'ol' Jew rajo jögoru öri röjëhijarue ariböviohu'ol' ri'öromo Iesu uavareje: Jasi ijorajo ömo'ömo ho a mamiehu bojëmibe rovare jöho bogo eromo jovoho övoho bogo otehodivorovë'e ioho ma-ue'aharue höjo. Rabëni ëhioho ë'arue höjo. ⁶ Ähi uavamu hegorovo Iesuro uëvadeje: Sareri sareri'e aribövie jëvavëjo. Jö God-aro baeromo majëhijade ae Isaiah-ro jemëhu ë'irarije jöho jajivoromo ähi uvë'e höjo:

Ave ariböviohuro ma-jö'ëremu God na rajehi'i

dë vövöbajo'oho bogo nasi gemuoroho jio'i ma-rori'ol' jioruomajëjo.

⁷ Jabumë a jabesi jögoroho ae röjëhiromo uëruomaje höjo: Äho God-are jöe jiaje ejahuorëjo.

Ma-a jabesi jögoroho ähi röjëhiromo ëhuro ma-döhemu God na rajehiruomaje höjo.

Äjemesi jö Isaiah-hu jajivadoho iae mae höjo. ⁸ God-hu bojëmade jögoroho jemëro vuonugo'i aehu bojëmibe rovare jögorohemu ma'ënaruje höjo.

⁹ Ähi uënuogoromo uëvadeje: Sareri'e uehoroho baeromo ëhuro God-hu bojëmade jöho aharuje höjo jemëhu a bojëmijaruje jögoroho ma'ëno'irarijëro. ¹⁰ Ähesi bëhoho Moses-ro uëvade höjo: Jasi vëmu vavu'oho mae uehorovëvonëjo. O jöe gö'ol' uëvade höjo: Ae rahu jö sisë jövoromo vëmu o vavu hesi iho ijumahë'oho anego guomo'irajo. ¹¹ Röhu jemëro ë jöho ahoromo ae röjëhiromo uëvaruje höjo: Jaehu jasi vëmu vavu'ol' God-are nunire uëvë'oho: Nasi maho sisëho ujuohoromo ajëmi'ibejodoho röhu aveho na God-are ihoro bamë'e jevavë uëvë'oho ¹² nadi röhu maho huotorovoromo jasi vëmu vavu'oho ajëminëjo. Ajëmi'ijë'oho sisë höjo. Ähi uëvaruje höjo. ¹³ Vëmu vavu'ol' ajëmi'ijë'oho sisë hö uëvarujohuro ëhuro vëmu vavu'ol' mae uehorovëvo'irarijego God-hu bojëmade jöho jemëro aharuje höjo jemesi a mami jöho e'irovo. Ähi jii'ë mu sisëho aho'obëhe röjëhijaruje höjo.

Bogo i ijaruohuro a'i uehoro sisë baejaruohuro ëhuro God-are nunire sisë'rëjavuaje jöhoje.

¹⁴ Iesuro ähi uënuogoromo ae aho'obëhe röhu maho uëvadeje: Ro gemuoro gagovohëromu ro gagovamu uëvadeje: Naehu ave uhu jö uë'ië'ajoho jemë ae aho'obëhe avoho heromo bëhoho baerëjo. ¹⁵ Rabe rori'ol' jiajehu jö'ore va'ë'oho bogo ëhuro aho sisë'rë'amo'i a'i rabe dë vövöbajo'ere jioromo suorovë'ohuro ëhuro aho sisë'rë'amaje höjo. ¹⁶ [Ae rahu ja God-are jö hejanue ae javë'oho bëhoho nahoromo birohönëjo.]

¹⁷ Ähi majëhinuogoromo Iesuro ae aho'obëhe rëmo'i osare va'adeje. Osare va'amu hesi ijorajoho jaburo uavareje: Uhu jö majahuijane hesi bëhoho huruohego no hejarëjo. ¹⁸ Hejarëjamu Iesuro uëvadeje: Ähi jii'ë'oho na jemë'ol' uehoroho bogojëvavëjo. Jemë rabëni bogo garomo uvarujëjo: Rabe rori'ol' jiajehu jö'ore va'ë'oho bogo ëhuro aho sisë'rë'amaje höjo. ¹⁹ Ähesi bëhoho rabe jö'ore va'ë'oho vövöbajo'eroho bogo abue'i dëre abuejaje höjo. Dëre abueromo dëre jioromo suorovoromo bogo aho ijumëvë'e ma-gua gagore va'aje höjo. Ähu'ëro aho God-are nuniroho bogo sisë'rë'amaje höjo. Iesuhu ähi jövadoho

huro uõromo ë'adeje: Jaruvoho ie aho'o ma-ue'ahë'o'oho God-ro uvaje höjo: Iae mae höjo. ²⁰ Röhu Iesuro hesi jö vituoho majëhiromo uëvadeje: I ue'ahë'ohuro bogo ëhuro aho sisërë'amo'i a'i dë vövöbajo'ere jioromo rojomoromo suorovë'ohuro ëhuro aho God-are nuniroho sisërë'amaje höjo. ²¹ Uehoro sisëhuro dë vövöbajo'ere jioromo rojomego ëhuro öero jijihanovoruomaje höjo. Vajiohëro ujuohoruomaje höjo. Ae muo'amoruomaje höjo. ²² Goho'amoruomaje höjo. A jabesiroho ujuohoniëhi'i ganiganimoruomaje höjo. Mu sisë rabe rabe vaeruomaje höjo. Ae gö sarerëmiruomaje höjo. A nunire javoji'e muoho vaeruomaje höjo. A jabesi mu mahuni dë vörönëgaje höjo. A jabesi ihoho ijumoruomaje höjo. Sivue uehorovoromo jabesi ihoho döro bamoruomaje höjo. Simane sisë'i uehorovoromuomaje höjo. ²³ Ëhi jië'e uehoro sisë aho'obëhe dë vövöbajo'ere jioromo rojomoromo suorovajohuro ëhuro aho God-are nunire sisërë'amaje höjo.

Israel rajo bogo a'i sa'a gö rajo magonahehu Iesu mae uehorovade jöhoje.

²⁴ Ëhi'onugoromo Iesuro ri'öromo ë Jew rajo jabesi sa'aho vuonugo'i va'adoho va'o sa'a göre Tyre amo Sidon amo jiajinö sa'are ë rovadeje. Ruenugoromo osare va'oromo uëvadeje: Naehu ave rovodoho nadi huruohorëjo. Ëhi uëvadeje röhu hesi ihoho ë sa'aroho börömëro jië'ëro hu rovadoho bogo a subivëho varijënoho jiadeje. ²⁵ Ëhu'ëro jië'ëro magonahe gemuëro ma-burëro hejadeje uvavamu: Iesu rovë'e höjo. Ëmagonahoho aboje gemu bise'e jiadeje. Satan-are a sisëro ë aboji hesi dëre abueromo simanoho huotovahë'e jiadeje. Hesi abojoho ëhi jië'ëro ë magonahohuro hejade uvavamu: Iesu rovë'e hö uvavamu hegorovo rueromo Iesuare hörü bëhire ague aho hijadeje. ²⁶ Röhu ë magonahoho hu bogo Jew rajo magonahehu jioromo bogo Jew rajo jöehu jövaje magonahehu jio'i a'i hesi sa'a börömoho Syria jio'i hesi sa'a bise'o'oho Phoenicia jiadeje. Hu bogo Jew rajoho jië'e Iesu ëninamiromo uavadeje: Ajemiromo a sisë nasi aboji hesirire jiajoho rarovö'öjego va'irajo. ²⁷ Rarovö'öjego va'irajamu Iesuro uehorovoromo uvadeje: Vëmu vavu'ehu jabesi aboji harihu'o urimo ajëmijaruëhi naro nasi sa'a rajohemu ëhi urimo ajëmi'i rovode höjo. Ëhi uvoromo ë sa'a gö rajo magonahoho uhu'e uavadeje: O-ajo. Nadi'ego urimo aboji harihu'o'oho ie da'uojëhi'iröjo. Ëhesi bëhoho noehu aboji harihu'o jabesi i ujuohoromo ö harihu mio'amë'o'oho ëho bogo maehu höjo. ²⁸ Bogo maehu höjamu hegorovo rue magonahohuro uehorovoromo uvadeje: Iae na bisemu ioniro sa'a gö raje jevo'ego ëhuni bogo ajemi'i jöho jövajëjo. Röhu noehu bogo rarovego öehu i ugobajo'o ue'aharuëhi nani Iesuro na'o ëhi ejehoromo nasi abojoho ajami'ajëjo. Ëhi uvoromo mana uhu'e uavadeje: Bada iae mae-ëjo röhu i maratu aharire raromarue öho jabumëro aboji harihu'o jabesi i ugobajo'oho iae ue'aharue höjo. ²⁹ Ue'aharue höjamu Iesuro uavadeje: Iae mae uevanuëjo. Ëhuni va'onëjo. A sisëho jasi aboji hesi dëre jioromo iae mami'e höröromö va'ë'e höjo. ³⁰ Ëhi uëvamu hegorovo rue magonahohuro vuonorö'öromö hesi osare va'oromo gavadeje a sisëho mami'e hörö va'i abojoho röhore raromamu.

Ae gemu hesi hia'e tugohoromo bitare töv'e jiamu Iesuhu ajamade jöhoje.

³¹ Ëhi'amu Iesuro Tyre amonö jioromo va'oromo Sidon amonö rova'adoho va'o sa'a ihe Ame 10 Jio'amaje Sa'are ë va'oromo nume Galilee e'ure ruvebijadeje. ³² Ruvebijamu gagorovo aëro ae gemu hu'irae baeromo rovareje. Ëa hesi hia'oho tugohë'e o jöho a'o'a'ohë'e jövë'e ae jiadeje. Ëaho hu'irae baeromo rueromo Iesu ëninamiromo uavareje: Jasi övoho hesi sinoro bamego hu mae jiajo. ³³ Ëhi uavamu Iesuro hu'irae baeromo ae aho'obëhe riravaruire jioromo va'oromo jabesi sivue rirarovoromo hesi övo namoho niö'i ë a hesi hia'i gagore rëmö'öjadeje. Rëmö'öromo jijönugoromo sabëro öromo ë a hesi bitaroho rëhahadeje. ³⁴ Bitaroho rëhahonugoromo ö'idöho sioroho garomo ë ahuni hara'uoromo hesi jöëro uavadeje: Epatajo. Ëhesi bëhoho huotovë'oho: Hia'e dadovo'amëjo. ³⁵ Ëhi uavamu gavë'i ë a hesi hia'oho dadovaho'i bitaroho marëromo jöho avoho jövadeje. ³⁶ Jöho avoho jövamu Iesuro ae aho'obëhe uëvadeje: Naehu mu vaejodoho nadi aho majëhirëjo. Iesuhu nijio'iraejëvo'i hijadoho bogo ejahoruomo'i ae ëma majëhibe va'areje. ³⁷ Röhu ae aho'obëhe Iesuare muoho garomo tiöruomadeje. Tiöromo uvoruomadeje: Mue bövie bise'e ma-mabëhe vaejë'e höjo. Mu masije gö gö vaeromo röhu hia'i tugohë'e bitaro tövë'e aribövioho jabu'o avohëvego marë'amoromo jöe heromo jöe atarue höjo.

8

Iesuhu ae aho'obëhe 4,000 i da'uojëhade jöhoje.

¹ Ëhi'amu ae aho'obëhe röhu maho gagovë'ëro ie bogojëvadeje. Ie bogojëvamu gagorovo Iesuro hesi ijorajo ömo'ömoho uëvadeje: Ruehë uëromo rovamu uëvadeje: ² Ave ariböviohuni vavaenegajëjo. Jabumë na'o raromobe rovaroho majae niö'i gemu barëjël'ëro ëhu'ëro i ue'aho'iröhoho bogohöjo. ³ Naehu ma-dë gagëremu rëmö'öjamu jabesirëro va'ë'oho nune öri'amobe va'oruomo'ajëjo jabumë ae gö gö öre ëgoro rueruomël'ëro jiël'ëro. ⁴ Ëhi uëvamu rue ijorajoho jaburo uavareje: Röhu diehi'oromo ë aribövioho ioho da'uojëhi'ëjarëjo. Aveho a rumo'e sa'ae höjo. ⁵ A rumo'e sa'ae höjamu uëvadeje: Ioho dimino'e jëvajëjo. Dimino'e jëvajëjamu uavareje: Ie övo gö mine övo göre niö'i javuajëjo.

⁶ Ëhi uavamu hegorovo Iesuro ae aho'obëhe uëvadeje: Sa'aro raro-mohëjo. Raromohëromo ie övo gö mine övo göre niö'i ujuoho rovaroho ëho Iesuro ujuohoromo God huë mae uaromo ato'atovoromo hesi ijorajo ömo'ömoho i'imëmijadeje jaburo suvuorëmijëro. I'imëmamu ujuohoromo ae aho'obëhe suvuorëmijareje. ⁷ Ëhi'o'i visu inine ma-gemu gemu Iesuare ijorajo jabesirire jiadeje. Jëvamu Iesuro ujuohoromo God huë mae uanugoromo hesi aribövioho uëvadeje: Ave visuohu'o suvuorëmibe va'ohëjo. ⁸ Ëhi ë'ë'ëro ae aho'obëhe ë ioho ue'ahamu da'uëgadeje. Da'uëgamu gagorovo ijorajoho jaburo i vitu vituoho gagovoromo esöe övo gö mine övo göre niö'i aegamu irijjio'mamideje. Ëhi'areje. ⁹ Röhu ë i visu ue'ahare aribövioho aho'obëhe 4,000 rabu'e jiadeje. Ue'ahoromo Iesuro rëmö'öjamu va'oruomadeje. ¹⁰ Va'amu

gavë'i Iesuro hesi ijorajo ömo'ömohu'o gemu mae boat-re ajiomoromo Dalmanutha sa'are va'adeje.

Pharisee ariböviehu Iesu bogo ma uehorovoromo huhu darugo'e mu vaejöro dinamare jöhoje.

¹¹ Èhi'amu iae Pharisee ariböviohuro rueromo Iesu jö aho'ahamijareje. Jö aho'ahamiromo Iesu bijioho ga'i nimareje ga'i hu guaro beva'ego. Èhi nimoromo Iesu uavareje: God-are darugoho baeromo bogo gavarue muoho röjahujego no gavarëjo huro ja ajamego muoho vaejanue javego o bogo. ¹² Èhi uëvamu hegorovo dë vövöbajo'o uhure sisë maro vavaenimoromo hara'uoromo uëvadeje: Ave jaruvore raromaruje aribövioho jemë rabëni bogo gavarue muoho ga'i nimarujëjo. Na God-are ae jevego ga'i nadi ëhioho uehëjo. Ave jöho na jö mae majëhi'ie'ajëjo. Ave jaruvore raromaruje aribövioho ëhi jië'e darugo'e muoho bogo mae bogo ga'a'arujëjo. ¹³ Èhi uënugoromo rëmö'ö'i Iesumëro va'oromo boat-re iojiomoromo jovo e'u ioni gönö va'i va'areje.

Pharisee aribövi o Herod-are aribövi jabesi i dë huaje oso hesi uhu jöhoje.

¹⁴ Va'oromo hesi ijorajoho jaburo rumonëgamu iruno'oho bogo gö'oho ujuohë'e jiareje. Ioho ma-bisemu urimo jiadohemu ëhuremu boat-re jëvadeje. ¹⁵ Ie ma-bisemu jëvamu Iesuro uhu'e uëvadeje: Jemëro gavë'iajo. Pharisee aribövi jabesi o Herod-are i dë huo'amaje osohuro jemesirire rumorovo'ajëjo. ¹⁶ Rumorovo'ajëjamu rueho jaburo ë jöho mevoromo uarovareje: No ie bogojavuo'ego ëhuni jövajëjo. ¹⁷ Èhi uarovamu Iesuro gëromo uvadeje: Jabumë ë jöho ataruëromo uëvadeje: Jemë rabëni i bogojavuaie jöho atarujëjo. Jemë rabëni avejë'öhu'o bogo gavarujëjo. O rabëni bogo uehorovarujëjo. Na mu ma hesi uehoroho bogojëvë'ëro ëhu'ëro bogo gavarujëjo. ¹⁸ Jemë nuni'e hia'i'e jëvajëjo. Röhu rabëni bogo garomo bogo hejarujëjo. Jemë rabëni ave jö hesi bëhoho bogo uehorovarujëjo. ¹⁹ Naehu ie övo gö mine ujuohoromo ato'atovoromo ae aho'obëhe 5,000 i'imëmodoho jemë ë i vitu vituoho aegamu esöe dimino'e irijiom'o'amade höjo. Uëvareje: Esöe aho'obëhe 12 irijiom'o'amade höjo. ²⁰ Èhi uavamu uëvadeje: O naehu ie övo gö mine övo göre niö'i ato'atovoromo ae aho'obëhe 4,000 i'imëmodoho jemë ë i vitu vituoho aegamu esöe dimino'e irijiom'o'amade höjo. Uavareje: Esöe aho'obëhe övo gö mine övo göre niö'i ëhi irijiom'o'amade höjo. ²¹ Irijiom'o'amade höjamu uëvadeje: Urimo nasi mu bëhi bogo gavarijoho jaruvohu'o jemë rabëni bogo avoho gevaruje höjo na diehi jië'e ae jevajoho.

Iesuhu nuni sisë'e a ajamamu öri ari'o ma-bisemu ma'e ma'e garomo röhu maho ajamamu avoho ga barëjade jöhoje.

²² Èhi'onugoromo Iesu'o hesi ijorajo ömo'ömohu'o ëho jaburo Bethsaida amore rovarëje. Rovamu aëro nuni sisë'e ae gemu hu'irae baeromo rovarëje. Barueromo Iesu ëninamiromo uavareje: Ave iaho rëhego nunoho marëjajo. ²³ Marëjajamu Iesuro nuni sisë'e a hesi övore ma'enoromo amore jioromo hu'irae baeromo va'adeje. Hu'irae baeromo va'oromo ë a hesi nunoho sabëro ödivoromo övoho nunire bamëvoromo uavadeje: Na ja uherihoromo bövioho bise'oho gavanuëjo.

24 Gavanuëjamu ruehuro nigerohoromo garomo uavadeje: Na sisë'i gavajëjo ae jijiho'i röhu jabesi nu ano'o ho ijo va'ëne jio'amo'ego. 25 Ëhi uëvamu ruehuro övoho nunire röhu maho bamëvadeje. Bamëvamu röhu maho uherihoromo avoho garomo bövie bise'e aho'o ma-mae ga'amadeje. 26 Ma-mae ga'amamu uavadeje: Nadi arue amoho vuonorö'ö va'i o öre gö öre göho va'i ma-ahorirëro jasi osaëro va'ëjo.

Iesu hu ëhi jië'e ae jiaje jö Peter-hu jövade jöhoje.

27 Ëhi ë'ë'ëro Iesu'o hesi ijorajo ömo'ömo'u'o va'areje. Va'oromo Caesarea Philippi amo börömo jiajinö amore amore suorovo'i iojomareje. Örire iojomë'i Iesuro uëvadeje: Na rahuo jevaje jöho ae aho'obëhe diehi atoruomaje höjo. 28 Diehi atoruomaje höjamu uavareje: A ioro'iorohuro uvoruomaje höjo: Ja John bapataeto vaejavuonövane ahuro rovë'e javajëjo. A ioro'iorohuro uvoruomaje höjo: Ja Elijah-ro rovë'e javajëjo. A ioro'iorohuro uvoruomaje höjo: Mami gö'e jö God-aro baeromo majëhinövarijohuro röhu jero gemuëro rovë'e javajëjo. 29 Ëhi uavamu hegorovo Iesuro uëvadeje: Röhu jemë nasi jöho diehi ataruje höjo. Diehi ataruje höjamu Peter-ro ri'öromo uavadeje: Ja böröme namiro mo ajamuijanue aho javajëjo. 30 Javajëjamu uëvadeje: Ëjöho nadi aho huruoho majëhirëjo.

Iesuhu huë vavaeni baeromo guomoröhe jö jövadohoje.

31 Ëhi'onugoromo Iesuro aevoromo hesi ijorajo ömo'ömo'u'o röjëhiromo uëvadeje: God-ro ëhi bamë'ëro ëhu'ëro hesi A Maho naro vi'ehe huë vavaene bövie bise'e bae'ejöjo. Jew rajo a duvaho ömo'ömo'u'o priest masijoho jögoru öri röjëhijarue aribövioho ëho jaburo na bijönegoruomo'ajëjo. Bijönegoruomo'iramu aëro anego'iramu guomevo'ajëjo. Guomoromo majae niö'i gemu hesi uhure i'ovoromo ri'ö'ejöjo. 32 Ëjöho Iesuro bogo subivëho'i ma-sama'e röjëhijadeje. Röjëhijamu Peter-ro Iesu rori'o hu'irae bava'oromo uavadeje: Ëhi jië'e jöho nadi jövëjo. 33 Nadi jövëjamu Iesuro huotorovoromo hesi ijorajo ömo'ömo'u'o gëromo Peter uavadeje: Satan rori'o va'ëjo. God-hu uehorovajëhioho ja bogo ëhioho uehorovo'i ma-aehu uehorovaruëhi jero ëhi uehorovoromo ëhuni ë jöho jövanuëjo.

34 Ëhi uënuogoromo Iesuro hesi ijorajo ömo'ömo'u'o a ioro'ioroho aho'obëhe ëhu'o uëvadeje: Ruehë uëromo rovamu uëvadeje: Ae rahuaru nasi ijore ijore jijiho'i nimë'o ho jasi sinehu nimajoho nadi uehorovo'i uvonëjo: Iesuaru jöëni vi'ehe huë vavaene javoje rabe baeromo guomevë'o ho iae hesi hö uvoromo korosi hesi i'uoho banigijomanovoromo nasi ijoro ijoro juvonövonëjo. 35 Ja jasi sinohuni uehorovoromo biririvoromo ave sa'are hi'i ëhemu uehorovë'o ho ijönöho guomo öriro va'a'anuëjo. O ja nasi jöëni o nasi jö ma hesi jöëni guomë'o ho ijönöho maro hi'a'anuëjo. 36 Jaehu are jove sa'ae mae sisë aho'obëhe bae barë'i röhu jasi arijo'arije ijumorovë'o ho na ja ëhuro mae javo'ajëjo. Bogajo. 37 Arijo'arije ijumorovë'o ho diehi röhu maho avohorovo'iramu mae javo'ajëjo. Öre bogohöjo. 38 Ëhesi bëhoho ave jaruvore raromarue aribövioho sisë aribövioho jioruomë'ëro bogo God gemu uehorovo'i mue gö gö uehorovoromaje höjo. Jabumë ae rahu nasi jöëni o naehu majëhijaje jö hesi jöhuni javojëgë'o ho u'emu God-are

A Maho naro maemu jïë'e anera ömo'ömohu'o nasi Vavu hesi ajohu'o rue'iramu evare nani javojimoruomade ariböviohuni javojego'ajëjo.

9

¹ Èhi uënuogoromo uëvadeje: Ave jöho na jö mae uë'ië'ajëjo. Jemë a ioro'iore ave riravarujoho bogo vuovë'e raromoromo ga'a'arujëjo God-hu böröme namiromo hesi darugehu muebejaje ajoho rue'iramu.

Iesuare nu ano'ehu ajivoromo gorosovade jöhoje.

² Èhi'oromo majae aho'obëhe övo gö mine övo göre gemu barëjamu Iesuro Peter James John èhi söromo dahoru ëgobövire ajiomoromo jabesi sivue hahagu raromareje. Raromoromo ë ijorajoho jaburo gavareje Iesuare sino haho'e gorosovoromo ³ niögoho ajivo avo-hamu. Sa'are raromarue aribövioho noro niöge u'o'ibejo bogo ëhioho ajivo'ibejo. Iesuare niögohuro èhi ajivamu gavareje. ⁴ Èhi ga'i gavareje a mami ae niö'i Elijah'o Moses'o ëma jëvoromo jabu'o Iesu'o jöe atoruumamu. ⁵ Jöe atamu gëgorovo Peter-ro Iesu uavadeje: Tisa no ave raromaruoho iae mae höjo. Uövuego no javu harihe niö'i gemu vae'amarëjo jani gemu Moses-ni gemu Elijah-ni gemu. ⁶ Peter-hu èhi uavade hesi bëhoho Peter James John ëho jaburo sisë maro juhuonirovë'ëro jö ma diehi jövo'iröhoho Peter dadivamu ëhuni èhi jövadeje. ⁷ Èhi jövoromo Iesuare ijorajoho jaburo gavare suehuro Iesumë aegëhamu gagorovo hejareje sue uhure uvavamu: Ave aho nasi Harihu mabëhe höjo. Huhu jövaje jöho avoho herëjo. ⁸ Èhi uvamu hejë'i Iesuare ijorajoho jaburo ruaroho numiaroho uheriho'i gavareje Moses'o Elijah'o bogojëvo'i Iesuro gemuëro ë jabesi bëhire namijamu.

⁹ Èhi'oromo dahorure ruvebijë'i Iesuro uëvadeje: Jemëhu gavarijoho nadi aho huruoho majëhirëjo. U'emu God-are A Maho naro guomoromo ri'öjego evaro majëhirëjo. ¹⁰ Èhi uëvamu rue ijorajoho jaburo iae ejahoromo Iesu gorosovamu gavare jöho subivëhobe va'areje. Röhu jabesi sivue atoromo uarovareje: Guomoromo ri'ö'iröhëro uövuaje jö hesi bëhoho rabe höjo.

John bapataeto vaejaje aehu rovadoho ëho Elijah-hu rovanovade jöhoje.

¹¹ Èhi uarovoromo jabumëro Iesu uavareje: Jew rajo nosi jögoru öri röjahuijarue ariböviohuro uövuarue höjo: God-are a börömoho bogo ëma rue'i hu rue'ië'iroho a mami ae Elijah God-arire va'aduhuro vuonorö'ö rue'a'ajëjo. Rue'iramu God-are a börömoho ijore rue'a'ajëjo. Jögoru öri röjahuijarue aribövioho rabëni ë jöho majahuijarue höjo. ¹² Rabëni majahuijarue höjamu Iesuro uëvadeje: Io'ajo. Elijah-hu urimo rueromo bövi bise'o avoho'amo'iröhe jöho iae mae-ëjo. Röhu ave jöhu'o God-are surire jajivoromo uvë'e höjo: Aëro God-are A Maho nörö nue huodivoromo sisë vae'iramu vi'ehe huë vavaene bövie bise'e bae'a'ajëjo. Èhi jajivë'e höjo. Ejöho bogo ëma jajivo'i iae mae jajivare höjo. ¹³ Röhu naro ave jöho jemë uhu'e uë'ië'ajëjo. Hehëjo. Elijah iae mami'e öre avoho'i rovade höjo. Rovamu jaburo diehi nimarëhi èhi hesi örire sisë vaeruomade höjo. Èhi ë'iröhe jöhu'o God-are surire jajivë'e höjo.

Iesuhu Satan-are a sisë aharihu hesi dëre jiamu rarovö'öjade jöhoje.

14 Ëhi uënuḡoromo Iesu Peter James John ëho jaburo dahorure ruvebijareje. Ruvebiromomo Iesuare ijorajo ioro'ioro jabetesire ruel'i gavareje ae aho'obëhe jabesi bëhire gagovoromo riravo rova'o rojomo'i Jew rajo jögoru öri röjëhijarue ariböviohuro Iesuare aribövi jabesi jöho aho'ahëmijamu. 15 Ëhi jië'ëro ae aho'obëhe gavare Iesu rovamu gagorovo tiöjëvadeje. Tiöjëvamu Iesu ma-burëro bihororomo jejamiruomadeje. 16 Jecamijamu Iesuro uëvadeje: Jemë rabu jöe nasi ariböviohu'ooho atarujëjo. 17 Atarujëjamu ae gemuëro uavadeje: Tisa na nasi harihoho jasi örire barovode höjo. Ëhesi bëhoho Satan-are ae gemuëro hesi dëre abo hiromomo hesi bitaroho tövahë'e höjo. Ëhi jië'e aru'ahoho hesirire höjo. 18 Hesirire jië'ëro nasi harihu hesi simano huotovahë'iroho ijumahego jue'i sa'are behumorovaje höjo. Behumorovoromo jö'onö obohu tatogo'e rueromomo ane vuogigimoromomo biriri'övaje höjo. Ëhi'ajego naro jasi ijorajo ömo'ömo uëvode höjo: Aru'aho sisëho rarovö'öhego va'ajo. Ëhi uëvamu rarovö'ö'i ë'o gavaroho bogo eni jëvade höjo. 19 Bogo eni jëvade höjamu Iesuro uëvadeje: Asë'e ave jaruvore raromaruje aribövioho jemë bogo ma uehorovaruje aribövie jëvajëjo. Na majae dimino'e jemë'ooho hibe va'ejöjo. Majae dimino'e jemesi mu sisëho garomomo manunëro ga taemobe va'ejöjo. Jemesi uehoro sisëhuro na u'uvevajëjo. Ëharihoho barovego na gavöjo. 20 Na gavöjamu rueho jaburo aharihoho hu'irae rovareje. Rovamu uhure a sisëhuro Iesu garomomo ma-burëro dë vövöbajo'ooho ijumahamu simane sisërëromomo bijöbijövoromomo övo'o höru'o ajiomomomo sa'are behumorovoromomo jö'onö obohu tatogo'e rueromomo ubiri'ubirivadeje. 21 Ubiri'ubirivamomo gagorovo Iesuro vavuoho uavadeje: Divare aevoromomo simanoho sisërëbe rovade höjo. Sisërëbe rovade höjamu uavadeje: Asisö'o jiadevare evare aevoromomo ëhi jiove rovade höjo. 22 Röhu uhure a sisëhuro majae aho'obëhe ijumo avoho'i nimego simane huotovahego vënire jovore ëma ravorovaje höjo. Röhu ja eni javë'ooho nosi jöëni vavaenimomomo ajamuijëjo. O bogo eni javego ëhuro vuonugëjo. Vuonugëjamu Iesuro uavadeje: 23 Ja rabëni uvanuëjo: Nani nöro bogo eni höjo. Ae rahu God mae uehorovë'ooho God-hu ëhi jië'e ariböviohuni bövi bise'o vae'iröhoho eni höjo. 24 Eni höjamu rue vavuohuro ma-darugo'o uvadeje: Iae na ma-bisemu mae uehorovajëjo. Ajemego na mae uehorovo avohöjo.

25 Ëhi uavamu heromomo Iesuro gavade rue ariböviohuro aho'obëhe tubijiohoromomo ruë numë hu baba'amo'i rueruomamomo gëgorovo uhure a sisëho birevoromomo uavadeje: Aru'aho sisë a jabetesire abueromomo bitaro tövëhoromomo hia'i tugohëhanuoho naro ja uavajëjo: Höröromomo va'ëjo. Ijoho bogave gemu vuonorö'ö abue'iranëjo. 26 Ëhi uavamu hegorovo rue uhure a sisëhuro jö'e dadovoromomo aharihu hesi simanoho huotovahamomo bijöbijövoromomo sisë maro övo'o höru'o ajiomadeje. Sisë maro övo'o höru'o ajiomamomo uhure a sisëhuro höröromomo va'amomo aharihoho guomo barëjë'e sinoho va'ëne raromadeje. Ëhi raromamomo ae aho'obëhe uvoruomadeje: Ëiaho mami'e guomë'e höjo. 27 Guomë'e höjamu Iesuro aharihoho övore ma'ënoromomo nigemamomo ri'öjajëje.

28 Ëhi'amu Iesuro va'o osare hijamomo hesi ijorajohomo jaburemomo hu'o raromomomo uavareje: Diehi'oromomo noehu aru'aho sisë rarovö'öjarohomo

bogo eni javuade hōjo. ²⁹ Bogo eni javuade hōjamu Iesuro uēvadeje: Ēaharihu hesi dēre jiade ēhi jiē'e a sisē ae gō hesi dēre jiajoho rarovō'ō'iē'iroho God-are ōrire ēninamijē'ohuro ēhuro rarovō'ō'amo'arujējo. Ōri gōho bogo'e hōjo.

Iesuhu guomorōhe jō rōhu maho majēhijade jōhoje.

³⁰ Ēhi'onugoromo Iesu'o hesi aribōviohu'o ē sa'aho vuonugo'i va'areje. Va'oromo Galilee sa'are ma-saginiēri jijihoruomadeje aēro Iesu gajōēni. ³¹ Ēhesi bēhoho huro hesi aribōvioho rōjēhibe juvoromo uēnōvadeje: God-ro ēhi bamē'ēro hesi A Maho na a jabesi ōvore va'oromo anego'iramu guomo'ejōjo. Guomoromo majae niō'i gemu hesi uhure ri'ō'ejōjo. ³² Jōho ēhi rōjēhamu bēhoho bogo he'irōgoro juhuoninēgamu bogo ua gavareje.

Di aehu a ioro'ioro iosirēmiromo bōrōme jiaje jōhoje.

³³ Ēhi'oromo Iesumēro Capernaum amore rovarēje. Rueromo osare va'o raromoromo Iesuro hesi aribōvioho uēvadeje: Jemē rabu jōe ōriroho atobe rovarije hōjo. ³⁴ Atobe rovarije hōjamu jōrumoraējareje ē hesi bēhoho ōrire rueromo atoromo uarovē'ēro: Iesuarē ijorajo ōmo'ōmoho di aho bōrōmoho javuajējo. Ēhi uarovobe rovē'ēro jōrumoraējareje. ³⁵ Jōrumoraējamu Iesuro sa'aro hiromo hesi aribōvi 12-ho jaburo ruejōro uvēvamu rovarēje. Rovamu uēvadeje: Ae rahu a ioro'ioro iosirēmiromo nunire nami'i uehorovē'oho uvonējo: Na a ioro'ioro jabesi dejonō namijajēromo jabesi muoho vaejēhonōvonējo. ³⁶ Ēhi uēnugoromo Iesuro va'o aharihoho viēhi jabesi nunire baro gurasijiomomo namiromo uēvadeje: ³⁷ Ae rahu aviēhi jiē'e asisō'oho gemu nasi ihore rajahiromo baejē'oho ēhuro na'o rajahiromo baejevoruomaje hōjo. O ae rahu na rajahiromo baejevē'oho ēhuro bogo na gemu rajehi'i remō'ojamu rovode ahu'o rajahiruomaje hōjo.

Ae rahu jemē'o bogo iro muorovo'e vaejē'oho jemē'o gemuore jiaje hesi jō Iesuhu jōvadohoje.

³⁸ Ēhi uēvamu John-ro ri'ōromomo uavadeje: Tisa no gavare hōjo ae gemuēro jasi ihoho uvoromo aru'aho sisē a jabesi dēroho rarovō'ōjēvamu. Rarovō'ōjēvamu garomo rōhu gavare hu bogo no'o juvaje aho jiamu gagorovo uavareje: Vuonugējo. ³⁹ Vuonugējamu Iesuro uēvadeje: Nadi ēhi jiē'oho ē'orējo. Ae rahu nasi iho uvoromo darugo'e mu vaejē'oho bogo burēroho huotorovoromo nasi jō sisēho aho majēhi varijēnoho hōjo. ⁴⁰ Ae rahu nosi ōrire bogo bijōnimē'oho ē aribōvioho nosi aemo'aeme jioruomajējo. ⁴¹ Rōhu ave jōho na jō mae uē'iē'ajējo. Ae rahu jemē gēromo uvē'oho: Jemē Keriso-are aribōvie jēvajēromo ma-bisemu ajēmiromo enatuore jovo bojēmijē'oho jabu iae manaho ujuohoruomo'ajējo.

God uehorovarue mu ijumēharue aribōvi jabesi jōhoje.

⁴² Ae gōēro asisō'onō'e jōrume hiromo nasi ōrire mae uehorovevo'ajējo. Ēhi'o'iramu ae gōēro ē aho mu sisē rōjahiromo ēhuro na mae uehorovevaje muoho ijumaho'ajējo. Ijumahoromo i'u sisēho bae'a'ajējo. Mu sisē bogo rōjahijajevare evare ē mu sisē rōjahijaje a hesi sōnō'ahore aēro i'u'e munē hitahiohuro tōvoromo sō jovore ba'amego e'ure beva'oromo guomo'ibejajo ēho ma-jianovo'ibejajo.

A'i ë mu sisë røjahi'iröhe ë hesi i'uoho börömo bëhe bae'a'ajëjo. ⁴³ O jasi övehu mu sisë vaeromo God uehorovanue mu vuonugo'ië'iroho övoho tariö'önëjo. Ja öve gemu javamu ijönö va'oromo mare hijë'oho ëhuro mae javo'ajëjo. A'i öve niö'i javamu ijönö God-hu ramö'öjamu ravemu ravaje vënire va'ë'oho ëhuro sisë bëhe javo'ajëjo. ⁴⁴ [Ëdirö'ore huiniehuro bogo vuovo'i a sine ma-ue'ahemu ue'ahago vënoho bogo duorohego ë dirö'ore aho vi'ehoho ma-baemu baejarue höjo.] ⁴⁵ O jasi hörehu mu sisë vaeromo God uehorovanue mu vuonugo'ië'iroho höroho tariö'önëjo. Ja höre gemu javamu ijönö va'oromo mare hijë'oho ëhuro ja mae javo'ajëjo. A'i höre niö'i javamu ijönö God-hu ramö'öjamu vënire va'ë'oho ëhuro ja sisë bëhe javo'ajëjo. ⁴⁶ [Ëdirö'ore huiniehuro bogo vuovo'i a sine ma-ue'ahemu ue'ahago vënoho bogo duorohego ë dirö'ore aho vi'ehoho ma-baemu baejarue höjo.] ⁴⁷ O jasi nunehu mu sisë vaeromo God uehorovanue mu vuonugo'ië'iroho nunoho jahonëjo. Ja nune gemu javamu ijönö va'oromo God-are aharire hijë'oho ëhuro mae javo'ajëjo. A'i nune niö'i javamu God-hu ramö'öjamu vënire va'ë'oho ëhuro ja sisë bëhe javo'ajëjo. ⁴⁸ Ëdirö'ore huiniehuro bogo vuovo'i a sine ma-ue'ahemu ue'ahago vënoho bogo duorohego ë aho vi'ehoho ma-baemu baejarue höjo.

⁴⁹ Söero ioho hu'ihego ëhuro ioho bogo sisërë'i mae jiaje höjo. Söehu i hu'ihego i bogo sisërë'i mae jiajëhi ëhi ae aho'obëhe jemë vënëro ravëvanovoromo vi'ehe bae'a'arujëjo ëhuro jemesi dë vövöbajö'oho bogo sisërëjëho'i ma-mae jëvoröhego. ⁵⁰ Söho rihu'e mabëhe höjo. Röhu sö hesi rihu barëjë'oho röhu bogo maho avoho hesi höjo. Ëhuni nasi rihu'e jöho ma'eno'i nadi boremi'örëjo. Nadi boremi'ö'i nadi iro muorovo'oho vae'i ma-huë baerovorëjo.

10

Vaboro'o baru'o gemuoho jëvaje jöhoje.

¹ Iesuro jöho ëhi majëhinugoromo ë sa'aho vuonugo'i va'adeje. Va'adoho va'o Judea sa'are va'oromo Jordan beromo ioni göre ajiomadeje. Ajiomamu gagorovo ae aho'obëhe hesi örire röhu maho ro gagovareje. Gagovamu huro urimo ë'ajëhi ëhi God-are jöe røjëhijadeje.

² Røjëhijamu Pharisee ariböviohuro rueromo Iesu guaro beva'ojöro uaruomadeje: Vaboro nugö'ö'amo'iröhe jögoru hesi jöho no he'i naguajëjo. Aehu vaboro nugö'öjë'oho ëhi jië'oho na mae o sisë höjo.

³ Na mae o sisë höjamu Iesuro uëvadeje: Röhu Moses-hu jajivoromo bojëmade jögoroho diehi höjo. ⁴ Diehi höjamu uavareje: Moses-ro jajivoromo uövuë'e höjo: Nugö'ö'i nagë'oho nugö'ö'irane jöho suroro jajivoromo vaboroho bojamiromo evaro nugö'önëjo. ⁵ Ëhi uavamu uëvadeje: Iae ëhi höjo röhu jemë hia'i biriri'e aribövie jëvobe rovë'ego ëhuni Moses-ro ë jögoroho jemëni jajivëhade höjo. ⁶ Röhu aevo'i God-hu bövi bise'o bamade majaroho bogo ëhioho jio'i ë hesi jöho God-are surire ëhi uvë'e höjo: God-ro aevoromo ahu'o magonahohu'o bamëvade höjo.

⁷ Ëhu'ëro jië'ëro aëro vëmu vavu'oho rëmö'ö'i vaborohu'o gemu mae hi'a'ajëjo. ⁸ Vaborohu'o hi'iramu jabumë niö'i jëvadoho röhu gemu jio'a'ajëjo. Ëhi uvë'e höjo. Ëhu'ëro jië'ëro ë ahu'o magonahohu'o bogo hahagu hahagu jio'i ma-gemu jëvo'ajëjo. ⁹ God-hu mami'e gemuore havoromo muhadoho jemë ma-ae jëvaje nadi tarivorëjo.

¹⁰ Ëhi uënu goromo hu'o hesi i jorajo ömo'ö mohu'o vuonorö'ö va'o osare raromoromo i jorajoho jaburo Iesu uavareje: Vaboro nugö'ö amarue jöho röhu maho majahuijego no hejarëjo. ¹¹ Hejarëjamu Iesuro uëvadeje: Baruehu vaboro nugö'ö i gö masuvë'oho ëho goho'amarue muoho vae'a'ajëjo. Ëhuro vaboro maho ijumo'ajëjo. ¹² O vaborehu baru nugö'ö i gö masuvë'oho ëho bogo maho masu'i goho'amarue muoho vae'a'ajëjo. Ëhi uëvadeje.

Iesuhu hesi övo asisö'o inino jabesi sinore bamëhade jöhoje.

¹³ Ëhi uëvë'ëro aëro asisö'oho sö ujuoho rueruomadeje Iesuro öve jabesi sinore bamëhojoro. Ujuoho rovamu gëgorovo Iesure i jorajo ömo'ö mohuro birëgoromo uëvareje: Asisö'oho nadi aveho sö ruehëjo. ¹⁴ Ëhi birëgamu hegoro Iesuro dë vörönimamu hesi aribövioho uëvadeje: Nadi ahëvo'i uëhego rueruomajo. Ëhi jië'e asisö'o va'ëne jörume raromë'e aribövioho God-ro böröme namiromo muebejëvego hesi ahariremu raromoruomaje höjo. ¹⁵ Ave jöho na jö mae uë'ië'ajëjo. Asisö'o ininehu bogo sivu uehorovo'i God-hu muebejavuajoho mae hö uvaruëhi ae rahu bogo ëhi uvë'oho ë God-are ahariroho bogo va'o raromo'aruëjo. ¹⁶ Ëhi uënu goromo ë asisö'oho huohudë'amoromo övoho jabesi simanore bamëhoromo uëvadeje: God-ro huë mae bojëmi'ajëjo.

Bövi bise'o marohë'e a hesi jöhoje.

¹⁷ Ëhi ë'ë'ëro Iesuro ri'öromo örire va'adeje. Va'amu ae gemuëro tutuvo rueromo hesi bëhire ague aho hiromo uavadeje: Tisa ja a mae javajëjo. Na diehi'oromo ioro'ioremuoho maroho hi'ejöjo. ¹⁸ Maroho hi'ejöjamu uavadeje: Jero na uevanuëjo: Ja a mae javajëjo. Iae mae höjo röhu hesi God gemu a maho höjo. ¹⁹ Röhu mae hi'iranëro ue gevanuoho ja God-are jögoroho iae gavanue höjo. Nadi aho anonëjo. Nadi goho'amonëjo. Nadi vajiohoho baenëjo. Nadi sareri'e jöho aho majëhinëjo. Nadi sareri sarerioho ë'oromo vajiohu muoho vaenëjo. Jasi vëmoho vavuoho mae uehorovëvonëjo. Mae hi'irane öroho ëhi höjo. ²⁰ Öroho ëhi höjamu uavadeje: Tisa iae mae-ëjo röhu na asisö'o'ere aevoromo jö ebe rovodoho jaruvohu'o ëhi gemuoho ë'aje höjo. ²¹ Ëhi uavamu hegoro Iesuro hu garomo hesi örire dë vövöbajole aho'o uehorovoromo uavadeje: Iae ëhi höjo röhu mue gemu bogo vaejëlëro javë'ëro ëhu'ëro ja bogo eni javajëjo mae hiemu hi'iranoho. Va'oromo jasi inömo ho bövioho bise'oho imo'amoromo monioho baeromo inömo bogo eni jië'e aribövioho suvuorëminëjo. Ëhi ë'ë'öho bövie bise'e maho maho janioho ö'lidöre jiaho'ajëjo. Ëhi'oromo rueromo nasi ijoro ijoro juvonövonëjo. ²² Ëhi uavamu hegoro ruehuro hesi uehorovoromo uvadeje: Na bövie bise'e börömo mae jevë'ëro suvuorëmi'irodoho na bogo eni jevajëromomo vavaenimoromo nu ano'e sisërëromomo va'adeje.

²³ Va'amu gagorovo Iesuro uherihoromo hesi i jorajo ömo'ö mohu'o gëromomo uëvadeje: Bövi bise'o marohë'e ariböviehu God-hu muebejaje öri ari'ere va'ë'öho anoji'e mae jio'a'ajëjo. ²⁴ Ëhi uëvamu rue i jorajoho jahu jöe barëjëvadeje. Jöe barëjëvamu Iesuro röhu maho uëvadeje: Aganomë God-hu muebejaje aji'e öri ari'ere va'iröhoho anoji'e mae höjo. ²⁵ Mi börömo anugo gagore nugö'öjë'öho ja bogo eni javo'ajëjo.

Röhu ëhi ë'ë'oho samae jianovo'i a'i bövi bise'o marohë'e ariböviehu God-hu muebejaje öri ari'ere va'iröhoho ëho anoji'e mae höjo. ²⁶ Ëhi jövamu heromo tiötiövoromo uavareje: Ëhi jië'oho no diehi'oromo maroho va'ejarëjo. No ae aho'obëhe bogo eni javuajëjo. ²⁷ Bogo eni javajëjamu Iesuro ërimëhoromo uëvadeje: Io'ajo. Jemë aëro jëvë'ëro bogo eni jëvajëjo. A'i God-hu öri avohëhë'oho hu eni höjo hu mue aho'obëhe vaejë'oho eni jiajëro jië'ëro.

²⁸ Ëhi uëvamu hegoroovo Peter-ro ri'öromomo Iesu uavadeje: Aveho gavëjo. Noro bövie bise'e nosiroho vuonugo'i jasi ijore ijore ji-jihë'e javuajëjo. ²⁹ Jijihë'e javuajëjamu Iesuro uëvadeje: Ëho iae mae höjo. Aveho na jö mae uë'ië'ajëjo. Ae rahu javue öe ma'ine vëme vavue aboji harihu'e o sa'ae vuonugo'i nasi jöëni va'oromo nasi jö ma a majëhijë'oho ³⁰ ëhi jië'e aribövioho jemë jemesi bövioho bise'oho ëho ma-bise'e vuonugarije höjo röhu avevejö'e ave sa'are bövi mae bae'a'arujëjo. Javue aho'o ö ömo'öme aho'o ma'ino ömo'öme aho'o vëmu ömo'öme aho'o aboji harihu'e aho'o sa'ae aho'o bae'a'arujëjo. Ëhi bae'a'arujëjo röhu aëro nasi jöëni huë vavaenohu'o bojëmi'iramu bae'a'arujëjo. Röhu majae ijönö jemë ma-ioro'ioremu maro raromola'arujëjo. ³¹ Ëhi höjo röhu a ioro'iore aho'o nuninö jiaruoho dejönö jio'i a ioro'iore dejönö jiaruoho nuninö jioruomola'ajëjo.

Iesuhu guomoröhe jö urimo vae niö'i majëhijadoho ijönö röhu maho majëhijade jöhoje.

³² Ëhi ë'ë'ëro Iesu'o hu'o va'arue ariböviohu'o ëho jaburo Jerusalem amo börömore ajiomo'i örire va'areje. Iesuro urimo va'i hesi ijo-rajo ömo'ömohuro uehoro böröme baebe hesi ijore va'i a ioro'ioroho aho'obëhe jaburo jabesi ijore juhuonivobe va'oruomadeje. Va'oromo Iesuro hesi ijoraje 12-ho röhu maho rori'o sö va'oromo aehu hesi örire diehi jië'e mu vae'iröhe jöho majëhiromo uëvadeje: ³³ Aveho hehëjo. No Jerusalem amore ajiomaruëjo. Ajio ë raromoromo God-ro hesi ëhi bamë'ëro hesi A Maho naro priest masijo jabesi övore Jew rajo jögoru öri röjëhjarue a jabesi övore va'iramu baejevo'aruëjo. Baejevoromo nasi jöho mevo garomo uvoruomola'ajëjo: Nörö sisë'e aego guomola'ajëjo. Guomola'ajëromomo na baejevoromo sa'a göre jioromo rovere aribövi jabesi övore bojëmi'iramu baejevoromo ³⁴ sivegoromo sabëro ödegoromo hisuebijevevoromo anegola'iramu guomevo'ajëjo. Guomoromo majae niö'i gemu hesi uhure ri'ö'ejöjo.

James'o John'o masije rirarovo'i Iesu ua gavare jöhoje.

³⁵ Ëhi uëvë'ëro iae Zebedee-are harihe niö'i James'o John'o rueromomo Iesu uavareje: Tisa no naguajëjo noehu rabu jö ua galië'aruëhi jero ëhi ë'iranego. ³⁶ Ëhi uavamu uëvadeje: Naro rabe ë'ëhojörö uevarujëjo. ³⁷ Rabe ë'ëhojörö uevarujëjamu uavareje: No naguajëjo jaehu jasi aji'e öri ari'ere hijë'iroho jero uövüego no ö'o jasi bëhire masije rirarovoromo noro göëro jasi övo manö göëro jasi övo adonö ëhi ari'iröhëro. ³⁸ Ëhi uavamu uëvadeje: Iae ëhi höjo röhu jemëhu ue gevaruje jö hesi bëhoho jemë bogo gavë'e ëma uevarujëjo. Na gavajëjo ajuo'e jovo sisëhu ajuemanovo'iröhoho jioromo nasi örire jövëro rovanovo hesi jio'ëgo. Ëhi jië'e huë vavaeni bae'irarijoho na

jemë'o eni jëvájëjo. ³⁹Eni jëvájëjamu uavareje: Iae no eni javuajëjo. Ëhi uavamu Iesuro uëvadeje: Iae mae hõjo. Na ajuemi'irõhe jovo sisëhuro jemë'o ajuëmi'ajëjo. O nani ruerõhe jovohuro jemëni rue'a'ajëjo. ⁴⁰Rõhu nasi bëhire õvo manõ o õvo adonõ ari'irarije jõ uë'irodoho ëho bogo nasirehu hõjo. Hesi God-hu a rahumëni uvoromo nugade rõhoho ë aho jaburemu nasi bëhiroho ari'a'aruëjo.

⁴¹Ëhi'amu Iesuare ijorajo ioro'ioroho 10 jaburo hejareje uvavamu: James'o John'o Iesuare bëhire bõrõme rirarovo'i uvare hõjamu hegorovo jabesi õrire dë võronimoruomadeje. ⁴²Dë võronimoruomamu gagorovo Iesuro hesi ijorajoho aho'obëhe uëvadeje: Ruehëromu rovamu uëvadeje: Iae jemë'o gavarujëjo. Sa'a ioro'ioro rajëro uvoroumaje hõjo: Ëa masijohuro no muebejavuarue hõjo. Ëhi hõjo rõhu ë a masijoho jaburo jabesi aribõvioho ruahõ'õjëvoromo jabumëremu masije riravarue hõjo. O jabesi bëhire riravaruoohuro ëhi taemëvoromo jõe bojëmijarue hõjo. ⁴³Sa'a ioro'ioro rajohuro ëhi ë'arue hõjo. Rõhu jemë'o nadi ëhioho dõroho bamorovorëjo. A'i jemesi ae gemu rahu bõvie nami'i nimë'oho hu a ioro'ioro jemë ajëminõvo'irõhe ae jio'a'ajëjo. ⁴⁴O jemesi ae gemu rahu nunire jio'i nimë'oho hu a ioro'ioro jemesi mu vaejëhonõvo'irõhe ae jio'a'ajëjo. ⁴⁵Ëhesi bëhoho God-are A Maho na'o ae ajëmi'i ëhuni rovode hõjo. Naehu rovode hesi bëhoho bogo aëro na ajemi'irarijego rue'i a'i naro ae ajëmiromu nasi arijo'arije bojamirovoromo guomorovoromo ëhuro ae aho'obëhe sisëhu tõvëvajoho jiovo rëmõ'õ'irodëni ëhuni rovode hõjo.

Iesuhu Jericho amo vuonugoromo va'i nuni sisë'e a ajamade jõhoje.

⁴⁶Ëhi'oromo Iesumëro va'aroho va'o Jericho amore suorovareje. Suorovë'ëro Iesu'o hesi ijorajo õmo'õmohu'o a ioro'iorohu'o aho'obëhe ëho jaburo Jericho amoho nugoromo va'i ë'areje. Rõhu Timaeus-are harihe Bartimaeus õri ionire hijë'e jiadeje. Hu nuni sisë'e aëro jië'ëro hiromu maëni sisëni ëninëminõvadeje. ⁴⁷Ëahuro õri ionire hiromu hejade uvoruomamu: Rova'aje aho Nazareth amo raje Iesu hõ uvamu hegorovo ma-darugo'o uvo'i hijadeje: David-are ujoho bõrõme javaje Iesu jero nani vavaenimëjo. ⁴⁸Vavaenimëjamu hegorovo ae aho'obëhe jaburo birevoromo uavareje: Jõe vuonugëjo. Jõe vuonugëjamu hejë'i rõhu maho darugo ma'o uvo'i hijadeje: Hë David-are ujoho nani vavaenimëjo. ⁴⁹Ëhi uvo'i hijamu hegorovo Iesuro va'adoho vuonugo'i ë namiromu uëvadeje: Uvohego rovajo. Rovajamu rueho jaburo ë nuni sisë'e aho uavareje: Iae mae hõjo. Ri'õromu rovëjo. Arue ahuro uvajëjo jero ruejõro. ⁵⁰Ëhi uavamu hejë'i ruehuro dõre ba'amade niõgoho jaho bu'õromu ma-burëro ri'õromu Iesuaro va'adeje. ⁵¹Va'amu Iesuro uavadeje: Naro diehi ajamijõro nagajëjo. Nagajëjamu rue nuni sisë'e ahuro uavadeje: Bada ajemego na nune dadovoromo uherihõjo. ⁵²Uherihõjamu Iesuro uavadeje: Iae mae hõjo. Va'ëjo. Jero God mae uehorovamu ëhuro marëjavë'e hõjo. Ëhi uavamu gavë'i ma-burëro uherihadeje. Uherihoromo Iesuare ijore õrire va'adeje.

11

Iesuhu Jerusalem mabëhe rovade jõhoje.

¹ Iae Iesumëro va'o Jerusalem bëhire va'oromo Olives Dahorure iojomoromo Bethphage amo o Bethany amo jiajinö ë rovareje. Rueromo Iesuro hesi ijorajoho niö'i rëmö'öromo ² uëvadeje: Arue jemesi nuninörire amohuro va'ohëjo. Va'o hörö'i ga'arujëjo donkey harihe bise'ego aehu döre bogo hiromo va'aruoho benugë'e jio'iramu. Benugë'e jiego jiovoromo hu'irae ruerëjo. ³ O aehu uëvë'oho: Jemë rabëni jiovarujë uëvë'oho uërëjo: Badaro ave mioho nimo'ego ëhuni jiovaruëre. Huro mu nimadoho vaeromo iae ma-burëro sionëro nugö'ö'ajëre.

⁴ Èhi uëvamu va'oromo gavareje donkey harihoho öri börömore javue gemu nami'ego ë ojanore benugë'e jiamu. Benugë'e jiamu gagorovo jiovarëje. ⁵ Jiovamu gëgorovo ë bëhire riravare aribövioho jaburo uëvareje: Jemë rabëni donkey harihoho jiovarujëjo. ⁶ Rabëni jiovarujëjamu Iesuhu uëvadëhi ëhi majëhijareje. Èhi majëhijamu rueho jaburo uëvareje: Iae mae hëjo. Bava'ohëjo. ⁷ Bava'ohëjamu hu'irae barueromo jabesi niögohö mi dejore ruaho'amo bahijamu Iesuro ë ajio hijadeje. ⁸ Hiromo va'amu gavë'i ae aho'obëhe a ioro'iorohuro niögohö örire ahahobe va'i a ioro'iorohuro mure ijo rude tarivë'ëro ahahobe va'areje. ⁹ Va'oromo Iesuale nuninö va'oruomadohu'o dejonö rueruomadohu'o ma-darugo'o uvoruomadeje:

God mabëhëjo.

Ave aho Badare ihore rovajoho mabëhëjo.

¹⁰ Nosi hije David-are sionoho baeromo böröme namiromo muebejavuo'ië'ajëjo.

No naguajëjo ë muoho mae tutuvoröhego.

God mabëhëjo.

¹¹ Èhi rajahibe rovë'i Iesu'o Jerusalem rovareje. Iesuro Jerusalem ruenugoromo God-are amo börömore va'adeje. God-are amo börömore va'oromo bövioho bise'oho gabe juvonugoromo gavade mami'e vö'öromamu gagorovo huro hesi ijoraje 12-ho jabu'o gemu mae Bethany amore sionëro va'adeje.

Mesehu bajo bogo raejöro Iesuhu uavade jöhoje.

¹² Bethany amore va'ë'ëro nërö ri'öromo ë jioromo vuonorö'ö rovareje. Örire rueromo Iesuro hejade hömamu hejë'i ¹³ rue'i gavadeje arue riribövire mesoho hano'e namijamu. Mesoho namijamu gagorovo ë bëhire va'adeje ga'i bösoho raejë'e jiego o bogo. Va'oromo gavadeje bajoho bogojio'i ma-hano rudu'emu jiamu hesi raejaje majaho bogo rovë'ëro jië'ëro. ¹⁴ Hano rudu'emu jiamu gagorovo mesoho uavadeje: Ijonöho nadi bajoho raenego aho ue'aho'irarëjo. Èhi uavamu hesi ijorajoho jaburo hejareje.

Iesuhu God-are amo börömore va'oromo ë'ade jöhoje.

¹⁵ Èhi'oromo Iesumëro örëro ajiomoromo Jerusalem ajio suorovareje. Suorovoromo Iesuro God-are amo börömore va'adeje. Va'i gavade aëro bövie bise'e imo'amamu gëgorovo rarovö'öjëvadeje. Rarovö'öjëvoromo gavade aëro sa'a göre göre jioromo rovare aribövi jabesi ijo bajoho ujuoho'i amo börömo hesi ijo bajoho i'imëmamu gëgorovo jabesi mu maratuocho huotovö'öjëhoromo ugo imo'amarue aribövi jabesi arëtohu'o huotovö'öjëhadeje. ¹⁶ Huotovö'öromo ae aho'obëhe

ahävadeje jabuhu inömo inömo ujuohoromo God-are amo ririre örörovaruoho vuonugojöro. ¹⁷ Ëhi uëngoromo God-are jö hesi öroho ae röjëhiromo uëvadeje: God-are surire jajivoromo uvë'e höjo: God nasi osaho aëro uvoruomo'ajëjo: Ëosa hesi bëhoho sa'ae dinö'e dinö'e raromarue ariböviehu ro God-are örire jö atarue osaho höjo. Ëhi uvë'e höjo röhu jemëro mu sisë ë'ë'ëro ëhuro ave osaho vajiohu'e ariböviehu gurihirovarue juju gagoho va'ëne höjo.

¹⁸ Ëhi uëvamu priest masijohu'o Jew rajo jögoru öri röjëhjarue ariböviohu'o ëho jaburo ë jöho heromo gavare ae aho'obëhe Iesuhu röjëhijaje jöho heromo tiöruomamu gëgorovo uvareje: Nani ae aho'obëhe no ramuoi Iesu gemu uehorovo'aruëromo juhuonivareje. Juhuonivoromo öre nahareje Iesu anego guomoröhego.

¹⁹ Ëhi'amu vö'öromamu gagorovo Iesu'o hesi ariböviohu'o Jerusalem jioromo va'areje.

Iesuhu meso hesi uhu jö huruoho majëhijade jöhoje.

²⁰ Va'ë'ëro sisonuvamu Iesu'o hesi ariböviohu'o örire vuonorö'ö rueli gavareje mesoho mami'e sahori barëjë'e jiamu. ²¹ Sahori barëjë'e jiamu gagorovo Peter-ro Iesuhu urimo jövade jöho uehorovoromo uavadeje: Bada arueho gavëjo. Jaehu sahorijöro uavane mesoho iae sahorijë'e höjo.

²² Sahorijë'e höjamu Iesuro uëvadeje: God mae uehorovorëjo. ²³ Ave jöho na jö mae uë'ië'ajëjo. Jemë bogo uehore niö'li bae'irögoro God gemu mae uehorovoromo uvë'oho: Na uvajëhi iae ëhi jio'a'ajë uvoromo ave dahoru uavë'oho: Ri'öromo va'o jovo börömore bu'örovonë uavë'oho jemëhu uvarije muoho God-ro vaejëho'ajëjo. ²⁴ Ëhuni na uëvajëjo: Rabe rabe God ua gavë'oho mae uehorovoromo uvorëjo: Iae mae-ëjo. God-ro iae bojemi'iramu bae'ejëjo. Ëhi uvë'ohuro ëhuro iae bae'a'arujëjo.

²⁵ O jemë döre riravoromo God-are örire ëninami'irögoro röhu ae göëni dë vörönëgë'oho ë a hesi sisëho uehorovoromo vuonugorëjo. Ëhi ë'ë'öho ëhuro jemesi Vavue ö'idöre hijaje ahuro jemesi sisëhu'o uehorovoromo vuonugo'ajëjo. ²⁶ [O jemëhu jabesi sisë bogo uehorovoromo vuonugë'oho jemesi Vavue ö'idöre hijaje aho hu'o jemesi sisëho bogo uehorovoromo vuonugo'ajëjo.]

Jew rajo a masijehu Iesu bogo ma uehorovoromo darugoho dinö'e baejane hö uavare jöhoje.

²⁷ Ëhi majëhinugoromo Iesu'o hesi ariböviohu'o Jerusalem röhu maho rovareje. Jerusalem rueromo Iesuro God-are amo börömore va'oromo ë juvadeje. Juvamu gagorovo priest masijohuro Jew rajo jögoru öri röjëhjarue ariböviohuro a duvaho ömo'ömhuro rueromo ²⁸ Iesu uavareje: Jaehu God-are amo börömore hiromo mue gö gö vaejanuoho diehi jië'e daruge javoromo o raro darugoho bojamijë'ëro ëhi jië'e muoho vaejanue höjo.

²⁹ Vaejanue höjamu Iesuro uëvadeje: Nasi darugo hesi jö ue gevaru-joho na'ö jemë jöe gemu uë gë'ië'ajëjo. Jemëhu mana uevë'oho naro jemë uë'ejëjo: Na ëhi jië'e darugohuro muoho vaejaje höjo. ³⁰ John-hu bapataeto vaejavuonövadoho na God-ro o ma-aëro darugoho bojamijë'ëro ëhioho ë'onövade höjo. Uehego na hejëjo.

³¹ Hejōjamu rue a masijohuro Iesu diehi mana ua'irōhe jōho jabesi mevoromo uarovareje: Noehu uavē'oho: God-ro John darugoho bojamade hō uavē'oho Iesuro uō'a'ajējo: Ĕhi jiē'oho jemē rabēni John bogo ma uehorovarije hōjo. ³² O noehu Iesu ua'irōhoho: Ma-aēro John uavamu ē'ade hō ua'irōhoho rōhu ē jōho bogo ua'ejarējo. Ĕhi uarovare hesi bēhoho ae aho'obēhe uvoruomadeje: John hu jō God-aro baeromo majahuinōvade ae hōjo. Ĕhi uvoruomamu ē a masijehu ae aho'o jabesi jō aho'i jō gō Iesu ua'irōhoho juhuonivareje. Juhuonivo'i ēhuni Iesu ua'irōhoho: Ma-aēro John uavamu ē'ade hō ua'irōhoho bijōnimareje. ³³ Bijōnimoromo Iesu uavareje: Jaehu uō gövuanue jō hesi bēhoho no dadivavuaējo. Dadivavuaējamu hegorovo Iesuro uēvadeje: Ĕhi jiē'oho jemēhu uevarije jōho na'o bogo uē'ejōjo: Na ēhi jiē'e darugohuro muoho vaejaje hōjo.

12

Mu aribōviehu a bōrōmo hesi ō'i bajo mu mueberomo sisē ē'are uhu jōhoje.

¹ Iesuro ēhi uēnugoromo ē Jew rajo aribōvi jabesi jō sisēho uhu'e majēhiromo uēvadeje: Iae ae gemuēro mure grape ō'oho bivo'amade hōjo. Bivoromo ē muoho buore iromo rova'o rojomoromo ō'i bajo sa'ijovorōhe guaho umoromo mu javue dōro vaejade hōjo hesi mu ahuro aijo ē hiromo muoho atovorōhego. Muoho ēhi avohoromo gavade eni jiamu gagorovo ae uēvade hōjo: Na va'ejōjo. Jemēro nasi muoho muebejehorējo. Mueberomo ō'i bajoho raeromo mavego nasiroho bahi'i ioro'ioroho jemesi ujuohorējo. Ĕhi uēnugoromo ri'ōromo va'o sa'a gōro ē hijade hōjo. ² Sa'a gōro va'oromo hijuvo gavade ō'i bajo urarue majaho rovamu gagorovo mu vaejहारue aho gemu uavade hōjo: Va'irano ho mu muebejarue aribōvioho uēnego ō'i baje gō i'imamego ujuoheho ruenējo. Ujuoheho ruenējamu ruehuro va'ade hōjo. ³ Va'o mure hōrōjamu gavē'i rue mu muebejarue aribōviohuro ē aho gudumoromo anoromo sihō'ōjamu sionēro ōvemu rovade hōjo. ⁴ Ōvemu rovamu gagorovo rue a bōrōmhuro mu vaejहारue ae gö'o nugō'ōjamu mure va'ade hōjo. Va'o hōrōjamu gavē'i rue mu muebejarue aribōviohuro ē aho simanore anoromo hesi ōrire mu sisē vaejare hōjo. ⁵ Ĕhi'amu mu arijo'ohuro mu vaejहारue ae gö'o nugō'ōjamu mure va'ade hōjo. Va'oromo hōrōjamu gavē'i mu muebejarue aribōviohuro ē aho anamu guomade hōjo. Anamu guomamugo mu arijo'ohuro hesi mu vaejहारue ae gö gō nugō'ōbe rovade hōjo. Nugō'ō'ego va'o mure hōrō'ego ioro'ioroho ijahēro hisuebi'amo'i ioro'ioroho muo'amo barēnōvare hōjo. ⁶ Ĕhi'ojuvo hu'oho ae gemu jade hōjo. Ĕaho hesi harihu mabēhoho jiade hōjo. Ijo tugohō'i mu arijo'ohuro uehorovoromo uvade hōjo: Arue mu muebejarue aribōviohuro hu garomo uvo'a'aruējo: Nōruare harihe hō uvoromo ēhuni mae uehorovo'aruējo. Ĕhi uvoromo nugō'ōjamu mure va'ade hōjo. ⁷ Va'o hōrōjamu gavē'i ē mu muebejarue aribōviohuro uarovare hōjo: Arue rovaje ahuro hesi vavu hesi sionoho bae hesi hōjo. Ĕhuni ē'ego ano bamarējo ēhuro ave muoho noro baerōhe hōjo. ⁸ Ĕhi

uarovonugoromo ë aho guduamoromo anoromo guomamu muro jiamu baeromo rori'o bu'öruomade höjo. Ëhi'are höjo.

⁹ Ëhi jië'o'oho mu arijo'ohuro diehi ë'a'ajëjo. Huro rueromo mu muebejarue aribövioho i'tue bojëmiromomo muo'amo'i ë muoho ae gö bojëmi'ajëjo jaburo mueberöhego. ¹⁰⁻¹¹ Röhu ave uhu jöho God-are surire jajivoromo uvë'e höjo:

Munë javue vae'irögoro munë gemu bijönimoromo vuonugare höjo.

Vuonugaroho jaruvoho ë munëhuro javuoho nigemo'ego bibivoromo mae namijajëjo.

Hesi Bada God-ro ëhi ë'ade höjo.

Ëho noro garomo uvarue höjo: God-ro mu mabëhe ë'ë'e höjo.

Ëjö God-are surire jajivamu adaharijoho jemë diehi'oromo ë hesi bëhoho bogo avoho baejarije höjo.

¹² Ëhi uëvamu hegorovo rue Jew rajo a masijohuro garomo uvareje: Iesuro a masijoho no biraguoromo ëhuni uhu jöho jövajëjo. Jövajë uvoromo Iesu guduamo bava'ië'oromo ae aho'obëhe juhuonëmiromomo vuonugo va'areje.

Iesuhu guaro berovojöro aehu tax jö ua gavarohoje.

¹³ Ëhi'amu aëro Pharisee aribövioho o Herod-are aribövioho rëmö'öjareje va'oromo Iesu sareramego huro jöe sisë'i jövoromo guaro berovoröhego. ¹⁴ Rëmö'öjamu va'oromo Iesu sarerisareriamiromomo uavareje: Tisajo. Iae no gavarue höjo ja a mae javego. O aho bogo juhuonëmijego. Ëhesi bëhoho jero no göromomo ae böröme o bise'e javuajëromomo jöe gö gö bogo röjahui'i God gemu uehorovoromo hesi örohemo mae röjahuijanue höjo. Ëhuni no jö harihe ua ga'ië'aruëjo tax jöho. Rome a börömhuro nosi sa'aho muebejego noro hu tax bojamijarue höjo. Noehu ëhi ë'aruoho na ëhuro Jew rajo nosi jögoroho aharue höjo o bogajo. Na no bojami'ejarejo o bogajo. ¹⁵ Bogajamu Iesuro gëromomo uvadeje: Arue ariböviohuro nasi örire ma-döemu mae ue ge'i a'i jabesi uhoho na ijumevo'i nimoromo majehijaruëromomo uëvadeje: Jemë rabëni nasi dëho bijioho gevarujëjo ga'i na bejevego. Ajivë'e ijo baje gemu baruehego na gavöjo. ¹⁶ Gavöjamu barovareje. Barovamu garomo uëvadeje: Aveho rahuare nu ano'ohu'o ihohu'o jajivë'e höjo. Jajivë'e höjamu uavareje: Rome a börömo hesi höjo. ¹⁷ Rome a börömo hesi höjamu Iesuro uëvadeje: Ëhuni Rome a börömo hesiroho ëho hesi öroro bojami'i God-aroho ëho God-are öroro bojaminövorëjo. Ëhi uëvamu heromo jöe barëjëvadeje.

Iesuhu guaro berovojöro vuovë'e ariböviehu ri'öruomoto'röhe jö Sadducee ariböviehu hu ua gavarohoje.

¹⁸ Ëhi'amu iae Jew rajo a masijo ioro'iorohuro rovarëje. Jabumë Sadducee jö uehorovarue aribövie jioruomadeje. Sadducee ariböviohuro uehorovoromomo uvoruomajeje: A vuovë'o'oho ijönöho bogo ri'ö'amo'i maiorio'iore gemu vuovo'ajëjo. Ëhi uvoruomaje ariböviohuro rueromomo Iesu guaro berovojöro sarerisareriamiromomo uavareje: ¹⁹ Tisajo. Moses-ro jögore jajivoromomo uövuë'e höjo: Aboji harihu'o rumo'e a vuovego diehi ë'iröhe öroho aviëhi höjo. Aehu vaboro masuromomo vaboroho aboji harihu'o'oho bogo vaejë'e baruehu guomo'i vaboro nugë'oho hesi öhuro vuojiroho masuromomo ëhuro guomade ö hesi ihoro ujoho vaejaho'ajëjo.

Moses-are jögoroho ëhi höjo. ²⁰ Ëhi jië'ëro iae ma-ö ömo'ömëremu ae aho'o 7 raromare höjo. Raromoromo muriohuro magonahoho masuvade höjo. Masuromo vaboroho aboji harihu'oho bogo vaejë'e baruoho guomade höjo. ²¹ Guomamu hesi vaboroho dorue hijamu ö göhuro vuojiroho masuvade höjo. Masuromo vaboroho aboji harihu'oho bogo vaejë'e baruoho guomade höjo. Guomamu hesi vaboroho röhu maho dorue hijamu gagorovo ö göhuro vuojiroho masuvade höjo. Masuromo guomade höjo. ²² Ö ömo'ömo ioro'iorohu'o ëhi gemuoho ë'obe rovere höjo. Ö ömo'öme 7 jabuhu ë magonahe gemuoho masube rovaroho ë magonahoho aboji harihu'oho bogo vaejë'e aho ma-vuovëvobe rovide höjo. Vuovobe ruejuvo barëjumu ijo tugoho'ioho ë magonahoho hu'o guomade höjo. Ëhi'are höjo. ²³ Ëhi ë'arohuni ëhuni ave jöho no ua galië'aruëjo. Jero uvanue höjo: Vuovoromo ri'ö'ëjarëjo. Ëhuni vuovë'e ariböviehu ri'öruomoröhe majaroho ë magonahoho di ahu'o hi'a'ajëjo. Barue aho'o 7 masuvë'ego uvaruëjo.

²⁴ Ëhi uavamu hegoroovo Iesuro uëvadeje: Bogajo. God-are surire jöhu'o huhu mu vaeröhe darugohu'o jemë bogo avoho gavarujëro sisë'i uehorovoromo ue gevarujëjo. ²⁵ Ëhesi bëhoho vuovë'ëro ri'öruomo'iröhe maja rovë'iroho vaboroho baruoho bogo masurovo'i aneraehu ö'idöre ma-raromaruëhi ëhi raromo'aruëjo. Ëhuni ë magonahehu di ahu'o hi'iröhe jö ue gevarujoho bëhi rumo'e höjo. ²⁶ Ëjöhö jemëro uvaruje höjo: Vuovë'e ariböviehu ri'ö'iröhe jöho sareri jöe höjo. Ëho bogo sareri jöehu jio'i jö mae höjo. Ëhesi bëhoho vuovoromo ri'ö'iröhe jöho Moses-ro God-are surire iae jajivë'e höjo. Ijo hisu vënehu ravade jö jajivadevare evare God-hu jövade jöho jajivoromo ave jöhu'o uvë'e höjo: God na Abraham Isaac Jacob ëhi muebejëvaje ae jevajëjo. Jemë rabëni ë jö hesi bëhoho bogo avoho baejarije höjo. ²⁷ God-hu Abraham Isaac Jacob muebejëvaje jö hesi bëhoho jabumë vuovoromo bogo ioro'iolemuoho barë'i va'o raromego God-ro muebejëvaje höjo. God bogo vuovoromo ioro'iolemu barëjë'e aribövioho muebejëvo'ibejajo. A'i hu vuovoromo va'o raromarue aribövioho iae muebejëvaje höjo. Ëhuni ae vuovoromo ioro'iolemu barëjaje hö uvarujoho ëho sarerivarujëjo.

God-hu bojamuade jöho diho börömohe jiajoho aehu Iesu ua gavadohoje.

²⁸ Ëhi uëvamu Jew rajo jögoru öri röjëhijarue ae gemuëro rueromo hejade Iesu'o Sadducee ariböviohu'o jö aho'ahamirovamu hejë'i röhu gavade Iesuro jö mae mana majëhijamu gagorovo Iesu uavadeje: Na ave jöho ua galië'ajëjo. God-hu bojamuade jögore aho'o jio'amajoho di jöhuro jö ioro'ioroho iosiramiamoromo nuniroho höjo.

²⁹ Nuniroho höjumu Iesuro uavadeje: Nunire jö börömohe aveho höjo: Israel ariböviohumë ave jöho hehëjo. Bada nosi God hu gemu börömohe höjo. ³⁰ Jasi dë vövöbajo'e aru'ahe uehore daruge aho'obëhe Bada jasi God ma-hu gemu bojaminëjo. ³¹ Ëjöhö nuniroho höjo. Röhu ë jö hesi bëhiroho aveho höjo. Jaehu jasi arijo'arije rajahirovanuëhi jasi ae gemuoho ëhi rajahinëjo. Jögoru ioro'ioroho ë jö niö'ioho bogo iosirëmiromo masijoho jio'amo'i ë jö niö'ioho börömo maho jëvajëjo.

³² Börömo maho jëvájëjãmu hegoroovo rue jögoru öri röjëhijaje ahuro Iesu uavadeje: Tisa ja jö mae jövanuëjo. Jaehu uevanuoho: God ma-gemu jio'i god gö gö bogohöjo. ³³ Noehu dë vövöbajo'e uehore daruge aho'obëhe ma-hu gemu bojãmiromo röhu nosi arijo'arije rajãhoroaruëhi nosi ae gemuoho ëhi rajãhijë'oho ëho ma-mabëhe höjo. O mi vënire bueromo God-are örire bojãmiijë'oho o suvuore gö gö hu bojãmiijë'oho ëho ma-jianovajëjo.

³⁴ Ma-jianovajëjãmu hegoroovo Iesuro gavade rue aho simano mae uehorovoromo jövãmu gagorovo uavadeje: Jaehu God-are ahãrire va'o hijego huhu muebejavo'iröhoho ja bogo rori'oho javo'i iae bëhiro javajëjo. Ëhi uavãmu hegoroovo ae aho'obëhe jöe gö gö ua ga'ië'aroho juhuonivoromo vuonugareje.

Böröme namiromo ajãmuaje a hesi jö Iesuhu röjëhi'i uë gëvadohoje.

³⁵ Vuonugãmu Iesuro God-are osa börömore hiromo jögoroho röjëhijadeje. Röjëhiromo uëvadeje: Aveho hehëjo. Böröme namiromo ajëmi'iröhe a hesi jöho jövo'ie'ajëjo. Jew rajo jögoru öri röjëhijãrue ariböviohuro uvoruomaje höjo: Böröme namiromo ajãmu'iröhe aho ma-David-are uje jio'a'ajëjo. Rabëni ëhioho uvoruomaje höjo. ³⁶ God-are Aru'ahohuro jöho David-are simãnore bojãmãmu jajivoromo uvë'e höjo:

Bada God-ro nasi Bada uavade höjo:

Nasi övo manö rojo hijego

ja'o muorovarue aribövioho nãro ruahö'öjëvego

hörëro vijuvo taemo'ãmo'irane höjo.

³⁷ Ëhesi bëhoho böröme namiromo ajëmi'iröhe a hesi jöho David-ro jajivoromo uvë'e höjo: Bada höjo. Bada hö uvãdoho ëhu'oho rabëni uvoruomaje höjo: Böröme namiromo ajãmu'iröhe aho ma-David-are uje höjo. Ëhi uëvãmu ae aho'obëhe huhu majëhijaje jöho heromo nimorohoruomadeje.

Jew rajo jögoru öri röjëhijãrue ariböviehu sareri'e mu vaejaruëhi aehu bogo ëhi ë'iröhëgo Iesuhu jövãdohoje.

³⁸ Ëhi'ãmu Iesuro jöho röjëhijuvu röhu uëvadeje: Jemëro Jew rajo jögoru öri röjëhijãrue aribövioho gë avohorëjo. Ëhesi bëhoho ë aribövioho jaburo jabesi sinohemu uehorovoromo niögu ëgobövie hörü'o utahë'oho io'ãmoromo jijihãrue ëhi jië'e muoho nimarue höjo aëro gëromo rajëhijöro. O imo'ãmaruire va'ë'oho jaburo nimarue höjo aëro uvoruumoröhëgo: Jabumë a masijëro jijihajëromo rajëhiromo jejëmiruomoröhëgo. ³⁹ O God rajãhijãrue osare va'ë'oho o sörö i'i va'ë'oho a masijëhu raromãruië ë va'o raromö'i nimarue höjo. ⁴⁰ Rãromö'i nimoromo magonãho doru jabesi bövioho bise'oho ëma ujuohëharue höjo. Ujuohoromo sarerivoromo pari ëgobövie jaguvarue höjo aëro gëromo uvöjöro: Mu mae vaejaruëjo. Ëhi jië'e sareri'e muoho vaejaruego ëhuni God-ro i'u börömo mae bojëmi'ajëjo.

Bövi bise'o rumo'e magonãho doruehu God-ni suvuoro ba'amade jöhoje.

⁴¹ Ëhi uënuqoromo Iesuro God-are suvuoro bahijãrue bëhire ë va'o hijadeje. Hiromo uheriho'i gavadeje ae aho'obëhe ijo bajoho ë io'ãmãmu. Bövi bise'o marohë'e mae jië'e aribövie aho'obëhe jaburo rueromo

ijo baje böröme ba'amoromo va'onövareje. ⁴² Ëhi'amu magonaho dorue gemuëro rueromo rövê'e ijo baje niö'i ba'amévadeje. A'i ë monioho ma-bise'e jiadeje. ⁴³ Ba'amévamu Iesuro ëho garomo hesi ijorajo ömo'ömhuro ruejoro uvévadeje. Rovamu uévadeje: Ëbövi bise'o marohê'e jiê'e ariböviohuro ijo baje aho'o io'amo'i arue bogo eni jiê'e magonahohuro rövê'e ijo bajoho niö'i ba'amade höjo. Röhu God-ro ëhi uvajëjo: God-are suvuoro io'amare a ioro'iorohuro bisemu bisemu io'amo'i ë bogo eni jiê'e magonaho doruohuro bövi mae ba'amade höjo. Na mae uévajëjo. ⁴⁴ God-hu ëhi uehorovaje hesi bëhoho ë a ioro'iorohuro inömo marohê'e maëro jiê'ëro ma-vituochemu bojami'i ë magonahohuro inömo rumo'ëro jiê'ëro hesi i i'ibejade monioho aho'o bojami barëjê'e höjo.

13

Aehu God-are amo börömo dadovoruomo'iröhe jö Iesuhu majëhijadohoje.

¹ Ëhi'onugoromo Iesuro God-are amo börömore jioromo va'amu gavë'i hesi ijorajo ömo'öme röhu ae gemuëro Iesu uavadeje: Tisa aruëroho gavëjo. God-are javu masijo vae'amarohu'o javu masijo hesi munëhu'o ma-mabêhe jio'amajëjo. ² Ëhi uavamu uavadeje: Ave munë javu masijoho na jemë gavarujëjo. Ëjavuoho aho'obêhe aëro dadovoruomo'iramu munëho ahoromo sa'aro ruvebi barë nahonahovo'ajëjo.

Huë vavaeni börömo rueröhe jö Iesuhu majëhijadohoje.

³ Ëhi uënuoromo Iesuro va'oromo Olives Dahorure ajio hiromo gavadeje God-are amo börömo anume jiamu. God-are amo börömo anume jiamu Peter James John Andrew ëho jaburo sivue ajio Iesu'o raromoromo uavareje: ⁴ Ave jöho majahuego hejarëjo. God-are javu masijehu rireromo'iröhego uövuanoho ëho divare jio'a'ajëjo. O no mu rabe garomo uvo'ejarëjo: Ëhi jiê'e muoho aho'obêhe rue'ie'ajëjo.

⁵ Rue'ie'ajëjamu uévadeje: Gavë'iajo. Aëro sarerëmi'iramu guaro rireromévo va'a'ajëjo. ⁶ Ae aho'obêhe rueromo sarerëmiromo uë'a'aruëjo: Nöruare ihoro rovajëjo. God-hu uevë'ëro böröme namiromo ajëmi'irode aho na jevajëjo. Ëhi uëromo ae aho'obêhe sarerëmi'iramu uvo'a'aruëjo: Mae-ëromo guaro rireromo'ajëjo. ⁷ O he'irarije muorovo jö ruenövo muorovonövamu hejë'oho nadi juhuonivorëjo. Öre gö bogojiê'ëro ëhi jiê'e mu sisëho iae jio'a'ajëjo. Röhu sa'aho bövioho bise'ohe evaroho bogo barë'i ëho hesi majae göro jio'a'ajëjo. ⁸ Sa'ae göëro göhu'o muorovonövo a masijo ioro'iorohuro ioro'iorohu'o muorovonövo'aruëjo. Sa'ae dinö'e dinö'e jiajoho hijiohijiovo'amo'ajëjo. Sa'ae gö gö iruno'e bogojio'ajëjo. Ëhi jiê'e huë vavaenoho rue'iramu mu sisëho bogo burëroho barë'i a'i magonahehu aevoromo raho'i hara'uajëhi ëhi aho aevoromo huë vavaene börömo bae va'oruomo'ajëjo.

⁹ Röhu gavë'i raromorëjo. Aëro guduamo ujuohëvo va'oromo jögoru muebejarue aribövi jabesi övore bojëmi'aruëjo. God rajahijarue osa göro göro ë hisuebijëvo'aruëjo. Gavana o sa'are a masijo gö gö jabesi nunire rëmo'iramu nasi jöëni ë riravo'aruëjo nasi jöho huruoho

majëhi'i. ¹⁰ Röhu God-are jö maho aëro sa'ae din'ö'e din'ö'e majëhibe va'ö barë'ajëjo. Ëmuoho urimoho jio hesi höjo. Bövi bise'ö barë'iröhe majaho ë hesi ijonö jio'a'ajëjo. ¹¹ Röhu jabuhu guduamo ujuohëvo va'amü a masijo jabesi nunire riravë'oho nadi uvorëjo: Na rabu jöe majëhi'ejöromo nurunurumorëjo. Nadi ëhioho ë'i a'i a masijo jabesi nunire riravo'irarije maja rovamu evare God-hu rabu jö jemesi simanore bojëmë'oho ë jöho majëhirëjo. Ëhesi bëhoho bogo jemëhu jöho majëhi'irögöro a'i God-are Aru'ahöhuro jöho simanore bojëmi'iramu jemë ë jöho majëhi'arujëjo. ¹² Röhu öhuro öho ae gö jabesi örire bojëminövo'aruëjo muo'amöjoro. Vavuöhuro aboji harihu'oho ëhi gemuoho ë'a'aruëjo. Aboji harihu'öhuro ri'öromo ae uë'iramu vëmu vavu'oho muo'amö'aruëjo. ¹³ O jemëhu na uehorovevarujöhuni ae aho'obëhe jaburo jemesi örire nue huodëgoruomö'ajëjo. Röhu ae rahu biririvoromo mae uehorovevobe va'öjuvo maja barë'iröhe maja rovë'iroho God-ro baejëvoromo manö bamëvo'ajëjo.

Mu sisë bëhe rueröhe jöhoje.

¹⁴ Röhu jemë ga'a'arujëjo God-are osa ijumaje sisëhuro maehu jiaje röhöre ëma nami'iramu. Ëjö Iesuhu majëhijadoho adahoromo avo'avoho gare. Amö Iesuro jö vituoho majëhiromo uëvadeje: Sisëhuro maehu jiajire ëma namijamu gavë'oho ave Judea sa'are raromaruje aribövioharo huruomoromo dahoru'ero iojioromöne. ¹⁵ Ae rahu javu dönö haradare raromë'oho abueromo osare inömocho nadi va'ö ujuohö'i ma-huruomoromo va'orëne. ¹⁶ O mure raromë'oho nadi vuonor'ö va'ö niögöho ujuohö'i ma-huruomoromo va'orëne. ¹⁷ Röhu ë huë vavaeni rue'iröhe majaröho dë'e magonahöhu'ö aboji harihu'ö inino jio'amë'e magonahöhu'ö jabumë vaevë'oho diehi huruomoruomö'ajëjo. ¹⁸ Röhu God ua garëjo huro ajëmego ëhuro aho niohijo majaröho bogo huruomö'iröhe höjo. ¹⁹ Rabëni hesi bëhoho evare majaröho huë vavaene bogo bise'ö vadu'oho rue'a'ajëjo. Ëhi jië'e huë vavaenoho urimo God-hu sa'a bövi bise'ö bamadevaröho bogojiohe ruejuvo ro jaruvo majahu'ö ëhi jië'e huë vavaenoho bogöhöjo. O ijonöhu'ö bogojio'i ë majaho gemu börömöho jio'a'ajëjo. ²⁰ Ëhuë vavaeni maja ëgöbövi jiajöhö God bogo tarioromo bunemuoho bamö'ibejajo aho bogo biririvoromo raromö'ibejajo. A'i God-ro hesi baejëvade aribövioho uehorovëvoromo ë majaho tarioromo bunemu bamo'i uvë'e höjo.

²¹ Ëhi jiamu ae göehu uëvë'oho: Aveho ro gahëjo. O arueho va'ö gahëjo. God-hu uavë'ëro böröme namiromo ajamui'iröhe aho aviae o aruae hö uëvë'oho nadi maho uehorovorëjo. ²² Ëhesi bëhoho rabëniajo. Ae aho'obëhe rueromo sarerëmiromo uëbe va'a'aruëjo: God-hu uevë'ëro böröme namiromo ajëmi'irode aho jevajëjo o jö God-aro baeromo majëhijaje ae jevajëjo. Sarerëmiromo ëhi majëhiromo bogo gavarue mu masijöhö vaenövo'aruëjo eni jëvego God-hu söjëvade aribövioho sarerëmëgo rireromö'iröhëgo. ²³ Röhu jemëro avoho mueberovorëjo. Ijonö jioröhe jöho na urimo majëhijë'e jevajëjo. Ëhuni sareri'e jöho nadi maho uehorovorëjo.

God-are A Maehu rueröhe jöhoje.

²⁴ Rõhu ë huë vavaeni majaho barë'iramu evare maja nunoho ramoramovoromo manaeroho duorohoromo ²⁵ jïjoho sisërë'amoromo ö'idöre inõmoho aho'o arua anumiae va'o'amo'ajëjo. ²⁶ Èhi'o'iramu sa'are raromarue ariböviohuro ae aho'obëhe ga'a'aruëjo God-are A Maho naro darugo'o aji'o bõrõmo mae baeromo suere ruvehi'iramu. ²⁷ Ruvebiromõ nasi aneraho rëmõ'õ'iramu ro God-hu sõjëvade aribövioho gagovëvo'aruëjo. Arua anumiae sa'ae dinõ'e dinõ'e maja rojomajire beva'ajire jioruomajoho gagovëvo'aruëjo.

Mesehu gumutivego Jew rajo jabesi vama maja dunovaje uhu jõhoje.

²⁸ Rõhu meso hesi uhu jõho heromo bëhoho avoho uehorovorëjo. Gavaruje mesoho gumutivoromo rahego garomo evare jemë uvaruje hõjo: Jew rajo nosi vama majaho iae dunovajëjo. ²⁹ Èhesi bëhoho jemë ga'irarije naehu uëvodëhi mue gö gö rovamu gavë'iroho uvorëjo: Èmajaho iae rovajëjo. ³⁰ Ave jõho na jõ mae uë'ië'ajëjo. Ave jaruvore raromaruje aribövioho jemë bogo vuovo barëjë'iro evare naehu uëvaje mue aho'obëhe rue'a'ajëjo. ³¹ Ö'idõe sa'ae bövie bise'e barë'i nasi jõho gemu bogo barë'ajëjo.

Iesuhu vuonorõ'õ ruerõhe maja no bogo gavarue jõhoje.

³² Rõhu ë majaho divare jio'irõhoho aho bogo gavaruëjo. Ö'idöre raromarue anerahu'o Harihoho na'o bogo ga'i hesi Vavuohuro gemuëro gavajëjo. ³³ Avoho mueberovorëjo. Gavë'iajo. Jemë'o ë majaho bogo gavarujëjo. ³⁴ Èhesi jõho uhu'e majëhi'ië'ajëjo avoho he'irarijego. Ae gemuëro õre gö va'ië'ajëjo. Amore jioromo va'ië'iroho hesi mu vaejharue aribövioho ae gö gö mue gö gö bojëmibe va'a'ajëjo jaburo simane vaeromo ë muoho muebejaho'irõhego. Bojëmibe va'oromo hesi osa ojo muebejaje aho ua'a'ajëjo: Ojoho avo'avoho muebenëjo. Osa arijo'ohuro ëhi ë'a'ajëjo. ³⁵ Èhesi bëhoho na ë osa arijo'oho va'ëne jevajëjo. Na divare vuonorõ'õ rue'irodoho jemë bogo gavarujëjo. Nani võ'õ'e o vahi riri'e o sisonuyo'i titimo'iramu o sisonuvo'iramu rue'ejõjo. Jemë bogo gavarujëjo. Èhuni muoho avo'avoho mueberëjo. ³⁶ O bogo nuni jioromo mu avoho muebejë'oho nani na ma-majioho rue'i ga'ejõjo jemë momorõ'õ uro'amë'e jëvo'iramu. ³⁷ Na jemë uëvajëhi ae aho'obëhe ëhi gemuoho uëvajëjo: Nune jioromo muoho avo'avoho mueberëjo.

14

Jew rajo a masijehu Iesu ano'i jõ mevare jõhoje.

¹ Iae God-hu Vörõ Tugohade Sörõ o I Dë Huaje Oso Rumõ'e Sörõ jiamëhi i'irõhoho jio'i rõhu jaruvëhi priest masijohu'o Jew rajo jõgoru õri rõjëhijarue ariböviohu'o ëho jaburo õre nahareje Iesu saginiëri gud-uamoromo ano'irõhëro. ² Öre nahoromo uarovareje: Sörõ majaroho bogo guduamo'ejarëjo aëro göromõ no'o muorovojõeni.

Magonahe gemuehu ridi'e jovehu Iesuarë simanore otehodivade jõhoje.

³ Èhi'amu Iesuro Bethany amore rueromo sino jomõ'e ae Simon-are osare ro hiromõ ie ijadeje. Ie ijamu gagorovo magonahe gemuëro

munë huono mabëhe baeromo rovadeje. Ëhuono gagore ridi'e osoho jië'e jiadeje. Osoho bogo jovo'oho buarohë'e ma-oso maemo jiadeje. Oso ihoho nard jiadeje. Röhu hesi manaho bogo bise'ovadu'oho jiadeje. Magonahohuro ë munë gagore jiaje osoho barueromo munëho hahovoromo Iesuare simanore otehadeje. ⁴Simanore otehamu gagorovo ae göëro göëro dë vörönëgamu jö sisë atoromo uarovareje: Ëmagonahoho rabëni osoho ëma otehö'öjajëjo. ⁵Aro imo'ibejarëjo 300 kina iosiramijë'e manaho bövi mae bae'ibejarëjo. Ëmanaho baeromo bövi bise'ovado'aribövioho suvuorëmi'ibejarëjo. Ëhi jië'oho iae mae jio'ibejajo. Röhu huro ëma otehö'öjade höjo. Ëhi uarovoromo magonahoho birevareje.

⁶Birevamu hegorovo Iesuro uëvadeje: Ëmagonaho birevarujoho vuonugohëjo. Jemë rabëni magonahoho huë vavaenoho bojami-jarujëjo. Huro na mabëhe avohevë'e höjo. ⁷Bövi bise'ovado'aribövioho jemë'ovaro'araromobe jijihö'aruëjo. Jemesi nimoromo jabumë ajëmijë'oho iae jemë eni jëvaje höjo. A'i naro jemë'ovado'aribövioho hibe juvo'ejöjo. Ijonö ëhi avohevo'irarijoho bogo eni jëvo'ajëjo. ⁸Ëmagonahohuro rabe eni jiadoho ëho nasi örire mae avohevade höjo. Mae avohevoromo oso nasi sinore otehadë hesi bëhoho nasi sinoho avohehadë höjo ëhuro nasi sinoho mae jevego aëro hure bamevoruomoröhego. ⁹Ave jöho na jö mae uë'ië'ajëjo. Sa'ae dinö'e dinö'e aehu nasi jö ma majëhibe jijihë'iroho ë magonahuhu ë'ade jöhu'ovado'aribövioho hu mae uehorovoromoröhego.

Judas-hu Iesuni Jew rajo a masijo hiruëmade jöhoje.

¹⁰Ëhi'ovado'aribövioho Iesuare ijoraje 12 röhu gemuëro Judas Iscariot-ro va'ovado'aribövioho priest masijoho uëvadeje: Jemë nëgë'ovado'aribövioho na Iesu jemesi övore bojëmi'ejöjo. ¹¹Bojëmi'ejöjamu hegorovo nimorohoromo uavareje: Iae mae höjo. Ëhi jië'ovado'aribövioho no ijo baje mana bojami'ejarëjo. Ëhi uavamu hegorovo Judas-ro öre nahadeje Iesu jabesi övore bojëmi'iröhëro.

God-hu Vörö Tugohade Sörö Iesumëhu ijare jöhoje.

¹²I Dë Huaje Oso Rumovado'aribövioho I ibe va'iröhë majaho aevoromo rovadeje. Aevoromo rovaje majaho rue'ego Jew rajëro sheep harihoho muo'amonövareje God-hu Vörö Tugohade Söröho i'iro. Amo ë majaho rovamu gagorovo Iesuare ijorajoho jaburo Iesu uavareje: Ja nagajoho no dinö'e va'ovado'aribövioho söröho avohahö'ejarëjo.

¹³Avohö'ejarëjamu Iesuro hesi ijorajoho niö'ovado'aribövioho uëvadeje: Jerusalem amo börömorovado'aribövioho va'orëjo. Va'ovado'aribövioho ga'a'aruëjo aëro jovo'ovado'aribövioho ramahö simanëro baeromovado'aribövioho ro birohëvo'iramu. ¹⁴Ro birohëvego va'ovado'aribövioho ga'irarije hu di osare rumovado'aribövioho va'ego gagorovo jemë'ovado'aribövioho ë osaro va'ovado'aribövioho osa arijo'ovado'aribövioho uarëjo: Tisahuro uvade höjo: Osahö dinö'e höjo naehu nasi ijorajoho jabu'ovado'aribövioho gemu mae sörö i'irodoho. Ëhi uarëjo. ¹⁵Ëhi u'iramu osa arijo'ovado'aribövioho jemë hu'iraejëvoromovado'aribövioho vuahure ajiomoromovado'aribövioho döre osa börömorohö röhë'i'ajëjo. Röhë'i'iramu ga'a'aruëjo maratue bövie bise'ovado'aribövioho eni avohoromovado'aribövioho bahijë'e jio'iramu. Ëhi jiamu gavë'iroho ë dirö'ovado'aribövioho söröho avohoröhö jemë'ovado'aribövioho no'ovado'aribövioho ë i'iröhë.

¹⁶Ëhi uëvamu rue ae niö'ovado'aribövioho ri'ovado'aribövioho Jerusalem va'areje. Va'ovado'aribövioho gavare Iesuhu uëvadëhi bövioho bise'ovado'aribövioho ëhi jiamu gagorovo söröho avohareje.

17 Ëhi'amu vahiromadeje. Vahiromamu gagorovo Iesuro hesi ijo-
raje 12-ho jabu'o gemu mae rovadeje. 18 Rueromo ioho ijë'i Iesuro
uëvadeje: Ave jöho na jö mae uë'ië'ajëjo. Jemë ae gemuëro na
bijönegarue aribövi jabesi övore bojëmi'anuejo. Ëaho ja aviae na'o
ie ijanuejo. 19 Ie ijanuejamu hegorovo jaburo uehore gö gö baeromo
ae gemuëro gemuëro uavareje: Na bogo ëhioho ë'ejöjo. Na na mae
uavajëjo. 20 Mae uavajëjamu hegorovo uëvadeje: Ae aho'obëhe 12
röhu gemu naehu i hevöre ba'amo'ego hu'o gemuore ba'amaje ahuro
ë mu sisëho vae'a'ajëjo. 21 God-are surire jajivarëhi hesi A Maho
na ëhi guomevo'ajëjo. Röhu na bijönegarue aribövi jabesi övore
bojëmi'iröhe aho vaevë'o ho sisërë'ajëjo. Ëaho bogo raho'ibejajo
ëhuro mae jio'ibejajo.

Sino'o kö'o aevoromo ijare jöhoje.

22 Ëhi uëngoromo ioho ue'ahoromo Iesuro ioho baeromo God mae
uanugoromo ato'atovoromo hesi aribövioho suvuorëmiromo uëvadeje:
Baehëjo. Aveho nasi sine höjo. 23 Ëhi'onugoromo enatuore
jovoho baeromo God mae uanugoromo bojëmadeje. Bojëmamu ae
aho'obëhe ë jovoho ibe rova'areje. 24 Ibe rova'amu Iesuro uëvadeje:
Aveho nasi köe höjo. Ae aho'o jemesi jöeni köho rovevoromo
guomevo'ajëjo. Guomevo'iramu ëhuro God-hu jemë muebejëvo'iröhe
jögoroho marë'ajëjo. 25 Röhu ave jöho na jö mae uë'ië'ajëjo. Na ijoho
ö'i bajo jovoho bogo i'ejöjo hujeji ëho majaho rovego evare na God-
hu muebejaje öri ari'ere hiromo ö'i bajo jovo i'oho i'irodëni. 26 Ëhi
uëngoromo God rajahijarue jöho ioruumoromo suorovo va'oromo
Olives Dahorure iojio mareje.

Peter-hu Iesu gavaje jö a subivëhoröhe jö Iesuhu majahijadohoje.

27 Olives Dahorure iojio moromo Iesuro hesi aribövioho uëvadeje:
Jemë ae aho'obëhe nasi örire mae uehorovevarujoho vuonugo'i remo
va'a'arujëjo. Ëhesi bëhoho God-are surire jöho jajivoromo uvë'e
höjo: Sheep muebe'amaje aho God naro ano'ejöjo. Ano'iramu huhu
muebe'amade sheep-oho jaburo arua anumiae va'o'amo'ajëjo. God-
are jö jiajëhi ëhi remo va'a'arujëjo. 28 Remo va'iramu guomoromo
ri'önugoromo naro urimo Galilee va'ejöjo. Jemë ijore ö'a'arujëjo.
29 Ëhi uëvamu Peter-ro ri'öromo uavadeje: Nani a ioro'ioroho jasi
örire uehorovaruo ho vuonugo'i ramo va'a'aruëjo röhu na bogo ëhioho
ë'ejöjo. 30 Bogo ëhioho ë'ejöjamu Iesuro Peter uavadeje: Ëhi uevanuejo
röhu ave jöho na jö mae ua'ië'ajëjo. Jaruvo vahire kökörökoho bogo
urimoho vae niö'i uvë'e jero urimo vae niö'i gemu ae uë'a'anuejo:
Na Iesu bogo gavaje höjo. 31 Ëhi uë'a'anuejamu hegorovo Peter-ro
ma-darugo'o uavadeje: O na bogo ëhioho ë'ejöjo. Aehu anegamu
ja'o gemuore guomo'ië'iroho na bogo ëhioho majëhi'ejöjo. Bogo
majëhi'ejöjamu Iesure aribövi ioro'ioroho aho'o jabu'o ëhi gemuoho
Iesu uaruomadeje.

Iesuhu Gethsemane sa'are hiromo God-are örire ëninamijade jöhoje.

32 Ëhi uanugoromo Iesu'o hesi ariböviohu'o va'oromo öri ari'o
ihe Gethsemane rovareje. Rueromo Iesuro uëvadeje: Avehuro
raromohego na aruëre va'oromo God-are örire jöe jövöjo. 33 Ëhi

uënegoromo Peter James John ëhi sö ujuoho va'oromo hesi dë vövöbajo'o uhure huë vavaene aho'o rovamu sisë maro nurunurumadeje. ³⁴ Nurunurumoromo uëvadeje: Na sisë maro huë vavaene baejevajëjo. Ëhuro guomevo hesi höjo. Ëhuni nadi momorö'ö'i ma-nune jioromo na'o gemuoro avoho mueberovë'e raromohëjo.

³⁵ Ëhi uënegoromo rori'o ëgo'o va'oromo sa'are behumoromo God ëninamijadeje ëhuro eni jiego vi'ehoho bogo bae'iröhëni. ³⁶ Ëninamiromo uavadeje: Apo mue aho'o vae'iranoho ja eni javajëjo. Ëhuni i'ue huë vavaene nasi örire rovajoho ahego na bogo bae'iröjo. Röhu naehu nimajoho nadi ë'i jaeu nimanuëhi ëhi ë'onëjo.

³⁷ Ëhi ëninaminugoromo vuonorö'ö rueromo gavade hesi ae niö'li gemu momorö'öjamu gëgorovo Peter uavadeje: Simon-ajo. Rabëni niavanuëjo. Majae ma-bunemu nune jioromo mueberovë'e hi'iranoho ja diehi'oromo bogo eni javajëjo. ³⁸ Jemëro nune jioromo mueberomo ëninamihego God-ro ajëmego Satan-ro bogo dinëmego ëhuro bogo bejëvo'irajo. Jemesi aru'ahoho mu mae vae'i nimo'li jemesi sino haho'o'oho u'uhë'e höjo.

³⁹ Ëhi uënegoromo röhu maho va'oromo urimo ëninamiromo uavade jöe gemuoho ëninamijadeje. ⁴⁰ Ëninaminugoromo vuonorö'ö rueromo gavadeje jabumë nunëhimo'amo'ego momorö'öjamu. Rueho jaburo momorö'öjël'ëro ri'öromo Iesuare örire jö mana ua'iröhoho dadivëvadeje.

⁴¹ Dadivëvamu Iesuro urimë'li vae niö'li va'oromo ëninamijadoho röhu maho va'oromo ëninamijadeje. Ëninaminugoromo rueromo uëvadeje: Jemë diehi'oromo ma-momorö'öemu momorö'öjarujëjo. Iae mino'ëjo. Iae barëjajëjo. Majaho mami'e rovë'e höjo. Aëro God-are A Maho na bijönegarue aribövi jabesi övore bojëmi'ie'ajëjo. ⁴² Ri'öromo go va'ohego va'arëjo. Gahëjo. Na bijönegarue aribövi jabesi övore bojëmi'iröhe aho rovajëjo.

Iesu guduamare jöhoje.

⁴³ Ëhi uëvamu gavë'li Judas rovadeje. Iesuare ijoraje aho'obëhe 12 röhu Judas hu'o jabesi ae gemuoho jiadeje. Judas rovamu ae aho'obëhe siravae kepatae ujuohoromo hu'o rueruomadeje priest masijohu'o Jew rajo jögoru öri röjëhijarue ariböviohu'o a duvaho ioro'iorohu'o ëho jaburo rëmö'öjël'ëro. ⁴⁴ Röhu urimë'li ë sareri'e aho Judas-ro ë aribövioho uëvadeje: Ga'irarije naro di aho dudöhamu gavë'o'oho uvorëjo: Iae Iesu höromo guduamoromo hu'iraeromo avoho muebebe va'orëjo.

⁴⁵ Judas-ro ëhi uëvë'ëro huro rueromo ma-burëro ro Iesu jejamiromo Bada uavë'li dudöhadeje. ⁴⁶ Dudöhamu gavë'li ë ariböviohuro Iesu guduamareje. ⁴⁷ Guduamamu ae gemu Iesuare bëhire namijadohuro hesi kaejöhö jijöromo priest börömo hesi mu vaejaje aho anoromo hia'o'oho tariö'öjahadeje.

⁴⁸ Ëhi'amu Iesuro ë rueruomade aribövioho uëvadeje: Aveho na bogo vajiohu'e anano'e aehu jevajëjo. Jemë rabëni siravaho kepataho ujuohoromo guduamevo'li rovarujëjo. ⁴⁹ Mami'e majae aho'o naehu God-are amo börömore hiromo God-are jö hesi öri a röjëhinövodoho jemë varo'ho bogo guduamevarije höjo. Röhu jemëhu vaejaruje muoho ë hesi jö God-are surire jajivarëhi muoho ëhi jioröhego ëhuni ave

muoho rovë'e höjo. ⁵⁰ Èhi uëvamu hesi ijoraje aho'obëhe hu nugo'i huruomoromo va'areje.

⁵¹ Va'amu a i'e gemuëro niöge hane gemu ruohë'e Iesuare ijore va'adeje. Iesuare ijore va'amu aëro guduamo'ia'amu ⁵² niögoho jaho bu'önugoromo dë'ahobatëremu ju'ebiro mo va'adeje.

Iesu Jew rajo a masijo jabesi nunire namijade jöhoje.

⁵³ Èhi'amu Iesu hu'irae rueromo priest börömo hesi osare rovareje. Èosare priest masijoho a duvaho ömo'ömoho jögoru öri röjèhjarue aribövioho è aribövioho aho'obëhe jaburo è gemuoro gagovareje. ⁵⁴ Iesu priest börömo hesi osare barovamu Peter-ro arue riribövire Iesu rihimoromo priest börömo hesi osare rovadeje. Rueromo osare rumo va'oromo abo osa ririre ruë numë javue vae'i riroho ma-va'oraho nugarire è va'oromo priest hesi mu vaeruomaje ariböviohu'o gemuore hiromo vënoho jrovadeje. ⁵⁵ Èhi'amu priest masijohu'o a masijo ioro'iorohu'o ae nahareje jaburo huruoho majëhiromo uëröhego: Iesuoro èhi jië'e mu sisëho vaejamu gavare höjeho heromo Iesu anego guomoröhego. Nahareje röhu jö sisëho bogo birohareje. ⁵⁶ Ae aho'o sarerëmiromo Iesuare jö sisëho majëhiromo ae göëro göëro jöe gö gö majëhijareje.

⁵⁷ Ae göëro göëro jöe gö gö majëhijuvo a ioro'iorëro ri'öromo sarerëmiromo Iesuare jö sisëho huruoho majëhiromo uëvareje: ⁵⁸ Èahuro èhi uvavohijajo: Ave God-are javu börömo naro dadovo'ejöjo. Dadovoromo majae niö'i gemu hesi uhure javu i'oho vae'ejöjo. Uri-more javuoho aëro övëro vaejare höjo. A'i ijore javuoho èho bogo övehu vaejè'oho jio'a'ajëjo. Èhi uvade höjo. ⁵⁹ Jöho èhi majëhijareje röhu jabu'o jöe bogo gemuoho majëhi'i ae göëro göëro jöe gö gö majëhijareje.

⁶⁰ Jöe gö gö majëhijamu hegorovo priest börömo huro ri'öromo ae aho'obëhe jabesi nuninö va'o namiromo Iesu uavadeje: Na ja jö mana uö'iranoho bogojavajëjo. Aehu jasi jö sisë majahuijaruoho na èho mae o sarere höjo. ⁶¹ Mae o sarere höjamu Iesuro jöho bogo mana ua'i majörume namijadeje. Jörume namijamu priest börömo huro röhu maho jöe gö bu'öromo bijioho garomo uavadeje: Böröme namiromo ajamuijanue aho na ja javajëjo. Na ja noehu rajahjarue A hesi Hariho javajëjo. ⁶² Javajëjamu uavadeje: Iae na è aho jevajëjo. Röhu u'emu jemëro ge'a'arujëjo God-are A Maho naro darugo eni jië'e A hesi övo manö hi'iramu. Ö'idöre jio'amaje suehu'o gemu mae ruvebi'iramu. ⁶³ Èhi uavamu hegorovo rue priest börömo huro hesi niögoho dadovoromo uëvadeje: Iae eni jië'e höjo. A göho rabëni rueromo hesi jöho huruoho majahuijöräjo. Iae no eni hejè'e javuajëjo. ⁶⁴ God-are iho ijumajoho jemë'o iae hejarujëjo. Èhuni jemë diehi uehorovarujëjo. Diehi uehorovarujëjamu uavareje: Jö sareri'e aego ano'iramu guomo'a'ajëjo.

⁶⁵ Èhi uanugoromo a ioro'iorëro ri'öromo Iesu sabëro ödivoromo nunoho tugohahoromo övo mugö mugöëro anareje. Anoromo sivoromo uavareje: Na jö God-aro baeromo majëhijaje ae jevajë uövuanue javaje èhuni anagare aribövi jabesi ihoho huruoho majahuijeho hejarëjo. Èhi uavamu Iesu atovarue ariböviohuro Iesu baeromo sisë maro ano'i arijareje.

Peter-hu Iesu gavaje jö a subivëhade jöhoje.

⁶⁶ Ĕhi'amu Peter-ro anume aehu raromaruire ě hijadeje. Hijamu priest bŕŕomo mu ajamijarue magonahoho rŕhu gemuĕro rovadeje. ⁶⁷ Rueromo gavade Peter hiromo vĕne jurovamu gagorovo ĕrimahoromo uavadeje: Ja'o Nazareth amo rajo ae Iesu'o gemu mae javade hŕjo. ⁶⁸ Javade hŕjumu Peter-ro magonahoho sareramiro mo uavadeje: Jaehu jŕvanue jŕ hesi bĕhoho na bogo garomo bogo hejajĕjo. Ĕhi uanugoromo ojonŕ va'o namijadeje. [Namijamu kŕkŕrŕke uvadeje.]

⁶⁹ Amo Peter-ro ĕhi namijamu gagorovo priest bŕŕomo mu ajamijaje magonahohuro Peter garomo hesi bĕhire riravarue aribŕvioho uĕvadeje: Ĕaho Iesuare aribŕvi jabesi ae gemuoho hŕjo. ⁷⁰ Iesuare aribŕvi jabesi ae gemuoho hŕjumu Peter-ro rŕhu maho sareramiro mo uavadeje: Na bogajo.

Ĕhi uavadoho ririvanovamu bĕhire riravaroho jaburo Peter uavareje: Iae mae-ĕjo. Iesuare aribŕvi jabesi ae gemuoho javajĕjo. Ja'o hu'o Galilee sa'a raje jĕvĕ'ego ĕhuni uavaruĕjo. ⁷¹ Uavaruĕjumu Peter-ro uĕvadeje: Na jemĕ sarerĕmijĕ'o ho i'ue baejŕni ĕhuni na jŕ mae uĕvajĕjo. Jemĕhu uevaruje aho na bogo gavaje hŕjo. ⁷² Bogo gavaje hŕjumu gavĕ'i kŕkŕrŕko urimo vae gemu uvadoho rŕhu maho uvadeje. Uvamu hegoro Peter-ro uehorovoromo uvadeje: O mami'e Iesuro uevade hŕjo: Kŕkŕrŕkoho bogo urimoho vae niŕ'i uvĕ'e jero urimo vae niŕ'i gemu ae uĕ'a'anuĕjo: Na Iesu bogo gavaje hŕjo. Ĕhi uehorovoromo sisĕ maro nivadeje.

15

Iesu Pilate-are nunire namijade jŕhoje.

¹ Iae sisonuvo'ia'amu gagorovo priest masijohuro a duvaho ŕmo'ŕmohuro Jew rajo jŕgoru ŕri rŕjĕhijarue aribŕviohuro jŕ mevarue a masijo ioro'iorohuro ĕho jaburo gemuore gagovoromo jŕe mevoromo uvoruomadeje: No Iesuare ŕrire ĕhi ĕhi ĕ'ĕjarĕjo. Ĕhi mevoromo eni jiamu gagorovo Iesu tŕvoromo bava'oromo Pilate-are ŕvore bamareje. ² Bamamu Pilate-ro Iesu uavadeje: Na ja Jew rajo jabesi a bŕŕomoho javajĕjo. Javajĕjumu Iesuro uavadeje: Ĕjŕho jero jasi jŕvanuĕjo.

³ Ĕhi uavamu priest masijohuro Pilate sareramiro mo Iesuare jŕ sisĕho aho'obĕhe huruoho majahijareje. ⁴ Majahijamu Pilate-ro Iesu rŕhu maho jŕe ua garomo uavadeje: Jasi jŕ sisĕ aho'obĕhe majehijaruho ja hejanuĕjo. Na ja jŕ mana majĕhi'irano ho bogojavajĕjo. ⁵ Bogojavajĕjumu Iesu jŕho bogo mana majĕhamu Pilate-ro uvadeje: Diehi'oromo jŕho bogo jŕvajĕromo tiŕjadeje.

Iesu anego guomojŕo Pilate-hu uĕvade jŕhoje.

⁶ Rŕhu God-hu Vŕrŕ Tughade Sŕrŕ maja rovĕ'iroho savoji gagore raromarue aribŕvioho di aho jiovo nugŕ'ŕjŕro aehu uvoruomĕ'o ho Pilate-ro ĕ aho jiovo nugŕ'ŕnŕvadeje. ⁷ Rŕhu ae gemu hesi ihe Barabbas savoji gagore hijadeje. Urimĕ'i sa'are a masijohu'o muorovare majaho jiamu ae aho'o sa'are a masijohu'o muorovoromo ae muo'amareje. Ae muo'amĕ'ĕro savoji gagore raromareje. Rŕhu ae gemu Barabbas jiadeje. ⁸ Barabbas savoji gagore hijamu amonŕ gagovoromo riravare aribŕvioho ae aho'obĕhe jaburo rueromo Pilate uavareje: Savoji gagore raromaruho noehu uavego jiovo nugŕ'ŕjahuanuĕhi ĕhi ĕ'onĕjo.

9-10 Ëhi ë'onëjambu Pilate-ro gëromo uvadeje: Iesuare ihoho bövie jië'ego priest masijohuro dë vörönëgamu nasi övore bojemijare hö uvoromo uëvadeje: Na jemë nëgajëjo naro Jew rajo jemesi a börömoho jiovo nugö'öjoro.

11 Ëhi uëvamu priest masijohuro ae aho'obëhe birivoromo dinëmijamu hegoro vo jaburo uvoruomadeje: Iesu vuonugo'i Barabbas jiovo nugö'öjëjo. 12 Ëhi uvoruomamu hegoro vo Pilate-ro uëvadeje: Ëhi jië'o ho jemëhu uvarujoho: Jew rajo nosi a böröme hö uvaruje ë aho na diehi'o'ejöjo. 13 Diehi'o'ejöjamu uvoruomadeje: Korosioro anego guomajo. 14 Guomajamu Pilate-ro uëvadeje: Rabëniajo. Diehi jië'e mu sisë vaejë'e höjo. Vaejë'e höjamu ma-darugo ma'e uvo'i arijareje: Korosioro anego guomajo. 15 Guomajamu hegoro vo Pilate-ro ë aribövioho aho'obëhe sanuëmi'i nimamu Barabbas jiovo nugö'öjadeje. Barabbas jiovo nugö'ö'i Iesu hisuebijöro uënugoromo uëvadeje: Ave aho bava'oromo korosioro anohego guomajo.

Muorovo ariböviehu Iesu sivare jöhoje.

16 Ëhi uëvamu rue muorovo ariböviohuro Iesu hu'irae bava'oromo gavanare osa böröme va'areje. Osa böröme hesi ihoho prae-torium uvonövereje. Va'oromo jabesi muorovo ariböviohuni jöe nugö'öromo uëvareje: Jemë aho'o avehuro ro gagovohëjamugo ro gagovareje. 17 Gagovoromo Iesu sivo'irögoro sa'are a masijehu kavuë'e niögu ëgo io'amoromo mu vaejarue ëhi jië'e niögoho Iesu ba'amahareje. Ba'amahoromo a masijehu bosö didi'arue ëhi jië'e bosöho Iesuare simanore didi'ahareje. Röhu bogo inömo maho baeromo bosöho avohaho'i bibë'e ijo hisuoho ujuohoromo huoromo simanore ba'amahareje. 18 Ëhi'onugoromo sivoromo jejamiromo uavareje: Jew rajo jabesi börömoho vaevë'e hijanuëjo. 19 Vaevë'e hijanuëromo ijahëro simanore anoromo sabëro ödivoromo ëma sarere ague aho raromoromo rajahijareje. 20 Ëhi sivoruomoromo niögu ëgoho jijövaho'i hesi niögu maho io'amahoromo osare jioromo hu'irae bava'areje korosire ano taemo'i.

Iesu korosire ano taemare jöhoje.

21 Bava'oromo örire va'ihö gavareje ae gemu hesi ihe Simon muro jië'lëro rovamu. Röhu Simon hu Cyrene sa'a rajo ae jia-deje. Hu Alexander'o Rufus'o jabesi vavue jiadeje. Amo Simon-ro örire rovamu gagorovo muorovo ariböviohuro hu garomo övëro bi-jimö'öromo uavareje: Ave a hesi korosioho baeromo va'ëjo. 22 Baeromo va'ëjamu ejëhoromo baeromo jabumë aho'o va'aroho ajiomoromo sa'a ihe Golgotha nosi huëhu huotovë'o ho simano gijo va'ëne sa'are ë ajio suorovareje. 23 Suorovonugoromo wine jovohu'o myrrh osuhu'o buaroharoho Iesu bojamareje hesi vi'ehoho bisemu u'uhoröhego. Bo-jamamu juahëmadeje. 24 Juahëmamu korosire ano taemareje. Ano taemoromo hesi niögoho adovoromo ajajovareje ga'i di aho di niögoho bae hesi jiego. Ajajovonugoromo niögoho ujuohareje. 25 Röhu Iesu korosire ano taemare majaho 9 o'clock sisonu'e jiadeje. 26 O Iesuare jö sisëho jajivoromo ëhi uvë'e jiareje: Ave aho Jew rajo jabesi a börömoho höjo. 27 Röhu aëro anano'e vajiohu'e ae niö'i jabu'o korosire ano taemëvoromo göho ruëhi Iesuare övo manö göho viëhi övo adonö ëhi

amëvareje. ²⁸ [Amëvamu Iesu ë a sisë niö'i jabesi ririre korosire iromadeje. A sisë jabesi ririre iromadohuro ëhuro ëhi ë'iröhego God-are surire jö aehu jajivadëhi iae ëhi jiadeje. God-are surire jöho jajivoro uvë'eje: Aëro uvoruomë'e höjo: Hu jö ahoruomaje ariböviohu'o gemuore höjo.]

²⁹ Ëhi'amu aëro rova'ë'i uvene hijohijiovoromo sivoromo uvoruomonövadeje: Asë'e sareri ae javajëjo. Jero uvane höjo: Naro God-are osa börömoho dadovoromo majae niö'i gemu hesi uhure röhu maho vae barë'ejöjo. ³⁰ Ëhi uvë'e javaje ëhuni jasi sinoho ajamirovoromo korosire javajoho ruvebijëjo. Sivoromo ëhi uvoruomadeje.

³¹ Jabuhu sivarëhi priest masijohu'o jögoru öri röjëhijarue ariböviohu'o ëhi sivoromo uarovareje: Ëahuro uövuade höjo: Naro a ioro'ioroho ajëmego marëjëvaje höjo. Ëhi uövuade höjo röhu hesi sino ajamirovë'oho hu bogo eni höjo. ³² Huro uövuade höjo: Böröme namiromo jemë ajëmaje aho na jevajëjo. Israel rajo jemesi börömoho na jevajëjo. Ëhuni nadi'ego hu korosire jioromo ruvebijego no garomo hu mae uehorovarëjo. Ëhi uarovamu ë ae niö'i hesi bëhire korosi'o amëvare aho jabu'o Iesu sivareje.

Iesu guomade jöhoje.

³³ Ëhi'amu maja ririre öri ari'e aho'o ramoramovadeje. Ramoramovobe va'ojuvo majae huotorovamu gavë'i ajivadeje. ³⁴ Majae huotorovoromo ajivamu gavë'i Iesuro Jew rajo jabesi jöëro ma-darugo'o uvadeje: Eloiajo. Eloiajo. Lema sabaktaniajo. Nosi jöehu huotovë'oho God nasi Böviohajo. God nasi Böviohajo. Ja rabëni remo va'ane höjo.

³⁵ Remo va'ane höjamu bëhire riravare a ioro'iorohuro hejare uvavamu: Eloia uvamu heromo uarovareje: Ëho hehëjo. Elijah-ni uvajëjo. ³⁶ Ëhi uarovoromo ae gemuëro tutuvo va'oromo u'uhë'e inömoho barueromo nioga'i'e wine jovore ba'amoromo rumorovamu ioromo ijaho viture bijiohoromo Iesu bojami'ië'adeje. Bojami'ië'oromo aribövioho uëvadeje: Nadi'ego no gavarëjo Elijah-ro God-arire jioromo ro Iesu juvo baruvebijego o bogo.

³⁷ Ëhi uëvamu Iesuro jö'e dadovoromo guomadeje.

³⁸ Guomamu gavë'i God-are osa börömo ojo göho gagonö jiajoho niögehu tugoharoho arorovo ruvebijadeje. ³⁹ Ëhi'amu muorovo simano vaejaje ahuro Iesuarë nuninö namiromo gavade Iesu ëhi'oromo guomamu gagorovo uvadeje: Iae mae-ëjo. Ave aho God-are Harihe jiade höjo.

⁴⁰ Ëhi'amu magonaho ömo'ömohuro arue riribövire riravoromo Iesu diehi'aruoho garuomadeje. Mary Magdalene o Mary göho James a i'o o Joses jabesi vëmoho o Salome o magonaho ioro'ioroho ëhi jioruomadeje. ⁴¹ Urimë'i Iesu Galilee sa'are hijadevare evare ë magonaho ömo'ömohuro bövie bise'e ajamibe hesi ijore ijore jijihonövareje. Ëhi ë'ë'ëro ë magonahohu'o magonaho ioro'iorohu'o aho'obëhe Jerusalem amore hu'o gemu mae rovë'ëro ë riravoromo garuomadeje.

Iesuarë sino munë gagore bamare jöhoje.

42 Rõhu ë majaho bövi bise'lo avoho'amarue majae jiadeje nërõho nuhoromo God rajahi'irõhëro. Ëmajaho garobo'e bamadeje. 43 Nuho majae rue'ia'amu majae garobo'e bamamu gagorovo Arimathea amo raje ae gemu hesi ihe Joseph-ro va'adeje. Hu Jew rajo jabesi a duvahëro jië'ëro Jew rajo a masijo ioro'iorohu'o hiromo jõe mevonövadeje. Jõe mevo'ego ae aho'obëhe hesi õrire mae uehorovonövareje. Rõhu ae göehu göehu ë'aruëhi hu'o ëhi muebejë'e hijadeje God-ro ro börõme namiro mo aho'obëhe muebejëvorõhego. Joseph ëhi jië'e ae jiadeje. Ëhi jië'e aëro jië'ëro huro biririvoromo va'oromo Pilate uavadeje: Uevego na Iesuale sinoho bae'irõjo. 44 Iesuale sinoho bae'irõjamu Pilate-ro tiõromo uvadeje: Iesu diehi'oromo ma-burëroho guomade hõjo. Ëhi uvoromo jõe nugõ'õjamu Iesu muebejade muorovo ahuro rovadeje. Rovamu Pilate-ro uavadeje: Na Iesu mami'e guomë'e hõjo. 45 Guomë'e hõjamu ruehuro uavadeje: Iae guomë'e hõjamu hegoroovo Joseph uavadeje: Jaehu Iesuale sino baejë'o ho iae mae hõjo. 46 Iae mae hõjamu Joseph-ro va'oromo niõgu mabëhe imoromo guomë'e sinoho baruvebiromo niõgohuro numadeje. Niõgohuro nomoromo munë ubuvarire ë bamadeje. Bamoromo munë hõhõ barueromo ojoho tugohadeje. 47 Ëhi'amu Mary Magdalene'o Joses-are vëmoho Mary'o jaburo niõ'iro ariromo gavareje Iesu ë dirõ'ore bamamu.

16

Iesuhu ri'õjade jõhoje.

1 Iae Jew rajo jabesi nuho majaho barëjadeje. Jew rajo jabesi nuho majaho barëjamu Mary Magdalene o Mary göho James-are vëmoho o Salome ëho jaburo va'oromo ridi'e osoho imareje va'oromo Iesuale sinore otehorõhëro. 2 Imë'ëro hura börõmore sue'lo majae rojomamu gagorovo ri'õromo Iesuale sino bamarire va'areje. 3 Va'ë'i uarovareje: Raro ojo tugohare munëho rori'o hõhõ baejahuo va'a'ajëjo. 4 Ëhi uarovoromo avoho ga'i gavareje mami'e rori'o bava'ë'e jiamu. Rõhu ë munëho börõme jiadeje. 5 Bava'ë'e jiamu gagoro va'lo munë gagore rumo va'oromo gavareje rue jabesi õvo manõ a i'e ajivë'e niõgu ba'amë'o ho ë hijamu. Hijamu gagorovo jiodudu'iraëjareje.

6 Jiodudu'iraëjamu gagorovo ruehuro uëvadeje: Nadi jiodudu'iraëhëjo. Nazareth rajo ae Iesu korosire anamu guomade a hesi sinoho jemë naharujëjo. Hu aveho bogohõjo. Guomoromo ri'õjë'e hõjo. Hesi sino bamare sionoho gahëjo. 7 Garomo va'oromo Peter'o Iesuale ijorajo ioro'iorohu'o uërëjo: Iesuro urimo Galilee va'iramu mami'e uëvadire jemë ë ijore va'oromo ga'a'arujë uërëjo.

8 Ëhi uëvamu ë magonaho õmo'õmohuro jiodudu'iraeromo butubutu-moromo munë gagore jioromo suorovoromo huruomoromo va'areje. Va'oromo juhuonivo'i ë jõho aho bogo majëhijareje.

Iesuhu Mary Magdalene-are nunire rovade jõhoje.

9 [Iae hura börõmore sisonuvo'ia'amu Iesu guomadoho ri'õjadeje. Ri'õromo aevon'ioho Mary Magdalene-are nunire rovadeje. Rõhu urimo bogo guomade majare Iesuro ë magonaho hesi dëre jio'amaje aru'aho sisë 7 raro'v'amadeje. 10 Ëmagonaho hesi nunire rovamu gagorovo ë magonahohuro va'oromo gavade Iesuale aribõvioho huë vavaene

baeromo nivoruomamu gëgorovo uëvadeje: Iesu ri'öjè'ëro hijamu gavode höjo. ¹¹ Hijamu gavode höjamu heromo bogo ma uehorovareje.

Iesuhu hesi ijoraje niö'i jabesi nunire rovade jöhoje.

¹² Bogo ma uehorovamu Iesuro Mary Magdalene-are nunire rovamu ijönö ae niö'iro amore jioromo va'i gavareje Iesu nu ano'e gorosovè'e rovamu. ¹³ Rovamu gagorovo jaburo niö'iro vuonorö'ö rueromo Iesuale aribövi ioro'ioroho Iesu gavare jöho majëhijamu bogo ma uehorovareje.

Iesuhu hesi ijoraje 11 jabesi nunire rovade jöhoje.

¹⁴ Bogo ma uehorovoromo Iesuale ijoraje 11-ho jaburo ie ue'ahamu evare ijo tugoho'i Iesu jabesi nuniroho rovadeje. Rueromo uehorovoromo uvadeje: Ave nasi ariböviohuro hejare ae göëro göëro uëvamu: Nörö ri'öjè'e jiamu noro gavare hö uëvamu heromo bogo ma uehorovare hö uvoromo birëgadeje. Birëgoromo uëvadeje: Jemë rabu hia'i birire è'oromo naehu ri'öjode jöho bogo ma uehorovarije höjo. ¹⁵ Èhi birëgonugoromo uëvadeje: Sa'ae dinö'e dinö'e va'oromo nasi jö maho ae aho'obëhe majëhi barërëjo. ¹⁶ Ae rahu mae uehorovoromo bapataeto vaejè'o'ho God-ro baejëvoromo manö bamëvo'ajëjo. Ae rahu bogo ma uehorovè'o'ho God-ro uè'a'ajëjo: Jemë sisë jëvaje öri sisënö va'ohëjo. ¹⁷ O ae rahu mae uehorovè'o'ho aviëhi jië'e bogo gavarue mu masijoho vaeruomo'ajëjo aëro èho garomo uvoruomoröhego: Iae mae-ëjo. Jemë jö mae atarujëjo. Nasi ihoho uvoromo Satan-are sisë aribövi a dëre jëvajoho rarovö'öruomo'ajëjo. Bogo hejarue jöëro atoruo'mo'ajëjo. ¹⁸ Vörö'e sigobu banigojio'mè'o'ho o oso sisë'e jovo ue'ahè'o'ho bogo sisërëjèvo'ajëjo. O guomo guomo'e aribövi jabesi sinore övo bamëhè'o'ho marëjèvo'ajëjo.

God-hu Iesu ajamamu ö'idöre ajiomade jöhoje.

¹⁹ Bada Iesuro èhi jië'e jöho majëhiromomo God-ro hu ajamamu huro ö'idöre ajiomoromo God-are övo manö hijadeje. ²⁰ God-are övo manö hijamu hesi ariböviohuro va'oromo jöho majëhibe dinö'e dinö'e jiji-honövareje. Majëhibe jijih'o'ego Badaro jabu'o bimuovoromo muoho ajëmi'ego bogo gavarue darugo'e muoho vaenövareje aëro èho garomo jabesi jöho mae uehorovo'iröhego. Èhi'areje. Ahia mino'e.]

LUKE

Luke-hu jajivade jö hesi bēhohoje.

¹⁻² O asē'e Theophilus naro ave jōho jasi örire jajivo'iē'e gane. Mu böröme nosirire rovē'eje. Ēmu aevadire aëro nunëro gabe rovē'ëro ë jōho ae majahuinövareje. Majahuijamu ae aho'obēhe heromo ë jö gö göho gemuoro gagovoromo jajivo gavareje. ³ Ēhuni ë muoho aho'o diehi diehi vaejaroho he avoho'i uē gēbe rovē'ëro naro jani avoho ahorirëro jajivo'amo'i uehorovodeje ⁴ ëhuro jero adahoromo mami'e hejane jōho mae uehorovo'iranego.

Bapataeto vaejaje ae John rahoröhego aneraehu majahijade jōhoje.

⁵ Iae Herod-hu Judea sa'a muebejadevare priest gemu ë hijadeje. Priest hesi ihoho Zechariah jiadeje. Abijah-are ujore priest ömo'ömocho Zechariah hu'o ae gemuoho jiadeje. Hesi vaboro hesi ihoho Elizabeth jiadeje. Elizabeth hu aevo'i jiadeje priest Aaron-are uje jiadeje. ⁶ Vaboro'baru'o jaburo niö'iro Badahu bojēmade jögoroho bövioho bise'oho aho'o avoho ejahoromo hesi nunire ma-mabēhe arijareje. ⁷ Jabumē aboji harihu'o rumo'e jēvadeje Elizabeth dē tiojē'e magonahëro jiē'ëro. Röhu mami'e mavojiraejēv'e jiadeje. Jabumē ëhi jiē'e a magonaho'e jēvadeje.

⁸ Ēhi jēvē'ëro Zechariah'o hu'o gemu mae priest mu vaejarue ariböviohu'o jabesi mu majaho rovamu evare Zechariah-ro priest muoho God-are nunire vaejadeje. ⁹ Muoho vaejamu Jew rajo priest-ehu vaejaruēhi jabumëro priest ihoho jajivo'amoromo gemuore buarohoromo gemu iareje ga'i di ahuro di muoho bae hesi jiego. Ihoho ioromo gavareje Badare osa börömore rumo va'oromo ridi'e oso God-ni vënehu bueröhe muoho Zechariah-ro baejē'e jiamu. Zechariah-ro ë muoho baenugoromo ose bue'i Badare osa börömore va'irögoro ¹⁰ a ioro'iorohuro aho'o amonö raromoromo God-are örire jöe atoruo-madeje. ¹¹ God-are örire jöe atamu gavē'i Zechariah-ro osa börömore muoho vae'i gavadeje Badare anerae gemu nune oso buejarue maratu övo manö ro namijamu. ¹² Aneraho ro namijamu gagorovo jiodudu'iraeromo juhuonivadeje. ¹³ Juhuonivamu gagorovo anerahuro uavadeje: Zechariah nadi juhuonivējo. Jaehu God ëninamijanoho hu iae ejahē'e höjo. Ejahē'ëro huro jasi vabore Elizabeth ajami'iramu huro jani harihoho raho'a'ajējo. Rahē'iroho hesi ihoho John jumuvonējo. ¹⁴ Jero sisē maro nimoroho'iramu ae aho'obēhe jabu'o uvo'a'aruējo: Mabēhe rahade hö uvoromo nimoroho'aruējo. ¹⁵ Hu Badare nunire a böröme jio'a'ajējo. Wine jove vörö'e jove gö gö bogo i'a'ajējo. Hu hesi vëmu hesi dëre jio'iröhire aevoromo God-are Aru'ohohuro hesi dē vövöbajo'ere simanore raro'ajējo. ¹⁶ Rarovo'iramu Israel raje ae aho'obēhe jabesi dē vövöbajo'oho huotovëho'iramu jabumëro Bada jabesi God-are örire avoho uehorovoruomo'ajējo. ¹⁷ Huro Elijah-are öre daruge gemuoho baeromo ëhuro Badare jōho baeromo urimo va'a'ajējo. Va'oromo aribövi jabesi dē vövöbajo'oho huotovëho'iramu vavu ömo'ömhuro aboji harihu'oho huë baejēvo'aruējo. Jö bijönimarue ariböviohuro mu mae vaejarue aribövi jabesi jö maho ejëhoruomo'ajējo.

Ēhi ajēmi'iramu evare aribövioho avoho raromoruomo'ajējo Bada maro ruerōhego.

¹⁸ Anerahuro ēhi majahijamu hegorovo Zechariah-ro uavadeje: Nasi vaboroho raho'a'ajē uevanuoho rōhu na mavoje jevoromo nasi vaborohu'o mavoje hōjo. Ēhi jiē'oho na diehi'oromo uvo'ejōjo: Ja jō mae uevanuējo. ¹⁹ Uevanuējamu anerahuro uavadeje: Na Gabriel jevajējo. Na God-are nuninō namijaje hōjo. Huro na remō'ōjade hōjo naro ja'o jōe jōvoromo jaehu hejanue jō mabēhoho majahi'irodego. ²⁰ Ēhuni hejējo. Jaehu nasi jō bogo ma uehorovanuohuni ēhuni ja jō jōvanuoho bitaroho tövavo'iramu jōrume hibe va'ojuvo naehu uavodēhi ēhi jio'iramu evare jōho jōvo'anuējo. Amo ē jōho bogo sareroho jio'i hesi majaho rue'iramu iae jio'a'ajējo.

²¹ Ēhi'amu ae aho'obēhe Zechariah mueberomo uvoruomadeje: Hu rabe ē'oromo osa bōrōmoroho hiromo ōrisanuovajējo.

²² Ōrisanuovajējamu Zechariah-ro amonō hörō rueromo jōho bogo majēhi varijēnoho jiadeje. Jōho bogo majēhi varijēnoho jiamu gagorovo rue ariböviohuro garomo uvoruomadeje: Hu God-are osa bōrōmore hijadevare God-ro rōjahamu nia'ovo'iraeromo mu bōrōme gavē'ero ēhu'ero jōho bogo majahui varijēnoho hōjo. Rōhu hu töv'ero jiē'ero jōho bogo majēhi'i ma-ōvēremu majēhijadeje.

²³ Ēhi ē'ē'ero God-are osare mu majaho barējamu Zechariah-ro hesi amēro vuonorō'ō va'adeje. ²⁴⁻²⁵ Va'amu hesi vabore Elizabeth-ro dē'iraeromo uvadeje: Dē tioromo hiromo ae aho'obēhe jabesi nunire javoji baebe rovodoho aviavejō'e Badaro huē baejevoromo ajemamu javojoho barējevē'e hōjo. Ēhi uvoromo osaremu hijamu manaere övo gö mine barējadeje.

Iesu rahorōhe jōhoje.

²⁶ Elizabeth dē'iraeromo manaere 5 barēromo rōhu manaere 6-ho jiamu gavē'i God-ro anerae Gabriel nugō'ōjamu Galilee sa'are Nazareth amore rovadeje ²⁷ aboride gemu jōe majahi'irōhēni. Ēaborido hesi ihoho Mary jiadeje. Hu o a juvije gemu jabu niō'ihu masurovo'irōhe jōho ae aho'obēhe jabesi nunire majēhijareje. A juvijo hesi ihoho Joseph jiadeje. Joseph hu Israel sa'are bōrōmo vaenōvade ae David-are uje jiadeje. ²⁸ Amo anerahuro rueromo Mary uavadeje: Vaevē'e javajējo. God-hu huē baejavaje magonahe javajējo. Badaro ja'o juvaje hōjo. ²⁹ Ja'o juvaje hōjamu hegorovo Mary-ro sisē maro nurunurumoromo uehorovoromo uvadeje: Bēhoho rabēni ēhi jiē'e huē baejē'e jōho majehiromo jejemijajējo. ³⁰ Ēhi uvamu anerahuro uavadeje: Mary God-ro jasi ōrire huē baejavē'e jiaje nadi juhuonivo'i ³¹ aveho gavējo. Jero dē'iraeromo harihe rahoromo Iesu jumuvo'anuējo. ³² Hu bōrōme jio'a'ajējo. Huro ave ihoho bae'a'ajējo Dō Mare Hijaje A hesi Harihe ē ihoho bae'a'ajējo. Bada God-ro ē aho ua'a'ajējo: Jasi hije David-are sionoho baeromo bōrōme namiromo Israel rajoho muebejēvonējo. ³³ Muebejēvonē ua'iramu huro Jacob-are ujo ömo'ömoho ma-ioro'ioremu muebejēvonövo'ajējo. Bogo vuonugo'i ēhi muebejēvobe va'a'ajējo.

³⁴ Muebejēvobe va'a'ajējamu Mary-ro aneraho uavadeje: Iae jō mae-ējo. Rōhu aho bogo masegē'e na ēma hijajējo. Ēhi jiē'oho diehi'oromo

na dè'iraejevo'ajèjo. ³⁵ Dè'iraejevo'ajèjamu anerahuro uavadeje: God-are Aru'ahohuro ruahö'öjavo'ajèjo. Dö mare hijaje A hesi darugohuro aegaho'ajèjo. Èhuni raho'irane a ma hesi jöho God-ro uè'a'ajèjo: Hu nasi Harihe höjo. ³⁶ Röhu aveho gavèjo. Jasi agane Elizabeth mavoje höjo röhu hu'o harihe raho'irögoro è'ajèjo. Ae aho'obèhe garomo uvoromadè höjo: Hu dè tjojè'e magonahe höjo. Röhu hu dè'iraejadoho manaere 5 barè'i aveho 6-ho höjo. ³⁷ Rahade hesi bëhoho mue bövie bise'e vae'iröhoho God hu eni jiajèjo.

³⁸ Eni jiajèjamu Mary-ro uavadeje: Iae mae höjo. Na Badare mu vaejaje magonahe jevajèjo. Èhuni jaehu uevanue èhi jiè'e muehu nasi örire rovè'oho iae mae höjo. Èhi uavamü anerahuro hu nugo'i va'adeje.

Mary-hu Elizabeth ga'i ajiomade jöhoje.

³⁹ Va'amu gagorovo Mary-ro ri'öromo dahorunörire Judea sa'are è ma-burèro ajiomoromo amore höröjadeje. ⁴⁰ Hörönugoromo Zechariah-are osare va'oromo Elizabeth jejamijadeje. ⁴¹ Jejamijamu hejè'i Elizabeth-ro hejadeje hesi dère aharihoho tiöjavamu. Tiö'ego God-are Aru'ahohuro hesi dè vövöbajo'ere sino haho'ere aho'obèhe rumorovavamu hegorovo ⁴² Mary-ni ma-darugo'o uvadeje: Ja huè mae baejè'e javajèjo. Magonaho ioro'ioroho iosirèmiyè'e javajèjo. Jaehu raho'iranoho huè mae jiajèjo. ⁴³ Aveho na diehi'oromo huè mae baejevè'e höjo nasi Börömo hesi vëmehü nasi örire rovanoho. ⁴⁴ Èhesi bëhoho jero jejemijamu hejè'i hejode höjo nasi dère aharihohuro nimorohoromo tiöjavamu. ⁴⁵ Ja huè mae javajèjo Badahu uvadèhi èhi jio'a'ajè uvanohuro.

Mary-hu jö ioromo God rajahijade jöhoje.

⁴⁶ Èhi uavamü hegorovo Mary-ro uavadeje:
Naro nasi dè vövöbajo'o uhure Bada mabèhe uavajèjo.
⁴⁷ God na ajemaje aho uehorovoromo na nimorohevajèjo.
⁴⁸ Na hesi mu magonahe ma-bise'e jevajèjo röhu huro nasi örire uehorovevè'e höjo.
Aviavejè'e aevoromo ae aho'obèhe uvonövo'aruèjo: Nörö huè mae baejè'e höjo.
⁴⁹ Darugo ma'e Ahuro mu böröme vaejehè'e höjo.
Hesi ihoho gemu maemu höjo.
⁵⁰ Hu mae uehorovarue aribövi jabesi jöèni vavaenimaje höjo.
Jabesi a ujo ömo'ömohuni hesi vavaenoho èhi jiemu jioje va'a'ajèjo.
⁵¹ Hesi darugo'e mu maho röjèhiromo
a masije javuajè uvarue aribövioho rarovö'öjèvamu huruomè'e höjo.
⁵² Huro darugo'e a masijo jabesi ihoho sa'aro ba'obue'i
iho rumo'e aribövioho banigojiomèvè'e höjo.
⁵³ Vadunehu vuovè'e aribövioho iruno'o mahuro da'uojèhi'i
bövi bise'o marohè'e aribövioho rëmö'öjamu ma-övemu va'oruomè'e höjo.
⁵⁴⁻⁵⁵ Huro hesi mu aribövie Israel raje no ajamuijè'e höjo.
Nosi hijo miono'o uèvadèhi huro èhi Abraham'o hesi ujo ömo'ömohu'o nosi jöèni vavaenimemu vavaenimobe rovè'e höjo.
⁵⁶ Èhi jövonugoromo Mary-ro Elizabeth'o hiromo manaere niö'i gemu barèjamu hesi amèro vuonorö'ö abuejadeje.

Bapataeto vaejaje ae John rahade jöhoje.

⁵⁷ Iae Elizabeth-are majaho rovamu harihoho rahadeje. ⁵⁸ Rahamu hesi amo rajohu'o aganohu'o hejare uëvavamu: Badaro huë baeromo Elizabeth mabêhe ajamijade hö uëvavamu hegorovo jabu'o nimorohoruomadeje.

⁵⁹ Nimorohoromo rahadoho hurae gemu barëjamu gagorovo rueruomadeje garöhëni jabesi Jew rajo muoho vaeromo aharihu hesi sinoho tariojahego. Rueromo ihoho hesi vavu hesi ihe Zechariah ë ihe gemuoho jumuvo'ie'areje. ⁶⁰ Jumuvo'ia'amu gagorovo vëmohuro uëvadeje: Bogajo. Hesi ihoho John ua'ejarëjo. ⁶¹ John ua'ejarëjamu uavareje: Iae mae höjo röhu jasi aganoho ëhi jië'e ihoho bogohöjo. ⁶² Bogohö uanugoromo vavuoho övëremu ua gavareje: Harihu hesi ihoho rahuo jio'a'ajëjo. ⁶³ Rahuo jio'a'ajëjamu vavuohuro övëremu uëvadeje: Ijo ha'osoho barovego na jajivöjo. Ijo ha'osoho baro bojамamu jajivoromo uëvadeje: Hesi ihoho John höjo. Hesi ihoho John hö uëvamu gagorovo rue aribövioho gövögövövereje. ⁶⁴ Ëhi'amu evare Zechariah-are jö'oho bitaroho marëjamu God rajahijadeje. ⁶⁵ Rajahijamu gagorovo rue amo rajohuro ae aho'obêhe juhuonivoruomadeje. Juhuonivoromo ë mu börömo hesi jöho aho'o Judea dahorunörire sa'a börömore ë vaerovemu vaerovoruomadeje. ⁶⁶ Vaerovemu vaerovoromo ë jöho sisë maro uehorovoruomadeje. Uehorovoromo gavare Badaro aharihoho mae ajamamu gagoro uvareje: Ëaharihoho hu diehi jië'e a mabêhe jio hesi höjo.

Zechariah-hu jö God-aro baeromo majëhijade jöhoje.

⁶⁷ Iae aharihu hesi vavue Zechariah-ro hejade God-are Aru'ahoho hesi dë vövöbajo'ere sino haho'ere rumorovoromo uehore bojамamu hegorovo ave jöho majëhiromu uëvadeje:

⁶⁸ Bada God Israel rajo muebejavuaje aho hu mabêhe höjo.

Huro uehoro ma-mae baeromo hesi aribövioho ajamui'i rovë'e höjo. Rueromo sisë'i raromaroho maro bamavuë'e höjo.

⁶⁹ Huro darugo'e aho God-are mu vaenövade ae David-are ujoho bojамuij'e höjo no baejavuoromo maro ramuo'iröhego.

⁷⁰ Huro ëhi ë'iröhëro mami gö'e hesi jö baejare aribövi maho ëhi huruoho'ego jabumëro ë jöho ae majëhinövare höjo.

⁷¹ Huro no'o muorovarue aribövioho ruahö'öjëvoromo no baejavuoromo maro ramuo'iröhëro no nu huodaguarue aribövi jabesi övore javuego baeniëhiromu maro bamavuo'iröhëro ëhi uvade höjo.

⁷² Huro muebejavuobe va'iröhe jöho uehorovoromo nosi hijo miono'oho huë baejëvo'i uvade höjo.

⁷³ Huro nosi hije Abraham darugo'e jöho majahiromu uavade höjo

⁷⁴⁻⁷⁵ ajamuiromu no'o muorovarue aribövi jabesi övore javuego baeniëhi'iröhëro.

Baeniëhijego noro bogo juhuonivo'i ma-ioro'ioremu hesi nuniro raro-

romoromo hu gemu uehorovoromo ae mae vaejëvoromo hesi muoho vaenövo'iröhego.

⁷⁶ Röhu jue'iajo. Dö mare hijaje Aho God-ro ave jöho majahiromu ua'a'ajëjo:

Ja jö God nasiro baeromo a majëhijanue ae javajëjo.

Jero Badare jöho baeromo urimo va'a'anuëjo huhu rueröhe öroho avohahego maro rueröhego.

⁷⁷ Jero jöe majëhijego God-are ariböviohuro heromo uvoruomorohego: God-ro nosi sisëho uehorovoromo vuonugoromo no baejavuoromo maro ramuaje hö uvorohego.

⁷⁸⁻⁷⁹ Èhesi bëhoho God-ro noni vavaenimajohuro majaëro ö'idöre rojomanovoromo

ramoramore vuovo örire jijiharue aribövioho no ajivavuo'ajëjo.

Ajivavuoromo huë mae bae'iröhe öroho röjahui'a'ajëjo.

⁸⁰ Zechariah-ro ëhi jövë'ëro John-ro böviraebe hesi aru'ahoho dë vövöbajo'oho biririvobe va'adeje. Biririvobe va'oromo a rumo'e sa'are va'o hijadeje u'emu Israel rajo jabesi nunire muoho ma-va'orahoro vaeröhëni.

2

Iesu rahade jöhoje.

¹ Èhi'amu evare Rome a böröme sa'ae aho'obëhe muebejaje a ihe Caesar Augustus-ro jöe nugö'öjadeje. Jöe nugö'öromomo uëvadeje: Nasi aribövie sa'ae dinö'e dinö'e raromarujo jemëro va'oromo jemesi ihoho census aribövioho bojëmirego jajivëho'irarëjo. ² Röhu evare majaho ëho iho aevoromo jajivo'amare majaho jiadeje. Evare majaroho Quirinius-ro bövie vaeromo Syria sa'aho muebenövadeje. ³ Amo ë jöho rovamu gagorovo ae gemu gemu amo göre göre va'o raromarohe jabesi amo mare vuonorö'ö rueruomadeje jabesi ihoho uëvego jajivojöro.

⁴ Rueruomamu Joseph-ro hu'o Galilee sa'are Nazareth amore hiromo vuonugoromo hu David-are ujëro jië'ëro David-hu aevo'i hijade amore Bethlehem ë rovadeje. ⁵ Rue'i Mary hu'irae rovadeje jabesi ihohu'o jajivëhojöro rabëni Mary huro masuröhe magonahego. Röhu hu dë'e jiadeje. ⁶ Bethlehem rueromo arijamu magonahehu rahoröhe majaho rovadeje. ⁷ Majaho rovamu gavare aehu nuharue osaho rarovamu gagorovo mi nugo'amarue osare va'o harihu murioho rahoromo niögëro numoromo mi jabesi i bahijarue röhore ë bamareje.

Aneraehu jö barovamu sheep muebejarue ariböviehu hejare jöhoje.

⁸ Èhi'amu gavë'i iae dirö'e gemuore aëro vahi'e sheep mure raromoro sheep-oho muebe'amareje. ⁹ Sheep-oho muebe'i gavare Badare anerahuro ro nami'ego Badare ajohuro ajivëvamu gagorovo sisë maro juhuonivareje. ¹⁰ Juhuonivamu gagorovo anerahuro uëvadeje: Nadi juhuonivohëjo. Naehu rovaje hesi bëhoho na jö mae baeromo rovajëjo jemë'o jemesi a ioro'iorohu'o aho'obëhe heromo börömo bëhe nimoroho'irarijego. ¹¹ Aruëre David-hu hinövade amore jemë baejëvoromo mare bamëvo'iröhe aho jaruvo rahë'e höjo. God-hu uavë'ëro böröme namiromo ajëmi'iröhe aho höjo. Hu Bada höjo. ¹² Röhu jemëro va'oromo ga'irarije aharihoho niögëro numë'e mi jabesi i bahijarue röhore raromamu gavë'iroho uvorëjo: Nörö jö mae uövuade höjo.

¹³ Jö mae uövuade hö uëvamu gavë'i anerae aho'obëhe ö'idöre jioromo ma-majioho ruvebiruomoro urimore rovade anerahu'o gemu mae riravoromo God rajahiromo uvoruomadeje:

14 Dö mare hijaje aho God hu mabëhe höjo.

Sa'are raromarue aribövioho huhu huë baejävajoho maro raro-moruomo'ajëjo.

15 Aneraho jaburo ëhi uvoruomoromo ö'idöre vuonorö'ö iojioamamu gagorovo nume sheep muebejarue ariböviohuro uarovareje: Rovego Bethlehem va'oromo Badahu uövuade muoho gavarëjo. 16 Ëhi uarovonugoromo ma-burëro rueromo nahoromo gavareje Mary'o Joseph'o ari'irögoro aharihoho miehu i ijarue röhore raromamu. 17 Ëhi ganugoromo aharihu hesi jö aneraehu uëvamu hejarohe Mary'o Joseph'o majëhijareje. 18 Majëhijamu hegorovo ae aho'obëhe tiöjëvadeje. 19 Tiöjëvamu Mary-ro jöho avoho heromo hesi simanore bamoromo uehorovemu uehorovadeje. 20 Ëhi'amu rue sheep muebejarue ariböviohuro aneraehu uëvadëhi ëhi jiamu gavë'ëro o jöho ëhi hejë'ëro God rajahibe mae uabe jabesirëro sionëro va'areje.

Iesu jumuvare jöhoje.

21 Iesu rahadoho hurae gemu barëjamugo Iesuare örire Jew rajo muoho vaeromo sinoho tariö'öjahoromo urimo Mary bogo ma'enorohë'e ma-hijadevare aneraehu iho uavadëhi ëhi Iesu jumuvareje.

Iesu osa börömore bava'oromo God-are örire bojамare jöhoje.

22 Mary-ro aharihoho rahoromo hijuvo gavade Moses-hu bojëmade mu vaeromo jabesi sisë u'oröhe majaho rovamu gagorovo huro Joseph-mu niö'iro aharihe Iesu baeromo Jerusalem amore ajiomareje aharihoho Bada bojami'iröhëni. 23 Ëmu hesi jöho God-are surire jajivoromo uvë'eje: Harihu murioho aho'obëhe God-are öroro i'imamego hesiremu jio'amo'irajo. Amo Mary'o Joseph'o aharihoho bava'areje ëhi jië'e muoho vaeröhëni. 24 O jö göho Badare surire jajivoromo ëhi uvë'eje: Ihititore niö'i o guaho harihe niö'i ëhi jië'e ugohe priest bojëmege God-ni vënëro muejëvo'irajo. Ëmuohu'o vae'iröhëni jabumë aharihoho bava'areje.

25 Röhu ae gemu Jerusalem amore hijë'e jiadeje. Hesi ihoho Simeon jiadeje. Hu ae mae vaejëvoromo God-are muoho gemu uehorovaje aëro jië'ëro muebenövadeje God-ro Israel rajoho ajëmiromu jabesi huë vavaenoho tugohëhoröhego. Röhu God-are Aru'ahohuro hu'o juvonövadeje. Hu ëhi jië'e ae jiadeje. 26 Simeon hu ëhi jië'e ae jiamu God-are Aru'ahohuro röjahiromo uavadeje: Ja bogo avevejö'oho guomo'i Badahu uavë'ëro böröme namiromo ajëmi'iröhe aho rue'iramu ganugoromo evare guomo'a'anuëjo. 27 Ëhi uavë'ëro ijönö God-are Aru'ahohuro uehore bojамamu Simeon-ro God-are osa börömore rovadeje. Rovamu evare Iesuare vëmu vavu'ohuro aharihoho God-are osa börömore barovareje Jew rajo jögoru jiaje ëhi jië'e muoho vae'iro. 28 Barovamu gagorovo Simeon-ro aharihoho övëro huohudëromu God rajahiromo uavadeje:

29 Bada jaruvo jero jasi nimoromo uevego na muoho vuonugo'i huë mae ö'iröjo jaehu uevanëhi ëhi jië'e jiaje.

30 No maro bamavuo'iröhe aho nasi nunëro gavë'e jevajëjo.

31 Ëaehu vaeröhe muoho jero avohane höjo sa'ae aho'o garöhego.

32 Avohane hesi bëhoho huro ajoho barovego

ëhuro jasi jö bogo hejë'e aribövioho jasi öroho ga'i jasi aribövie Israel rajo nosi ihoho döro jioröhego.

³³ Simeon-ro ëhi jövamu hegorovo Iesuare vëmohu'o vavuohu'o tiöjëvadeje. ³⁴ Tiöjëvamu God-ro jabumë huë mae bojëmi'iröhego Simeon-ro God uanugoromo Iesuare vëme Mary uavadeje: Aveho hejëjo. Ave aharihoho God-ro bamade höjo huro muoho vaejeho ëhuro Israel rajo a ioro'ioroho sa'are rirerömëvo'i ioro'ioroho döro ri'öröhego. God-ro bamade höjo huro hesi jöho barueröhego. Huro hesi jöho barue'iramu aëro ahoruomo'ajëjo. ³⁵ Ahoromo ëhuro ae aho'obëhe jabuhu diehi diehi uehorovaruoho va'orahoro jio'iramu ga'ejarëjo. Ëhi'o'iramu jero jasi dë vövöbajo'o uhure huë vavaene börömoho bae'a'anuëjo.

³⁶ Simeon-ro Mary ëhi uavadeje. Röhu magonaho mavoje gemu ë hijë'e jadeje. Hesi ihoho Anna jadeje. Hu jö God-aro baeromo majëhijaje magonahe jadeje. Phaniel-are aboje jadeje. Asher-are uje gemuoho jadeje. Röhu hesi vadunoho aho'obëhe mae jadeje. Urimë'i barue masuromo baru'o hijadoho vadune aho'obëhe 7 barëjamu ³⁷ baru guomamu doru hijadoho rahade vadunoho aho'obëhe 84 jadeje. Ëhu'ëro mavoji mae jadeje. Röhu huro ë God-are osa börömoremu va'oromo majae vahie jene ioho vuonugo'i God gemu uehorovoromo hesi örire jöe jövoromo rajahinövadeje. ³⁸ Amo Mary'o Joseph'o God-are osa börömore arijamu ë magonahohuro jabesirire rovadeje. Rueromo aharihoho garomo God huë mae uavadeje. Huë mae uaromo va'oromo ganövade di ariböviohuro God-ro Jerusalem amo rajoho maro bamëvoröhego muebejarue ë aribövioho gëromo aharihu hesi jöho majëhinövadeje.

Iesu Nazareth amore vuonorö'ö barovare jöhoje.

³⁹ Ëhi'amu Mary'o Joseph'o Badare surire jiaje ëhi jië'e muoho vae barënugoromo Galilee sa'are vuonorö'ö rueromo ro jabesi amore Nazareth ë arijareje. ⁴⁰ Arijamu aharihoho böviraebe biririvobe va'adeje. Hu uehoro mabëhe hesi simanore jadeje. God-ro hesi örire huë bae avohobe va'adeje.

A harihe Iesuhu God-are osare hiromo ë'ade jöhoje.

⁴¹ Ëhi jië'ëro God-hu Vörö Tugohade Maja Börömoho rue'ego vadune göro göro Iesuare vëmu vavu'ohuro Jerusalem ajiomoromo ë hesi söröho inövareje. ⁴² Ëhi'obe rovaroho Iesu vadune aho'obëhe 12 baejamu gagoro Iesuare vëmu vavu'ohuro ëhi gemuoho ë'oromo Jerusalem amore ajiomareje. ⁴³ Ajiomoromo sörö majaho barëjamu vuonorö'öromo sionëro jabesi amëro rue'ie'areje. Röhu jabesi harihe Iesuro ë Jerusalem hijadeje. Hijamu vëmu vavu'oho dadivëvadeje. ⁴⁴ Dadivëvamu uehorovoromo uvareje: Evaho Iesu nosi a ioro'iorohu'o gemu mae rovajëromo rovaroho majae gemu barëjadeje. Majae gemu barëjamu agano ioro'iohehu örire rovaruire Iesu nahobe jirehojuvo ⁴⁵ gavare Iesu bogojiamu gagorovo öri ahore vuonorö'öromo Jerusalem naho va'areje. ⁴⁶ Nahojuvo jiamëhi va'i gavareje Iesu God-are amo börömore hiromo God-are jö öri röjëhijarue aribövi jabesi jöho hejë'i hu'o mana uë gëvamu. ⁴⁷ Hejareje huro ëhi'ego ae aho'obëhe tiöromo uvoruomamu: Rabu simano ma-mabëhe baejë'ëro jöho mana

bu'öjajëjo. ⁴⁸ Èhi'amu vëmu vavu'ohuro Iesu garomo tiöromo vëmohuro uavadeje: Jue'i ja rabëni nosi öriroho ëhiöho ë'ane höjo. No jasi vavuhumu niö'iro nurunurumë'i nahavobe rovare höjo. ⁴⁹ Rovare höjamu Iesuro uëvadeje: Jemë rabëni na nahevobe rovarije höjo. Jemë rabëni bogo uvariye höjo: Nörö hesi Vavuohuro nimo'ego hesi osare hijajëjo. ⁵⁰ Èhi uëvamu hegorovo vëmu vavu'oho Iesuhu uëvaje jö hesi bëhoho dadivëvadeje.

⁵¹ Dadivëvamu Iesuro vëmu vavu'ohu'o sionëro vuonorö'ö rovadoho jabesi amore Nazareth ë hiromo jabesi jöho ejëhë'e hinövadeje. Hijamu vëmohuro gavade hejade jöho hesi simanore bamoromo uehorovemu uehorovonövadeje. ⁵² Èhi'amu Iesuro simano mae jiobe daje böviræbe va'adeje. God o ae aho'obëhe jaburo hesi örire huë bae avohobe va'areje.

3

Bapataeto vaejaje ae John-hu jö majëhinövade jöhoje.

¹ Iae Tiberius Caesar-hu Rome amore bövie namiromo hesi sa'ae dinö'e dinö'e aevoromo muebejavuadoho vadune aho'obëhe 14 barë'i 15-ho jiadeje. Röhu Pontius Pilate-ro Judea sa'aho muebe'i Herod-ro Galilee sa'aho muebe'i Herod-are murie Philip-ro Iturea sa'ahu'o Trachonitis sa'ahu'o muebejëvo'i Lysanias-ro Abilene sa'aho muebejadeje. ² Annas'o Caiaphas'o jabumë niö'i Jew rajo jabesi priest böröme jëvadeje. Èsa'are a masijo'o priest masijo'o ëhi jio'amade majare evare Zechariah-are harihe John-ro a rumo'e sa'are hijamu God-are jöhuro dëre abuejadeje. ³ Abuejamu hegorovo jöho majëhibe juvoromo Jordan jovonörire öri ari'oho juvo barëjadeje. Juvo barëromo majëhiromo uënövadeje: Uehoro sisëho vuonugo'i uehoro mae baeromo bapataeto vaehego God-ro jemesi sisëho uehorovoromo vuonugëhajo.

⁴ John-hu ëhi ë'iröhe jöho urimë'i jö God-aro baeromo majëhinövade ae Isaiah-ro surire jajivoromo uvadeje:

Aëro a rumo'e sa'are hiromo ma-darugo'o uvo'a'ajëjo:

Badahu rueröhe öroho avohorego hu maro rue'irajo.

Hesi öroho ahorirëro vajivorego hu maro juvo'irajo.

⁵ Guoröte aho'obëhe huo'amo'iramu rojomo'amo'ajëjo.

Dahoru ëgohu'o bunohu'o aho'obëhe aho'amo'iramu ahorire jio va'a'ajëjo.

Tagu tagu'e öroho vajivo'iramu ahorirëro jio'amo'ajëjo.

Abue ajiomë'e öroho avoho'iramu ahorirëro jio va'a'ajëjo.

⁶ Èhi'o'iramu ae aho'obëhe garuomo'ajëjo God-hu baejëvoromo mare bamëvajoho.

⁷ Èhi jajivë'ëro jië'ëro iae John-ro gavade ae aho'obëhe mae huro bapataeto vaejëvojöro rueruomamu gëgorovo uëvadeje: Sigobu aboji har-ihu'e jëvanovajëjo. Jemë raro uëvade höjo: God-are vöröehu rue'iröhire jioromo huruomoromo manö va'irarijoho eni jëvo'ajëjo. Bogajo. ⁸ Ijehu bajo mae raejajëhi ëhi mu mae vaerego no garomo uvo'irarëjo: Iae jemë uehoro sisëho vuonugo'i uehoro mae baejë'e jëvajëjo. Röhu nadi uvorëjo: Abraham nosi bëhohuro jië'ëro ëhu'ëro no mae javuajëjo. Naro jemë uëvajëjo: Jemë Abraham-are ujo ömo'ömo jëvajoho ëho mabise'e höjo. God-ro nimo'ibejajo ave munëho ujuohoromo avohëvego

araeromo Abraham-are ujo ömo'ömo ho jio'amo'ibejajo. Èhuni nadi nimorohë'ioho èhioho atorëjo. ⁹ Röhu tonëro ijoho bëhi'o huo'ö'ië'ajëjo. Di ijohuro bajoho bogo ma raejë'e jiego huo'öromo vëniro huo'ie'ajëjo. ¹⁰ Èhi jië'e jöho majëhi'ego aëro uanövareje: Èhi jië'oho no diehi jië'e muoho vae'ejarëjo. ¹¹ Vae'ejarë'ego John-ro uënövadeje: Ae rahu niöge niö'i jëvë'oho gö baeromo niögu rumo'e aho bojaminëjo. O ie jëvë'oho i rumo'e aho gö bojaminëjo. ¹² Èhi uë'ego tax baejarue aribövioho jabu'o bapataeto vae'i ruenövareje. Rueromo uanövareje: Tisa no diehi jië'e muoho vae'ejarëjo. ¹³ Vae'ejarë'ego John-ro uënövadeje: Tax baejë'iroho sa'are a masijehu uëvaruëhi èmino'e bae'i nadi gö'oho döroho jemesi ëma baerëjo. ¹⁴ Èhi uë'ego muorovo aribövioho jabu'o uanövareje: Jabesi muoho èhi höjo röhu nomë diehi jië'e muoho vae'ejarëjo. Vae'ejarëjamu uëvadeje: Jemëro va'oromo nadi ae gö jabesi monioho baeniëhirëjo o nadi sarerëmiromo uërëjo: Jemë mu sisë vaejë'e jëvaje monie mana bojamuihëjo. Nadi èhi jië'e muoho vaeromo monioho ujuoho'i ma-uvorëjo: No suvuoro baejaruoho iae eni höjo.

¹⁵ Èhi majëhijamu hegorovo ae aho'obëhe dë vövöbajo'ere uvoruomadeje: Nani mu börömëro rovajëjo. O nani John hu God-hu uavë'ëro böröme namiro mo ajamui'iröhe ahuro jöe majahuijajëjo. ¹⁶ Èhi uvoruomamu gagorovo John-ro uëvadeje: Naro jovëremu bapataeto vaejëvaje höjo. Röhu ae gö nasi ijönö rue'ie'ajëjo. Huro na iosiremiromo börömoho höjo. Naehu hesi mu bise'o vaejahoromo hörü sino jio-vaho'ibejodoho o mu bise'o bise'e rabe vaejaho'ibejodoho röhu na mabise'e jevajëjo. Naro ma-jovëremu bapataeto vaejëvaje höjo. Èahuro God-are Aru'ahohuro o vënëro bapataeto vaejëvo'ajëjo. ¹⁷ Hesi ijo garanoho övore höjo. Ijo garanoho övore jië'ëro ioho tevoro mo döro hijiohijiovoromo mevoromo i maho gagovoromo hesi iruno'e osare è avoho bahi'i subueho sinoho ravemu ravaje vëniro huo'a'ajëjo. ¹⁸ Èhi jië'e jöho o jöe gö gö John-ro majëhiromo èhuro jabesi simanoho huotovëho ganövadeje. Èhi'oromo God-are jö maho majëhinövadeje.

John savoji gagore ba'amare jöhoje.

¹⁹ Èhi'amu gagorovo iae è sa'a muebejaje a böröme Herod-ro hesi muri hesi vabore Herodias gohoniahiromo mu sisë gö gö vaejamu gagorovo John-ro ri'öromo birevadeje. ²⁰ Birevamu Herod-ro mu sisë aho'obëhe vaejë'ëro röhu ave mu sisëhu'o vaejadeje. Huro ae uëvamu John guduamo bava'oromo savoji gagore ba'amareje.

John-hu Iesu bapataeto vaejade jöhoje.

²¹ Röhu è hesi urimo John-hu a bapataeto vaejëvade majare huro ae aho'obëhe bapataeto vaejëvonugoromo Iesu'o bapataeto vaejadeje. Bapataeto vaejamu Iesuro God-are örire jöe jövamu gavë'i ö'idöho arorovadeje. ²² Arorovamu God-are Aru'ahohuro sino haho'e jioromo guaho va'ënohuro Iesuaro ruvebijamu gavë'i ae aho'obëhe hejareje ö'idöre uvavamu: Ja nasi Harihu mabëhe javajëjo. Naro ja garomo èhuro nasi dë vövöbajo'oho nimorohevajëjo.

Iesuare hijo miono'o jabesi iho jajivobe va'ade jöhoje.

²³ Röhu Iesuhu mu aevade majaho hu vadune aho'obëhe 30 rabu'e jiadeje. Ae aho'obëhe uvoruomadeje: Iesu hu Joseph-are harihe höjo.

Röhu Joseph hu Heli-are harihe jiadeje. ²⁴ Heli hu Matthat-are harihe jiadeje. Matthat hu Levi-are harihe jiadeje. Levi hu Melchi-are harihe jiadeje. Melchi hu Jannai-are harihe jiadeje. Jannai hu Joseph-are harihe jiadeje. ²⁵ Joseph hu Mattathias-are harihe jiadeje. Mattathias hu Amos-are harihe jiadeje. Amos hu Nahum-are harihe jiadeje. Nahum hu Esli-are harihe jiadeje. Esli hu Naggai-are harihe jiadeje. ²⁶ Naggai hu Maath-are harihe jiadeje. Maath hu Mattathias-are harihe jiadeje. Mattathias hu Semein-are harihe jiadeje. Semein hu Josech-are harihe jiadeje. Josech hu Joda-are harihe jiadeje. ²⁷ Joda hu Joanan-are harihe jiadeje. Joanan hu Rhesa-are harihe jiadeje. Rhesa hu Zerubbabel-are harihe jiadeje. Zerubbabel hu Shealtiel-are harihe jiadeje. Shealtiel hu Neri-are harihe jiadeje. ²⁸ Neri hu Melchi-are harihe jiadeje. Melchi hu Addi-are harihe jiadeje. Addi hu Cosam-are harihe jiadeje. Cosam hu Elmadam-are harihe jiadeje. Elmadam hu Er-are harihe jiadeje. ²⁹ Er hu Joshua-are harihe jiadeje. Joshua hu Eliezer-are harihe jiadeje. Eliezer hu Jorim-are harihe jiadeje. Jorim hu Matthat-are harihe jiadeje. Matthat hu Levi-are harihe jiadeje. ³⁰ Levi hu Simeon-are harihe jiadeje. Simeon hu Judah-are harihe jiadeje. Judah hu Joseph-are harihe jiadeje. Joseph hu Jonam-are harihe jiadeje. Jonam hu Eliakim-are harihe jiadeje. ³¹ Eliakim hu Melea-are harihe jiadeje. Melea hu Menna-are harihe jiadeje. Menna hu Mattatha-are harihe jiadeje. Mattatha hu Nathan-are harihe jiadeje. Nathan hu David-are harihe jiadeje. ³² David hu Jesse-are harihe jiadeje. Jesse hu Obed-are harihe jiadeje. Obed hu Boaz-are harihe jiadeje. Boaz hu Shelah-are harihe jiadeje. Shelah hu Nahshon-are harihe jiadeje. ³³ Nahshon hu Amminadab-are harihe jiadeje. Amminadab hu Admin-are harihe jiadeje. Admin hu Arni-are harihe jiadeje. Arni hu Hezron-are harihe jiadeje. Hezron hu Perez-are harihe jiadeje. Perez hu Judah-are harihe jiadeje. ³⁴ Judah hu Jacob-are harihe jiadeje. Jacob hu Isaac-are harihe jiadeje. Isaac hu Abraham-are harihe jiadeje. Abraham hu Terah-are harihe jiadeje. Terah hu Nahor-are harihe jiadeje. ³⁵ Nahor hu Serug-are harihe jiadeje. Serug hu Reu-are harihe jiadeje. Reu hu Peleg-are harihe jiadeje. Peleg hu Eber-are harihe jiadeje. Eber hu Shelah-are harihe jiadeje. ³⁶ Shelah hu Cainan-are harihe jiadeje. Cainan hu Arphaxad-are harihe jiadeje. Arphaxad hu Shem-are harihe jiadeje. Shem hu Noah-are harihe jiadeje. Noah hu Lamech-are harihe jiadeje. ³⁷ Lamech hu Methuselah-are harihe jiadeje. Methuselah hu Enoch-are harihe jiadeje. Enoch hu Jared-are harihe jiadeje. Jared hu Mahalaleel-are harihe jiadeje. Mahalaleel hu Cainan-are harihe jiadeje. ³⁸ Cainan hu Enos-are harihe jiadeje. Enos hu Seth-are harihe jiadeje. Seth hu Adam-are harihe jiadeje. Adam hu God-are harihe jiadeje.

4

Iesuhu mu sisë vaejōro Satan-hu bijioho gavade jōhoje.

¹ Iae Iesuro hejade God-are Aru'ahohuro hesi dë vövöbajo'ere sino haho'ere rumorovavamu hegorovo Jordan jovoho vunugo'irōgoro God-are Aru'ahuhu uavajire a rumo'e sa'a göre ë va'o juvadeje. ² A rumo'e sa'are juvamu gagorovo Iesuro God-are jōho ahōjōro Satan-ro hesi dēho bijioho gabe va'adoho majae aho'o 40 barējadeje. Bijioho

ga'li hijamu evare majaroho Iesuro ioho bogo ijë'e ma-hibe va'oromo ë majaho barëjamu vadunëro hõmadeje.

³ Vadunëro hõmamu Satan-ro ri'õromo uavadeje: Ja God-are Harihe javë'oho ave munëho uavego iraejajo. ⁴ Iraejajamu ruehuro uavadeje: Röhu God-are jõho jajivoromo ëhi uvë'e hõjo: Aehu iemu uehorovë'oho bogo maho raro'mo'aruëjo.

⁵ Ëhi uavamu Satan-ro Iesu hu'irae ba'o'jomoromo a masijehu dinö'e dinö'e raromoromo muebe'amarue öri ari'oho ëho ma-burëro röjahi barëjadeje. ⁶ Röjahiromo uavadeje: Eëri ari'oho aho'obëhe naro bojami barë'ejõjo jero mueberomo ë bövi bise'o maho ujuoho'iranego. Ehesi bëhoho ë öri ari'oho naro baejë'ëro jevë'ëro ae rahu bojëmi'li negë'oho iae bojëmaje hõjo. ⁷ Ehuni jaehu uvene aho röjehijë'oho aho'obëhe jasi jio'amo'ajëjo. ⁸ Jasi jio'amo'ajëjamu Iesuro uavadeje: Röhu God-are surire jõho ëhi uvë'e hõjo: Bada jasi God gemu rajahiromo hesi muohemu gemu vaejahonëjo.

⁹ Ëhi uavamu Satan-ro Iesu Jerusalem hu'irae baeromo ajiomadoho ruhe God-are osa börömo hesi döre ba'o'jio ë nugamu namijadeje. Namijamu Satan-ro uavadeje: Ja God-are Harihe javë'oho avehuro nami'li jörö'örovëjo. ¹⁰ Ehesi bëhoho God-are surire jõho ëhi uvë'e hõjo: God-ro hesi aneraho uë'iramu ja avoho muebejavo'aruëjo. ¹¹ O hesi surire jö göho ëhi uvë'e hõjo: Aneraho jaburo övore ma'enagonövo'aruëjo jasi hörure munëro bibejavojöëni. Ehuni jörö'örovëjo. ¹² Jörö'örovëjamu uavadeje: Röhu God-are jõho ëhi uvë'e hõjo: Nadi ri'õromo Bada jasi God hesi dëho ëma bijiohoromo uanëjo: God jero ëhi ëhi ë'ëjo. ¹³ Ëhi uavamu Iesuro mue gö gö aho'o vaejõro Satan-ro hesi dëho bijioho ganugoromo vuonugo va'adeje majae eni jiego vuonorö'ö rueröhëro.

Iesuhu Galilee sa'are hiromo aevoromo mu vaejade jõhoje.

¹⁴ Va'amu iae Iesuro God-are Aru'aho hesi darugoho baeromo vuonorö'õromo Galilee sa'are va'adeje. Va'amu huhu rovade jõho ë sa'aho aho'obëhe heruomadeje. ¹⁵ Iesuro Jew rajehu God rajahijarue osare osare jöe röjëhibe juvamu ae aho'obëhe uvoruomadeje: Hu a mae hõjo.

Iesuare ame Nazareth rajehu Iesu bijõnimoruomade jõhoje.

¹⁶ Ehi'amu Iesuro jöe röjëhibe juvoromo urimë'li asisö'o'ere hiromo böviraejade amore Nazareth ë rovadeje. Rueromo nuho majae rovamu amo göre göre va'oromo ë'ajëhi ëhi huro God rajahijarue osare va'adeje. Va'oromo God-are surire jõho adaho'li ri'ö namijadeje. ¹⁷ Namijamu jö God-aro baeromo majëhinövade ae Isaiah-hu jajivade jö'e suroho ae göëro bojämijadeje. Bojamamu Iesuro baeromo jiovö'õromo ave jajivade jõho nahoromo bihoromo adahoromo ¹⁸ uvadeje:

Badare Aru'ahohuro nasi simanore rumorovevajëjo Badaro hesi Aru'ahoho nasirire bamë'ëro jië'ëro.

Huhu bamade hesi bëhoho naro hesi jö maho baeromo bogo eni jië'e aribövioho majëhi'irodego bamade hõjo.

Huro na remö'õjade hõjo naro va'oromo tövëvë'e aribövioho uë'irodego: Jiovo rëmö'õ'irode majaho rovë'e hõjo.

Nuni tugorohëvë'e aribövioho uë'irodego: Nuni dadovëho'irode majaho rovë'e hõjo.

Remö'øjade höjo sisëhu ruahö'øjëvë'e aribövioho naro manö bamëvo'irodego.

¹⁹ Naro ae uë'irodego: Badahu ajëmi'iröhe majaho iae rovë'e höjo.

²⁰ Ejöho adahonugoromo Iesuro suroho huhoho taemoromo osa muebejaje aho sionëro bojamiromo jö bëhoho røjëhi'i sa'aro hijadeje. Hijamu gagorovo ë osare raromare ariböviohuro ae aho'obëhe he'i Iesu gemu ërimahareje. ²¹ Erimahamu uëvadeje: God-are jö adahamu hejarije ë hesi muoho aviavejô'e rovë'e höjo. ²² Iesuro ëhi jië'e jöho jövamu hegorovo ae aho'obëhe uvoruomadeje: Hu jö mae jövajëromomo hesi huë ma jöho heromomo tiöjëvadeje. Tiöjëvamu uvoruomadeje: Eiaho bogo a börömehu jio'i hu Joseph-are harihe höjo. ²³ Ehi uvoruomamu Iesuro uëvadeje: Ave uhu jö atarujoho jemëro ëhi ue'a'arujëjo: Oso muebejanue aho jero jasi ajamirovego mae javajo. Ehesi bëhoho jemëro ueromo ë'arujëjo: Arue Capernaum amore mu vaejane ë hesi jö hejaroho ëhi jië'e muoho ave jasi amoro vaejago no gavarejo. ²⁴ Röhu ave jöho na jö mae uë'ië'ajëjo. Jö God-aro baeromomo majëhijarue aribövioho nosi sa'a rajohuro bogo ma uehorovavuarue höjo. Bogo mae bogajo. ²⁵ Röhu aveho na jö mae uë'ië'ajëjo. Elijah-hu hijade majaroho ave Israel sa'are magonaho dorue aho'obëhe jio'amade höjo. Evare majare ëni bogo mae bogo rovadoho vadune niö'i gemu röhu döre manaere 6 ëhi barëjë'ëro ëhu'ëro sa'ae aho'obëhe majae ëgobövie vadune raromare höjo. Vadune raromamu evare ²⁶ magonaho dorue aho'obëhe ave Israel sa'are raromaroho God-ro Elijah hesi sa'a rajo magonaho doruoho bogo gemu vadu'e ajamijöro jabumënioho nugö'ö'i sa'ae gö Sidon amonörire sa'are Zarephath amore hijade magonaho doruohuni gemu nugö'øjade höjo ajami'iröhëgo. ²⁷ O jö God-aro baeromomo majëhinövade ae Elisha-hu hijade majaroho ave Israel sa'are sino jomo'e ae aho'obëhe jio'amade höjo. Röhu Elisha-ro Israel raromarue jomo'e aribövi bogo ae gemu vadu'e jabesi sinoho avohëho'i Syria rajemu gemu a ihe Naaman hesi sinoho avohahade höjo. ²⁸ Ehi majëhijamu hegorovo ë God rajahijarue osare raromarue ariböviohuro heromomo sisë maro dë vörönimoruomadeje. ²⁹ Dë vörönëgamu ri'öromomo Iesu amore jiamu guduamo baeromomo amo'e dahoru bönure iojioromomo dahoru vösöre suorovareje barado döre riravo'i baba'amo'irovo. ³⁰ Ehi'o'i ë'oruomamu gëgorovo Iesuro jabesi ririre jioromomo rëmö'öromomo va'adeje.

Aru'aho sisë ae gemu hesi dëre jiamu Iesuhu rarovö'øjade jöhoje.

³¹ Va'oromomo Iesuro abuejadoho abo Galilee sa'are Capernaum amore höröjjadeje. Höröromomo Jew rajo jabesi nuho majaho rovamu God rajahijarue osare va'oromomo jöho røjëhijadeje. ³² Jöho røjëhijamu heromomo tiöromomo uvoruomadeje: Hesi jöho darugo'e ma-mabëhe javavajëjo. Ehi uvoruomade hesi bëhoho hesi birire baejë'ëro hu jöho majëhijadeje. ³³ Amo ë osare Satan-are a sisëhu dëre abuejë'e aho hijë'e jiadeje. Hijë'ëro ma-darugo'o uvadeje: ³⁴ Hë-ajo. Iesu Nazareth rajoho ja rabëni sihusihuaguo'i rovane höjo. Na ja ijumavuo'i ë'anuëjo. Na iae ja gavajëjo. Ja God-aro jioromomo rovë'e a ma-maemu jië'e ae javajëjo. ³⁵ Ehi uavamu hejë'i Iesuro uavadeje: Jöho vuonugo'i höröjëjo. Höröjëjamu hejë'i uhure a sisëhuro ë a hesi simanoho

huotovahamu ë aribövi jabesi nunire sa'are behumorovadeje. Sa'are behumorovamu uhure a sisëhuro ë a hesi sino haho'oho bogo ijumaho'i ma-höröromo va'adeje. ³⁶ Höröromo va'amu gagorovo ae aho'obëhe garomo tiöjëvamu uarovareje: Aveho rabu'e jöho höjo. Darugo'e jöho jövego a sisëhuro ma-burëro ejahoromo suorovo va'oruomaje höjo. ³⁷ Èhi'amu Iesuhu vaejaje mu hesi jöho ë sa'aho aho'obëhe he barëjareje.

Iesuhu ae aho'obëhe jabesi sino avohëhade jöhoje.

³⁸ Röhu a sisëho dëre jioromo hörö va'amu Iesuro God rajahijarue osare jioromo va'adeje. Va'oromo Simon-are osare va'adeje. Röhu Simon-are jure magonaho hesi sino haho'oho vörö'irae avohë'e jiadeje. Vörö'iraejamu Iesu uavareje: Na ja magonahoho ajaminëjo. ³⁹ Ajaminëjamu hegorovo Iesuro va'oromo bëhire ruaho'amo namiromo uavadeje: Vörö'iraejanuoho u'uhëjo. U'uhëjamu sino haho'ere vörö'iraejadoho u'uhadeje. U'uhamu hejë'i ri'öromo iruno'e avohëhoromo i'imëmadeje.

⁴⁰ I'imëmamu majae beva'amu gagorovo ae rahu hesi ae guomo guome gö gö jië'oho ujuoho rovamu Iesuro hesi övoho ae aho'obëhe jabesi sinore bamëho'ego marë'amonövadeje. ⁴¹ Marë'amo'ego aru'aho sisë ae aho'obëhe jabesi dëre raromarohuro suorovo va'onövareje. Suorovo va'ië'iroho ma-darugo'o uvonövareje: Ja God-are Harihe javajë'ego heromo uënövadeje: Jöe nugohëjo. Nadi nasi jöho huruohohëjo. Iesuhu ëhi jië'e jö jövade hesi bëhoho ë aru'aho sisëho jaburo garomo uvareje: Hu böröme namiromo ae ajëmaje aho höjo.

Iesuhu Judea sa'are jö majëhibe juvade jöhoje.

⁴² Èhi ë'ë'ëro sisonuvamugo Iesuro ri'öromo va'oromo a rumo'e sa'are ë hijadeje. Hijamu ae aho'obëhe hu nahobe rovareje. Nahobe rueromo gavare ë hijamu gagorovo nijio'iraeromo uavareje: Nadi va'i rueromo no'o hijëjo. ⁴³ No'o hijëjamu hegorovo uëvadeje: Iae mae uevarujëjo röhu God-hu böröme namiromo muebejëvaje jöho ë jöho amo ior'iorohu'o majëhibe va'ejöjo ë hesi bëhoho God-ro ëhuni remö'öjamu rovë'ëro. ⁴⁴ Èhi'onugoromo Judea sa'are God rajahijarue osare osare jöho majëhibe juvadeje.

5

Iesuare ijore ijore jijihoröhego Iesuhu aevoromo a uëvade jöhoje.

¹ Iae Iesuro Gennesaret e'u riröre namijadeje. Namijamu ae aho'obëhe God-are jöho he'i tagavoromo bijimö'örovobe rueruomadeje. ² Rovamu Iesuro namiromo gavadeje boat niö'i e'u riröre raromëvo'i visu suovarue aribövioho rori'o raromoromo viöho u'ovamu. ³ Èhi ganugoromo boat gemu Simon-are boat-re ajio hiromo Simon uavadeje: Ave riröre jioromo biduohö'öjego rori'o va'ajo. Rori'o va'a uanugoromo gavade eni jiamu gagorovo boat-re ëhi hiromo jöho röjëhijamu rue sa'are raromare ariböviohuro heruomadeje.

⁴ Heruomamu Iesuro hesi jöho jöve va'öjuvo barëjamu Simon uavadeje: Ave jasi boat-oho baeromo e'u umahë'inö huo'öbe va'oromo ja'o jasi ariböviohu'o viöho ba'amorëjo ëhuro visue aho'o suovo'irarije

höjo. ⁵ Suovo'irarije höjamu Simon-ro uavadeje: Tisa ëho iae mae höjo röhu no vahi bövie visu suovo'i ë'o gabe rovaroho gavare höjo bogo eni javuamu. Röhu jero uë'ego ëhuni viöho ba'amo'ejöjo. ⁶ Ëhi uanugoromo viöho ba'amoromo visue aho'obëhe suovamu viöho dadorovo'ië'adeje. ⁷ Dadorovo'ia'amu gagorovo Peter-mëro jabesi a ioro'iore boat göre arijaruoho övëro uëvareje: Ro ajamuihëjo. Ro ajamuihëjamu rueho jaburo rueromo ajëmiromomo visue aho'obëhe suovoromo ë boat niö'ire bahijamu irijiomoromo diruvëvo varijëne jiadeje. ⁸ Ëhi'amu gagorovo Simon Peter-ro Iesuare bëhire ague aho hiromomo uavadeje: Bada na remo va'ëjo. Na a sisë jevajëjo. ⁹ Peter-mëro visue aho'obëhe mae suovoruumoromo tiöjëvë'ëro jië'ëro ëhu'ëro ëhi uavadeje. ¹⁰ Peter-më tiöjëvo'i James'o John'o jabu'o tiöjëvadeje. Röhu James'o John'o jabumë Zebedee-are harihe jëvadeje. Jabumë Simon'o gemu mae muoho vaenövareje. Amo tiöjëvamu Iesuro Simon uavadeje: Nadi juhuonivonëjo. Aviavej'ë aevoromo ja bogo visuoho gagovo'i ae magonahe gagovëvo'iramu nasinö jioruomoma'ajëjo. ¹¹ Ëhi jövamugo boat-re rueromo ravo'amoromo boat-oho jagu ömëvo va'o nie'uahore ötöjëvareje. Ötöjëvonugoromo jabesi muoho bövioho bise'oho vuonugo'i aevoromo Iesuare ijore ijore jijihonövareje.

Iesuhu sino jomo'e a ajamade jöhoje.

¹² Iae Iesuro amore hijadeje. Hijamu ae gemu sino haho'e jomemu jië'ohuro rueromo Iesu garomo ague aho hiromomo ëninamiromomo uavadeje: Bada ja nasi sino avoheho'iranoho ja eni javajëjo. Ëhuni jasi nimoromo ajemijë'ohuro iae ajemi'anuejo. ¹³ Ajemi'anuejamu Iesuro övoho nugö'öromomo sinoho rëhahoromo uavadeje: Iae na negajëjo ajami'iro. Marëjëjo. Marëjëjamu gavë'i jomoho rireromomomo hesi sinore sisë sisëho barëjjadeje. ¹⁴ Sisëho barëjamu gagorovo Iesuro uavadeje: Naehu ëhi ë'odoho nadi aho huruoho majëhinëjo. A'i mava'oromomo jasi sinoho priest röjahijego ga'irajo. Ëhi'oromomo Moses-hu uövuade ëhi jië'e suvuoroho God-are öroro bojamego aëro garomomo uvo'irarëjo: Jasi sinore sisëho barëjë'ëro iae mae javajëjo. ¹⁵ Bogo aho huruoho majëhi'iröhego uavadeje röhu ë huhu vaejade mu jöho börömo mae rumorovamu ae gö gö hebe va'oruomadeje. Hebe va'oruomë'ëro ae aho'obëhe rueromomo gagovoruumadeje hesi jöho heruomoma'ihu jabesi sino haho'oho ajëmego marëjëvo'iröhego. ¹⁶ Ro gagovoruumamomo gëgorovo Iesuro a rumo'e sa'are va'o hiromomo God-are örire jöe jövadeje.

Övo höru'e vuovahë'e a Iesuhu ajamade jöhoje.

¹⁷ Ëhi'oromomo iae Iesuro aribövioho jöho röjëhijamu Pharisee ariböviohu'o Jew rajo jögoru öri röjëhijarue ariböviohu'o ëho jaburo hesi bëhire raromoruomadeje. Urimë'i ë aribövioho ioro'iorohuro ë Galilee sa'are amo göre göre jioromomo ioro'iorohuro arue Jerusalem amore Judea sa'are amo ioro'iorore jioromomo rueruumë'ëro ë raromoruomadeje. Raromamu Iesuro jöho röjëhiromomo Badare darugoho baejë'ëro guomo guomo'e a jabesi sino avohëho'iröhoho eni jiadeje. ¹⁸ Sino avohëho'iröhoho eni jiamu iae aëro övo höru'e vuovahë'e aho maratuoroho giojimo barovareje. Barueromomo osanö bava'oromomo Iesuare bëhire bamo'iröhe öroho nahareje. ¹⁹ Öroho nahoromomo gavare ae aho'obëhe tagavoromomo ojanoho urahë'e jiamu

gagorovo ba'ojiomoromo javuoho dönö dadov'öromo maratuohu'o nume osare riravarue aribövi jabesi ririre Iesuare bēhire ē ba'amareje. ²⁰ Ba'amamu gagorovo Iesuro gavade i'e rovare ariböviohuro hu mae uehorovorouomamu gēgorovo övo hörü'e vuovahē'e aho uavadeje: Isiajo. Jasi sisēho uehorovoromo vuonugoromo mu'u barējahē'e hōjo. ²¹ Mu'u barējahē'e hōjamu hegorovo jōgoru öri rōjēhijarue ariböviohu'o Pharisee ariböviohu'o uarovareje: Asē'ējo. Sareri ae hōjo. Huro God sivoromo ēhi jiē'e jōho jōvajējo. Hu ma-ae hōjo. Röhu huro ē aho uavajējo: Naro jasi sisēho uehorovoromo vuonugoromo mu'u barējahē'e jevajējo. Ēhi jiē'e muoho hesi God-ro gemuero vaejaje hōjo. Ma-aho bogajo. ²² Ēhi atamu gagorovo Iesuro uēvadeje: Jemē rabēni uehore gö gö baejarujējo. ²³ Jemē'o uehorovohējo. Nani ja ae ēma ua'a'anuējo: Jasi sisēho uehorovoromo vuonugahē'e hō ua'a'anuējo. Ja ēhi ua'ibejanējo aho nunoho bogo ga'ibekarējo ja mae o sarere jōv'ē'e javego. Röhu ja bogo ēma ua'a'anuējo: Ri'öromo nami juv'ējo hesi guomo guomoho bogo barējago ja javojagōjōeni. ²⁴ Röhu ē bogo ēma jōvo'ibejane jōho iae na jōvo'ejōjo huro ejehoromo ri'ö nami juvego jemēro ē muoho garomo ēhuro ga'irarijago God-are A Maho naro sa'are hijajire evare sisē mu'uvaje darugoho ēhu'o baejē'e jevego. Ēhi uēnugoromo röhu övo hörü'e vuovahē'e aho uavadeje: Naro ja uavajējo: Jero ri'öromo raromanue maratuoho banigojiomoromo baeromo jasirero va'ējo. ²⁵ Va'ējamu hejē'i ruehuro ae aho'obēhe jabesi nunire ri'öromo maratuoho banigojiomoromo baeromo God rajahibe hesirero va'adeje. ²⁶ Va'amu gagorovo ē aribövioho aho'obēhe tiōjevamu juhuonivoromo God rajahiromo uarovareje: Asē'ējo. No bogo gavarue muoho jaruvo gavē'e javuajējo.

Levi-hu Iesuare ijore ijore juvorōhego Iesuhu uavade jōhoje.

²⁷ Ēhi'amu gagorovo Iesuro ri'öromo va'adeje. Va'i gavade tax baejaje ae hesi ihoho Levi hesi mu vaejaje osare hijamu gagorovo uavadeje: Rueromo nasi ijoro ijoro juvonōvonējo. ²⁸ Juvonōvonējamu hegorovo hesi muoho aho'o vuonugo'i ri'öromo aevoromo Iesuare ijore ijore juvonōvadeje.

²⁹ Ēhi'oromo Levi-ro Iesu rajahi'i sörö bōrōme hesi osare bamoromo Iesu'o a ioro'iorohu'o aho'obēhe uēvadeje: Rueromo sörōe ihējo. Ihējamu hegorovo tax baejarue ae aho'obēhe ēhi jiē'e a ioro'iore aho'obēhe ēho jaburo ro gemuoro raromoromo ie ue'ahareje. ³⁰ Ie ue'ahamu gēgorovo Jew rajo jōgoru öri rōjēhijarue Pharisee ariböviohu'o Pharisee aribövi ioro'iorohu'o ēho jaburo dē vōrōnēgamu Iesuare aribövioho uēvareje: Jemē rabēni tax baejarue ariböviohu'o sisē a ioro'iorohu'o gemuoroho ioho jovoho ue'aharujējo. Ēhi jiē'oho sisē hōjo. ³¹ Sisē hōjamu hegorovo Iesuro uhu'e uēvadeje: Röhu guomo guomo'e ariböviohuremu doctor gavarue hōjo mae jēv'ē'e aribövioho bogajo. ³² Ēhesi bēhoho naro sisē aribövioho sisē vaejaruoho vuonugojōro uē'i rovode hōjo ma-dōemu mae jēv'ē'e aribövioho bogajo.

Bēhoho rabēni Iesuare ariböviehu i bogo vuonugare jōhoje.

³³ Iae aēro Iesu uavareje: John-are jō hejarue ariböviohuro majae aho'obēhe God uehorovo'i ioho vuonugoromo hesi örire jōe ato'i arijarue hōjo. O Pharisee jabesi jō hejarue aribövioho jabu'o ēhi

jië'e muoho vae'i arijarue hõjo. Jabumëhu ëhi ë'aruoho iae mae hõjo. Röhu jasi aribövioho ioho bogo vuonugo'i ma-iemu jovemu ue'aharue hõjo. Rabëni ëhioho ë'arue hõjo. ³⁴ Rabëni ëhioho ë'arue hõjamu hegorofo Iesuro uhu'e uëvadeje: I'o masurõhe a hesi sõrõre aemo'aemehu rueromo i i'lië'iroho jemë tugohëvo'irarijoho na eni jëvajëjo o bogajo. Bogajo. ³⁵ Röhu majae ijonõ i'o masurõhe aho aëro guduamo bava'iramu evare majare ioho vuonugo'aruëjo. Avevejõ'oho naro jabu'o hijë'ego jabu ioho bogo vuonugo'aruëjo.

Jew rajehu gororovo'irõhe jõgoru mamiohu'o Iesuhu barovade mu i'ohu'o bogo gemuore havo'irõhe jõhoje.

³⁶ Ëhi uëngoromo Iesuro uhu jõe gö'o majëhiromo uëvadeje: Niõgu i'ohu'o mamiohu'o bogo havo'anuejo. Bogo havoromo dadovadiroho niõgu i'oho baeromo bisemu tariõ'õromo niõgu mami hesi gagoroho bamoromo sigohi'anuejo. Ëhi ë'ibejanëjo niõgu i'oho tariõ'õjëlëro ëhuro sisërë'ibejajo. O niõgu mamioho ëho nu ano'e gö jio'i i'oho nu ano'e gö jioromo ëhuro niõgu mamiohu'o sisërë'ibejajo. ³⁷ O wine jovo mi sino gagore bigu'ië'iroho jovo i'ohu'o mi sino mamiohu'o bogo gemuoroho havoromo jovo i'oho mi sino mamiroho bigu'anuejo. Ëhi ë'ibejanëjo jovohuro gatovoromo õgohuro bibivoromo mi sinoho mamiëro jië'ëro tõgõmoromo ioro'ioremu dadorovego jovoho rova'ibejajo. ³⁸ A'i jovo i'oho mi sino i'o hesi gagoremu bigu'anuejo. ³⁹ Röhu jovo mami ue'ahë'oho aëro uvarue hõjo: Mamioho mae hõromo ëhuni i'oho bijõnimarue hõjo. ËJew rajehu Iesuarue mu i'o bijõnimarue jõho Iesuro uhu'e ëhi majëhijadeje.

6

Jew rajehu nuharue maja hesi jõhoje.

¹ Iae Jew rajo jabesi nuho majaho rovamu gagorovo Iesumëro mure jijihareje. Jijihoromo hesi ijorajo õmo'õmohuro ioho babovoromo õvëro uhiromo ue'ahobe va'oruomadeje. ² Ioho õvëro uhiromo ue'ahobe va'amu gëgorovo Pharisee ariböviëro uëvareje: Jaruvoho nuho majae hõjo. I avoharujoho ëho nuho maja hesi jõgoroho aharujëjo. Rabëni ëhi jië'oho ë'arujëjo. ³ Ë'arujëjamu Iesuro uëvadeje: David nosi a bõrõme jionõvade hõjo. Röhu hu'o hesi ariböviohu'o hõmëvamu hegorofo huhu ë'ade jõ God-are surire adaharijoho ëho diehi'oromo bogo avoho uehorovarujëjo. ⁴ David-ro God-are osare va'oromo God-are nunire bahijare ioho ujuohoromo vituoho i'i vituoho hesi aribövioho i'imëmamu ue'ahare hõjo. Ëhi jië'e ioho aho bogo ue'aho'i hesi ma-priest-ëremu ue'aho'irõhe ie hõjo. Röhu jabuhu ue'aharohuro ëhuro jõgoroho ahare hõjo. Röhu ë hesi jõho bogojiade hõjo. ⁵ Ëhi uëngoromo uëvadeje: God-are A Maho naro nuho maja hesi jõgoroho muebejaje hõjo.

Õvo guomahë'e a Iesuhu ajamade jõhoje.

⁶ Ëhi uëvë'ëro Jew rajo jabesi nuho majae gö'o rovadeje. Nuhu majae gö'o rovamu Iesuro God rajahijarue osare va'oromo hesi jõho røjëhijadeje. Amo ë osare õvo manõrire õvo hitahi guomahë'e aho hijë'e jiadeje. ⁷ Jew rajo jõgoru õri røjëhijarue ariböviohu'o Pharisee ariböviohu'o ëho jaburo Iesuarue jõ sisëho nahoromo uvareje: Iesuhu

guomo guomo'e aribövi jabesi sino avohëhë'oho noro a masijoho huruoho majëhiromo uë'ejarëjo: Iesuro a ajëmaje muoho vaeromo nuho maja hesi jögoroho ahade höjo. Ëhi uvoromo jabumëro ma-hu gemu ërimahareje ga'iro nuho majare hu guomo guomo'e aribövi jabesi sinoho avohëhego o bogo. ⁸ Ërimahamu Iesuro gëromomo uavadeje: Jabumë ëhi ëhi uehorovarüë uvoromo övo guomahë'e aho uavadeje: Ro ave nosi riroro namijëjo. Namijëjamu ro jabesi ririre namijadeje. ⁹ Namijamu hu bijönimoromo ërimaharuoho Iesuro uëvadeje: Na ave jöho uë gë'ië'ajëjo. Nosi nuho maja hesi jögoroho diehi höjo. Nuho majaroho na ae mae vaejëvo'ejarëjo o sisë vaejëvo'ejarëjo. I'ovëvo'ejarëjo o muo'amo'ejarëjo. ¹⁰ Ëhi uëngoromo uherihoromo ë aribövioho aho'obëhe gëngoromo övo guomahë'e aho uavadeje: Jasi övoho nugö'öjëjo. Ëhi uavamumu hegorovo övoho nugö'öjamu marëjadeje. ¹¹ Marëjamu rue ariböviohuro gavare Iesuro ë aho ajami'ego marëjamu gagorovo dë vörönëgo avohadeje. Dë vörönëgamu jöe atoromo uarovareje: No Iesuare öriroho diehi'o'ejarëjo.

Iesuhu hesi apostle 12 baejëvade jöhoje.

¹² Ëhi'o'irögoro Iesuro God-are örire jöe jövo'iro dahorure ajiomadeje. Ajo hiromo vahi bövie God-are örire jöe jövobe va'ojuvo ëhi sisonu-vadeje. ¹³ Sisonuvamu gagorovo hesi ijore ijore jijiharue ariböviohuro ruejoro uëvadeje. Uëvoromo rovamu ae aho'obëhe 12 hesi baejëvadeje. Baejëvoromo uëvadeje: Jemë nasi apostle jëvajëjo. ¹⁴ Iesuro Simon baejadeje. Baeromo iho göho Peter jumuvadeje. O Peter-are öho Andrew baejadeje. O göho James John Philip Bartholomew ¹⁵ Matthew Thomas o James Alphaeus-are harihe o Simon aehu uvaruoho Jew rajehu jabesi mueberovo'i nimaje aho ¹⁶ o Judas James-are harihoho o göho Judas Iscariot ë aribövioho baejëvadeje. Judas Iscariot Iesuni hiruëmiromo a jabesi övore bojëmi'iröhe aho jiajadeje.

Iesuhu a jabesi sino avohëhade jöhoje.

¹⁷ Ëaribövioho baejëvonugoromo Iesuro jabu'o gemu mae abueromo enure ë namijadeje. Namijamu hesi aribövie aho'obëhe mae o a ioro'iorohu'o arue Jerusalem amore jioromo Judea sa'a ioro'iorore jioromo nume Tyre amo Sidon amo jiajinö sö jovo bëhire sa'are jioromo ae aho'obëhe mae ë ro riravareje ¹⁸ Iesuare jöho heruomoli huro ajëmego jabesi sino haho'oho marëjëvo'iröhego. Ro riravamu a sisëhu dëre abuejëvë'ëro i'u baejarue aribövioho Iesuro ajëmamu marëjëvadeje. ¹⁹ Marëjëvamu ae aho'obëhe gavare Iesuare darugohuro rueromo guomo guomo'e ae aho'obëhe ajëmamu gagorovo Iesu rëho'i ë'ö gavareje ëhuro guomo guomoho barëjëvo'iröhego.

Huë mae baeröhe ariböviohu'o huë vavaene baeröhe aribövi jabesi jöhoje.

²⁰ Ëhi'amu Iesuro hesi ijorajo ömo'ömohe gëromomo uëvadeje: Bövi bise'o rumo'e aribövioho jemë huë mae jëvajëjo God-ro muebejëvego hesi aharire mae raromoli'ë'ero. ²¹ Avevejë'e hömëvaje aribövioho jemë huë mae jëvajëjo maja ijönöho eni da'uëgo'lië'ëro.

Avevejö'e nierusuburu'e bamaruje aribövioho jemë huë mae jëvájëjo maja ijönöho nimoroho'ie'ëro.

²² Jemëhu God-are A Maho na uehorovevamu aehu gëromo bijönëgoromo nu huodëgoromo sivëgoromo jemesi ihoho sisë höromo vuonugëhë'oho huë mae jëvaje höjo. ²³ Jabuhu ëhi sisë vaejëvë'iroho jemëro hirohiromoromo nimoroho avohorëjo God-hu suvuoro jemëni ö'idöre bamëhajoho böröme jïë'e jiaje. Ëaribövi jabesi hijo miono'ohuro jö God-aro baeromo majëhinövare aribövi jabesi örire ëhi gemuoho sisë vaejëvonövare höjo.

²⁴ A'i bövi bise'o marohë'e mae jëvë'e aribövioho vaevë'e jëvájëjo. Jemesi bövi bise'o maho ujuoho barëjë'ëro ijönöho bogo ujuoho hesi jëvájëjo.

²⁵ Avevejö'e da'uëgë'e aribövioho vaevë'e jëvájëjo.

Maja viture vadunëro vuovëvo hesi höjo.

Avevejö'e nimoroharuje aribövioho vaevë'e jëvájëjo.

Maja viture huë vavaene baejë'i nierusuburu'e bae hesi jëvájëjo.

²⁶ Ae aho'obëhe jemesi jö ma-mabëhe atë'oho vaevë'e jëvájëjo. Ëaribövi jabesi hijo miono'ohuro God-are jö huotuhuotovoromo majëhinövare aribövi jabesi örire ëhi gemuoho mae atonövare höjo.

Nu huodaguarue aribövi jabesi örire noehu huë baejëvo'iröhe jöhoje.

²⁷ Röhu jemë nasi jö hejaruje ariböviohumë ave jöho majëhi'ie'ajëjo. Jemë'o muorovarue aribövioho huë baejëvorëjo. Jemë nu huodëgarue aribövioho mae vaejëvorëjo. ²⁸ Jö sisë uëvarue aribövioho jö mae uërëjo. Sisë vaejëvarue ariböviohuni God-are öroro ëninamirëjo. ²⁹ Aehu a'isabi gönö anagë'iroho hunuorovego a'isabi gönöhu'o anago'irajo. Aehu niögu gö baeniahijë'oho nadi nijio'iraejego niögu göhu'o bae'irajo. ³⁰ Aehu jasi örire böviëni bise'ëni ëninamijë'oho bojämijëjo. Aehu jasi mae sisë baejahë'oho nadi uanëjo: Sionëro bojëmëjo. ³¹ Jemë ae göehu diehi vaejëvojöro nëgë'oho jemë'o ëhi jïë'e muoho ae gö jabesi öroro vaejëvorëjo.

³² O jemë huë baejëvarue aganohemu huë baejëvë'oho rabëni uvorëjo: God-are nunire mabëhe javuajëjo. Sisë ariböviohuro jabu'o huë baejëvarue aganoho mana huë baejëvarue höjo. ³³ O jemë mae vaejëvarue ariböviohemu mae vaejëvë'oho rabëni uvorëjo: God-are nunire mabëhe javuajëjo. Sisë ariböviohuro jabu'o ëhi gemuoho ë'arue höjo. ³⁴ O uvë'oho: Ëhi gemuoho vuonorö'ö bae'ejöromo ëhuni bövi bise'o ma-jahuri ae gö bojëmijë'oho rabëni uvorëjo: God-are nunire mabëhe javuajëjo. Sisë ariböviohuro jabu'o uvoruomaje höjo: Ëhi gemuoho vuonorö'ö bae'ejöromo ëhuni bövioho bise'oho ma-jahuri ae gö bojëmijarue höjo. ³⁵ A'i jemë nu huodëgarue aribövioho huë baejëvorëjo. Mae vaejëvorëjo. Nadi uvorëjo: Mana bojëmi'aruë uvë'i jemesi bövioho bise'oho ma-bojëmirëjo. Ëhi ë'ë'oho God-ro jemë suvuoro böröme bojëmi'ajëjo. Èhuro God-hu dö mare hijaje a hesi aboji harihu'o mae jëvo'ajëjo. Èhesi bëhoho God-ro gëvaje a sisë jioruomo'i bogo mana mabëhe uavë'e suvuore ëma baejarue aribövie jëvego gëgorovo huro ëma huë baejëvoromo ajëmijaje höjo. Huhu ë'aje ëhi jïë'e mu vaejë'oho jemë hesi aboji harihu'o mae jëvo'ajëjo. ³⁶ Èhuni jemesi Vavuehu jemëni vavaenimajëhi ëhi ae göëni vavaenimorëjo.

Bogo döro bamorovoromo a jabesi sisë mevo'iröhe jöhoje.

³⁷ Nadi döroho bamorovoromo a jabesi sisëho mevorëjo. Jabesi sisë bogo mevä'oho God jemesi sisëhu'o bogo mevo'ajëjo. Nadi a jabesi sisëhunioho i'uoho bojëmirëjo. I'u bogo bojëmi'ë'oho God jemë'o i'uoho bogo bojëmi'ajëjo. A'i ae gö jabesi sisëho uehorovoromo vuonugorëjo. Èhi ë'ë'oho God-ro jemesi sisëhu'o uehorovoromo vuonugo'ajëjo. ³⁸ Ae suvuorëmirëjo. Jemë èhi ë'ë'oho God-ro jemë'o suvuorëmi'ajëjo. Börömo mae suvuorëmiromo jemëro övoho avoho'iramu sörö va'ëne ë bamëho'iramu övo duvahoho rarovoromo oteroho'a'ajëjo. Bogo bise'o vadu'oho suvuorëmi'ajëjo. Jemë dimino'e bojëmi'ohuro ëhuro ë bojëmarije mino'e èhi bae'a'arujëjo. Iesuro èhi jövadeje.

³⁹ Röhu Iesuro röjëhi'iro ave uhu jöho uëvadeje: Nuni sisë'e a göhuro nuni sisë'e a göho diehi öroho röjahibe va'a'ajëjo. Bogajo. Röjahijë'oho jabumë niö'i guare bejëvo va'a'ajëjo. ⁴⁰ Jö hejaruje aribövioho jö röjëhijaje aho na bogo iosiremiromo jö maho bae'a'arujëjo. Jöho he barë'iramu evare jö röjëhijaje aho va'ëne jëvo'ajëjo.

⁴¹ Röhu ja diehi'oromo ijo ugobajo'e biseharihehu isiare nunire namijajoho ga'i ijo börömehu jasi nunire namijavajoho bogo gavanuëjo. ⁴² Ijo börömehu jasi nunire namijavajoho bogo gavë'oho ëhu'oho ja rabëni jasi aemo'aemoho uanëjo: Isi ë'ego na jasi nunire ijo ine namijavajoho jahahöjo. Sareri ae javajëjo. Jasi nunire ijo börömehu tugohavajoho jero urimo jahonëjo. Jahonugoromo evare avoho garomo ijo ino harihoho isiare nuniroho jahaho'anuëjo.

Aho mu vaejajire garomo uvarueje: Hu mae o sisë höjo. Èhesi uhu jöhoje.

⁴³ Ijo maho bajo sisëho bogo rae'i ijo sisëho bajo maho bogo raejaje höjo. ⁴⁴ Ijoho bajoro garomo uvo'a'anuëjo: Èijoho mae höjo ëho sisë höjo. Meso böso uro'ië'iroho mesoremu uro'i bibë'e ijo sisëroho bogo uro'a'anuëjo. Rihu'e grape bajo uro'ië'iroho ë ö'iremu uro'i bibë'e resu sisëroho bogo uro'a'anuëjo. Ijo sisëhuro bajo sisëho rae'amaje höjo. Ijo mahuro bajo maho rae'amaje höjo. ⁴⁵ Èhesi bëhoho a maho ijo maehu bajo mae raejajëhi èhi jëvaje höjo. A maho uehoro maëremu jabesi dë vövöbajo'ere jëvë'ëro mu maemu vaeruomaje höjo. A sisëho uehoro sisëremu jabesi dë vövöbajo'ere jëvë'ëro mu sisëmu vaeruomaje höjo. Aëro diehi jië'e uehorehu jabesi dë vövöbajo'ere irijiomëvajoho jabesi jö'ëro atarue höjo.

Simano ma'e ahu'o simano sisë'e ahu'o javu vaejare uhu jöhoje.

⁴⁶ Jemëro uevaruje höjo: Bada ja no mu bojamuijanue aho javajëjo. Èhi jië'oho jemë rabëni naehu bojëmaje muoho bogo vaejaruje höjo. ⁴⁷ Röhu ae rahu nasi örire rueromo nasi jö heromo ejehajoho èhi jië'e a hesi jöho naro uhu'e majëhi'ejöjo. ⁴⁸ Ae gemuëro javue vae'ië'ade höjo. Javue vae'irögoro ëgobövie umo abuejuvo mun'e sa'aho birohogoro öboho ë ruhoromo javuoho vaejade höjo bibivoröhëgo. Javuoho vae barëromo hijamu jovo börömëro ruomoromo ë javuoho anade höjo. Anamu javuoho mae vaejë'ëro jië'ëro bogo orivo'i ma-bibivoromo namijade höjo. Nasi jö ejehaje aho ë bibivë'e javu vaejade aho va'ëne höjo. ⁴⁹ A'i ae rahu nasi jö heromo bogo ejehajoho èhi jië'e a hesi jöho naro uhu'e majëhi'ejöjo. Ae gemuëro javue vae'ië'ade höjo. Röhu

sa'aho bogo umo abueromo öboho ruho'i ma-sa'a döre vaejade höjo. Vaejè'ero è javuoho jovèro ro anamu dadorovo barè nahonahovade höjo.

7

Rome raje muorovo simano vaejaje a hesi mu vaejaje a guomo'ia'amu Iesuhu ajamade jöhoje.

¹ Iesuro hesi jöho ae aho'obèhe majèhinugoromo va'adoho va'o Capernaum amore hijadeje. ² Röhu Rome raje muorovo simano vaejaje ae gemuèro è hijè'e jiadeje. Hu bogo Jew rajehu jio'i sa'a gö raje jiadeje. Hesi muemu vaejahaje ahuro hu'o hijadeje. Hijamu rue simano vaejaje ahuro è iaho mae uehorovo avohadeje. Mae uehorovo avohamu rue aho guomo guomo böröme baejè'ero guomo'ie'adeje. ³ Guomo'ia'amu gagorovo rue simano vaejaje ahuro Iesuhu a ajëmaje jöho hegoro Jew rajo a duvaho ioro'ioroho uèvadeje: Va'oromo Iesu uarego rueromo nasi mu vaejahaje a hesi sinoho avohahego marè'irajo. ⁴ Èhi uèvamu hegorovo va'areje. Va'oromo Iesu èninamiromo uavareje: Èaho ajaminèjo. Hu a maego jaehu ajamijè'oho iae mae höjo. ⁵ Hu sa'a gö raje höjo röhu huro ave sa'a rajoho no uehorovavuaje höjo. Uehorovavujèro jiè'ero huro ajamuiromo ae uèvade höjo noehu God rajahijarue osaho vaejahuoröhego.

⁶ Èhi uavamu Iesuro ri'öromo jabu'o va'adeje. Va'oromo è simano vaejaje a hesi osa bëhire rovamu gavè'i rue simano vaejaje ahuro hesi aho uèvadeje: Va'oromo Iesu bihororomo uarèjo: Badajo. Nadi nasiroho rueromo u'uoho baejèjo. Na ae ma-bise'e jevoromo sisè jevè'e jaehu nasi osare rovè'oho bogo maehu höjo. ⁷ Èhuni na uehorovoromo uvode höjo: Na ö'irodoho röhu na bogo maehu jevajèjo. Èhuni nadi rue'i ma-jö'ero jöe jövego nasi mu vaejahaje aho marè'irajo. ⁸ Ma-jö jövego mu rovaje hesi öroho iae na gavè'e jevajèjo. Èhesi bëhoho na nasi a masijo jabesi aharire jevè'ero jabesi jöho ejèhoromo muoho vae'i muorovo aribövioho nasi aharire jèvè'ero nasi jöho ejèhoromo muoho vaejarue höjo. Naehu muorovo ae gö uavè'oho: Va'è uavè'iroho iae hu va'aje höjo. O muorovo ae gö uavè'oho: Rovè uavè'iroho iae hu rovaje höjo. O nasi mu ajemaje a uavè'oho: Mue èhi èhi vaejehè uavè'iroho iae hu èhi vaejaje höjo. Èhu'ero jö jövego mu rovaje hesi bëhoho iae na gavè'e jevajèjo. Èhuni uavajèjo: Ma-jö'ero jöe jövego marè'irajo. Èjöho baeromo Iesu majahirego he'irajo. ⁹ He'irajamu simano vaejaje a hesi ariböviohuro è jöho bava'oromo Iesu majahijareje. Majahijamu Iesuro heromo tiöjadeje. Tiöromo huotorovoromo hu rihiomare aribövioho uèvadeje: Hu mabèhe uehorovevade höjo. Èhi jiè'e aho na bogo birohè'e jevajèjo. Nosi Israel rajoho jabu'o bogo èhioho mae uehorovevaruèjo. Iae na mae jövajèjo. ¹⁰ Èhi uèvamu hegorovo rue ariböviohuro vuonorö'ö rueromo simano vaejaje a hesi osare ro gavareje hesi mu vaejahaje aho mami'e marèjè'e jiamu.

Magonaho doru hesi harihu guomo raromamu Iesuhu ajamamu i'ovade jöhoje.

¹¹ Èhi'o'irögoro iae Iesuro Nain amore va'i va'adeje. Va'amu Iesuare ijorajo ömo'ömohu'o a ioro'iorohu'o ae aho'obèhe mae hu'o

va'oruomadeje. ¹² Va'oromo amo rejo ojo bëhire hörö'ia'amu suorovo'ia'amu evare aëro guomë'e a hesi sinoho amore jioromo guavo'i giojimo baeromo rovareje. Röhu vaevë'oho guomë'e aho magonaho doru hesi harihu gemu'oho jiadeje. Amo raje ae aho'obëhe ë magonahohu'o rueruomadeje. ¹³ Rueruomamu Badaro magonahoho ganugoromo huni vavaenimamu uavadeje: Nadi nivonëjo. ¹⁴ Nadi nivonëromo rueromo sino bamare maratuoho rëhadeje. Rëhamu giojimo barovare ariböviohuro ëhi riravareje. Riravamu gagorovo Iesuro a juvijoho uavadeje: Jue'iajo. Naro ja uavajëjo: Guomanoho ri'öjëjo. ¹⁵ Ri'öjëjamu döro ri'ö hiromo aevoromo jöe jövadeje. Jöe jövamu gagorovo Iesuro harihoho vëmu hesi övore bamadeje. ¹⁶ Ëhi'amu gavë'i ae aho'obëhe juhuonivoromo God rajahiromo uvoruomadeje: Asë'e jö God-aro baeromo majahuijaje a börömohuro nosi örire rovë'e hö uvoromo God-ro hesi aribövi nosi jöëni vavaenimë'e hö uvoruomadeje. ¹⁷ Ëhi'amu gagorovo ae aho'obëhe Judea sa'ahu'o sa'a ioro'iore bëhirohu'o Iesure jöho ëhi vaerovemu vaerovobe va'areje.

Bapataeto vaejaje ae John-hu ae rëmö'öjamu rueromo Iesu jö ua gavare jöhoje.

¹⁸ Iesuhu ëhi jië'e mu vaejade jöho John-are ijore ijore jijiharue ariböviohuro John majahijareje. ¹⁹ Ëhi majahijamu hegorovo John-ro hesi aribövioho niö'iro ruejöro uëvamu rovareje. Rovamu uëvadeje: Va'oromo Iesu ua garëjo: No uvaruëjo: God-ro ae nugö'ö'iramu nosi örire rue'a'ajëjo. Na ja ë aho javajëjo. O na no muebe'ëjarëjo ae göëro rueröhego. ²⁰ Ëhi uëvamu hegorovo va'oromo Iesu uavareje: John bapataeto vaejavuaje ahuro uövuamu rovare höjo. Huro uövuade höjo: Iesu uarëjo: No uvaruëjo: God-ro a böröme nugö'ö'iramu nosi örire rue'a'ajëjo. Na ja ë aho javajëjo. O na no muebe'ëjarëjo ae göëro rueröhego. ²¹ Ëhi uavamu hegoro evare Iesuro guomo guome gö gö juhuonini'oho aho'o aru'aho sisë'oho aho'o avoho'amadeje. Nuni tugorohë'e aribövioho aho'o jabesi nunoho dadovëhadeje. ²² Ëhi'oromo John-are ae niö'ioho uëvadeje: Va'oromo diehi gavarijoho hejarijoho John majahirego he'irajo. Uarëjo: Nöröro ae nuni sisë'oho ajëmijego mae uheriharue höjo. Hörü sisë'oho ajëmijego mae jijiharue höjo. Jomo'e aho ajëmijego marëjëvoromo jabesirire sisë sisëho barëjëhaje höjo. Hia'i sisë'oho ajëmijego hia'e dadovoromo jöe hejarue höjo. Vuovë'e aho ajëmijego i'ovarue höjo. Bogo eni jië'e aribövioho ajëmiromo majëhijego God-are jö maho hejarue höjo. Va'oromo John ëhi majahirëjo. ²³ Röhu John o ae rahu biririvoromo nasi örire mae uehorovevë'oho ë ahuro maho hi'a'ajëjo.

²⁴ Maho hi'a'ajëjamu John-are ae niö'iohuro vuonorö'öromo va'areje. Va'amu gavë'i Iesuro ë hesi bëhire gagovare aribövioho John-are jöho majëhiromo uëvadeje: Urimë'ioho jemë rabe ga'irögoro John-hu a rumo'e sa'are hijajiroho ëho va'onövarije höjo. Ijo rudu burehu huosihego arue anume va'aje ëhi uehorovaje aho na John ëhi jië'e ae jiamu jemë ga'i va'arije höjo. Bogajo. ²⁵ O diehi jië'e ae ga'i va'arije höjo. Na niögu mabëhe sanu'e io'amë'e ae jiego ga'i va'arije höjo. Röhu ëhi jië'e niögu ma io'amoromo bövi bise'oh marohë'e ma baeromo raromarue aribövioho bogo a rumo'e sa'aroho raromö'i a masijehu raromarue osaremu raromarue höjo. ²⁶ Röhu diehi jië'e ae ga'i va'arije

höjo. Na John jö God-aro baeromo majëhijaje ae jiamu ga'i va'arije höjo. Io'ajo. John iae hu ëhi jië'e ae höjo. Röhu aveho hehëjo. Jö God-aro baeromo majëhinövare a ioro'ioroho iosirëmiromo John hu börömoho höjo. ²⁷ Iae ë a hesi jöho God-are surire jajivoromo ëhi uvë'e höjo:

Ave aho God nasi jö bajuvaaje aho höjo.

Ja va'ië'iroho naro hu urimo nugö'ö'iramu va'oromo ae uë'a'ajëjo jaehu va'irane öroho iogorahoröhego.

Ëhi jajivë'e höjo. ²⁸ Ave jöho na jö mae uë'ië'ajëjo. Ave sa'are raromarue aho ae gemu vadu'oho John bogo iosiramiroho börömoho jië'e höjo. A'i God-hu böröme namiromo muebejëvego hesi aharire raromarue a inino mahuro John iosiramiroho döroho jioruomajëjo.

²⁹ Iesuro ëhi majëhijamu tax baejarue ariböviohu'o a ioro'iorohu'o aho'obëhe ë jöho heromo uvoruomadeje: God hu mae höjo. Rabëni John-hu bapataeto vaeröhe jöho jaburo ejahë'ëro. ³⁰ A'i Pharisee ömo'ömohu'o Jew rajo jögoru öri röjëhijarue a ömo'ömohu'o ë jöho heromo jabuhu ë'ojöro God-hu nimaje muoho juahovareje rabëni John-hu bapataeto vaeröhe jöho jaburo bijönimë'ëro.

³¹ Röhu Iesuro hesi jö vituoho majëhiromo uëvadeje: Ave jaruvore raromaruje aribövi jemesi jöho uhu'e majëhi'ië'ajëjo. ³² Amo ririre raromoromo jö bijönimoruomaje asisö'oho jëvanovajëjo. Amo ririre raromoromo asisö'oho ioro'iorohuro ioro'ioroho uvëvoruomajëjo: Noehu aninivoromo jemëni virikö huosihëharoho jemëro bijönimoromo bogo ejahuoromo javavarije höjo. Noehu aninivoromo huë vavaeni'e jö iaroho jemëro bijönimoromo bogo ejahuoromo nierusuburu'e bamar-ije höjo. ³³ Ëhesi bëhoho bapataeto vaejavuaje ae John-ro rueromo God uehorovoromo ma-hi'i ioho wine jovoho bogo inövade höjo. Ëhi'onövadoho jemëro ë jö bijönimarue asisö'oho va'ëne bijönëgamu John-are jöho bogo ejaho'i sisë'i uehorovoromo uvonövarije höjo: Aru'aho sisë dëre jië'ëro ëhu'ëro ioho jovoho bogo ijaje höjo. ³⁴ O God-are A Maho naro rueromo ioho jovoho ma-ijaje höjo. Ëhi ë'ajoho jemëro ëhu'o bijönimoromo uvaruje höjo: Nörö gahëjo. Ioho mahunö'e iromo vörö'e jovemu ijaje höjo. Hu vajiohu'e tax baejarue ahu'o a sisë ioro'iorohu'o ëho jabesi aemo'aeme höjo. ³⁵ Jemëro John-are muohu'o nasi muohu'o bijönimaruje höjo röhu no God-are uehoro maho baejë'ëro muoho vaejarue höjo. Ëmu nimarue aribövioho aho'o jaburo garomo uvoruomo'ajëjo: God-are uehoroho iae mae höjo. Ëhu'ëro muoho vaejare höjo.

Iesuhu Pharisee ae gemu Simon-are osare hiromo ë'ade jöhoje.

³⁶ Ëhi'amu Pharisee ae gemuëro Iesu uavadeje: Nasi osaro rovego no ie ijarëjo. Ie ijarëjamu ë a hesi osare va'oromo ie i'i sa'aro hijadeje. ³⁷ Röhu sisë magonahe gemuëro ë amore hijadeje. Hiromo hejade uvavamu: Iesuro Pharisee a hesi osare hiromo ie ijajë uvavamu hegorovo ridi'e ose munë huono mabëhiromo baeromo rovadeje. ³⁸ Barueromo Iesuare dejonö höru bëhire hiromo nivoromo hesi nuni jovohuro Iesuare hörure aho'amodivamu buejahoromo simano uohuro uhijahoromo höroho dudöhahoromo ridi'e jovohuro otehahadeje.

³⁹ Ëhi'amu gagorovo ë Pharisee ae Iesu uvavamu rueromo i ijaje ahuro uehorovoromo uvadeje: Ave aho jö God-aro baeromo majahuijaje ae

jio'ibejajo hu ga'ibejajo magonahehu ma'enajoho rahuo jio'i o diehi jië'e mue vaebe juvaje magonahe jiego ahego ehuro mae jio'ibejajo. Ehesi bëhoho hu magonaho sisë hõjo. Röhu Iesuhu ë magonaho bogo avoho gavajoho ehuro hu bogo jö God-aro baeromo majahuijaje aehu hõjo. ⁴⁰ Ehi uehorovamu gagorovo Iesuro Simon ë Pharisee a hesi ihoho Simon uavadeje: Simon na jö harihe majahi'ie'ajëjo. Majahi'ie'ajëjamu Simon-ro uavadeje: Tisa iae mae hõjo. Majehego hejõjo. ⁴¹ Hejõjamu Iesuro uhu'e uavadeje: Iae ae niö'iehu ae gemu hesi õrre moni mana sionehu bojami'iröhoho jëvade hõjo. Göhuro 500 kina göhuro 50 kina ë a hesi õrre bojami'iröhoho jiade hõjo. ⁴² Röhu bogo eni jëvade hõjo. Bogo eni jëvamu gagorovo moni bae'irõhe ahuro ë ae niö'iehu moni bojami'iröhoho uehorovoromo vuonugëhade hõjo. Ehi jië'o'ho ë ae niö'ioho di ahuro ë moni bae'irõhe a hesi õriroho börõme rajahi'i di ahuro ma-bisemu rajahi'ajëjo. ⁴³ Rajahi'ajëjamu Simon-ro uavadeje: Na uehorovoromo uvajëjo: Moni börõme bojami'irõhe ahuro ë moni bae'irõhe aho börõme rajahi'ajëjo ë hesi bëhoho huro moni börõmo mae uehorovoromo vuonugahë'ego. Rajahi'ajëjamu Iesuro uavadeje: Ja mae uevanuëjo.

⁴⁴ Ehi uaromo huotorovoromo magonahoho gavë'i Simon uavadeje: Ave magonahoho gavëjo. Naro jasi osare rovode hõjo röhu ja bogo rajehiromo jovoho bojemiJane hõjo nasi hõroho u'o'jõro. A'i ave magonahohuro rajehiromo hesi nuni jovohuro nasi hõrure aho'amodegamu ehuro u'ovehade hõjo. U'ovehoromo hesi simano uohuro uhijehade hõjo. ⁴⁵ Ja bogo rajehiromo dudõhevë'e javajëjo. A'i ë magonahohuro naehu jasirire rovodevare evare aevoromo rajehiromo nasi hõroho dudõhobe rovë'e hõjo. ⁴⁶ Ja bogo rajehiromo ninugu'e jovoho nasi simanoroho oteheho'i ë magonahohuro rajehi avohoromo ridi'e jovo mabëhohuro nasi hõrure otehehade hõjo. ⁴⁷ Ehuni uavajëjo: Eëmagonahohuro na rajehi avohë'ëro ehuhëro hesi sisë aho'obëhe jiadoho uehorovoromo vuonugë'e hõjo. A'i sisë ma-bisemu uehorovoromo vuonugëhë'o'ho ehi jië'e aribövioho ma-bisemu rajehi'aruëjo. ⁴⁸ Ehi uanugoromo magonahoho uavadeje: Jasi sisëho uehorovoromo vuonugahë'e hõjo. ⁴⁹ Vuonugahë'e hõjamu Iesu'o raromoromo i ue'aharue ariböviohuro jabesi uehorovoromo uvareje: Eäho hu diehi jië'e aëro jië'ëro huro God-are muoho baeromo ae magonahe jabesi sisëho uehorovoromo vuonugëhaje hõjo. Hu ehi jië'e muohu'o vaejaje hõjo. ⁵⁰ Ehi uvamu Iesuro magonahoho uavadeje: Jero nasi õrre mae uehorovevamu God-ro ja baejavoromo maro ramë'e hõjo. Vaevë'e va'onëjo.

8

Magonaho göehu göehu Iesu'o gemu mae jijihoromo Iesu ajaminövare jõhoje.

¹ Ehi ë'ë'ëro Iesuro va'adeje. Va'oromo God-hu börõme namiromo muebejavuaje jö maho baeromo ae majëhibe amo masijore ininore ë va'adeje. Röhu hesi ijoraje 12-ho jabu'o ² magonaho õmo'õmohu'o ehi Iesu'o gemu mae va'areje. Eëmagonahoho ioro'ioroho urimo aru'aho sisëhu dëre abuejëvo'i ioro'ioroho guomo guomo baejëvadoho Iesuro ajëmijamu marëjëvadeje. Eëmagonaho jabesi ihoho göho Mary aehu

uvaruoho Mary Magdalene jiadeje. Iesuro ë magonaho hesi dëre jio'amaje aru'aho sisë 7 raro'v'omadeje. ³ O magonaho gö hesi ihoho Joanna jiadeje. Joanna hu Chuza-are vabore jiadeje. Chuza hu a böröme Herod-are bövi bise'o muebejahaje ae jiadeje. Röhu magonaho gö hesi ihoho Susanna jiadeje. Ëmagonaho ömo'ömohu'o magonaho ioro'iorohu'o aho'obëhe jaburo jabesi bövi bise'o jëvadohuro ëhuro Iesumë rabe rabe bogo eni jëvajokho ajëmibe va'onövareje.

Aehu i ujo sa'a mare sa'a sisëre riremado uhu jöhoje.

⁴ Ëhi'amu iae ae aho'obëhe amo göre göre jioromo gagovamu sa'aho rarovadeje. Rarovamu gagorovo Iesuro uhu'e majëhiromomo uëvadeje:

⁵ Iae ae gemuëro hesi i uje ujuohoromo mure riremomi va'ade höjo. Riremobe va'amu ujo ioro'ioroho örire rireromade höjo. Rireromamu gagorovo aëro taemotaemovamu ugëro ro i barëjare höjo. ⁶ Ujo ioro'ioroho munë uhunö jië'e sa'are rireromade höjo. Rireromonugoromo rijamu sahori'amade höjo sa'aho jovo rumo'ëro jië'ëro. ⁷ Ujo ioro'ioroho bibë'e resu'e sa'are rireromade höjo. Rireromë'ëro ujo ma hesi gemuoro riromo baba'amade höjo. ⁸ Ujo ioro'ioroho sa'a mare rireromade höjo. Rireromoromo riromo maho aho'obëhe 100 100 ëhi rae'amade höjo. Uhu'e ëhi uënuhoromo ma-darugo'o uëvadeje: Ae rahu ja God-are jö hejanue ae javë'o'ho bëhoho nahoromo birohonëjo.

Iesuhu rabëni uhu'e majëhinövade ë hesi jöhoje.

⁹ Ëhi'amu Iesure ijorajo ömo'ömohuro uhu jö hesi bëhoho he'i ua gavareje. ¹⁰ Ua gavamu Iesuro uëvadeje: God-ro böröme namiromomo aho'obëhe muebejaje jöho urimoho subivëhade höjo. Ësubivëhade jöho huro hesi suvure jemë bojëmijë'e höjo jemëremu he'irarijago. Ëhu'ëro jemëro jö bëhoho he'i a'i a ioro'ioro jabesi öriroho ma-uhu jöemu rovaje höjo ëhuro nunëremu ga'i bëhoho bogo avoho ga'i hia'ëremu he'i bëhoho bogo avoho heruomoröhego.

I ujo sa'are riremado uhu jö Iesuhu huruoho majëhijade jöhoje.

¹¹ Röhu ë uhu jö hesi bëhoho aviëhi höjo. I ujo hesi bëhoho God-are jöe höjo. ¹² Ujehu örire rireromamu ugehu i barëjare jö hesi bëhoho aehu God-are jö hejamu gavë'o'ho Satan-ro rueromomo jöho baeniëhiromomo rori'o bu'öjaje höjo ëhuro jabumë bogo ma uehorovoromomo maroho va'oruomoröhego. ¹³ O i ujehu munë uhunö jië'e sa'are rireromoromo riromo sahori'amade jö hesi bëhoho aëro God-are jöho heromomo nimorohoromomo jöho ejaharue höjo. Ejahoromomo jöho ma-döëremu baejë'ëro majae ma-bunemu mae uehorovoromomo Satan-ro dinëmege evare vuonugarue höjo. ¹⁴ Ujehu bibë'e resu resu gemuore rireromade jö hesi bëhoho aëro God-are jöho hejarue höjo. Heromomo röhu jabesi muohuni nurunurumomomo monie bövie bise'e uehorovoromomo ave sa'a hesirohemu nimoronimorohoromomo ëhi jië'e muohemu uehorovaruohuro God-are jö jabesi dëre jiajoko taemego jabumë bogo rae avoharue höjo. ¹⁵ Ujehu sa'a mare rireromade hesi bëhoho aëro jabesi dë vövöbajo'oho maëro jië'ëro God-are jöho heromomo ejahoromomo ma'eno titimoromomo biririvobe va'o ijönö rae avohoruomaje höjo.

Iro bueromomo va'orahore bahjarue uhu jöhoje.

¹⁶ Rõhu iro buno'iraejè'iroho bogo hevö gagoroho o maratu ahariroho gurihi'i ma-va'orahoro bamo'anuëjo ae osare rovè'o ho ajivëvorõhego. ¹⁷ Nasi jö bëhoho rabe rabe gurihiro jiajoho aho'obèhe ma-va'orahoro jio'a'ajëjo. O rabe rabe subivëhajoho aho'obèhe ma-samaro jio'a'ajëjo.

¹⁸ Èhuni naehu jövaje jöho avo'avoho herëjo. Aji'e jö javè'o ho God-ro gö'o bojami'iramu bae'a'anuëjo. O bogojavè'o ho ma-döëremu baejanoho God-ro è uehoroho mu'uvaho'ajëjo.

Iesuare vëmu ömo'öme o ö ömo'öme rahumë jëvaje jöhoje.

¹⁹ Èhi uëvamu iae Iesuare vëmohu'o ö ömo'ömo'u jaburo rovareje. Rueromo gavareje ae aho'obèhe tagavoromo öroho rarovè'ero hu jiajiroho bogo rue varijënoho jëvamu. ²⁰ Bogo rue varijënoho jëvamu gagorovo aëro Iesu uavareje: Jasi vëmohu'o ö ömo'ömo'u ja gal'i nimoromo amonö riravaruëjo. ²¹ Riravaruëjamu Iesuro è aribövioho uhu'e uëvadeje: Iae hejajëjo. Rõhu ae magonahe rahu God-are jö heromo ejahè'o ho èhuro è aribövioho nasi vëme ö ömo'öme jioruo-majëjo.

Iesuhu uavamu jovo börömehu ruhosöjade jöhoje.

²² Èhi è'è'ero iae Iesuro hesi ijorajoho jabu'o gemu mae boat-re ajo hijadeje. Hiromo uëvadeje: Ruehego no e'u ioni gönö va'arëjo. Va'arëromo ri'öromo va'areje. ²³ Ri'öromo va'aroho va'oromo Iesuro niavadeje. Niavamu gavè'i buru börömëro e'ure rovadeje. Bure rovamu jovëro hasaromo boat gagore abueromo irijiomoromo diruvëvo'ië'adeje. ²⁴ Diruvëvo'ia'amu gavè'i Iesuare ijo-rajoho jaburo va'o Iesu ioromo uavareje: Asè'e Tisa vuovavuo'ië'ajëjo. Vuovavuo'ië'ajëjamu ri'öromo burohu'o hasajaje jovohu'o uëvadeje: Vuonugohëjo. Vuonugohëjamu buru rovdoho barè'i jovoho u'uhadeje. ²⁵ U'uhamu gagorovo Iesuro hesi aribövioho uëvadeje: Jemë rabëni bogo ma uehorovevarujëjo. Èhi'amu rueho jaburo tiöromo juhuonivoromo uarovareje: Ave aho diehi jiè'e ae höjo. Huhu uëvè'o ho bogo aëremuoho ejaho'i burohu'o jovohu'o jabu'o hesi jöho ejaharue höjo.

Satan-are a sisë aho'obèhe ae gemu hesirire jioruomamu Iesuhu rarovö'ö'amade jöhoje.

²⁶ Èhi'amu Iesumëro e'u döre va'adoho va'o Gergesa sa'are va'o baboro bejareje. Galilee sa'aho nume e'u ioni gönö jio'i Gergesa sa'aho ruhe ioni gönö jiadeje. ²⁷ Gergesa sa'are va'o baboro bejamu gagorovo amo raje ae gemuëro rueromo Iesu birohadeje. Èaho aru'aho sisë aho'obèhëro dëre abue'amamu simane huotorovè'e jiadeje. Niögu rumo'e ma-dè'ahobatëremu majae ègobövie hibe rovè'e jiadeje. Os-aro ho bogo hi'i guavo'amarue munë gagoremu hinövadeje. ²⁸ Hijè'ero rueromo Iesu garomo jö'e dadovoromo Iesuare höru bëhire ague aho hiromo ma-darugo'o uvadeje: Iesu ja God dö mare hijaje a hesi Harihe javajëjo. Ja rabëni sihusihuego'i rovane höjo. Vuonugevëjo. Nadi huë sisëho vi'ehoho bojemëjo. ²⁹ Vi'ehoho nadi bojemiëj uvade hesi bëhoho urimë'i aru'aho sisëhuro höröjoro Iesuro uavè'ego èhuni uvadeje. Rõhu urimoho è aru'aho sisëhuro hu baenövadeje. Bae'ego aëro hu avoho mueberomo hesi övoho höroho tövaho'amonövareje. Tövaho'amo'ego ö'o ho tarivo ruruhö'öromo aru'aho sisëhuro hesi uhure jiè'ero ua'ego a rumo'e sa'are va'onövadeje. ³⁰ Èhi è'onövè'ero Iesuro uavadeje: Jasi

ihoho rahuo hōjo. Rahuo hōjamu uavadeje: Nasi ihoho Siriehu Bimuvanovē'oho jevajējo. Huhu ēhi uavade hesi bēhoho a sisē aho'obēhe siri va'ēne hesi dēre abue'amē'ero jiē'ero ēhi uavadeje. ³¹ Ēhi'amu ē dē uhure sisē aribōviahuro Iesu ēninamiromo uaruomadeje: Nadi uōnego no sisēroho revo'irarējo.

³² Rōhu mahe aho'obēhe aruhēre dahoru ahore gemuoro ie ue'ahamu gagorovo dēre sisē aribōviahuro Iesu uaruomadeje: Uōvuego no suorovo va'oromo aruhe mahu jabesi dēre va'o abuejarējo. Abuejarējamu uēvadeje: Ēhuro va'ohējo. ³³ Ēhuro va'ohē uēvamu hejē'i rue sisē aribōviahuro ē a hesi dēre jioromo suorovo va'oromo ruhe mahu jabesi dēre abueruomadeje. Abueruomamu ē mahohuro va'o baradore rireromoromo e'ure siō ruruhō'ō va'oromo jove ue'ahoromo vuovadeje.

³⁴ Vuovamu gavē'i mahu muebe'amarue aribōviahuro huruomoromo amo bōrōmore amo ininore jōho majēhibe va'areje. ³⁵ Jōho majēhijamu hejē'i ae aho'obēhe rueruomadeje ga'iro diehi jiego. Iesuaro rueromo gavareje aru'aho sisēhu dēre jioromo suorovo va'oruomade aho simanoho mae jio'ego niōge ba'amē'e Iesuare hōru bēhire hijamu. Ēhi gagorovo juhuonivoruomadeje. ³⁶ Juhuonivamu Iesuhu mu vaejamu gavare aribōviahuro uēvareje: Sisē aribōviehu dēre abue'amade aho Iesuro ēhi ajami'ego marēhijajo. ³⁷ Marēhijajamu Gergesa sa'a rajoho jaburo heromo sisē maro juhuonivē'ero Iesu uavareje: Nosi sa'aho vuonugo'i va'ējo. Vuonugo'i va'ējamu Iesuro boat-re ajiomoromo sionēro vuonorō'ō va'iē'adeje. ³⁸ Va'ia'amu aru'aho sisēhu dēre jioromo suorovo va'oruomade ahuro Iesu uavadeje: Na ō'o ja'o hi'i negajējo. Negajējamu Iesuro nijio'iraeromo sionēro nugō'oromo ³⁹ uavadeje: Bogo rue'a'anuējo. Sionēro jasi amoro va'oromo uēnējo: God-ro ēhi mabēhe ajemijamu rovode hōjo. Ēhi uavamu rue ahuro va'oromo amo bōrōmoho jōe majēhibe juvo barējadeje. Majēhiromo uēvadeje: Iesuro ēhi mabēhe ajemijamu rovode hōjo.

Iesuhu magonahe niō'i Jairus-are abojohu'o magonahe gö'o ajēmade jōhoje.

⁴⁰ Ēhi'amu Iesuro boat-re vuonorō'ō rueromo ve e'u ioni gōnō rovadeje. Rovamu ae aho'obēhe hu muebejē'ero gavare rovamu gagorovo nīmorohoromo rajahiruomadeje. ⁴¹⁻⁴² Rajahiruomamu iae ae gemu hesi ihe Jairus-ro rovadeje. Jairus hu God rajahijarue osa muebejaje ae jiadeje. Rōhu hu aboje ihevae gemu jiadeje. Abojoho vadune aho'obēhe 12 rabu'e jiadeje. Amo guomo'iē'adeje. Guomo'ia'amu gagorovo Jairus-ro rueromo Iesuare hōru bēhire ague aho hiromo dinamiro mo uavadeje: Nasi osaro rueromo nasi abojoho ajamējo. Ajamijējamu hegorovo Iesuro hu'o va'adeje. Va'amu ae aho'obēhe hu'o gemuore ēhi tatijiomobe va'areje.

⁴³ Tatijiomobe va'amu gagorovo iae magonahe gemuēro jabu'o va'adeje. Ēmagonahoho manaero garorovade guomo guomoho bogo barē'i ēhi jiemu jiobe va'adoho vadune aho'o 12 barējē'e jiadeje. [Hesi ijo baje doctor jabesi ōrire bu'ō barējadeje.] Rōhu ajami'irōhoho bogo eni jēvē'ero ēhi jiemu jiadeje. ⁴⁴ Ēhi jiemu jiē'ero ē magonahohuro Iesuare dejonō rovadeje. Rueromo niōgu vītuoho rēhamu gavē'i kō

rovadoho ijoho bogo rovadeje. ⁴⁵ Ijoho bogo rovamu Iesuro ae uévadeje: Ja rahuaro réhevane höjo. Réhevane höjumu hegoro vo ae aho'obêhe uavareje: No bogo réhavê'e javuajêjo. Réhavê'e javuajêrom Peter-ro uavadeje: Tisa ja rabêni êhioho uövuanuêjo. Ae aho'obêhe jasi bêhire jijihoromo tatijiomavaruêjo. ⁴⁶ Tatijiomavaruêjumu uévadeje: Iae aëro réhevade höjo. Na hejajoho nasi darugoho ae ajêmi'i gö va'ê'e jiavajêjo. ⁴⁷ Va'ê'e jiavajêjumu ê magonahohuro garomo uvadeje: Naehu Iesu niögure réhodoho bogo subivo varijênoho jevajê uvoromo juhuonivadeje. Juhuonivoromo butubutumobe rueromo Iesuarê hôru bêhire ague aho hijadeje. Ague aho hiromomo ae aho'obêhe jabesi nunire Iesu uavadeje: Na êhi marêjevojôro negamu êhuni réhavode höjo. Réhavamu êhuro ma-burêro marêjevade höjo. ⁴⁸ Êhi uavamu hegoro vo Iesuro uavadeje: Abojêjo. Jero na mae uehorovevamu êhuro marêjavê'e höjo. Vaevê'e va'onêjo.

⁴⁹ Iesuro êhi uavamu gavê'i ae göëro Jairus-are osare jioromo rueromo uavadeje: Jasi abojoho mami'e guomê'e höjo. Êhuni mino'e tisaho u'uoho bojamêjo. ⁵⁰ Mino'e u'uoho bojamêjumu Iesuro mu'ôjahiromomo Jairus uavadeje: Nadi juhuonivo'i mae uehorovonêjo. Êhi jiê'ohuro jasi abojoho i'ovo'ajêjo. ⁵¹ I'ovo'ajê uanugoromo Iesuro Jairus-are osare va'oromo Peter John James magonaho harihu hesi vëmu vavu'oho êho jaburo hu'o va'ojôro uê'i a ioro'ioroho nijio'iraejêvadeje. ⁵² Nijio'iraejêvonugoromo osare va'oromo gavade ae aho'obêhe magonaho hesi jôëni nierusuburu'e bamoromo jabesi muo'amorovamu gëgorovo Iesuro uévadeje: Nadi nierusuburu'e bamohêjo. Êmagonaho harihoho bogo guomo'i ma-niavajêjo. ⁵³ Maniavajêjumu hegoro vo ruêho jaburo garomo uvareje: Magonahoho iae mae guomê'e hôromomo Iesu sivoromo ijo'ijahareje. ⁵⁴ Ijo'ijahamu Iesuro va'oromo magonaho hesi övore ma'enoromo ma-darugo'ovadeje: Bësu ri'ôjêjo. ⁵⁵ Ri'ôjêjumu magonaho hesi aru'ahohuro vuonorô'ö rovamu hejê'i ma-burêro ri'ôjadeje. Ri'ôjumu gagorovo Iesuro uévadeje: Ie bojamego ijajo. ⁵⁶ Êhi'amu vëmu vavu'oho tiôjêvadeje. Tiôjêvamu Iesuro uévadeje: Naehu vaejode muoho nadi aho uêrêjo.

9

Iesuarê ijoraje 12 jabuhu va'oromo mu vaerôhego Iesuhu rêmô'ôjade jôhoje.

¹ Iae Iesuro hesi ijoraje 12-ho uévadeje: Ro gemuoro gagovohêjo. Gagovohêromomo rovamu uévadeje: Jemêhu mu vae'irarijohuni nasi darugoho bojêmijajêjo êhuro jemêro Satan-are a sisê a dêre jio'amê'ohorarovô'ô'amoromo guomo guomo'e aribövioho ajêminôvo'irarijêjo. ² Êjôho darugoho bojêmijê'e jevaje êhuni va'oromo God-hu bôrôme namiromomo muebejêvaje jôho majêhibe guomo guomo'e aribövioho ajêmime jijihorêjo. ³ Êhi uëromomo uévadeje: Va'iê'iroho bövioho bise'ohoroadi ujuohorêjo. Ha'itohomo esôho iruno'ohoroadi ijo bajohoroadi ujuohorêjo. Niögohoroadi göho ujuoho'i ma-gemu ruohoromomo jijihorêjo. ⁴ Amogôre göre va'oromomo aehu di osare raromojôro uévamu va'oromomê'ohoroadi êhuremu raromomomo va'onôvorêjo. ⁵ O di amore ariböviohu jemesisôre nu huodêgê'ohoroadi amoho nugo va'irôgoroadi jabesi sa'a hesi tohotohe

jemesi hörü hitahire jiajoho sa'aro riremō va'ego ē amo rajohuro garomo uvo'irarējo: No sisē ē'ē'e javuajējo. ⁶ Ēhi majēhijamu hegorovo Iesuare ijorajoho jaburo ri'ōromo va'areje. Va'oromo jō maho majēhibe guomo guomo'e aribōvi jabesi sinoho ajēmibe ame aho'o jijihareje.

Herod-hu Iesuare jō heromo dadivade jōhoje.

⁷ Iae Galilee sa'are a bōrōme Herod-ro hejade uvoruomamu: Iesumēro ēhi jiē'e mu masije vae'amē'e hō uvavamu hegorovo Iesuare jōho uehorovoromo uvadeje: Diehi'oromo ē'ajējo. Ēhesi bēhoho hu hejadeje a ioro'iorohuro uvoruomamu: Iesu hu John bapataeto vaenōvade ahuro guomoromo ri'ōjē'e hōjo. Ēhu'ēro ēhi jiē'e muoho vae'amaje hōjo. ⁸ O a ioro'iorohuro uvoruomamu: Iesu hu mami'e hijade ae Elijah-ro rovē'ēro ē'ajējo. O a ioro'iorohuro uvoruomamu: Mami gō'e jō God-aro baeromo majēhinōvare aribōvioho rōhu gemuēro i'ovoromo ri'ōjē'ēro ē'ajējo. ⁹ Ae gōēro gōēro jōe gō gō ēhi atavamu hegoro Herod-ro dadivamu uvadeje: Nani ē aho bogo John-hu hōjo. Mami'e na John-are sōnōho tarijahode hōjo. Rōhu ē mu masijo vae'ego aehu garomo ato'ego na hejajoho ē iaho rahuo hōjo. Ēhi uvoromo Iesu ga'i nimadeje.

Iesuhu ae aho'obēhe 5,000 da'uojēhade jōhoje.

¹⁰ Ēhi'amu apostle ōmo'ōmohuro vuonorō'ō rueromo Iesu uavareje: No ēhi ēhi ē'oromo rovere hōjo. Rovare hōjamu Iesuro sōjēvoromo Bethsaida amore jabesi sivue raromo'i va'areje. ¹¹ Bethsaida jabesi sivue raromo'i va'i va'amu ae aho'obēhe ē jōho heromo rueromadeje. Rueromo bihoruomamu gēgorovo Iesuro uēvadeje: Iae mae rovē'e jēvajē uēnugoromo God-hu bōrōme namiromo muebejavuaje jōho majēhiromo guomo guomo'e aribōvioho ajēmijadeje.

¹² Ēhi'ojuvo majae garobo'e bamamugo hesi ijoraje 12-ho jaburo rueromo uavareje: Aveho a rumo'e sa'ae hōjo. Ēhuni ave aribōvioho rēmō'ōjego ave bēhire amo masijore amo ininore va'oromo ie nahoromo ue'ahoromo momorō'ō'irarējo. ¹³ Momorō'ō'irarējamu uēvadeje: Bogajo. Jemēro iruno'o'ho da'uojēhirējo. Da'uojēhirējamu uavareje: Iae mae hōjo rōhu no ie ōvo gō mine visue niō'i ēhemu javuo'i gō bogojavuajējo. O na ja uōromo ē'anuējo noro va'oromo ave aribōviohuni ie imo'amōjōro. Ae aho'obēhe jiē'ēro no bogo eni javuajējo. ¹⁴ Ēhi uavare hesi bēhoho ama'e aho'obēhe 5,000 rabu'e ē raromē'ego ēhuni uavareje. Ēhi uavamu Iesuro hesi ijorajo ōmo'ōmoho uēvadeje: Uēvego 50 50 rabu'e hahagu hahagu gagovoromo ēhi raromobe va'arējo. ¹⁵ Raromobe va'arējamu rue ijorajoho jaburo uēvamu ae aho'obēhe ēhi raromobe va'oruomadeje. ¹⁶ Ēhi raromobe va'amu gagorovo ie ōvo gō mine visue niō'i ujuoho rovaroho ēho Iesuro ujuohoromo ō'idōho sioroho garomo God huē mae uavadeje. Huē mae uanugoromo ioho ato'atovoromo hesi ijorajo ōmo'ōmoho i'imēmijamu suvuorēmijareje. ¹⁷ Suvuorēmijamu ae aho'obēhe ue'ahamu da'uēgadeje. Da'uēgamu gagorovo ijorajoho jaburo vitu vituoho gagovoromo esōe aho'obēhe 12 aego'amareje.

Iesu hu ēhi jiē'e ae jiaje jōho Peter-hu jōvade jōhoje.

18 Ëhi'amu Iesuro huro hesi sivue parie vaejumu evare hesi ijorajoho jaburo hu'o raromareje. Raromamu gagorovo uêvadeje: Na rahuo jevaje jôho ae aho'obêhe diehi atoruumaje hôjo. 19 Diehi atoruumaje hôjamu uavareje: A ioro'iorohuro uvoruomaje hôjo: Ja John bapataeto vaejavuonövane ahuro rov'e javajêjo. A ioro'iorohuro uvoruomaje hôjo: Ja Elijah-ro rov'e javajêjo. A ioro'iorohuro uvoruomaje hôjo: Mami gö'e jô God-aro baeromo majëhinövarije aribövioho rôhu jero gemuëro i'ovoromo rov'e javajêjo. 20 Ëhi uavamu Iesuro uêvadeje: Rôhu jemë nasi jôho diehi ataruje hôjo. Diehi ataruje hôjamu Peter-ro ri'öromo uavadeje: Ja God-hu uavê'ëro bôröme namiromo ajamuijanue aho javajêjo.

Iesuhu huë vavaeni baeromo guomoröhe jô jövadohoje.

21 Javajêjamu Iesuro jôho darugo'o majëhiromo uêvadeje: Ëjôho nadi aho huruoho majëhirêjo. 22 Ëhi uëngoromo uêvadeje: God-ro ëhi bamê'ëro ëhu'ëro hesi A Maho naro vi'ehe huë vavaene bövie bise'e bae'ejôjo. Jew rajo a duvaho ömo'ömoho priest masijoho Jew rajo jögoru öri rôjêhijarue aribövioho ëho jaburo na bijönegoruomo'ajêjo. Bijönegoruomo'iramu aëro anego'iramu guomevo'ajêjo. Guomoromo majae niö'i gemu hesi uhure i'ovoromo ri'ö'ejôjo.

23 Iesuro hesi ijorajoho ëhi majëhinugoromo ae aho'obêhe uêvadeje: Ae rahuaro nasi ijore ijore juvo'i nimê'oho jasi sinehu nimajoho nadi uehorovo'i vae majae uvonêjo: Iesuare jöëni vi'ehe huë vavaene javoje rabe baeromo guomevê'oho iae hesi hô uvoromo korosi hesi i'uoho banigojiomanovoromo nasi ijoro ijoro juvonövonêjo. 24 Ja jasi sino-huni uehorovoromo birivoromo ave sa'are hi'i ëhemu uehorovê'oho ijönöho guomo öriro va'a'anuejo. O ja nasi jöëni guomê'oho ijönöho maro hi'a'anuejo. 25 Jaehu are jove sa'ae mae sisë aho'obêhe bae barê'i rôhu arijo'arije ijumorovê'oho o sisërörovê'oho na ja ëhuro mae javo'ajêjo. Bogajo. 26 Ëhesi bëhoho ae rahu nasi jöëni o naehu majëhijaje jô hesi jöhuni javojëgê'oho u'emu God-are A Maho naro nasi ajohu'o nasi Vavu hesi ajohu'o anera maemu jië'e jabesi ajohu'o rue'iramu evare nani javojimoruomade ariböviohuni javojego'ajêjo. 27 Rôhu ave jôho na jô mae uê'iê'ajêjo. Jemë a ioro'iore ave riravarujoho bogo vuovê'e raromoromo God-hu bôröme namiromo muebejaje ajoho ga'a'arujêjo.

Iesuare nu ano'ehu ajivoromo gorosovade jôhoje.

28 Ëhi uëngoromo hurae gemu barêjamu Iesuro Peter John James ëhi söromo God-are örire jöe jövo'i dahorure ajiomadeje. 29 Ajiomoromo God-are örire jöe jövamu Iesuare nu ano'oho gorosovoromo ma-mabêhe jio'i hesi niögoho majaehu bamajëhi ëhi ajivo avohadeje. 30-31 Ajivo avohamu gavê'i iae urimê'i arinövare ae niö'i Moses'o Elijah'o mamajioho aji mare rirarovoromo jabu'o Iesu'o jöe atareje. Atoromo God-hu nimaje mu Iesuhu vaeromo Jerusalem guomoröhe jôho atareje. 32 Atoruomamu Peter-mëro nunêhëgamu momorö'ö uro'amareje. Momorö'ö uro'amê'ëro ri'ö'i gavareje Iesu ajj'ere nami'ego ë ae niö'ioho jabu'o ë rirarovamu. 33 Rirarovoromo Moses'o Elijah'o Iesu nugo va'ia'amu gavê'i Peter-ro Iesu uavadeje: Tisa no ave raromaruoho iae mae hôjo. Uövuego no javu harihe niö'i gemu vae'amarêjo jani gemu Moses-ni gemu Elijah-ni gemu. Peter-ro bëhoho bogo avoho

uehorovë'e ë jöho ëma jövadeje. ³⁴ Jövamu gavë'i suëro rueromo aegëhadeje. Aegëhamu Peter-mëro gavare Iesu Moses Elijah suëro numëvamu gagorovo juhuonivareje. ³⁵ Juhuonivë'i hejareje sue uhure uvavamu: Ave aho nasi Harihe naehu baejode aho höjo. Huhu jövaje jöho avoho herëjo. ³⁶ Ëhi uvavamu hejë'i gavareje Iesu hesi sivue namijamu. Ëhi gavë'ëro Peter-mëro rabe rabe gavaroho subivëhoromo aho bogo majëhijareje u'emu majëhi'iröhëro.

Iesuhu Satan-are a sisë aharihu hesi dëre jiamu rarovö'öjade jöhoje.

³⁷ Ëhi ë'ë'ëro sisonuvamu gagorovo Iesu o hesi ae niö'i gemu dahorure abuejareje. Abuejamu gavë'i ae aho'obëhe rueromo Iesu bihororomadadeje. ³⁸ Ae aho'obëhe ro bihororomo röhu ae gemuëro ma-darugo'o uvadeje: Tisa huë baejevoromo nasi harihoho ro gavëjo. Na aboji harihu'e bogojevo'i avehuremu gemu jevajëjo. ³⁹ Röhu Satan-are a sisëro hesi dëre abueromo ijumahego aharihoho simane sisërëromo ma-majioho jö'e dadovoromo bijöbijövoromo övo'o höru'o ajiomoromo jö'onö obohu tatogo'e rovaje höjo. Obohu tatogo'e rovego a sisëhuro bogo burëroho hörö va'i sino haho'oho ijumahojuvo u'uhego evare höröromo va'aje höjo. ⁴⁰ Ëhi ë'i hijë'ego naro jasi ijorajo ömo'ömo uëvode höjo: Aru'aho sisëho rarovö'öhego va'ajo. Ëhi uëvamu rarovö'ö'i ë'o gavaroho bogo eni jëvade höjo. ⁴¹ Bogo eni jëvade höjamu Iesuro uëvadeje: Asë'e ave jaruvore raromarujë aribövioho jemë bogo ma uehorovo'i jöe gö gö ëma uehorovarujë aribövie jëvajëjo. Na majae dimino'e jemë'oho hiromo jemesi mu sisëho garomo ma-nunëro ga taemobe va'ejöjo. Jemesi uehoro sisëhuro na u'uvevajëjo. Jasi harihoho avehuro barovego na gavöjo. ⁴² Gavöjamu ë harihoho rovamu gavë'i Satan-are a sisë dëre hijadohuro dë vövöbajö'oho ijumahamu simane sisërëromo sa'are darugo'o behumorovoromo bijöbijövoromo övo'o höru'o ajiomadeje. Övo'o höru'o ajiomamu gagorovo Iesuro aru'aho sisëho rarovö'öjamu marëjadeje. Marëjamu Iesuro aharihoho baeromo vavuoho sionëro bojamijadeje. ⁴³ Bojamamu ae aho'obëhe God-are darugo börömo ho garomo jöe barëjëvadeje.

Iesuhu guomoröhe jö röhu mahö majëhijade jöhoje.

Ae aho'obëhe Iesure mu masijoho aho'o uehorovoromo jöe barëjëvamu gavë'i Iesuro hesi ijorajo ömo'ömo ho majëhiromo uëvadeje: ⁴⁴ Ave jöhuremu avoho hehëjo. God-ro ëhi bamë'ëro hesi A Maho na a jabesi övore va'iramu baejevoruoma'ajëjo. ⁴⁵ Ëhi uëvamu hejareje röhu jö bëhoho dadivëvadeje. Subivëhë'ëro bëhoho bogo gavareje. O ua ga'iröhoho juhuonivareje.

Di aehu a ioro'ioro iosirëmiromo böröme jiaje jöhoje.

⁴⁶ Ëhi'onugoromo ë ijorajoho jaburo jö aho'ahamirovoromo uarovareje: Iesure ijorajo ömo'ömo ho di aho börömo ho javuajëjo. ⁴⁷ Börömo ho javuajëjamu Iesuro jabesi uehoroho garomo aharihe gemu baro hesi bëhire nugamu namijadeje. ⁴⁸ Namijamu hesi ijorajo ömo'ömo ho uëvadeje: Ae rahu raviëhi jië'e aharihoho nasi ihore rajahiro mo baejë'oho ëhuro na'o rajehiro mo baejevoruomaje höjo. O ae rahu na rajehiro mo baejevë'oho ëhuro remö'öjamu rovode ahu'o

rajahiruomaje hōjo. Ĕhesi bēhoho jemesirire di aho bise'ο jiajoho God-hu gavajoho ēhi jiē'e aho bōrōmoho hōjo.

Ae rahu jemē'ο bogo iro muorovo'e vaejē'οho jemē'ο gemuore jiaje a hesi jō Iesuhu jōvadohoje.

⁴⁹ Ĕhi uēvamu John-ro ri'ōromo uavadeje: Tisa no gavare hōjo ae gemuēro jasi ihoho uvoromo aru'aho sisē a jabesi dēroho rarovō'ōjēvamu. Rarovō'ōjēvamu garomo rōhu gavare hu bogo no'ο juvaje aho jiamu gagorovo uavare hōjo: Vuonugējo. ⁵⁰ Vuonugējamu Iesuro uavadeje: Nadi ēhi jiē'οho ē'orējo. Ae rahu jemesi ōrīre bogo bijōnimē'οho ē aribōvioho jemesi aemo'aeme jioruomajējo.

Iesuhu Samaria sa'are amore ro hi'ia'amu amo rajehu hesi ōri ahare jōhoje.

⁵¹ God-hu Iesu uavego ō'idōre ajiomo'irōhe majaho dunovamu gagorovo Iesuro uehore gemu baeromo uvadeje: Iae na Jerusalem ajiomo'iē'ajējo. ⁵² Ĕhi uvoromo ae rēmō'ōromo uēvadeje: Jemēro urimo va'irarijoho Samaria sa'are amo gōhuro va'oromo amo rajoho uēnējo: Nōrō ō'a'ajējo. Ō'a'ajējamu hegoro rueho jaburo va'oromo amore suorovareje bōvie bise'e Iesuni avohahorōhēro. ⁵³ Suorovamu ē amore aribōviohuro uvoruomadeje: Jerusalem amoho sisē jiē'e Iesuro ē amore va'i rovajēromo ēhuni Iesuhu jabesi amore hi'irōhoho ahoruomadeje. ⁵⁴ Ahoruomamu gagorovo Iesure ijoraje James'ο John'ο jaburo Iesu uavareje: Tisajo. Na ja nagajējo noro uavego vēnēro ō'idōre jioromo ruvebiromo ē amo rajoho ravēvojōro. ⁵⁵ Ĕhi uavamu hegorovo Iesuro huotorovoromo James'ο John'ο uēvadeje: Bogave ēhioho uvo'irarijējo. ⁵⁶ Ĕhi uēnugoromo ame gōro va'areje.

A ioro'iorehu Iesure ijore ijore jijihō'ia'amu Iesuhu majēhijade jōhoje.

⁵⁷ Ōrīre va'oruomoromo ae gemuēro Iesu uavadeje: Ja dinō'e dinō'e va'ē'iroho na jasi ijore ijore juvonōvo'ejōjo. ⁵⁸ Juvonōvo'ejōjamu Iesuro uavadeje: Jero nasi ijore ijore juvo'i uevanuējo rōhu je'ο majehu sa'a gagore rōho avohoromo mare raromaruoho iae jiajējo. Je'ο ugehu iju vaeromo mare raromaruoho iae jiajējo. A'i God-are A Ma naehu niavaje hijaje osaho bogojevajējo. Nadi uvonējo: Nōrō'ο hibe juvē'οho mae hibe juvo'ejōromo nasiriroho ruenējo. ⁵⁹ Ĕhi ē'ē'ēro Iesuro ae gō uavadeje: Rueromo nasi ijoro ijoro juvējo. Juvējamu ruehuro uavadeje: Iae mae hōjo rōhu uevego na nimo vuonorō'ō va'oromo nasi vavuoho guavoromo hujeji evare jasi ijore ijoro juvo'irōjo. ⁶⁰ Juvo'irōjamu Iesuro uavadeje: O-ajo. Vuonugego vuovo ōrīre jijiharue aribōviohuro jabesi aribōvioho guavo'amo'irarējo. A'i jero va'oromo God-hu bōrōme namiromo muebejēvaje jōho majēhibe juvonōvonējo. ⁶¹ Ĕhi uavamu ae gōēro Iesu uavadeje: Bada iae na jasi ijore ijore juvonōvo'ejōjo. Rōhu uevego na urimo va'oromo nasi aganho jejēmiromo rueromo evare jasi ijore ijoro juvo'irōjo. ⁶² Juvo'irōjamu Iesuro uhu'e uavadeje: Rōhu aehu aevoromo mu ravoromo vuonorō'ō uherihobe ravobe va'ē'οho hu muoho bogo avo'avoho ravaje hōjo. Ĕhesi bēhoho ja uehoro niō'i baejē'οho ēhuro God-are aji'e ōri ari'ο hesi mu vae'iranoho bogo eni javo'ajējo.

10

Ae aho'obêhe 72 jabuhu va'oromo mu vaejôro Iesuhu rêmô'ô'irôgoro jô majêhijade jôhoje.

¹ Èhi è'è'ëro Badaro ae gö aho'obêhe 72 baejêvoromo rêmô'ôromo uêvadeje: Naehu juvo'irode è amoro amoro êhuro jemëro ae niô'i niô'i urimo va'orêjo. ² Èhi uênugoromo uhu'e uêvadeje: Ae aho'obêhe nasinô sô rue'irôhoho êho mure iruno'e gagovo'irôhoho va'êne hôjo. Mure gagovo'irôhe iruno'oho bövi mae jio'i gagovarue aribövioho no magemu gemu javuajêjo. Èhuni mu Arijo'oho ênamiromu uarego huro ae gö'o rêmô'ôjêgo mure rueromo ajamuiromu iruno'oho gagovo'irarêjo. ³ Jemëro va'orêjo. Röhu gavê'iajo. Naro rêmô'ôjêgo jemë vaevê'e sheep harihunô'e vörô'e miehu jioruomajire va'iê'arujêjo. ⁴ Monioho esôho hôru sinoho nadi ujuoho va'orêjo. Öriroho nadi ae gö gö jabesi öriroho jejëmibe va'oromo örisanuoho è'orêjo. ⁵ Jemë ae gö jabesi osare va'iê'iroho urimo jejëmiromu uênövorêjo: Ave osare aribövioho huë mae baerêjo. ⁶ Huë mae baerë'iramu God-are huë ma bae'i nimaje aho è osare hijê'oho iae huë mae bae'a'ajêjo. O God-are huë ma baeröhoho bijönimoruumê'oho uêrêjo: God-are huë ma jô uêvodoho vuonugajêjo. Èhu'ëro bogo bae'a'arujêjo. ⁷ Nadi osa göroho göroho momorô'öbe va'i ma-osae gemuoro raromoromo ie jove rabe i'imëmijê'oho êho ue'ahorêjo. Jemêhu jabesi iruno'o o jovo ue'ahê'oho iae mae hôjo rabëni jemë jabesi mue vae'iê'ëro. Èhesi bêhoho ae rahu mu vaeromo mana baejê'oho iae mae hôjo. ⁸ Jemë di amore va'o suorovamu jabuhu huë baejêvamu gavê'ohuro ie rabe rabe i'imëmê'oho êho ue'ahorêjo. ⁹ Guomo guomo'e aribövie è amore raromê'oho ajëmirejo. Amo rajoho jôe majêhiromu uêrêjo: Avevejô'oho God-ro böröme namiromu jemë muebejêvo'ie'ajêjo. ¹⁰ O jemë di amore va'o suorovamu jabuhu jemë bijönégê'oho amoho nugo va'irôgoro amoro jijihoromo jôe majêhiromu uêrêjo: ¹¹ Noro jemesi bövioho bise'oho riremî'öromo jemesi amore sa'a hesi tohotohehu nosi hörure aegadoho no va'i êhu'o riremî va'ëjarêjo êhuro jemë garomo uvo'irarijêgo: No sisê aribövie javuajêjo. Röhu ave jôhu'o avo'avoho uehorovohêre. God-ro böröme namiromu aevoromo jemë mabêhe muebejêvo'ie'oromo vuonugê'e hore. Ame gö gö jemesi jô bijönimê'oho èhi majêhinövorêjo. ¹² Naro jemë uêvajêjo: God-hu i'u bojëmi'irôhe maja rovê'iroho Sodom amo rajo jabuhu i'u baeröhoho êho ma-jianovo'i a'i jemesi jô bogo eruomaje aribövioho jaburo i'u börömo maho baeruomo'ajêjo.

Ame göehu göehu Iesu bogo ma uehorovare jô Iesuhu jövadohoje.

¹³ Chorazin'o Bethsaida'o amo rajohumê vaevê'oho sisëro revo hesi jêvajêjo. Naro darugo'e muoho jemesi amore vaejêgo garomo röhu nasi jôho bijönimaruje hôjo. Naehu darugo'e mu jemesi amore vaejedoho Tyre amore o Sidon amore vaejêgo ga'ibejarêjo mami'e jabesi sisëni huë vavaene baeromo niögu sisê io'amoromo uonëro buerovoromo raromoromo uehoro sisêho vuonugo'i uehoro mae baeruomo'ibejajo. ¹⁴ God-hu i'u bojëmi'irôhe maja rovê'iroho Tyre o Sidon rajo jabuhu i'u baeröhoho ma-jianovo'i jemëro i'u börömo maho bae'a'arujêjo. ¹⁵ Röhu Capernaum amo rajohumê jemëro jemesi sivue uehorovoromo

uvaruje hōjo: Nosi ihoho ò'idōre ajiomo'ajējo. Bogo ēhioho jio'i sa'aro be'a'ajējo.

¹⁶ Rōhu nasi aribōviahumē ae rahu jemesi jō ejēhē'oho nasi jōhu'o ejeharue hōjo. O ae rahu jemē juahēmijē'oho na'o juahemijarue hōjo. Ae rahu na juahemijē'oho remō'ōjamu rovode ahu'o juahamijarue hōjo. Hesi ae 72-ho ēhi uēnugoromo rēmō'ōjamu va'areje.

Ae aho'obēhe 72 jabuhu Iesuare mu vaenugoromo vuonorō'ō rovere jōhoje.

¹⁷ Va'ē'ēro ē ae aho'obēhe 72-ho jaburo nimorohē'i vuonorō'ō rueromo Iesu uavareje: Bada mue aho'obēhe mabēhe vaebe jiji'hē'ēro rovaruējo. No jasi ihore uēvamu Satan-are sisē aribōviahuro ejahuoromo suorovo va'oruomade hōjo. Ēhi jiē'e muoho ēhu'o gavē'e javuajējo. ¹⁸ Gavē'e javuajējamu Iesuro uēvadeje: Satan-are aribōviehu jemē ejēhare hesi bēhoho naro gavode hōjo Satan-are vōrōe barēromo baderehu baderivajēhi Satan ēhi ò'idōre jioromo berovamu. ¹⁹ Iae nasi mu vae'irarije darugoho bojēmijē'ēro ēhuro jemēro vōrō'e sigobohu'o niani'ōhu'o hōrēro taemo'amoromo Satan-are vōrōho aho'obēhe ruahō'ō'amo'arujējo. Ēhi ē'iramu bōvioho bise'oho jemē bogo ijumēvo'ajējo. ²⁰ Iae ēhi hōjo. Rōhu Satan-are aribōviehu jemesi jō ejēharuoho ma-jianovē'e jiaje nadi uehorovo'i a'i jemesi ihe ò'idōre jajivē'e jiajoho ēho uehorovoromo nimorohorējo.

Iesuhu nimorohade jōhoje.

²¹ Ēhi uēromo evare majare Iesuro God-are Aru'aho hesi huē maho baeromo nimoroho avohadeje. Nimorohoromo God uavadeje: Apo ja ò'idōrohu'o sa'arohu'o muebejanue ae javajējo. Naro jasi òrire huē mae uavajējo. Rabēni hesi bēhoho jero gavane nuni aji'e a masijohuro uvoruomamu: Nosi simanoho mae javuoromo bōvie bise'e ga barējē'e javuajē uvamu gēgorovo jero jasi jōho jabesi òrire subivēhē'e javajējo. A'i gavane bogo gavē'e aribōviahuro bogo dōroho bamorovo'i jōho hel'i nēgamu gēgorovo jero jasi jō bēhoho rōjēhijē'e javajējo. Apo iae mae hōjo. Jero jasi nimoromo ē'ane hōjo.

²² God ēhi uanugoromo ē aribōvioho uēvadeje: Nasi Vavuohuro jōe aho'o bojēmijē'e hōjo muebe'irodego. Vavuohuro gemuēro Hari-hoho na avoho gevaje hōjo. Harihoho naremuēremu Vavuoho avoho gavaje hōjo. O Harihu naehu di aribōvi rōjēhi'i negē'ohuro ēhuro ē aribōviahuremu rōjēhijego jabu'o Vavuoho gavarue hōjo.

²³ Ēhi uēvē'ēro Iesu'o hesi ijorajoho jabu'o jabesi sivue raromoromo Iesuro hunuorovoromo uēvadeje: Jemē mu maho gavarujēro jēv'ēro ēhu'ēro jemē mae jēvājējo. ²⁴ Ave jōho na jō mae uē'iē'ajējo. Jemēhu gavaruje muoho o hejaruje jōho urimē'i jō God-aro baeromo majēhinōvare aribōviohu'o sa'are a masijohu'o aho'obēhe jaburo nimoruomade hōjo garomo hel'iro. Rōhu bogo garomo heruomade hōjo. Rōhu God-ro jemē ajēmijē'ēro ēho gavaruje hōjo. Ēhu'ēro jemē huē mae baejē'e jēvājējo.

Sa'a gō rajehu sa'a gō rajo ajamade uhu jōhoje.

²⁵ Ēhi'amu gagorovo Jew rajo jōgoru òri rōjēhijaje ae gemuēro Iesuare dēho bijioho ga'irōgoro ri'ōromo uavadeje: Tisajo. Na diehi'oromo ioro'ioremuoho maroho hi'ejōjo. ²⁶ Maroho hi'ejōjamu

Iesuro uavadeje: God-are surire jöho diehi jajivë'e höjo. Ja uehorovanuoho bëhoho diehi höjo. ²⁷ Bëhoho diehi höjamu ruehuro uavadeje: Jasi dë vövöbajole aru'ahë daruge uehore aho'obëhe Bada jasi God ma-hu gemu bojaminëjo. O jö göho jaehu jasi arijo'arije rajahirovanuëhi jasi ae gemuoho ëhi rajahinëjo. ²⁸ Rajahinëjamu Iesuro uavadeje: Ja jö mae jövanuëjo. Ëhi ë'ë'oho ëhuro ja maro hi'a'anuëjo.

²⁹ Hi'a'anuëjamu rue röjëhijaje ahuro hesi ihoho mae jiojöro nimamu Iesu uavadeje: Röhu nasi ae gemuoho rahumë höjo. ³⁰ Rahumë höjamu Iesuro uhu'e uavadeje: Iae Jew raje ae gemuëro Jerusalem jioromo Jericho amore abue'ië'ade höjo. Örire abueromo nume vajiohu'e aribövi jabesi övoro va'ade höjo. Övoro va'amu gudumomomo niögoho maho sisëho vajiohëro ujuohahoromo sa'ijosa'ijovoromo gavare guomo'ia'amu gagorovo nugo va'are höjo. ³¹ Va'amu gagorovo priest-ëro ijönö örire ruvebijade höjo. Ruvebi'i gavade aho raromamu gagorovo iosiramiromo öri ioni gönö va'ade höjo. ³² Ëhi'amu Levi raje God-are mu ajamaje ahuro ëhi gemuoho ë'ade höjo. Ruvebiromo bëhire va'oromo aho ërimahonugoromo öri ioni gönö va'oromo iosirami va'ade höjo. ³³ Va'amu gagorovo sa'a gö raje ae gemuëro örire ruvebijade höjo. Hu Samaria sa'a raje jemëhu nu huodëgaruje sa'a raje ae gemuëro ruvebijade höjo. Ëho rajëro ruvebiromo Jew rajoho birohade höjo. Birohoromo gavade raromamu gagorovo huni vavaenimade höjo. ³⁴ Vavaenimamu va'o garomo nemo'amade sagohore ninugu'e osohu'o wine jovo osohu'o otehahoromo muohaho'amade höjo. Muohahonugoromo banigojiomoromo hesi mi dejore bamonugoromo hu'irae ba'obuejadoho abo öri jijihoromo momorö'öjarue osare rovide höjo. Rueromo hiromo aho avoho ajamijade höjo. ³⁵ Ajamiromo diroharëro sisonuvamu gagorovo Samaria rajohuro ajivë'e ijo baje niö'i jabesi uhure aho'o jië'oho baeromo osa muebejaje aho bojamiromo uavade höjo: Na va'ajëjo. Jero ave aho avoho muebenëjo. Monie gö'o bu'öjë'oho vuonorö'ö rueromo naro jaehu bu'öjane ë hesi manaho bojami'ejöjo. Ëhi'ade höjo. ³⁶ Röhu ja diehi uehorovanuëjo. ËJew rajohuro vajiohu'e aribövi jabesi övore va'oromo sisë birohade höjo. Sisë birohama ae niö'i gemu ro hu gavare höjo. Göho priest-ëro göho God-are mu ajamijaje ahuro göho nu huodëgaruje sa'a gö rajohuro ëhi ro gavare höjo. Röhu di aho hesi ae gemuoho jiade höjo. ³⁷ Ae gemuoho jiade höjamu jögoru öri röjëhijaje ahuro uavadeje: Huë baeromo ajamijade aho hu hesi ae gemuoho jiade höjo. Ëhi uavamu Iesuro uavadeje: Jero va'oromo ëhi jië'e muoho vaenövonëjo.

Iesuhu Martha'o Mary'o gë'i va'ade jöhoje.

³⁸ Ëhi uënugoromo iae Iesu'o hesi ijorajoho jabu'o va'aroho va'o amore suorovareje. Suorovamu magonahe gemu hesi ihe Martha-ro Iesu uavadeje: Nasi osaro ro hijëjo.

³⁹ Hijëjamu Iesuro osare va'o hijadeje. Hijamu Martha-are öe Mary-ro ro Badare hörü bëhire hiromo huhu jö röjëhijajoho hejadeje. ⁴⁰ Hiromo jöho hejamu gagorovo Martha-ro Iesuni bövie bise'e avohoromo bogo eni jiamu nurunurumoromo Iesu uavadeje: Bada nasi öho na remö'öjë'ëro nasi sivue mue vaejajëjo. Na ja nasi jöënioho bogo uehorovanuëjo. Uavego ro ajemajo. ⁴¹ Ajemajamu Badaro

uavadeje: Asè'e Martha-ajo. Jero mue aho'obèhe uehorovo'ego èhuro nurunuruagajèjo. ⁴² Rõhu ja mue gemu bogo baejè'e javajèjo. A'i Mary-ro mu maho baejè'e hõjo. Èmuoho no bogo aho'ejarèjo.

11

Noehu pari vae'irõhe òri Iesuhu røjèhijade jõhoje.

¹ Iae Iesuro hirono God-are òrire jõe jõvadeje. Jõe jõvoromo barèjamu gagorovo hesi ijorajoho gemuëro uavadeje: Bada God-are òrire jõe ato'irõhego John-hu hesi ijorajo òmo'òmo røjèhijadèhi jero no'o èhi è hesi òroho røjahuijèjo.

² Røjahuijèjamu hegorovo Iesuro uèvadeje: Jemèhu God-are òrire jõe atè'iroho èhi uarèjo:

Apo ae aho'obèhe nosi dè vövøbajo'oho avohahuego ja gemu mae uehorovavo'irarèjo.

Jero bõrõme namiromo aho'obèhe muebejavuego no jasi aharire gemu raromo'irarèjo.

³ Vae majae ioho bojamuibe va'ego ue'ahago da'uaguo'irajo.

⁴ Nosi sisèho uehorovoromo vuonugahuèjo no a jabesi sisèho uehorovoromo vuonugèharue jiaje. Nadi vörö'eroho ramuö'õjego rireromavuo'irajo.

⁵ Èhi uènugoromo Iesuro hesi ijorajo òmo'òmoho uhu'e uèvadeje: Nani jemè ae gemuëro vahi riri'e aemo'aemo hesi osare va'oromo ua'a'anuèjo: Isiajo. Ie gö bojemèjo. ⁶ Nasi aemo'aeme gö òrire juvè'èro nasi osare ro hijajèjo. Rõhu i bojami'iroadoho bogojevajèjo. ⁷ Bogojevajè'iramu nani jasi aemo'aemohuro osare raromoromo ua'a'ajèjo: Nadi nunèhoho iegèjo. Mami'e oje tugohoromo asisö'o'o na'o momorö'õjè'èro na bogo ri'òromo ajami'ejõjo. ⁸ Nani èhi ua'a'ajèjo. Rõhu naro jemè uèvajèjo: Nani hu bogo uehorovoromo uvo'a'ajèjo: Nasi aemo'aemego ri'òromo ajami'ejõ uvoromo ajami'i rõhu herõhe jero biririvoromo ua ga'i hi'iramu evare hu ri'òromo ja rabe rabe nimanuoho bojami'ajèjo.

⁹ Èhuni na jemè uèvajèjo: Biririvoromo God ua garèjo. Biririvoromo ua gavè'oho ujuoho'arujèjo. Biririvoromo nahorèjo. Nahè'oho biroho'arujèjo. Ojoho ano'anovorèjo. Ano'anovè'oho God-ro jiovèho'ajèjo. ¹⁰ Ae rahu ua gavè'oho ujuohoruomo'ajèjo. Nahè'oho bihoruomo'ajèjo. Ano'anovè'oho ojoho jiovèho'ajèjo. ¹¹ Nasi jõe hejarujoho ae gö vavu òmo'òmo'e jèvajèjo. Jemesi harihehu uèvè'iroho: Jovo mie bojemego na ijõ uèvamu hejè'oho na jemè sareramiro sigobu sisèho bojamirèjo. ¹² O uèvè'iroho: Ugo une bojemego na ijõ uèvamu hejè'iroho na jemè sareramiro ògusuru une bojamirèjo. Bogajo. Jemè i mae i'imami'arujèjo. ¹³ Jemè sisè aribövie jèvajèjo rõhu jemesi aboji harihu'o avoho suvuorèmi'irarije òroho iae gavaruje hõjo. Jemè sisè jèvo'i ò'idõre hijaje jemesi Vavuoho mae jiaje jemèro uvorèjo: Hu maèro jiè'èro ae rahu ua gavè'oho nosi Vavuohuro hesi Aru'ahoho iae mabèhe suvuoramui'ajèjo.

Iesuhu Satan-are aribövi a dère jio'amamu rarovö'õjèvadoho hu bogo Satan-are darugoho baeromo èhioho è'adeje. Èhesi jõhoje.

¹⁴ Ae gemu aru'aho sisë dëre jië'ëro bitare tövoromo jöe bogo jövë'e hijadeje. Hijamu Iesuro aru'aho sisëho rarovö'öjajedeje. Rarovö'öjamu ë aho aevoromo jöe jövadeje. Jöe jövamu gagorovo ae aho'obëhe tiöjövadeje. ¹⁵ Tiöjövamu a ioro'iorohuro uarovareje: Beelzebul sisë a börömhuro vöröho bojämijego ëhuro Iesuro a dëre aru'aho sisëho rarovö'ö'amaje höjo. ¹⁶ A ioro'iorohuro nimareje Iesuare darugoho ga'i diehi jië'e jiego. Ëhi nimoromo uavareje: Bogo gavarue darugo'e muoho röjahuijego no gavarëjo God-ro ja ajamego o bogo ajamego. ¹⁷ Ëhi uavamu Iesuro jabesi sareri sarerihoho gëromu uëvadeje: Sa'ae gemuehu adovoromo jabesi arijo'arije muorovë'o ho barërovo'ajëjo. O agane gemuehu adovoromo jabesi arijo'arije muorovë'o ho sisërërovo'ajëjo. ¹⁸ Ëhuni Satan-ro ri'öromu hesi ariböviohu'o muorovo'ibejajo hesi darugoho uehoroho muoho diehi'oromo biririvoromo nami'ibejajo. Jemëro uvarujëjo: Sisë a börömhuro nörö vöröho bojamego hesi sisë aribövioho rarovö'öjajede höjo. ¹⁹ Ëhi jië'o ho na jemesi ariböviohuro sisë a börömo hesi vöröho baeromo rarovö'ö'amarue höjo. O diehi'oromo ë'arue höjo. Jaburo uë'a'aruëjo: Sarerivarujëjo. Aho bogo sisë a börömo hesi vöröho baeromo ëhioho ë'arue höjo. ²⁰ A'i naro God-are darugoho baeromo raro'vamaje höjo. Ëhuni uvorëjo: God-ro aevoromo böröme namiro muosi örire muebejavuajëro jië'ëro ëhu'ëro ë'ajëjo.

²¹ Biriri'e aehu bije tone bahiromu javuoho avoho muebejë'o ho hesi inömo inömo ho ma-jiemu jio'a'ajëjo. ²² O ae göehu rueromu javu arijo'o hesi biriri iosiramijë'o ho javu arijo'ohuro uvo'a'ajëjo: Bije tone eni javajëromu hi'iramu ruehuro osare rueromu arijo'ohu guduamöromu rahoromo bijo ho tonoho ujuohoniahiromu inömo inöme aho'o ujuo ho va'a'ajëjo. Vajiohehu ujuohadoho ae suvorëmi'ajëjo. Naro Satan ëhi ruahö'öjajede höjo.

²³ Ae rahu bogo nasi a jië'o ho ëho huro na'o muorovaje höjo. O na bogo ajemiromu nasi aribövi gagovë'o ho ëho huro arua anumiaë nugö'ö'amaje höjo.

Satan-are a sisëhu a hesi dëre vuonorö'ö abueromo ijumahade uhu jö Iesuhu jövadohoje.

²⁴ Röhu Satan-are mu ajamaje aru'aho sisëhuro ae gemu hesi dëre hi'a'ajëjo. Hiromu hörö va'a'ajëjo. Va'oromo jovo rumo'e sa'are va'oromo hi'iröhe röho ho nahobe juvojuvo bogo birohogorovo uvo'a'ajëjo: Na vuonorö'ö va'oromo hijode sionore röhu maho ë hi'lejöjo. ²⁵ Ëhi uvonugoromo vuonorö'ö va'oromo urimo hijade a hesi dëre abueromo ga'a'ajëjo dë vövöbajo'ohu bibivoromo iogorë'e ma-mabëhe osa va'ëne jio'iramu. ²⁶ Ëhi jio'iramu gagorovo va'oromo Satan-are aru'aho sisë aho'obëhe söromu rue'a'ajëjo. Ëurimore ro hijade aru'ahoho a sisë höjo. Ijore huhu sö rovade ariböviohuro hu iosiramiromu jabumë sisë bëhi mae jioruomajëjo. Ëhu'ëro urimo sisë'i hijade aho ijönöho sisë bëhe hi'a'ajëjo.

Huë mae raromo'iröhe hesi jöhoje.

²⁷ Iesuro ëhi uëvamu hejë'i magonahe gemuëro ae aho'obëhe jabesi ririre jië'ëro Iesu ma-darugo'o uavadeje: Ja rahavoromo amu bojämijade magonahohuro maro ho hijaje höjo. ²⁸ Maro ho hijaje höjamu

uavadeje: Ĕho ma-jianovo'i a'i ae rahu God-are jö heromo ejahë'oho ë ariböviohuro ma-maroho raromarue hōjo.

Ariböviehu Iesu bogo ma uehorovoromo huhu darugo'e mu vaejōro dinamare jōhoje.

²⁹ Iae ae aho'obēhe Iesuare bēhire ro tagavoruomadeje. Tagavoruomamu gēgorovo Iesuro uēvadeje: Ave jaruvore raromaruje aribövioho sisē aribövie jēvajējo. Jemēro darugo'e muoho ga'i uevaruje hōjo ga'i God-ro na ajemego muoho vaejaje jevego o bogo. Na ēhi jiē'e muoho bogo vae'i a'i Jonah-hu God-are mu bōrōmo rōjēhijadēhi ēhi jiē'e muohuremu rōjēhi'ejōjo. Mue gō gō bogajo. ³⁰ Nineveh amo rajehu mae uehorovorōhego Jonah-hu mu rōjēhijadēhi God-are A Maho naro ēhi jiē'e muohemu rōjēhi'ejōjo ave jaruvore raromaruje ariböviohuro mae uehorovevo'irarijego.

³¹ God-hu mevoromo gērōhe majaho rue'iramu arue sa'a gōre bōrōmo vaenōvade magonahohuro ave jaruvore raromaruje ariböviohu'o gemu mae ri'ōromo God-are nunire nami'a'ajējo. Nami'iramu God-ro ë sa'a gō rajo magonaho hesi mu maho garomo jemesi mu sisēho garomo jemē uē'a'ajējo: Ĕmagonahehu vaejade ēhi jiē'e mu maho bogo vaejē'ego ēhuni na uēvajējo: Jemē sisē'e aribövie jēvaje sisēro va'ohējo. Ĕhesi bēhoho ë sa'are bōrōmo vaenōvade magonahohuro hesi sa'aho vuonugo'i ōri ēgobōviro rovade hōjo a bōrōme Solomon-hu nuni aji'e jö jōvajoho he'iro. Solomon-hu ae ma-bisemu bōrōmo jioromo jö majēhijajoho ë magonahohuro he'i nimade hōjo. A'i naehu Solomon iosiramiro mo bōrōmo mae jioromo jö majēhijajoho he'irarijoho jemē bijōnēgajējo. Ĕhu'ero jiē'ero mevo gērōhe majaho rue'iramu jemē sisērējēvo'ajējo. ³² O ēho majaho rue'iramu ë sa'ae gō aribövie Nineveh amo rajohuro ave jaruvore raromaruje ariböviohu'o gemu mae ri'ōromo God-are nunire riravoruomo'ajējo. Riravo'iramu God-ro jabesi mu maho garomo jemesi mu sisēho garomo jemē uē'a'ajējo: Nineveh amo rajehu vaejare ēhi jiē'e mu maho bogo vaejē'ego ēhuni na uēvajējo: Jemē sisē'e aribövie jēvaje sisēro va'ohējo. Ĕhesi bēhoho ë Nineveh amo rajohuro mu sisē vaeruomē'ero hejare Jonah-ro God-are jōe majēhijamu hegorovo jabesi uehoro sisēho vuonugo'i uehoro mae baejare hōjo. Jonah ma-bise'o jioromo jö majēhijadoho Nineveh amo rajohuro hesi jōho ejahare hōjo. A'i naehu hu iosiramiro mo bōrōmo jioromo jö majēhijajoho jemē bogo ejeharuje hōjo. Ĕhu'ero jiē'ero mevo gērōhe majaho rue'iramu jemē sisērējēvo'ajējo.

Sino haho'o hesi iroho nuni jiaje uhu jö Iesuhu jōvadohoje.

³³ Iro buno'iraejē'iroho bogo sa'a gagoroho hevō gagoroho gurihi'i ma-va'orahoro bamo'anuējo ae ë osare rovē'oho ajivēvorōhego. ³⁴ Jasi sino hesi iroho nunoho hōjo. Jasi nuni mae jiē'oho ēhuro aji maro hi'a'anuējo. O jasi nuni sisē jiē'oho ēhuro ja ramoramoro hi'a'anuējo. Ĕhesi bēhoho naro uēromo ē'ajējo: Jasi uehoro mae jiē'ohuro God-are aji'e jōho baeromo aji maro hi'a'anuējo. O uehoro sisē jiē'ohuro nunoho ramoramovavo'iramu ramoramoro hi'a'anuējo. ³⁵ Avo'avoho mueberovonējo. Nani jasi uehoro sisēremu jioromo ramoramoro'ere mu javajējo. ³⁶ Rōhu jasi nuni mae jiego ajire hijanuēhi

ramoramoho bogojio'i ma-aje gemu jië'o'oho ëhuro aje aho'obëhe jasirire rueromo ja ajivavo barë'ajëjo. Irehu ajivavajëhi ëhi ajivavo'ajëjo.

Pharisee ariböviohu'o Jew rajo jögoru öri röjëhijarue ariböviohu'o Iesuhu birëgade jöhoje.

³⁷ Iesuro jöho majëhiromo barëjamu gavë'i Pharisee ae gemuëro uavadeje: Nasi osaro rovego no i harihe gemuoro ijarëjo. Ijarëjamu Iesuro va'oromo osare va'o hijadeje ie i'irovo. ³⁸ Hijamu rue Pharisee ahuro gavade Iesuro a mami muoho bogo vaeromo övoho bogo eguë'e ioho ëma ijamu gagorovo tiöromo uehorovoromo uvadeje: Iesu diehi'oromo övoho bogo eguë'e ioho ëma ijajëjo. Ëhi jië'e muoho God hu bijönimaje höjo. ³⁹ God bijönimaje höjamu Badaro uavadeje: Övo eguo jö uvanuoho aveho hejëjo. Ëhi jië'e muoho ëho ma-döemu höjo. Pharisee aribövioho jemëro döre muohemu vaeromo hevöho enatuoho u'o'amoromo uvaruje höjo: God iae ëhuni nimorohajëjo. Röhu jemesi uhoho vajiohu'e mu o mu sisë gö gö uehorovarujohuro ëhuro jemesi dë vövöbajo'oho irijiomëhë'e höjo. ⁴⁰ Simano sisërëjë'e aribövie jëvavëjo. Nani jemë uvarujëjo: Nunehu ga'amarue inömohe mu God-ro avoho'amo'i nosi dë vövöbajo'oho bogo avohade höromo ëhuni öve hevöe enatue ëhi jië'e inömo hesi va'inumohemu uehorovo'i dë vövöbajo'o hesi sisëho bogo uehorovaruje höjo. ⁴¹ Röhu ae huë baejëvoromo jemesi enatu gagore jovoho hevö gagore ioho ae suvuorëminövorëjo. Ëhi ë'ë'ohuro uvo'a'arujëjo: Inöme bövie bise'e ma-mae gemu jio'amajëjo.

⁴² Pharisee ariböviohumë vaevë'oho jemë sisërëjëvo'ajëjo. Jemëro jemesi i jögoru e avohoromo i'o buarohoromo ijarue rihu'e oso harihu harihue gö gö garue gö gö mevoromo 10 10 bahibe va'oromo gemu gemu God suvuore bojamijaruje höjo. Ëhi jië'e jögoru ininoho ejaho avoharuje höjo. Ëhi jië'oho iae mae höjo. Nadi vuonugorëjo. Röhu a mu ma-maemu vaejëvo'irarije muohu'o God-are örire dë vövöbajo'ere uehorovo'irarije muohu'o rumonimaruje höjo. Nadi rumonimo'ibejarijëjo.

⁴³ Pharisee ariböviohumë vaevë'oho sisërëjëvo'ajëjo. God rajahijarue osare va'ë'iroho jemëro jemesi sinohemu uehorovoromo ëhuni a masijehu raromaruire ë va'o raromo'i nimaruje höjo. O imo'amaruire va'ë'iroho jemë nimaruje höjo ae aho'obëhe uvoruomoröhego: Jemë a masijëro jijiharujëromo rajëhiromo jejëmiruomoröhego.

⁴⁴ Vaevë'oho sisërëjëvo'ajëjo. Jemë ma-döhuremu mae jëvo'i uhoho sisë jëvavëjo. A guavoromo hure guodo sibiri'e bogo ruhë'oho jëvanovajëjo. Aëro sagohe sa'a uhure jiaje jöho bogo uehorovë'e ëma uvarue höjo: Ma-sa'a maemu höromo hu döre ë jijiharue höjo. Ëhesi bëhoho ae göëro uvarue höjo: Jemë maemu jëvavëjo. Röhu uhoho ëhi sisë bëhe jëvavëjo.

⁴⁵ Iesuro ëhi majëhijamu hegorovo Jew rajo jabesi jögoru öri röjëhijarue ae gemuëro ri'öromo uavadeje: Tisa jaehu ëhi jië'e jö jövanuoho ëho ja bogo Pharisee ariböviohemuoho agëvo'i jögoru öri röjëhijarue aribövioho aho'obëhe no'o agavuanuëjo. ⁴⁶ Agavuanuëjamu Iesuro uëvadeje: Iae mae uvanuëjo. Jögoru öri röjëhijarue ariböviohumë vaevë'oho jemë'o sisërëjëvo'ajëjo. Aehu i'u'e inömo ujuoho va'oruomojoro buahore bahijëhoromo va'ego bogo ajëmiromo

övo name gemu vadulehu vitu banigojiohmëharuëhi jemëro ëhi ë'aruje höjo. Jemëro i'u'e muoho aho'o ae bojëmiromo bogo mae bogo ajëmi'i ma-nunëremu gëvaruje höjo.

⁴⁷ Vaevë'o ho sisërëjëvo'ajëjo. Jö God-aro baeromo majëhinövare aribövioho jemesi hijo miono'ohuro muo'amare höjo. Muo'amë'ëro jemëro ëma uvaruje höjo: No God-are aribövioho uehorovëvaruëromo jabesi sino guavo'amare huoho avoho'amaruje höjo. ⁴⁸ Röhu jabesi hu avoharujoho ëho uöromo ë'aruje höjo: Jö God-aro baeromo majëhinövare aribövioho nosi hijo miono'ehu muo'amaroho iae mae höjo. Naehu uëvaje hesi bëhoho jemesi hijo miono'ehu muo'amaroho jemëro jabesi sionoho avoho'amaruje höjo. ⁴⁹ Jemëhu a ano'irarije uehore ëhi jëvë'ëro God-are simano ma'e jöho ëhi uvë'e höjo: Jö nasiro baeromo majëhi'iröhe ariböviohu'o nasi apostle ariböviohu'o ëhi naro rëmö'ö'iramu a jabesi örire va'a'aruëjo. Va'iramu aëro a ioro'ioroho muo'amo'i ioro'ioroho huë vavaene bojëmi'aruëjo. Ëhi uvë'e höjo. ⁵⁰ Ëhu'ëro jië'ëro God-hu sa'a bamadevare evare aevoromo jemesi hijo miono'ehu jö God-aro baeromo majëhinövare aribövi muo'amobe rovere ë hesi i'uoho ave jaruvore raromaruje aribövioho jemëni rue'a'ajëjo. ⁵¹ Aev'oioho aëro Abel anoromo God-are aribövi ioro'ioroho ëhi muo'amobe ruejuvo ro ijo tugoho'ioho Zechariah anare höjo. God-are suvuro bahijarue maratuo ho ruhëhi jio'i God-are osa bërömo numëhi jiamu Zechariah ë ririre anare höjo. Ave jöho na jö mae uë'ië'ajëjo. God-are aribövi ëhi muo'amobe rovere ë hesi i'uoho ave jaruvore raromaruje aribövioho jemëni rue'a'ajëjo.

⁵² Jögoru öri röjëhijaruje ariböviohumë vaevë'o ho sisërëjëvo'ajëjo. God-are mu ma hesi jöho jemëro bogo röjëhi'i aëro heruomöjööni jemëro ë hesi ojo jiovaruoho gurihi bamë'e jëvajëjo. Jemë ë mu ma hesi jöho bogo baejaruje höjo. O ae göehu bae'ia'amu gëvë'o ho ahëvaruje höjo.

⁵³ Iesuro ëhi majëhinugoromo va'adeje. Va'amu gavë'i Jew rajo jögoru öri röjëhijaruje ariböviohu'o Pharisee ariböviohu'o ëho jaburo Iesu'o va'oromo aevoromo hu nue huodivoromo dinamiromo jöe gö gö ua ga'i arijareje. ⁵⁴ Jöe gö gö ua ga'i ariromo mu'öjahareje he'i hu guaro berovoromo jöe sisë'i jövego.

12

Noehu bogo ma-döhemu mu mae vae'iröhe jöhoje.

¹ Iae ae aho'obëhe mae ro tagavoromo tatijiomorovoromo hörëro bijöëro vaerovamu hesi ijorajoho jaburo urimo hejöro Iesuro ëhi majëhiromo uëvadeje: Jemëro gavë'iajo. Pharisee aribövi jabesi i dë huaje osohuro jemesirire rumorovo'ajëjo. Jabuhu sareri'e mu vaejarue ëhi jië'e muohuro jemesirire rumorovöjööni uëvajëjo. ² Jaruvoho Pharisee ariböviohuro jabesi mu sisëho gurihijaruje höjo. Röhu mue rabe gurihiro jiajoho aho'obëhe va'orahoro jio'a'ajëjo. Rabe rabe saginiëri vaejaruoho aho'obëhe ma-samaro jio'a'ajëjo. ³ Ëhu'ëro jië'ëro jemëhu jöe rabe vahi'e saginiëri atë'o ho ijonö maja'e ë jöho ma-va'orahoro heruomö'ajëjo. O osa gagore raromoromo saginiëri hia'ire majëhijë'o ho aëro amo ririre ë jöho ma-darugo'o majëhiruomö'ajëjo.

Noehu bogo a juhuonëmi'i God juhuonami'iröhe jö Iesuhu jövadohoje.

⁴ Rõhu nasi ariböviohumë naro ave jõho jemesi õrيره majëhi'ie'ajëjo. Nadi uvorëjo: Ëariböviohuro anaguo'ajëromo juhuonëmiromomo jabesi jõho uehorovorëjo. Jemesi sino haho'o muo'amë'o'oho eni jëvajëjo. Rõhu sino haho'o muo'amonugoromo ijonõ mu sisë gö jemesi õrيره vaejëvë'o'oho bogo eni jioruomo hesi hõjo. Ëhuni nadi ë aribövioho juhuonëmirëjo. ⁵ A'i juhuonami'irarije aho naro uë'ie'ajëjo. God juhuonamiromomo hesi jõho uehorovorëjo. Ëhesi bëhoho God-hu jemesi aru'aho baejëhego vuovëvego evare ijonõ vëni'e õri ari'ere ujuoho ruruhõ'õjëvo'irõhoho hu eni jiajëjo. Iae mae-ëjo. Jemë ë aho gemu juhuonamirëjo.

⁶ A'i aho bõvioho bise'o'oho nadi juhuonëmirëjo. Ëhesi bëhoho God-ro uvajëjo: Jemë iae masije jëvajëromomo avo'avoho muebejëvaje hõjo. Monie ma-bisemu bu'õromomo ugo inine õvo gö mine imo'arujëjo. Rõhu God bogo uvaje hõjo: Ugoho ininego bogo muebe'amo'ejõjo. Bogo ëhioho uvo'i iae hu avo'avoho muebe'amaje hõjo. ⁷ A'i jemë God-ro jemesi bõvie bise'e aho'o muebejëhoromo rõhu jemesi simano uoho ëhu'o adahëhoromo avo'avoho muebejëhaje hõjo. Ëhuni nadi juhuonivorëjo uge aho'obëhe jio'amajoho ëho ma-jianovo'i ae gemu gemu jemë masije jëvë'e jiaje.

Keriso-are jõ a nunire huruoho majëhi'irõhe jõhoje.

⁸ Rõhu ave jõho naro uëvajëjo. Ae rahu a nunire uvë'o'oho: Na Iesuare ae jëvajë uvë'o'oho God-are A Maho naro God-are anera jabesi nunire uvo'ejõjo: Ëho nasi ae magonahe hõjo. ⁹ O ae rahu a nunire uvë'o'oho: Na bogo Iesuare aehu jëvajë uvë'o'oho naro God-are anera jabesi nunire uvo'ejõjo: Ëho bogo nasi aehu magonahehu hõjo.

¹⁰ O ae rahu God-are A Ma nasi jõ sisë'i atë'o'oho God-ro uehorovoromomo vuonugo'ajëjo. A'i ae rahu God-are Aru'aho hesi jõ sisë'i atë'o'oho ëho God bogo uehorovoromomo vuonugo'ajëjo.

¹¹ O jemë nasi mu vaejama gavë'o'oho aëro uvo'a'aruëjo: Iesuare mu vaejarujoho ëho mu sisë vaejaruje hõromomo jemë guduamëvoromomo God rajahijarue osare mu vaejarue a masijo jabesi nunire o gavana jabesi o sa'are a masijo gö gö jabesi nunire rëmoruomomo'ajëjo court vaejëvojõro. Ërëmë'iroho nadi uvorëjo: No diehi nosi jõho majëhi'ëjarëjo. O rabu jõe majëhi'ëjarëromomo nurunurumorëjo. ¹² Ëhesi bëhoho jemëhu jõ majëhi'irarije majaho ruel'iramu evare majare God-are Aru'ahohuro rõjëhi'iramu garomomo uvo'a'arujëjo: Iae no ëhi ëhi majëhi'ëjarëromomo ëhuni nadi nurunurumorëjo.

Bõvi bise'o marohë'e aehu sisë'i uehorovade jõhoje.

¹³ Iae ae aho'obëhe jiareje rõhu ae gemuëro ri'õromomo Iesu uavadeje: Tisa nasi õho uavego nosi vavuehu guomoli nughuadoho na gö bojemi'irajo. ¹⁴ Gö bojemi'irajamu Iesuro uavadeje: Raro uvade hõjo naro jemesi muoho gavëhoromomo jemesi inõmo inõmoho maho sisëho mevonõvo'irodego. Ëho bogo nasi muehu hõjo. ¹⁵ Ëhi uanugoromomo ae aho'obëhe uëvadeje: Jemëro gavë'i avo'avoho mueberovorëjo. Jemesi sinohemmo uehorovoromomo bõvie bise'e bae'i ëma nëgojõëni uëvajëjo. Ja sa'ae jove inõmo inõme rabe rabe bõvi mae baejë'o'oho bogo ëhuro maroho hi'a'anuejo.

16 Ĕhi uēnugoromo ave uhu jōho rōjēhiromomo uēvadeje: Iae bōvi bise'o marohē'e ae gemuēro hijade hōjo. Hijamu hesi sa'aroho iruno'o ho ma-mabēhe ri'amade hōjo. 17 Ma-mabēhe ri'amamu gagorovo huro hesi simanore uehorovoromo uvade hōjo: Nasi iruno'o ho bōrōmo bōrōme jevajējo. Ĕhu'ēro nasi iruno'o avoho bahi'irode rōhoho bogo eni jio'amajējo bise'ero jiē'ero. Ĕhi jiē'o ho na diehi'o'ejōjo. 18 O iae na ēhi ē'ejōjo. Nasi i bahijaje osaho bise'e jio'amē'ero naro dadovo'amo'i javu masijo masije vae'amo'ejōjo nasi iruno'e nasi bōvie bise'e ē maro bahi'irodēni. 19 Vaenugoromo naro nasi uvo'ejōjo: Na eni jevē'e ae jevajējo. Iruno'o ho inōmo inōmoho bōvi mae avoho bahijē'ero vadune aho'obēhe eni jevobe va'a'ajējo. Ĕhuni na nuhoromo ma-hijē'i ie jove iromomo nimoronimorohonōvo'ejōjo. 20 Nimorohonōvo'ejōjamu God-ro uavade hōjo: Ja simano sisē'i uehorovanue ae javajējo. Jaruvo vahie naro jasi aru'ahoho baejaho'iramu guomo'a'anuējo. Guomo'iramu jae hu bahijane iruno'o ho bōvioho bise'o ho raro bae'a'ajējo. God-ro ēhi uavade hōjo. 21 Ĕaehu ē'ade mu hesi bēhoho ēhi hōjo. Ae rahu hesi sinohemu uehorovoromo bōvi bise'o marohē'e mae bahiromomo uvē'o ho: Ĕhuro na eni jevajē uvamu rōhu God-hu uvē'o ho: Bogo ēhioho jio'i hu bogo eni jiē'e hō uvē'o ho ēhuro ē ahu'o hesi muohu'o be'a'ajējo.

Bogo nurunurumo'i God mae uehorovo'irōhe jōhoje.

22 Ĕhi uēnugoromo Iesuro hesi ijorajo ōmo'ōmoho uēvadeje: Inōmemu uehorovē'o ho bēhi rumo'e jiē'e jiaje ēhuni nadi uvorējo: No i rabe ue'ahoromo bogo vuovo'i biririvoromo raromo'ejarējo. Uho niōgu'o rabēro sino haho'o ho riogivo'ejarēromo nurunurumorējo. 23 Ĕhesi bēhoho ioho bise'e jio'i jemēhu biririvoromo raromarujoho ēho bōrōmoho hōjo. Uho niōgu'o ho bise'e jio'i sino haho'o jēvajoho ēho bōrōmoho hōjo. 24 Magugoho uehorovohējo. Noehu ē'aruēhioho magugoho bogo ēhioho iruno'o ho bivarue hōjo o gagovarue hōjo. I bahijarue osaho bogojēvajējo. Rōhu God-ro ē ugho mio'amaje hōjo. Rōhu jabumē ma-bise'e jio'amo'i jemē masijo mae jēvajējo. Ĕhuni hu jemē'o avo'avoho muebejēvo'ajējo. 25 O jemēhu uvē'o ho: No diehi'oromo ave sa'aroho majae ēgo'o raromo'ejarē uvoromo nurunurumē'o ho na ēhuro jemesi vuovo'irarije majaho iosiramiroromo ruēhi ma-bisemu gō'o raromobe va'orējo. Bogajo. 26 Ajamirovoromo bogo vuovo'i majae ēgo'o raromē'o ho ēho mu bise'e hōjo. Rōhu nurunurumē'ohuro ēgo'o raromo'irarijoho jemē bogo eni jēvajējo. Ĕhu'o ho rabēni mu gōēni gōēnioho nurunurumaruje hōjo. Bēhe bogohōjo. 27 O je'ore resu resuehu diehi'oromo ri'amaruoho ēhu'o uehorovohējo. Aehu mu vaeromo niōgu avoharuēhioho resu resuoho bogo ēhioho ē'arue hōjo. Bogo ēhioho ē'arue hōjo rōhu ave resu resuoho ma-mabēhe kavuego garomo nosi dēho vuēvavuaje hōjo. Naro jemē uēvajējo: A bōrōme Solomon niōgu ma-mabēhe io'amonōvadoho ēho ma-jianovo'i ave resu resuoho ma-mabēhe mae kavuo'amaje hōjo. 28 Jaruvēhi resu resuoho sa'are rijego nērēhi ēhi aēro jahoromo vēniro huo'amarue hōjo. Rōhu ēhi jiē'e resu resuoho God-ro muebejeho marēromo kavuo'amaje hōjo. Resu resuoho ma-bise'e jio'amo'i jemē masijo mae jēvajējo. Ĕhuni uvorējo: Hu no'o avo'avoho muebejavuoromo uhe niōge i'imamui'ajējo. Nurunurumarujoho God bogo mae uehorovaruje

aribövie jëvájëjo. ²⁹ Röhu jemëro nadi uvorëjo: No i rabe jovo rabe i'ëjarëromo nurunurumorëjo. ³⁰ God-are jö bogo hejë'e raromaruë ariböviohuro ie jove bövie bise'e ëhuremu uehorovorouomaje höjo. Röhu jemëro nadi ëhioho ë'orëjo. Jemesi Vavuohuro iae mae garomo uvájëjo: Jemë iëro jovëro rabëro ëhuro birivoromo raromaruëjo. ³¹ Èhuni nadi ëhemuho uehorovo'i a'i God-hu bëröme namiromo muebejëvaje muoho ëho uehorovorëjo. Èhi ë'ë'o'oho God-ro jemesi aru'ahoho muebejëvoromo röhu ie jove niöge ëhu'o romoromoro bojëmi'ajëjo.

Ö'idöre mabëhe ujuoho 'iröhe suvuoro hesi jöhoje.

³² Jemë bogo ae aho'o jëvo'i God-are ö mahu'e ma-gemu gemu jëvájëjo. Röhu nadi juhuonivorëjo. Jemesi Vavuohuro iae nimájëjo hesi ajie öri ari'e ë hesi huë maho bojëmi'iröhëni. ³³ Röhu jemesi bövioho bise'o'oho imo'amoromo monioho baeromo bogo eni jië'e aribövioho suvuorëmirëjo. Èhi ë'ë'o'oho jemesi bövioho bise'o'oho ö'idöre bahi'aruëjo. Èhuro bogo sisërëjëho'i vajiohu'e aho bogo bëhiroho va'oromo ujuohëho'i majo majoho bogo tarivëho'i a'i jemesi bövioho bise'o'oho marohë'e mae jiemu jiëho'ajëjo. ³⁴ Jemesi mae sisë dinö'e jiajire jemesi dë vövöbajo'oho ë gemu jio'a'ajëjo.

Nosi a bëröme Kerisohu rueröhego noehu muebe'iröhe jöhoje.

³⁵ Röhu jö göho ave muohu'o vaenövorëjo. Jemëro avohorovoromo uho niögu'e vaeromo iroho bueromo avoho raromorëjo. ³⁶ Avoho raromoromo mu ajamijaruë ariböviehu jabesi bërömehu rovego ajami'i muebejaruëhi ëhi avoho raromoromo mueberëjo. Èhesi bëhoho mu ajamarue aribövi jabesi bërömhuro aehu masu'iröhe söröre va'ë'ëro vuonorö'ö rueromo ojore ano'anovo'iramu rueho jaburo heromo ojoho ma-burëro jiovah'aruëjo. ³⁷ Ma-burëro jiovah'iramu jabesi a bërömhuro garöhe jabumë nune jioruomoromo eni jëvamu gëvë'o'oho huë mabëhe bojëmi'ajëjo. Huë mabëhe bojëmiromo hesi niögoho avoho ruahoromo jaburo sa'are raromojöro uënuoromo ioho jovoho i'imëmi'ajëjo. ³⁸ Èa bërömehu bogo burëro rue'i vahi riri'e o vahi riri duvahoho iosiramiromo ëhi ruëhi rueromo gëröhe jabumë eni jëvamu gëvë'o'oho huë mabëhe bojëmi'iramu baerumo'ajëjo. ³⁹ Ave uhu jöhu'o avo'avoho uehorovohëjo. Vajiohu'e aehu rueröhe majaho osa arijo'oho bogo gavade höjo. Ga'ibejajo vajiohu'e a hesi öroho tugohahego osaho bogo dadovoromo inömo'oho ujuoh'o'ibejajo. ⁴⁰ Osa arijo'ohuro gavë'i hi'ibejajo mae jio'ibejajo. Jemë'o gavë'i raromorëjo. Jemë bogo uehorovë'e raromaruë majare evare God-are A Maho naru rue'ejöjo.

A bërömo hesi mu aehu avoho o sisë'i mueberöhe jöhoje.

⁴¹ Èhi uëvamu hegorovo Peter-ro Iesu uavadeje: Bada na ja jasi ijorajoho noremüëremu röjahui'i o ae aho'obëhe röjahui'i ë uhu jöho majahuijanuëjo. ⁴² Majahuijanuëjamu Badaro uëvadeje: Naehu ë jö majëhijaje hesi bëhoho aehu hesi a bërömo hesi muohemu uehorovë'i simano mae uehorovoromo mu vaejajëhi jemëro ëhi muoho vaenövo'irarijigo uëvájëjo. Èhi jië'e mu muebejaje a hesi a bërömhuro ua'a'ajëjo: Na va'ie'ajëjo. Jero nasi mu vaejarue a ioro'ioroho muebejëvonëjo. Muebejëvoromo majae eni jiego jabesi iruno'oho

i'imëminövonëjo. I'imëminövonë uanugoromo va'a'ajëjo. ⁴³ Va'o hijuvo röhu ijono vuonorö'ö rueromo garöhe ë ahuro hesi muoho avoho vaejaho'iramu gagorovo huë mabëhe bojami'ajëjo. ⁴⁴ Huë mabëhe bojamiromo ua'a'ajëjo: Ja mu mae vaejanohuni ëhuni na mu börömore bamavo'ejöjo. Jero bövie vaeromo nasi sa'ae inömo inöme bövie bise'e aho'o muebejehonëjo. Mu avo'avoho muebejë'ohohu iae hu ëhi ua'a'ajëjo. ⁴⁵ A'i ë mu vaejahaje aho sisë jië'ohuro ëhuro uehorovoromo uvo'a'ajëjo: Nasi börömohu bogo burëroho rue'i örisanuovajëromo ri'öromo mu vaejarue aho magonahoho muo'amoromo ie jove iromo ëhuro simane sisërë'ajëjo. ⁴⁶ Ehi'oromo bogo gavë'e uehorovë'e hi'iramu evare hesi börömohu ma-majioho rue'a'ajëjo. Rueromo sino haho'ohu sisë maro ijumahoromo nugö'ö'iramu sisëro va'oromo jö aho'aho'e ariböviohu'o hi'a'ajëjo.

⁴⁷ A börömehu nimajoho mu vaejahaje aehu heromo röhu jö bogo ejahoromo bövi bise'o bogo avoho'amë'ohu ëhuro hesi a börömhuro rueromo sisë maro ano'ajëjo. ⁴⁸ O a börömehu nimajoho mu vaejahaje aehu bogo hejë'e mu sisë vaejë'lëro mana anoröhe bëhi jië'ohu iae ma-bisemu ano'ajëjo. Röhu mu vae'irarije simano ma-mabëhemu o suvuro gö gö bövi mae God-hu jemesi örire bojëmijë'ohu huro uvo'a'ajëjo: Na böröme bojëmijë'lëro ëhuro mu böröme vaeruomo'ajëjo. O bogo vaeruemë'ohu ëho sisë höjo.

Iesuhu rovë'lëro ëhulëro ae adovoromo göehu jöe gö göehu jöe gö uehorovarue jöhoje.

⁴⁹ Naehu rovode hesi bëhoho sa'ae aho'obëhe vëninö'e ravëvo'i rovode höjo mu sisëho barë'i aho'obëhe ma-maemu jioröhego. Emuoho mami'e vae barë'ibejajo iae mae jevo'ibejajo. ⁵⁰ Röhu ë hesi urimo na vi'ehe huë vavaene bae'irodoho ëho nasi örire jövëro rovanovo hesi höjo. Eho bapataeto vaejevanovo'ajëjo. E'huni naehu nurunuru börömo baejajoho hujeji ë huë vavaenoho baegorovo evare mae hi'ejöjo. ⁵¹ Nani jemëro uehorovoromo uvarujëjo: Nöröhu rovade hesi bëhoho nöröro ajamuego sa'ae aho'obëhe iro muorovo'ohu vuonugö'i ma-huë baerovoromo gemuoro raromo'iröhego rovade höjo. Jemëro ëhi uvarujëjo röhu na bogo ehunioho rovode höjo. Bogo mae bogajo. A'i naehu rovode hesi bëhoho naru nasi jöho majëhijego aëro heromo adovoromo ae göëro jöe gö uehorovo'i ae göëro jöe gö uehorovo'irarijego rovode höjo. ⁵² Ehesi bëhoho nani agane gemuoho ae aho'obëhe övo gö mine osae gemuore huë mae raromoromo röhu a ioro'iorohuro avevejö'e aevoromo nasi muoho nimo'i ioro'iorohuro bogo nimoromo ae niö'i gemu jaburo jöe gö uehorovo'i ae niö'iro jöe gö uehorovoromo ëhuro huë sisë baeromo bogo gemuoroho avoho raromo'aruëjo. ⁵³ Vavuohuro uehore gö baeromo harihoho nue huodivo'i harihohuro uehore gö baeromo vavuoho nue huodivo'ajëjo. Vëmohuro uehore gö baeromo abojoho nue huodivo'i abojohuro uehore gö baeromo vëmoho nue huodivo'ajëjo. Ajohuro uehore gö baeromo ajoho nue huodivo'i ajohuro uehore gö baeromo ajoho nue huodivo'ajëjo. Ehi jiohe va'a'ajëjo.

Iesuhu mu masijo vaejade majae ë hesi bëhoho ariböviehu bogo avoho gavare jöhoje.

⁵⁴ Ēhi uēnugoromo Iesuro ae aho'obēhe uēvadeje: Jemēro gavaruje anumēhi sue rojomego uvaruje hōjo: Iae ēnēro rue'iē'ajējo. Rue'iē'ajējogo evare ēnoho rovaje hōjo. ⁵⁵ O jemēro gavaruje aruēhi bure rovego uvaruje hōjo: Birebire bōrōme jio'iē'ajējogo iae ēhi birebire bōrōme jiaje hōjo. ⁵⁶ Jemē sareri sareri'e ae jēvajējo. Jemēro sa'aho ō'idōho uherihoromo sue bure rabe rabe garomo uvaruje hōjo: Ēhesi bēhoho iae ēhi jio'iē'ajējo. Rōhu ave jaruvore rovaje muoho garomo ē hesi bēhoho bogo avoho garomo uvarujējo: Iae God-are mu bōrōmoho rovajējo. Diehi'oromo bogo avoho gavarujējo.

Aehu nosi jō sisē majahuijego noehu ma-burēro ahore vae'irōhe jōhoje.

⁵⁷ Rōhu jemē rabēni bogo avoho mevoromo gavaruje hōjo di muoho mae jiego. ⁵⁸ Ae gōehu jasi jō sisē hesirire jiē'ero ja baejavoromo court-re va'iē'iroho jemē niō'iro ōrire va'arujevaro jero hu'o jōho mevoromo ahore vae ganējo. Bogo ahore vaejē'oho huro gud-uamavoromo court gavaje a hesi ōvore bojami'ajējo. Bojami'iramu court gavaje ahuro police bojami'iramu savoji gagore ba'amavo'iramu ē hi'a'anuējo. ⁵⁹ Ēhi hiemu hijuvo moni bojami'iranoho aho'obēhe bojami barē nahonahovo'anuējo. Iae na mae uavajējo.

13

Uehoro sisē bogo vuonugē'oho sisērējēvo'irōhe jōhoje.

¹ Ēhi uēvamu gavē'i ē raromarohuro Iesu uavareje: Galilee sa'a raje ae gōero God-ni mie bahi'irōgoro muo'amare hōjo. Muo'amoromo kōe otehamu gavē'i Pilate-are muorovo aribōviohuro ro ē aribōvioho muo'amamu ēhuro jabesi kōhu'o God-are mi kōhu'o gemuore buarohē'e hōjo. ² Buarohē'e hōjamu hegorovo Iesuro uēvadeje: Na jemēro uvarujējo: ĒGalilee rajohuro Galilee rajo ioro'ioroho iosirēmiromo sisē bēhe jioruomē'ero ēhu'ero ēhi jiē'e huē vavaenoho baeromo vuovade hōjo. ³ Hesi bēhoho bogo ēhioho hōjo. Bogo mae bogajo. A'i jemēhu uehoro sisē bogo vuonugo'i God mae uehorovē'oho jabumē vuovēvadēhi ae aho'obēhe jemē'o ēhi i'uocho mana baeromo vuovēvo'ajējo. ⁴ O Jerusalem raje ae aho'obēhe 18 vuovēvade jōho uehorovohējo. Jerusalem amore Siloam jovo bēhire javu ēgobōviohuro ahoromo ae aho'obēhe 18 jabesi dōre ruvebiromo taemo'amade hōjo. Na jemēro uvarujējo: Taemo'amade Jerusalem amo rajohuro Jerusalem amo rajo ioro'ioroho iosirēmiromo sisē bēhi mae jioruomē'ero ēhu'ero ēhi jiē'e huē vavaenoho baeromo vuovade hōjo. ⁵ Bogo mae bogajo. A'i jemēhu uehoro sisē bogo vuonugo'i God mae uehorovē'oho jabumē vuovēvadēhi ae aho'obēhe jemē'o ēhi jiē'e i'uocho mana baeromo vuovēvo'ajējo.

⁶ Ēhi uēnugoromo ave uhu jōho majēhiromo uēvadeje: Ae gemu hesi ō'i bajo mure mesoho ri'ōjē'e jiade hōjo. Ri'ōjē'e jiamugo rueromo bōse nahoromo gavade hōjo bogojiamu. ⁷ Bogojiamu gagorovo mu arijo'ohuro mu ajamijaje aho uavade hōjo: Aveho gavējo. Na aviae rueromo bōse nahoromo ga'i hijode hōjo mesoho bajoho bogo raejē'e jiamu ga'i hijodoho vadune aho'obēhe niō'i gemu barējē'e hōjo. Ēhi jiē'e jiaje mesoho uejējo. Rabēni ēma nugo'iramu sa'a rihocho barē'ajējo.

⁸ Ĕhi uavamu hegorovo mu ajamaje ahuro uavade hōjo: Iae mae hōjo rōhu vuonugego vadune gemu gō'o namijego naro bēhire vo'onōe umo rova'oromo mi dēho ē bahijego ēhuro rihue bae'irōhe hōjo. ⁹ Rihu baebe va'oromo vadune gemu barējamu bajoraejē'iroho ēho iae mae jio'a'ajējo. O bogo raejē'oho uevego na mesoho ue'irōjo.

Magonahe gemu hesi deĵo gurorovē'e nuho majare Iesuhu ajamade jōhoje.

¹⁰ Iae Jew rajo jabesi nuho majae jiamu gagorovo Iesuro God rajahjarue osare hiromo jōho rōjēhijadeje. ¹¹ Rōhu ē osare magonahe gemu hijē'e jiadeje. Satan-are a sisē hesi dēre abuejē'ero ēhu'ero hesi sino haho'o sisērējadoho vadune aho'obēhe 18 barējadeje. Sisērōromo hesi dejoho gurorovē'ero ahorire nami'irōhoho bogo eni jiadeje. ¹² Ĕhi jiamu gagorovo Iesuro magonahoho garomo uvamu rovadeje. Rovamu uavadeje: Ma'ino ja marējavē'e hōjo. ¹³ Marējavē'e hō uaromo ōvoho sinore bamahamu gavē'i ahorire namiromo God huē mae uavadeje. ¹⁴ Ĕhi'amu God rajahjarue osa muebejaje ahuro gavade nuho majare Iesuro magonahoho ēhi ajamamu gagorovo dē vōrōnimadeje. Dē vōrōnimamu ae aho'obēhe uēvadeje: Mu vaejarue majaho majae aho'o ōvo gō mine ōvo gōre gemu ēhi hōjo. Ĕmajaro rovego hu jemesi sinoho ajēmi'irajo. Nosi nuho majaroho nadi ruerego hu ajēmi'irajo. ¹⁵ Ĕhi uēvamu hegorovo Badaro ē osa muebejaje aho uavadeje: Jemē sareri sareri'e aribōvie jēvajējo. Nuho maja jiē'iroho jemē ae aho'obēhe mue vaeromo jemesi ō mahu'oho jiovo'amoromo jovore sō ujuoho va'aruje hōjo jove ue'ahojōro. Na mae-ējo. ¹⁶ Jemēro jemesi ō mahu'oho nuho majare ēhi ajamijaruje hōjo. Rōhu ave magonahoho bogo ō mahu'ehu jio'i hu Abraham-are ujēro jiē'ero ēhu'ero God-ro huē baejaje magonahe hōjo. Rōhu Satan-hu hu tōvahadoho vadune aho'obēhe 18 barējajējo. Ĕhi jiē'oho naro rabēni nuho majaroho bogo ajamego bogo marējōrajo. ¹⁷ Ĕhi uēvamu hegorovo Iesu bijōnimoruomade aribōvioho aho'obēhe javoje bōrōme bae'i a ioro'iorohuro aho'obēhe uvoruomadeje: Iesuro mu mabēhe aho'obēhe vaejaje hō uvoromo nimorohoruomadeje.

Ijo hisue mustard-hu ēgovade uhu jōhoje.

¹⁸ Ĕhi'amu Iesuro jōe gō majēhiromo uēvadeje: God-hu bōrōme namiromo muebejēvaje ōroho naro uhu'e bu'ōromo jemē'o na'o ue-horovo'ejarējo. ¹⁹ Ijo hisu ihe mustard ujehu riromo ēgovoromo bōrōmo rijajēhi God-ro bōrōme namiromo ae gō'o gō'o ēhi gagovoromo muebejēvobe va'a'ajējo. Ae gemuēro mustard ijo hisu uje gemu baeromo hesi mure ōjade hōjo. Ōjamu riromo ijo va'ēne ēgovoromo bōrōmorijade hōjo. Bōrōmorijamu ugēro rueromo hesi adore ijue vae'amare hōjo.

I dē huaje osehu ire rumorovade uhu jōhoje.

²⁰ Ĕhi uēnugoromo jō gōho majēhiromo uēvadeje: God-hu bōrōme namiromo muebejēvaje ōri ē hesi uhu jō gōho naro majēhi'iē'ajējo. ²¹ I dē huaje osehu ire rumorovajēhi God-hu bōrōme namiromo muebejēvaje muohuro sa'ae aho'o ēhi rumorovobe va'aje hōjo. Magonahe gemuēro ie aho'obēhe gagovoromo i dē huaje osoho i gemuore bamoromo iohu'o buarohade hōjo. Buarohamu ē ioho aho'obēhe rumorovo barējade hōjo.

Ojo harihure va'iröhe ë hesi uhu jöhoje.

²² Ëhi'onugoromo Iesuro Jerusalem va'iröhëni amo masijore amo ininore jöho röjêhibe va'adeje. ²³ Va'amu ae gemuëro uavadeje: Bada naehu jö ua ga'ie'ajoho hejëjo. Na ae ma-gemu gemu ëhemu vuovoromo sisëroho bogo va'i God-are öri ari'eroho va'oromo maroho raromo'ejarëjo. O diehi jio'a'ajëjo. Diehi jio'a'ajëjamu Iesuro ae aho'obëhe uëvadeje: ²⁴ Sivo hemu sivo horomo ojo harihoro rumo va'o garëjo ëhuro ijönö God-are öri ari'ere va'irarije. Naro jemë uëvajëjo: Ae aho'obëhe rumo va'ie'iroho bogo eni jëvo'ajëjo.

²⁵ Röhu jemë ojo harihure bogo rumo va'ë'oho majae ijönö ë osa arijo'ohuro ri'öromo ojoho tugoho titimo'ajëjo. Ojoho tugoho titimo'iramu jemëro amonö riravoromo aevoromo ojoho ano'anovoromo osa arijo'oho ua'a'arujëjo: Bada oje jiovahuego ö'arëjo. Ö'arë'iramu huro uë'a'ajëjo: Jemë a rabëro rueruomoromo ojoho jiovëhojöro uvarujëjo. Ojoho na bogo jiovëho'ejöjo. ²⁶ Ojoho na bogo jiovëho'ejö'iramu jemëro ua'a'arujëjo: Röhu no ie jove ja'o gemu mae inövare höjo. Nosi amoroho jero jöho röjahuinövane höjo. ²⁷ Röjahuinövane hö'iramu rue osa arijo'ohuro uë'a'ajëjo: Jemë a rabëro rueruomoromo ojoho jiovëhojöro uvarujëjo. Jemë mu sisë vaejaruje aribövie jëvaje rori'o va'ohëjo. ²⁸ Va'ohë'iramu jemëro ga'a'arujëjo jemesi hijo miono'e Abraham Isaac Jacob o jö God-aro baeromo majëhinövare ae aho'obëhe God-are öri ari'ere ë raromoli jemë babu'öjëvo'iramu gagorovo nierusuburu'e bamoromo ane ja'iho vuogigimo'arujëjo. ²⁹ Röhu maja rojomajire beva'ajire arua anumiaie jioromo ae aho'o God-are öri ari'ere va'oromo ie ue'ahoromo'ajëjo. ³⁰ Ue'aho'iramu a ioro'ioire dejönö jiaruoho nuninö jioruomoli a ioro'ioire nuninö jiaruoho dejönö jioruomoli'ajëjo. Ëhuremu uehorovorëjo.

Iesuhu Jerusalem amo rajëni vavaenimade jöhoje.

³¹ Iesuro ëhi uëvamu gavëli Pharisee ae göëro rueruomoromo uavareje: Ri'öromo öre gö va'ëjo. Ave sa'a muebejaje ae Herod-ro anago'ie'ajëjo. ³² Anago'ie'ajëjamu hegorovo Iesuro uëvadeje: Herod hu sareri'e mu vaejaje ö sisëho va'ëne ae höjo. Va'oromo hu uarëjo: Ave jöho hejëjo. Nörö hiromo Satan-are aru'aho sisë aribövi jabesi dëre jio'amajoho rarovö'öjëvobe a jabesi sinoho avohëvobe va'ojuvo evare nasi muoho barë'ajëjo. Ëhi uarëjo. ³³ Röhu iae na ave sa'aho vuonugoromo örire juvobe hibe va'ojuvo evare Jerusalem hörö'ejöjo nasi muoho ëhi jië'lëro. Ëhesi bëhoho jö God-aro baeromo majëhijarue ae aho'obëhe ë amoremu muo'amamu vuovëvobe rovë'e höjo. Ëhuni na'o ë amore va'iramu anego'iramu guomo'ejöjo.

³⁴ Vaevë'e Jerusalem amo rajohumë jemëro jö God-aro baeromo majëhijarue aribövioho muo'amaruje höjo. God-hu jemëni rëmö'öjaje aribövioho munëro väjëmijaruje höjo. Kököröko vëmehu harihu vivoju uhure nugo'amoromo diehehu aegëharuëhi naro jemë ëhi gagovëvoromo gemuore rëmo'li nimo'li hijode höjo röhu jemëro bijönimarije höjo. ³⁵ Ëhuni ave jöho hehëjo. God-ro jemesi amoho vuonugego jemesi sivue jëvo'ie'ajëjo. Naro jemë'o hiromo va'iramu jemë nasi nu ano'oho bogo ga'a'arujëjo hujeji na vuonorö'ö rue'iramu

evare avoho geromo ue'a'arujêjo: Bada God-are ihore rovanuoho mabêhe rovanuêjo. Ëhuremu uehorovorêjo.

14

Övo hörue huê'e a Iesuhu nuho majare ajamade jôhoje.

¹ Iae Jew rajo jabesi nuho majaho rovamu Iesuro Pharisee a bôröme gemu hesi osare ie i'li va'adeje. Osare va'amamu gagorovo Pharisee ariböviohuro ë raromoro Iesu ga'i muebejareje hu mu sisë o rabe ë'ego. ² Rôhu ë osare ae gemu hijê'e jiadeje. Hesi övo hörue aho'obêhe huo'amê'e jiadeje. ³ Huo'amê'e jiamu gagorovo Iesuro ri'öromo Jew rajo jögoru öri rôjêhijarue ariböviohu'o Pharisee ariböviohu'o uêvadeje: Nuho majare a jabesi sino ajëmiijê'oho na êhuro no nosi jögoroho aharue hôjo o bogajo. ⁴ Bogajamu rueho jaburo jörumoraejareje. Jörumoraejamu Iesuro aho baeromo sinoho avohahoromo nugö'öjamu va'adeje. ⁵ Va'amamu gavê'i Iesuro uêvadeje: Nuho majare jemesi harihoho o mioho jovo'e guare beva'ibejajo na jemë burëro io barojomo'ibejarijêjo o bogajo. Iae jemë êhi ë'ibejarijêjo. ⁶ Êhi ë'ibejarijêjamu jö mana uaröhoho bogojêvadeje.

Nosi arijo'arije ba'obuero'iröhe jôhu'o inömo rumo'e aribövi ajëmi'iröhe jôhu'o ë jôho niö'i jêve.

⁷ Jöe bogojêvamu Iesuro gavade ë ruenugade ariböviohuro rôho mamahemu baeromo raromamu gëgorovo uhu'e uêvadeje: ⁸ Aehu ja uavê'oho: Rueromo masuröhe sörö inë uavê'iroho nadi jasi sivuoho uehorovoromo va'o a masijo raromaruiroho hinêjo. Ja êhi ë'ê'oho nani ae gö jasi iho iosiramijê'ohuro söröre rue'a'ajêjo sörö arijo'ohuro mami'e uavê'ëro. ⁹ Rovê'oho ja'o a bôrömo'ohu'o ruejôro uêvade ahuro rueromo ja ua'a'ajêjo: Röhe bojamego hu ë hijajo. Êhi uavê'oho ja javoje baeromo rori'o va'o hi'a'anuêjo. ¹⁰ A'i aehu ja sörö ro ijôro uavê'iroho va'oromo ma-rori'o hinêjo. Êhi ë'ê'oho ro ijôro uavade ahuro rueromo ua'a'ajêjo: Isio dôro ajio hijêjo. Ajio hi'iramu gagorovo sörö ue'aharue ariböviohuro uehorovavoromo uvo'a'aruêjo: Ja a bôröme javajêjo. ¹¹ Êhesi bêhoho ae rahu hesi sivue uehorovoromo dôre bamorovê'oho hesi ihoho abue'a'ajêjo. O ae rahu ba'obuero'iröhe hesi ihoho dôro ajiomo'ajêjo.

¹² Êruenugade aribövioho Iesuro êhi uënu'ogoromo huotorovoromo ro i ijôro uavade aho uavadeje: Jaehu i harihu maja'e o jeni'e bamo'iê'iroho nadi jasi aemo'aemoho ö mueno'oho bövi bise'o marohê'e mae jiê'e bêhire raromarue aribövioho nadi êhi jiê'e ariböviohemo'ohu'o uêvego ro ioho ue'ahoh'irarêjo. Uêvê'oho jabumëro ijönö mana bojami'iramu jasi suvuoroho bae barê'anuêjo. ¹³ A'i jaehu i bamo'iê'iroho bövi bise'o bogo eni jiê'e aribövioho övo hörue sisê'e o nuni sisê'e aribövioho êhi jiê'e aribövioho uêvego rue'irarêjo. ¹⁴ Êhi ë'ê'oho ë ariböviehu mana bojami'iröhoho bogo eni jêvê'ëro ja huë mabêhe bae'a'anuêjo. Hujeji mu mae vaejarue aribövioho vuovê'ëro i'ovoromo ri'öruomo'iramu evare God-ro jasi manaho bojami'ajêjo.

Sörö bamamu aehu juahamare uhu jôhoje.

15 Ëhi uavamu hegorovo Iesu'o raromoromo i iruomade ae gemuëro Iesu uavadeje: Ariböviehu ri'öromo God-are öri arilere va'o raromoromo i ue'aho'iröhoho no huë mae bae'ejarëjo. 16 Huë mae bae'ejarëjamu Iesuro uhu'e uavadeje: Iae ae gemuëro sörö böröme baeromo ae aho'obëhe uëvade höjo: Rueromo söröe i'a'arujëjo. 17 Ëhi ë'ë'ëro sörö majaha rovamu hesi mu vaejahaje aho nug'öjamu sörö anue va'oromo ae uëbe juvoromo uëvade höjo: Söröho eni jiajëjo. Evaro ruehëjo. 18 Ëhi uëvamu hegorovo ae aho'obëhe mae juahamare höjo. Ae göëro ri'öromo uavade höjo: O asë'ëjo. Na ö'ibejodoho röhu na sa'ae i'e imë'ëro ë va'oromo ga'ejëjo. 19 Ae göëro uavade höjo: O asë'ëjo. Na ö'ibejodoho röhu na mu vaejaje mioho aho'obëhe 10 imë'ëro ëhuni ë va'oromo ga'ie'ajëjo gë'i mae ë'oruomego. 20 Ae göëro uavade höjo: Na magonahe masuv'e lejev'ëro ëhuni bogo ö'ejëjo. 21 Ëhi'amu rue ahuro vuonorö'ö rueromo hesi a börömoho uavade höjo: Ëhi ëhi uevare höjo. Ëhi uevare höjamu rue osa arijo'ohuro vörö'iraeromo hesi aho uavade höjo: Ma-burëro va'iranoho amo'e öri masijoho ininoho aho'obëhe juvo barënëjo. Juvo barëromo bogo eni jië'e aribövioho sino sisërëjë'e aribövioho nuni sisë'e aribövioho hörü sisë'e aribövioho ëhi jië'e aribövioho ujuoho ruenëjo. 22 Ëhi uavamu ejahoromo ëhi ë'ë'ëro jië'ëro rueromo hesi börömoho uavade höjo: Ja uevanëhi iae na ëhi ë'ë'e jevajëjo. Röhu röhe iae jiajëjo. 23 Röhe iae jiajëjamu rue börömohuro uavade höjo: Mu öröro je'o öröro va'iranoho dinëmiromo uëvego ae aho'obëhe ruero'irajo ëhuro nasi osaho irijiomol'iröhe höjo. 24 Na jemë ae aho'obëhe uëvajëjo: Na urimo uëvamu juahemijare aribövioho nasi i sörö'oho bogo i'a'aruëjo. Bogo mae bogajo.

Bëhoho uehorovo avohoromo evare Iesuarë ijore ijore jijihol'iröhe jöhoje.

25 Iae ae magonahe aho'obëhe siri va'ëne Iesu'o gemu mae örire jijihoruomonövadeje. Jijihujuvo Iesuro huotorovoromo uëvadeje: 26 Jemëhu nasiro rov'öho jemesi vëmu vavu'e vabore aboji harihu'e öe ma'ine nadi ë aribövioho nuninöho bamo'i na dejonöho remorëjo. Röhu avehu'o gemuoho höjo. Jemëhu ave sa'are raro'irarijoho nadi ëho nuninöho bamo'i na dejonöho remorëjo. Jemëhu bövie bise'le göemu göemu nuninö bamë'öho nasi ijore ijoroho bogo jijihol'arujëjo. 27 O ae rahu ja bogo uvë'öho: Iesuarë jöëni vi'ehe huë vavaene javoje rabe baeromo guomev'öho iae hesi hö uvoromo bogo korosi hesi i'u banigojio'ianovoromo nasi ijore ijore juvë'öho ja bogo nasi ijorajoho javo'ajëjo.

28 Nasi ijore ijore jijihol'ie'iroho ëho mu böröme jiaje nadi ëma jijihol'i urimo uehorovo avohoromo evaro nasi ijore ijoroho jijihorëjo. Ehesi bëhoho ae rahu ja javu ëgobövi vae'ie'iroho bogo ëma vae'i urimo sa'aro hiromo javu vae'irane monioho adaho ga'a'anuejo ga'i vae barë'irane monioho eni jiego o bogo. 29 Ja bogo adaho gavë'öho ëhuro nani sa'ahemu vaeromo ga'a'anuejo monioho barë'iramu vituoho vuonugo'anuejo. Vuonugol'iramu ae aho'obëhe ëho garomo ja sivagoromo uvoruomol'ajëjo: 30 Èsareri'e aho javu ëgobövie vae'ie'oromo bogo eni jiamu vituoho vuonugade höjo.

³¹ O uhu jö göho bëhe gemuoho höjo. Sa'are a börömo göehu sa'a a börömo göhu'o muorovo'ië'iroho hu bogo ëma muorovo'i urimo sa'aro hiromo uehorovoromo uvo'a'ajëjo: Rue a börömo göhuro muorovo ae aho'obëhe 20,000 ae aho'obëhe mae sö ujuohe rovajëjo. Na muorovo ae aho'obëhe 10,000 ma-vevino'e ëhemu jevajëjo. Naehu hu'o muorovë'oho na na eni jevo'ajëjo o bogo eni jevo'ajëjo. ³² Èhi uvonugoromo uvë'oho: Bogo eni jevo hesi hö uvë'oho muorovo'i rovaje a börömo bogo bëhiroho rovë'e evare ve hijaje a börömo göhuro hesi aho rëmö'ö'iramu va'oromo rue rovaje a börömo göho sanuamiromo jö mae majahiromo ua'a'aruëjo: No diehi'oromo muorovoho tugohoromo avoho raromo'ejarejo. ³³ Èuhu jö hesi bëhoho jemëhu jemesi sa'ae inömo inöme bövie bise'e uehorovarujoho bogo vuonugë'oho bogo nasi ijarahö öm'ömoho jëvo'ajëjo.

Rihu rumo'e sö hesi uhu jöhoje.

³⁴ Nasi ijore ijore jijiharujoho jemë sö va'ëne jëvajëjo. Söho rihu'e mabëhe höjo. Röhu sö hesi rihu barëjë'oho röhu bogo maho avoho hesi höjo. ³⁵ Èhu'ëro ë hesi muoho bogohöjo. Bogo muroho ruruhö'öjeho muoho rihuvu'i bogo mi dëhu'o buarohoromo bahijego muoho marë'i a'i ëhi jië'e söho ma-ruruhö'öjarue höjo. Ae rahu ja God-are jö hejanue ae javë'oho bëhoho nahoromo birohönëjo.

15

Sheep subirö'öjamu nahoromo birohade uhu jöhoje.

¹ Iae vajiohu'e tax baejarue ariböviohu'o sisë aribövi ioro'iorohu'o ëho jaburo Iesuarue jöho he'i rueruomadeje. ² Rovamu gagorovo Pharisee ariböviohu'o Jew rajo jögoru öri rëjëhjarue ariböviohu'o uarovareje: Èsareri'e ahuro sisë aribövioho rajëhiromo jabu'o gemuoro ie ijaje höjo. ³ Ijaje höjamu Iesuro uhu'e uëvadeje:

⁴ Jemë ae gemu sheep aho'obëhe 100 javo'i gemu subirö'öjë'oho ja diehi'onëjo. Ja sheep ioro'iore mure raromaruoho ëhi nugo'amö'i va'oromo ë sheep gemu'oho nahobe juvojuvo hujeji vae göro birohö'anuëjo. ⁵ Birohonugoromo nimorohë'i babuarirromo amëro rue'a'anuëjo. ⁶ Rueromo jasi amo rajoho aganoho uë'a'anuëjo: Nasi sheep subirö'öjadoho iae birohë'e jevajëjo. Èhuni ruehego no gemuoro nimoroharëjo. ⁷ Èhesi bëhoho naro uë'ië'ajëjo. Ö'idöre raromarue ariböviohuo gavarue ae gemu öri sisëre juvajoho vuonugo'i huotorovoromo öri mare juvamu gavë'oho nimoroho avoharue höjo. O gavarue ae aho'obëhe jabesi sivue uehorovoromo uvamu: No mae javuë'ëro ëhu'ëro mu sisë vuonugo'iröhohoho bogojavuajë uvamu gevë'oho bogo ëhioho nimoroharue höjo.

Subirö'öjë'e ijo bajo nahoromo birohade uhu jöhoje.

⁸ O uhu jö göho hehëjo. Magonahe gemu ajivë'e ijo baje aho'obëhe 10 jiajoho gemu subirö'öjë'oho hu diehi ë'a'ajëjo. Iroho buenugoromo ari sisuoho bibivë'i ma-avoho nahobe juvoromo hujeji vae göro birohö'ajëjo. ⁹ Birohonugoromo hesi amo rajoho aganoho uë'a'ajëjo: Subirö'öjë'e ijo bajoho birohë'e jevaje ëhuni ruehego no gemuoro nimoroharëjo. ¹⁰ Èhesi bëhoho na uë'ië'ajëjo. God-are anerahuro

gavarue ae gemu öri sisëre juvajoho vuonugo'i huotorovoromo öri mare juvamu gavë'oho nimoroharue höjo.

Ijorajo subirö'öromo vuonorö'ö rovamugo vavuehu hu rajahi'i muriehu bijönimade jöhoje.

¹¹ Èhi uënu goromo Iesuro uhu jöe gö'o majëhiromo uëvadeje: Iae ae gemu harihe niö'i jëvade höjo. ¹² Harihe niö'i jëvë'ëro ijorajohuro ri'öromo vavuoho uavade höjo: Apo ja guomavego naehu ujuoho'irodego uevane bövioho bise'oho avevejë'e bojëmëjo. Bojemijëjamo rue vavuohuro hesi bövioho bise'oho adovoromo harihu göho ioni göho bojami'i harihu göho ioni göho bojamijade höjo. ¹³ Bojamamu majae ma-gemu niö'i barëjamo rue ijorajohuro huhu ujuohadoho imo'amo barëromo monioho baeromo va'ade höjo. Va'adoho va'ojuvo öri ëgöböviro sa'a göro va'oromo nimoronimorohë'i hiromo hesi maho sisëho ma-bu'önövade höjo. ¹⁴ Èhi bu'öbe va'amu hesi bövioho bise'oho barëjahade höjo. Barëjahamu ë sa'are iruno'oho aho'o barëromo ë sa'are aribövioho vadunëro vuovamu ë aho huë vavaene böröme baejë'e hijade höjo. ¹⁵ Èhi hiromo va'oromo ë sa'aho raje ae gemu uavade höjo: Ja mue javë'oho uevego na ë jasiro mue vaejöjo. Mue vaejöjamo ruehuro uavade höjo: Mahu muohuro va'oromo mahe mio'amonëjo. ¹⁶ Mahe mio'amonëjamo ë Jew rajehu sisë hö uvarue muoho baeromo va'oromo mahoho mueberomo hömamu uvade höjo: Raro mahu ioho babojemego na ijego da'uego'irajo. Èhi uvade höjo röhu a vadu'oho ioho bogo bojamare höjo. ¹⁷ Bogo bojamamu hiromo ijönö avoho uehorovoromo uvade höjo: O apare mu aribövioho ie aho'obëhe jëvë'ëro i barë'iröhoho bogo eni jëvajëjo. Na aviae harihoho jevajëjo röhu vadunëro guomevo'ië'ajëjo. ¹⁸ Èhuni naro ri'öromo aparo va'oromo ua'ejöjo: Apo naehu God-are örire jasi örire huë vavaeni bojëmodoho ëho naro mu sisë vaejë'e jevajëjo. ¹⁹ Na a sisë jëvë'ëgo ëhuni ja bogo na harihoho ue'a'anuëjo. A'i jasi muoro bamevego na muoho vaejahoromo manaho bae'iröjo. ²⁰ Èijorajohuro ëhi uvonugoromo ri'öromo hesi vavuehu hijajire va'i va'ade höjo.

Va'i va'amu vavuohuro gavade höjo arue riribövire hesi harihoho rovamü. Ganugoromo vavaenimoromo tutuvo va'oromo guduamoromo dudöhade höjo. ²¹ Dudöhamu rue harihohuro uavade höjo: Apo naehu God-are örire jasi örire huë vavaeni bojëmodoho ëho naro mu sisë vaejë'e jevajëjo. Na a sisë jëvë'ëgo ëhuni ja bogo na harihoho ue'a'anuëjo. ²² Èhi uavamü hejë'i rue vavuohuro harihoho bogo ejaho'i hesi mu vaejaha rue aribövioho uëvade höjo: Ma-burëro va'oromo niögu maho jaegoho höru guduoho ëhi jue'ini ujuohaho rueromo sinoro övo gaenoro höroro io'amahohëjo. ²³ Jëmëhu ma-je i muoharuje sanuovë'e mioho baro anohego no i sörö'e iromo nimoronimoroharëjo. ²⁴ Urimoho naro uvode höjo: Nani nasi harihoho guomë'e höjo. Nani diehi ë'ë'e höjo. Avevejö'oho na gavajoho hu iae hijajëjo. Urimoho öri ari'e göro subirö'öjade höjo. Avevejö'oho iae birohë'e jevajëjo. Èhuni ë'ëgo no nimoroharëjo. Èhi uëvë'ëro söröe iromo nimoro nimore bamare höjo.

²⁵ Èhi'amu gavë'i iae muriohuro muro hijade höjo. Muro hiromo amo bëhire rue'i hejade höjo javavo'ëgo jajoho hëgöho rovamü. ²⁶ Jajoho

hëgöho rovavamu hegorovo mu vaejarue ae gemuëro ruejoro uaromo rovam uavade höjo: Rabëni ë'aruëjo. ²⁷ Rabëni ë'aruëjamu ruehuro uavade höjo: Jasi ijorajohuro rovam jasi vavuohuro gavade hesi harihoho raboho raboho bogo ë'ë'e hesi örire ma-mae rovam gagoro ma-je i muoharue sanuovë'e mioho huni anahade höjo. ²⁸ Anade höjamu rue muriohuro dë vörönimamu osare va'iröhoho bijönimade höjo. Bijönimamu vavuohuro amonö hörö rueromo uavade höjo: Nadi juahovo'i osaëro rueromo ioho ma-ijëjo. ²⁹ Ijëjamu rue muriohuro uavade höjo: Aveho hejëjo. Jasi jöho na bogo gemu vadu'oho ahaho'i vadune vadune na jasi muohemu vaejahobe rovë'e jevajëjo. Iae ëhi höjo röhu mi mae o mi sisë'ëhu'o bogo bojemijane höjo ëhuro naehu nasi aemo'aemohu'o iromo nimoroho'irodoho. Bogo mae bogajo. ³⁰ Nasi öriroho bogo bojemi'i jasi harihoho magonaho sisëho ga'amoromo ëhuro jasi maho sisëho i barëjë'ëro rovam gavë'i jero sanuovë'e mi mabëhoho anoromo hesi örire bojamane höjo. ³¹ Bojamane höjamu rue vavuohuro uavade höjo: Jue'i ja majae ëhi na'o gemu mae hijanue höjo. Nasi sa'ae are inömo inöme ie bövie bise'e aho'o ma-jasiremu höjo. ³² Èhi höjo röhu urimoho naro uvode höjo: Nani jasi ijorajoho guomë'e höjo. Nani diehi ë'ë'e höjo. Avevejö'oho na gavajoho hu iae hijajëjo. Urimoho öri ari'e göro subirö'øjade höjo. Avevejö'oho iae birohë'e jevajëjo. Èhuni noehu huë mae baeromo nimoronimorohë'oho iae mae höjo.

16

Ae gemuehu hesi a börömo hesi mu sisë'i muebejahoromo röhu uehoro mae birohade uhu jöhoje.

¹ Iae Iesuro hesi ijorajo ömo'ömoho uhu'e uëvadeje: Iae moni marohë'e jië'e ahu'o hesi mu muebejahaje ahu'o jaburo niö'iro arijare höjo. Ariromo eni jië'e ahuro hejade höjo uavamu: Jasi mu vaejahaje ahuro jasi inömo inömo ma-bu'øjahaje höjo. ² Ma-bu'øjahaje höjamu hegorovo ë iahuni uvoromo rovam uavade höjo: Jaehu ë'anuoho na hejë'e jevajëjo. Nasi mu muebejanuoho vuonugo'anuëjo. Èhuni nasi mu suri surioho ujuoho ro memego na gavöjo ja nasi mu diehi muebejanoho. ³ Èhi uavamu rue mu muebejaje ahuro uehorovoromo uvade höjo: Nasi a börömhuro uevajëjo naro muoho vuonugojöro. Èhuni na diehi'o'ejöjo. Sa'a umoromo o ëhi jië'e i'u'e mu gö vae'irodoho darugoho bogo eni jevajëjo. Ae gö jabesi örire ëninëmi'irodoho na javojegajëjo. ⁴ O iae na uehorovajëjo. Na ae ajëmiromo ëhi ë'ejöjo ëhuro nasi börömhuro remö'øjego na va'ego jabumë ae göëro göëro ueruomoröhego: Nasi osaro rovëjo.

⁵ Èhi uvonugoromo ae rahu rahu inömo inöme rabe rabe hesi a börömo bojami'iröhohuni jöe nugö'öromo uëvade höjo ae gemu gemu ruejoro. Urimore ahuro rovam mu vaejaje ahuro uavade höjo: Nasi a börömo hesi örire mana bojami'iranoho dimino'e javajëjo. ⁶ Dimino'e javajëjamu uavade höjo: Jovo'e rama masije aho'obëhe 100 bojami'irodoho jevajëjo. Bojami'irodoho jevajëjamu uavade höjo: Ja dimino'e bojami'irane jöho jië'e jiaje ave suroho baejëjo. Baeromo ma-burëro sa'aro hiromo ramae 100 bojami'irane jöho mu'u'i ba'obueromo ramae aho'obëhe 50 bojami'iranoho jajivëjo. ⁷ Èhi ë'ë'ëro ae göëro

rovamu mu vaejaje ahuro uavade hōjo: Ja'o bojami'irano ho dimino'e javajējo. Dimino'e javajējamu uavade hōjo: I esōe aho'obēhe 100 bojami'irodoho jevajējo. Jevajējamu uavade hōjo: Ja bojami'irane jōho jiē'e jiaje ave suroho baeromo esōe 100 bojami'irane jōho mu'u'i ba'obueromo esōe aho'obēhe 80 bojami'irano ho jajivējo. Ēhi'obe va'ade hōjo. ⁸ Ēhi ē'ade jōho hejē'ero a bōrōmohuro hesi mu sisē'i muebejaje aho uavade hōjo: Ja uehoro mabēhe mae rovavamu ēho ē'ane hōjo. Ēhi rajahijade hesi bēhoho ave sa'a hesi muohemu uehorovarue aribōviahuro uehoro mabēhe birohoro mo jabesi muoho vaeruomaje hōjo. A'i God-are aji'e mu uehorovarue aribōviahuro simane sisē'i sisē'i uehorovoromo muoho vaeruomaje hōjo.

⁹ Ēhesi bēhoho na uē'ejōjo. Jemēro ave sa'a hesi monioho baeromo ēhuro mu mae vaeromo jemesi agane baejēvorējo. Ēhi ē'ē'oho ēhuro vuovēvo'iramu moni hesi bēhoho barē'iramu God-ro uē'a'ajējo: Nasi amoro rueromo ma-ioro'io remu raromohējo. ¹⁰ Ae rahu mu inino avoho muebejē'ohuro mu masijohu'o avoho mueberuomo'ajējo. Ae rahu mu inino sisē'i muebejē'ohuro mu masijohu'o sisē'i mueberuomo'ajējo. ¹¹ Ēhuni jemē ave sa'a hesi inōmo sisē'i muebejē'oho God rabēni ō'idō hesi inōmo maho bojēmi'ajējo jemēro muebejōro. ¹² O jemēhu ae gō hesi bōvi bise'o bogo avoho muebejahē'oho God rabēni bōvioho bise'oho i'imēmī'ajējo jemesi ujuohōjōro.

¹³ Ae niō'i bōrōmoho gemuoho jēvajēromo jabesi mu gemuore havoromo vaejē'oho bogo eni javo'ajējo. Ja gōho nue huodivo'i gōho rajahi'anuējo. O gōho mae uehorovo'i gōho bijōnimo'anuējo. Ēhesi bēhoho God'o moni'o niō'i bōrōmoho gemuoho jēvajēromo gemuore havoromo mu vaejē'oho bogo eni javo'ajējo.

Iesuhu jō masije gō gō majēhijade jōhoje.

¹⁴ Iesuro ēhi uēvamū hejē'i Pharisee aribōviahuro moniemu uehorovoromē'ero Iesu sivareje. ¹⁵ Sivamu hegorovo Iesuro uēvadeje: Jemē ma-dōeremu mu maho vaejaruje hōjo aēro jemē gēromo uvojōro: Ēaribōvioho mu mae vaeruomaje aribōvie jioruomajējo. Rōhu jemesi dē vōvōbajo'oho diehi jiajoho God iae gē barējaje hōjo. Huhu jemesi dē vōvōbajo'o gēvē'oho aehu gēvaruēhioho hu bogo ēhioho gēvaje hōjo. Ēhesi bēhoho aehu sarerivoromo uvarujohō: Mabēhe hō uvarujoho God-hu gavajoho sisē bēhe hōjo.

¹⁶ Urimē'i Moses-hu surire jajivade jōgorohu'o jō God-aro baeromo majēhinōvare a ioro'io ro jabesi surire jōhu'o aehu hebe rovaroho evare John rovade hōjo. John rovamu evare God-hu bōrōme namiromo ae aho'obēhe muebejēvaje ē hesi huē ma jōho aevoromo rovē'e hōjo. Aevoromo rovē'ego ae aho'obēhe daruge aho'o bojamirovoromo biririvoromo ōroho jiovoruomaje hōjo ēhuro God-ro muebejēvego hesi aharinō jēvorōhego. ¹⁷ Ēhi jiē'e mu i'oho rovē'e hōjo rōhu God-hu urimo bojēmade jōgoroho bogo barē hesi hōjo. Ō'idō'o sa'a'o sisērējē'oho ēho samae hōjo. A'i God-are jōgoroho gō bogo bisemu vadu'oho sisērē hesi hōjo.

¹⁸ Rōhu jō gōhajo. Baruehu vaboro nugō'ō'i gō masuvē'oho ēho bogo masuvē'e muoho jio'i goho'amarue muoho hōjo. O aehu

nugö'öjê'e magonaho masuvê'oho bogo hesi vaboro maho masu'i êho goho'amarue muoho hõjo.

Inõmo ma'e ahu'o Lazarus'o jabu niö'ihu ë'are jö Iesuhu jövadohoje.

¹⁹ Iae ae gemuëro hijade hõjo. Hesi inõmo inõme are sa'ae bövie mae jiade hõjo. Niõge sanuovê'e kavuê'e mabêhe io'amonövade hõjo. Iruno'e aho'obêhe sörönö'e iromo nimoronimorohonövade hõjo. Majae aho'o êhi gemu êhi'obe rovade hõjo. ²⁰ Êhi'ego inõmo'e a hesi ojanore bövi bise'o bogojîê'e ahuro ë raromonövade hõjo. A ihoho Lazarus jiade hõjo. Lazarus-are sino haho'oho ma-sagohemu jiê'e jiade hõjo. ²¹ Sagohemu jio'ego Lazarus-ro nimonövade hõjo eni jiê'e a hesi i vitu vituoho i'irovo êhuro da'uomojõro. Röhu vaevê'oho öëro rueruomoromo hesi sagohoho sêhahonövare hõjo. ²² Êhi'ojuvo iae ë bövi bise'o bogojîê'e aho guomade hõjo. Guomamu aneraëro hesi aru'ahoho bava'amu nosi bêhe Abraham-are guruto mare avoho hijade hõjo. Hijamu ë eni jiê'e ahu'o guomade hõjo. Guomamu guavare hõjo. ²³ Guavamu vuovarue ariböviehu raromaruire va'o hijade hõjo. Hiromo vi'ehi sisê bêhe baejê'ëro nunëro ga avoho'i gavade hõjo Abraham arue riribövire hi'i Lazarus Abraham-are guruto mare hijamu. ²⁴ Êhi gënuogoromo ma-darugo'o uvade hõjo: Saso Abraham-ajo. Nani vavaenimoromo Lazarus nugö'öjêgo huro hesi övo namoho jovore ba'amoromo rueromo nasi bitaroho rêhoromo sanuoveho'irajo. Na vëniro jevê'ëro sisê maro vi'ehégavajêjo. ²⁵ Vi'ehégajêjamu Abraham-ro ri'öromo uavade hõjo: Sasajo. Aveho uehorovêjo. Sa'are hijê'i ja huê ma-mabêhe birohane hõjo. Lazarus hu hijê'i ma-huê sisêmu birohade hõjo. Röhu jaruvoho Lazarus-ro sanue baeromo hijajêjo. Jero vi'ehi bõrõme baeromo hijanuêjo. ²⁶ Röhu jö göho êhu'o hejêjo. No aviae javuo'i jemê aruae jëvavajêjo. Röhu ririre hahe guorõte jiê'ëro êhuro ave jioromo jemesirire ö'ë'oho bogo eni jio'i jemesirire jioromo ave rovê'oho bogo eni jiajêjo. ²⁷ Bogo eni jiajêjamu uavade hõjo: Saso êhi jiê'oho huê baejevoromo Lazarus nugö'öjêgo huro nasi aganehu raromaruire va'ajo. ²⁸ Na öe aho'obêhe övo gö mine jevê'e jiaje uavego Lazarus-ro va'oromo nasi ö ömo'ömoho jögore majêhi'irajo êhuro ave vörö'eroho bogo rueruomorõhe hõjo. ²⁹ Êhi uavamu Abraham-ro uavade hõjo: Röhu jasi ö ömo'ömoho Moses-are surire jõho mami'e gavarue hõjo. Jö God-aro baeromo majêhinövare a ioro'ioro jabesi surire jõhu'o gavarue hõjo. Êhuni nadi'ego jabumëro jabesi jõho ejêho'irarêjo. ³⁰ Ejêho'irarêjamu uavade hõjo: Saso Abraham iae êhi hõjo. Röhu surire jõho bogo eruomo'ajêjo. A'i vuovoromo ave ro raromajire aehu ë jioromo ri'ö va'oromo jö majêhijamu hejê'iroho iae jabu huotorovoromo mae uehorovo'aruêjo. ³¹ Mae uehorovo'aruêjamu Abraham-ro uavade hõjo: Bogo êhioho jio'a'ajêjo. Jasi ö ömo'ömoho Moses-are surire jõho bogo ejaharue hõjo. Jö God-aro baeromo majêhinövare a ioro'ioro jabesi surire jõho bogo ejêharue hõjo. Jabesi jõho bogo ejêhobe rovê'ëro he'irõhe ae gö guomoromo ri'öromo jö majêhijamu hejê'oho hesi jõhu'o bogo ma uehorovo'aruêjo.

17

Mu sisê hesi jõhoje.

¹ Ĕhi'oromo Iesuro hesi ijorajo ömo'ömo ho uävadeje: Göehu gö bijioho gavego sisë vaeröhe muoho iae ruenövo'ajëjo. Iae ëhi jio'a'ajëjo röhu ae rahu ë mu barovë'oho vaevë'oho sisërë'ajëjo. ² Asisö'onö'e jörume rarumarue ae gemu mu sisë röjahijamu bejë'oho mu sisë bogo röjahijajevare ë mu sisë röjahijaje a hesi sönö'ahore aëro i'u'e munë hitahiohuro tövoromo sö jovore ba'amego e'ure beva'oromo guomo'ibejajo ëho majjanovo'ibejajo. A'i ë mu sisë röjahi'iröhe ë hesi i'uoho börömo bëhe bae'a'ajëjo. ³ Ĕhuni avo'avoho mueberovorëjo.

Jasi öehu jasi örire sisë vaejavë'oho ahonëjo. Ahamu huhu huotorovoromo uehoro mae baejë'oho ëhuro jero hesi sisëho uehorovoromo vuonugonëjo. ⁴ O majae gemu röhu mu sisë gö'o gö'o vae 7 vaejavo'i hiromo röhu vae 7 ro ua'i hijë'oho: Iae naro mu sisëho vaejë'ëro jevë'ëro vuonugotejö ua'i hijë'oho jero uehorovoromo vuonugaho'i hinëjo.

God mae uehorovoromo ëhuro mu masijo vaeröhe jöhoje.

⁵ Ĕhi uëvamu Iesuare apostle ömo'ömo huro ri'öromo Bada uavareje: Iae no jasi darugoho ma-bisemu mae uehorovarue höjo. Röhu jero ajamuego no mae uehorovo avoho'irarëjo. ⁶ Mae uehorovo avoho'irarëjamu huro uhu'e uävadeje: Mustard bajoho inino mae jio'amajëjo. Mustard baje gemu ma-bise'o jiajëhi ëhi uehoro mae ma-bisemu baeromo God mae uehorovo'ibejarijëjo ave namijaje ijo börömo ho ua'ibejarijëjo: Jasi jahorovëjo. Jahorovoromo va'oromo sö jovohuro jasi ba'amorovë ua'ibejarijëjo ë ijohuro jemë ejëho'ibejajo. Mae uehorovo'ibejarijëjo ëhi jië'e muoho vae'ibejarijëjo.

A börömo hesi mu vaejarue uhu jöhoje.

⁷ Röhu jö göho jemë nasi jö hejaruje aribövioho nani ja ae gemu jasi muemu vaejaje ae javajëjo. Nani huro jasi muro hiromo sa'aho avohaho'ajëjo o ö mahu'oho muebejaho'ajëjo. Mu vaeromo rovë'oho na ja hu uanëjo: Ro hiromo ie ijëjo. Ja bogo ëhi jië'e jöho ua'i ⁸ a'i ua'a'anuëjo: Nasi ioho avohehoromo jasi niögoho avoho ruohoromo ro ioho jovoho i'imemego na i'iröjo. Na ijego evaro ja'o inëjo. ⁹ Jaehu mu jö ëhi bojamamu hu ejahoromo mu vaejë'oho na ja uanëjo: Mabëhe huë baejevoromo ajemijane höjo. Bogo ëhioho ua'a'anuëjo hu jasi muemu vaejajego. ¹⁰ Ĕuhu jö hesi bëhoho jemë God-are muemu vaejaruje aribövie jëvajëjo. God-hu jemë bojëmaje mu jemë vae barëjë'iroho uvorëjo: No mu aribövi sisë sisë javuajëjo. Ĕho nosi muego ë'are höjo.

Iesuho ae 10 ajëmamu ae gemuehu God huë mae uavade jöhoje.

¹¹ Iae Iesuro Jerusalem amore va'ë'i va'ë'i Galilee sa'a vituohu'o Samaria sa'a vituohu'o birorohadinö ëhunö va'adeje. ¹² Va'oromo ë dirö'ore amore hörö'ia'amu gavë'i sino jomo'e ae aho'obëhe 10 rueromo rori'o riravareje. ¹³ Riravoromo ma-darugo'o uvoruomadeje: Iesujajo. Badajajo. Noni vavaenimoromo ajamuijëjo. ¹⁴ Ajamuijëjamu Iesuro gëromo uävadeje: De va'irarijoho arue priest ömo'ömo ho röjëhirego jabumëro morijëgo gë'irarëjo. Morijëgo gë'irarëjamu örire va'amu gavë'i marëjëvadeje. ¹⁵ Marëjëvamu gagorovo ae gemuëro vuonorö'öromo ma-darugo'o God mabëhe uabe rovadeje. ¹⁶ Rueromo Iesuare hörü bëhire ague aho hiromo rajahijadeje. Röhu ë aho bogo Jew rajehu jio'i Samaria rajë jiadeje. ¹⁷ Rovamu gagorovo Iesuro uavadeje:

Jomo'e ae aho'obêhe 10 marëjêvade hõjo. Na mae-ëjo. Röhu a ioro'iore 9-ho diehi'oromo bogo rovere hõjo. ¹⁸ Diehi'oromo nosi Jew rajoho bogo rueruomoli ave sa'a gö rajohuremu God mae uali vuonorõ'õ rovade hõjo. ¹⁹ Ëhi uanugoromo ë Samaria rajoho uavadeje: Ri'õ va'ëjo. Jero God mae uehorovamu ehuro marëjavê'e hõjo.

God-hu aevoromo hesi aji ma røjahuiromo bõrõme namiromo muebejavuo'irõhe jõhoje.

²⁰ Ëhi'amu Pharisee a ioro'iorëro ri'õromo Iesu uavareje: God divare aevoromo bõrõme namiromo muebejavuo'iramu no hesi ahariremu raromo'ejarejo. Raromo'ejarejamu Iesuro uëvadeje: God-hu bõrõme namiromo aho'obêhe muebejêvajoho vörõ'e muoho jemesi nunoho bogo garomo uvo'a'arujëjo: God-ro aevoromo muebejavuo'ego no hesi ahariremu raromaruëjo. ²¹ O ja bogo aho uë'a'anuëjo: Aveho gahëjo. God-ro ave dirõ'oremu bõrõme namiromo muebejavuajëjo. O arueho gahëjo. God-ro ë dirõ'oremu bõrõme namiromo muebejêvajëjo. Bogo ehioho uë'a'anuëjo ë hesi bëhoho God-ro jemesirire bõrõme namiromo muebejêvajëro jië'ëro.

²² Ëhi uënuoromo hesi ijorajo ömo'ömoho uëvadeje: Majae ijönö jemëro God-are A Maho ge'li nimo avohoromo uvo'a'arujëjo: Majae ëgobövie bogo gavë'ëro nörö majae ma-bisemu ga'ibejarëjo mae javuo'ibejajo. Röhu bogo ge'a'arujëjo. ²³ Bogo ge'iramu aëro jemë sarerëmiromo uë'a'aruëjo: Gahëjo. Nörö aruae hõjo. O nörö aviae hõjo. Ëhi uëvë'oho nadi ejëhoromo ge'li jabu'oho va'orëjo. ²⁴ Ëhesi bëhoho naehu rue'irode majaho rue'iramu na bogo dirõ'e gemuoroho ro hi'li a'li baderehu ö'idöre baderivoromo ö'idöe aho'o ajivo barëjego ae aho'obêhe ga barëjaruëhi God-are A Maho naro ëhi rue'iramu ge'a'arujëjo. ²⁵ Iae ëhi jio'a'ajëjo röhu urimoho na vi'ehe huë vavaene bövie bise'e bae'ejöjo. Ave jaruvore raromarue ariböviohuro na bijönegoruomo'ajëjo.

²⁶ Röhu God-are A Ma naehu a nunire rue'ieß'iroho a mami ae Noahu hijade majare jiadëhi ëhi gemuoho jio'a'ajëjo. ²⁷ Noah hijadevare evare aëro ie jove ue'ahobe masurovobe ëhi jië'e muohemu uehorovobe va'ojuvo evare Noah-mëro boat bõrõmore rumo va'amu gavë'li jovo bõrõmëro rojomoromo a ioro'ioroho baeniagëgamu vuovo barë nahonahovade hõjo. ²⁸ O a mami ae Lot-hu hijade majare jiadëhi God-are A Ma naehu a nunire rue'ieß'iroho ëhi gemuoho jio'a'ajëjo. Lot hijade majare evare ae aho'obêhe ie jove ue'ahobe bövie bise'e imobe i'o mu'e vaebe javue vaebe ëhi jië'e muohemu uehorovobe va'ojuvo ²⁹ evare Lot-ro Sodom amore jioromo mae va'amu gavë'li vënëro girosijiomë'e munëhuro rireromo ruvebiromo a ioro'ioroho bijuëmamu vuovo barë nahonahovade hõjo. ³⁰ God-are A Ma naehu rue'ieß'iroho aëro ëhi gemuoho ë'obe va'ojuvo evare ë majaho ma-majioho rue'a'ajëjo.

³¹ Ëmaja rovë'oho ae rahu javu dönö haradare raromoli jabesi inömo inömo osanö jië'oho nadi inömoho ujuoho'i abo osaroho rumo va'li o mure raromë'oho jabu'o nadi inömoho ujuoho'i uehorovoromo vuonorõ'õ rue'li ma-huruomo'irarëjo. ³² Lot-are vaborehu hesi inömo uehorovoromo vuonorõ'õ'ia'amu i'uehu hesi örيره rovade jõho avoho uehorovorëjo. ³³ Ae rahu hesi sinohuni uehorovoromo birivoromo ave sa'are hi'li ehemu uehorovë'oho vuovo öriro va'a'ajëjo. O ae

rahu hesi sinëni bogo uehorovo'i nasi jöhuremu uehorovoromo maguomorovë'oho ë ahuro maro hiemu hi'a'ajëjo. ³⁴ Röhu na avehu'o uëvájëjo. Naehu rue'irode vahire evare ae niö'iro röhe gemuore diroho'aruëjo. Diroho'iramu God-ro göho bae'i göho ë vuonugo'ajëjo. ³⁵ Magonahe niö'iro gemuoro ariromo ioho sa'ijovoromo avoho'iramu God-ro göho bae'i göho ë vuonugo'ajëjo. ³⁶ [Ae niö'iro mure ari'iramu God-ro göho bae'i göho ë vuonugo'ajëjo.] ³⁷ Ëhi uëvamu rue ijorajo ömo'ömohuro uavareje: Bada ja di öri ari'ere vuonorö'ö ruenëjo. Ruenëjamu uhu'e uëvadeje: Sagohe dinö'e jiajire ë ugoho gagovoruomo'ajëjo.

18

Magonaho doruehu jö mevaje a hesi örire birivoromo ëninamijamu ajamade uhu jöhoje.

¹ Iae Iesuro uhu jöe gö majëhijadeje aëro heromo uvoröhego: No bogo u'uhö'i birivoromo parie vae'i ari'ëjarëjo. ² Majëhiromo uëvadeje: Iae ae gemuëro hijade höjo. Hu jö heromo mevaje a böröme jiade höjo. Hu God bogo ma uehorovoromo a jabesi örirohu'o bogo ma uehorovonövade höjo. ³ Hu bogo mae uehorovë'e ae jio'i röhu magonaho doruëro ë ame gemuore hijade höjo. Hiromo ë jö mevaje a hesi örire rueromo ua'i hinövade höjo: Ajemego sisë vaejevaje aho iosirami'iröjo. ⁴ Ëhi ua'ego bogo ejahonövade höjo. Ëhi'o'i arijuvo ë jö mevaje ahuro hesi uehorovoromo uvade höjo: Na God bogo uehorovoromo a jabesi örirohu'o bogo uehorovaje höjo ⁵ röhu ave magonaho doruohuro dinemi'i hi'ego na bijönego'ego ëhuni na hesi öroho avohaho'ejöjo huro ro ue'i hijego na he'i hijego u'uvevojöeni. ⁶ Badaro ë uhu jöho ëhi majëhinugoromo jö bëhoho uëvadeje: Ëjö mevaje a sisëhu diehi jövadoho uehorovorëjo. ⁷ A'i God-ro diehi ë'a'ajëjo. Hesi aribövi maehu vahie sisone jene hesi örire ëninami'i arijaruoho na hu jabesi mu öroho bogo avohëho'ajëjo. Na hu majae ëgobövie örisanuovo'i bogo burëroho ajëmi'ajëjo. ⁸ Iae hu ma-burëro ajëmi'ajëjo. Röhu God-are A Ma naehu sa'are rovë'iroho na na ga'ejöjo aëro birivoromo God mae uehorovo'iramu o bogo.

Ae döemu mae jiajohu'o a sisë'o pari vaejare uhu jöhoje.

⁹ Iae Iesuro gëvadeje ae gö jabesi sivue uehorovoromo uvamu: Noremuëremu maho javuajëromo a ioro'ioro jabesi jöho bogo uehorovoruumamu gëgorovo jabesi örire ave uhu jöho majëhiromo uëvadeje: ¹⁰ Iae ae niö'iro God-are osa börömore parie vae'i ajiomare höjo. Göho Pharisee ae jiade höjo. Göho vajiohu'e tax baejaje ae jiade höjo. ¹¹ Ajiomoromo Pharisee ahuro va'oromo namiromo parie vaeromo ëhi uavade höjo: God-ajo. Na jasi örire huë mae uavajëjo rabëni a ioro'ioroho jabu anano'e vajiohu'e goho'amarue mu vaeruomajëhi naehu bogo ëhi ë'ajohuni. O aruëre tax baejaje ae jiajëhi na bogo ëhi jevajohuni. ¹² A'i hurae gemu gemu hesi uhure majae niö'i jasi jöeni na ioho bogo ijaje höjo. Inöme rabe ujuohë'oho 9 nasi bahi'i gemu jani bamahobe va'aje höjo. ¹³ Ëhi ua'irögoro rue tax baejaje ahuro rori'o namiromo javojimamu nunoho bogo ö'idöho sioroho'i vineboho övëro ano'anovoromo God uavade höjo: Na a sisë jevaje nani vavaenimëjo.

Ëhi'are höjo. ¹⁴ Naro jemë uëväjëjo: Tax baejaje aho God-ro hesi sisëho uehorovoromo vuonugamu God-are nurire mae namijë'ëro hesi osare vuonorö'ö abuejade höjo. A'i rue Pharisee aho bogo ëhiho maho abuejade höjo. Ëhesi bëhoho ae rahu hesi sivu uehorovoromo döre bamorovë'oho hesi ihoho abue'a'ajëjo. O ae rahu ba'obuerovë'oho hesi ihoho döro ajiomo'ajëjo.

Iesuhu hesi övo asisö'o inino jabesi sinore bamëhade jöhoje.

¹⁵ Ëhi uëvamu aëro asisö'o ininoho ëhu'o sö ujuoho rueruomadeje Iesuro öve jabesi sinore bamëhojoro. Ujuoho rovamu gëgorovo Iesuale ijorajo ömo'ömohuro birëgareje. ¹⁶ Birëgamu hegoro Iesuro asisö'oho ujuoho ruejoro uvoromo hesi ijorajoho uëvadeje: Nadi ahëvo'i uëhego rueruomajo. Ëhi jië'e asisö'o va'ëne jörume raromë'e aribövioho God-ro böröme namiro mo muebejëvego hesi ahariremu raromoruomaje höjo. ¹⁷ Ave jöho na jö mae uë'ië'ajëjo. Asisö'o ininehu bogo sivu uehorovo'i God-hu muebejavuajoho mae hö uvaruëhi ae rahu bogo ëhi uvë'oho God-are ahariroho bogo va'o raromo'aruëjo.

Bövi bise'o marohë'e a hesi jöhoje.

¹⁸ Ëhi'amu iae Jew rajo a böröme gemuëro ri'öromo Iesu uavadeje: Tisa ja a mae javajëjo. Na diehi'oromo ma-ioro'ioremuoho maroho hi'ejöjo. ¹⁹ Maroho hi'ejöjamu uavadeje: Jero na uevanuëjo: Ja a mae javajëjo. Iae mae höjo röhu hesi God gemu a maho höjo. ²⁰ Röhu mae hi'iranëro ue gevanuoho ja God-are jögoroho iae gavanue höjo. Nadi goho'amonëjo. Nadi aho anonëjo. Nadi vajiohoho baenëjo. Nadi sareri'e jöho aho majëhinëjo. Jasi vëmoho vavuoho mae uehorovëvonëjo. Mae hi'irane öroho ëhi höjo. ²¹ Öroho ëhi höjamu uavadeje: Iae mae-ëjo röhu na asisö'ere aevoromo jö ebe rovodoho jaruvohu'o ëhi gemuoho ë'aje höjo. ²² Ëhi gemuoho ë'aje höjamu hegorovo Iesuro uavadeje: Iae mae ë'anue höjo röhu mue gemu bogo vaejë'e javajëjo. Jasi bövioho bise'oho imo'amoromo monioho baeromo inömo bogo eni jië'e aribövioho suvuorëminëjo. Ëhi ë'ë'oho bövie bise'e maho maho janioho ö'idöre jiaho'ajëjo. Ëhi'oromo rueromo nasi ijoro ijoro juvonövonëjo. ²³ Ëhi uavamu hegorovo ruehuro hesi uehorovoromo uvadeje: Na bövie bise'e börömo mae jevë'ëro suvuorëmi'irodoho na bogo eni jevajëromo huë vavaene böröme baejadeje.

²⁴ Huë vavaene baejamu Iesuro hu garomo a ioro'ioroho uëvadeje: Bövi bise'o marohë'e mae jië'e ariböviehu God-hu muebejaje öri ari'ere va'ë'oho anoji'e mae höjo. ²⁵ Mi börömo anugo gagore nugö'öjë'oho ja bogo eni javo'ajëjo. Röhu ëhi ë'ë'oho samae jianovo'i a'i bövi bise'o marohë'e ariböviehu God-hu muebejaje öri ari'ere va'iröhoho ëho anoji'e mae höjo. ²⁶ Ëhi jövamu heromo uavareje: Ëhi jië'oho no diehi'oromo maroho va'ëjarëjo. No ae aho'obëhe bogo eni javuajëjo. ²⁷ Bogo eni javuajëjamu Iesuro uëvadeje: Iae ëhi höjo röhu jemë ma-aëro jëvë'ëro mu vaejë'oho bogo eni jëvajoho ëho God hu eni jiajëjo.

²⁸ Ëhi uëvamu Peter-ro ri'öromo Iesu uavadeje: Aveho gavëjo. Noro bövie bise'e nosiroho vuonugo'i jasi ijore ijore jijihë'e javuajëjo. ²⁹ Jijihë'e javuajëjamu Iesuro uavadeje: Ëho iae mae höjo. Aveho

na jö mae uë'ië'ajëjo. Ae rahu God-hu muebejëvo'iröhe mu uehorovoromo ëhuni javue vabore ö ömo'öme vëmu vavu'e aboji harihu'e vuonugo'amë'o³⁰ ëhi jië'e aribövioho jemë jemesi bövioho bise'o³⁰ ëho ma-bise'e vuonugarije höjo röhu avevejö'e ave sa'are bövi mae bae'a'arujëjo. O majae ijonö jemë ma-ioro'io³⁰remu maro raromo'arujëjo.

Iesuhu guomoröhe jö urimo vae niö'i majëhijadoho ijonö röhu maho majëhijade jöhoje.

³¹ Iae Iesuro hesi ijaraje 12-ho rori'o sö va'oromo uëvadeje: Aveho hehëjo. No Jerusalem amore ajiomaruëjo. Ajiomaruëjo raromo'iramu evare urimo jö God-aro baeromo majëhinö³¹vare aribövioho jö jajivo'amarëhi ëhi jië'e muoho Jerusalem rajëro God-are A Ma nasi örire vaejevo'aruëjo. ³² God-ro hesi ëhi bamë'ëro naro sa'a göre jioromo rovare aribövi jabesi övore va'ejöjo. Va'iramu jaburo baejevoromo sivegoromo ijumevoromo sabëro ödegoromo ³³ hisuebije³³voromo anego'iramu guomevo'ajëjo. Guomoromo majae niö'i gemu hesi uhure ri'ö'ejöjo. ³⁴ Ëhi uëvamu hegorovo hesi ijarajoho jabu bogo mae bogo hejareje. Bëhoho subivëhë'ëro hesi jöho bogo avoho baejareje.

Iesuhu Jericho amore rueromo nuni sisë'e ae ajamade jöhoje.

³⁵ Ëhi'amu iae Iesuro va'adoho va'o Jericho amore hörö'iro ë'adeje. Röhu nuni sisë'e ae gemuëro ë öri ionire hiromo maëni sisëni ae ëninëmijadeje. ³⁶ Ae ëninëmiromo hejade ae aho'obëhe mae rova'avamu hejë'i ae uëvadeje: Jabumë rabë'i rova'aruëjo. ³⁷ Rabë'i rova'aruëjamu aëro uavareje: Iesu Nazareth rajohuro rova'ego ëhuni ë'aruëjo. ³⁸ Ëhi uavamu hegorovo nuni sisë'e ahuro ma-darugo'o uvadeje: David-are ujoho böröme javaje Iesu jero nani vavaenimëjo. ³⁹ Vavaenimëjamu hegorovo rue urimo va'are ariböviohuro birevoromo uavareje: Jöe vuonugëjo. Jöe vuonugëjamu hejë'i ma-darugo ma'o uvo'i hijadeje: Hë David-are ujoho nani vavaenimëjo. ⁴⁰ Ëhi uvo'i hijamu Iesuro va'adoho vuonugo'i ë namiromo uëvadeje: Nuni sisë'e aho hu'irae baruehëromo barovamu nuni sisë'e aho uavadeje: ⁴¹ Naro diehi ajamijöro nagajëjo. Nagajëjamu uavadeje: Bada ajemego na nune dadovoromo uherihöjo. ⁴² Uherihöjamu Iesuro uavadeje: De nune dadovoromo uherihëjo. Jero God mae uehorovamu ëhuro marëjavë'e höjo. ⁴³ Ëhi uavamu ma-burëro uherihadeje. Uherihoromo God huë mae uabe Iesure ijore ijore va'adeje. Va'amu ae aho'obëhe garomo God rajahiruomadeje.

19

Zacchaeus-hu Iesu ga'i nimamu ëhi ë'ade jöhoje.

¹ Ëhi'amu Iesuro Jericho amore rovë'ëro amo ririre rova'adeje. ² Röhu ë amore ae gemu hijë'e jiadeje. Hesi ihoho Zacchaeus jiadeje. Hu tax baejaje a böröme jiadeje. Hesi bövioho bise'o² marohë'e mae jiadeje. ³ Amo Iesuro rueromo va'ia'amugo Zacchaeus-ro Iesu ga'i sivohoromo röhu ae aho'obëhe tagavoromo urahë'ëro bunosirivamu bogo avoho gavadeje. ⁴ Bogo gagorovo uvadeje: Iesuro ë örire va'a'ajë uvoromo urimo tutuvo va'oromo öri bëhire ijo duvahre ajiomaruëjo. Iesu rovego niomo'amo ga'iro. ⁵ Ajiomaruëjamu Iesuro hu jiaji'ere ruego namiromo sioroho garomo uavadeje: Zacchaeus-ajo. Ma-burëro

ruvebijego va'arëjo jaruvoho na jasi osare hi'ie'e jevaje. ⁶ Ëhi uavamu hejë'i Zacchaeus-ro nimorohoromo ma-burëro abueromo Iesu hu'irae baeromo hesi osare va'oromo rajahijadeje. ⁷ Rajahijamu ae aho'obëhe gavare Iesuro Zacchaeus-are osare va'amu gagorovo bijönimoromo uarovareje: Asë'e Zacchaeus a sisë höjo. Iesu rabëni ëhi jië'e a hesi osaroho niavo'i va'ajëjo. ⁸ Ëhi uarovamu Zacchaeus-ro ri'öromo Bada uavadeje: Bada aveho hejëjo. Nasi bövioho bise'oho ririre tarioromo vituoho bae'i vituoho bogo eni jië'e aribövioho suvuorëmi'ejöjo. Naehu a rahuare inömo sarerëmiromo vajiohehu ujuohodoho iae na ëhi niö'i ëhi niö'i ëhi mana vuonorö'ö bojëmibe va'ejöjo. ⁹ Bojëmibe va'ejöjamu hegorovo Iesuro ae aho'obëhe uëvadeje: Jaruvo ave osare raromarue aribövi jabesi sisëho uehorovoromo vuonugëhë'ëro mae jëvajëjo. Ëhesi bëhoho Zacchaeus hu'o Abraham-are ujëro jië'ëro ëhu'ëro God-hu huë baejaje ae höjo. ¹⁰ Zacchaeus va'ëne ëhi subirö'ö'amë'e aribövi ioro'ioroho naho'amoromo sö rueromo maro nugo'amo'irodëni ëhuni God-are A Maho na rovode höjo.

A böröme gemuehu hesi mu aribövi ijo bajo bojëmiromo avoho muebejehorë uëvade uhu jöhoje.

¹¹ Ëhi uëvamu ae aho'obëhe hejareje. Heromo uvareje: Iesu Jerusalem hörö'i dunovajëjo. Hörö'iramu gavë'i no aevoromo ga'ejarëjo God-ro böröme namiromo no muebejavuo'iramu. Ëhi uvoruomamu gëgorovo Iesuro hesi jöho uhu'e majëhiromo uëvadeje: ¹² Iae a böröme gemuëro hijade höjo. Hiromo öre ëgoböviro sa'a göro va'ie'ade höjo hesi sa'a mueberöhe darugoho baeromo vuonorö'ö ruel'iröhëni. ¹³ Va'irögoro hesi mu vaejharue ae aho'obëhe 10 jaburo ruejëro uvëvoromo rueruomamu ae gemu gemu 20 kina 20 kina ëhi bojëmibe va'ade höjo. Bojëmibe va'oromo uëvade höjo: Ave monioho baeromo muoho ma-vaemu vaeromo monie gö'o döro baejehorego evare na vuonorö'ö rueromo bae'iröjo. ¹⁴ Ëhi uëvë'ëro va'amu gagorovo ë a börömoho hesi sa'a rajohuro nue huodivë'ëro ae gö rëmö'öjamu a börömo hesi ijore va'are höjo. Va'oromo ë sa'a göre suorovoromo a masijoho uëvare höjo: Ëaehu böröme namiromo nosi sa'a muebejavuo'iröhoho no bijönaguajëjo.

¹⁵ Ëhi'amu ë ahuro hesi sa'a mueberöhe darugoho baeromo vuonorö'ö rovade höjo. Rueromo jöe nugö'öromo hesi moni bojëmide mu aribövioho uëvade höjo: Ruehego na gëvöjo monioho dimine dimine gö'o döroho baejehë'e jëvego. ¹⁶ Ëhi uëvamu ae gemuëro urimo rueromo uavade höjo: Jaehu 20 kina bojemijanohuro ëhuro na mue vaeromo gö'o döre 200 kina baejahë'e jevajëjo. ¹⁷ Baejahë'e jevajëjamu ruehuro uavade höjo: Mabëhëjo. Ja mu mae vaejanue ae javajëjo. Ja mu bise'oho mabëhe muebejehobe rovanohuni ëhuni naro darugoho bojami'ejöjo jero ame aho'o 10 muebejeho'iranego. ¹⁸ Ëhi uavamu gavë'i mu vaejaje a göhuro rueromo uavade höjo: Jaehu 20 kina bojemanohuro ëhuro na mue vaeromo gö'o döre 100 kina baejahë'e jevajëjo. ¹⁹ Baejahë'e jevajëjamu ruehuro uavade höjo: Jero ame 5 muebenëjo. ²⁰ Muebenëjamu gavë'i mu vaejaje a göhuro rueromo uavade höjo: Jasi 20 kinaha aviae höjo. Niögëro numoromo avoho bamahë'e jevajëjo. ²¹ Ëhesi bëhoho naro ja juhuonamijode höjo ja

vörö'e ae javë'ego. Ae göehu ba'amaroho bivaroho ja ma-ijanue höjo. ²² Ëhi uavamu hesi börömohuro uavade höjo: Ja mu sisë vaejanue ae javajëjo. Jaehu jasi jö'ehu jövanue jöe gemuoho ëho naro baeromo vuonorö'ö ja mana majahi'ië'ajëjo jero heromo uvo'iranego: Ojo'e na sisë ë'aje ae jevajëjo. Jero uvane höjo: Nörö vörö'e aëro jië'ëro ae göehu ba'amaroho bivaroho ma-ijaje höjo. ²³ Ëhi uvanoho röhu ja rabëni nasi ijo bajoho bogo baeromo avoho bahijarue aribövi jabesi övoroho bamane höjo na rueromo nasiroho baeromo gö'o döre bamaroho ëhu'o bae'irode. ²⁴ Ëhi uanugoromo ë bëhire riravarue aribövioho uëvade höjo: Ëia hesi 20 kina baeniahiromo 200 kina baejade aho bojamihejo. ²⁵ Bojamihejamu rue ariböviohuro uavare höjo: Iae mae höjo röhu mami'e iae hu 200 kina baejade höjo. ²⁶ Baejade höjamu ruehuro uëvade höjo: Na aveho uëvajëjo. Mu vae'irane suvuore javë'o'ho God-ro gö'o bojami'iramu bae'a'anuëjo. O bogojavë'o'ho bisemu baejanoho God-ro baeniahi'ajëjo.

²⁷ Röhu na nu huodegarue aribövi jabesi jöho uë'ië'ajëjo. Naro böröme namiromo muebejëvo'ia'amu bijönimare jiaje ëhuni guduamo ujuoho rueromo nasi nunoro muo'amego vuovajo.

Iesuhu Jerusalem mabëhe rovade jöhoje.

²⁸ Ëaribövioho ëhi uënugoromo Iesuro urimo Jerusalem hörö'i ajiomamu gavë'i ë ariböviohuro ijore rihimareje. ²⁹ Ëhi'oromo Iesuro Olives Dahorure Bethphage amo o Bethany amo jiajinö ë ajio höröjadeje. Hörönugoromo hesi ijorajoho niö'i rëmö'öromo ³⁰ uëvadeje: Arue jemesi nuninörire amohuro va'ohëjo. Va'o hörö'i ga'a'arujëjo donkey harihe bise'ego aehu döre bogo hiromo va'aruoho benugë'e jio'iramu. Benugë'e jiego jiovoromo hu'irae ruerëjo. ³¹ O aehu uëvë'o'ho: Jemë rabëni jiovarujë uëvë'o'ho uërëjo: Badaro ave mioho nimo'ego ëhuni jiovaruëre. ³² Ëhi uëvamu va'oromo gavareje Iesuhu uëvadëhi ëhi jiamu. ³³ Ëhi jiamu gagorovo jaburo donkey harihoho jiovamu gavë'i ë mi arijo'o'ho jaburo gëromo uëvareje: Jemë rabëni donkey harihoho jiovarujëjo. ³⁴ Rabëni jiovarujëjamu rueho jaburo uëvareje: Badaro ave mioho nimo'ego jiovaruëjo. ³⁵ Ëhi uëromo jiovoromo hu'irae barueromo jabesi niögoho mi dejore ruaho'amo bahiromo Iesu ma'enamamu ajio döre hijadeje. ³⁶ Hiromo va'amu gavë'i ae aho'obëhe niögoho örire ahahobe va'areje. ³⁷ Ahobe va'amu Iesuro ë va'oromo Olives Dahorure ajiomoromo hojire höröromo Jerusalem hörö'i abue'ië'adeje. Abue'ia'amu Iesure aribövie aho'obëhe Iesuro mu masije aho'o vaejamu garuomë'ëro ma-darugo'o God mae uabe nimorohobe abueruomadeje. ³⁸ Abuejë'i uvoruomadeje: Ave aho a börömehu Badare ihore rovajoho mabëhejo.

Ö'idöre aribövioho huë maro raromaruëjo.

Aje aho'o God-aremu höjo.

³⁹ Ae aho'obëhe hu'o gemuore va'oruomadeje röhu Pharisee a ioro'iorohuro Iesu uavareje: Tisa jasi aribövioho uëvego ja rajahijaruoho vuonugarëjo. ⁴⁰ Vuonugarëjamu Iesuro uëvadeje: Bogajo. Na aveho uëvajëjo. Nasi ariböviehu rajehijaruoho vuonugo'ibejarëjo ë munëho jaburo aëro ë'anovoromo nasi örire rajehiruomoromo ma-darugo'o uvoruomo'ibejajo.

Iesuhu Jerusalem amo rajëni nivade jöhoje.

⁴¹ Ëhi uëngoromo Iesuro va'adoho Jerusalem amo bëhi mare va'adoho va'o amoho garomo vavaenimoromo ⁴² nivë'i uvadeje: Vaevë'oho jemë jaruvo ga'ibejarijëjo jemë diehi ë'oromo ma-mae raromo'irarije öroho ëhi jiego ga'ibejarijëjo mae jëvo'ibejajo. Röhu jaruvo ga'ibejarijoho tugohë'ëro bogohöjo. ⁴³ Majae ijoho rue'iramu jemë'o muorovarue ariböviohuro rueromo sa'ae babaenemi rova'oromo tugohoromo ruë numë numëvo barë'aruëjo. ⁴⁴ Numëvoromo jemë ujuoho sa'are behumëvo'amo'aruëjo jemë'o jemesi asisö'ohu'o. Munë javu vaeromo babaenemibe ajiomaroho jaburo dadovo'iramu ahoromo sa'aro ruvebi barë nahonahovo'ajëjo. Rabëni hesi bëhoho God-ro jemë ajëmi'i rovamu jemëro ëho bogo uehorovë'ego ëhunijajo.

Iesuhu God-are amo börömore va'oromo diehi ë'ade jöhoje.

⁴⁵ Iesuro nivë'i ëhi uvoromo God-are amo börömore ajiomoromo bövie bise'e imo'amarue aribövioho osare jëvamu rarovö'öjëvadeje. ⁴⁶ Rarovö'öjëvoromo uëvadeje: God-are surire jöho ëhi uvë'e höjo: God nasi osaho nasi örire jö ato'irarije osae höjo. Ëhi uvë'e höjo röhu jemëro mu sisë ë'lë'ëro ëhuro ave osaho vajiohu'e ariböviehu gurihiovarue juju gagoho va'ëne höjo.

⁴⁷ Ëhi ë'lë'ëro Iesuro majae ëhi God-are osare hiromo jöho röjëhinövadeje. Röjëhijamu priest masijohu'o Jew rajo jögoru öri röjëhijarue ariböviohu'o Iesu ano'iröhe öroho naho'i amo rajo a masijoho jabu'o ëhi ë'areje. ⁴⁸ Öroho nahoromo gavare ae aho'obëhe Iesuare jöhuremu he'i hia'e avohamu gëgorovo uvareje: No Iesu anë'oho ë aribövioho jaburo diehi'avuo'aruëjo. Ëhi jië'ëro Iesu anoröhe öroho bogo birohareje.

20

Jew rajo a masijehu Iesu bogo ma uehorovoromo darugoho dinö'e bajane hö uavare jöhoje.

¹ Ëhi'amu Iesuro God-are amo börömore hiromo ae magonahe hesi jö maho majëhiromo hesi öroho röjëhijadeje. Röjëhijamu gavë'i Jew rajo priest masijohu'o jabesi jögoru öri röjëhijarue ariböviohu'o ëho jaburo a duvaho ömo'ömo'ohu'o gemu mae rueruomadeje. ² Rueromo Iesu uavareje: Ave jöho uövuego no he'irarëjo. Jaehu God-are amo börömore hiromo mue gö gö vaejanuoho diehi jië'e daruge javoromo o raro darugoho bojamijë'ëro ëhi jië'e muoho vaejanue höjo. ³ Vaejanue höjamu Iesuro uëvadeje: Nasi darugo hesi jö ue gevarujoho na'o jemë jöe gemu uë gë'lë'ajëjo. ⁴ John-hu bapataeto vaejavuonövadoho na God-ro o ma-aëro darugoho bojamijë'ëro ëhioho ë'onövade höjo. ⁵ Ë'onövade höjamu rue a masijohuro Iesu diehi mana ua'iröhe jöho jabesi mevoromo uarovareje: Noehu uavë'oho: God-ro John darugoho bojamade hö uavë'oho Iesuro uö'a'ajëjo: Ëhi jië'oho jemë rabëni John bogo ma uehorovarije höjo. ⁶ O noehu Iesu uavë'oho: Ma-aëro John uavamu ë'ade hö uavamu hejë'oho ae aho'obëhe munëro vajamui'aruëjo ë hesi bëhoho jaburo uvoruomë'ëro: John hu jö God-aro baeromo majahuinövade ae hö uvoruomë'ëro. ⁷ Ëhi uarovoromo

Iesu uavareje: No dadivavuajëjo John darugoho dinö'e baeromo muoho vaejade höjo. ⁸ Vaejade höjamu Iesuro uëvadeje: Ëhi jië'oho jemëhu uevarije jöho na'lo bogo uë'ejöjo: Ëhi jië'e darugohuro na muoho vaejaje höjo.

Mu ariböviehu a börömo hesi ö'i bajo mu mueberomo sisë ë'are uhu jöhoje.

⁹ Iesuro ëhi uënugoromo ë Jew rajo aribövi jabesi jö sisëho uhu'e majëhiromu ae aho'obëhe uëvadeje: Iae ae gemuëro mure grape ö'oho bivo'amade höjo. Bivonugoromo ae uëvade höjo: Na va'ejöjo. Jemëro nasi muoho muebejehorëjo. Mueberomo ö'i bajoho raeromu mavego nasiroho bahi'i ioro'ioroho jemesi ujuohorëjo. Ëhi uënugoromo ri'öromu sa'a göro va'oromo majae ëgobövie ë hijade höjo. ¹⁰ Hijuvo gavade ö'i bajo urarue majaho rovamu mu vaejharue aho gemu uavade höjo: Va'irano mu muebejarue aribövioho uënego ö'i baje gö i'imamego ujuoheho ruenëjo. Ujuoheho ruenëjamu riehuro va'ade höjo. Va'lo mure höröjamu gavë'i rue mu muebejarue ariböviohuro ë aho anoromo sihö'öjamu sionëro övemu rovade höjo. ¹¹ Övemu rovamu gagorovo mu arijo'ohuro mu vaejahaje a göho nugö'öjamu mure va'ade höjo. Va'lo höröjamu gavë'i rue mu muebejarue ariböviohuro ë aho anoromo hesi örire mu sisë vaeromo sihö'öjamu sionëro övemu rovade höjo. ¹² Rovamu gagorovo mu arijo'ohuro mu vaejahaje a göho nugö'öjamu mure va'ade höjo. Va'amu gavë'i mu muebejarue ariböviohuro ë aho anujuvo gavare hesi sino haho'oho ma-köëremu rumorovoromo rövamu rori'lo babu'öjare höjo. ¹³ Ëhi'amu gagorovo mu arijo'ohuro uehorovoromo uvade höjo: Ëhi jië'oho na diehi'oromo ö'i bajoho ujuohö'ejöjo. Iae na nasi harihu mabëhoho nugö'ö'ejöjo. Nugö'ö'iramu va'iramu rue ariböviohuro hu garomo uvoruomo'ajëjo: Nöruare harihe hö uvoromo ëhuni nani hu mae uehorovoromo'ajëjo. ¹⁴ Ëhi uvoromo hesi harihoho nugö'öjamu mure va'ade höjo. Va'lo höröjamu gavë'i rue mu muebejarue ariböviohuro uarovare höjo: Arue rovaje ahuro hesi vavu hesi sionoho bae hesi höjo. Ëhuni ë'ego ano bamarëjo ehuro ave muoho noro baeröhe höjo. ¹⁵ Ëhi uarovoromo ë aho guduamoromo mure jiamu rori'lo bijimo bu'öromu anamu guomade höjo. Ëhi'are höjo.

Ëhi jië'oho mu arijo'ohuro ë mu muebejarue aribövioho diehi'ëvo'ajëjo. ¹⁶ Huro rueromo i'ue bojëmiromu muo'amo'i ë muoho ae gö bojëmi'ajëjo jaburo mueberöhego. Ae gö bojëmi'ajëjamu hegorovo ae aho'obëhe bëhoho uehorovoromo uvareje: Mu muebejare ariböviehu sisë ë'oromo i'u baejarëhi nosi a masijo ëhi jëvoröhoho no bijönaguajëromu Iesu uavareje: Asë'e ëhi jië'oho mu sisë höjo. ¹⁷ Mu sisë höjamu hegoro Iesuro jabumë ërimëhoromo uëvadeje: Jemesi a masijehu ëhi jië'e mu sisë vaeromo i'u baeröhoho jemë bijönëgajëjo röhu ave uhu jö God-are surire jajivadoho bëhe gemuoho höjo: Munë javue vae'irögoro munë gemu bijönimoromo vuonugare höjo. Vuonugaroho jaruvoho ë munëhuro javuoho nigemo'ego bibivoromo mae namijajëjo.

Ëhi jajivë'e höjo. ¹⁸ Röhu aehu ë munë döre bejë'oho ahoro ahoro bae'a'ajëjo. O ë munëhu a döre berovë'oho aho sa'ijovo barë'ajëjo.

Iesuhu guaro berovojöro aehu tax jö ua gavarohoje.

¹⁹ Ëhi uëvamu hegorovo rue Jew rajo jögoru röjëhijarue ariböviohu'o priest masijohu'o ëho jaburo garomo uvareje: Iesuro a masijoho no biraguoromo ëhuni uhu jöho jövajëjo. Jövajë uvoromo evare Iesu guduamo bava'ië'oromo ae aho'obëhe juhuonëmiromo vuonugareje. ²⁰ Vuonugonugoromo Iesu garomo muebejuvo majae eni jiamu gagorovo ae uëvareje: Va'irarijoho Iesu sareramijego huro uvo'irajo: Jemë a mae jëvajëjo. Ëhi'oromo hesi öroro jöe ua gavego huro jöe sisë'i jövoromo guaro berovo'irajo. Berovego evare no guduamo bava'oromo gavanare övore bojami'iröhe höjo. ²¹ Ëhi uëvamu hegorovo jaburo va'oromo Iesu sarerisareriamiromo uavareje: Tisajo. Iae no gavaruë höjo ja jö maemu jövoromo mu maemu röjahuijego. Jero no göromo ma-gemu uehorovavuoromo God-are örohëmu mae röjahuijanue höjo. ²² Ëhuni jö harihe ua ga'ië'aruëjo tax jöho. Rome a börömohuro nosi sa'aho muebejego noro hu tax bojamiarue höjo. Noehu ëhi ë'aruoho na ëhuro nosi jögoroho aharue höjo o bogajo. ²³ Bogajamu Iesuro gëromo uvadeje: Naehu io'a o boga uëvë'o ho ijumevo'i nimiruëromo uëvadeje: ²⁴ Ijo baje gemu röjehihego na gavöjo. Röjahijamu uëvadeje: Rahuare nu ano'ohu'o ihohu'o jajivë'e höjo. Jajivë'e höjamu uavareje: Rome a börömo hesi höjo. ²⁵ Rome a börömo hesi höjamu Iesuro uëvadeje: Ëhuni Rome a börömo hesiroho ëho hesi öroro bojami'i God-aroho ëho God-are öroro bojaminövorejo. ²⁶ Ëhi uëvamu hegorovo rue Iesuarë jö sisë nahare ariböviohuro uvareje: Noro uvare höjo: Noro Iesu bijioho ga'iramu huro tax jöho sisë'i jövoromo a nuniro be'a'ajë uvaroho röhu hu bogo bejade höjo. Ëhi uvoromo jöe barëjëvamu jörumoraejareje.

Iesuhu guaro berovojöro vuovë'e ariböviehu ri'öruomo'iröhe jö Sadducee ariböviehu hu ua gavarohoje.

²⁷ Jörumoraejamu iae Jew rajo a masijo ioro'iorohuro rovareje. Jabumë Sadducee jö uehorovarue aribövie jioruomadeje. Sadducee ariböviohuro uehorovoromo uvoruomajeje: A vuovë'o ho ijönöho bogo ri'ö'amo'i ma-ioro'iore gemu vuovo'ajëjo. ²⁸ Ëhi uvoruomaje ariböviohuro rueromo Iesu guaro berovojöro sarerisareriamiromo uavareje: Tisajo. Moses-ro jögore jajivoromo uövuë'e höjo: Aboji harihu'o rumo'e a vuovego diehi ë'iröhe öroho aviëhi höjo. Aehu vaboro masuromo vaboroho aboji harihu'o ho bogo vaejë'e baruehu guomo'i vaboro nugë'o ho hesi öhuro vuojiroho masuromo ëhuro guomade ö hesi ihero ujoho vaejaho'ajëjo. Moses-are jögoroho ëhi höjo. ²⁹ Ëhi jjië'ero iae ma-ö ömo'ömëremu ae aho'o 7 raromare höjo. Raromoromo muriohuro magonahoho masuvade höjo. Masuromo vaboroho aboji harihu'o ho bogo vaejë'e baruoho guomade höjo. ³⁰ Guomamu hesi vaboroho dorue hijamu gagorovo ö göhuro vuojiroho masuvade höjo. ³¹ Masuromo guomade höjo. Guomamu hesi vaboroho röhu maho dorue hijamu gagorovo ö göhuro vuojiroho masuvade höjo. Masuromo guomade höjo. Ö ömo'ömo ioro'iorohu'o ëhi gemuoho ë'obe rovare höjo. Ö ömo'öme 7 jabuhu ë magonahe gemuoho masube rovaroho magonahoho aboji harihu'o ho bogo vaejë'e aho ma-vuovëvobe rovade höjo. ³² Vuovobe ruejuvo barëjamu ijo tugoho'ioho ë magonahoho hu'o guomade höjo. Ëhi'are höjo. ³³ Ëhi ë'arohuni ëhuni ave jöho no ua

ga'ië'aruëjo. Jero uvanue höjo: Vuovoromo ri'ö'ejarëjo. Èhuni vuovè'le ariböviehu ri'öruomoröhe majaroho ë magonahoho di ahu'o hi'a'ajëjo. Barue aho'o 7 masuvè'ego ëhuni uavaruëjo.

³⁴ Uavaruëjamu uëvadeje: Bogajo. Ave sa'are raromarue aribövioho masurovarue höjo. ³⁵ A'i God-hu uvè'o'ho: Mae jëvè'ego vuovoromo ri'öromo maja i'ore raromo'aruë uvè'o'ho ë aribövioho evaroho bogo masurovo'aruëjo ³⁶ bogo röhu maho vuovëvo'ië'ëro. Èhesi bëhoho ëhi jië'le aribövioho vuovoromo ri'ö'amë'ëro jabumë God-are aboji harihu'e jëvoromo anera va'ëne jëvo'ajëjo. ³⁷ Röhu vuovè'le ariböviehu ri'ö'iröhohoho ë jöho Moses-ro röjëhijade höjo. Ijo hisu vënehu ravade jö jajivadevare evare surire jajivoromo uvè'le höjo: Bada God-hu Abraham Isaac Jacob ëhi muebejëvaje ae höjo. ³⁸ God-hu Abraham Isaac Jacob muebejëvaje jö hesi bëhoho jabumë vuovoromo bogo ioro'ioremuoho barè'i va'o raromego God-ro muebejëvaje höjo. God bogo vuovoromo ioro'ioremu barëjè'le aribövioho muebejëvo'ibejajo. A'i hu vuovoromo va'o raromarue aribövioho muebejëvaje höjo. God gavaje höjo vuovè'le o bogo vuovè'le aribövioho bogo barè'i raromego muebejëvaje höjo. ³⁹ Èhi uëvamu hegoroovo Jew rajo jögoru öri röjëhijarue aribövi ioro'iorohuro uavareje: Tisa ja mae uvanuëjo. ⁴⁰ O Iesu bijönimare ariböviohuro Iesuare dëre bijioho garöhe jöho ua ga'ië'aroho juhuonivoromo ioro'ioremu vuonugareje.

Böröme namiromo ajamuae a hesi jö Iesuhu röjëhi'i uë gëvadohoje.

⁴¹ Vuonugamu Iesuro uëvadeje: Aëro atoromo uvoruomaje höjo: Böröme namiromo ajamui'iröhe aho hu ma-David-are uje jio'a'ajëjo. Rabëni ëhioho uvoruomaje höjo. ⁴² David-ro Psalms jajivo'amare surire jajivoromo uvè'le höjo:

Bada God-ro nasi Bada uavade höjo: Nasi övo manö rojo hijego

⁴³ ja'o muorovarue aribövioho naro ruahö'öjëvego

hörëro vijuvo taemo'amö'irane höjo.

⁴⁴ Èhesi bëhoho böröme namiromo ajëmi'iröhe a hesi jöho David-ro jajivoromo uvè'le höjo: Bada höjo. Bada hö uvadoho ëhu'o'ho rabëni uvoruomaje höjo: Böröme namiromo ajamui'iröhe aho ma-David-are uje höjo.

Jew rajo jögoru öri röjëhijarue ariböviehu sareri'le mu vaejaruëhi aehu bogo ëhi ë'iröhego Iesuhu jövadohoje.

⁴⁵ Ma-David-are uje höjamu rue Jew rajo jögoru öri röjëhijarue ariböviohuro jöho bogo mana uavareje. Bogo mana uavamu ae aho'obëhe riravoromo mu'öjahijamu gavè'i Iesuro hesi aribövioho uëvadeje: ⁴⁶ Jew rajo jögoru öri röjëhijarue aribövioho gë avohorëjo. Èhesi bëhoho ë aribövioho jaburo jabesi sinohemu uehorovoromo niögu ëgobövie höru'o utahë'o'ho io'amoromo jijiharue ëhi jië'le muoho nimarue höjo aëro gëromo rajëhijöro. O imo'amaruire va'ë'o'ho jaburo nimarue höjo aëro uvoruomoröhego: Jabumë a masijëro jijihajëromo rajëhiromo jejëmiruomoröhego. O God rajahijarue osare va'ë'iroho o söro i'i va'ë'iroho a masijehu raromuire ë va'o raromo'i nimarue höjo. ⁴⁷ Raromo'i nimoromo magonaho doru jabesi bövioho bise'o'ho ëma ujuohëharue höjo. Ujuohoromo sarerivoromo pari ëgobövie jaguvarue höjo aëro gëromo uvojöro: Mu mae vaejaruëjo. Èhi jië'le sareri'le

muoho vaejaruego ëhuni God-ro i'u bõrõmo mae bojëmi'ajëjo. Ëhuni avoho mueberovo'i nadi ëhi jië'e muoho vaerëjo.

21

Bövi bise'o rumo'e magonaho doruehu God-ni suvuoro ba'amade jöhoje.

¹ Ëhi uënu goromo Iesuro avoho uheriho'i gavadeje bövi bise'o marohë'e mae jië'e aribövioho God-are amo bõrõmore riravoromo God-are suvuoro bahijaruire ë va'oromo jabesi suvuoroho io'amamu.

² Io'amamu gëvë'i gavadeje bövi bise'o rumo'e magonaho dorue gemuëro rueromo rövë'e ijo baje niö'i ë gemuore ba'amëvamu.

³ Ba'amëvamu gagorovo Iesuro ae uëvadeje: Ëbövi bise'o marohë'e jië'e ariböviohuro ijo baje aho'o io'amo'i arue bogo eni jië'e magonahohuro rövë'e ijo bajoho niö'i ba'amade höjo. Röhu God-ro ëhi uvajëjo: Ëmagonaho hesi suvuorohuro a ioro'ioro jabesi suvuoroho iosirami'amoromo bõrõmo mae höjo. Na mae uëvajëjo. ⁴ God-hu ëhi uehorovaje hesi bëhoho ë a ioro'iorohuro inõmo marohë'e maëro jië'ëro ma-vituochemu bojami'i ë magonahohuro inõmo rumo'ëro jië'ëro hesi i i'ibejade monioho bövioho bise'o ho aho'o bojami barëjë'e höjo.

Aehu God-are amo bõrõmo dadovoruomo'irõhe jö Iesuhu majëhijadohoje.

⁵ Ëhi'amu aëro God-are amo bõrõmo hesi jöho atareje. Munë mabëhëro iromë'ëro God-ni suvuoro nu ano'e mabëhe ë amore bahijë'ëro ëhu'ëro ë amo hesi nu ano'e mabëhe jiajoho ë hesi jöho atareje. Ëhi atamu hegorovo Iesuro uëvadeje: ⁶ Jemë ave aho'o gavarujoho majae ijönö ë munë javuoho aho'obëhe aëro dadovoruomo'iramu munëho ahoromo sa'aro ruvebi barë nahonahovo'ajëjo.

Huë vavaeni bõrõmo ruerõhe jö Iesuhu majëhijadohoje.

⁷ Ëhi uëvamu rue ariböviohuro uavareje: Tisa jaehu uövuanue muoho ëho divare jio'a'ajëjo. O mu rabe garomo uvo'ëjarëjo: Iae ë majaho rue'ië'ajëjo.

⁸ Rue'ië'ajëjamu Iesuro uëvadeje: Gavë'iajo. Aëro sarerëmi'iramu jemë rireromëvo va'a'ajëjo. Ae aho'obëhe rueromo sarerëmiromo uë'a'aruëjo: Nõruare ihoro rovajëjo. God-hu uevë'ëro bõrõme namiromo ajëmi'irode aho na jevajëjo. O uë'a'aruëjo: Jemëhu muebejaruje majaho iae aviae rovajëjo. Ëhi jië'e jö uëvamu hejë'o ho jabesi ijore ijoroho nadi jijihorëjo. ⁹ O he'irarije sa'ae göehu sa'a göhu'o muorovarue jöhu'o sa'a gemuehu arijo'arije muorovamirovarue jöhu'o hejë'o ho nadi juhuonivorëjo. Öre gö bogojië'ëro ëhi jië'e mu sisëho iae urimo jio'a'ajëjo. Röhu sa'aho bövioho bise'o ho evaroho bogo barë'i hesi majae göro jio'a'ajëjo. ¹⁰ Ëhi uënu goromo röhu ave jö bõrõmohu'o majëhiromo uëvadeje: Sa'ae göëro göhu'o muorovonõvo a masijo ioro'iorohuro ioro'iorohu'o muorovonõvo'aruëjo. ¹¹ Sa'ae darugo'o hijiohijiovo'amo'ajëjo. Sa'ae gö gö iruno'e bogojioromo guomo guomo sisë rue'a'ajëjo. Bogo gavarue vörö'e mu masijoho ö'idöre jio'a'ajëjo.

¹² Röhu ë mue aho'o ë hesi urimo aëro na bijõnegoromo jemë guduamëvoromo sisë vaejëvo'aruëjo. Ujuohëvo va'oromo God rajahjarue osae göre göre court vaejëvoromo savoji gagore

io'amëvo'aruëjo. Gavana o sa'are a masijo gö gö jabesi nunire rëmo'iramu ë riravo'arujëjo. ¹³ Jabesi nunire riravo'iramu ëhuro jemëhu nasi jö huruoho majëhi'irarije öroho jiovëho'ajëjo. ¹⁴ Nasi jö majëhi'irarije öroho jiovëho'ië'aje jiaje ëhuni a masijo jabesi nunire riravo'irarije maja ë hesi urimo uehore gemu baeromo uvorëjo: Noehu jabesi nunire riravë'iroho no bogo uvo'ëjarëjo: Diehi mana uë'ëjarëromo nurunurumo'ëjarëjo. ¹⁵ Ëhesi bëhoho Iesu naro jemesi jö'e simane sasohëho'iramu jöho majëhi'arujëjo. Majëhi'iramu jemë nu huodëgarue aribövioho jemesi jöho heromo röhu ahëhoromo jö mana majëhi'iröhoho bogo eni jioruomo'ajëjo. ¹⁶ Bogo a göho gemu a'i jemesi vëmu vavu'ëro ö ömo'ömëro aganëro aemo'aemëro jabu'o jemë guduamëvoromo ujuohëvo va'oromo a masijo jabesi övore bojëmi'iramu bæjëvoruomo'ajëjo. Bæjëvoromo a ioro'ioroho jemë muo'amëvo'iramu vuovëvo'ajëjo. ¹⁷ Jemëhu na uehorovevarujohuni ae aho'obëhe jaburo jemesi örire nue huodëgoruomo'ajëjo. ¹⁸ Röhu jemesi aru'ahoho bogo ëhi ëhi'o'i ma-mabëhe jëvo'ajëjo. ¹⁹ Biririvë'ohuro ëhuro mae raromo'irarije öroho biroho'arujëjo.

Aehu rueromo Jerusalem dadovo'iröhe jö Iesuhu majëhijadohoje.

²⁰ Röhu jemëro ga'irarije muorovo ariböviehu rueromo amo numamu gavë'iroho uvorëjo: Jerusalem ijumo barë'iröhe majaho iae rovajëjo. ²¹ Ëhi uvoromo ave Judea sa'are raromaruje aribövioharo huruomoromo dahoru'ero iojioromëne. O Jerusalem raromaruje aribövioharo rori'o va'orëne. O mure je'ore raromaruje aribövioharo nadi amo bërömoroho va'orëne. ²² Huruomo va'o jö uëvaje hesi bëhoho i'ue mana ave sa'are rueröhego God-are surire jajivare jöho ë i'uoho aho'obëhe evare majare rue barë'ajëjo. ²³ Ëhuë vavaeni rue'iröhe majaroho dë'e magonahohu'o aboji harihu'o inino jio'amë'e magonahohu'o jabumë vaevë'oho jëvo'ajëjo. God-ro ave aribövi jabesi örire dë vörönimoromo i'ue nugö'ö'iramu huë vavaene sisë mae ave sa'are rue'a'ajëjo. ²⁴ Huë vavaene ave sa'are rue'iramu muorovo ariböviohuro bibe bune baeromo sa'ae göro jioromo rueromo jemesi a ioro'ioroho muo'amo'iramu vuovo'i a ioro'ioroho guduamoromo tövo'amoromo sa'ae göro göro ujuoho va'oruomo'ajëjo. O sa'a göre göre jioromo rueröhe ariböviohuro Jerusalem ijumo barëromo ave sa'aho jabesi baeromo sisë'i muebejëvobe va'ojuvo hujeji God-hu bamade majaho rue'iramu evare jabesi vöröho barë'ajëjo.

God-are A Mae Kerisohu sa'are rueröhe jöhoje.

²⁵ Röhu majare manaerore jijire mujöure vörö'e muoho jio'iramu aëro sioroho garuomo'ajëjo. O sa'aroho sa'a gö gö rajëro he'iröhe sö jovoho ma-darugo'o hasajavo'iramu hegorovo uehorovoromo uvoruomo'ajëjo: Rabëro ë'ajëromo juhuonivoromo huë vavaene bëröme baeruomo'ajëjo. ²⁶ Garöhe ö'idöre inömoho aho'o arua anumiäe va'iramu gagorovo nune örijanovoromo dë vövöbajo'e butubutumoromo uvoruomo'ajëjo: Sa'aho diehi diehi jio'ië'ajëjo. ²⁷ Ëhi uvoromo garuomo'ajëjo God-are A Maho naro darugo'o aji'o bëröme baeromo suere ruvebi'iramu. Ëhi jio'a'ajëjo. ²⁸ Röhu ëhi jjë'e mu aevoromo jjë'iroho döro riravoromo sioroho garomo uvorëjo: God-ro nosi i'u'e muoho tugoho'i hesi sasohë'e muoho röjahui'irögöro ë'ajëjo.

Mesehu gumutivego Jew rajo jabesi vama maja dunovaje uhu jöhoje.

²⁹ Iesuro ëhi uënuqoromo ave uhu jöho uëvadeje. Mesohu'o ijo ioro'iorohu'o uehorovohëjo. ³⁰ Gavaruje hane gumutivego garomo evare jemë uvaruje höjo: Jew rajo nosi vama majaho iae dunovajëjo. ³¹ Èhesi bëhoho ga'irarije naehu uëvodëhi mue gö gö rovamu gavë'iroho uvo'a'arujëjo: No ga'ië'aruëjo God-ro böröme namiromo aho'obëhe muebejavuego.

³² Ave jöho na jö mae uë'ië'ajëjo. Ave jaruvore raromaruje aribövioho bogo vuovëvo barëjë'iro naehu uëvaje muoho aho'obëhe rue'a'ajëjo. ³³ Ö'idöe sa'ae bövie bise'e barë'i nasi jöho gemu bogo barë'ajëjo.

Avoho mueberovo'iröhe jöhoje.

³⁴ Röhu gavë'i raromorëjo. Nadi nimoronimorohoromo iruno'emuoho uehorovoromo vörö'le jovemuoho ue'ahoromo simanoho sisërërovorëjo. O ave sa'a hesi muohemu nadi uehorovoromo nurunurumorëjo. Èhi ë'ë'oho jemëhu bogo uehorovo'irarije majare evare nasi majahuro ma-majiohëvo'ajëjo. ³⁵ Ö'ehu mahu mi'e ma-majioho baejajëhi majae höröjajire beva'ajire aëro ma-raromo jijih'o'i ga'a'aruëjo nasi majaho ëhi ma-majioho rue'iramu. ³⁶ A'i jemëro nune jioromo muebenövorëjo. Mueberomo God uanövorëjo: Èhuë vavaeni maja rovë'iroho jero ajamuego no mae biririvo'irarëjo ëhuro mae javuobe va'oromo jasi A Ma hesi nunire mae riravo'iröhe höjo.

³⁷ Iesuro ëhi majëhijadeje. Röhu hesi muoho aviëhi jionövadeje. Sisonuvo'ego God-are amo börömore hiromo God-are jöho ae röjëhiromo vahiro'mo'ego va'oromo ajio Olives Dahorure ë hinövadeje. ³⁸ Èhi ë'ego sisonu sisonu'e ae aho'obëhe rueromo God-are amo börömore gagovonövareje Iesuhu jövaje jöho he'iro.

22

Iesu anoröhe öri nahare jöhoje.

¹ Jew rajehu Dë Huaje Oso Rumo'e I Ue'aharue Söröho dunovadeje. Sörö hesi iho göho God-hu Vörö Tugohade Söröhoje. ² Amo sörö majaho dunovamu priest masijohu'o Jew rajo jögoru öri röjëharue ariböviohu'o ëho jaburo Jew rajo a ioro'ioroho juhuonëmiromo öre nahareje Iesu masaginiëri baeromo anego guomoröhego.

Judas-hu Iesuni Jew rajo a masijo hiruëmijade jöhoje.

³ Öre nahamu Judas hesi iho göho Iscariot-ro rovadeje. Iesuare ijoraje ae aho'obëhe 12 röhu Judas hu jabesi gemuoho jiadeje. Judas hu Iesuare ijorajo jabesi gemuoho jiamu Satan-ro hesi dëre abueromo jöe bojamadeje. ⁴ Jöe bojamamu Judas-ro va'oromo priest a masijohu'o osa börömo muebejarue ariböviohu'o jöe jövadeje hu diehi'oromo Iesu ë aribövi jabesi övore bojëmego guduamo'iröhoho. ⁵ Jöe jövamu hegorovo rueho jaburo nimorohoromo Judas uavareje: Iae mae höjo. Èhi jië'oho no monie mana bojami'ëjarëjo. ⁶ Bojami'ëjarëjamu Judas-ro uëvadeje: Èhi jië'oho iae mae höjo. Iae mae hö uëromo va'oromo öre nahadeje ae aho'o bogojëvego evare Iesu a masijo jabesi övore bojëmi'iröhëro.

God-hu Vörö Tugohade Sörö Iesuhu i'iro bövi bise'o avohade jöhoje.

7 Ĕhi'amu iae Oso Rumo'e I Ue'aharue Sörö majaho rovadeje. Röhu ě maja rovä'iroho Jew rajero sheep harihoho bijuëmarueje God-hu Vörö Tugohade Söröho i'iro. 8 Sörö majaho rovamu Iesuro Peter'o John'o nugö'öjëvoromo uëvadeje: Va'oromo söröho avohorego no ue'aho'irarëjo. 9 Ue'aho'irarëjamu uavareje: Ja nagajoho no dinö'e va'oromo söröho avoho'ëjarëjo. 10 Avoho'ëjarëjamu Iesuro uëvadeje: Aveho hehëjo. Jerusalem amo börömoromo va'orëjo. Va'li ga'a'arujëjo aëro jovo'e ramaho simanëro baeromo ro birohëvo'iramu. Ro birohëvego hesi ijoro ijoro va'orëjo. Va'oromo ga'irarije hu di osare rumo va'ego gagorovo jemë'o ě osaro va'orëjo. 11 Osaro va'oromo osa arijo'oho uarëjo: Tisahuro jani uvade höjo: Osaho dinö'e höjo naehu nasi ijorajoho jabu'o gemu mae sörö i'irodoho. Ĕhi uarëjo. 12 Ĕhi ua'iramu osa arijo'ohuro jemë hu'iraejëvo ajiomoromo döre osa börömo rojëhi'a'ajëjo. Rojëhi'iramu ga'a'arujëjo maratue bövie bise'e eni avohoromo bahijë'e jio'iramu. Ĕhi jiamu gavë'iroho ě dirö'oro söröho avohorëjo. 13 Ĕhi uëvamu rueho jaburo va'areje. Va'oromo gavare Iesuhu uëvadëhi ěhi jiamu gagorovo söröho avohareje.

Sino'o kö'o aevoromo ijare jöhoje.

14 Ĕhi ě'ëlëro sörö majaho rovamu Iesuro hesi apostle ömo'ömo'hu'o gemuore hijadeje ie i'irovo. 15 Hiromomo uëvadeje: Na nego avohajëjo God-hu Vörö Tugohade ě hesi Ioho jemë'o i'irovo ijonö vi'ehe baeromo guomevoröhego. 16 Ĕhesi bëhoho na uë'ië'ajëjo. Na ijoho ě ioho bogo i'ejöjo. Hujeji God-ro a nunire böröme namiromomo aho'obëhe muebejëvo'iramu sörö bëhoho va'orahoro jio'iramu evare i'ejöjo. 17 Ĕhi uënu'goromo enatuore jovoho baeromo God mae uaromomo hesi aribövioho uëvadeje: Aveho jemë ae gemu gemu ba ibe göëro göho bojamibe va'orëjo. 18 Aveho hehëjo. Na ijoho ö'i bajo jovoho bogo i'ejöjo. Hujeji God-ro rueromomo a nunire böröme namiromomo aho'obëhe muebejëvo'iramu evare i'ejöjo. 19 Ĕhi'onu'goromomo ioho baeromomo God mae uanu'goromomo ato'atovoromomo hesi aribövioho suvuorëmiromomo uëvadeje: Aveho nasi sine höjo. [Na nasi sinoho God-are örire bojamiromomo ië'ajëjo jemë mae jëvoröhego. Aviëhi jië'e muoho vaenövorëjo ëhuro na uehorovevo'irarije höjo. 20 Ĕhi ě'ëlëro ioho ue'ahonu'goromomo enatuore jovoho baeromomo ěhi jië'e mue gemuoho vaeromomo hesi aribövioho uëvadeje: Ave enatuore jovo hesi bëhoho iae nasi köho jemëni rovevo'ajëjo ëhuro God-hu muebejëvonövoröhe jögoru i'oho marë'iröhego.]

21 Iae ěhi höjo. Röhu gahëjo. Aehu na bijönegarue a jabesi övore bojëmi'iröhe ahuro na'o ie ijajëjo. 22 God-hu bamadëhi hesi A Maho na iae ěhi guomevo'ajëjo röhu na bijönegarue a jabesi övore bojëmi'iröhe aho vaevë'oho sisërë'ajëjo. 23 Ĕhi uëvamu hesi ariböviohuro uaravareje: Di aho noro ěhi jië'e mu sisëho vae'ëjarëjo.

Di aehu a ioro'ioro iosirëmiromomo börömo jiaje jöhoje.

24 Ĕhi'oromomo Iesure ijorajo ömo'ömo'ohuro jö aho'ahamirovoromomo uaravareje: Di aho a nuniroho a börömo javuajëjo. 25 Ĕhi uarovamu Iesuro uëvadeje: Sa'a ioro'ioro rajohuro jabesi sa'a rajoho ruahö'öjëvoromomo jabumëremu masije riravarue höjo. Riravoromomo röhu jabesi jumuvorovoromomo jabesi sa'a rajoho uëvarue höjo: Uönövorëjo:

Sa'a aribövi ajamuijaruje a masije jëvájëjo. ²⁶ Röhu jemë'o nadi ëhioho döroho bamorovorëjo. A'i ae rahu a börömo börömo jië'o'ho ë aho jero ijorajonö'e jionövonëjo. O ae rahu simano vaejë'o'ho ë aho jero ae gö ajëmi'irane ae jionövonëjo. ²⁷ Röhu jemë diehi uehorovarujëjo. Di aho böröme jio'i di aho bise'e höjo. Na hiro mo i ijaje aho börömoho höjo o ajëmiromo jabesi i ujuoho mëmijajoho börömoho höjo. Hiromo i ijaje aho iae börömoho höjo. O ajëmijaje aho ma-bise'e höjo. Na mae-ëjo. Röhu Iesu na ajëmiromo i ujuoho mëmijaje aho va'ëne jevajëjo.

²⁸ Na i'ue bövie bise'e bae'ego jemëro biririvoromo na'o jijihobe ruenövarije höjo. ²⁹ Nasi Vavuohuro darugoho bojëmijade höjo naro böröme namiromo nasi aribövioho muebejëvo'irodego. Huhu ë'adëhi naro ëhi jemesi örire daruge bojëmijajëjo masije riravo'irarijeko. ³⁰ Naro böröme namiromo nasi aribövioho muebejëvo'iramu jemëro na'o raromoromo ioho jovoho ue'aho'arujëjo. Ioho ue'ahoromo jemë ae aho'obëhe 12 na'o gemu mae arëto göro göro raromoromo Israel rajo nosi agane gö gö 12 jabesi muoho mevo ga'a'arujëjo ga'i mae o sisë jiego.

Peter-hu Iesu gavaje jö a subivëho'iröhe jö Iesuhu majahijadohoje.

³¹ Röhu Simon-ajo. Ave jöho hejëjo. Satan-ro God ua gavë'e höjo jemë baejëvoromo jemesi dëre bijëho'irohëni. Ëhuni aehu i hijiohi-jiovoromo garuomaje diho mae jiego diho sisë jiego gavaruëhi Satan-ro ëhi jemesi dëre bijëho gë'a'ajëjo gë'i rahuo darugo'o'ho jio'i rahuo darugo rumo'o'ho jiego. Amo Satan-ro ëhi ua gavamu God-ro jemë hesi övore bojëmijë'e höjo. ³² Ëhi jie röhu Simon naro jani parie vaejë'e jevajëjo jero bogo uehorovevoromo vuonugo'iranego. Röhu ijonö Satan-hu jasi dë bijioho garomo barëjamu jaehu huotorovoromo nasi örire avoho uehorovevë'iroho jasi aganoho ajëmego biririvo'irarëjo. ³³ Biririvo'irarëjamu Peter-ro uavadeje: Bada iae ëhi höjo röhu na ja'o gemu mae juvoromo ja'o savoji gagore va'ë'o'ho o ja'o guomevë'o'ho iae na eni jevajëjo. ³⁴ Eni jevajëjamu Iesuro uavadeje: Peter röhu nasi jöho hejëjo. Jaruvo vahi'o'ho kökörökoho bogo uvë'e jero majae niö'i gemu ae uë'a'anuëjo: Na Iesu bogo gavaje höjo.

Iesuale ariböviehu monie esöe muorovo'iröhe kaejöe ujuoho'iröhego Iesuhu majëhijadohoje.

³⁵ Iae Iesuro hesi ijorajo ömo'ömo uëvadeje: Urimoho naro rëmö'öromo uëvode höjo: Monioho esöho bövioho bise'o'ho nadi ujuoho va'orëjo. O hörü sinoho nadi io'amoromo va'orëjo. Röhu na jemë bövi bise'o'ho nimarijoho eni baejarije höjo o bogajo. Bogajamu uavareje: Iae no eni baejare höjo. ³⁶ Eni baejare höjamu Iesuro uhu'e uëvadeje: Urimoho aëro ajëmamü ëhi baejarije höjo röhu avevejë'o'ho bogo ëhioho jio'a'ajëjo. Ëhuni monie o esöe jëvë'o'ho ujuohoromo va'orëjo. O muorovo'irarije kaejö ëge bogojëvë'o'ho jemë döre io'amaruje niögoho imo'amoromo monie mana ujuohoromo kaejö ëgoho imo'amorëjo. ³⁷ Ëhesi bëhoho hejëjo. God-ro ëhi bamade höjo hesi surire jö jaji-varëhi ëhi jioröhego. God-are surire jajivoromo ëhi uvë'e höjo: Aëro uvoruomë'e höjo: Hu jö ahoruomaje ariböviohu'o'ho gemuore höjo. Nasi jöho ëhi uvë'e höjo. God-are surire jö jajivarëhi iae ëhi jio'irögoro ë'ajëjo. ³⁸ Ëhi jio'irögoro ë'ajëjamu ijorajoho jaburo uavareje: Bada

gavëjo. Aviae kaejō ēge niō'i javuajëjo. Kaejōe niō'i javuajëjamu uëvadeje: Ëhi jië'e jōho iae mino'ëjo.

Iesuhu Gethsemane sa'are hiromo God-are örire ëninamijade jōhoje.

³⁹ Ëhi'oromo Iesuro ë osaho vuonugo'i Olives Dahorure mami'e va'onövadire röhu maho ë va'adeje. Va'amu hesi ijarahoho jaburo hu rihromareje. ⁴⁰ Rihromoromo va'o suorovoromo Iesuro uëvadeje: Ëninamihego God-ro ajëmego Satan-ro bogo dinëmego ëhuro bogo bejëvo'irajo. ⁴¹ Ëhi uëngoromo rori'o va'adeje. Munë bu'öjogo va'o bejaje ëmino'e va'oromo ague aho hiromo parie vaeromo uavadeje: ⁴² Apajo. Ja nagë'o'ho i'ue huë vavaene nasi örire rovajoho ahego na bogo bae'irōjo. Röhu naehu nimajoho nadi ë'i jaehu nimanuëhi ëhi ë'onëjo. ⁴³ [Ëhi'amu gavë'i anerae gemuëro ö'idöre jioromo rueromo Iesu ajamamu biririvadeje. ⁴⁴ Biririvoromo röhu huë vavaene bogo bise'o vadu'oho baeromo parioho ma'eno titimoromo vaemu vaejadeje. Parie vaemu vaejamu nu ano'ere jōho köe direjohijë'ehu sa'are ahajëhi ëhi aho'amadeje.]

⁴⁵ Parie vaenugoromo döro ri'öjadeje. Ri'öromo vuonorö'ö va'oromo gavadeje ijarahoho jabumë huë vavaene böröme baejë'ero momorö'öjamu. ⁴⁶ Momorö'öjamu gëgorovo uëvadeje: Jemë rabëni momorö'öjarujëjo. Ri'öromo ëninamihëjo. Satan-ro dinëmi'iramu bejëvo'ajëjo.

Iesu guduamare jōhoje.

⁴⁷ Ëhi uëvamu gavë'i ae aho'obëhe Judas-ro öroho röjëhiromo sö ujuohoromo rovamu rueruomadeje. Iesure ijarahoe aho'obëhe 12 röhu Judas hu'o jabesi ae gemuoho jiadeje. Judas-ro rueromo Iesu dudöho'i bëhire rovadeje. ⁴⁸ Dudöho'i rovamu Iesuro uavadeje: Judas-ajo. Na God-are A Maho jevajëjo. Ja diehi'oromo ma-döëremuoho rajehiromo dudöhevanuëjo arue ariböviohuro guduamo baejevo va'ojöro. ⁴⁹ Ëhi uavamu Iesure aribövie hesi bëhire riravaroho jaburo gavare a ioro'iorohuro mu sisë vae'ia'amu gëgorovo uavareje: Bada na no kaejō ëgobövioho jijöromo muo'amo'ëjarëjo o diehi'o'ëjarëjo. ⁵⁰ Ëhi uaromo Iesure ae gemuëro priest börömo hesi mu vaejaje aho anoromo övo manörire hia'oho tariö'öjahadeje. ⁵¹ Tariö'öjahamu Iesuro uavadeje: Ëhi jië'e muoho vuonugëjo. Vuonugë'i ë anade a hesi hia'i sionoho rëhamu marëjadeje.

⁵² Marëjamu priest masijohuro God-are osa börömo atovarue ariböviohuro a duvahohuro Iesu guduamo bava'i rovë'ero riravareje. Riravamu gagorovo Iesuro uëvadeje: Aveho na bogo vajiohu'e anano'e aehu jevajëjo. Jemë rabëni siravaho kepataho ujuohoromo rovarujëjo. ⁵³ Mami'e majae aho'o naehu God-are amo börömore jemë'o hinövodoho jemë evaroho bogo guduamevarije hōjo. Röhu jaruvoho jemesi majae hōjo. Ramoramo'e mu muebejaje a hesi vöröho rovë'e hōjo.

Peter-hu Iesu gavaje jō a subivëhadohoje.

⁵⁴ Ëhi uëvamu Iesu guduamo barueromo priest börömo hesi osare rovarëje. Priest hesi osare rue'irögoro Peter-ro arue riribövire Iesu

rihiromoromo ijore rovadeje. ⁵⁵ Osare rueromo gavade aehu raro-maruire vëne huë'ëro ravo'ego ae uono bëhire raromamu. Ae uono bëhire raromamu gatorovo jabu'o gemu mae hijadeje. ⁵⁶ Hijamu gatorovo mu ajëmijarue magonahe gemuëro gavade Peter uono bëhire hi'ego nu ano'o'ho vënëro ajivë'e jiamu. Ajivë'e jiamu gavë'i Peter ërimahë'i ë aribövioho uëvadeje: Ave iaho hu'o Iesu'o gemu mae juvonövade ae höjo. ⁵⁷ Juvonövade ae höjamu Peter-ro uavadeje: Sarerivanuëjo. Na ë iaho bogo mae bogo gavaje höjo. ⁵⁸ Bogo gavaje höjamu majae ma-bunemu jioromo barëjamu ae göëro Peter garomo uavadeje: Ja'o Iesuare ae javajëjamu Peter-ro uavadeje: Sarerivanuëjo. Na bogojevajëjo. ⁵⁹ Bogojevajëjamu hour gemu rabu'e barëjamu ae göëro biririvoromo ë aribövioho uëvadeje: Iae mae-ëjo. Iae na gavajëjo ave aho Iesu'o juvonövade ae höjo. Hu'o Galilee sa'a raje höjo. ⁶⁰ Èhi uëvamu Peter-ro uavadeje: Sarerivanuëjo. Ja jövanue jöho na dadivevo avohajëjo. Dadivevo avohajëjamu kökörökoho uvadeje. ⁶¹ Kökörökoho uvamu Badaro huotorovoromo Peter gavadeje. Gavamu gavë'i Peter-ro uehorovoromo uvadeje: O Badaro mam'i'e uevade höjo: Jaruvo vahire kökörökoho bogo urimoho uvë'e jero urimo vae niö'i gemu ae uë'a'anuëjo: Na Iesu bogo gavaje höjo. ⁶² Èhi uevade hö uvoromo Peter-ro amonö hörö va'oromo sisë maro nivadeje.

Aehu Iesu sivare jöhoje.

⁶³ Èhi'amu iae Iesu mueberuomaje ariböviohuro Iesu sivoromo sino haho'ere ano'anovareje. ⁶⁴ Ano'anovoromo nu ano'e niögëro tugohahoromo uavareje: Na jö God-aro baeromo majëhijaje ae jevajë uövuanue javaje ëhuni anagade a hesi ihoho huruoho majahuijego no hejarëjo. ⁶⁵ Èhi jje'e jö sisë gö gö aho'obëhe atoromo Iesu sivareje.

Iesu Jew rajo a masijo jabesi nunire namijade jöhoje.

⁶⁶ Èhi ë'ë'ëro sisonuvamu Jew rajo a duvaho ömo'ömhuro priest masijohuro Jew rajo jögoru öri röjëhjarue ariböviohuro gagovorovoromo ae uëvareje: Iesu hu'irae barovego no court vaejarëjo. ⁶⁷ Barovamu rue a masijohuro Iesu uavareje: Na ja God-hu uavë'ëro böröme namiromo ajamui'irane aho javajëjo. Ja ë aho javë'o'ho uövuego no hejarëjo. Hejarëjamu Iesuro uëvadeje: Na uëvë'o'ho röhu jemë bogo ma uehorovo'arujëjo. ⁶⁸ O na jö uë gevë'o'ho jemë bogo mana ue'a'arujëjo. ⁶⁹ Röhu majae dunovo'iramu evare God-are A Maho naro börömëro jevë'ëro ajiomoromo God darugo eni jje'e A hesi övo manö ëhi hiemu hi'ejöjo. ⁷⁰ Hi'ejöjamu rue a masijohuro uavareje: Èhi jje'o'ho na ja God-are Harihe javajëjo. Uëvadeje: Iae mae-ëjo. Jemëro jemesi uevarujëjo: Ja ëhi javajëjo. ⁷¹ Èhi javajëjamu rue a masijohuro uarovareje: Iesuro hesi jö'ëro hesi jö sisëho majahuijamu iae mam'i'e hejë'e javuajëjo. Èhuni rabëni ae gö uë'ëjarëjo: Gavarije o hejarije jöho majahuijego no hejarëjo. Court-oho iae barëjajëjo.

23

Iesu Pilate-are nunire namijade jöhoje.

¹ Èhi uarovonugoromo ë a masijo ömo'ömhuro ri'öromo Iesu hu'iraeromo Pilate-are nunire va'areje. ² Va'oromo Pilate-are nunire

riravoromo Iesuare jö sisêho aevoromo huruoho majahijareje. Majahiro-
 romo uavareje: Iae no hejare hõjo ë iaho sareri'e jõe majëhijavamu. Ëhi
 majëhijë'ëro ëhu'ëro nosi sa'a rajohuro sa'are a masijo jemesi jõho bogo
 eruomo hesi hõjo. No hejare hõjo Iesuro uvavamu: Rome a bõrõmoho
 tax-oho nadi ijoho bojamirëjo ë hesi bëhoho sa'are a bõrõmoho na jevë'e
 jiaje. God-hu uevë'ëro bõrõme namiromo ajëmi'irode aho Keriso na
 jevajëjo. ³ Keriso jevajëjamu Pilate-ro Iesu uavadeje: Na ja Jew rajo
 jabesi a bõrõmoho javajëjo. Bõrõmoho javajëjamu Iesuro uavadeje:
 Ëjõho jero jasi jõvanuëjo. ⁴ Jõvanuëjamu Pilate-ro priest masijohu'o a
 ioro'iorohu'o uëvadeje: Ave aehu i'u baerõhe hesi sisêho bogo birohë'e
 jevajëjo. ⁵ Ëhi uëvamu hegorovo ae aho'obëhe biririvoromo uavareje:
 Ëiahuro Galilee sa'are aevoromo jö sisë ae røjëhiromo muorovojõro
 simane huotovëhobe Judea sa'aho aho'o juvoromo avehu'o rovë'e hõjo.

Iesu Herod-are nunire namijade jõhoje.

⁶ Ëhi uaruomamu hegorovo Pilate-ro uëvadeje: Na ë iaho Galilee
 sa'a raje hõjo. ⁷ Galilee sa'a raje hõjamu rue ariböviohuro uavareje:
 Io'ajo. Io'ajamu hegorovo Pilate-ro uehorovoromo uavadeje: Herod hu
 Galilee sa'a muebejaje ae hõjo. Röhu hu aviae Jerusalem rovë'e hõjo.
 Rovë'e hö uvoromo Iesu nugö'õjamu aëro bava'areje Herod-ro court
 vaerõhego. ⁸ Iesu bava'amumu Herod-ro garomo uehorovoromo uvadeje:
 Na mami'e Iesuhu mu vae'amade jõho hejë'ëro ga'i nimobe rovë'e
 jevajëjo. Nani huro darugo'e muoho vaejeho'iramu na ga'ejõ uvoromo
 Iesu garomo nimoroho avohadeje. ⁹ Nimorohoromo jõe aho'obëhe Iesu
 ua gavadeje. Ua gavamu jõho bogo mana uavadeje. ¹⁰ Bogo mana
 uavamu priest masijohu'o Jew rajo jõgoru õri røjëhijarue ariböviohu'o
 ëho jaburo Herod-are nunire riravoromo Iesuare jö sisêho darugo'o
 huruoho majahijareje. ¹¹ Majahijamu Herod-ro heromo hu'o hesi
 muorovo ariböviohu'o Iesu nue huodivoromo sisë vaeromo sivareje.
 Sivoromo Iesu niõgu ëgo mabëhëro ba'amahoromo nugö'õjamu sionëro
 Pilate-aro bava'areje. ¹² Bava'amumu evare majae gemuore Herod'o
 Pilate'o urimo nu huodivorovaroho vuonugo'i huë baerovoromo ma-
 mae arijareje.

Iesu anego guomojõro Pilate-hu uëvade jõhoje.

¹³ Iesu barueruomamu gëgorovo Jew rajo priest masijoho ë sa'are
 a masijoho a ioro'ioroho ëho jabumëni Pilate-ro uvadeje gagovoromo
 raromojõro. ¹⁴ Gagovamu gëgorovo Pilate-ro uëvadeje: Ëiaho jemëro
 barueromo uevarije hõjo: Huro sareri'e jõho majëhijë'ëro ae aho'obëhe
 sa'are masijo nosi jõho bogo e hesi jëvajëjo. Jemëro ëhi uëvamu hejode
 hõjo. Röhu naro jemesi nunire namiromo Iesuare jõho morijovoromo
 gavode hõjo Iesuare jö sisêho uevarijoho bogojiamu. ¹⁵ O Iesu mae
 jiajoho Herod-ro hu'o gavade hõjo. Ëhi gagorovo sionëro nosi õrire
 nugö'õjade hõjo. Ëhuni aveho hehëjo. Hu mu sisë vaejë'ëro mana anego
 guomorõhe bëhoho bogohõjo. ¹⁶ Ëhuni naro ae uë'iramu hisuebiromo
 jiovo nugö'õ'iramu va'a'ajëjo. ¹⁷ [Rõhu God-hu Võrõ Tugohade Sõrõ
 maja rovë'iroho savoji gagore raromarue aho gemu Pilate-ro Jew
 rajo ariböviohuni jiovo nugö'õjehonövadeje hu bojamare muoho ëhi
 jië'ëro.] ¹⁸ Muoho ëhi jiamu ae aho'obëhe ma-gemu mae uvoruomadeje:
 Ëiaho anëjo. Barabbas jiovahuëjo. ¹⁹ Röhu Barabbas savoji gagore

hijade hesi bēhoho urimē'i a masijohu'o amo bōrōmoro muorovare majaho jiamu hu'o muorovoromo ae anamu police aribōviohuro hu guduamo bava'oromo savoji gagore ba'amareje. ²⁰ Rōhu Pilate-ro Iesu jiovo nugō'ō'i nimamu jōe gō'o majēhijadeje. ²¹ Majēhijamu hejē'i ae aho'obēhe uvo'i arijareje: Korosioro anego guomajo. Korosioro anego guomajo. ²² Guomajamu Pilate-ro urimo vae niō'i rōhu maho uēvadeje: Rabēniajo. Diehi jīē'e mu sisē vaejē'e hōjo. Na gavajoho mu sisē ē'ē'ero mana anego guomorōhe bēhoho bogohōjo. Ēhuni hisuebiromo jiovo nugō'ō'ejōjo. ²³ Jiovo nugō'ō'ejōjamu ae aho'obēhe birivoromo dinamiromo ma-darugo'o uvo'i arijareje: Korosioro anego guomajo. Ēhi uvamu jabesinō marējadeje. ²⁴ Marējamu jabuhu uvarēhi Pilate-ro jōho ēhi majēhijadeje. ²⁵ Ūrimo Barabbas-ro a sisē ioro'iorohu'o gemuoro bu'ōromo sa'are a masijohu'o muorovoromo ae muo'amadeje. Ēhi ē'ē'ero savojire raromadeje. Ēhi jīē'e a sisē jadeje rōhu Pilate-ro hejade Jew rajohuro Barabbas nimoromo uvo'i arijavamu hegorovo hesi mu aribōvioho uēvadeje: Barabbas jiovo nugō'ō'i jaburo nimē'e jiarue Iesu anohējo.

Iesu korosire ano taemare jōhoje.

²⁶ Anohējamu aēro Iesu court-re jioromo ano'i bava'areje. Bava'oromo ōrire va'i gavareje Cyrene amo raje ae gemu hesi ihe Simon muro jīē'ero Jerusalem rovamu. Rovamu gagorovo ōvōro ma'enoromo korosioho hesi dejore bamoromo uavareje: Baeromo Iesuare ijoro va'ējo. Va'ējamu Simon-ro Iesuare korosioho bava'adeje.

²⁷ Bava'amu iae ae aho'obēhe Iesu rihromareje. Rihromoromo magonaho ioro'iorohuro muo'amorovē'i nierusuburu'e bamobe rovareje. ²⁸ Nierusuburu'e bamobe rovamu gagorovo Iesuro hunuorovoromo uēvadeje: Jerusalem magonaho ōmo'ōmohumē nadi naniho vavaenimoromo nierusuburu'e bamo'i jemē'o jemesi aboji harihu'ohu'o uehorovoromo nivo'amirovorējo. ²⁹ Huē vavaene bogo bise'o vadu'oho rue'iramu aēro uvoruomo'ajējo: Dē tōjē'e magonahoho aboji harihu rumo'e raromarue magonahoho huē mae jēvājējo. ³⁰ Ēhi uvoromo juhuonivoromo uvoruomo'ajējo: Dahoru masijoho ininoho jemēro ahoromo taemavovorējo. Ēhi uvoruomo'ajējo. ³¹ Na ijo ma va'ēne jevājējo rōhu ije uejevanovaruējo. A'i jemē ijo sahonō'e huo'ōjēvoromo baradore siō'ōjēvo'amo'aruējo.

³² Iae mu sisē vaejare ae niō'ioho guduamo ōmēvo va'areje Iesu'o gemu mae vuovēvorōhego. ³³ Va'aroho ajiomoromo sa'a ihe Simano Gijo ajio surovareje. Suorovoromo Iesu baeromo korosire ano taemareje. Iesu ano taemo'i ē a sisēho niō'i jabu'o ano taemēvareje. Ano taemoromo ujuoho nigemo'amoromo Iesu ririre amo'i a sisē gōho ruēhi Iesuare ōvo manō amo'i gōho viēhi ōvo adonō amareje. ³⁴ Amamu Iesuro uavadeje: Apajo. Aehu nasi ōrire mu sisē vaejevaruoho uehorovoromo vuonugējo. Jabumē ē mu hesi bēhoho dadibijiohajējo.

Dadibijiohajējamu rue muorovo aribōviohuro Iesuare niōgoho adovoromo ajajovoromo ae gemu niōge gemu ēhi baebe rovareje. ³⁵ O ae aho'obēhe riravoromo ērimahareje. Ērimahamu a masijohuro sivoromo uarovareje: Ēahuro uōvuade hōjo: Naro a ioro'ioroho ajēmego marējēvaje hōjo. Ēhuni nadi'ego hu hesi arijo'arije

ajamirovego hu mae jiajo. Huro uövuade höjo: God-hu uevë'ero böröme namiromo ajëmi'irode aho na jevajëjo. God-hu nimoromo baejevade aho na jevajëjo. Èhuni nadi'lego hu hesi arijo'arije ajamirovajo. ³⁶ A masijohuro èhi sivamu muorovo ariböviohuro jabu'o Iesu sivareje. Sivoromo rueromo nioga'i'e wine jovoho bojami'ië'areje. ³⁷ Bojami'ië'oromo uavareje: Jew rajo jabesi a börömo javë'o'ho èhuro jasi ajamirovego mae javajo. Sivoromo èhi uavareje. ³⁸ Röhu Iesuare simano namore ijo viture jajivoromo uvë'e jiadeje: Ave aho Jew rajo jabesi a börömoho höjo.

³⁹ Iae korosire iromë'e a sisë göhuro Iesu sivoromo uavadeje: God-hu uavë'ero böröme namiromo ajamui'irane aho ja javajëjo. Na mae-ëjo. Èhi jië'o'ho jasi arijo'arije ajamirovoromo no'o ajamuego mae javuajo. ⁴⁰ Èhi uavamu a sisë göhuro uavadeje: Nadi èhi jië'e jöho jövëjo. Ja'o i'ue gemuoho baejanuëjo. Èhi jië'o'ho ja diehi'oromo God bogo juhuonamijanuëjo. ⁴¹ No niö'iro mu sisë vaejë'ero èhu'ero iae mae no i'ue baeromo ë'aruëjo. A'i è iaho mu sisëho bogo vaejë'e höjo. ⁴² Bogo vaejë'e hö'i Iesu uavadeje: Iesuajo. A muebejavuo'irane darugo barueromo böröme namijë'iroho nasi öroro uehorovevonëjo. ⁴³ Uehorovevonëjamu Iesuro uavadeje: Aveho na jö mae uavajëjo. Jaruvoho ja'o na'o gemu mae Paradise-re ari'ejarëjo.

Iesu guomade jöhoje.

⁴⁴ Iae majae ririre jiadeje. Majae ririre jiamu öri ari'e aho'o ramoramovadeje. Ramoramovobe va'ojuvo majae huotorovamu gavë'i ajivadeje. ⁴⁵ Ajivamu gavë'i God-are osa börömo ojo göho gagonö jiajoho niögehu tugoharoho arorovadeje. ⁴⁶ Arorovamu gavë'i Iesuro God madarugo'o uavadeje: Apajo. Naro nasi aru'ahoho jasi övo döre nugajëjo. Nugajëromo evare nugo'amadeje. ⁴⁷ Nugo'amamu muorovo a börömëro gavade èhi jië'e mue gö gö ë'amu gagorovo uvadeje: Iae mae-ëjo. Èaho iae a mae jiade höjo. Èhi uvamu èhuro God-are ihoho mae jiadeje. ⁴⁸ Ae aho'obëhe urimo è mu börömo ga'i gagovarohuro gavare èhi jië'e mue gö gö ë'amu gagorovo vuonorö'öromo vavaenimoromo vinebe anobe va'areje. ⁴⁹ Va'amu Iesuare ariböviohu'o Galilee sa'are jioromo Iesuare ijore ijore rovere magonaho ömo'ömohu'o èho jaburo rori'o riravoromo gavareje èhi jië'e mue gö gö ë'amu.

Iesuare sino munë gagore bamare jöhoje.

⁵⁰ Èhi'amu ae gemu hesi ihe Joseph-ro iae hijadeje. Hu Arimathea amo raje jiadeje. Hu Jew rajo jabesi a duvahëro jië'ero a masijo ioro'iorohu'o hiromo jöe mevonövadeje. Hu a mabëhe God-are jöho avoho ejahaje ae jiadeje. ⁵¹ A maëro jië'ero èhu'ero a masijo ioro'iorohu'o hiromo hejade uvoruomamu: È'lego no Iesu ano'irarë uvoruomamu hegorovo bogo ejëhadeje. Bogo ejëhoromo gavade jaburo Iesu anamu gëgorovo uvadeje: Èhi jië'o'ho sisë höjo. Röhu huro muebejë'e hijadeje God-ro böröme namiromo aho'obëhe muebejëvoröhego. Joseph èhi jië'e ae jiadeje. ⁵² Èhi jië'e aëro jië'ero huro va'oromo Pilate uavadeje: Uevego na Iesuare sinoho bae'iröjo. ⁵³ Sinoho bae'iröjamu Pilate-ro ejahamu va'oromo sinoho baruvebiromo niögu maëro numoromo munë ubuvarire è bamadeje. Èmunë gagoho ae gö bogo bamë'e

Iesu ë bamadeje. ⁵⁴ Ëmajaho Friday jië'ëro Jew rajehu nuharue majaho rue'ie'adeje.

⁵⁵ Joseph-hu Iesuare sino bava'oromo bamadevare evare Galilee sa'are jioromo Iesu'o gemuore rovare magonaho ömo'ömhuro Joseph-are ijore rueromo ubuvare munëho garomo gavareje Iesuare sinoho ë avoho bamamu. ⁵⁶ Iesuare sinoho ë avoho bamamu gagorovo vuonorö'ö va'oromo ridi'e ose gö gö avoho'amareje Iesuare sinore bahi'iröhëro. Avohoromo nuho majaho rovamu Jew rajo jögoroho eromo ma-nuhareje.

24

Iesu ri'öjêde jöhoje.

¹ Nuhë'ëro hura börömore sue'o sue'o ë magonaho ömo'ömhuro ri'öromoro ridi'e oso avoharoho ujuohoromo Iesu bamarire ë vuonorö'ö va'areje. ² Iesu bamarire va'i gavareje munë gago tugohare munë börömo rori'o höhö bava'ë'e jiamu. ³ Höhö bava'ë'e jiamu gagorovo munë gagore rumo va'areje röhu Bada Iesuare sinoho bogo birohareje. ⁴ Bogo birohogoro ë riravoromo uehore gö gö baejareje. Uehore gö gö baejamu gavë'i ae niö'iro ma-majioho rovareje jabesi niögoho majaehu bamanövë'e ëhi ajivë'e niögoho io'amë'ëro. Rueromo ë magonaho jabesi bëhire rirarovareje. ⁵ Bëhire ro rirarovamu gëgorovo rue magonahoho jaburo juhuonëmiromo uruho'amo riravareje. Uruho'amo riravamu gavë'i rue ae niö'iohuro uëvareje: Jemë rabëni i'ovë'e aho guomë'e a sino bamaruiroho naharujëjo. ⁶ Iesu aveho bogohöjo. Hu mami'e ri'öjê'e höjo. Ri'öröhe jö Galilee sa'are hiromo majëhijadoho uehorovohëjo. ⁷ Huro jemë uëvade höjo: Aëro God-are A Maho na baejevoromo a sisë jabesi övore bojëmi'iramu baejevoromo korosire ano taemevoruomo'ajëjo. Ano taemevo'iramu guomoromo majae niö'i gemu hesi uhure ri'ö'ejöjo. Nasi muoho God-ro ëhi bojemë'e höjo. Iesuro ëhi uëvamu hejarije höjo. ⁸ Hejarije höjamu rue magonahoho jaburo ë jöho uehorovareje. ⁹ Uehorovoromo Iesu bamarire jioromo vuonorö'ö va'areje. Va'oromo rabe rabe gavare hejare jöho majëhijamu Iesuare ijoraje 11-ho jabu'o Iesuare aribövi ioro'iorohu'o ë jöho heruomadeje. ¹⁰ Röhu ë jö majëhijare magonaho jabesi ihoho Mary Magdalene o Joanna o James-are vëme Mary ëhi jëvadeje. Ëmagonahohu'o magonaho ioro'iore jabu'o gemu mae jijiharohu'o ëho jaburo ë jöho apostle aribövioho majëhijareje. ¹¹ Majëhijamu hegorovo rue apostle ariböviohuro uvareje: Ëmagonahoho jaburo ë jöho ëma ataruëromo bogo ma uehorovareje. ¹² Bogo ma uehorovoromo röhu Peter-ro ri'öromoro sino bamarire tutuvoromo ë va'adeje. Va'oromo munë gago hohi-tohoromo gavadeje Iesu numare niögohemu jio'amamu. Niögohemu jiamu gagorovo uehorovoromo uvadeje: Aveho diehi'ade hö uvoromo hesirëro vuonorö'ö va'adeje.

Emmaus amore va'i örire diehi ë'are jöhoje.

¹³ Va'ë'ëro jeniromamu Iesuare ae niö'iro Emmaus amore va'irögoro örire va'areje Jerusalem jioromo Emmaus va'iröhe öri hesi vahuoho 11 kilometre jië'ëro. ¹⁴ Örire va'oromo mu rabe rabe jiade jöho jörovobe va'areje. ¹⁵ Jöho jörovoromo berohobe va'amu Iesuro birohëvoromo jabu'o gemu mae va'adeje. ¹⁶ Va'amu ë ae niö'i jabesi uehoroho

tugohëhamu bogo avoho garomo uvareje: Ëho Iesu hōjo. ¹⁷ Bogo avoho gavamu Iesuro uëvadeje: Jemë diehi jië'e jōho jōrovobe jireharujējo. Jireharujējamu rueho jaburo jireharoho vuonugo'i nu ano'e sisë'irëovoromo rirarovareje.

¹⁸ Rirarovoromo ae gemu hesi ihe Cleopas-ro uavadeje: Ae aho'obëhe Jerusalem raromaruohuro avevejō'e rabehe ë'adoho iae garuomoi ja gemu diehi'avo'ego bogo gavanuëjo. ¹⁹ Bogo gavanuëjamu Iesuro uëvadeje: Diehi jië'e muohajo. Uavareje: Nazareth raje Iesure örire vaejare jōho uavaruëjo. Iesu hu jō God-aro baeromo no majahuijaje ae jiade hōjo. Ëhi jië'e aëro jië'ëro God-are nunire o ae aho'obëhe nosi nunire namiromo biriri'e muoho vaenövo biriri'e jōho jövonövade hōjo. ²⁰ Iesu hu ëhi jië'e ae jiade hōjo. Röhu nosi priest masijohu'o nosi a masijo ioro'iorohu'o ëho jaburo Rome aribövi jabesi övore bojëmijare hōjo ëhuro ëho jaburo court vaeromo Iesu ano'iröhe jōho uëröhego. Rome aribövi jabesi övore bojëmamu ëhuro Iesu korosire ano taemare hōjo. ²¹ Röhu noro uehorovoromo uvare hōjo: Ëaho nani God-ro nugö'öjode hōjo rueromo no ajamuromo Israel rajo nosi i'u'e muoho ahavuo'i hesi sasohë'e muoho röjahuiröhego. No ëhi uehorovare hōjo. Röhu jöe gö'o ë mu sisë vaeruomadoho majae niö'i barëjamu röhu aveho majae göho rovë'e hōjo. ²² Iae ëhi hōjo röhu no'o gemu mae Iesure ijore ijore jijiharue magonahohuro ave jō börömohe majahuijamu hegoro no tiöjavuade hōjo. Jaburo jaruvo sue'o ri'öromo Iesu bamarire va'are hōjo. ²³ Va'oromo gavare hōjo Iesure sinoho bogojiamu. Bogojiamu gagorovo vuonorö'ö rueromo uövuare hōjo: No va'oromo nia'ovo'iraajanovoromo garomo hejare hōjo aneraho jaburo uövuamu: Iesu bogo guomoi i'ovë'e hōjo. Magonahoho jaburo ëhi uövuamu hejare hōjo. ²⁴ Jōho henugoromo nosi ae göëro göëro Iesu bamarire va'oromo gavare hōjo magonahehu uövuadëhi ëhi jiamu. Röhu Iesu bogo gavare hōjo.

²⁵ Iesu bogo gavare hōjamu Iesuro ri'öromo ë ae niö'ioho uëvadeje: Asë'e jemë simane i'uhëgo'ego God-are jōho bogo ma-burëroho baejarujējo. Ëhu'ëro jië'ëro jō God-aro baeromo majëhinövare a jabesi jōho bogo maho uehorovarujējo. ²⁶ Jemë diehi'oromo ave jōho bogo uehorovarujējo. God-ro bamade hōjo böröme namiromo ajëmi'iröhe aho vi'ehi böröme baeromo guomojōro röhu ijönö aji'ere ajio hiröhego. ²⁷ Ëhi uënogoromo Iesuro hesi jöe God-are surire jajivo'amadoho huruoho majëhi barëjadeje. Moses-hu jajivade jōho aevo'i majëhiromo jō God-aro baeromo majëhinövare a ioro'iorehu jajivo'amade jōhu'o huruoho majëhijadeje. Majëhijamu rue ae niö'iohuro hebe va'areje.

²⁸ Hebe va'aroho va'i nimare amore hörö'ië'areje. Hörö'irögoro Iesu öre ëgo'o va'o hesi jiamu gagorovo ²⁹ rueho jaburo nijio'iraeromo uavareje: Nadi va'i no'o hijëjo. Majae mami'e barëjë'ëro vahiromavuo'ië'ajëjo. Vahiromavuo'ië'ajëjamu ejëhoromo jabu'o va'oromo osare hijadeje. ³⁰ Hiromo jabu'o ie i'irögoro sa'aro hiromo ie baerome God mae uaromo ato'atovoromo i'imëmamu rueho jaburo baejareje. ³¹ Baeromo God-ro jabesi simanoho jiovëhamu evare Iesu avoho garomo uvareje: Ojo'e ë aho Iesu hōjo. Iesu hörömo ga'i gavareje Iesu ëma bogojio va'amu. ³² Va'amu gagorovo uarovareje: Ja'o uehorovëjo. Ëahuro no'o jöe jövoromo God-are suri bëhoho huruoho majahuibe

örire rovamu heromo nosi dë vövöbajo'oho sasohavuoromo ri'öjavuo avohade höjo.

³³ Ëhi uarovoromo ma-burëro sionëro vuono bul'öromo Jerusalem amore va'areje. Jerusalem va'oromo gavare Iesuare ijoraje 11-hu'lo jabesi a ioro'iorohu'lo gagovoromo raromë'le jiamu. ³⁴ Raromë'ëro jaburo è ae niö'ioho uëvareje: Bada iae ri'öjë'e höjo. Ri'öromo Simonare örire rovamu huro gavade höjo. ³⁵ Gavade höjamu rue ae niö'iohuro uëvareje: Noro niö'iro örire jirehoromo ëhi ëhi gavare höjo. Ëhi uëromo uëvareje: Iesuro ie ato'atovoromo i'imamuamu evare no avoho garomo uvare höjo: Iae Bada höjo.

Iesuhu hesi ijorajo jabesi nunire rovade jöhoje.

³⁶ Bada höjamu gavë'i Iesuro ro ma-majioho jabu'lo gemu mae namijadeje. Namiro mo uëvadeje: Aganomë vaevë'e raromarujëjo. ³⁷ Vaevë'e raromarujëjamu juhuonivoromo jiodudu'iraeromo uvareje: No aru'ahe gavaruëjo. ³⁸ Aru'ahe gavaruëjamu uëvadeje: Jemë rabëni juhuonivarujëjo. Rabëni uehore gö gö baejarujëjo. ³⁹ Ave nasi övoho höroho geromo uvorëjo: Nörö höjo. Ma'enegro heromo uvorëjo: Nörö bogo aru'ahemuoho jio'i a mae höjo. Aru'ahoho sine ijo'ahe bogohöjo. Röhu jemë iae gevarujëjo na sino'e ijo'aho'e jevo'ego. ⁴⁰ Ëhi uënu goromo övohu'lo hörohu'lo röjëhijamu gavareje. ⁴¹ Garomo uehorovemu uehorovo'i arijareje. Uehorovoromo uvareje: Aveho mu ma-mabëhe jië'e nani noro sisë'i gavaruëromo bogo ma uehorovareje. Bogo ma uehorovamu gavë'i Iesuro uëvadeje: Na jemë ioho jëvavëjo o bogojëvavëjo. ⁴² Ëhi uëvamu visue vënire buejë'oho babojamareje. ⁴³ Babojamamu Iesuro baeromo ae aho'obëhe jabesi nunire ijadeje.

⁴⁴ Iromo uëvadeje: Urimo naehu jemë'lo hiromo majëhijamu hejarije jöho iae avevejö'e röhu maho majëhi'irögoro ë'ajëjo. Na uëvode höjo: Nasi jöho aho'obëhe Moses-hu jajivadoho jö God-aro baeromo majëhinövare a ioro'iorehu jajivaroho Psalms jö jajivaroho nasi jöe aho'obëhe God-are surire jajivarëhi iae ëhi jio'a'ajëjo. Öre gö bogohöjo. Ëhi uëvamu hejarije höjo. ⁴⁵ Hejarije hö uëromo jabesi simanoho huotovëhamu God-are surire jö bëhoho avoho gavareje. ⁴⁶ Avoho gavamu huro uëvadeje: God-are surire jajivoromo ëhi uvë'e höjo: God-ro bamë'ëro böröme namiromo ajëmijaje aho nörö vi'ehi böröme baeromo guomoromo majae niö'i gemu hesi uhure ri'ö'a'ajëjo. ⁴⁷ Ri'ö'iramu aëro nöruare ihore jöe majëhiromo ae uë'a'aruëjo: Ae aho'obëhe öri sisëre jijiharujoho vuonugohëjo. Mu sisëho vuonugö'i avoho uehorovoromo mu mae vaehego God-ro jemesi sisëho uehorovoromo vuonugajo. Ëhi jië'e jöho Jerusalem amore aevoromo majëhiromo maja rojomajire beva'ajire sa'are sa'are majëhibe jijihö'aruëjo. God-are surire jöho ëhi uvë'e höjo. ⁴⁸ Röhu ëhi jië'e muoho jemë gavë'e jëvaje ëhuni è jöho majëhibe jijihorëjo. ⁴⁹ Röhu aveho hehëjo. Urimo nasi Vavuehu hesi Aru'aho suvuorëmi'i mae uëvadëhi narö è Aru'aho suvuoroho jemëni nugö'ö'iramu bae'a'aruëjo. Ëhuni è hesi urimo jemëro va'oromo Jerusalem amohuremu raromorego hujeji God-are darugohuro ruvebiromo ruahö'öjëvo'iröhe höjo. God-are darugohuro ruvebiromo ruahö'öjëvo'iramu evare va'oromo nasi muoho vae'a'aruëjo.

Iesu ö'idöre ajiomade jöhoje.

⁵⁰ Ĕhi uēnugoromo sō ujuohoromo Bethany amonō va'adeje. Va'oromo övoho nigemēvoromo uēvadeje: God-ro jemē huē mae bojēmi'ajējo. ⁵¹ God-ro jemē huē mae bojēmi'ajē uēromo God-ro uavamu jabumē ē rēmo'i huro ö'idöre ajiomadeje. ⁵² Ajiomamu gagorovo rue Iesuare ariböviohuro hu rajahiromo börömo bëhe nimorohobe Jerusalem vuonorö'ö va'areje. ⁵³ Va'oromo raromoromo God-are osa börömore va'oromo majae aho'o God rajahinövareje. Ahia mino'e.

JOHN

God-are Jö Jövaje Aehu God-arire jioromo sa'are rueromo mu ma barovade jöhoje.

¹ Ni'i'ivade majaroho ae gemu hesi ihoho God-are Jö jumuvè'o ho iae hijè'e jadeje. Hu God'o gemu mae hi'i hu'o God jadeje. ² Ni'i'ivadire è aho God'o gemu mae hijè'e jadeje. ³ God-ro uavamu huro sa'ae bövie bise'e bamadeje. Bogo bamo'ibejo bövioho bise'o ho bogo mae bogojio'ibejo. ⁴ Darugoho aho'o hesirire gemu jioromo rovadeje. Rueromo ae aho'o ajoho bojamuadeje. ⁵ Èajohuro ramoramore ajivajeje. Ramoramoho ajoho bogo tugohè'eje.

⁶ Ae gemu God-ro nugö'öjamu rovadeje. Hesi ihoho John jadeje. ⁷ Hu rovadeje aji hesi bëhi gavadoho huruoho majahui'iröhëro. Majahuijogo ae aho'obèhe hesi jöho heromo mae uehorovo'iröhego. ⁸ Hu bogo ajoho jadeje. A'i huro aji hesi bëhoho majahui'i rovadeje. ⁹ Èajoho iae aji maho jiohijo. Evare majare è aje ae aho'obèhe ajivavuajohuro sa'are ruehijo.

¹⁰ Amo God-are Jö jumuvade ahuro ave sa'are hijadeje. Urimè'i God-ro uavamu ave sa'aroho avoho'amadeje röhu ave sa'are ariböviohuro hu bogo avoho garuomadeje. ¹¹ Hu hesiro rovadeje röhu hesi aribövi mahuro hu bijönimoruomadeje. ¹² Röhu hesi a ioro'iorohuro hu nimoromo mae uehorovoruomadeje. Mae uehorovoruomamu èhuni uèvadeje: Avevejö'e jemè God-are aboji harihu'e raejèvajèjo. ¹³ God-are aboji harihu'e raejèvade hesi öroho bogo aehu nimoromo baejèvamu i'oroho rahèvo'i a'i God-ro baejèvè'ëro èhuro hesi aboji harihu'e jèvadeje.

¹⁴ Röhu God-are Jö jumuvè'e ahuro sino haho'e baeromo ro God-are jöho mae röjahui avohoromo huè baejavuo avohoromo no'o gemu mae hibe juvadeje. Hi juvamu no hesi ajoho gavareje è ajoho hesi Vavu hesi Harihe hu gemu'ëro jiè'ëro baejè'ëro.

¹⁵ Èhi'amu gagorovo John-ro è a hesi jöho ae huruoho majèhijadeje. Majèhiromo ma-darugo'o uvadeje: Naehu uèvode aho aviae höjo. Na mami'e uèvode höjo: Naro urimo rovè'e jevajèjo. Ae gemu'ëro nasi ijono rue'iè'ajèjo. Èhi höjo röhu è ahuro na iosiremiromo hu börömoho höjo na bogo rahevadevare hu jiobe rovè'ëro jiè'ëro. Èhi uèvadeje.

¹⁶ Iae hu huè baejavuo avohè'ëro èhu'ëro huè mae no ae aho'obèhe bojamuiromo döre döre bojamuibe rovè'eje. ¹⁷ Mu vae'iröhe jögoroho God-ro uavamu Moses-ro bojamuadeje. A'i God-ro uavamu Iesu Kerisoro huè baejavuoromo God-are bëhoho maemu röjahuijadeje. ¹⁸ Aho God bogo mae bogo gavè'e javue. God Harihoho gemu Vavu hesi bëhi mare hijaje aëro jiè'ëro huro God röjahuijè'eje.

John bapataeto vaejaje aehu a jö majèhijadohoje.

¹⁹ Röhu Jerusalem raromarue Jew rajo a masijohuro priest ömo'ömo'u'o priest ajëmijarue a ömo'ömo'u'o uèvareje: Va'irarijoho John uarèjo: Ja rahuo javajëre. Èhi uèvamu va'oromo è jöho ua gavamu huro avièhi jiè'e jöho majèhijadeje. ²⁰ Hu bogo jöho subivèho'i

sama'e huruoho majëhiromo uëvadeje: Na bogo böröme namiromo ajëmi'irode aho jevajëjo. ²¹ Uavareje: Ëhi jië'o ho na ja Elijah javajëjo. Uëvadeje: Bogajo. Uavareje: No muebejaruëjo a börömohuro jöe God-aro barueromo majahui'iröhego. Na ja ë aho javajëjo. Uëvadeje: Bogajo. ²² Uavareje: Ëhi jië'o ho ja rahuo javajëjo. Majahuijego no va'oromo ramuö'öjamu rovare aho majëhi'iröhe höjo. Jasi jöho ja diehi jövanue höjo. ²³ Diehi jövanue höjamu John-ro uëvadeje: Na a rumo'e sa'are hiromo aviëhi jië'e jöho ma-darugo'o majëhijaje ae jevajëjo.

Badahu rueröhe öroho ahorirëro vajivahorego hu maro rue'irajo. Urimë'i jö God-aro baeromo majëhinövade ae Isaiah-ro ë jöho jajivadeje. Ëho John-ro uëromu ë'adeje: Isaiah-hu jajivade jö hesi muoho iae na vaeromo ë'ajëjo.

²⁴ Ëhi jövamu rueho jaburo Pharisee a masijohuro rëmö'öjamu rovë'ëro ²⁵ uavareje: Ja bogo böröme namiromo ajamui'irane aho javajëjo bogo Elijah javajëjo bogo jö God-aro baeromo majahuijanue a börömoho javajëjo röhu ja diehi'oromo aho bapataeto vaejëvanue höjo. ²⁶ Vaejëvanue höjamu John-ro uëvadeje: Naro jovëro bapataeto vaejëvaje höjo. Röhu jemëhu bogo gavaruje aho jemesi ririre nami-jajëjo. ²⁷ Huro nasi ijonö rue'ië'ajëjo röhu huro na iosiremiromo börömoho höjo. Naehu hesi mu bise'o vaejahoromo hesi höru sino jiova'hibejodoho o mu bise'o bise'e rabe vaejaho'ibejodoho na ma-bise'e jevajëjo. John-ro ëhi uëvadeje. ²⁸ John'o Jerusalem jioromo rovare ariböviohu'o jö ëhi vaerovaroho ëho Bethany jiadeje. Bethany amoho Jordan jovo ruhëhi jiadeje. Ësa'are Jordan jovore John-ro ae bapataeto vaejëvonövadeje.

Iesu God-are Sheep Harihu jiaje jöhoje.

²⁹ Nërö John-ro gavade Iesu rovamu gagorovo ae uëvadeje: Arueho gahëjo. Sheep harihu muo'amamu God-hu mu sisë rori'o babu'öjadëhi ëhi ë ahuro sa'ae gö gö aho'obëhe nosi sisëho rori'o babu'ö'ajëjo. ³⁰ Ëa hesi jöho na mami'e majëhijode höjo. Majëhiromo uëvode höjo: Naro urimo rovë'e jevajëjo. Ae gemuëro nasi ijonö rue'ië'ajëjo. Ëhi höjo röhu huro na iosiremiromo hu börömoho höjo na bogo rahevadevare hu jiobe rovë'ëro jië'ëro. Ëhi majëhijode höjo. ³¹ Mami'o ho na hu bogo avoho gavade höjo. Röhu naehu rueromo jovehu bapataeto vaejëvode hesi bëhoho ëho naru hu röjëhijego Israel aribövioho jemëro ga'irarijego ëhuni ë'ode höjo.

³² O ave jöho John-ro gavë'ëro huruoho majëhiromo uëvadeje: Naro gavade höjo God-are Aru'ahe guaho va'ënohuro ö'idöre jioromo ë a hesi simano namore ruvebiromo gerejamu. ³³ Mami'e na hu bogo gavade höjo röhu naehu jovehu bapataeto vaejëvojöro uevadohuro uevade höjo: Ga'irane Aru'ahohuro ruvebiromo di a hesi simanore gerejamu gavë'o ho uvonëjo: Ëahuro God-are Aru'aho Mahuro ëhuro bapataeto vaejëvo'ajëjo. Vavuohuro ëhi uevamu hejë'ëro ijonö gavade höjo Aru'ahoho ruvebiromo ë a hesi simanore gerejamu. ³⁴ Ëho nasi nunëro gavade höjo. Gavë'ëro naru jemë uëvajëjo: Arue aho God-are Harihe höjo.

Iesuhu aevoromo ae uëvamu hesi ijore ijore jijihare jöhoje.

³⁵ Ëhi uëvë'ëro nërö John-ro röhu maho ë rueromo hesi ijorajoho niö'i jabu'o gemu mae namijadeje. ³⁶ Nami'i gavade Iesu rova'amu gagorovo ijorajo niö'ioho uëvadeje: Arueho gahëjo. God-are Sheep Harihoho iae jiajëjo. ³⁷ Ëhi uëvamu hegorovo rueho jaburo John nugo'i Iesuare ijore va'areje. ³⁸ Iesuare ijore va'amu huro huotorovoromo gëvade ë ae niö'ioho hesi ijore rovamu gëgorovo uëvadeje: Jemë rabe naharujëjo. Rabe naharujëjamu jabesi huëro uavareje: Rabae ja dinö'e hijanue höjo. Röhu Rabae uavaroho ëho uaromo ë'areje: Röjahuijanue a börömhajö. ³⁹ Rabae ja dinö'e hijanue hö uavamu hegorovo Iesuro uëvadeje: Rueromo gahëjo. Gahëjamu hegorovo majae garobo'e bamamu hu'o va'oromo hu hijaje osaho gavareje. Garomo hu'o arijuvo vahiromamu va'areje.

⁴⁰ Ae niö'iohuro John-are jöho hejë'ëro Iesuare ijore rovare a gö hesi ihoho Andrew Simon Peter-are öho jiadeje. ⁴¹ Andrew-ro ma-burëro hesi öho Simon naho va'oromo bihoromo uavadeje: Böröme namiromo ajamui'iröhe aho noro birohë'e javuajëjo. Böröme namiromo ajamui'iröhe aho Greece huëhu huotovë'ohö Kerisoje. ⁴² Böröme namiromo ajamui'iröhe aho birohë'e javuajëromo Simon hu'irae baeromo Iesu ga'iro rovadeje. Rovamu Iesuro hu garomo uavadeje: Ja Simon John-are harihe javajëjo. Jasi ihoho Cephas jio'a'ajëjo. Hebrew huëhu Cephas huotovë'ohö Greece huëho Peter-je. Ëiho hesi bëhoho munëje.

Iesuhu Philip'o Nathanael'o uëvamu hesi ijore ijore jirehare jöhoje.

⁴³ Ëhi ë'ë'ëro nërö Iesuro uvadeje: Jaruvo na Galilee sa'are ajiomo'ejöjo. Ajiomo'ejö uvonugoromo ajiomadoho ajio Philip birohadeje. Philip bihoromo uavadeje: Nasi ijoro ijoro rovëjo. ⁴⁴ Röhu Philip hu Bethsaida amo rajo ae jiadeje. Andrew'o Peter'o jabu'o ame gemuoho jëvadeje. ⁴⁵ Ëhi'amu Philip-ro Nathanael naho va'oromo bihoromo uavadeje: Urimë'i Moses-ro hesi jögoru surire uövuade höjo: Ijonö a böröme rue'a'ajëjo. O jö God-aro baeromo majëhinövare ariböviohuro jöe gemuoho jajivoromo uönövare höjo. Èrueröhego jajivoruomade aho iae no birohë'e javuajëjo. Hesi ihoho Iesu höjo. Hu Joseph-are harihe höjo. Hesi amo ihoho Nazareth höjo. ⁴⁶ Nazareth höjamu Nathanael-ro uavadeje: Asë'e a maho ëhi jië'e amoroho bogo rue hesi höjo. Bogo rue hesi höjamu Philip-ro uavadeje: Ja'o ro gavëjo.

⁴⁷ Ëhi'amu Iesuro gavade Nathanael rovamu gagorovo ae uëvadeje: Arueho gahëjo. Israel rajo a ma-maëro rovajëjo. Hesi uhuroho sareri'e jöho bogohöjo. ⁴⁸ Ëhi uavamu Nathanael-ro uavadeje: Ja diehi'oromo na gevanue höjo. Gevanue höjamu Iesuro uavadeje: Jaehu ruejöro Philip-hu uavade hesi urimo ja meso gurutore hijamu gavode höjo. ⁴⁹ Gavode höjamu Nathanael-ro uavadeje: Tisa ja God-are Harihe javajëjo. Ja böröme namiromo Israel rajo muebejavuanue aho javajëjo. ⁵⁰ Muebejavuanue aho javajëjamu Iesuro uavadeje: Na uavode höjo: Ja meso gurutore hijamu gavode höjo. Ëmu harihu vaejode jöho uavamu hejë'ëro jero mae uehorovevanuëjo. Röhu u'emu mu masijo maho ga'amo'anuëjo. ⁵¹ Ëhi uanugoromo uëvadeje: Ave jöho na jö mae uë'ië'ajëjo. Jemë iae ga'a'arujëjo ö'idöho arorovo'i God-are A Ma naehu jiajire God-are anerahuro iojioromo ruvebi'i ari'iramu.

2

Iesuho Cana amore hiromo masurovare sörö iromo bëhi'e mu börömo vaejade jöhoje.

¹ Majae niö'i gemu hesi uhure iae masurovo'iröhe söröho Cana amore Galilee sa'are avohareje. Avohamu Iesuare vëmohuro ë hijadeje. ² Iesu'o hesi ijorajoho jabu'o söröre ruejöro uëvë'ëro ë ro raromareje. ³ Raromoromo sörö'le ariböviohuro wine jovoho ue'aho barënuogromo vëmohuro Iesu uavadeje: Wine jovoho barëjë'e höjo. ⁴ Barëjë'e höjumu uavadeje: Mamajo. Rabëni ajëmijöro uevanuëjo. Nasi maja börömo bogo rovë'e höjo. ⁵ Bogo rovë'e höjumu hegoro vëmohuro mu ajëmijarue aribövioho uëvadeje: Ëaehu diehi uëvamu hejë'o ho ëhi ë'orëjo.

⁶ Röhu Jew rajëro God uehorovoromo jabesi sine inöme u'o'amarue jögoroho enövareje. Ëhuni jovo hevöe munëhu ubovoromo avoho'amaroho aho'obëhe övo gö mine övo göre gemu ë momorö'öjadeje. Jovo bövi mae 80 o 120 litre gemu gemu oteho'amo'ego irijiomomo'amonövadeje. ⁷ Ëhi jië'e jië'ëro Iesuro mu aribövioho uëvadeje: Ëmunë hevöro jovo maho oteho'amego irijiomomo'amo'irajo. Ëhi uëvamu irijiomomo'amo barëjareje. ⁸ Ëhi'amu uëvadeje: Jove gö ë hevöro vuoromo ujuoho va'oromo sörö muebejaje aho i'imamirëjo. I'imamirëjumu ujuoho va'oromo i'imamijareje. ⁹ I'imamamu rue sörö muebejaje ahuro i heromo hejadeje jovoho rihu'e jiamu ë jovo maho mami'e wine-rëjë'ëro jië'ëro. Röhu ë wine jovoho dinö'le jioromo ujuoho rovaroho bogo ga'i hesi jovo vuare mu ariböviohuro gavareje. Amo hejade rihu'e jiamu hegoro i'o masuvade aho uvamu rovadeje. ¹⁰ Rovamu rue sörö muebejaje ahuro uavadeje: Ae aho'obëhe wine jovo mabëhoho urimo bahijëharue höjo. Bahijëhonugoromo aëro jovo bövi mae ue'ahëgo ijönö jove ma-bisemu sisëho bahijëharue höjo. A'i jero wine jovo maho avoho runo'le bamane höjo aviavejë'le i'iröhohuni.

¹¹ Iesuro Cana amore Galilee sa'are hiromo bëhi'e mu börömo aëvo'i ëhi vaejadeje. Vaeromo ëhuro hesi aji maho röjëhijamu gagorovo hesi ijorajoho jaburo hu mae uehorovareje.

¹² Ëhi'amu Iesu o hesi vëmoho o ö ömo'ömoho o ijorajo ömo'ömoho ëho jaburo Capernaum amore abuejareje. Abueromo ë raromaroho majae gemu niö'i rabu'e barëjadeje.

Iesuho God-are amo börömore ajiomoromo inömo imo'amarue aribövi rarovö'öjëvade jöhoje.

¹³ God-hu Vörö Tugohade Sörö Jew rajehu ijarue majaho dunovadeje. Sörö majaho dunovamu Iesuro Jerusalem ajiomadeje. ¹⁴ Ajiomoromo God-are amo börömore va'oromo gavadeje a ioro'ioroho cow-ho Sheep-oho guaho va'ëne ugoho ëhi imo'amo'i o a ioro'ioroho mu maratu bëhire raromoromo ijo bajoho ujuoho'i amo börömo hesi ijo bajoho mana i'imëmijamu. ¹⁵ Ëhi gënuogromo ö'le ujuohoromo baduno'e ö'oho huadeje ëhuro hisuebi'amoröhëni. Huonugoromo ë aribövioho aho'obëhe God-are amore jioruomamu hisuebijëvoromo rarovö'öjëvoromo sheep-ohu'o cow-hu'o rarovö'ö'amadeje. Ijo bajo mu vaeruomaje aribövi jabesi mu maratuho huotovö'öjëhamu ijo

bajoho rireromoromo arua anumiae va'adeje. ¹⁶ Guaho va'ène ugo imoruomaje aribövioho uévadeje: Ave inómo inómoho rori'o ujuoho va'ohêjo. Nadi aveho imohêjo. Nasi Vavu hesi amoho bogo bövi bise'o imarue amoho hõjo. ¹⁷ Bogo bövi bise'o imarue amoho hõjamu hegorofo Iesuare ijorajoho jaburo uehorovoromo uvareje: Huhu é mu vaejaje hesi bëhoho God-are surire jajivoromo uvè'e hõjo: Vavuoho jasi osa hesi mu nimajohuro èhuro vèninö'e nasi dè vövöbajo'ere ravevajêjo.

¹⁸ Röhu Jew rajo a masijohuro gavare Iesu èhi'amu uavareje: Rabèni èhioho è'anuëjo. Bogo gavarue darugo'e muoho røjahujjego no garomo uvarêjo: God-ro uavè'èro è'anuëjo. ¹⁹ È'anuëjamu Iesuro uévadeje: Ave God-are amoho dadovorêjo. Dadovè'oho majae niö'i gemu hesi uhure naro röhu maho vae barè'iramu mae nami'a'ajêjo. Èhi jiè'e darugo'e muohemu røjèhi'ejöjo. ²⁰ Røjèhi'ejöjamu Jew rajohuro uévareje: Sarerivanuëjo. Ave amo vaebe rovaroho vadune aho'obèhe 46 barèjè'e hõjo. Èhuni dadovè'oho röhu ja diehi'oromo majae niö'i gemu hesi uhuroho vae barè'iramu maho nami'a'ajêjo.

²¹ Jaburo uvareje: Nani God-are amo bërömore dadovo barèjego huro vae barè'i jövajêjo. Röhu bogo amo hesi jöho jövo'i hesi sino haho'ehu guomoromo röhu maho ri'öröhe jöho jövadeje. ²² Èhu'èro jiè'èro ijönö Iesuhu guomoromo ri'øjadevare evare hesi ijorajoho jaburo uehorovoromo uvareje: Iesuro mami'e uönövade hõjo: God-are amoho naro avoho vae'iramu nami'a'ajèromo evare Iesu ri'ö'iröhe jö God-are surire jajivare Iesuhu majèhijadoho èho mae uehorovareje.

Iesuhu ae aho'obèhe gö barèjaje jöhoje.

²³ God-hu Vörö Tugohade Sörö majare Iesuro Jerusalem amo bërömore hijamu evare ae aho'obèhe gavare hu mu masije vaejamu gagorovo hesi örire mae uehorovoruomadeje. ²⁴ Mae uehorovamu Iesuro uvadeje: Èaribövioho ma-döèremu uehorovevaruèromo jabesi öriroho bogo ma uehorovévadeje ae aho'obèhe mami'e gèvè'èro jiè'èro. ²⁵ Iae hu ae aho'obèhe jabesi dè vövöbajo'oho gè barènövadeje. Èhu'èro ae gö jabesi jö Iesuare örire majahi'iröhe bëhoho bogojadeje.

3

Iesuhu Nicodemus'o jö jövade jöhoje.

¹ Iae Jew rajo a bëröme gemuèro hijadeje hesi ihoho Nicodemus. Hu Pharisee ae jiadeje. ² Vahie gemu huro Iesu ga'i va'adeje. Va'oromo Iesu uavadeje: Tisa no ja garomo uvarue hõjo: God-hu ramö'öjamu røjahui'i rovane ae javajêjo. Rabèniajo. God a'oho bogo hi'ibejajo jaehu vaejanue èhi jiè'e mu masijo vaejè'oho bogo eni javuo'ibejajo. ³ Bogo eni javuo'ibejajamu Iesuro uavadeje: Ave jöho na jö mae ua'ie'ajêjo. Ae mami'e rahadoho röhu maho bogo raho'amè'oho God-hu muebejaje öri ari'o garuomoröhoho bogo eni jioruomo'ajêjo. ⁴ Bogo eni jioruomo'ajèjamu Nicodemus-ro uavadeje: Iae mae hõjo röhu aho mavojiraejè'oho diehi'oromo röhu maho raho'amo'iröhoho eni jioruomo'ajêjo. Vèmu jabesi dère vuonorö'ö rumo va'oromo suorovönè'oho bogo eni hõjo. ⁵ Bogo eni hõjamu Iesuro uavadeje: Ave jöho na jö mae ua'ie'ajêjo. Jovohu'o God-are Aru'ahohu'o bogo ajèmijamu röhu maho rahè'oho God-are öri ari'ere

va'iröhoho bogo eni jioruomo'ajëjo. ⁶ Sino haho'o'e aëro sino haho'o'e harihoho baeruomo'i a'i God-are Aru'ahohuro iae aru'aho'e harihoho avoho'amaje höjo. ⁷ Na uavode höjo: jemë mami'e rahëvadoho röhu maho rahëvë'oho ehuremu mae jëvo'ajë jöho hejanuoho nadi tiönëjo. ⁸ Buroho dinö'e dinö'e va'i nimë'oho hesi ëma va'aje höjo. Ja he'a'anuëjo rovavo'iramu röhu bogo ga'a'anuëjo dinö'e jioromo rovajoho o dinö'e va'ajoho. God-are Aru'ahuhu a rahu ajëmamu röhu maho rahë'oho jabesi öroho iae ëhi dadivavo'iramu bogo ga'a'anuëjo.

⁹ Bogo ga'a'anuëjamu Nicodemus-ro uavadeje: Röhu ëhi jië'e muoho diehi jio'a'ajëjo. ¹⁰ Diehi jio'a'ajëjamu Iesuro uavadeje: Ja Israel rajo röjahujanue a böröme javajëjo. Röhu ja diehi'oromo ëhi jië'e muoho bogo gavanue höjo. ¹¹ Ave jöho na jö mae ua'ië'ajëjo. Simane javuë'ero ë jöho no atarue höjo. Nunehu gavë'e jöho huruoho majëhijarue höjo. Majëhijego jemëro bogo ejahuaruje höjo. ¹² Sa'a hesi mu jö majëhijodoho jemë bogo maho uehorovevaruje höjo. Ehuni ö'idö hesi mu jö majëhijë'oho jemë diehi'oromo mae uehorovevorëjo. ¹³ A ioro'ioroho bogo ö'idöroho ajio raromoruomade höjo. God-are A Maho ö'idöre jioromo ruvebijodoho naru gemuëro ëho hijode höjo. ¹⁴ Röhu urimë'i Moses-ro a rumo'e sa'are hiromo sigobu va'ëne inömo mamabëhe avohoromo ijore bamoromo a jabesi nunire banigojiomade höjo aëro ëho garomo mae raromonövoröhego. Sigobu va'ëne inömo banigojiomadëhi God-ro bamë'ero aëro ëhi hesi A Maho na a jabesi nunire banigojiomevo'aruëjo ¹⁵ ehuro ae rahu na mae uehorovevë'oho i'e rahanovoromo ma-ioro'ioremu maro raromo'iröhego.

¹⁶ Sa'ae dinö'e dinö'e God-ro dë vövöbajo'e aho'o uehorovavuadeje. Uehorovavuoromo hesi Harihu gemu'oho bojamuijadeje ehuro ae rahu Harihu mae uehorovë'ohuro ehuro bogo sisëroho va'i ma-ioro'ioremu maro raromoröhego. ¹⁷ God-hu hesi Harihu sa'are nugö'öjade hesi bëhoho bogo nosi sisëho garomo sisëroho bamavuo'i a'i ajamuiromo maro ramuo'iröhego ehuni nugö'öjadeje.

¹⁸ Ae rahu Harihu mae uehorovë'oho bogo sisëroho va'o hesije. O bogo ma uehorovë'oho mami'e sisënö bamë'eje ë hesi bëhoho hu God-are Harihu gemu'oho bogo ma uehorovë'ego. ¹⁹ A sisënö bamëvaje hesi öroho aviëhije. Ajohuro sa'are rovë'eje. Rovë'e jiamu aëro ajoho bijönimo'i ramoramoho nimoruomadeje mu sisëmu vaejaruëro jië'ero. ²⁰ Ae rahu mu sisë vaejë'oho ajoho garomo bijönimoromo bogo bëhiroho rovajeje hesi mu sisëho va'orahoro jiojöeni. ²¹ A'i ae rahu mu ma vaejë'ohuro aji bëhire rovajeje huhu God-are jö ejahoromo mu vaeajoho ëho samaro jioröhego.

John-hu Iesuarë jö majëhijade jöhoje.

²² Eh'i'amu Iesu'o hesi ijorajo ömo'ömo'u'ö ëho jaburo Judea sa'are va'areje. Va'oromo huro jabu'ö hiromo ae bapataeto vaejëvonövadeje. ²³ Bapataeto vaejëvo'i John-ro Aenon sa'are Salim amo bëhire hiromo hu'ö bapataeto vaejëvonövadeje ë dirö'oho jove aho'obëhe jië'ero. Bapataeto vae'ego ae aho'obëhe ë rueromo vaenövareje ²⁴ ë hesi bëhoho John bogo guduumoromo savoji gagoroho ba'amë'ero ijönö ba'amö'iröhego.

²⁵ John-ro bapataeto ëhi vaejëvamu hesi ijorajo ömo'ömo'u'ö Jew rajo ae gö'ö jö aho'ahamirovoromo uarovareje: Jovehu sisë u'ö'iröhe

öroho ëhi ëhi höjo. ²⁶ Jöho ëhi aho'ahamirovoromo John-are ijora-johuro va'oromo John uavareje: Tisa Jordan jovo ioro'iorore ja'ö hijamu jaehu hesi jö majahuijanoho ë ahuro jasi muoho vajiohunö'e baeromo bapataeto vaejëvego jabu ae aho'obëhe hesirire va'oruomaje höjo. ²⁷ Va'oruomaje höjamu John-ro uëvadeje: Röhu aehu nosirire rueruomë'o'oho o muehu o rabehu rabehu rovë'o'oho bogo ëma rovego bae'i a'i God-ro bojamuijego baejarue höjo. ²⁸ Jemë mami'e hejarije höjo naro jemë uëvamu: Böröme namiromomo ajëmi'irode aho bogo naehu jevajëjo. A'i God-ro na urimo remö'öjamu rovë'e jevajëjo ë ahuro ijore rueröhego. ²⁹ Èa hesi jöho uhunö'e majëhi'ie'ajëjo. I'ö masuröhe aho huro gemuëro vaboroho bae'a'ajëjo. O ë a hesi aemo'aemohuro namiromomo mu'öjamiromomo heröhe masuröhe aho jöe jövavamu hejë'o'oho nimoroho'ajëjo. Nimoroho'iröhëhi jemëhu uevaruje a hesi mu jöho heromo na nimorohevo avohajëjo. ³⁰ God-ro ëhi nimo'ego ë a hesi ihoho ajiomö'i nasi ihoho abuejajëjo.

Iesuhu ö'idöre jioromo ruvebijë'ëro jö börömo majahuijaje jöhoje.

³¹ John-hu majëhijadëhi iae ëhije. Döre jioromo ruvebijade ahuro ae aho'obëhe iosiramuiromomo börömochoje. Bogo döre jioromo ruvebi'i a'i ma-sa'are rahëvare aribövioho jabumë ma-sa'aremu raromarue ariböviëro jëvë'ëro sa'a hesi jöhemu majahuijarueje. O ö'idöre jioromo ruvebijade ahuro aho'obëhe iosiramuiromomo hu börömochoje. ³² Börömocho jjë'ëro garomo hejade jöho huro ae majëhijajeje. Majëhijego hesi jöho aho bogo ejaharueje. ³³ Röhu ae rahuro hesi jö ejahë'o'oho ëhuro uvarueje: Iae mae-ëjo God mae höjo. ³⁴ Èhesi bëhoho God-hu nugö'öjade ahuro God-are jöhuremu jövajeje. Rabëni hesi bëhoho God-ro hesi Aru'ahoho bojami avohego dë vövöbajo'e raroahago jöho jövajeje. ³⁵ Vavuohuro Harihoho rajahijajeje. Rajahiromomo bövie bise'e hesi övore bamë'eje. ³⁶ Ae rahu Harihu mae uehorovë'o'oho ma-ioro'io'oremu maro hijajeje. O ae rahu Harihu bogo ejahë'o'oho bogo maroho hi'i God-ro hesi örire dë vörönimemu vörönimajeje.

4

Iesuhu Samaria rajo magonahohu'o jö jövadohoje.

¹ Iae Pharisee ariböviohuro hejareje aëro uvoruomamu: John rinëgoromo bapataeto vaejëvebe rovaje aho ma-jianovo'i Iesuhu rinëgoromo bapataeto vaejëvebe rovaje aho börömocho höjo. ² Èhi hejareje röhu Iesu bogo hesi övoho bapataeto vaejëve'i a'i hesi ijorajoho jaburo ë'areje. ³ Amo Iesuro hejade uvavamu: Huhu ë'aje muohuro John hesiroho iosiramijë'e jöho Pharisee ariböviohuro hejë'e hö uvavamu hegorovo Judea sa'aho vuonugo'i vuonorö'öromomo Galilee sa'are ajiomö'i va'adeje. ⁴ Galilee ajiomö'irögoromo Samaria öreoro va'adeje hesi muëro jjë'ëro.

⁵ Va'oromo Samaria sa'are ajiomoromo amo ihe Sychar ë rovadeje. Röhu Sychar amo bëhire jiaje sa'aho urimë'i a mami ae Jacob-ro hesi harihoho Joseph bojamijadeje. Èsa'anö Iesu rovadeje. ⁶ Rueromomo maja ririvanovë'iro öri ëgoböviro rovë'ëro u'uvamu hegoro Jacob-mëhu jövëni umare gua bëhire hijadeje.

7-8 Hesi ijarahoho jabu ie imo'i amore va'è'èro hesi sivue hijadeje. Hijamu iae Samaria sa'a rajo magonahe gemuëro jove vuo'i rovadeje. Rovamu gagorovo Iesuro uavadeje: Jove vuo bojemego na ijöjo. ⁹ Jove bojemego na ijöjamu rue magonahohuro uavadeje: Ja Jew raje javo'i na Samaria rajo magonahe jevajëjo. Èhu'oho rabëni jovo jöho ue gevanuëjo. Èmagonahehu èhi uavade hesi bëhoho Jew rajohuro uvoruomajeje: Samaria rajo jabesi ano sabo'e hevöho enatuoho uno ho ioho bogo i'ejarëjo. Jew rajehu èhi uvoromo ömaruëhi Iesu bogo èhioho ömè'èro èhu'èro magonahohuro uavadeje: Rabëni jovo jöho ue gevanuëjo. ¹⁰ Ue gevanuëjamu hegorovo Iesuro uavadeje: God-hu a bojëmijaje suvuoroho jero bogo gavanuëjo. O naehu jovo bojëmijöro ua gavaje aho jero bogo gevanuëjo. Ge'ibejanëjo ja ue ge'ibejanëjo naro a i'ovëvaje jovoho bojami'ibejöjo iromo maro hi'iranego. ¹¹ Bojami'ibejöjamu magonahohuro uavadeje: Iae mae höjo röhu jovo vuoromo bojemi'irane hevöho bogojavajëjo. Röhu jovo vuo'irane guaho ègobövi mae jio abuejajëjo. Èhi jië'oho ja diehi'oromo a i'ovëvaje jovoho vuo bojeminëjo. ¹² Nosi hije bövi mae Jacob-ro ave jovo vuarue guaho bojamuijade höjo. Hu'o hesi harihu ömo'ömohu'o èho jaburo ave guare rueromo jovoho vuoromo ue'ahë'i jabesi mioho mio'amonövare höjo. Na jero Jacob iosiramiro mo börömo ho javajëromo èhu'èro jero a i'ovëvaje jovoho bojemi'i uevanuëjo. ¹³ Uevanuëjamu uavadeje: Ae rahu ave jovo ue'ahë'oho huë girihevo'iramu röhu maho gö'o i'i nimonövo'arujëjo. ¹⁴ O naehu jovo mëmamu ue'ahë'oho huëho bogo girihevo'i ioro'iore gemu ma-maemu jioruomo'ajëjo. Èhesi bëhoho naro jovoho bojemi'iramu nasi jovo mahuro jabesi dë vövöbajo'ere jövëro bubujivanovo rojomëvo'iramu ma-ioro'iore gemu maro raromo'aruëjo. ¹⁵ Raromo'aruëjamu magonahohuro uvadeje: Mae jovo jöe jövajëromo uavadeje: Iae mae höjo. Èhi jië'e jovoho bojemego na ijöjo. Iromo ijonöho huëho bogo girihevego aveho bogo rueromo jovoho vuo'irode höjo.

¹⁶ Bogo vuo'irode höjamu Iesuro uavadeje: Va'oromo jasi baruoho uaromo hu'irae baruenëjo. ¹⁷ Baruenëjamu rue magonahohuro uavadeje: Baru rumo'e jevajëjo. Baru rumo'e jevajëjamu uavadeje: Iae mae uevanuëjo: Baru rumo'e jevajëjo. ¹⁸ Urimo baru masu nugobe rovanoho aho'obëhe övo gö mine höjo. Avevejö'e garomo hijanuoho èho bogo jasi baruoho höjo. Èhuni ja mae uevanuëjo. ¹⁹ Mae uevanuëjamu rue magonahohuro uavadeje: Iae na gavajoho ja jö God-aro baeromo majahuijanue ae javajëjo. ²⁰ Èhuni ave jöho uevego na hejöjo. Nosi Samaria hijo miono'o ömo'ömohuro rue dahorure iojioromo God rajahibe rovë'e höjo. Röhu Jew rajoho jemëro uvaruje höjo: Jerusalem amohuremu rojomoromo God rajahinövorëjo. Di öri ari'oho maho höjo. ²¹ Maho höjamu uavadeje: Röhu ave nasi jöho mae uehorovëjo. Majae ijonöho aho bogo rue dahoruroho o Jerusalem amoroho Vavuoho rajahiruomo'ajëjo. ²² Samaria rajoho jemëhu rajahijaruje bëhoho bogo gavë'e ëma è'aruje höjo. Röhu Jew rajo noehu rajahijaruho noro avoho garomo è'aruje höjo. Rabëni hesi bëhoho God-hu a manö babamëvo'iröhe muoho Jew rajo nosirire aevë'èro jië'èro èhu'èro noro öroho avoho garomo God rajahijaruje höjo. ²³ Majae gö rue'ië'ajëjo. Röhu mami'e rovanovë'e höjo. Evare majare

aehu uhohu'o God rajahijë'o ho God-are Aru'ahoho baeromo Vavuoho avoho uehorovoromo ëhi rajahi'aruëjo. Vavuohuro iae nimajëjo ëhi jïë'e ariböviohuro hu rajahinövoröhego. ²⁴ God hu aru'ahe höjo. Ëhuni ae rahu God rajahijë'iroho hesi Aru'ahoho baeromo God avoho uehorovoromo rajahi'aruëjo. Öre gö bogohöjo. ²⁵ Bogohöjamu rue magonahohuro uavadeje: Iae na gavajëjo. Böröme namiromo ajamui'iröhe aho Keriso iae rue'a'ajëjo. Rueromo jöe aho'obëhe huruoho majahui barë'ajëjo. ²⁶ Majahui barë'ajëjamu Iesuro uavadeje: Jaehu uvanue aho iae na aviae jevajëjo ja'o jö jövajoho.

²⁷ Ëhi uavamü gavë'i Iesuare ijorajoho jaburo vuonorö'ö rovaraje. Rue'i gavare Iesuro magonaho'o jöe jövamu gagorovo tiöjévadeje. Tiöjévamu röhu aho Iesu bogo uavareje: Ja rabe nagajëjo. O bogo uavareje: Ja rabëni hu'o ho jöho jövanuëjo. ²⁸ Ëhi'amu magonahohuro ri'öromö jovo'e hevöho ë nugo'i amëro va'adeje. Va'oromö ae uëvadeje: ²⁹ Rueromö ae gemu gahëjo. Naehu bövi bise'o ömode jöho huro majehijamu hejë'e jevajëjo. Na ë aho böröme namiromö ajamui'iröhe aho höjo o rahuo höjo. ³⁰ Ëhi uëvamu amoho vuonugo'i Iesu ga'i örire rueruomadeje.

³¹ Ëmagonahohuro ëhi ë'irögoro Iesuare ijorajoho jaburo ioho imë'ëro uavareje: Tisa ie ijëjo. ³² Ijëjamu Iesuro uëvadeje: Iae nasi ie jïajëjo. Röhu jemë bogo gavarujëjo. ³³ Bogo gavarujëjamu rueho jaburo uarovareje: Na aëro ioho ba ro bojämijare höjo. O dinö'e baejade höjo. ³⁴ Ëhi uarovamu Iesuro uëvadeje: Ëho na bogo i jöho uë'iro a'i Vavuehu sa'are remö'öromö nimaje jöho naro ejahoromö huhu bojemade muoho vae barëjego ëhuro inö'e da'uegaje höjo.

³⁵ Jemë'o uehorovohëjo. Jemë atoromö ëhi uvaruje höjo: Manaere ëhi niö'i ëhi niö'i mueberomö iruno'oho mavo'iramu evare gagovo'ëjarëjo. Röhu aveho hehëjo. I'o mu'oho ruë numë uherihoromö gahëjo. Iruno'oho iae mavo'amë'e höjo gagovo'amo'iröhego. Ëhi uëvade jö hesi bëhoho bogo iruno'o jöho jio'i a'i Samaria raje ae aho'obëhe magonahohuro uëvë'ëro Iesu ga'i örire rueruomade jöhoje. ³⁶ Röhu uhu jö hesi vituoho majëhiromö uëvadeje: Gagovarue ariböviohuro aviavejö'e jabesi suvuoroho ujuohoromö aribövioho iruno'o va'ëne gagovëvaruëjo jaburo ma-ioro'ioremü maro raromöröhego. Ëhu'ëro iruno'e bamarue ariböviohu'o gagovarue ariböviohu'o ma-gemuoro nimorohoromö'ajëjo. ³⁷ Röhu ave jöhu'o atoromö uvarue höjo: A ioro'iorohuro iruno'oho bamego a ioro'iorohuro gagovarue höjo. Ëjöhö iae mae höjo. ³⁸ Naro jemë rëmö'öjode höjo i'u'e mü bogo vaejarijire ë va'oromö ma-gagovo'irarijego. Hesi a ioro'iorohuro i'u'e muoho ë vaejamü jemëro jabesi mü vituoho baejë'ëro ae ma-gagovëvo'ië'arujëjo nasinö jëvojöro.

³⁹ Ëhi'amu Samaria sa'a rajo aribövie ë amore raromaruohuro hejare magonahoho uëvamu: Naehu bövi bise'o ömode jöho majehijamu hejë'e jevajë uëvamu hegorovo ae aho'obëhe Iesu mae uehorovareje. ⁴⁰ Mae uehorovoromö rueromö Iesu uavareje: Ro nosi amorö no'o hijëjo. Hijëjamü Iesuro va'oromö majae niö'i jabu'o hijadeje.

⁴¹ Hijamu urimö ae aho'o magonaho hesi jöho heromö mae uehorovë'ëro hejare Iesuro jöe majëhijamu hegorovo ae gö gö aho'obëhe

mae uehorovareje. ⁴² Mae uehorovoromo magonahoho uavareje: Urimoho jasi jöho heromo Iesu mae uehorovare höjo. Jaruvoho bogo ehunioho mae uehorovo'i a'i nosi hia'ëro hejare Iesuro jöe majahuijamu hejë'ëro ehü'ëro noro mae garomo uvarue höjo: Iae mae-ëjo. Èaho sa'ae dinö'e dinö'e raromarue aribövioho manö babamavuaje aho höjo.

Gavamen mu vaejaje a hesi harihu hesi sino Iesuhu ajamamu marëjade jöhoje.

⁴³ Èhi uavamumu Iesuro ë amore hiromo majae niö'i barëjamu gagorovo va'adeje. Va'oromo Galilee sa'are ajiomadeje. ⁴⁴ Urimë'i Iesuro ae majëhiromo uëvadeje: Jö God-aro baeromo majëhijarue aribövioho èhi jië'e aribövioho nosi sa'a rajohuro bogo masijoho höromo maho uehorovavuoruomaje höjo. ⁴⁵ Röhu va'oromo Galilee sa'are rovamu gagorovo ë sa'a rajohuro hu rajahiruomadeje ë hesi bëhoho mami'e söröho i'i Jerusalem va'oromo gavare Iesuro darugo'e mu masijoho vaejamu gavë'ëro.

⁴⁶ Rajahijamu Iesuro Galilee sa'are hiromo röhu maho va'oromo Cana amore höröjadeje. Urimë'i huro ë amore hiromo jovo maho baeromo avohamu wine-rëjadeje. Èamore röhu maho rovadeje. Röhu gavamen mu vaejaje aëro ë sa'ae gemuore hijë'e jiadeje. Sa'ae gemuore Capernaum amore hi'i hesi harihoho guomo guome baeromo hu'o hijadeje. ⁴⁷ Hijamu vavuohuro hejade uvavamumu: Iesuro Judea jioromo Galilee ro hijajë uvamu hegorovo ajio Cana höröromo Iesu uavadeje: Nasi harihoho guomeho'ië'ajëjo. Èhuni na'o ruvebiromo anume Capernaum amoro ajamego mae jio'irajo. ⁴⁸ Mae jio'irajamu Iesuro uavadeje: Na jemë nasi darugo'e mu masijoho garomo mae uehorovevo'i ehuni na bogo maho uehorovevaruje höjo. ⁴⁹ Uehorovevaruje höjamu rue vavuohuro uavadeje: Iae èhi höjo röhu ruvebiromo ajamijëjo. Jue'i guomo'ië'ajëjo. ⁵⁰ Guomo'ië'ajëjamu Iesuro uavadeje: Va'ëjo. Jasi harihoho iae i'ovoromo hi'ië'ajëjo. Hi'ië'ajëjamu hegorovo rue vavuohuro jöho mae uehorovoromo abuejadeje. ⁵¹ Abuejamu gagorovo hesi mu vaejajarue ariböviohuro rueromo örire birohoro uavareje: Jasi harihoho iae i'ovoromo hijajëjo. ⁵² Hijajëjamu uëvadeje: Maja raburo jue'i i'ovade höjo. I'ovade höjamu uavareje: Nëri jeni'e majae huotorovamu gavë'i evare hesi sino dajo'e vörö'iraejadoho u'uhade höjo. ⁵³ U'uhade höjamu rue vavuohuro uehorovoromo uvadeje: O majae èhi gemuoho jiamu gavë'i Iesuro uevade höjo: Jasi harihoho iae i'ovoromo hi'ië'ajëromo hu'o hesi ö mueno'e aho'obëhe jabu'o mae uehorovareje.

⁵⁴ Röhu urimë'i Iesuro Judea sa'are jioromo Galilee rueromo evare bëhi'e mu börömo gö vaejadoho avevejö'e jö jövamu a börömo hesi harihu i'ovadoho èho bëhi'e mu göho jiadeje.

5

Iesuhu jovo riröre va'oromo a hesi sino ajamamu marëjade jöhoje.

¹ Èhi'amu Jew rajehu God uehorovoromo sörö ijarue majaho gemu rovadeje. Sörö majaho rovamu Iesuro Jerusalem ajiomadeje. ² Röhu Jerusalem amo börömo oje gemu hesi ihoho Sheep Ojohoje. Èjoje hesi bëhire jovo e'ue gemu ruhijë'eje. Èjovo hesi ihoho Hebrew huëhu

uvaruoho Bethzatha-je. Röhu ë jovo hesi ruhëhi numëhi ionire ionire ririre javu ëge övo gö mine jio'ame. Javuoho bogo irom'ële madöhemu vaeromo ëhi ma-gagemu nugo'amë'ejö ë raromonövoröhëni. ³ Ëjavuore guomo guomo'e ae aho'obëhe raromonövareje. Nuni sisë'le hörü övo hörü'o tövë'le ëhi jië'le aribövioho ë raromoromo [muebejareje jovoho avadu'avaduvoröhego. ⁴ Ëhesi bëhoho Badare anerae gemuëro majae gö gö ë jovore abueromo jovoho huototuoto'ego avadu'avaduvonövadeje. Avadu'avaduvo'ego guomo guomo'e aribövioho di aho urimo jovore abuejadoho marënövadeje.]

⁵ Iae ae gemuëro ë raromadeje. Guomo guomo maminö gö'le baeromo ëhi jiobe rovadoho vadune aho'obëhe 38 barëjë'le jiadeje. ⁶ Ëraromamu Iesuro hu gavadeje. Garomo uvadeje: Ëaho guomo guomo baejadoho majae ëgobövie barëjë'le hörömo uavadeje: Na ja marëjavojöro nagajëjo. ⁷ Marëjavojöro nagajëjamu rue guomo guomo'e ahuro uavadeje: Na aemo'aeme bogojevë'ëro jovo avadu'avaduvë'iroho bogo baejevoromo jovoroho ba'amevarue höjo. O na jovore abue'ië'iroho ae göëro na iosiremiromo urimo abuejaje höjo. ⁸ Urimo abuejaje höjamu uavadeje: Ri'ö namiromo raromanue suhoho banigojiomoromo baeromo juvëjo. ⁹ Juvëjamu ë aho ma-burëro marëjadeje. Marëjamu hesi suhoho banigojiomoromo baeromo juvo va'adeje.

Ëhi ë'adeje röhu ë majaho Jew rajehu mu bogo vae'i nuharue majaho jiadeje. ¹⁰ Nuharue majaho jiamu gagorovo Jew rajo a masijohuro gavare ë ahuro suhoho bava'amu gagorovo uavareje: Jaruvo nosi nuho majae höjo. Ëhuni ja suhi baeromo juvanuoho ëho jero nosi jögoroho ahanuëjo. ¹¹ Ahanuëjamu uëvadeje: Röhu ajemamu marëjevade ahuro uevade höjo: Jasi suhoho banigojiomoromo baeromo juvë uevadohuni ëhuni baeromo juvajëjo. ¹² Baeromo juvajëjamu uavareje: Raro ëhioho uavade höjo. ¹³ Ëhi uavamü röhu dadivamu bogo uëvadeje rabëni ae aho'obëhe jovo riröre tagavamü Iesuro ajamiromo va'ë'ëro jië'ëro.

¹⁴ Ëhi ë'ë'ëro Iesuro God-are amo börömore va'oromo ë aho birohoro uavadeje: Hejëjo. Iae mami'le marëjavë'le jiaje ijoho nadi mu sisëho vaenëjo. Urimo huë vavaene ma-bisemu baejanoho röhu ijönöho börömo bëhe bae'a'anuëjo. ¹⁵ Ëhi uavamü hegorovo rue ahuro va'oromo Jew rajo a masijoho uëvadeje: Ajemamu marëjevade aho Iesu höjo. ¹⁶ Iesu hö uëvamü hegorovo Jew rajo a masijohuro uvareje: Iesuro ë muoho nuho majaro ömade hö uvoromo dë vörönimoromo aevoromo Iesu huë vavaene bojami'i arijareje.

¹⁷ Huë vavaene bojami'i arijamu Iesuro uëvadeje: Nasi Vavuoho bogo nuho'i a'i ma-muemu vaemu vaejego na'o ëhi ë'aje höjo. ¹⁸ Ëhi uëvamü hegorovo rue a masijohuro uvareje: Nuho maja hesi jögoroho ahë'le höjo. Röhu göho hu uvajëjo: God nasi Vavu mae höjo. Ëhu'ëro hu uvoromo ë'ajëjo: Na God'lo gemuoho jevajëjo. Ëhi uvoromo ëhuni jaburo uehore aho'lo ma-gemu baeromo uvareje: Iaho ano'ëjarëjo.

God-are Harihehu God-are darugo baeromo mu vaejaje jö Iesuhu jövadohoje.

¹⁹ Ëhi uvamu Iesuro jöe majëhiromo uëvadeje: Ave jöho na jö mae uë'ië'ajëjo. God-are Harihu naehu nasi sivu mu vae'irodoho bogo eni jevajëjo. A'i Apohu vaejego gavaje muohemu vaejaje höjo. Apohu

vaejajēhi Harihoho naro ēhi gemuoho vaejaje hōjo. ²⁰ Ēhesi bēhoho Aporo Harihoho na uehorovevoro huhu mu bōvi bise'lo vaejajoho ēho rōjehijaje hōjo. Rōhu ē mu rōjehijajoho u'emu iosiramimoro masijo maho rōjehi'a'ajējo naro vaejaje jemēro garomo tiōromo uvo'irarijego: Mabēhe ē'ajējo. ²¹ Vavuehu vuovē'e aribōvi ajēmijego i'ovaruēhi ēhi Harihoho na'lo vuovē'e ae rahu ajēmi'i negē'o'ho ajēmego i'ovaruē hōjo. ²² Vavuohuro aho bogo mevoromo gēvaje hōjo mae o sisē jio'amego a'i mevoromo mae o sisē jēvego gē'irode muoho Vavuohuro Harihu nasi ōvore bamo barējē'e hōjo naro ē muoho vae'irodego. ²³ Naro vaejaje ae aho'obēhe Vavu rajahijaruēhi Harihoho na'lo ēhi rajehiruomorōhego. Ae rahu Harihoho bogo rajehijē'o'ho ēhuro Vavue remō'ōjadohu'o bogo rajahijaruē hōjo.

²⁴ Ave jōho na jō mae uē'iē'ajējo. Ae rahu nasi jō heromo sa'are remō'ōjade aho mae uehorovē'o'ho ma-ioro'io'emu mae raromo'irōhe ōrire jijihoruomaje hōjo. Mae raromo'irōhe ōrire jijihobe va'ojuvo mevoromo gē'irode majaho rue'iramu God-are i'uoho bogo baeruumo'ajējo vuovo ōrire jijiharoho mami'e vuonugo'i i'ovo ōrire jijiharuēro jīē'ero. ²⁵ Ave jōho na jō mae uē'iē'ajējo. Majaho rue'a'ajējo. Rōhu mami'e rovanovē'e hōjo. Evare majare vuovēvē'e aribōvie gōero gōero he'a'aruējo God-are Harihoho naro uvavo'iramu. Ae rahu Harihu naehu uvamu hejē'o'ho vuovo ōrire jijiharuoho vuonugo'i i'ovo ōrire jijiharuējo. ²⁶ Vavuehu ae uēvego i'ovaruēhi huro na ajēmijē'ero Harihoho na'lo ēhi uēvego i'ovaruē hōjo. ²⁷ Vavuohuro ēhi ajemiromo rōhu jōho bojēmijade hōjo naro ae mevēvoromo gē'irodego mae o sisē jēvego rabēni na hesi A Maho jevē'ego. ²⁸ Ējō hejarujoho nadi tiōrējo. Majaho rue'iramu evare ae aho'obēhe hure raromaruohuro herōhe naro uvavo'iramu ²⁹ hegoroovo hure jioromo suorovoruumo'ajējo. Suorovoromo mu ma vaejare aribōviahuro ri'ōromo ma-ioro'io'emu maro raromo'irōgoro mu sisē vaejare aribōviahuro ri'ōromo naro mevēvo gēromo i'ue mana bojēmi'iramu sisēro va'oruomo'ajējo.

Rabe rabe garomo heromo ēhuni uvo'ejo: Iesu mae hōjo. Ēhesi jōhoje.

³⁰ Naehu nasi sivu mu vae'irodoho bogo eni jevajējo. Vavuehu uevego hejajēhi na ēhi mevēvoromo gēvaje hōjo ae mae o sisē jēvego. Bogo ēma mevēvo'i a'i mae mevēvoromo gēvaje hōjo rabēni hesi bēhoho nasi nimajoho bogo uehorovo'irōgoro a'i sa'are na remō'ōjade aehu nimajoho uehorovajēro jīē'ero. Iae ēhuni avoho mevēvoromo gēvaje hōjo.

³¹ Naro nasi sivue nasi jōho huruoho majēhijego he'ibejarijējo nani aēro uvo'ibejarijējo: Sarere hōjo. ³² Rōhu bogo nasi sivuoho jōvo'i ae gō na ōmego gevajohuro jōvo ajemiromo uēvaje hōjo: Nōrō jō mae jōvaje hōjo. Iae na gavajoho ē aho hu jō maemu jōvaje hōjo nasi Vavuohuro jīē'ero. ³³ Mami'e jemēro jemesi ae rēmō'ōjamu John-are ōrire va'are hōjo. Va'oromo hejare hōjo huro jō ma hesi jōho mae majēhijamu. ³⁴ Ēhesi bēhoho nasi jōho majēhijade hōjo. Na ēhi uēvaje hesi bēhoho bogo aēro nasi jōho ajemiromo majēhijōro nego'ego uēvajējo. A'i ēhi uēvaje hesi bēhoho jemēro ejehoromo bogo sisēroho va'i maro va'irarijego ēhuni uēvajējo. ³⁵ Rōhu John-ro irehu hōduvoromo ajivavujēhi huro ēhi ajivēvonōvade hōjo. Ēhi'amū majae ma-bunemu nimarije hōjo hesi ajire raromogoro nimoroho'irovo. ³⁶ John-hu

nasi jö majëhijamu hejarijoho iae mae höjo röhu ëho ma-jianovo'li Vavuehu bojemego vae'amaje muoho ëho masijoho höjo. Ëho garomo uvo'ibejarijëjo: Iae mae-ëjo. Vavuohuro nörö nugö'öjamu rovë'e höjo. ³⁷ Röhu Vavue na sa'are remö'öjade ahuro hu'o ajemiromo nasi jöho majëhijë'e höjo. Hesi huëho jemë bogo heromu nu ano'oho bogo gavë'e jëvájëjo. ³⁸ Hesi jöho jemesi dë vövöbajö'eroho bogo'e höjo rabëni huhu remö'öjamu rovode aho na bogo ma uehorovevarujëro jëvë'ëro. ³⁹ Röhu jemëro uehorovoromo uvaruje höjo: God-are surire jö adahë'oho noehu ma-ioro'ioremu mae raromo'iröhe öroho biroho'ejarëromo ë hesi öroho naho'irögoro suroho adaho avoharuje höjo. Röhu nasi jöho jemëhu adaharuje surire iae ë jajivë'e höjo. ⁴⁰ Nasi jöe ë surire jajivare höjo röhu jemëhu ë jö eromo nasirire rueromo ëhuro mae raromo'irarijoho bijönimaruje höjo.

⁴¹ Ma-aehu nasi iho döre bameho'irarijoho ëho na bogo uehorovoromo jövájëjo. ⁴² Röhu jemesi dëho iae na gëvájëjo. God-are öriroho jemesi dë vövöbajö'eroho bogo uehorovaruje höjo. ⁴³ Naro nasi Vavu hesi ihore rovode höjo. Röhu jemëro bogo ejeharuje höjo. Ae göehu hesi ëma rovë'oho ëma ejëho'arujëjo. ⁴⁴ Jemë nimarujëjo jemesi ariböviëro jemesi ihoho döro bamëhojöro. A'li God gemu eni jië'e aehu jemesi iho döre bamëhoröhe ë hesi öroho bogo naho gavaruje höjo. Bogo naho gavë'oho jemë diehi'oromo na mae uehorovevorëjo. ⁴⁵ Röhu nadi uvorëjo: Nöröro hesi Vavu hesi örire nosi jö sisëho huruoho majahi'ajëjo. Na bogo ëhioho ë'ejöjo. A'iro Moses-ro jemesi jö sisëho huruoho majahi'ajëjo. Jemë uvaruje höjo: Moses-ro ajamui'iramu mae raromo'ejarë uvaruje höjo röhu hesi jöho bogo ejaharuje höjo. Ëhuni huro huruoho majahi'ajëjo. ⁴⁶ Ëhesi bëhoho jemëro Moses-are jöho ejaho'ibejarijëjo nasi jöhu'o ejeho'ibejarijëjo. Huro nasi jöho jajivë'ego ëhuni uëvájëjo. ⁴⁷ Röhu huhu jajivo'amade jö bogo ejaharujoho jemë diehi'oromo nasi jöho ejehorëjo.

6

Iesuhu ae aho'obëhe 5,000 da'uojëhade jöhoje.

¹ Ëhi'onugoromo Iesumëro boat-re ajio raromoromo Galilee e'u döre e'u hesi iho göho Tiberias e'u ioni göre ë va'areje. ² Va'amumu ae aho'obëhe mae Iesuro darugo'e muoho vaeromo guomo guomo'e ae ajëmamu mami'e gavë'ëro Iesu ijore rihimoromuadeje. ³ Amo Iesuro hesi ijorajo ömo'ömoho söjëvo ujuohoromo dahorure ajiomoromo jabu'o ë hijadeje. ⁴ Ëmajaho God-hu Vörö Tugohade Majaho Jew rajo jabesi sörö majaho dunovadeje. ⁵ Evare majare Iesuro dahorure hiromo uheriho'li gavadeje ae aho'obëhe ijore rojomoromumu. Rojomumu gëgorovo Philip uavadeje: No dinö'e ioho imoromo ë aribövioho aho'o da'uojëho'ejarëjo. ⁶ Hu mami'e gavadeje rabe ë'iröhoho. Röhu huro Philip uavadeje he'li Philip-ro diehi uavego. ⁷ Amo ëhi ua gavamu Philip-ro uavadeje: Monie aho'obëhe 200 kina röhu döre gö'o bu'öromo ie imoromo i'imëmi'ibearëjo ae aho'o jië'ëro ma-bisemu bisemu ue'ahoruomo'ibejajo. ⁸ Ëhi uavamu Iesuare ijoraje ae gö hesi ihoho Andrew Simon Peter-are öhuro uavadeje: ⁹ Aharihe gemu iae höjo. Hu ie aho'obëhe 5 visue niö'i ëhi jiajëjo. Röhu ja'o uehorovëjo ëho bogo eni höjo ae aho'obëhe jië'ëro. ¹⁰ Ëhi uavamu hegorovo Iesuro hesi

aribövioho uëvadeje: Ae aho'obêhe uëvego sa'are raromarêjo. Röhu ë dir'ö'oho ma-garasiemu jië'e jiadeje. Ëhi'amu ae aho'obêhe 5,000 rabu'e ë raromareje. ¹¹ Raromamu Iesuro ë aharuhehu ujuoho rovade ioho ujuohoromo God mae uaromo raromarue aribövioho i'imëmadeje. Ëhi'oromo visuohu'o ujuohoromo ëhi gemuoho ë'adeje. Ëhi'amu ë ariböviohuro dimino'e i'li nimarêhi ëhi ue'ahareje. ¹² Ue'ahoromo da'uëgamu gagorovo Iesuro hesi ijorajo ömo'ömoho uëvadeje: I vitu vituoho gagovorego bogo mae bogo mu'u'irajo. ¹³ Ëhi uëvamu ie aho'obêhe 5 ue'ahare ë hesi vitu vituoho gagovoromo esöe aho'obêhe 12 irijiomo'amareje.

¹⁴ Irijiomo'amamu Iesuhu bëhi'e mu börömo vaejadoho ae aho'obêhe garomo uarovareje: No muebejarue höjo jö God-aro baeromo majahuijaje a börömhuro sa'are rueröhego. Ëaho jiajêjo. ¹⁵ Ëhi uvoromo rueromo Iesu ëma guduamoromo ua'irögoro ë'areje: Jero nosi börömhoho jionêjo. Ëhi ë'ia'amu gëgorovo Iesuro va'adeje. Va'oromo dahorure vuonorö'ö ajiomoromo hesi sivue hijadeje.

Iesuhu e'u döre hörehu va'ade jöhoje.

¹⁶ Majae beva'ia'amu Iesuarue ijorajo ömo'ömohuro e'u riröre abuejareje. ¹⁷ Abueromo boat-re ajio raromoromo Capernaum amore va'i jovo döre va'areje. Va'amu vahiromëvadeje. Röhu Iesu evaroho jabisiriroho bogo rovë'e jiadeje. ¹⁸ Bogo rovamu gavareje buru börömhoho rue'ego jovoho hasajamu. ¹⁹ Jovoho hasajamu jovo döre huo'öbe va'aroho 5 o 6 kilometre ëmino'e va'aroho va'ihö gavare Iesuro jovo döre juvobe jabesi bëhire rovamu gagorovo juhuonivareje. ²⁰ Juhuonivamu uëvadeje: Na jevajêjo. Nadi juhuonivohêjo. ²¹ Nadi juhuonivohêjamu hegorovo jaburo nimareje Iesuro boat gagore rojomöjro. Ëhi'oromo din'ö'e va'i nimarire ë ma-burëro va'areje.

Ae aho'obêhe Iesu biroh'o'i nahoruomade jöhoje.

²² Iesu'o hesi ijorajo ömo'ömohu'o ëhi jovo ioni gönö va'i a'i i'io visu'o ue'ahare aribövie aho'obêhe mae jovo ioni gönö ëhi raromareje. Raromë'ëro nërö gavareje Iesu bogojiamu. Bogojiamu uvoruomadeje: Nëröho boat gemuëro ave jovo riröroho nami'i boat gö gö bogojiohijajo. Röhu Iesu ë boat-roho bogo va'i hesi ijorajohuremu va'oruomade höjo. ²³ Ëhi uvoromo gavareje boat gö gö Tiberias amore jioromo rueromo Bada Iesuhu Vavu mae uvamu i ue'aharinö ë ro riravamu. ²⁴ Boat gö gö ro riravamu gagorovo gavare Iesu'o hesi ijorajo ömo'ömohu'o bogojëvamu gëgorovo arue boat göre göre iojiomoromo Iesu naho'irögoro Capernaum amore va'oruomadeje.

Iesu i va'ëne jië'ëro i'ovavuo'iröhe jö Iesuhu jövadohoje.

²⁵ Va'aroho jovo ioni gönö va'o baboro beromo Iesu birohoro-madeje. Birohoromo uaruomadeje: Tisa ja divare aveho rovane höjo. ²⁶ Divare aveho rovane höjamu hegoro uëvadeje: Ave jöho na jö mae uë'ië'ajêjo. Jemëhu na nahevaruje hesi bëhoho jemë bogo uehorovoromo uvarije höjo: Nöröro bëhi'e mu masijoho røjahuijê'e hö uvoromo ëhuniho nahevo'i a'i jemë ie aho'obêhe ue'ahamu da'uëgadhuni ëhuni nahevarujêjo. ²⁷ Röhu muduroho'iröhe iënioho nadi muoho vae'i a'i jiemu jioröhe iohuremu uehorovoromo muoho

vaerego ëhuro ma-ioro'ioeremu maro raromo'irarije höjo. Ëioho God-are A Maho naro suvuorëmi'ejöjo rabëni God Vavuohuro a nuniro uevë'ego: Jasi muoho mae höjo. ²⁸ Ëhi uëvamu uaruomadeje: Ëhi jië'oho no diehi jië'e muoho vaeromo ëhuro God-hu nimaje muoho vae'amo'ejarëjo. ²⁹ Vae'ejarëjamu uëvadeje: God-hu nimaje mu vae'irarijoho aviëhi höjo huhu sa'are remö'öjade aho na jemëhu mae uehorovevo'irarijoho. Iae ëhi ë'orëjo. ³⁰ Ëhi ë'orëjamu uaruomadeje: Röhu ja'o ja mu rabe vaenëjo. Diehi jië'e darugo'e muoho ömo'iramu no garomo mae uehorovo'ejarëjo ³¹ Iae urimë'i nosi hijo miono'ohuro darugo'e muoho iae gavare höjo. A rumo'e sa'are raromo jijiharevare evare bogo ijarue i mabëhi hesi ihe manna ue'ahoruomade höjo. God-are surire uvë'e höjo: Ö'idöre jioromo ruvebijade ioho huro i'imëmade höjo jaburo ue'ahoröhego. ³² Ëhi uavamu Iesuro uëvadeje: Iae jemë uevarujëjo: Ö'idöre jioromo ruvebijade ioho Moses-ro nosi hijo miono'oho i'imëmade höjo ue'ahoröhego. Röhu aveho na jö mae uëvajëjo. Ejö hesi bëhoho avoho uehorovoromo uvorëjo: Bogo Moses-hu mami'e bojëmade jöho jio'i a'i nöruare Vavuehu avevejö'e ö'idöre i ma bojamuijaje jöho höjo. ³³ God-hu bojëmaje iohuro ö'idöre jioromo ruvebiromu birire bojëmego sa'ae dinö'e dinö'e i'ovoromo maro raromarue höjo.

³⁴ Maro raromarue höjamu uvareje: I ma hesi jöho jövajëromo uavareje: No naguajëjo jero majae ëhi ë ioho bojamuinövo'iranego. ³⁵ Ëhi uavamu uëvadeje: Röhu ë i hesi bëhoho na i'ovëvajoho jevajëjo. Ae rahu nasinö rovë'oho ijoho bogo hömo'ajëjo. Mae uehorovevë'oho ijoho bogo huëho giriho'a'ajëjo. ³⁶ Röhu na mami'e uëvode höjo: Jemë na gevë'e jëvajëjo röhu bogo ma uehorovevaruje höjo. ³⁷ Nasi Vavuehu ae rahu bojemijë'oho ë ariböviohuro nasi örire rueruomaje höjo. Ae rahu nasi örire rovë'oho na bogo mae bogo uë'ejöjo: Rori'o va'ohëjo ³⁸ rabëni naehu ö'idöre jioromo ruvebijode hesi bëhoho bogo nasi nimaje muoho ömo'i a'i sa'are na remö'öjade aehu nimajohemu ömo'irodëni rovë'ëro. ³⁹ Hu nimajëjo huhu bojemade aribövioho na bogo ae gemu vadu'oho boremi'ö'i a'i muebejëvojuvo ijo tugohö'i majare naro ajëmego vuovoromo ri'öruomoröhego. ⁴⁰ Nasi Vavuohuro aveho nimaje höjo ae rahu Harihu na geromo mae uehorovevë'oho ma-ioro'ioeremu maro raromoruomoröhego. Eëaribövioho ijo tugohö'i majare naro i'ovëvo'iramu jabumë ri'öromo raromo'aruëjo.

⁴¹ Röhu Iesuhu ö'idöre jioromo inö'e rueromo a i'ovëvaje jöho ëhi majëhijamu hegorovo Jew rajo ariböviohuro dë vörönëgamu jöe sisë'i atoromadeje. ⁴² Jöe sisë'i atoromo uarovareje: Ave iaho Joseph-are harihe höjo. Hesi vëmu vavu'oho iae no gëvarue höjo. Röhu hu rabëni uvajëjo: Na ö'idöre jioromo ruvebijë'e jevajëjo. ⁴³ Ëhi uarovamu uëvadeje: Nadi nasi jöho sisë'ioho atohëjo. ⁴⁴ Aho bogo jabeti ëma rueromo na'oho raromo'i a'i nasi Vavue sa'are remö'öjadohuro rinëgamu ëhuro nasirire rueruomë'oho eni jëvaje höjo. A ioro'iohoro bogajo. Rovë'oho naro ijo tugohö'i majare i'ovëvo'iramu vuovoromo ri'öruomo'ajëjo. ⁴⁵ Mami'e jö God-aro baeromo majëhinövere ariböviohuro jajivoromo uvare höjo: God-ro ae aho'obëhe röjëhi'iramu hesi jöho heruomö'ajëjo. Ëhi jajivë'e höjo. Röhu Vavuehu hesi jö röjëhijamu ae rahu heromo ejahë'oho nasi örire

rueruomaje hōjo. ⁴⁶ Ēhi hōjo rōhu aho Vavuoho bogo gavē'e hōjo. God-arire jioromo ruvebijode aho naremuēremu Vavuoho gavē'e jevajējo. ⁴⁷ Ave jōho na jō mae uē'iē'ajējo. Ae rahu mae uehorovevē'oho mami'e aevē'ero ma-ioro'ioremu maro raromaruje hōjo. ⁴⁸ A i'ovēvaje ioho na jevajējo. ⁴⁹ Jemesi hijo miono'ohuro a rumo'e sa'are raromo jijihoromo bogo ijarue i mabēhi hesi ihe manna inōvare hōjo. Inōvare hōjo rōhu vuovēvade hōjo. ⁵⁰ A'i ō'idōre jioromo ruvebijaje ioho ae rahu ijē'oho ēhuro bogo vuovēvo'ajējo. ⁵¹ Ō'idōre jioromo ruvebijē'ero a i'ovēvaje ioho na jevajējo. Ae rahu ē i ijē'oho ma-ioro'ioremu maro raromo'arujējo. Naehu bojēmi'irode ioho ēho nasi sine hōjo. Ēhesi bēhoho nasi sinoho bojamirovo'ejōjo sa'ae aho'obēhe vuovēvadoho i'ovoromo mae raromo'irarijēgo.

⁵² Ēhi majēhijamu hegorovo Jew rajohuro dē vōrōnēgamu jō aho'ahamirovoromo uarovareje: Ēaho diehi hesi sinoho bojamui'iramu i'ejarējo. ⁵³ I'ejarējamu uēvadeje: Ave jōho na jō mae uē'iē'ajējo. God-are A Ma nasi sinohu'o kōhu'o bogo ijē'oho darugoho bogo bae'i vuovēvo'ajējo. ⁵⁴ Ae rahu nasi sino kō ijē'oho ma-ioro'ioremu maro raromarue hōjo. Raromojuvo ijo tugoho'i majare i'ovēvo'iramu ri'ō'a'aruējo. ⁵⁵ Ēhesi bēhoho nasi sinoho iae i mae jio'i nasi kōho iae jovo mae jiē'ero ēhu'ero ijē'oho mae raromo'aruējo. ⁵⁶ Ae rahu nasi sinohu'o kōhu'o ijē'oho na'o gemu mae jio'i na jabu'o gemu mae jevaje hōjo. ⁵⁷ Vavue daruge eni jiē'ero hijajohuro na sa'are remō'ōjade hōjo. Remō'ōjē'ero darugoho bojemijēgo na hijaje hōjo. Naehu hesi darugo baeromo hijajēhi ae rahu na ijevē'oho nasi darugoho ēhi baeromo raromo'aruējo. ⁵⁸ Ēhu'ero jiē'ero ō'idōre jioromo ruvebijade i hesi jōho na majēhijē'e jevajējo. Jemesi hijo miono'e jabesi i mabēhe ue'ahare hōjo rōhu vuovēvade hōjo. O naehu uēvaje ioho bogo ēhioho jio'i ae rahu ijē'oho bogo vuovēvo'i ma-ioro'ioremu maro raromo'aruējo. Ahia mino'ējo. ⁵⁹ Iesuhu Capernaum hiromo God rajahijarue osare jō rōjēhijadevare evare hu ē jōho majēhijadeje.

Iesuhu jōvaje jō baejē'oho ēho darugo baejarue ē hesi jōhoje.

⁶⁰ Ēhi majēhijamu hegorovo Iesuae ijore ijore jijiharue a ioro'ioroho ae aho'obēhe uarovareje: Ēhi jiē'e jōho i'u ma'e hōjo. Nomē diehi'oromo bae'ejarējo. ⁶¹ Bae'ejarējamu Iesuro hesi simanore garomo uvadeje: Nasi ijore ijore jijiharue aribōviahuro nasi jōho bijōnimoromo sisē'i ataruēromo uēvadeje: Naehu ō'idōre jioromo ruvebijode jō hejar-ijoho jemē diehi uehorovarujējo. Na jemē nēgajējo na'o jijiharujoho vuonugo'i. ⁶² Rōhu jemē gevē'oho God-are A Ma naehu urimo hijodire sionēro ajiomamu gevē'oho jemē diehi uehorovorējo. ⁶³ Hesi God-are Aru'ahohuro darugoho bojēmi'iramu i'ovoromo mae raromo'arujējo. Jemesi sino hesi biriroho baeromo arijo'arije ajamirovo'iē'iroho bogo eni jēvo'ajējo. Rōhu naehu jōvaje jō ejahē'ohuro ēhuro Aru'aho daruge baeromo i'ovoromo mae raromo'arujējo. ⁶⁴ Rōhu a ioro'ioroho jemēro bogo ma uehorovevaruje hōjo. Ēhi uēvade hesi bēhoho mami'e huhu urimo ijorajo gagovēvade majare aevoromo gēromo uvobe rovadeje: Ēaribōvioho bogo ma uehorovevo'irōhoho hōjo. O ē aho a hiruēmiromo na baejevoro mo jabesi ōvore bojēmi'irōhoho hōjo. Ēhi gēromo uvobe

rovë'ëro ëhu'ëro uëvadeje: A ioro'ioroho jemëro bogo ma uehorovevaruje hõjo. ⁶⁵ Rõhu hesi jõ viture uëvadeje: A ioro'ioroho jemëro bogo ma uehorovevaruje hõjo. Ëhuni uëvode hõjo: Aho nasi õriroho bogo ëma rueruomaje hõjo bogo eni jëvë'ëro. Ma-Vavuehu uëvë'ohuremu rueruomaje hõjo.

⁶⁶ Ëhi uëvamu hegorovo Iesuare ijore ijore jijiharue aribõvi ioro'ioroho ae aho'obëhe hu nugo va'oruomadeje ijonoõho hu'oho bogo gemuoroho jijihoruomorõhëni. ⁶⁷ Va'amumu gëgorovo Iesuro gëvade hesi ijoraje 12-ho ëhi raromamu gëgorovo uëvadeje: Rõhu jemëjo. Na jemë'o na remo va'orëjo. ⁶⁸ Remo va'orëjamu Simon Peter-ro uavadeje: Bada no rahuare õrire va'ojõrajo. Jero jõho jõvego ëhuro no darugoho baeromo ma-ioro'ioeremu maro raromarue hõjo. ⁶⁹ Iae no garomo mae uehorovoromo uvarue hõjo: God-hu baejavade A Mahuremu ja javajëjo. ⁷⁰ Ja javajëjamu Iesuro uëvadeje: Jemë'o uehorovohëjo. Naro jemë ae aho'obëhe 12 baejëvode hõjo. Rõhu jemesirire ae gemu hu Satan hõjo. ⁷¹ Ëhi uëvadeje. Rõhu Satan hõ uëvade hesi bëhoho Judas Simon Iscariot-are harihu hesi jõho uëromo ë'adeje. Iesuare ijoraje aho'obëhe 12 jio'amajoho Judas hu'o ë ae gemuoho jiadeje. Rõhu huro ijonoõ ae hiruëmiromo Iesu jabesi õvore bojëmadeje. Iae ëhuni Iesuro Satan hõ uëvadeje.

7

Iesuare õ ma jabuhu hesi õrire bogo ma uehorovare jõhoje.

¹ Ëhi'amumu Iesuro garomo uvadeje: Jew rajohuro anego'i nimarueõromo Judea sa'aroho bogo hi'i Galilee sa'aremu hibe juvadeje. ² Galilee sa'are hibe juvamu Jew rajo jabesi sõrõ maja bõrõmoho dunovadeje. Sõrõ hesi ihoho Amo Harihu Ma-Jahuri Vae'amë'e Sõrõhoje. ³ Ësõrõ majaho dunovamu Iesuare õ maho jaburo ri'õromo Iesu uavareje: Ave amoho nugo'i Judea sa'ahuro va'oromo jasi mu masijoho rõjëhijego jasi ijore ijore jijiharue aribõvioho jaburo garuomoi'irajo. ⁴ Ae aho'obëhe jabuhu nosi iho hejõro noehu nimë'oho bogo gurihiroho muoho vaejarue hõjo. Ëhuni ja mu masije vaejanue javaje jero va'oromo ma-va'orahoro muoho vaenego ae aho'obëhe garuomoi'irajo. ⁵ Ëhi uavare hesi bëhoho jabumë Iesuare õ õmo'õme jëvadeje rõhu hesi õriroho bogo ma uehorovë'ëro ëhuni ëhi uavareje. ⁶ Ëhi uavamu uëvadeje: Nasi majaho bogo rovë'e hõjo ijonoõ rue'irõhëro. Jemëhu sõrõro va'irarije majaho majae aho'obëhe hõjo. ⁷ Sa'are mu sisëmu uehorovoromaje aribõvioho jemesi õriroho bogo nu huodëgo varijënoho hõjo bëhe bogojio'ego. A'i nasi õrire iae nue huodegarue hõjo. Rabëni hesi bëhoho naro majëhiromo uëvaje hõjo: Jemë mu sisë vaejaruje hõ uëvego ëhuni nue huodegarue hõjo. ⁸ Jemesi iojiomoromo maja bõrõmoho vaerëjo. Nasi majaho bogo rovë'ego sõrõroho bogo ajiomoi'ejõjo. ⁹ Ëhi uënuõgromõ Galilee sa'are ëhi hijadeje.

Iesuhu Jerusalem ajiomoromo Amo Harihu Ma-Jahuri Vae'amë'e Sõrõ garomo jõ rõjëhijade jõhoje.

¹⁰ Hijamu hesi õ õmo'õmohuro iojiomareje maja bõrõmoho vaerõhëro. Iojiomamu evare Iesuro hu'o ajiomadeje. Bogo va'orahoroho ajiomoi'ima-saginiëri ajiomadeje. ¹¹ Saginiëri ajiomamu Jew rajo a masijohuro

sörö ririre Iesu nahoromo uvoruomadeje: Ēaho dinö'e höjo. ¹² Ēhi atoromo ae aho'obēhe gemuore gagovē'ero göēro göho saginiēri majahirovoromo Iesuare jōho uarovareje. Uarovoromo a ioro'iorohuro uvareje: Ēaho a mae höjo. A ioro'iorohuro uvareje: Bogajo. Huro ae aho'obēhe sareramuijaje höjo. ¹³ Ēhi atoromo Jew a masijoho juhuonēmiromo aho bogo va'orahoroho Iesuare jōho ato'i ma-saginiēri atoromadeje.

¹⁴ Ēhi'amu Iesuro sörö maja hesi ririre God-are amo börömore ajiomoromo ae jōe majēhijadeje. ¹⁵ Jōe majēhijamu hegorovo Jew rajohuro tiōromo uvareje: Ae gö hu bogo rōjahijē'e höjo. Ēhi jiē'oho hu diehi'oromo nuni aji'e jioromo jōho majahuijajējo. ¹⁶ Jōho majahuijajējamu Iesuro uēvadeje: Naehu rōjēhaje jōho bogo naehu uehorovohējo rōjēhi'i sa'are na remō'ōjade ahuro bojēmijē'ero rōjēhijaje höjo. ¹⁷ Ae rahu God-hu nimaje mu vae'i nimē'oho ē ariböviohuro garomo uvoruomo'ajējo: Nörö bogo hesi simanēremuoho jōho ēma rōjahui'i a'i God-ro jōho bojāmijego rōjahuijaje höjo. ¹⁸ Ae rahu jabesi simanēremu jō majēhijē'oho jō majēhijarue hesi bēhoho jaburo nimoruomaje höjo jabesi ihoho dōro jiojōro. O noehu naguē'oho ramuō'ōjamu rovere a hesi iho dōro jiojōro naguē'oho ēhi javuē'e aribövioho sareroho bogojavuo'i ma-maemu javuaje höjo. ¹⁹ Jemē'o uehorovohējo Moses-ro God-are jōgoroho jemē bojēmijade höjo. Röhu jemē bogo ae gemu vadu'oho jōgoroho ejaharuje höjo. Jemē rabēni ē jōho ahoromo anego'iro ē'arujējo. ²⁰ Ēhi uēvamu ae aho'obēhe uaruomadeje: Sarerivanuējo. Sisēhuro baejavē'ero simane sisērēromo jōvanuējo. Raro ja anago'iē'ego uvanuējo. ²¹ Uvanuējamu Iesuro uēvadeje: Naro mue gemu vaejamu jemē ae aho'obēhe tiōromo uehore gö gö baejē'e jēvajējo. ²² Röhu Moses-ro aharihu jabesi sino tarivēho'irarije muoho bojēmijade höjo. Bogo huro aevoromo bojēmi'i a'i urimore jemesi a mamiohuro aevoromo bojēmijare höjo. Bojēmijē'ero ēhu'ero jemēro nuho majaro mue vaeromo aharihu jabesi sinoho tarivēharuje höjo. ²³ Nuho majaro jemēro a sino tarivēharuje muoho vaejaruje höjo Moses-are jōgoroho ahōjōēni. A'i nuho majare naro a hesi sinoho avohahamu marē barējade höjo. Ēhi jiē'oho röhu jemē rabēni uvarujējo: Nöröro nuho maja hesi jōgoroho ahade hōromo nasi öriroho dēho vörönimarujējo. ²⁴ Ēhi'oromo jemē nasi muoho madöemu garomo mevoromo nasi öriroho dēho vörönegajējo. Nadi ēhiho ē'i nasi mu öroho ma-avoho garomo mevorējo.

Ariböviohuro uarovareje: Na böröme namiromo ajamui'iröhe aho Iesu höjo o bogajo. Ēhi uarovare jōhoje.

²⁵ Ēhi uēvamu gagorovo Jerusalem amo rajo a ioro'iorohuro uarovareje: Ēaho nosi a masijehu ano'iē'arue aho höjo. Na mae-ējo. ²⁶ Röhu gahējo. Hu a nunire jōe jōvajējo röhu nosi a masijohuro hesi öriroho jōho bogo ua'i ma-nunēremu gavaruējo. Na jabumē garomo uvaruējo: Ēaho böröme namiromo ajamui'iröhe aho hōromo ēhiho ē'aruējo. ²⁷ Röhu böröme namiromo ajamui'iröhe aehu rovē'iroho hu di amore jioromo rueröhoho no dadivavuo'ajējo. A'i ē aho di amore jioromo rovadoho iae no gavaruējo. Ēhuni hu bogo ē aho höjo.

28 Ëhi atamu Iesuro hejadeje. Heromo God-are amo bõrõmore hiromo jõho majëhiromo ma-darugo'o uvadeje: Jemëro uvarujëjo: Noro nõrõ iae mae gavaruëjo. Di amore jioromo rovadoho ëhu'o gavaruëjo. Rõhu jemë bogo avoho gevaruje hõjo. Na bogo nasi ëma rue'i Vavuohuro remõ'õjamu rovode hõjo. Ëaho hu mae hõjo. Rõhu jemë hu bogo gavaruje hõjo. 29 Naro hu gavaje hõjo naro hu'o jiamu huro na remõ'õjamu rovē'ëro jevë'ëro. 30 Ëhi uëvamu hegorovo guduamo'ië'oromo hesi majaho bogo rovē'e jiamu vuonugareje. 31 Vuonugamu a ioro'ioroho aho'obëhe Iesu mae uehorovareje. Mae uehorovoromo uarovareje: Bõrõme namiromo ajamui'irõhe aehu rovē'iroho na huro ave aho iosiramiro mo bëhi'e mu masijoho vae'a'ajëjo. Bogajo. Ëhuni nani hu ë ruerõhe a bõrõmoho hõjo.

Iesu guduamo'irõhego atovarue aribõvi rëmõ'õjamu rueruomade jõhoje.

32 Jõ ëhi vaerovobe rovaruoho Pharisee aribõviahuro hejareje. Heromo jabu'o priest masijohu'o ëho jaburo jabuni atovarue aribõvi ioro'ioroho rëmõ'õjareje va'oromo Iesu guduamo baruerõhego. 33 Ëhi'amu Iesuro ae uëvadeje: Majae ma-bunemu jemë'o hiromo remõ'õjamu rovode a hesirire vuonorõ'õ va'ejõjo. 34 Va'iramu jemëro na nahevoromo bogo birohevo'arujëjo. Naehu hi'irodire jemëhu ë õ'irarijoho bogo eni jëvo'ajëjo. 35 Õ'irarijoho bogo eni jëvo'ajë uëvamu Jew rajo a masijohuro uarovareje: Ëaho dinõ'e va'ego no bogo biroho'irõhego uõvuajëjo. Na hu Jew rajehu sa'a göre va'o raromaruire ë va'oromo God rumo'e aribõvioho jõe røjëhi'irõhëni uvajëjo o dinõ'e va'i uvajëjo. 36 Hu uvajëjo: Jemë na nahevoromo bogo birohevo'arujëjo. O naehu hi'irodire jemëhu õ'irarijoho jemë bogo eni jëvo'ajëjo. Ëhi jië'e jõho hu diehi jõvoromo ë'ajëjo.

A i'ovëvaje jovo hesi jõ Iesuhu jõvadohoje.

37 Ëhi'amu sörõ maja bõrõme jiobe ruejuvo ijo tugoho'i maja bõrõmo maho rovadeje. Rovamu evare Iesuro dõre ri'õ namiromo ma-darugo'o uvadeje: Jovo ue'aho'i nëgë'iroho nasi örõro rueromo irëjo. 38 Ae rahu na mae uehorovevë'o God-are surire jõ jajivoromo uvarëhi ëhi jëvo'ajëjo. Ëhesi bëhoho ae rahu mae uehorovevë'o a i'ovëvaje jovohuro jemesi dë vövõbajo'ere jioromo rojomoromo suorovo va'iramu aho i'ovëvo'ajëjo. 39 Ëjovo jõ hesi bëhoho God-are Aru'aho hesi jõho jõvoromo ë'adeje Iesu mae uehorovarue aribõviahuro ijõnõ ëho bae'irõhego. Iesuhu ëhi jõvade majaroho Aru'ahoho bogo sa'aroho nugõ'õjë'e jiadeje ë hesi bëhoho Iesu õ'idõroho bogo ajiomoromo ajoho baejë'ëro.

Iesure jõ ae göehu gö uehorovo'i ae göehu gö uehorovare jõhoje.

40 Ëhi jõvamu hegorovo a ioro'ioroho ae aho'obëhe uvareje: Ëaho iae jõ God-aro baeromo majahuijaje a bõrõmoho ruerõhego muebejaruoho hõjo. 41 A ioro'iorohuro uvareje: Ëaho bõrõme namiromo ajamui'irõhe aho hõjo. A ioro'iorohuro uvareje: Hu bogo ë aho hõjo. Hu Galilee rajo ae hõjo. Rõhu bõrõme namiromo ajamui'irõhe aho bogo Galilee sa'aroho jioromo rue'a'ajëjo. 42 A'i God-are surire jajivoromo uvë'e hõjo: Bõrõme namiromo ajamui'irõhe aho David-are ujoho jië'ëro

David-hu hijade ame Bethlehem ë raho'a'ajëjo. A'i Iesu Galilee rajëro jjië'ëro ëhu'ëro hu bogo ë uehorovarue a börömoho höjo. ⁴³ Ëhi atoromo ae aho'obëhe Iesuare jöho jöe gö gö uehorovareje. ⁴⁴ A ioro'iorohuro Iesu guduamo'i nimareje. Röhu aho hesi sinoroho övoho bogo bamareje.

Jew rajo a masijehu Iesu bogo ma uehorovare jöhoje.

⁴⁵ Ëhi'amu Pharisee ömo'ömohuni priest masijohuni atovarue ariböviohuro mami'e Iesu guduamo barue'i va'ë'ëro övemu vuonorö'ö rovamu gëgorovo jabesi masijohuro uëvareje: Jemë rabëni hu bogo guduamo barovarije höjo. ⁴⁶ Barovarije höjamu uëvareje: Urimë'i aehu bogo ëhi jjië'e jö ma jövamu hejaroho ë iahuro jö maho jövamu hegoro ëhuni vuonugare höjo. ⁴⁷ Vuonugare höjamu Pharisee ariböviohuro uëvareje: Na hu jemë'o sarerëmiromo jaguvëvade höjo. ⁴⁸ Jemë gavarujoho di a masijohuro o di Pharisee ahuro hesi öriroho maho uehorovë'e javuajëjo. Bogo'e höjo. ⁴⁹ Hesi ma-raromo jijih'o'e vaejarue ariböviohuremu Iesu mae uehorovarue höjo. Jabumë Moses-are jögoroho bogo hejaruëro jjië'ëro ëhu'ëro God-are i'uoho baeruomo hesi höjo. ⁵⁰ Pharisee ömo'ömohuro ëhi uënugoromo jabesi ae gemu Nicodemus-ro mami'e Iesu ga'i va'adohuro ri'öromo uëvadeje: ⁵¹ Ëjöho bogo maehu höjo. No aho bogo ëma uavarue höjo: Sisëro va'ëjo. Nosi jögoroho bogo ëhioho höjo. Urimo huro hesi jö'ëro jöho jövego heromo huhu rabe rabe ë'adoho heromo evare uavarue höjo: Ja i'ue baejë'e javajëjo. ⁵²⁻⁵³ Ëhi uëvamu sivoromo uavareje: Sareri ae javajëjo. Na ja Iesuare sa'ae gemuoho Galilee rajëro javë'ëro ëhuni ja hesi öroho avohanuëjo. Röhu ja'o God-are surire jöho avoho adahoromo ganëjo jö God-aro baeromo majahuijarue aehu Galilee sa'are jioromo rueröhe jöho bogojiajoho.

8

Magonahehu a goho'amamu garomo Iesuare nunire barovare jöhoje.

¹ [Ëhi'amu ae gemu gemu jabesi osaëro osaëro va'irögoro Iesuro aruhe Olives Dahorure ajiomadeje. ² Ajiomoromo niavë'ëro sue'o ri'öromo God-are amo börömore vuonorö'ö rovadeje. Rueromo gavade ae aho'obëhe hesi bëhire rueruomamu gëgorovo sa'aro hiromo aevoromo jöho röjëhijadeje. ³ Jöho röjëhijamu gagorovo Moses-are jögoru öri röjëhijarue ariböviohu'o Pharisee ömo'ömohu'o ëho jaburo masuvë'e magonahe gemu hu'irae baeromo rovareje mami'e ë magonahohuro ae gö'o niavamu aëro garomo guduamë'ëro. Hu'irae barueromo ae aho'obëhe jabesi nunire nugareje. ⁴ Nunire nugoromo Iesu uavareje: Tisa ave magonahohuro ae gö'o niavamu aëro gavare höjo. ⁵ Röhu mami'e Moses-ro jögoroho jajivoromo uövuade höjo ëhi jjië'e magonahoho munëro vajami'iröhego. Röhu ja diehi uehorovanuëjo. ⁶ Ëhi uavare hesi bëhoho jabumë nimareje Iesuro jöe sisë'i jövego jöho jaburo court-re huruoho majëhi'iröhëro. Ëhuni ëhi uavareje. Ëhi uavamu hegorovo Iesuro jöho bogo uëvë'e ma-uruho'amoromo övo namëro sa'are jajivadeje. ⁷ Sa'are jajivamu jö ga'i arijaroho bogo mana uëvë'e ma-sa'are jajivojuvo hujeji ijonö ririrohoromo uëvadeje: Jemë di aharo sisë rumo'e javego aevoromo munëro

vajamijëjo. ⁸ Munëro vajamijëromo röhu maho uruhu'amoromo sa'are jajivadeje. ⁹ Sa'are jajivamu huhu jövade jöho heromo ë ariböviohuro va'oruomadeje. Ama'i mavojoho jaburo aevoromo huruomoromo gemu gemu ri'ö va'ujuvo ijore a i'oho va'amu barëjadeje. Barëjamu Iesu hesi sivue jio'i magonahoho hesi nunire ë namijë'e jiadeje. ¹⁰ Namijë'e jiamu Iesuro ririrohoromo magonahoho uavadeje: Ma'ino aribövioho dinö'e jioruomajëjo. Na jasi sisë mevoromo i'u bojami'iröhe aho bogohöjo. ¹¹ Uavadeje: Bada ae bogohöjo. Ëhi uavamu uavadeje: Ëhi jië'oho na'o jasi jö sisëho bogo jövoromo i'uoho bojami'ejöjo. Va'oromo nadi ijoho ëhi jië'e muoho vaenëjo.]

Iesuhu sa'ae aho'obëhe ajivavuaje jö huhu jövdohoje.

¹² Ëhi'ë'ero Iesuro röhu maho jöe majëhiromo uëvadeje: Na ajoho jevë'ëro sa'ae dinö'e dinö'e ajivëvaje höjo. Ae rahu nasi ijore ijore jijihë'iroho bogo mae bogo ramoramoroho jijihö'i ajoho baeromo maro raromo'aruëjo. ¹³ Maro raromo'aruëjamu Pharisee ömo'ömhuro uavareje: Röhu jero jasi sivue jasi jöho majahuiromo uövuanuëjo: Nasi jöho mae höjo. Ëhi jië'oho no jasi jöho diehi maho uehorovo'ejarejo. Öre bogohöjo. ¹⁴ Öre bogohöjamu uëvadeje: Iae mae-ëjo. Iae na nasi sivue jöho majëhijajëjo. Röhu nasi jöho iae mae höjo. Rabëni hesi bëhoho na dinö'e jioromo rovodoho o dinö'e va'irodoho naro gavaje höjo. Jemë ëho bogo gavaruje höjo. ¹⁵ Jemëro ma-sa'a hesi uehore baeromo ae magonahe sisëro bahijaruje höjo. Na bogo aho sisëroho bahijaje höjo. ¹⁶ Röhu na sisëro bahi'i uehorovo'ibejöjo sareri'e jöho bogo uehorovo'i ma-mae ë'ibejöjo. Rabëni hesi bëhoho na bogo nasi sivuoho mevoromo jöho jövo'i na'o Vavue remö'öjadohu'o noro niö'iro mevoromo jöho majëhijarue höjo. ¹⁷ Ëhesi jöho jemesi jögoru surire ave jöho jajivoromo uvë'e höjo: Ae niö'iehu mu garomo ajamirovoromo jöe gemuoho majëhijamu gavë'oho uvorëjo: Jabesi jöho iae mae höjo. Ëhi jajivë'e höjo. ¹⁸ Naro nasi jöho majëhijego nasi Vavue sa'are remö'öjadohuro hu'o nasi jöe gemuoho majëhijaje höjo. Ëhuni nasi jöho iae mae höjo. ¹⁹ Mae höjamu uavareje: Röhu jasi Vavuoho dinö'e höjo. Dinö'e höjamu Iesuro uëvadeje: Jemë na'o nasi Vavuohu'o bogo gövuaruje höjo. Jemë na ge'ibejarijëjo nasi Vavuohu'o ga'ibejarijëjo.

²⁰ Iesuro God-are amo börömore hiromo God-ni suvuro bahijarue osare jö röjëhijadevare evare ë jöho majëhijadeje. Majëhijamu aho hu bogo guduamo bava'areje hesi majaho bogo rovë'ëro jië'ëro.

Iesuro uëvadeje: Naehu va'irodire jemë'o ë ö'irarijoho bogo eni jëvajëjo. Ëhesi jöhoje.

²¹ Ëhi ë'ë'ëro iae Iesuro jöe gö Jew rajoho majëhiromo uëvadeje: Naro öre gö va'ejöjo. Va'iramu jemëro nahevo'arujëjo. Nahevo'iramu röhu mu sisë'e jëvoromo vuovëvo'ajëjo. Vuovëvo'iramu naehu va'irodire ë ö'irarijoho bogo eni jëvo'ajëjo. ²² Bogo eni jëvo'ajëjamu rue Jew rajohuro uarovareje: Huro uövuaajëjo: Naehu va'irodire ë ö'irarijoho bogo eni jëvo'ajëjo. Hu diehi uöromo jövajëjo. Na hu anorovo'i jövajëjo. O diehi ë'iro jövajëjo. ²³ Diehi ë'iro jövajëjamu Iesuro uëvadeje: Jemë ave sa'are sisë'i rarumaruje aribövie jëvo'i na aruhe döre jioromo ruvebijë'e jëvajëjo. Jemë ave sa'aho raje jëvo'i na bogo ave sa'a rajehu jëvo'i dö raje jëvajëjo. ²⁴ Ëhuni uëvajëjo: Jemë sisë'e jëvoromo

vuovëvo'ajëjo. Jemë bogo ma uehorovevoromo uvë'o'oho: Nöröhu uëvaje ë aho hö uvë'o'oho sisë'e jëvoromo vuovëvo'ajëjo. ²⁵ Vuovëvo'ajëjamu uavareje: Ëhi jië'o'oho ja rahuo javajëjo. Ja rahuo javajëjamu uëvadeje: Na aevoromo uëbe rovode ë aho jëvajëjo. ²⁶ Jemesi mu sisë jöho aho'obëhe nasiriro jiajëjo jövo'irodoho. Röhu remö'öjade aehu uevamu hejode jöho na ëhuremu jövaje höjo sa'are raromaruje aribövioho jemëro hejéro rabëni hesi bëhoho remö'öjade aho jö maemu jövajëro jië'ëro.

²⁷ Ëhi uëvamu jaburo bogo avoho uehorovoromo uvareje: Remö'öjade hö uövuaje aho Vavuoho höjo. ²⁸ Bogo ëhioho uvoruomamu Iesuro uëvadeje: God-are A Maho na banigojiomevoromo döre nugevë'iroho evare jemë avoho garomo uvo'a'arujëjo: Nöröhu uëvaje ë aho höjo. Evare jemë garomo uvo'a'arujëjo: Na bogo nasi simanoho muoho vae'i Vavuehu röjehijade jöhuremu jövaje höjo. ²⁹ Remö'öjade ahuro bogo vuororemiromu va'i na'o hijaje höjo hu nimaje muoho naro majae ëhi vaejajego. ³⁰ Ëhi uëvamu hegoroovo ae aho'obëhe hesi örire mae uehorovareje.

Sisë hesi darugore raromaruoho Iesuhu jiovëho'i uvade jöhoje.

³¹ Jew rajo ioro'iorohuro Iesure jöho mae uehorovamu gagorovo uëvadeje: Jemë nasi jö ejehonövë'o'oho nasi ijorajo mae jëvo'ajëjo. ³² Ëhi jëvo'iramu jö maho ga'a'arujëjo. Jö maho garomo ëhuro ijönöho i'u'e mu hesi uhure jëvajoho barëjëvo'i ma-sasohë'e mu hesi aharire jëvo'ajëjo. ³³ Jëvo'ajëjamu uavareje: Iae ëhi höjo röhu no Abraham-are ujo ömo'ömëro javuë'ëro avare i'u'e mu hesi uhuroho bogo raromobe rovë'e javuajëjo. Ëhi jië'o'oho ja diehi uöromu ë'anuëjo: I'u'e mue jëvajoho barëjëvo'ajëjo.

³⁴ Barëjëvo'ajëjamu Iesuro uëvadeje: Ave jöho na jö mae uë'ië'ajëjo. Ae rahu sisë vaejaruoho mu sisë hesi uhure jioruomajëjo. ³⁵ I'u'e mu vaemu vaejarue ariböviohuro aganohu'o ma-jahuri raromo'i harihu ömo'ömohuro aganohu'o ma-ioro'ioyemmu raromaruje höjo. ³⁶ Jemë i'u'e mu hesi uhure jëvamu Harihu naehu tugohëhë'o'oho ëhuro iae mu ma hesi aharire jëvo'ajëjo. ³⁷ Iae na garomo uvajëjo: Jemë Abraham-are a uje jëvajëjo. Röhu nasi jöho bijönëgo'ego ëhuni anego'ië'arujëjo. ³⁸ Nasi Vavuehu röjehijamu gavode jöho naro jövaje höjo. A'i jemëro jemesi vavuehu uëvamu hejarije jöho ejahoromo ömaruje höjo.

³⁹ Ömaruje höjamu uavareje: Röhu nosi aevö'i jiade vavuoho Abraham jio'i no hesi ujo ömo'ömoho javuajëjo. Hesi ujoho javuajëjamu uëvadeje: Iae ëhi jëvajëjo röhu jemë Abraham-are ujo mae jëvo'ibejajo huhu mu ma vaejade ëhi jië'e mu maho vae'ibejarijëjo. ⁴⁰ God-hu uevamu hejode jö maho majëhibe rovode höjo röhu jaruvoho jemëro na anego'ië'arujëjo. Abraham ëhi jië'e muoho bogo vaenövade höjo. ⁴¹ Jemesi vavuehu sisë'i ë'adëhi ëhi ë'arujëjo. Ëhi ë'arujëjamu uavareje: Asë'e no bogo öbiehu javuoi God gemu nosi Vavuoho höjo. No hesi ujo mahuremu javuajëjo.

⁴² Ujo mahuremu javuajëjamu Iesuro uëvadeje: Jemë ëhi uvarujëjo röhu jemesi Vavuoho God jio'ibejajo nasi örire rajehi'ibejarijëjo. Rabëni hesi bëhoho na God jiajire jioromo rovodoho aviae jëvajëjo. Bogo nasi ma-rue'i God-ro na remö'öjamu rovode höjo. Röhu jemëhu

bogo rajehijarujohuni ehuni God bogo jemesi Vavuehu hōjo. ⁴³ Jemē rabēni nasi jō bēhoho bogo avoho hejarujējo. Nasi jōho bijōnēgo'ego ehuni ē'arujējo. ⁴⁴ Jemē jemesi vavu hesi agane gemuoho jēvajējo. Rōhu jemesi vavuoho Satan hōjo. Jemesi vavuehu nimajēhi ēhi ōmō'i nimaruje hōjo. Ni'i'ivadire Satan-ro aevoromo ae muo'amobe rov'e hōjo. Hu ma-sareri'e jōemu uehorovajēro ehuni hu jō maho bogo ajamijaje hōjo. Hu sareri'e jō jōv'iroho hesi muoho ēhi jiē'ero ehū'ero hu ēhi gemu muoho vaejaje hōjo rabēni sareri'e mu hesi bēhoho hu jiē'ero sareri'e jōhemu uehorovajēro jiē'ero. Jemē'o ēhi gemuoho jēvajējo. ⁴⁵ Naehu jō ma jōvajoho ēho bijōnimoromo jemē nasi jōho bogo ma uehorovaruje hōjo. ⁴⁶ Dī aho ja nasi sisē garomo huruoho'iranoho eni javajējo. Nasi sisēho bogojiē'ero jemē huruoho'irarijoho bogo eni jēvajējo. Naehu jō ma majēhijajoho jemē rabēni nasi ōriroho bogo maho uehorovevarujējo. ⁴⁷ God-are aganoho hesi jōho hejarue hōjo. Rōhu jemē bogo God-are agane gemuoho jēv'ero ehū'ero hesi jōho bogo hejaruje hōjo.

Iesuro uēvadeje: Abraham bogo rahadevaroho evaroho naro hibe rovode hōjo. Ējōho Iesuhu jōvadohoje.

⁴⁸ Ēhi uēvamu Jew rajohuro Iesu birevoromo uavareje: Iae no mae uavare hōjo: Ja sareri'e Samaria rajo va'ēne javanovajējo. Satan-are a sisēho jasi dēre jiajējo. ⁴⁹ Jiajējamu uēvadeje: Satan-are aho nasi dēroho bogohōjo. A'i naro nasi Vavu hesi ihoho banigojiomego dōro jiaje hōjo. Rōhu jemēro nasi ihoho sisē vaejeharujējo sa'aro jiehojōro. ⁵⁰ Rōhu nasi ihehu dōro jiorōhoho ēho bogo naehu uehorovo'i a'i A Gōhuro iae uehorovaje hōjo. Ēho uehorovoromo huro bōrōme namiromo nasi jōho mae mevehaje hōjo. ⁵¹ Ave jōho na jō mae uē'iē'ajējo. Ae rahu nasi jō ejeh'oho ijonōho bogo mae bogo vuovēvo'ajējo. ⁵² Bogo vuovēvo'ajējamu rue Jew rajohuro uavareje: Avejō'oho iae no gavaruoho Satan-are a sisēho jasi dēre jiajējo. Abraham'o jō God-aro baeromo majahuinōvare a masijohu'o mami'e vuovobe rov'e hōjo. Rōhu jero uōvuauējo: Ae rahu nasi jō ejeh'oho bogo mae bogo vuovēvo'ajējo. ⁵³ Nosi aevo'i jiade vavuoho Abraham guomade hōjo. Na jero uvanuējo: Na Abraham iosiramij'e a bōrōme jevajējo. O jō God-aro baeromo majahuinōvade aribōvioho vuovobe rov'e hōjo. Diehi jiē'e aharo nimoronimorohē'i jōvanuējo. ⁵⁴ Jōvanuējamu Iesuro uēvadeje: Naro nasi ihoho banigojiomo'ibejōjo ēho bēhe bogojio'ibejajo. Rōhu nasi Vavuohuro nasi ihoho banigojiomehego dōro jiaje hōjo. Ēaho jemēro uvaruje hōjo: God nosi Bōrōmoho hōjo. ⁵⁵ Rōhu jemē hu bogo gav'e jēvajējo. Naro iae hu gavaje hōjo. Na uē'ibejōjo: Na hu bogo gavaje hō uē'ibejōjo jemē jō sareri'e ae jēvajēhi na ēhi jiē'e ae jevo'ibejajo. Rōhu iae naro hu garomo hesi jōho ejahaje hōjo. ⁵⁶ Jemesi aevo'i jiade vavuoho Abraham-ro naehu hijode maja ga'irōhohuni ehuni nimoroho avohade hōjo. Nimorohē'ero naehu hijode majaho iae hu gavamu dē sasohade hōjo. ⁵⁷ Dē sasohade hōjamu rue Jew rajoho jaburo uavareje: Sarerivanuējo. Hu mami gō gō'e guomadoho ja vadune aho'obēhe 50-ho bogo baej'e javajējo. Ēhi jiē'oho ja diehi'oromo Abraham gavane hōjo. ⁵⁸ Gavane hōjamu Iesuro uēvadeje: Ave jōho na jō mae uē'iē'ajējo. Abraham bogo rahadevaroho

na urimoho jevë'e jiade höjo. ⁵⁹ Ëhi jövamu hejë'i vajamil'irögoro munëho ujuohareje. Ujuohamu Iesuro gurihirovë'ëro God-are amo börömo nugo'i va'adeje.

9

Iesuhu nuni ramoramovë'e a ajamamu marëjade jöhoje.

¹ Iae Iesuro juvo va'adeje. Va'ihö gavadeje nuni sisë'e ae gemu hijamu rahade majare aevoromo hesi nunoho sisërëjävë'ëro jië'ëro. ² Ëaho ë hijamu gagorovo Iesuale ijorajo ömo'ömhuro uavareje: Tisa rahuare sisëro ëhuro nuni sisë'oho rahade höjo. Na hesi sisëro o hesi vëmu vavu'o jabesi sisërajo. ³ Ëhi uavamu uëvadeje: Bogo hesi sisëhuro o bogo hesi vëmu vavu'o jabesi sisëhuro ëhuro nunoho sisërëjade höjo. A'i sisërëjade hesi bëhoho jemë ga'irarijego God-ro hesi darugohuro diehi ajamego mae jiajoho iae ëhuni nuni sisë'oho jiade höjo. ⁴ Aji maja jiajevare evare sa'are remö'öjade aehu nimaje muoho no vaenövo'ëjarëjo. Vahiromavuo'ië'ajëjo. Evaroho aehu mu vae'iröhoho bogo eni jio'a'ajëjo. ⁵ Na ave sa'are hijajevare evare na ajoho jevë'ëro sa'ae aho'obëhe ajivëvaje höjo.

⁶ Ëhi uënugoromo sabëro sa'aho ödivoromo tevoromo övëro hatohatovoromo nuni sisë'e a hesi nunoho buejahadeje. ⁷ Buejahoromo uavadeje: Siloam jovo e'uoro va'oromo nu ano'oho eguëjo. Röhu Siloam nosi jöehu huotovë'oho nugö'öjade jöhoje. Nu ano'oho eguëjamu hegorovo rue nuni sisë'e ahuro va'oromo nu ano'oho eguoromo mae uherihoromo vuonorö'ö rovadeje.

⁸ Rovamu hesi amo rajohu'o a ioro'iorohu'o böviëni bise'ëni ëninëmi'ego ganövë'ëro jaburo uarovareje: Ave iaho urimë'i hiromo noehu ajamijöro ëninamuinövade aho höjo. Na mae-ëjo. ⁹ Na mae-ëjamu a ioro'iorohuro uvareje: Io'ajo. Iae ë aho höjo. A ioro'iorohuro uvareje: Bogajo. Ae gö ë iaho va'ëne höjo. Ëiaho va'ëne höjamu rue ahuro uëvadeje: Na bogo ae göehu jevo'i jemesi örire ëninëmijode aho jevajëjo. ¹⁰ Ëninëmijode aho jevajëjamu uavareje: Ëhi jië'oho diehi'amu jasi nunoho marëjahade höjo. ¹¹ Marëjahade höjamu uëvadeje: Ae gemu hesi ihe Iesu ë ahuro busasovë'e sa'aho hatohatovoromo nunoho buejehoromo uevade höjo: Siloam jovo e'uoro va'oromo nu ano'oho eguëjamu naro va'oromo eguoromo evare mae uherihode höjo. ¹² Mae uherihode höjamu uavareje: Röhu hu dinö'e höjo. Dinö'e höjamu uëvadeje: Hesi nani'ajo.

¹³ Ëhi uëvamu ë urimo nuni sisë'e jiade aho ë ariböviohuro hu'irae baeromo Pharisee aribövi jabesirire va'areje. ¹⁴ Röhu mami'e Iesuhu busasovë'e sa'a hatohatovoromo ë ia hesi nuni dadovahade majaho Jew rajehu mu bogo vae'i ma-nuharue majaho jiadeje. ¹⁵ Manuharue majare Iesuro nunoho dadovahë'ego Pharisee aribövioho jabu'o jöe gemuoho uavareje: Diehi'amu jasi nunoho marëjahade höjo. Marëjahade höjamu uëvadeje: Huro busasovë'e sa'aho hatohatovoromo nunire buejehamu naro va'oromo nu ano'oho eguë'ëro ëhu'ëro mae uherihaje höjo. ¹⁶ Mae uherihaje höjamu Pharisee aribövi ioro'iorohuro uvareje: O ë ahuro nunoho dadovahoromo ëhuro nuho maja hesi jögoroho ahade höjo. Ëhu'ëro ë aho bogo God-hu nugö'öjamu

rovè'e aho hōjo. Bogo God-hu nugö'ōjamu rovè'e aho hōjamu Pharisee a ioro'iorohuro uvareje: Iae ēhi hōjo rōhu hu a sisè jio'ibejajo hu diehi'oromo ēhi jiè'e mu masijoho vae'ibejajo. Èhi uarovoromo Pharisee ariböviohuro jōe gō gō uehorovo'amareje. ¹⁷ Jōe gō gō uehorovoromo urimo nuni sisè'e jiade aho rōhu maho jōe majahiromo uavareje: Jero uövuanuējo: Huro nasi nunoho dadovehade hōjo. Èhi jiè'o'ho ja uehorovanuoho hu diehi jiè'e ae hōjo. Diehi jiè'e ae hōjamu uévadeje: Hu jō God-aro baeromo majahuijaje ae hōjo.

¹⁸ Rōhu rue Jew rajohuro uvareje: Nani sareramuiromo uövuaruējo: Aevo'i nuni sisè'e jiadoho avevejō'oho gavajēromo ae uévareje: Uëvego ave a hesi vèmu vavu'ohuro rue'irarējo. ¹⁹ Jabumè rovamu uévareje: Na ave aho jemesi harihe hōjo. Jemè uövuarije hōjo: No ave harihu baejare majare evare hu aevoromo nuni sisè'e jiade hōjo. Na mae o sarerējo. Mae jiè'o'ho diehi'è'èro jaruvoho hu mae uherihajējo. ²⁰ Mae uherihajējamu rue vèmu vavu'ohuro uévareje: No gavaruoho ave aho iae hu nosi harihe hōjo. No hu baejarevare evare aevoromo nuni sisè'e jiade hōjo. Èjōho iae no gavaruējo. ²¹ Rōhu rahuhu diehi ajamamu nuni dadovadoho no bogo gavè'e javuajējo. Jue'io ua garego huro hesi jō'èro majēhi'irajo hu bövie jiaje. ²² Rōhu vèmu vavu'ehu è jō uévare hesi bēhoho jaburo è Jew rajo masijoho juhuonēmijareje. Urimè'i è a masijohuro jōe mevoromo ae aho'obèhe uévareje: Ae rahu huruoho majahuiromo uövüè'oho: Bōrōme namiromo ajamuijaje aho Iesu hō uövüè'oho ēhi jiè'e aribövioho noro ahèvo'iramu ijōnōho nosi osa bōrōmoroho bogo rueromo God rajahinövo'aruējo. Èjōho uehorovoromo vèmu vavu'ohuro juhuonēmijareje. ²³ Juhuonēmiromo èhuni uévareje: Èaho bövie jiaje èhuni jemèro hu ua garējo.

²⁴ Hu ua garējamu hegorovo rue a masijohuro jōe nugö'ōjareje urimo nuni sisè'e jiade ahuro vuonorö'ö rueröhego. Jōe nugö'ōromo rovamu Iesuare jōho atoromo uavareje: God-are nunoro jōe ma-maemu jōvego no hejarējo. No gavaruoho è aho a sisè hōjo. ²⁵ A sisè hōjamu uévadeje: Na'o bogo gavajējo. Nani hu a sisè hōjo o bogajo. Rōhu jōe gemu iae na gavajējo urimo nuni sisè'e jevadoho jaruvoho mae uherihevo'ego. ²⁶ Èhi uévamu uavareje: Hu diehi'avade hōjo. Hu diehi nunoho dadovahade hōjo. ²⁷ Dadovahade hōjamu uévadeje: Na mami'e uévamu jemèro bogo ejeharije hōjo. Rabèni rōhu maho he'i nēgajējo. Nani jemè'o hesi ijore ijore jijih'o'i nēgo'ego o rabèni ue ge'i arijarujējo. ²⁸ Ue ge'i arijarujējamu sivoromo uavareje: Ja è ia hesi ijore ijore juvanue ae javajējo. No bogajo. No Moses-are jōgoru ijore ijore jijiharue aribövie javuajējo. ²⁹ No iae garomo uvarue hōjo: God-ro Moses jōe bojамamu majahuijade hōjo. A'i è a gō hesi bēhoho no bogo gavaruējo. ³⁰ Bogo gavaruējamu rue nuni sisè'e jiade ahuro uévadeje: Asè'e jemè diehi'oromo hesi bēhoho bogo gavaruje hōjo. Iae huro nasi nunoho dadovehade hōjo rōhu jemè hu bogo gavaruje hōjo. ³¹ No gavaruoho God a sisè jabesi jōho bogo ejēhaje hōjo. O aehu God uehorovoromo huhu nimaje mu vaejè'oho ēhi jiè'e aribövioho God-ro ejēhaje hōjo. ³² Ni'i'ivadire jioromo ēhi ro avevejō'oho bogo hebe rovè'e javuajējo uvavamu: Vèmu dère jioromo nuni sisè'e raharoho aèro nunoho dadovèhade hōjo. ³³ God bogo nugö'ōjago rue'ibejajo ēhi jiè'e darugo'e mu vaejajoho hu bogo mae bogo eni jio'ibejajo.

³⁴ Bogo eni jio'ibejajamu uavareje: Jasi vëmu hesi dëre jioromo mu sisëmu vaebe rovë'e javajëjo. Èhi javajëjo rõhu ja diehi'oromo jögoroho bojamuijanuëjo. Èhi uanugoromo jabesi osa börömoroho rarovö'öjamu va'adeje.

Ae gö dë vövöbajo'e ramoramovë'e raromarue jö Iesuhu jövadohoje.

³⁵ Èrarovö'öjamu va'ade jöho aëro atamu Iesuro hejadeje. Heromo ë aho bihoromo uavadeje: Na ja God-are A Ma hesi öriroho mae uehorovanuëjo. ³⁶ Mae uehorovanuëjumu uavadeje: Rõhu God-are A Maho rahuo höjo. Uevego na hesi örire mae uehorovöjo. ³⁷ Mae uehorovöjumu Iesuro uavadeje: God-are A Maho jero mami'e gavane höjo. Rõhu aviavejõ'e ja'o jõe jövajëjo. Iae na jevajëjo. ³⁸ Na jevajëjumu uavadeje: Bada naro jasi örire mae uehorovavajëjo. Mae uehorovavajëromo ague aho hiromo rajahijadeje.

³⁹ Rajahijamu Iesuro uëvadeje: Naro sa'are rovode höjo mae o sisë aribövie mevëvo'irodëni. Nuni ramoramovë'e aribövioho nune dadovëho'i ma-döhemu nuni ma'e aribövioho nune tugohëho'irodëni ëhuni sa'are rovode höjo. ⁴⁰ Èhi uëvamu Pharisee a ioro'iore bëhire ramarohuro ë jöho heromo uavareje: Na ja nosi jöho jövoromo ë'anuëjo. No bogo nuni ramoramovë'e ariböviehu javuajëjo. ⁴¹ Javuajëjumu Iesuro uëvadeje: Jemë nuni ramoramovë'e jëvo'ibejajo jö sisëho bogojëvo'ibejajo. Rõhu jemë ëma uvaruje höjo: Iae no mae gavarue höjo. Èhuni jemesi sisëho iae jëvajëjo.

10

Sheep-ehu raromarue amo hesi uhu jö Iesuhu jövadohoje.

¹ Iae Iesuro uhu'e uëvadeje: Ave jöho na jö mae uë'ië'ajëjo. Ae rahu sheep jabesi amore va'ië'iroho bogo ojoroho va'i buoru iromaroho ruahoromo va'amu gavë'oho uvo'a'anuëjo: Èhi jië'e aho anano'e vajiohu'e ae höjo. ² O ae rahu ojore va'amu gavë'oho uvo'a'anuëjo: Èho sheep muebe'amaje aho höjo. ³ Sheep muebe'amaje aho sheep amore va'ia'amu gavë'iroho ojo muebejaje ahuro ojoho jiovahego ë va'aje höjo. O sheep-ohuro hesi huëho heruomaje höjo. Hejego hesi sheep gemu gemu hesi ihoho uvoromo sö ujuohoromo va'o amonö höröjaje höjo. ⁴ Sö ujuoho va'o barënuhoromo evare jabesi nuninö va'ego sheep-ohuro ijore va'oruomaje höjo hesi huëho heruomajëro jië'ëro. ⁵ A ioro'iore jabesi huëho bogo hejaruëro jië'ëro jabesi ijoroho bogo va'i huruomoromo va'oruomajëjo.

⁶ Èjöhö Iesuro uhu'e uëvamu ë jö hesi bëhoho bogo avoho hejareje.

Sheep muebe'amaje a maho hu Iesu jiaje jö Iesuhu jövadohoje.

⁷ Bogo avoho hejë'ëro Iesuro uëvadeje: Ave jöhu'o na jö mae uë'ië'ajëjo. Na sheep-ehu va'oruomaje ojoho va'ëne jevajëjo. ⁸ Urimo rueruomade aribövioho anano'e vajiohu'e a va'ëne jëvobe rovadoho nasi sheep mahuro jabumë bogo ejëhare höjo. ⁹ Na ojo va'ëne jevajëjo. Ae rahu nasirire ruaho rovë'oho maro jioruomajëjo. Maro jioromo ruaho ruerome osare jioromo ruaho va'oromo va'orahonö ioho bihoromo ue'aho'aruëjo. Èhi gemu ë'onövo'aruëjo. ¹⁰ Rõhu anano'e vajiohu'e ahuro rueruomaje höjo vajiohëro ujuoho'i bijuëmo'i

ijumo'amo'irovo. Naro rovode hōjo nasi sheep ömo'ömhuro i'ovoromo ma-marō raromorōhego.

¹¹ Sheep muebe'amaje a maho na jevajējo. Sheep muebejaje a mahuro uvaje hōjo: Naehu sheep jabesi jōēni nasi arijo'arije bojamirovoromo guomorov'oho iae mae hōjo. ¹² O ma-moniemu nimoromo ae gö hesi sheep muebejahaje aho ēho bogo sheep jabesi vavuoho jio'i ma-muebe'amajero jiē'ero ga'irōhe vörö'e mioho rovamu gavē'iroho sheep-oho rēmöl'ōromo ju'ebiromo va'aje hōjo. Ju'ebiromo va'ego miohuro ro sheep-oho umi ujuoho va'ego sheep ioro'iorohuro huruomomomo arua anumiae va'aje hōjo. ¹³ Amo a hesi sheep muebejahajohuro moniemu nimē'ero sheep-oho bogo huēho baejēvaje hōjo. Ēhu'ero huruomaje hōjo. ¹⁴⁻¹⁵ A'i na sheep muebe'amaje a maho jevajējo. Vavuohuro na ge'i naehu Vavu gavajēhi ēhi naro nasi sheep-oho ga'amaje hōjo. O nasi sheep-ohuro na geruomaje hōjo. Ēhi jiē'ero naehu sheep jabesi jōēni nasi arijo'arije bojamirovoromo guomorov'oho iae mae hōjo. ¹⁶ Röhu sheep ioro'ioroho iae jevajējo. Jabumē ave sheep amoroho bogo raromarue hōjo. Bogo raromaruoho jahu'o sōjēvo rue'ejōjo. Rueromo jōe majēhi'iramu ejehonövo'aruējo. Ēhu'ero jiē'ero sheep aho'obēhe ma-gemuoro jio'i sheep muebejaje aho ma-gemu jevo'ajējo.

¹⁷ Vavuehu na rajehijaje hesi bēhoho naro guomorovo'ejōjo i'ovoromo röhu maho hi'irodēni. ¹⁸ Aho bogo ma-anego'i nasi nimoromo bojamirovo'iramu anego'iramu guomevo'ajējo. Naehu bojamirovamu anegamu guomev'oho iae mae hōjo. O ajamirovoromo i'ovoromo röhu maho hijē'oho ēhu'o iae mae hōjo ēhi guomoromo röhu maho ri'ö'irodoho nasi Vavuohuro uevamu hejē'ero jev'ero.

¹⁹ Ēhi uēvamu hegorovo rue Jew rajohuro röhu maho jōe gö gö uehorovareje. ²⁰ A ioro'ioroho aho'obēhe jaburo atoromo uarovareje: Satan-are a sisē gemuero hesi dē vövöbajo'ere abuejē'ero simane sisē'i uehorovoromo jōvajējo. Jemē rabēni hesi jōho hejarujējo. ²¹ A ioro'iorohuro uarovareje: O huhu jō jōvajoho bogo Satan-are a hesi dēroho abuejē'ero jōho jōvajējo. Ēhesi bēhoho Satan-are a sisēhuro nuni sisē'e aho diehi ajamego mae jio'ibejajo. Bogajo. Ēhi atoromadeje.

Jew rajo ariböviehu Iesuare örire bijönimoruomade jōhoje.

²² Iae Jerusalem amore maja bōrōmoho rovadeje. Ēmaja bōrōmo hesi bēhoho Jew rajo ömo'ömhuro uehorovoromo uvonōvareje: Evare majare nosi a mamiohuro God-are amo bōrōmo hesi ojoho jiovoromo God-are örire ma-ioro'ioemu bojamare hōjo hesi baerōhego. Ēmaja bōrōmoho runoni majae jiē'iro evare rovadeje. ²³ Ēmaja bōrōmoho rovamu Iesuro God-are amo bōrōmo hesi haradare juvadeje. Harada hesi ihoho Solomon-are Haradae jiadeje. ²⁴ Juvamu gagorovo Iesu ririre jio'i Jew rajohuro ruē numē riravo rova'oromo uavareje: Ja divare jō subivahuanuoho vuonugo'iramu ēhuro bogo dadivavuo'ajējo. Masama'e majahuijigo hejarējo. Na ja bōrōme namiromo ajamui'irane aho javajējo o bogajo. ²⁵ Ēhi uavamu Iesuro uēvadeje: Naro mami'e uēvode hōjo. Röhu jemē bogo ma uehorovevaruje hōjo. Naro nasi Vavu hesi ihore mu masijoho vaejaje hōjo jemero ē muoho garomo uvo'irarijigo: Iae mae-ējo. Nörö iae a mae hōjo. ²⁶ Röhu jemēhu

na bogo ma uehorovevaruje hesi bëhoho jemë bogo nasi sheep-oho jëvajújo. ²⁷ Nasi sheep-ohuro nasi huëho heromo ejehoruomego naro jabumë gëvaje höjo. Gëvego jaburo nasi ijore ijore jijihoruomaje höjo. ²⁸ Nasi ijore ijore jijihoruomego naro jabu ajëmege ma-ioro'ioremu maro raromarue höjo. Èhu'ëro jië'ëro jabumë bogo mae bogo sisëroho va'oruomo'ajëjo. O nasi övo döre raromaruoho aho bogo baeniehi'aruëjo. ²⁹ Nasi Vavue jabumë baejëvoromo nasi örire bojemade ahuro aho'obëhe iosirëmijë'e höjo. Èhuni Vavu hesi övo döre raromaruoho aho bogo baeniahi'aruëjo. ³⁰ Na'o nasi Vavuohu'o no gemuoho javuajëjo.

³¹ Na'o nasi Vavuohu'o no gemuoho javuajëjamu hegorovo Jew rajohuro urimo munëhu vajami'ië'aroho röhu maho munëho ujuohareje vajami'irovo. ³² Munëho ujuohamu gagorovo Iesuro uëvadeje: Vavuohuro na ajemamu mu mae aho'obëhe vae'amamu gavarije höjo. Di mu vaejamu gavarijohuni munëho vajemi'ië'arujëjo. ³³ Munëho vajemi'ië'arujëjamu uavareje: Bogo mu ma hesi jöënioho munëho vajami'ië'aruëjo. A'i jero God-are ihoho ijumo'ego èhuni è'aruëjo. Ja ma-ae javajëjo. Röhu jero uvanuëjo: Na God jiaje gemuoho jevajë uvanuohuro èhuro God-are ihoho ijumanuëjo. ³⁴ Ijumanuëjamu Iesuro uëvadeje: Röhu jemesi jögoru surire jajivoromo èhi uvë'e höjo: God naro uëvajëjo: Jemë god ömo'öme jëvajújo. ³⁵ Èhi jajivë'e höjo. God-are surire jöho ioro'ioremu jioröhe jöho höjo. Èsurire jajivoromo uvë'e höjo: God-are jö baejare aribövioho jabumë god ömo'öme jio'amajë uvë'e höjo. ³⁶ Röhu na bogo ma-God-are jöho bae'i a'i Vavuohuro na baejëvoromo sa'are remö'öjamu rovë'ëro uëvajëjo: Na God-are Harihe jevajëjo. Èhi jië'oho jemë rabëni uevarujëjo: Jaehu uövuanuoho: Na God-are Harihe jevajë uövuanuohuro èhuro God-are ihoho ijumanuëjo. Èhi jië'oho bogo maehu höjo. ³⁷ Röhu nasi Vavuehu bojemade muoho na na vaejaje höjo o bogo vaejaje höjo. Bogo vaejaje jevamu gavë'oho nadi maho uehorovevorëjo. ³⁸ Röhu Vavuehu bojemade muohuremu iae na vaejaje höjo. Nani jemëro na bogo ma uehorovevo'arujëjo röhu nasi muoho èhuro garomo uvorëjo: Iae mae-ëjo. Vavuohuro ajamamu vaejade höjo. Jemë èhi uehorovë'oho èhuro avoho ga barëromo uvo'a'arujëjo: Vavuohuro nasi dë vövöbajo'ere jio'i naro Vavu hesi dë vövöbajo'ere jiaje höjo.

³⁹ Èhi jövamu hegorovo rueho jaburo röhu maho Iesu guduamo'ië'areje. Guduamo'ia'amu garaedëgoromo va'adeje.

⁴⁰ Va'adoho va'o Jordan jovoho beromo ioni gönö va'oromo John-hu aevoromo bapataeto vaejëvadire è va'o hijadeje. ⁴¹ Va'o hijamu gagorovo ae aho'obëhe rueruomadeje. Rueromo uarovareje: John bogo darugo'e mu masijoho vaenövade höjo. Röhu ave a hesi jö John-hu majahuijamu hejaroho è jöho aho'obëhe iae mae uövuade höjo. ⁴² Èhi uarovoromo ae aho'obëhe Iesu è öri ari'ere mae uehorovoruumadeje.

11

Lazarus guomade jöhoje.

¹ Iae guomo guomo'e ae gemu hesi ihoho Lazarus Bethany amore hijadeje. Röhu hesi ma'ine niö'i Mary'o Martha'o jabesi amoho gemuoho

jiadeje. ² Rõhu Mary hu majae ijönö hiromo Badare hörure ridi'e jovehu otehodivoromo simano uehu uhijaho'irõhe magonaho jiadeje. Amo ë magonaho hesi ma'ine Lazarus-ro guomo guome baeromo hijadeje. ³ Hijamu Lazarus-are ma'ine niõ'iro jõe nugõ'õromo Iesu uavareje: Bada jaehu huë baejanue aho guomo guome baejẽ'e hõjo. ⁴ Guomo guome baejẽ'e hõjamu hegorovo Iesuro uëvadeje: Ëguomo guomo baejade hesi bëhoho hu bogo ioro'ioremuoho guomo'irõgoro God-are ihoho döro jiorõhego. Hu guomo guome baejẽ'ëro ëhu'ëro God-ro ajemi'iramu hesi Harihe nasi ihohu'o dö maro jio'a'ajëjo. ⁵ Rõhu Iesuro ö'o ö'o Martha'o Mary'o jabesi ma'ine Lazarus'o ëhi dë vövõbajo'e aho'o uehorovëvadeje. ⁶ Amo hejade uavamu: Lazarus guomo guome baejẽ'e hõ uavamu heromo bogo Judea sa'aroho va'oromo Lazarus ga'irõgoro ëhi hijamu majae niõ'i barëjëvadeje.

⁷ Majae niõ'i barëjëvamu gagorovo hesi ijorajo ömo'õmoho uëvadeje: Ruehego no Judea sa'are vuonorõ'ö va'arëjo. ⁸ Va'arëjamu ijorajoho jaburo uavareje: Tisa iae mae hõjo rõhu avevejõ'e Jew rajoho jaburo ja munëro vajami'ië'are hõjo. Ëhi jië'o ho ja rabëni ë sa'aroho vuonorõ'ö va'ië'anuëjo. ⁹ Va'ië'anuëjamu Iesuro uëvadeje: Aveho aji majaromëro jië'ëro va'ejõjo. Jemë'o uehorovohëjo. Majae hörõromo hour aho'obëhe 12 barëjego evare beva'aje hõjo. Ëhu'ëro ae rahu maja'e jijihë'o ho ave sa'ae aho'o hesi ajire jijihoromo ëhuro bogo biberovarue hõjo. ¹⁰ O vahi'e jijihë'o ho ajoho bogojëvë'ëro ëhuro biberovarue hõjo. ¹¹ Ëhi uëromo ijönö uëvadeje: Nosi aemo'aemoho Lazarus niavë'e hõjo. Ëhuni na va'oromo io'ejõjo. ¹²⁻¹³ Io'ejõjamu hesi ijorajoho jaburo uvareje: Nani Iesuro uõromo ë'ajëjo: Lazarus ma-niavajë uõvuajëromo uavareje: Bada hu niavë'o ho iae marë'ajëjo. Rõhu Iesu bogo ëhioho uë'i a'i uëromo ë'adeje: Lazarus hu guomë'e hõjo. ¹⁴ Ëhuni Iesuro huruoho majëhiromo uëvadeje: Lazarus guomë'e hõjo. ¹⁵ Guomamu naehu bogo hu'o hijodohuni ëhuni jemesi jõëni nimorohajëjo ëhuro jemëro nasi muoho garomo mae uehorovo'irarijego. Rõhu ruehego no hesirire va'arëjo. ¹⁶ Ëhi uëvamu hegorovo Thomas hesi ihoho aehu uvaruoho Huodi'e Rahade Aho huro ijorajo ioro'ioroho uëvadeje: Go va'ohego no'o va'oromo Iesu'o gemu mae vuovo'irarëjo.

Iesuhu vuovë'e aribövi ajëmego i'ovoromo ri'õromo mae raromarue jö Iesuhu jövadohoje.

¹⁷ Ëhi'amu Iesuro va'oromo Bethany amore hörõ'irõgoro hejade uavavamu: Lazarus mami'e guomamu guavaroho majae ëhi niõ'i ëhi niõ'i barëjẽ'e hõjo. ¹⁸ Rõhu Bethany amoho Jerusalem bëhire jië'ëro 3 kilometre rabu'e jiadeje. ¹⁹ Ëhu'ëro Jew raje ae aho'obëhe jaburo Jerusalem jioromo Bethany rovë'ëro ë raromareje Martha'o Mary'o jabesi ma'inoho guomë'ëro huë vavaeni baejaruoho sanuëmirõhëro.

²⁰ Ëhi'amu Martha-ro hejade uvavamu: Iesu rovajëjamu hegorovo osare jioromo hörõromo Iesu biroho'i rovadeje. Rue'irõgoro Mary-ro ëhi osare hijadeje. ²¹ Hijamu Martha-ro rueromo Iesu birohoromo uavadeje: Bada ja ave hi'ibejanëjo nasi ma'inoho bogo guomo'ibejajo. ²² Nasi ma'inoho iae guomë'e hõjo. Rõhu jaruvohu'o God-hu diehi ajamijõro Iesu jaehu ua gavë'o ho iae ajami'ajëjo. ²³ Ajami'ajëjamu Iesuro uavadeje: Jasi ma'inoho

iae i'ovoromo ri'ö'a'ajëjo. ²⁴ Ri'ö'a'ajëjamu Martha-ro uavadeje: Iae na garomo uvajëjo: Ijo tugoho'i rueröhe majaho rue'iramu evare ae aho'obëhe i'ovoromo ri'öruomo'iramu hu'o ri'ö'a'ajëjo. ²⁵ Ri'ö'a'ajëjamu Iesuro uavadeje: Vuovoromo i'ovoromo ri'öromo mae raromo'irarije darugo hesi bëhoho na jevajëjo. Èhu'ëro ae rahu nasi örire mae uehorovevë'ohuro daruge baeromo mae raromo'aruëjo. Nani vuovo'ajëjo röhu iae i'ovëvo'ajëjo. ²⁶ Ae rahu i'ovoromo raromoromo nasi örire ma uehorovevë'oho bogo sisëroho va'i mae raromemu raromo'aruëjo. Na ja ë jöho mae uehorovanuëjo. ²⁷ Mae uehorovanuëjamu uavadeje: Bada io'ajo. Iae na mae uehorovoromo uvajëjo: Böröme namiromo ajamui'irane aho God-are Harihoho ja javajëjo. Ave sa'are rue'iranego God-hu uövuade aho ja javajëjo.

Iesuhu nivade jöhoje.

²⁸ Martha-ro Iesu ëhi uanugoromo va'adeje. Va'oromo osare va'o hesi öho Mary saginiëri uavadeje: Tisae rovë'e höjo. Rovë'ëro uvajëjo jero ruejöro. ²⁹ Ruejöro uvajëjamu hejë'i ma-burëro ri'öromo Iesu biroho'i va'adeje. ³⁰⁻³¹ Ma-burëro ri'öromo Iesu biroho'i va'amu gagorovo Jew raje Mary'o osare raromoromo sanuamijarohuro uvareje: Nani Lazarus-are sino bamarire nivo'i va'ajëromo rihromareje. Rihromamu Iesuro amo maroho bogo rue'i Martha-hu birohadire ë hij'ëro Mary-ro ë biroho'i rovadeje.

³² Rueromo Iesu garomo hesi bëhire ague aho hiromo uavadeje: Bada ja ave hi'ibejanëjo nasi ma'inoho bogo guomo'ibejajo. ³³ Èhi uaromo nivamu Jew raje hu'o gemu mae rovarohu'o nivoruomamu gëgorovo Iesuro hesi dë vövöbajo'o uhure hara'uoromo vavaenimo avohadeje. ³⁴ Vavaenimoromo uëvadeje: Jemë sinoho din'ë bamarije höjo. Bamarije höjamu uvareje: Bada rueromo gavëjo. ³⁵ Rueromo gavëjamu Iesuro nivadeje. ³⁶ Nivamu gagorovo rue Jew rajohuro uarovareje: Aroriaho gahëjo. Hu Lazarus-are örire hesi dë vövöbajo'ere bogo bisemuoho uehorovë'ëro ëhuni nivajëjo. ³⁷ Nivajëromo ae göëro göëro uvareje: Èahuro nuni sisë'e aho ajamamu marëjade höjo. Èhuni nani huro Lazarus mami'e ro ajami'ibejajo hu bogo guomo'ibejajo.

Iesuhu Lazarus ajamamu guomoromo i'ovoromo ri'öjade jöhoje.

³⁸ Èhi uarovamu hegorovo Iesuro röhu maho hara'uoromo vavaenimamu sino bamarire va'adeje. Va'oromo gavadeje juju gagoho munëro tugohë'e jiamu. ³⁹ Tugohë'e jiamu gagorovo uëvadeje: Munëho rori'o bava'ohëjo. Bava'ohëjamu guomë'e a hesi ma'ine Martha-ro uavadeje: Bada iae ëhi höjo röhu majae ëhi niö'i ëhi niö'i barëj'ëro ji'ëro usihövajëjo. ⁴⁰ Usihövajëjamu Iesuro uavadeje: Iae ëhi höjo röhu na mami'e uavode höjo: Jaehu mae uehorovë'oho God-are aji maho ga'a'anuëjo. Naehu uavode jöho na ja ëho uehorovanuëjo o bogajo. ⁴¹ Èhi uavamu hegorovo rueho jaburo munëho bava'areje. Bava'amu Iesuro sioroho garomo uavadeje: Apo naro jasi örire huë mae uavajëjo rabëni jero nasi jöho ejuhë'ego. ⁴² Iae na garomo uvajëjo: Jero majae ëhi ejehanue höjo. Röhu naro ave jöho uavajëjo arue aribövi jabesi jöëni ëhuro jaburo uvoruomoröhego: Iae mae-ëjo. God-ro nöro nugö'öjamu rovade höjo. ⁴³ Èhi uanugoromo ma-darugo'o uvadeje: Lazarus va'orahonö hörö rovëjo. ⁴⁴ Hörö rovëjamu guomamu bamare ahuro

i'ovoromo hesi övo hör'u'oho nu ano'oho niögëro muoho taemo'amë'e juju gagore jioromo hörö rovadeje. Rovamu gagorovo Iesuro uëvadeje: Niögoho jiovahohego va'ajo.

Jew rajo a masijehu Iesu ano'iro jö atare jöhoje.

⁴⁵ Ëhi'amu Jew raje ae aho'obëhe Mary ga'i rovarohuro gavare Iesuro Lazarus ëhi ajami'ego i'ovoromo ri'öjamu gagorovo hesi örire mae uehorovareje. ⁴⁶ A ioro'iorohuro bogo ma uehorovo'i va'oromo Pharisee aribövioho huruoho majëhiromu uëvareje: Iesuro ëhi jië'e muoho vaejade höjo. ⁴⁷ Ëhi majëhijamu hegorovo priest masijohu'o Pharisee ömo'ömohu'o ëho jaburo Jew rajo a masijo ioro'ioroho uëvareje: Gagovohego no jöe mevarëjo. Jöe mevarëromu gagovamu uëvareje: No ave a hesi öriroho diehi'o'ejarëjo. Huro darugo'e mu masijoho aho'obëhe vaejaje höjo. ⁴⁸ Ëhi jië'e mu masijoho vaemu vaejamu noehu bogo tugohë'oho ae aho'obëhe hesi örire mae uehorovoruomo'ajëjo. Mae uehorovo'iramu gagorovo Rome ariböviohuro rueromo nosi amo börömohu'o sa'ahu'o ijumavuo barë'ajëjo. ⁴⁹ Röhu ae gemu hesi ihoho Caiaphas hu jabu'o jiadeje. Evare vaduniroho hu priest böröme namijë'e jiadeje. Ëhuro ri'öromu uëvadeje: Jemë ave muoho bogo avo'avoho gavarujëjo. ⁵⁰ Jemë diehi'oromo bogo uehorovarujëjo ae gemuehu ae aho'obëhe noni guomë'oho ëhuro jemë marëjëvo'ajëjo. Ëhi jië'oho nosi sa'aho aho'obëhe bogo barëjavuo'ajëjo. Caiaphas-ro ëhi jövadeje. ⁵¹ Ëjöhö bogo hesi ëma jövo'irögoru evare vaduniroho hu priest börömëro jië'ëro ijonö jioröhe jöho God-ro bojamamu majëhijadeje. Majëhijade jö hesi bëhi huruoho majëhijë'oho Iesu guomo'a'ajëjo Jew raje aho'obëhe ajëmi'iröhëro. ⁵² Röhu bogo Jew rajo jabesi jöëni ëhemuoho guomo'i a'i guomoromo ëhuro God-are aboji harihu'e aho'obëhe dinö'e dinö'e raromaruoho gemuoro gagovo'iröhego Caiaphas-ro jö bëhoho bogo uehorovë'e ëhi ma-jövadeje. ⁵³ Iesu guomoröhe jöho ëhi atoromo evare majare aevoromo öroho nahoromo avohobe rovareje hu anoröhëro. ⁵⁴ Ëhi'amu Iesuro Judea sa'are va'orahore juvadoho vuonugo'i va'adeje. Va'oromo a rumo'e sa'a hesi bëhire amo ihe Ephraim ë va'oromo hesi ijorajo ömo'ömohu'o gemu mae hijadeje.

⁵⁵ Hijamu Jew rajo jabesi maja börömoho dunovadeje. Maja börömo hesi ihoho God-hu Vörö Tugohade hesi Majaho jiadeje. Ëmaja börömoho dunovamu ae aho'obëhe amo harihu harihure jioromo Jerusalem amo börömore iojio mareje Moses-are jögoroho ejahoromo jabesi sisëho avohorovo'i sörö majaho rovego avoho ue'ahoröhëni. ⁵⁶ Iojio moromo Iesu nahoromo God-are amo börömore gagovoromo uarovareje: Jemë diehi uehorovarujëjo. Na jemë uehorovarujöho Iesu sörö börömoroho rue'a'ajëjo o bogajo. Nani bogajo. ⁵⁷ Röhu mami'e priest masijohuro Pharisee ömo'ömohuro ae aho'obëhe jöe bojëmiromu uëvareje: Iesu dinö'e hijajoho ae rahu gavë'oho ro huruoho majahuirego no heromu va'oromo hu guduamo'irarëjo.

12

Magonaho göehu ridi'e oso baeromo Iesuare hörure otehodivade jöhoje.

¹ Ijonö majae aho'obêhe 6 barëjego God-hu Vörö Tugohade Sörö maja rue'iröhoho jiadeje. Rue'iröhoho jiamu evare Iesuro Bethany amore Lazarus-hu hijajire ë ajiomadeje. Lazarus guomamu Iesuhu ajamamu ri'öjade aho jiadeje. ² Amo Iesuro ë ajiomamu ariböviohuro i harihe avohoromo Iesu bojamijareje. Bojamiromom Martha-ro ajëmiromom ie i'imëmamu Lazarus-ro ie i'i Iesumë'o ro hijadeje. ³ Ëhi ro raromamu Mary-ro ridi'e osoho bisemu bövie barovadeje. Osoho bogo jovo'oho buarohë'e ma-oso maemu jiadeje. Hesi manaho bogo bise'o vadu'oho jiadeje. Ësoho Mary-ro barueromom Iesuare hörü döre otehodivomom simano uohuro höröho uhijahadeje. Uhijahamum ridohuro osae aho'obêhe rumorovo barëjadeje. ⁴ Rumorovo barëjamum Iesuare ijorajom öm'o'mohom ae gemum hesi ihe Judas Iscariot Iesuni hiruëmiromom a jabesi övore bojëmi'iröhe ahurum uëvadeje: ⁵ Ridi'e osoho rabëni bogom arohom imëvoromom 300 kina rabu'e baeromom bövi bise'o rumo'e aribövioh suvuorëmiijare höjom. Ëhi jië'ohom iae mae jio'ibejajom. ⁶ Ëhi uëvade hesi bëhohom Judas Iscariot-ro bövi bise'o rumo'e ariböviohuniöhom bogom uehorovoromom jövo'i a'i vajiohum u'e aërom jië'ërom ëhi jövadeje. Ëhesi bëhohom hurum Iesumesim moni'e esöhom muebenövadeje. Muebejë'i gö vajiohërom baenövadeje. Vajiohërom baenövë'ërom ëhu'ërom uëvadeje: Ridi'e osoho rabëni bogom arohom imëvoromom bövi bise'o rumo'e aribövioh suvuorëmiijare höjom. ⁷ Bövi bise'o rumo'e aribövioh suvuorëmiijare höjamum hegorovom Iesuro uavadeje: Bogavem magonahohom savaenohom bojamim'iranëjom. Hurum nimadem höjom osoho avohom mueberomom guomevegom otehodegoromom guavevo'iröhëni. ⁸ Bövi bise'o rumo'e aribövioh jemë'o jiemum jioruomom'i na bogom jemë'ohom hiemum hi'ejöjom. Ëhunim hum iae mae otehodegadem höjom.

Jew rajo priest masijehum Lazarus ano'i jö atarohojem.

⁹ Ëhi'amum Jew rajem ae aho'obêhe hejarem uvavamum: Iesuro Lazarus'om gemuore hijajë uvamum hegorovom rueruomadejem Iesum ga'irovom. Röhum bogom Iesum gemum ga'i rue'irögorom Lazarus'om ga'i rovarajem Iesuro ajamamum i'ovë'ërom jië'ërom. ¹⁰ Lazarus ga'i rueruomadem jöhom hegorom priest masijohurum jöem mevoromom uarovarajem: Ë'egom Lazarus'om ano'irarëjom. ¹¹ Lazarus ano'i atarem hesi bëhohom Jew rajem ae aho'obêhe uvarajem: Iesuro Lazarus mabêhem ajamijadem hörömom priest masijom jabesim jöhom vuonugom'i Iesum mae uehorovarajem. Ëhunim ano'i atarajem.

Iesuhum Jerusalem mae rovamum gavë'i aehum mabêhem rajahiruomadem jöhojem.

¹² Ëhi'amum nërö sörö i'i rovarem aribövioh aho'obêhe hejarem uvavamum: Iesum Jerusalem rojomajëjom. ¹³ Rojomajëjamum hegorovom ijom rude ujuohoromom Iesum birohom'irögorom uvobem va'oromom uvoruomadem: God mabëhëjom.

Ave aho Badarem ihorem rovajohom mabëhëjom.

Israel rajom nosim böromohom mabëhëjom.

¹⁴ Ëhi uvoruomamum Iesuro donkey harihem baeromom hesim dörëm ajio hijadejem. Donkey dörëm hijegom Jerusalem amom rajehum garuomom'iröhem jöhom mami'e God-arem surirem jajivoromom uvë'ejem:

¹⁵ Zion rajomë nadem juhuonivo'i aruehom gahëjom.

Jemesim böromohurum donkey harihum dörëm hiruom rovajëjom.

Ëhi jajivë'eje. Röhu mami'e God-are surire jajivadëhi Iesuro ëhi ë'adeje. ¹⁶ Urimoho Iesuare ijorajo ömo'ömohuro ë surire jö hesi bëhoho bogo avoho uehorovareje. Röhu ijönö Iesuro döre ajiomoromo aje baeromo böröme namijamu evare ë jöho uehorovoromo uvareje: Iae mae-ëjo. Iesuare jö God-are surire jajivarëhi no hesi örire ëhi vaejahare höjo.

¹⁷ Röhu ae aho'obëhe Iesu biroho'i rueruomade hesi bëhoho urimë'i Lazarus guomamu Iesuro huni uvamu i'ovoromo munë gagore jioromo hörö rovamu evare ae aho'obëhe Iesu'o raromoromo ë muoho gavareje. Gavë'ëro ë jöho majëhibe jijihareje. ¹⁸ Ëbëhi'e mu börömo hesi jöho majëhijamu hejë'ëro ëhuni ae aho'obëhe Iesu biroho'i rueruomadeje. ¹⁹ Iesu biroho'i rueruomamu gëgorovo Pharisee ariböviohuro uarovareje: Jemë'o gahëjo. Ëa hesi mu tugohë'o bogo eni javuo hesi höjo. Iae ae aho'obëhe mae hu gemu uehorovoromo hesi ijore ijore jijihoruomajëjo.

Greece sa'a rajo a ioro'iorehu Iesu ga'i nimoruomade jöhoje.

²⁰ Ëhi'amu ae aho'obëhe Jerusalem rojomamu Greece raje ae gö gö jabu'o rojomareje sörö majaho rovego God rajahi'iröhëro. ²¹ Rojomoromo Philip ga'i rovarëje. Philip hu Galilee sa'a raje Bethsaida amo raje jiadeje. Jaburo Philip ga'i rueromo uavareje: No naguajëjo Iesu ga'irovo. ²² Ëhi uavamu hegorovo Philip-ro va'oromo Andrew uanugoromo jaburo niö'iro va'oromo ë jöho Iesu majahijareje. ²³ Majahijamu Iesuro uëvadeje: God-are A Ma nasi iho döre jioröhe majaho iae rovë'e höjo. ²⁴ Ave naehu ë'irode jöho uhu'e majëhi'ië'ajëjo. Ëhesi bëhoho iae jö mae ma-gemuohemu höjo. I ujo gemu sa'are beruvebiromomo sisërë'ajëjo. Sisërëjë'ëro ëhu'ëro tögömoromo ëgovoromo baje aho'o rae'amo'ajëjo. Bogo sisërë'ibejajo ëhi ma-gemu jio'ibejajo. Sisërëjë'ohuro ëhuro bogo sivuoho jio'i aho'o jio'amo'ajëjo. Na ëhi sisërëjevo'iramu ëhuro ae aho'o gemuore jio'a'ajëjo. ²⁵ Ae rahu jabesi sinohemu uehorovë'o bogo ijumorovarue höjo. O ave sa'are raromoromo sinehu nimaje mu bogo uehorovë'o bogo ëhuro ioro'ioere gemu raromo'aruëjo. ²⁶ Ae rahu nasi mu vae'i nimë'o bogo nasi ijore ijore jijih'o'aruëjo. Na dinö'e hijë'iroho nasi mu aribövioho jabu'o ë raromonövo'aruëjo. Ae rahu nasi mu vaejehë'o bogo nasi Vavuohuro jabesi ihoho döre bamo'ajëjo.

Iesu guomoröhe jö huhu jövdohoje.

²⁷ Avejë'o bogo na dë vövöbajo'ere vavaenegavajëjo. Ëhuni na diehi ua'ejöjo. Na na ua'ejöjo: Apajo. Ave vavaeni maja rueröhoho tugöhego bogo bae'iröjo. Bogajo. Na bogo ëhioho ua'ejöjo rabëni na ë vavaenoho bae'i rovë'ëro. ²⁸ Ëhuni bogo tugoho jöho ua'irögoro a'i ua'ejöjo: Apo jasi aji'e muoho röjëhijego aëro garomo uvarëjo: Jasi ihoho böröme höjo. Jasi ihoho böröme hö uanugoromo hejadeje ö'idöre uvavamu: Na mami'e nasi aji'e muoho röjëhijë'e jevajëjo. Röhu maho röjëhi'ejöjo aëro uvoruomoröhego: God nasi ihoho böröme höjo.

²⁹ Ëhi uvavamu hegorovo ae aho'obëhe bëhire riravarohuro a ioro'iorohuro uvareje: Varurëro anavohijajo. A ioro'iorohuro uvareje: O aneraëro Iesu jöe majahiromomo uvavohijajo. ³⁰ Ëhi atoruumamu hegorovo Iesuro uëvadeje: Ejö uvavamu hejarijoho bogo nasi jöënioho

uvo'i jemesi jöëni uvade höjo. ³¹ Jaruvoho ave sa'are mu sisë vaeruo-
maje aribövioho God-ro mevévo'irögoro ë'ajëjo. Jaruvoho ave sa'are
mu sisë simano vaejaje aho God-ro ruahö'ö'irögoro ë'ajëjo. ³² Na
sa'are jevajoho aehu banigojiomevë'ocho evare naro ae aho'obëhe
rinëgo'iramu nasinö rueruomo'ajëjo. ³³ Aehu hu banigojiomo'iröhe
jö majëhijadoho huro uëromo ë'adeje: Aëro ëhi korosire banigo-
jiomevo'iramu guomo'ejöjo. ³⁴ Ehi uëvamu hegoro rue ariböviohuro
uaruomadeje: Guomo'irane jö uövuanuoho röhu no hejë'e javuajëjo
nosi jögoru surire adahoromo uövuamu: Böröme namiromo aja-
mui'iröhe aho nosirire rovë'iroho hu bogo guomo'i ma-ioro'ioerumu
hi'a'ajëjo. Ehi jië'ocho ja diehi uöromo ë'anuëjo: Aëro God-are A Maho
na banigojiomevo'aruëjo. God-are A Maho ja diehi jië'e aëro javë'ëro ja
guomo'i uvanuëjo. ³⁵ Guomo'i uvanuëjamu hegorovo Iesuro uëvadeje:
Ajoho naro majae ma-bunemu jemë'o hiromo ajivëvo'ejöjo. Jemë'o
hiromo ajivëvego ajiro jijihorëjo ehuro bogo ramoramovëvo'iröhe höjo.
Ramoramore jijihë'ocho öroho sidövëvo'ajëjo. ³⁶ Ehi jië'e jiaje aji
naehu jemë'o hijajevero evaro ajoho na mae uehorovevorëjo. Mae
uehorovevë'ocho aji'e aribövie jëvo'ajëjo.

Jew rajo ariböviehu Iesu bogo ma uehorovare jöhoje.

Ehi uënugoromo va'adeje. Va'oromo gurihirovoromo dirö'o göro
hijadeje jaburo gajöëni. Ehi'adeje. ³⁷ Urimo Iesuro Jew rajohu'o
hiromo bëhi'e mu masije aho'obëhe jabesi nunire vaebe rovadeje. Röhu
jabumëro hesi öriroho bogo maho uehorovareje. ³⁸ Ehesi bëhoho jö God-
aro baeromo majëhinövade ae Isaiah-hu maminö gö'e jajivadëhi ëhi
jioröhego ehuni Iesu bijönimareje. Isaiah-ro God-are surire jajivoromo
uvadeje:

Bada rahuro nosi jöho mae uehorovë'e höjo.

Badare darugo'e mu hesi bëhoho rahuro avoho gavë'e höjo.

Isaiah-ro ëhi jajivadeje ijönö jioröhego. Huhu jajivadëhi jaburo ëhi
ë'oromo Iesu bogo ma uehorovareje. ³⁹ Iesu mae uehorovo'iröhoho
bogo eni jëvadeje. Bogo eni jëvade hesi bëhoho Isaiah-ro ave jöhu'o
surire uhunö'e jajivadeje. Jajivoromo uvadeje:

⁴⁰ God-ro uvajëjo: Naro jabesi nunoho tugohëhoromo

uehoroho ijumëhë'e jevajëjo

ehuro nunoho ramoramovëvoromo uehoroho bogojëvoröhego.

Uehoroho bogojëvego bogo huotorovoromo nasi öriroho bogo rovego
naro bogo i'ovëvego bogo mae jëvoröhego.

⁴¹ Isaiah-hu ëhi jajivade hesi bëhoho huro uehore God-aro baeromo
Iesuhu baeröhe ajoho garomo huhu vaeröhe jöho jövadeje. ⁴² Iae
a ioro'ioroho Iesu bogo ma uehorovareje röhu a ioro'ioroho aho'o
Jew rajo a masijo ioro'iorohu'o iae hu mae uehorovareje. Mae
uehorovoromo röhu uvareje: Pharisee ömo'ömhuro uö'a'aruëjo: Iesu
mae uehorovarujohuni God rajahjarue osaroho nadi ijoroho ruere
uö'a'aruëromo ehuni Pharisee juhuonëmiromo Iesu mae uehorovare
jöho subivëhareje. ⁴³ Uvareje: God-hu no rajahui'iröhoho ëho ma-
jianovo'i aehu no rajahuijaruoho iae mae höjo.

Iesuhu majëhijade jö bijönimë'ohuro sisëro va'iröhe jöhoje.

⁴⁴ Iae Iesuro ma-darugo'o uvadeje: Ae rahu na mae uehorovevè'oho bogo nasi öriroho gemu uehorovevo'i sa'are remö'øjade ahu'o mae uehorovarue höjo. ⁴⁵ Ae rahu na gevè'oho sa'are na remö'øjade ahu'o gavarue höjo. ⁴⁶ Naro sa'are rovè'ero aho'o ajivèvaje höjo èhuro ae rahu na mae uehorovevè'oho è aribövioho bogo ramoramoroho raromoröhego. ⁴⁷ O ae rahu nasi jö heromo bogo ejehè'oho na bogo jabesi jöho mevoromo sisèroho bamèvo'ejöjo. Sa'ae aho'o bogo sisèroho bamèvo'i maro bamèvo'i rovode höjo. ⁴⁸ Röhu na'o nasi jöhu'o bijönimè'oho sisère va'iröhe bëhoho iae jiajèjo. Bëhoho èho naehu majèhibe rovode jöho höjo. Hujeji ijo tugoho'i majaho rue'iramu è jöho bijönimè'ero èhu'ero sisèro va'a'aruèjo. ⁴⁹ Rabèni hesi bëhoho naehu majèhibe rovode jöho bogo nasi èma jövo'i Vavue sa'are remö'øjadhuro jöho bojemijade höjo naro èhuremu jövo'irodego. ⁵⁰ Röhu naro garomo uvaje höjo: God-hu bojemijade jö aehu ejahè'ohuro èhuro maiorio'ioremu maro raromarue höjo. Èhu'ero jiè'ero naehu jövaje jöho Vavuehu uevadèhi iae èhi gemuoho höjo.

13

Iesuhu hesi ijorajo ömo'ömo jabesi hörü hitahi u'ovèhade jöhoje.

¹ Iae God-hu Vörö Tugohade Sörö majaho nèrèhi jio hesi jiadeje. Nèrèhi jio hesi jiamu Iesuro garomo uvadeje: Naehu sa'a nugo'i Vavu hesi örire va'irode majaho iae rovè'e höjo. Röhu hesi aribövi maho ave sa'are raromaruoho mami'e dè vövöbajole aho'o uehorovèvobe rovodoho bogo vuonugo'i uehorovèvobe va'adeje èhi ma-guomorohego.

² Iae Satan-ro mami'e Simon Iscariot-are harihe Judas-are simanoho ijumahadeje huro Iesu bijönimarue a jabesi övore bojèmi'iröhego. Èhi jiè'ero Iesu'o hesi ijorajoho jabu'o raromoro i harihe ue'ahareje.

³ Ie ue'ahoromo Iesuro garomo uvadeje: Vavuohuro daruge aho'obèhe nasi övoro bamehè'e höjo. Na God-arire jioromo rovodoho hesi örire vuonorö'ö va'ejöjo. ⁴ Hesi örire vuonorö'ö va'ejöromo Iesuro ie ijè'ero ri'öromo döre niögoho jijöromo uhirovarue niögoho dè'ahore muohorovadeje. ⁵ Muohorovoromo jovoho hevöre otehoromo aevoromo hesi ijorajo jabesi höroho eguehoromo muohorovade niögoho baeromo höroho uhijèhadeje. ⁶ Èhi'obe va'oromo Simon Peter-hu hijajire rovadeje. Rovamu uavadeje: Bada na ja nasi hörohu'o eguehonèjo. ⁷ Eguehonèjamu uavadeje: Naehu ömaje hesi bëhoho jaruvoho ja bogo gavanuèjo. U'emu ga'a'anuèjo. ⁸ Ga'a'anuèjamu hegorovo Peter-ro uavadeje: Nasi höroho bogo egueho'anuèjo. Bogo mae bogajo. Bogajamu uavadeje: Naehu jasi hörü bogo eguahè'oho ijönöho ja bogo nasi ae gemuoho javo'ajèjo. ⁹ Javo'ajèjamu hegorovo Simon Peter-ro uavadeje: Èhi jiè'e jiaje nadi höremuoho egueho'i a'i övohu'o simanohu'o èhu'o eguehèjo. ¹⁰ Eguehèjamu Iesuro uavadeje: Rabèni övoho simanoho eguahojörajo. Bëhoho bogohöjo. Ae rahu jabesi sino haho'o jovo eguoromo u'o barèjè'oho röhu maho bogo eguoromo'i jabesi hörohemu eguonövo'aruèjo. Röhu jemesi sisèho mami'e u'ovèhè'ero mae jèvajèjo. Mae jèvo'i sisèho jemesi ae gemu hesiriremu höjo. ¹¹ Iesuhu èhi uèvade hesi bëhoho huro garomo uvadeje: Judas-ro na bijönegarue a jabesi övore bojèmi'ajèjo. Èhuni uèvadeje: Jemè mae jèvo'i sisèho jemesi ae gemu hesiriremu höjo.

¹² Ĕhi uĕromo ijorajo jabesi hĕroho eguĕhonugoromo niĕgu jjiĕ bamadoho rĕhu maho ba'amoromo va'lo hesi rĕhore hinugoromo uĕvadeje: Naehu jemesi ĕrire ĕmode mu hesi bĕhoho na jemĕ gavarujĕjo o bogajo. ¹³ Bĕhoho iae na majĕhi'iĕ'ajĕjo. Jemĕro uevaruje hĕjo: Tisajo o Badaĕjo. Iae mae uevaruje hĕjo na ĕhi jevĕ'ego. ¹⁴ Na jemesi Bada'lo Tisa'lo jevajĕjo rĕhu na bogo uvode hĕjo: Bĕviĕro jevĕ'ĕro hĕroho bogo eguĕho'ejĕ uvo'li ma-eguĕhode hĕjo. Ĕhuni jemĕ'o nadi bĕvie javuajĕ uvo'li gĕĕro gĕho huĕ baerovoromo hĕroho eguahorovorĕjo. ¹⁵ Ĕhesi bĕhoho naro mu mae rĕjĕhijĕ'e jevajĕjo ĕhuro naehu jemĕ ajĕmijodĕhi jemĕ'o ĕhi huĕ baerovoromo ajamirovo'irarijĕjo. ¹⁶ Ave jĕho na jĕ mae uĕ'iĕ'ajĕjo. Mu aribĕviohuro o anue jijiharue aribĕviohuro jabesi a bĕrĕmoho bogo iosiramiro mo masije riravarue hĕjo. ¹⁷ Ĕjĕho mae jio'ego jemĕ iae gavarujĕjo. Ĕhuni nadi na iosiremiromo uvorĕjo: No masijĕro javuĕ'ĕro aho bogo ajĕmi'ĕjarĕ uvo'li ma-ajamirovorĕjo. Ĕhi ĕ'lĕ'oĕo huĕ mae jĕvo'ajĕjo.

¹⁸ Huĕ mae jĕvo'ajĕ uĕvaje jĕho ĕho bogo ae aho'obĕhe jemesi jĕho uĕromo ĕ'ajĕjo. Jemĕ diehi jĕ'e aribĕvie baejĕvodoho iae na gĕvaje hĕjo. Mami'e God-are surire jĕho jajivoromo uvĕ'e hĕjo: Na'lo gemu mae i ijajohuro huotorovoromo na'lo muorovo'li nimade hĕjo. Ĕhi jiorĕhego God-are surire jajivadĕhi iae ĕhi jĕ'e mu sisĕho jio'a'ajĕjo God-are surire jĕho bogo bejajĕro jĕ'ĕro. ¹⁹ Ĕmu sisĕho bogo vejĕ'oĕo jio'li u'emu jio'a'ajĕjo. Rĕhu aviavejĕ'e uĕvajĕjo jemĕro ga'irarijĕjo ĕ mu sisĕho rovego garomo uvo'irarijĕjo: Iae mae-ĕjo. Nĕrĕ jĕmu jiaje A Bĕrĕmoho hĕjo. ²⁰ Rĕhu ave jĕho na jĕ mae uĕ'iĕ'ajĕjo. Naehu rĕmĕ'oĕjĕgo rovarue aribĕvioĕo ae rahuĕ ĕ aribĕvi rajĕhiromo baejĕvĕ'oĕo ĕhuro na'lo rajehiromo baejevorumaje hĕjo. O ae rahu na rajehiromo baejĕvĕ'oĕo ĕhuro rĕmĕ'oĕjamu rovode ahu'lo rajahiruomaje hĕjo.

Judas-hu Iesu bijĕnimarue a jabesi ĕvore bojĕmi'trĕhe jĕ Iesuĕu jĕvadohoje.

²¹ Ĕhi uĕromo hesi dĕ vĕvĕbajo'ere huĕ vavaene bĕrĕme baejadeje. Huĕ vavaene bĕrĕme baeromo ma-sama'e majĕhiromo uĕvadeje: Ave jĕho na jĕ mae uĕ'iĕ'ajĕjo. Jemesirire jiaje ae gemuĕro na bijĕnegarue aribĕvi jabesi ĕvore bojĕmi'anuĕjo. ²² Ĕhi uĕvamu hegorovo hesi ijorajoho jaburo nuniro garoro garoro baeromo uvareje: Rahuare jĕho uĕromo ĕ'ajĕjo. ²³ Rĕhu Iesuare ijoraje ae gemuĕro Iesuare bĕhi mare hijĕ'e jiadeje. Iesuro ĕ aho hesi dĕ vĕvĕbajo'e aho'lo rajahinĕvadeje. ²⁴ Ĕaho Iesuare bĕhire hijĕ'e jĕamu Simon Peter-ro ĕ a hesi ĕrire uvenĕro uavadeje: Ua gavĕjo: Rahuare jĕho uĕromo ĕ'anuĕjo. ²⁵ Uĕromo ĕ'anuĕjamu ĕ ijorajohuro Iesu hia'iro saginiĕri uavadeje: Bada ja rahuare jĕe uĕromo ĕ'anuĕjo. ²⁶ Uĕromo ĕ'anuĕjamu Iesuro uavadeje: Naro ioho baeromo ijo bajo nesarire ba'amoromo ioromo ae gemu bojami'ejĕjo. Bojamijĕgo garomo uvonĕjo: Iae ĕ ahuro ĕhi sisĕ vaejevo'ajĕjo. Ĕhi uanugoromo ie gemu baeromo ba'amoromo ioromo Simon Iscariot-are hariĕho Judas bojamijadeje. ²⁷ Bojamamu Judas-ro baeromo ijamu gavĕ'li Satan-ro ĕ a hesi dĕ vĕvĕbajo'ere abuejadeje. Abuejamu Iesuro uavadeje: Jaehu vae'li ĕ'anue muoĕo maburĕro va'oromo vaejĕjo. ²⁸ Vaejĕjamu hegorovo raromoro mo i jarue aribĕviohuro bĕhoho rabĕni Iesuĕu Judas ĕhi uavajoho bogo avoĕo

hejareje. ²⁹ Bogo avoho he'irögoro a ioro'iorohuro uvareje: Judas-ro moni bahijaruoho muebejajego ehuni nani Iesuro uaromo ë'ajëjo: Va'oromo söröeni ie imahuëjo. O va'oromo inömo rumo'e aribövioho monioho gö suvuorëmijëjo. Ehuni uaromo ë'ajëjo. ³⁰ Röhu Judas-ro Iesuhu bojamijade ioho baeromo ma-burëro höröromo ramoramore va'adeje.

Göehu gö rajahirovo'iröhe jö i'ohoje.

³¹ Judas va'amu gagorovo Iesuro uëvadeje: Avevejö'oho God-are A Ma nasi aji'e muoho röjëhijë'e höjo. God-ro daruge bojëmijë'ëro hesi aji'e muohu'o röjëhijë'e jevajëjo. ³² Naro God-are ajoho ae röjëhi'iramu evare God-ro hesi A Ma nasi ihoho banigojiomeho'ajëjo. Hu ma-burëro iae ëhi ë'ië'ajëjo. ³³ Nasi harihu ömo'ömohumë na jemë'oho majae ma-bunemu hi'ejöjo. Hiromu va'iramu nahevo'arujëjo. Röhu Jew rajo masijo mami'e uëvodëhi jemë'o ëhi uë'ië'ajëjo: Naehu va'irodire jemë ë ö'irarijoho bogo eni jëvajëjo. ³⁴ Röhu jögoru i'e bojëmi'ië'ajëjo. Göëro göho rajahirovorëjo. Naehu jemë rajëhibe rovodëhi jemë'o ëhi gemuoho ë'orëjo. ³⁵ Jemë rajahirovë'oho ehuro ae aho'obëhe göromu uvoruomo'ajëjo: Jemë nöruare ijore ijore jijiharuje aribövie jëvajëjo.

Peter-hu Iesu gavajoho subivëho'iröhe jö Iesuhu jövadohoje.

³⁶ Ehni uëvamu Simon Peter-ro uavadeje: Bada röhu ja dinö'e va'onëjo. Dinö'e va'onëjamu uavadeje: Naehu va'irodire avevejö'e ë ö'iranoho bogo eni javajëjo. U'emu ö'a'anuëjo. ³⁷ Ö'a'anuëjamu hegorovo Peter-ro uavadeje: Bada röhu avevejö'e naehu jasi ijore ö'ë'oho rabëro bogo eni jëvajëjo. Naehu ajamiromo jani guomevë'oho iae mae höjo. ³⁸ Iae mae höjamu Iesuro uavadeje: Peter jero uvanuëjo: Naro nöro ajamiromo guomorovo'ejöjo. Röhu ave jöho na jö mae ua'ië'ajëjo. Kökörökoho bogo uvë'e jero majae niö'i gemu ae uë'a'anuëjo: Na Iesu bogo gavaje höjo.

14

Vavu hesirire va'arue öroho Iesu jiaje jö Iesuhu jövadohoje.

¹ Iae Iesuro hesi ijorajo ömo'ömoho uëvadeje: Nadi nurunurumoromo uehore gö gö bae'i a'i God-are öroro mae uehorovoromo nasi örohu'o ehuh'o mae uehorovorëjo. ² Ehësi bëhoho nasi Vavu hesi osare röhoho aho'obëhe jio'amajëjo. Ehuni na ë va'oromo jemëhu raromo'irarije röhoho avohëho'ejöjo. Naehu jövaje jöho bogo maehu jio'ibejajo bogo uë'ibejöjo. ³ Va'oromo jemesi röhoho avohëhonugoromo vuonorö'ö rueromo söjëvoromo nasirëro va'ejöjo ehuro naehu hijajire jemë'o ë raromo'irarijogo. ⁴ Naehu va'oromo hi'irode öroho jemë iae gavaruje höjo. ⁵ Gavaruje höjamu Thomas-ro uavadeje: Bada jero ëhi uövuanuëjo röhu jaehu dinö'e va'o hi'iranoho no bogo gavaruëjo. Ehni jië'oho ja diehi'oromo uövuanuëjo: Öroho iae gavaruje höjo. ⁶ Gavaruje höjamu Iesuro uavadeje: Mare va'irarije öroho na jëvajëjo. Jö ma ga'irarije öroho na jëvajëjo. Darugo bae'irarije öroho na jëvajëjo. Vavuohu'o gemu mae jëvojöro nëgë'iroho öroho na gemu jëvajëjo. ⁷ Jemë na gevë'e jëvë'ëro nasi Vavuohu'o ga'a'arujëjo. Jaruvoho aevoromo jemë ë A hesi bëhoho uehore baeromo gabe va'a'arujëjo.

⁸ Gabe va'a'arujëjumu Philip-ro uavadeje: Vavuoho røjahuijego no gavarëjo. Gavë'oho ëhuro no mae javuo'ajëjo. ⁹ Mae javuo'ajëjumu uavadeje: Philip na majae ëgobövie jemë'o hijë'e jevajëjo. Ëhu'oho ja diehi'oromo bogo avoho gevanuëjo. Ae rahu na gevë'oho nasi Vavuohu'o garuomaje höjo. Ëhu'oho ja diehi'oromo uevanuëjo: Vavuoho røjahuijego no gavarëjo. ¹⁰ Ja diehi'oromo bogo uehorovoromo uvanuëjo: Nöröro Vavu hesi dë vövöbajo'ere jio'i Vavuohuro nöruare dë vövöbajo'ere jiajëjo. Naehu jemë uëvaje jöho bogo nasi ëma uehorovoromo uë'i a'i Vavue nasi dë vövöbajo'ere hijajohuro huro hesi muoho nasi dë vövöbajo'ere vaejego na vaejaje höjo. ¹¹ Na uëvode höjo: Naro Vavu hesi dë vövöbajo'ere jio'i Vavuohuro nasi dë vövöbajo'ere jiajëjo. Ëjöhö heromo uvorëjo: Iae mae-ëjo. O jemë uvë'oho: Nöruare jöho bogo eni hö uvë'oho naehu vaejaje mu masijoho uehorovoromo uvorëjo: Nöruare jöho mae höjo. ¹² Ave jöho na jö mae uë'ië'ajëjo. Ae rahu na mae uehorovevë'oho naehu vaejajëhi jië'e darugo'e muoho vae'a'arujëjo. Röhu naehu vaejaje darugo'e muoho ma-jianovajoho u'emu jemëro darugo'e mu masijo maho vae'a'arujëjo rabëni naro Vavu hesi örire va'iramu. ¹³ O jemë rabe rabe Vavuoho nasi ihore ua gavë'oho naro ëhi vaejëho'ejöjo ëhuro Harihu nasi muoho garomo uvo'irarijego: Vavuoho böröme höjo. ¹⁴ No nöruare aribövie javuajë uvoromo rabe rabe ue gevë'oho iae na vaejëho'ejöjo.

God-hu hesi Aru'aho mëmi'iröhe jö Iesuhu jövodohoje.

¹⁵ Jemë na rajehijë'ohuro nasi jögoroho ejeho'arujëjo. ¹⁶ Ejeho'iramu naro Vavuoho ua'iramu Ajëminövo'iröhe A göho bojëmi'ajëjo huro rueromo jemë'o ma-ioro'ioremu hi'iröhego. ¹⁷ Ajëminövo'iröhe Aho iae jö maemu barovaje Aru'ahoho höjo. Sa'arohemu uehorovarue ariböviohuro ë Aru'ahoho bogo uehorovoromo simanoho bogo avoho gavaruëro jië'ëro ëhuni bae'iröhoho bogo eni jëvajëjo. A'i jemëro hu avoho gavaruje höjo. Avevejö'e hu jemë'o hijajoho u'emu jemesi dëre abo hibe va'a'ajëjo. Iae ëhuni jemë gavaruje höjo.

¹⁸ Naro jemë rëmo va'iramu jemë bogo sivuoho öbioho raromanovo'arujëjo. A'iro na vuonorö'öromo jemesirire rue'ejöjo. ¹⁹ Majae ma-bunemu barë'iramu sa'arohemu uehorovarue ariböviohuro bogo geruomö'ajëjo. Röhu jemëro iae ge'a'arujëjo. Na hiemu hijajohuro ëhuro jemë'o daruge baeromo raromö'arujëjo. ²⁰ Ëho majaho rue'iramu jemë garomo uvo'a'arujëjo: Nörö hesi Vavu hesi dë vövöbajo'ere jio'i no nöruare dë vövöbajo'ere javuoi' no nörö nosi dë vövöbajo'ere jiajëjo.

²¹ Ae rahu nasi jögoru baeromo ejehë'oho ëhi jië'e ariböviohuro rajehiruomaje höjo. Rajehijë'oho nasi Vavuohuro jabumë rajëhi'ajëjo. Rajëhi'iramu na'o ë aribövioho rajëhiromo va'orahoro røjahirovo'ejöjo geruomoröhego. ²² Ëhi uëvamu Judas-ro bogo Judas Iscariot a'i Judas göhuro Iesu uavadeje: Bada ja diehi'oromo nosi örire gemu jasi arijo'arije røjahirovo'i sa'arohemu uehorovarue aribövi jabesi öriroho bogo røjahirovo'ië'anuëjo. ²³ Bogo røjahirovo'ië'anuëjumu uavadeje: Ae rahu na rajehijë'oho ë ariböviohuro nasi jöho ejehoruomö'ajëjo. Ejeho'iramu nasi Vavuohuro jabumë rajëhiromo hu'o na'o ö'oromo jabu'o gemu mae ari'ëjarëjo. ²⁴ O ae rahu bogo rajehijë'oho nasi jöho

bogo ejehoruomaje hōjo. Jemē hejaruje jōho bogo nasirehu jio'i a'i Vavuehu remō'ōjamu rovode a hesi jōho hōjo.

²⁵ Na jemē'o hijē'i ē jōho majēhijē'e jevajējo. ²⁶ O Vavuohuro jemē Ajēminōvo'irōhe Aho ē hesi bēhoho Vavu hesi Aru'ahoho nasi ihore nugō'ō'iramu huro jemē bōvioho bise'oho rōjēhiromo simanoho huotovēho'iramu naehu majēhijode jōho uehorovo barē'arujējo.

²⁷ Nasi huē maho jemesi ōrire bojēmijajējo rēmo va'iē'ero. Sa'arohemu uehorovarue aribōviehu huē ma bojēmijaruēhioho na bogo ēhioho bojēmi'i uohu'o bojēmijajējo. Nadi nurunurumoromo juhuonivorējo. ²⁸ Mami'e jemē hejarije hōjo naro uēvamu: Na va'ejōjo. Rōhu na vuonorō'ōromo jemesirire rue'ejōjo. Jemē na avoho rajehi'ibejarijējo nasi Vavu hesirire va'irode jōho heromo nimoroho'ibejarijējo Vavuehu na iosiremiromo bōrōmo jiajohuni. ²⁹ Avevejō'oho ē muoho bogo vaejē'e rōhu urimo na ma-majēhijē'e jevajējo ēhi'ego garomo evare mae uehorovo'irarijego. ³⁰ Rōhu na bogo majae ēgō'oho jemē jōho majēhi'ejōjo ave sa'are Sisē A Bōrōmoho rue'ego ēhunivo. Rōhu hu bogo nasi bōvioho jiē'ero hu jōho bogohōjo. ³¹ Rōhu na nege sa'ae aho'o jaburo garomo uvoruomorōhego: Nōrōro Vavuoho iae rajahiromo Vavuehu jō bojamjadēhi nōrōro ēhi ē'aje hōjo. Ahia mino'ējo. Ri'ōhego no va'arējo.

15

Iesu grape bajo rae'amaje ō'i mae jiaje uhu jō Iesuhu jōvadohoje.

¹ Iae Iesuro hesi ijorajo ōmo'ōmoho jō viture uhu'e uēvadeje: Grape bajo rae avohaje ō'oho na jevajējo. Ō'i muebejaje aho nasi Vavuoho hōjo. ² Na'o bimuvaruje aribōvioho ēho ō'i ado sirino'oho jio'amajējo. Ō'i muebejaje ahuro garōhe di adoho bajoho bogo rae'amamu gavē'oho duvahore tarivoromo ruruhō'ōjaje hōjo. O garōhe di adoho bajoho raejamu gavē'oho iogororomo sirino sirino harihu sahori'amē'oho tarivo ruruhō'ō'i mahemu nugaje hōjo ēhuro ē adohuro bajoho rae avohorōhego. ³ Rōhu naehu majēhijode jōho ejehē'ero ēhuro jemē adonō'e mami'e iogorēv'e hōjo. ⁴ Rōhu jemē na'o gemuore bimuvoromo raromarujohe ēhi raromorējo. O naro jemē'o gemuore bimuvoromo hijajoho ēhi hi'ejōjo. Jemēhu na'o bogo gemuore bimuvoromo raromē'oho bogo rae avoho hesi jēvajējo. Ō'i adehu aho najore bogo bimuvē'ero sisērōromo bajo bogo ma raejajēhi ēhi jēvo'ajējo.

⁵ Ō'i bēhoho na jevo'i jemē ado sirino'oho jēvajējo. Ae rahu na'o gemuore bimuvoromo raromō'i naehu jemē'o gemuore bimuvoromo hijē'ohuro ēhuro rae avoho'arujējo. O na'o gemuore bogo bimuvē'oho i'o mu'o vaejē'oho bogo mae bogo eni jēvo'ajējo. ⁶ Ae rahu na'o bogo gemuore bimuvoromo raromē'oho ado suaromo ruruhō'ōjego sisērējajēhi ēhi jēvo'ajējo. Ēhi jiē'e adoho gagovoromo vēnire huego ravo'amaje hōjo. ⁷ Rōhu jemē na'o gemuore bimuvoromo raromē'oho o nasi jō jemesi dē vōvōbajo'ere jiē'oho ēhuro jemē rabe rabe God ua ga'i nēgē'oho uarējo. Ua gavē'oho iae bae'a'arujējo. ⁸ Jemē bajo rae avohē'ohuro ēhuro nasi Vavu hesi ihoho dōro jiaje hōjo. O bajo rae avohē'ohuro ēhuro nasi ijore ijore jijiharuje aribōvi mae jēvo'ajējo. ⁹ Iae Vavuehu na rajehijadēhi naro ēhi jemē rajēhijē'e jevajējo. Naro ēhi rajēhijē'e jevaje ēhuni na'o gemu mae ēhi raromorego na rajēhiemu

rajëhinövo'iröjo. ¹⁰ Jemëhu nasi jögoru ejehë'oho ëhuro na'o gemu mae raromo'iramu ëhuro na rajëhinövo'ejöjo. Naehu nasi Vavu hesi jögoru ejahë'ëro hu'o hijego huhu rajehijajëhi jemëro ëhi na'o raromo'iramu rajëhinövo'ejöjo.

¹¹ Naehu jö ëhi jövaje hesi bëhoho naehu nimorohajëhi jemë'o na'o gemu mae nimoroho'irarijego bogo bisemuoho nimoroho'i nimoroho avoho'irarijego. ¹² Ave jögoroho naro bojëmi'ië'ajëjo. Naehu jemë dë vövöbajo'e aho'o uehorovëvajëhi jemëro göëro göho ëhi uehorovëvorëjo. ¹³ Göehu gö dë vövöbajo'ere uehorovëvarue mu börömoho aviëhi höjo nosi aganoho ajëmi'i vuovorovo'ejarëjo. Mu ioro'ioroho ma-jianovajëjo. ¹⁴ Nasi jögoru ejehë'oho jemë nasi agane jëvaje höjo. ¹⁵ Urimoho na bogo aganoho uë'i a'i uënövode höjo: Nasi mu vaejaruje aribövie jëvavajëjo. Ae gö jabesi mu vaejarue ariböviohuro jabesi masijehu vaejarue mu hesi bëhoho bogo garuomaje höjo. Ëhuni avevejö'oho na bogo nasi mu vaejaruje aribövioho uë'i a'i agane uëvavajëjo ë hesi bëhoho nasi Vavuehu rabe rabe uevamu hejode jöho naro röjëhijamu jemë gavë'ego. ¹⁶ Jemë na bogo baejevo'i a'i naro jemë baejëvode höjo. Baejëvoromo muro bamëvode höjo jemëro va'oromo ioro'ioremu jioröhe bajoho rae avoho'irarijego. Ëhi jië'e bajo rae avohë'oho ëhuro jemëhu Vavu hesi örire rabe rabe nasi ihore ua gavë'oho iae huro bojëmi'ajëjo. ¹⁷ Ëhu'ëro jië'ëro ave jögoroho naro bojëmijajëjo. Göëro göho dë vövöbajo'e aho'o uehorovëvorëjo.

Sa'are mu sisë uehorovoruomaje ariböviehu Iesuare aribövi nu huodaguo'iröhe jö Iesuhu jövadohoje.

¹⁸ Sa'arohemu uehorovarue ariböviehu jemë nu huodëgaruoho uvorëjo: Urimo ëhi jië'e ariböviohuro nöro nue huodivoruomade höjo. ¹⁹ Jemë'o sa'arohemu uehorovarue aribövie jëvo'ibejajo ë ariböviohuro uvoruomo'ibejajo: Jemë nosi aribövie gemuoho jëvavëromö rajëhi'ibejarëjo. A'i jemë sa'arohemu uehorovarijoho naro baejëvode höjo nasinö jëvoröhego. Baejëvë'ego jemë bogo jabu'oho havoromo ave sa'a hesirohemuoho uehorovarue höjo. Ëhuni ë ariböviohuro jemë nue huodëgarue höjo. ²⁰ Jemë'o uehorovohëjo. Naro mami'e uëvode höjo: Mu ariböviohuro jabesi a masijoho bogo iosirëmiromö masijoho riravarue höjo. Ëjö hesi bëhoho jemesi börömoho na sisë vaejevë'ëro ëhu'ëro sa'ae aho'o jaburo mu vaejaruje aribövioho jemë'o sisë vaejëvo'aruëjo. O nasi jö ejehë'oho jemesi jöhu'o ejëho'aruëjo. ²¹ Jemëro nasi ihoho baejë'ego ëhuni ëho jaburo jemesi örire ëhi sisë vaejëvoruomo'ajëjo rabëni hesi bëhoho sa'are na remö'öjade aho jabumë bogo gavaruëro jië'ëro. ²² Na bogo sa'aroho rueromö jöho jabesi öriroho majëhi'ibejöjo jabesi jö sisëho bogojio'ibejajo. Röhu nasi jöho majëhijamu hejare höjo. Hejë'ëro bogo uö'a'aruëjo: Noehu mu sisë vaejaroho bogo gavë'e ëma ë'are höjo. ²³ Na nu huodegë'oho nasi Vavuohu'o nue huodivoruomaje höjo. ²⁴ Ae göehu bogo vaejarue ëhi jië'e darugo'e mu masijoho naro jabesi nunire vaenövode höjo. Jabesi nuniroho ëhi jië'e muoho bogo vae'ibejöjo ëhuro jabesi jö sisëho bogojio'ibejajo. O avevejö'oho jabumë nasi muoho iae gavare höjo röhu na'o nasi Vavuohu'o nue huodaguruomaje höjo.

²⁵ Jabuhu nu huodaguarue hesi bēhoho urimē'i jabesi jōgoru surire jāvivoromo uvē'e hōjo: Na sisēho bogo ömē'e jabumē ēma nue huodegare hōjo. Rōhu nue huodego'irōhe jō jajivadēhi ēhi nue huodegarue hōjo God-are jōho bogo bejajero jiē'ero.

²⁶ Rōhu jemē Ajēminōvo'irōhe Aho jō maemu barovaje Aru'ahohuro jiē'ero Vavuohu'o gemu mae hijaje hōjo. Ēhi hijajero jiē'ero naru nugō'ō'iramu Vavu gesirire jioromo jemesi örire ruvebi'ajējo. Ruvebiiromomo nasi jōho huruoho majēhi'ajējo. ²⁷ O jemē'o nasi jōho huruoho majēhi'arujējo aevo'i na'o raromobe rovē'ero jēvē'ero.

16

¹ Ējōho naru uēvajējo jemē mae uehorovevarujoho vuonugojōeni. ² Jew rajehu God rajahijarue osare osare jemēhu gagovoromo God rajahijarujoho aēro ahēvoruomō'ajējo. O majae ijonō aehu jemē muo'amēvē'iroho uvoruomō'ajējo: Noehu Iesuare aribōvi muo'amaruoho ēho God-are mue vaejaruējo. ³ Ēhi jiē'e huē vavaeni'e muoho jemesi örire vaejēvo'aruējo ē hesi bēhoho Vavuohu'o na'o bogo gövuaruēro jiē'ero. ⁴ Rōhu naru ē jōho uēvajējo ēhuro naehu ēhi uēvode huē vavaeni majaho rovego jemēro uehorovoromo uvo'irarijego: Nōrōro uōvuade hōjo: Ēhi jiē'e mu sisēho rue'a'ajējo.

God-are Aru'ahuhu mu vaejaje jō Iesuhu jōvadohoje.

Ēhi jiē'e jōho na bogo aevo'ioho uēvode hesi bēhoho na urimē'i jemē'o hibe jivoromo ēhuni bogo uēvode hōjo. ⁵ Rōhu avevejō'oho na jemē'oho bogo hi'i a'i na remō'ōjamu sa'are rovode a hesi örire vuonorō'ō va'iē'ajējo. Jemē bogo ae gemu vadu'oho uevarujējo: Ja dinō'e va'iē'anuējo. ⁶ Rōhu na va'i uēvodohuni ēhuni jemē sisē maro vavaenimarujējo. ⁷ Ave jōho na jō mae uē'iē'ajējo. Na bogo va'ibejōjo bisemu sisē jēvo'ibejajo. O na va'ē'ohuro ēhuro maho jēvo'ajējo. Ēhesi bēhoho na bogo va'ibejōjo ēhuro God-are Aru'ahuhu Ajēminōvo'irōhoho jemesi öriroho bogo rue'ibejajo. O va'ē'oho ēhuro naru Aru'ahoho jemēni nugō'ō'iramu rue'a'ajējo. ⁸ Aru'ahohuro ruerome sama'e rōjēhi'a'ajējo ae aho'o ga'irarijego sa'arohemu uehorovarue aribōvioho jaburo mu sisē hesi öroho mu ma hesi öroho sisē mevēho'irōhe hesi öroho bogo avoho uehorovorouomego. ⁹ Mu sisē hesi öri bogo avoho uehorovarue hesi bēhoho jabumē nasi öriroho bogo maho uehorovevoruomaje hōjo. ¹⁰ Mu ma hesi öri bogo avoho uehorovarue hesi bēhoho naru Vavu hesi örire maro va'iramu ijonōho bogo ge'a'arujējo. ¹¹ Sisē mevēho'irōhe hesi öri bogo avoho uehorovarue hesi bēhoho ave sa'are Sisē A Bōrōmo hesi muoho mami'e mevamu bejē'e hōjo.

¹² Naehu jemē jōe aho'obēhe majēhi'irodoho avevejō'e simanore uehorovo'irarijoho jemē bogo eni jēvajējo. ¹³ Iae ēhi hōjo rōhu jō mae barovaje Aru'ahohuro rovē'iroho huro mu ma hesi öroho rōjēhi barē'ajējo. Hu bogo hesi ēma uehorovoromo jōho jōvo'i a'iro jōe rabe rabe hejē'oho ēho jōvoromo rōhu u'emu jiorōhe mu jōho huruoho majēhi'ajējo. ¹⁴ Naru jōe jōvo'iramu Aru'ahohuro nasi jōho baeromo jemē huruoho majēhi'iramu ēhuro nasi ihoho dōro jio'a'ajējo. ¹⁵ Vavuehu jōvaje jōho aho'o nasirohu'o gemuoho hōjo. Iae ēhuni na uēvajējo: Naru God-are jōe jōvo'iramu Aru'ahohuro nasi jōho baeromo jemē majēhi'ajējo.

Iesuare ariböviehu huë vavaeni baeromo barëjego huë mae bae'iröhe jö Iesuhu jövadohoje.

¹⁶ Majae ma-bunemu barë'iramu jemë na bogo ge'a'arujëjo. Bogo geromo röhu va'o majae ma-bunemu barë'iramu evare röhu maho ge'a'arujëjo. ¹⁷ Ge'a'arujëjamu hegoroovo hesi ijarahjo ioro'iorohuro uarovareje: Iesuro no uövuajëjo: Majae ma-bunemu barë'iramu bogo geromo röhu majae ma-bunemu barë'iramu ge'a'arujëjo. Hu diehi uöromo jövajëjo. O uövuajëjo: Na bogo ge'irarije hesi bëhoho na Vavu hesi örire va'ië'ajëjo. Èhu'o hu diehi uöromo ë'ajëjo. ¹⁸ Majae ma-bunemu uvaje jö bëhoho rabe höjo. Hu rabu jö jövajoho no dadivavuajëjo. ¹⁹ Èhi uarovamu Iesuro garomo uvadeje: Arue aribövioho ue ge'i nimiruëromo uëvadeje: Na uëvajëjo: Majae ma-bunemu barë'iramu bogo ge'a'arujëjo. Bogo geromo röhu va'o majae ma-bunemu barë'iramu röhu maho ge'a'arujëjo. Na jemë ë jö hesi bëhoho naho'i atarujëjo. ²⁰ Ave jöho na jö mae uë'ië'ajëjo. Jemë sisë maro nierusuburu'e bamo'arujëjo. Al'i ave sa'arohemu uehorovarue ariböviohuro nimoroho avoho'aruëjo. Jemë huë vavaene bae'a'arujëjo röhu huë vavaeni bae'irarijoho barëromo dë mae jëvo'iramu nimoroho'arujëjo. ²¹ Magonahehu raho'ië'iroho hejaje höjo vi'ehimavego huë vavaene baejaje höjo. Huë vavaene baeromo harihoro rahonugoromo uvaje höjo: Iae harihoro mabëhe baejë'e jevajëromo nimorohage höjo. Nimorohego èhuro hesi vi'ehoho rumonimaje höjo. ²² Magonahehu huë vavaeni rumonimajëhi jemë'o huë vavaeni baejarujoho èhi rumonimo'arujëjo. Avevejö'oho jemë nasi jöëni huë vavaene baejarujëjo. Huë vavaeni baejarujoho u'emu naro röhu maho ro gë'iramu nimoroho'arujëjo. Jemëhu nimoroho'irarijoho aho bogo ahëvo hesi höjo.

²³ Èmajaho rue'iramu jemë bogo nasi öriroho ue ge'a'arujëjo naro ajëmijöro. Röhu ave jöho na jö mae uë'ië'ajëjo. Jemë rabe nëgamu Vavuoho nasi ihore ua gavë'oho hu iae ajëmi'ajëjo. ²⁴ Urimoho nasi ihoroho bogo uabe rovarijoho röhu aevoromo nasi ihoru ua ganövorëjo. Èhi jië'oho jemë ua ga'irarijoho iae baeromo nimoroho avoho'arujëjo.

Sa'are mu sisë uehorovoroumaje aribövi jabesi mu sisë Iesuhu ru-ahö'öjëho'iröhe jö Iesuhu jövadohoje.

²⁵ Na uhu'e jöe gö gö jövoromo èhuro nasi jöho majëhijajëjo. Röhu ijönö majaho rue'iramu evare uhu'oho bogo majëhi'i Vavu hesi jöho ma-sama'e majëhi'ejöjo. ²⁶ Èho majaho rue'iramu jemë Vavuoho nasi ihore ua ganövo'arujëjo huro ajëmi'iröhego. Ua ga'irarijoho na bogo uëvajëjo: Naro jemesi jöëni hu ua ga'ejöjo ²⁷ rabëni hesi bëhoho Vavuo-huro iae hesi dë vövöbajö'e aho'o jemë uehorovëvajëro jië'ëro. Èhuni jemesi jöënioho na bogo ua ga'i jemesi ua ganövo'arujëjo. Vavuehu jemë uehorovëvaje hesi bëhoho jemëro na rajehiromo mae uehorovoromo uvaruje höjo: Nörö Vavu hesirire jioromo rovade höjo. ²⁸ Iae mae-ëjo. Iae na Vavu hesirire rovë'ëro ave sa'are hijajëjo. Hijajëro ave sa'aho nugo'i Vavu hesi örire vuonorö'ö va'ië'ajëjo.

²⁹ Va'ië'ajëjamu hesi ijarahjo jaburo uavareje: Asë'e avevejö'oho ja bogo uhu'oho jövo'i ma-sama'e jövanuëjo. ³⁰ Avevejö'oho no garomo uvaruëjo: Ja bövie bise'e ga barëjë'e javajëjo. Ja bogo ae gö uö gövuanue höjo: Jö rabe ue ge'i nëgajëjo. Uö gö'irane bëhoho bogohöjo jero mami'e

gövuë'ëro. Ëhuni no mae uehorovoromo uvaruëjo: Ja God-arire jioromo rovine höjo. ³¹ Rovane höjamu Iesuro uëvadeje: Na jemë jaruvoho mae uehorovarujëjo. ³² Majae ijonöho majae ma-bunemu jio'iramu jemëro na remö'ö barëromo jemesi osare osare huruomo va'iramu sivue jevo'ajëjo. Röhu na bogo sivuoho jevo'i Vavuoho na'o jiaje höjo. ³³ Ëjöho na majëhijajëjo ëhuro jemë heromo nasi ae gemuohuro jëvë'ëro juhuonoho bogojëvo'i huë mae jëvo'iröhego. Sa'are jiaje mu sisëro jïë'ëro ëhuro sa'are raromoromo huë vavaene bae'a'arujëjo. Ëhi höjo röhu naro mu sisëho ruahö'öjë'e jevaje ëhuni biririvorëjo.

17

God-hu Iesuare aribövi ajëmiröhego Iesuhu ëninamade jöhoje.

¹ Iesuro hesi aribövioho ëhi uënogoromo ö'idöre siorohoromo uavadeje: Apajo. Majaho rovë'e höjo. Na jasi Harihe jevaje nasi ihoho döro banigojiomehonego naro jasi ihohu'o döro banigojiomaho'iröjo. ² Jero jöho bojemijane höjo naro döro namiromo ae aho'obëhe muebejëvo'irodego. Muebejëvoromo ëhuro jaehu bojemijane aribövioho naro darugoho bojëmego jaburo ma-ioro'iolemu maro raromo'iröhego. ³ Aehu ma-ioro'iolemu maro raromarue hesi bëhoho ëho God ja gavarue höjo ja gemu maho javego. O jaehu remö'öjamu ave sa'are rovode aho Iesu Keriso na gevarue höjo. Ma-ioro'iolemu maro raromarue hesi bëhoho iae ëhi höjo. ⁴ Naro ave sa'are hirono jaehu bojemane muoho vae barëromo ëhuro jasi ihoho döro banigojiomë'e jevajëjo. ⁵ Röhu Apo avevejë'e na ja'o hijajoho jero nasi ihoho döro banigojiomehonëjo. Urimo sa'a bövi bise'o bogo bamanevare evare naro ja'o hijamu nasi ihoho dö maro jiade höjo. Ëhi jïë'e ihe gemuoho bojemego na bae'iröjo.

⁶ Ave sa'a hesirohemu uehorovarue aribövioho God jero a ioro'ioroho baejëvoromo nasi örire bojemamu baejëvode höjo. Baejëvoromo ja diehi jïë'e ae javajoho naro röjëhijode höjo. Jabumë jasinö jiaroho jero na bojemamu baejëvode höjo. Baejëvamu jabumë jasi jöho ejahë'e höjo. ⁷ Ejahë'ëro avevejë'o'oho jaburo garomo uvarue höjo: Jaehu bojemijane jöho muoho bövioho bise'o'oho jasi örire jioromo rovë'e höjo. ⁸ Jabuhu ëhi uvarue hesi bëhoho jaehu röjëhijane jöho naro jabesi örire röjëhijë'e jevajëjo. Röjëhijamu heromo baejare höjo. Baejë'ëro garomo uvarue höjo: Iae mae-ëjo. Nörö jasi örire jioromo rovade höjo. Ëhi uvoromo mae uehorovoromo uvarue höjo: God jero nörö ave sa'are nugö'öjane höjo.

⁹ Na jabumëni ëninamijajëjo. Na bogo uavajëjo jero sa'arohemu uehorovarue aribövioho ajëmi'i a'i jaehu bojemane aribövioho ajëmi'iranego jasinö jëvë'ëro. ¹⁰ Ae bövie bise'e na'o jiaruoho jasirohu'o jioruomajëjo. O ae bövie bise'e ja'o jiaruoho nasirohu'o jioruomajëjo. Nasi iho börömoho jabumëro ae ma-va'orahoro röjëhijë'e höjo. ¹¹ Na jasirire ö'ië'ajëjo. Ave sa'aroho bogo ëgo'oho hi'i a'i jabumë ave sa'are ëhi raromonövo'aruëjo. Sa'are raromo hesi jioruomë'e jiaje ëhuni Apo maemu javajoho jero jasi darugohuro avoho muebejëvonëjo. Ëdarugoho jero na bojemane höjo. Ëdarugo gemuohuro jabumë muebejëvego ëhuro ja'o na'o ma-gemu jiaruëhi jabu'o ëhi ma-gemu jioruomoröhe höjo. ¹² Naro jabu'o hijodevare jaehu bojemijane

darugohuro ehuro avoho muebejévonövode höjo rireromévojöeni. Muebejévoromo nasi gurutore rémamu aho siséroho bogo va'è'e höjo. Siséro va'iröhe ahuremu siséro va'è'e höjo jasi surire jö jiajèhi éhi jioröhego. ¹³ Aviavejôle naro jasi örire ö'iè'ajéjo. Röhu naro ave sa'are hiromo ave jöho jasi örire uavajéjo ehuro naehu nimorohajèhi jabu'o éhi nimoroho avoho'iröhego. ¹⁴ Naro jasi jöho jabesi örire röjèhijamu baeruem'e höjo. Baeruemamu sa'arohemu uehorovarue ariböviohuro jabesi örire nue huodëgoruom'e höjo. Rabèni hesi bëhoho naehu bogo sa'arohemu uehorovajèhioho èhioho nasi aribövioho jabu'o bogo sa'arohemuohu uehorovaruego ehuni nue huodëg'e höjo. ¹⁵ Röhu na bogo èninamiromo uavajéjo: Sö va'ego ave sa'aroho bogo raromo'iraréjo. A'i naro uavajéjo: Avoho muebejévego A Sisèho bogo baejévo'irajo. ¹⁶ Naehu sa'arohemu bogo uehorovajèhioho èhioho jabu'o sa'arohemuohu bogo uehorovarue höjo. ¹⁷ Jero jabumë baejévego jö mahemu ejahoromo ehuro jasi aribövieu jio'amo'irajo. Jö mahemu uavaje ë hesi bëhoho avièhi höjo. Jaehu jövanue jöho höjo. ¹⁸ Jaehu na sa'are remö'öjanèhi éhi naro jabumë rémö'öjè'e jevajéjo sa'are ariböviohu'o raromoromo mue vaeröhego. ¹⁹ Rémo'öjè'ëro jabesi jöeni uehorovoromo naro nasi arijo'arije jasi örire bojamirovajéjo naro jabumë ajëmijego ehuro jabu'o jasi gemu jioruomoröhego.

²⁰ Na'o raromarue aribövi jabesi jöeni éhi èninamijajéjo. Bogo jabesi jöeniho gemu uehorovo'i u'emu nasi jö majèhijego heromo na mae uehorovevo'iröhe aribövi jabesi jöhu'o uehorovajéjo. ²¹ Uehorovoromo èninamijajéjo ehuro jabumë ae aho'obèhe ma-gemu jioröhego. Apajo. Na negajéjo jaehu na'o bimuvo'i naehu ja'o bimuvajèhi jaburo éhi no'o gemuoro bimovoröhego. Bimuvego sa'arohemu uehorovarue ariböviohuro èho garomo uvoruomoröhego: Iae mae-ëjo. God-ro nörö nugö'öjamu sa'are rovade höjo. ²² Jaehu nasi iho banigojiomoromo aji bojëmijanèhi naro éhi jiè'e ajoho bojëmè'e jevajéjo ehuro ja'o na'o ma-gemu javuajèhi jabu'o éhi ma-gemu jioruomoröhego. ²³ Naehu jabu'o bimuvo'i jaehu na'o bimuvanèhi éhi jabu'o bimuvoromo ma-gemu jëvego sa'arohemu uehorovarue ariböviohuro èho garomo uvoruomoröhego: God-ro nörö nugö'öjamu rovade höjo. O God-hu nörö rajahijadèhi huro hesi ariböviohu'o éhi rajèhijaje höjo.

²⁴ Apajo. Na negajéjo jaehu bojëmijane ariböviohuro nasinö ö'oromo na'o gemu mae raromoruomoröhego. Raromoromo nasi aji maho garuomoröhego. Èajoho jero na bojëmiane höjo rabèni mami gö'e sa'a bövi bise'o bogo bamanevare evare jaehu na rajèhinövanohuni. ²⁵ O Apo ja mu maemu vaejanue ae javajéjo. Sa'arohemu uehorovarue aribövioho ja bogo gavarue höjo. A'i naro iae ja gavaje höjo. O ave nasi ariböviohuro iae garomo uvoruomaje höjo: Jero nörö nugö'öjamu rovade höjo. ²⁶ Ja diehi jiè'e ae javajoho naro nasi aribövioho röjèhijè'e jevajéjo. Iae na éhi röjèhinövo'ejöjo ehuro jaehu na rajèhijanuèhi jaburo éhi göëro göho rajahirovego naro jabu'o gemu mae juvo'irodëro.

18

Judas-hu Iesu bijönimarue aribövi ajëmiromo Iesu jabesi övore bojëmade jöhoje.

¹ Iesuro ëhi ëninaminugoromo hesi ijorajo ömo'ömoihu'o gemu mae va'adeje. Va'oromo Kidron dodure abueromo iojioromomo aehu ijo bivare öri ari'ere ë va'o raromareje. ² Röhu Iesuni hiruëmade aho Judas ë öri ari'oho iae gavadeje mami'e Iesuro hesi ijorajoho jabu'o ë ro hinövë'ëro. ³ Judas-ro ë öri ari'oho gavë'ëro ae söjëvo ujuohoromo rovadeje. Muorovo aribövioho söromo God-are amo börömo atovarue aribövie priest masijohu'o Pharisee ömo'ömoihu'o jabuhu rëmö'öjamu rovaroho sö ujuohoromo rovamu bijo bunu'oho ujuohoromo iroho gae ujuohoromo rueruomadeje. ⁴ Rovamu gëgorovo diehi jï'e muehu hesi örire rue'iröhoho Iesu iae ga barëromo ro birohëvoromo uëvadeje: Jemë rahuo naharujëjo. ⁵ Rahuo naharujëjamu uavareje: Iesu Nazareth rajoho naharuëjo. Naharuëjamu uëvadeje: Euvaruje aho iae na aviae jevajëjo.

Röhu Iesuni hiruëmade aho Judas jabu'o gemu mae namijadeje. ⁶ Jabu'o gemu mae namijamu gagorovo rueho jaburo hejare Iesuro uëvamu: Na jevajë uëvamu hegorovo dejonö va'oromo sa'are rireromareje. ⁷ Ehi'amu Iesuro röhu maho uëvadeje: Jemë rahuo naharujëjo. Naharujëjamu uavareje: Iesu Nazareth rajoho naharuëjo. ⁸ Naharuëjamu uëvadeje: Na mami'e uëvode höjo: Iae na aviae jevajëjo. Jemë na nahevogoro ave nasi aribövioho rëmö'öjogo ma-va'arëjo. ⁹ Ehi uëvade hesi bëhoho mami'e Iesuro Vavuho uavadeje: Jaehu bojemane aribövioho naro bogo ae gemu vadu'oho nugö'öjamu sisëroho va'ë'e höjo. Hu Vavu uavadëhi hesi aribövioho ëhi mae jio'amoröhego ehuni guduamo'i rovare aribövioho uëvadeje: Nasi aribövioho rëmö'öjogo va'arëjo. ¹⁰ Ehi uëvamu Simon Peter-ro kaejoe gurahi bamë'ëro jï'ëro jïjörömo priest börömo hesi mu vaejaje a ihe Malchus anoromo övo manörire hia'oho tariö'öjahadeje. ¹¹ Hia'oho tariö'öjahamu Iesuro Peter uavadeje: Kaejöhö sionoro ba'amëjo. Naehu i'u baejörö Vavuehu uevajoho rabëni bogo baejöröjo.

Aehu Iesu Annas-are nunire bava'o nugare jöhoje.

¹² Ehi'amu gagorovo muorovo ariböviohu'o jabesi a börömoihu'o Jew rajo atovarue ariböviohu'o ëho jaburo Iesu guduamoromo tövonugoromo ¹³ hu'irae baeromo urimo Annas ga'i rovareje. Annas hu Caiaphas-are vaboro hesi vavue jiadeje. Eavaduniroho Caiaphas hu priest böröme jiadeje. ¹⁴ Caiaphas-ro urimë'i Jew rajo a masijöhö uëvadeje: Ae gemuehu ae aho'obëhe noni guomë'oho iae mae höjo. Ehi jövade a hesi juroho Annas ga'irögorö Iesu hu'irae bava'areje.

Peter-hu Iesu gavaje jö a subivëhade jöhoje.

¹⁵ Hu'irae bava'amu Simon Peter'o ijoraje gö'ö jaburo niö'iro Iesu rihioromareje. Rihioromomo priest börömo hesi amo rejo iromare ojore rovareje. Rueromo göhuro Iesuhu va'ajire ë va'adeje priest börömohe ë aho mami'e gavajego. Huro ë va'i Peter-ro rejo ojore viëhi amonö namijadeje. ¹⁶ Ojore viëhi amonö namijamu Iesuare ijorajo göho priest börömehu gavaje ahuro sionöre ojore rueromo ojo muebejaje magonahoho uanugoromo Peter ojore namijajoho osanö hu'irae bava'adeje. ¹⁷ Bava'amu ë ojo muebejaje magonahohuro Peter uavadeje: Na mae ja'o ë ia hesi ijoraje javajëjo. Ijoraje javajëjamu uavadeje: O na bogajo. ¹⁸ Ehi uanugoromo va'oromo gëvade

mu ariböviohu'o atovarue ariböviohu'o runonëgamu vëni muraege biho'amë'ëro bëhire riravoromo jurovoruomamu gëgorovo va'oromo jabu'o gemu mae namiromo vënoho jurovadeje.

Iesu priest bërömo hesi nunire namijamu jöe gö gö ua ga'i hijade jöhoje.

¹⁹ Èhi'amu priest bëröme Annas-ro Iesu uavadeje: Jasi ijore ijore jiji-harue aribövioho rahumë höjo. Ja diehi jië'e jöho aho røjëhijanue höjo. Èjöhö majehijego hejöjo. ²⁰ Majehijego hejøjamu uavadeje: Na bogo gurihirromo jöho majëhi'i ma-va'orahoro sama'e majëhinövode höjo ae aho'obëhe heruomoröhego. God rajahijarue osare osare o God-are amo bërömore ë røjëhibe juvonövode höjo Jew raje aho'obëhe ë gagovaruëro jië'ëro. ²¹ Èhu'o ho ja rabëni nasi öriroho ue gevanuëjo. Nasi jö heruomade aribövioho jabumë uë gënego majahiruomo'irajo. Naehu majëhijode jöho jabumë iae gavarue höjo. ²² Èhi jövamu hejë'i evare atovarue ae gemu Iesuare bëhire namijaduhuro Iesu övo hitahiëro anoromo uavadeje: Hë ja rabëni priest bërömo ho ëhioho uavanuëjo. ²³ Uavanuëjumu hegorovo uavadeje: Naehu jö sisë majahamu hejanoho huruoho majahuego no ae aho'obëhe hejarëjo. O naehu jö mae majahamu hejanoho röhu rabëni na aneganuëjo.

²⁴ Èhi uavamu hegorovo Annas-ro Iesu tövare ö'oho bogo jiovahë'e èhu'o èhi nugö'öjadeje va'oromo priest bëröme Caiaphas-are nunire namiröhego.

Peter-hu Iesu gavaje jö röhu maho subivëhade jöhoje.

²⁵ Èhi'amu Simon Peter-ro èhi namiromo vënoho jurovadeje. Jurovamu gagorovo aëro uavareje: Na mae ja'o hesi ijoraje javajëjo. Ijoraje javajëjumu uëvadeje: O na bogajo. ²⁶ Èhi uavamu priest bërömo hesi mu vaejarue röhu ae gemu Peter-hu anoromo hia'i tariö'öjahade ë a hesi agane gemuohuro Peter uavadeje: Iae na gavode höjo ijo bivare öri ari'ere ja Iesu'o gemuore namijamu. Na mae-ëjo. ²⁷ Èhi uavamu Peter-ro uavadeje: Bogajo. Bogajumu gavë'i evare kökörökoho uvadeje.

Iesu barovamu Pilate-are nunire namijade jöhoje.

²⁸ Èhi'amu Iesu Caiaphas-are nunire namijë'ëro sisonuvamu aëro hu hu'irae baeromo sa'a muebejaje a bërömo hesi osare rovareje. Rueromo röhu uvareje: Osare va'ë'oho no sisë baeromo God-hu Vörö Tugohade Söröho bogo avoho i'ëjarë uvoromo bogo osaroho va'i ma-ojanore riravareje. ²⁹ Ojanore riravamu Pilate-ro hörö rueromo uëvadeje: Ave ia hesi sisëho rabe jiamu baeromo rovarije höjo. ³⁰ Baeromo rovarije höjumu uëvareje: Èiaho bogo mu sisë vaejaje aho jio'ibejajo no bogo barueromo jasi öriroho bojami'ibejarëjo. ³¹ Bogo bojami'ibejarëjumu Pilate-ro uëvadeje: Jemëro jemesi bava'oromo court vaeromo jemesi jögoroho atoromo hesi muoho mevo garëjo mae o sisë jiergo. Èhi uëvamu Jew rajo masijohuro uavareje: Iae èhi höjo röhu aehu mu sisë vaejarohuni noehu uëvego vuovoröhe darugoho nosi öriroho bogohöjo. ³² Uëvego vuovoröhe darugoho nosi öriroho bogohö uavare hesi bëhoho God-ro nimadeje Iesu korosire anego guomoröhe jöho Iesuhu mami'e jövadëhi èhi jioröhego. Èhuni uavareje: Èhi jië'e darugoho bogojavuajëjo. ³³ Bogojavuajëjumu Pilate-ro hesi

osa börömore vuonorö'ö va'adeje. Va'oromo Iesuni uvoromo rovamu uavadeje: Na ja Jew rajo jabesi a börömoho javajëjo. ³⁴ Börömoho javajëjamu Iesuro uavadeje: Na jasi ëma uehorovoromo uevanuëjo. O na ae göero nasi jöho uavë'ëro uevanuëjo. ³⁵ Uevanuëjamu Pilate-ro uavadeje: Asë'e na bogo Jew rajehu jevajëjo. Jasi sa'a rajohu'o jasi priest masijohu'o ëho jaburo baejavoromo ro nasi övore bojemare höjo. Ja diehi'amu baejavo rovere höjo. ³⁶ Rovare höjamu uavadeje: Ave sa'are masije riravarue aribövi jabesi muoho gö jio'i naehu börömo namijaje muoho gö höjo. Nasi muoho sa'are jiaje mue gemuoho jio'ibejajo nasi mu ariböviohuro muorovoromo ahëvo'ibejarëjo ëhuro Jew rajohuro bogo guduamevoröhego. Röhu bogo ëhioho höjo. Naehu börömo namijaje muoho bogo ave sa'are vaejarue mue gemuoho höjo. ³⁷ Ëhi uavamu Pilate-ro uavadeje: Ëhi jië'o ho na ja böröme namiromo ae muebejëvanue ae javajëjo. Javajëjamu Iesuro uavadeje: Naehu börömo namijajoho jero jasi jövanuëjo. Röhu na sa'are ruvebijamu rahevade hesi bëhoho jö mahuremu majëhi'irodëro ruvebijamu rahevade höjo. Ae rahu jö mahuremu nimaruoho nasi jöe ejeharue höjo. ³⁸ Ejeharue höjamu Pilate-ro uavadeje: Röhu jö ma hesi bëhoho diehi höjo.

Iesu anego guomoröhego Pilate-hu majëhijade jöhoje.

Jö ma hesi bëhoho diehi hö uaromo amonö röhu maho hörö va'oromo Jew rajoho uëvadeje: Ave aehu i'u baeröhe hesi sisëho bogo birohë'e jevajëjo. ³⁹ Röhu ave söro majaho rovego evare naro savoji ojoho jiovoromo jemëni ae gemu nugö'öjëhego hu mae va'aje höjo jemesi muoho ëhi gemu jiobe rove'ëgo. Ëhi jië'o ho na jemë nëgajëjo naro Jew rajo jemesi börömoho jiovo nugö'öjëhego mae va'ojöro. ⁴⁰ Ëhi uëvamu hegorovo jö'e dadovoromo uvoruomadeje: Bogo ë iahajo. A'i Barabbas-ajo. Ëhi uvoruomadeje. Jaburo Barabbas jiovahego va'ojöro nimareje röhu hu vajiohu'e anano'e ae jiadeje.

19

¹ Iae Pilate-ro uëvamu muorovo ariböviohuro Iesu bava'oromo hisuebijareje. ² Hisuebiromo a masijehu bosö didi'arue ëhi jië'e bosöho Iesure simanore didi'ahareje. Röhu bogo inömo maho baeromo bosöho avohaho'i bibë'e ijo hisuoho ujuoho huoromo simanore ba'amahareje. Ba'amahoromo a masijehu kavuë'e niögu ëgo io'amarue ëhi jië'e niögoho ba'amahoromo ³ ro sivoromo ua'i arijareje: Jew rajo a börömoho vaevë'e hijanuëjo. Ëhi uaromo övo hitahiëro ano'i arijareje.

⁴ Ëhi'amu gagorovo Pilate-ro osare jioromo röhu maho hörö rueromo ë gagovare aribövioho uëvadeje: Jöe hehëjo. Naro ë iaho hu'irae barue'ie'ajëjo jemëro garomo uvo'irarijego: I'u bojami'irode bëhoho na bogo birohë'e jevajëjo. ⁵ Ëhi uëvamu gavë'i Iesuro bibë'e bosöho simanore didi'ë'e kavuë'e niögoho ba'amë'e hu'o höröjadeje. Höröjamu gagorovo Pilate-ro uëvadeje: Gahëjo. Ëiaho aviae höjo. ⁶ Iesu ganugoromo priest masijohuro God-are osa atovarue ariböviohuro uvoruomadeje: Korosioro anego guomajo. Korosioro anego guomajo. Guomajamu Pilate-ro uëvadeje: Jemëro jemesi bava'oromo korosioro anohego guomajo. I'u bojami'irode bëhoho na bogo birohë'e jevajëjo. ⁷ Bogo birohë'e jevajëjamu rue Jew rajohuro uaruomadeje: Röhu jögoru

börömoho nosi örire jiajêjo. Ëiahuro ë jöho ahoromo uövuade höjo: Na God-are Harihe jevajêjo. Ëjögöru ahadoghuni ëhuni guomo'a'ajêjo.

⁸ Ëhi uavamu hegoroovo Pilate-ro urimo juhuonivadoho ë jabesi jöho hegoro evare juhuonivo avohadeje. ⁹ Juhuonivo avohoromo Iesu hu'irae baeromo rue osa börömore vuonorö'ö va'oromo uavadeje: Ja dinö'e jioromo rovane höjo. Rovane höjamu Iesu bogo mana ua'i ma-jörumoraejadeje. ¹⁰ Jörumoraejamu Pilate-ro uavadeje: Ja diehi'oromo jöho bogo mana majehijanuêjo. Aveho uehorovêjo. Na jiovo ramö'ö'irode darugoho korosire ano taemavo'irode darugoho iae na jevajêjo. ¹¹ Jevajêjamu uavadeje: Iae ëhi höjo röhu God darugoho bogo bojami'ibejajo nasi örire mae o sisë vae'irane darugoho bogojavo'ibejajo. A'i God-ro bojami'jë'ëro ëhu'ëro iae eni javajêjo. Ëhi jiël'ëro jasi övore bojamamu ja baejevane a hesi jö sisëhuro jasiriroho iosiramiromo bövi mae höjo. ¹² Ëhi uavamu hegoroovo Pilate-ro öre nahadeje Iesu jiovo nugö'ö'irovo. Jiovo nugö'ö'li öre nahamu Jew rajohuro ma-darugo'o uvoruomadeje: Jaehu hu jiovo nugö'öjê'oho ëho ja bogo Rome a börömo nimanue aho javo'ajêjo. Ae rahu uvê'oho: Na böröme namijaje ae jevajê uvê'oho ë iahuro Rome a börömo hesi muoho ahaje höjo. ¹³ Ahaje höjamu hegoro Pilate-ro va'o Iesu hu'irae baeromo amonö ro hörönugoromo va'adoho munëhu ahare öri ari'ere Hebrew huëhu huotovê'oho Gabbatha ë va'oromo jö mevarue arëto börömore hijadeje.

¹⁴ Röhu God-hu Vörö Tugohade Sörö iröhe majaho nërëhi jio'li röhu evaroho majae ririre jio'iro ë'adeje. Evare majare Pilate-ro arëto börömore hiromo Jew rajoho uëvadeje: Jemesi a börömo gahêjo. ¹⁵ Gahêjamu hejê'li rue ariböviohuro ma-darugo'o uvoruomadeje: Anêjo. Anêjo. Korosioro anego guomajo. Pilate-ro uëvadeje: Na na jemesi börömo korosiroho ano'ejöjo. Ano'ejöjamu priest masijohuro uaruomadeje: Rome a börömo ëhemu nosi börömo jiajêjo. Ae gö bogohöjo. ¹⁶ Ae gö bogohöjamu Pilate-ro ë aribövioho ejëhoromo muorovo a jabesi övore Iesu bojëmadeje jaburo bava'oromo korosire anego guomojoro. Bojëmamu Iesu baeruomadeje.

Iesu korosire ano taemare jöhoje.

¹⁷ Iesu baeruomamu huro korosioho banigojiomoromo dejore bamoromo baeromo va'adoho ajio ë'o ihe Simano Gijo Va'ëne Ë'oho Hebrew huëhu huotovê'oho Golgotha ë ajio suorovareje. ¹⁸ Suorovonugoromo ë dirö'ore korosire ano taemareje. Röhu ae niö'li jabu'o ano taemëvareje u'emu ujuoho nigemo'amoromo Iesu ririre amo'li a göho ruëhi amo'li göho viëhi amo'iröhëro. ¹⁹ Ëhi'o'li röhu urimo Pilate-ro Iesuare jöho jajivoromo ae bojëmijadeje bava'oromo Iesuare simano namore korosire ano taemego aëro garuomoröhego. Jöho jajivoromo ëhi uvê'e jiadeje: Iesu Nazareth raje Jew rajo jabesi a börömo höjo. ²⁰ Ëjöhö Jew raje ae aho'obëhe adahoruomadeje Iesuhu korosire iromadoho amo börömo bëhiro jië'ëro. Ëjöhö Hebrew jöëro Rome jöëro Greece jöëro jajivo'amê'e jiadeje. ²¹ Jajivê'e jiamu gagorovo Jew rajo priest masijohuro va'oromo Pilate uavareje: Nadi ëhioho jajivoromo uvo'ibejanêjo: Jew rajo jabesi a börömo höjo. A'i jajivoromo uvonêjo: Ave iahuro hesi ëma uvade höjo: Na Jew rajo jabesi

börömoho jevajëjo. ²² Börömoho jevajëjumu Pilate-ro uëvadeje: Bogajo. Na jajivodoho hesi ëhi jiemu jio'a'ajëjo.

²³ Èhi'amu muorovo ariböviohuro Iesu korosire ano taemonugoromo hesi niögoho adovoromo muorovo ae ëhi niö'i ëhi niö'i jië'ëro gemu gemu ujuohareje. Röhu hesi niögu ëgobövioho ëhu'o baejareje. Baeromo gavareje bogo niögu göho göho gemuoroho bimuvoromo sigohijë'e jio'i ma-böröme gemu jiamu gagorovo ²⁴ uarovareje: È'ego no niögoho bogo arororomo gemu gemu bae'irögoro a'i ajajovoromo gavarejo raro baejogo. Jabuhu ëhi ë'are hesi bëhoho mami'e God-are surire jajivoromo uvë'eje:

Nasi uho giva'oho adovoromo ujuohare höjo.

Nasi niögoho ajajovoromo ae gemuëro baejade höjo.

Surire jajivadëhi ë muorovo ariböviohuro ëhi ë'areje.

²⁵ Èhi'amu Iesuare vëmoho o vëmu hesi öho o Mary Clopas-are vaboroho o Mary Magdalene ëho jaburo korosi bëhire riravareje. ²⁶ Riravamu gagorovo Iesuro gavadeje aruëre hesi vëmohu'o hesi ijoraje huhu dë vövöbajo'e aho'o rajahijajoho jabu niö'iro rirarovamu. Rirarovamu gëgorovo vëmoho uavadeje: Mamajo. Ave iahuro har-ihëro muebejavanovo'ajë ua'i ²⁷ ijorajoho uavadeje: Ave magonahoho vëmunö'e muebenëjo. Èhi uavë'ëro rue ahuro magonahoho hu'irae bava'amu hesi osare hijadeje.

Iesu guomade jöhoje.

²⁸ Èhi ë'ë'ëro Iesuro garomo uvadeje: God-hu nimade muoho mami'e barëjë'e höjo. Mami'e barëjë'e höromo diehi ë'iröhego God-are surire jö jajivadëhi ëhi ë'i nimamu uvadeje: Na jove i'i negajëjo. ²⁹ Jove i'i negajëjumu ramaho roriae jadeje. Nioga'i'e wine jovëro ë ramaho irijiomë'e jadeje. Èhi jiamu aëro u'uhë'e inömoho jovore ba'amonugoromo rumorovamu ioromo ijaho viture bijiohonugoromo nigemoromo hirere bamahadeje. ³⁰ Bamahamu jovoho sunuohonugoromo uvadeje: Iae barëjajëjo. Èhi uvoromo simanoho uruhoromo aru'ahoho nugö'önugoromo guomadeje.

Muorovo aehu Iesuare ionire bijehu bijiohade jöhoje.

³¹ Guomamu majaho Friday jië'ëro Jew rajohuro uvareje: Nëröho nuho majae sörö maja börömoho jio'ië'ëgo ëhuni vuovë'e sinehu korosire nuho majare rae'amo'iröhoho no bijönaguajëromo iae va'areje. Va'oromo Pilate uavareje: Uëvego korosire rae'amaje aribövioho aëro va'o höroho aho'amëhego vuovëvo'irajo. Vuovëvego evare korosire jajajoho ujuoho ruvebi'irarëjo. ³² Ruvebi'irarëjumu Pilate-ro ejëhamu muorovo ariböviohuro va'oromo va'o Iesu'o gemu mae ano taemare a gö hesi hörohu'o gö hesi hörohu'o ahëhoromo ³³ Iesuaro va'oromo gavare mami'e guomë'e jiamu gagorovo höroho bogo ahahareje. ³⁴ Bogo ahaho'irögoro muorovo ae gemuëro bijohuro Iesuare ionire bijiohamu gavë'i kö'o jovo'o rovadeje. ³⁵ Kö'o jovo'o rovamu gavade ahuro majahuijë'eje jemëro heromo mae uehorovo'irarijogo. Hesi jöho bogo sareri'ehu jio'i iae maeje. Huro mae garomo uvajeje: Naehu majëhijode jöho iae mae höjo. ³⁶ Röhu Iesuare höru bogo ahahare hesi bëhoho mami'e diehi ë'iröhego God-are surire jö jajivadëhi ëhi jioröhego. Jöho jajivoromo ëhi uvë'eje: Hesi ijo'ahe gemu vadu'oho

bogo ahö'øjaho'aruëjo. ³⁷ O Iesuare ionire bijiohade hesi bëhoho mamile God-are surire jö göho jajivoromo ëhi uvë'eje: Bijëro bijiohoromo ë aho nunëro garuomo'ajëjo. Diehi ë'iröhego God-are surire jajivadëhi iae ëhi bijiohadeje.

Iesuare sino munë gagore bamare jöhoje.

³⁸ Ëhi'amu Joseph Arimathea amo rajohuro rovadeje. Joseph hu Iesuare ijore ijore juvaje ae jiadeje. Röhu Jew rajo a masijoho juhuonëmiromomo bogo huruoho majëhi'i ma-saginiëri Iesu uehorovobe juvadeje. Ëhuro rueromo Pilate uavadeje: Uevego na va'oromo Iesuare sinoho bava'iröjo. Bava'iröjamu Pilate-ro ejhamu Iesuare sinoho bae'i va'adeje. ³⁹ Röhu Nicodemus-ro hu'o gemu mae va'adeje. Nicodemus hu urimë'i vahi'e Iesu ga'i rovade aho jiadeje. Hu'o hesi ariböviohu'o ridi'e osoho ujuohoromo Joseph'o va'areje. Ësoho ridi'e ije niö'i jabesi siva buaroharoho ë hesi i'uoho 40 kilo rabu'e ëhi jiadeje. ⁴⁰ Ësoho ujuoho va'oromo Iesuare sinoho baeromo Jew rajehu sino guavo'i ë'aruëhi Joseph'o Nicodemus'o ëhi niögohu'o ridi'e osohu'o ujuohoromo ëhuro sinoho avohahoromo numareje. ⁴¹ Röhu Iesu korosire anare ë hesi bëhoho mue jiadeje. Ëmure munë gage gemu bogo aho bamë'e ëma uno'e jië'e jiadeje. ⁴² Uno'e jië'ëro Iesuare sinoho numonugoromo uvareje: Nëröho Jew rajo nosi nuho majae jio'a'ajëromomo munë gagoho bëhiro jië'ëro ë dunemu bamareje.

20

Iesu i'ovoromo ri'öjë'ëro hesi sino bamariroho bogojiade jöhoje.

¹ Iae hura börömoho bogo ajivë'e i'o ma-sisonuvo'ia'amu Mary Magdalene-ro Iesu bamarire va'adeje. Va'i gavadeje ojo tugohare munëho rori'o bava'ë'e jiamu. ² Bava'ë'e jiamu gavë'i ë magonahohuro tutuvoromo va'adoho Simon Peter'o ijoraje Iesuhu dë vövöbajole aho'o rajahinövade ë ahu'o uëvadeje: Badare sinoho munë gagoroho bava'ë'e höjo. Bava'oromo dinö'e bamaroho no dadivavuajëjo. ³ Dadivavuajëjamu gagorovo Peter'o Iesuare ijorajo göhu'o ri'öromomo Iesu bamarire va'areje. ⁴ Jaburo niö'iro tutuvo va'oromo ijorajo göhuro Peter iosiramimoromo munë bëhire urimo rovadeje. ⁵ Urimo rueromo hohitohoromo sino numo'amare niögohu ga'amadeje. Ga'i munë gagoroho bogo rumo va'adeje. ⁶ Bogo rumo va'amu Simon Petero ijore rovadoho ro munë gagore va'adeje. Va'oromo gavadeje sino numo'amare niögohu momorö'ö'i ⁷ Iesuare simano numare niögohu hesi hahagu huhohë'e raromamu. ⁸ Ëhi gavamu gavë'i urimo rovade Iesuare ijorajo göhuro hu'o rumo va'oromo nunëro garomo mae uehorovadeje. ⁹ Jaburo niö'iro Iesuhu guomoromo ri'ö'iröhe God-are surire jajivare jöho bogo uehorovareje. ¹⁰ Bogo uehorovë'ëro Iesuare ijoraje niö'iro sionëro jabisirëro va'areje.

Iesuhu Mary Magdalene-are nunire rovamu gavade jöhoje.

¹¹ Iesuare ijoraje niö'iro va'irögoro Mary-ro sino bamare ojo bëhire namimoromo nivadeje. Nivoromo hohitohoromo sino bamarire uherihadeje. ¹² Uheriho'i gavadeje anerae niö'i ajivë'e niögohu io'amë'e Iesuare sino bamare sionore göho simano bamarinö hi'i göho hörubamarinö hijamu. ¹³ Ëhi gëvamu gagorovo rue aneraho jaburo

uavareje: Ma'inoho ja rabëni nivanuëjo. Ja rabëni nivanuëjamu rue magonahohuro uëvadeje: Aëro nasi Badare sinoho bava'ë'e höjo. Bava'oromo dinö'e bamaroho na bogo gagoro ëhuni nivajëjo. ¹⁴ Ëhuni nivajëromo huotorovo'i gavade Iesu namijamu gagorovo uvadeje: Nani hesi ae gö höjo. ¹⁵ Hesi ae gö höjamu Iesuro uavadeje: Ma'inoho ja rabëni nivanuëjo. Ja rahuo nahanuëjo. Ja rahuo nahanuëjamu magonahohuro uvadeje: Nani ave mu muebejaje aho höromo uavadeje: Jero sinoho bava'ë'e javego röjehego na va'o baejjo. ¹⁶ Baejjamu ruehuro uavadeje: Mary-ajo. Mary-ajamu magonahohuro huotorovoromo Hebrew jöero uavadeje: Raboniajo. Rabonia uavade hesi bëhoho uaromo ë'adeje: Tisajo. ¹⁷ Rabonia uavamu uavadeje: Nasi Vavu hesi öriroho bogo ajiomë'e jevaje ma'eneganooho vuonugëjo. Vuonugo'i va'oromo nasi ö ömo'ömoho uënëjo: Nörö God-are örire ajiomo'ië'ajëjo. God hu nöruare Vavue jioromo jemesi Vavue höjo. Hu nöruare God jioromo jemesi God höjo. ¹⁸ Ëhi uavamu Mary Magdalene-ro va'oromo Iesuare ijorajo ömo'ömoho uëvadeje: Na Bada gavë'e jevajëjo. Gavamu huro jöho ëhi ëhi majehade höjo.

Iesuhu hesi ijorajo jabesi nunire rovamu gavare jöhoje.

¹⁹ Evare majare hura börömore vahiromamu Iesuare ijorajo ömo'ömohuro Jew rajo a masijoho juhuonëmiromo osare gagovoromo ojoho tugoho titimë'ëro ë raromareje. Raromamu gavë'i Iesuro jabesi ririre ëma ro namiromo uëvadeje: Huë mae raromohëjo. ²⁰ Huë mae raromohë'i hesi övohu'o ionohu'o röjehijadeje. Röjehijamu gagorovo uvareje: Iae Bada hö uvoromo nimorohareje. ²¹ Nimorohamu röhu maho uëvadeje: Huë mae raromohëjo. Nasi Vavuehu na remö'öjamu sa'are rovodëhi ëhi naro jemë rëmö'öjajëjo jemëro va'oromo nasi muoho vaebe jijihö'irarijago. ²² Ëhi uënuogoromo nu öge ahodëgoromo uëvadeje: God-are Aru'ahoho baerëjo. ²³ Jemëhu ae rahuare örire uavë'o: God-ro jasi sisëho uehorovoromo vuonugajë uavë'o: God-ro ë a hesi sisëho uehorovoromo ma-ioro'ioiremumu vuonugo'ajëjo. Ö jemëhu ae rahuare örire uavë'o: God-ro jasi sisëho majae ëhi uehorovaje hö uavë'o: God-ro ë a hesi sisëho majae ëhi uehorovo'ajëjo.

Iesuhu Thomas-are nunire rovamu gavade jöhoje.

²⁴ Ëhi'amu ijoraje ae gemu bogojië'ëro Iesu rovajoho bogo gavadeje. Ëijorajo hesi ihoho Thomas aehu uvaruoho Huodi'e Rahade Ahoje. ²⁵ Thomas Iesu bogo gavë'ego Iesuare ijorajo ioro'iorohuro Thomas uavareje: No Bada gavë'e javuajëjo. Bada gavë'e javuajëjamu uëvadeje: Hesi övore vio'uehu ano taemo'amare sionoho naehu bogo garomo nasi övo namehu bogo rëhë'o: o hesi ioni'ahore bijehu bijiohadire nasi övo bogo nugö'öjë'o: ehuro bogo ma uehorovoromo bogo uvo'ejjo: Iesu ri'öjë'e höjo.

²⁶ Röhu urimo Iesuhu jabesi nunire rovadoho hurae gemu barëjamu hesi ijorajoho jaburo röhu maho osare raromareje. Raromamu Thomas-ro jabu'o hijadeje. Ojoho tugoho titimoromo osare raromamu gavë'i Iesuro jabesi ririre ëma ro namiromo uëvadeje: Huë mae raromohëjo. ²⁷ Ëhi uënuogoromo Thomas uavadeje: Jasi övo namoho barueromo ave nasi övoho gavehëjo. Jasi övoho barueromo nasi

ioni'ahoro nugö'ö gavëjo. Ëhi'oromo naehu ri'öjode jöho mae o sarere hö uvanuoho vuonugo'i ma-avoho uehorovonëjo. ²⁸ Avoho uehorovonëjamu Thomas-ro uavadeje: Nasi Bada nasi God ja javajëjo. ²⁹ Nasi God ja javajëjamu Iesuro uavadeje: Jero na gevë'ëro ëhu'ëro mae uehorovanuëjo. Röhu bogo gevë'e ëma mae uehorovë'oho ëhi jië'e aribövioho huë mae bae'a'aruëjo.

Ave surire jö jajivade hesi bëhoho ëhi jiaje jöhoje.

³⁰ Iae Iesuhu bëhi'e mu masije aho'o hesi ijore ijore jijiharue aribövi jabesi nunire vae'amadoho ave suriroho ë jöho bogo jajivo'amë'eje. ³¹ Ëhi jie röhu naehu ave jö jajivobe rovode hesi bëhoho jemëro adahoromo uvo'irarijago: Iae mae-ëjo. Iesu hu börome namiromo ajamuaje aho höjo. Hu God-are Harihe höjo. Ejöho uehorovoromo hesi darugoho baeromo ëhuro i'ovoromo maro raromo'irarijago ëhuni jajivë'e jeve.

21

Iesuhu hesi ijoraje 7 jabesi nunire rovamu gavare jöhoje.

¹ Ëhi'amu ijonö röhu maho Iesuro hesi ijorajo jabesi nunire rovadeje. Evare majaroho Tiberias e'ua riröre ë rovadeje. Rueromo huhu ë'ade jöho na jajivo'ië'e. ² Iae Simon Peter o Thomas aehu uvaruoho Huodi'e Rahade Aho o Nathanael Galilee sa'a raje Cana amo rajoho o Zebedee-are harihe niö'i o ijoraje gö'o niö'i ëho jaburo gemuore gagovoromo raromareje. ³ Raromoromo Simon Peter-ro ri'öromo a ioro'ioroho uëvadeje: Na visu maje va'ië'ajëjo. Va'ië'ajëjamu jaburo uavareje: No'o ö'ië'aruëjo. Ö'ië'aruëromo va'oromo boat gagore ajiomoromo jovo döre va'oromo vahi bövie visuëni viöe jovore ba'amoromo io gabe jijihoromo visuoho bogo birohë'e gavareje sisonuvamu.

⁴ Sisonuvamu gavë'i gavare arue Iesu jovo riröre namijamu gagorovo jaburo hu garomo uvareje: Nani hesi ae gö höjo. ⁵ Hesi ae gö höjamu Iesuro jabumë gëromo uvëvadeje: Aganomë na jemë visuoho suovë'e jëvajëjo. Suovë'e jëvajëjamu rueho jaburo uvareje: Visuoho no bogo suovë'e javuajëjo. ⁶ Bogo suovë'e javuajëjamu uvëvadeje: Boat-re viöho ioromo övo manö ba'amohëjo visue suovo'irarije. Ëhi uëvamu viöho ba'amoromo gavareje visue aho'obëhe ro abuejël'ëro viö barojomo'iröhoho bogo eni jëvamu. ⁷ Bogo eni jëvamu gagorovo Iesuhu dë vövöbajo'e aho'o rajahijaje ijorajohuro Peter uavadeje: Iae Bada höjo. Bada höjamu hegorovo Peter-ro döre ba'amaje niögoho mami'e jijövä'ëro röhu maho ba'amoromo avoho ruohoromo jovore jörö'öromo Iesu biroho'i va'adeje. ⁸ Peter-ro jovore jörö'öromo va'irögoro ijorajo ioro'iorohuro boat gagore raromoromo viöre visuoho ioninö jagu baeromo rovareje jovo riröho bogo ëgoho jio'i ma-90 metre rabu'e ëhi jië'ëro.

⁹ Rueromo sa'are ravo'amoromo gavareje vëni muraege biho'amë'ëro visuoho ë mue'i ioho ë bëhire momorö'öjamu. ¹⁰ Ëhi'amu Iesuro uëvadeje: Avevejö'e suovarije visuoho gö ujuoho ruehëjo. ¹¹ Ujuoho ruehëjamu Simon Peter-ro va'oromo boat-re ajiomoromo viöho sa'are jagu barovadeje. Röhu viöre visu masijoho aho'obëhe 153 jië'ëro ëhuro irijiomë'e jiadeje. Visuoho aho'obëhe jiadeje röhu

viöho bogo dadorovadeje. ¹² Viöho barovamu Iesuro uëvadeje: Ro ie ihëjo. Ro ie ihëjamu rue ijorajoho jabu bogo birivoromo uavareje: Ja rahu javajëjo. Jabumë iae garomo uvareje: Iae hu Bada höjo. ¹³ Èhi'amu Iesuro rueromo ioho ujuoho i'imëmiromo visuohu'o èhi gemuoho è'adeje. ¹⁴ Urimë'i Iesuro guomoromo ri'önugoromo urimo vae niö'i hesi ijorajo jabetesi nunire rovadoho evare majare röhu maho jabetesi nunire rueromo iohu'o visuohu'o èhi suvuorëmijadeje.

Iesuhu Peter'o jö jövade jöhoje.

¹⁵ Suvuorëmiromo ue'ahamu gagorovo Iesuro Simon Peter uavadeje: Simon John-are harihoho na jero ave aribövioho iosirëmiromo na rajehi avohanue höjo. Èhi uavamu Peter-ro uavadeje: Bada io'ajo. Jero na gevanue höjo naro ja rajahijego. Èhi uavamu uavadeje: Èhi jië'oho jero nasi sheep harihoho mio'amego jabetesi aru'ahoho da'uomo'amo'irajo. ¹⁶ Da'uomo'amo'ira uanugoromo röhu maho uavadeje: Simon John-are harihoho na jero na rajehianue höjo. Rajehianue höjamu Peter-ro uavadeje: Bada io'ajo. Jero na gevanue höjo naro ja rajahijego. Èhi uavamu Iesuro uavadeje: Èhi jië'oho jero nasi sheep-oho muebejehonövonëjo. ¹⁷ Muebejehonë uaromo urimo vae niö'i uavadoho röhu maho uavadeje: Simon John-are harihoho na jero na rajehianue höjo. Vae niö'i gemu è jöe gemuoho èhi ua'i hijamu hegorovo Peter vavaenimadeje. Vavaenimoromo uavadeje: Bada jero bövioho bise'oho gavanue höjo. Jero na gevanue höjo naro ja rajahijego. Èhi uavamu Iesuro uavadeje: Èhi jië'oho jero nasi sheep-oho mio'amego jabetesi aru'ahoho da'uomo'amo'irajo. ¹⁸ Ave jöho na jö mae ua'ië'ajëjo. Urimo ja a i'o javadevare evare jasi arijo'ëro niögho ruoho titimoromo din'öle juvo'i nagadire ëma junonövane höjo. Röhu ijonö ja mavojirae'irane majare evare jero jasi öve niö'i ahorire vae'iramu ae göero jasi övoho muoho titimëvoromo ja è dirö'ore va'ë'oho bijönagajire è baejavo va'a'ajëjo.

¹⁹ Èhi uavade hesi bëhoho hu Peter röjahiromo è'adeje huro heromo uvoröhego: Aëro èhi èhi'oromo na anego'iramu guomevo'ajëjo. Guomevo'iramu ehuro God-are ihoho döro jio'a'ajëjo. Amo Iesuro è jöho uanugoromo Peter uavadeje: Nasi ijoro ijoro juvonövonëjo.

Iesuhu dë vövöbajo'e aho'o rajahijaje ijorajo hesi jöhoje.

²⁰ Juvonövonëjamu Peter-ro huotorovo'i gavade Iesuhu dë vövöbajo'e aho'o rajahijaje ijorajoho ijore rovamu. Urimë'i è ahuro Iesure bëhire ie iromo va'o hia'iro saginiëri uavadeje: Bada ja bijönagarue a jabetesi övore bojami'iröhe aho rahu höjo. Èhi ua gavade ae gemuohuro rovamu Peter-ro huotorovoromo gavadeje. ²¹ Garomo uavadeje: Bada ave iaho diehi jio'a'ajëjo. ²² Diehi jio'a'ajëjamu Iesuro uavadeje: Hesi jöho èho bogo jasi muehu höjo. Na neg'ohuro hu birivoromo èhi hiemu hi'iramu na vuonorö'ö rue'ejöjo èho bogo jasi muoho höjo. Jero nasi ijoro juvonövonëjo. ²³ Èhi jövë'ëro Iesuhu Peter èhi majahijade jöho Iesure aribövioho jaburo jabetesi ëma vaerovemu vaerovoromo uvoruomadeje: Ejö hesi bëhoho è iaho bogo guomo'i ma-hiEMU hi'iröhe jöho höjo. Èhi uvoruomadeje röhu Iesuro Peter bogo uavadeje: Iaho bogo guomo'a'ajë ua'i a'i uavadeje: Na neg'ohuro hu birivoromo

ëhi hiemu hi'iramu na vuonorö'ö rue'ejöjo ëho bogo jasi muoho höjo. Iesuro dë vövöbajo'e aho'o rajahijaje ijorajo hesi jöho ëhi jövadeje.

²⁴Röhu ë adaharije mu hesi jöho ë ijoraje gemuohuro garomo hejë'ëro no majahuijajeje. Röhu ë jöho huro surire jajivë'eje. Noro garomo uvarueje: Hu iae jö mae majahuijaje höjo.

²⁵Röhu ë mu jö jajivadoho Iesu bogo ë muohemuoho vae'i mue aho'obëhe vae'amadeje. Röhu na uehorovoromo uve: Iesuhu vaejade muoho aho'obëhe aëro mue gemu gemu surire jajivo'amo va'o barë'ibejajo suri bahi'iröhe röhoho sa'ae dinö'e dinö'e jio'amajoho nani bogo eni jio'ibejajo. Ahia mino'e.

ACTS

God-hu hesi Aru'aho mēmi'irōhēni mae uēvade jō Iesuhu jōvade jōhoje.

¹⁻² O asē'e Theophilus ave jōho naro jajivo'iē'e. Urimē'i Iesuhu mue rabe rabe vaejade jōho naro jajivo barējamu ja adahaneje. Huro muoho aevo'i vaenugoromo mue vaebe jōe rōjēhibe ēhi'obe ruejuvo God-ro uavamū ō'idōre ajiomadeje. Urimore jōho na ēhi jajivodeje. Rōhu Iesuro ō'idōre ajiomo'irōgoro God-are Aru'aho hesi darugohuro jōgoroho apostle ōmo'ōmoho bojēmijadeje jabumē mami'e hesi baejēvē'ēro. ³ Guomoromo ri'ōjē'ēro majae aho'obēhe 40 hesi uhure jabesi nunire rueromo hesi arijo'arije rōjahirovo'i hinōvadeje. Rōjahirovamu jaburo garomo uvareje: Iae hijajējo. Huro jabesi nunire rueromo God-hu bōrōme namiromo muebejavuaje ē hesi jōho majēhi'ego henōvareje. ⁴ Hejamu huro jabu'o hiromo uēvadeje: Naro mami'e uēvode hōjo: Vavuohuro suvuoroho mēmi'ajējo. Ēhuni Jerusalem va'irarijoho nadi nugo va'i ē amoremu raromoromo ē suvuoroho mueberējo. ⁵ Suvuoro hesi bēhoho ēhi hōjo. Urimē'i John jōvēro bapataeto vaejēvade hōjo. Bogo majae ēgoho baebe va'ē'iro God-ro hesi Aru'ahoho mēmiromo ēhuro jovoho bogo a'i Aru'ahohuro bapataeto vaejēvo'ajējo.

Iesuhu ō'idōre ajiomade jōhoje.

⁶ Ēhi'amu iae apostle ōmo'ōmohuro Iesu'o gemuore jioruomē'ēro uavareje: Bada na ja avevejō'e ajamui'iramu Israel rajoho nomēro urimo ē'arēhi ēhi masije riravoromo sa'a ioro'ioroho muebejēvo'ejarējo o bogajo.

⁷ O bogajamu uēvadeje: Ēhi jīē'e muoho bōvioho bise'o'ho divare majare jio'amorōhoho hesi Vavuohuro bamē'ēro ēhu'ēro bogo ga'a'arujējo. ⁸ Iae ēhi hōjo rōhu God-are Aru'ahohuro jemesirire ruvebi'iramu darugoho bae'a'arujējo. Baenugoromo naehu diehi diehi ē'amu gavarije jōho ē jōho Jerusalem amore majēhibe Judea sa'ae bōvioho majēhibe Samaria sa'ae bōvioho majēhibe sa'ae gō gō majēhibe jijihō barē'arujējo. ⁹ Ēhi uēvamu hegoro gavareje hu ō'idōre ajiomamu God-ro uavē'ēro. Ajiomamu suēro riogivē'ēro hu bogo gavareje.

¹⁰ Rōhu ajiomamu bogo gavē'e ō'idōho ēma ērimahamu gavē'i ae niō'i ajivē'e niōgu io'amē'o'ho jaburo ma-majioho rueromo bēhire rirarovareje. ¹¹ Rirarovoromo uēvareje: Asē'e Galilee rajomē jemē rabēni riravoromo ō'idōho ērimaharujējo. Ēaho Iesu jemesirire jioromo ō'idōre ajiomē'ēro sionēro ruvebi'ajējo. Sue uhure ajiomamu gavarijēhi ēhi rue'a'ajējo.

Judas-are siono baeromo apostle jiorōhe a baejare jōhoje.

¹² Ēhi majēhijamu hegorovo apostle ōmo'ōmohuro Olives Dahorure jioromo ōri dunonō 1 kilometre rabu'e vuonorō'ō va'oromo abo Jerusalem va'o suorovareje. ¹³ Suorovonugoromo va'oromo urimo raromonōvare dōre osa gagore ē ioijomareje. Ēapostle jabesi ihoho Peter John James Andrew Philip Thomas Bartholomew Matthew o Alphaeus-are harihe James o Simon. Rōhu Simon hu Jew rajehu

jabesi mueberovo'i nimade aho jiadeje. O apostle gö James-are harihe Judas jiadeje. Apostle jabesi ihoho ëhi jio'amadeje. ¹⁴ Ëaribövioho aho'obëhe ë iojioromoro Iesuare ö ömo'ömo ho hesi vëme Mary mag-onaho ioro'ioroho ë ariböviohu'o gemu mae raromoromo God-are örire jöe ato'i arinövareje.

¹⁵ Ëhi'oromo majae vemino'e barëjamu evare Iesu mae uehorovarue aribövioho 120 rabu'e ëho jaburo gemuore gagovorovë'ëro Peter-ro ri'öromo uëvadeje: ¹⁶ Ö mueno'ohumë Judas-hu ë'ade jöho God-are surire jajivarëhi öre gö bogojië'ëro iae ëhi jiade höjo. Urimë'i God-are Aru'ahohuro David uavamu Judas-hu majae ijönö vaeröhe jöho jajivade höjo. Judas hu aehu Iesu guduamojoro öri röjëhijade ae jiade höjo. ¹⁷ Hu no'o gemu mae hi juvonövade höjo. Huro no'o bimuvoromo mue gemu vaeröhego ëhuni Iesuro hu baejade höjo.

¹⁸ Peter-ro ëhi jövadeje röhu hesi jö bëhoho Judas-hu mu sisë vaeromo ujuohade ë ijo bajohuro ëhuro sa'aho imadeje. Imoromo ë sa'are beruvebiromomo dëho tögömamu dë hötöre suoro suoro baeromo guomadeje. ¹⁹ Guomamu ë jöho Jerusalem raje ae aho'obëhe jaburo henugoromo ë sa'aho jabesi jöëro Akeldama jumuvareje. Akeldama huotovë'e hesi bëhoho Kö Rovë'e Sa'ahoje.

²⁰ Amo Peter-ro Judas-are jö vituoho majëhiromomo uëvadeje: David-ro Judas-are jöho Psalms surire jajivoromo uvë'e höjo:

Hesi amoho a rumo'e jioröhe höjo.

Nadi a göho ëho hi'irajo.

O jö göho uvë'e höjo: Ae göëro hesi sionoho baeromo mue bae'a'ajëjo.

²¹⁻²² Ëhi uvë'ego na negajëjo ae gemuëro Judas-are sionoho baeromo no'o gemu mae juvoromo Bada Iesu ri'öjël'ëro hijamu nunehu gavade jöho ae majëhinövoröhego. Na negajëjo Iesuhu no'o hibe juvo'ego John-hu bapataeto mu vaejamu aevo'i no'o hibe ruejuvo Iesu ö'idöre ajiomamu ëhi hiemu hibe rovade ëhi jië'e ae jio'iröhego.

²³ Peter-ro ëhi uëvamu hegorovo rueho jaburo ae niö'i jabesi ihoho uvareje Judas-are sionoho baeröhego. A gö hesi ihoho Joseph jiadeje. Ëa hesi iho göho Barsabbas jio'i iho göho Justus jiadeje. Hesi ihoho niö'i gemu jiadeje. O a gö hesi ihoho Matthias jiadeje. ²⁴ Ëae niö'i jabesi ihoho uvonugoromo God-are örire ëninamiromomo uavareje: Bada ae aho'obëhe nosi dë vövöbajo'oho jero gövuanue höjo. Ëhuni ae niö'i röhu di aho gemu nimanuoho jero röjahuijego no bae'irarëjo ²⁵ ëhuro hu Judas-are sionoho baeromo apostle muoho vae'iröhe höjo. Ëhesi bëhoho urimë'i Judas apostle jië'ëro röhu muoho vuonugo'i guomoromo hesi röho sisëre va'ade höjo. ²⁶ God ëhi uanugoromo munë inine ömëvonugoromo ë ae niö'i jabesi ihoho ë munë jabesi döre jajivoromo hevö gagore ba'amoromo hijiohijiovereje ga'iro di aho bae'iröhoho jiego. Hijiohijiovoromo gavareje bae'iröhe aho Matthias jiamu gagorovo uavareje huro Iesuare apostle 11-ho jabu'o gemuore juvonövoröhego.

2

God-are Aru'ahehu ruvebijade jöhoje.

¹ Ëhi'amu Pentecost majaho rovamu Keriso mae uehorovarue ariböviohuro aho'obëhe osae gemuore raromoruomadeje.

² Raromoromo ma-majioho hejareje buru börömonö'e ö'idöre jioromo ruvebiromo jabuhu raromarue osaho aho'o huosihuosihavamu. ³ Huosihavamu hejë'i gavareje vëni hödu va'ëne bitaroho rumorovoromo ae gemu gemu jabesi simano döre jiorovamu. ⁴ Jiorovamu gagorovo God-are Aru'ahohuro ae aho'obëhe jabesi dë vövöbajo'ere abueromo rarovadeje. Rarovoromo bitaroho ajëmijamu aavoromo huë göëro göëro jöe vaerovobe va'areje.

⁵ Röhu Jew rajo ae göëro göëro Jerusalem amore ë raromoruomadeje God mae uehorovaruëro jië'ëro sa'ae göre göre jioromo rueruomë'ëro. ⁶ Jerusalem raromoromo hejare Iesuare ariböviohuro atavavamu hegorovo ae aho'obëhe gemuore ruero gogovoruumadeje. Gagovoromo ae gemu gemu hejare jaburo jabesi huë göëro göëro vaerovavamu hegorovo hire görö'öjévadeje. ⁷ Hire görö'öjévamu ri'öromo uvoruomadeje: Jabumë bogo nosi sa'ae gemuoho jio'i Galilee rajemu jioruomajëjo. ⁸ Èhi jië'o'ho diehi'oromo nosi huë göëro göëro ato'ego no hejaruëjo. ⁹ No Parthia sa'a raje javuajëjo. Media raje Elam raje Mesopotamia raje Judea raje Cappadocia raje Pontus raje Asia raje ¹⁰ Phrygia raje Pamphylia raje Egypt raje javuajëjo. Cyrene amo bëhire Libya sa'a raje javuajëjo. Rome amo raje javuajëjo. ¹¹ Rome amo rajo a ioro'ioroho Jew rajo ae javuajëjo. A ioro'ioroho bogo Jew aehu javuo'i röhu Jew rajo jabesi muoho noro ijonö baejë'e javuajëjo. Crete sa'a raje javuajëjo. Arabia sa'a raje javuajëjo. No sa'ae gö gö èhi javuajëjo. Röhu no ae aho'obëhe hebe rovaruëjo God-hu mu masije gö gö è'ade jöho ë aribövioho jaburo ae gemu gemu nosi jöëro atavavo'ego. ¹² Èhi uvoromo ae aho'o tiöromo uehore gö gö baeromo uarovareje: Diehi'ego èhioho è'aruëjo. ¹³ A ioro'ioroho bogo èhioho uvo'i a'i masivëgoromo uarovareje: Èaribövioho rihu'e jovo sisë ue'aho avohë'ëro simane huotovëho'ego è'aruëjo.

God-are Aru'ahehu rovamu Peter-hu Iesuare jö majëhijade jöhoje.

¹⁴ Èhi'amu Peter-ro apostle ioro'iore 11-ho jabu'o gemu mae jië'ëro ri'öromo ae aho'obëhe ma-darugo'o uëvadeje: Jew raje Jerusalem raromarujohumë ae aho'obëhe naehu jö jövo'ië'ajoho avo'avoho hehëjo. ¹⁵ Jemëro uvarujëjo: Ave aribövioho simane sisërëjë'ëro è'aruëjo. Bogo èhioho höjo rabëni majae rojomanovego vörö'e jovoho aho bogo ue'ahoruomajëro jië'ëro. ¹⁶ Èhuni bogo èhioho jio'i a'i ë mu hesi bëhoho urimë'i Joel-ro ave jöho God-aro baeromo jajivoromo uvade höjo: ¹⁷ God-ro uövuavohijajo: Ijo tugoho'i majaho rue'iramu naro ave muoho vae'ejöjo.

Naro nasi Aru'ahoho jovonö'e otehëho'iramu ae magonahe aho'o rumorovo'ajëjo.

Rumorovo'iramu jemesi ujo ömo'ömo'ho a'o magonaho'o nasi jöho huruoho'aruëjo.

Jemesi a i'ohuro nasi muoho nia'ovoro ga'a'aruëjo.

Jemesi a mavojohuro momorö'öromo mue gemuoho ga'a'aruëjo.

¹⁸ Èho majaho rue'iramu nasi Aru'ahoho otehëho'iramu nasi mu vaejarue aho magonahoho jabu'o rumorovo'ajëjo.

Rumorovo'iramu nasi jöho huruoho'aruëjo.

¹⁹ Ö'idöre vörö'e muoho vae'ejöjo.

Sa'are darugo'e muoho ömo'ejöjo.

Sa'are ömo'iramu köemu jioromo vëne ravoromo u'e ajiomo'ajëjo.

²⁰ Ö'idöre vae'iramu majaho ramoramovoromo manaeroho kö'e jio'a'ajëjo.

Badare aji'e maja börömo rueröhe ë hesi urimo ëho jio'a'ajëjo.

²¹ Evare ae rahu Badani uvë'o'ho maro jëvo'ajëjo.

²² Röhu Israel rajomë ave jöho hehëjo. Naro Nazareth raje Iesuare jöho majëhi'ië'ajëjo. God-ro Iesu ajamijamu bogo gavarue darugo'e muoho vae'amade höjo ëhuro jemëro tiöromo ma-sama'e uvo'irarijego:

Iesu bogo ëma rue'i God-ro nugö'öjamu rovade höjo. Ëmuoho jemesirire vaejë'ëro jemë'o iae gavaruje höjo. ²³ Ëaho jemesi övore rovade höjo God-ro ëhi nimoromo uvë'ëro. Jemesi övore rovamu jemëro baeromo sisë aribövioho uëvamu korosire anare höjo. Jemesi sisë höjo.

²⁴ Röhu vavaene baeromo guomo raromoromo God-ro hesi vavaenoho avohahamu ri'öjade höjo bogo ioro'ioremu guomoröhe ahuro jië'ëro.

²⁵ Ëhi ri'ö'iröhe jöho urimë'i David-ro God-are surire jajivoromo uvë'e höjo:

Naro gavode höjo Badaro na'o gemu mae juvo'i hijamu.

Huro nasi bëhire juvo'ego na bogo juhuonivo'ejöjo.

²⁶ Ëhuro dë vövöbajo'o'ho sasohevaje höjo. O bitarohuro nimorohë'i jöe jövaje höjo.

Iae nasi sino haho'o'ho guomo hesi höjo. Röhu na mae hiromo muebe'ejöjo hujeji God-ro ajemi'iröhego.

²⁷ Ëhesi bëhoho guomevo'iramu vuovoromo raromaruiroho God ja nasi aru'ahoho ëho bogo nugeho'iramu bogo ioro'ioremuoho ëho hi'a'ajëjo.

Na jasi aëro jevë'ëro ëhu'ëro jero ajemi'iramu nasi sinoho bogo sago-horijevo'ajëjo.

²⁸ Naehu hiemu hi'irode öroho jero röjehijë'e javajëjo.

Jero na'o gemu mae juvo'ego ëhuro na nimorohevo avoho'ajëjo.

Iesuhu ëhi ë'iröhe jöho David-ro jajivade höjo.

²⁹ Aganomë naro nosi hijo miono'e David-are jöho jemesi örire huruoho majëhi'ejöjo. David guomamu guavare höjo. Hu guavare huoho jaruvohu'o aviae jiajëjo. Ëhuni hesi sinoho bogo sagohori'iröhe jöho hu bogo jövo'i Iesuare jöho jövade höjo. ³⁰ Ëhesi bëhoho David-ro jö God-aro baeromo juvaje aëro jië'ëro ijönö jioröhe jöho gavade höjo. Ëhu'ëro hu garomo uvade höjo: God-ro na jöe darugo ma'e majehiromo uevë'e höjo: God naro jasi uje gemu baeromo böröme bamo'ejöjo David jaehu öri ari'e muebejanuëhi ëhi ë'iröhego. ³¹ God-hu Keriso böröme bamoröhe jöho David-ro gavë'ëro ëhuni Kerisohu ri'öröhe jöho jajivoromo uvade höjo:

Vuovoromo raromaruiroho God ja hesi aru'ahoho ëho bogo nugahamu bogo ioro'ioremuoho ëho hijade höjo.

Jero hu ajamamu hesi sinoho bogo sagohorijahade höjo.

³² Röhu ë aho Iesu God-ro ajamijamu ri'öromo röhu maho hijade höjo. Hijamu hesi aribövioho aho'o no iae nunëro gavë'e javuajëjo.

³³ Ri'ö hiromo God-ro böröme bamamu ajiomoromo hesi övo manö hijë'e höjo. Hiromo Vavuehu uavadëhi ëhi hesi Aru'ahoho bojamamu baeromo jovonö'e otehauë'ëro jemë garomo hejaruje muoho nomëro vaejaruëjo. ³⁴ Röhu Iesuhu God-arire ajiomade jöho iae mae jio'ego

röjehi'ejöjo. Iesuhu ajiomadëhioho David God-ariroho bogo ëhioho ajiomade höjo. David hu bogo ajiomade höjo röhu God-are surire jajivoromo uövuade höjo:

Bada God-ro nasi Bada uavade höjo:

Nasi övo manö rojo hijego

ja'lo muorovarue aribövioho ³⁵ naro ruahö'öjëvego

hörëro vijuvo taemo'amo'irane höjo.

Bada Iesuhu ajio God-are övo manö hi'iröhe jöho David-ro ëhi jajivade höjo.

³⁶ Èhuni Israel aribövioho aho'obëhe jemëro ave jöho avoho hehëjo. Jemëhu korosire anarije aho Iesu ë aho God-ro böröme bamë'ëro hu Bada höjo. Böröme namiromo ajamuijaje ae höjo.

³⁷ Peter-ro ëhi majëhijamu hegorovo ë aribövioho jaburo juhuone böröme baeromo Peter'o apostle ioro'iorohu'o uëvareje: Ö ömo'ömoho no diehi ë'ëjarëjo.

³⁸ Diehi'o'ëjarëjamu Peter-ro uëvadeje: Jemë ae gemu gemu uehoro sisëho vuonugo'i uehoro mae baeromo Iesu Keriso-are ihoro bapataeto vaejego God-ro jemesi sisëho uehorovoromo vuonugo'irajo ëhuro God-ro hesi Aru'ahoho suvuore mëmego bae'irarije höjo. ³⁹ Èhesi bëhoho God-ro hesi Aru'ahoho jemë'o jemesi aboji harihu'ohu'o mëmi'i uvade höjo. Ae dinö'e dinö'e raromoromo nosi Bada God-hu uvamu ejahë'oho hesi Aru'ahoho mëmi'i uvade höjo.

⁴⁰ Peter-ro ëhi uëngoromo ëhi jië'e jö göho aho'obëhe majëhiromo uëvadeje: Sisëho vuonugo'i avoho raromohego ave sisë ariböviehu i'u bae'iröhoho jemë bogo ëhioho bae'irarije höjo. ⁴¹ Peter-ro ëhi majëhamu hegorovo hesi jö ejahare ariböviohuro bapataeto vaeromadaje. Vaejë'ëro ëhu'ëro evare majare ae aho'obëhe 3,000 ëhi aevoromo Iesuare aribövi ioro'iorohu'o gemu mae jijihonövareje. ⁴² Gemu mae jijihoromo apostle jabesi jöho heromo agane vaerovoromo gemuoro ie ue'ahoromo God-are örire jöe atonövareje. Èhi jië'e muohuremu uehorovonövareje.

Iesuare ariböviehu gemuore raromo jijihoromo aviëhi jië'e mu vaejare jöhoje.

⁴³ Èhi'o'ëgo God-ro apostle-ho ajëmi'ëgo bogo gavarue darugo'e muoho vaenövareje. Vae'ëgo ae aho'obëhe ëho gagorovo tiöromo uvonövareje: O mu mabëhe barueromo röjahuijaruëjo. ⁴⁴ Èhi'o'ëgo Iesu mae uehorovarue aho jaburo agane gemuoho va'ëne gemuoro raromo jijihoromo bövie bise'e bogo sivu sivuoho bae'i ma-gemuoro bahinövareje. ⁴⁵ Jabesi sa'ae inömo inöme bövie bise'e imo'amoromo ijo baje ujuohoromo ae gö rabe rabe bogojië'oho suvuorëminövareje. ⁴⁶ Majae ëhi God-are amo börömore gagovorovonövareje. O osare osare gemuoro raromoromo nimorohë'i huë baerovë'i ie ue'ahonövareje. ⁴⁷ Ue'ahoromo God rajahiromo a ioro'ioro jabetesi huë mae baenövareje. Èhi'o'ëgo Badaro ae gö gö baejëvoromo maro bamëvoromo ekaresia gemuore bimuvëvonövareje.

3

Peter'o John'o höru sisë'e a ajamamu marëjade jöhoje.

¹ Majae sanuovamu Jew rajehu pari vaejarue majare Peter'o John'o jaburo niö'iro ruhe God-are amo börömore hörö'i ajiomareje. ² Ajiomoromo amo börömo hesi rejo ojo behire rovareje. Eöjo hesi iho jumovaroho Ojo Mabêheje. Rue'i gavareje ae gemu ë hijamu mami'e hörü sisë'e ëhi rahë'e jië'ëro. Hörü sisë'ego majae ëhi hesi ariböviohuro barueromo ojo behire ë bamonövareje. Ojo behire bamo'ego ae gö gö osa börömore va'ië'iroho jaburo hu ijo baje bojämijöro ëninëminövadeje. ³ Ehi ë'ujuvo hiromö gavade Peter'o John'o jabu'o osare rova'ia'amu gëgorovo ëninëmadeje. ⁴ Eñinëmamü hegorovo rueho jaburo hu ërimahoromo Peter-ro uavadeje: No gövuëjo. ⁵ Gövuëjamü hegorovo rue ahuro uvadeje: Jaburo suvuore memi'i uevaruëromö gëvadeje. ⁶ Gëvamü Peter-ro uavadeje: Ijo baje bogöjevajëjo. Röhu nasi örire jevajohuro ehuro ajami'ejöjo. Naro Nazareth amo raje Iesu Keriso-are ihore ja uavajëjo: Ri'öromö juvëjo. ⁷ Ri'öromö juvëromö hesi övo manö ma'ënoromö nigëmadeje. Nigëmamü gavë'i hejade hesi hörü hitahioho öbinajoho mae jivamu hegorovo ⁸ döro majioho ri'öromö namiromö hesi hörëro juvadeje. Hesi hörëro juvoromö tiöbe God rajahibe jabu'o gemu mae God-are osare va'adeje. ⁹ Ehi'amu ae aho'obëhe garuomadeje huro God rajahibe juvamü gagorovo ¹⁰ gavare Ojo Mabëhi hesi behire hiromö ijo bajëni ëninëmaje aho jiamü garomö tiöjëvamü uvareje: Diehi'oromö höröho marëjë'ëro juvajëjo.

Peter-hu God-are osa börömore namiromö Iesuare jö majëhijade jöhoje.

¹¹ Ehi uvoromö gavare ë aho Peter'o John'o jabesi övoro jiorovoromö jabu'o ëhi juvamü God-are amo börömo hesi harada ihe Solomon-are haradare ë juvamü garomö tiöjëvamü tutuvoromö ë gemu va'oromö gagovorüomadeje ga'irovo. ¹² Gagovamü gëgorovo Peter-ro uëvadeje: Israel rajomë jemë ave aho garomö rabëni tiöjarujëjo. Jemë rabëni John'o na'o ërimahuarujëjo. Bogave uvo'irarijëjo: No vörö'e aëro javuë'ëro o mü maemu vaejaruëro ehü'ëro norö ajami'ego marëromö juvajëjo. Bogo ehioho höjo. ¹³ A'i hu marëjade hesi bëhoho aviëhi höjo. God-hu Abraham Isaac Jacob nosi hijö mionö'o iorö'iorö muebe'amadöhuro hesi mü vaejaje aho Iesuare ihoho döro nigëmahade höjo. Eäho jemëro gudüamoromö a masijö jabesi övore bojëmijarije höjo baeromö sisë vaeröhego. Bojëmiromö hejarije Pilate-ro uvavamü: E'ëgo naro Iesu jiovo nugö'ö'irö uvamü hegorovo jemëro Pilate-are nunire Iesu bijönimarije höjo. ¹⁴ Iesu hu God gemu uehorovoromö mü maemu vaenövade höjo röhu jemëro hu bijönimoromö Pilate uavarije höjo huro a müo'amaje aho jemëni jiovo nugö'öjëhego va'iröhego. ¹⁵ A müo'amaje aho jiovo nugö'öjëhojörö ua'i a i'ovavüaje aho Iesu anöjörö uavarije höjo. Ehi'amu guomoromö God-ro ajamamü ri'öromö hijamü nosi nunëro gavë'ëro ë jöho majëhijarue höjo. ¹⁶ Eäho Iesu mae uehorovadöhuro ehuro hesi darugöhuro ajamamü ave hörü sisë'e a jemë gavarujocho biriroho bæjade höjo. Eäho Iesu mae uehorovamü ehuro marëjadöho jemë ae aho'obëhe iae gavarujejo.

¹⁷ Aganomë iae ëhi höjo röhu na gavajöho jemë'o jemesi a masijohu'o bëhoho bogö avöho gavë'ëro Iesu anarije höjo. ¹⁸ Röhu jemëhu vaejarije mü sisë hesi bëhoho urimë'i God-ro jöho nugö'öjamü jö

hesiro baeromo majehinövare ariböviohuro surire jajivoromo uöbe rueruomade höjo: God-hu uavë'ëro böröme namiromo ajamui'iröhe aho vi'ehe baeromo guomo'a'ajëjo. God-ro mami'e jö bamoromo uövuadëhi öroho ëhi avohamu Iesu guomade höjo. ¹⁹ Ëhi jië'e jiaje ëhuni öri sisëre jijiharujoho vuonugo'i God-are öroro jijihego huro jemesi sisëho mu'uvëho'irajo. ²⁰ Ëhi ë'ë'o'oho Badaro jemesi aru'ahoho biririvëho'ajëjo. Biririvëhoromo Iesu nugö'ö'iramu jemëni rue'a'ajëjo. Iesu böröme namiromo ajëmi'iröhe aho ë aho God-ro jemesi jöëni baejade höjo. ²¹ Baejë'ëro huro ö'idöre hijuvo hujeji God-ro sa'ae bövie bise'e röhu maho i'e avoho'iramu evare rue'a'ajëjo. Ëhi jië'e jöho mami gö'e nugö'öjamu jö hesiro baeromo majehinövare aribövi mahuro surire jajivobe rovere höjo. ²² Iesuare jöho Moses-ro God-are surire jajivoromo uövuade höjo: Jemesi a bövie God-hu na remö'öjamu rovodëhi huro jö hesiro baeromo majëhi'iröhe a göhu'o ëhi nugö'ö'iramu rue'a'ajëjo. Hu jemesi sa'a raje jio'a'ajëjo. Jö rabe uëvë'o'oho ejahonövorëjo. ²³ Ae rahu hesi jö bogo ejahë'o'oho ë aribövioho rori'o sö va'oromo ijumëvo'aruëjo. Iesuare jöho ëhi jajivë'e höjo. ²⁴ Ëhi jajivamu jö God-aro baeromo majahinövare a ioro'ioroho Samuel-arire aevoromo hesi ijore rueromo jö majëhijare ae aho'obëhe ëho jaburo jaruvore mu rabeju rovaje jöho majëhibe rovere höjo. ²⁵ Röhu jemë'o huë mae bae'irarijago ëhuni ë ariböviohuro jöho God-aro baeromo majëhiromo uënövare höjo: Huro mu mabëhe nugö'ö'iramu rue'a'ajëjo. Jemë'o huë mae bae'irarijago ëhuni God-ro jemesi hijo miono'o'oho darugo'e jögoroho bojëmiromo uëvade höjo: Iae naro muebejëvonövo'ejöjo. Huro ëhi jië'e jögoroho Abraham bojamiromo uavade höjo: Naro jasi a ujoho mae avohëvo'iramu ëhuro sa'ae din'o'e din'o'e raromarue ariböviohu'o huë mae baeruomo'a'ajëjo. ²⁶ Ëhi uavë'ëro huro hesi mu vaejaje aho Iesu baeromo urimo jemesirire nugö'öjade höjo huro rueromo jemë huë mae bojëmiromo dë vövöbajo'oho huotovëhego jemë ae aho'obëhe mu sisëho vuonugo'irarijago.

4

Peter'o John'o Jew rajo a masijo jabesi nunire rirarovare jöhoje.

¹⁻² Peter'o John'o jaburo jöho ëhi majëhijamu hejë'i Jew rajo a masijohuro rueruomadeje. Priest ömo'ömhuro God-are amo börömo atovarue jabesi a böviohuro Sadducee ömo'ömhuro ëho jaburo hejare Peter'o John'o ae uëvamu: Iesu guomoromo ri'öjël'ëro ëhu'ëro vuovarue ae aho'obëhe no'o ri'ö'ëjarë uëvamu hegorovo uvareje: Jö sisë ae majëhijaruëromo dë vörönëgamu rovereje. ³ Rueromo Peter'o John'o guduamo ömëvo va'oromo majae barëjamu gagorovo savoji gagore ba'amëvareje hujeji nërö rueromo jabesi nunire rirarovoröhego. ⁴ Amo ae aho'obëhe Peter'o John'o majëhijare jöho heromo Iesu mae uehorovoruomadeje. Mae uehorovë'ëro ëhu'ëro Iesu mae uehorovarue aribövioho aho'obëhe 5,000 rabu'e jiadeje.

⁵ Peter'o John'o savoji gagore ba'amëvamu momorö'öjël'ëro sisonuvamu gagorovo council a masijohuro a duvaho ömo'ömhuro jögoru öri röjëhijarue ariböviohuro ëho jaburo Jerusalem rueromo gemuore gagovoruomadeje. ⁶ Gagovoruomamu priest böröme Annas-ro Caiaphas-ro John-ro Alexander-ro priest börömo hesi agano ioro'iorohuro ëho

jaburo a masijo ioro'iorohu'o gemuoro gagovareje. ⁷ Gagovoromo Peter'o John'o hu'iraejêvo ruejôro jõe nugö'öjamu rueromo jabesi nunire ë rirarovareje. Rirarovamu gëgorovo uëvareje: Jemë diehi'oromo hôru sisê'e aho ajamijamu marêjade hôjo. Diehi jiê'e vörôho baeromo rahuaru e ihoro uvoromo ë'arije hôjo.

⁸ Ëhi uëvamu God-are Aru'ahohuro Peter-are dë vövöbajo'oho rarovamu ri'öromo uëvadeje: Jew rajo a masijohu'o a duvahohu'o nasi jõe hehêjo. ⁹ Noehu hôru sisê'e a ajamamu marêjade jôho evaho nani jemë he'i nëgamu êhuni noro jemesi nunire rirarovojôro atê'ëro uö gövuarujêjo. ¹⁰ Ëhi jiê'oho na negajêjo jemë'lo Israel a ioro'iorohu'o ae aho'obêhe jemëro ave jôho he'irarijêgo. Ave aho jemesi nunire marêjê'e namijaje hesi bëhoho Nazareth raje Iesu Keriso hesi darugohuro êhuro ajamamu marêjê'e hôjo. Ëaho Iesu jemë korosire anamu guomamu God-ro i'ovamu ri'öjade hôjo. ¹¹ Ëaho Iesuare jôho God-are surire uhunö'e jajivoromo uövuê'e hôjo:

Jemë munë javue vae'irögoru munë gemu bijönimoromo vuonugarije hôjo.

Vuonugarijoho jaruvoho ë munëhuro javuoho nigemo'ego bibivoromo mae namijajêjo.

Ëhi jajivê'e hôjo. ¹² Iesuro huro gemuëro ajamuijêgo i'uoho bogo bae'i marêjavuajê hôjo. Ëhesi bëhoho God-ro Iesuare ihe gemu sa'ae dinö'e dinö'e bojamuijê'e hôjo aho bogo sisêroho va'i mae javuoröhego. Iho göho bogohôjo.

¹³ Ëhi uëvamu hegorovo rue Jew rajo a masijoho jaburo gavare Peter'o John'o bogo nuni aji'e aho jêvo'i ëma uno'e ae jêvê'e bogo juhuonivo'i birivoromo jôho majêhijamu gagorovo tiöromadeje. Tiöromo evare garomo uvareje: Ëaho jaburo niö'iro Iesu'o gemu mae jirehonövä'ëro êhu'ëro ë'aruêjo. ¹⁴ Ëhi uvoromo gavare hôru sisê'e aho mami'e marêjê'ëro Peter'o John'o jabesi gemuore namijamu gagorovo jabesi jö aho'iröhoho bogo eni jioruomadeje. ¹⁵ Bogo eni jioruomamu aëro Peter'o John'o hu'iraejêvoromo gagovarue osaho vuonugo'i rori'o va'ojôro uënugoromo jabesi sivue jôho mevoromo uarovareje: ¹⁶ Noro ave ae niö'ioho diehi'ëvo'ëjarêjo. Ëhesi bëhoho Jerusalem raromarue ae aho'obêhe hejare uvamu: Ëae niö'iohuro bogo gavarue mue gö vaejê'e hõ uvamu hejê'ëro êhu'ëro subivo'iröhoho bogo eni javuajêjo. ¹⁷ Röhu ae göëro göëro hebe va'ojöëni ë'ëgo no jögore bojëmiromo uë'irarêjo: Bogave ijoho Iesuare ihoroho jôho majêhi'irarijêjo.

¹⁸ Ëhi uarovoromo ae uëvamu Peter'o John'o osaëro hu'iraejêvo rovareje. Hu'iraejêvo rovamu uëvareje: Bogave gemu Iesuare ihoroho jôho majêhiromo røjêhi'irarijêjo. ¹⁹ Ëhi uëvamu hegorovo rue ae niö'iohuro uëvareje: Jemëhu uövuuarujoho nadi Iesuare ihoroho jôho majêhirê uövuuarujoho iae no hejaruêjo. Röhu na no jemesi jôho ejêho'ëjarêjo o God-are jôho ejaho'ëjarêjo. Jemesi garêjo God di muoho nimego. ²⁰ Iesuhu ë'amu noehu garomo hejare jôho diehi'oromo vuonugojörajo. ²¹ Ëhi uëvamu rue Jew rajo a masijohuro Peter'o John'o i'u bojëmi'ibeharoho röhu uvareje: Hôru sisê'e aho marêjamu gavê'ëro ae aho'obêhe God rajahiruomajêromo i'u bojëmi'iröhe öroho bogo birohogoro vuonugo'i jõe gö'o darugo ma'e majêhiromo jiovo

rëmö'öjävamu va'areje. ²² Amo ae aho'o God rajahijare hesi bëhoho ë hörü sisë'e aehu hijade hesi vadunoho aho'o 40 ëmino'e iosiramiro mo ruëhi jië'ëro bogo marë hesi jiadoho rôhu Peter'o John'o Iesuare daruge baeromo ajamamu marëjadeje.

God-hu ajëme go bogo juhuonivë'e ma-biririvoromo jö majëhi'iröhëro Iesuare ariböviehu ëninamare jöhoje.

²³ Iae jiovo rëmö'öjävamu va'oromo Peter'o John'o ma-burëro vuonorö'ö va'oromo jabesi aribövioho uëvareje: Jew rajo priest masijohu'o a duvahohu'o jaburo no uövuare höjo: Iesuare ihoroho nadi ijoho jöho majëhirëjo. ²⁴ Èhi uëvamu hegoro vo rue Iesuare ae aho'obëhe jaburo uehore gemu baeromo God uaruomadeje: O asë'e nosi A Börömo ho ö'idöe sa'ae jove bövie bise'e jero bamavuane höjo. ²⁵ Urimë'i jero ave jöho bojamamu jasi Aru'ahohuro jasi mu vaejaje ae David nosi hije David-are simanore bojamamu huro jajivade höjo. Jajivoromo uövuë'e höjo:

Sa'a ioro'ioro rajoho rabëni jövëro gatovanovoruomade höjo.

Sa'ae göre göre aribövioho rabëni simano rumo'e muoho vae'i öroho naho garuomade höjo.

²⁶ Sa'ae dinö'e dinö'e raromarue a masijohuro muorovo'i avohorovare höjo.

Sa'are simano vaejarue ariböviohuro gagovorovare höjo

Bada God'o muorovo'i God-hu uavë'ëro böröme namiromo ajamuae ahu'o muorovo'i.

²⁷ David-hu ë jö jajivadëhi ëhi ave amore iae gagovoruomade höjo Iesu'o muorovo'irovo. A masije niö'i Herod'o Pontius Pilate'o ëho jaburo sa'a ioro'ioro rajohu'o Israel rajohu'o gemuoro gagovare höjo Iesu'o muorovo'irovo. Iesu jasi muohuremu vaejaje aho höjo. Jero hu uavane höjo huro böröme namiromo ajamui'iröhego. Èahu'o muorovo'i gagovoruomade höjo. ²⁸ Èmuoho vae'i gagovare höjo. Röhu urimë'i ëhi jië'e muoho jioröhego God jero darugo'ëro javë'ëro jasi nimoromo ëhi bamane höjo. ²⁹ Bada röhu jaruvoho ë ariböviehu uövuaro ho Iesuare jö majëhijë'o ho i'ue bae'a'arujë uövuare jöho jero ëho heromo uehorovoromo no jasi mu vaejarue aho ajamuinego bogo juhuonivo'i biririvoromo jasi jöho ma-sama'e majëhinövo'irarëjo. ³⁰ Jasi muemu vaejaje ae Iesuare jöëni ri'öromo guomo guomo'e aribövioho ajëmiromo darugo'e mue gö gö vaejago aëro garomo jöho mae uehorovo'irarëjo. Ahia mino'ëjo.

³¹ God-are örire ëhi atamu gagorovo jabuhu raromaruoho hijiohi-jiovamu God-are Aru'aho hesi darugohuro ae aho'obëhe jabesi dë vövöbajo'oho rarovamu bogo juhuonivo'i biririvoromo God-are jöho atobe va'areje.

Iesuare ariböviehu huë baeromo ajamirovonövare jöhoje.

³² Èhi'amu iae Iesu uehorovarue aribövioho aho'obëhe uehore gemu dë vövöbajo'e gemu baeromo bogo uvonövareje: Nasi höromo sivu sivu bahi'i a'i uvonövareje: Ae aho'obëhe nosi höromo ma-gemuoro bahinövareje. ³³ Apostle ömo'ömhuro darugo ma'o ae majëhiromo uënövareje: Bada Iesu guomoromo ri'öjè'ëro hijamu nosi nunëro gavë'e javuajëjo. Èhi'o'ego God-are huë mahuro ë aribövioho aho'o ruahö'öjëvonövadeje. ³⁴ Ruahö'öjëvo'ego Iesuare aribövioho aho'obëhe

i runo'e bövie bise'e eni jëvonövadeje. Ëhesi bëhoho ae rahu sa'ae o javue ma-jio'amë'oho imo'amoromo monioho ujuohoromo rueromo
³⁵ apostle jabesi övore bahinövareje. Bahi'ego apostle-ho jaburo ganövare Iesuare ae gö gö rabe bogojamu gavë'oho suvuorëminövareje.

³⁶ Suvuorërijamu iae ae gemu hesi ihoho Joseph-ro mue gemuoho vaejadeje. Joseph-are iho göho apostle ömo'ömohuro Barnabas jumuvareje. Barnabas huotovë'e hesi bëhoho biriri bojëmaje ahoje. Hesi agano ihoho Levi raje jiadeje. Cyprus sa'are jioromo rovadeje.
³⁷ Rovë'ëro hiromomo sa'ae gö imoromo monioho barueromo apostle jabesi övore bojëmadeje ae suvuorëmiröhego.

5

Ananias'o Sapphira'o sareri sareri'e jö majëhijare jöhoje.

¹ Ëhi jië'e mu maho vaejumu röhu ae göëro mu sisëho vaejadeje. A hesi ihoho Ananias jio'i hesi vaboro ihoho Sapphira jiadeje. Ananias-ro mu sisëho vaeromo jabesi sa'aho gö imoromo ² subivëhoromo moni vitu hesi tario bamadoho vaborohuro iae gavadeje. Vituho hesi tario bamo'i vituho apostle ömo'ömoho i'imëmiromomo sarerëmiromomo uëvadeje: Sa'a imode hesi ijo bajoho iae bojëmi barëj'e jevajëjo.
³ Bojëmi barëj'e jevajëjumu Peter-ro uavadeje: Ananias Satan-hu dinamijadoho ja rabëni ejahoromo hesi jöho baejane höjo. Nadi God-are Aru'ahoho sareramiro mo sa'a moni vituho subivëhoromo tario bamoromo uö'ibejanëjo: Na sa'a hesi monioho iae bojëmi barëj'e jevajëjo. ⁴ Sa'a bogo imane majaroho ëho jasi jiade höjo. Jero jasi ga'ibejanëjo imavego o bogo. O sa'a imanevare monioho aho'o jasi jiade höjo. Jero jasi ga'ibejanëjo ae bojëmavego o jasi ma'enavego. Röhu ja rabëni ëhioho ë'i uehorovane höjo. Ëhi ë'ano ho ja bogo ma-aemuoho sareramui'i God'o sareramijane höjo. ⁵ Jöho ëhi majahijamu hejë'i Ananias sa'are beromo guomadeje. Guomamu ae aho'obëhe ë jöho hegorovo sisë maro juhuonivareje. ⁶ Amo guomamu a i'o ömo'ömohuro rueromo sinoho niögëro numoromo bava'oromo guavareje.

⁷ Guavamumu majae 3 hours rabu'e barëjumu gagorovo vaborohuro hesi baru guomade jöho bogo hejë'e ma-rovadeje. ⁸ Rovamu gagorovo Peter-ro uavadeje: Ave jöho uevego na hejëjo. Sa'aho imoromo na jemë monioho avemino'e baejarije höjo o gö'o döre baejarije höjo. Baejarije höjumu sareramiro mo uavadeje: Iae ëmino'e baejë'ëro jemesi örire bojëmi barëj'e javuajëjo.

⁹ Bojëmi barëj'e javuajëjumu hegorovo Peter-ro uavadeje: Ja'o jasi baruohu'o jemë rabëni uvarije höjo: Nani Badare Aru'ahohuro bogo göromomo i'uoho bojamui'ajëromomo ëma sareramuijarije höjo. Nadi ëhioho ë'ibejarijëjo. Aveho gavëjo. Aribövioho jasi baruohu'o guavë'ëro aruëre ojanore rovaruoho hejëjo. Jasi sinohu'o bava'oromo guavo'aruëjo.
¹⁰ Ëhi uavamu gavë'i vaborohuro Peter-are bëhire ma-majioho beromo guomadeje. Guomamu rue a i'ohuro osare rueromo gavare vaboroho mami'e guomë'e jiamu gagorovo amonö bava'oromo hesi baru hesi bëhire guavareje. ¹¹ Ëhi'amu ekaresiae aho'obëhe o a ioro'ioroho jabu'o ë jöho hegoro sisë maro juhuonivoruomadeje.

Apostle ömo'ömehu noehu bogo gavarue darugo'e mu vaenövare jöhoje.

12 Ĕhi ěl'ěro iae God-ro ajěmi'ego apostle ōmo'ōmohuro bogo gavarue darugo'e muoho aho'oběhe vae'ego ae aho'oběhe ganōvareje. Ĕhi'o'ego Iesuare aribōviohuro God-are amo bōrōmore iojioromo amo bōrōmo hesi harada ihe Solomon-are haradare ě gemuoro gagovoronōvareje. 13 Gagovo'ego a ioro'ioroho jaburo Iesuare aribōvioho mae uehorověvo'i rōhu juhuonivoromo bogo ěma gemuoroho va'o raromonōvareje. 14 Bogo ěma gemuoroho raromo'i rōhu ae magonahe gō'o gō'o aho'oběhe Bada mae uehorovoromo Iesuare aribōviohu'o aevoromo gemu mae raromo jijihonōvareje. 15 Ĕhi jiě'e mu masijoho rově'ego aěro guomo guomo'e aribōvioho ōrire ujuoho ruenugoromo momorō'ōjarue rōho nu ano'e gōre gōre ě bahinōvareje Peter rova'ego hesi ōvehu bogo ajěmijě'oho rōhu hesi maja aru'ahohuro baměvego marě'irōhego. 16 Ĕhi'o'ego ae aho'oběhe Jerusalem-nōrire amo gōre gōre raromarue aribōvioho jaburo guomo guomo'e aribōviohu'o aru'aho sisěhu simano sisě vaejěhě'e aribōviohu'o ujuoho rue'ego apostle ōmo'ōmohuro jabumě aho'oběhe ajěmiromo avohěvonōvareje.

Jew rajo a masijehu Iesuare apostle aribōvi sisě vaejěvare jōhoje.

17 Ĕhi'amu gagorovo iae Jew rajo priest bōrōmohu'o hesi aemo'aeme Sadducee aribōviohu'o ěho jaburo apostle jabesi mu maho garomo dě vōrōnimareje. 18 Dě vōrōnimoromo ri'ōromo apostle aribōvioho gudu-aměvoromo ujuoho va'oromo savoji gagore io'amamu sisě aribōviohu'o gemuore raromareje. 19 Savoji gagore raromamu vahiromamu gagorovo Badahu nugō'ōjade anerahuro rueromo ojoho jiověhoromo apostle aribōvioho sōjěvo va'oromo amonō hōrōjadeje. Hōrōromo uěvadeje: 20 Va'irarijoho God-are amo bōrōmoro riravoromo Iesu uehorovoromo mae raromo'irōhe ōri hesi jōho majěhirego ae aho'oběhe he barě'irarějo. 21 He barě'irarějamu hegorovo va'oromo sisonuvamu gagorovo God-are amo bōrōmore ajio riravoromo aevoromo Iesuare jōho majěhijareje.

Ĕhi'amu Jew rajo priest bōrōmohu'o hesi aribōviohu'o ěho jaburo rueromo Jew rajo a duvahoho aho'oběhe jōe nugō'ōromo uěvareje: Jew rajo a masijoho aho'oběhe ro gemuoro gagovorego no jōe mevo'irarějo. Mevo'irarěromo jōe nugō'ōromo police-oho uěvareje: Savoji gagore aribōvioho sō ujuoho ruehějo. 22 Sō ujuoho ruehějamu hegorovo va'oromo gavare savoji gagoroho apostle aribōvioho bogojěvamu gagorovo vuonorō'ō rueromo Jew rajo a masijoho uěvareje: 23 Noro va'oromo gavare hōjo savoji gago hesi ojoho tugoho titimo'amě'ero muebejarue aribōvioho ojore ojore atovoromo riravoruomamu gěgorovo ojoho jiovoromo osare va'ihō gavare hōjo Iesuare aribōvioho bogojěvamu. 24 Ĕhi uěvamu hegorovo God-are amo bōrōmo atovaje police bōviohu'o priest masijohu'o uvareje: Diehi jiě'ěro bogo'e hōjo. 25 Bogo'e hōjamu ae gemuěro rueromo uěvadeje: Jōe hehějo. Savoji gagore io'amarije aribōvioho jaburo God-are amore riravoromo ae aho'oběhe jōe rōjěhijaruějo. 26 Rōjěhijaruějamu hegorovo rue police bōviohu'o hesi běhire raromarue aribōviohu'o ěho jaburo apostle ōmo'ōmoho sō ujuoho rue'i va'areje. Va'oromo uvareje: Noehu jabumě guduaměvě'oho ae aho'oběhe no gōromo bijōnimoromo muněro

vajamui'aruëromo juhuonivoromo apostle bogo guduamëvë'e ma-sö ujuoho rovareje.

²⁷ Ujuoho rueromo Jew rajo a masijo jabesi nunire rëmamu ë rivareje. Rivavamu gagorovo priest bërömhuro uëvadeje: ²⁸ Noro darugo'e jöho mami'e bojëmiromo jemë uëvare höjo: Iesuale ihoroho bogave gemu aho jöho röjëhi'irarijëjo. Röhu jemëro jemesi jö sisëho röjëhi'i arijamu Jerusalem amo rajoho ae aho'obëhe heruomë'e höjo. Ëhi'oromo nimarujëjo Iesu anamu guomade mu hesi i'uoho noro bae'iröhego.

²⁹ Ëhi uëvamu hegorovo Peter'o apostle ioro'iorohu'o jaburo uëvareje: Iae no hejaruëjo röhu jemesi jöho gö jio'i God-are jöho gö jio'lego ëhuni nomë God-are jöho ejaho'ejarëjo a jöho bogajo. ³⁰ God nosi hijo miono'o muebe'amonövade ahuro Iesu ajamamu guomoromo ri'öjade höjo jemëro hu ijore ano taemamu guomë'ëro. ³¹ Ri'öjamu God-ro hesi ihoho döro bamoromo uavade höjo: Rojo nasi övo manö hijëjo. Hiromo ae aho'obëhe jabesi bëröme namiromo maro bamëvo'irane aho jionëjo. Ëhi jioromo öroho jiovëhego Israel rajoho jaburo uehoro sisëho vuonugego God naro jabesi sisëho dejonö bu'öjëho'irode höjo. ³² God-ro ëhi jië'e muoho vaejamu nosi nunëro gavë'ëro ë hesi jöho ae majëhijarue höjo. Röhu bogo no gemu majëhi'i God-are Aru'ahohu'o ajamuiromo ae majëhijaje höjo. Ae rahu God-are jö ejahë'oho Aru'ahoho God-aro baejarue höjo. Amo hu'o ajamuiromo ae majëhijaje höjo.

³³ Ëhi uëvamu hegorovo rue Jew rajo a masijohuro vörö'iraeromo apostle ömo'ömoho muo'amojoro uvoruomadeje. ³⁴ Uvoruomamu jabesi ae gemuëro jöe jövo'i ri'öjadeje. Ëa hesi ihoho Gamaliel jiadeje. Hu Pharisee ae jiadeje. Hu Jew rajo jögoru öri röjëhijaje ae jiamu ae aho'obëhe hesi örire mae uehorovoruomadeje. Ëaho Gamaliel-ro ri'öromo a masijo ioro'ioroho uëvadeje: Ëaribövioho rori'o sö va'ego na jö harihe majëhijego evaro sionëro sö ruerëjo. ³⁵ Sö ruerëjamu sö ujuoho va'amu evare uëvadeje: Israel rajomë rue Iesuale aribövi muo'amo'i uvarujoho o jabesi örire rabe rabe vae'i uehorovë'oho nadi nuni rumo'oho ma-vae'i uehorovo avohoromo vaerëjo. ³⁶ Ëhesi bëhoho rabëni ma-bisemu urimo ae gemu hesi ihoho Theudas-ro rovade höjo. Rueromo ae uënövade höjo: Na a bëröme jevajëjo. Ëhi uë'lego ae aho'obëhe 400 rabu'e hesi ijore ijore jijihonövare höjo. Hesi ijore ijore jijihojuvo aëro Theudas anamu guomamu hesi aribövioho aho'obëhe arua anumiae va'oruomamu hesi muoho sisërë barëromo bogojade höjo. ³⁷ Ëhi ë'ë'ëro sa'are a jabesi iho baeruomade majare ae gö hesi ihe Judas Galilee sa'a rajohuro rovade höjo. Rueromo jöe majëhiromo jabesi simanoho huotovëhë'ëro ae aho'obëhe hesi ijore ijore jijihonövare höjo. Jijihamu aëro Judas'o anamu guomamu ë hesi aribövioho aho'obëhe arua anumiae va'o barëjade höjo. ³⁸ Va'o barëjë'lego ëhuni naro ave jöho majëhiromo uëvajëjo: ËIesuale aribövioho ma-nunëremu gëromo vuororëmirëjo. Ëhesi bëhoho rabëni jabuhu vae'i nimoruomaje muoho ma-a jabesi mu jiajoho Theudas'o Judas'o jabesi muehu sisërëjadëhi Iesuale aribövi jabesi muohu'o ëhi sisërë'ajëjo. ³⁹ O God-hu bojëmade mu vaejaruohuro jemë jabumë bogo iosirëmi varijënoho jëvajëjo. Iosirëmi'ië'oho uvo'a'arujëjo: Nani no ae

gö'lo muorovaruë'i ga'a'arujëjo God'lo muorovëvo'iramu.

Jöho ëhi majëhamu hegorovo ë Jew rajo a masijohuro ejahoruomadeje. ⁴⁰ Ejahoromo ae uëvamu apostle aribövioho osaëro sö rovereje. Sö rovamu gagorovo hisuebijëvojöro uëromo apostle-ho uëvareje: Ijoho bogave Iesuare ihoroho jöho aho majëhi'irarijë uëngoromo jiovo rëmö'öjareje. ⁴¹ Rëmö'öjamu uvareje: God-ro no mae uehorovavuë'ëro ëhuni hu uvajëjo: Noehu Iesuare jöëni i'u baejaruoho iae eni javuajëromo nimorohobe Jew rajo a masijehu jiaruire jioromo va'areje. ⁴² Va'ë'ëro Iesuare jö mae majëhinövaroho bogo vuonugol'i majae ëhi God-are amo bërömore va'oromo jabesi osare osare va'oromo ae uënövareje: God-hu uavë'ëro bëröme namiromo ajamuaje aho iae Iesu höjo. Jöho ëhi majëhiromo ë hesi öroho rjëhinövareje.

6

Ae aho'obëhe 7-hu ekaresia ajëmiromo moni mu muebejëhoröhego ekaresiaehu baejëvare jöhoje.

¹ Èhi'amu ae magonahe aho'lo ro Iesuare aribövi gemuoro havobe va'amu bërömoraejadeje. Bërömoraejamu Greece huëhu atarue Iesuare ariböviohuro dë vörönëgamu jöe atoromo uvareje: Ijo bajo magonaho doru majae ëhi suvorëmijaruoho nosi Greece huëhu atarue magonahoho ijo bajoho bogo avoho baejarue höjo. ² Èhi atamu hegorovo apostle aho'lo 12-ho jaburo Iesuare ae magonahe aho'obëhe gemuoro gagovojöro jöe nugö'öjareje. Jöe nugö'öjamu ro gemuoro gagovamu gagorovo uëvareje: Apostle nosi muoho God-are jö majëhijaruoho höjo. Noehu God-are jö majëhijaruoho bogo avoho ma'eno'i moni suvorëmijarue muohu'o vaejë'o ho ëho bogo maho höjo. ³ Aganomë bogo maho jië'e jiaje ëhuni ga'irarije di aho ae aho'obëhe uvarujoho: God-are Aru'ahohuro dë vövöbajore rarevë'ëro jabumë simano mae uehorovarue aribövioho hö uvarujoho ëhi jië'e aho aho'obëhe 7 ëmino'e jabesi ihoho uövuego noro ë moni muro bamëvego jabumë ëho muebe'irarëjo. ⁴ Èaribövioho 7 jaburo suvorëmi'iröhe muoho muebe'iramu noro ë muoho vuonugol'i God-are örire jöe atoromo hesi jöho majëhinövö'ëjarëjo. Èhuremu uehorovonövö'ëjarëjo.

⁵ Apostle-ho jaburo ëhi majëhijamu hegorovo ae magonahe aho'obëhe uvareje: Jö mae höjo. Jö mae hö uvoromo ejëhoromo Stephen baejareje. Stephen Iesu mae uehorovo avohamu God-are Aru'ahëro rumorovë'te ae jadeje. Stephen baeromo Philip Prochorus Nicanor Timon Parmenas Nicolaus ëho jabu'o baejëvareje. Nicolaus mami'e Antioch amore jioromo rovadeje. Urimoho bogo Jew rajo jiadoho ijonö Jew rajo muoho baejadeje. ⁶ Èaribövioho 7 baejëvonugoromo sö ujuoho va'oromo apostle jabesi nunire rëmareje. Jabesi nunire rëmamumu apostle-ho jaburo jabesi jöëni God-are örire jöe atoromo öve simanore bamëvareje ë ijo bajo suvorëmiröhe muoho vaeröhego.

⁷ Èhi ë'ë'ëro God-are jöho Jerusalem ame bövioho rumorovamu Iesuare ae magonahe Jerusalem raromaruoho ae aho'obëhe jiobe va'adeje. Ae aho'obëhe jiobe va'ojuvo Jew rajo priest ae aho'obëhe Iesuare jöho aevoromo ejahareje.

Jew rajo a masijehu uëvamu Stephen guduamare jöhoje.

⁸ Ĕhi'amu iae God-ro Stephen mabēhe ajamiromo darugoho bo-jami'ego ēhuro bogo gavarue darugo'e mu masije gō gō ae aho'obēhe jabesi nunire vaenōvadeje. ⁹ Mu masijoho vaejamu Jew rajo a ioro'iorohuro ri'ōromo Stephen-are jōho aho'ahamijareje. Jō aho'ahamijare aribōvioho ioro'iorohuro Cyrene amore Alexandria amore jioromo rovē'ēro Jerusalem raromoromo Jew rajehu God rajahjarue osae gemuore gagovoromo God rajahinōvareje. Ĕosa hesi ihoho Jiovo Rēmō'ōjē'e Aribōvi Jabesi Osaho jiadeje. O ioro'iorohuro Cilicia sa'are Asia sa'are jioromo rovē'ēro raromareje. Ĕaribōvioho jabu'o Stephen-are jōho aho'ahamareje. ¹⁰ Aho'ahami'ego God-are Aru'ahohuro Stephen simano mae bojami'ego huhu jōvaje jō ahorōhoho bogo eni jēvonōvadeje.

¹¹ Bogo eni jēvamu gagorovo jabumēro a ioro'ioroho ijo bajoho bojēmiromo uēvareje: Jemēro ae aho'obēhe sarerēmiromo uērējo: Noro hejare hōjo Stephen-ro Moses'o God'o jabesi jōho sisē'i jōvavamu. ¹² Ĕhi majēhiromo Jew rajo a duvaho jabesi o jōgoru ōri rōjēhijarue aribōvi jabesi o ae magonahe aho'obēhe jabesi dē vōvōbajo'oho huotovēhamu dē vōrōnimoruomadeje. Dē vōrōnimoruomoro rueromo Stephen guduamo bava'oromo Jew rajo a masijo jabesi nunire nugareje. ¹³ Jew rajo a masijo jabesi nunire nugoromo a ioro'ioroho sō rovereje jaburo ē a masijo jabesi nunire Stephen-are jōho sarerēmirōhego. Sō rovamu ēho jaburo Jew rajo a masijoho sarerēmiromo uēvareje: Ave iahuro God-are osa bōrōmoho sivoromo Moses-hu bojamuijade jōgorohu'o sivemu sivaje hōjo. ¹⁴ Ĕhesi bēhoho noro hejare hōjo Stephen-ro uvamu: Nazareth rajoho Iesuro God-are osa bōrōmoho dadovoromo Moses-hu bojamuijade muoho aho'o tugoho'i mu i'e bojamui'ajējo. Stephen-ro ēhi jiē'e jō sisēho jōvamu hejare hōjo. ¹⁵ Sarerēmiromo ēhi majēhijamu hegorovo rue Jew rajo a masijohuro Stephen gemu ērimahoromo gavareje hesi nu ano'oho anera jabesi nu ano'o va'ēne jiamu.

7

Israel rajehu God-are jō bijōnimobe rovere jō Stephen-hu majēhijadohoje.

¹ Anera jabesi nu ano'o va'ēne jiamu gagorovo priest bōrōmohuro Stephen uavadeje: Jasi jō sisē uōvuaruoho ē jōho na ma jōe o sareri jōe hōjo.

² Mae o sareri jōe hōjamu hegorovo Stephen-ro uēvadeje: A duvahohu'o agano ioro'iorohu'o naehu jō harihu majēhi'iē'ajoho hehējo. Urimē'i God-ro nosi hije Abraham-are nunire rovade hōjo. U'emu Abraham-ro Haran sa'are va'irōhēro ē hesi urimo Mesopotamia sa'are hijamu evare God aji'ere hijaje ahuro hesi ōrire rovade hōjo. ³ Rueromo uavade hōjo: Jasi aganoho sa'aho vuonugo'i naehu rōjahi'irode sa'ahuro ēhuro va'onējo. ⁴ Ĕhi uavamu hegorovo Chaldea sa'aho vuonugo'i Haran sa'are va'oromo ē hijade hōjo. Hiromo hesi vavuoho guomamugo God-ro uavamu ave jemēhu raromaruje sa'are ro hijade hōjo. ⁵ Rueromo hijamu evare majaroho God-ro sa'aho bogo gō bisemu vadu'oho bojamade hōjo. Bogo bojami'i a'i mae majahiromo uavade hōjo: U'emu bojēmi'ejōjo ja'o jasi ujohu'o ave sa'aho bae'irarijejo.

Abraham harihu rumo'e jië'e röhu God-ro ëhi jövade höjo. ⁶ Ëhi uaromo uavade höjo: Jasi ujo ömo'ömoho sa'ae göro va'o raromoruomo'ajëjo. Raromo'iramu ë sa'a rajohuro i'u'e mue huë vavaene bojëmi'iramu jabesi darugoremu raromoro huë vavaene baebe va'ojuvo vadune aho'obëhe 400 barë'ajëjo. ⁷ Barë'iramu jemesi ujo ömo'ömehu vaejoro i'u'e mu bojëmaje aribövioho God naro gëromo i'ue mana bojëmi'ejëjo. I'ue bojëmi'iramu evare jasi ujo ömo'ömohuro ri'öromo ë sa'are jioromo rueröhoho ro ave dirö'ore na rajehiruomo'ajëjo. ⁸ Ëhi mae uanugoromo uavade höjo: Jasi a jabesi sinoho tarivo'amobe va'onövorëjo. Ëhuro na uvo'irode höjo: Nasi aribövie jëvajëromo muebejëvo'irode höjo. Ja'o jasi ujo ömo'ömohu'o jemëro ëhi ë'onövorëjo. Ëhi uavë'ëro ijönö Abraham-ro harihoho Isaac baeromo hurae gemu barëjamu gagorovo sinoho tarijahamu God-are harihuraejade höjo. Ëhi'amu ijönö Isaac-ro harihoho Jacob baeromo hesi sinoho ëhi tarijahade höjo. Ëhi'amu ijönö Jacob-ro hesi harihe aho'obëhe 12 nosi hijo miono'o jabesi sinoho ëhi tarivëhobe rovade höjo.

⁹ Ëhijo miono'ohuro masijoraeromo Joseph-are mu mahuni dë vörönëgamu hu ae gö imëvoromo mana baejare höjo. Mana baejamu rue imare ariböviohuro Joseph baeromo Egypt sa'are abuejare höjo. Abuejamu God-ro Joseph'o gemu mae juvade höjo. ¹⁰ Joseph'o gemu mae juvoromo Joseph-ro vavaene bae'ego gagoro ajami'ego mae hinövade höjo. Mae hijamu God-ro hu ajamiromo huë mae uehoro mae bojami'ego mu mae vaenövade höjo. Mu mae vaejamu gagorovo Pharaoh Egypt sa'are simano vaejaje ahuro Joseph-are muoho garomo rajahiromo uavade höjo: Nasi Egypt sa'aho o bövie bise'e avoho muebejëhonëjo. ¹¹ Ëhi uavamü muebebe va'ë'ëro iruno'e bogojiego ëma raromarue majaho rovamu ae aho'obëhe nume Egypt sa'are ave Canaan sa'are raromaruohuro huë vavaeni döro raromare höjo. Raromoro nosi hijo miono'ohuro ie nahoromo gavare höjo bogojiamu. ¹² Ie bogojiamu gagorovo Jacob-ro hejade uvavamu: Nume Egypt sa'are iruno'e iae jiajëjamu hegorovo hesi harihu ömo'ömoho uëvade höjo: Egypt sa'aro abueromo iruno'e imoromo ujuoho ruerëjo. Ruerëjamu aevoromo Egypt abuejare höjo. ¹³ Abuejë'ëro vuonorö'öromo Canaan sa'are rojomareje. Rojomë'ëro röhu maho Egypt abuejamu gagorovo Joseph-ro huruohoromo uëvade höjo: Na jemesi öe jevajëjo. Ëhi uëvamu Egypt sa'are simano vaejaje ahuro Joseph-are agano jabesi jöho hejade höjo. ¹⁴ Hejamu Joseph-ro jöe nugö'öromo vavuoho uavade höjo: Ja'o agano ioro'iorohu'o Egypt sa'aro ruerëjo. Ëaganoho aho'obëhe 75 ëmino'e jiade höjo. ¹⁵ Jöe nugö'öjamu hegorovo Jacob'o hesi aganohu'o Egypt abueruomade höjo. Abuejë'ëro ë vuovëvade höjo. ¹⁶ Vuovëvamu jabesi sinoho vuonorö'ö ujuoho rojomoromo Shechem amore ë guavare höjo mami'e jabesi hije Abraham-ro Hamor rajo aribövioho monie bojëmiromo ë sa'aho imë'ëro.

¹⁷ Guavamü nosi hijo miono'e Egypt raromaruohuro ae aho'obëhe jiobe ruejuvo God-hu mami'e hesi ujo ajëmi'i Abraham uavadëhi ëhi ajëmi'iröhe majaho dunovade höjo. ¹⁸ Dunovamu gagorovo sa'are simano vaejaje ae gö Joseph bogo gavadohuro ri'öromo Egypt sa'aho muebejëjade höjo. ¹⁹ Egypt mueberomo nosi aribövioho sarerëminövade höjo. Sarerëmiromo nosi hijo miono'oho sisë vaejëvoromo uëvade

höjo: Jemesi harihu ininoho amonö bahiromo ehuro vuonugo'amego vuovëho'irajo. U'ëgo ëhi ë'onövare höjo. ²⁰ Ëhi'amu Moses rahade höjo. Aharihu hesi nu ano'ocho mabëhe jiade höjo. Nu ano'ocho mae jiamu hesi vëmu vavu'ohuro jabesi osare muohojuvo manaere niö'i gemu barëjade höjo. ²¹ Manaere niö'i gemu barëjamu gagorovo amonö banugare höjo. Banugamu gagorovo sa'are simano vaejaje a hesi abojohuro rue'i gavade Moses raromamu gagorovo baeromo va'o hesi muohade höjo. Muohamu böviraejade höjo. ²² Böviraejamu Egypt rajohuro jabesi mu mae jö mae bövie bise'e röjahijamu bae barëjade höjo. Bae barëjël'ëro jö börömo jövoromo mu masijo vae'amaje ae jiade höjo.

²³ Ëhi'ojuvo Moses vadune aho'obëhe 40 barëjamu gagorovo huro uehorovoromo uvade höjo: Jaruvoho na va'oromo nasi Israel rajo aribövioho gë'ejö gë'i diehi raromego. ²⁴ Ëhi uvonugoromo va'i gavade Egypt raje ae gemuëro Israel raje ae gemu hesi örire mu sisë vaejamu gagorovo Israel rajoho ajamiromo Egypt rajoho i'ue mana bojamiromo ano bamade höjo. ²⁵ Ano bamoromo uvade höjo: Nani nasi ariböviohuro uehorovoromo uvarue höjo: God-ro nörö ua'iramu nöröro no ajamui'iramu avare darugore raromaruoho vuonugo'i va'o mae raromo'ëjarëjo. Ëhi uvarue hö uvadoho bogo ëhioho jiade höjo. ²⁶ Ëhi'ë'ëro nörö Moses-ro gavade höjo Israel raje niö'iro muororovamu. Muororovamu gëgorovo ahëvë'i uëvade höjo: A niö'imë agane gemuoho jëvajëjo. Röhu jemë rabëni muorovarujëjo. ²⁷ Ëhi uëvamu hegorovo mu sisë vaejade ahuro ri'öromo Moses övëro rori'o biduohö'öromo uavade höjo: Ja raro ua'ëgo böröme vaeromo nosi muoho garomo ahavuanuëjo. ²⁸ Ja nëri Egypt rajo ananëhi na ja ëhi anego'iro ë'anuëjo. ²⁹ Ëhi uavamu hejël'i Moses-ro Egypt sa'are jioromo ju'ëbiromo va'adoho va'o Midian sa'are ë hijade höjo. Ëhiromo harihe niö'i ömëvade höjo.

³⁰ Harihe niö'i ömëvoromo hijuvo vadune aho'obëhe 40 barëjamu Moses-ro a rumo'e sa'are Sinai dahoru bëhire nami'i gavade höjo ijo hisue vënehu ravo'ëgo anerae gemu ririre hijamu. ³¹ Ëhijamu gagorovo tiöromo avoho ga'i bëhire va'ihö hejade höjo Badaro uavavamu: ³² Na jasi hijo miono'e Abraham Isaac Jacob muebejëvaje aho God jëvajëjo. God jëvajëjamu hegorovo Moses-ro avoho ga'ië'adoho juhuonivoromo butubutumoromo bogo avoho gavade höjo. ³³ Bogo avoho gavamu Badaro uavade höjo: Ave sa'aho nasi sa'ae jiaje na mae uehorovevoromo hörü guduoho jijövëjo. ³⁴ Naro iae gëvode höjo nasi ariböviohuro Egypt sa'are sisë'i raromamu gavë'i hejode höjo jabumë hara'uavavamu. Ëhuni na ruvebijë'e jëvajëjo jabumë ajëmego sisë'i raromaruoho vuonugo'i mae raromoröhego. Ëhi jië'e jiaje ri'öjogo na ramö'öjogo Egypt sa'aro va'ëjo. God-ro Moses-are örire ëhi uavade höjo.

³⁵ Ëaho iae Moses höjo. Urimë'i Israel rajo ariböviohuro ë ae gemuoho bijönimoromo uaruomade höjo: Ja raro ua'ëgo böröme vaeromo nosi muoho gavanuëjo. Israel rajo ariböviohuro Moses ëhi bijönimoruomamu God-ro hu bæjade höjo. God-ro hu baeromo hu börömoho bojamade höjo. Ëhesi bëhoho God-ro uavamu vënehu ravade ijo hisu ririre hijade anerahuro Moses nugö'öjamu Egypt sa'are abueromo a böröme namiromo Israel rajo aribövioho vavaene jëvamu

baejëvoromo maro bamëvade höjo. Ëhi jië'e mu börömoho God-ro Moses bojamade höjo. ³⁶ Ëae gemuoho Moses-ro Egypt sa'are hiromo bogo gavarue vörö'e muoho vae'amoromo Israel rajoho Egypt sa'are jioromo sôjêvo va'adoho va'o jovo e'ure jovo ihe Kavue'e Jovore darugo'e muoho vae'aromo sôjêvo va'adoho va'o a rumo'e sa'are darugo'e muoho vae'amobe va'ojuvo vadune aho'obêhe 40 barëjade höjo. ³⁷ Ëae gemuoho Moses-ro Israel rajoho uëvade höjo: God-hu na remö'ojamu rovodëhi jö hesiro baeromo majëhi'iröhe a göhu'o huro ëhi nugö'ö'iramu rue'a'ajëjo. Hu jemesi sa'a raje jio'a'ajëjo. Ëhi uëvade höjo. ³⁸ Ëae gemuoho Moses Israel rajehu a rumo'e sa'are gagovoromo raromaruire hu'o ë gemuore hijade höjo. Hu Sinai dahorure hiromo anera hesi jöho baeromo anumiae abo hijo miono'o'oho majëhinövo numeho jabesi jöho aruhiae ajio aneraho majahinövade höjo. A i'ovëvo'iröhe jöho God-aro baejade höjo nosi örire bojamui'iröhëro.

³⁹ Ëhi ë'amu nosi hijo miono'ohuro Moses-are jöho bogo ejahare höjo. Bogo ejaho'irögoro a'i Moses juhamiromo Egypt sa'are vuonorö'ö va'irögoro ë'are höjo. ⁴⁰ Va'irögoro Aaron uaruomade höjo: Inömoho avoho'amego no ëho masije hö uvoromo jabesi ijore ijore jijih'o'irarëjo. A'i Moses sôjavuo rovade aho no bogo gavaruëjo hu dinö'e höjo. ⁴¹ Ëhi atonugoromo cow harihu nu ano'o va'ëne inömoho avohoromo uvare höjo: Ave inömoho darugo'ego ma-hu gemu uehorovonövo'ejarëjo. Ëhi uvoromo mie muo'amoromo vëniro mueromo rajahiromo bahijahare höjo. Jabumë övehu avohare inömoho ëho uvare höjo: Börömoho höromo hesi ihoro söröho ijare höjo. ⁴² Ëhi'amu gagorovo God-ro jabesinö dejoho bu'öromo uëvade höjo: Jemëro jije mujöre ëho rajëhibe va'orëjo. Jemëhu nëgajëhi ëhi ë'orëjo. Ëhesi jöho jö God-aro baeromo majëhinövare aribövi jabesi surire jajivoromo uvë'e höjo: God-ro uëvajëjo: Israel rajomë mie muo'amoromo vëniro mueromo bahibe a rumo'e sa'are vadune aho'o 40 jijiharije höjo. Na jemë na rajehi'i ë'arije höjo. Bogajo. ⁴³ A'i ae gö jabesi god ihe Moloch ë hesi niögu javuoho baeromo jijiharije höjo. Ae gö jabesi god ihe Raphan hesi jiji nu ano'o'oho baeromo jijiharije höjo. Einömo sisëho jemesi övëro avoho'amarije höjo uvene aho röjahi'irarijëro. Ëhuni na jemë rëmö'ö'ejöjo öre ëgoro va'oromo Babylon iosiramiroromo rori'o va'o raromo'irarijego. God-are surire jöho ëhi jajivë'e höjo.

⁴⁴ Nosi hijo miono'ehu a rumo'e sa'are raromo jijiharevare evare God-are niögu javu börömoho jabesi örire jiade höjo jaburo ëho garomo uvoröhego: God-ro no'o gemu mae juvaje hö uvoröhego. Ëjavu vaeröhe hesi öroho God-ro röjahijamu Moses-ro ëho garomo ae uëvamu ëhi vaejare höjo. ⁴⁵ Vaejamu nosi hijo miono'ohuro baejare höjo. Baej'ëro vuovëvamu jabesi ujoho jaburo baejare höjo. Baeromo Joshua-are ijore va'oromo ave sa'are rueromo gavare höjo urimore raromare aribövioho God-ro bisihö'öjëvamu gagorovo ave sa'aho baeromo javu börömoho ë bamare höjo. Bamamu javuoho ë jiobe ruejuvo David-ro böröme namiromo Israel muebejëvade höjo. ⁴⁶ Muebejëvoromo mu mae vaeromo God-ro hu mae uehorovamu uvade höjo: Na negajëjo javu maho vaejego Jacob muebenövade aho God-ro ë hiröhego. ⁴⁷ Röhu hu bogo a'i Solomon-ro God-ni javu maho vaejahade höjo.

⁴⁸ Ëhi ë'ade höjo röhu God dö mare hijajëro aehu övehu vaejहारue osaroho bogo hijaje höjo. Osare bogo hijaje jöho jö God-aro baeromo majëhinövade ahuro jajivoromo uvë'e höjo:

⁴⁹ Badaro uvavohijajo: Na hijajoho ö'idöre höjo.

Höroho sa'are bamaje höjo.

Ëhi jië'oho diehi jië'e javue nanioho vaerëjo.

Nuho'irode osaho dinö'e avohorëjo.

⁵⁰ Jemë bogo eni jëvo'ajëjo naro nasi övëro ave inömoaho aho'obëhe bamë'ëro jevë'ëro.

God-are surire ëhi jajivë'e höjo.

⁵¹ Sareri hia'i biriri'e aribövie jëvavëjo. Dë vövöbajo'oho gö gö uehorovarue aribövie jëvavëjo. Hia'e tugohë'e aribövie jëvavëjo. Jemesi hijo miono'ehu ë'onövarëhi ëhi ë'aruje höjo. God-are Aru'ahoho bijönimobe rovarue höjo. ⁵² God-are jö majëhijarue aribövioho jemesi hijo miono'oho rabu'e aribövioho bogo sisë vaejëvare höjo. Mami gö'e God-ro ae rëmö'öjamu jaburo ae majëhiromo uëbe rovere höjo: God-are mu ma vaejaje aho rue'a'ajë uëvare höjo röhu jemesi hijo miono'ohuro muo'amare höjo. O avevejö'e jemëro God-are mu ma vaejaje aho a sisë jabesi övore bojëmamu anare höjo. Ëho jemesi sisë höjo. ⁵³ Jemesi jöëni aneraëro jö börömoaho God-aro baeromo bojëmare höjo. Röhu jemëro bogo ejaharije höjo.

Stephen munëhu vajamiromo ano bamare jöhoje.

⁵⁴ Stephen-ro jöho ëhi majëhijamu hejë'i Jew rajo ariböviohuro hesi örire dë vörönëgamu vörö'iraeromo ane vuogigimoruomadeje. ⁵⁵ Ane vuogigimamu God-are Aru'ahohuro hesi darugohuro Stephen-are dë vövöbajo'ere rarovamu ö'idöre sioroho gavadeje God ajivo'ego Iesuro God-are övo manö namijamu. ⁵⁶ Iesu ë namijamu gagorovo uëvadeje: Arueho gahëjo. Na gavajëjo ö'idöho arorovo'ego God-are A Mahuro hesi övo manö nami'ego.

⁵⁷ Ëhi uëvamu hejë'i rueho jaburo jö'e dadovoromo hia'e övo hitahiëro tugohoromo ma-darugo'o tutuvo rueruomoro Stephen ruë numë baba'amoromo riravareje. ⁵⁸ Riravoromo jagu bava'oromo rori'o nugaromo munëro vajamiruomadeje. Munëro vajami'irögoro urimo utaho'amojëni niögoho jövo bahiruomadeje a i'e gemu Saul-ro muebejëhoröhego. ⁵⁹ Niögoho bahinugaromo munëro vajamemu vajamijamu Stephen-ro uavadeje: Bada Iesu nasi aru'ahoho baejehego jasi örire ö'iröjo. ⁶⁰ Ëhi uanugaromo ague aho hiromo ma-darugo'o uvadeje: Bada ave aribövi jabesi sisëho uehorovoromo vuonugëhëjo. Ëhi uvoromo guomadeje.

8

¹ Stephen guomamu gagorovo Saul-ro uvadeje: Stephen anaroho iae mae höjo.

Saul-hu ekaresia sisë vaejëvobe juvade jöhoje.

Ëhi'amu evare majare aëro aevoromo ekaresiae Jerusalem raro-maruo mu sisë bëhe vaejëvonövareje. Vaejëvamu Iesuro aribövioho aho'obëhe Jerusalem jioromo huruomoro adovoromo va'o Judea sa'are Samaria sa'are dirö'e göro göro raromobe va'areje. Apostle

ömo'ömohuremu ëhi ë Jerusalem raromareje. ² Amo God uehorovarue a ioro'iorohuro Stephen-are jöëni darugo'o nierusuburu'e bamoromo hesi sinoho guavareje.

³ Guavamu Saul-ro ekaresiae aho'obëhe ijumëvo'i ë'onövadeje. Ijumëvo'irögoro osare osare va'oromo Iesuare aho magonahoho gud-uamo'amoromo ruho ujuoho rueromo savoji gagore io'amonövadeje.

Philip-hu Iesuare jö bava'oromo Samaria sa'a rajo majëhijade jöhoje.

⁴ Iae huruomoromo va'are ariböviohuro dirö'e göro göro Iesuare jöho majëhibe va'onövareje. ⁵ Ëhi majëhibe va'oromo iae Philip-ro Samaria rajo jabesi amo börömore va'adeje. Va'oromo majëhiromomo uëvadeje: God-hu uavë'ëro böröme namiromomo ajamuijaje aho iae Iesu höjo. ⁶ Ëhi jï'e jöho majëhi'ego Samaria raje ae aho'obëhe jaburo hesi jöhuremu avoho henövareje. Hesi jöho heromo ganövareje Philip-ro darugo'e muoho vae'amo'ego. ⁷ Vae'ego aru'aho sisëhuro jö'e dadovoromo a dëre jioromo suorovo va'onövareje. Övo höru'e vuovëhë'e höru sisë'e ëhi jï'e aribövioho marë'amonövadeje. ⁸ Ëhi'o'ego Samaria aribövioho nimorohëvo avohonövadeje.

⁹ Nimorohamu ae gemuëro ë amore hijadeje. Ëa hesi ihoho Simon jidadeje. Simon-ro iro oso'e vaebe rovamu Samaria sa'a raje ae aho'obëhe garomo jöe barëjövadeje. Jöe barë'ego huro uënövadeje: Na a böröme jevajëjo. ¹⁰ Ëhi uë'ego amo raje ae aho'obëhe ininore va'o masijore avoho heromo uvonövareje: Nani Simon hu God-are vörö røjahuijaje ae hesi ihoho Vörö'e A Börömoho höjo. ¹¹ Iro oso'e majae ëgobövie vaebe rovë'ëro ëhuni ë sa'a rajoho jöe barëjëvo'ego hesi jöhuremu avoho henövareje. ¹² Hesi jöhuremu hejë'ëro hejareje Philip-ro jö maho majëhiromomo uëvamu: God-hu böröme namiromomo muebejavuaje majaho rovë'e höjo. Iesu Keriso-are ihoho böröme höjo. Ëhi jï'e jö maho Philip-ro majëhi'ego Samaria rajo a'o magonaho'o mae uehorovoromo bapataeto vaenövareje. ¹³ Röhu iae Simon hu'o mae uehorovadeje. Mae uehorovoromo bapataeto vaeromo Philip'o gemu mae juvonövadeje. Juvoromo ganövade Philip-ro bogo gavarue darugo'e mue gö gö vae'ego garomo tiönövadeje.

¹⁴ Ëhi'amu apostle ömo'öme Jerusalem raromaruohuro hejare uvavamu: Samaria rajohuro God-are jöho ejaharuëjamu hegorovo Peter'o John'o rëmö'öjëvareje Samaria va'oröhego. ¹⁵⁻¹⁶ Rëmö'öjëvamu Peter'o John'o va'aroho va'o Samaria höröjareje. Hörönugoromo gavare God-are Aru'ahoho Samaria rajo jabesi öriroho bogo ruvebijë'e jabumë Bada Iesuare ihoro ma-bapataeto vaejë'e jiamu gagorovo God ëninamiromomo uavareje Iesuare ariböviohuro Aru'ahoho baeruomoröhego. ¹⁷ Ëninamiromomo simane öve taemëhamu God-are Aru'ahoho baeruomadeje.

¹⁸ Simane öve taemëho'ego Aru'ahoho baeruomamu gëgorovo Simon-ro ri'öromomo Peter'o John'o uëvadeje: Naro ijo baje bojëmi'ejöjo. ¹⁹ Ëhuni jemëro daruge bojemego na'o bae'iröjo ëhuro ae rahuare rahuare simanore öve bamego God-are Aru'ahoho baeruom'o'iröhe höjo.

²⁰ Ëhi uëvamu Peter-ro uavadeje: Ja'o jasi moniohu'o vënëro ravëvo'ajëjo. Jero uvanuëjo: Naro monie bojamiromomo ëhuro Aru'aho ae gö bojëmi'irode darugoho bae'ejöjo. Röhu ëhi jï'e darugoho hesi

God-are suvuore hōjo. ²¹ God-are nuniroho jasi dē vövöbajo'oho bogo maho jio'ego ja bogo no'oho havo'anuejo. ²² Èhuni sisē uehorovanuoho vuonugo'i Bada uavego mae jië'oho jasi uehoro sisêho uehorovoromo vuonugaho'irajo. ²³ Iae na gavajoho jero ganiganimoromo mu sisē uehorovo'i hi'ego èhuro jasi dē vövöbajo'oho ma-sisëremu rarovavê'e hōjo. ²⁴ Èhi uavamu hegorovo Simon-ro Peter'o John'o uëvadeje: Jemëro Badare öroro èninamego huro ajemego jemëhu uevarije i'uoho bogo bae'irōjo.

²⁵ Èhi'amu Peter'o John'o Badahu mu rabe vaejamu gavare jōho majëhinugoromo vuonorö'öromo Iesuare jō maho Samaria rajo jabesi amore amore majëhibe va'aroho va'o Jerusalem höröjareje.

Philip-hu Iesuare jō majahijamu Ethiopia sa'a rajehu heromo mae uehorovade jōhoje.

²⁶ Èhi'amu Badare anerahuro Philip uavadeje: De ri'öromo va'iranoho arue Jerusalem jioromo anume Gaza abuejarue öroro hörönëjo. A rumo'e sa'are va'arue öroho uavajëjo. ²⁷ Èhi uavamu hegorovo ri'öromo va'adeje. Va'ihö gavadeje Ethiopia sa'a raje aho örëro rova'amu. Èaho Ethiopia sa'are simano vaejaje magonaho Candace uvaruoho è magonaho hesi mu vaejahaje a böröme jiadeje. Hesi mu vaejahaje a börömëro jië'ëro huro è magonaho hesi inömo inömo aho'obêhe muebejahonövadeje. Hesi muoho èhi jiadeje. Urim'ëi God rajahi'i Jerusalem va'ë'ëro ²⁸ vuonorö'öromo maratu döre hiromo miohuro jaguvamu va'ë'i suri surire jōho adahobe va'adeje. Surire jōho èho Isaiah God-are jō majëhinövade aehu jajivade jōho jiadeje. ²⁹ Surire jōho adahobe va'amu gavë'i God-are Aru'ahohuro Philip uavadeje: Va'oromo arue maratuore hiromo va'aje aho bihoromo ajio hu'o hiromo va'onëjo.

³⁰ Hiromo va'onëjamu hegorovo Philip-ro tutuvo va'oromo hejade rue Ethiopia rajohuro Isaiah-are surire jōho adahamu hegoro uavadeje: Èjō adahanuoho na ja hejanuëjo o bogajo. ³¹ Ruehuro uavadeje: Aehu bëhi bogo röjehijë'oho na diehi hejöräjo. Rojomoromo na'o hijego va'arëjo. ³² Èhi uavamu hegorovo Philip-ro ajio hu'o hijadeje. Hiromo gavadeje Ethiopia rajohuro ave jōho adahamu.

Vaevë'oho sheep ano'i hu'irae va'aruëhi èhi bava'are hōjo.

Sheep harihu u tarivahego bogo uë'uëvë'e namijajëhi èhi jörume nami-jade hōjo.

³³ Aëro hesi iho mu'uvahamu aho bogo ajamiromo hesi jō maho jövade hōjo.

Raro hesi aboji harihu'o jabesi jōho majahui'ajëjo.

Aboji harihu'o rumo'e ave sa'are hijadoho iae barëjê'e hōjo.

³⁴ Èjōho adahoromo rue Ethiopia rajo a börömohuro Philip uavadeje: Ave jōho na uevego hejōjo. Jō God-aro baeromo majëhinövade ahuro rahuare jōe jajivë'e hōjo. Na hesi jōe o ae gö hesi jōe jajivade hōjo.

³⁵ Èhi uavamu hegorovo Philip-ro è adahade jōho aevoromo Iesuare jō maho majahijamu Ethiopia rajohuro hejadeje. ³⁶ Heromo örëro va'ihö gavare jove jiamu gagorovo rue a börömohuro Philip uavadeje: Èhuro gavëjo jove jiego. Naehu avevejö'e bapataeto vaejê'oho na mae hōjo o sisë hōjo. ³⁷ [Mae o sisë hōjamu Philip-ro uavadeje: Ja

jasi dē vövöbajo'e aho'o mae uehorovë'ohuro bapataeto vaejê'oho iae mae höjo. Iae mae höjamu ruehuro uavadeje: Io'ajo. Iae na mae uehorovoromo uvajêjo: Iesu Keriso iae God-are Harihe höjo.]
³⁸ Èhi uanugoromo maratu jagu bava'ajoho èhi namijöro uavadeje. Namijamu Philip'o è a börömo'u jaburo niö'iro jovore abueromo Philip-ro è aho bapataeto vaejadeje. ³⁹ Bapataeto vaeromo jovore jioromo rojomareje. Rojomamu gavë'i Badare Aru'ahohuro Philip ma-majioho hu'irae baeromo va'adeje. Va'amu Ethiopia rajo a börömo'huro ijoho hu bogo gavadeje. Bogo ga'irögoru maratuore ajio hiromo nimorohobe va'adeje. ⁴⁰ Va'amu Philip-ro gavadeje mami'e Ashdod amore rovë'e jiamu. Ashdod rueromo amore amore höröbe jö maho majêhibe ruejuvo Caesarea amore höröromo è hijadeje.

9

Saul-hu aevoromo Christian vaejade jöhoje.

¹ Èhi'amu Saul-ro bogo vuonugo'i Badare aribövioho muo'amo'i ma-vöröëremu jövonövadeje. Ma-vöröëremu jövë'ëro Jerusalem ajiomoromo va'oromo Jew rajo priest börömo'u uavadeje: ² Na negajêjo jero surire jajivoromo i'imemego na Damascus amore ujuoho va'oromo Jew rajehu God rajahjarue osare osare i'imëmego jaburo garomo uvo'iröhego: Nörö priest börömo hesi ihoro rovë'e höjo. Jabuhu èhi uvë'oho ue'iramu naro gë'irode ae o magonahe Iesuare örire jijihamu gavë'oho naro guduamëvoromo Jerusalem amore vuonorö'ö ujuoho rue'ejöjo.

³ Èhi ë'ë'ëro iae va'adeje. Va'adoho va'o Damascus amore hörö'i gavade ajoho ma-majioho ö'idöre jioromo ruvebiromo hu ajivamu gavë'i ⁴ sa'are behumorovoromo hejadeje èhi uvavamu: Asë'e Saul ja rabëni sisë vaejevanue höjo.

⁵ Sisë vaejevanue höjamu uavadeje: Bada ja rahuo javajêjo. Rahuo javajêjamu uavadeje: Jaehu sisë vaejevanue aho Iesu na jevajêjo. ⁶ Röhu ri'öromo va'oromo rue Damascus amoro hinêjo. Hiromo he'a'anuêjo ae gemuëro ua'iramu: Jero èhi èhi ë'ë'ëjo.

⁷ Èhi uavamu Saul'o va'are ariböviohuro aho bogo ga'i ma-huëhemu heromo ma-jörume riravareje. ⁸ Ma-jörume riravamu Saul-ro sa'are raromadohuro ri'öromo nune dadovo'i röhu öri ari'oho bogo gavadeje. Öri ari'oho bogo gavamu gagorovo rueho jaburo övëro ma'eno bava'oromo Damascus amore suorovareje. ⁹ Suorovonugoromo Saul-ro öri ari'oho bogo gavë'e ioho jovoho bogo ijê'e ma-hijuvo majae niö'i gemu barêjadeje.

¹⁰ Majae niö'i gemu barêjamu Iesuare ae gemu hesi ihe Ananias Damascus amore hiromo nia'ovo'iraeromo gavadeje Badaro rueromo uavamu: Ananias-ajo. Èhi uavamu ruehuro uavadeje: Bada na aviae jevajêjo. ¹¹ Na aviae jevajêjamu Badaro uavadeje: De ri'öromo öri ihe Ahorirehu Va'arue Öroro va'onêjo. Va'oromo Judas-are osaro höröromo uënêjo: Tarsus amo rajo a ihe Saul na èho jiajêjo. Na hu ga'i rovode höjo. Èhi uënêjo. Iae hu parie vaejavêjo. ¹² Urimë'i huro nia'ovo'iraeromo gavade höjo ae gemu Ananias-ro rueromo hesi övoho sinore bamamu nunoho marêjöro. Èhuni va'oromo gavêjo. ¹³ Èhi uavamu hegorovo Ananias-ro uavadeje: Bada iae mae höjo röhu na hejode höjo ae

aho'obēhe Saul-are jō sisēho uevamu hejode hōjo. Jaburo uevare hōjo: Huro Jerusalem amore hiromo jasi aribōvioho mu sisē bēhe vaejēvo'i hijade hōjo. ¹⁴ Mu sisē vaejēvē'ero Jerusalem priest masijo jabesi darugoho baeromo aviaē rovē'e hōjo ēhuro ae rahu ja uehorovavē'oho guduamo ujuoho va'o barērōhēro. ¹⁵ Ēhi uavamu Badaro uavadeje: O-ajo. Va'ējo. Ēhesi bēhoho naro ē iaho baejē'e jevajējo huro nasi muoho vaerōhego. Huro nasi jōho bava'oromo sa'a ioro'ioro rajo aribōvioho jabesi a masijoho Israel rajo aribōvioho huruoho majēhibe juvego ae aho'obēhe heruomorōhego ēhuni na Saul baejode hōjo. ¹⁶ Baejē'ero naro hu rōjahi'ejōjo huro garōhego huhu nasi jōēni vi'ehe huē vavaene rabe bae'irōhoho diehi jiē'e jiego garōhego.

¹⁷ Ēhi uavamu hegorovo Ananias-ro va'adoho osare rumo va'oromo ōvoho Saul-are sinore bamoromo uavadeje: Ōho Saul-ajo. Badaro remō'ojamu rovode hōjo. Ja ave amore rue'irōgoro ōrire gavane aho Iesuro remō'ojade hōjo naro rueromo ajamego jasi nunoho marē'i God-are Aru'ahohuro jasi dē vōvōbajo'ere abueromo rarovavo'irōhego. ¹⁸ Ēhi uavamu gavē'i hiobaro ginioru nu ano'o va'ēnoho Saul-are nunire jioromo sa'are rireromo rovamu nunoho marējadeje. Marējamu ri'ōromo bapataeto vaejadeje. ¹⁹ Bapataeto vaenugoromo ie inugoromo rōhu maho biririvoromo mae hijadeje.

Saul-hu Damascus amore hiromo Iesure jō majēhijade jōhoje.

Mae hijē'ero Iesure aribōviohu'o Damascus hijamu majae ma-gemu niō'i barējadeje. ²⁰ Hiromo ma-burēro aevoromo Jew rajehu God rajahijarue osare osare Iesure jōho majēhibe juvadeje. Majēhiromo uēnōvadeje: Iesu iae God-are Harihe hōjo.

²¹ God-are Harihe hō uēvamu heromo tiōromo uarovareje: Asē'e ē aho Saul na ae gemuoho hōjo o ae gō hōjo. Ēhesi bēhoho Saul Jerusalem hiromo bogo ēhioho ē'onōvade hōjo. A'i Iesu uehorovarue aribōvioho muo'amonōvade hōjo. Muo'amē'ero huhu ave rovade hesi bēhoho Iesure aribōvioho guduamo ujuoho va'oromo Jew rajo priest masijoho i'imēmego baejēvo'irōhego ēhuni rovade hōjo. Ēhi jiē'oho hu diehi'oromo Iesure jōho majahuijajējo.

²² Ēhi uarovamu Saul-ro biririvo avohoromo jōho jōvobe va'oromo majēhiromo uēnōvadeje: God-hu uavē'ero bōrōme namiromo ajamuijaje aho Iesu hōjo. Ēhi uēromo ē jō bēhoho avoho garomo hejē'ero darugo'o majēhijamu hegorovo Jew raje Damascus amore raromaruoho jabuhu Saul-are jō aho'irōhoho bogo eni jioruomadeje.

²³ Bogo eni jioruomamu ēhi'ojuvo majae aho'obēhe barējamu Jew rajohuro gagovoromo Saul ano'i atareje. ²⁴ Ano'i atamu ē jōho heromo ae gō'ero Saul majahijadeje. Rōhu jene vō'ōe majae vahie Jew rajo aribōviohuro Damascus amo rejo ojore ojore atovo raromareje Saul hōrō rovego ano'iro. ²⁵ Ēhi'obe va'ojuvo hujeji vahie gemu evare Saul-are aemo'aemohuro uavamu niomoniomo bojō gagore abo hijadeje. Abo hijamu ō'ero beromo ma-saginiēri ō'ire ma'enē'i rejo sigagure ō'oho a'ohō'ōjē'i ma-u'emu ba'amamu je'onō ruvebi sa'are ravo'amoromo va'adeje.

Saul-hu Jerusalem amore va'oromo ē'ade jōhoje.

²⁶ Va'oromo Jerusalem höröjadeje. Höröromo Iesuare ariböviohu'o gemu mae juvo'i ë'o gavadeje. Juvo'ia'amu gagorovo rue ariböviohuro uvareje: Nani Saul bogo Iesuare aehu jio'i ma-sareramuijajëromu juhuonamiruomadeje. ²⁷ Juhuonamijamu gagorovo Iesuare ae gemu Barnabas-ro Saul ajamiromo hu'irae baeromo apostle jabesi örire rovadeje. Rueromo uëvadeje: Saul urimo mu sisë vaenövadëhioho bogo ëhioho vae'i a'i Damascus örire va'ihö gavade höjo Badaro birohoromo jöe ëhi ëhi majahijamu. Jöe ëhi ëhi majahijamu hegoroovo Damascus va'oromo darugo'o maëro Iesuare jöho majëhibe juvade höjo. Ëhuni jaruvoho Saul hu a mae höjo. ²⁸ Ëhi'amu gagorovo Saul-ro Iesuare ariböviohu'o gemu mae hi juvadeje. Hi juvoromo birivoromo Badare jöho Jerusalem ame bövioho majëhibe juvadeje. ²⁹ Majëhibe juvoromo Jew rajehu Greece huëhu atarue ariböviohu'o Iesuare jöho jövoromo jö aho'ahamirovareje. Jö aho'ahamirovoromo rueho jaburo Saul ano'irögoro ë'areje. ³⁰ Ano'ia'amu gagorovo Iesu uehorovarue ö mueno'o ömo'ömhuro Saul hu'irae baeromo Caesarea amore abuejaroho abo nugö'öjamu hesi amëro Tarsus va'adeje.

³¹ Va'amu Judea sa'are Galilee sa'are Samaria sa'are jioruomaje ekaresia ariböviohuro huë vavaeni'e raromaroho barë'i mae raromareje. Mae raromamu God-are Aru'ahohuro ekaresiaho ajëmamumu Bada mae uehorovoromo biririvobe va'amu ae aho'obëhe jëvobe va'adeje.

Peter-hu Lydda amore Joppa amore va'o hiromo ë'ade jöhoje.

³² Ëhi'ego Peter-ro amore amore juvonövadeje. Juvoromo iae God-are aribövioho gë'iro Lydda amore abueromo ë hijadeje. ³³ Hiromo gavadeje ae gemu hesi ihe Aeneas övo hörü'e vuovahë'ëro maratuoremu raromamu. Mami'e aevoromo raromobe rovadoho vadune aho'obëhe 8 barëjë'e jiadeje. ³⁴ Raromamu gagorovo Peter-ro uavadeje: Aeneas Iesu Kerisoro jasi sinoho avohahajëjo ëhuro mae javojöro. Ëhuni ri'öromo jaehu raromanue maratuoho avoho bamëjo. Ëhi uavamu hejë'i ma-burëro ri'öjadeje. ³⁵ Ri'öromo juvamu Lydda amo rajohu'o Sharon sa'a rajohu'o ae aho'obëhe Aeneas garomo aevoromo Badare ijore ijore jijihadeje.

³⁶ Ëhi'amu Iesuare magonahe gemu hesi ihe Tabitha Joppa amore hijadeje. Hesi ihoho Greece huëhu uvaruoho Dorcas-je. Dorcas iho bëhoho mi ihe deer-je. Huro hiromo huë baejë'e muoho vaeromo ae ajëminövadeje. ³⁷ Ae ajëmiromo ijonö guomo guome baeromo guomadeje. Guomamu hesi sinoho u'oromo baeromo javu döre osare ajio bamareje. ³⁸ Bamamu Iesuare ariböviohuro hejareje uvavamu: Peter-ro Lydda amore hijajë uvamu hegoro öroho bogo ëgoho jië'ego ae niö'i uëvareje: Va'irarijoho Peter uavego ma-burëro rue'irajo. Rue'irajamu va'o majahijareje. ³⁹ Majahijamu hegoroovo Peter-ro ri'öromo jabu'o rovamu hu'irae baeromo döre osare iojomareje. Iojomamu magonaho doru ömo'ömhuro nierusuburu'e bamë'i Peter-are bëhire ro ruë numë gagovo rova'o rojomoromo Dorcas-hu jabu'o hijë'i sigohi'amade niögoho Peter-ro gajöro röjahijareje. ⁴⁰ Röjahijamu huro jabumë aho'obëhe ë döre osare jëvamu rëmö'öjamu va'o barëjadeje. Va'amu Peter-ro ague aho hiromo God-are örire ëninamiromo huotorovoromo sinoho garomo uavadeje: Tabitha ri'öjëjo. Ri'öjëjamu Tabitha-ro

nune dadovoromo Peter garomo ri'öromo döre hijadeje. ⁴¹ Hijamu gagorovo Peter-ro öve nugö'öromo ma'enoromo nigemamu namijadeje. Namijamu Peter-ro uvêvadeje magonaho doru ömo'ömohu'o Iesuare ae magonaho ioro'iorohu'o ruejoro. Rovamu Peter-ro uêvadeje: Ave magonahoho i'ovoromo mae hijaje gahêjo. ⁴² Èhi'ade jöho Joppa amoho aho'o uarovo barêjadeje. Jöho uarovamu hegoroovo ae aho'obêhe Bada aevoromo mae uehorovoromadajeje. ⁴³ Mae uehorovamu Peter-ro majae aho'obêhe Joppa amore baeromo mi sino mae avohaje a hesi osae gemuore hijadeje. A ihoho Simon jiadeje.

10

Peter-hu Jew raje jiadeje röhu sa'a gö raje Cornelius ga'i va'ade jöhoje.

¹ Peter-ro Simon'o gemuore hijamu iae ae gemuëro arue Caesarea amore hijê'e jiadeje. Hesi ihoho Cornelius jiadeje. Cornelius bogo Jew rajoho jio'i hu muorovo simano vaejaje aëro jiê'ëro muorovo aribövi ioro'ioroho ma-gemuoro bu'öromo hijê'ëro èhi muebejêvonövadeje. Èmuorovo aribövi gemuore bu'öjare jabesi ihoho Italy muorovo aribövie jiadeje. ² Röhu Cornelius God mae uehorovaje ae jiadeje. Hu'o hesi agane aho'o jaburo God rajahinövareje. Huro Jew rajo aribövioho huê baejêvoromo ajêminövo God-are örire jöe jövonövadeje. Èhi jiê'e ae jiadeje.

³ Èhi jiê'e aëro jiê'ëro iae majae sanuovamu gagoro Cornelius-ro nia'ovo'liraeromo ma-samaro gavadeje God-are anerae gemuëro rovamu. Rueromo uahijo: Cornelius-ajo. ⁴ Cornelius-ajamu hegoroovo Cornelius-ro aneraho juhuonamiromo èrimahoromo uavadeje: Ja diehi uehorovoromo rovanuêjo. Rovanuê'ego anerahuro uahijo: Jaehu God-are örire jö jövanuoho ae gö huê baejêvanuoho èho God-ro ejahoromo ja mae uehorovavajêjo. ⁵ Èhuni ae gö rêmö'öjago rue Joppa amore va'arêjo ae gemu Simon hesi iho göho Peter-ro rueröhe höjo. ⁶ Simon Peter-ro Simon göhu'o mi sino mae avohaje a hesi osae gemuore majahuri hijajêjo. Hesi javuoho sö jovo bêhire jiajêjo. ⁷ Anerahuro èhi majahinugoromo va'amu gagorovo Cornelius-ro hesi osa muebejeharue ae niö'iro o muorovo ae gemuëro èhi ruejoro jöe nugö'öjadeje. Èmuorovo aho God mae uehorovoromo Cornelius hu'o gemu mae juvoromo ajamijaje ae jiadeje. ⁸ Èaho niö'i gemu rueruomamu Cornelius-ro diehi è'amu gavade jöho majêhiromo rêmö'öjamu Joppa amore va'areje.

⁹ Nêrö è ariböviohuro örêro va'oromo Joppa suorovo'i rovaraje. Suorovo'i rovamu gavê'i majae ririre rabu'e jiamu gagorovo evare Peter-ro ruhêre javu döre ajiomoromo hitavê'ëro raromaruire è hijadeje God-are örire jöe jövo'irovo. ¹⁰ Hiromo hömamu hegoroovo ae uêvadeje: Ie avohoromo bojemirego na i'iröjo. I'irö uêvamu hegoro ioho avohahareje. Ioho avohahamu hu nune jioromo nia'ovo'liraejadeje. ¹¹ Nia'ovo'liraeromo gavadeje ö'idöho arorovo'ego niögu va'ëne inömo bôröme veneguöruvê'o ho hesi bêhire ruvebi raromamu. ¹² Raromamu gavê'i gavadeje sa'are jijihaje maje gö gö sigobe je'o uge rabe rabe niögu va'ëne inömo hesi döre jio'amamu. ¹³ Jio'amamu gagorovo hejadeje uavavamu: Peter jero ri'öromo muo'amoromo ijêjo. ¹⁴ Ijêjamu hegoroovo Peter-ro uavadeje: Bada bogajo. Jew rajo noehu bogo ijarue i sisêho bogo mae bogo ibe rovê'e

jevajëjo jögore ahojööni. ¹⁵ Peter-ro ëhi uanugoromo hejadeje röhu maho uavavamu: O-ajo. God-hu sisë barëjë'e hö uvoromo jiovëhë'e mioho raboho ëho nadi uvorëjo: Sisë höjo. ¹⁶ Vae niö'i gemu ëhi jië'e muoho Peter-ro ga'i hijuvo evare gavadeje ë inömo sionëro ö'idöre ba'ojjomamu.

¹⁷ Ba'ojjomamu gagorovo Peter-ro hesi uehorovoromo uvadeje: Nia'ovo'iraeromo gavode hesi bëhoho rabe höjo. Hesi bëhoho rabe hö uvamu iae nume Cornelius-are ariböviohuro Simon-are osaho dinö'e jiaje jöho hejë'ëro ë osa hesi ojanore ro riravareje. ¹⁸ Riravoromo ma-darugo'o uvareje: Na ae ihe Simon Peter ëho jiajëjo.

¹⁹ Ëhi uvamu iae Peter-ro nia'ovo'iraeromo gavade mu hesi bëhoho uehorovë'e hijamu gavë'i God-are Aru'ahohuro hu uavadeje: Hejëjo. Ae niö'i gemu jaburo ja nahavaruëjo. ²⁰ Ri'ö abue'i nadi uvonëjo: Sa'ae gö raje jëvo'ego bogo va'ejö uvo'i ma-va'onëjo. Naro rëmö'öjamu rovere höjo. ²¹ Ëhi uavamu hegorovo Peter-ro abueromo nume rovere aho uëvadeje: Jemë nahevarujoho na aviae jevajëjo. Jemë rabe nëgamu rovarije höjo. ²² Rovarije höjamu uavareje: Muorovo simano vaejaje ae Cornelius-ro uövuamu rovere höjo. Hu a mae God mae uehorovaje ae höjo. Ëhuni Jew raje ae aho'obëhe jaburo hesi örire mae uehorovarue höjo. Ëhi jië'ego God-are anerae gemuëro rueromo Cornelius uavade höjo: Jero uavego Peter rue'irajo jöe majahijego he'irane höjo. Ëhuni rovere höjo. ²³ Ëhuni rovere höjamu hegorovo Peter-ro uëvadeje: Osaro ro raromoromo vahiromego momorö'örëjo.

Ëhi ë'ë'ëro nëröho Peter-ro ri'öromu jabu'o va'adeje. Röhu Joppa raje Iesuare ö mueno'o ioro'iorohuro hu'o va'areje. ²⁴⁻²⁷ Va'aroho va'o nëröho Caesarea amore suovareje. Amore suovoromo Cornelius-are osare va'ia'amu Cornelius-ro Peter birohoro uvadeje: Peter God va'ëne höromo hesi bëhire sa'are ague aho hiromo Peter rajahijadeje. Rajahijamu gagorovo Peter-ro Cornelius banigojioromo uvadeje: Nadi ëhioho ë'i ma-ri'öromu döro namijëjo. Na bogo God jevo'i ma-ae jevajëjo. Ma-ae jevajë uanugoromo hu'o Cornelius'o jöe jörovobe osare va'oromo Peter-ro gëvade Cornelius-are agane aemo'aeme ruejöro uëvadoho ae aho'obëhe gagovoromo gemuore raromoromo muebejamu. ²⁸ Muebejamu gëgorovo uëvadeje: Iae jemë'o gavarujëjo Jew rajo noehu sa'a ioro'ioro rajo jemë'o gemu mae jijihö'iröhoho o jemesi osare va'iröhoho nosi öroho tugohahuë'e höjo. Ëhi höjo röhu God-ro na röjehiromo uevë'e höjo: Jero nadi uvonëjo: Sa'a ioro'ioro rajoho o rahuo rahuo sisëgo gorëvo'iröhe aribövioho jio'amajëjo. ²⁹ Ëhuni naro ruejöro jero jöe nugö'öjamu hegorovo na bogo uvode höjo: Ja sa'a gö raje javajëromu nue gö gö uehorovo'i ma-burëro rovode höjo. Ëhi jië'oho rabëni ruejöro uevane höjo.

³⁰ Uevane höjamu Cornelius-ro uvadeje: Naehu uavode hesi bëhoho urimo riröhe majae sanuovamu jaruvo jiajëhi naro nasi osare hiromo God-are örire jöe jövode höjo. God-are örire jöe jövë'i gavode höjo ae gemuëro niögu aji mabëhe ba'amë'e nasi örire rovamu. ³¹ Rueromo uevavohijajo: Cornelius jaehu God-are örire jö jövanuoho God-ro ejahoromo jaehu ae gö huë baejëvanuoho huro ëhu'o uehorovajëjo. ³² Ëhuni ae rëmö'öjego Joppa va'arëjo ae gemu Simon hesi iho göho Peter-ro rueröhe höjo. Simon Peter-ro Simon göhu'o mi sino mae

avohaje a hesi osae gemuore ma-jahuri hijajëjo. Hesi javuoho sô jovo bëhire hõjo. ³³ Èhi uevamu hejë'i naro ma-burëro jõe nugö'õjode hõjo jero ruejëro. Röhu ja rovanoho iae mabëhe è'ane hõjo. Èhu'ëro no ae aho'obëhe aviae God'o gemuoro raromoromo muebejaruëjo heli Badaro diehi diehi jõho bojämë'ëro jero majahuijogo.

Peter-hu Cornelius-mesi õrيره majahijade jõhoje.

³⁴ Èhi uavamu hegorovo Peter-ro jõho majëhiromomo uëvadeje: Iae na gavajoho God bogo Jew rajohemu nimo'i sa'a ioro'ioro rajoho bijõnimo'i ³⁵ a'i ae aho'obëhe sa'ae dinö'e dinö'e raromoromo God uehorovoromo mu mae vaejaruoho no aho'o huro èhi ma-gemu uehorovavuoromo ejahuaje hõjo. ³⁶ Iae jemë'o gavarujëjo God-ro Israel rajo nosi õrيره ave jö maho majahuiromomo uõvuade hõjo: God na'o jemë'o hahagu hahagu javuadoho jaruvoho Iesu Kerisoro gagovavuë'e hõjo. Röhu huro bõröme namiromomo sa'ae dinö'e dinö'e muebejavuaje ae hõjo. ³⁷ Jemë'o gavarujëjo Iesuare mu bõrömohe Judea sa'ae bövioho rumorovade hõjo. Bapataeto vae'irõhe jõho John-ro majahuijamu evare è mu bõrömohe Galilee sa'are aevoromo Judea sa'ae bövioho rovide hõjo. ³⁸ Nazareth rajo ae Iesu hesi jõho jemë'o iae hejaruje hõjo. God-ro Iesu muro bamo'irõgoro hesi Aru'ahohu'o darugohu'o bojamiromomo muro nugade hõjo. Muro nugë'ëro hu'o gemu mae juvo'ego Iesuro ae mae vaejëvobe Satan-are darugoro raromarue aribövioho aho'o ajëmibe èhi è'obe è sa'ae bövioho juvonövade hõjo. ³⁹ Juvoromo Jew rajo nosi sa'are o Jerusalem amore mu rabe rabe vaejadoho iae nosi nunëro gavë'e javuajëjo. Aëro hu korosire anamu guomade hõjo. ⁴⁰ Guomamu majae niö'i gemu hesi uhure God-ro uavamu ri'õjë'ëro hijamu gavare hõjo. ⁴¹ Ae aho'obëhe Iesu bogo gavare hõjo. Noehu hu garomo a majëhirõhego God-hu mami'e baejavuade aribövioho noremuëremu hu gavare hõjo. Hu guomoromo ri'õjade hesi ijore hu'o i jovo ue'ahare aribövioho noremuëremu gavare hõjo. ⁴² Noro hu gavamu Iesuro uõvuade hõjo noro hesi jõho ae majëhiromomo uënõvorõhego: God-ro Iesu gemu uavade hõjo ae aho'obëhe vuovë'oho o bogo vuovë'oho hesi nunire rivavego mevëvorõhego. Èhi uënõvorõhego Iesu majahuijade hõjo. ⁴³ Röhu è a hesi jõho jö God-aro baeromo majëhinõvare ae aho'obëhe avoho majahuiromomo jajivobe rovere hõjo. Jajivoromo uõvuare hõjo: Ae rahu è a mae uehorovë'oho God-ro hesi jöeni nosi sisëho uehorovoromo vuonugahuo'ajëjo.

Sa'a ioro'ioro rajehu aevoromo God-are Aru'aho baejare jõhoje.

⁴⁴ Peter-ro èhi majëhijamu gavë'i God-are Aru'ahohuro ruvebiromomo jö hejarue aribövie aho'o jabesi dë vövõbajo'ere abue'amadeje. ⁴⁵⁻⁴⁶ Abue'amamu gagoro Jew raje Iesu mae uehorovë'i Peter'o rovere ariböviohuro hejare è sa'a ioro'ioro rajohuro bogo hejarue huë göëro göëro atoromo God bõröme hõ uvavamu hegorovo tiõjëvadeje. Tiõjëvamu uehorovoromo uvareje: Asë'e God-ro hesi Aru'ahoho bogo Jew rajohemu bojämui'i sa'a ioro'ioro rajohu'o bojëmijade hõjo. Bojëmijade hõjamu Peter-ro ri'õromomo uëvadeje: ⁴⁷ Jew rajo noehu God-are Aru'aho baejarëhi ave sa'a ioro'ioro rajo ariböviohu'o God-are Aru'ahoho èhi baejare hõjo. Èhi jië'oho no rabëni ahëvo'iramu bogo bapataeto vae'a'aruëjo. Bëhe bogohõjo. ⁴⁸ Èhi uënugoromo hesi

aribövioho uëvadeje: Iesu Keriso-are ihoro bapataeto vaejövohëjo. Èhi è'è'ëro Cornelius-mëro Peter uavareje: Nadi ma-burëroho va'i majae ègo'lo no'lo hiromo va'onëjo. Èhi uavamu jabu'lo hijadeje.

11

Sa'a ioro'ioro rajehu bapataeto vaejare jö Peter-hu majëhijamu Jerusalem ekaresia ariböviehu hejare jöhoje.

¹ Iae apostle ömo'ömohu'lo Keriso-are ö mueno'lo ioro'iorohu'lo Judea sa'are röhu è sa'ae gemuore dirö'le göre göre raromaruohuro hejareje uvavamu: Bogo Jew rajoho gemu a'i sa'a gö rajohu'lo God-are jöho baejare höjo. ² Èhi uvamu hegoroovo Jew rajo a ioro'ioroho Jew rajehu è'aruëhi sa'a gö rajo jabesi sino tarivëhoröhego nimoruomaje ariböviohuro gavare Peter Jerusalem rovamu gagorovo birevoromo uavareje: ³ Jew rajo nosi sino tarivahuaruëhioho aho jabesi sinoho bogo èhioho tarivëhare höjo röhu jero jabesi osare va'oromo jabu'lo gemu mae hiromo ioho ijane höjo.

⁴ Èhi uavamu Peter-ro ri'öromo huhu sa'a gö rajohu'lo hiromo vaejade mu hesi bëhoho huruoho majëhi barëjadeje. ⁵ Majëhiromo uëvadeje: Naehu vaejode mu hesi bëhoho na anumiae Joppa amore hijode höjo. Hiromo God-are örire jöe jövode höjo. Jöe jövë'i nia'ovo'iraeromo gavode höjo niögu va'ëne inömo böröme veneguöruvë'oho nasi bëhire ruvebi raromamu. ⁶ Raromamu ga'i gavode höjo amo maje je'lo maje sigobe uge rabe èhi è inömo hesi döre jio'amamu. ⁷ Hejode höjo uevavamu: Peter ri'öromo muo'amoromo ijëjo. ⁸ Ijëjumu hegoro naro uavode höjo: Bada bogajo. Jew rajo noehu bogo ijarue i sisëho bogo mae bogo ibe rovë'e jevajëjo jögore ahojöëni. ⁹ Èhi uanugoromo hejode höjo ö'idöre röhu maho uevavamu: O-ajo. God-hu sisë barëjë'e hö uvoromo jiovëhë'e mioho raboho èho nadi uvorëjo: Sisë höjo. ¹⁰ Èhi uevamu èhi jië'e mucho vae niö'i gemu naro ga'i hijuvo evare gavode höjo è inömo aho'lo sionëro ö'idöre ba'ojojömë'e jiamu. ¹¹ Èhi'amu gavë'i ae niö'i gemu naehu hijaje osare ö'are höjo Caesarea amore jioromo rëmö'öjë'ëro jië'ëro. ¹² Ö'amu God-are Aru'ahohuro uevade höjo: Nadi uvonëjo: Sa'a gö raje jëvo'ego nani na jabu'oho bogo va'ejö uvo'i ma-va'onëjo. Èhi uevamu ave raromarue Iesuare ö ömo'ömoho övo gö mine övo göre gemu èho jaburo na'lo gemu mae ri'öromo è rovare ariböviohu'lo gemuore va'oromo Cornelius-arire suorovoromo hesi osare va'are höjo. ¹³ Noro hesi osare va'amu Cornelius-ro uövuade höjo: Na gavode höjo anerae gemuëro rueromo uevavamu: Ae rëmö'öjëgo Joppa va'arëjo ae gemu Simon hesi iho göho Peter-ro rueröhe höjo. ¹⁴ Huro rueromo jöe majëhi'ajëjo ja'lo jasi aganohu'lo heromo bogo sisëroho va'i maro raromo'irarijëgo. ¹⁵ Cornelius-ro èhi uövuamu hegoroovo naro aevoromo jöho majëhijamu gavë'i God-are Aru'ahohuro jabesi örire ruvebijade höjo. Urimë'i Jew rajo nosi örire ruvebijadëhi èhi è'ade höjo. ¹⁶ Ruvebijamu gagorovo naro uehorovoromo uvode höjo: O Badaro mami'e uövuade höjo: Urimë'i John jövëro bapataeto vaejövade höjo. U'emu God-ro hesi Aru'ahoho mëmiromo èhuro jovoho bogo a'i Aru'ahohuro bapataeto vaejëvo'ajëjo. Iesuro èhi uövuade höjo. ¹⁷ Amo urimë'i noehu Bada Iesu Keriso mae uehorovamu God-hu hesi Aru'aho

suvuoro mamuijadēhi ēhi sa'a gō aribōviohu'o mēmade hōjo. God-hu ēhi sa'a gō rajo ajēmijadoho ēhu'oho na rabēni God-are ōroho tugohojōrajo.

¹⁸ Peter-ro ēhi uēvamu hegoro rue Jew rajohuro Peter birevaroho vuonugo'i God rajahiromo uavareje: Ēhi jiē'oho God-ro sa'a ioro'ioro rajo jabesi ōroho jiovēhē'e hōjo ēhuro jabu'o dē vōvōbajo'e huotorovoromo mae raromo'irōhego.

Antioch amo rajehu aevoromo Keriso mae uehorovare jōhoje.

¹⁹ Urimē'i Jew rajēro Stephen anonugoromo Iesu mae uehorovarue aribōvioho sisē vaejēvamu gagorovo huruomoromo sa'are sa'are va'o raromareje. Va'aroho ioro'iorohuro ma-bisemu dunoro va'o raromo'i ioro'iorohuro ōri ēgobōvie va'oromo Phoenicia sa'are o Cyprus sa'are o Antioch amore ē va'o raromoruomadeje. Raromoromo Jew rajohemu Iesuare jōho majēhinōvareje. ²⁰ Rōhu Iesu mae uehorovarue a ioro'ioroho Cyprus sa'a rajohu'o Cyrene amo rajohu'o ēho jaburo Antioch amore va'o raromareje. Raromoromo bogo Jew rajohemu a'i sa'a gō aribōviohu'o Bada Iesuare jō maho aevoromo majēhijareje. ²¹ Sa'a gō aribōviohu'o jōho majēhijamu Bada God-ro daruge ajēmijamu Antioch amo raje ae aho'obēhe Bada Iesu mae uehorovoromo aevoromo hesi ōrire jijihareje.

²² Hesi ōrire jijihamu Jerusalem ekaresiahuro ē jōho hejareje. Heromo Barnabas nugō'ōjamu Antioch rajoho gēli va'adeje. ²³ Va'oromo gavade God-ro mae ajēmijē'e jiamu gēgorovo nimorohoromo uēvadeje: Ae aho'obēhe jemēro birivoromo jemesi dē vōvōbajo'e aho'o Bada gemu uehorovorējo. ²⁴ Ēhi uēvade hesi bēhoho Barnabas hu a mae jiadeje. God-are Aru'ahohuro hesi dē vōvōbajo'oho aho'o rarovamu huro God mae uehorovo avohadeje. Ēhi'amu ae aho'obēhe aevoromo Badare ōrire jijihareje.

²⁵ Ae aho'obēhe Badare ōrire jijihamu gagorovo Barnabas-ro ri'ōromo Tarsus amore va'adeje Saul naho'irovo. ²⁶ Nahoromo birohonugoromo hu'irae baeromo sionēro Antioch rovadeje. Rueromo Barnabas'o Saul'o jaburo niō'iro Antioch ekaresiahu'o gemu mae ariromo ae aho'obēhe rōjēhibe va'aroho vadune gemu barējadeje. Ēhi'amu Antioch amore ē dirō'ore aēro Keriso-are aribōvioho gēromo aevoromo uvareje: Jabumē Christian aribōvioho jēvajējo. Urimoho ēhi jiē'e ihoho bogojēvadeje.

²⁷ Rōhu evare majare jō God-aro baeromo majēhijarue a ioro'iorohuro Jerusalem jioromo Antioch rovareje. ²⁸ Rueromo ae gemu hesi ihoho Agabus-ro jōe God-are Aru'aho hesiro baeromo ri'ōromo uēvadeje: Ijonō i bogojio majaho sa'ae aho'obēhe rue'a'ajējo. Huhu uēvadēhi ijonō Claudius Rome a bōrōmo jiadevare evare ē i bogojio majaho rovadeje. ²⁹ Amo Agabus-ro ē jōho majēhijamu hegoro Antioch amore raromarue Keriso-are aribōviohuro uvareje: No ae gemuēro gemuēro ga'irōhe no ijo bajo bōvie baejē'e javuamu gavē'oho bōvie tarioromo bise'e baejē'e javuamu gavē'oho bisemu tarioromo baro gemuoro bamoromo Christian agane Judea sa'are raromaruohuni nugō'ōjēho'ejarējo. ³⁰ Ēhi uvonugoromo suvuoro'ho gagovoromo Barnabas'o Saul'o i'imēmijareje jaburo niō'iro ujuoho va'oromo Jerusalem ekaresia a duvaho jabesi ōvo dōre bahijēhorōhego.

12

Peter savojire ba'amare jöhoje.

¹ Evare majaroho Judea sa'are börömo vaeromo hijaje a böröme Herod-ro ri'öromo jöe nugö'öjadeje aëro ekaresia a ioro'ioroho ijumëvoröhego. ² Huro ae uëvamu jaburo John-are öho James gud-uamoromo siravaëro anareje. ³ Anamu Herod-ro gavade Jew rajo ariböviohuro ëhi nimoruomamu gëgorovo ae uëvamu Peter'lo guduamo bava'areje. I Dë Huaje Oso Rumo'e Jew rajehu Ue'aharue Maja börömo jiadevare evare ëhi ë'areje. ⁴ Peter guduamo bava'oromo savoji gagore ba'amareje. Ba'amamu muorovo aëro 4 aevo'ioho Peter muebejareje. Muebejamu muorovo ae 4 gö'o ro jabesi sionoho baejareje. Röhu ae 4 gö'o ro jabesi sionoho baejareje. Röhu ae 4 gö'o ro jabesi sionoho baejareje. Ëhi ë'onövareje. Urimoroho va'ego ae göëro ro sionoho baenövareje. Ëhi ë'l'ë'ero Herod-ro uvadeje hujeji God-hu Vörö Tugohade Söröho barëjego evare Peter ae aho'obëhe jabesi nunire barueromo court vaeröhego. ⁵ Ëhi uvamu Peter-ro savoji gagore ëhi hijadeje. Hi'ego ekaresiaho jaburo biririvoromo God uanövareje hu ajamiröhego.

Aneraehu Peter ajamamu Peter-hu savoji gagore jioromo hörö va'ade jöhoje.

⁶ Ëhi'ojuvo nërö Herod-ro Peter ae aho'obëhe jabesi nunire bava'i uvë'iro röhu jaruvëhi a göhuro ruëhi hi'i göhuro viëhi hiromu Peter muebe'i Peter ririre ö'e niö'iro tövë'ero niavë'e jiadeje. Ae göëro savoji ojoho muebejareje. ⁷ Muebejamu iae Badare anerae gemüëro mamajioho rovamu savoji gagoho ajivadeje. Ajivamu gavë'i anerahuro Peter-are ionire anoromo ioromo uavadeje: Ma-burëro ri'öjêjo. Ëhi uavamu gavë'i övore muohahare ö'ohuro jiovo bu'öromo sa'are bejadeje. ⁸ Bejamu anerahuro uavadeje: Jasi götaho ruoho bibivo'i höru guduoho io'amëjo. Io'amëjamu Peter-ro götaho ruoho bibivoromo höru guduoho io'amadeje. Io'amamu uavadeje: Niögoho ba'amoromo nasi ijoro rovëjo. ⁹ Nasi ijoro rovëjamu savoji gagoroho höröromo hesi ijore va'adeje. Va'oromo uvadeje: Aneraehu ömajoho nani bogo maho ga'i na nia'ovo'iraejajë'i va'ojuvo ¹⁰ va'o urimo mueberomo riravaruire rova'oromo ijore mueberomo riravaruire rova'oromo suorovoromo amo börömore va'arue biriri'e ojore ë rovareje. Rueli gavare ojoho hesi ëma jiororovamu gagorovo va'orahonö va'oromo örire jirehareje. Jirehoromo anerahuro ma-majioho va'adeje.

¹¹ Va'amamu gagorovo Peter-ro uehorovo avohoromo uvadeje: Avevejö'oho iae na garomo uvajëjo: Iae mae-ëjo. Badaro hesi aneraho nugö'öjamu Herod-are övore jevadoho baeniahi baejevo rovë'e höjo. Baeniahi baejevo rovë'ero Jew rajo ariböviohuro bövi bise'o vaejevo'i uvaroho ëhi ë'oröhoho bogo eni jëvo'ajëjo.

¹² Peter-ro ëhi uehorovonugoromo John Mark-are vëme Mary-arire va'adeje. Röhu Iesuaru ae aho'obëhe Mary-are osare raromoromo ëninamijareje God-ro Peter ajamijöro. ¹³ Ëninamamu gavë'i Peter-ro rueromo oje jiovahojöro ano'anovadeje. Ano'anovamu hegoro magonaho aboride gemu hesi ihoho Rhoda-ro ojoho jiovahoi'ro rovadeje. ¹⁴ Rueromo Peter-are huëho hegoro nimorohoromo ojoho bogo jiovo'i

ma-burëro vuonorö'ö va'oromo osare aribövioho uëvadeje: Peter mami'e rovë'e aviae ojanore namijajëjo. ¹⁵ Namijajëjamu uvoruomadeje: Nani Peter savoji gagore hijajëromo magonahoho uavareje: Simane huotorovoromo ëma uövuanuëjo. Ëma uövuanuëjamu magonahohuro uëvadeje: O-ajo. Na mae uëvajëjo. Hu iae rovë'e höjo. Uavareje: Peter bogo rue'i ma-hesi aru'ahohuremu rueromo namijajëjo.

¹⁶ Ëhi'amu gagorovo ojo jiovahojöro Peter-ro ojore ano'anovo'i hijadeje. Ano'anovo'i hijamu va'o ojoho jiovoromo Peter gavamu jöe barëjëvadeje. ¹⁷ Jöe barëjëvamu Peter-ro övëro tugohëvoromo uëvadeje: Na savoji gagore jevamu Badaro ëhi ëhi ë'oromo hu'irae baejevo rovade höjo. Ëhi jïë'e jöho majëhinugoromo uëvadeje: Jemëro va'oromo James'o agano ioro'iorohu'o nasi jöho majëhirego he'irarëjo. Ëhi uënugoromo öre gö va'adeje.

¹⁸ Öre gö va'ë'ëro sisonuvamu savoji gago muebejarue ariböviohuro gavare Peter bogojiamu gagorovo tiöromo juhuonivoromo uehoroho bogojëvamu ma-jöe gö gö atoromo uvareje: Peter din'ö'e va'ë'ëro bogojiajëjo. ¹⁹ Bogojiajëjamu Herod-ro uëvamu hesi ariböviohuro Peter nahemu nahujuvo gavareje bogojiamu. Bogojiamu gagorovo Herod-ro Peter atovarue aribövi jabesi jöho heromo jöe mevoromo hesi ariböviohuro atovarue aribövioho muo'amojöro uëvadeje. Ëhi'onugoromo Herod-ro Judea sa'are jioromo abuejadoho abo Caesarea amore ë hijadeje.

Herod guomade jöhoje.

²⁰ Caesarea hiromo Herod-ro Tyre o Sidon amo rajo jabesi örire sisë maro dë vörönimadeje. Dë vörönimamu gagorovo rue amo rajohuro uvareje: Noehu ijarue iruno'oho Herod-hu muebejaje sa'are jioromo rovaje höjo. Ioro'ioremu tugohojöëni ëhuni Herod ga'i gemuore ruenugadeje. Rueromo Herod-are osa muebejaje aho Blastus jabesi jöho ajëmiromo Herod sanuamijöro dinamiro mo jöe nugö'öromo Herod uavareje: Noni vavaenimoromo ajamuijego ja'o no'o huë baerovoromo raromo'irarëjo.

²¹ Ëhi'amu Herod-ro majaho bojëmadeje ë majare rueruomoröhego. Ëmajaho rovamu gagorovo Herod-ro hesi niögu ma-maho io'amadeje. Io'amoromo hu bövi namiromo hijaje röho mare hiromo ae aho'obëhe jöe majëhijadeje. ²² Jöe majëhijamu hejë'i rue ariböviohuro uvoruomadeje: Asë'e jö böröme höjo. Bogo ma-ae hu jöho majahui'i a iosiramuiromo dö mare jïë'e aru'ahohuro jöho majahuijajëjo. ²³ Ëhi uvoruomamu gavë'i Badare anerahuro Herod anamu huiniëro hesi uhoho ijahamu guomadeje. Anade hesi bëhoho hu God-are iho bogo nigemadohuni ëhuni anamu guomadeje.

²⁴ Röhu God-are jöho ejahoruomamu aro rumorovobe va'adeje.

²⁵ Ëhi'amu Barnabas'o Saul'o Jerusalem va'oromo monioho ekaresia jabesi a duvahoho i'imëmijë'ëro John hesi iho göho Mark hu'irae baeromo Antioch amore vuonorö'ö va'areje.

13

Barnabas'o Saul'o va'oromo God-are jö majëhibe jirehoröhego Antioch ekaresia ariböviehu baejëvoromo rëmö'öjare jöhoje.

¹ Iae Antioch amore ekaresia a ioro'ioroho jö God-aro baeromo majëhijarue ariböviohu'o Iesuare öri röjëhijarue ariböviohu'o jëvadeje. Ëaribövi jabesi ihoho Barnabas o Simeon iho göho Niger o Cyrene amo raje Lucius o sa'a a böröme Herod'o gemu mae bövi raejade aho Manaen o Saul ëhi jio'amadeje. ² Ëhi jio'amamu ekaresiaho jaburo ioho bogo ijë'e God ma-rajahiemu rajahijamu gagorovo hesi Aru'ahohuro uëvadeje: Jemëro Barnabas'o Saul'o baejëvoromo nani rëmhëjjo jabuhu ë'ojöro baejëvode muoho vaenövoröhe höjjo. ³ Ëhi uëvamugo ekaresiaho jaburo ioho bogo ijë'e God-are örire jöe atonugoromo Barnabas'o Saul'o jabesi simanore öve bamëhoromo rëmö'öjamu va'areje.

Barnabas'o Saul'o Cyprus sa'are va'oromo Keriso-are jö majëhijare jöhoje.

⁴ God-are Aru'ahohuro Barnabas'o Saul'o ëhi rëmö'öjadeje God-are muohuremu vaeröhego. Rëmö'öjamu abuejaroho abo Seleucia amore höröjareje. Höröromo boat-re ajiomoromo jovo döre va'aroho Cyprus ruë numë sö jovemu jië'e sa'are ë va'o ravo'amareje. ⁵ Cyprus sa'are ravo'amoromo Salamis amore höröromo Jew rajehu God rajahijarue osare osare God-are jöho majëhibe jirehareje. Röhu John Mark hu'irae baeromo hu'o jirehareje huro ajëmego jaburo muoho vaebe jirehoröhëro.

⁶ Jirehoromo Salamis amoho nugo va'oromo Cyprus sa'aho jirehobe numëhi va'o viture juvö'öromo Paphos amore höröjareje. Höröromo sareri sareri'e iro oso'e ae gemu birohareje. Hesi ihoho Bar-Iesu jiadeje. Hu Jew rajëro jië'ëro aribövioho sarerëmiromo uënövadeje: Na jö God-aro baeromo majëhijaje ae jevajëjo. ⁷ Bar-Iesu ë sa'are a börömo hesi ae jiadeje. Ësa'are a börömo hesi ihoho Sergius Paulus jiadeje. Hu uehoro ma'e ae jiadeje. Uehoro ma'e aëro jië'ëro jöe nugö'öromo Barnabas'o Saul'o uëvadeje: Rueromo God-are jöho majehirego na he'iröjjo. ⁸ Na he'iröjamu rueromo God-are jöho majahijamu hejë'i ë iro oso'e aho Bar-Iesu röhu iho göho Greece jöehu uvaruoho Elymas-ro jabesi jöho aho'ahovadeje. Elymas-ro Barnabas'o Saul'o jabesi jöho aho'ahovoromo ë sa'are a börömo niji'irae gavadeje Iesuare jöho ejahojöëni. ⁹ Nijio'irae gavamu Saul hesi iho göho Paul-are dë vövöbajo'e aho'o God-are Aru'ahohuro rarovamu gagorovo Paul-ro Elymas gemu ërimahoromo ¹⁰ uavadeje: Ja Satan-are ae javajëjo. Sareri sareri'e muohemu vaejanue mu maho bövi bise'o maho ijumanue ae javajëjo. Badare jö ma huotohuotovo jövanuoho divare vuonugonëjo. ¹¹ Ëhuni Badahu i'u mana bojami'ië'ajoho gavëjo. Jasi nunoho sisërëjavoië'ajëjo. Sisërëjavoi'iramu majaehu ajivajoho majae ëgo'o bogo uherihoromo ga'a'anuëjo.

Ëhi uavamü gavë'i hesi nunoho sisërëjamu ramoramoro hijadeje. Ramoramoro hiromo övëro morijovobe juvadeje aëro övëro ma'eno bava'ojöro. ¹² Ëhi'amu ë sa'are a börömhohuro gavade Paul-ro jöe jövo'ego ë a hesi nunoho sisërëjamu gagorovo tiöromo uvadeje: Badare jö Paul-hu majahuijajoho iae jö böröme hö uvoromo Iesuare örire mae uehorovadeje.

Barnabas'o Paul'o Pisidia sa'are Antioch amore va'oromo God-are jö majëhijare jöhoje.

13 Ĕhi'amu Paul'o hesi ariböviohu'o ěho jaburo Paphos amore boat-re iojioromoro jovo dġre va'oromo Pamphylia sa'are Perga amore ě ravo'amareje. Ravo'amonugoromo John Mark-ro jabumě rěmoromo Jerusalem vuonorġo va'adeje. 14 John va'irġoro Barnabas'o Paul'o jaburo niġ'iro Perga amore jioromo va'oromo Pisidia sa'are Antioch amore ro arijareje. Ariromo Jew rajo jabesi nuho majaho rovamu God rajahjarue osare va'o arijareje. 15 Arijamu aěro Moses-hu bojěmade jġgoru surire jġho adaho jġ God-aro baeromo majěhinġvare aribġviehu jajivare surire jġho adahamu evare God rajahjarue osa muebejarue aribġviohuro Barnabas'o Paul'o jġe nugġ'ġoromo uěvareje: Jew rajo aganomě jemě jġgore jěvě'o ho majahuijġe no heromo biririvoromo God mae uehorovo'irarġjo.

16 Ĕhi uěvamu hegorovo Paul-ro ri'ġoromo jaburo hejġro ġvěro tugohěvoromo uěvadeje: Israel rajomě God mae uehorovarue a ioro'iorohumě na jġ harihe majěhi'iě'ajġjo. Hehġjo. 17 God Israel rajo aribġvi muebejavuajohuro nosi hijo miono'o ho hesi baejěvade hġjo. Baejěvě'e jiamu jabuměro Egypt sa'are abueromo ma-jahuri raromamu God-ro ajěmijamu ae aho'oběhe jěvobe va'ade hġjo. Aho'oběhe jěvobe va'amu God-ro hesi darugěro ajěmiromo Egypt sa'are jěvamu sġjěvo ujuoho rovade hġjo. 18 Sġjěvo ujuoho rovamu vadune aho'oběhe 40 a rumo'e sa'are mu sisě vaebe juvo'ego ma-nuněremu gě taemoromo ajěminġvade hġjo. 19 Ĕhi'ojuvo jabuměro Canaan sa'are rueruomamu evare ě sa'a uhure ěne aho'oběhe 7 mamirovoromo raromonġrovare aribġvioho God-ro muo barěromo jabesi sa'aho nosi Jew rajo hijo miono'o ho měmijade hġjo jabesi sionoho baerġhego. 20 Rġhu God-ro Israel rajo baejěvadoho aevoromo Egypt sa'are abo raromojuvo a rumo'e sa'are raromobe jijihojuvo ro Canaan sa'are raromaroho vadune aho'o 450 ěhi barějade hġjo. Vadune 450 barějamu gagoro God-ro a mevěvarue a masijoho bojěmibe rovade hġjo nosi hijo miono'o ho muebejěvonġvorġhego. A mevěvarue a masijoho bojěmibe ruejuvo evare Samuel jġ God-aro baeromo majěhijaje ahuro hijo miono'o ho muebejěvade hġjo. 21 Samuel-ro muebejěvamu evare Israel rajo aribġviohuro ri'ġoromo God ua gavare hġjo huro bġrġme namiromo muebejěvo'irġhe aho bojěmijġro. Ua gavamu God-ro jabesi ġrire Kish-are harihe Saul bojěmijade hġjo bġrġme namiromo muebejěvorġhego. Saul hu Benjamin rajo ae jiade hġjo. Saul bojěmijamu muebejěvojuvo vadune 40 barějade hġjo. 22 Vadune 40 barějamu God-ro Saul rori'o babu'ġ'i David Saul-are sionore nugade hġjo bġrġme namiromo muebejěvorġhego. David nugoromo uěvade hġjo: Jesse-are harihe David iae na garomo nego avohajġjo. Huro naehu nimaje bġvioho bise'o ho vae'a'ajġjo. David-are jġho ěhi uěvade hġjo. 23 Ĕhi uěromo va'ojuvo majae ijonġ David-are ujoho gemu Iesu God-hu Israel rajo uěvaděhi ěhi bojamuade hġjo no Israel aribġvioho manġ bamavuorġhego. 24 Iesu rue'ia'amu John-ro Israel raje ae aho'oběhe majahuiromo uġvuade hġjo: Uehoro sisěho vuonugo'i uehoro mae baeromo bapataeto vaerġjo. 25 Ĕhi jiě'e jġho majahuijuvo muoho barě'ia'amu uġvuade hġjo: Jeměro uvarujġjo: Na rahuo jevajġjo. Na bogo ro ajěmi'irode a muebejarujoho jevajġjo. Rġhu gahġjo. Ĕahuro nasi ijonġ rue'iě'ajġjo. Na hesi mu bise'o vaejahoromo hġru sino jiovaho'ibejodoho o mu bise'o bise'e rabe

vaejaho'ibejodoho röhu hu böröme jio'li na ma-bise'e jevajëjo.

²⁶ Röhu aganomë Abraham-are ujo ömo'ömohumë o sa'a gö raje God mae uehorovarujohumë God-hu ajamuiromo manö bamavuaaje jöho ë jöho nosi jöëni rovë'e höjo. ²⁷ Ëhesi bëhoho Jerusalem raromarue ariböviohu'o jabesi a masijohu'o ëho jaburo Iesuare bëhoho bogo avoho garomo bogo uvare höjo: Iesu iae ajamuiromo manö bamavuaaje aho höjo. Bogo avoho garomo röhu Jew rajo nosi nuho majahorue'ego henövare jö God-aro baeromo majëhinövare a jabesi surire jöho adahoromo uvo'ego: U'emu a börömëro rueromo ajamui'ajë'ego dadivëvo'ego uvonövare höjo: Ëa börömoho bogo Iesuhu jio'li ae gö jio'a'ajëjo Iesuare bëhoho bogo avoho gavë'ëro. Bogo gavë'ëro aehu Iesuare örire vaeruomoröhego ë surire jajivarëhi Jerusalem raromarue ariböviohuro ëhi ë'oromo Iesu court vaeromo uaruomade höjo: Sisë ae javë'ëro guomo'a'anuëjo. ²⁸ Guomo'a'anuë uanugoromo nahoromo gavare guomoröhe bëhoho bogojiamu gavë'i Pilate ëma uaruomade höjo: Uëvego ano'irarëjo. ²⁹ Amo Iesuare örire bövi bise'o sisë'li vaeröhego God-are surire jö jajivarëhi Jerusalem raromarue ariböviohuro ëhi vae barënuigoromo Iesu ijore jiamu baruvebiromo hure bamare höjo. ³⁰ Hure bamamu God-ro ajamijamu ri'öjade höjo. ³¹ Ri'öjamu Galilee sa'are jioromo Jerusalem Iesu'o gemu mae urimo rovare a jabesi nunire rue'li hijadoho majae aho'obëhe barëjade höjo. Rue'li hijamu hu gavare ariböviohuro jaruvoho Israel rajo jabesi örire hesi jöho ma-mae majëhijarue höjo. ³² Iae noro jö maho majëhiromo uëvaruëjo: God-hu nosi hijo miono'o uëvadëhi ³³ no jabesi ujëro javuë'ëro ëhi ajamuijade höjo. Ajamuiromo nosi jöëni Iesu ajamijamu guomoromo ri'öjade höjo. Ëhesi bëhoho God-hu Iesu ajamego ri'ö'iröhe jöho God-are surire Psalm 2-re jajivoromo uvë'e höjo:

Ja nasi Harihoho javajëjo.

Jaruvoho naro ja baejavë'e jevajëjo.

³⁴ O God-are surire jö göho huhu ajamego Iesu ri'öjego ijönö bogo guomoromo sino sagohori'iröhe jöho jajivoromo ëhi uvë'e höjo: God naehu David uavodëhi iae ëhi ma-maemu ajëmi'ejöjo jemë mae jëvo'iröhego.

³⁵ O God-are surire jö göho jajivoromo uvë'e höjo: Jasi aëro jevë'ëro God jero ajemi'iramu nasi sinoho bogo sagohorijevo'ajëjo. ³⁶ Iae David-hu hijade majare God-hu nimade muoho vaebe juvojuvo guomade höjo. Guomamu hesi hijo miono'o guavarire sionore guavamu hesi sinoho sagohorijade höjo. Ëhuni hesi sino bogo sagohori'iröhe jöho David-ro bogo jajivo'li ³⁷ a'li Iesuare jöho jajivade höjo. Ëhesi bëhoho God-ro ajamamu guomoromo ri'öjë'ëro ëhu'ëro hesi sinoho bogo sagohorijade höjo. ³⁸⁻³⁹ Aganomë ëhu'e jiaje ave jö hesi bëhoho ga avohohëjo. Iesuare jöëni God-hu mu sisë uehorovoromo vuonugo'iröhe öroho jemesi örire majëhijë'e höjo. O ae rahu Iesu mae uehorovë'oho mu sisë vaejarije hesi i'uoho iae barëjaje höjo. Moses-hu bojamuade jögoru ejahë'oho bogo ëhuro mu sisë hesi i'uoho barë'i a'li Iesu mae uehorovë'oho iae barëjaje höjo. ⁴⁰ Ëhuni avoho mueberovohëjo ëhuro jö God-aro baeromo majahuinövare a jabesi surire jajivare i'uoho bogo bae'irarije höjo.

⁴¹ Ëhesi bëhoho God-are jöho jabesi surire jajivoromo uvë'e höjo:

God-ro uëvajëjo: Nasi jö ahoromo sivaruje ariböviohumë nasi muoho garomo tiöromo vuovorejo.

Ēhesi bēhoho jemē bogo vuovo'i raromaruje majare evare naro vōrō'e mu bōrōmoho vae'iē'ajējo.

I'u'e mu bōrōmēro jīē'ēro aēro jemē sama'e rōjēhi'ibejarējo rōhu bogo avoho heromo mae uehorovo'ibejarijējo.

Ēhi uvē'e hōjo. Ēhuni avoho uehorovohējo.

⁴² Paul-ro ēhi uēnugoromo hu'o Barnabas'o hōrōjamu gēvē'i rue aribōviohuro uēvareje: Ruēre hura gō hesi nuho majaho rovego vuonorō'ō rueromo ēhi jīē'e jōho majahuirego no he'irarējo. ⁴³ Ēhi uēruomoromo suovororomo Jew raje ae aho'obēhe o sa'a ioro'ioro rajehu jabesi mu vuonugo'i Jew rajo mu baeromo God mae uehorovarue aribōvioho aho'obēhe jaburo Paul'o Barnabas'o jabesi ijore va'areje. Ijore va'amu gēgorovo jaburo niō'iro jabesi ōrire jōgore mēmiromō uēvareje: Biririvoromo uvorējo: Hesi God-ro huē baeromo ajamui'ajēromo muoho vaenōvorējo.

⁴⁴ Ēhi ē'ē'ēro hura gō hesi nuho majaho rovamu amo raje ae aho'obēhe Badare jōho he'i ē osare gemu gagovoruomadeje. Ae gemu gemu bogo rovereje. ⁴⁵ Amo raje ae aho'obēhe gagovamu gēgorovo Jew rajoho jaburo Paul'o Barnabas'o jabesi mu mahuni dē vōrōnēgo avohamu Paul-are jōho aho'ahovoromo jō sisē atareje.

⁴⁶ Jō sisē atamu hegorovo Paul'o Barnabas'o bogo juhuonivo'i mabiririvoromo jōho majēhiromō uēvareje: God-ro nimade hōjo Jew rajo jemēro hesi jōho urimo hejōro. Ēhi hōjo rōhu jemē ē jōho heromo bijōnimarujējo. Bijōnimoromo ēhuro jemēhu ioro'ioeromu maro raromō'irarije ōroho tugohē'e jēvajējo. Ēhuni no huotorovoromo sa'a ioro'ioro rajoho jōho majēhinōvo'ejarējo. ⁴⁷ Ēhesi bēhoho rabēni Badaro jōe bojamuiromō uōvuē'e hōjo:

Naro ja bamavode hōjo jero sa'a ioro'ioro rajoho ajivēvo'iranego.

Ajivēvego ae aho'obēhe majae beva'ajire majae hō'ōjajire maro raromō'irōhego.

⁴⁸ Ēhi uēvamu hegorovo sa'a ioro'ioro rajohuro nimorohoromo uvoruomadeje: Badare jōho iae mae hōjo. Ēhi uvoromo ioro'ioeromu raromō'irōhego God-hu uvade aribōviohuro Iesu mae uehorovoroumadeje.

⁴⁹ Mae uehorovamu Badare jōho ē sa'ae bōvioho uarovobe va'adeje. ⁵⁰ Uarovobe va'irōgoro a'i rue Jew rajoho jaburo God uehorovarue magonaho masijohu'o amore a masijohu'o ē aribōvi jabesi dēho iēhamu ri'ōromo Paul'o Barnabas'o sisē vaejēvoruomadeje. Sisē vaejēvoromo Antioch sa'anō jēvamu rēmō'ōjēvoruomadeje. ⁵¹ Rēmō'ōjēvamu gagorovo va'irōgoro hōru tohotoho'e jēvamu riremōromo va'areje amo rajohuro sisē vaejaruoho gajōro. Va'oromo Iconium amore hōrōjareje. ⁵² Amo Antioch raromarue Keriso-are aribōvi jabesi dē vōvōbajo'oho aho'o sasohēvoromo God-are Aru'ahohuro rarovēhadeje.

14

Paul'o Barnabas'o Iconium amore ariromō God-are jō majēhijare jōhoje.

¹ Paul'o Barnabas'o Iconium amore hōrōnugoromo urimo Antioch ē'arēhi ēhi Jew rajehu God rajahijarue osare va'oromo Iesuare jōho majēhijareje. Jōho majēhijamu ēhuro Jew raje ae aho'obēhe sa'a

ioro'ioro raje ae aho'obêhe Iesu mae uehorovoruomadeje. ² Mae uehorovamu gëgorovo Jew raje jö bogo ma uehorovarue ariböviohuro sa'a ioro'ioro rajo jabesi örire uehoro sisêho bojëmiromo jabesi dë iëhamu jaburo Keriso-are aribövioho nue huodëgoruomadeje. ³ Nue huodëgamu Paul'o Barnabas'o majae ëgobövie ariromo bogo juhuonivo'i ma-biririvoromo Badare jöho majëhijareje. Majëhiromo Badaro ajëmamu ëhuro bogo gavarue darugo'e mue gö gö vae'amareje ae aho'obêhe garomo uvoröhego: Iae mae-ëjo. God-hu huë baeromo ajamuijaje jöho mae hö uvoröhego. ⁴ Èhi'amu amo rajo ariböviohuro jöe gö gö uehorovareje. A ioro'iorohuro Jew rajo jabesi dönö jio'i a ioro'iorohuro Paul'o Barnabas'o jabesi dönö jëvadeje. ⁵ Èhi'oromo Jew rajohu'o sa'a ioro'iorohu'o ëho jaburo jabesi masijohu'o gemu mae ri'öromo Paul'o Barnabas'o ijumëvoromo munëro vajëmi'i atareje. ⁶ Munëro vajëmi'i atamu Paul'o Barnabas'o ë jöho heromo ju'ebiromo va'areje. Va'oromo Lycaonia sa'are Lystra amo Derbe amo jiajinö ë va'areje. ⁷ Va'oromo ë sa'are aribövioho Iesuarë jö maho majëhibe jirehareje.

Paul'o Barnabas'o Lystra amore ariromo God-are jö majëhiromo huë vavaeni bihoromo ju'ebiromo Derbe amore va'are jöhoje.

⁸ Jirehoromo Lystra amore ro arijareje. Röhu hörü sisë'e ae gemuëro ë hijë'e jiadeje. Urimë'i vëmehu rahadire aevoromo hörü sisë'e jiove rovë'ëro ëhu'ëro bogo mae bogo juvadeje. ⁹ Bogo juvë'ëro hejadeje Paul ae jöe majëhijamu. Paul-ro jöho majëhiromo gavade ë aho hu'o jöho hejamu gagorovo ma-hu gemu ërimahoromo gavade hu mae uehorovo'ego marë'iröhoho eni jiamu gagorovo ¹⁰ ma-darugo'o uavadeje: Döro ri'öromo avoho namijëjo. Namijëjamu hejë'i ma-burëro döro ri'öromo aevoromo juvadeje.

¹¹ Juvamu ae aho'obêhe gavare Paul-ro ë hörü sisë'e aho ëhi ajamamu gagorovo simane sisë'i uehorovoromo uvoruomadeje: Paul-hu ë hörü sisë'e aho ajamamu aevoromo juvade hesi bëhoho Paul'o Barnabas'o bogo ma-aehu jëvo'i a'i aru'aho bërömo ho niö'iro araeromo rueromo jabesi darugoho bërömëro jëvë'ëro ëhu'ëro Paul-ro ë iaho ajamade höjo. Simane ëhi sisë'i uehorovoromo ri'öromo jabesi Lycaonia jöero ma-darugo'o uvoruomadeje: O aveho bogo ma-aehu rue'i a'i muebejavuarue aru'aho bërömo ho niö'iro araeromo nosi örire ruvebijë'e höjo. ¹² Aru'aho bërömo ho niö'i ruvebijë'e höromo Barnabas jabesi sareri'e god hesi ihe Zeus jumuvoromo Paul-are jöho sarerivoromo uvoruomadeje: Nani ë aho nosi god Hermes jö bajuvaje aru'ahoho höromo Paul Hermes jumuvoruomadeje Paul jögoru jövaje aego. ¹³ Zeus aru'aho bëröme höromo rajahjarue osaho amo bëhiro jië'ëro Zeus rajahjarue mu muebejaje ahu'o uvadeje: Nani iae mae-ëjo. Nosi aru'aho bëröme Zeus-më amore rovë'e höromo cow ano'oho ujuohoromo ijino inovaroho ujuohoromo amo bërömore rejo ojo bëhire rovadeje. Rueromo hu'o a ioro'iorohu'o ëho jaburo Paul'o Barnabas'o aru'aho bëröme jëvajëromo uvene aho röjëhiromo ë mioho muo'amoromo vëniro mueromo i'imëmi'irögoro ë'oruomadeje.

¹⁴ Èhi ë'iröhe jöho henugoromo Barnabas'o Paul'o ë apostle-ho niö'iro uvareje: Èhi jië'oho mu sisë bëhe höromo jabesi niögoho dadovo'amareje ae göëro garomo uvoröhego: Jaburo nosi muoho bijönimoromo ë'aruëjo. Niögoho dadovoromo ma-ba viëhi jiaroho rue

ae aho'obēhe jabesi ririre rirarovoromo ma-darugo'o uvareje: ¹⁵ Asē'e jemē rabēni ēhioho ē'arujējo. No bogo aru'aho bōrōmoho javuo'i no ma-ae jemē va'ēne javuajējo. No jō maho majēhi'i rovare hōjo ēhuro ēhi jiē'e darugo rumo'e inōmo ēma rajēhijarujoho vuonugo'i darugo jiē'e aho God uehorovo'irarijego. God-ro ō'idōe sa'ae jove bōvie bisē'e no bamavuade hōjo. ¹⁶ Urimē'i sa'a gōre gōre raromaruje aribōvioho jemesi nimaruje nimaruje muoho vae'ego huro ma gē taemonōvade hōjo. ¹⁷ Iae ēhi jiade hōjo rōhu God-ro hesi muoho aho'o bogo gurihi'i a'i jemē mae avohēvoromo hesi muoho rōjēhibe rovade hōjo jemēro garomo uvo'irarijego: Iae mae-ējo. Hu ēhi jiē'e a bōrōme hō uvo'irarijego. Huro ēne nugō'ōromo i majaho rovego uvaje hōjo: Iēro tagavējo. Ioho tagavego uēvaje hōjo: Jemēro i avohego da'uēgo'irajo. Nimoronimorohego dē vōvōbajo'e sasohēvo'irajo. Huro hesi muoho ēhi rōjēhibe rovē'e hōjo. ¹⁸ Biririvoromo ēhi jiē'e jōho majēhiromo dē vōvōbajo'e huotovēho'i ē'o gavaroho mi suvuro vēnire bueromo bamēho'i ē'aroho bogo vuonugo varijēnoho jiē'e ēma vuonugareje.

¹⁹ Vuonugamu iae Jew rajo a ioro'iorohuro Antioch amore Iconium amore jioromo rueromadeje. Rueromo Lystra amo rajoho jabetesinō jioruomōjōro mu sisē jōho biririvoromo majēhijareje. Majēhijamu Lystra amo rajoho jaburo ejēhoromo ajēmiromo Paul munēro vajamiruomadeje. Vajamiromo uvoruomadeje: Paul guomē'e hōromo amoro jiamu rori'o ruho baeromo va'oruomadeje. ²⁰ Bava'amu Kerisore aribōviohuro ro Paul-are bēhire gagovoromo riravo rova'areje. Riravo rova'amu Paul-ro ri'ōromo rue amo bōrōmore vuonorō'ō va'adeje. Va'oromo nērōho Barnabas-mu niō'iro ri'ōromo va'aroho va'o Derbe amore hōrōjareje.

Paul'o Barnabas'o Syria sa'are Antioch amore vuonorō'ō va'are jōhoje.

²¹ Derbe hōrōromo Iesuare jō maho majēhijamu ae aho'obēhe aevoromo Iesuare ijore ijore jijiharue aribōvie jioruomadeje. Ēhi'amu gagorovo Paul'o Barnabas'o jaburo vuonorō'ōromo Lystra Iconium Antioch amore ekaresiae ajēmibe va'areje. ²² Ajēmiromo jabesi dē vōvōbajo'oho biririvēhoromo uēnōvareje: Biririvoromo Iesuare jōhemu mae uehorovonōvorējo. Ēhesi bēhoho God-are aji ōri ari'ere va'i naguē'oho no vavaene bōrōme baebe va'ojuvo evare va'ejarējo. ²³ Ēhi uēbe a duvahe ekaresia jabesi simano vaerōhoho nugo'amobe ie bogo ijē'e ma-pariemu vaeromo uēbe va'areje: Jemē Bada mae uehorovaruje a hesi ōvo dōre rēmaruējo. Ekaresiaho ēhi ajēmibe va'areje. ²⁴ Va'oromo Pisidia sa'aho jireho barēnugoromo Pamphylia sa'are rovareje. ²⁵ Pamphylia rueromo Perga amore ariromo Iesuare jōho majēhinugoromo va'o Attalia amore abuejareje. ²⁶ Attalia amore abo ariromo boat-re ajiomoromo jovo dōre va'aroho va'o sionēro Antioch amore rovareje. Urimoho Antioch ekaresiaho jaburo Paul'o Barnabas'o God-are ōvo dōre rēmareje huro ajēmego mu mae vaebe jireho'irōhego. Jaruvoho ē muoho barējē'ero Paul'o Barnabas'o sionēro rovareje. ²⁷ Rueromo ekaresiaho uēvareje: Gagovohego jōe majēhijarējo. Majēhijarē uēnugoromo gagovamu uēvareje: God-ro ajamuijumu ēhi jiē'e muoho vaeromo rovare hōjo. Huro ōroho sa'a ioro'ioro rajohuni jiovēhamu jaburo Iesu mae uehorovare hōjo. Ēhi'ade

höjo. ²⁸ Ëhi majëhiromo Keriso-are ariböviohu'o gemu mae majae egobövie ë arijareje.

15

Ekaresia jabesi a masijehu Jerusalem gagovoromo Moses-hu bojëmade jögoru ë hesi jö mevare jöhoje.

¹ Paul'o Barnabas'o Antioch amore arijamu iae ae göëro Judea sa'are jïë'ëro rueromo Keriso-are ariböviohu majëhiromo uënövareje: God-arire mae va'i nëgë'iroho Moses-hu Jew rajo nosi jögoru jajivadëhi sa'a ioro'ioro rajoho jemë'o sinoho ëhi tarivëhego God-are aribövie jëvo'irajo. Sino bogo tarivëhë'ooho bogo maroho va'a'arujëjo. ² Bogo maroho va'a'arujëjamu hegorovo Paul'o Barnabas'o jaburo ri'öromomo irovoromo darugo'o jö aho'ahëmiromo i'e rovere ariböviohu uëvareje: Sa'a ioro'ioro rajoho nadi ëhi jïë'e jöho majëhirëjo. Majëhirëjamu Antioch ekaresiaho jaburo Paul Barnabas Antioch amore ekaresia a ioro'ioroho ëhi baejëvareje jaburo Jerusalem amore va'oromo apostle ömo'ömo'ömu'o Jerusalem ekaresia a duvaho ioro'iorohu'o sino tarivo'iröhe jöho mevo'iröhego.

³ Baejëvoromo rëmö'öjamu Paul'o Barnabas'o jaburo a ioro'iorohu'o gemu mae ae jöe majëhibe Phoenicia sa'are Samaria sa'are va'areje. Majëhiromo uënövareje: Sa'a ioro'ioro rajoho iae aevoromo God mae uehorovoruumohijajo. Ëhi uë'ëgo Christian aganoho aho'obëhe ë jöho heromo börömo bëhe nimorohonövareje. ⁴ Amo ëhi jïë'e jöho majëhibe rueromo Jerusalem suorovareje. Suorovamu gëgorovo apostle ariböviohuro ekaresia a duvaho ömo'ömo'ömu'o ekaresia a ioro'iorohuro ëho jaburo jejëmiruumadeje. Jejëmijamu rueho jaburo jöho majëhiromo uëvareje: God-ro ëhi ajamuamu muoho vaeromo rovere höjo. ⁵ Ëhi majëhijamu Pharisee aribövie Iesu mae uehorovarue a ioro'iorohuro ri'öromomo uëvareje: Iae ëhi höjo röhu sa'a ioro'ioro rajo jabesi sinoho tarivëhoromo jöe majëhiromo uë'ëjarëjo: Moses-hu bojamuade jögoroho ejahonövorëjo. Ëhuremu mae höjo.

⁶ Ëhi uëvamu hegoro apostle ariböviohu'o Jerusalem ekaresia a duvaho ioro'iorohu'o ë jöho mevo'i gagovareje. ⁷ Jöho mevojuvo Petero ri'öromomo uëvadeje: Aganomë jemë'o gavarujejo urimë'i God-ro na jemesi ririre baejevade höjo naro hesi jö maho majëhijego sa'a ioro'ioro rajoho jaburo heromo Iesu mae uehorovoröhego. ⁸ Jaburo mae uehorovamu God-hu hesi Aru'aho Jew rajo Keriso-are aribövi mamuadëhi sa'a ioro'ioro rajoho jabu'o ëhi mëmade höjo ëhuro noro garomo uvoröhego: God ae aho'o nosi dë vövöbajo'o gövuajohuro hesi Aru'ahoho sa'a ioro'ioro rajoho mëmijë'ëro ëhuni huro jabu'o mae uehorovëvajejo. ⁹ God-ro Jew rajohu'o sa'a ioro'ioro rajohu'o bogo gö gö uehorovavuo'i ma-gemu uehorovavuade höjo. Ëhesi bëhoho sa'a ioro'ioro rajohuro Keriso mae uehorovamu God-ro jabesi sisëho u'ovëho barëjade höjo. ¹⁰ Moses-hu bojamuade jögoroho i'u ma'ëro jïë'ëro no'o nosi hijo miono'ohu'o vaeromo mare va'iröhoho bogo eni javuade höjo. Ëhi jïë'ooho jemë rabëni nëgajëjo sa'a ioro'ioro rajohu'o ëhi jïë'e i'u'e muoho bojëmi'iro. Jemë rabëni God-are dëho bijioho ga'i nëgajëjo. ¹¹ Bogajo. No mae uehorovoromo uvarue höjo: Bogo noehu mu vaejaruohuro a'i hesi Bada Iesuhu huë baeromo ajamuijajohuro iae

ëhuro Jew rajoho no maro raromo'ejarëjo. Sa'a ioro'ioro rajo jabeti öri jiajëhi noehu maro raromo'iröhe öroho gemuoho höjo.

¹² Peter-ro ëhi majëhijamu Barnabas'o Paul'o ri'öromo uëvareje: God-ro ajamuamu noro darugo'e mu gö gö ëhi ëhi vaeromo sa'a ioro'ioro rajoho ajëmime jirehare höjo. Ëjöhö he'iro ae aho'obëhe jöromoraejareje.

¹³ Jöromoraejumu Barnabas'o Paul'o jöhö majëhi barëjumu hegoroovo James-ro ri'öromo uëvadeje: Aganomë nasi jöhu'o hehëjo. ¹⁴ God-hu sa'a ioro'ioro rajo aevoromo uehorovëvoromo a ioro'ioro hesi baejëvade jöhö Simon-ro ë jöhö majahuijumu no hejare höjo. ¹⁵ Ëjöhö iae mae höjo. Ëhesi bëhoho God-hu sa'a ioro'ioro rajo baejëvoröhe jöhö urimë'i jö God-aro baeromo majëhinövare ariböviohuro jajivare höjo. Jabeti ae gemuëro David-are ujo gagovëvoröhe jöhö uhu'e huotovoromo jajivoromo uvë'e höjo:

¹⁶ Badaro uvavohijajo: Ëhesi ijonö naro vuonorö'ö rueromo David-are javu dadorovadoho evare avoho vae'ejöjo.

Sisërëjadoho naro avoho'iramu urimë'i namijadëhi ëhi nami'a'ajëjo.

¹⁷ Nami'iramu sa'a göëro göëro Bada na birohevo'i nahevo'aruëjo.

Nasi jö bogo henövare ariböviehu nasi iho baejarohuro ëhi ë'a'aruëjo.

Badaro ëhi uvajëjo. ¹⁸ Mami gö'e huro ë jöhö aevoromo majëhadoho hebe rovë'e javuajëjo.

Ëhi jajivë'e höjo.

¹⁹ Ëhuni na ëhi uehorovajëjo. Sa'a ioro'ioro rajehu huotorovoromo God mae uehorovë'oho no nosi i'u'e muoho jabeti öriroho bogo bojëmi'i

²⁰ a'i ma-suriro jöhö nugö'öromo uë'ejarëjo: Aehu sareri'e god göëni göëni bahijë'e mioho uvorëjo: Sisë höromo nadi ue'ahorëjo. Nadi önö'oho jijihorëjo. Mi hesi köho nadi ue'ahorëjo. Huë ahahë'e mioho kö'e jiaje nadi ue'ahorëjo. Ëjöhemu jajivo'ejarëjo. ²¹ Ëhi jië'e jögoru jajivo'iröhe ë hesi bëhoho Moses-hu ëhi jië'e jö bamadoho mami'e ame aho'obëhe majëhibe rovë'e höjo. O hesi jöhö Jew rajo nosi nuho majaho rovego noehu God rajahijarue osare osare Moses-are jöhö adahego jaburo hejarue höjo. Ëhuni ëhi jië'e mu gororovo'iröhe jöhö sa'a ioro'ioro rajo jabeti örire nugö'ö'ejarëjo.

Jerusalem ekaresia a masijehu suri suri jajivoromo sa'a ioro'ioro rajëhu Keriso mae uehorovarue aribövi jabeti örire bamëhare jöhöje.

²² James-ro ëhi uëvamu hegoro apostle-ho jabu'o ekaresia a duvaho ömo'ömo'u'ö ëhö jaburo jöe mevoromo uvareje: Ë'ego no nosi a ioro'ioroho baejëvego jaburo Paul'o Barnabas'o gemu mae Antioch amore va'irarëjo. Ëhi majëhijumu ekaresiae ae aho'obëhe uvareje: Ëhi jië'oho iae mae höjo. Ëhi uvoruomoromo Judas hesi iho göhö Barsabbas'o Silas'o jabumë niö'i baejëvareje ekaresiaho jaburo ë ae niö'i jabeti örire mae uehorovaruëro jië'ëro.

²³ Baejëvoromo suroho jajivoromo bava'ojöro bojëmijareje. Surire jajivare jöhö ëhi uvë'e jiadeje: O asë'e Jew rajoho bogo a'i sa'a ioro'ioro rajoho Antioch amore Syria sa'a ioro'iore Cilicia sa'are raramaruje ariböviohumë apostle ariböviohu'ö Jerusalem ekaresia a duvaho ömo'ömo'u'ö jemesi ö mueno'ëro javuë'ëro noro jemesi örire jejëmaruëjo. ²⁴ Röhu no hejare höjo uvavamu: A ioro'iorohuro nosirire jioromo ö'are höjo. Ö'oromo jöe gö majëhiromo jemesi simanoho

sisëvojëhamu uehore gö gö baejarije höjo. Röhu ëho bogo noehu uëvamu ë'are höjo. ²⁵ Ëhuni no ae aho'obëhe gemuoro gagovoromo jöe mevoromo uehore gemuoho baeromo uvare höjo: Noro ae gö baejëvo'ëjarëjo jemesi örire rëmö'öjëvego jaburo nosi aemo'aeme Barnabas'o Paul'o gemu mae ö'iröhego. ²⁶ Barnabas'o Paul'o vuovëvoröhe jöho bogo uehorovë'e ma-biririvoromo nosi Bada Iesu Keriso-are muhuremu uehorovë'e arijare höjo. ²⁷ Röhu Judas'o Silas'o jabu'o gemu mae rëmö'öjëvaruëjo jaburo ö'oromo noehu jajivarue jöe gemuoho majëhijego he'irarijego. ²⁸ God-are Aru'ahohu'o no'o jöe gemuoho uehorovoromo uvaruëjo: Jew rajo nosi i'u'e mue gö gö bogo bojëmi'i ave jögorohuremu bojëmi'ëjarëjo. ²⁹ Aehu sareri'e god göëni göëni bahijë'e mioho nadi ue'ahorëjo. Mi hesi köho nadi ue'ahorëjo. Huë ahahë'e mioho kö'e jiaje nadi ue'ahorëjo. Nadi önö'o ho jijihorëjo. Ëhi jjë'e mu gororovë'o ho ëhuro mae jëvo'ajëjo. Ahia mino'ëjo. Surire jöho ëhi jajivoromo bojëmijareje bava'oröhego.

³⁰ Bojëmiromo rëmö'öjamu Paul Barnabas Judas Silas ëho jaburo va'aroho va'o Antioch amore suorovareje. Suorovonugoromo Christian aribövioho aho'obëhe gagovëvoromo suroho bojëmijareje. ³¹ Suroho bojëmamu ekaresiae ae aho'obëhe hejare adahoromo uvavamu: Jew rajo nosi i'u'e muoho sa'a ioro'ioro rajoho bogo bojëmi'ëjarëjamu hegorovo uvareje: Sasohë'e mu maho rovë'e höromo nimorohoruomadeje. ³² Ëhi'amu Judas'o Silas'o jö God-aro baeromo majëhijarue aëro jëvë'ëro majae ëgobövie jöe majëhiromo Christian agano jabesi dë vövöbajo'o ho biririvëhareje. ³³ Ëhi'oromo majae ëgo'o Antioch arijamu evare ë Christian aganohuro rëmö'öjëvoromo uëvareje: Huë mae baeromo va'orëjamu jaburo Jerusalem jioromo rëmö'öjëvamu rovere ë aribövi jabesirire sionëro va'areje. ³⁴ [A'i Silas-ro ëhi hi'i uvadeje.]

³⁵ Iae Paul'o Barnabas'o jaburo Antioch majae ëgo'o arijareje. Ariromo jabu niö'i o a ioro'ioroho aho'obëhe ëho jaburo Badare jöho ekaresiae majëhiromo bëhoho röjëhinövareje.

Paul'o Barnabas'o jö aho'ahamirovoromo gemuore jireharoho vuonugo'i öre gö öre gö va'are jöhoje.

³⁶ Ëhi'ojuvo iae Paul-ro Barnabas uavadeje: No urimo Badare jöho majëhibe amo göre göre dinö'e dinö'e jireharire ë'ego no ë vuonorö'ö va'oromo gëvarëjo Christian aganoho diehi diehi muoho vaeruomego. ³⁷ Ëhi uavamu hegoro Barnabas-ro uavadeje: Iae mae höjo röhu na negajëjo John Mark-ro no'o ö'ojöro. ³⁸ Ëhi uavamu Paul-ro uavadeje: Bogajo. John Mark-hu no'o ö'ë'o ho bogo maehu höjo. Ëhesi bëhoho urimë'i mue ajamuike juvoromo Pamphylia sa'are ramuö'ö'i sionëro rovade höjo. Ëhi jjë'e a bava'ë'o ho na bijönegajëjo. ³⁹ Bijönegajë uaromo Paul'o Barnabas'o irorovoromo göëro öre gö va'i göëro öre gö va'adeje. Va'iro Barnabas-ro Mark hu'irae baeromo boat-re ajiomoromo Cyprus sa'are va'adeje. ⁴⁰ Cyprus va'irögoro Paul-ro Silas uavadeje: Rovego ja'o na'o muoho vaebe jireho'irarëjo. Jireho'irarëjamu Silas-ro uavadeje: Iae ëhi'o'ëjarëjamu Christian agano ömo'ömohuro Paul'o Silas'o Badare övo döre rëmareje huro ajëmego mu mae vaebe jirehoröhego. Rëmamu Paul-ro Silas hu'iraeromo va'adeje.

41 Hu'iraeromo va'adoho va'o Syria sa'are Cilicia sa'are ekaresia aribövioho jöe majëhiromo ëhuro jabesi dë vövöbajo'oho biririvëhobe va'adeje.

16

Timothy-hu aevoromo Paul'o Silas'o gemu mae juvade jöhoje.

¹ Va'oromo Paul-ro va'adoho va'o Derbe amore ro hiromo va'adoho Lystra amore rovadeje. Röhu Keriso uehorovaje ae gemuëro ë hijadeje. Hesi ihoho Timothy jiadeje. Hesi vëmoho Jew raje Iesu mae uehorovaje magonahe jiadeje. A'i hesi vavuoho Greece raje jiadeje. ² Christian agane Lystra amore Iconium amore raromaruohuro uvoruomadeje: Timothy hu mu mae vaejaje ae höjo. ³ Paul-ro nimadeje Timothy hu'irae va'ego hu'o juvoröhego. Hu ëhi nimoromo röhu uvadeje: Jew raje ave sa'are röhu dirö'e göre göre raromaruohuro garomo uvaruëjo: Timothy-are vavuoho bogo Jew rajoho jië'ëro sinoho bogo tarijahë'e höjo. Ëhi uvoromo Timothy-are sinoho bogo tarijahego Jew rajëro hesi jöho bogo ejahojöeni Paul-ro uëvadeje Jew rajehu ë'aruëhi Timothy-are sinoho tarijahojöro. Ëhi ë'ë'ëro hu'irae baeromo va'adeje. ⁴ Va'oromo Paul'o Silas'o amore amore jöe majëhibe va'areje. Majëhiromo Keriso-are aribövioho uënövareje: Apostle-ho jabu'o Jerusalem ekaresia a duvaho ömo'ömo'hu'o ëhi jië'e jögoroho uehorovë'ëro bojëmijare höjo jemëro ejëhonövo'irarijeko. Ëjöho ejëhonövorëjo. ⁵ Ëhi jië'e jöho majëhibe va'ego ekaresia ariböviohuro biririvoromo Keriso mae uehorovobe va'areje. O majae ëhi ekaresiae aho'obëhe marohëvobe va'adeje.

Paul-hu Troas amore va'oromo nia'ovo'iraeromo gavade jöhoje.

⁶ Paul'o Silas'o jöho majëhibe va'amu gavë'i God-are Aru'ahohuro jabumë tugohëvadeje Asia sa'aroho jöho bogo majëhiröhego. Tugohëvë'ëgo Phrygia sa'a'o Galatia sa'a'o birorohade ënire ë jireho va'areje. ⁷ Va'aroho va'o Mysia sa'a viture va'aroho Bithynia sa'are va'ia'amu Iesuare Aru'ahohuro uëvadeje: Nadi ë sa'aho va'ohëjo. ⁸ Ëhi uëvamu Bithynia sa'aroho bogo va'i Mysia sa'aremu rova'oromo abuejaroho abo Troas amore höröjareje. ⁹ Troas hörönugoromo vahiomamu Paul-ro nia'ovo'iraeromo gavadeje Macedonia sa'aro rueromo ajamuinëjo. ¹⁰ Nia'ovo'iraeromo ëhi ganugoromo Paul-ro Silas-ro narovareje: God-ro uöromomo ë'ajëjo: Macedonia sa'a rajoho Iesuare jö maho majëhihë uövuajë uvoromo ma-burëro va'iro bövioho bise'oho avohareje.

Paul'o hesi ariböviohu'o Philippi amore ro jö atamu hegorovo Lydia-hu mae uehorovade jöhoje.

¹¹ Ëhi'onugoromo Troas jioromo boat-re iojiomoromo ma-ahorirëro jovo döre va'aroho va'o Samothrace sa'are suorovë'ëro nëröho jovo döre va'aroho Neapolis amore suorovareje. ¹² Neapolis suorovonugoromo örëro va'aroho Philippi amore suorovareje. Ëamoho Macedonia sa'are jiadeje. Macedonia sa'a börömoho röhu ë sa'aho taritarivë'e ihe gö gö jiadeje. Röhu sa'a dirö'e gemu börömoho jiadeje. Ëdirö'ore sa'are Philippi amoho jiadeje. Rome amo rajohuro rueruomoromo ë

amoho aevo'i ioromo raromobe rové'e jiareje. Amo noro ro Philippi amore suorovoromo majae gemu niö'i ë raromareje.

¹³ Raromoromo iae Jew rajo nuho majaho rovamu noro uvareje: Nani Jew rajo ariböviohuro God-are örire jöe ato'i nume jovo riröre abo raromarue höromo amore jioromo ë abuejareje. Abueromo ë raromoromo gagovoromo raromarue magonaho ömo'ömocho Iesuare jöho majëhijareje. ¹⁴ Jöe majëhijamu magonahe gemu hesi ihoho Lydia-ro ë hiromo hejadeje. Lydia hu Thyatira amo rajo magonahe jiadeje. Hu kavü'e niögu maho imo'amaje magonahe jiadeje. Hu bogo Jew rajo magonahehu jiadeje röhu Jew rajo ariböviohu'o gemuore God rajahinövadeje. Röhu Badaro Lydia-are dë vövöbajo'oho jiovahë'ero huro hejade Paul-ro Iesuare jöho majëhijamu hegorovo jöho ejahadeje. ¹⁵ Ejahoromo hu'o hesi osare raromarue ariböviohu'o bapataeto vaejareje. Vaenugoromo ë magonahohuro uövüadeje: Jemë uvarujoho: Iae mae-ëjo. Nöröro Bada mae uehorovajë uvarujoho jemëro rueromo nasi osaro raromohëjo. Èhi uöromo dinamuijamu ejahareje.

Philippi amo rajo jabesi a masijehu Paul'o Silas'o savoji gagore ba'amëvare jöhoje.

¹⁶ Èhi ë'ë'ero iae noro God-are örire jö ataruire va'i va'amu gavë'i magonaho aboride gemuëro örire birohavuadeje. Èmagonahoho hesi ma-a masijo jabesi muemu vaejëhaje magonahe jiadeje. Röhu Satan-are aru'aho sisë gemuëro hesi dë vövöbajo'ere abuejamu simanoho sisërejë'ero ëhu'ero rabe rabe ijönö jioröhe jöho iae hu ae huruoho majëhinövadeje. Majëhiromo monie mana baenugoromo hesi a masijo ömo'ömocho i'imëmi'ego rueho jaburo moni börömo mae baenövareje. ¹⁷ Amo ë magonahohuro simanoho sisërejë'ero Paul'o no'o rihromavutoromo darugo'o uvobe rovadeje: Èaribövioho jabumë God dö mare hijaje hesi mu aribövie jëvajëjo. Jemëhu sisëroho bogo va'i maro va'irarije öroho röjëhijarue höjo. ¹⁸ Èjöe gemuoho majae aho'o rihromavutoromo uvobe ruenövadeje. Èhi'ojuvo Paul-ro he'i hiromo vörönimamu hegorovo huotorovoromo magonaho hesi dëre aru'aho sisëho uavadeje: Iesu Keriso-are ihoro naro ja uavajëjo: Aruëre magonaho hesi dë vövöbajo'eroho hörö va'ëjo. Va'ëjamu gavë'i evare höröromo va'adeje. ¹⁹ Höröromo va'amu ë magonaho hesi a masijohuro garomo uvareje: Aru'ahoho magonaho hesi dëre rarovö'öjahë'ero jjië'ero ë magonahoho rabe rabe ijönö jioröhe jöho bogo majëhiromo ëhuro monie gö'o bogo baeromo bojamui'iramu bae'ëjarëromo Paul'o Silas'o guduamëvoromo amo ririre jagu baejëvo rovarëje amore a masijo jabesi nunire rëmoröhëro. ²⁰ Jagu baejëvo rueromo Rome rajehu court mevarue a jabesi nunire rëmonugoromo Paul'o Silas'o jabesi jö sisëho majëhiromo uëvareje: Ave aho Jew raje aëro jëvë'ero nosi amore mu sisë barueromo ijumavuaruëjo. ²¹ Èhesi bëhoho Rome nosi jögoroho ahoromo jabesi muoho röjahuijaruëjo. No Rome rajëro javuë'ero jabuhu röjahuijarue mu ejëhoromo vaejë'oho bogo maehu höjo. ²² Bogo maehu höjamu hegoro rue amo raje ae aho'obëhe gemuore gagovoromo ajëmiromo anëgo'ië'areje. Anëgo'ia'amugo amore a masijohuro Paul'o Silas'o jabesi niögocho ma'eno dadovëhoromo jijövëhoromo police uëvareje: Hisuebijëvohëjo. ²³ Hisuebijëvohëjamu hisuebijëvo'i

arijuvo hisuebijëvonugoromo baejëvo va'o savoji gagore ba'amëvoromo savoji muebejaje aho uavareje: Ave ae niö'ioho avoho muebejëvonëjo. Ju'ebi'aruëjo. ²⁴ Ëhi uavamu hegorovo baejëvo va'oromo savoji osa riri-ro avoho ba'amo rëmoromo hõroho ijo dirõ'ore bahijëhoromo evare i'u'e ijo ha'osi gõho baro havoromo muoho taemëvamu ëhi ariemu arijareje.

²⁵ Ariromo vahi riri'e jiamu Paul'o Silas'o God-are õrire jõe majahiromo hu rajahiromo jõe iareje. Rajahiromo jõe iavavamu savojire a ioro'iorohuro heruomadeje. ²⁶ Ëhi'amu gavë'i sa'aho mamajioho hijiohijiovamu savoji gagoho aho'obëhe ë javu vaejare munë sa'a uhure jio'amajohu'o sisë maro hijiohijiovadeje. Hijiohijiovamu gavë'i evare oje aho'obëhe jiororovoromo ae aho'obëhe tövëvare õ'oho jiororovo'amadeje. ²⁷ Jiororovo'amamu iae savoji muebejaje ahuro niavë'ëro ri'õromo gavade ojoho aho'o jiororovo'amë'e jiamu gagorovo uvadeje: Huruomë'e hõromo kaejõ ëgoho jijõromo hesi arijo'arije anorovo'ië'adeje. ²⁸ Hesi anorovo'ia'amu gavë'i Paul-ro ma-darugo'o uavadeje: Ëhi jië'oho vuonugëjo. No ae aho'obëhe aviae javuajëjo.

²⁹ Aviae javuajëjamu uvadeje: Iroho gae ujuoho ruehego gavõromo ma-burëro rovadeje. Rueromo juhuonivoromo butubutumoromo Paul'o Silas'o jabesi bëhire behumorovadeje. ³⁰ Behumorovë'ëro hu'irae õmëvoromo amonõ va'oromo uëvadeje: Na diehi ë'ejõjo ëhuro maja ijoho na sisëroho bogo va'i maro va'irode.

³¹ Diehi ë'ejõjamu uavareje: Bada Iesu mae uehorovonëjo. Mae uehorovë'õho God-ro ja manõ bamavo'iramu maro va'a'anuëjo. Ja'o jasi osare raromaruohu'o ëhi jëvo'ajëjo. ³² Ëhi'onugoromo Badare jõho majëhijamu rue savoji muebejaje ahu'o hesi osare raromaruohu'o jaburo hejareje. ³³ Henugoromo evare majaroho vahiromë'iro Paul'o Silas'o hu'irae õmëvo va'oromo sinore nemo'amadoho u'ovëho'amoromo hu'o hesi osare raromaruohu'o ma-burëro bapataeto vaejareje. ³⁴ Bapataeto vaenugoromo Paul'o Silas'o hu'irae õmëvoromo osare ajiomoromo ie i'imëmijadeje. Ie i'imëmiromo hu'o hesi osare raromaruohu'o God mae uehorovë'ëro nimoroho avohareje.

³⁵ Ëhi ë'ë'ëro sisonuvamu gagorovo Rome rajehu court mevarue a masijohuro police-oho jõe bojëmiromo rëmõ'õjamu va'oromo savoji muebejaje aho uavareje: Savoji gagore arijarue ae niö'ioho ojoho jiovëhego va'irarëjo. ³⁶ Va'irarëjamu hegorovo savoji muebejaje ahuro Paul uavadeje: Court mevarue ariböviohuro jõe nugõ'õjë'e hõjo naro rëmõ'õjego Silas'o ja'o hõroromo va'irarijago. Ëhuni hõroromo mae va'orëjo.

³⁷ Mae va'orëjamu Paul-ro ri'õromo police-oho uëvadeje: Röhu nosi sisë bogo birohë'e a nuniro ëma hisuebijavuare hõjo. Ëho bogo maehu hõjo no Rome rajëro javuë'ëro. Ëhi'oromo savoji gagore ba'amavuare hõjo. Ëhi ë'are hõjo röhu jaruvoho jabumë diehi'oromo saginiëri ramuõ'õ'ië'aruëjo noro va'ojõro. Bogo ëhioho hõjo. Nadi'ego court mevarue ariböviohuro rueromo jabesi õvëro baejavuego hõroromo va'irarëjo.

³⁸ Ëhi uëvamu hegorovo police-ohuro jõho bava'oromo court mevarue aribövioho majëhijareje. Majëhijamu hegorovo hejare Paul'o Silas'o Rome raje ae jëvamu hegorovo juhuonivareje. ³⁹ Juhuonivoromo

rueromo Paul'o Silas'o sanuëmiromo savoji gagore jëvamu hu'irae ömëvo rueromo uëvareje: Jemëro nosi amoho vuonugo'i va'orëjo. 40 Va'orëjamu Paul'o Silas'o jaburo savoji gagore jioromo höröromo Lydia-are osare va'areje. Va'oromo Christian agano ömo'ömoho gëromo jögore mëmiromo va'areje.

17

Paul'o Silas'o Thessalonica amore va'oromo huë vavaeni baejare jöhoje.

¹ Va'oromo Paul'o Silas'o Amphipolis amore va'aroho Apollonia amore va'aroho va'o Thessalonica amore höröjareje. Höröromo gavareje Jew rajehu God rajahijarue osaho ë jiamu. ² Jew rajehu God rajahijarue osaho jiamu gagorovo Paul-hu amore amore juvoromo God rajahijarue osare va'onövadëhi ëhi ë osare va'adeje. Va'oromo God-are surire jöho adahoromo ë jö hesi bëhoho Jew rajo ariböviohu'o gemu mae mevadeje jabesi simane huotovëho'i. Nuho majae niö'i gemu rue'ego ëhi ë'onövadeje. ³ Bëhoho røjëhiromo uënövadeje: God-are surire jö urimë'i jajivare hesi bëhoho God-hu uavë'ëro bëröme namiromo ajamui'iröhe aehu rovë'iroho huro huë vavaene baeromo guomoromo i'ovoromo ri'ö'a'ajëjo. Surire jö hesi bëhoho ëhi höjo. Röhu naehu majëhijaje aho Iesu hu iae ë bëröme namiromo ajamuijaje aho höjo. ⁴ Ehi jië'e jöho majëhijamu Jew rajo a ioro'iorohuro uvareje: Iae jö mae höjo. Jö mae hö uvoromo aevoromo Paul'o Silas'o gemu mae jijihareje. Greece rajehu God mae uehorovarue aho aho'obëhe magonaho masijoho aho'obëhe jabu'o Paul'o Silas'o gemu mae jijihoruomadeje.

⁵ Ae aho'obëhe Paul'o Silas'o gemu mae jijihamu gëgorovo Jew rajoho ëhuni dë vörönëgadeje. Dë vörönëgamu örيره ëma jijiharue a sisëhu mu sisë vaejoro gemuoro gagovëvareje. Gemuoro gagovëvoromo muorovo jöho ma-darugo'o atamu amo raje ae aho'obëhe heromo muorovo'i ë'oruomadeje. Muorovo'i ë'oromo ri'öromo Jason-are amoho ro juhiromo osare va'oromo Paul'o Silas'o nahëvareje guduamëvoromo amonö baejëvo rueromo ae aho'o jabesi nunire rëmo'iro. ⁶ Jason-are osare va'oromo gavare Paul'o Silas'o bogojëvamu gagorovo jaburo Jason o Christian agane gö gö guduamoromo jagu ujuoho va'oromo amore a masijo jabesi nunire bamëvoromo ma-darugëremu uëvareje: Majae hö'öjajire nume beva'ajire huë sisë öri røjëhibe jijihaje aribövioho ave nosi amohu'o rovë'e höjo. ⁷ Nosi amohu'o rovamugo Jason-ro uëvade höjo: Ro nasi osaro arihëjo. Huro ëhi uëvamu hesi osare arijë'ëro Rome a bërömehu bojamuijade jöho ahoromo sareramuiromo uövuarue höjo: A ioro'ioro iosiramuiromo bërömo namijaje aho bogo Rome hiromo bëröme namiromo no muebejavuaje aho jio'i a'i hesi ae gö höjo. Hesi ihoho Iesu höjo. ⁸ Ehi majëhijamu hegorovo amore ae aho'obëhe o jabesi masijoho aho'o vörö'iraeruomadeje. ⁹ Vörö'iraeromo amore a masijohuro Jason'o Christian a ioro'iorohu'o uëvamu monioho bojëmijamu ëhuro rëmö'öjamu va'areje.

Paul'o Silas'o Berea amore va'oromo ë'are jöhoje.

¹⁰ Ehi'oromo vahiomamu gavë'i Christian aganohuro Paul'o Silas'o Thessalonica amore jëvamu rëmö'öjëvareje Berea amore va'iröhego. Rëmö'öjëvamu va'oromo Berea amore höröjareje. Höröromo Jew rajehu

God rajahijarue osare va'oromo Iesuare jöho majëhijareje. ¹¹ Jöho majëhijamu Berea amo rajohuro Thessalonica amo rajoho iosirëmiromo simano mae uehorovë'e aribövie jioruomadeje. Simano mae uehorovë'ëro God-are jöho he'i nimo avohareje. Heromo God-are surire jöho adaho'i arijareje ga'iro Paul-hu majëhijade jöho jö mae o sareri jöe jiego. ¹² Mae o sareri jöe jiego ga'i adahonugoromo Jew raje ae aho'obëhe Iesu mae uehorovareje. Jew rajëro mae uehorovoli Greece rajo magonaho masijohu'o Greece rajo ama'i'o ae bogo bise'o vadu'oho Iesu mae uehorovoruomadeje. ¹³ Èhi'amu Jew raje rue Thessalonica amore raromaruoho jaburo hejare uvavamu: Paul-ro God-are jöho Berea amore majëhijë'e jiajëjamu hegoro Berea rueromo amo raje ae aho'obëhe jabesi dëho iëhareje jaburo vörö'iraeromo Paul'o muorovo'iröhego. ¹⁴ Èhi'amu gavë'i Christian aganohuro Paul nugö'öjamu abuejadoho abo sö jovore höröjadeje. Èhi'o'irögoro Silas'o Timothy'o Berea amore èhi arijareje. ¹⁵ Arijamu Paul namijaho va'are ariböviohuro hu'irae bava'oromo Athens amore suorovoromo è nugareje. Paul è nugoromo Berea vuonorö'ö va'ia'amu gagorovo Paul-ro uëvadeje: Va'irarijoho Silas'o Timothy'o uëregö ma-burëro rue'irarëjo. Èhi uëvamu hegorovo va'areje.

Paul-hu Athens amore hiromo Iesuare jö majëhijade jöhoje.

¹⁶ Va'amu gagorovo iae Paul-ro Athens amore hiromo Silas'o Timothy'o muebejëvadeje. Hiromo muebejëvoromo gavade aru'aho'e höromö uvene aho röjahi'amarue inömoho aho'obëhe amore jiorovamu gagorovo uvadeje: Amo rajoho God-are jöho bogo hejarue höromö èhuni dë vövöbajo'e aho'o vavaenimadeje. ¹⁷ Vavaenimoromo Jew rajehu God rajahijarue osare va'oromo Jew rajohu'o sa'a ioro'ioro rajehu God mae uehorovarue ariböviohu'o Iesuare jöho mevoromo jabesi simane huotovëho'iro vae majae imo'amarue öri ari'ere va'o namiromo ganövade ae rue'ego jabu'o Iesuare jöho mevonövadeje jabesi simanohu'o huotovëho'iro. ¹⁸ Jöho mevo'ego Epicurus-are jö hesi ijore ijore jijiharue ariböviohu'o Stoic jö hesi ijore ijore jijiharue ariböviohu'o èhi jië'e ariböviohuro God-are jöho bogo hejaruëro jië'ëro Paul-are örire rueromo jö aho'ahaminövareje. Jö aho'ahamiromo a ioro'iorohuro uarovonövareje: Simano bogojië'e aho rahuro rajahijöro jöho jövajëjo. Rabu jöe jövo'i è'ajëjo. A ioro'iorohuro uarovonövareje: Nani sa'a gö rajehu böröme hö uehorovarue aru'aho jabesi jöho huro majahuiromo è'ajëjo. Jabuhu èhi uarovare hesi bëhoho Paul-ro Iesuare jöhu'o aehu vuovoromo ri'öjarue jöhu'o majëhijamu hejë'ëro èhuni uarovareje: Sa'a gö rajo aru'aho jabesi jöho majahuijajëjo. ¹⁹ Èhi uarovoromo Paul uavareje: Rovego no Areopagus dahorure ajiomarëjo èhuro è gagovarue a masijo jabesi nunire jasi jöho jövego heröhe höjo. Èhi uanugoromo hu'irae bava'oromo Areopagus a masijo jabesi nunire nugoromo uavareje: Jö i'e jaehu baeromo rovanuoho no he'i nagujajëjo. ²⁰ Jaehu jövanue jöho bogo hejaruëro jië'ëro èhuni no nagujajëjo avoho he'iro. ²¹ Èhi uavare hesi bëhoho Athens amo rajohu'o sa'a ioro'iorore jioromo ro Athens raromarue ariböviohu'o èho jaburo jö i'e èhemu atemu atoromo hemu henövareje. Èhi jië'e muohemu uehorovonövareje.

22 Ĕhi'amu Paul-ro ě a masijo jabesi nunire ri'ō namiromo uĕvadeje: Athens amo rajomĕ na jō harihe majĕhi'iĕ'ajĕjo. Na gĕvajoho jemĕ aru'ahē gō gō mae uehorovĕvaruje aribōvie jĕvajĕjo. 23 Ĕhesi bĕhoho na jemesi amore juvode hōjo. Juvoromo jemĕhu aru'aho rajĕhijaruje ōri ari'oho gabe juvo'i gavode hōjo munĕ maratue hitavoromo sehoromo jajivoromo uvĕ'e jiamu: Ave maratu hesi bĕhoho hesi iho bogo hejarue aru'ahohuni ave maratuoho ĕma hitavo nugaruĕjo. Ĕhi uvĕ'e jiamu gavĕ'ĕro jemĕ hesi iho bogo hejĕ'e ĕma rajahijaruje aru'aho hesi jōho iae na rōjĕhi'irōgoro ĕ'ajĕjo. 24 Ĕaru'ahoho iae God hōjo. God-hu sa'a bōvi bise'o bamade aho hōjo. Huro bōrōme namiromo ō'idōrohu'o sa'arohu'o muebejavuaje hōjo. Ĕhuni ma-aehu hu rajahi'i vae'amare osaroho hu bogo ĕho hijaje hōjo. 25 Hu eni jiĕ'e aego no bogo hunioho vavaenimoromo bōvioho bise'oho avohoromo hu i'imami'ejarĕjo. Ĕhesi bĕhoho huro gemuĕro no ae aho'o birire bojamuego nue ahoromo daruge bōvie bise'e baeromo raromarue hōjo. 26 Huro ae gemu bamade hōjo. Bamoromo ĕ aho baeromo ĕhuro sa'ae aho'obĕhe raje avohĕvobe rovĕ'e hōjo jaburo sa'ae dinō'e dinō'e va'oromo raromorōhego majae hō'ōjajire beva'ajire. A bogo bamadevare evare huro uvade hōjo: Aribōvioho ĕ majare raromō'i ĕ majare rireromobe va'oromo ĕ sa'are ĕ sa'are raromobe va'a'ajĕjo. 27 Huhu bamĕvade hesi bĕhoho aĕro God ga'i nahobe va'irōhego. Nahobe va'ojuvo nani bihorōhego. Rōhu God bogo ĕgoroho jio'i ae gemu gemu no'o hi juvaje hōjo. 28 Ĕhesi bĕhoho noro hesi darugoro raromō jijiho'e vaejarue hōjo. Ĕjōe gemuoho jemesi gavĕ'e aribōviohuro jajivoromo uvĕ'e hōjo: Iae no ae aho'obĕhe hesi aboji harihu'e javuajĕjo. Ĕhi uvare hōjo.

29 No God-are aboji harihu'ĕro javuĕ'ĕro ĕhuni no bogo uehorovoromo uvo'ejarĕjo: God hu aehu gold silver munĕ gō gō ujuohoromo ōvo sasohoromo simano sasohoromo sehoromo avohō'amare inōmoho va'ĕne hōjo. No bogo uvo'ejarĕjo: God hu ĕhi hōjo. 30 Urimoho aehu God-are jō bogo hejare majare God-ro gĕvade aĕro ĕhi jiĕ'e inōmoho aru'aho'e hōromo uvene aho rōjĕhi'ego gĕromo magĕ taemonōvade hōjo. A'i avevejō'oho ae aho'obĕhe sa'ae dinō'e dinō'e raromaruje aribōvioho uĕvajĕjo: Uehoro sisĕho vuonugo'i nasi ōroro ruehĕjo. 31 Ĕhi uĕvaje hesi bĕhoho huro majaho bamĕ'e hōjo sa'are ae aho'obĕhe hesi court-re riravo'irōhego. Riravo'iramū huhu uavade ahuro hesi ihore court vaejĕvoromo ae aho'o jabesi jōho avoho mevoromo gĕ'a'ajĕjo gĕ'i ae mae o sisĕ jĕvego. Aĕro ma-samaro uvorōhego: Ĕahuro mevo gō'a'ajĕ uvorōhego ĕhuni hu ajamamu guomoromo ri'ōjade hōjo.

32 Guomoromo ri'ōjade jōho heruomoromo a ioro'iorohuro sivareje. A ioro'iorohuro uavareje: Jasi jōho rōhu maho u'emu he'ejarĕjo. 33 Ĕhi'amu Paul-ro gagovaruire jioromo va'adeje. 34 Va'amu a ioro'iorohuro aevoromo hu'o gemu mae jijiho va'oromo Iesu mae uehorovareje. Areopagus dahorure gagovaje a bōrōme gemu hesi ihe Dionysius o magonahe gemu hesi ihe Damaris o ae gō gō ĕho jaburo mae uehorovareje.

18

Paul-hu Corinth amore va'oromo ë'ade jöhoje.

¹ Ëhi'amu gagorovo Paul-ro Athens amore jioromo va'adoho va'o Corinth amore höröjadeje. ² Corinth höröromo Jew rajo a ihe Aquila birohadeje. Aquila hu Pontus amore rahade ae jiadeje. Rahë'ëro ijönö va'o Italy sa'are hijadeje. Hiromo Rome a böröme Claudius-ro Jew rajo ariböviohuro Rome jëvamu va'o barëjoro uëvamu gagoro hu'o hesi vabore Priscilla'o Rome jioromo Corinth amore aviavejõ'e rovareje. Corinth aviavejõ'e rovamu Paul-ro jabumë gë'i va'adeje. ³ Va'oromo Paul o Aquila o Priscilla mue gemuoho vaeromo niögu javue vaejaruëro jië'ëro Paul-ro jabu'o hiromo ë muoho gemu mae vaeromo ijo bajoho mana baenövareje. ⁴ Ëhi'oromo Jew rajo nuho majaho rue'ego Paul-ro Jew rajehu God rajahjarue osare va'oromo Jew rajohu'o Greece rajohu'o jabu'o jõe mevoromo jabesi dë vövöbajo'o ho huotovëho'i ë'o ganövadeje jaburo aevoromo Iesuare örire jijihoröhego.

⁵ Ëhi'ojuvo Silas'o Timothy'o jaburo niö'iro Macedonia sa'are ar-ijë'ëro Corinth amore rovareje. Corinth amore rovamu gagorovo Paul-ro mue gö gö vuonugo'i Iesuare jöhuremu ae majëhijadeje. Majëhiromu Jew rajoho uënovadeje: God-hu uavë'ëro böröme namiromu ajamuijaje aho iae Iesu höjo. ⁶ Ëhi majëhijamu hegoro ruue Jew rajo ariböviohuro jö aho'ahamiromu Paul-are jö sisëho atamu hegoro huro niögure uono'uonoho jabesi nunire hijiovo röjëhijadeje jaburo garöhego hu jabesi muoho bijönimego. Röjëhiromu uëvadeje: Jemë i'u baejë'oho ëho jemesi mue höjo. Bogo nasi muehu höjo. Ijoho naro Jew rajoho jemë vuonugëvo'i va'oromo sa'a ioro'oro rajoho jöho majëhinövo'ejöjo. ⁷ Ëhi uënugoro muo Jew rajehu God rajahjarue osaho vuonugo'i va'oromo ruëre osa göre Titius Justus-are osare va'o hijadeje. Titius Justus bogo Jew rajo aho jiadeje röhu Jew rajoho jabu'o God rajahijaje ae jiadeje. ⁸ Ëhi'amu gagorovo Crispus Jew rajehu God rajahjarue osa muebejaje aho Crispus'o hesi osare raromarue aribövioho aho'obëhe jabu'o aevoromo Bada mae uehorovareje. Mae uehorovamu Corinth amo rajae ae aho'obëhe Iesuare jöho heromo mae uehorovoromo bapataeto vaeruomadeje.

⁹ Ëhi'amu vahiromamu gagorovo Paul-ro nia'ovo'iraeromo gavadeje Badaro rueromo uavamu: Nadi juhuonivo'i jöho jövonövonëjo. Bogave vuonugo'iranëjo. ¹⁰ Ëhesi bëhoho na ja'o hi juvaje höjo. Aho bogo anago'aruëjo ave amore nasi aribövioho böröme mae jië'ëro. ¹¹ Ëhi uavamu Paul-hu ë amore hiromu God-are öri röjëhibe va'adoho vadune gemu manaere 6 ëhi barëjadeje.

¹² Vadune gemu manaere 6 ëhi barëjamu Gallio-hu Greece sa'a Rome jabesi ihore muebejëvadevare evare Jew rajoho jaburo gagovoromo Paul guduamoromo court-ro bava'oruomadeje. ¹³ Paul court-ro bava'oromo ë a börömoho Gallio uavareje: No ave a barovare hesi bëhoho huro aribövi jabesi dë vövöbajo'o ho huotovëho'i ë'ajëjo jaburo God sisë'i sisë'i rajahiröhego. God ëhi rajahijë'oho jögoroho ahoruomo'ajëjo.

¹⁴ Ahoruomo'ajëjamu Paul-ro hesi jöho majahi'ia'amu gavë'i Gallio-ro uëvadeje: Jew rajomë ave aho vajiohu'e anano'e muoho vae'ibejajo

naehu ma-taemorovoromo jemesi jö hejë'oho iae mae jio'ibejajo. ¹⁵ Röhu bogo ëhi jië'e jöho barovarije höjo. A'i jemesi jö bëhi iho bëhi mu jögoru bëhi rabe rabe Jew rajo jemëhu atoromo berohemu beroharujohe ëhi jië'e jöhemu court-ro barovë'e jëvaje ëhuni jemëro jemesi gahëjo. Ëhi jië'e mu öri mevë'oho na bijönegajëjo. ¹⁶ Ëhi uënuoromo hesi aribövioho uëvamu sihö'öjëvareje. ¹⁷ Sihö'öjëvoromo ae aho'obëhe ri'öromo Jew rajehu God rajahijarue osa muebejaje a hesi ihoho Sosthenes guduamoromo court a masijo jabesi nunire baro anoromo köe bojamareje. Köe bojamamu gëgorovo Gallio-ro ma-nunëremu gëvadeje.

Paul-hu Antioch amore vuonorö'ö va'ade jöhoje.

¹⁸ Ëhi'amu Paul-ro Corinth amore Christian aganohu'o gemu mae hijamu majae ëgobövie barëjadeje. Majae ëgobövie barëjamu huro aribövioho ë rëmo'i Cenchreae amore abuejadeje. Abueromo höröromo mue vaeröhëni God-are nunire mae uanugoromo aëro simano uoho tariojahöjoro uavadeje hujeji muoho barëjego evare ijönö aëro röhu maho tariojahoröhego. Simanoho tariojahamu Paul-ro Priscilla'o Aquila'o gemu mae boat-re ajiomadeje Syria sa'are va'oröhëni. ¹⁹ Va'adoho va'o Ephesus amore höröjadeje Aquila'o Priscilla'o ë amore rëmo va'ießëro. Höröromo huro Jew rajehu God rajahijarue osare va'oromo Iesuare jöho Jew rajohu'o mevadeje jabesi simanoho huotovëho'i. ²⁰ Mevamu hegorovo rue ariböviohuro uavareje: Avehuro majae ëgo'o hiromu u'emu va'onëjo. U'emu va'onëjamu bogo ejëhadeje. ²¹ Bogo ejëhoromo va'irögoro uëvadeje: God-hu nimë'ohuro na vuonorö'ö rueromo gë'ejöjo. Ëhi uënuoromo boat-re ajiomoromo Ephesus amoho vuonugo'i va'adeje. ²² Va'adoho Caesarea amore ravo'amoromo ajiomadoho ajio Jerusalem amore höröromo ekaresia aho magonahoho jejëminugoromo va'adoho va'o Antioch amore höröjadeje.

²³ Antioch majae ëgo'o hiromu va'adoho Galatia sa'a'o Phrygia sa'a'o birorohade ënire Keriso-are aribövioho aho'o jöe majëhiromu ëhuro jabesi dë vövöbajo'oho biririvëhobe juvadeje.

Apollos-hu Ephesus amore ro hiromu va'oromo Corinth amore hiromu ë'ade jöhoje.

²⁴ Ëhi'amu iae Jew raje ae gemu hesi ihoho Apollos-ro Ephesus amore rovadeje. Hu Alexandria amore rahade ae jö'e sasohoromo jöe jövaje ae God-are surire jöho ga avohë'e ae jiadeje. ²⁵ Ae göëro Badare öroho Apollos röjahijamu hejë'ëro hesi dë vövöbajo'e aho'o ri'öromo Iesuare jöho majëhiromu ma-ahorirëro röjëhinövadeje. Ëhi jiadeje röhu Iesuare ihore bapataeto vaeröhe jöho bogo he'i John-hu bapataeto vaejëvade jöhemu hejë'ëro jöho jövonövadeje. ²⁶ Amo Apollos-ro Ephesus amore rueromo Jew rajehu God rajahijarue osare va'oromo aevoromo God-are jöho biririvoromo majëhijadeje. Majëhijamu Priscilla'o Aquila'o hejare Apollos-ro God-are jö vituoho he'i vituoho bogo ma hejë'ëro jöho majëhijamu hegorovo jabesi osare hu'irae bava'oromo avoho röjahiromu uavareje: God-are mu öroho ëhi höjo.

²⁷ Ĕhi'amu Apollos-ro uvadeje: Na Greece sa'are va'ejōjo. Va'ejōjamu Ephesus amore Keriso-are aribōviohuro hu ajamiromo suroho jajiv-
oromo bojamijareje huro bava'ego Greece sa'are raromarue Keriso-
are aribōviohuro adahoromo hu rajahiromo baeruomorōhego. Suroho
bojamamu baeromo va'o Greece sa'are hörōjadeje. Hörōromo jōho
majēhadeje. Majēhiromo God-hu huē baejēvoromo jabesi simano hu-
tovēhē'e Keriso mae uehorovarue aribōvioho ē aribōvioho Apollos-ro
mabēhe ajēmijadeje. ²⁸ Ĕhesi bēhoho huro biririvoromo Jew rajo jabesi
jōho a nunire aho'ahēmiromo God-are surire jōho adahoromo avoho
rōjēhijadeje jaburo garomo uvorōhego: Iae mae-ējo. God-hu uavē'ero
bōrōme namiromo ajamuijaje aho iae Iesu hōjo.

19

Paul-hu Ephesus amore hiromo ē'ade jōhoje.

¹ Apollos-ro Corinth amore hijamu evare majae gemuore Paul-ro
sa'a ririre va'adoho va'o Ephesus amore hörōromo ē hijadeje. Hiromo
Keriso-are aribōvi ioro'ioroho birohēvadeje. ² Birohēvoromo uēvadeje:
Jemē Iesu mae uehorovarijevaroho na jemē God-are Aru'ahoho baejar-
ije hōjo o bogajo. O bogajamu uavareje: O-ajo. God-are Aru'aho hesi
jōho no bogo hejē'e javuajējo. ³ Bogo hejē'e javuajējamu uēvadeje:
God-are Aru'aho hesi jō bogo hejē'o ho jemēhu bapataeto vaejarijoho bēhoho
diehi jiade hōjo. Uavareje: John-hu bapataeto hesi bēhi majēhinōvadoho
bēhe gemuoho jiade hōjo. ⁴ Bēhe gemuoho jiade hōjamu Paul-ro
uēvadeje: Iae mae hōjo rōhu John-hu a bapataeto vaejēvade hesi
bēhoho aēro uvorōhego: Ĕaribōvioho uehoro sisēho vuonugo'i uehoro
i'e baejē'ero ēhu'ero ē'aruējo. Rōhu bapataeto vaejēvoromo uēnōvade
hōjo: Nasi ijore ruerōhe aho rovego ē a hesi ōroro mae uehorovorējo.
Ĕhesi bēhoho Iesu mae uehorovo'irōhe jōho uēromo ē'ade hōjo. ⁵ Ĕhi
uēvamu hegoro ē Ephesus amo rajohuro Bada Iesuare ihoro bapataeto
vaejareje. ⁶ Bapataeto vaejamu Paul-ro ōve simane taemēhamu God-
are Aru'ahohuro jabesi dē vōvōbajo'ere ro abuejadeje. Aru'ahohuro
abueromo jabesi simanore ajēmiromo huotovēho'ego jōho bogo hejarue
huē gōēro gōēro atonōvo jōe God-aro baeromo huruoho majēhinōvareje.
⁷ Ae aho'obēhe 12 rabu'e jaburo ēhi jiē'e muoho vaejareje.

⁸ Ĕhi'amu Paul-ro Jew rajehu God rajahjarue osare va'oromo biririv-
oromo ē aribōviohu'o jōe mevoromo jabesi uehoroho aho'o hu-
tovēho'i ē'o gavadeje jaburo uvorōhego: Iae mae-ējo. God-ro bōrōme
namiromo ēhi muebejavuaje hōjo. Ĕhi'obe va'ojuvo manaere niō'i
gemu barējadeje. ⁹ Manaere niō'i gemu barējamu a ioro'iorohuro
biriri'ōvoromo jōho bogo ejahoromo Badare mu ōri hesi jōho ae aho'o
jabesi nunire sisē'i atareje. Jōho sisē'i atamugo Paul-ro ri'ōromo ē Jew
rajehu God rajahjarue osare aribōvioho rēmo'i Keriso-are aribōvioho
sō ujuohoromo va'adeje. Va'oromo Tyrannus-hu jō majēhijaje osa
bōrōmore va'oromo majae ēhi Iesuare jōho jōvonōvadeje. ¹⁰ Ĕhi'obe
va'ojuvo vadune niō'i barējamu Asia sa'are raromarue ae aho'obēhe
Jew rajohu'o sa'a ioro'ioro rajohu'o ēho jaburo Badare jōho hejareje.

Sceva-are harihu ōmo'ōmehu sareri sareri ē'are jōhoje.

11 Ĕhi'ĕ'ego God-ro Paul ajami'ego bogo gavarue darugo'e mu masi-joho vaenövadeje. 12 Mu masijoho vae'ego Paul-are sinore rĕho'amade niögoho aĕro ujuohoromo guomo guomo baejĕ'e aribövi jabesi örire va'ego jabesi guomoho barĕnövo Satan-are a sisĕ dĕre jiĕ'oho suorovo va'onövareje.

13 Va'ego iae Jew rajo a ioro'iorĕro sisĕ aribövi dĕre jioruomajoho suorovo va'ojöro uvobe jijihonövareje. Jijihoromo ma-sarerivoromo Bada Iesuare ihoho uvo ganövareje suorovoromo va'ojöro. Uvo garomo aru'aho sisĕho uĕnövareje: Paul-hu majahuijego hejarue aho Iesu ĕ a hesi ihore uĕvaruĕjo: A dĕre jiarujoho suorovoromo va'ohĕjo. 14 Jew rajo priest böröme gemu Sceva-are harihe 7 ĕho jaburo ĕhi jiĕ'e sareri'e muoho vaejareje. 15 Ĕhi jiĕ'e muoho vae'i ĕ ö ömo'ömo 7-ho jaburo aru'aho sisĕ hesi dĕre abuejĕ'e ae gemu hesi osare va'areje. Va'oromo sarerivoromo Paul-are ihohu'o Iesuare ihohu'o ĕma jöho majahiromomo aru'aho sisĕho sarerami'i ĕ'o gavareje. Sarerami'i ĕ'o garomo uavareje: Paul-hu majahuego hejarue aho Iesu ĕ a hesi ihore noro uavaruĕjo: Ĕa hesi dĕre jianuoho höröromomo va'ĕjo. Höröromomo va'ĕjamu hejĕ'i rue aru'aho sisĕhuro uĕvadeje: Jemĕ Iesuare jöhu'o Paul-are jöhu'o majehijarujĕjo. Iesu iae na gavaje höjo o Paul-are jöho iae na hejĕ'e jĕvajĕjo. Röhu jemĕ rahumĕ jĕvajĕjo. 16 Rahumĕ jĕvajĕjamu hejĕ'i aru'aho sisĕ dĕre jiĕ'e ahuro ri'öromomo ĕ ö ömo'öme 7-ho darugo'o muo'amoromo jabesi darugoho ruahö'öjĕhoromo jabesi niögoho jaho'amoromo ruruhö'öjĕhamu dĕ'ahobatĕremu ma-köemu jiĕ'e hesi osare jioromo huruomoromo va'areje.

17 Huruomoromo va'amu Jew rajohu'o sa'a ioro'ioro rajohu'o Ephesus raromaruohuro ĕ jöho heruomadeje. Heromo ae aho'obĕhe juhuonibijiohamu Bada Iesuare ihoho ma-döro jiadeje. 18 Ma-döro jiamu Iesu mae uehorovarue ae aho'obĕhe mu sisĕ gö gö gurihiromomo vaejaroho sama'e huruoho majĕhijareje. 19 Majĕhiromomo röhu ae gö gö urimo iro oso'e mu vaenövarohuro uvoruomadeje: Nosi iro oso'e muoho sisĕ hö uvoromo jabesi iro oso'e mu hesi suri surioho ujuoho rueromomo gemuoro gagovoromomo ae aho'o jabesi nunire vĕniro huareje. Vĕniro huoromomo suri suri hesi manaho adahoromomo gavareje ajivĕ'e ijo baje 50,000 ĕhi vĕniro ravĕ'e jiamu. 20 Ĕhu'ĕro jiĕ'ĕro ae aho'obĕhe Badare jöho hebe mae uehorovobe va'areje.

Ephesus amo rajehu muorovo'irögoro vörö'iraeruomade jöhoje.

21 Ĕhi'amu Paul-ro uehorovoromomo uvadeje: Macedonia sa'are Greece sa'are juvo va'onugoromomo evare ajiomoromomo Jerusalem amore höröromomo ĕ hi'ĕjĕjo. Hiromomo hujeji evare na Rome amoho va'o ga'ĕjĕjo. 22 Ĕhi uvonugoromomo hu ajamijarue aho niö'i Timothy'o Erastus'o rĕmö'öjĕvamu Macedonia sa'are va'areje. Va'irögorovo huro Ephesus amore Asia sa'are ĕhi hijadeje.

23 Hijamu evare aĕro Badare öroho bijönimoromomo iro muorovo'ohomo Ephesus amore vaejareje. 24 Ĕhesi bĕhoho ae gemu Demetrius-ro Ephesus hijadeje. Hu silver-ehu inömo avoho'amaje ae jiadeje. Silver-ehu inömo avoho'amaje aĕro jiĕ'ĕro Artemis rajahijarue javu börömo hesi nu aņo'o va'ĕne inömo ininoho silver-ĕro avohoromomo imo'amonövadeje. Ĕhesi bĕhoho ĕ amo raje ae aho'obĕhe sarerivoromomo uvonövareje: Artemis aru'aho magonahe höröromomo rajahi'irögoro huni

javu böröme vaejahareje. Vaejël'ëro ë javu hesi nu ano'o va'ënoho javu inino avohoromo imo'amarue muoho Demetrius-ro muebenövadeje. Muebe'ego hesi mu ajamarue aribövioho ijo bajo böröme baenövareje.

²⁵ Èhu'ëro jiël'ëro Demetrius-ro hu ajamijarue ariböviohu'o ëhi jiël'e mu vaejarue aribövi ioro'iorohu'o ëho jabuni jöe nugö'öromo uëvadeje: Gagovorovego no jöe ato'irarëjo. Èhi uëvamu gemuoro gagovareje. Gagovamu uëvadeje: Ae aho'obëhe nasi jöho hehëjo. Jemë'o uehorovarujëjo. Noehu Artemis-are javu va'ëne inino avohoromo imo'amaruohuro ëhuro no ijo bajo bövie baejarue höjo. ²⁶ Ijo bajo bövie baejarue höjo röhu ë a sisë Paul-hu diehi jiël'e mu vaejajoho jemëro jemesi nunëro garomo jemesi hia'ëro hejaruje höjo. Huro uövuaje höjo: Aehu övehu avoho'amaje vörö'e inömohe ëho vörö rumo'e jio'amajëjo. Èhi uöromo Ephesus amo rajohu'o Asia sa'a rajo ioro'iorohu'o jabesi simanoho huotovëhamu ae ma-vemino'e bogo e'li a'li ae aho'obëhe ëma sarerivoromo uvoruomë'e höjo: Paul jö mae jövajëjo. ²⁷ Èhi uehorovoromo nani jaburo uvoruomo'ajëjo: Noehu Artemis-are javu inino avohoromo imo'amaruoho mu sisë vaejarue höjo. Röhu gö'o ae aho'o jaburo nani uvoruomo'ajëjo: Artemis nosi aru'aho magonaho börömo hu rajahijarue javu börömohe iho rumo'e höjo. Èaru'aho magonahoho ae aho'obëhe Asia sa'are sa'ae dinö'e dinö'e raromarue ariböviohuro hu gemu börömo bëhe rajahijarue höjo. Röhu jabumë Paul-are jö ejahë'ohuro ëhuro ijönöho ë magonahoho bogo börömohe uehorovo'iramu hesi ihoho bogojio'ajëjo.

²⁸ Demetrius-ro ëhi uëvamu hegorovo ae aho'obëhe dë vörö'iraeromo ma-darugo'o uvo'li arijareje: Ephesus nosi aru'aho magonahoho Artemis hu böröme höjo. ²⁹ Èhi uvo'li arijamu hegorovo ë amoho muorovo'li vörö'iraebe va'oruomadeje. Vörö'iraebe va'oromo ae aho'obëhe jaburo Macedonia raje ae niö'li Paul'o gemu mae jireharuoho jabesi ihoho Gaius'o Aristarchus'o ë ae niö'ioho gudu-amëvoromo hu'iraëjëvoromo tutubijiohoromo jabuhu gagovarue öri ari'ere va'oromo gemuoro gagovorovareje. ³⁰ Gagovorovamu Paul-ro ë öri ari'ere va'oromo ae aho'obëhe jabesi nunire namiromo jöe jövo'li nimamu gagorovo Keriso-are ariböviohuro ahoromo uavareje: Vuonugëjo. ³¹ Vuonugëjamu Asia sa'are a masijo ioro'iorohuro Paul mae uehorovë'ëro jöe nugö'öromo uavareje: Nadí ë öri ari'erohe va'ego ae aho'obëhe ja ga'irarëjo. ³² Èhi'amu jö ataroho sisërëjamu gagovare hesi bëhoho ae ma-gemu gemu ga'li ae aho'o bogo gagoro ae göëro göëro jöe gö gö ëma ma-darugo'o uvoruomadeje. ³³ Uvoruomoromo a ioro'iorohuro gavare Jew rajëro Alexander nuninö nugoruomamu gagorovo uvareje: Nani Alexander-are jöëni gagovare höjo. Gagovare höjamu Alexander-ro övëro tugohëvoromo hesi jöho hesi arijo'arije ajamirovoromo majëhi'li ë'o gavadeje. ³⁴ Majëhi'li ë'o gavamu rue ariböviohuro ae aho'obëhe gavare Alexander Artemis bogo ma uehorovaje aehu jio'li Jew raje jiamu gagorovo gemu mae uvemu uvareje: Ephesus nosi aru'aho magonahoho Artemis hu böröme höjo. Èhi gemu uvo'li arijuvo 2 hours barëjadeje. ³⁵ 2 hours barëjamu amo rajo a böröme gemuëro ahëvo gabe va'oromo gavade jörumorae barëjamu gagorovo uëvadeje: Ephesus rajomë jemëro nasi jöho hehëjo. Ae aho'obëhe iae gavaruë höjo Ephesus rajoho no aru'aho magonaho böröme Artemis-

are osa muebejarue aribövie javuego. O hesi vörö'e munë ö'idöre jioromo beruvebijadoho muebejarue aribövie javuego. ³⁶ Aho ë jöho bogo aho'a'aruëjo. Ëhi jië'e jiaje nadi uehoro rumo'e muoho vae'i ma-sanuovorëjo. ³⁷ Ave ae niö'i ma-baejëvo rovarijoho jabumë bogo nosi aru'aho jabesi javu masijoroho va'oromo vajiohoho ujuohare höjo. Nosi aru'aho magonaho hesi jöho bogo sisë'ioho atare höjo. ³⁸ Èhu'ëro jië'ëro Demetrius-hu o hesi mu ajamijarue ariböviehu ae gö jabesi jö sisë huruoho majëhi'i nimë'oho court vaejarue majae iae jiajëjo. Court vaejarue aribövie iae jioruomajëjo. Èhuni ë va'oruomoromo jö sisëho majahirovo'aruëjo. ³⁹ Röhu jemë jöe gö jëvë'oho amo rajo a masijehu gemuore gagovoromo atarue majaho rovego evaro jemesi jöho bu'öjego jaburo heromo avoho mevëho'irarëjo. ⁴⁰ Naehu ëhi uëvaje hesi bëhoho noehu jaruvo vaejarue mu hesi jö hejë'oho nani ave sa'are a masijohuro no uö'a'aruëjo: Jemëro rabëni muorovo sisëho barovarije höjo. Ëhi uövuë'oho no rabu jöe mana majëhijöëni ma-hia'ëremu he'ëjarëjo. ⁴¹ Èhi uëngoromo uëvadeje: Iae barëjajëjo. Va'ohëjo.

20

Paul-hu Macedonia sa'are va'oromo jö majëhibe juvoromo Greece sa'are va'ade jöhoje.

¹ Iro muorovo'oho barëjamu gagorovo Paul-ro jöe nugö'öjadeje Keriso-are ariböviohuro gagovorovoröhego. Gagovorovamu ajëmiromo jögoroho bojëmiromo jejëmiromo Macedonia sa'are va'adeje. ² Macedonia va'oromo Christian aribövioho ajëmiromo jögore aho'o bojëmibe va'adeje. Va'onugoromo Greece sa'are rovadeje. ³ Greece sa'are ro hijadoho manaere 3 barëjadeje. Manaere 3 barëjamu gagorovo Syria sa'are jovo döro va'ië'i'iro evare hejade uvavamu: Jew rajo ariböviohuro ja anago'i saginiëri jöe ataruë uvamu hegorovo uvadeje: Èhi jië'oho na bogo jovo döroho va'i vuonorö'öromomo Macedonia örëro va'ejöjo. ⁴ Èhi uvamu Pyrrhus-are harihe Berea amo raje Sopater-ro Paul'o ë va'adeje. Röhu Thessalonica amo raje ae niö'i Aristarchus'o Secundus'o Derbe amo raje ae Gaius-ro Timothy-ro Asia sa'a raje ae niö'i Tychicus'o Trophimus'o ë aribövioho jaburo Paul'o gemu mae va'areje. ⁵ Va'aroho jabumëro urimo Troas amore va'oromo raromoromo muebejavuareje no ijore va'oröhego. ⁶ Muebejavuamu noro Philippi amore ariromo Jew rajehu I Dë Huaje Oso Rumo'e I ijarue majaho barëjamu evare boat-ëro baejavuoromo va'adoho majae övo gö mine barëjamu Troas amore ravo'amoromo no muebejavuarue aribövioho birohëvareje. Birohëvoromo ë raromaroho hurae gemu barëjadeje.

Paul-hu Troas amore hiromo ë'ade jöhoje.

⁷ Hurae gemu barëjamu hura bise'ore vahiromamu gagorovo no gagovorovareje ie gemuoro ue'aho'irovo. Gagovorovamu gagorovo Paul-ro ë amo rajo aribövioho jöe majëhibe va'adoho vahi riri'e jiadeje sisonuvego va'oröhëro. ⁸ Röhu ë javu döre osare noehu gagovarire ire aho'obëhe bue'amë'e jiadeje. ⁹ Bue'amë'e jiamu iae a i'e gemu hesi ihe Eutychus-ro döre ahë'e ojo arëtoere hijadeje. Hijamu Paul-ro jöho ma-jövemu jövobe va'amu gavë'i Eutychus nunëhimobe va'ojuvo

nunëhimamu niavamu döre jioromo amonö beva'adeje. Osa uhure ririre döre ëhi jiobe ajiomë'e döre javu hesi osare jioromo amonö beva'adeje. Beva'amu ruhe döre ariböviohuro abueromo banigo-jiomoromo gavareje mami'e guomë'e jiamu. ¹⁰ Guomë'e jiamugo Paul-ro abueromo Eutychus bu'ö taemoromo huohudëromono no uövuadeje: Nadi huë vavaenoho baehëjo. Hu bogo guomë'e iae hijajëjo. ¹¹ Ëhi uönugoromo ajiomoromo ie ato'atovoromo iromono ë aribövioho jöe majëhibe va'ojuvo va'o sisonuvadeje. Sisonuvamu gagorovo va'adeje. ¹² Röhu a i'oho bogo guomë'e hijamu gagorovo Keriso-are ariböviohuro hu bava'oromo huë mabëhe baejareje.

Paul-hu Troas jioromo Miletus amore va'ade jöhoje.

¹³ Ëhi'amu iae Paul-ro uövuadeje: Jemëro urimo boat baeromo Assos amoro va'ego na ijore sa'aëro ö'iröjo jemë'o na'o ë jioromo boat-re gemu mae va'oröhe. Ëhi uövuamugo boat-re va'areje. ¹⁴ Va'oromo Assos rueromo Paul hu'irae baeromo jovo doremu va'onövojuvo va'o Mitylene amore rovereje. ¹⁵ Mitylene rovë'ëro nërö jovo doremu va'ojuvo Chios sa'a bëhire rovë'ëro nërö va'aroho Samos sa'are rovë'ëro nërö va'aroho Ephesus amoho iosirami va'oromo hujëji Miletus amore ë ro suorovareje. ¹⁶ Ephesus amo iosiramijare hesi bëhoho Paul-ro ëhi iosirami'i nimadeje ëhuro bogo Asia sa'aroho ëgoho hi'i maburëro evare Jerusalem va'oromo eni jië'oho Pentecost majaho rovego Jerusalem höröröhëni.

Paul-hu Ephesus ekaresia muebejëvarue a duvaho jabesi örيره jögoru majëhijade jöhoje.

¹⁷ Miletus amore suorovoromo ë ravo'amoromo Paul-ro Ephesus amore jöe nugö'öjadeje ekaresia a duvahohuro ruvebiruomoröhego. ¹⁸ Ruvebiruomamu uëvadeje: Naehu urimo Asia sa'are rovodevare evare naehu diehi diehi mu vaebe rovodoho jemë iae uehorovarujëjo. ¹⁹ Jew rajëro ijumevo'i ato'i ari'ego na huë vavaene baeromo nivëli bogo döroho bamorovo'i ma-taemo hiromono Badare muohuremu vaejahonövode höjo. ²⁰ Jemë ajëmi'irode jöho na bogo subivëho'i ekaresiae ae aho'obëhe jemesi nunire ekaresiae ae gemu gemu jemesi osare osare jöho majëhi barëromono öroho röjëhi barënovode höjo. ²¹ Jew rajohu'o sa'a ioro'ioro rajohu'o jemesi örire darugo'o majëhiromono uënövode höjo: Jemëhu öri sisëre jijiharujoho vuonugo'i God-are öroro jijihoromo nosi Bada Iesu mae uehorovorëjo.

²² Röhu avehu'o hehëjo. Avevejö'oho God-are Aru'ahohuro ue'ego na Jerusalem va'ajëjo. Va'o höröjëgo diehi'evoruomoröhoho na bogo gavajëjo. ²³ Na aviëhi jië'e muohuremu gavajëjo. Ame göre göre hibe rue'ego God-are Aru'ahohuro uebe ruehijajo: Ja Jerusalem hörö'iramu savoji gagore ba'amavo'iramu huë vavaene gö gö bae'a'anuëjo. ²⁴ Ëhi uevade höjo röhu na nasi sinohunioho bogo uehorovaje höjo ëhuro Bada Iesuhu bojemade muoho aho'o vae barë'irodëni. Ëmu hesi bëhoho God-hu no huë baejavuoromo ajamuijaje jöho a majëhibe juvo'irodoho höjo.

²⁵ God-hu böröme namiromono muebejavuajë jöho ae aho'o jemesirire jövole juvë'e jevajëjo. Röhu iae na gavajëjo. Ijonöho ae gemu vadu'oho na bogo ge'a'arujëjo. ²⁶ Ëhuni avevejö'oho naro darugo'o majëhiromono uëvajëjo: Jemë ae gö gö sisëre va'ë'oho ëho bogo nasi

sisëhu hōjo. ²⁷ Ēhesi bēhoho rabēni God-hu uvaje jōho na bogo subivēho'i na majēhi barējē'e jevajējo. ²⁸ Jemesi dē vōvōbajo'oho mueberovorējo. O God-are Aru'ahēhu jemē bojēmijade aribōvioho aho'o muebejēvorējo. Ēaribōvioho God-are sheep-nō'e jio'amajējo. Hu hesi Harihu mae nugō'ōjamu guomadohuro ēhuro jabumē hesi baejēvade hōjo. Ēhuni hesi ekaresiaho sheep-nō'e mio'amoromo muebejēvorējo. ²⁹ Ēhesi bēhoho na gavajoho na va'iramu vōrō'e miehu rueromo sheep ijumo'amaruēhi a sisē göero göero jemesirire rueromo sareri sareri'e jōho majēhiromo ekaresia jemesi uehoroho ijumēho'aruējo. ³⁰ Rōhu gö'o jemesi a ioro'iorohuro ri'ōromo sareri sareri'e jōho ato'a'aruējo Keriso-are aribōvioho jemēro jabesinō va'irarijego. ³¹ Ēhuni gavē'i raromorējo. Uvorējo: Nōrōro muoho bogo vuonugo'i majae jene vahie vō'ōe sisone huē vavaene baeromo nivē'i no ae gemu gemu rōjahuibe ruejuvo vadune aho'obēhe 3 barējade hōjo.

³² Rōhu jaruvoho na negajējo God-ro jemē muebejēvego huhu no huē baejavuoromo ajamuaje jōho jemēro uehorovego ma-mae jēvorōhego. Jemēhu hesi jō uehorovē'oho ēhuro jemēro biririvobe va'oromo God mae uehorovo'iramu God-hu hesi aribōvie aho'o mae avohavujēhi jemē'o ēhi avohēvo'ajējo. ³³ Rōhu jemesi ijo bajēnioho niōgēnioho na bogo ganiganiegade hōjo. ³⁴ A'i jemē'o iae gavaruējo na'o nasi aribōviohu'o no huē vavaene javuadoho ave nasi övohuro muoho vaeromo hesi manaho baeromo ēhuro bōvioho bise'oho ujuohonōvode hōjo. ³⁵ Muoho ēhi vaeromo ēhuro naro jemē rōjēhijode hōjo jemēro garomo uvo'irarijego: Mu rabe rabe rovē'oho Paul-hu ē'adēhi no'o ēhi biririvoromo muoho vaeromo ēhuro darugo u'uhē'e aribōvioho ajēmīnōvo'ejarējo. Uehorovoromo uvorējo: Bada Iesuro huro hesi uōvuade hōjo: Suvuoro ma-baejē'oho ja ma-bisemu vuēvavo'ajējo. A'i suvuorēmijē'ohuro ēhuro vuēvavo avoho'ajējo.

³⁶ Paul-ro ēhi uēnugoromo a duvahoho aho'o jabu'o gemu mae ague aho hiromo God-are ōrīre jōe jōvadeje. ³⁷ Jōe jōvamu jabumē aho'obēhe nierusuburu'e bamē'i Paul guduamoromo dudōhoromo jejamareje. ³⁸ Uvareje: Huē vavaeni jō gō hejaroho ma-jianovo'i a'i noehu ijonō hu bogo ga'irōhe jōho ēho bōrōmoho hōromo sisē maro vavaenimareje. Ēhi'oromo Paul boat-re hu'irae bava'areje.

21

Paul-hu Jerusalem va'ade jōhoje.

¹ Hu'irae bava'amu Paul'o no'o boat-re iojioromomo Ephesus aribōvioho ē rēmo'i va'areje. Jovo dōremu va'onōvojuvo ahorirēro va'aroho va'o Cos sa'are rovareje. Rovē'ero nērō va'aroho Rhodes sa'are rova'aroho va'o Patara amore ē suorovareje. ² Patara amore suorovonugoromo gavare boat göho Phoenicia sa'are va'i ē namijamu gagorovo noehu rovare boat-oho vuonugo'i ē boat gagore iojioromomo va'areje. ³ Va'aroho gavare Cyprus sa'aho arue nosi övo adonō jiamu iosiramiro mo viēhi rova'aroho Syria sa'are rueromo Tyre amore ravo'amareje jabumēro inōmo inōme suovo bahi'iro. ⁴ Ravo'amoromo noro Keriso-are aribōvioho nahēvojuvo birohēvoromo jabu'o raromamu hurae gemu barējadeje. Jabu'o raromamu God-are Aru'ahohuro ē Keriso-are a jabesī ōrīre uehore bojēmi'ego Paul uanōvareje: Jerusalem

bogave va'iranëjo. ⁵ Ëhi uavamu noro jabu'o raromoromo nosi majaho barëjãmu ri'öromomo va'areje. Va'ia'amugo rue Keriso-are aribövioho ae aho'obëhe jabesi vaborohu'o aboji harihu'ohu'o no sô ujuohavuoromo amore jioromo va'areje. Va'oromo sô jovo riröre jabu'o no'o ague aho raromoromo God-are örire jöe atareje. ⁶ Atonugoromo göero göho jejamirovonugoromo noro boat gagore iojiomo'i jaburo vuonorö'ö amëro va'areje.

⁷ Va'iro noro Tyre amoho vuonugo'li boat-re va'aroho va'o Ptolemais amore ro ravo'amareje. Ravo'amoromo Christian aganoho jejëmiromo jabu'o majae gemu raromareje. ⁸ Majae gemu raromë'ëro nërö noro ri'öromomo va'aroho va'o Caesarea amore suorovareje. Suorovonugoromo Iesuare jö ma majëhijaje ae Philip-are osare va'oromo ë raromareje. Ëaho Philip urimë'i Jerusalem ekaresiahuro hu'o a ioro'iorohu'o ⁶ ëhi baejëvareje ijo bajo a suvorëmi'iröhe muoho muebenövo'iröhego. ⁹ Röhu Philip-are abojoho aho'o ⁴ jaburo bogo masuvé'ëro jöho God-aro baeromo ae huruoho majëhinövareje.

¹⁰ No majae gemu niö'li Philip'o gemu mae raromamu ae gemuëro Judea sa'are jioromo ruvebijadeje. Hesi ihoho Agabus jiadeje. Hu jö God-aro baeromo ae huruoho majëhijaje aëro jië'ëro ¹¹ ri'öromomo Paul-are götaho jijövahonugoromo baeromo hesi övo hörü'oho tövorovo'amadeje. Tövorovoromo Paul uavadeje: God-are Aru'ahohuro uvavohijajo: Æ göta arijo'ohuro Jerusalem ajiomo'iramu gagorovo Jew rajohuro ë aho ëhi tövonugoromo sa'a ioro'ioro rajo jabesi övore bojëmi'aruëjo.

¹² Agabus-ro jöho ëhi majahijamu hegorovo ë amore Christian ariböviohu'o no'o Paul dinamiro mo ua'i arijareje: Ëhi jië'oho bogave Jerusalem ajiomo'iranëjo. ¹³ Bogave ajiomo'iranëjãmu Paul-ro uövuadeje: Jemë rabëni nierusuburu'e bamoromo nasi uehoroho aheho'ego na huë vavaenoho baejajëjo. Ëhi jië'oho vuonugohëjo. Naehu Jerusalem ajiomo'iramu Bada Iesuare jöhuni tövavo'aruë uevarujoho iae eni jiajëjo. O anegamu guomevë'oho ëhu'o iae eni jiajëjo. ¹⁴ Ëhi uövuamu noro gavare bogo ejahuamu gagorovo dinamijaroho vuonugo'li uavareje: Ëhi jië'oho no naguajëjo Badahu nimaje muoho jioröhego.

¹⁵ Ëhi'amu gagorovo inömo inömoho avohoromo Jerusalem amore iojiomo'iro ë'areje. ¹⁶ Iojiomo'irögoro Caesarea amo rajo Keriso-are a ioro'iorohuro söjavuo va'oromo a ihe Mnason-are osare rovareje noro hu'o raromo'iröhego. Röhu Mnason hu Cyprus sa'a raje jiadeje. Hu mami gö'e aevoromo Keriso mae uehorovadeje.

Paul-hu Jerusalem ajiomoromo ekaresia muebejëvaje ae James ga'li va'ade jöhoje.

¹⁷ Iojiomoromo Jerusalem suorovamu nosi Christian ö mueno'ohuro jabesi dë vövöbajo'e aho'o jejamuijareje. ¹⁸ Jejamuijël'ëro nërö Paul-ro no'o gemu mae James ga'li va'adeje. Va'oromo gavadeje ekaresia a duvahoho aho'obëhe jaburo James'o gemuore raromoruomamu. ¹⁹ Raromamu gögorovo Paul-ro jejëmijadeje. Jejëmiromo uëvadeje: Naehu Keriso-are jö majëhibe juvodohuro ëhuro God-ro sa'a ioro'ioro rajoho ëhi ëhi ajëmijade höjo. Ëhi jië'e jöho Paul-ro majëhi barëjjadeje.

20 Majëhijamu hegorovo rueho jaburo God rajahijareje. Rajahiromo Paul uavareje: Öho röhu Jerusalem amoroho diehi jiego ja gavanue höjo. Èhesi bëhoho Jew raje ae aho'obëhe Iesu mae uehorovarue höjo. Mae uehorovoromo röhu jabumë ae aho'o Moses-are jögoroho nimo avoharue höjo. 21 Moses-are jögoru nimaruohe hejare höjo sareri'e jöho uvavamu: Paul jero sa'a göre göre va'oromo Jew rajoho aho'obëhe jöe bojëmibe juvoromo uëvanue höjo: Moses-are jögoroho vuonugohëjo. Moses-are jöho vuonugoromo jemesi harihu jabesi sino tarivëharujoho vuonugoromo Jew rajo nosi mu ioro'iorohu'o vuonugohëjo. 22 Jaehu ëhi majëhijane sareri jö ave raromarue aribövioho hejaroho he'a'aruëjo uvavo'iramu: Jero Jerusalem rovane höjo. Èhuni ja diehi'oromo Jew rajoho röjëhi'iramu garomo uvoruomajëjo: No sareri jöe hejare höjo. Moses-are jögoroho ja bogo vuonugë'e javajëjo. 23 Jaehu diehi ë'irane jöho no ua'ië'aruëjo. Ae aho'o 4 jabu no'o raromaruëjo. Iae urimo ë ariböviohuro Jew rajo nosi muoho aevoromo vaeromo God uavare höjo: God jasi nunëro jero gö'ego no muoho ëhi ëhi vae'ëjarëjo. 24 Jabumë ëhi jië'e Jew rajo muoho vaejë'e jioruomaje ëhuni jero jabumë söjëvo va'oromo ajëmiromo jabu'o gemu mae bimuvoromo sisë barëjëho'iröhe muoho vaeromo eni jiego ë ae 4 jabesi jöëni monie bojëmego mie imoromo God-ni suvuore bahijahego ëhuro jabesi simano uoho tari-ojëho'irarëjo. Jaehu ëhi Jew rajo mu ajëmiromo vaejë'o ho ëhuro Jew raje Christian ae aho'obëhe ja garomo uehorovoromo uvoruomajëjo: Paul jaehu Moses-are jögoru vuonugane jö hejaroho ëho ma-sareri'e jöe höjo. A'i Moses-hu uövuade jöho iae ja ejahë'e hijanue höjo. Jabumëro ëhi uvoruomajëjo. 25 Iae Jew raje noro Moses-are jöho ëhi ma'eno'ëjarëjo. Röhu sa'a ioro'ioro raje Iesu mae uehorovarue ariböviohuni urimë'i noro jöe gö uehorovoromo jajivoromo nugö'öromo uëvare höjo: Aehu sareri'e god göëni göëni bahijë'e mioho nadi ue'ahorëjo. Mi hesi köho nadi ue'ahorëjo. Huë ahahë'e mioho kö'e jiaje nadi ue'ahorëjo. Nadi önö'oho jijjhorëjo.

26 Èhi uavamu hegorovo Paul-ro ejëhë'ëro nërö ë Jew raje ae 4-ho söjëvo va'oromo ajëmiromo jabu'o gemu mae Jew rajo muoho vaejadeje jabesi sisëho barë'iröhego. Èhi'onugoromo Paul-ro God-are osa börömore va'oromo priest aribövioho uëvadeje: Majae ëmino'e barë'iramu evare ë ae 4 jabesi o nasi sisëho barë'ajëjo. Barë'iramu evare ae gemu gemu nosi jöhuni God-ni mi suvuore bahi'ëjarëjo.

Paul-hu God-are osa börömore hijamu Jew rajehu guduamo bava'oruomade jöhoje.

27 Paul-ro ëhi majëhijamu va'o huhu uëvade majae 7 barë'ië'adeje. Barë'ia'amu evare Asia sa'are jioromo rovare Jew rajo a ioro'iorohuro gavareje Paul God-are osa börömore jiamu. Paul osa börömore jiamu gagorovo ri'öromo iro muorovo'e vae'iro jöe darugo'o atamu ae aho'obëhe heromo uehoro sisë baeruomadeje. Uehoro sisë baeruomamu Asia jioromo rovare ariböviohuro Paul guduamareje. 28 Guduamoromo ma-darugo'o uvareje: Israel rajoho jemëro ro ajamuihëjo. A sisëho aviae höjo. Huro Jew rajo nosi ihoho Moses-are jögoroho ave God-are amo börömore ë hesi jöho ijumo'amoromo ae aho'o jabesi örire sisë'i röjëhibe sa'ae dinö'e dinö'e juvaje höjo. Jaruvoho huro sa'a gö rajo aho söromo ave God-are osare rovamu ëhuro

osa maho ijumë'e höjo. Ëmu sisëhu'o ë'ë'e höjo. ²⁹ Ëhi uvare hesi bëhoho urimo jaburo gavare Ephesus amo rajo ae Trophimus Paul'o gemu mae Jerusalem jiamu gavë'ëro uvareje: Nani Paul-ro God-are osare hu barovë'e höromo ëhuni darugo'o uvareje: Paul-ro sa'a gö rajo ae aviae barovë'e höjo.

³⁰ Ëhi uvamu hegoroovo Jerusalem amo raje ae aho'obëhe ri'öromo vörö'iraeromo tutubijiohoromo gemuoro gagovoromo Paul God-are osare jiamu guduamo bava'areje. Bava'amu gavë'i God-are javuoho ojoho tugoho'amareje. ³¹ Tugoho'amamu ae aho'obëhe jaburo Paul guomojoro ano'ia'amu gavë'i aëro jöe bava'oromo Rome muorovo a börömoho uavareje: Jerusalem muorovo'irögoro ë'oruomajëjo. ³² Muorovo'irögoro ë'aruëjamu hejë'i rue muorovo a börömohuro hesi bëhire muorovo simano vaejarue ariböviohu'o muorovo a ioro'iorohu'o sÿjëvoromo ma-burëro tutuvo ruvebijadeje muorovo'i ë'aruoho ahëvo'i. Ruvebijamu ae aho'obëhe gavare muorovo a börömohu'o muorovo a ioro'iorohu'o rovamu gëgoro Paul anaroho vuonugareje. ³³ Vuonugamu muorovo a börömohuro rueromo Paul guduamoromo ae uvëvadeje: Ö'e niö'i barueromo tövohë uëvamu tövareje. Tövamu gagorovo muorovo a börömohuro uëvadeje: Ave aho rahuo höjo. Rabe ë'ego ëhuni anarujëjo. ³⁴ Anarujëjamu ae aho'obëhe ri'öromo jöe gö gö mana ma-darugo'o uvoruomadeje. Amo ëhu'ëro jöjöje böröme jiamu a börömoho Paul-are jöho bogo avoho hejadeje. Bogo avoho hejë'ëro hesi aribövioho uëvadeje: Ave aho hu'iraeromo aruhe muorovo a nosi osaro iojiohmöhëjo. ³⁵⁻³⁶ Iojiohmöhëjamu hu'irae bava'oromo vuahure iojiohmöhëjo gavare ae aho'obëhe vörö'iraeromo gemuoro tatijiomobe Paul anojöro uvobe ijore jijihoruumamu gëgorovo Paul döro nigemo baeromo iojiohmöhëje.

Paul-hu ae aho'obëhe jabesi nunire namiromo hesi arijo'arije ajamirovoromo jö majëhijade jöhoje.

³⁷ Iojiohmöhëjamu muorovo osare bava'ia'amu gagorovo Paul-ro a börömoho uavadeje: Naehu jasi örire jö majahijë'oho na mae höjo. Na mae höjamu rue a börömohuro uavadeje: O-ajo. Ja Greece a jabesi jöëro jövanuëjo. ³⁸ Naro uvode höjo: Ja Egypt sa'a rajo ae javajëjo. Na uehorovoromo uvode höjo: Jero urimë'i muorovo jöho barueromo vörö'e aribövioho 4,000 gagovoromo a rumo'e sa'are sÿ va'ane höjo Rome a masijohu'o muorovo'iro. Ja ë aho javajë uvode höjo röhu nani ja ae gö javajëjo. ³⁹ Javajëjamu Paul-ro uavadeje: Io'ajo. Na Jew raje jevajëjo. Cilicia sa'are Tarsus amore rahevade höjo. Nasi amo hesi ihoho böröme höjo. Röhu na negajëjo jero uevego na ae aho'obëhe jabesi örire jö harihe majëhi'iro. ⁴⁰ Ëhi uvamu rue a börömohuro Paul uavadeje: Iae mae höjo. Jöho jövëjo. Jövëjamu hegoroovo Paul-ro vuahure namiromo ae aho'obëhe övëro tugohëvadeje. Tugohëvoromo jörumoraejamu jabesi Hebrew jöëro majëhijadeje.

22

¹ Majëhiromo uëvadeje: Nasi a duvahohu'o ö mueno'o ioro'iorohu'o nasi jö harihu majëhi'ie'ajoho hehëjo. Na mu sisë rabe rabe bogo ömë'ëro i'uoho bogo bae'irodëro ë hesi jöho majëhi'ie'ajëjo.

2 Majëhi'ie'ajëjumu ae aho'obëhe urimo jö vuonugaroho hejare Paul-ro jabesi Hebrew jöëro majëhijavamu hegoroovo jöromorae barëjareje. Jöromorae barëjumu Paul-ro uëvadeje: 3 Na Jew rajo ae jevajëjo. Cilicia sa'are Tarsus amore rahevë'ëro Jerusalem rovode höjo. Rovamu Gamaliel-ro röjehijumu Jew rajo muoho hebe rovode höjo. Nosi hijo miono'ehu röjahuibe rovare jögorohuremu he avohoromo jemëhu God-are muemu uehorovarujëhi na'ö ehi gemuoho uehorovonövode höjo. 4 Ehi gemuoho uehorovoromo ganövode aëro Iesuare örire jijihö'ego gëgorovo huë sisë bojëminövode höjo. O aëro jabu muo'amego vuovëvojöro uënövode höjo. Aho magonahoho guduamo'amoromo savoji gagore io'amonövode höjo. 5 Priest bërömo'u'o Jew rajo a masijo ioro'ioroho aho'ö nasi muoho gavë'ëro jemë uë'a'aruëjo: Nöröro mae uëvajëjo. Ehesi bëhoho urimë'i ë a masijoho jaburo Christian a guduamo'amo'irode jö'e suri surioho i'imemijare höjo naro Damascus amore ujuoho va'oromo Jew rajo nosi ö ömo'ömo'ho i'imëmi'irodego. I'imemamu naro ujuohoromo ë va'ode höjo Christian aribövioho gud-uamoromo tövo ujuohoromo Jerusalem vuonorö'ö rovego i'ue baeruo-moröhego.

Paul-hu aevoromo Keriso mae uehorovade jö majëhijade jöhoje.

6 Örire va'ojuvo maja ririre jiamu Damascus amore hörö'i gavodeje aji bërömo'ho ma-majioho ö'idöre jioromo ruvebiromo ajivevamu. 7 Ajivevamu gavë'i sa'are behumorovoromo hejodeje uevavamu: Asë'e Saul ja rabëni na sisë vaejevanue höjo. 8 Sisë vaejevanue höjumu uavode höjo: Bada ja rahuo javajëjo. Rahuo javajëjumu uevade höjo: Na Nazareth rajoho Iesu jaehu sisë vaejevanue aho jevajëjo. 9 Ehi uevamu na'ö jijihare ariböviohuro ajohemu ga'i huëho bogo hejare höjo. A'i naremuëremu huëho hejode höjo. 10 Heromo uavode höjo: Bada na diehi ë'ejöjo. Diehi ë'ejöjumu uevade höjo: Ri'öromo va'oromo rue Damascus amoro hinëjo. Hiromo jaehu vae'irane mu God-hu uvadoho aho'ö he'a'anuëjo. 11 Ehi uevamu aji bërömo'ho gavë'ëro nasi nunoho sue'iraejehade höjo. Nunoho sue'iraejehamu nasi ariböviohuro övore ma'eno baejevo va'oromo Damascus amore suorovare höjo. 12 Röhu ë amore ae gemu hesi ihe Ananias hijë'e jiade höjo. Hu Jew rajo nosi jögoroho avoho eromo God rajahijaje aëro jië'ëro Jew raje Damascus raromarue aho aho'obëhe jaburo hesi jöho mae uehorovare höjo. 13 Eäho Ananias-ro rueromo bëhire namiromo uevade höjo: Öho Saul nunoho dadovahego röhu maho avoho uherihëjo. Uherihëjumu gavë'i nunoho ma-burëro dadovehamu hu gavode höjo. 14 Gavamu uevade höjo: God nosi hijo miono'e muebejëvobe rovade ahuro ja baejavade höjo jero huhu nimaje muoho baeromo hesi A Maho nunëro garomo A Ma hesi huëho he'iranego. 15 Ehesi bëhoho hesi jö majëhijanue ae javo'ajëjo jaehu garomo hejane jöho ma-maemu majëhijego ae aho'obëhe heruomo'iröhego. 16 Röhu rabëni gö'oho muebenëjo. Ri'öromo bapataeto vaeromo Badare ihoho uvego jasi sisëho u'ovaho'irajo.

God-hu Paul uavamu Jew rajo jabesi sa'are bogo a'i sa'a ioro'ioro rajo jabesi sa'are va'oromo ajëmade jö Paul-hu majëhijadohoje.

17 Ĕhi'amu naro vuonorö'öromo Jerusalem rovode höjo. Rueromo God-are osa börömore va'oromo hesi örire jöe jövoromo nia'ovonö'e gavode höjo 18 Bada Iesuro ro uevamu: Ma-burëro Jerusalem amoho vuonugo'i va'ëjo. Ĕhesi bëhoho jaehu nasi jö majëhijë'oho ave amo rajoho bijönëgo'ajëjo. 19 Bijönëgo'ajëjamu uavode höjo: Iae mae höjo röhu naehu diehi jië'e mu vaenövodoho ave ariböviohuro iae mae gavarue höjo. Naro Jew rajehu God rajahjarue osare osare va'oromo ja mae uehorovavarue aribövioho guduamo ujuoho va'oromo savoji gagore io'amonövo hisuebijëvonövode höjo. 20 O aëro jasi jö majëhijaje ae Stephen anamu gagorovo na ë jevë'ëro uvode höjo: Jabuhu Stephen anaruoho iae mae ë'aruëromo jabesi niögu jövo bahijaroho muebejëhode höjo. Ĕjöhö ave ariböviohuro iae mae gavarue höjo. 21 Mae gavarue höjamu Badaro uevade höjo: O va'ëjo. Naro öre ëgoböviro ramö'ö'ejöjo jero sa'a ioro'ioro rajoho nasi jöhö majëhi'iranego. 22 Paul-ro ëhi majëhijamu ae aho'obëhe hebe rueruomë'ëro hejare uëvavamu: Sa'a ioro'ioro rajoho majëhi'iranego ramö'ö'ejö uëvamu hegorovo hejaroho vuonugo'i vörö'iraeromo madarugo'o uvo'i arijareje: Ĕaho anohëjo. Huhu ave sa'are hijajoho sisë höjo. 23 Ĕhi ma-darugo'o uvoruomë'i niögöho jövoromo hijiohijiovë'i tohotohoho döro ruruhö'ö'i arijareje. 24 Ruruhö'ö'i arijamu gagorovo rue muorovo a börömhuro hesi aribövioho uëvadeje: Jemëro ave iahto nosi osahuro hu'irae bava'oromo hesi dëho bijioho ga'i hisuebiromo uarëjo: Rabëni anagöjoro uvaruëjo. 25 Uvaruëjamu Paul osare bava'oromo hisuebi'irögörovo tövamu Paul-ro gavade a börömo ajamiromo mu simane vaejaje ae gemu aruëre namijamu gagorovo uavadeje: Na Rome raje jevajëjo. Röhu bogo court vaejevë'e ëma hisuebijevö'iro ë'arujëjo. Rome rajo nosi jögöroho bogo ëhioho höjo. Ĕhi jië'oho jemë rabëni ëma hisuebijevö'ie'arujëjo. 26 Ĕhi uavamu hejë'i rue simano vaejaje ahuro va'oromo muorovo a börömhöho uavadeje: Ja rabë'i ë'anujëjo. Ĕaho Rome raje höjo. 27 Ĕhi uavamu hegorovo rue a börömhuro rueromo Paul uavadeje: Uevego na hejëjo. Na ja Rome raje javajëjo. Javajëjamu Paul-ro uavadeje: Io'ajo. 28 Io'ajamu a börömhuro uavadeje: Naro moni böröme bu'öjë'ëro ëhu'ëro na Rome raje jevajëjo. Jevajëjamu Paul-ro uavadeje: Röhu na monioho bogo bojëmi'i a'i nasi vëmu vavu'ohuro baejevamu evare na Rome raje jevade höjo. 29 Ĕhi uavamu hejë'i evare Paul hisuebijë'i ua ga'ie'are ariböviohuro huruomö va'o rori'o riravareje. Rori'o riravamu rue a börömhuro uehorovoromo uvadeje: Rome raje tövë'e jevajëromo juhuonivadeje.

Paul Jew rajo a masijo jabesi nunire namijade jöhoje.

30 Muorovo a börömhuro juhuonivë'ëro nërö uvadeje: Nume Jew rajo ariböviohuro Paul-are jöhö rabu jö sisë majahui'ie'aruëromo ae gö uëvadeje: Paul tövare ö'oho jiovahöhë'i ae gö uëvadeje: Abueromo uëvego Jew rajo priest masijohu'o Jew rajo masijo ioro'iorohu'o gagovorego na jabesi jöhö he'iröjo. Ĕhi ë'ë'ëro Paul hu'irae ba'obueromo Jew rajo a masijo jabesi nunire nugadeje.

23

¹ Jew rajo a masijo jabesi nunire nugamu Paul-ro gë avohoromo

uëvadeje: Aganomë God-are nunire na sa'are hiromo rabe rabe ë'obe rovodoho na nasi herovajoho na ma-mae jevajëjo. ² Ma-mae jevajëjumu hegoroovo priest böröme Ananias-ro Paul-are bëhire riravare aribövioho uëvadeje: Paul jö'oro anohëjo. ³ Anohëjumu hegoroovo Paul-ro ri'öromo priest börömoho uavadeje: God-ro ja'o anago'ajëjo döhemu ajivavë'e aego. Ja aviae hijanuëjo mevoromo ga'iranëro na nosi jögoroho mae ejë'e jevego o bogo ejë'e jevego. Röhu jero ë jögoroho ahoromo uëvanuëjo: Paul anohëjo. ⁴ Paul anohëjumu Paul-are bëhire riravare ariböviohuro Paul uavareje: Asë'e jero God-are priest börömoho aganuëjo. ⁵ Aganuëjumu Paul-ro uëvadeje: Aganomë naro uvode höjo: Ëaho bogo priest börömehu höromo jövode höjo. Na uehorovo'ibejëjo na bogo ëhioho jövo'ibejëjo. Ëhesi bëhoho God-are surire jöho jajivoromo ëhi uövuë'e höjo: Jasi aribövi muebejëvaje aho nadi agonëjo.

⁶ Ëhi uënugoromo Paul-ro gavade ë a masijo ioro'ioroho Sadducee aribövie jioruomoi a ioro'ioroho Pharisee aribövie jioruomamu gëgorovo ë a masijo jabesi nunire ma-darugo'o uëvadeje: Aganomë na Pharisee ae jevajëjo. Nasi vëmu vavu'o'ho Pharisee aribövie jëvade höjo. Na court-re namijaje hesi bëhoho Pharisee aribövi noehu uehorovaruëhi naro ëhi uehorovoromo uvaje höjo: Vuovë'e ariböviohuro i'ovoromo röhu maho ri'öruomoi'ajëjo.

⁷ Ëhi uëvamu hejë'i Pharisee ariböviohu'o Sadducee ariböviohu'o irovoromo uehore gö gö baeruomadeje. ⁸ Uehore gö gö baeruomade hesi bëhoho Sadducee ariböviohuro uvoruomajeje: Vuovë'e aribövioho bogo i'ovo'aruëjo. O anerahu'o aru'aho ioro'iorohu'o bogohöjo. A'i Pharisee ariböviohuro uvoruomajeje: Vuovë'e aribövioho iae i'ovo'aruëjo. Anerahu'o aru'aho ioro'iorohu'o iae jioruomajëjo. Iae ëhuni Sadducee ariböviohu'o Pharisee ariböviohu'o Paul-are jöho heromo irovareje. ⁹ Irovoromo darugo'o uvobe rueromo Jew rajo jabesi jögoru öri röjëhjarue ahuro Pharisee aëro jëvë'ëro ri'öromo madarugo'o uëvareje: No gavaruoho ave aho sisë rumo'e ae höjo. Nani mae-ëjo. Nani aneraëro o aru'aho göëro hesi örire jöe majahijë'ëro jövajëjo. ¹⁰ Ëhi uënugoromo irovoromo börömo bëhe vörö'iraeruomamu gëgorovo rue muorovo a börömohuro juhuonivadeje Jew rajohuro Paul-are övore duruajore ruhamirovego tariorovojöeni. Juhuonivoromo va'o hesi muorovo aribövioho uëvadeje: Abo nume ae aho'obëhe jiaruoro ëhuro Paul baeniëhiromo hu'irae ba'ojiomoromo muorovo a nosi osaro nugorëjo.

¹¹ Ëhi'amu vahiromamu gagorovo Badaro rueromo Paul-are bëhire namiromomo uavadeje: Nadi juhuonivo'i ma-biririvoromo hinëjo. Ja nasi jö Jerusalem ma-mae majëhijanëhi Rome amoho ëhu'o va'oromo nasi jöho ëhi ma-maemu majëhi'anuëjo.

Jew rajo ae göehu göehu Paul ano'i uvoruomade jöhoje.

¹² Ëhi uavë'ëro sisonuvamu gagorovo Jew rajo ariböviohuro gagovorovoromo jöe atoromo uarovareje: God-ro gö'ego no ioho jovoho bogo i'ëjarëjo hujeji Paul anogoro evare iröhëro. ¹³ Ëhi uarovare aribövioho ae aho'obëhe 40 iosirëmiromo ruëhi jiadeje. ¹⁴ Ëhi uarovoromo va'oromo priest masijohu'o a duvaho ioro'iorohu'o uëvareje: Noro

darugo'e jõe atoromo uarovare hõjo: God-ro gö'lego no ioho jovoho bogo i'ejarëjo hujeji Paul anogoro evare irõhëro. ¹⁵ Ëhuni ave muoho vaenëjo. Jemë'o Jew rajo nosi a masijo ioro'iorohu'o Rome muorovo a bõrõmohuni jõho nugõ'õromo sareramiro mo uarëjo: Paul rõhu maho hu'irae baruvebijego jõ mevarue aribõviohuro hesi jõho he avoho'irarëjo. Jõe nugõ'õromo ëhi uarëjo. Rõhu muorovo aribõviohuro jemesi jõho eromo Paul hu'irae barovamu gavë'o ho noro õrire atovoromo rue'iramu ano'ejarëjo.

¹⁶ Ëhi majëhijamu Paul-are ma'ino hesi harihohuro Paul anorõhe jõho hejadeje. Heromo ruhe muorovo aehu raromarue osare ajiomoromo Paul huruoho majahijadeje. ¹⁷ Majahijamu hegorovo Paul-ro muorovo simano vaejaje ae gemuëni uvadeje: Rovego na jõe majahijõromo rovamu uavadeje: Ave a i'oho muorovo a bõrõmo hesi õroro hu'irae va'ego hesi jõho majahi'irajo. ¹⁸ Majahi'irajamu hu'irae bava'oromo muorovo a bõrõmoho uavadeje: Ave a i'o naehu barovode hesi bõhoho ë hisiehu tõvë'e aho Paul-ro hesirire va'ojõro uvevonugoromo naro va'amu uevade hõjo: Ave a i'oho bava'ego hesi jõho a bõrõmoho majahi'irajo. Ëhuni barovode hõjo. ¹⁹ Barovode hõjamu rue a bõrõmohuro a i'oho õvore ma'eno bava'oromo va'o rori'o jabesi sivue ariromo uavadeje: Rabu jõe majehi'ië'anuëjo. ²⁰ Majehi'ië'anuëjamu a i'ohuro uavadeje: Jew rajo aribõviohuro uarovare hõjo: Nëri muorovo a bõrõmoho sareramiro mo ua'ejarëjo: Paul baruvebijego Jew rajo jõ mevarue a masijohuro hesi jõho he avoho'irarëjo. ²¹ Ëhi uarovë'e jiaje ëhuni Jew rajehu nëri jõ majahijë'oho nadi ejëhoromo Paul Jew rajo a masijo jabesi õriroho hu'irae ba'obue'i ave osaro nugonëjo. Ëhesi bõhoho Jew raje ae aho'obëhe 40 iosirëmiromo ruëhi ëmino'e gurihivoromo atovo'aruëjo Paul rovego anorõhëni. Ëhesi bõhoho urimë'i uarovare hõjo: God-ro gö'lego no ioho jovoho bogo i'ejarëjo hujeji Paul anogoro irõhëro. Ëhi uarovare hõjo. Rõhu jaruvo jabumë bövie bise'e avohë'ëro jië'ëro raromo muebejaruëjo hujeji nëri jasi jõho he'irõhëro. ²² Ëhi majahijamu hegorovo rue a bõrõmohuro a i'oho uavadeje: Jaehu majehanue jõho bogave aho majëhi'iranëjo. Ëhi uanugoromo nugõ'õjamu va'adeje.

Muorovo a bõrõmehu Paul nugõ'õjamu Jerusalem jioromo Caesarea amore va'ade jõhoje.

²³ Va'amu gagorovo rue muorovo a bõrõmohuro hu ajamiromo simano vaejarue aho niõ'i uëvadeje: Ruehego na jõe majëhijõjo. Rovamu uëvadeje: Kaejõ ëgehu muorovarue aribõvioho 200 o horse-re jijihoromo muorovarue aribõvioho 70 o bijehu muorovarue aribõvioho 200 ëho gagovëvego jaburo vahi'e 9 o'clock evare va'irarëjo. ²⁴ O horse gö avoho'amego Paul-ro jabesi dõre hiromo va'onõvo'irajo. Eni romoromo jiego evaro va'oromo Paul avoho hu'irae baeromo muebebe va'orego ëhuro bogo anego guomo'i sa'a muebejaje a bõrõme Felix-arire mae va'irajo. ²⁵ Ëhi uënugoromo muorovo a bõrõmohuro jõho surire jajivoromo uavadeje: ²⁶ O asë'e Felix ja a bõrõmego Claudius Lysias naro jasi õrire jejamijajëjo. ²⁷ Ave nugõ'õjaje aho Jew rajo aribõviohuro guduumoromo ano'ië'are hõjo. Ano'ia'amu naro hejode uvavamu: Hu Rome raje hõ uvamu hegorovo naro nasi muorovo aribõviohu'o gemu

mae va'oromo gëvode ano'ia'amu gëgoro baeniëhiromomo hu'iraeromomo rovide höjo. ²⁸ Rueromomo he'li negade höjo uevego: Èhi èhi è'amu noro Paul ano'iro è'are höjo. Ano'iro è'are jöho he'li negamu naro Paul hu'iraeromomo Jew rajo jabesi jö mevarue a masijo jabesirire abuejode höjo jö bëhoho he'iro. ²⁹ Hu'iraeromomo abueromomo bëhoho hejode höjo. Ano'ië'are bëhoho Jew rajo ariböviohuro uevare höjo: Paul-ro Jew rajo nosi jögoroho ahade höjo. Èhi jië'e jöhuni ano'ië'are höjo. Röhu na gavode höjo mu sisë vaejego mana anaruëhi jië'e mu sisëho o mu sisë vaejego savoji gagore ba'amaruëhi jië'e mu sisëho èhi jië'e muoho Paul bogo vaej'e jiamu. ³⁰ Èhi gavë'ëro va'o ijonö hejode ae göëro huruoho majehiromomo uevamu: Jew rajëro Paul ano'i örire atovo'aruë uevamu hej'ëro na ma-burëro Paul Felix jasi örire nugö'öjajëjo. Hu jasi örire nugö'öromomo Jew rajo aribövioho uë'irögoromo è'ajëjo jaburo Felix jasi örire ö'oromomo Paul-are jö sisëho majahego jero he'iranego. Ahia mino'ëjo.

³¹ Èhi jajivoromomo vahiromomomo gagoromomo muoromomo ariböviohuro jabesi a börömohomo ejahoromomo Paul hu'irae va'oromomo Antipatris amore ë suorovareje. ³² Amore suorovoromomo sisonuvamomo gagoro muoromomo a ioro'iorohuro jabesirëro va'irögoromo horse-re jijihoromomo muorovarue ariböviohuro ri'öromomo Paul hu'iraeromomo va'areje. ³³ Va'arohomo va'o Caesarea amore ë suorovareje. Caesarea amore suorovoromomo Paul barovare jö hesi suri surioho sa'a a börömohomo bojamiromomo uavareje: Aveho Paul höjo. ³⁴ Aveho Paul höjamu sa'a a börömohuro suri surioho adahoromomo Paul uavadeje: Ja di sa'aho raje javajëjamu Paul-ro uavadeje: Cilicia sa'a raje javajëjo. ³⁵ Cilicia sa'a raje javajëjamu a börömohuro uavadeje: Jasi jö sisë atarue aribövioho rue'iramu evare na jasi jöho he'ejöjo. Èhi uanugoromomo hesi aribövioho uëvadeje: Paul hu'irae va'oromomo Herod-hu vaejade osa börömomomo nugego atovarue ariböviohuro ë muebe'irarëjo.

24

Paul sa'a muebejaje a böröme Felix-are nunire namijamu Jew rajo a ömo'ömehu Paul-are jö sisë majahijare jöhoje.

¹ Paul osare nugamu majae övo gö mine barëjamu gagoromomo priest böröme Ananias-ro Jew rajo a duvaho ioro'iorohu'o jabesi court jö majëhijaje ae gemu Tertullus hu'o ë aribövioho söjëvoromomo Caesarea amore ë ruvebijadeje. Ruvebiromomo sa'a a böröme Felix hesi nunire riravoromomo Paul-are jö sisëho huruoho majahijareje. ² Majahijamu Tertullus-ro jöho majahijöro Felix-ro uavamomo hegoro Tertullus-ro ri'öromomo Paul-are jö sisëho majahiromomo uavadeje: Na jö majahi'ië'ajoho henëjo. Ja a böröme javajëjo. Jero avoho muebejavuë'ëro majae ëgobövie no iro muoromomo'ohomo bogo vae'li ma-mae raromobe rovë'e javuajëjo. O mue rabe rabe bogo eni javuobe rovë'ohomo jero ajamuego nosi sa'aho mu maëremu ri'öjego no huë mae raromarue höjo. ³ Èhuni Felix jaehu vaejanue muoho dirö'e aho'o majae aho'o mae hö uvoromomo dë vövöbajole aho'o jasi örire rajahijarue höjo. ⁴ Röhu na jasi mu majahomo bogo anahoromomo jö ëgohomo majahi'i ma-bunemomo majahi'ië'ajëjo. Èhuni uavajëjo: Huë baejavuoromomo nosi jö harihohomo avoho henëjo.

⁵ No gavë'e javuajëjo ave aho Paul a sisë bëhe jiamu. Hu jö sisë jövobe sa'ae dinö'e dinö'e juvoromomo Jew rajo jabesi dë iëhego muoromomo'i

vörö'iraeruomaje höjo. Iesu Nazareth rajo a hesi sisë aribövi jabetesi simano vaejarue aho Paul hu'oje. ⁶ Ëhi jië'e aëro jië'ëro huro God-are osa börömoho ijumo'iro ë'amu gagorovo noro guduamare höjo. [Guduamo bava'oromo noro court vaeromo Jew rajo nosi jögoroho uehorovoromo hesi jö sisëho ga'irögoro ë'amu ⁷ muorovo a böröme Lysias-ro ö'oromo ma-darugo'o baeniahuiromomo ruho bava'ade höjo. ⁸ Bava'onugoromo huro Jew rajoho no uövuade höjo noro Caesarea ruvebiromomo Paul-are jö sisëho huruoho majëhijego Felix jero he'iranego.] Röhu jaehu Paul ua gavë'ocho hesi jö sisë noehu majahijaruoho jasi hia'ëro he barë'anuejo. Ahia mino'ëjo. ⁹ Ëhi majahijamu hej'ëi Jew rajë ae aho'obëhe jaburo hu ajamiromomo uavareje: Tertullus-ro jö mae jövajëjo. Paul hu ëhi jië'e ae höjo.

Paul-hu Felix-are nunire namiromomo hesi arijo'arije ajamirovoromomo majahijade jöhoje.

¹⁰ Ëhi majahiruomamu rue sa'a a börömohuro uvene aho röjahijadeje Paul-ro garomo evare hesi jöho jövojöro. Ëhi'amu gagorovo evare Paul-ro majahiromomo uavadeje: Iae na gavajëjo jaehu jö mevanue mu hesi öri muebebe rovanoho vadune aho'obëhe barëj'ë'e javajëjo. Ëhuro na dë mae jevo'ego nasi jöho majahi'ië'ajëjo jero heromomo uvojöro: Paul mu sisëho bogo vaej'ë'e höjo. ¹¹ Naehu majëhi'ië'aje jöho jasi nagë'ocho ae uë henëjo mae o sarere jiego. Naehu God rajahi'i Jerusalem ajiomodoho maja ëgoho bogo barë'i majae 12 ëhuremu barëj'ë'e höjo. ¹² Jerusalem hijodevaroho nasi jö sisë majahijarue aribövioho na mu sisë vadu'oho bogo vaejamu jabumë gevë'e höjo. God-are amo börömore hiromomo na ae gö'oho bogo jö aho'alaho ë'ode höjo. Jew rajehu God rajahijarue osare osaroho o Jerusalem uhure dinö'e dinö'e na bogo mu sisëho vaeromomo jö sisëho majëhijode höjo aëro iro muorovo'e vaejöro. Na ëhi jië'e mu sisëho bogo vaejamu jabumë gevë'e höjo. ¹³ Bogo vaejamu gevë'ëro jö bëhi ja majahijego heromomo mae uehorovo'iranoho jabetesi öriroho bogohöjo. Bogojië'e nasi örire ëma nibejeharuëjo. ¹⁴ Ruëroho numëroho na bogo ömo'i ave ömaje jöhemu huruoho majëhi'irodoho jevajëjo. Na Iesuare öri i'ore juvaje höjo. Röhu ave Jew rajoho jaburo uevarue höjo: Ëëroho sisë öriro juvanue höjo. Ëërire iae na ë juvoromomo ëhuro nosi hijo miono'o muebejëvobe rovade aho God rajahijaje höjo. Iae na ëhi ë'aje höjo röhu Jew rajehu ë'aruëhi Moses-hu bojamuade surire jögorohu'o jö God-aro baeromomo majahuinövare a jabetesi surire jöhu'o na'ö ëhi mae uehorovo avohaje höjo. ¹⁵ O ave Jew rajehu ë'aruëhi na'ö ëhi gemuoho God mae uehorovoromomo uvaje höjo: God-ro vuovë'e aribövioho a mahu'o a sisëhu'o i'ovavuo'iramu ri'ö'ëjarëjo. ¹⁶ Ëhi uehorovoromomo God-are nunire o ae aho'ö jabetesi nunire mae namijego dë mae jevo'iröhohuni ëhuni na ömo gavaje höjo. Na ëhi jië'e ae jevajëjo.

¹⁷ Ëhi jië'e aëro jevë'ëro öre gö hiromomo vadune gö gö barëjamu evare ijo bajoho ujuohoromomo Jerusalem rovode höjo nasi aribövioho suvuorëmi'irodëro. O rovode höjo Jew rajo muoho vaeromomo bijuëmäre mioho God-are örire suvuoramim'irodëro. ¹⁸ Jerusalem ro hiromomo ëhi jië'e muoho vaejamu evare Jew rajohuro ro gevare höjo na God-are osare jevamu. Röhu na urimo Jew rajo muoho vaejamu sisëho barë'i ma-mae jevë'ëro ëhu'ëro na God-are osare jevadoho iae mae jiade

höjo. Röhu göho jabuhu gevare majare ae aho'o na'oho bogojio'i iro muorovo'e jöjöje rabe rabe bogojiade höjo. ¹⁹ Na ëhi mae hijamu jaburo gevare höjo. Röhu Jew raje Asia sa'are jioromo rovarohuro ë osae gemuore jiare höjo. A'i jabumë aveho bogo rovare höjo. Ëaribövioho jabumë nasi jö sisë jëvo'ibejajo rueromo jasi örire majahi'ibejarëjo iae mae jio'ibejajo. Röhu bogo rove'e höjo. ²⁰ O na Jew rajo jö mevarue a masijo jabesi nunire namijodevare jabuhu nasi mu sisë rabe gavaruo nadi'ego ave ariböviohuro majahijego hejëjo. Röhu nasi sisëho bogo birohare höjo. ²¹ Ave jöhuremu hejare höjo. Na jabesi nunire namiromo ma-darugo'o uvode höjo: Jemëhu jaruvo court vaejevoromo uvarujoho: Paul-are ihoho sisë hö uvaruje hesi bëhoho naro mae uehorovoromo uvaje höjo: Vuovë'e aribövioho i'ovoromo ri'ö'ejarejo. Ëjöhuremu hejare höjo. Ahia mino'ëjo.

²² Paul-ro ëhi majahijamu hegorovo Felix-ro Iesuale öri hesi jöho mae hejë'ëro uëvadeje: U'emu muorovo a böröme Lysias ruvebi'iramu evare na jemesi jöho gö'o heromo uë'ejöjo: Paul-are jöho mae höjo o bejë'e höjo. Ëhi uëngoromo court-oho tugohadeje. ²³ Tugohoromo muorovo simano vaejaje aho uavadeje: Jero Paul muebejago bogo rori'oho va'i ë bëhiremu hi juvo'irajo. O hesi aganehu ö'oromo ajami'ië'iroho nadi nijio'iraejëvonëjo.

Paul-hu Felix'o hesi vabore Drusilla'o jabesi nunire namiromo jö jövade jöhoje.

²⁴ Ëhi'oromo majae gemu niö'i barëjamu Felix-ro hesi vaborohu'o gemu mae Paul ga'i va'adeje. Vaboro hesi ihoho Drusilla jiadeje. Hu Jew rajo magonahe jiadeje. Felix-ro va'oromo Paul-ro hesirire ruejöro jöe nugö'öjadeje. Jöe nugö'öjamu Paul-ro rueromo Iesu Keriso mae uehorovarue jöho majahijamu Felix-ro hejadeje. ²⁵ Hejamu Paul-ro mu maemu vaeröhe jöho ma-taemo raromo'iröhe jöho u'emu God-are nunire riravoröhe jöho ëhi jië'e jöho jövobe va'amu Felix-ro heromo juhuonivadeje. Juhuonivoromo Paul uavadeje: Va'ëjo. Majae eni jevo'iramu jöe nugö'ö'ejöjo jero sionëro ruejöro. ²⁶ Ëhi uaromo huro sareri'e muoho vae'i uehorovoromo uvadeje: Nani Paul-ro ue'a'ajëjo: Ë'ego na ja ijo bajo harihe saginiëri bojamego jero ëho bae'i na ëma jiovo remö'öjëjo. Felix-ro uehorovoromo uvadeje: Paul-ro ëhi ue'a'ajëromomo ëhuni Paul-ni jöe nugö'ö'i hijadeje. Nugö'ö'i hiromomo rue'ego huro Paul'o jöe jövonövadeje.

²⁷ Ëhi'ojuvo vadune niö'i barëjamu Felix-ro sa'a muebejaje muoho vuonugo'i Jew rajo ariböviohuro hu mae uehorovöjoro Paul savoji gagore ëhi nugoromo va'adeje. Va'amu Porcius Festus-ro rueromo hesi sionoho baejadeje.

25

Paul-hu Rome va'oromo a böröme Caesar-are nunire namiromo court avo'avoho vaeröhëro jöe jövade jöhoje.

¹ Hesi sionoho baeromo Festus-ro sa'aho muebe'i rovadeje. Rueromo majae niö'i gemu barëjamu Caesarea amore jioromo Jerusalem ajiomadeje. ² Ajiomamu Jew rajo priest masijohu'o Jew rajo a masijo ioro'iorohu'o ëho jaburo Paul-are jö sisëho huruoho majahijareje

Festus-ro hejōro. Paul-are jō sisēho majahinugoromo Festus uavareje: ³ Jero huē baeromo ajamuīromo va'o Paul nugō'ōjego Jerusalem rojomo'irajo. Ēhi ua gavare hesi bēhoho urimē'i Paul ōri ahore ano'i saginiēri atē'ēro ēhuni uavareje: Nugō'ōjego Jerusalem rojomo'irajo. ⁴ Rojomo'irajamu Festus-ro uēvadeje: O-ajo. Paul Caesarea amove savoji gagore jiē'ēro rojomo'irōhoho bogo eni jiajējo. Rōhu na aviae vejō'e vejō'e Caesarea vuonorō'ō'ejōjo. ⁵ Ēhuni jemesi masijohuro Caesarea amoro na'o ō'oromo Paul-are jō sisē rabe rabe jiē'oho court vaeromo majehijego na he'irōjo.

⁶ Ēhi uēnugoromo Festus-ro Jerusalem hiromo majae gö'o 8 o 10 rabu'e barējamu Caesarea amore vuonorō'ō abuejadeje. Abuejē'ero nērō court vaeromo Paul hu'irae ruejōro uvadeje. ⁷ Paul hu'irae rovamu Jew raje mami'e Jerusalem jioromo ruvebijaroho jaburo Paul-are bēhire gagovo rova'oromo sareri'e jō masijoho aho'obēhe Festus majahiromo uavareje: Paul-ro ēhi jiē'e ēhi jiē'e mu sisēho vaejade hōjo. Paul-are jō sisēho ēhi majahiromo rōhu jō bēhi majahego mae uehorovo'irōhoho jabesi ōriroho bogojiadeje. Bogojiē'e ma-nibejahareje. ⁸ Ma-nibejahamu Paul-ro Festus uavadeje: Na sisēho bogo vaejē'e jevajējo. Jew rajo nosi jōgoroho God-are osa bōrōmoho Rome a bōrōmehu no muebejavuajoho na jabesi jōho bogo ahoromo jabesi muoho bogo ijumēh'e jevajējo. ⁹ Ēhi majahijamu gavē'i Festus-ro Jew rajo aribōviahuro hu mae uehorovojōro nimamu Paul uavadeje: Na ja nagajējo Jerusalem ajiomoromo ē amore nasi nunire namiromo jasi jō sisē jabuhu ataruoho mevo'iro. ¹⁰ Ēhi uavamu Paul-ro uavadeje: Bogajo. Na aviae Rome a bōrōmo hesi court-re namijajējo. Ēhuremu gemu iae maho hōjo. Ja'o iae gavanuējo Jew rajo aribōvioho na bogo sisē vaejēvode hōjo. ¹¹ Na mu sisē vaejē'ēro guomevorōhe bēhoho jio'ibejajo na bogo nijio'iraejēvego jabesi anegego guomevō'ibejajo. A'i ē Jew rajo aribōviehu nasi jō sisē ēma barueromo nibejehiromo uavaruoho: Paul-ro ēhi ē'ade hō savaruoho aho Jew rajo jabesi ōvoroho bogo ēma bojēmi'arujējo court vaejevoro mo i'ue bojemi'irōhego. Ēhuni na negajējo Rome va'oromo muebejavuaje a bōrōmo hesi nunire nami'iro. ¹² Ēhi uavamu Festus-ro hesi jō ajamiromo mevarue aribōvi jabesi jōho heromo Paul uavadeje: Jero uevanuējo: Na negajējo Rome va'oromo a bōrōmo hesi nunire nami'iro. Ēhuni iae va'oromo hesi nunire nami'a'anuējo.

Paul-hu a bōrōme Agrippa'o Bernice'o ma'ino'o ma'ino'o jabesi nunire namiromo jōvade jōhoje.

¹³ Ēhi'amu va'o ririvanovamu evare a bōrōme Agrippa'o Bernice'o jaburo niō'iro Festus jejami'i rovaraje. ¹⁴ Rueromo majae bisemu ēge hu'o arijareje. Arijamu Festus-ro Paul-are jōho Agrippa majahiromo uavadeje: Ae gemu aviae hōjo mami'e Felix-ro savoji gagore ba'amoromo nugo va'ē'ēro. ¹⁵ Na Jerusalem ajio hijodevare evare Jew rajo jabesi priest masijohu'o a duvaho ōmo'ōmohu'o ēho jaburo hesi jō sisēho huruoho majehiromo uevare hōjo naro hu i'ue bojami'irodego. ¹⁶ Ēhi uevamu uēvode hōjo: Rome aribōvioho no ēhi jiē'e muoho bogo vaejarue hōjo. No bogo aho a jabesi ōvoroho ēma bojēmijarue hōjo i'ue bojēmi'irōhego. A'i urimo iho sisē'e ahu'o hesi jō sisē majahuijarue

ariböviohu'o gemuore jio'iramu jaburo hesi jö sisêho majahui'iramu huro mana hesiroho majahui'ajêjo. Hujeji hesi jöe bejê'ohuro êhuro i'uoho bojami'ejarêjo. ¹⁷ Èhi uêvode hōjo. Rōhu è Jew rajo ariböviohuro Paul-are jö sisêho huruoho majehi'i ruvebijamu gëgorovo na bogo örisanuovo'i nêrōho nasi aribövioho uêvode hōjo: Paul hu'irae ruehego court vaejōjo. ¹⁸ Èhi uêvamu hu'irae rovamu Jew rajo ariböviohuro ri'ōromo Paul-are jö sisêho majahuijare hōjo. Majahuijumu naro uvode hōjo: Nani jaburo Paul-hu mu sisê bēhe vaejade jōho majahui'aruêjo. Rōhu bogo êhioho majahuijare hōjo. ¹⁹ A'i Jew rajehu jabesi beroharue jōhuremu Paul'o jö aho'ahamirovare hōjo. Jö aho'ahamirovoromo jabesi sareri'e aru'aho hesi mu jōhu'o guomê'e a hesi ihe Iesu è a hesi jōhu'o jö aho'ahamirovoromo Paul-ro uêvade hōjo: Èaho Iesu bogo guomê'e iae hijajêjo. Èhi jiê'e jōhuremu court-re barovare hōjo. ²⁰ Èhi barovamu hegorovo naro uvode hōjo: Èhi jiê'e jōho bogo avoho hejê'ëro na bogo mevo varijënoho jevajêjo. Bogo mevo varijënoho jevajëromomo êhuni Paul uavode hōjo: Na ja nagajêjo Jerusalem ajiomoromo Jew rajo jabesi nunire namijego jaburo è jōho mevo'irōhego. ²¹ Èhi uavamu Paul-ro uevade hōjo: Na bogo ajiomomo'ejōjo. Na negajêjo jemëro na muebejevego hujeji na Rome amore va'ego muebejavuaje a bōrōmohuro nasi jōho mevo'irōhego. Èhi uevamu naro nasi muorovo aribövioho uêvode hōjo: Paul avoho muebejevo bogo rori'oho va'irajo hujeji naro Paul nugö'ōjogo va'o Rome rajo a bōrōmo hesi nunire nami'irōhe hōjo. ²² Festus-ro jōho êhi majahijamu hegorovo Agrippa-ro uavadeje: Paul-ro jōho jōvego na'o nasi hia'ëro he'i negajêjo. He'i negajêjamu uavadeje: Jōho nêri jōvo'iramu he'a'anuêjo.

²³ Èhi uavê'ëro nêrō Agrippa'o Bernice'o rovamu ae aho'obêhe jaburo ri'ōromo jabesi ihoho dōro bamoromo rajêhijareje. Rajêhijamu gavê'i jaburo niö'iro muorovo a masijohu'o amo rajo a masijohu'o gemu mae gagovarue osa bōrōmore rueruomadeje. Rovamu gagorovo Festus-ro ae uêvamu Paul hu'irae rovareje. ²⁴ Hu'irae rovamu Festus-ro jö majêhiromo uêvadeje: Agrippa a bōrōmohajo. O a ioro'iore ave gemuore gagovarijohumê ave aho Paul aviae nami'ego gavarujêjo. Èa hesi jö sisêho Jew raje ae aho'obêhe ave raromaruohu'o Jerusalem raromaruohu'o êho jaburo nasi örire majehijarue hōjo. Majehiromo jö'e dadovoromo ma-darugo'o ueruomaje hōjo: Ave sa'are êgo'o mahijê'oho bogo maehu hōjo. ²⁵ Jabuhu êhi uevarue hōjo rōhu anego guomorōhe hesi bēhoho bogo birohê'e jevajêjo. Rōhu Paul-ro hesi uevade hōjo: Remö'ōjogo naro Rome va'ego è a bōrōmohuro nasi jōho mevo'irajo. Èhi uevamu êhuni uvode hōjo: Naro Paul nugö'ō'ejōjo Rome a bōrōmo hesirire va'irōhego. ²⁶ Iae na nugö'ō'ejōjo rōhu Paul-are mu sisê jö jajivoromo a bōrōmo hesi örire nugö'ō'irodoho bogojevajêjo. Bogojevê'ego êhuni naro uêvode hōjo Paul hu'irae rovego huro ae aho'obêhe jemesi nunire o Agrippa jasi nunire namijego noro hesi jōho heromo mevoromo bēhoho garomo eni jiego evare jōho jajivoromo nugö'ō'irodëro. ²⁷ Èhesi bēhoho naro uvode hōjo: Tövê'e a hesi jö sisê bogo jajivê'e ma-nugö'ōjê'oho êhi jiê'oho bogo maehu hōjo.

Paul-hu Agrippa-are nunire namiromo hesi arijo'arije ajamirovoromo majahijade jöhoje.

¹ Èhi uëvamu Agrippa-ro Paul uavadeje: Jasi jöho majahuego no hejarëjo. Hejarëjamu Paul-ro jöe jövo'irögoro öve nigemoromo uëvadeje: ² Agrippa a börömoajo. Na jö harihe majahi'ie'ajëjo. Jew rajehu nasi jö sisë rabe rabe majëhiruomego naehu aho'i jaruvo jasi nunire namijajoho na uvajëjo: Iae huë mae baejë'e jevajëjo. ³ Huë mae jevaje hesi bëhoho aveho börömoajo. Jew rajehu mu diehi vaeromo jö rabe beroharuoho Agrippa jero mae gavanuego ëhuni Paul naehu jasi nunire namijajoho iae mae höjo. Èhuni na negajëjo jero ma-taemorovoromo nasi jöhemu he'iranego.

⁴ Na asisö'o jevadire aevoromo nasi sa'a rajohu'o gemuore hibe o ro Jerusalem amo rajohu'o gemuore naehu diehi hibe rovodoho Jew raje ae aho'obëhe mae gavë'e höjo. ⁵ Jew rajëro mami'e gabe rovë'ëro jaburo iae mae geromo uvarue höjo: Pharisee aribövi jabesi jöho mami'e aevoromo ebe rovode höjo. Jew rajo ioro'ioroho Jew rajo nosi jögoru ejaruoho ma-jianovo'i a'i Pharisee ariböviohuro e avoharue höjo. Naehu èhi eromo vaebe rovodoho ave Jew rajohuro nimë'ooho ua'a'aruëjo: Paul jö mae jövajëjo. ⁶ Röhu avevejö'e naehu jasi nunire namijaje hesi bëhoho aveho höjo. Naro mae uehorovoromo uvaje höjo: Iae mae-ëjo. God-hu nosi hijo miono'o uëvadëhi huro èhi ajamui'iramu ma-mabëhe raromo'ejarëjo. ⁷ Nosi Jew rajo anie aho'obëhe 12-ho jabumë ae aho'obëhe vae majae God rajahiemu rajahiromo naehu uehorovajëhi jabu'o èhi gemuoho uehorovoromo uvarue höjo: God-ro uövuadëhi ijönö nosi örire ajamui'iramu mae raromo'ejarëjo. Agrippa jabuhu uehorovaruëhi na'o èhi gemuoho uehorovaje höjo röhu è jöhuni Jew rajohuro nasi jö sisëho huruoho majëhi'ego naro jasi nunire namijajëjo. ⁸ Röhu Iesu guomamu God-hu i'ovadoho jemë bogo maho uehorovarujëjo. Jemë rabëni uvarujëjo: God-hu vuovë'e aribövi i'ovo'amaje jö uehorovo'iröhoho no bogo eni javuajëjo.

⁹ Urimë'i na'o uvonövode höjo: Naehu bövi bise'o vaeromo ëhuro Nazareth raje Iesuare iho ijumë'ooho èhi jië'ooho èho nasi mu maho hörömo ¹⁰ èhuni Jerusalem hiromo hesi muoho ijumo'i ë'ode höjo. Èhi'oromo naro priest masijo jabesi jöho baeromo God-are aribövioho aho'obëhe guduamo ujuoho va'oromo savoji gagore io'amonövode höjo. O Jew rajo a masijo ioro'iorohuro Iesuare aribövi jabesi jöho mevoromo vuovëvojöro uë'ego na'o ajëmiromo uënövode höjo: Iae mae uëvarujëjo. Jabumë vuovë'ooho iae mae höjo. ¹¹ Èhi'oromo majae aho'obëhe Jew rajehu God rajahjarue osare osare va'oromo Iesuare aribövi jabesi örire i'ue bojëmijöro uënövode höjo. I'ue bojëmijöro uëromo uënövode höjo: Uöhëjo: Noehu Iesu mae uehorovaroho avevejö'ooho vuonugë'e javuajëjo. O naro jabumë muo'amëvo'i vörö'iraeromo èhuni nasi sa'aho vuonugo'i sa'a göre göre amo göre göre va'onövode höjo sisë vae'amo'iro.

Paul-hu aevoromo Keriso mae uehorovade jö majahijadohoje.

¹² Iesuare aribövioho sisë vaejëvo'irögoro èhuni jabumë guduamo ujuoho rue'irodego nosi Jew rajo priest masijehu jajivare jöho naro baeromo Damascus va'ode höjo. ¹³ Röhu Agrippa naro örire va'oromo

majae ririre jiamu va'ihö gavode höjo ajoho ö'idöre jioromo ru-vebiromo na'o na'o gemu mae ö'arue ariböviohu'o ajivavuamu. Maja nuni hesi ajoho ma-jianovo'i ëho aji bëhe jiamu gavode höjo. ¹⁴ Ajivavuamu gagorovo no ae aho'obëhe sa'are behumorovoromo naro hejode höjo nasi Hebrew jöero uevavamu: Asë'e Saul-ajo. Ja rabëni sisë vaejevanuëjo. Naro ja minö'e sihavamu jero na ijumevo'i höromo jasi ijumorovë'e javajëjo. ¹⁵ Ehi uevamu naro uavode höjo: Bada ja rahuo javajëjamu uevade höjo: Jaehu sisë vaejevanue aho Iesu na jevajëjo. ¹⁶ Röhu de jero ri'öromo jasi hörëro döro namijëjo. Naehu jasi nunire rovode ë hesi bëhoho naro ja nasi baejavego jero nasi muoho vaejehoromo jaehu na gevanue jöhu'o u'emu naehu röjahijego ga'irane jöhu'o ae majëhibe juvonövo'iranego ëhuni rovode höjo. ¹⁷ Majëhibe juvo'iramu naro ja ajami'iramu Jew rajohu'o sa'a ioro'ioro rajohu'o ja bogo anago'aruëjo. Iae na sa'a ioro'ioro rajo jabesi örire ramö'ö'ejöjo. ¹⁸ Ramö'ö'iramu jero va'oromo ajëmiromo jabesi nunoho dadovëho'iramu ramoramole muoho vuonugo'i ma-ajiro raromo'aruëjo. Satan-are vörö hesi uhure raromaruoho vuonugo'i God-are aharire raromo'aruëjo. God-are aharire raromoro nasi örire mae uehorovevë'ero God-ro jabesi sisëho uehorovoromo vuonugoromo jabesi röhoho bojëmi'iramu God-hu baejëvade aribövi ioro'iorohu'o gemu mae raromo'aruëjo.

Paul-hu Keriso-are mu vaebe rovade jö jövadohoje.

¹⁹ Röhu King Agrippa Iesuro ö'idöre hiromo ëhi ajoho röjehiromo jöho majehijamu garömo hejode höjo. Heromo na bogo bijönimode höjo. ²⁰ Bogo bijönimo'i a'i huhu uevadëhi ëhi vaeromo urimo Damascus amore ijönö Jerusalem amore Judea sa'ae bövioho sa'a ioro'ioro rajo jabesi sa'are ëhi Iesure jöho majëhibe juvoromo uënövode höjo: Uehoro sisëho vuonugo'i God mae uehorovoromo mu maemu vaenövorëjo. Mu mae vaejë'o ho ëhuro noro gëromo uvo'ejarëjo: Iae mae-ëjo. Jemëro mu i'oho mabëhe baejë'e jëvajëjo. ²¹ Naro ëhi jjië'e jöho majëhibe juvë'ego ëhuni Jew rajo ariböviohuro God-are osa bërömore guduamevoromo anego'ië'are höjo. ²² Anego'ia'amu God-ro na ajemibe rovë'ëro ëhu'ëro jaruvoho iae na aviae jevajëjo. Aviae jevë'ëro naro namiromo nasi jö maho majëhi'ego jemë a ininore va'o a masijore ëhi hejarujëjo. Nasi jöho iae mae höjo. Ehesi bëhoho ijönö jioröhe mu jöho urimë'i jö God-aro baeromo majëhinövare aribövi jabesi surire o Moses-are surire jajivarëhi naro ëhi majëhijaje höjo. ²³ Jabuhu jajivarëhi naro ëhi majëhijaje höjo. Jaburo jajivoromo uvonövare höjo: Bëröme namiromo ajamui'iröhe aho huë vavaene bëröme baeromo guomo'a'ajëjo. Guomo'iramu a ioro'ioroho taemëvo'i huro urimo ri'ö'a'ajëjo. Ri'öromo hesi aji'e jöho majëhi'iramu Jew rajohu'o sa'a ioro'ioro rajohu'o heruomo'ajëjo.

²⁴ Paul-ro hesi jöho ëhi majëhijuvo evare Festus-ro ri'öromo ma-darugo'o uavadeje: Paul ja simane sisërëjavo'ego ëhi jjië'e jöho jövanuëjo. Ja bëröme gavë'e aëro javë'ëro ëhu'ëro jasi simanoho sisërëjahë'e höjo. ²⁵ Sisërëjahë'e höjamu Paul-ro uavadeje: Bogajo. Nasi simanoho bogo sisërëjehë'e höjo. Na simano maëro jevë'ëro jö maemu jövajëjo. ²⁶ Röhu naro Agrippa hesi örire jöho bogo subivaho'i masama'e majahijajoho iae mae höjo. Iae hu bëhoho gavaje höjo. Iesure

örire mu diehi diehi rovadoho o huhu mu diehi diehi vaejadoho bogo gurihiroho vae'i ma-va'orahoro vaej'ëro na uehorovajëjo iae Agrippa ë jöe aho'o garomo uehorovë'e höjo. ²⁷ Agrippa-jo. Jö God-aro baeromo majahuinövare ariböviehu jajivare jöho na ja mae uehorovanuëjo o bogajo. Iae na gavajoho ja mae uehorovanue höjo. ²⁸ Mae uehorovanue höjamu Agrippa-ro Paul uavadeje: Asë'e jero uvanuëjo: Naro Agrippa'o majae ma-bunemu jöe jövoromo dinami'iramu hu Christian vae'a'ajëjo. Röhu bogajo. ²⁹ Bogajamu Paul-ro uavadeje: Majae ma-bunemu o majae ëgo'o baeromo Christian vaej'ëho iae mae höjo. Röhu naro God-are örire uavajëjo huro ja ajamijego bogo ja gemu ae aho'obëhe nasi jö jaruvo hejarujoho ajëmego na jevajëhi jemë'o ëhi jëvoröhego. Röhu ö'ëhu tövevarëhi jemë'o ëhi tövëvo'iröhoho na bogo ëho uëromo ë'ajëjo.

³⁰ Paul-ro ëhi majëhijamu hegorovo Agrippa Festus Bernice a ioro'ioroho ëho jaburo ri'öjareje. ³¹ Ri'öromo suorovoromo uarovareje: Ëaho mu sisë vaej'ëro guomoröhe o savoji gagore hi'iröhe hesi bëhoho bogohöjo. ³² Ëhi uarovoromo Agrippa-ro Festus uavadeje: Ëaho Rome va'oromo a börömo hesi nuniroho bogo nami'i uvo'ibejajo jaehu jiovo nugö'öj'ëho iae mae jio'ibejajo.

27

Paul-hu Rome amore va'iröhëro boat baeromo sö jovo döre va'ade jöhoje.

¹ Ëhi'amu a böröme Festus-ro uvadeje ë majare noro boat-re ajiomoromo Italy sa'are va'oröhego. Ëuvade majaho rovamu aëro Paul'o savoji'e a ioro'iorohu'o ujuohoromo ae gemu hesi örire bo-jamareje huro jabumë avoho muebejëvego boat-ohuro aegoromo va'oröhego. Ëmuebe'amoröhe a hesi ihoho Julius jiadeje. Hu Rome rajë muorovo a ioro'ioro ma-gemuore bu'öromo muebejëvobe juvaje ae jiadeje. Gemuore bu'öjare muorovo aribövi jabesi ihoho Rome A Börömo Hesi Muorovo Aribövioho jiadeje. Julius-ro ë aribövioho mue-bejëvonövadeje. ² Julius-are örire Paul'o savoji'e aribövi ioro'iorohu'o bojамamu Julius Paul na a ioro'ioroho no ae aho'obëhe boat-re iojiomareje. Ëboat-oho Adramyttium amore jioromo rovë'ëro röhu vuonorö'öromo Asia sa'are jio'amaje amore amore höröbe va'irögoro ë'adeje. Va'ia'amu noro ë boat-re iojiomareje. Ajio raromamu evare boat-oho ri'öromo va'adeje. Röhu ae gö hesi ihe Aristarchus-ro no'o ö'adeje. Aristarchus hesi sa'a ihoho Macedonia jio'i amo ihoho Thes-salonica jiadeje. ³ Boat-ëro aegavuoromo va'aroho nërö Sidon amore suorovareje. Suorovoromo Julius-ro Paul huë baeromo uavadeje: Ja nagë'oho va'oromo jasi aganoho gëvego rabe rabe bogo eni javajoho i'imamego ujuohoromo vuonorö'ö ruenëjo. ⁴ Ëhi'amu boat-ohuro aegavuoromo Sidon amore jioromo va'areje. Va'ihö gavare bure boat nuninö rovamu gagorovo Cyprus sa'aho viëhi nugo'i ruëhi va'areje sa'ahuro buroho urahego mae va'oröhëro. ⁵ Sö jovo döre va'aroho Cilicia sa'aho iosiramiroho va'aroho Pamphylia sa'aho iosiramiroho va'aroho va'o Lycia sa'are Myra amore ro suorovareje. ⁶ Suorovoromo ravö'amoromo Julius-ro gavade boat gö Alexandria amore jioromo rovë'ëro Italy sa'are va'i namijamu gagorovo söjavuoromo ë boat-re ajiomadeje. ⁷ Boat-re iojiomoromo va'amu burëro taemoromo

unovamu ma-u'emu va'ojuvo majae gemu niö'li rabu'e ëhi barëjamu evare Cnidus amo bëhire boat-oho ro namijadeje. Namijamu gavare burëro darugo'o nuninö ro taemo'ego bogo va'o hesi javuamu huotorovoromo ruëhi dirö'o gönö va'areje. Va'aroho Crete sa'a vitu jövore ba'amade sa'a vösö hesi ihe Salmone iosiramiromo va'aroho Crete sa'aho viëhi nugo'li ruëhi sa'a bëhire va'areje sa'ahuro buroho urahego mae va'iröhëro. ⁸ Ioni bëhi mare va'adoho unamuike va'ojuvo Lasea amo bëhire jiaje osore ro namijadeje. Oso hesi ihoho Boat Mae Rivavaje Osoho jie.

⁹ Boat Mae Rivavaje Osore namiromo majae ëgobövie ë raromareje. Raromojuvo buru majae boat bogo jijiharue majaho dunovadeje Jew rajehu i bogo ijarue maja börömo mami'e barëjël'ëro. Buru majaho dunovamu Paul-ro ri'öromo boat-re raromarue aribövioho jöe majëhiromo uëvadeje: ¹⁰ Aribövi jöe hehëjo. No boat-re röhu maho aevoromo va'ë'oho na gavajoho sisërëjavuo hesi höjo. Inömohu'o boat-ohu'o ijumo'amo'ajëjo. Röhu bogo ëhemuoho ijumo'li no ae gö vuovavuo hesi höjo. ¹¹ Vuovavuo hesi höjamu hegorovo Julius-ro Paul-are jöho bogo ejaho'li boat baeromo juvaje ahu'o boat arijo'ohu'o jabesi jöho ejëhoromo uvadeje: Ë'ego no ma-va'arëjo. ¹² Röhu göho buru maja rovë'iroho boat ë dirö'ore namiromo gurihi'iröhoho ë osoho bogo eni jio hesi jiamu gagorovo ae aho'obëhe uvareje: Ë'ego no ma-sivoho gabe va'oromo mae javuë'oho Phoenix osore suorovoromo buru maja jïë'oho ë gurihi raromobe va'irarëjo. Ëhi uvareje. Röhu Phoenix ëho Crete sa'are osohoje. Maja beva'ajire röhu viënöho ruënöho bogo tugohële ma-va'orahoreje. Ëdirö'ore va'li nimoruomadeje.

Paul-mëhu sö jovo döre va'oromo buru börömehu rueromo boat anamu huë vavaeni bæjare jöhoje.

¹³ Phoenix va'li nimoromo gavare buru burue aruëhi rovamu gagoro boat muebejarue ariböviohuro uvareje: Phoenix va'ë'oho iae no mae va'ëjarëromo boat i'uhoromo namijöro be ba'amarue inömoho barojo dönö bamoromo evare va'areje. Va'oromo Crete sa'a bëhi mare va'areje. ¹⁴ Ma-bisemu va'anovamu gavëli evare buru börömo Crete sa'anö jioromo rovadeje. Ëburu hesi ihoho uvarueje: Maja Rojomajinö Röhu Bisemu Aruëhi Rovaje Buroho höjo. ¹⁵ Ëburohuro rueromo boat simanonö darugo'o anamu gagorovo buru rovajinö va'iröhoho bogo eni javuamu gagoro sivoho garomo vuonugo'li huotorovoromo burëro dirö'o göre bava'amu ëma va'areje. ¹⁶ Va'aroho va'o sa'a bise'o hesi ihoho Cauda ruëhi nugo'li viëhi va'ihö gavare ë sa'ahuro buroho urahë'ëro ma-bisemu u'uhamu gagorovo noro sivohojuvo nosi boat bise'o ruho bava'aruoho ma'eno titimareje. ¹⁷ Ma'eno titimoromo boat muebejarue ariböviohuro ë boat bise'oho io barojomoromo börömo hesi döre avoho bamareje. Bamonugoromo biriri'e ö'oho ujuohoromo boat börömo avoho tövo rova'o rojomareje bibivego jovoho bogo dadovoröhego. Avoho tövo rova'o rojomoromo uvareje: Boat bæjavuoromo öri ëgoböviro Libya sa'a bëhire va'iramu sa'a hurihuriro irovoromo diruvavuo'ajëromo juhuonivoromo burehu namijaje niögöho muotohoromo baruvebiromo bamamu buruhuro boat-ohu'o bæjavuoromo ëma va'adeje. ¹⁸ Ëma va'oromo gavare buru böröme ma-darugo ma'o rovadoho bogo barëjamu gagorovo

boat i'uhoromo diruvo'ajëromo boat-ehu ujuoho va'aje inömoho nërö aevoromo ujuohoromo jovore ruruhö'öjareje. ¹⁹ Ruruhö'öjê'ëro nërö boat mu vaejarue hesi inömoho êhu'o jabesi övëro ujuohoromo jovore ruruhö'öjareje. ²⁰ Ruruhö'öromo va'aroho no majae bogo gavê'e jije bogo gavê'e êhuro öroho dadivavuoromo ëma va'aroho buru börömo bëhe ruemu ruejuvo majae aho'obêhe barëjamu gagorovo uehorovoromo uvareje: Bogo i'ovo'li vuovavuo hesi höjo.

²¹ Vuovavuo hesi höjamu boat muebejarue aribövioho ioho bogo ue'ahê'e ma-muemu vaejuvo majae ëgobövie barëjamu gëgorovo Paul-ro ri'öromo uëvadeje: Aribövijaço. Mami'e nasi jöho ejeho'i Crete sa'aho bogo nugo rue'ibejarijëjo bövioho bise'oho bogo êhioho sisërëjahuo'ibejajo. ²² Iae êhi höjo röhu naro uëvajëjo: Biririvohëjo. Jemë ae gemu vadu'oho bogo guomëvo'ajëjo. Boat-ohemu dadorovo'i jemë mae raromo'arujëjo. ²³ Naehu êhi uëvaje hesi bëhoho God-are aëro jevê'ëro naro hu rajahijaje höjo. Ëa hesi anerahuro jaruvo vahi'e ro nasi bëhire namiromo ²⁴ uevade höjo: Paul nadi juhuonivëjo. Ëhesi bëhoho jasi muëro jiê'ëro ja va'oromo Rome a börömo hesi nunire nami'a'anuëjo. Ëhuni bogo öriroho guomo'a'anuëjo. Röhu ave jöhu'o hejëjo. God-ro jasi örire huë baejavê'ëro êhi ajami'ajëjo. Huro jasi jöeni uehorovoromo ja'o boat-re jijiharue aribövioho aho'obêhe ajëmi'iramu bogo vuovëvo'ajëjo. ²⁵ Ëhi jiê'e jö maho anerahuro uevê'e jiaje êhuni jemëro biririvohëjo. Ëhesi bëhoho naro God mae uehorovoromo uvajëjo: Aneraehu uevadëhi iae êhi mae javuo'ajëjo. ²⁶ No mae javuo'i röhu burëro boat-oho baeromo va'iramu sa'a motumoture iorovo'ajëjo.

²⁷ Paul-ro êhi majëhijamu majae aho'o 13 barë'i vahie 14 vahiromadeje. Vahie 14 vahiromamu Mediterranean sö jovore ëma va'areje. Va'aroho vahi riri'e jiamu gagorovo boat muebejarue ariböviohuro uvareje: Nani no sa'a bëhiro rovaruëjo. ²⁸ Sa'a bëhiro rovaruëromo jovo vahuoho diehi jiego ga'irögoro vahuvo garomo gavareje jovo hesi ëgoho 40 metre ëmino'e jiamu. Vahuvo ganugoromo rori'o va'oromo röhu maho vahuvo garomo gavareje jovo hesi ëgoho 30 metre jiamu. ²⁹ 30 metre jiamu gagorovo uvareje: Nosi boat-oho va'o munë masijoro va'o titimo'ajëromo juhuonivareje. Juhuonivoromo boat i'uhoromo namijöro be io'amarue inömoho 4 êhi boat dejonö jovore be io'amoromo vahie ëgobövie jiamu uvareje: Ma-burëro sisonuvego no öri ari'e gavarëjo. ³⁰ Ëhi'ojuvo boat muebejarue ariböviohuro boat bise'ore huruomo va'i nimoromo sareramuiromo uövuareje: Boat börömo avoho namijöro i'u'e inömoho boat nuninö be io'amo'i êhuni boat bise'oho ba'obueromo jovo döre ba'amaruëjo ë raromoromo muoho vae'iro. Ëhuni ë'aruëromo boat bise'oho baba'amareje. ³¹ Baba'amê'ëro ë abueromo huruomo va'ia'amu gëgorovo Paul-ro muorovo a börömo Julius'o hesi muorovo ariböviohu'o uëvadeje: Nume boat muebejarue aribövioho ave boat börömore bogo raromo'i huruomo va'ë'oho sa'are va'irarijoho bogo eni jëvo'ajëjo. Vuovëvo'ajëjo. ³² Ëhi majëhijamu hegorovo muorovo ariböviohuro boat muebejarue ariböviehu huruomo'iröhe öroho tugoho'i boat bise'o tövare ö'oho tariö'öjamu boat bise'ohuro a rumo'e ma-gagëremu va'adeje.

³³ Ma-gagëremu va'amu sisonuvo'ia'amu gagorovo Paul-ro ae aho'obêhe uëvadeje: Ie ihëjo. Jemë nurunuruëgamu ioho bogo ijê'e

ma-dë gagëremu raromo jijiharijoho majae aho'o 14 barëjë'e jëvājëjo. ³⁴ Ëhuni uëvājëjo: Ie ihëjo ëhuro jemesi dajoho bogo ma-ruhorovo'i biririvo'irarije hōjo. Ëhesi bëhoho jovoho raboho bogo anëgo'i jemesi sino haho'o'oho aho'o ma-mae jëvo'ajëjo. ³⁵ Ëhi uëngoromo ie baeromo ae aho'obëhe jabesi nunire God-are örire mae uaromo ioho atoromo ijadeje. ³⁶ Ijamu gagorovo ae aho'obëhe biririvoromo jabu'o ie ue'ahareje. ³⁷ Röhu no ae aho'obëhe 276 ëmino'e boat-re raromareje. ³⁸ Ae aho'obëhe ie ue'ahoromo da'uëgamu hegorovo wheat iruno'oho suevoromo jovore ruruhö'öjamu boat-oho sasohoromo ma-döro hetebe va'adeje.

Burehu rueromo jovehu boat anamu dadorovade jöhoje.

³⁹ Hetebe va'ojuvo sisonuvamu boat muebejarue ariböviohuro sa'aho garomo uvareje: No ari rahu rovere hōjo. Ari rahu rovere hō'i uherihoromo gavareje osore nie'uahe jiamu gagorovo uvareje: No eni javuë'oho boat-oho baeromo ë nie'uahore va'ëjarëjo. ⁴⁰ Ëhi uvonugoromo boat i'uhoromo namijöro be io'amare inömo ë hesi ö'oho tarivamu i'u inömo'u'ö ö'ohu'o jovore rireromo va'amu boat-oho sasohadeje. Sasohamu boat hunuovarue ijo be nugare ö'oho jiovo nugareje ëhuro ijo damuoho ma'enoromo hunuovobe va'oröhëro. Jiovo nugoromo burehu ro namiromo boat bava'aje niögoho boat simanonörire ijo namore ba'ojiomoromo be nugareje ëhuro boat-oho nuninö darugo'o va'oröhego. Boat-oho ëhi avohonugoromo eni jiamu gagorovo nie'uahore va'i va'areje. ⁴¹ Va'ihöromomo boat-oho nie'u huri-huri'ere iorovadeje. Iorovamu boat simanonöho nie'ure diruvë'ëro unovamu da'irinöho jovo vöröhuro ano dadovo'amadeje.

⁴² Dadovo'amamu gagorovo muorovo aribövioho jaburo jöe mevoromo uarovareje: Ë'ego no savoji'e aribövioho muo'amarëjo. Sövöe muoromo va'oruomomo'ajëjo. ⁴³ Ëhi uarovamu jabesi börömohuro Paul bogo guomo'i ma-mae hijöro nimoromo ahëvadeje. Ahëvoromo no uövuadeje: Ae rahu sövö'e jëvë'oho urimo jovohuro revoromo sövöe muoromo va'o ravojiomorëjo. ⁴⁴ A ioro'ioroho jemëro ijo ha'ose o boat dadorovade ijo vitu vituoho ujuohoromo jovo döro va'oromo va'o ionoro ravojiomorëjo. Ëhi uövuadeje. Ëhi uöromomo no ae aho'obëhe ëhi'oromo va'o ari mare ravojiomomo barëjareje.

28

Paul-hu Malta motumoture hijade jöhoje.

¹ Ari mare ravojiomonugoromo hejareje uvavamu: Ave motumotu hesi ihoho Malta hōjo. ² Ëhi hejamu ë sa'a arijo'e ariböviohuro huë mabëhe bojamuijareje. Huë mabëhe bojamuiromomo gavare ëne rueromo runone rovamu gagorovo vëne huoromo bövie bise'e ajamuijareje. ³ Ajamuijamu Paul-ro ijo vëne gagovoromo huduamo va'oromo vënoho huamu gavë'i sigobohuro vëni vöröho juhuonamiromomo höröromomo Paul-are övore ja'iho titimadeje. ⁴ Sigobohuro hesi övore ja'iho titimoromo ëhi iromë'e jiamu ë sa'a rajohuro garomo uarovareje: Sigobehu ja'ihaje hesi bëhoho iae no gavaruëjo. Hesi bëhoho ë ahuro ae anë'ëro ë'ajëjo. Ëahuro ae anade hōjo röhu ë hesi manaho bogo baeromo sö jovoho iromomo guomade hōjo. Bogo mana guomadohuni ëhuni i'u

bojamuaje aru'ahohuro ë sigoboho uavamu rueromo ja'ihade hõjo mana guomojõro. ⁵ Ëhi uarovamu gagoro Paul-ro õvoho hijiohijio-vamu sigobohuro Paul bogo ja'ihõ avohë'e ma-juvo bu'õromo vënire ravorovadeje. ⁶ Vënire ravorovamu gagorovo ë sa'a rajo aribõviohuro uvareje: Sigobëro ja'ihë'ëro nani ë a hesi sinoho huo'a'ajëjo. O ma-majioho sa'are beromo guomo'a'ajëromo raromoromo muebejareje Paul guomorõhego o diehi ë'orõhego. Muebebe va'ojuvo gavare bogo ëhi ëhi'amu gagorovo uehore gö baeromo uvareje: Nani hu bogo ma-aehu jio'i hu aru'aho bõrõme anõ'e rovë'ëro ëhu'ëro hu mae hõjo.

⁷ Iae sa'are a bõrõmo hesi sa'aho no raromarue bëhire jiadeje. Ëa bõrõmo hesi ihoho Publius jiadeje. Publius-ro no uõvuadeje: Nasi osaro ro raromohëjo. Raromohëjõmu va'areje. Va'amu huro huë mae bojamuiromõ ajamuibe va'ojuvo majae niõ'i gemu barëjadeje. ⁸ Huë mae ajamuamu ë a hesi vavuho guomo guome baeromo raromadeje. Guomo guome baeromo raromoromo hesi sinoho võrõ'iraeromo dë sirõvadeje. Ëhi jiamu gagorovo Paul-ro ë guomo guomo a hesi osare va'oromo God-are õrire uanugoromo õvoho hesi sinore bamamu guomo guomõho barëjadeje. ⁹ Barëjõmu gagorovo guomo guomo baejë'e a ioro'iorõho rueruomamu Paul-ro ajëmamõ mae jëvadeje.

¹⁰ Mae jëvamu rajahuromõ suvuore aho'o i'imamuijareje. I'imamuijë'ëro rõhu ijõnõ noro va'iro ë'amu gagorovo inõme rabe rabe no bogõjavuajõho ujuohoromo noni boat-re bahijahuareje.

Paul-hu rueromo Rome amore hijade jõhoje.

¹¹ Manaere niõ'i gemu barëjõmu boat göre iojio mareje. Ëboat hesi ihoho Huodi'e Rahëvade Aru'aho Jabesi Boat jiadeje. Ëboat-õho urimë'i Alexandria amore jioromo rueromo buru bõrõmo hesi majarõho ë namijuvo buroho barëjõmu evare va'iro ë'adeje. Va'iro ë'amu evare no iojio moromo va'areje. ¹² Va'arõho va'o Syracuse amore suorovoromo ë raromoromo majae niõ'i gemu barëjadeje. ¹³ Majae niõ'i gemu barëjõmu ë amõho vuõnugo'i boat-re va'arõho va'o Rhegium amore suorovoromo ë raromareje. Raromoromo nërõ gavare burohuro no va'iro ë'aruinõ ë va'amu gagorovo noro ri'õromo boat-õho baeromo va'amu burohuro nosi dejõnõ boat-õho bijimõbe õ'amu evare va'areje. Va'arõho nërõ Puteoli amore rueromo sa'are ravo'amareje. ¹⁴ Puteoli amore ravo'amoromo va'oromo Christian aganoõhi birohëvareje. Birohëvoromo uõvuamu jabesi osare va'o raromoromo hurae gemu baejareje. Hurae gemu baeromo Rome amore va'i va'areje. ¹⁵ Va'amu Rome raromarue Christian aganoõhuro noehu va'arue jõho hegoro nahavuo'i rovarëje. Rueromo a ioro'iorõhuro Appius õrire bövi bise'õ imo'amaruire ro birohavuo'i a ioro'iorõhuro nuharue osae niõ'i gemu jiajire ë ro birohavuarëje. Birohavuamu gëgorovo Paul-ro God huë mae uavamu hesi dë vövõbajo'õho saso-hadeje.

¹⁶ Dë vövõbajo'õho sasõhamu noro va'oromo Rome amore suorovareje. Suorovamu gavamen a masijëro osae bojamamu Paul-ro hesi sivue hijõmu muorovo ae gemuëro hu muebe hijadeje.

Paul-hu Rome amore hiromõ Keriso-are jõ majëhijadohoje.

17 Ĕhi'lamu majae niö'li gemu barëjamu Paul-ro Jew rajo a masije bëhire raromaruohuni jöe nugö'öromo uëvadeje: Ro gagovorego no jöe ato'irarëjo. Jöe ato'irarëjamu ro gemuoro gagovareje. Gagovamu gagorovo uëvadeje: Jew rajo ö ömo'ömomë nasi jöho hehëjo. Na nosi Jew rajo aganoho bogo sisë vaejövode höjo. Jew rajo nosi a mami muoho bogo ahëvode höjo. Ĕhi höjo röhu Jerusalem amore Jew rajo ariböviohuro ëma gudamevoromo Rome rajo jabesi övore bojëmare höjo baejevoromo court vaejevoröhego. 18 Bojëmamu Rome ariböviohuro baejevoromo court vaejevoromo gavare höjo na mu sisë vaejë'ëro guomo'irode bëhoho bogojiamu. Bogojiamu gagorovo jiovo remö'ö'irögoro ë'are höjo. 19 Jiovo remö'ö'ia'lamu Jew rajo ariböviohuro nijio'iraejëvoromo uëvare höjo: Nadi ëhi jië'o'ho ë'ohëjo. Nadi ëhi jië'o'ho ë'ohëjamu naro gavode mae va'irode öri göho bogojiamu gagorovo uëvode höjo: Iae na Rome va'oromo a börömo hesi nunire nami'ejöjo. Na ëhi uëvode höjo. Röhu na Jew rajo agano jabesi jö sisëho bogojevë'ëro na bogo ëhuniöho Rome a börömo hesi nuniroho nami'li uvode höjo. 20 Ĕhi jië'ëro ëhuni jemëni jöe nugö'öromo uëvode höjo: Ruehego na gëromo jemë'o jöe jövöjo. Röhu ave ö'ëhu tövevare hesi bëhoho aji mu börömo'ho rueröhego Israel aribövi ioro'io'erehu muebejarujëhi na ëhi gemuoho muebejajëro jië'ëro ëhuni na ave ö'öhuro tövevë'e höjo.

21 Paul-ro ëhi uëvamu hegorovo rue Jew rajo ariböviohuro uavareje: Jew rajo Judea sa'are raromarue aribövioho jasi jöho bogo suriroho javivoromo nugö'öjamu baejë'e javuajëjo. O nosi Jew rajo aganoho Judea sa'are jioromo rovarevaroho jasi jö sisë jöho o jaehu rabe rabe ë'ane jöho bogo majahujare höjo. 22 Röhu jasi uehoroho diehi jiajoho no he'li naguajëjo. Ĕhesi bëhoho ae aho'obëhe dinö'e dinö'e raromaruohuro uvoruomaje höjo: Jaehu uehorovanuëhi ëhi uehorovarue aribövi jabesi öroho sisë höjo.

23 Ĕhi uanugoromo majaho bojamiromo uavareje: No ë majare rue'ëjarëjo. Ĕhi uavë'ëro ë bojamare majaho sisonuvamu Jew rajae ae aho'obëhe Paul-are osare rovareje. Rovamu sisonu'e aevoromo Paul-ro jöe majëhiemu majëhibe va'öjuvo va'ö vahiromadeje. Majëhiromo uëvadeje: God-hu böröme namiromo muebejavuajë hesi öroho ëhi höjo. Ĕhi majëhiromo Moses-are jögoru surire jöhu'o God-are jö baeromo majëhinövare a ioro'io'ro jabesi surire jöhu'o adahoromo bëhoho röjëhiromo ëhuro jabesi simanoho huotovëho gavadeje jaburo Iesu mae uehorovo'iröhego. 24 Ĕhi'lamu hegoro a ioro'io'roho mae uehorovo'li a ioro'io'roho bogo ma uehorovareje. 25 Ĕhi'oromo va'oromo Paul-hu jövamu hejare jöho berohemu berohoromo amonö suorovo va'oromo göëro mae uehorovareje göëro bogo. Röhu bogo va'oruomë'iro Paul-ro ave jöhuremu majëhiromo uëvadeje: God-are Aru'ahohuro jemesi jöho iae mae jövade höjo. Ĕhesi bëhoho Isaiah jö God-aro baeromo majëhinövade a hesi simanore God-are Aru'ahohuro jöe bojamijade höjo huro jemesi hijo miono'öho uëröhego. 26 Jöe bojamiromo uavade höjo:

Va'oromo ë aribövioho ëhi uënëjo:

Jemë hemu he'a'arujëjo röhu bëhoho bogo avoho he'a'arujëjo.

Jemë gaemu ga'a'arujëjo röhu bëhoho bogo avoho ga'a'arujëjo.

27 Ĕaribövi jabesi dē vövöbajo'oho i'uhägaje höjo.

Hia'oho tugohëhë'e höjo.

Nunoho sigohijëhë'e höjo.

Bogo ëhioho jëvo'ibejajo nunëro ga'ibejarëjo.

Hia'ëro he'ibejarëjo.

Dë vövöbajo'oho sasohoromo jöho bae'ibejarëjo

ëhuro jabumë huotorovoromo rue'ibejarëjo naro avohëvego mae jëvo'ibejajo.

Ĕjöho God-are Aru'ahohuro iae mae jövade höjo.

28 Ĕhuni ave jöho majëhi'ië'ajëjo jemëro hejëro. God-hu maro ramuaje jö naehu majëhijajoho sa'a ioro'ioro rajo jabesi örire nugö'öjë'e höjo. Jemëhu ma-he taemarujo jabumëro iae he'a'aruëjo. 29 [Paul-ro ëhi uëvamu rue Jew rajoho jaburo darugo'o jö aho'ahamirovobe va'areje.]

30 Ĕhi'amu vadune niö'i hesi uhure Paul-ro osae gemu ma-jahuri hirono monioho mana bojëmibe va'onövadeje. Ĕosare hiromo gënövade aëro hu ga'i rue'ego huë mae bojëminövadeje. 31 Huë mae bojëmiromo God-hu böröme namiromo muebejavuaje jöho majëhibe Bada Iesu Keriso-are öroho röjëhibe va'onövadeje. Röhu jö majëhinövadoho aho bogo ahonövareje. O hu'o bogo juhuonivë'e aho jöho ma-sama'e majëhinövadeje. Ahia mino'e.

ROMANS

Paul-hu apostle mu hesi bëhi jajivade jöhoje.

¹ Paul naro ave jöho jajivo'irögoro ë'e. Na Iesu Keriso-are mu vaemu vaejahaje ae jeve. Na apostle jeve ë hesi bëhoho God-ro uevë'ëro. Huro na baejevoromo bamevadeje huhu bojamuade jö mahuremu naro ae majëhinövo'irodego.

² Ëjö maho urimoroho huro hesi jö majëhijarue aribövioho bojëmi'ego jabumëro hesi surire jajivobe rueromo uvonövareje: God-ro iae ëhi ëhi ajamui'ajëjo. ³ Röhu ë jö maho iae God-are Harihu hesi jöhoje. Hu araeromo a daje baejadire hu David-are uje jiadeje. ⁴ Röhu guomamu God-ro hu i'ovoromo hesi Aru'aho Maho bojami avohë'ëro uavadeje: Jaruvo ja nasi Harihe darugo baejë'e ae javajëjo. Ëaho hu Iesu Keriso nosi Badaje. ⁵ Ëaho God-ro uavamu huro Paul na huë baeromo ajemiromo apostle muoho bojemiromo uevadeje: Nasi jöho majëhijego sa'a ioro'ioro raje aho'obëhe mae uehorovoromo jöho ejeho'irarëjo ëhuro Keriso nasi ihoho döro jioröhe. Ëmuoho bojemamu naro baejë'ëro sa'a ioro'ioro rajoho ajëmijajeje. ⁶ Röhu Rome aribövime jemë'o iae ëhi jië'e aribövie jëvo'ego jemë'o ajëmi'irodoho jëve. God-ro jemë'o uevë'ëro ëhu'ëro Iesu Keriso-are aribövie gemuoho jëve.

⁷ Ëhuni Rome amo rajo God-hu rajëhiromo hesi baejëvade aribövime naro jemesi örire jajive. Na nege God nosi Vavuohu'o Bada Iesu Keriso'o huë baeromo ajëmijego maro raromo'irarijego.

Paul-hu Rome va'oromo amo rajo gë'i nimade jöhoje.

⁸ Urimoho naro Iesu Keriso-are ihore God mabëhe uave ae aho'obëhe jemesi jöëni. Ëhesi bëhoho ae aho'obëhe sa'ae dinö'e dinö'e hejarueje atoromo uvoruomavego: Rome aribövioho jaburo Keriso mae uehorovarue höjo. Ëhuni jemesi jöëni mabëhe uave. ⁹ Iae ave jöho na jö mae jövo'ie'e God-are nuniro. God hu nasi börömohoje. Ëhuni God-are nuniro ave jöho jemë mae majëhi'ie'e. Na bogo vuonugo'i majae ëhi jemëni uehorovëvoromo ¹⁰ parie vaejajeje. Urimë'i jemë bogo gënovë'ëro ëhuni God-are örire uavajeje huro hesi nimoromo nasi öroho avohehego naro ma-marö ö'oromo gë'irodëni. ¹¹ Ëhesi bëhoho na jemë gë'i nego avohe ëhuro naro jemë ajëmijego God-are Aru'ahuhu bojamiujaje suvuoroho jemëro baeromo biririvo'irarijego. ¹² Na negajoho jemë'o na'o Keriso mae uehorovë'ëro ëhu'ëro ajamirovo'iramu mae javuo'ë'e. Na ëhi nege.

¹³ Nasi ö mueno'e na nege ave jöho ga'irarijego. Na majae göro göro ö'ie'oromo muëro böviëro bise'ëro ma'enegro'i hijamu bogo ö'odeje. Na negadeje sa'a ioro'ioro rajo jabumë ajëmibe juvajëhi na jemesirire ö'oromo ëhi jemë'o ajëmiromo ae gö Keriso-arinö ujuohëvo rue'irodëro. ¹⁴ Sa'ae aho'o Keriso-are jöho majëhibe juvo'ejo. Amore raromarue je'ore raromarue gavë'e bogo gavë'e ëhi jië'e aribövioho aho'o jöho majëhibe juvo'ejo God-ro muoho ëhi bojëmijë'ëro. ¹⁵ Ëhuni na nego avohe Rome amore ö'oromo Keriso-are jö maho jemë'o majëhi'irodëni.

Keriso-are jö mae uehorovë'oho God-hu no i'ovavuaaje darugo røjahuiromo ajamuaaje jöhoje.

¹⁶ Ëjö ma hesi jöhuni röromo na javojoho bogojevo'i ma-mae jeve. Rabëni ë jö maho ae rahu heromo Keriso mae uehorovë'oho God-ro i'ovavuaaje öroho no røjahuiromo ajamuiromo öri sisënö javuajoho baejavuoromo öri manö ramuajeje. Ürimo Jew rajoho ëhi ajëmiromo röhu sa'a ioro'ioro rajohu'o ajëmijego maro raromarueje. ¹⁷ Ëjö uehorovoromo maro raromarue hesi bëhoho God-ro ë jöe gemuoho bojamuiromo ëhuro hesi muoho røjahuijego no garomo uvarueje: God-hu nosi sisë mu'uvahuo'iröhe öroho aviëhi höjo. Noehu Keriso mae uehorovë'ohuro iae ëhuro God-ro nosi sisë mu'uvahuego hesi nunire mae riravarue höjo. Öre gö bogohöjo. Ëhi uvarueje. Röhu God-are surire jöho ëhi gemuoho uvë'eje: Ae rahu God mae uehorovoromo hesi nunire mae riravë'oho ë aribövioho iae maro raromo'aruëjo.

Ae aho'obëhe God-are i'uhesi uhure raromobe rovere jöhoje.

¹⁸ Röhu God-ro ö'idöre hiromo røjahuego no garomo uvarueje: Hu sisë aribövioho aho'obëhe jabesi jöëni dë vörönimoromo i'ue mana bojëmaje höjo. Ëhi jië'e ariböviohuro God bijönimoromo ae sisë vaejëvoruomajeje. Mu sisë vaeromo ëhuro mu ma hesi öroho subivëho'i ë'o garuomajeje. ¹⁹ God-hu diehi jië'e ae jiajoho vituoho gavarueje vituoho bogo. Röhu gavarue vituoho ë sisë ariböviohuro iae va'orahoro garuomajeje God-ro røjëhijë'e jiego. ²⁰ No bogo nunoho gavarueje God diehi jië'e jiego. Röhu God-hu sa'a bövi bise'o bamadevare evare aëro aevoromo gabe rovereje sa'ae jove bövie bise'e God-hu bamadoho jio'amamu. Ëhi jiamu gagorovo ëhuro uvobe rueruomadeje: Bövie bise'e aho'o bamë'ëro ëhuni hu bogo ma-aehu jio'i hu gemu bëröme jio'i hu gemu eni jië'ëro ëhi jiemu jiobe rovadoho ëhi jiemu jiobe va'a'ajëjo. Ëhi uvobe rueruomë'ëro jabumë God bogo mana uaruomo hesije: O no ja bogo gavë'ëro jië'ëro ëhuni mu sisëho vaejare höjo. Ëhi jië'e jöho bogojio'ë'e. ²¹ Jabumë iae God jabesi simanëro gabe rueruomadeje. Röhu bogo uvareje: God gemu bërömo ho uvoromo rajahijareje. Suvuoro gö gö bojëmadoho bogo huë mae uavë'e ëma ujuohareje. Ëhi'oromo God bogo uehorovo'i a'i sisë'i sisë'i uehorovobe nu ano'e ramoramovobe simane sisë maro sisërërovobe rueruomadeje. ²² Uvobe rueruomadeje: No simano ma'e aribövie javuajë'i simane sisërëbe rueruomadeje. ²³ Simane sisërërovë'ëro ëhu'ëro bogo uvareje: God hu ioro'ioeremu ajie hijaje ae jio'i ave sa'are aribövioho nomë majahuri raromarue aribövie javuajë uvo'i a'i God ioro'ioeremu jiaje aho bijönimo'i majahuri raromarue aribövi no va'ëne inömoho avohoromo ëhi rajahi'amobe rovereje. A va'ëne ugo va'ëne majo va'ëne sigobu va'ëne ëhi jië'e inömoho avohoromo rajahi'amobe rovereje.

²⁴ Ëhi jië'e simano rumo'e muoho vaejë'ëro ëhuni God-ro jabu manunëremu gëromo rëmö'öjadeje jabesi nimarue muoho vae'iröhego. Rëmö'öjamu jabesi nimoromo öëro jijihanovoromo göëro göho mu gö gö vaeromo jabesi dajoho ijumorovobe rovereje. ²⁵ God hu diehi jië'e a jiaje uehoro maho vüonugo'i sarerie muohemu uehorovobe rovereje. God-hu avoho'amade bövioho bise'oho God höromo uvene

aho rōjahi'amobe rovaraje. Bövi bise'o avohade ë aho bogo uehorovareje. Röhu hesi ihoho ma-mabēhe jiemu jiobe va'ë'e. Iae mae.

²⁶ Jaburo God bogo uehorovë'ego huro ma-nunëremu gëromo rëmö'ōjamu öëro jijihanovobe rovaraje. Iae magonahohuro ama'i'o masurovarue muoho vuonugo'irōgoro magonahohuro jabesi arijo'arije sihamirovobe rovaraje. ²⁷ O ama'ohuro ëhi jië'e mu sisë gemuoho vaeromo vaboro masëgarue muoho vuonugo'i dëre ri'ōromu öëro jijihanovoromo a'o a'o sihamirovobe rovaraje. Ëhi jië'e javoji'e mu sisëho vaerovë'ëro ëhu'ëro i'ue mana baebe rovaraje.

²⁸ Jabumë uvareje: God uehorovë'oho bëhi rumo'e hö uvoruomamu ëhuni God-ro ma-nunëremu gëromu rëmö'ōjamu jabesi uehoroho ihesi ma'e sisërëromu bogo ë'o varijëne muoho vaebe rueruomadeje. ²⁹ Bogo mu maho vaejamu mu sisë göëro göëro jabesi dëho irijiomëhë'eje. Mu sisë uehorovarueje. Bövie bise'e ma-bae taemarueje. Mu gö gö vaejarueje. Ae gö jabesi mu mahuni dë vörönëgajeje. Ae muo'amarueje. Iro muorovo'e vaejarueje. Sareri sareri'e muoho vaejarueje. Nue huodëgarueje. Ëhi jië'e uehoro sisëhuro jabesi dë vövöbajo'ere irijiomëvë'eje. O ae gö jabesi jö sisëho saginiëri atarueje. ³⁰ A göëro gö hesi ihoho ijumarueje. God nue huodivarueje. A ioro'ioro jabesi ihoho ijumarueje. Döro bamorovarueje. Nimoronimorohë'i atarueje. Mu gö gö barovarueje. Vëmu vavu'o jabesi jöho bogo ejëharueje. ³¹ Uehoro maho mu maho huë maho dë maho bövi bise'o maho bogojëve. ³² Iae garomo uvarueje: Ae rahu ëhi jië'e mu sisë vaejè'oho vuovo hesi höjo God-are jögoroho ëhi jië'ëro. Iae ëhi uvarueje röhu jabumë ëhi jië'e muoho vaejarueje. Röhu bogo jabesi ëma va'e'i a'i garöhe ae gö ëhi jië'e mu sisë vaejamu gavë'oho uëvarueje: Iae mu mae vaejarujëjo.

2

God-hu ae aho'obëhe avoho mevavuo'iröhe jöhoje.

¹ Nani jero döro bamorovoromo uvo'a'anue: Ëaribövioho sisëgo sisëro va'ë'oho iae mae höjo. Ja ëhi uvo'a'anue röhu jabuhu vaejaruëhi ëhi jië'e mu sisë gemuoho ja'o vaejanueje. Ëhuni God-ro uvajeje: Jero uvanue höjo: Ësisë aribövioho sisëro va'a'aruë uvanuoho ëhuro ja'o i'ue gemuoho bae hesi javajëjo. Ëhu'ëro ja jö God mana ua'iranoho bogojavo'ë'e. ² Iae no garomo uvarueje: Ëhi jië'e mu sisë vaejarue aribövioho God-hu i'u mana bojëmijë'oho iae mae höjo. ³ Ae gö jabesi sisëho mevanueje röhu ja'o iae ëhi jië'e mu sisë gemuoho vaejanueje. Na ja uvanueje: God-hu bojamuijaje i'u'oho na bogo bae'ejöjo. ⁴ God-ro huë baejavuo avohoromo nosi sisëho garomo bogo burëroho i'uoho bojamui'i ma-göromu hesi vöröho nimo ëhi taemajeje. Iae ëhi jie röhu na jero uehorovoromo uvanueje: Iae hesi höjo. Röhu huro jasi öriroho bogo ëma huë baejavo'i a'i huhu huë baejavaje hesi bëhoho hu nime jasi dë vövöbajo'oho huotovahego jasi sisëho vuonugoromo hu mae uehorovo'iranego. Röhu ëho ja rabëni bogo avoho uehorovanueje. ⁵ Röhu jero mu sisë vaejanuoho bogo vuonugo'i a'i hia'e biriri'övoromo ma-vaemu vaebe va'ëgo ëhuro God-ro gö'o gö'o döre dë vörönimobe va'öjuvo hujeji hesi maja börömoho rue'iramu evare i'uoho sisë maro mana bojami'iramu bae'a'anue. Ëmaja börömoroho huro a nuniro namiromo jabesi sisëho avoho mevoromo ae aho'obëhe

hesi dère vöröho baeromo evare i'ue bojëmi'ë'e. ⁶ Aehu diehi jië'e mu vaejaruoho evare majare huro ëhi jië'e manaho ae gemu gemu bojëmi'ë'e. ⁷ Ae göëro biririvoromo mu mae vaeromo nimarueje hujeji God-ro hesi aji maho bojëmiromo jabesi ihoho mae uëvego ma-ioro'ioeromu God'o raromo'iröhëro. Ëhi jië'e aribövioho God-ro ajëmi'iramu ma-ioro'ioeromu maro raromo'ë'ö. ⁸ O ae göëro jabesi sinohemu uehorovoromo God-are jö maho bijönimoromo öri sisëro jijihoruomajeje. Ëhi jië'e ariböviohuni God-ro dë vörönimo'iramu i'ue sisë maro bojëmi'ë'e. ⁹ Mu sisë vaejë'oho ae aho'o vi'ehe huë vavaene bae'ë'ö. Jew rajohuro urimo bae'iramu röhu sa'a ioro'ioro rajoho jabu'o gemuoho bae'ë'ö. ¹⁰ O mu mae vaejë'oho ëhi jië'e ae aho'o God-ro aji maho bojëmiromo jabesi ihoho mae uëromu ajëmi'iramu huë mae raromo'ë'ö. Jew rajoho urimo ajëmiromo röhu sa'a ioro'ioro rajoho jabu'o ëhi gemuoho ajëmi'ë'e. ¹¹ God-ro ae aho'obëhe ma-gemu göromu sisë bojamuibe mae bojamuibe va'ajeje.

¹² Sa'a ioro'ioro rajohuro Moses-are jögoroho bogo hejë'e mu sisëho ma-vaeruomajeje. Hesi jöho bogo hejë'e mu sisë ma-vaejaruëro jië'ëro ëhuni ijönö God-ro Moses-are jöho bogo majëhijë'e ma-uë'ë'e: Sisë jëvaje sisëro va'ohëjo. O Jew rajohuro Moses-are jögoroho iae hejarueje. Heromo röhu sisë vaeruomajeje. Heromo röhu mu sisë vaejaruëro jië'ëro ëhuni ijönö God-ro jabesi örire Moses-are jöho majëhiromo uë'ë'e: Jemëro hesi jögoroho ahë'e jëvaje sisëro va'ohëjo. ¹³ Ëhesi bëhoho bogo jögoru hejarue aribövioho a'i jögoru ejahoromo mu vaejarue ariböviohuro God-are nunire mae riravo'ë'ö. ¹⁴ Sa'a ioro'ioro rajoho Moses-are jögoroho bogo hebe rovë'eje. Röhu hesi jögoru jiajëhi ëhi jië'e muoho vae'ë'ö. Vaejë'oho ë hesi bëhoho God-are jögoroho bogo he'i a'i jabesi uehororo jië'ëro ë muoho vaejarueje. ¹⁵ Ëhi vaejego noro garomo uvarueje: God-are jögoru jiajëhi jië'e mu vaeröhe hesi uehoroho huro jabesi dë vövöbajo'ere ba'amëhë'e höjo. Jabesi dère herovarueje jabesi arijo'ëro mu mae o sisë vaejë'e jiavego. Jabesi uehore gö gö rovego uvarueje: No sisë vaejë'e javuajëjo o nani majae gö uvarueje: Mae vaejë'e javuajëjo. ¹⁶ Röhu ëho majaho rue'iramu iae ëhi jio'ë'e. Naehu Keriso-are jö mae majëhiromo ae uëvajëhi God-ro ëhi ë'oromo Iesu Keriso ua'iramu huro ae aho'o jabesi uehoro gurihi taemarohe mevo'ë'e ga'i mae o sisë jiego.

Mu vaeröhe jögoru Moses-hu bojëmamu Jew rajehu bogo ejahare jöhoje.

¹⁷ Röhu nani jero ae uëvanueje: Na Jew rajëro jevë'ëro iho mabëhe jevajëjo. Jero uvanueje: Na Moses-are jögoru ijore ijore juvaje aëro jevë'ëro ëhu'ëro God-are nunire mae nami'ejöjo. Jero sivue döro bamorovoromo ae uëvanueje: Na God-are a maëro jevë'ëro ëhu'ëro ma-mabëhe jevajëjo. ¹⁸ Iae maeje. God-hu rabe rabe nimajoho jero uehorovanueje. Moses-are jögoroho hejë'ëro ëhu'ëro jero gavanueje di muoho maho jiego. ¹⁹ Jero biririvo avohoromo uvanueje: Nuni tugarohë'e jabesi öri röhëhijaje aho na jevajëjo. Ramoramo'ere raromarue aribövi jabesi ojo jiovëhaje aho na jevajëjo ajivëvo'irodoho. ²⁰ Simano bogojië'e aribövi röhëhijaje aho na jevajëjo. Asisö'o röhëhijanovaje aho na jevajëjo. Moses-are jögoroho hejë'ëro ëhu'ëro na nuni aji'e jö maho ga barë nahonahovë'e jevajëjo. Na ëhi jië'e ae jevajëjo. Nani jero ëhi

uvanueje. ²¹ Iae maeje. Jero a ioro'ioroho jöho röjehanueje. Röhu ja rabëni jasi arijo'arijoho bogo röjahirovanueje. Jero a ioro'ioroho majëhiromo uëvanueje: Nadi vajiohoho ë'orëjo. Iae mae uëvanueje röhu na ja vajiohoho ë'anueje. ²² O jero a ioro'ioroho uëvanueje: Nadi goho'amorëjo. Röhu na ja goho'amanueje. O jero uehorovoromo uvanueje: Sareri vörö'e inömo sisë bëhe jio'amajëjo. Röhu na ja ë inömo uehorovarue osaroho rumo va'o'amoromo vajiohoho ujuo-horomo ë inömo hesi sisëho baejanueje. ²³ Jero uvanueje: Na God-are jögoroho hejël'ëro mae jevajëjo. Iae ëhi jie röhu na ja God-are jögoroho ahoromo hesi ihoho ijumanueje. ²⁴ God-are iho ijumanue jöho iae hesi surire ëhi gemuoho uvë'eje: Jew raje jemëro sisë vaejego ëhuni sa'a ioro'ioro rajohuro God-are ihoho sisë'i uvarue höjo.

²⁵ Jew rajehu ë'aruëhi ëhi jasi sinoho tariojahë'eje. Ja God-are jögoru ejahamu sino ëhi tariojahë'oho ëhuro mae javo'ë'e. O God-are jögoru bogo ejahamu sino ëhi tariojahë'oho bogo ëhuro maho javo'ë'e. ²⁶ Ave jöhu'o uehorovore. Sa'a ioro'ioro rajoho Jew rajo muoho bogo vaeromo sinoho bogo tarivo'amarueje. Röhu jabumë ae rahu God-are jögoru ejahë'oho ëhuro God-ro uvo'ë'e: Ëaribövioho sa'a gö raje jio'i röhu Jew rajo jabesi sino tariojëharuëhi jië'e aribövie jëvë'ëro ëhu'ëro jabu'o nasi aribövi mae jio'amajëjo. ²⁷ Sa'a ioro'ioro raje ae göëro göëro sinoho bogo tarivo'amë'e God-are jögoroho iae ejaharueje. God-ro jabesi mu maho garomo Jew rajoho ja ua'ë'e: Ja nasi surire jöho baejë'e javajëjo. Nasinö javojöro jasi sinoho tariojahë'e höjo. Röhu sa'a ioro'ioro rajehu ë'arëhioho ja rabëni jögoroho bogo ebe rovane höjo. ²⁸ Ëhesi bëhoho ja Jew rajo iho javo'i Jew rajehu ë'aruëhi jasi sino tariojaho'i röhu God bogo uhohu'o uehorovë'oho ja ma-döhemu Jew rajoho javë'ëro ëhu'ëro ja bogo God-are a maho javajeje. ²⁹ Döremu Jew rajo javë'oho ëho bëhi rumo'e javo'i a'i Jew rajehu God uehorovaruëhi ëhi uhure uehorovë'oho ëho börömohoje. Ëhesi bëhoho bogo jasi sinoho tarioromo avohaho'i a'i jasi dë vövöbajo'oho avohahë'eje. Bogo ma-jajivë'e jögoru ejahoromo aehu jasi sinoho tariojaho'i a'i God-are Aru'ahohuro jasi dë vövöbajo'oho avohahë'eje. Dë vövöbajo'oho avohaho'iramu bogo aehu ja rajahi'i God-ro rajahi'ë'e.

3

¹ Ëhi jië'oho na Jew rajo ariböviohuro sa'a ioro'ioro rajoho iosirëmiromo God-are mu maho baejë'ejö o bogo. O Jew rajo mu vaeromo sino tarivaruoho na ëhuro mae baejë'ejö o bogo. ² Io'o mue aho'o iae mae baejë'ejö. Aevo'i jöho aviëhije. God-ro Jew rajo jabesi övore hesi jögoroho bamadeje jaburo mueberöhego. ³ Jabesi övore bamamu röhu Jew rajo a ioro'iorohuro ë jögoroho bogo avoho ejaho'i vuonugareje. Vuonugarohuni na ëhuni God-ro huhu uëvade muohu'o vuonugo'i jö göho uehorovo'ë'e o bogo. ⁴ God bogo mae bogo ëhioho ë'ë'e. Ëhesi bëhoho God bogo sareri'oho jio'i hu ma-maëremuje. Ae aho'obëhe sareri sareri'e javuë'oho röhu God hu'o bogo ëhioho jio'i hu ma-maemu jio'ë'e. God-are surire jöhu'o ëhi gemuoho uvë'eje: No gavarue höjo God jasi jöho ma-maemu majahuijego. Aëro uvoruomo'ajëjo: God jasi muoho sisë hö uvoruomo'ajëjo röhu iae ga'ëjarëjo jasi muoho mae jio'iramu.

⁵ Rõhu noehu mu sisë vaeromo God-are mu mahu'o gemuore havoromo gavë'oho ëhuro hesi mu maho ma-va'orahoro jio'ë'e. Ëhuni nani aëro ëho garomo sarerivoromo ave sa'are ariböviehu uvaruëhi ëma uvo'ë'ö: Noehu sisë vaejamu ëhuro God-are mu ma va'orahoro jië'oho noehu mu sisë vaejago huhu i'u mana bojamui'iröhoho ëho sisë höjo. ⁶ Rõhu bogo ëhiohoje. God-hu a sisë i'u mana bojëmi'iröhoho sisë jio'ibejo hu diehi'oromo sa'a raje aho'obëhe göromo mevavuo'ibejo mae o sisë javuego. Rõhu huro ae aho'obëhe iae mevavuo'ë'e. Ëhuni God-hu a sisë i'u mana bojëmi'iröhoho iae maeje.

⁷ O nani aëro ëma uehorovoromo uvo'ë'e: Naehu jö sareri jövë'ohuro ëhuro God-are jö maho va'orahoro jio'a'ajëjo. Ëhi jië'ëro God-are ihoho döro jio'a'ajëjo. Nasi sisëhuni hesi ihoho döre jië'oho God-hu na ue'iröhoho: Ja sisë javaje sisëro va'ë ue'iröhoho ëho sisë höjo. Rõhu aehu ëhi jövë'oho ëho sisëje. ⁸ Ëhi jië'e jöho aviëhi jianove. Ruehego no mu sisë vaejarëjo ëhuro God-are ihoho mae jio'iröhe höjo. Iae aëro Paul nasi ihoho ijumoromo ëma uëvarueje: Nöröro ëhi jië'e jö sisëho jövaje höjo. Ëhi ataruëro jië'ëro sisëre va'oruomë'oho iae maeje.

Ae aho'obëhe sisë javuaje jöhoje.

⁹ Rõhu Jew raje noro God-are mu mabëhe baejë'e javue. Mu mabëhe baejaroho na ëhuro noro sa'a ioro'ioro rajoho mue aho'o iosirëmiromo mae javue o bogo. Bogo. Jew rajohu'o sa'a ioro'ioro rajohu'o no aho'o mu sisë darugo hesi uhuremu javue. Ëjöho na mami'e jajivodeje ga'irarijejo. ¹⁰ God-are surire jöhu'o ëhi gemuoho uvë'eje: Bogo mae bogo ae gemu vadu'oho maho höjo.

¹¹ Aho bogo simano maho uehorovoruomaje höjo.

God birohuruë öroho bogo nahoruomaje höjo.

¹² Ae aho'obëhe öri maho nugö'öli je'oro va'oruomë'e höjo.

Ae aho'obëhe sisë mae sisërërovë'e höjo.

Bogo mae bogo ae gemu vadu'oho mu maho vaejaje höjo.

¹³ Jö sisë ataruohuro ëhuro sisë bëhe jëvájëjo.

Ae guavoromo bogo duho'i ma-nugego usihövo rojomajëhi jabesi huë gagore ëhi rojomanovaje höjo.

Jö'ëro jö sareri sareri'e atoromo jövëro rovanovaje höjo.

Bitaro vuodovë'ohuro bitaro gagore sigobu vörö va'ënoho rojomaje höjo.

¹⁴ Jö'ore ajuo'e rojomego nu huë'e jöemu atarue höjo.

¹⁵ Hörohuro tutuvo va'oromo ae muo'amarue höjo.

¹⁶ Dinö'e va'ë'iroho bövie bise'e ijumobe ae huë vavaene bojëmime va'arue höjo.

¹⁷ Huë mae bae'iröhe öroho bogo gavë'e höjo.

¹⁸ Simanohuro God bogo uehorovë'e ma-jijiharue höjo.

God-are surire jögoroho ëhi uvë'eje.

¹⁹ Ëmu sisë vaejarue jöho iae no gavarueje. God-hu ë jö bojamuijade hesi bëhoho ëhuro Moses-are jögoru hesi uhure raromarue ariböviohuro heromo jabumë'o sa'a ioro'ioro rajohu'o ae aho'obëhe jö mana uaröhoho bogojavuego jö'e tugorohoromo hesi nunire gövögövövé'e riravo'iröhego ae aho'obëhe maja hö'öjajire beva'ajire. ²⁰ Gövögövövé'e riravo'iröhe hesi bëhoho aehu mu vaeröhe jögoru heromo ijore ijore

va'è'ohohogo bogo ehuro God-are nuniroho mahoriravo'i a'i ma-uvarueje: Noro è jögorohogo bogo avohogejaruëro javuë'ërosisè javuajëjo.

Keriso mae uehorovaruohuro ehuro God-are nunire mae riravarue jöhoje.

²¹ Iae èhi sisè javue röhu jaruvorohogonoehu hesi nunire mae riravo'iröhe öroho God-ro röjahuijè'eje. Moses-are jögoru surire o jö God-aro baeromogomae majëhinövare aribövi jabesisurire è hesi öroho iae jajivè'eje. Röhu è öroho bogo jögoru heromomu vaeröhe örehujio'i a'i öroho aviëhije. ²² Aehu Iesu Keriso mae uehorovè'ohuro ehuro God-ro nosi sisèhoguehorovoromovuonugegohesi nunire mae riravarueje. Aeaho'obèhe mae aeahu Keriso mae uehorovè'ohogèhi ajamuijajeje. God-ro gövuajaje no aeaho'obèhe bogogöho göhøjavuo'i ma-gemuohogjavuego. ²³ No aeaho'obèhe sisè vaejè'ëro God-are ajie muohogvae'iröhohogobogoeni javuego mararomarueje. ²⁴ Röhu God-ro hesi uehorovoromogonohuè mae bojamuiromogiesu Keriso noniguomöjörösa'are nugö'öromogehuro sisè hesidarugore javuadohogobaeniahijè'ëro no hesi nunire mae riravarueje. ²⁵ God-ro Keriso nugö'öjadejehesiköho rueromogumegogonoro è muohogmae uehorovego God-ro nosi sisèhogodejonöbu'öjogohesidë vörönimadohogobarè'iröhogegogod-ro nosi sisèhogèhi ajamuijadehesibèhohogöröjahuijogogonogogaröhogegohumaemuvaejaje aejiego. Èhesibèhohogomami'ohogaaërosisè vae'egogod-ro ma-taemorovoromogunüremugèbe ruenövadeje. ²⁶ Avevejö'ohogonosi sisèhogobogomaa-nunüremugö'i a'i Keriso nosi sisèni nugö'öjahuadeje. Huanimadejegeröjahuijogogonogogaröhogegohumaemuvaejaje aejiego. Norogaröhogegohumu maemuvaejajohogogiesu mae uehorovarue aribövi nosi sisè mu'uvahuegohesinunire mae riravaruohog.

²⁷ Èhi jiè'ohogonodiehinimorohè'i uvo'ejo: Nosibirirohuro God-arenunire mae javuajëjo. Èhi jiè'e jöhogogojehesibèhohogorabèni nobogogèhiohoguvo'ejo. Na nosibirirohuro mu vaeröhe jögorohogobaejè'ëro èhuginobogonimorohè'iohogatarueje. Bogogèhiohoje. Nosibirirohogobogoa'i God-are birire mae uehorovo'iröhe jögorohogobaejè'ëro èhuginobogogèhiohogato'ejo. ²⁸ Èhesibèhohogorabèni. Noroguehorovoromogouvarueje: Jew rajogomu vaeröhe jögoru ijore ijore va'è'ohogobogogehuro God-arenunirohogomahogriravaruehö uvo'i a'i Keriso mae uehorovè'ohogogehuro God-arenunire mae riravaruehöjo. ²⁹ Jew rajogomu vaejè'ohogogehuro marogjavuo'ibejogonouvo'ibejogogod huma-Jew rajohemumuebe'amajehöjo. Röhu humagogjabumëremumuebejèvo'i a'isa'ae aho'ogomuebe'amajajeje. ³⁰ Iae God humagemuje. Huro Jew rajohu'ogosa'agioro'iorohu'ogomae riravoröhe öregemuohogöröjèhijajeje. Jew rajohu'ogosa'agioro'iorogajohu'ogogjabumë Keriso mae uehorovè'ohogogehuro ajëmijogomae riravarueje. ³¹ Keriso mae uehorovo'iröhe jöhogobaejè'ohogonana nobogogehuro God-are jögorumamiohogoharueje. Bogogahog'a'i èhogoma'eno titimarueje.

4

Abraham bogogaeu hesi sinogotariojaharohuro bogogehuro God-arenunire mae nami'i a'ihuhugogod mae uehorovadoghuro ehuro God-arenunire mae namijadegöhoje.

¹ Bêhe vaeromo jiade Jew rajo nosi hijoho Abraham jie. Röhu Abraham-hu gavade God-hu diehi ajamamu gavade jôho no uehorovo'ejo. ² Nani aëro uvo'ë'ö: Abraham-hu God-are nunire mae nami'ië'adevaroho huro mu mae vaeromo êhuro God-are nunire mae namijade hōjo. Êhuni dôro bamorovoromo nimorohë'i uvo'ibejajo: Naro nasi birivoromo êhuro God-are nunire mae namijaje hō uvo'ibejajo êho iae mae jio'ibejajo. Nani êhi uvo'ë'ö. Röhu God-hu gavajoho Abraham-hu dôro bamorovo'iröhoho bêhoho bogoje. ³ God-are surire jôho êhi uvë'eje: Abraham-ro God-are örire mae uehorovoromo uvade hōjo: Hesi God-ro ajemi'ajëjo. Huro mae uehorovamu gagorovo God-ro huni vavaenimoromo uvade hōjo: Na gavajoho hesi sisêho barë'ego iae hu a mae hōjo. ⁴ Röhu göehu gö hesi mu vaejahamu ë hesi mana bojamamu gavë'oho uvarueje: Êaho bogo ëma vavaenimoromo suvoroho bojami'i a'i mu vaejadohuni hesi manaho bojamade hōjo. ⁵ O ae göehu mu mae bogo vae'i ma-uvë'oho: Iae mae-ëjo. No a sisë javuë'ego God-ro nosi sisêho mu'uvahuego hesi nunire mae riravarue hōjo. Êhuni hesi huro na'o ajemi'iramu mae jevo'ajë uvë'oho God-ro uvajeje: Êahuro na mae uehorovevë'ëro êhu'ëro na gavajoho hesi sisêho barë'ego iae hu a mae hōjo. ⁶ David-ro jõe gemuoho jajivadeje. Aehu bogo hesi birivoromo mu mae vae'i ma-God mae uehorovego God-hu vavaenimoromo ajamego hesi nunire mae namiromo huë mae baejaje jôho David-ro God-are surire jajivoromo êhi uvë'eje:

⁷ O asë'e mabêhëjo.

Aehu God-are jô ahamu huhu uehorovoromo vuonugahuë'oho mu sisë vaejamu u'ovahuë'oho no huë mae baejarue hōjo.

⁸ Noehu sisë vaejaroho Badahu bogo ijonö jö majahuijë'oho êhuro no huë mae baejarue hōjo.

Êhi uvë'eje.

⁹ Röhu ë huë ma baejarue aribövioho rahumëje. Na ma-Jew rajo mu vaeromo sino tarivo'amarue ariböviohuremu God-are nuniroho maho riravoromo huë maho baejarueje. O na sa'a ioro'ioro rajohu'o êhi gemuoho huë mae baejarueje. Bogo Jew rajohuremuoho a'i Jew rajo mu bogo vaeromo sino bogo tarivo'amarue aribövioho jabu'o ë huë maho baejarueje. Êhesi bêhoho urimë'i naro ave God-are surire jôho adahoromo jajivë'e jeve. Jajivoromo uëvë'e jeve: Abraham-ro God-are örire mae uehorovoromo uvade hōjo: Hesi God-ro ajemi'ajëjo. Huro mae uehorovamu gagorovo God-ro huni vavaenimoromo uvade hōjo: Na gavajoho hesi sisêho barë'ego iae hu a mae hōjo. ¹⁰ Röhu rabu'e majare God-ro uvadeje: Abraham hu mae hōjo. Na hu sino tarijahare maja hesi urimo o ijonö evare uvadeje. Sino tarijahare maja hesi urimo evare God-ro uvadeje: Abraham hu mae hōjo. ¹¹ Abraham mae hō uvonugoromo ijonö God-ro sino tarivoröhe muoho Abraham bojamadeje ae aho'o êho garomo uvoröhego: Urimë'i sino bogo tarijahare majare Abraham-ro God mae uehorovoromo êhuro hesi nunire mae namijade hōjo. Êhu'ëro jië'ëro Abraham-hu ë'adëhi Jew rajo mu bogo vaeromo sino tarivo'amë'e ma-God mae uehorovoromo hesi nunire mae riravarue aribövioho ë aribövi jabesi bêhoho iae Abraham-je. ¹² Röhu Jew rajo mu vaeromo sino tarivare aribövie gö gö nosi bêhoho

iae Abraham gemuje. Ëhesi bëhoho Abraham ë'adëhi nosi sinohu'o tarivahuë'eje. Röhu ëho ma-jianovo'i a'i Abraham sino bogo tarijahë'e ma-hijade majare huhu God mae uehorovadëhi Jew raje ae rahu ëhi gemuoho God mae uehorovë'o'oho ëhuro Abraham hu nosi bëhohoje.

Noehu jögoru ejaruohuro bogo ëhuro God-are huë maho nosiroho rueti a'i noehu God mae uehorovoromo hesi nunire mae riravaruohuro ëhuro God-are huë mahuro nosirire rovajeje. Ëhesi jöhoje.

¹³ God-ro Abraham uavadeje: Ave jöho na mae uavajëjo. Naro ja'o jasi ujohu'o sa'ae aho'o bojëmi'iramu bae barë'arujëjo. Rabëni baeröhego God-ro uavadeje. Bogo Abraham-hu mu vaeröhe jögoru ejahadohunioho bogo ëhunioho God-ro mana uavadeje: Sa'ae aho'o bae barë'arujëjo. A'i Abraham-ro God mae uehorovoromo uvadeje: Hesi God-ro ajemi'ajë uvadohuni ëhuni God-ro uvadeje: Na gavajoho Abraham-are sisëho barë'lego hu mae hö uvadohuni ëhuni uavadeje: Sa'ae aho'o bae barë'arujëjo. ¹⁴ O God-ro uö'ibejo: Ave jöho na mae uëvajëjo. Jemëhu jemesi biririvoromo mu vae'irarije jö ejehë'ohuro ëhuro na sa'ae aho'o bojëmi'ejöjo. O bogo ejehë'oho bogo bojëmi'ejö uö'ibejo no mae uehorovoromo uvaruoho: Hesi God-ro ajamui'iramu mae javuo'ajë uvaruoho ë hesi bëhe bogojio'ibejo. O nosi biriroho bogo eni javuë'ëro huhu bojamui'i uövuadoho bogo bae'ibejo. Röhu bogo ëhiohoje. Mu vaeröhe jögoru ejaharuohunioho God-ro bogo ëhunioho ajamui'i a'i noehu hesi örire mae uehorovaruohuni ëhuni ajamuajeje. ¹⁵ Mu vaeröhe jö God-hu bojamuadoho no bogo ejahego mae javuo'i a'i ahego God-ro no göromo dë vörönimego i'ue bojamuajeje. O mu vaeröhe jögoroho bogojio'ibejo bogo aho'ibejo.

¹⁶ Ëhu'ëro jië'ëro God-hu no ajamui'i Abraham uavadoho ëho no bogo mu vaeröhe jöho ejahoromo bae'i a'i God mae uehorovoromo ëhuro baejarueje. Ëhu'ëro God-ro bogo nosi muoho garomo huhu Abraham uavadëhi ëhi mana ajamui'i a'i hesi ëma nïmoromo huhu Abraham uavadëhi iae hu ëhi ajamuego ëhuro Abraham-are ujoho no ae aho'obëhe iae baejarueje. Bogo Moses-are jögoru ejaharue aribövïe gemuohemuoho bae'i a'i ae rahu Abraham-hu ë'adëhi God mae uehorovë'o'oho iae bae'ejö ë hesi bëhoho God mae uehorovarue aribövïo'oho aho'obëhe nosi bëhoho Abraham jië'ëro. ¹⁷ Abraham nosi bëhi jio'iröhe jö God-hu Abraham uavadoho God-are surire jajivoromo ëhi uvë'eje: God naro ja ajami'iramu ëhuro sa'a gö gö raje aho'obëhe jabesi hijoho ja javo'ajëjo. Ëhu'ëro jië'ëro noehu God mae uehorovarue aribövïe aho'obëhe nosi bëhoho Abraham-je hu God-are nunire ëhi jië'ëro. God gemu Abraham-ro mae uehorovadeje. God hu vuovë'e aho ajamuijego i'ovavuae ahoje. God-hu uvego urimo bogojio'amë'e bövi bise'o ëma jio'amaje ahoje. God hu ëhi jië'e a jiajoho Abraham-ro hu mae uehorovadeje. ¹⁸ Mae uehorovamu God-ro uavadeje: Sa'ae gö gö aho'obëhe jabesi hijoho ja javo'ajëjo. Ëhi uavamu Abraham-ro uvadeje: Diehi'oromo bae'ejöjo. Öroho bogohöjo. Iae ëhi uvadeje röhu huro God mae uehorovoromo uvadeje: Iae hesi höjo. God-hu uevadëhi iae ëhi jio'a'ajë uvoromo hiromo muebejadeje. God ëhi mae uehorovoromo muebejë'ëro ëhu'ëro Abraham sa'ae gö gö aho'obëhe nosi bëhoho jië'eje. Nosi bëhi jioröhe jö God-hu Abraham uavadoho God-are surire ëhi uvë'eje: Abraham jasi ujoho aho'obëhe

jiji va'ëne jiobe va'a'ajëjo. Surire jö jiadëhi iae ëhije. ¹⁹ Röhu Abraham vadune aho'obëhe 100 rabu'e bae'irögoro ë'ë'ëro ëhu'ëro hesi sino haho'e u'uhoromo guomanovë'e jiadeje. O hesi vaboroho Sarah dë tjojë'e magonahe jiadeje. Baruohu'o vaborohu'o ëhi sisërëjëvë'e jiadeje. Röhu Abraham-ro uehorovoromo uvadeje: Iae ëhi höjo röhu God-ro iae uje bojemi'iramu ëhuro aho'obëhe jieho'ajëjo. Abraham-ro ëhi biririvoromo God mae uehorovobe rovadeje. ²⁰ God mae uehorovadoho hu bogo vuonugoromo uvadeje: Na God-hu uevadëhi ëhi jio'a'ajëjo o bogajo. Bogo ëhioho uvo'i a'i biririvo avohoromo God mae uehorovobe rovadeje. Mae uehorovobe rueromo God-are örire rajahiromo ²¹ uvadeje: Iae mae-ëjo. God-hu uevadëhi ëhi ajemi'iröhoho iae hu eni jiajëjo. ²² Ëhi mae uehorovoromo uvamu gagorovo God-ro Abraham-ni uehorovoromo uvadeje: Ëhu'ëro na gavajoho hesi sisëho barë'ego iae hu a mae höjo. ²³ Röhu ë jöho bogo Abraham-nioho gemu jajivo'i ²⁴ ae aho'obëhe nosi jöhu'o jajivë'eje. God-hu no ae rahu mae javuajë uvoromo baejavuade aribövi nosi jöhoje ë hesi bëhoho no Iesu nosi Bada i'ovade ae God hesi örire mae uehorovaruëro jï'ëro. ²⁵ Röhu God-ro Iesu a övore bojëmadeje baeromo anego nosi sisëhuni guomoröhego. Guomamu God-ro hu ajamijamu i'ovoromo ri'öjajede ëhuro noro God-are nunire mae riravo'iröhego.

5

God-are nunire mae riravaruëro jï'ëro hu'o huë mae baeromo nimoroharue jöhoje.

¹ Noro Keriso mae uehorovamu God-ro nosi sisëho mu'uvahuamu hesi nunire mae riravë'ëro javuë'ëro ëhu'ëro God'o no'o gemuoro mae raromarueje nosi Bada Iesu Kerisoro buore vaejavuë'ëro. ² Buore vaejavuoromo ajamuijë'ëro ëhuro no God-are huë maho birohoro biririvoromo hesi nunire mae riravarueje ë hesi bëhoho noro hesi örire mae uehorovë'ëro javuë'ëro. Hesi nunire mae riravoromo noro uvarueje: Noro God-are aji mare raro'mëjarë uvoromo ëhuni noro nimorohë'i muebejarueje. ³ Röhu göho no huë vavaeni bövi bise'o baejë'iroho ëhu'o nimoroharueje. Rabëni hesi bëhoho no uvarueje: Huë vavaeni baejë'ohuro ëhuro birire baeromo God mae uehorovobe va'arue höjo. ⁴ Biririvoromo God mae uehorovobe va'ë'ohuro ëhuro God-ro uvajeje: Jemë ruahö'öjë'e jëvajë uvajohuro ëhuro no dë ma-mabëhe jioromo muebejarueje ijönö huro ajamuego ma-mabëhe javuoröhego. ⁵ No mabëhe javuo'iröhego muebejaruoho ëho bogo sarerivoromo ë'arueje. Ëhesi bëhoho God-ro hesi Aru'ahoho no bojamuijë'ëro no dë vövöbajö'ere herovarueje God-ro no mabëhe uehorovavuo avohego.

⁶ God-hu no uehorovavuae öroho aviëhije. Urimoho nosi arijo'arije ajamirovë'oho bogo eni javuadeje. Bogo eni javuobe rovamu God-hu nimade majaho rovamu evare Kerisoro guomadeje hu bijönimarue aribövioho ajamui'iro. ⁷ O noro garöhe ae gö mae jï'e hu ëma vörö'ere hijamu gagorovo hu ajami'i vuovorovë'oho ëho juhuoni'e muego nani no hu bogo ajami'ëjo. O ga'iröhe ae gö huë bae avohaje a mabëhe jï'e hu ëma vörö'ere hijamu gavë'oho hesi nani'o. Nani no hu ajami'i biririvoromo vuovorovo'ëjo nani bogo. ⁸ A'i Kerisoro gavade

no sisë aribövie javuamu evare huro no ajamui'i guomorovadeje. No sisë aribövie javuamu evare guomë'ëro jië'ëro ëhu'ëro God-ro no røjahuij'ëje noro garomo uvoröhego: God-ro no uehorovavuo avohaje höjo. ⁹ No ae sisë javuamu evare Kerisoro noni guomë'ëro ëhu'ëro no God-are nunire mae riravarueje. Ëmuoho i'u'e mae jiadeje. Ëhuni no biririvo avohoromo uvo'ejo: Kerisoro mami'e ajamuij'ëgo majae ijonöho God-hu bojamui'iröhe i'uoho no bogo bae'ëjarëjo. ¹⁰ Hu'o no'o gororamirovarue aribövie javuamu evare hesi Harihoho noni guomamu ëhuro hesinö ramuadeje. Ëmuoho i'u'e mae jiadeje. Ëhuni biririvo avohoromo uvo'ejo: God-ro mami'e hesinö ramuë'ëro jië'ëro hesi Harihe biririvoromo hijajohuro ëhuro God-ro baejavuoromo maro bamavuo'iramu mae javuo'ajëjo. ¹¹ Iae u'emu mae javuo'ë'e röhu avevejö'ohu'o no God rajahiromo nimoroharueje nosi Bada Iesu Kerisore jöëni ë hesi bëhoho huro mami'e vöröho tugohahuoromo God-arinö ramuë'ëro.

Adam-hu mu sisë vaejamu vuovarue muehu rue'i Kerisohu mu mae vaejamu i'ovarue muehu rovade jöhoje.

¹² Ëhi jië'ëro urimoho ae gemuëro aevoromo mu sisëho vaejadeje. Ae gemuëro mu sisëho vaejamu ëhuro mu sisëho sa'are rovadeje. Sisëho rovamu ëhuro aevoromo aho vuovëvadeje. Vuovëv'ëro ëhuro no ae aho'obëhe vuovavuobe rovajeje ae aho'obëhe mu sisë vaej'ëro. ¹³ Urimë'i Moses-hu God-are jögoru bogo barovadevare evare mu sisëho iae sa'are jiove rovadeje. Röhu Moses-are jögoroho bogojiamu aribövioho ëho bogo heromo ahë'ëro ëhuni God-ro mu sisëho gemu gemu garomo bogo adaho'i ma-nunëro gëbe rovadeje. ¹⁴ Mu sisëho bogo adaho'i ma-nunëremu gëbe rovamu röhu Adam-hu mu sisë vaejadevare evare ae aho'obëhe aevoromo vuovobe rovadoho röhu evare Moses rovadeje. Ëaribövioho Adam-hu God-are jö heromo ahadëhioho bogo ëhioho heromo ahobe rovë'e jabu'o vuovëvobe rovadeje.

Röhu Adam hu God-aro jioromo ijonö sa'are rovade aho Keriso va'ëne ëhi jianove. ¹⁵ Iae ëhi jie röhu Adam'o ijonö sa'are rovade ahu'o ae niö'i jabesi muoho bogo gemuoho jio'irögöro gö gö jiadeje. Gö gö jië'ëro God-are suvuorohuro Adam-hu sisë ë'adoho iosiramij'ëje. Ëhesi bëhoho Adam hu ma-gemu jiadeje. Huro God-are jöho ahamu ëhuro ae aho'o vuovëvobe rovë'eje. Iae ëhi jie röhu Iesu Keriso hu'o ma-gemuje. Röhu God-ro no huë baejavuoromo ë aho uavamu nosi sisëho ajamuij'ëro ëhu'ëro ae aho'obëhe hesi huë maho bae avohobe maro raromobe rovë'e javue. ¹⁶ Ae gemuëro sisë vaej'ëro ëhu'ëro no'o sisë javue röhu God-are suvuorohuro ë muoho iosiramij'ëje. Ëhesi bëhoho huro mu sisë gemu vaej'ëro ëhu'ëro God-ro no uövuajeje: Jemë'o sisë'e aribövie jëvajejo. A'i noehu mu sisë aho'obëhe vaejaruoho God-ro hesi nimoromo huë baejavuoromo uövuajeje: Jemesi sisëho iae mu'uvëh'ë höjo. ¹⁷ Ae gemuëro mu sisë vaej'ëro ëhu'ëro a vuovavuaje muoho börömoraej'ëje ae gemuëro huro ëhi sisë ël'ëro. Ëhuni no biririvo avohoromo uvo'ejo: Ae gemu Iesu Kerisoro ajamuij'ëro ëhu'ëro ae rahu God-are suvuoro mabëhe baeromo aevoromo hesi nunire mae riravë'oho ëhi jië'e aribövioho noro bogo vuovo'i Kerisore darugoho baeromo masije riravo'ëjarëjo.

18 Ĕhu'ëro jië'ëro mu sisë gemu jië'ëro ëhuro ae aho'o God-are nunire sisë'e javue. A'i ae gemuëro mu maho vaejë'ëro ëhuro ae aho'obëhe nosi sisëho mu'uvahuë'ego no God-are nunire mae jioromo hu'o maro raromo'ejo. 19 Ĕhesi bëhoho ae gemuëro God-are jöho ahamu ae aho'obëhe sisërejavuadeje. A'i ae gemuëro hesi jöho ejahë'ëro ëhu'ëro ae aho'obëhe hesi nunire marëjavuo'ë'e.

20 Moses-are jögorehu ijönö rovade hesi bëhoho aëro ëho heromo biriri'övoromo jöho ahobe va'ego mu sisë börömo bëhe ma-va'orahoro jioröhego. Mu sisë böröme jio'amadeje röhu God-ro hesi nimoromo huë baejavuoromo bogo bise'o vadu'o ho ajamuiromu nosi sisëho iosirami'amoromo hesi mu börömoho röjahuijadeje. 21 Ĕhu'ëro urimoho mu sisëho börömoho jiadeje. Mu sisë hesi uhure javuë'ëro vuovavuonövadeje. Jaruvoho God-hu huë baejavuade muoho börömohoje. God-are huë ma hesi uhure javuë'ëro hesi nunire mae riravarueje. Mae riravoromo ma-ioro'ioere gemu maro raromo'ejo nosi Bada Iesu Kerisoro ajamuijë'ëro.

6

Noehu Keriso'o bimuvoromo hu'o vuovanovoromo uehoro mami vuonugo'i i'ovoromo uehoro i'e baejarue jöhoje.

1 God-hu hesi nimoromo huë baejavuoromo nosi sisëho ajamuijë'o ho no diehi uvo'ejo. Na no uvo'ejo: Ĕ'ego no ëhi ma-mu sisëmu vaebe va'ego nosi sisëho aho'o jiego God-ro no huë baejavuo avohoromo mu'u'amajo. 2 Bogo mae bogo ëhioho uvo'ejo. Mu sisë uhure javuadoho no vuovarüëhi ëhi jianovoromo iae barëjahue'eje. Ĕhi jië'o ho no diehi vuonorö'öromu mu sisë hesi uhuroho biririvoromo raromonövo'ejo. No bogo ëhioho ë'ejo. 3 Ave jöho jemë'o uehorovo'ibejarije. Ae rahu bapataeto vaejamu Iesu Keriso'o gemuore bimuvavuë'o ho ëhuro hu'o gemuore bimuvoromo vuovavuë'eje. 4 Ĕhuni no bapataeto vaejamu ëhuro Keriso'o bimuvoromo vuovoromo hu'o gemuore sa'a gagore raromareje ëhuro Vavuehu hesi aji'e darugohoro ajamamu Kerisohu guomadoho i'ovoromo ri'öjadëhi ëhi no'o mu i'ore raromo jijihonövoröhego.

5 No Keriso'o gemu mae bimuvoromo hu guomadëhi no'o ëhi vuovarohuni ëhuni iae no Keriso'o gemu mae bimuvoromo hu i'ovadëhi no'o ëhi i'ovoromo mu i'e bae'ejo. 6 Ave jöho iae no gavarueje. No Keriso'o gemu mae bimuvoromo korosire ano taemavuoromo hu'o vuovavuade hesi bëhoho sisëhu nosi uehorore dajore biririvobe rovadoho barëjahuego ëhuro mu sisë hesi darugore javuadoho ijönöho bogo vaenövoröhego. Ĕhuni no Keriso'o gemu mae vuovavuë'eje. 7 Keriso'o gemu mae bimuvoromo vuovavuë'iroho sisë uhure javuadoho iae barëjahue'eje. 8 No Keriso'o gemu mae bimuvoromo vuovavuë'ëro ëhuni no mae uehorovoromo uvarueje: Iae no i'ovoromo hu'o gemu mae raromonövo'ejarejo. 9 No ëhi uehorovarue hesi bëhoho no gavaruoho God-ro ajamamu Keriso guomoromo ri'öjë'ëro hiromo röhu maho bogo guomo'ë'e hu guomoröhe hesi vöröho ruahö'öjë'ëro. 10 Keriso urimo guomadeje. Ĕhesi bëhoho hu guomoromo ëhuro sisëho ioro'ioere gemu taemadeje. O jaruvoho iae hu hije ë hesi bëhoho hu God'o gemu mae hijajëro jië'ëro. 11 Ĕhuni jemëro

uvore: No'o vuovavuamu ëhuro ma-ioro'ioiremu mu sisëho taemë'e javuajëjo. Röhu no i'ovoromo Iesu Keriso'o gemuore javuë'ëro iae God'o gemu mae raromaruëjo.

¹² Èhuni mu sisë uehoro sisë jemesi vuovëvoröhe sinehu nimajoho ëho nadi ejahorego ëhuro sisëho jemë bogo ruahö'öjëvo'iro. ¹³ O jemesi öve höre simane rabe sisë öriroho nadi bojamirovoromo mu sisëho vaere. A'i uvore: No i'ovoromo mu i'e baejë'e aribövie javuajë uvoromo jemesi dë vövöbajo'e aho'o ma-God gemu bojamirovoromo jemesi öve höre simane rabe ëhu'o hesi öroro bojamirovoromo mu mae vaere. ¹⁴ Mu sisëho jemë bogo ruahö'öjëvo'ë'e. Èhesi bëhoho God-are jögoru aharuje ë hesi i'uocho bogo bae hesi jëve. God-ro hesi nimoromo huë baejëvoromo jemesi sisëho uehorovoromo vuonugëhajeje. Jemë ëhi maro raromarujeje.

Mu ma hesi darugoremu raromarue jöhoje.

¹⁵ Jögoru aharuje hesi i'uocho bogo bae'i God-are nimoro nosi sisë uehorovoromo vuonugahuë'oho na no ëhunioho mu sisëho vae'ejo. Bogo mae bogo ëhioho ë'ejo. ¹⁶ Jemë'o uehorovore. Jemë ae gö hesi jöhemu ejahoromo hesi muohemu vaejaho'i nëgamu jemesi arijo'arije bojamirovë'oho ëhuro jemë ë a hesi darugoremu raromo'aruje. Jemë mu sisëmu vae'i nëgamu bojamirovë'oho ëhuro jemë sisë hesi darugoremu raromoromo vuovoromo sisëro va'o hesi jëve. O God-are jö ejahoromo hesi muemu vaejaho'i nëgamu bojamirovë'oho ëhuro hesi darugoremu raromoromo hesi nunire mae jëvajeje. ¹⁷ Röhu na God mabëhe uave. Èhesi bëhoho urimoho jemë mu sisë hesi darugoremu raromonövarijeje röhu avevejö'oho jemë God-are jö diehi diehi röjëhijamu hejarijoho ë jöho jemesi dë vövöbajo'e aho'obëhe ejaharujeje. ¹⁸ Mu sisë hesi darugoremu raromarijoho God-ro jiovëhadeje. Èhu'ëro ae göehu gö hesi darugoremu hijajëhi ëhi jemëro mu ma hesi darugoremu raromarujeje. ¹⁹ Ae göehu gö hesi darugoremu hijajëhi jemëhu mu ma hesi darugoremu raromaruje jö naehu uëvaje hesi bëhoho nasi jöho sama'e huruohë'e jioröhego jemesi uehoroho u'uhëvego bogo avoho hejöëni. Urimoho jemëro jemesi öve höre simane rabe aho'o bojamirovvarijeje ëhuro va'inumi'e mu o mu sisë gö gö hesi darugoremu raromoromo ëhi jië'e muohemu vaenövo'irarijëro. O avevejö'oho ëhi jemesi öve höre simane rabe aho'o bojamirovoromo mu ma hesi darugoremu raromoromo God-are mu mahemu vaenövore.

²⁰ Urimë'i jemë mu sisë hesi darugoremu raromarijevaroho evaroho mu ma hesi darugoroho bogo raromoi ma-raromarijeje. ²¹ Mararomoromo mu sisë vaejarijoho uehorovoromo javojëge. Röhu evare majare ëhi jië'e mu sisë vaejarijoho ë hesi maho rabe baejarijeje. Bogojadeje. Èhi jië'e mu sisë vaejë'oho ëhuro ma-vuovoromo sisëro va'arujeje. ²² O avevejö'oho God-ro ajëmamu mu sisë hesi darugoremu raromarijoho vuonugo'i God-are darugoremu raromë'e jëve. Èhu'ëro jemë God-are aribövi mae jëvoromo ëhuro ma-ioro'ioiremu maro raromo'aruje. ²³ Noro mu sisë vaejego ë hesi manaho baeromo vuovoromo sisëro va'arujeje. O God-ro hesi huë baejavuaje suvuoroho bojamuego ëhuro no ma-ioro'ioire gemu maro raromarujeje Iesu Keriso nosi Badare ae gemuohuro javuë'ëro.

7

God-are jögoru ahoromo vavaeni'ere raromaroho vuonugo'i Keriso-are aribövie javuaje jöhoje.

¹ Aganomë sa'a a masijo jabesi mu vae'irarije jögoru hesi öroho jemë gavarujëro jëvë'ëro ëhuni ave jöho iae ga'a'aruje. Ja sa'are hijë'oho sa'a hesi jögoru uhure hibe va'ojuvo guomavo'iramu jögoru uhuroho bogojavo'ë'e. ² Bëhoho ëhi jianove. Baru hijë'oho vaborohuro hu gemu gabe va'ë'e jögorure ëhi uövuë'ego. A'i baru guomë'oho magonahoho ë jögorehu nijio'iraejadoho iae barëjë'eje. ³ Ëhi jië'ëro baru hijamu sionoho ioro bamë'oho aëro uvo'ë'ö: Ëmagonahoho önö'e majuvë'e magonahe höjo. A'i baru guomë'oho jögorehu nijio'iraejadoho barëjë'ego hesi nimoro ae gö baeromo hu'o gemuoro hijë'oho bogo önö'e ma-juvë'e magonahe jio'ë'e. ⁴ Baru mamioho guomamu magonahohuro baru i'e baeromo gemu mae hijajëhi jemë'o ëhi jëvanove. Jemë Keriso-are sinohu'o gemuore bimuvorovoromo vuovëvë'ëro ëhu'ëro jögoru aharuje hesi i'uoho ma-ioro'ioire gemu barëjëhë'eje ëhuro guomoromo ri'öjade ahu'o gemuoro jemëro raromoromo God-hu nimaje muoho vae avoho'irarijeko. ⁵ Röhu urimë'i nosirire jiaje sisëhemu uehorovarevare evare mu vaeröhe jögoroho no uehorovoromo dë iahuo'ego mu sisëmu vae'i nimonövareje. Ëhi nimoromo sisëho dajo haho'ëro vaeromo ëhuro vuovoromo sisëro va'o hesi javuadeje. ⁶ Avevejö'oho mu vaeröhe jögorehu no nijio'iraejavuadoho Keriso'o gemu mae vuovavuanovë'ëro ma-ioro'ioiremu barëjahuë'eje. Ëhuro ë jögoru aharue hesi i'uoho bogo bae hesi javue. Ëhu'ëro ijönöho no öri mamioho bogo va'oromo ma-surire jajivë'e jögoroho adahobe God-are muoho ma-sivoho gabe va'i a'i öri i'ore va'oromo God-are Aru'aho hesi darugohuro hesi muoho vaejarueje.

Mu vaeröhe jögoru adahoromo ëhuro mu sisë hesi bëhi gavarue jöhoje.

⁷ Ësurire jajivë'e jögoru hesi uhure javuadoho iae barëjë'eje. Ëhuni no diehi uvo'ejo. Na no ëma uvo'ejo: Ëjögoroho sisë höjo. Bogo mae bogo ëhioho uvo'ejo. Ëjögoroho bogojio'ibejo Paul na bogo ga'ibejo mu sisë hesi öroho diehi jië'e jiego. Ëhesi bëhoho jögore gemu jajivoromo ëhi uvë'eje: Nadi ae gö hesi böviëni bise'ënioho ganiganimonëjo. Bogo ëhioho jajivo'ibejo naro uvo'ibejo: Ganigani muoho nani mae höjo. ⁸ Röhu ganigani hesi jögoroho iae jajivë'eje. Jajivë'ëro naro garomo uvodeje: Ëganigani muoho God-ro bijönimaje hö uvamu nasi dë iehamu sisëhuro börömo mae rojomamu avare böviëni bise'ëni ganiganiego avohadeje. O surire jajivë'e jögoroho bogojio'ibejo uehoro sisëho bogo ëhioho rojomoi'ibejo. ⁹ Urimoho ë jögoroho bogo hejë'e ëma hibe rueromo uvodeje: Nani na mae jevajëjo. A'i ganigani jögoroho hejamu mu sisëhuro baejevamu naro biriri'övoromo jögoroho ahoromo ¹⁰ uvodeje: Ëhu'ëro na guomo örire jevajëjo. Röhu mami'e God-hu ganigani jögoru bamade hesi bëhoho ëhuro no mae raromo'iröhego. Röhu ë ganigani jögoroho jië'ëro ëhu'ëro sisëhuro baejevamu na guomo örire jevadeje. ¹¹ Guomo örire jevade hesi bëhoho surire jajivë'e jögoroho na hejë'ëro ëhu'ëro ë mu sisëhuro sareremiromo dë iehamu naro jögoroho ahamu ëhuro guomo örire jevadeje.

12 Röhu ë surire jajivë'e jögoroho aho'obëhe God-aro jioromo rovë'eje. Ëhesi jöe gö gö God-ro bamadeje noro mu mae vaejeko marëjavuoröhego. Ëhu'ëro ë jöho iae maeje. 13 Mae jië'oho na no ëma uvo'ejo: Jö mahuro ëhuro na ijumevamu guomo örire jevade höjo. Bogo ëhioho uvo'ejo. A'i uehoro sisëhuro ëhuro ë'adeje. Uehoro sisëhuro ë jö maho huotovoromo ijumevamu guomo örire jevadeje. Ëhesi bëhoho God-ro nimadeje no samaro garöhego sisë hesi bëhoho i'u'e mae jiego. Hu nimadeje jögoroho jioromo ëhuro mu sisëho börömoräeröhego.

Uehoro ma'o uehoro sisë'o umogirohaje ë hesi jöhoje.

14 Röhu no gavaruoho God-are jögoroho hesi Aru'ahohuro bojamuajaje jöeje. Röhu na bogo hesi Aru'aho ejahaje aho jevo'i sino hesi mu sisë eromo hesi darugoremu hijaje ae jeve. 15 Ëhuni na uvajeje: Naro diehi ë'ego ë'aje höjo. Mu mae negajoho bogo vae'i a'i mu sisë bijönegajoho ëma vaejajeje. 16 Röhu naehu mu sisë vaeromo God-are jögoru ahajoho bijönegego ëhuro na uvajeje: God-hu bojamuade jögoroho iae maho höjo. 17 Ëhi jië'ëro bogo naehu nimoromo sisëho vae'i a'i uehoro sisëro dëre rojomego ëhuro vaejajeje. 18 Na gavajoho uehoro maho nasiroho bogo mae bogoje. Ëhesi bëhoho nasi dëre uehoro mami jiobe rovadoho ëho sisëmuje. Na ëhi gavaje hesi bëhoho na mu mae vae'i negajoho bogo vae hesi jeve. 19 Mu mae vae'i negajoho ëho bogo vae'i a'i mu sisë bijönegajoho ëho iae na vaejajeje. 20 Na bijönegaje muoho ëma vaejë'ëro ëhuro bogo naehu nimoromo vae'irögoru uehoro sisëhuro nasi dëre rojomego ëhuro vaejajeje.

21 Ëhu'ëro na gavajeje aviëhi jië'e muoho jiego. Na mu mae vae'i negë'iroho mu maho bogo rue'i mu sisëhuremu nasirire rovajeje. 22 Nasi dë vövöbajo'ere God-are jögoroho negajeje. 23 Röhu na gavajoho uehoro göhuro nasi sino haho'e ruahö'öjevajeje. Ruahö'öjevoromo God-are jögoru simanehu nimajohu'o umogihorovajeje. Umogihorovoromo ëhuro sino haho'ere jiaje sisëhuro na ruaho'amoniagegajeje. 24 Asë'e vaevë'e jevaje. Sisëhu sino haho'e ruahö'öjevo'ego guomevo hesi jevajoho raro ajemi'iramu maho jevo'ë'e. 25 Röhu na God mabëhe uave. Huro ua'iramu Iesu Keriso nosi Badaro ajemi'iramu mae jevo'ë'e.

Ëhu'ëro jië'ëro na ëhi jeve. Naro nasi uehoroho bojamirovoromo God-are jögoroho ejahajeje. Röhu sisë nasirire jiobe rovadohuro mu sisë hesi jöhu'o ejahajeje.

8

God-are Aru'aho baeromo ëhuro mae raromarue jöhoje.

1 Röhu jaruvoho Iesu Keriso-are ae gemuoho javuë'oho mu sisë hesi i'uoho bogo bae hesi javue. 2 Urimoho ja mu sisëmu vaeromo guomo örire mu juvonövaneje. Jaruvoho ja Iesu Keriso-are ae gemuoho javë'ëro i'ovavujaje Aru'ahohuro ja ajamiromo ë sisëhu ruahö'öjadadoho bisihö'öjamu mae javë'eje. 3 God hu eni jië'ëro hesi Harihu Maho nugö'öjadeje araeromo sino haho'e baeromo no a sisë javuajëhi hu ëhi jioromo rueromo sisëni guomoröhego. Ëhi'amu ëhuro nosirire jiaje sisë hesi darugoho barëjahuadeje. Noehu mu vaeröhe jögorohuro bogo ëhuro sisë hesi darugoho barëjahuadeje. Sisë nosirire jië'ëro jögoru hesi biriroho bogojiadeje. 4 Röhu God-hu sisë hesi darugo ëhi tugohahuade

hesi bēhoho hu nimadeje noro God-are jōgoru hesi mu maho aho'obēhe vaerōhego sino hesi sisēhu nimajoho no bogo e'i God-are Aru'ahehu nimajēhi ēhi vaejaruēro javuē'ēro. ⁵ Sinehu nimaje sisē ejē'oho ē hesi muohuremu uehorovarueje. O God-are Aru'ahehu nimajēhi vaejē'oho Aru'ahehu uōvuajohuremu uehorovarueje. ⁶ Nosirire jiaje sisēhuremu uehorovē'oho ēhuro no vuovoromo sisēro va'arueje. A'i God-are Aru'ahehu uōvuajohuremu uehorovē'oho ēhuro ma-ioro'ioire gemu huē mae raromarueje. ⁷ Nosirire jiaje sisēhuremu uehorovego vuovavuaaje hesi bēhoho ēhi jiē'e uehoro sisē baejē'oho God-are jōgoroho bogo ejaharueje. Ejaho'irōhoho bogo eni javuaajeje. Ēhuro God'o muorovarue aribōvie javuaajeje. ⁸ Nosirire jiaje sisēhuremu uehorovē'oho God-hu nimaje muoho bogo biroho hesi javuaajeje.

⁹ Rōhu jemē bogo ēhioho ē'arujeje. Jemē sinehu nimaje sisēho bogo e'i a'i God-are Aru'ahehu nimajēhi ēhi vaejarujeje God-are Aru'ahoho jemesi dē vōvōbajo'ere mami'e abo gemu mae hijē'ego. Ae rahu Keriso-are Aru'aho dē vōvōbajo'ere bogojiē'oho hu bogo Keriso-are ahoje. Rōhu hesi Aru'ahoho jemesirire jiē'ego ēhuni huhu nimaje jōho iae ejaharueje. ¹⁰ Keriso jemesi dē vōvōbajo'ere jie. Ēhu'ēro jemē sisē vaejarujohuro jemesi sino haho'oho iae vuovēho hesije rōhu jemē God-are nunire mae riravarujohuro jemesi aru'ahoho biririvēhego raromarueje. ¹¹ Rōhu God-ro Iesu ajamamu guomoromo ri'ōjadeje. Ēhuni hesi Aru'ahoho jemesirire jiē'ēro God-hu Keriso ajamamu guomoromo i'ovadēhi jemesi vuovo sinohu'o ēhi ajēmi'iramu i'ovēvo'ē'e God-are Aru'ahohuro jemesi dēre abo hijē'ēro.

¹² Ēhi jiē'ēro noehu mu vae'irōhoho iae jiahue. Rōhu nosi sinehu nimaje mu sisēho ēho bogo nosi muehuje. ¹³ Ēhi jiē'e sisē vaejē'ohuro ēhuro jemē ioro'ioiremu vuovēvo'ē'e. A'i God-are Aru'aho hesi birire baeromo jemesi sino hesi mu sisē mu'uromo bogo gavanovē'oho ēhuro jemē ma-ioro'ioiremu raromo'aruje. ¹⁴ Ae rahu God-are Aru'aho ejahobe va'ē'oho ē aribōvioho God-are aboji harihu'e jio'ame. ¹⁵ God-are Aru'aho baejarijohuro jemē bogo tōvo rēmo'ego rōhu maho sisēroho raromoromo juhuonibijioho'irōgoro a'i God-are Aru'ahohuro jemē ajēmijē'ēro hesi aboji harihu'e jēve. Ēhuni no God-are ōrire uavarueje: As'e Apajo. ¹⁶ Noehu ēhi uavarue hesi bēhoho God-are Aru'ahohuro nosi aru'ahoho ajamuiromo uōvuajeje: Jemē iae God-are aboji harihu'o mae jēvājējo. ¹⁷ No hesi aboji harihu'ēro javuē'ēro no God nosi Vavu hesi maho bae hesi javue. Kerisohu baejajēhi no'o ēhi bae'ejo. No Keriso'o huē vavaene baejaruēro jiē'ēro ēhuro hu'o gemuore aji maho bae'ejo.

U'emu God-are aji ma baerōhe jōhoje.

¹⁸ Na uve: Huē vavaene jaruvo baejaruoho ma-bise'e jio'ego bogo uehorovo'i a'i God-hu rōjahuijego garōhe aji mabēhoho ēho bōrōmo mae hōjo. ¹⁹ Rōhu vaevē'oho sa'ae mie bōvie bise'e God-hu bamadoho bogo eni jiobe ruejuvo God-ro hesi aboji harihu'oho va'orahoro bamavuo'iramu ēho ma-marō jio'amo'ē'e. ²⁰ Ēhesi bēhoho God-ro uvadeje: Sa'ae bōvie bise'e sisērē'amo'ajējo. Bogo hesi ēma sisērē'amobe rueli God-ro hesi nimoromo sisērējōro uvadeje hujeji avohego marē'amorōhego. ²¹ God-hu bamade bōvioho

bise'oho jaruvoho ëhi ma-sagohoriemu sagohoribe va'ajeje. U'emu God-ro avoho'amo'iramu ëhi jioje va'ajoho iae barë'irögoro huro i'ovo'amo'iramu hesi aboji harihu'e ma-marö javuoröhëhi ëhi huhu bamade bövioho bise'oho maro jio'amo'ë'e. ²² Vaevë'oho iae no gavö God-hu bamade bövioho bise'oho sisërëbe rovë'e jio'ego ijonö mae jio'amo'lië'ero. ²³ Sa'ae bövie bise'e bogo ëhemuoho sisërë'i röhu huhu hesi Aru'aho aevo'i suvuoramumu baejare aribövioho no'o sisë'i huë vavaeni'e raromë'ero hara'uë'i mueberomo raromö ijonö God-ro hesi aboji harihu'oho no avohavuoromo nosi sino haho'e aho'obëhe i'ovavuego ma-maemu javuoröhego. ²⁴ Ëhi mae javuoröhoho ëho noro muebejoro God-ro ajamuiromo maro bamavuë'eje. Mue gö gö no avevejö'e nunehu ga'amaruoho ëho bogo ga'amo'i muebejarueje iae mami'e gavaruëro. ²⁵ A'i mae javuo'iröhoho nunoho bogo ga'i ma-raromoromo muebejaruëro jië'ero ëhuni ga'irögoro biririvoromo raromoromo muebebe va'arueje.

²⁶ Röhu no u'uhavuë'ego God-are Aru'ahohuro nosirire rueromo ajamuijajeje. Ëhesi bëhoho God-are örire diehi avoho ato'iröhoho no dadivavue. Dadivavuego God-are Aru'ahohuro hesi ajamuiromo nosi jöëni huë vavaene böörömo bëhe baeromo sisë maro hara'uoromo ëhuro God-are örire ëninamijajeje. Huhu hara'uoromo ëninamijaje jöho aho ë jöho bogo ato hesi javue. ²⁷ Röhu God-hu dë vövöbajo'ere bijioho gövuajohuro hesi Aru'aho hesi uehorohu'o iae gavajeje rabëni God-hu nimajëhi hesi Aru'ahohuro ëhi jië'e uehoroho baeromo hesi aribövi nosi jöëni ëninamijajeje.

²⁸ No gavaruoho ae rahu God rajahijë'iroho mu mae mu sisë huë mae huë sisë jabesi örire rovego röhu God-ro jabumë ajëmiromo huë mahu'o huë sisëhu'o aho'obëhe avohëhajeje ëhuro ijonö jabumë mae jëvo'iröhego hesi nimadëhi rinëgade ariböviëro jëvë'ero. ²⁹ Ëaribövioho urimë'i God-ro söjëgo'irögoro uehorovëvadeje. Uehorovëvoromo hesi simanëro mevoromo uvadeje: Hujëji ë aribövioho naro tarioromo baejëvo'ejöjo ëhuro nasi Harihu ma va'ëne jëvoröhego. Ëhi jië'oho jabumë ijoraje aho'obëhe jëvo'i nasi Harihoho murioho jio'a'ajëjo. Mevoromo ëhi uvadeje. ³⁰ Ëaribövie gemuoho mevoromo röhu hesinö rinëgadeje. Rinëgoromo röhu jabesi jö sisëho uehorovoromo vuonugëhamu hesi nunire mae riravareje. Hesi nunire mae riravamu huro baejëvoromo aji mare rëmadeje.

God-hu dë vövöbajo'ere no uehorovavuae muoho ëho a göehu o mu göehu bogo aho'iröhe jöhoje.

³¹ God-hu ëhi ajamuijadoho no diehi uehorovo'ejo. Iae no ëhi uvo'ejo: God nosi dönö jiajoho raro no bisihö'öjavuo'ajëjo. ³² God bogo uvadeje: Nasi Harihoho maego bogo bojëmi'ejö uvoromo nijio'irae'i a'i Harihoho nugö'öjadeje ae aho'obëhe nosi jöëni huë vavaene baeröhego. Hesi Harihoho ëhi bojamuijë'ero ëhuni noro biririvoromo uvarueje: Hesi suvuoro böörömo mami'e bojamuijë'ero ëhuni suvuoro ioro'iorohu'o iae bojamui barë'ajëjo. ³³ God-hu baejavuae aribövi nosi jö sisëho raro jövo'ë'e. Jövoröhe aho bogoje. Rabëni God-ro nosi sisëho avohahuë'ero uvajeje: Jemë mae jëvajëjo. ³⁴ O raro uö'ë'e: Sisë'e jëvaje sisëro va'ohëjo. Ëhi uö'iröhe aho bogoje. Rabëni hesi bëhoho Iesu Kerisoro

guomadeje. Guomoromo röhu ri'öromo ajiomë'ëro God-are övo manö hiromo nosi jöëni God-are örire jöe majahijajeje. ³⁵ Kerisoro no dë vövöbajo'e aho'o uehorovavuoromo ajamuijajeje. Uehorovavuoromo ajamuijaje öroho raro tugohahuo'ë'e. Aho bogo. Huë vavaeni bövi bise'o rovë'oho ae göehu ijumavuë'oho ie o niögu suhi'e bogojavuë'oho vörö'tere va'ë'oho aehu bijuëmavuuamu vuovë'oho bogo ëhuro tugohahuo'ë'e. ³⁶ Iae ëhi jië'e mu sisëho nosi örire rovajeje. Ejöho God-are surire ëhi uvë'eje:

God no jasi ariböviëro javuë'ëro ëhuni aëro vae majae muo'amavuo'ië'ego no vöröre ma-raromarue höjo.

Sheep rinovoromo bijuëmo'ië'aruëhi aëro nosi örire ëhi ë'arue höjo.

³⁷ Iae no ëhi javue. Röhu rabe rabe rovë'iroho Kerisoro no uehorovavuoromo ajamuijago ëhuro no ruahö'ö avohoromo ma-mae javuajajeje. ³⁸ Ehesi bëhoho na mae uehorovoromo uvajajeje: Huhu dë vövöbajo'e aho'o uehorovavuoromo ajamuijaje öroho mu gö gö rovë'oho bogo tugohahuo'ajëjo. Vuovavuë'oho o ave sa'are raromë'oho anerae maja aru'ahae vörö'e mue gö gö rovë'oho mu rabu rabu jaruvo o u'emu rovë'oho ³⁹ noehu dö mare ajiomë'oho o sa'a gago ëgobövire abuejë'oho bövie bise'e dinö'e dinö'e jiajoho rovë'oho God-hu uehorovavujaje öri Iesu Keriso nosi Badarire röjahuijajoho ëho bogo tugohahuo'ajëjo.

9

God-hu hesi nimoromo Israel rajo hesinö baejävade jöhoje.

¹ Na Keriso-are ae gemuohuro jevë'ëro jö mae majëhi'ië'e sareri'e jöho bogo. God-are Aru'ahohuro nasi dë vövöbajo'oho ajemiromo avoheho'ego herovoromo na jö mae majëhi'ië'e. ² Huë vavaene na bogo bise'o vadu'oho baeromo majae ëhi vavaenegajeje. ³ Nasi sa'a raje ö mueno'e gemuoho jëvanovo'ego jabesi jöëni vavaene baeje. Ehesi bëhoho jabumë Keriso bogo mae uehorovoruomajeje. Röhu jabesi aru'ahohuni na böröme uehorovevo'i nasi sinoho ma-bisemu uehorovajeje. E'huni na uve: God-ro sisë bojemiromo Keriso-are bëhiroho rori'o babu'öjevego nasi sa'a rajohuro aevoromo Keriso mae uehorovoruomo'ibejajo ëhuro iae mae jevo'ibejajo. Jabesi jöëni ëhi dë vövöbajo'e aho'o uehorovëvoromo vavaenimajeje. ⁴ Nasi sa'a rajoho Keriso bogo ma uehorovarueje röhu huë mabëhe God-are örire baerumë'eje. Jabumë Israel rajo God-hu baejävade aribövie jioruome. Huro jabumë hesi aboji harihu'e vaejävadeje. Hesi aji maho röjëhijadeje. Hesi jögoru maho bojëmiromo uëvadeje: Iae na jemë muebejëvo'ejöjo. Mu vaeröhe jögoroho bojëmadeje. Osa börömore rueromo hu rajahi'iröhe öroho röjëhijadeje. Ijonö mae ajëmi'iröhe jöho bojëmadeje. ⁵ Jabesi hijo miono'oho God-are a masije jëvadeje. Böröme namiromo ajamujaje aho Keriso jabesi sa'a raje gemuoho jiadeje. Keriso hu bogo ma-aehu jio'i hu God jië'ëro sa'ae bövie bise'e muebejajago ëhuni noro hesi örire rajahiemu rajahibe va'ejjo.

⁶ Iae Israel-are ujo ömo'ömohe noro ëhi jië'e mu maho baejë'e javue. Röhu hesi ujoho ma-ae gemuëro gemuëro Keriso mae uehorovo'i a ioro'ioroho bogo ma uehorovarueje. Bogo ma uehorovarueje röhu Israel-are ujo muebejavuoröhëro God-hu uvade jöho bogo barëjë'eje.

Ëhesi bēhoho Israel-are siono baeromo mu ma bövi bise'o baejarue ariböviohuremu God-ro muebejavuo'i uvadeje. Röhu ēhi jīē'e aribövioho bogo aho'oho jio'i ma-gemu gemu javue. God-hu Israel-are mu ma baejarue aribövi muebejavuo'i uvadēhi ēhi muebejavuaajeje. Ëhuni Israel-are ujo muebejavuoröhëro uvade jōho bogo barjē'eje. ⁷ Göho Abraham-are ujoho aho'obēheje röhu ujo ioro'ioroho hesi mu maho bövioho bise'oho bogo baeruomē'eje. Ëhesi jōho God-hu Abraham uavadoho God-are surire jajivoromo uvē'eje: Jasi harihe Isaac'o hesi ujohu'o ē ariböviohuremu jasi sionoho baeromo bövioho bise'oho baebe va'i jasi ujo ioro'ioroho bogajo. Ëhi uvē'eje. ⁸ Ejō hesi bēhoho bogo Abraham hesi arijo'ëro ëma nimoromo baejade harihohu'o ē harihu hesi ujohu'o God-are aboji harihu ömo'ömehu jio'i a'i God-hu Abraham bojami'i uavade ujo ömo'ömoho ëho jaburo Abraham-are sionoho baejarueje. ⁹ God-ro Abraham harihe bojami'i majahiromo uavadeje: Evare majare na vuonorö'ö rue'iramu Sarah harihe raho'a'ajëjo. Ëhi uvē'eje.

¹⁰ Abraham-are harihu göhuremu Abraham-are sionoho bae'iröhego ēhi uvadeje röhu bogo ehemu jio'i a'i ijönö Rebecca harihe niö'i huodi'e dëre jëvadeje. Harihu niö'i jabesi vavuoho gemu jiadeje. Hu nosi hijo miono'e Isaac jiadeje. ¹¹⁻¹² Röhu harihe niö'i bogo rēhëv'e dëre jëvamu mu maho o mu sisëho bogo vaejē'iro evare majare God-ro jabesi vëmoho Rebecca uavadeje: Naro ijorajohemu ajami'iramu böröme jio'iramu muriohuro bise'e jioromo ijorajo hesi muoho vaejahanövo'ajëjo. Mu ma o mu sisë bogo vaejare majare harihe gemu ajami'i uvade hesi bēhoho ehuro huhu nimadēhi ehemu uehorovoromo ae baejëvoröhëni hu bogo aehu mu ma vaejaruoho gëromo rinëgo'i hesi nimoro ëma rinëgajëro jīē'ëro. Iae ehuni mu bogo vaejare majare harihe gemu ajami'i uvadeje. ¹³ God-hu ijoraje Jacob ajami'i murie Esau bogo ajamijade jōho God-are surire jajivoromo ēhi uvē'eje: Na Jacob nego'i Esau bijönegade höjo. God-ro ēhi uvē'eje.

¹⁴ Ëhi jīē'oho no diehi uvo'ejo. Na no ëma uehorovoromo uvo'ejo: God-hu a sisëro jīē'ëro sisë'i uehorovoromo ehioho ë'ade höjo. Ëhi jīē'oho jö sisëgo bogo ehioho uvo'ejo. ¹⁵ Ëhesi bēhoho God-ro Moses uavadeje: Di aribövi sisë jëvajoho huë baejëvo'i negë'oho ē aribövioho huë baejëvo'ejöjo. O di ariböviohuni na vavaenimo'i negë'oho ē ariböviohuni vavaenimo'ejöjo. ¹⁶ Ëhu'ëro jīē'ëro God-hu hesinö rinaguaje hesi bēhoho bogo noehu nimoromo biririvoromo muoho vae'i a'i huro noni vavaenimoromo rinaguajeje. ¹⁷ God-hu sisë a börömo Pharaoh-are örire jö majahijade jōho God-are surire jajivoromo ēhi uvē'eje: God naehu ja böröme vaejavoromo döro bamavode hesi bēhoho naro jasi sisë hesi i'uoho bojamiromo ehuro nasi vöröho ae röjēhijego sa'ae göre göre raromarue aribövioho aho'obēhe nasi ihoho hebe va'oröhego. ¹⁸ Ëhu'ëro jīē'ëro God hesi nimē'oho a ioro'ioro jabumëni vavaenimoromo hesinö javuojöro gagovavuo'i a ioro'ioroho ma-rëmajeje jabesi nimoromo biriri'övoromo mu sisëhemu vaenövoröhego.

God-hu dë vörönimoromo i'u bojamuibe noni vavaenimobe va'aje jōhoje.

19 Ĕhu'ero jiē'ero nani jero ae gö sisē uehorovoromo nasi jōho ahoromo sarerivoromo ue'a'anue: God-ro hesi nimoromo ramuē'ero ĩhu'ero nore biriri'ōvoromo mu sisēho vaejarue hōjo. Noehu mu sisē vaejaruoho ĩho bogo nosi sisēhu jio'i God-hu nimade muoho hōjo. Hesi nimade muoho bogo aho varijēnoho javuego ĩhuni no mu sisēho vaejarue hōjo. Ĕhuni God-ro sarerivoromo ĩma uōvuaje hōjo: Jemēhu mu sisē vaejarujoho jemesi sisē hōjo. Ĕho bogo nosi sisēho jio'i God-ro hesi nimoromo ramuē'ero ĩhu'ero no mu sisēho vaejarue hōjo. 20 Jaehu ĩhi jiē'e sareri'e jō majehijē'oho naro ja ua'ejo: Ja ma-ae javajējo. Ja ma-a javē'oho rōhu ja rabēni biriri'ōvoromo God-are ōriroho ĩhi jiē'e jō sisēho jōvanuējo. No sa'ae hu rama avoharuēhi ĩhi javuo'i God hu rama avoho'amaje aho va'ēne jiē'ego ĩhuni no bogo ri'ōromo ua'ejarejo: Ja rabēni no ĩhioho avohavuane hōjo. Bogo ĩhioho ua'ejarejo. 21 Ja'oe uehorovone. Rama avoho'amarue aribōviehu sa'a mugōru baeromo jabesi nimoromo avohē'oho iae maeje. Nimē'oho sa'a mugōre gemu baeromo rōhu ramae niō'i avohēvo'ē'e rama gōho maego maja bōrōmohuni runo'e bamo'irōgoro gōho sisēgo majae ĩhi ĩnemonōvo'irōhēro.

22 Ĕhu jō hesi bēhoho God no avohavuaje aeje. No avohavuaje aēro jiē'ero ĩhu'ero jiē'ero hu hesi nimoromo ĩ'ē'oho iae maeje. Hu nimadeje huhu a i'u bojēmi'irōhe vōrōhu'o darugohu'o ae aho'obēhe rōjēhi'irōhēni. Ĕhuni huhu dē vōrōnimego sisērōrōhe aribōvi jabesi ōriroho i'uocho bogo burēroho bojēmi'i ma-biririvoromo gē taemobe rovadeje ijōnō i'uocho bojēmi'irōhēni. 23 Ma-gē taemobe rovade hesi bēhoho hu nimadeje hesi aji mabēhe nosi ōrire rōjahui avoho'iro rabēni hu noni vavaenimaje aribōvie javuē'ego. Noehu hesi aji baerōhego huhu huē baeromo avohavuade aribōvie javuē'ego. 24 Jew rajo ioro'ioroho no hesinō javuojōro rinaguade aribōvie uēve. Rōhu bogo Jew rajoho gemu rinaguo'i a'i sa'a gö gö raje a ioro'iorohu'o rinēgē'aje. 25 God-hu sa'a ioro'ioro rajo hesinō jēvojōro rinēgorōhe jōho urimēli Hosea-ro God-are surire jajivoromo uvē'eje:

God-ro uvajējo: Ĕaribōvioho bogo nasi aribōvie jēvajoho

ijōnō naro uē'ejōjo: Ĕho nasi aribōvie jioruomajējo.

Ĕaribōvioho bogo nasi huē baejēvaje agane jēvajoho

ijōnō naro uē'ejōjo: Naehu huē baejēvaje agane jioruomajējo.

26 Di sa'are aribōviohuro henōvare God-ro uē'ego: Jemē bogo nasi aribōviehu jēvajē'ego henōvaroho

ē aribōvioho naro uē'ejōjo: God darugo'o hijaje a nasi aboji harihu'e jēvajējo.

27 God-hu sa'a ioro'ioro rajo rinēgade hesi jōho ĩhi jio'i rōhu Israel rajo jabesi jō Isaiah-hu darugo'o uvade jōho God-are surire jajivoromo ĩhi uvē'eje: Nani Israel rajoho nie'u va'ēne ae jēvo'ajējo rōhu ae mavemino'e i'uocho bogo bae'i mae jioruomo'ajējo. 28 Ĕhesi bēhoho God-ro sa'ae aho'o jabesi sisēho ma-burēro mevoromo i'uocho ma-ioro'ioremu bojēmi'ajējo. 29 O Isaiah-ro ave jōhu'o jajivoromo uvadeje:

Jōgoru eni jiē'e ae Bada God-ro noni a uje gemu gemu bogo vuonugahuo'ibejajo

Sodom amo barējadēhi no'o ĩhi barējavuo'ibejajo.

Gomorraah amo sisērējadēhi no'o ĩhi sisērējavuo'ibejajo.

Isaiah-hu urimo uvadëhi avevejö'oho Israel rajoho no ëhi ae ma-gemu gemu God-are aribövi mae javue.

Israel rajehu Keriso bogo ma uehorovarue jöhoje.

³⁰ Ëhi jië'oho no diehi uvo'ejo. No ëhi uvo'ejo: Israel rajoho bogo a'i sa'a ioro'ioro rajoho bogo sivoho gabe rovere höjo God-are nunire mae riravoröhoho. Ëhi höjo röhu jabumëro Keriso-are örire mae uehorovoromo ëhuro God-are nunire mae riravo'iröhe öroho iae baejë'e höjo. ³¹ Sa'a ioro'ioro rajohuro baejare höjo a'i Israel rajohuro uvare höjo: No God-are jögoru ejahë'oho ëhuro hesi nunire mae riravo'ejarëromo God-are jöho ejaho'i sivoho gabe rovaroho mae riravo'iröhe öroho bogo baejare höjo. ³² Bogo baejare hesi bëhoho bogo uvareje: Kerisoro gemuëro ajamui'iramu mae javuo'ajë uvo'i a'i ömo gavareje ga'i avohorovë'ëro God-are nunire mae riravo hesi jëvego. Ëhi jië'e öroho nahoromo bogo biroho'i God-are munë Iesu bijönimoromo hesirire munëro biberovanovareje. ³³ Keriso munë va'ëne jiaje jöho uhu'e jajivoromo ëhi uvë'eje:

Ëhuro gahëjo. God naro munë va'ëne aho Zion bamajëjo.

Aëro hesirire ro biberovo'aruëjo.

Hesirire ro rireromo'aruëjo.

A'i ae rahu ë aho mae uehorovë'oho bogo javojimo ga'a'ajëjo.

10

¹ O asë'e aganomë nasi dë vövöbajo'oho aho'o nimo avohoromo God-are örire ëninamijajeje nasi Israel sa'a rajohuro God-are i'uoho bogo bae'i ma-marö va'iröhego. ² Ëhesi bëhoho naro jabetesi muoho garomo uëve: God-are muoho nimo avohoruomaje höjo. Röhu bogo ma garomo ë'oruomaje höjo. ³ God-hu nosi iho avohahuaje öroho bogo gavanovo'i sarerivoromo uvoruomë'eje: No mu mae vaejë'oho God-ro göromo nosi sisëho uehorovoromo vuonugo'iramu hesi nunire mae riravo'ejarëromo jabetesi biririvoromo God-are jögoroho ejaho'i ë'o gavë'eje. Ëhi'oromo God-hu nosi sisë avohahuego hesi nunire mae riravo'iröhe jöho bijönibijohë'eje. ⁴ Ëhesi bëhoho aëro sarerivoromo uvoruomajeje: No God-are jögoru ejahoromo mu mae vaejë'oho ëhuro hesi nunire ma-mae riravo'ejarëjo. Ëhi uvoruomajeje. Röhu ae rahu Keriso mae uehorovë'oho ijönöho bogo ëhioho uvo'i a'i uvarueje: Hesi Kerisoro ajamui'iramu God-are nunire riravo'ejarëjo.

Israel rajohu'o sa'a ioro'ioro rajohu'o Keriso mae uehorovego God-hu baejavuoromo maro bamavuaje jöhoje.

⁵ Jögoru ejahoromo God-are nunire mae riravo'iröhe ë hesi jöho Moses-ro jajivoromo uvë'eje: Ae rahu jögoru e barëjë'oho ëhuro maro raromoruomo'ajëjo. ⁶ Röhu God-are jögoru ejahoromo hesi nunire mae riravo'iröhe ë hesi darugoho bogo nosirehu jio'i a'i Keriso mae uehorovoromo God-are nunire mae riravo'iröhe öroho iae nosirire jie. Ëhesi jöho God-are surire jajivoromo ëhi uvë'eje: Nadi jemesi simanoho uehorovoromo uvorëjo: No diehi'oromo ö'idöroho iojiomo'ejarëjo. Ësurire jö hesi bëhoho uöromo ë'adeje: Nadi uvorëjo: No diehi'oromo iojiomo'ejarëjo ëhuro Keriso hu'irae baeromo vuonorö'ö ruvebijego huro no ajamui'iröhego. ⁷ O jö göho nadi uvorëjo: No diehi'oromo

vuov'e ariböviehu raromaruירוהו abue'ejarëjo. Èsurire jö hesi bëhoho uöromo ë'adeje: Nadi uvorëjo: No diehi'oromo vuov'e ariböviehu raromaruירוהו abue'ejarëjo ëhuro Keriso hu'irae barojomego ajamui'iröhego. ⁸ Keriso-are muoho bogo rori'ohoje. A'i God-are surire jöho ëhi uvë'eje:

God-are jöho iae jemesirire höjo.

Hesi jöho dë vövöbajo'ere jëvë'ëro jemesi jö'ehu ato'irarijoho höjo. God-are jö hesi bëhoho Keriso mae uehorovoröhego noehu majëhijarue jöho uöromo ë'adeje. ⁹ Jaehu dë vövöbajo'ere mae uehorovoromo uvë'o: God-ro Iesu ajamamu guomoromo ri'öjade hö uvoromo röhu mae uehorovanue jö jasi jö'ehu a huruoho majëhiromo uëvë'o: Iesu gemu Bada hö uëvë'o bogo sisëroho va'i maro hi'a'anue. ¹⁰ Dë vövöbajo'o o jö'o jabesi bëhoho dë vövöbajo'ere noro Iesu mae uehorovoromo ëhuro God-are nunire mae riravarueje. O jö'ëro no Iesuare jöho ae huruoho majëhiromo ëhuro bogo sisëroho va'i maro va'o hesi javue. ¹¹ Èhi jië'e jöho God-are surire jajivoromo uvë'eje: Ae rahu ë aho mae uehorovë'o bogo javojimo ga'a'ajëjo. ¹² Èsurire jöho sa'ae aho'obëhe aribövi nosi jöhoje. Jew rajo ariböviohu'o sa'a ioro'iorohu'o bogo göho göho javuo'i ma-gemuoho javue. Badaro gemuëro böröme namiromo ae aho'obëhe muebejavuoromo göröhe di ahuro huro ajamijöro ua gavamu gövüë'o no ae aho'obëhe mabëhe ajamuijajeje. ¹³ God-are surire jöho ëhi gemuoho uvë'eje: Ae rahu Badaro ajamijöro ua gavë'o ajëmi'iramu bogo sisëroho raromo'i maro raromo'aruëjo.

¹⁴ Èhi jie röhu aehu Bada Iesu bogo ma uehorovë'o ajamijöro diehi ua ga'ë'ö. Ua ga'iröhe öroho bogoje. O hesi jö bogo hejë'o diehi mae uehorovë'ö. Mae uehorov'iröhe öroho bogoje. O aehu hesi jö bogo majëhijë'o diehi he'ë'ö. He'iröhe öroho bogoje. ¹⁵ O God-hu a bogo rëmö'öjamu rovë'o hesi jöho diehi majëhi'ë'ö. Majëhi'iröhe öroho bogoje. God-are surire jöho ëhi uvë'eje: Jö ma barovarue aribövioho mabëhe rovego gëvarue höjo. ¹⁶ Mabëhe rovego gëvarue hö jajivadeje röhu Jew raje ae aho'o bogo a'i ma-gemuëro gemuëro Iesuare jö maho ejahë'ejö. Urimë'i Isaiah-ro jöe gemuoho jajivoromo uvë'eje: Bada rahuro nosi jöho mae uehorovë'e höjo. Ae vemino'ëro ejahüë'e höjo. ¹⁷ Èhu'ëro jië'ëro Keriso-are jöho majahuijego ëhuro no hejarueje. Heromo ëhuro no mae uehorovarueje.

¹⁸ Èhi jie röhu naro uëve: Na Israel rajoho hejë'e höjo o bogajo. Iae jabumë hejareje. God-are jö hejaroho iae hesi surire jajivoromo ëhi uvë'eje:

Jabesi huëho sa'a viture viture he barëjë'e höjo.

Jabesi jöho maja rojomajire maja beva'ajire rërirae barëjë'e höjo.

¹⁹ Röhu ave johu'o uë gë'ejo. Na Israel rajoho God-are jö bëhoho gavare höjo o bogajo. Iae jabumë bëhoho gavareje röhu bogo ejareje. Urimo Moses-ro God-are surire jajivoromo uvë'eje:

Jabesi sivu sivue raromarue aribövioho God naro ajëmi'iramu

Jew rajoho jemëro gëromo dë vi'ehëgo'iramu uvo'a'arujëjo:

God-ro rabëni jabumë ajëmi'i no bogo ajamuijaje höjo.

O God na bogo avoho gëvarue aribövioho naro ajëmi'iramu

Jew raje jemëro jabumë gëromo dë vörönimo'arujëjo.

Ëhesi bēhoho Israel rajohuro God-are jōho iae hejareje rōhu bogo ejahareje. ²⁰ Ëhi jiē'e jōe gemuoho Isaiāh-ro ma-sama'e huruoho jajivoromo uvē'eje:

Bogo birohevo'i nahevare aribōviohuro God na birohevare hōjo.

Nasi jōeni bogo uē gēvare aribōvioho naro jabesi ōrire rōjahirovamu gevare hōjo.

²¹ Sa'a ioro'ioro rajehu God biroho'irōhe jōho ēhi jajivo'i a'i Israel rajo jabesi jōho jajivoromo ēhi uvē'eje: Jaburo nasiro ruejōro na vae majae ōve nugō'ōbe rovē'e jevajējo rōhu jabumē jōe bogo e'i biriri'ōvoruomaje aribōvie jioruomajējo.

11

God-hu Israel raje ae aho'obēhe bogo vuonugēvo'i a vituohuni vavaenimoromo ajēmibe rovide jōhoje.

¹ Israel rajoho ēhi jiē'e hia'i biriri'ōvē'e aribōvie jioruomē'ego Paul naro uēve: Na ēhuni God hesi aribōvioho ioro'ioemu vuonugēvē'e hōjo. Bogo mae bogo vuonugēvē'eje. Paul na'o Israel raje jeve. Na Abraham-are uje jeve. Na Abraham-are uje Benjamin hesi uje gemuoho jeve. ² Urimē'i God sa'a bōvi bise'o bogo bamadevare evare Israel aribōvioho hesi baejavuo'i uvē'ēro ēhu'ēro ijōnōho bogo ramuō'ōjē'eje. Elijah-hu ē'ade jōho jemē'o iae gavarujeje. Elijah-ro Israel rajo jabesi jō sisēho God majahiromo uavade hōjo: ³ Bada jani suvuro vēnire buejharue maratuoho Israel rajohuro dadovo'amē'e hōjo. Jō jasiro baeromo majēhijarue aribōvi ioro'ioroho muo'amē'e hōjo. Vaevē'e na gemu jevajējo. Rōhu na'o anego'i nimarujējo. ⁴ Elijah-ro God ēhi uavade hōjo. Ëhi uavamu God-ro Elijah mana diehi uavade hōjo. Huro ēhi uavade hōjo: Ja uvanuoho: Na gemu jevajē uvanuoho rōhu na Israel raje ae aho'obēhe 7,000 avoho nugo'amē'e jevajējo. Ëhu'ēro jabu'o na bogo vuonugevo'i sareri'e god gō Baal ague aho raromoromo rajahiruomē'e hōjo. God-ro ēhi uavade hōjo. ⁵ God-hu Israel rajo ioro'ioro avoho nugo'amadēhi avevejō'oho ēhi gemuohoje. God-ro hesi nimoromo huē baejavuoromo Israel rajo a vituoho avohoromo maro ramuē'eje. ⁶ Avoho ramuade hesi bēhoho noehu vaejarue muoho bogo uehorovē'e hesi ēma nimoromo huē baejavuoromo ajamuijadeje. O noro mu mae vaejego huro ēho garomo avoho ramuō'ibejo ēho bogo hesi ēma nimoromo huē baejavuaje muoho jio'ibejo.

⁷ Ëhu'ēro jiē'ēro Israel rajohuro God-are nunire mae riravorōhe ōri nahobe rovaroho bogo birohareje. Ae ma-gemu gemu God-ro hesinō baejavuē'ēro ē ōroho birohareje. Israel rajo a ioro'ioroho God-ro marēmamu jabesi biriri'ōvoromo mu sisēho vaebe jijihadeje. ⁸ God-are surire jōho ēhi gemuoho jajivoromo uvē'eje: God-ro jabesi ōroho tugohēhamu momorō'ō uro'amē'ēro God-are muoho jabesi nunoho bogo garomo hesi jōho jabesi hia'oho bogo hebe rovaroho jaruvohu'o ēhi gemuoho hōjo. ⁹ Rōhu Israel rajo jabesi jōho David hu'o God-are surire jajivoromo uvē'eje: God jero ēhi'onego jabumēro uvo'irarējo: No mae javuajēromo sōrōe ijanovego evare guaevēro jiomēvanovoromo buorēro taemēvanovoromo guaro rireromēvanovoromo ēhi'oromo ēhuro jabesi i'uoho mana baeruomorōhe. ¹⁰ God jero jabesi nunoho tugohēhōnego ramoramovēhego bōvioho bise'oho bogo garuomō'irajo. I'u bōrōme

bojëminego baeromo ma-ioro'iore gemu deje gurorov'e jijihoi'irajo. David-ro ëhi jajivë'eje.

God-hu sa'a ioro'ioro rajo baejavuoromo mare bamavuafe jöhoje.

¹¹ Ëhuni na uëve: Israel raje rireromëvadoho na ëhuro ioro'ioremu sisërëjêvo hesi höjo. Bogo mae bogo. A'i Israel raje Keriso bijönimë'ego ëhuro sa'a ioro'ioro raje sisë'i jëvajoho God-ro baejëvoromo maro bamëvë'eje. Baejëvoromo maro bamëvade hesi bëhoho ëhuro Israel rajohuro dë vi'ehëgego uvoruomoröhego: God-ro diehi'oromo sa'a ioro'ioro rajoho ajëmi'i no bogo ajamuijaje höjo. ¹² Israel rajohuro Keriso bijönimoromo God-hu ajëmaje muoho boremi'öjamu ëhuro sa'a ioro'ioro raje dinö'e dinö'e raromaruohuro Keriso-are mu maho baeruomë'eje. Ëhuni jemë'o uehorovore. Israel raje aribövie aho'obëhe vuonorö'öromomo God-are örire avo'avoho uehorovo'iramu ëhuro sa'a ioro'ioro rajohuro Keriso-are mu maho bae avohoruomomo'ë'e.

¹³ Röhu sa'a ioro'ioro rajomë naro jemesi örire ave jöho uë'ië'e. Kerisoro na remö'öjëlëro na hesi jö baeromo sa'a ioro'ioro rajo jemesi örire majëhibe juvaje ae jeve. Naro uvajeje: Ëmuoho böröme hö uvoromo nïmorohë'i Keriso-are jöho jemesi örire majëhijajeje. ¹⁴ Keriso-are jöho sa'a ioro'ioro rajo jemesi örire majëhiromu na nime nasi sa'a rajohuro dë vi'ehëgego uvoruomoröhego: Sa'a ioro'ioirehu mu ma baeruomajëhi rabëni no'o bogo ëhioho baejare höjo. Jabuhu ëhi uvë'oho nani naehu ajëmi'irodoho eni jevo'ë'e. Ëhuro jabumë Keriso uehorovoromo bogo sisëroho va'i maro va'oruomomo'ë'e. ¹⁵ God-ro Israel rajoho rori'o rëmö'öjëlëro ëhu'ëro sa'ae aho'o jemë'o buore vaeromo hu'o jemë'o gemu mae raromarujeje. Ëhu'ëro jië'ëro God-ro Israel rajoho sionëro baejëvo'iramu ëhuro aji'e mu göëro urimore muoho iosiramiromomo börömo bëhe rue'ë'e. Ëho vuovoromo i'ovanovë'e muoho jianovo'ë'e.

¹⁶ Röhu i mugöru vitu harihoho urimo atoromo God bojamijë'iroho i mugöru vitu göhu'o ëhu'o hesije. O ijo dirume God bojamijë'iroho ijo mahu'o ëhu'o hesije. Ëuhu jö hesi bëhoho Israel rajo hijo miono'e God-are ariböviëro jëvë'ëro ëhu'ëro ijore jiove rovaje hijo miono'ohu'o jabesi ujohu'o God-are aribövie javue. ¹⁷ Röhu uhu jö göho olive ije gö amore bivaroho gö je'ore ëma rijadohoje. Israel rajoho no amore bivare ijoho va'ëne javue. O sa'a ioro'ioro rajoho jemë je'ore ëma rijade ijoho va'ëne jëve. Röhu God-ro amore ijo hesi ade gö tarivo'amoromo rori'o bahi'i je'ore ijo hesi adoho ujuohoromo sionore bijioho nugo'amadeje. Ëhu'ëro jië'ëro je'ore ijo adohuro amore ijo hesi rihuoho baeromo sirihoromo ma-mabëhe gemuoro iojïomë'eje. Ëuhu jö hesi bëhoho God-ro sa'a ioro'ioro raje jemë Israel rajohu'o gemuore bimuvëvamu jemë'o God-are mu maho baejarijeje. ¹⁸ Tarivoromo rori'o bahijade ijo adoho garomomo nadi uvore: Noro jabumë iosirëmiromomo mamabëhe javuoromo jabesi sionoho baejë'e javuajëjo. Jemë ëhi uvë'oho avo'avoho uehorovoromo uvore: No ma-ijo ado va'ëne javuajëjo. No ijo bëhoho bogo rihuoho bojëmijarue höjo. A'i ijo bëhohuro no rihuoho bojamuijaje höjo. Ëhu'ëro no bogo masijoho javuajëjo.

¹⁹ Röhu nani jero ue'a'anue: Iae mae höjo röhu ë ijo adoho tarivë'e höjo ëhuro naro jabesi sionoho bae'irodego. Ëhu'ëro naro jabumë

iosirëmiromo ma-mabëhe jevajëjo. ²⁰ Iae mae uevanue röhu jabumëro Keriso-are jöho bogo ma uehorovamu ëhuni tarivë'eje. Röhu jero Keriso mae uehorovë'ëro ëhuro biririvoromo sirihirromo namijanue. Ëhuni nadi jasi sivuoho uehorovoromo uvone: Na böröme namijajëjo. Nadi ëhioho uvo'i a'i juhuonivone. ²¹ Israel rajo ijo ado ma va'ëne jëvadoho röhu God-ro jabesi sisëho bogo ma-nunëremuoho gë'i tarivoromo rori'o ruruhö'öjadeje. Ëhi jië'e jiaje ëhuni je'ore ijo adoho jero nadi uvone: Na sisë vaejë'oho hu ma-nunëro ge'a'ajë uvo'i a'i uvone: Na sisë vaejë'oho ë Israel aribövi i'u bojëmadëhi God-ro ëhi jië'e i'uoho na'o bojemi'ajëjo. ²² Ëhuni ave jöhuremu uehorovone. God hu huë baejavuaje aeje. Röhu hu i'ue bojamuijaje aeje. Sa'are rireromare aribövi jabesi örire i'ue bojëmijë'eje. O jasi örire huë baejavajeje. Huhu huë baejavaje muoho jaehu mae uehorovobe va'ë'oho iae huë baejavonövo'ë'e. O bogo mae uehorovë'oho huro ja'o tariö'öjavo'ë'e. ²³ O Israel rajoho Keriso bogo mae uehorovarueje. Röhu ë mu sisëho vuonugo'i Keriso mae uehorovë'oho God-ro ë aribövioho tariö'öjëvadoho ujuohoromo röhu maho sionore bimuvëvo'ë'e ëhi jië'e mu vae'iröhoho God hu eni jië'ëro. ²⁴ Ëhesi bëhoho sa'a gö rajo ae javajoho ja je'ore ijoho va'ëne javadeje. Ëhi javamu röhu God-ro ja je'ore ijo adoho va'ëne tariojavoromo amore ijo gemuore bimuvavadeje. Ëhi jië'e anoji'e muoho vaejë'ëro ëhu'ëro noro biririvo avohoromo uvarueje: God-hu Israel rajo ë amore ijo ado tarivoromo rori'o bahijadoho ujuoho sionore bimuvëvanovë'oho ëho ma-samae jio'a'ajëjo.

God-hu ae aho'obëhe nosi jöëni vavaenimoromo maro bamavuo'iröhe jöhoje.

²⁵ Aganomë ave jöho urimë'i God-hu gurihjadoho avevejë'oho röjahuijë'eje. Ëjöho na nege jemëro avoho ga'irarijego jemëro jemesi sivue uehorovoromo uvojöëni: Nosi simanoho mabëhëro javuë'ëro mae raromarue hjojo. Ëjöho na majëhi'ie'e. Israel rajo a ioro'iorohuro hia'e biriri'övaroho bogo ioro'iolemuoho ëhioho jëvobe va'i hujeji sa'a ioro'ioro raje ae aho'obëhe God-arinö rueruomoi'ramu evare barë'ë'e. ²⁶ Sa'a ioro'ioro rajohuro rueruomoi'ramu evare Israel rajoho ae aho'obëhe sisëre jëvajoho God-ro baejëvoromo maro bamëvo'ë'e. God-hu Israel rajo baejëvoromo mare bamëvo'iröhe jöho God-are surire ëhi gemuoho jajivoromo uvë'eje: Bada God-ro uvajëjo:

Ajëmi'iröhe ahuro nasi dahorure Zion jioromo ruvebi'ajëjo.

Ruvebiromo God bijönimarue mue aho'o Jacob-are ujo ömo'ömehu vaejaruoho rori'o babu'ö barë'ajëjo.

²⁷ Jabesi sisë u'ovëho'irode majare evare ëhi jië'e ioro'iolemu jioröhe jögoroho naro bojëmi'ejöjo.

Israel rajo jabesi jöho ëhi jajivë'eje.

²⁸ Israel rajehu Keriso-are jö ma bijönimaruohuro ëhuro jabu rori'o tario rëmajë aribövie jëve ë hesi bëhoho God-ro sa'a ioro'ioro rajoho ajëmi'i nimë'ëro. A'i God-hu Israel rajo nimoromo baejëvadohuro ëhuro jabumë God-hu huë baejëvaje aribövie jëve ë hesi bëhoho God-ro Israel rajo jabesi hijo miono'o jabesi ujoho ajëmi'i uvë'ëro jië'ëro.

²⁹ Ëhesi bëhoho God-hu di aribövi hesinö jioruomoröhego uëromo hesi mu ma suvuoro bojëmijë'oho huro bogo jö göho uehorovo'i

ëhi gemuoho uehorovëvobe va'ë'e. Ëhuni Israel rajoho bogo vuonugavuo'ë'e. ³⁰Urimoroho sa'a ioro'ioro rajoho jemëro God-are jöho bogo ejahnövarijeje. Bogo ejahamu God-ro gavë'ëro röhu jaruvoho gavade Israel rajohuro hesi jöho bogo ejahamu gëgorovo huotorovoromo sa'a ioro'ioro rajo jemesi jöëni vavaenimë'eje. ³¹God-ro sa'a ioro'ioro rajoho jemëni vavaenimoromo ajëmijë'ëro Jew rajehu avevejö'e God-are jö bogo ejaharuoho ijonö God-ro jabesi jöëni ëhu'o vavaenimo'iramumarö jëvo'ë'e. ³²God-ro ae aho'o jögoru aho'iröhe hesi darugo uhure ramuë'eje ëhuro ijonö ae aho'obëhe no huë baejavuo'iröhëro.

³³Asë'e God-are huë maho bogo bise'lo vadu'ohoje. Hesi simano maho nuni aji maho börömo maeje. Huhu uehoro mae baejaje hesi bëhoho rahuro biroho'ibejo. Huhu diehi ë'aje öroho rahuro ga'ibejo. ³⁴God-are surire jöho ëhi gemuoho jajivoromo uvë'eje:

Rahuro Badare uehoroho gavë'e höjo.

Hesi öriroho rahuro jögoroho mami'ajëjo.

³⁵Raro suvuoroho bojämijë'ëro ëhu'ëro

God-ro mana vuonorö'ö bojami'ajëjo.

³⁶Ëhesi bëhoho God-ro bövioho bise'loho hesiremu javuoröhego avohavuë'ëro huro döre hiromo aho'obëhe muebejavuajeje. Ëhuni hesi ihoho gemu rajahiemu rajahibe va'ejo. Iae mae.

12

Noehu God-are örire dë vövöbajo'e aho'o bojamiromo hesi mu vaenövoröhejöhoje.

¹Aganomë God-ro ëhi noni vavaenimë'ëro ëhuni na nege jemëro jemesi sino haho'e dë vövöbajo'e aho'o baeromo God-are örire gemu bojamirovo'irarijego. Ëhi bojamirovë'oho ëhuro Jew rajehu vuovë'e mi suvuoro God-ni bahijaruoho bogo ëhioho jio'i nune jië'e suvuore jio'ë'e. Ëhi jië'e suvuoroho God-aremu jio'iramumarö hu nimo avoho'ë'e. Jemesi arijo'arije God-are örire ëhi bojamirovë'oho ëhuro jemë simano mae jioromo God avoho rajahi'aruje. ²O ave sa'arohemu uehorovarue aribövieuhu nunire bahijaruje mu sisëho nadi ejëhoromo vaenövore. A'i nugego God-ro jemesi uehore aho'o huotovëho'iro ëhuro jemesi dë vövöbajo'ere God-are aji mahemu baebe va'irarije. Ëhi ë'ë'oho God-hu diehi diehi jië'e mu nimajoho jemë ga'a'aruje. Ga'a'aruje diehi jië'e muoho sisëho bogojio'i God-are nunire ma-maemu jio'iramumarö.

³Röhu God-ro hesi nimoromo huë baejevoromo apostle mu hesi darugoho bojämijë'ego ëhuni ave jöhu'o majëhi'ejo jemë ae aho'obëhe he'irarijego. Nadi jemesi sivuoho uehorovoromo uvore: No a masije javuajëjo. A'i jemë ae gemu gemu avoho uehorovoromo uvore: Naro hesi örire mae uehorovoromo mu vaejöro God-hu ajemadëhi naro hesi örire ëhi mae uehorovoromo ëhi jië'e muoho vaenövo'ejöjo. ⁴No sino haho'e gemu gemu javuo rove. Röhu öve höre nune ëhi jië'e inömo aho'obëhe javuë'ëro inöme göëro mue gö vaejarueje inöme göëro mue gö vaejarueje. ⁵Ëhesi bëhoho ekaresiaho no ae aho'obëhe javue. Ëhi javue röhu Keriso-are ae gemuoho javuë'ëro ëhuro aho'o sino haho'e gemuoho javue. Ëhi javuë'ëro no ae aho'obëhe gemuore bimumorovë'e javue. Nosi sino haho'o bimumorovarëhi ëhi gemuoho javue.

6 Röhu God-ro hesi nimoromo huë baejavuoromo ae gemu gemu suvuoro gö gö bojamuijamu baebe rovareje. Ëhuni suvuoro diehi baejare ãhi jïë'e muoho vaebe va'ejo. Jö God-aro baeromo a majëhi'iröhe suvuoro baejë'oho mae uehorovoromo uvo'ejo: God-are jöho ãhi röjahuijï'e hö uvaruëhi ãhi jïë'e jöhemu ae majëhibe va'ejo. 7 O ae gö a ajëmi'iröhe suvuoro baejë'oho iae no ae ajëmime va'ejo. O God-are öri röjëhijarue ae javuë'oho iae no ae röjëhibe va'ejo. 8 O jögoru bojëmijarue ae javuë'oho iae no jögore bojëmime va'ejo. O ae suvuorëmijarue ae javuë'oho iae no öve sasohavuo'iramu suvuorëmime va'ejo. O masijo riravoromo muebejëvarue ae javuë'oho ëhuremu uehorovoromo muebejëvobe va'ejo. O huë baejarue ae javuë'oho daje nimorohoromo huë baeromo ajëmime va'ejo.

9 Ae gö rajëhijë'iroho nadi ma-döhuremuoho rajëhi'i jemesi uhohu'o rajëhibe va'ore. Mu sisë rovajoho bijönimoromo nadi gavanovo'i mu maemu ma'enobe va'ore. 10 Göëro göho Christian ö mueno'e hö uvoromo huë baerovore. A ioro'ioro jabesi ihoho döro bamoromo rajëhi avohore. 11 Muoho nadi bijönimo'i biririvoromo vaebe va'ore. Jasi dë vövöbajo'e aho'o Badare öroro gemu bojamirovoromo hesi muoho vaejahobe va'ore. 12 Uvore: Ijonö God-ro mae ajamui'iramu aji maro raromo'ëjarëromo nimorohobe va'ore. Huë sisë rovë'iroho biririvoromo riravobe va'ore. Majae ãhi God-are öroro jöe atoromo ë muohuremu uehorovobe va'ore. 13 God-are aribövïe huë vavaene jëvë'oho suvuorëmiromo ajëminövore. Aehu vejö'e i'e rovë'oho ni-hudëgonövore.

14 Aehu sisë vaejëvo'i arijë'oho jemëro God uavego huro jabumë huë mae bojëmi'iro. Nadi uavego huro sisëho bojëmi'i a'i uavego mae bojëmi'iro. 15 Ae nimorohë'oho jemë'o gemuoro bimuvoromo nimorohore. Ae vavaenimë'oho jemë'o gemuoro bimuvoromo vavaenimore. 16 Jemë aho'obëhe ma-gemu uehorovoromo huë baerovore. Nadi uvore: No masijëro javuë'ëro mu ininoho bogo vae'ëjarë'i mu bööröme o bise'e ma-vaere. Nadi sivuoho uehorovoromo uvore: No simano ma'e ae javuajëjo. 17 Ae göehu sisë vaejëvë'oho nadi mana sisë vaejëvore. Ae aho'obëhe uvaruoho: Ëmuoho mae hö uvaruoho ãhi jïë'e muoho vae'i ë'o gare. 18 Huë mae hesi örohuremu uehorovoromo ë hesi muohuremu vaeromo ae aho'o jabu'o gemu mae raromo gare. 19 Aganomë aehu sisë vaejëvë'oho nadi mana i'uoho bojëmi'i ma-ga taemorego hesi God-ro vörö'iraeromo i'uoho bojëmi'iro. Ëjöho God-are surire uvë'eje: Badaro övuajëjo: I'u bojëmi'irodoho nasi mue höjo. Naro mana bojëmi'ëjjo. 20 Ëhi uvë'e jiaje nadi mana bojëmi'i a'i God-are surire jöho uvë'e jiajëhi ãhi vaere. Ëjöho ãhi uvë'eje: Ja'o muorovaje aho hömë'iroho ioho ma-bojaminëjo. O jovo i'i nimë'iroho jovoho ma-bojaminëjo. Ëhi ë'ë'oho ruehuro ëho garomo tiöromo gövögövövoromo avo'avoho uehorovo'ajëjo. 21 Mu sisë rovë'iroho nadi ejahorego jemë ruahö'öjëvego bejëvo'i a'i mu mae vaeromo ëhuro ë sisë rovajoho ruahö'öre.

13

Sa'are a masijehu bojamuaje mu noehu vaeröhe jöhoje.

¹ Ae gemu gemu aho'obēhe ave sa'are a masijo jabesi jōho ejēhore. Sa'ae dinō'e dinō'e raromoromo masijo vaejarue aribōvi jabesi darugoho bogo ēma ri'ō'i God-ro darugoho bojēmiromo uēvadeje: Ēmuoho vaerējo. ² Ēhuni ae rahu ave sa'are a masijo jabesi jō ah'ē'oho ēhuro God-hu bamade muohu'o mu'uvajeje. God-hu bamade mu mu'uvē'oho ēhuro i'uoho mana bae'ē'e. ³ Sa'are a masijo jabesi mu bēhoho mu ma vaejarue aribōviohuro bogo juhuonivo'i a'i mu sisē vaejarue aribōviohuro juhuonivo'irōhego. Jabesi mu bēhoho ēhije. Ēhuni ja sa'are a bōrōmo bogo juhuonami'iē'oho mu mahemu vaene. Mu ma vaejē'oho huro jasi ihoho mae ua'ē'e. ⁴ Sa'are a bōrōmoho God ajamiromo mu vaejaje aeje ēhuro ja mae javo'irōhego. A'i jaehu sisē vaejē'iroho juhuonamine. Rabēni i'u bojamui'irōhe vōrōho ave sa'are a bōrōmoho bogo ēma bae'i a'i God-are mue vaeromo mu sisē vaeruomaje aribōvioho God-are vōrō'e i'uoho mana bojēmijajeje. ⁵ Ēhuni jero ave sa'are a masijo jabesi jōho ejēhone. Ejahē'oho ēhuro i'uoho bogo bae'a'anue. Rōhu gōho jasi dē vōvōbajo'ere herovoromo uvo'a'anue: Na mu mae vaejē'e jevajējo.

⁶ Iae ēhuni ave muohu'o vaejarujeje. Jemēro jabumē tax-oho bojēmijarujeje rabēni ave sa'are a masijohuro God-are muoho vaeromo avoho muebejaruēro jiē'ēro ē hesi bēhohuni. ⁷ A masijo jabesi ōrire diehi jiē'e mu vae'irarijoho ēhi vaere. Tax ihe gō gō bojēmi'irarijoho ēhi bojēmire. Mae uehorovo'irarije aribōvioho mae uehorovore. Rajēhi'irarije aribōvioho rajēhire.

Gōehu gō hesi ōrire diehi jiē'e mu vaerōhe jōhoje.

⁸ Suvuore rabe a mana bojēmi'irarijoho ma-burēro mana bojēmirego ē muoho barē'iro. A'i ave muohuremu jiemu jiobe va'ē'e dē vōvōbajo'e a bojēmi'irarije muohoje. Gōehu gō dē vōvōbajo'e aho'o bojamijē'oho ēhuro God-hu bojamuade jōgoroho e barē'aruje. ⁹ Rabēni hesi bēhoho God-hu bojamuade jōgoroho ēhi uvē'eje: Nadi goho'amonējo. Nadi ae anonējo. Nadi vajiohe ē'onējo. Nadi ae gō hesi bōviēni bise'ēnioho ganiganimonējo. Ējōhu'o jōgoru ioro'iorohu'o ē hesi bēhoho ēhi uvē'eje: Jasi arijo'arije rajahirovanuēhi jasi ae gemuoho ēhi rajahinējo. ¹⁰ Jasi ae gemuoho dē vōvōbajo'ehu rajahijē'oho hesi ōriroho mu sisēho bogo vae'a'anue. Ēhuni gōehu gō rajahirovē'oho ēhuro God-are jōgoroho e barē'anue.

¹¹ Ēhi jiē'e muoho vaenōvore rabēni hesi bēhoho jaruvoho diehi jiē'e maja jiajoho jemē iae gavaruje. Momorō'ōjarujoho ri'ō'irarije majaho rovē'eje. Ēhesi bēhoho aevo'i Keriso mae uehorovare majare evare noehu God'o maro raromo'irōhe majaho ēgo'o jiaadeje. Jaruvoho ē majaho dunove. ¹² Vahioho barē'i Badahu ruerōhe majaho sisonuvo'irōgoro ē'e. Ēhuni ramoramo'e muoho vuonugo'i muorovo'irōhe inōmo inōmoho ujuoho'ejo ajī'e majare muorovo'irōhēro. ¹³ Aehu majare avoho raromo jijiharuēhi noro ēhi ē'ejo. O gemuore gagovoromo mahunō'e uruvoromo tiōromo jijihē'oho bogo. Jovo iromo simano sisērējē'oho bogo. Ōehu jijihanovoromo mu gō gō vaejē'oho bogo. Ire muorove bogo. Ae gō jabesi mu mahuni dē vōrōnimē'oho bogo. ¹⁴ A'i jemēro Bada Iesu Keriso-are darugoho baeromo ēhuro sinehu sisē nimajoho nadi eromo hesi muoho vaere.

14

Noehu bogo masije riravoromo uvo'iröhe: Christian ö mueno'oho sisë hö uvo'iröhe jöhoje.

¹ A ioro'iorohuro Keriso mae uehorovarueje. Röhu bogo avo'avoho uehorovo'i ma-juhuoni juhuonie mae uehorovarueje. Ëhi jië'e ariböviehu ekaresiae jemë'o bimuvo'i nimamu gëvë'iroho jemesi baejövore. Röhu nadi uvore: Jabumë rue'iramu noro jabesi jöho aho'ahovo'ejarëromo baejövore. ² Ae göëro biririvoromo Keriso avoho uehorovoromo uvo'ë'e: I mi bövi bise'o ijë'oho iae mae höjo. Ae göëro juhuoni juhuonie uehorovë'ëro mioho bogo i'i ma-iemu i'ë'e. ³ Röhu mi bövi bise'o ijanue aharo nadi sivoromo uvone: Mi bövi bise'o juahovaje aho ma-asisö'o va'ënëro jië'ëro juahovaje höjo. Nadi ëhioho uvone. O mi juahovanue aharo nadi uvone: Bövi bise'o ijaje aho vajamirovajëjo. Nadi ëhioho uvone. God-ro ë aho hesinö baejë'e höjo. ⁴ Ae gö hesi mu ajamaje aho jaehu garomo sisë hö ua'iranoho ëho bogo jasi muehuje. God hesi böviahuremu ga'ë'e hesi mu ajamijaje aho mae nami'iramu o be'iramu. Röhu hu iae nami'ë'e. Rabëni hesi bëhoho. Hesi Bövioho ajami'iröhoho eni jië'ëro ëhuro hu ajami'iramu biririvoromo mae nami'ë'e. ⁵ Ae göëro uvajeje: Ëmajaho ë majaho börömego ëhuni ë majaroho no God mae uehorovoromo raromo'ejarëjo. O maja ioro'ioroho ma-mu majaemu höjo. Ae göëro uvajeje: O bogo ëhioho jio'i a'i majae aho'obëhe God-are majae jië'ëro no God uehorovë'i muoho vae'ejarëjo. Ëhi jië'e uehoroho niö'i jëve. Röhu ae gemu gemu di uehoroho mae hö uvanuoho ë uehoroho gemu ma'enoromo hi juvone. ⁶ Ae rahu uvë'iroho: Ëmajaho böröme hö uvë'iroho huro Bada mae uehorovoromo ëhuni ë majaho uehorovajeje. O ae rahu mie rabe ijë'iroho huro uvajeje: God-ro suvuro mae bojemijë'e höromo ijajeje. Ëhu'ëro Bada mae uehorovoromo ijajeje. O ae rahu mie rabe juahovë'iroho Bada mae uehorovoromo ëhuni juahovajeje. Juahovoromo röhu i rabe ijajohuni God huë mae uavajeje. ⁷ Ëhesi bëhoho no ave sa'are raromë'iroho bogo nosi jöënioho gemu raromarueje. O vuovë'iroho bogo nosi jöënioho gemu uehorovoromo vuovo'i ⁸ a'i raromë'oho Badare jöëni uehorovoromo raromarueje. O vuovë'oho Badare jöëni uehorovoromo vuovarueje. Ëhu'ëro jië'ëro raromë'oho o vuovë'oho no Badare javue. ⁹ Kerisohu guomoromo röhu ri'öromo hijade hesi bëhoho vuovë'e ariböviohu'o ave sa'are raromarue ariböviohu'o nosi Bada jioromo muebejavuo'iröhëni. Ëhu'ëro no Keriso-aremu javue. ¹⁰ Ja rabëni jasi öehu mu ë'ajoho garomo sisë höromo aganueje. O ja rabëni öho juhuoni'e ae höromo sivanueje. Hujeji God-are majaho rue'iramu no aho'obëhe hesi nunire riravo'ejo hesi huro mevavuoröhego. ¹¹ Ëhesi jöho God-are surire jajivoromo uvë'eje: Badaro ëhi uövuajëjo:

Na daruge jioromo hijajoho iae mae jio'ego ave jöhu'o mae majëhi'ië'ajëjo.

Ae aho'obëhe God nasi jöëni gemu ague aho raromo'aruëjo.

Ae aho'obëhe jö'ëro huruohoromo uvo'a'aruëjo: Nörö God höjo.

12 Noehu God-are nunire gemu riravo'iröhe jöho ëhi jajivë'ëro ëhuni no ae aho'obëhe gemu gemu God-are nunire riravoromo mu vaebe rovare bëhoho huruoho majahi'ejo huro heröhego.

No mue gö gö nosi Christian ö mueno'o jabesi nunire bogo vaejego jabuhu no göromo nosi döre bogo ö'oromo mu sisë vaejego rireromëvo'iröhe jöhoje.

13 Ëhuni ë'ego no ijonöho bogo uvo'iro: Ëaho mi ijajoho o ëhi jië'e mu vaejajoho ëhuro mu sisëho vaejaje höjo. Ë'ego no bogo ëhioho uvo'i. A'i uvore: Noro mue gö gö agano jabesi nuniroho bogo vae'ejarejö jaburo no göromo nosi döre ö'oromo mu sisë vaejego rireromëvojöëni. 14 Na Bada Iesuare ae gemuohuro jevë'ëro ëhu'ëro na ma-mae garomo uvajeje: Ijarue ioho mioho bövioho bise'oho God bogo ahavuae höjo. Iae ëhi jie röhu aehu uvë'oho: God-ro ahavuade hö uvoromo é uvade aehu ijë'oho sisëje. 15 Ëhesi bëhoho mae höromo jaehu ie mie jasi Christian ae gö hesi nunire ijamu é ahuro garomo uvë'oho: O God-hu ahavuade ioho ijane höjo. Ëhuni na'o God-are jöho ahoromo i'ejö uvë'oho jaehu hesi nunire ijanoho ëho bogo maho ë'aneje. Jero hesi örire bogo uehorovë'e ma-ijaneje. Ëa hesi jöëni Kerisoro guomë'e jiaje ëhuni nadi ioho mioho ëma iromo ëhuro hu ijumone. 16 Jemëhu uvarujoho: Ie mie jove bövie bise'e ijë'oho mae hö uvarujoho gavë'i ue'ahore. Ae göëro gëromo jemesi mu ma hesi jöho sisë'i ato'ë'ö. 17 God-hu böröme namiromo muebejavuae hesi bëhoho bogo ie jove ue'aharuoho jio'i a'i mu mae vaeromo huë baerovoromo God-are Aru'ahehu dë vövöbajo'o sasohavuego raromaruohoje. 18 Ëhi jië'e mu ma vaeromo Kerisore mu vaejahë'oho God-ro ëhi jië'e aho nimo'iramu ae aho'obëhe uvoruomo'ë'e: Ëahuro mu maho ömaje höjo.

19 Ëhu'ëro jië'ëro no ave muohemu ë'o ga'ejo. Noro gemuoro avoho huë mae raromoromo ajamirovo'ejo ëhuro avoho biririvoromo riravo'iröhëni. 20 Jemëro nadi iemuoho miemuoho uehorovoromo God-hu ae gö jabesi dë vövöbajo'ere mu vaejajoho ijumëhore. Ie aho'obëhe God bogo tugohë'eje. Röhu jemëhu i ue'ahamu ae göehu gëromo jabu'o ue'ahoromo God-are jö ahë'oho ëhuro jemëhu ue'aharujoho sisë jio'ë'e. 21 A'i aveho mu mahoje. Jaehu mi ijamu wine jove ijamu o mu rabe vaejamu jasi Christian aganehu ja garomo döre ö'oromo rireromo'iröhe ëhi jië'e muoho gorone. 22 Jaehu uvanuoho: Na ie mie bövie bise'e ijë'oho iae mae hö uvanuoho jero ine. Röhu jasi sivue God-are nunoro ine. Jaehu uvë'oho: Ave muoho iae mae hö uvë'oho röhu é muoho vaeromo he'irane dë vövöbajo'oho mae jiamamu hejë'oho huë mae javajeje. 23 A'i jaehu i i'ie'iroho uehore niö'i baeromo röhu é i ëma ijë'oho God-are nunire mu sisë vaejanueje é hesi bëhoho ja bogo herovoromo uvaneje: Iae mae-ëjo. God-ro ëhi jië'e muoho nimajë uvë'e ëma ijë'ëro. Jaehu bogo uvë'oho: Iae God-ro é muoho nimajë uvë'e mu ëma vaejë'oho ëho mu sisë vaejanueje.

15

Nosi sino bogo uehorovo'i a ioro'ioro jabesi jöhu'o uehorovoromo mu vaeröhe jöhoje.

¹ No birivoromo Keriso avoho uehorovarue aribövioho noro aviëhi jië'e muoho vae'ejo. Noro garöhe ae göehu ma-juhuoni juhuonie uehorovamu gëvë'o'oho nosi sinehu nimajoho bogo uehorovë'e ma-u'emu sanuovoromo ajëminövo'ejo. ² Nosi Christian aganehu uvaruoho: Ëmuoho mae hö uvaruoho ëhi jië'e muoho no ae gemu gemu vaenövo'ejo ajëmego jaburo avoho birivoromo Keriso mae uehorovo'iröhego. ³ Keriso'o hesi sinehu nimajoho bogo uehorovadeje. A'i huhu ë'ade jöho God-are surire jajivoromo ëhi uvë'eje: Aehu jö sisë rabe rabe God ja bojamaroho na'o ë i'uoho baejode höjo. ⁴ Röhu urimë'i God-are surire jö diehi diehi jajivo'amare hesi bëhoho ëhije röjahuego noro ë surire jöho adahoromo dë sanuovahuego birivoromo ëhuro muebebe va'ego God-ro ajamuijego mae javuoröhego. ⁵ Röhu avevejö'o'oho God-ro ajamuijajeje ëhuro no dë sanuovahuego birivobe va'oröhego. Ëhuni na nege huro jemë ajëmijego Iesu Kerisohu uehorovadëhi ëhi gemuoho uehorovoromo jemë aho'obëhe simane gemuoho uehorovo'irarijego. ⁶ Simane gemuoho uehorovë'o'oho ëhuro jöe gemuoho atoromo gemuore bimuvoromo God rajahi'aruje hesi ihoho böröme jioröhego God hu nosi Bada Iesu Keriso-are Börömoho o hesi Vavuoho jië'ëro.

God-hu bogo Jew rajemuoho a'i sa'a ioro'ioro rajohu'o ajamujaje jöhoje.

⁷ Ëhuni Kerisohu jemë rajëhiromo baejëvadëhi jemë'o göëro gö rajihovoromo baerovorego ëhuro God-are ihoho böröme jio'iro. ⁸ Ëhesi bëhoho majëhi'ië'e. Kerisoro Jew rajoho no ajamui'i rovadeje. Jew rajo no ajamui'i rovade hesi bëhoho God-ro nosi Jew rajo hijo miono'o'oho uëvadeje: Ijonö naro ëhi'oromo jemesi ujoho ajëmi'ejöjo. God-ro ëhi uëvë'ëro Kerisoro ijonö rueromo nimadeje God-hu Jew rajo jabesi ujo ajamui'i uëvadëhi Jew rajoho ëhi ajamui'iro ëhuro noro garöhego God hu jö maemu majahuijaje aho jiego. ⁹ O sa'a ioro'ioro rajohuro uvoröhego: God-ro noni vavaenimoromo no'o mabëhe ajamuijë'e hö uvoromo hesi ihoho döro bamo'iröhego. Ëhesi jöho God-are surire ëhi uvë'eje:

Ëhuni naro sa'a ioro'ioro rajohu'o hiromo God jasi örire huë mae ua'ejöjo.

Na jöe ioromo jasi ioho rajahi'ejöjo.

¹⁰ O God-are surire jö göho uvë'eje: Sa'a ioro'ioro rajoho jemëro God-are ariböviohu'o gemu mae nimorohorëjo. ¹¹ O surire jö göho ëhi uvë'eje: Sa'a ioro'ioro rajoho jemëro ae aho'obëhe Bada mabëhe uarëjo.

Sa'ae dinö'e dinö'e raromarujoho ae aho'obëhe hesi öroro rajahirëjo.

¹² O Isaiah-ro Keriso-are mu diehi jioröhe öroho jajivoromo uvë'eje:

A mami ae Jesse bëhoho jiade höjo.

Röhu sahorijadoho hujeji bunuhuro sirinohiromo ri'ö sionore nami'a'ajëjo.

Ëhi'oromo böröme namiromo sa'a ioro'ioroho muebejëvo'ajëjo.

Muebejëvo'iramu jaburo uvo'a'aruëjo: Iae ë ahuro ijonöho no ajamuinövo'ajëjo.

Ëhi uvë'eje.

¹³ Iae God-ro nosi dë vövöbajo'e avohahuego ehuro no uvarueje: Ijonöho huro ajamui'iramu mae javuo'ajëjo. Ehuni na nege huro ehi ajëmijego jemëro hesi örire mae uehorovoromo ehuro huë vavaenoho juhuonoho bogo bae'irögoro ma-nimorohoromo mae raromo'irarijego. Ehi jië'oho God-are Aru'ahohuro hesi darugoho bojëmi'iramu jemëro ma-mabëhe biririvoromo muebebe va'a'aruje hesi aji maho bae'irarijëro. Ehi jië'oho iae na nege.

Paul-hu rabëni Rome ariböviëni biririvoromo jajivade hesi bëhohoje.

¹⁴ Aganomë iae na mae garomo uve: Jemesi muoho iae ma-maemu jiajëjo. Uehoro maho jemesi simanëro eni baejë'e jëvajëjo. Nuehu uehorovoromo röjahirovarujoho eni jëvajëjo. Iae na ehi uve ¹⁵ röhu naehu jö jajivodoho na ma-bisemu biririvanovoromo majëhijodeje jemëro garomo avoho uehorovo'irarijego. Naehu ehi jajivode hesi bëhoho God-ro huë baejevoromo muoho bojemadeje ¹⁶ naro Iesu Keriso-are muoho vaejahoromo sa'a ioro'ioro rajoho jemë ajëmi'irodego. Ehuni naro jemë ajëmiromo priest-ehu vaejarue ehi jië'e muoho vaeromo God-are jö maho majëhijajeje ehuro priest-ehu suvuoro ujuohoromo God-are örire bojamego nimorohajëhi naro sa'a ioro'ioro rajoho jemë ehi ujuohëvoromo God-are örire suvuore bojämijego hesi Aru'ahohuro jemesi dë vövöbajo'oho avohëvego maemu jëvego God-ro baejëvoromo nimoroho'iröhego.

¹⁷ Ehu'ëro jië'ëro na Iesu Keriso-are ae gemuohuro jevë'ëro God-are mu vaejahajohuro ehuro na mae jeve. ¹⁸⁻¹⁹ Ave jöhuremu biririvoromo jövo'ejo jö göho bogo. Kerisoro uevë'ëro naro hesi jöho majëhibe hesi muoho vaebe darugo'e mu masijoho röjëhibe hesi Aru'aho hesi darugoro biririvobe juvamu ehuro sa'a ioro'ioro rajohuro God-are jöho ejahë'eje. Ejëhemu jövo'ejo. Naro Keriso-are jö maho baeromo ruhëhi Jerusalem amoho numëhi Illyricum sa'aho röhu ë rirohu'o aho'o majëhibe juvë'e jeve. ²⁰ Na negadeje Keriso-are jö bogo hejë'e ariböviohuremu majëhibe juvo'irodëni ae göëro mami'e vaejë'e naro maho döre vaejööni. ²¹ Ejëho God-are surire jajivoromo ehi uvë'eje: God-are jö bogo majëhijamu hejare ariböviohuro iae garuomo'ajëjo. Bogo hejare ariböviohuro iae jö bëhoho baeruomo'ajëjo. Ehi jioröhego negamu bogo heruomë'e aribövioho majëhibe juvë'e jeve.

Paul-hu Rome amore va'i uehorovade jöhoje.

²² Ehi jië'e muoho vaebe juvoromo ehuro na ö'i ë'ohijodoho bogo eni jevonövohijo. ²³ Röhu avevejö'oho ave sa'anörire mu vae'irodoho iae barëje. Barëjë'ëro vadune aho'obëhe ö'i nimobe rovodohuni ²⁴ ehuni na uehorovoromo uve: Spain sa'are va'ië'iroho ö'oromo gë'ejöjo. Göromo jemë'o ma-bisemu hiromo huë mae jevo'iramu evare jemëro ajemi'iramu ehuro na Spain sa'are mae va'ejöjo. Na ehi nege. ²⁵ Röhu avevejö'oho na Jerusalem amore va'ië'e God-are aribövioho ajëmiromo suvuoro harihe i'imëmi'irodëro. ²⁶ Ehesi bëhoho God-are ariböviehu Macedonia sa'are Greece sa'are raromaruohuro jabesi nimoromo uvareje: E'ëgo no suvuore gagovoromo Jerusalem raromarue ariböviohuni nugö'öjëho'irarëjo God-are aribövi bövi bise'o rumo'oho jaburo ujuohoröhe höjo. ²⁷ Jabesi nimoromo ehi uvareje. Röhu Jerusalem ekaresia ajëmi'iröhoho ëho jabesi mueje. Rabëni.

Jew rajo ekaresiahuro sa'a ioro'ioro rajoho aru'aho muoho ajëmiromo Keriso-are jöho majëhijë'ëro ëhuni Jew rajo jabesi örire sino hesi muoho mana ajëmiromo ijo bajo nugö'öjëhë'o ho iae maeje. ²⁸ Naro jabesi suvuoroho bava'oromo ekaresia jabesi övore bamëhoromo barë'iramu evare ö'oromo jemë gëromo Spain sa'are va'ejo. ²⁹ Röhu na gavajoho ö'ë'iroho Kerisohu ajamuijaje darugoho bövi mae baeromo ö'oromo ajëmi'ejo.

³⁰ Röhu na aveho nimo avohoromo uë'ië'e. Jemëro nosi Bada Iesu Keriso uehorovoromo God-are Aru'ahehu dë vövöbajo'ere huë ma bojamuijajoho uehorovore. Ëho uehorovoromo na'o bimuvoromo biririvoromo nasi jöeni God-are öroro ua ganövore. ³¹ Ua garomo uare: God jero Paul ajaminego huro Judea sa'are va'oromo Keriso bogo uehorovarue a jabesi övoroho bogo va'irajo. Bogo va'i Paul-hu Jerusalem amore hiromo bogo eni jëvaje aribövi ajëmijë'iroho jero hu ajaminego God-are ariböviohuro uvo'irarëjo: Paul-ro mabëhe ajamuijade höjo. ³² Ëhi ua gavë'o ho God-ro hesi nimoromo ajëmi'iramu naro nimorohë'i jemesi örire ö'oromo jemë'o hi'ejo. Hi'iramu daje sasohevo'ë'e. ³³ Huë mae bojamuajaje aho God-ro ae aho'o jemë'o hi'ë'e. Iae mae.

16

Paul-hu a jejëmijade jöhoje.

¹ Röhu ave magonahoho Phoebe nosi Christian ma'ineje. Hu Cenchræe amore ekaresia ajëmijaje magonaheje. Hu magonaho maeje. ² Ëhuni God-are ariböviehu a rajëhiromo bæjëvaruëhi ëhi nosi Badare ihoro hu'o rajahiromo baere. O huë vavaene rabe jië'o ho ajamire rabëni hu ae aho'obëhe ajëmiromo na'o ajëmijë'e jiaje ëhuni.

³ O Prisca'o Aquila'o jejëmijode höre jabu'o na'o havoromo Iesu Keriso-are mu vaejarue a magonaho'ego. ⁴ Na bogo guomevoröhego jaburo niö'iro vörö'ere va'areje. Ëhuni naro jabesi örire huë mae jevajeje. Bogo naremuëremuoho a'i sa'a ioro'ioro rajo ekaresiae ae aho'obëhe jabu'o jabesi örire huë mae jioruomajeje. Ëhuni jejëmijode höre. ⁵ O jabesi osare gagovarue ekaresiahu'o jejëmijode höre.

O nasi aemo'aeme Epænetus jejamijode höre Asia sa'aroho huro aevö'ioho Keriso mae uehorovë'ego. ⁶ O Mary jejamijode höre mu böröme biririvoromo jemesirire vaejë'ego. ⁷ O Andronicus'o Junias'o jejëmijode höre nasi Jew rajo aganego. Jaburo niö'iro na'o savoji gagore arijareje. Apostle jabumëro ë ae niö'i jabesi ihoho mae hebe rovarueje. Urimo ë ae niö'ioho jaburo Keriso'o gemuoro bimuvamu naro jabesi ijore bimuvodeje.

⁸ O Ampliatus jejamijode höre. Hu'o na'o Badare ae gemuohuro javuë'ëro ëhu'ëro naro hesi örire dë vövöbajo'e aho'o uehorovajeje. ⁹ O Urbanus no'o gemuore havoromo Keriso-are muoho vaejajego jejamijode höre. O Stachys naro hu dë vövöbajo'e aho'o uehorovajëro jevë'ëro jejamijode höre. ¹⁰ O Apelles hu biririvoromo Keriso gemu uehorovego no ae aho'obëhe gavaruëro jië'ëro jejamijode höre. O Aristobulus-are aganoho jejamijode höre. ¹¹ O Herodion jejamijode höre nasi Jew rajo aganego. O Christian ö mueno'e Narcissus-are aganoho jejamijode höre.

¹² O Tryphaena'o Tryphosa'o jabesi örire jejëmjode höre ë magonaho niö'iohuro Badare muoho biririvoromo vaejaruego. O magonaho göho Persis jejamijode höre. Naro hesi örire dë vövöbajo'e aho'o uehorovo'i huro Badare muoho biririvoromo bövi mae vaejajego. ¹³ O Rufus jejamijode höre hu Badare a ma-mabëhego. O Rufus-are vëmoho jejamijode höre nasi vëmu maehu ë'anovajohuni. ¹⁴ Röhu Asyncritus Phlegon Hermes Patrobas o Hermas ëhi jejëmjode höre. Jabu'o gemu mae raromarue Christian aganoho ëhu'o jejëmjode höre. ¹⁵ O Philologus'o Julia'o niö'i o Nereus'o hesi ma'inohu'o niö'i o Olympas o God-are aribövie aho'o jabu'o raromaruoho ëhi jejëmjode höre.

¹⁶ God-are ariböviehu jejamirovaruëhi jemë'o ëhi rajahirovoromo jejamirovore. Röhu Keriso-are ekaresiae aho'obëhe jemesi örire jejëmiruomadeje.

Ijo tugoho'i jöhoje.

¹⁷ Aganomë ave jöhuremu uehorovore. Gavë'i raromoro Keriso-are jö majëhijamu hejarijoho nani aëro ö'oromo ahoromo jöe gö majëhi'ë'ö. Jöe gö majëhiromo jemesi mu maho ijumo'iramu jemëro jöe gemuoho bogo ato'i jöe gö gö ato'a'aruje. Ëhi jië'e aribövi ö'amu gëvë'oho jabesi jöho nadi ejëhore. ¹⁸ Ëhi jië'e aribövioho nosi Bada Keriso-are muoho bogo vaejaho'i jabesi sinehu nimaje muohemu vaejarueje. Jabesi sinehu nimaje muohemu vaeromo ae sanusanuëmiromo madöëremu jö mae majëhijego ae göëro mu sisë jöho bogo uehorovo'i maheromo uvarueje: Jö mae majahuijaruëromo ejëharueje. ¹⁹ A'i jemëro jabesi mu sisëho garomo nadi ejëhore. Naehu ëhi uëvaje hesi bëhoho jemëhu God-are jö mae ejaharuje jöho ae aho'obëhe hejë'ejö. Ëhuni na nimorohe. Röhu na nege jemëro mu sisëho bogo uehorovo'i mamu mahemu uehorovo'irarijego. ²⁰ Majae dunovo'iramu huë mae bojamuaje aho God-ro Satan-are muoho ruahö'ö'iramu jemesi hörëro vijuvo taemo'aruje.

Nosi Bada Iesuro jemë huë baeromo ajëminövo'ë'e.

²¹ Röhu na'o havoromo mu vaejaje ae Timothy-ro jemesi örire jejëmije. O Lucius o Jason o Sosipater ëho jaburo jemesi örire jejëmjö jabumë nasi Jew rajo aganëro jioruomë'ëro.

²² Tertius naro Badare ihore jejëmije. Paul-ro ue'ego naro hu ajamiromo ave surire jöho jajivahe.

²³ Röhu Gaius-ro jemë jejëmije. Ëa hesi osare Paul naro hijego huro muebejevajeje. O ekaresiae ae aho'o hesi osare gagovoromo God rajahi'i raromarueje. Röhu ave amo hesi ijo bajo muebejaje aho Erastus'o nosi Christian agane Quartus'o ëho jaburo niö'iro jemë jejëmjö. ²⁴ [Nosi Bada Iesu Kerisoro jemë ae aho'o huë baeromo ajëminövo'ë'e. Iae mae.] ²⁵ Röhu God hu mabëhego rajahi'ejo. Ëhesi bëhoho hu eni jië'ëro ajëmi'iramu jemë biririvoromo naehu majëhijaje jö maho Kerisohu ajamuaje jöho mae uehorovo'aruje. Keriso-are jöho God-ro urimo subivahuobe rovadoho ²⁶ jaruvoho ma-sama'e huruohoromo röjahuijë'eje. Ijonö jioröhe jö God-are surire jajivare hesi bëhoho noro garomo ë subivahuade jöho baejarueje. Baeromo ioro'ioreme hijaje aho God-ro uövuë'ëro noro ë jöho ae majëhibe jijiharuje sa'ae aho'obëhe raromarue ariböviohuro mae uehorovoromo ejahoruomoröhego.

²⁷ God hu gemu simano mae uehorovaje ahoje. Ĕhuni noro Iesu Keriso-are ihore hu rajahiemu rajahibe va'ejo. Iae mae.

1 CORINTHIANS

Paul-hu Corinth amo rajo ekaresia jejëmiromo jabesi jöëni God mae uavade jöhoje.

¹⁻² O asë'e God-are ekaresiae Corinth amore raromarujohumë God-ro jemë uëvë'ëro ëhu'ëro jemë God-are aribövi mae jëve jemë Keriso-are ae gemuohuro jëvë'ëro. Jemë God-are aribövie jëve röhu ae aho'obëhe sa'ae dinö'e dinö'e raromoromo nosi Bada Iesu Keriso-are iho uvaruoho jabu'o jemë'o God-are aribövie gemuoho jëve Keriso hu jabesi o nosi börömhuro jië'ëro. Röhu Paul na Iesu Keriso-are apostle jeve God-ro nimë'ëro. Nosi öe Sosthenes-mu niö'iro jemesi örire jejëmö. ³No nague God nosi Vavuohu'o Bada Iesu Keriso'o huë baeromo ajëmijego maro raromo'irarijego.

⁴Naro majae ëhi jemëni uehorovoromo nasi Böröme God-are örire mabëhe uavajeje rabëni huro jemë huë mae bojëmiromo Iesu Keriso uavamu huro jemë ajëmijë'ëgo. ⁵Jemë Keriso'o gemuoro jëvë'ëro ëhu'ëro mabëhe baejë'e jëve. Simano mae jö mae o ëhi jië'e suvuore gö gö aho'obëhe baejë'ëro ëhu'ëro jemë God-are jöho mabëhe uehorovoromo atarujeje. ⁶O Keriso-are jö noehu majëhijaruoho ëho jemesi dë vövöbajo'ere ma-mae uehorovoromo biririvoromo ma'ënarujeje. ⁷Ëhu'ëro jië'ëro mue gö gö vae'irarije suvuoroho gö bogo vuonugo'i aho'obëhe bae barëjë'e jëve. Ëhi jëvë'ëro muebejarujeje nosi Bada Iesu Keriso va'orahoro rovego ga'irarijëro. ⁸Jemëhu hu muebejarujoho huro jemë ajëmi'iramu biririvobe va'ojuvo va'o ijo tugoho'i majare nosi Bada Iesu Keriso göromo mevavuo'iramu evare jemë hesi nunire ma-maemu riravo'aruje ⁹ë hesi bëhoho God hu maëro jië'ëro. Huro uëvamu jemë aevoromo hesi Harihe Iesu Keriso nosi Bada'o bimuvë'ëro hu'o jemë'o gemuoro jëve. Ëhi ajëmade aho God-ro iae jemë ajëmi'iramu biririvobe va'a'aruje.

Ekaresia ariböviehu bogo jöe gemuoho uehorovo'i jöe gö gö uehorovoruomade jöhoje.

¹⁰Nasi ö mueno'ohumë ave jöho na Bada Iesu Keriso-are ihore majëhi'ië'e. Jemë ae aho'obëhe jöe gemuoho atore. Nadi sivu sivuoho jöe gö gö ato'i o uehore gö gö bae'i a'i uehore gemu baeromo raromore. ¹¹Nasi ö mueno'e naehu ëhi jajivaje hesi bëhoho here. Chloe-are agano ioro'iorohuro rueromo jemesi jö sisëho huruoho majëhiromo uevareje: Corinth rajo ariböviohuro jö aho'ahamirovarue höjo. Ëhi majëhijamu hejodeje. ¹²Ëhi ë'arujoho na uë'ië'e. Jemë ae göëro göëro jöe gö gö atarujeje. Ae göëro uvanueje: Paul börömege na hesi ijore ijore juvaje ae jevajëjo. Ae göëro uvanueje: Paul bogajo. A'i Apollos börömege na hesi ijore ijore juvaje ae jevajëjo. Ae göëro uvanueje: Apollos bogajo. A'i Peter börömege na hesi ijore ijore juvaje ae jevajëjo. Ae göëro uvanueje: Keriso börömege na hesi ijore ijore juvaje ae jevajëjo. Jemë bogo ëhioho ë'aruje höjo. Jemëro ëhi atarujeje. ¹³Nani sarerivoromo uvarujeje: Keriso-are sino haho'oho tariö'ö tariö'ö jië'e höjo. No ioro'ioroho Keriso-are javuo'i ioro'ioroho bogo Keriso-arohe javuajëjo. Ëhioho bogojië'e jiaje nadi ëhioho uvore. Keriso gemu börömohe gio'i

apostle aribövioho no bogo masijehu javue. Jemesi jöënioho bogo Paul naro guomodeje. Jemë bogo Paul nasi ihoroho bapataeto vaejêvareje. Èhu'ëro na bogo bôrömehu jeve.

¹⁴ Na bogo nasi övoho jemë bapataeto vaejêvonövodeje. Crispus'o Gaius'o èhemu bapataeto vaejêvo'i a ioro'ioroho jemë bogo bapataeto vaejêvodeje. Èhuni na God huë mae uave. ¹⁵ Na nasi övoho jemë bogo bapataeto vaejêv'ëro èhuni bogo uvo'a'aruje: Paul-ro bapataeto vaejavuamu noro hesi ihoro bapataeto vaejê'ëro èhu'ëro hesi aribövie javuajêjo. Jemë bogo èhioho uvo'a'aruje. Èhuni naehu bapataeto bogo vaejêvodoho na mae jeve. ¹⁶ O iae na uehorovajoho jemesi ae Stephanus-are aganoho jabu'o naro bapataeto vaejêvodeje. Röhu na uehorovoromo uve: Na na jemesi aribövi ioro'ioroho bapataeto vaejêvode höjo o bogajo. Nani bogajo. ¹⁷ Röhu na ae ma-vemino'e bapataeto vaejêvode hesi bëhoho èhije. Kerisoro remö'öromo na bogo uevadeje: Bapataeto vaejêvobe va'onêjo. A'i remö'öromo uevadeje: Nasi jö maho majêhibe va'onêjo. Kerisoro nimadeje ave sa'are ariböviehu simano ma'e jöe höromo ataruèhioho na bogo èhioho jövoromo hesi jöho aho majêhi'irodego ae aho'obêhe èhi jië'e jöho heromo èhuro Kerisohu korosire guomade jöho bogo avoho heromo dë vövöbajo'oho bogo marêjêvojöëni. Èhi jio'ibejo ë jöho daruge bogojio'ibejo.

God-are uehoro darugo röjahuijaje ae Keriso-are jöhoje.

¹⁸ Kerisohu korosire guomade jöho sisëre va'arue ariböviohuro heromo uvarueje: Èho simano rumo'e jöe höjo. O God-hu ajamuego mare va'arue aribövioho noro ë jöho heromo uvarueje: Keriso guomadohuro èhuro God-hu no ajamuijaje öroho jiovahuë'e höjo. Èhuro God-hu no ajamuaje darugoho iae no gavarue höjo. ¹⁹ God-are surire jajivoromo èhi uvê'eje:

Aëro ave sa'a hesi uehorohemu baeromo èho simano ma'e jöe hö uvoruomaje höjo.

Röhu God naro ë jöho mu'u'ejöjo.

Noro nuni aji'e jöho baejê'e javuajê uvoruomaje höjo.

Röhu naro èho rori'o babu'ö'ejöjo.

²⁰ Èhi jië'oho ave sa'arohemu uehorovarue aribövioho simano ma'e aribövi jabesi uehoroho diaje. Nuni aji'e aribövi jabesi uehoroho diaje. Jö'e sasohoromo darugo'e majêhijarue aribövi jabesi uehoroho diaje. God-ro röjahuijê'eje jabesi uehore aho'o bogojiajoho noro garöhego.

²¹ Èhesi bëhoho God-ro hesi simanoho maëro jië'ëro uvadeje: Aëro sa'arohemu uehorovoromo uvoruomaje höjo: Nosi simanoho mae höjo. Èhi uvarue höjo röhu bogo jabesi simanoho uehorovoromo God na ge'a'aruëjo. A'i jaburo uvoruomaje höjo: Kerisohu guomade jöho Paul-mèhu majahuijaruoho èho simano rumo'e jöe höjo. Èhi uvoruomaje höjo röhu ë jöho ae rahu mae uehorov'ë'oho God naro baejêvoromo maro bamëvo'ejöjo. God-ro èhi uvadeje. ²² Jew rajo ariböviohuro uvoruomajeje: Darugo'e muoho röjahuijego garomo uvo'irarêjo: God-are muoho rovê'e höjo. O Greece rajo ariböviohuro uvoruomajeje: Ave sa'a hesi simano ma'e jöhuremu he'li naguajêjo. ²³ Röhu no bogo èhi jië'e muoho jöho röjêhi'i a'i noro ave jöhuremu ae majêhiromo uëvarueje: Kerisoro noni korosire guomade höjo. Èhi majêhijarueje

röhu Jew rajo ariböviohuro ë jöho bijönimarueje. O sa'a ioro'ioro rajohuro uvarueje: Ëjöho simano rumo'e jöe höjo. ²⁴ Jaburo ëhi uvo'i a'i God-hu uövuë'ëro hesi aribövie javuajoho Jew rajohu'o sa'a ioro'iorohu'o noro uvarueje: Keriso guomadohuro ëhuro God-ro hesi darugohu'o hesi simano mahu'o röjahuij'e höjo. ²⁵ Ëhesi bëhoho aëro sa'arohemu uehorovoromo God-hu Keriso sa'are nugö'öjamu rueromo korosire guomade jöho heromo uvoruomajeje: Ëho God-ro simano rumo'e darugo rumo'e muoho vaejade höjo. Röhu a nosi simano maho ëho ma-jianovo'i God-hu vaejaje mu jabuhu uvarue simano rumo'e mue hö uvaruoho ëho börömo mahoje. A nosi darugoho ëho ma-jianovo'i God-hu vaejaje mu jabuhu uvarue darugo rumo'e mue hö uvaruoho ëho börömo mahoje. ²⁶ Nasi ö mueno'e God-hu jemë uëvamu aevoromo hesi aribövi jëvadevare jemë diehi jië'e aribövi jëvadoho ëhuremu uehorovore. Ave sa'a hesi simano ma'e aribövioho jemë ae ma-gemu gemu jëvadeje. O darugo ma'e aribövioho o iho döre jië'e aribövioho ëho ae ma-gemu gemu jëvadeje. Ëhi jië'e aribövioho ma-gemu gemu God-ro baejëvadeje. ²⁷ Röhu God-ro uvadeje: Aehu ma-sa'arohemu uehorovoromo uvarue simano rumo'e darugo rumo'e ae jioruomajë uvaruoho röhu ëhi jië'e aribövioho God naro baejëvo'ejöjo. Ëhi jië'e aribövioho baejëvo'iramu ëhuro sa'are simano ma'e ariböviohu'o sa'are darugo ma'e ariböviohu'o ëhi jië'e ariböviohuro uvoruomo'ajëjo: Noro uvare höjo: No simano ma'e darugo ma'e aribövie javuajëjo. Ëhi uvare höjo. Röhu God-ro no bogo baejavuo'i simano rumo'e darugo rumo'e aribövioho baejëvade höjo. Ëhu'ëro no gavaruoho nosi uehoroho bogo maehu jioromo nosi darugoho bogo eni jië'e höjo. Ëhi uvoruomo'ajëjo. ²⁸ Aehu ma-sa'arohemu uehorovoromo uvarue a inine iho rumo'e bëhi rumo'e jioruomajë uvarue aribövioho ëhi uëvarue aribövioho God naro baejëvo'ejöjo. Baejëvo'iramu ëhuro ae aho'obëhe ga'aruëjo sa'are mu hesi bëhoho bogojio'iramu. ²⁹ Ëhi jië'e aribövioho God-ro baejëvë'ëro jië'ëro ëhu'ëro aho God-are nuniroho bogo riravoromo nimorohë'i uvoruomo'ë'e: No a masije javuë'ego ëhuni God-ro no baejavuë'e höjo. Bogo ëhioho uvo'ë'ö. ³⁰ Röhu jemë bogo jemesi arijo'arijoho ajamirovo'i a'i God-ro jemë ajëmiromu baejëvë'ëro ëhu'ëro Iesu Keriso'o gemuoro jëve. God-ro ëhi bamë'ëro ëhu'ëro Kerisoro sisëhu tövavuadoho jiovahuoromo uehoro maho nosirire barueromo nosi ihoho God-are nunire avohahuoromo mu mahuremu röjahuijajeje. ³¹ Ëhu'ëro jië'ëro God-are surire jajivoromo uvë'eje: Nimoronimorohë'i ato'ië'iroho Badahu ë'ade jöho ëhuremu nimorohë'i atorëjo.

2

Kerisohu korosire guomade jöhoje.

¹ Nasi ö mueno'e naehu jemesi örيره ö'oromo God-are jö urimo guri-hijahuadoho huruoho majëhijodevaroho na bogo sine nimorohoromo ave sa'a hesi simano ma'e jöho bö'oromo bitare sasohoromo ave sa'a hesi vuëvo'e jöho majëhijodeje. ² Ëhesi bëhoho naro nasi nuëro uehorovoromo uvodeje: Naro jemë'o hiromu jö ioro'ioroho vunugom'i Iesu Kerisohu korosire guomade jöho börömejo ëhuni hesi jöhuremu uehorovoromo majëhinövo'ejöjo. ³ Naro ëhi uvoromo ö'oromo jemë'o

hiromo na daruge bogojevoromo juhuoninegoromo butubutuego avohadeje. ⁴ Naehu majëhijode jöho o naehu jö majëhijode ë hesi öroho na bogo sine nimorohoromo sanusanuëmiromo ave sa'a hesi simano ma'e jöho jövoromo ëhuro jemesi simanoho jaguvëho ga'i a'i God-are Aru'aho hesi darugoho jemë röjëhiromo Keriso-are jöho majëhijodeje ⁵ ëhuro jemëro bogo ave sa'a hesi simano ma'e jöho heromo Keriso mae uehorovo'i a'i God-are darugoho baeromo ëhuro Keriso mae uehorovo'irarijogo.

God-are Aru'ahehu hesi uehoro ma röjahuijaje jöhoje.

⁶ Iae ëhi jie röhu simano ma'e jöho iae no majëhijarueje God-are jö heromo mae biririvë'e ariböviohuro heruomoröhego. Simano ma'e jöho iae majëhijarueje röhu ë jöho göje o ave sa'a hesi jöho göje. Aehu ave sa'arohemu uehorovoromo ë jöho simano ma'e höromo ataruëhioho no bogo ëhioho majëhijarueje. O ave sa'a hesi muohemu muebejarue a masijehu jö mae höromo jö ataruëhioho nosi jöho bogo ëhiohoje ë a masijoho rireromo barë'ië'ego. ⁷ Ëhi jië'e aribövi jabesi simano ma'e jöho no bogo ato'i a'i God-are simano ma'e jöho urimo gurihijahuë'e jiadoho ëho huruoho majëhijarueje. Urimë'i sa'a bövi bise'o bogo bamadevare God-ro uvadeje noro ë jöho heromo aji maho baeröhego. ⁸ Noehu aji baeröhe jöho ave sa'a hesi muohemu muebejarue a masijoho jabu bogo mae bogo garuomadeje. Jabumë garuomo'ibejo Bada hesi iho döre jië'e aho uehorovoromo korosiroho bogo ano taemoruomo'ibejo. ⁹ Röhu jabumë bogo gavareje. Bogo gavare hesi jöho God-are surire jajivoromo ëhi uövuë'eje:

Nunehu bogo garomo hia'ehu bogo heromo

aehu nosi dë vövöbajo'ere bogo uehorovaroho ëhi jië'e ajoho God-ro avohahuade höjo

hu rajahijarue aribövioho noro baeröhego.

Ëhi uvë'eje. ¹⁰ Ëaji baeröhe jöho sa'a hesi muohemu muebejarue aribövioho bogo garuomadeje. Röhu God-ro uavamu hesi Aru'ahohuro ë jöho nosi örire röjahuijë'eje. Aru'ahehu röjahuijade hesi bëhoho huro aho'obëhe ga barëromo God-hu hesi dë vövöbajo'ere uehorovajoho ëhu'o iae ga barëjajeje. ¹¹ No ae gemu gemu diehi uehorovaruoho ae göho bogo ga'i nosi aru'ahohuremu sivue gavajeje. God-are Aru'ahoho ëhi gemuhoje. God-are Aru'ahohuremu God-are uehoroho gavajeje. No bogo gavarueje. ¹² Aji baeröhe jö God-are Aru'ahehu no röjahuijaje hesi bëhoho no bogo ave sa'a hesi jö uehorovaje aru'ahoho bae'i a'i God-hu nugö'öjade Aru'ahoho baejë'e javue ëhuro God-hu bojamuade suvuore bövie bise'e aho'obëhe huro röjahuijego garöhëro.

¹³ Ëhu'ëro jië'ëro aehu ave sa'arohemu uehorovoromo jö röjëhijaruëhioho no bogo ëhioho jöho röjëhi'i a'i God-are Aru'ahehu röjahuijajëhi ëhi majëhijarueje. Majëhiromo God-are Aru'aho hesi jö bëhoho huruoho majëhijarueje Aru'aho baejë'e ariböviohuro heruomoröhego. ¹⁴ Röhu God-are Aru'aho bogo baejë'e ariböviohuro uvoruomajeje: God-are Aru'aho hesi jöho simano rumo'e jöe höromo bogo eruomajeje. Jö bëhoho bogo garuomajeje. Bogo garuomaje hesi bëhoho ëhi jië'e jöho God-are Aru'ahohuremu ajamuego avoho mevoromo gavaruje mae jiego. Röhu God-are Aru'ahoho jabumë bogojëvë'ëro ëhu'ëro God-are Aru'ahoho jö bëhoho bogo röjëhijego

ëhuro bogo garuomajeje. ¹⁵ A'i God-are Aru'aho baejê'e aribövioho noro jõe aho'obêhe garomo mevarueje. Röhu noehu God-are Aru'aho baejaroho a ioro'ioroho bogo avoho mevavuarueje gö'i mae o sisê javuego. ¹⁶ Bogo mevavuarue hesi bêhoho Kerisohu diehi uehorovajoho God-are Aru'aho rumo'e ariböviehu mevo'iröhoho bogo eni jêve. Èhesi jöho God-are surire jajivoromo uvê'eje:

Rahuro Badare uehoroho gavê'e höjo.

Hesi öriroho rahuro jögoroho mami'ajêjo.

Èhi uvê'eje. Èhu'ëro God-are Aru'aho rumo'e aribövioho Keriso-are uehoroho bogo garuomajeje. Röhu huhu uehorovajêhi no'o uehorovaruëro jiê'ëro èhu'ëro God-are Aru'aho rumo'e aribövioho nosi uehorohu'o bogo garomo bogo avoho mevavuuruomajeje.

3

God-are mu vaeromo ekaresia ajëmarue aribövioho bogo masijehu jio'amo'i God gemu bôröme jiaje jöhoje.

¹ Nasi ö mueno'e urimê'i naro gavodeje jemê God-are Aru'aho hesi jöho bogo avoho uehorovo'i ave sa'arohemu uehorovamu. Jemê ave sa'arohemu uehorovamu gëgorovo Christian jö aevoromo røjêhijarue èhi jiê'e jöhemu røjêhijodeje. ² Asisö'o i mi bogo mëmi'i ma-amu rihu mëmijaruêhi na God-are jöho amu rihunö'e bojëmibe rovodeje. Èhesi bêhoho Keriso-are jö aevoromo sama'e røjêhijaruohuremu èhuremu jemesi örire røjêhijodeje. Ijore røjêhijarue jö bôrömo bogo røjêhijodeje. Èhesi bêhoho ijore røjêhijarue jö hejê'oho jemê bogo eni jêvadeje. Jemê bogo eni jêvobe rovadoho röhu jaruvohu'o bogo eni jêve. ³ Èhesi bêhoho ave sa'arohemu uehorovarijoho èho bogo vuonugê'e jêve. Bogo vuonugo'i a'i jemê göëro gö hesi muoho garomo dê võronimoromo iro muorovo'e vaejarujeje. Jemê èhi è'arujohuro èhuro ave sa'arohemu uehorovaruje aribövie jêve. God rumo'e aribövi jabesi muoho baeromo èhi raromo jijiharujeje. ⁴ Èhesi bêhoho jemê ae göëro uvanueje: Na Paul-are ae jevajêjo. Ae göëro uvanueje: Na Apollos-are ae jevajêjo. Èhi jiê'e jö gö gö atarujohuro èhuro jemê God rumo'e aribövioho va'ëne jêve.

⁵ Röhu Apollos-are muoho diehi jio'i Paul nasi muoho diehije. No bogo a masijehu javuo'i no God-hu bojamuade muohemu vaejarue ae javue. Hesi muoho vaeromo jöho majêhijamu jemëro aevoromo Keriso mae uehorovarijeje. No èhi jiê'e ae javue. Badahu ae gö gö mue gö gö bojamuibe rovadoho èho no vaejarueje. ⁶ Mue gö gö vaeromo naro ujane bivëvanovodeje jemê aevoromo Keriso-are aribövie jëvoröhego. O Apollos-ro ijore ö'oromo ujanore jove otehanovadeje sanuovëvego marë'irarijego. Noro èhi jiê'e muoho vae'i God-ro hesi sivue avohëvamu marëromo ri'öjarijeje. ⁷ Ujonö'e bivëvaje ahu'o jovehu sanuovëvaje ahu'o no ma-bise'e javuo'i God avohëvego ri'öjaruje aho hu bôrömoheje. ⁸ O ujonö'e bivëvaje ahu'o jovehu sanuovëvaje ahu'o no bogo göho bôröme göho bise'e javuo'i ma-gemuoho javue. No diehi jiê'e mu vaejê'oho God-ro manaho èhi bojamui'ê'e. ⁹ Iae no God'o gemu mae mu vaejarue ae javue. Jemê God-are i'o mu'o va'ëne jêve. Röhu uhu'e jõe göho. Jemê God-are javu va'ëne jëvanove. Ejöhu'o uehorovo'ejo. ¹⁰ God-ro na huë baejivoromo

muoho bojemamu ehuro aehu javu ma vaejaruēhi naro aevoromo jemē vaejēvoromo sa'a uhure umoromo biriri'oho bamēhodeje ehuro jemēro dōre javu va'ēne ēhi birivoromo mae riravo'irarijego. Ēhi vaejēvē'ero ae gōero javue dōre vaeruome. Javue dōre vaejaruoho ae gemu gemu gavē'i javuoho ma-avoho vae'iro. ¹¹ Ēhesi bēhoho God-ro aevoromo Iesu Keriso bamē'eje munēnō'e bibivoromo namiromo jemē nigemēvego riravo'irarijego. Javu uhure gō gō bogojio'i Iesu Keriso gemuje. Aho munē gōho bogo bamo'ē'ō javuoho birivorōhego. ¹²⁻¹³ Javu uhure Iesu Keriso jio'i dōre aēro javue vaejarueje. Javu dōre vaejaruoho ae gemu gemu diehi diehi vaejaruoho ijonō va'orahoro jio'ē'e. Munē ma-mabēhe gold silver oho inajo'e ujuohoromo munē mae gō gō oho inajo'e ujuohoromo avoho vae'i o ma-jahuri javu vaejarue inōmo ijo ō'e sare oho inajo'e ujuohoromo sisē'i vaejaruoho ēho va'orahoro jio'ē'e. God-are maja rovē'iroho vēni bōrōmēro rueromo ē javuoho ravo ga'ē'e. Vēnēro ravo'iramu no ga'ejo di ahuro biriri'oho vae'i di ahuro sisē'ioho vaejē'e jio'iramu. ¹⁴ Mami'e vaejare muoho vēnehu ravamu birivoromo namijē'oho ē javu vaejare aribōvioho suvuore mana baeruomo'ē'e. ¹⁵ O mu mami'e vaejaroho ravo barējē'oho ehuro ē javu vaejare aribōvioho suvoroho bogo baeruomo'ē'e. Rōhu jabumē bogo sisēroho va'i iae mae raromoruomo'ē'e. Raromoro rōhu uvoruomo'ē'e: Ravavuo'iē'ajēromo huruomare hōjo. Rōhu vaevē'e nosi muoho ravo barējahuoromo sisērējahuē'e hōjo. Ēhuni ae aho'obēhe gavē'i javuoho ma-avoho vaeruomo'iro.

¹⁶ Jemē iae gavaruje ekaresiaho jemē God-hu hijaje javuoho va'ēne jēvē'ego God-are Aru'ahēhu jemesirire hijajoho. ¹⁷ Jemē God-hu hijaje javuoho va'ēne jēvē'ero ēhu'ero God-are javu hesiremu jiajēhi jemē ēhi hesi aribōviemu jēve. Jemē hesi aribōviemu jēvē'ero ae rahuhu mu sisē jemē rōjēhiromo ijumēvē'oho ēhi jiē'e aribōvioho God-ro mana ijumēvo'ē'e. ¹⁸ Nadi jasi arijo'arijoho sareramirovone. Ja ae rahuro nimorohoromo uvē'oho: Ave sa'arohemu uehorovarue a jabesi nunire na simano ma'e ae jevajē uvē'oho ēhi jiē'e uehoroho vuonugone. Vuonugo'i uvone: Ave sa'arohemu uehorovarue a jabesi nunire na simano rumo'e ae jevē'oho iae mae hōjo. Ja ēhi uvē'oho God-are nunire ja simano ma'e ae javo'ajējo. ¹⁹ Ēhesi bēhoho ave sa'arohemu uehorovarue simano ma'e jōho ēho God-hu gavajoho simano rumo'e jōeje. Ēhesi jōho God-are surire jajivoromo uvē'eje: Ave sa'arohemu uehorovarue aribōviohuro sareri sarerie ē'oromo uvoruomaje hōjo: No simano mae baeromo jijiharuējego evare aevenēro mie jiomēvanovaje hōjo. ²⁰ O jōe gō'o jajivoromo uvē'eje: Badaro gavaje hōjo simano ma'e a jabesi uehoroho bogo maehu jiego. ²¹ Ēhu'e jiaje a nosi ihoho nadi dōroho bamoromo nimoronimorohē'ioho atoromo uvorējo: Paul o ae gō bōrōmēgo no jabesi ijore ijore jijiharue aribōvie javuajējo. Ēhesi bēhoho ae inōme bōvie bise'e God-hu bamavuadoho ēho noehu ajēmi'irōhoho javue. ²² Paul na Apollos Peter ēho no jemē ajēmi'irōhe aho javue. Sa'ae bōvie bise'e ēhu'o jemē ajēmi'irōhoho jio'ame. Jemē birivoromo raromē'oho o vuovēvē'oho ē bōvioho bise'oho ēhu'o jemē ajēmi'irōhoho jio'ame. Rabe rabe avevejō'e jio'amajoho ijonō jio'amō'irōhoho ēhu'o jemē ajēmi'irōhoho jio'ame. ²³ Ēho aho'obēhe jemesi javue. Rōhu jemē Keriso-are jēve. O Keriso hu God-areje. Ēhuni

nadi a nosi ihoho döroho bamoromo nimoronimorohë'ioho atore.

4

Corinth ariböviehu apostle ömo'ömo bogo gö nimo'i gö bijönimo'iröhe jöhoje.

¹ Èhu'e jiaje èhuni uvore: Paul-më èhi jië'e aribövie jëvájëjo. Jabumë Keriso-are mu vaejarue aribövie jëvájëjo. God-are jö mami'e subivahuade hesi mu muebejहारue aribövie jëvájëjo. Èhi uvore. ² Ae rahu ae gö hesi mu muebejahë'oho birivoromo muoho avoho ma'enobe va'arueje. Èhuremu maeje. Èhu'ëro no'lo èhi è'ëjo. ³ Naro uvajeje: Jemë o ae gö ave sa'a hesi uehore baeromo nasi mu mae o sisë jiego mevo gavarujoho èho ma-bise'e höjo. Iae na'lo nasi arijo'arijoho bogo mevorovajeje ga'i na mae o sisë jevego. ⁴ Èhesi bëhoho naehu mu sisë vaejode jöho na bogo uehorovoromo döroho juhuoninege. Iae èhi jie röhu bogo èhuro na God-are nuniroho maho namije. A'i Badaro gemuëro na gevajeje nasi muoho mae o sisë jiego. ⁵ Èhuni nadi sarerivoromo masijoho riravoromo ae gö nosi muoho mevo gavahuore ga'i no mae o sisë javuego. Mevo gö'iröhe majaho bogo rov'ëje. Hujeji Badaro rueromo nosi mue rabe rabe gurihijë'e bogo gavaruoho o noehu uhure ma-uehorovo taemaruoho va'orahoro bamoromo evare mevo gö'ë'e. Mevo göromo evare God-ro ae gemu nosi mu diehi vaejare atoro huë maho èhi ajiomë'e o abuejë'e mamui'ë'e.

⁶ Nasi ö mueno'e è jöho naro jemë majëhiromo ae gö jabesi jöhu'lo majëhiromo Apollos-mu nosi ihore jajivodeje röjëhijego jemëro garomo ave jögoru hesi bëhoho avoho uehorovo'irarijego. Jögoroho èhi uv'ëjeje: Nadi aruëroho anumëroho jijihö'i God-are surire jöhuremu èhuremu uehorovobe jijihorëjo. Èjögoru hesi bëhoho avoho uehorovoromo nadi jemesi sivuoho uehorovoromo döroho bamorovoromo nimorohë'ioho uvore: Èa masijoho èho nego'i èho bijönegajëjo. ⁷ Raro u'ëgo masijoho riravö. Inömoho raboho na èma baejarijeje. Bogo. Hesi God-ro bojëmadeje. Èhi jië'oho jemë rabëni uvarujeje: Bövie bise'e nosi birivoromo baejare höromo nimorohë'i atarujeje.

⁸ Sareri aribövie jëve. Nani jemë uvarujeje: Mami'e God-are jöho no da'uaguë'e höjo. Mami'e hesi ajoho bae barëjë'e javuajëjo. No masije riravoromo bövie bise'e muebe'amarue höjo. Apostle-ho no bogo èhioho masijoho javuë'e jemëro jemesi sivue uehorovoromo èma uvarujeje: Noremuëremu masije javuajëjo. Èhi uvarujeje röhu jemë bogo èhioho jëve. Jemë mae masije riravo'ibejarije èhuro na nimorohevo'ibejo. Èhesi bëhoho jemë mae masije riravo'ibejarije èhuro no'lo jemë'lo gemuoro masije riravo'ibejo. Èhi jië'oho mae jio'ibejo. ⁹ A'i avevejö'oho na uehorovoromo uve: God-ro apostle nosi ihoho sa'aro bamë'e höjo. Aehu i'u baeromo a nuniro guomo'ië'ëgo hesi iho sa'are jiajëhi nosi ihoho èhi sa'aro jiego ae anerae aru'ahe dinö'e dinö'e raromaruohuro apostle nosirire è gemu nunoho bamoromo èrimahuarue höjo. Na èhi uehorove. ¹⁰ Nosi ihoho sa'aro jië'ëro aëro nosi jöho uehorovoromo èma uvoruomajeje: Paul-mëro Keriso mae uehorovo'ëgo èhuro simano rumo'e aribövie jëvájëjo. Röhu jemëro jemesi jöho èma uvarujeje: Keriso'lo gemuore javuë'ëro Corinth rajoho

nomë simano mabëhe javuajëjo. Aëro apostle nosi jöho ëma uvoruoma-jeje: Paul-mesi muoho darugo rumo'e höjo. Röhu jemëro jemesi jöho ëma uvarujeje: Corinth rajo nosi muoho darugo ma'e höjo. Jemëro uvarujeje: Nosi ihoho dö mare höjo. Röhu apostle nosi ihoho sa'aroje. ¹¹ Io'lo apostle no iëni jovëni vuovavuobe rovadoho jaruvohu'o iae ëhi javue. Niögu sisëmu io'amarueje. Aëro anaguo'i arijarueje. Amo ari'e bogojavuë'ëro ëma jijiharueje. ¹² Nosi övëro biririvoromo i'u'e muoho vaeromo ioho ë ijarueje. Aehu nosi örire agavuë'iroho no ma-jö maemu mana majëharueje. Aehu nosi örire huë vavaeni bojamuij'ë'oho no ma-biririvoromo raromarueje. ¹³ Aehu nosi iho ijumoromo jö sisë at'ë'oho no ma-u'emu jöe sanu'e mana majëhijarueje. Sa'ae dinö'e dinö'e raromaruë aribövi jabesi nuniroho no sisë javuego musisinö'e bu'öjavuarue aribövie javue. Sa'osa'ëro ruhijanovë'e aribövie javue. Nosi ihoho ëhi jiobe rovadoho jaruvohu'o ëhi gemuohoje.

¹⁴ Ejö naehu jajivaje hesi bëhoho bogo jemëro adahoromo javoje bae'irarijego ëhunioho jajive. A'i naro uve: Jemë nasi aboji har-ihu'o mae jëvajëromomo öroho röjëhiromomo jajive. ¹⁵ Nani Keriso-are mu röjëhijarue aribövie marohë'e mae jëve. Röhu jemesi vavuoho na gemu jeve. Ehesi bëhoho jemë'o na'lo Keriso-are aëro javuë'ëro ëhu'ëro jemesi vavuoho na jeve rabëni naro aevoromo Keriso-are jö maho majëhijë'ëro. ¹⁶ Jemesi vavue jev'ë'ego ëhuni uëve: Na negajëjo naehu mu vaejajëhi jemë'o ëhi ë'irarijego. ¹⁷ Ehi nego'ego Timothy jemesi örire nugö'ö'ië'e. Hu nasi huë baejaje harihu maeje. Hu Badare muemu uehorovaje aeje. Eäho nugö'ö'iramu huro ö'oromo uë'ë'e: Nöröro ëhi jië'e jöho ejahoromo Iesu Keriso-arire juvoromo hijaje höjo. O ë jöe gemuoho ekaresiae aho'obëhe dinö'e dinö'e jioruomajoho röjëhibe juvaje höjo. Ehi jië'e jöho huro majëhi'iramu jemë röhu maho uehorovo'aruje.

¹⁸ Röhu jemë a ioro'iorëro uvarujeje: Nörö nosiriroho bogo rue'a'ajëromomo jemëro jemesi ihoho döro bamorovë'e jëve. ¹⁹ Röhu God-hu nimë'ohuro iae na ma-burëro ö'ejo. Ö'oromo nasi ga'ejo simano bövi'e aribövioho diehi jëvo'iramu. Na bogo jabesi jö huhu jöhëmu he'i ö'i a'i ö'ejo ga'i jabumë God-are darugoho baej'ë'e jioruomego o bogo. ²⁰ Ehesi bëhoho God-hu böröme namiromomo no muebejavuajoho ëho bogo ma-jö ataruoho jio'i a'i darugo'e muohoje. ²¹ Röhu jemë di muoho nimö. Na na ha'ite bö'oromo hisuebijëvo'ejo o huë baejëvoromo jö sanu'e majëhi'ejo.

5

Masuvuarue jögoru ahade a hesi jöhoje.

¹ Röhu jemesi jö sisëho na hej'ë'e jeve. Aëro atoromo uvoruomohijo: Corinth rajo ekaresia jabesirire öehu jijihanovarue muoho jiajëjo. Ae gemuëro vavu hesi vaboroho vajiohëro baeromo niö'iro gemu mae arijarue höjo. Ehi jië'e muoho sisë bëheje. God-are jö bogo hej'ë'e aribövioho jahu bogo ëhi jië'e muoho vaeruomajeje. A'i jemesi aëro ëhi jië'e muoho vaejajeje. ² Ehi jëv'ë'ëje röhu jemëro jemesi ihoho ëma döro bamorovarueje. Nadi ëhioho ë'ibejarije. A'i huë vavaene böröme baeromo ëhi jië'e mu vaejaje aho jemesirire jiajoho nugö'ö'ibejarije iae

mae jio'ibejo. Röhu bogo nugö'öjarijeje. ³ Nasi sino haho'oho bogo jemë'oho jie. A'i nasi uehoroho aho'o jemesirire jie. Ëhuro na jemë'o jevanove. Jemë'o jevanovoromo hesi sisëho mevoromo nosi Bada Iesuare ihore uvë'e jeve: Hu mu sisë bëhe vaejajëro i'ue bae'a'ajëjo. ⁴ Ëhuni jemëro gemuoro gagovorovoromo nasi uehorohu'o nosi Bada Iesuare vöröhu'o jemë'o jiego ⁵ ë iaho rori'o nugaromo Satan-are öroro bojamego ëhuro hesi sinore jiaje mu sisëho barë'iro ëhuro Badare majaho rovego ë ia hesi aru'ahoho bogo sisëroho va'i mae hiröheje.

⁶ Röhu jemëhu jemesi mu uehorovoromo iho döre bamorovarujoho ëho sisëje. Ave uhu'e ataruoho jemë'o iae uehorovaruje. I dë huaje oso biseharihoho ëhuro ie aho'obëhe rumorovego dë huaje höjo. ⁷ Ëdë huaje oso jemesirire jiajoho bu'öjego ma-i mahemu jëvo'i. Ëhesi bëhoho ë mu sisë jemesirire jiajoho ahego bogo rumorovo'i a'i barë'iro ëhuro jemë i ma va'ëne aribövie jëvo'iröhe. Röhu jemë iae i ma va'ëne aribövie jëve. Rabëni hesi bëhoho naro majëhi'ie'e. God-hu Vörö Tugohade Söröho Israel rajehu ue'ahë'iroho dë huaje oso rumo'e iohemu ue'aharueje. Ue'ahoromo röhu ave muohu'o vaejarueje. God-are jöëni sheep harihoho bijuëmarueje. Röhu Keriso sheep harihu va'ëne anamu guomë'eje ëhuro God-ro nosi sisëho uehorovoromo vuonugo'iröhego. God-ro jemesi sisëho uehorovoromo vuonugë'ëro ëhuro jemë i ma va'ëne jëve. ⁸ Nosi sisëho uehorovoromo vuonugë'ëro jië'ëro ëhuni Jew rajehu i dë huaje osoho sisë höromomo vuonugoromo evare God-hu Vörö Tugohade Sörö ijaruëhi no ëhi jië'e muoho vaeromo nu huohue mu sisë gö gö vuonugo'i God-hu vörö tugohahuade muoho uehorovoromo maemu raromolejo.

⁹ Röhu urimëli naro jöho jajivoromo majëhiromomo uëvodeje: Öehu jijihanovarue ariböviohu'o nadi gemuoroho raromomo jijihorëjo. ¹⁰ Ëjö jajivodoho na bogo uëromomo ë'odeje: God-are jö bogo hejë'e ariböviohu'oho nadi gemuoroho jijihorëjo. Na bogo uëromomo ë'odeje: Ga'irarije God-are jö bogo hejë'e aho önö'e mahunö'e mu vaebe vajiohu'e mu vaebe jijihamu God dejonö bamo'i bövi bise'o nuninö bahibe jijihamu gëvë'iroho ëhi jië'e ariböviohu'oho nadi gemuoroho raromomo jijihorëjo. Naehu uëvode jö hesi bëhoho bogo ëhioho jiadeje. Nasi bëhoho ëhi jio'ibejo jemëro ejeho'ibejarije God-are jö bogo hejë'e ariböviohu'o bogo gë vadë'ibejarije. Ëhuni God-are jö bogo hejë'e ariböviehu ëhi jië'e mu sisë vaejamu jemëhu jabu'o gemu mae raromomo jijihë'oho iae maeje. ¹¹ Röhu jajivode hesi bëhoho aviëhije. He'irarije aëro jemë'o raromoromo uëvamu: No Christian ae javuajë uëvamu hejë'iroho röhu ga'irarije jabumë önö'e mahunö'e jijihamu gëvë'iroho God dejonö bamo'i bövi bise'o nuninö bahijamu gëvë'iroho ae gö jabetesi jö sisë atobe jijihamu hejë'iroho jovo ue'ahoromo simano sisërëbe bövi bise'o ujuohoniëhibe jijihamu gëvë'iroho ëhi jië'e ariböviohu'oho nadi gemuoroho ioho ue'ahore o raboho raboho ë'ore.

¹² Naro rabëni God-are jö bogo hejarue aribövi jabetesi muoho garomomo mevojöro. Ëho bogo nasi muehuje. A'i Christian agano jabetesi muoho ëho garomomo mevore. ¹³ God-are jö bogo hejarue aribövi jabetesi muoho hesi God-ro sivue garomomo mevo'ë'e. No bogo mevarueje. A'i God-are jö hejarue aribövi jabetesi mu jemëhu garomomo mevo'irarije jöho God-are

surire jajivoromo uv'e'je: A sisë jemesirire jiajoho nugö'örego va'irajo. Ëhi uv'e' jiaje ë a sisëho nugö'örego va'iro.

6

Corinth ekaresiaehu Christian agano bogo court-re sö va'ego God-are jö bogo hej'e'le ariböviehu mevoröhe jöhoje.

¹ Röhu aviëhi jië'e muoho jemë rabëni biriri'övoromo ë'arujeje. Ja'o Christian a göhu'o jemë niö'i jö sisë jëvë'o'ho jemë God-are jö bogo hej'e'le aribövi jabesi nunire va'o rirarovoromo jemesi jö sisëho majëhijarujeje jaburo mevëhojoro. Bogo ëhioho ë'i a'i God-are aribövi jabesi nunire riravoromo jöho ato'ibejarije iae mae jio'ibejo. ² Jemë diehi'oromo bogo uehorovoromo uvö: God-are majaho rue'iramu God-are aribövioho noro sa'ae aho'obëhe jabesi muoho garomo mevo'ejarëjo. Ëhi uvo'ibejarije iae mae jio'ibejo. Röhu jemë majae ijönö mu böröme vaeromo ae aho'obëhe jabesi muoho garomo mevo'ie'ëro jëvë'ëro ëhu'ëro avevejö'e jö bise'o bise'o mevë'o'ho jemë iae eni jëve. ³ Jemë'o iae gavaruje Keriso-are aribövioho no majae ijönö anera gëromo jabesi mu masijo mevëho hesi jëvajoho. Iae ëhuni uvore: Ave sa'are mu ininoho garomo mevë'o'ho iae no eni javuajëjo. ⁴ Ave sa'a hesi jö inino mevo'irarijoho jëvë'o'ho jemë diehi'oromo ë jöho bava'oromo God-are jö bogo hejarue aribövi jabesi nuniroho riravoromo majëhijarujeje mevëhoröhego. Jabesi ihoho Keriso-are ekaresia jemesiroho bogojië'e jiaje jemesi jö sisëho jebesiroho nadi bava'ore. ⁵ Jemesi arijo'arije javojimorovohe. Christian agano jemesi jöehu umogihago mevo'irarijoho na jemesiroho simano ma'e aho bogojië'ego ëhuni dirö'le göro va'oromo jemesi jöho majëhijarujeje God-are jö bogo hej'e'le ariböviohuro mevëhoröhego. Röhu simano ma'e aribövioho jemesirire iae jio'ame. ⁶ Röhu Christian agane göëro göho dirö'le göro bava'oromo jemesi jöho majëhijarujeje God-are jö bogo hej'e'le ariböviohuro mevëho'iröhego.

⁷ Röhu jemë göëro göhu'o iro muorovo'e vaeromo court-re va'arujoho ëhuro jemesi Christian muoho mami'e bej'e'je. Jemë court-roho bogo va'i uvo'ibejarije: Sisë vaejevadoho o vajiohehu baejehadoho iae hesi hö uvo'ibejarije iae mae jio'ibejo. ⁸ Röhu jemë bogo ëhioho uvo'i jemëro ri'öromomo göëro gö hesi örire sisë vaejarujeje. O vajiohëro baejëharujeje. Bogo God-are jö bogo hej'e'le a jabesi örire gemu ë mu sisëho vae'i a'i jemesi Christian aganoho jabu'o ëhi'ëvarujeje. ⁹ Jemë iae gavarujeje sisë aribövie God-are aji'e öri ari'ere bogo va'o hesi jioruomajoho. Nadi sareramirovore. Önö'e jijiharue aribövioho God-are öri ari'eroho bogo va'ë'ö. God dejonö bamo'i bövi bise'o nuninö bahijaruë aribövioho bogo va'ë'ö. Goho'amarue aribövioho mu gö gö barueromo a'o a'o sihorovarue aribövioho bogo va'ë'ö. ¹⁰ Vajiohu ë'arue aribövioho mahunö'e ë'arue aribövioho jovo iromo simano sisë'ëjarue aribövioho ae gö jabesi jö sisë atarue aribövioho bövi bise'o ae gö ujuohoniëhijaruë aribövioho ëhi jië'e aribövioho God-are öri ari'eroho bogo va'ë'ö. ¹¹ Urimoho jemë a ioro'ioroho ëhi jië'e sisë aribövie jëvadeje. Jaruvoho jemesi sisëho u'ovëhë'je. Jemë God-are aribövie jëve. Jemë God-are nunire mae riravaruje. Ëhesi bëhoho God-ro Bada Iesu Keriso-are ihore hesi Aru'ahoho nugö'öjamu jemëni

rueromo dē vövöbajo'oho avohëhë'ëro ëhu'ëro mae jëve. Ëhuni mu sisëho vuonugo'i ma-raromore.

Sino haho'ehu mu maemu vaejego God-are itho dö mare jioröhe jöhoje.

¹² Jemë ae göëro uvarujeje: Noehu mue aho'obëhe vaejë'oho iae mae höjo. Ëhi uvarujeje. Iae ëhi jie röhu mu ioro'ioro vaejë'oho bogo ëhuro marëjavuo'ë'e. Nani noehu mue aho'obëhe vaejë'oho iae maeje röhu mu göehu göehu ruahö'öjevo'iröhoho na bijönego'ego ëhuni ëhi jië'e muoho na bogo vae'ejo. ¹³ Röhu jemëro uvarujeje: I hesi bëhoho dëre abuejajëjo. Dë hesi bëhoho ioho baejajëjo. Iae ëhi jie röhu God-ro uvo'iramu iohu'ö dëhu'ö barë'ë'e. Dë hesi bëhoho ioho baeje röhu nadi uvore: Nosi sino haho'ö hesi bëhoho öëro ë'anovajëjo. A'i uvore: Nosi sino haho'ö hesi bëhoho Badare örire bojamijaruëjo. O Badare bëhoho nosi sino haho'öho muebajëjo. ¹⁴ Iohu'ö dëhu'ö barë'ë'e. Röhu Bada guomoromo bogo barë'i God-ro daruge bojamamu ri'öjajëje. Ri'öjë'ëro no'ö ëhi daruge bojamui'iramu vuovoromo ri'öjavuo'ë'e. Ëhuni nosi sino haho'öho ma-Badaremuje.

¹⁵ Jemë'ö uehorovore. Jemesi sino haho'öho Keriso-are övo duruajo'e jëve. Ëhi jië'öho na no öëro jijihanovoromo Keriso-are övo duruajo'öho baeromo ö va'ëne magonaho sisëhu'ö gemuoroho havoromo momorö'ö'ëjo. Bogo mae bogo ëhioho ë'ëjo. ¹⁶ Ae rahu magonaho sisëhu'ö gemuore havoromo momorö'öjë'öhuro ëhuro sine dë vövöbajo'e gemuoho javuo'ë'e. Ëhuremu uehorovore. Ëjöho God-are surire ëhi gemuoho jajivoromo uvë'ëje: Jabumë ni'ö'i jëvadoho röhu gemu jio'a'ajëjo. ¹⁷ Jabumë gemu jiajeje röhu Bada'ö bimuvë'öhuro ëhuro Iesu'ö no'ö Aru'ahë gemuoho javue. Ëhuni magonaho sisëhu'ö bogo gemuoroho momorö'ö'ëjo.

¹⁸ Önö'e muoho gorore. Mu sisë ioro'iorohuro ëhuro sinoho dë vövöbajo'öho bogo sisë vaerovo'i a'i öehu jijihanovë'öhuro ëhuro sinoho dë vövöbajo'öho sisë vaerovarueje. ¹⁹ Ave jöhu'ö avo'avoho uehorovore. Jemesi sinoho dë vövöbajo'öho God-are Aru'aho hesi osa maho jëvanove. Ëhesi bëhoho God-are Aru'ahohuro God-are örire jioromo jemesi sinore dë vövöbajo'ëre rovë'ëro jemesi uhure ë hijajeje. Jemesi sinoho dë vövöbajo'öho aho'obëhe bogo jemesirehu jio'i God-areje. ²⁰ God-ro jemë bogo ëma baejëvo'i a'i hesi Harihoho nugö'öromö huë vavaene sisë maro baejë'ëro ëhu'ëro jemë hesi baejëvadeje. Ëhuni jemesi sino haho'öho mu maemu vaerego hesi ihoho dö maro jio'iro.

7

Masuarue mu hesi jöhoje.

¹ Röhu jemëhu jajivoromo ue gevarije jöho na majëhi'irögoro ë'e.

Aehu magonaho bogo masuvë'öho iae maeje. ² Röhu ae aho'obëhe önö'e jijiharue jiaje ëhuni ae gemu gemu magonahe masure ö magonahe gemu gemu ae masure. ³ Baruharo jasi vaborehu ja'ö niavo'i uavë'öho ejahone. O vaboroharo jasi baruehu ja'ö niavo'i uavë'öho ejahone. ⁴ Ëhesi bëhoho vaboroho jasi sino haho'öho bogo jasirehu jio'i jasi baru hesije. O baruho jasi sino haho'öho bogo jasirehu jio'i jasi vaboro hesije. ⁵ Ëhuni vaboroharo nadi baruho juahami'i baruoharo nadi vaboroho juahami'i ma-ejahorovore. Röhu nani jemë gemu mae jöe

jörovoromo uarovo'aruje: Ë'ego no gemuore niavarue muoho majae ma-bisemu vuonugo'i God-are örire jöe jövojuvo va'o majae eni jiego vuonugo'irarëjo. Ëhi jië'oho iae maeje. Röhu ëhi ë'ë'oho God-are örire jö jövo'irarije majaho barëjego ijonö röhu maho sionëro gemuoro niavore. Bogo ëhi ë'ë'oho nani jemëro bogo avo'avoho biririvo'iramu Satan-ro bijëho gë'ë'e.

⁶ Röhu jemëhu masurovo'irarije jö jajivajoho na bogo uëromo ë'e: Jemëhu bogo masurovë'oho sisë hö uë'i a'i na uëromo ë'e: Jemë nëgë'oho ëhi'orëjo. ⁷ Röhu naehu vaboro bogo masuv'e ma-hijajëhi ae magonahe aho'obëhe ëhi jëvo'ibejo ëhuro Paul na mae jevo'ibejo. Röhu bogo ëhioho jio'ë'e. A'i ae magonahe gö gö diehi jië'e mu vaeröhe suvuoroho mami'e God-ro bojamuibe rovë'eje. Ae göëro suvuore gö ae göëro suvuore gö ëhi baebe rovë'e javue. Ëhi jië'ëro ae magonahe gö gö masurovo'i göëro bogo masurovo'amë'eje.

⁸ Röhu magonaho doruohu'o bogo masuv'e aribövi ioro'iorohu'o ave jöho na jemesi örire majëhi'ië'e. Naehu ë'ajëhi jemë vabore o barue bogo masuvë'oho iae maeje. ⁹ Röhu biririvoromo avoho taemo raromo'irarijoho bogo eni jëvamu masurovo'amë'oho iae maeje. Ëhesi bëhoho jemesi dë vövöbajö'ere simanore uehoro gö gö baejë'oho ëho sisëje. Ëhuni masurovo'amore.

¹⁰ Röhu masurovë'e aribövioho jemë na ave jöho bojëmi'ië'e. Bogo naehu uehorovoromo majëhi'i a'i Badaro bojamuij'e jio'ego na majëhi'ië'e. Vaboroharo baruoho nadi nugö'öromo va'o rori'oho hine. ¹¹ O nugö'öromo va'o rori'o hijë'oho nadi ae göho masu'i ma-hine. O vuonorö'ö rueromo jasi baruohumu huë baerovoromo avoho arire. Röhu baruoharo ja'o vaboroho nadi nugö'öne.

Vaboro'o baru'o göehu Keriso mae uehorovo'i göehu bogo ma uehorovë'oho ëhuro ëhi ë'tiröhe jöhoje.

¹² Röhu a ioro'ioro jemesi örire ave jöho majëhi'ië'e. Bogo Badaro ave jöho jövo'i a'i naro nasi uehorovoromo jajive. Baruoharo ja bogo Keriso uehorovanevare jaehu Keriso bogo ma uehorovaje magonaho masuromo hiromo evare ijonö Keriso mae uehorovo'i jasi vaborehu bogo ma uehorovoromo ja uavë'oho: Iae na ja'o hinövo'ejö uavë'oho nadi nugö'öne. ¹³ O vaboroharo Keriso bogo uehorovanevare jaehu Keriso bogo ma uehorovaje a masuromo hiromo evare ijonö Keriso mae uehorovo'i jasi baruehu bogo ma uehorovoromo uavë'oho: Iae na ja'o hinövo'ejö uavë'oho nadi nugö'öne. ¹⁴ Ëhesi bëhoho Keriso bogo uehorovaje aho Christian vaborohu'o niö'iro gemuoro arijë'ëro ëhuro iae hu God-are aeje. O Keriso bogo uehorovaje magonahoho Christian baruohu'o niö'iro gemuoro arijë'ëro ëhuro iae hu God-are magonaheje. Bogo ëhioho jio'ibejo jemesi aboji harihu'oho God rumo'e aboji harihu'e jioruomo'ibejo. Röhu bogo ëhioho jio'i jabumë iae God-are aribövie jioruome. ¹⁵ Röhu gal'irane Keriso bogo ma uehorovaje jasi baruëro o jasi vaborëro ramö'öromo va'o rori'o hi'ia'amu gavë'oho nadi uehorovoromo uvore: No mami'e mae masurovë'ego hu va'ë'oho God-ro bijönimo'ajëromo nijio'irae'i ma-uane: Va'i nagego va'ëjo. O nijio'iraeromo gemuore arijë'oho huë vavaene baejë'e ari'aruje. Röhu God bogo ëhioho nimo'i a'i uëvadeje jemë hesi aribövie jioromo huë baerovoromo gemuoro raromo'irarijego. ¹⁶ Röhu Christian vaboroho

ja bogo gavanue. Nani jero baruoho ajami'iramu hu Keriso mae uehorovoromo bogo sisëroho va'i Keriso'o maro hi'ë'e. O Christian baruoho ja bogo gavanue. Nani jero vaboroho ajami'iramu hu Keriso mae uehorovoromo bogo sisëroho va'i Keriso'o maro hi'ë'e.

God-hu ae gemu gemu mu bojëmibe va'ego mu vaeröhe jöhoje.

¹⁷ Röhu Badahu ae gemu gemu mevoromo mure bamobe rovade muoho o jemëhu mu diehi vaebe rovamu evare God-hu hesinö rinëgadoho ëhi jië'e muohemu vaere. Naro ekaresiae aho'obëhe ë jögore gemuohemu bojëmibe va'ajeje. ¹⁸ Ae gö urimë'i Jew rajehu ë'aruëhi hesi sino tarijahamu hu hijuvo röhu God-hu hesinö rinovë'oho nadi sino tarijare muoho mu'ure. O ae gö Jew rajehu ë'aruëhioho hesi öriroho bogo ëhioho ë'amu hu hijamu röhu God-hu hesinö rinovë'oho nadi uarego Jew rajo jabesi muoho vaeromo hesi sinoho tarijah'o'iro. ¹⁹ Jew rajehu ë'aruëhi jemesi sino tarivëhë'oho o bogo tarivëhë'oho iae hesije. A'i God-are jöe gö gö ejahë'oho ëho börömochoje. ²⁰ Röhu ae gemu gemu jemëhu diehi jië'e mu vaebe rovamu evare God-hu hesinö rinëgadoho ëhi jië'e muoho vaenövore. ²¹ Nani ja a börömo hesi darugore javë'ëro hesi muohuremu vaejahë'iro evare God-ro ja hesinö rinagadeje. Nadi ëhunioho nurunurumo'i ë muohuremu vaenövone. Röhu jaehu ë a hesi darugore hijanuoho vuonugo'i va'oromo jasi nimanue mu öri birohë'ohuro va'o ë muoho vaene. ²² Röhu jaehu ae gö hesi darugoremu hiromo bogo nurunurumo'irane ë hesi bëhoho a börömo gö hesi muohuremu vaejahamu evare Badahu hesinö rinagë'oho ja döho jasi börömo hesi darugoremu hi'i jasi uhoho jasi nimoromo Badare mu vaejanue ae jave. O ja jasi nimanue muohemu vaejamu evare Badahu hesinö rinagë'oho ja Keriso-are darugoremu hiromo hesi muohemu vaejanue ae jave. ²³ God-ro jemë bogo ëma baejëvo'i a'i hesi Harihoho nugö'öromo huë vavaene sisë maro baejë'ëro ëhu'ëro jemë hesi baejëvadeje. Èhuni nadi ae gö jabesi darugoremuo haromoromo ma-muemu vae'i uehorovo'i a'i God-are muoho uehorovore. ²⁴ Nasi ö mueno'e ja ae gemu gemu diehi jië'e mu vaebe rovamu God-hu hesinö rinagadoho ë aho jero God-are nunoro juvoromo ëhi jië'e muohuremu vaenövone.

Bogo masurovë'e o ma-doru raromarue aribövi jabesi jöhoje.

²⁵ Röhu bogo masurovë'e aribövioho jemesi jöho na majëhi'ië'e. Ave jöho bogo Badaro uövüë'ëro majëhi'i a'i naehu uehorovaje jöho majëhi'ië'e. Iae naehu uehorovaje jöho na majëhi'ië'e röhu Badaro huë vavaene baeromo uehoroho bojëmijë'ëro ëhu'ëro nasi jöho heromo uvo'a'aruje: Iae jö mae höjo.

²⁶ Na uehorovoromo uve: Jaruvoho huë vavaeni majaho nosi örire rovë'ego ëhuni aehu raromaruëhi ëhi raromë'oho ëho iae maho höjo. ²⁷ Èhesi bëhoho nani jemë vabore masuvë'e raromarujeje. Èhi jië'oho nadi nugö'ö'i uehorovore. O nani jemë bogo masuvë'e maromarujeje. Èhi jië'oho vaboroho nadi nahore. ²⁸ Röhu a juvijehu o magonaho aboridehu masuvë'oho bogo sisë'ioho ë'arujeje. Röhu masuvë'ohuro ëhuru nurunurue uehore gö gö bae'a'aruje. Röhu na bijönege ëhi jië'e huë vavaenehu jemesi örire rueröhoho. Èhuni uëve: Vaboroho nadi nahorëjo.

29 Nasi ö mueno'e nasi bëhoho ëhije. God-ro majae ma-bunemu bamë'eje hesi majaho rueröhego. Ëhi jië'e jiaje ave majare aevoromo raromobe va'ë'iroho masuvë'e aribövioharo masuvarije muoho barë'ië'e jiaje nadi masuvarije muohemuoho uehorovo'i God-are muohu'o uehorovore. 30 O huë vavaeni baejë'e aribövioharo ave sa'a hesi huë vavaeni muoho barë'ië'e jiaje nadi huë vavaeni baejarujoho ëhemuoho uehorovo'i God-are muohu'o uehorovore. O nimorohë'e aribövioharo ave sa'a hesi nimorohë'e muoho barë'ië'e jiaje nadi nimoroharujoho ëhemuoho uehorovo'i God-are muohu'o uehorovore. O inöme rabe rabe imo'amaruje aribövioharo inöme bövie bise'e barë'ië'e jiaje uvore: Noehu imaroho bogo nosirehu jio'i hesi God-are höjo. 31 Ave sa'are bövie bise'e jiego gavaruoho barë'ië'e jiaje ëhuni ave sa'a hesi mue bövie bise'e vaejë'iroho nadi ëhuremuoho uehorovoromo vae'i God uehorovë'i muoho vaere.

32 Röhu na nege jemë bogo ave sa'a hesi muohuni uehorovoromo nurunurumo'irarijeko. Bogo masuvë'e aribövioharo Badare muohemu uehorovarueje ëhuro Bada dë mae jioröhego. 33 A'iro vaboro masuvë'e aribövioharo ave sa'a hesi muoho böröme uehorovarueje ëhuro jabesi vaboroho dë mae jioruomoröhego. 34 Ëhu'ëro Badare muohu'o ave sa'a hesi muohu'o gemuoro havoromo vaejeko anoji'e jiajeje. Röhu magonaho aboridohu'o bogo masuvë'e magonaho ioro'iorohu'o jaburo Badare muohemu uehorovarueje jabesi sino haho'ohu'o aru'ahohu'o God-are örire gemu bojamirovoröhëro. A'i baru masuvë'e magonahohuro ave sa'a hesi muoho uehorovarueje jabesi baruoho dë mae jioruomoröhego.

35 Na jö majëhijaje hesi bëhoho ëho bogo jemëhu masurovo'irarije öroho tugohëho'i a'i jemë ajëmijeko mae jëvoröhego majëhije. Avo'avoho raromoromo Badare muohuremu uehorovo'irarijeko ëhuni vabore o barue bogo naho'irarije jöho majëhije.

36 Röhu a juvijo'o magonaho aborido'o aemo'aemo'o jëvoromo röhu uvë'oho: No bogo masurovo'ejärë uvoromo ëhi uehorovobe va'ojuvo röhu aehu magonaho masu'iro nimo avohoromo ëhuni uvë'oho: Naro nasi magonaho hesi öriroho muoho bogo maho vaegoro masu'ië'ajë uvoromo masuvë'oho iae maeje. Hesi nimoromo masurovoromo gemuore ari'ëlö. Ëhi jië'oho bogo sisëhu jio'i maeje. 37 O aehu biririvoromo hesi dë vövöbajo'ere mae uehorovoromo uvë'oho: Ëmagonahohu'o na'o no aemo'aemëro javuë'ëro bogo masurovo'i ma-aemo'aeme vaejë'ëro bogo niavo'i ma-aribe jireho'ejärë uvoromo hesi dë vövöbajo'ere nimajoho bogo uehorovo'i hesi nimajoho taemorovoromo bogo masuvë'oho hu mae ë'ajeje mami'e biririvoromo uehorovë'ëro jië'ëro. 38 Ëhu'ëro jië'ëro aehu hesi aemo'aemo masuvë'oho iae maeje. O bogo masuvë'oho ëho ma-mabëheje.

39 Röhu masuvë'e magonahoho baru hijë'iroho baru'o gemu mae hi'ë'e. God-are jöho ëhije. O baru guomë'iroho magonahohuro di a nimë'oho ëho bae'ë'e. Röhu Bada mae uehorovaje ahuremu masu'ë'e ae gö bogo. 40 Röhu hu baru bogo bae'i ma-doru hijë'oho iae hu huë mabëhe hi'ë'e. O baru i'o baejë'oho ma-bisemu bogo ëhioho huë maho hi'ë'e. Nasi uehoroho ëhije. Röhu nasi uehoroho bogo sisëhuje. Ëhesi bëhoho naro uvajeje: God-are Aru'ahohuro bogo ae gö jabesi simanoho

gemu huotovëho'i Paul nasi simanohu'o huotovehego ëhuro na uehoro mae baeromo jajivaje hõjo.

8

Aehu inõmo sisëni bahijare mi hesi vitu Christian ariböviehu i'irõhe o bogo i'irõhe jö Corinth ariböviehu ua gavamu Paul-hu mana jajivade jõhoje.

¹ Rõhu jö göho na jajivo'ië'e. Övehu avohoromo uvene aho rõjahijarue inõmohuni mie anoromo aho'o bamëhoruomajeje sisëhuro baerõhego. Sisëni bamëhë'e mi vituoho na jemë ma-dajumo ue'ahore o uvore: Aru'aho sisëni bahijëhë'ego juahovo'ëjarëjo. Ëmioho i'irarije o juahovo'irarije di mucho mae jiajoho ëho no uehorovo'ëjo. Jemëhu ë'arujëhi aehu uvë'oho: Aru'aho mue bövie bise'e eni ga barëjë'e jevajë uvë'oho ëhuro hesi ihohe mu dõro bamorovajeje. O aehu ae gö jabesi õrire uehorovëvë'oho ëhuro hu ekaresia mucho nigemajeje. ² Ja uvë'oho: Na mue eni ga barëjë'e jevajë uvë'iroho ma-dõhemu ga'i bogo avoho gavanueje. ³ O jaehu God uehorovë'oho huro ja mae gavajeje.

⁴ Rõhu naehu urimo uëvode jõho inõmo sisë hesi mi i'irarije o juahovo'irarije jõho na majëhi'ië'e. Iae no garomo uvarueje: Ëhi jië'e inõmoho bëhi rumo'e hõjo. God gemu jio'i gö bogohõjo. ⁵ Iae God-are jö bogo hejë'e ariböviohuro sarerivoromo uvoruomajeje: Ö'idõre jio sa'are jië'e aribövi noehu bogo gëvaruoho uvene aho rõjëhi'irõhoho hõjo. Iae ëhi jie. Aëro uvarueje: God gö gö aho'obëhe no bogo gavarue darugo'e a masijoho aho'obëhe jio'amajëjo. ⁶ Rõhu Christian aribövioho no bogo ëhioho uehorovo'i God gemu Vavuoho mae uehorovarueje. Huro sa'ae bövie bise'e bamavuë'ëro noro hesi jõhemu uehorovoromo raromo jijiharueje. O Darugo'e A Börõme gemu Iesu Keriso mae uehorovarueje. God-ro uavamu Kerisoro bövie bise'e bamavuadeje. Bamavuoromo ajamuamu no vuovo õroho vuonugo'i darugoho bæjë'ëro mae raromarueje.

⁷ Iae no garomo uvarueje: God gemu A Börõme Keriso gemu ëhi jëvajëjo. Rõhu Keriso-are aribövi ioro'ioroho bogo ëhioho gavarueje. A'i urimë'i God-are jö bogo hejare majare uvonõvareje: Inõme gö aru'aho'e hõromu ëho rajëhinõvareje. Majae ëgobövie ëhi ë'obe rovë'ëro ëhu'ëro jabumë inõmëni bamëhare mi vitu i'ieß'iroho uvoruomajeje: Ëmioho iae aru'aho sisë hesi mie hõjo. Ëhi uvoromo ëma ijë'ohuro ëhuro herovoromo uvarueje: Nani no sisë ijaruëromu juhuonivarueje mu õroho bogo avo'avoho gavë'ëro. ⁸ Jabumë uvarueje: No sisë ijaruëromu juhuonivarueje rõhu i ijë'oho bogo ëhuro God-are bëhiroho va'ëjo. I juahovë'oho God-are nuniroho bogo sisëho javuo'ë'e. O ijë'oho God-are nuniroho bogo maho javuo'ë'e. ⁹ Jemë i ijë'oho o juahovë'oho God-ro uvajeje: Ëho jemesi mue hõjo. Rõhu gavë'i ë mioho ue'ahore. Nani bogo avoho biririvë'e Christian aribövioho jaburo jemë gëromu sisëro rireromo'ë'ö. ¹⁰ Ëhesi bëhoho ja iae garomo uvaneje: I ijë'oho o juahovë'oho hesi hõjo. Rõhu ë jõho Keriso-are ae göëro bogo avoho uehorovë'ëro jië'ëro juhuonivoromo uvo'ë'e: Sisë ariböviohuni bahijare mioho naehu ijë'oho sisë hõjo. Nani ë ahuro garõhe jero inõmo sisë rajëhijarue osare hiromu ie i'iramu gagorovo uvo'ë'e: Ëaru'aho

sisë hesi mi vitu aehu ijë'oho ëho God bijönimajë uvoromo röhu ja gavë'i hu'o ëma i'ë'e. ¹¹ I'iramu ë biriri rumo'e a hesi aru'ahoho sisërë'ë'e. Jasi öhuni Kerisoro uehorovoromo guomadeje. Röhu jero uvaneje: Mi hesi öroho na ga barëjë'e jevajëromo ë a hesi nunire mioho ijamu huro ja gavë'i iromo sisërëjajedeje. ¹² Ëhi jië'e mu vaejë'oho jemëro jemesi Christian agano jabesi dë vövöbajo'oho biriri rumo'ëro jië'ëro ijumëhoromo jabesi örire sisë vaejëvarujohuro ëhuro Keriso'o sisë vae'a'aruje. ¹³ Ëhi jië'ego naehu mi ijamu nasi aganehu geromo nasi döre rueromo sisërërovo'ia'amu gavë'oho naro mi ijajoho ioro'iore gemu vuonugo'ejo nasi aganoho sisërëjöëni.

9

Paul-hu bogo apostle jevajë uvoromo bövi bise'o maho hesi nijio 'irae'ï a'ï a gö jabesi jöëni uehorovoromo vuonugonövade jöhoje.

¹ Jemë'o uehorovore Paul na bogo a jabesi darugoremuoho hi'i nasi nimoromo hijajeje. Na apostle ae jeve. Na nosi Bada Iesu nunëro gavë'e jeve. Naehu Badare mu vaejodohuro iae ëhuro jemë hesi aribövie jëve. ² Ëhuni ame göehu göehu na bijönegoromo uvë'oho: Nörö bogo apostle-hu hö uvë'oho hesije röhu jemë bogo ëhioho uvo'i uvo'a'aruje: Paul iae apostle höjo hesi örire noro Keriso-are muoho baejë'ëro.

³ Röhu naehu vaejaje mu aehu garomo uevë'oho: Paul ja rabëni ëhi jië'e muoho vaejanue hö uevë'oho na ave jöho mana majëhijajeje. ⁴ No God-are jö majëhiroho ie jove mana i'ibejo na mae o sisë jio'ibejo. Iae mae jio'ibejo. ⁵ O Peter'o apostle ioro'iorohu'o Bada Iesuare ö ömo'ömohu'o ë'aruëhi no'o vabore masuromo sö ujuoho jireho'ibejo na mae o sisë jio'ibejo. Iae mae jio'ibejo. ⁶ O nani jemëro ëma uvarujeje: Nosi ekaresia ajamuijarue a ioro'iorohuro God-are muoho vaeromo ekaresia no ajamuromo ë muohuremu vae'iramu no mana bojëmi'ëjarëjo. Röhu Paul'o Barnabas'o jabumëremu bogo ëhioho mana bae'i God-are muoho vaeromo no ajamuromo jabesi övëro mue gö ionire vaeromo manaho baenövo'aruëjo. ⁷ Jemë nani ëhi uehorovaruje röhu muorovo aribövioho na jabumë jabesi övëro mu gö ionire vaeromo mana baeromo ioho ue'aharueje. Bogo. Jabumë muorovo muohemu vaeromo baejarueje. O iruno'e ba'amo bivo'e vaejarue aribövioho na jabumë ë iruno'oho ue'aharueje o bogo. Iae ue'aharueje. O mi muebejarue aribövioho na jabumë ë mi hesi amo rihuoho ue'aharueje o bogo. Iae ue'aharueje.

⁸ Aehu mu vaeromo mana baejarue jöho jajivë'e jeve jemëro heromo uvo'irarijigo: God-are ekaresia muebejavuoromo mana baejë'oho iae mae höjo. Röhu God-are jöho ëhi gemuoho jajivë'eje. ⁹ Moses-hu jajivade jögoru surire ëhi uvë'eje: Jasi mu vaejahaje miehu jasi mu vaejahoromo i hörehu sa'ijovobe juvë'oho hesi jö'oho nadi tugohahego hu juvoromo hesi manaho baeromo huhu hörehu sa'ijovaje i vitu vituoho ibe juvo'irajo. Ëhi jië'oho miohuro ëho hesi manae bae'a'ajëjo. God-are jöho ëhije. Röhu God bogo miohemuoho uehorovoromo ë jöho bojamui'i ¹⁰ a'ï nosi jöho uehorovoromo bojamuadeje. Ëhesi bëhoho iruno'o mu muebejë'iroho sa'a ato'atovarue ariböviohu'o i sa'ijovarue ariböviohu'o jabesi muoho vaejë'i uehorovoromo uvoruomajeje: No i mu vaejaruohuni ëhuni u'emu ë ioho ue'aho'ëjarëjo. Ëhi uvë'oho iae

maeje. ¹¹ Röhu no iruno'o bivarue aribövioho va'ëne javue. Noro God-are jöho jemesi örire majëhijë'e javue ëhuro God-are jö majëhijaro ho muro iruno'e bivanovë'e javue. No ëhi jï'e aru'aho muoho jemëni vaejëhë'ëro ëhuni ave sa'a hesi inöme ie rune mana baejë'o ho bogo sisëhu jio'i maeje. ¹² Jemesi ekaresia muebejëvarue a ioro'iorehu jemesi örire mana bae'i uehorovë'o ho maeje jabumëro jemë bisemu ajëmijë'ego. Röhu no jemë böröme ajëmijë'e javuë'ëro ëhuni no biririv-omomo uvo'ejo: No mana baejë'o ho iae mae höjo.

Röhu nosi nimoromo manaho bogo bae'i a'i no biririvoromo huë vavaene bövie bise'e baejë'e javue aëro uvojöëni: Paul-mëro nosi monioho bae'i nimoromo ekaresiaho muebejavuaje höromo Keriso-are jö maho bogo eruomojöëni. ¹³ Jew rajehu God-are amo börömo hesi mu vaejë'o ho God-are amore bahijare ioho jabesi manaego ujuohoromo ue'aharueje. O God-are maratuore mi bamoromo vënehu bue'öjarue ariböviohuro ë mi vituoho jabesi manaego ue'aharueje. Ëho na jemë uehorovö o bogo. ¹⁴ O Keriso-are mu vaejarue aribövioho ëhi gemuoho ë'arueje. Badaro uövuë'eje hesi jö majëhijarue aribövioho noro mana baeromo raromo jijihonövoröhego.

¹⁵ Ëhi uövuë'eje röhu na manaho bogo baejë'e jeve. O naehu avevejö'e jajivaje jö hesi bëhoho bogo ëhuro jemëro bojemi'irarijego. Naehu guomë'o ho iae hesije. A'i naehu Keriso-are jö ma majëhiromo ëhuni mana baejë'o ho ëho bogo maehuje. Na bijönege ae göëro mana bojemiromo ëhuro naehu nimorohë'i jövaje jö hesi bëhoho tugoho'iröhoho. ¹⁶ Naehu Keriso-are jö ma a majëhijë'o ho nimorohë'i jövo'irode bëhoho bogoje God-ro ë muoho bojemijë'ego. Hesi jö bogo majëhijë'o ho na i'ue bae'ejo. ¹⁷ Naehu nasi nimoromo Keriso-are jö majëhijë'o ho suvuore mana baejajeje. A'i na bogo negë'e Keriso-are jö ëma majëhijë'o ho God-hu bojemade muoho ma-vaejajeje. ¹⁸ Röhu naehu baejaje suvuoroho rabeje. Keriso-are jö majëhijë'o ho na ave sa'a hesi mana baejë'o ho maeje. Röhu ëho bogo uehorovoromo manaho bogo baejë'e hesi jö ëma majëhijajoho ëhuro dë vuëevajeje. Ëho nasi suvuoreje.

¹⁹ Na bogo ae gö jabesi darugoremuoho hiromo jabesi muohemu vaejëhaje aehu jevo'i a'i naro nasi mueberovoromo nasi nimoro muoho vaebe juvajeje. Röhu na bogo nasi nimaje muoho vae'i a'i ae aho'obëhe jabuhu diehi namaruoho ëho vaejajeje ëhuro ae aho'obëhe baejëvoromo Keriso-arire rëmo'irodëro. ²⁰ Jew rajo jabu'o gemuore hiromo God-are jö majëhijë'iroho Jew rajehu raromaruëhi na'o ëhi hibe juvajeje ëhuro Jew rajoho baejëvoromo Keriso-arire rëmo'irodëro. O Moses-are jögoruremu raromarue ariböviohu'o hiromo God-are jö majëhijë'o ho jabuhu Moses-are jö ejaharuëhi na'o ëhi eja-hajeje ëhuro Moses-are jögoruremu raromarue aribövioho baejëvoromo Keriso-arire rëmo'irodëro. Moses-are jögoroho iae na ejahajeje röhu bogo hesi jögoruremuoho hijajeje. ²¹ O Jew rajo jögoru bogo hejë'e ariböviohu'o hiromo God-are jö majëhijë'iroho jabuhu Jew rajo jögoru bogo ejaharuëhi na'o ëhi ë'ajeje ëhuro Jew rajo jögoru bogo hejë'e aribövioho baejëvoromo Keriso-arire rëmo'irodëro. Iae na Jew rajo jögoroho bogo ejahajeje röhu na God-are jögoroho bogo vuonugo'i Keriso-are jögoruremu hiromo God-are jöho ejahajeje. ²² O

juhuoni juhuoni mu vaejarue ariböviohu'o gemuore hiromo God-are jö majëhijë'iroho jabuhu raromaruëhi na'o ëhi hijajeje ëhuro ë aribövioho baejëvo'irodëro. Ëhu'ëro di ariböviohu'o hijë'o ho jabuhu mu vaejaruëhi na'o ëhi hibe juvoromo öre aho'obëhe ë'o gavajeje ëhuro a ioro'ioroho maro va'iröhego.

²³ Ëhi jië'e mu vaejaje hesi bëhoho aëro Keriso-are jö maho heromo jabu'o na'o huë mae baeröhëro ëhuni ë'ajeje. ²⁴ Jemë'o iae gavaruje tutuvoromo ae göehu gö iosirëmi'ië'iroho ae aho'obëhe biririvoromo tutubijioharuje röhu ae gemuëro iosirëmiromu urimo ma-burëro tutuvoromo suvuoro baejajoho. Jabuhu ë'aruëhi jemë'o ëhi jemesi uehoroho darugoho aho'o bojamiromu Keriso-are muohuremu biririvoromo vaere hujeji jemesi suvuoroho bae'irarije. ²⁵ Röhu tutuvoromo aehu a ioro'ioro iosirëmi'ië'iroho urimë'i biririvoromo dajoho avoho mueberovobe va'oruomajeje ëhuro darugo ma'ëro tutuvoromo suvuoroho baeröhëni. Ësuvuoroho ijino inovoromo simanore didi'aharuoho jië'ëro ëhu'ëro ma-burëro sisërë hesi jiajeje. Röhu ë sisërëröhe suvuoroho baeröhëro ëhuni ë ariböviohuro biririvoruomajeje. Röhu Christian aribövioho no bogo ëhi jië'e suvuoroho bae'i a'i ioro'ioremu jioröhe suvuoroho baeröhëni ëhuni Keriso-are muoho vaejarujeje. ²⁶ O Paul naro ioro'ioremu jioröhe suvuoroho bae'irodëni ëhuni aehu övo mugö mugöehu ano'irögoro övo aruëre anumëre ma-bu'öjaruëhioho na bogo ëhioho Keriso-are muoho sisë'i sisë'ioho vaejajeje. A'i aehu ma-ahorirehu biririvoromo tutuvaruëhi na ëhi Keriso-are muoho ma-ahorirëro biririvoromo vaejajeje. ²⁷ Keriso-are muoho vaeromo nasi dajehu nimajoho ma-taemorovajeje ëhuro biririvevoröhego. Ëhi'oromo nasi dajoho nasi mueberovoromo ahorirëro va'ajeje naro ae gö jabesi örire jögore majëhijajëro röhu Kerisoro uejëöni: Paul jasi muoho bogo eni jio'ego jasi suvuoroho bogo bae'a'anuë uejëöni.

10

Aehu övehu avohare inömo bogo uehorovo'iröhe jöhoje.

¹ Nasi ö mueno'e na nege jemëro ave jöho uehorovo'irarijeko nosi Jew rajo hijo miono'ehu ë'are jöho. Nosi Jew rajo hijo miono'oho aho'obëhe God-are suehuro riogëgoromo öroho röjëhi'ego ë örire jijihö va'onövareje. Jabumë ae aho'obëhe jovo ihe Kavüë'e Jovoho beromo mae iojiomareje. ² Jovo beruomamu suehu aegëhadoho ëho noehu bapataeto vaeromo Keriso'o bimuvaruëhi jabu'o ëhi bisemu gemuoho vaejanovareje. Ëhesi bëhoho jovo beruomamu suehu aegahadoho ëho Moses'o bimuvarohöje. ³ Röhu jabumë ae aho'obëhe ie gemuoho ue'ahareje. Ue'ahoromo ëhuro God-are Aru'aho hesi darugoho baejareje. ⁴ Jabumë ae aho'obëhe jove gemuoho ue'ahareje. Ëjovoho munë gagore jovo mae suorovajoho ue'ahareje. Röhu ë jovoho bogo jovo maemuoho jiadeje. Ëhesi bëhoho munënö'e aehu jabu'o gemuore va'onövadoho ë ahuro aru'aho'e jovohu'o bojëmamu jaburo jovo maho iromo ëhuro aru'aho hesi birirohu'o baejareje. Ëmunënö'e aho ëho Keriso jiadeje. ⁵ Jew rajo hijo miono'e ae aho'obëhe ëhi jië'e huë maho baeruomamu röhu ae ma-gemu niö'i jabesi muoho God-ro garomo nimorohadeje. A ioro'iorohunioho bogo nimorohö'i jabesi

örire bijönimadeje. Bijönimamu a rumo'e sa'are vuovo momorö'öbe va'adeje.

⁶ Mu sisë ëhi vaeromo vuovare jöho ëho God-are suriroho bogo ëma jajivo'i a'i noni jajivë'eje noro garomo adahoromo avo'avoho uehorovo'iröhego. Ëhi jië'oho jabuhu mu sisë nimarëhioho no bogo ëhioho nimo'ejo. ⁷ O jabumë a ioro'ioerehu inömo aru'aho'e höromo rajahi'amarëhioho no bogo ëhioho ë'ejo. Jabuhu ë inömo sisë aru'aho'e höromo rajahi'amo'irögoro nimorohare jöho God-are surire jajivoromo ëhi uövuë'eje: Ariböviohuro sa'aro raromoromo jovoho ioho mahunö'e ue'ahoromo ri'öromo mu sisë'o vaemarumijë'i ajajovare höjo. ⁸ Röhu jabumë a ioro'ioerehu öehu ë'anovarëhioho no bogo ëhioho ë'ejo. Öero ë'anovë'ëro ae aho'obëhe 23,000 majae gemuore rireromoromo vuovëvadeje. ⁹ Röhu jabumë a ioro'iorohuro mu sisë vaebe va'oromo ëhuro Badare dëho bijioho garuomadeje ga'iro hu manunëremu gëbe muebejëvobe va'ego o bogo. No ëhi jië'e muoho bogo vae'ejo. Röhu jabumë ëhi ë'ë'ego sigobëro umijëvamu vuovëvadeje. ¹⁰ Röhu jabumë a ioro'iorohuro huë sisë barueromo nurunuruëgamu God-are örire jöe sisë'i atoromadeje. Ëhi jië'oho no bogo ë'ejo. Jabumë ëhi ë'ë'ego a muo'amëgo vuovavuaeje anerahuro rueromo muo'amamu vuovëvadeje.

¹¹ Ëhi jië'e i'uoho aho'obëhe nosi hijo miono'o jabesi örire rovadeje ëhuro no ae aho'obëhe uehorovo'iröhego. Jabuhu mu sisë vaeromo i'u mana baejare jöho iae God-are surire jajivë'eje noro garomo adahoromo avo'avoho raromo'iröhego jaruvore maja barë'iröhoho mami'e dunovo'ego.

¹² Ëhu'e jiaje ja ae rahuario uvë'oho: Na bibivoromo namijajë uvë'oho gavë'i va'one. Bejavo'ë'e. ¹³ Röhu uehoro sisë gö gö jemesi örire rovajeje. Iae ëhi jie röhu diehi jië'e uehoro sisëhu rueromo jemesi dëre bijëhë'oho ëhi jië'e uehoro sisëho bogo jemesiroho gemu rume'i ae aho'obëhe nosi dëre ro bijahuajeje. Röhu God-hu no ajamui'i uövuadëhi iae hu ëhi ajamuijajëro jië'ëro ëhu'ëro huro garöhe biriri ma'e uehoro sisëhu jemesi örire rue'ia'amu jemë nijio'iraerovo'irarijoho bogo eni jëvamu gavë'iroho hu bogo ma-nunëremuoho gë'ë'e. A'i uehoro sisë jemesi örire bijëho'i rovë'iroho huro öroho röjëhi'ë'e jemëro ë jji-horomo uehoro sisëho vuonugo'i biririvoromo maro va'irarijogo.

¹⁴ Nasi ö mueno'e ëhi jië'e jiaje ëhuni inömo ho god höromo rajëhijarue muoho gororomo rori'o va'ore. ¹⁵ Röhu jemëro jemesi simanoho avo'avoho uehorovarujego ëhuni ave jöho majëhi'ië'e. Mevoromo gare jö hesi bëhoho diehi jiego. ¹⁶ Jemë'o uehorovore. Enatuore wine jovohuni God huë mae uaromo hesi suvuro baeromo ijë'iroho ëhuro no Keriso-are köho gemu mae baejarueje. O i ato'atovoromo ijë'iroho ëhuro no Keriso-are sinoho gemu mae baejarueje. ¹⁷ No ae aho'obëhe ie gemuoho ma-gemuoro ijë'ëro ëhu'ëro no ae aho'obëhe javue röhu ae gemuoho javue ie gemuoho ijë'ëro.

¹⁸ Röhu Israel rajo jabesi muohu'o uehorovore. Jaburo mioho tarioromo vituoho God-ni hesi maratuore bahi'i vituoho ijarueje. Iromo ëhuro ë mure bimuarueje. O inömo sisë hesi öroho gemuohoje. Noehu inömo sisë hesi i vitu ijë'ohuro ë mure bimuarueje. ¹⁹ Nani ë jöho adahoromo uvo'a'aruje: Paul-ro uöromo ë'ajëjo: God-are jö

bogo hejë'e ariböviehu rajëhjarue inömoho darugo'e jio'amajëjo. O inömo sisë bojëmijë'e mioho bëhi'e höjo. Nani ëhi uvo'a'aruje röhu na bogo ëhioho uëve. ²⁰ A'i na uëromo ë'e: God-are jö bogo hejë'e ariböviehu inömohuni i bamëhë'oho bogo God-ni bahijaho'i Satan-are aru'aho sisëho jabuni bahijëharue höjo. Èhuro aru'aho sisë jabesi mure bimubarue höjo. Röhu jemëhu Satan-are aru'aho sisëhu'o gemuore bimuvë'oho na bijönegajëjo. ²¹ Jemëhu Badare enatuore jovohu'o Satan-are aru'aho sisë jabesi enatuore jovohu'o gemuore havoromo ijë'oho bogo maehuje. O Badare maratuore iohu'o aru'aho sisë jabesi maratuore iohu'o gemuore havoromo ijë'oho bogo maehuje. ²² O noehu biriri'övoromo Satan-are aru'aho sisë jabesi i jovo iromo jabu'o bimuvë'oho God-ro uvo'ë'e: Jemë bogo na gemu rajehjarujëromo ëhuni dë vörönimo'ë'e. Èhi jië'oho na no aru'aho sisëhu'o bimuvo'ëjo. Bogo. O ëhi jië'e mu vaejë'oho nani no sisë'i uehorovoromo uvarueje: God-are darugoho bise'e höjo nosiroho böröme höjo. Èhu'ëro no hesi i'uoho bogo bae'ëjarëjo. Èhi uehorovë'oho sisëje. No aru'aho sisë'o bimuvë'oho iae no i'ue bae'ëjo.

Ave jö masijoho uehorovoromo inömo sisëni bahijare mi gororovo'iröhe ë hesi jö vituohoje.

²³ Jemë ae göëro uvarueje: Mue aho'obëhe vaejë'oho iae mae höjo. Iae ëhi jie röhu mu ioro'ioro vaejë'ohuro bogo ëhuro marëjavuo'ë'e. Nani mue aho'obëhe vaejë'oho iae maeje röhu mu ioro'ioro vaejë'ohuro bogo ëhuro ajamirovarueje avoho biririvoromo Keriso mae uehorovobe va'iröhëro. ²⁴ No bogo nosi sinohemuoho uehorovo'i ae gö jabesi sinohu'o uehorovo'ëjo.

²⁵ Market-re imarije mioho aho'o ma-dajumo ue'ahore. Nadi juhuonivoromo uvore: Na ave mioho aru'aho sisëni bamëhare mioho höjo o gö hö uvo'i ma-ue'ahore. ²⁶ Èhesi bëhoho God-are surire jajivoromo uvë'ëje: Sa'ae iruno'e bövie bise'e aho'obëhe Badare höjo.

²⁷ O God bogo ma uehorovarue aehu jemë uëvë'oho: Ruerego no i harihe gemuoro i'irarë uëvamu jabu'o ie i'i nëgë'oho va'oromo gal'irarije ie rabe rabe i'imëmamü gavë'oho ma-dajumo ue'ahore. Nadi dë vövöbajeroho uehorovoromo uvore: Na ave mi ue'ahë'oho mae o sisë hörömo mi hesi jöho uë gë'i ma-ue'ahore. ²⁸ Röhu ae göehu jemë uëvë'oho: Ave mioho aru'aho'e inömëni bamahë'e mie hö uëvë'oho nadi ue'ahore. Uvore: No ue'ahë'oho ë jö majahuijade ahuro garöhe noehu ue'ahamu gavë'oho uvo'a'ajëjo: Èho God bijönimajëromo juhuonivo'ajëjo. Èhuni no'o vuonugo'ëjarëjo. Èhi uvore. ²⁹ Na uëve: Jemë ë mi juahovo'irarije hesi bëhoho ë jö majëhijade ahuro juhuonivoromo uvojöëni: Èmi ue'aharujoho sisë hö uvojöëni uëve. Na bogo uëve jemëro juhuonivoromo uvojöro: Sisë hörömo juahovo'irarijeho. Nani jemëro na ue'a'aruje: Röhu God-ro uövuë'e höjo: Ie rabe rabe i'i nëgë'oho irëjo. Èhi jië'oho no rabëni juhuoni'e a hesi jöho uehorovoromo ë mioho juahovo'ëjarëjo. ³⁰ O no God-are örire huë mae uaromo mi ue'ahë'iroho rabëni ae göho uö'a'aruëjo: Jemë sisë ue'aharujëjo. Röhu ë miohuni no mami'e God mae uaromo ue'ahare höjo. Nani ëhi ue'a'aruje.

³¹ Iae ëhi jie röhu ie jove ue'ahë'o'ho o mue bövie bise'e vaejë'o'ho God uehorovoromo vaenövore hesi ihoho döro jioröhe. ³² Jew rajoho o sa'a ioro'ioro rajoho o ekaresia aribövioho ëho jabesi jöëni jemëro uehorovoromo nadi mue gö gö vaejeho jaburo ëho gavego jabesi aru'ahoho sisërëjêho'iro. ³³ Röhu na'o mu rabe rabe vaejë'iroho avo'avoho vaejajeje ae aho'obêhe na gevego mae jëvoröhego. Nasi sinoho bogo uehorovo'i ae aho'obêhe jabesi sinoho uehorovoromo muoho vaejajeje jaburo maro va'oruomoröhego.

11

¹ Naehu Keriso-are mu garomo vaejajêhi jemë'o nasi muoho garomo ëhi vaenövore.

Magonahehu God rajahiruomoi'ë'iroho simano nomorovo'amoröhe jöhoje.

² Röhu naro jemesi örire rajêhije. Êhesi bëhoho jemë majae ëhi nasi örire uehorovevoromo naehu jöe rabe hejë'ëro bojëmijodoho ejeharujeje. Êhuni naro jemesi örire rajêhije. ³ Röhu na nege jemëro garomo uvo'irarijego: A nosi simanoho Keriso höjo. No hesi uhure javuajêjo. Vaboro hesi simanoho baruoho höjo. Vaboroho baru hesi uhure höjo. Keriso-are simanoho God höjo. Êhi uvore. ⁴ Êhi jië'ëro God rajahi'i gemuore gagovë'iroho ama'e o asë rahu simano nomorovoromo pari vaejë'o'ho o God-are jö a majêhijë'o'ho êhuro no Keriso bogo avoho uehorovarueje ë hesi bëhoho Keriso nosi simanoho jië'ëro. ⁵ O magonahe rahu simano bogo nomorovë'e pari vaejë'o'ho o God-are jö a majêhijë'o'ho baruoho bogo avoho uehorovarueje ë hesi bëhoho baruoho jabesi simanoho jëvë'ëro. Simano bogo nomorovë'o'ho u seho barëjê'e magonahoho gemuoho jëvanove. ⁶ Magonahehu simano bogo nomorovë'o'ho simano uoho tario'ibejo iae mue gemuoho jio'ibejo. Röhu magonahehu simano u tariojê'o'ho o simano u seho barëjê'o'ho ëho javoji'e muohoje. Êhuni magonahehu simano nomorovë'o'ho iae maeje. ⁷ God-ro aho bamavuoromo hesi aru'ahoho ajoho bojamuijê'ëro God jiajêhi aho ëhi javue. Êhuni simano nomorovë'o'ho bogo ama'i nosirehuje. O God-ro a ijo'ahe baeromo magonahoho avohoromo a nosi ajoho magonahoho bojëmijadeje. Êhuni magonahehu simano nomorovë'o'ho iae maeje. ⁸ Aevo'ioho God bogo magonahoho baeromo êhuro ama'oho avoho'i a'i ama'e baeromo êhuro magonahoho avohadeje. ⁹ O God bogo ama'oho magonaho jöënioho avoho'i a'i magonahoho ama'i jöëni avohadeje. ¹⁰ Êhu'ëro jië'ëro magonaho jabuhu simano nomorovë'o'ho iae maeje êhuro aneraho jaburo gëromo uvoröhego: Êmagonahoho jaburo baru jabesi aharire raromarue höjo. ¹¹ Iae ëhi jie röhu a'o magonaho'o Bada'o gemuoro javuë'ëro êhu'ëro magonahoho bogo a rumo'oho riravo'i ama'oho bogo magonaho rumo'oho riravo'ë'ö. ¹² Ae jië'ëro êhuro God-hu magonaho avohadêhi ëhi magonahe jio'amë'ëro jië'ëro êhuro aho rahavuajeje. Röhu God-ro aho'obêhe bamavuë'ëro êhuro aho magonahoho bövioho bise'o'ho javue.

¹³ Röhu jemesi uehorovore. Magonahehu ekaresiae aho'obêhe jabesi gemuore raromoromo simano bogo nomorovë'e ma-pari vaejë'o'ho na mae o sisêje. Êho sisêje. ¹⁴ No ae magonahe aho'obêhe dinö'e dinö'e raromaruoho uehorovoromo uvarueje: A nosi simano u ëgo

jië'oho sisë höjo. ¹⁵ Röhu magonaho jabesi simano u ëgo jië'oho iae ma-mabëhe höjo. Ëhesi bëhoho God-ro magonahoho simano u ëgobövioho bojëmijadeje ëhuro simanoho riogivoröhego. ¹⁶ Ae göehu nasi jö aho'ahovo'ië'iroho röhu God-are ekaresiae dinö'e dinö'e raro-maruo'u'o no'o ëhi jië'e muohuremu vaejarueje.

Badare i jovo avoho ue'aho'iröhe jöhoje.

¹⁷ Röhu na bogo jemë rajëhiromo ave jöho majëhi'irögoro ë'e. Jemesi ekaresia gagovë'iroho ëhuro jemë bogo marojëvo'i a'i sisërëjävajeje. ¹⁸ Ëhesi bëhoho aevo'ioho na hejodeje uevamu: Corinth rajo ekaresia jabumë gemuore gagovorovë'iroho Christian ariböviohuro uehoroho bogo gemuoho bae'i ae göëro uehore gö ae göëro uehore gö baejarue höjo. Ëhi jië'e jöho hejë'ëro na uehorovoromo uve: Ëjöhö nani bogo sareroho jio'i ma-bisemu jö mae jië'ëro Corinth ekaresiaho jemëro nani ëhi jië'e mu sisëho vaejaruje höjo. ¹⁹ Röhu jemëhu hahagu hahagu uehorovë'oho ëho a jabesi mueje. Öre göho bogoje. Hahagu hahagu uehorovë'ëro ëhuro uhohu'o mae uehorovarue aribövioho va'orahoro jio'amo'ë'e. ²⁰ Amo jemëhu gemuore gagovorovë'iroho jemë bogo uvarujeje: Noehu i'iröhe ioho wine-oho ëho Badare hö uvo'i ma-ue'aharujeje. ²¹ Ëhesi bëhoho ë i jovo ue'ahë'iroho jemë a ioro'ioroho bogo uehorovë'e sivu sivue jemesi ioho jovoho ëma ue'aharujeje. Ioho jovoho ëma ue'ahoromo a ioro'ioroho hömëvo'i a ioro'ioroho vörö'e jovo böröme iromo simane sisërëjarujeje. ²² Na jemë osaho bogojëve ë raromoromo iruno'e jove i'irarijoho ëhuni gemuoro gagovoromo Badare ioho jovoho sisë'i ijarujeje. O na jemë God-are ekaresiaho bijönimoromo ëhuni iruno'o rumo'e aribövi jabesi örire javoje bojëmiromo ioho jabesi nunire ëma ue'aharujeje. Jemë ëhi ë'arujoho na diehi jië'e jöho jövo'ejo. Na na jemesi muohuni rajëhi'ejo. Na bogo rajëhiromo jövo'ejo.

²³ Röhu ave jöho Badaro bojëmijë'ëro naro jemë bojëmodeje. Bada Iesu a sisë bojëmi'iröhe vahire evare huro ioho baejade höjo. ²⁴ Ioho baeromo God mae uanugoromo ato'atovoromo hesi aribövioho uëvade höjo: Aveho nasi sine höjo. Na nasi sinoho bojamirovo'ië'ajëjo jemë mae jëvoröhego. Aviëhi jië'e muoho vaenövorëjo ëhuro na uehorovevo'irarije höjo. ²⁵ Ioho inugoromo röhu i baejadëhi ëhi enatuore jovoho baeromo uëvade höjo: Ave enatuore jovo hesi bëhoho hehëjo. Na köe rovevoromo guomevo'ië'ajëjo. Guomevo'iramu ëhuro God-hu jemë muebejëvoröhe jögoru i'oho ioro'ioremu marë'ajëjo. Ëhuni jemë jovo ijë'iroho irëjo ëhuro na uehorovevo'irarije höjo. ²⁶ Bada Iesuhu ëhi jövade jö hesi bëhoho ë i o ë enatuore jovo ijë'iroho ëhuro huhu guomade jöho röjëhibe va'ojuvo va'o hu rue'ë'e.

²⁷ Ëhu'ëro jië'ëro aehu Badare i o enatuore jovo bogo mae uehorovë'e ma-ijë'oho Badare sinoho köho ijumë'ëro ëhuro sisë jëve. ²⁸ Ëhuni ae aho'obëhe gemu gemu jasi dë vövöbajo'oho mevo avohoromo gare diehi diehi uehorovëvego. Ëhi ga avohoromo evaro ioho jovoho inövore. ²⁹ Badare sino bogo uehorovë'e ma-iemu jovemu ijë'oho ë ioho jovoho iromo ëhuro i'ue mana bae'a'aruje. ³⁰ I'ue baeromo jemesi a ioro'ioroho aho'obëhe sine u'uhëvoromo guomo guome gö gö baejë'ëj. A ioro'ioroho vuovëvë'eje. ³¹ Röhu nosi dë vövöbajo'oho urimo mevo

avohoromo ga'ibejo ëhi jië'e i'uoho bogo bae'ibejo. ³² O Badahu i'u bojamuijê'oho ëho røjahuiromo bojamuijajeje ëhuro noro avoho uehorovoromo sisë ariböviohu'o gemuoroho sisëroho bogo va'iröhego.

³³ Nasi ö mueno'e Badare i jovo i'i gagovë'iroho göëro göho mueberovoromo gemu mae ire. ³⁴ Röhu hömëvë'oho jemesi osaro osaro raromoromo ire. Ëhi jië'oho gagovoromo God-are i'uoho bogo bae'a'aruje. Röhu jö ioro'ioroho naehu ö'ë'iroho avohëho'ejo.

12

Mu vaeröhe suvuore gö gö God-are Aru'ahehu bojamuajje jöhoje.

¹ Nasi ö mueno'e God-are Aru'ahehu suvuoro bojamuijaje jöho na majëhi'ië'e. Ëhesi bëhoho na nege jemëro ë jöho avoho ga'irarijego. ² Iae jemë'o gavaruje jemë God bogo ma uehorovarije majaroho aëro jemë sarerëmi'ego jö mae hōromo ejëhoromo ëma jijihonövariije. Jijihoromo ëhuro jōrumo'e momorö'öjê'e inōmo inōmoho vörö'e hōromo ëma uvene aho røjahinövariije. ³ Ëhuni ave jöho uehorovore. God-are Aru'ahehu jö bojëmë'oho aho bogo uë'ë'ö: Iesu sisëgo sisëro va'a'ajëjo. God-are Aru'ahoho bogo ëhi jië'e jöho bojamuijajeje. A'i hesi God-are Aru'ahohuremu uehoroho bojamuijego uvaruje: Iesu bōrōme namijë'ëro iae Bada hōjo. O God-are Aru'ahehu uehoro bogo bojamuijê'oho nosi sivuoho ëhi jië'e jöho bogo vaerovo hesi javue.

⁴ Mu vaeröhe suvuoroho gö gö jiorove. Röhu Aru'ahe gemuëro ë suvuoroho bojamuibe va'ajeje. ⁵ Christian muoho gö gö jiorove. Röhu Badare muoho gemu noro vaejharujeje. ⁶ Mue gö gö vaejê'oho eni javue. Röhu God-ro gemuëro darugoho bojamuego no ae aho'obëhe ë muoho vaebe va'arueje. ⁷ No ae gemu gemu God-are Aru'ahëro suvuore bojamuijego ëhuro hesi muoho røjahirovarujeje ekaresiae ae aho'obëhe marëjavuoröhego. ⁸ Ae gö God-are Aru'ahëro hesi suvuore bojamuijego uehoro mae jië'e jöho atarueje. Ae gö Aru'ahe gemuohuro aji'e jöho bojamuijego ae rōjêhijarueje. ⁹ Ae gö Aru'ahe gemuohuro ajamuijego no biririvoromo God mae uehorovoromo ëhuro mu bövi mae vaejarueje. Ae gö Aru'ahe gemuohuro ajamuijego guomo guomo'e a jabesi sinoho avohëharueje. ¹⁰ Ae göëro darugo'e muoho vae'amarueje. Ae göëro jö God-aro baeromo ae huruoho majëhijarueje. Ae göëro gavarujeje di muoho God-are Aru'ahëro vaejê'e jiego di muoho bogo. Ae göëro bogo hejarue huë göëro göëro ëma atarueje. Ëma atego ae göëro ëhi jië'e jöho huotovoromo nosi jöëro majëhijarueje aëro hejōro. ¹¹ Ëhi jië'e muoho aho'obëhe bogo aru'aho göho göho vae'amo'i ma-gemuëro vae'amajeje. God-are Aru'ahehu diehi nimë'oho ae gö gö hesi suvuore gö gö bojamuibe va'ajeje.

No Keriso-are sine gemuoho javue röhu no hesi öve duruajje gö gö javuo'amajje jöhoje.

¹² Röhu no ae gemu gemu sino haho'oho ma-gemu javue röhu öve hōre nune hia'e bövie bise'e aho'o javue. Iae öve nune hōre gö gö aho'o javuo'ame röhu sino haho'oho ma-gemu javue. Sino haho'o jiajëhi ëhi Keriso-are aribövioho no aho'o sinoho ma-gemu javue. ¹³ No ae aho'obëhe Jew rajoho sa'a ioro'ioro rajoho a jabesi darugoremu raromarue aribövioho nosi nimoro mu vaejarue aribövioho God-are

Aru'ahe gemuohuro bapataeto vaejavuoromo sine gemu bamavuë'eje. Ae aho'obêhe Aru'ahe gemuoho jovonö'e bojamuamu ijë'e javue.

¹⁴ Röhu sino haho'o hesi öve höre nune bövie bise'e bogo gemuoho jio'i aho'obêhe javuo'ame. ¹⁵ Röhu hörohuro jöe jövoromo uvo'ibejo: Na bogo övoho jevajëjo. Na bogo övoho jevë'ëro ëhuni sino haho'oho hahagu jevajëjo. Iae ëhi uvo'ibejo röhu ëho hesi jio'ibejo bogo ëhuro höroho sino haho'oho hahagu jio'i sino haho'e gemuoho jio'ibejo. ¹⁶ O hia'ohuro jöe jövoromo uvo'ibejo: Na bogo nunoho jevë'ëro ëhuni na sino haho'oho hahagu jevajëjo. Iae ëhi uvo'ibejo röhu bogo ëhuro hia'oho sino haho'oho hahagu jio'i sino haho'e gemuoho jio'ibejo. ¹⁷ Sino haho'oho ma-nuni'emu javuo'ibejo no diehi he'ibejo. O sino haho'oho ma-hia'emu javuo'ibejo no diehi ridamui'ibejo. ¹⁸ Röhu bogo ëhiohoje. God-ro diehi nimadëhi öve duruaje nune gö gö baeromo havo'amoromo ëhuro sino haho'e gemu bamavuadeje. ¹⁹ Öve duruaje nune gö gö bogojavuo'ibejo ëhuro sino haho'e bogojavuo'ibejo. ²⁰ Röhu öve duruaje nune gö gö aho'obêhe javuo'i röhu sino haho'oho ma-gemu javue.

²¹ Ëhi jië'ëro nunohuro jöe jövoromo övo hesi örire ua'ibejo: Ja bëhi rumo'e javo'ego na ja bogo negajë ua'ibejo ëho sisë jio'ibejo. O simanohuro jöe jövoromo höroho uë'ibejo: Jemë bëhi rumo'e jëvo'ego na jemë bogo negajë uë'ibejo ëho sisë jio'ibejo. ²² Röhu sino haho'ere inöme gö gö jio'amajoho ga'amoromo uvarueje: Jabesi darugoho u'uhë'e höjo. Ëhi uvo'ejo röhu ëho bogojio'amo'ibejo bogo eni javuo'ibejo. ²³ O sino haho'ere inöme gö gö jio'amajoho ga'amoromo uvarueje: Ma-inine jio'amajëjo. Röhu ëho bogo sisëho hö uvo'i mueberovo avoharueje. Sino haho'ere inöme gö gö jio'amajoho ga'amoromo uvarueje: Ëho javoji'e inömoho höjo. Röhu ëho bogo sisëho hö uvo'i ma-mabêhe avoho riogivorovarueje. ²⁴ O javoji rumo'e inömo no ma-mae ga'amaruoho ëho no bogo ëhioho avoho riogivorovarueje. Röhu God-ro nosi sino haho'oho havo'amoromo gemuoro avohahuadeje ëhuro noro garöhego di inömoho javoji'oho jiego o darugo rumo'oho jiego ëho avo'avoho muebe'amoröhego. ²⁵ Ëhu'ëro jië'ëro nosi sino haho'oho gemuoho javuë'ego ë hesi inömo göhuro göho bogo sisë vae'i a'i uvo'ejo: Gemuoho javuajëromo huë baerovoromo ma-ajamirovo'ejo. ²⁶ Sino haho'o hesi inöme gö vi'ehimë'oho sino haho'e aho'o ë vi'ehoho herovajeje. O sino haho'o hesi inöme gö hesi iho döre jië'oho sino haho'e aho'obêhe gemuoro nimorohajeje.

²⁷ Röhu jemë ae aho'obêhe Keriso-are sino haho'e jëve. Jemë ae gemu gemu sino haho'ere höre nune bövie bise'e jëve. ²⁸ God-ro hesi ekaresi-aho aho'obêhe gemuoro havoromo avoho bamavuadeje. A ioro'ioroho apostle bamavuadeje rue nuni maroho javuoröhego. Ëhesi bëhire jö God-aro baeromo a majëhjarue aribövioho bamavuadeje. Ëhesi bëhire Keriso-are öri röjëhjarue aribövioho bamavuadeje. Ëhesi bëhire darugo'e mu vaejarue aribövioho bamavuadeje. Ëhesi bëhire darugo baeromo guomo guomo'e a jabeti sino avohëharue aribövioho bamavuadeje. O a ajëmarue aribövioho ekaresia muebejëvarue aribövioho o no bogo hejarue jö göehu göehu atarue aribövioho ëhi bamavuadeje. ²⁹ Na no ae aho'obêhe apostle javue. Bogo. Na no ae aho'obêhe jö God-aro baeromo majëhjarue aribövie javue. Bogo. Na no ae

aho'obêhe Keriso-are öri røjêhjarue aribövïe javue. Bogo. Na no ae aho'obêhe darugo'e muoho vaejarueje. Bogo. ³⁰ O na no ae aho'obêhe daruge baeromo guomo guomo'e aribövï jabesi sinoho avohêharueje. Bogo. Na no ae aho'obêhe God-are Aru'aho suvuoroho baeromo jö göëro göëro atarueje. Bogo. Na no ae aho'obêhe God-are Aru'aho suvuoroho baeromo huë göehu majêhjarue jôho huotovoromo sama'e majêhjarueje. Bogo. ³¹ Jemëro uvarujeje: Aru'aho suvuoro mabêhe bae'ië'ajëromomo bae gavarujeje. Röhu öri maho naro røjêhi'ejo göehu gö uehorovëvo'irarije öroho.

13

Göehu gö dë vövöbajo'ere uehorovo'iröhe jöhoje.

¹ Noehu bogo hejarue huë göehu göehu naehu jövo'irodoho eni jevë'oho o anera jabesi huëhu êhu'o jövo'irodoho eni jevo'i röhu a dë vövöbajo'ehu bogo uehorovëvë'oho na bitare garaegaraevanovoromo jôho ëma jövo'ejo. ² O naehu suvuoro God-aro baeromo hesi jö ma-mae majêhijë'oho o huhu subivahuade jôho aho'o nuni aji'e jôho aho'o ga barëjë'oho o biririvo avohoromo hesi örire mae uehorovoromo êhuro dahoru ujuohoromo rori'o bahijanovobe va'i röhu a dë vövöbajo'ehu bogo uehorovëvë'oho na bëhi rumo'e ae jeve. ³ O naehu a ajëmi'irögoro nasi bövi bise'o bojëmi barëjë'oho o nasi sinohu'o bue'öjevojöro bojamirovo'i röhu a dë vövöbajo'ehu bogo uehorovëvë'e ma-sino döhuremu êhi ajëmi'irögoro êhuro bogo maroho jevo'ë'e.

⁴ Jaehu a dë vövöbajo'ehu uehorovëvë'oho êhuro biririvoromo ma-ga taemo'anue. Ae huë baejëvo'anue. A dë vövöbajo'ehu uehorovëvë'oho êhuro ae gö hesi mu mahunioho bogo dë vörönago'ë'e. Bogo nimoronimorohë'ioho jövo'anue. Bogo sivuoho uehorovoromo döroho bamorovo'anue. ⁵ Bogo ma-mahu urejonö'oho juvo'a'anue. Bogo jasi sinohemu uehorovo'anue. Bogo uehore gö gö baeromo vörönimo'anue. Bogo ae gö jabesi sisëho uehorovemu uehorovo'anue. ⁶ Mu sisë garomo bogo êhunioho nimoroho'anue. Jö maemu heromo êhuro nimoroho'anue. ⁷ A dë vövöbajo'ehu uehorovëvë'oho êhuro huë vavaene rovë'oho ma-gavë'i hinövo'anue. Mae uehorovonövo'anue. Mae jio'a'ajë uvoromo muebenövo'anue. Biririvoromo naminövo'anue.

⁸ A dë vövöbajo'ehu uehorovëvarue muoho bogo barë'i êhi majiëmu jiajeje. Jöe gö gö God-aro baeromo majêhjarue suvuoroho iae barë'ë'e. Noehu bogo hejarue huë göehu göehu atarue suvuoroho iae bogojio'ë'e. A ioro'ioro iosirëmiromomo God-are jö mae gavarue suvuoroho iae barë'ë'e. ⁹ Êhesi bëhoho jaruvoho God-are mu vituoho gavarueje. Vituoho bogo. Jö vituoho God-aro baeromo majêhjarueje. Vituoho bogo. ¹⁰ Hujëji aji ma-mabêhe rue'iramu evare jöe mue gö ga'i gö bogo gavarue ë muoho iae barë'ë'e.

¹¹ Êhesi jôho uhu'e uë'ië'e. Na asisö'e jevade majaroho asisö'ehu ataruëhi êhi jövonövodeje. Asisö'ehu nimiruëhi êhi nimonövodeje. Asisö'ehu uehorovaruëhi êhi uehorovonövodeje. A'i ma'e jevade majare evare asisö'o uehoroho vuonugo'i ma-mae uehorovodeje. ¹² Êhesi bëhoho jaruvoho no sisë'i sisë'i aririro gavanovarueje. Majae ijönöho avoho ga'ejo. Jaruvoho jö vituoho naro gave. Jö vituoho bogo gave. A'i evare majaroho God-hu na gevajëhi na'o êhi muoho ga

barë'ejo. ¹³ Èhu'ëro ave muoho ma-jiemu jio'amobe va'ë'e. Gôho God mae uehorovarue muohoje. Gôho no uvarue: God-ro ajamui'iramu mae javuobe va'a'ajë uvarue muohoje. Gôho a dë vövöbajo'ehu uehorovëvarue muohoje. Èhi jië'e muoho niö'i gemu èhi jiemu jioje va'ë'e röhu a uehorovëvarue muoho èho böviohoje.

14

God-are Aru'aho hesiro baejarue suvuore niö'i God-are jö ae huruoho majëhijarue suvuorohu'o bogo hejarue huë göehu atarue suvuorohu'o ë suvuoro jabesi jöhoje.

¹ Èhuni göehu gö dë vövöbajo'ehu uehorovë'irarije muoho vae'i èhuremu ömo gare. Röhu aru'aho suvuore gö gö bae'i nimore. Jö God-aro baeromo a huruoho majëhi'irarije suvuoroho èho böromö bëhe nimore. ² Aehu aru'aho suvuoro baeromo bogo hejarue huëhu jövë'oho èho bogo aho he'i ma-God-remu hejörö jövajeje. Huë göehu jövë'oho suvuore Aru'aho hesiroho baeromo gurihijë'e jöho jövego aho bogo hejarueje. ³ A'i jö God-aro baeromo a huruoho majëhijë'oho aëro hejörö jövajeje heromo birire baeromo muoho avoho ma'enoröhego o huë vavaeni jëvadoho mae jëvoröhego. ⁴ O bogo hejarue huëhu jövë'oho hesi dë vövöbajo'ohemu ajamirovajeje. A'i God-are jö huruoho majëhijë'oho ekaresiaho ajëmajeje. ⁵ Jemë ae aho'obëhe huë göehu atë'oho iae na nego'ibejo. A'i jemë jö God-aro baeromo huruoho majëhi'irarijoho èho iae na nego avoho'ibejo. Jö God-aro baeromo a majëhijë'oho èho mu böromeje. O huë göehu atë'oho ë muoho ma-bisemu bise'eje. Röhu huë göehu atamu ae göehu jö huotovë'oho ekaresiaho ae aho'obëhe he'iramu mae jëvo'ë'e. Èhi jië'oho mu böromeje.

⁶ Nasi ö mueno'e na ö'oromo subivëhë'e jö bogo huruoho majëhi'i nuni ajile jö bogo majëhi'i bogo jö God-aro baeromo majëhi'i mu öri bogo röjëhi'i a'i bogo hejarue huë göëremu naehu jövë'oho jemë heromo bogo marëjëvo'ë'e. ⁷ O hesi ëma momorö'öjaje inömo inömo viriköe o gita èhi jië'e inömo uehorovore. Aruëre anumëre ëma huë'oho o bejë'oho èhuro huëho bogo avoho hejarueje rabu jö huajoho o bejajoho. ⁸ O muorovo jöhu'o uehorovore. Hëgö sisë'i huë'oho bogo avoho heromo avoho raromö'ë'ö muorovo'iröhëni. ⁹ Èjö hesi bëhoho no bogo hejarue huë göehu jemëhu atoromo sisë'i majahuijë'oho no bogo avoho he'ejo. Jemë jöho ma-bu'ö'a'aruje. ¹⁰ Sa'ae aho'obëhe huë gö gö atoromajeje. Röhu huë aho'obëhe bëhi'oje. ¹¹ Röhu na ave huë bogo baejë'oho jö jövaje ahuro uvo'ë'e: Nörö huë gö ae höjo. O naro uvo'ejo: Hu huë gö ae höjo. ¹² Huë göehu atë'oho jemë èhi jëvo'ë'e. Huë göehu ato'irarijoho nadi èhemu nimo'i a'i jemë suvuore God-are Aru'aho hesiro bae'i nëgë'e jiaje èhuni ekaresia ajëmi'irarije suvuoroho baeromo ë hesi muoho avoho vae'i nimore.

¹³ Èhuni ja huë göehu jövë'oho God uavego ajami'iro èhuro jöho huruoho majëhi'irane. ¹⁴ Naehu bogo hejaje huë göehu pari vaejë'oho nasi aru'ahoho parie vae'i simanoho uehore bogojio'ë'e. ¹⁵ Èhi jië'oho na diehi ë'ejo. Nasi aru'ahohuro parie vaeromo röhu nasi simanohu'o uehorovoromo parie vae'ejo. Nasi aru'ahohuro èhuro jöho io'ejo. Röhu nasi simanohu'o uehorovoromo jöho io'ejo. ¹⁶ Jemë'o uehorovore. Jemesi simanoho bogo uehorovë'e bogo hejarue huë göehu

ma-arua'ahohuremu atoromo God mae uavë'iroho suvuoro bogo baejë'e ahuro jemesi gemuore rueromo jöho heromo bëhoho bogo he'ë'e. Bogo heromo dadivo'iramu bogo uvo'ë'e: Iae mae-ëjo. ¹⁷ Ja God mae uavane jöho nani mae jövaneje. Röhu ë ahuro bogo avoho hejë'ëro ëhu'ëro dë vövöbajö'oho bogo maho jio'ë'e.

¹⁸ Röhu Paul naro suvuore God-are Aru'aho hesirire baeromo jemë iosirëmiromu majae aho'o huë göëro göëro jövajeje. Ëhuni na God mae uave. ¹⁹ Ëhi jie röhu na uehorovoromo uve: Ekaresia gemuore jevë'oho jö ëgobövie huë göëhu jövë'oho ma-jianovo'i aëro God-are jöho avoho heruomajöro jö biseharihe ma-sama'e jövë'oho ëho bërömofoje.

²⁰ Nasi ö mueno'e asisö'o ininehu mu sisë bogo uehorovaruëhi jemë'o ëhi gemuoho uehorovore. Röhu mu ioro'ioro asisö'ehu uehorovaruëhioho nadi ëhioho uehorovo'i a'i a duvahëro uehorovanovore. ²¹ God-are surire jöho ëhi uvë'eje: Badaro uvajëjo: Naehu ave aribövi jö majëhi'ië'iroho huë göëhu atarue aribövioho uë'iramu nasi jöho bava'oromo bojëmi'aruëjo.

Sa'a gö rajoho röjëhi'iramu nasi jöho bava'oromo majëhi'aruëjo. Röhu bogo ëhuro ave aribövioho ejeho'aruëjo.

²² Ëhuni suvuore Aru'aho hesiro baeromo huë göëhu atarue muoho ëho God bogo ma uehorovarue ariböviohuremu heromo uehore baeröhego. O jö God-aro baeromo huruoho majëhijaruë muoho ëho God mae uehorovarue ariböviohuremu heromo huë mae jëvoröhego.

²³ Jemë'o uehorovore. God-are ekaresiae ae aho'obëhe gemuore gagovoromo ae aho'obëhe bogo hejarue huë göëhu göëhu atamu ekaresia mu bogo gavë'e ariböviehu o Keriso bogo ma uehorovarue ariböviehu rovë'iroho jaburo heröhe bogo hejarue huë göëhu ëhi atamu hejë'oho uehorovoromo uvo'ë'ö: Ëekaresia ariböviohuro simane sisërëromu ehuro jöjövuvoruomajëjo. Jemëhu huë göëhu atë'oho ëhi jio'i ²⁴ a'i ekaresiae ae aho'obëhe jö God-aro baeromo huruoho majëhijamu Keriso bogo ma uehorovaje aehu o ekaresia mu bogo gavë'e aehu rovë'iroho huro heröhe jemëro God-are jöho majëhi'iramu hegorovo uehorovoromo uvo'ë'e: Nasi jö sisëho iae ataruëjo. Na sisë jëvajëjo. Ëhi uvo'ë'e. ²⁵ Ëa hesi uehoro sisë gurihijadoho jaburo ato'iramu va'orahoro jio'ë'e. Va'orahoro jio'iramu sa'are ague aho hiromu God rajahiromu uë'ë'e: God jemë'o jiajëjo.

Gagovoromo God rajahijë'oho ma-avoho rajahi'iröhe jöhoje.

²⁶ Nasi ö mueno'e naehu jajivaje jö hesi bëhoho uehorovore. Ekaresia gagovë'iroho ae göëro uë'ë'e: Ë'ego no ave jöho iarëjo. Ae göëro Keriso-are öroho röjëhi'ë'e. Ae göëro gurihijë'e jöho huruoho majëhi'ë'e. Ae göëro bogo hejarue huë göëro jövo'ë'e. Ae göëro ë jö hesi bëhoho huotovoromo majëhi'ë'e. Röhu ë muoho aho'obëhe avoho vaerego ehuro ekaresiae aho'o birire baeruomö'i. ²⁷ Röhu bogo hejarue huë göëhu ato'ië'iroho ae niö'iro o ae niö'i gemuëro ato'i a ioro'ioroho nadi atore. Röhu bogo majae gemuoroho ae aho'o ato'i ae gemuëro gemuëro jövobe va'ore. Jövobe va'ego ae gemuëro ë jöho huotovoromo aho majëhine. ²⁸ O jö huotovo'iröhe a bogojjë'oho huë göëhu jövaje ahuro ekaresia gemuore jörume hiromu hesi arijo'arije majahirovë'i God-are örire jöe jövo'ë'e. ²⁹ O jö God-aro baeromo majëhi'ië'iroho

ae niö'iro o niö'i gemuëro jöho majëhire. Majëhijego a ioro'ioroho jemëro jöho heromo mevo gare jöho mae o sisë jiego. ³⁰ O ae göehu jö majëhijamu röhu ae göehu sa'are hiromo hejë'iroho God-are jöehu hesi dë vövöbajo'ere rovamu hegorovo jö jövo'ië'iroho urimo jövane aharo vuonugonego ijore ahuro jöho jövo'iro. ³¹ Èhi'o'iramu jemë ae aho'obëhe röhu ae gemuëro gemuëro God-hu bojëmijaje jöho majëhibe va'a'aruje ëhuro ae aho'obëhe jöho he avohoromo birire baerumoröhego. ³² Nadi ma-majioho majëhi'i a'i ma-taemorovoromo majae eni jiego evaro majëhinövore. ³³ Èhesi bëhoho God bogo uövuajeje noro garatöhuritövë'e raromo'i ma-avoho taemo raromojöro uövuajeje.

Röhu God-are aribövi ioro'ioerehu gagovoromo vaejaruëhi jemë'o ëhi gemuoho vaere. ³⁴ Ekaresia jemëhu gemuore gagovë'iroho jemesi magonahohuro jörume raromo'iro. Jabumë jöho nadi majëhi'iro. God-are surire jiajëhi ëhi magonahohuro nadi masijoho riravo'i ma-jöemu ejëhobe jijih'o'iro. ³⁵ Jabumë God-are jö avoho he'i nimoruomë'o'oho jabesi osaro raromoromo baruoho uë gë'iro rabëni ekaresiae gemuore raromoromo jöe atë'o'oho bogo maehu jië'e jiaje.

³⁶ Röhu nani jemë sarerivoromo uvarujeje: Corinth rajo aribövioho noro aevoromo God-are jöho majëhibe va'are höjo. O nani uvarujeje: God-are jöho bogo sa'a göroho va'i ma-nosiriremu rovë'e höromo ëhuni jemë gemuore gagovë'o'oho jemesi sivue uehorovoromo magonahoho jahu'o God-are jöho atoromajeje. ³⁷ A'i jemë ae rahu uvë'o'oho: No jö God-aro baeromo majëhijarue ae javuajë uvë'o'oho o no God-are Aru'ahëhu uehoro ma bojamuego jö atarue ae javuajë uvë'o'oho uvore: Paul bogo ma-jajivo'i a'i Badaro jöho bojamamu jajivade höjo. ³⁸ Ae rahu nosi jö bogo uehorovë'o'oho nadi jabesi öriroho uehorovore.

³⁹ Nasi ö mueno'e ëhu'e jiaje jöe God-aro baeromo huruoho majëhi'i nimo avohore. O suvuro God-are Aru'aho hesiro baeromo bogo hejarue huë göehu ataruoho ëhi jië'e muoho nadi ahore. ⁴⁰ Röhu ekaresiae gemuore gagovoromo vaejaruje muoho aho'obëhe ma-avoho vaere.

15

Kerisohu guomoromo ri'öjade jöhoje.

¹ Nasi ö mueno'e Keriso-are jö maho na majëhi'ejo jemë röhu maho uehorovo'irarijego. Èjöho naro mami'e majëhijamu jemëro heromo ejë'ëro ëhuro mae biririvoromo riravarujeje. ² Na majëhamu hejarije ë jöho biririvoromo ma'enë'ohuro ëhuro maro raromarujeje. O ma-döhuremu uehorovë'o'oho bogo ëhioho maho jëvajeje.

³ Jö börömo böröme hejë'ëro jemesi örire majëhijodoho röhu maho majëhi'ië'e. Kerisohu guomo'iröhe jöho God-are surire jajivarëhi ëhi huro nosi sisëni guomade höjo. ⁴ Guomoromo guavamumu raromoromo majae niö'i gemu hesi uhure God-ro i'ovamu ri'öjade höjo. Èhi jië'e mu vaeröhe jöho God-are surire jajivo'amare höjo. ⁵ Röhu Kerisoro ri'önugoromo Peter-are nunire rueromo evare apostle aho'obëhe jabesi nunire rovadeje. ⁶ Ijonö hesi ijorajo ömo'omoho 500 iosirëmiromo ruëhi jië'e majae gemuore jabesi nunire rovadeje. Jaruvoho ë aribövioho ma-gemu gemu vuovëvo'i röhu aho'obëhe biririvoromo raromoruome.

7 Ĕhi jiĕ'ĕro James-are nunire ruenugoro mo apostle ae aho'obĕhe jabesi nunire rovadeje.

8 Rueromo ijo tugoho'i nasi ĕrĕ rovam u na'o nasi nunĕro gavodeje. Apostle ioro'ioŕehu Keriso aevoromo uehorovarĕhioho na bogo ĕhioho aevoromo hu mae uehorovo'i a'i mu sisĕ bĕhe vaeromo ma-majioho mae uehorovodeje. Ĕhu'ĕro jiĕ'ĕro vĕmehu sisĕ'i rahego harihehu ma-majioho rovajĕhi na ĕhi jevanove. Na urimo ramoram'ere hĕromo ma-majioho Keriso-are ajire rovodeje. 9 Apostle a ioro'iorohuro na iosiremiromo a masije jio'i na ma-bise'e jeve. Urimĕ'i naro God-are ekaresiae huĕ sisĕ bojĕmi'i hijĕ'ĕro ĕhu'ĕro apostle iho baejodoho na bogo maho jeve. 10 Ĕhi jie rĕhu God-ro hesi nimoromo huĕ baeromo ajemijĕ'ĕro ĕhuro na mae jeve. Huro ajemijĕ'ĕro na bogo ĕma hi'i a'i naro apostle ioro'ioroho iosirĕmiromo muoho darugo'o vaejĕ'e jeve. Rĕhu bogo nasi biriroho baeromo ĕhuro muoho vae'i hesi God-ro nimoromo huĕ baeromo ajemijĕ'ĕro vaejodeje. 11 Ĕhu'ĕro jiĕ'ĕro Keriso-are jĕ naehu majĕhijĕ'o ho o apostle ioro'ioŕehu majĕhijĕ'o ho Kerisohu guomoromo ri'ĕjade jĕe gemuoho no majĕhijarueje. Rĕhu ĕ jĕho jemĕ iae mae uehorovarijeje.

Noehu vuovoromo ri'ĕ'irĕhe jĕhoje.

12 Kerisohu guomoromo ri'ĕjade jĕho noro majĕhibe jijiharueje. Ĕjĕ majĕhibe jijihĕ'o ho jemĕ a ioro'ioroho diehi'oromo atoromo uvarujeje: Aho vuovoromo rĕhu bogo maho ri'ĕ'ejarĕjo. Nadi ĕhioho atore. 13 Aho vuovoromo bogo ri'ĕ hesi javuo'ibejo Keriso hu'o bogo ri'ĕ'ibejo. 14 Keriso bogo ri'ĕ'ibejo no ma-imo jĕho majĕhijego jemĕro ma-imo mae uehorovo'ibejarije. 15 Rĕhu aviĕhi jiĕ'e mu sisĕ gĕ'o dĕre jio'ibejo. No bogo ri'ĕ hesi javuo'ibejo God-hu Keriso ajamamu ri'ĕjade jĕ noehu majĕhijaruho sareri'e jĕe jio'ibejo ĕhuro nomĕ God-are jĕho a nuniro sareri'e majĕhi'ibejo. 16 Vuovĕ'e aribĕvioho bogo ri'ĕ hesi javuo'ibejo ĕhuro Keriso hu'o bogo ri'ĕ'ibejo. 17 Rĕhu Keriso bogo ri'ĕ'ibejo jemĕro Keriso-are ĕrĕ ma-imo uehorovo'ibejarije God jemesi sisĕho bogo uehorovoromo vuonugo'ibejo ĕhuro sisĕ jĕvadoho avevejĕ'ohu'o ĕhi gemuoho jĕvo'ibejo. 18 O Keriso mae uehorovoromo vuovĕ'e aribĕvioho sisĕro va'oruomo'ibejo. 19 No vuovoromo sisĕro va'o hesi javuo'ibejo no uvo'ibejo: Kerisoro ajamui'iramu ave sa'arohemu maroho raromo'ejarĕjo. Ijonĕho bogo maroho javuo'ajĕ uvo'ibejo ĕhuro a ioro'ioro jabesi vavaenoho bise'e jio'i Keriso-are aribĕvi nosiroho bĕrĕmo mae jio'ibejo.

20 Rĕhu bogo ĕhioho jio'i a'i Keriso guomoromo iae ri'ĕjĕ'eje. Ri'ĕjĕ'ĕro ma-oro'ioŕemu hijajeje. Ĕhu'ĕro no garomo uvarujeje: Vuovavujaje aribĕvi ioro'ioroho no'o ri'ĕ'ejarĕjo. 21 Ave sa'are hijade ae gemuĕro aevoromo mu sisĕ vaeromo guomĕ'ĕro ĕhuro vuovavuobe rovajeje. Rĕhu ave sa'are hijade a gĕho aevoromo ri'ĕjĕ'ĕro ĕhu'ĕro vuovoromo ri'ĕ'ejo. 22 Ĕhesi bĕhoho ae aho'obĕhe Adam-are ae gemuohuro javuĕ'ĕro ĕhu'ĕro vuovavujajeje. Rĕhu ae aho'obĕhe Keriso-are ae gemuohuro javuĕ'ĕro ri'ĕromo raromo'ejo. 23 Ae gĕ gĕ aho'obĕhe jabesi majaho rovego ri'ĕjarueje. Urimĕ'i Kerisoro ri'ĕjadeje. Ijonĕ Kerisohu rui'iramu evare hesi aribĕvioho no'o ri'ĕ'ejo. 24 Ri'ĕ'iramu evare jaruvore majaho iae barĕ'e'e. Jaruvore majaho barĕ'iramu evare Kerisoro

vörö'e sisë aribövie gö gö ruahö'öjévo barëromo öri ari'e aho'obëhe God Vavu hesi övore bojami'ë'e huro mueberöhego. ²⁵ O avevejö'oho God-ro nimo'ego Kerisoro böröme namiromo öri ari'e aho'o muebejuvo hujeji ijonö God-ro a sisëho mu sisëho ruahö'ö'amo barë'ë'e Kerisoro hörëro vijuvo taemego barë'iröhego. ²⁶ Huro mu sisë ioro'ioroho urimo ruahö'ö barënuoromo a vuovavuaie öroho ijo tugohoi ruahö'ö'iramu barë'ë'e. ²⁷ Èhesi jöho God-are surire jajivoromo uvë'eje: God-ro ae mue bövie bise'e aho'obëhe bahijahamu huro hörëro taemë'e höjo. Kerisohu ë'aje jöho ëhi jajivë'eje. Èhuni no uvarueje: Vuovavuaie örohu'o huro hörëro taemo'iramu iae barë'ajëjo. Röhu aho'obëhe Keriso-are aharinö jiaje hesi bëhoho God bogo a'i a ioro'ioroho aharinö jioruomajeje. Èho samaeje. Rabëni God-ro bövie bise'e Keriso-are aharinö bahijadeje huro mueberöhego. Èhuni God bogo Keriso-are aharinöho jio'ë'e. ²⁸ Röhu bövie bise'e Keriso-are aharinö bahi barë'iramu evare God-are Harihohuro God börömo mae jiaje hesi aharire va'o hi'ë'e God-ro aho'obëhe Keriso-are aharinö bahijahë'ëro jië'ëro. Èhu'ëro jië'ëro God-ro gemuëro böröme namiromo bövie bise'e aho'o muebejavuo barë'ë'e.

²⁹ Röhu jemë'o uehorovore. A ioro'ioroho bapataeto vaejëvarueje mami'e vuovë'e aribövioho ajëmi'iröhego. Röhu vuovavuë'e aribövioho bogo ri'ö hesi javuo'ibejo bëhoho rabëni vuovë'e aribövi jabesi jöëni bapataeto vaejëvarueje. ³⁰ Röhu no diehi javuaie jöhu'o uehorovore. Noro Keriso-are jöho majëhijego aëro bijönimoruomoro muë sisë bojamuego èhuro majae ëhi vörö'ere raromarueje. Vuovoromo bogo ri'ö hesi javuo'ibejo vörö'ere raromaruoho bëhi rumo'e jio'ibejo. ³¹ Nasi ö mueno'e Paul na majae ëhi vörö'ere jevë'ëro guomevo'ië'ajeje. Na mae uëve. Jemë'o na'o nosi Bada Iesu Keriso-are ae gemuohuro javuë'ëro naro jemesi jöho uehorovoromo nimorohajeje. Èjöho iae maeje. Röhu guomevo'ië'aje hö uëvaje jöho èhu'o iae jö maeje. ³² Na Ephesus hiromo ave sa'a hesi suvuorohemu uehorovo'ibejo na Keriso-are jöënioho vörö'e miroho bogo va'oromo jabu'oho muorovanovoromo vavaenoho bae'ibejo. A'i vuovë'e aribövioho bogo ri'ö hesi javuo'ibejo aehu atarue jöho ejëhoromo uvo'ibejo: Ioho jovoho ma-ue'ahë'e raromo'ëjarëjo ruëroho no ma-vuovo va'ië'ëro.

³³ Ae gö jabesi sareri sareri'e jö uehorovarujoho vuonugore. Vuonugoromo ave a mami jögoroho uehorovore. Sisë ariböviohu'o gemuore buaröhë'oho èhuro nosi mu maho ijumahuaje höjo. ³⁴ Mu sisëho vuonugo'i avo'avoho uehorovore. Jemë ae gö gö God bogo mae bogo gavarujeje. Jemë javoje baejörö èhuni uëve.

Noehu vuovoromo ri'öjego nosi sino haho'oho nu ano'e gö javuoröhe jöhoje.

³⁵ Ae göëro ue'a'anue: Röhu vuovë'e aribövioho diehi'avuo'iramu ri'ö'ëjarëjo. O diehi jië'e sino haho'e jioromo rue'ëjarëjo. ³⁶ Ja simane garae'ëro ëhi jië'e jöho majehi'anue. Ja ujo öjë'iroho bogo ëma ri'ö'ë'e. Su'oho sagohori'iramu röhu i'e rëdijiomoromo ri'ö'ë'e. ³⁷ O ja iruno'e ö'ië'iroho ahohu'o hanohu'o u'emu jioröhoho bogo ö'i a'i ma-ujohemu ö'a'anue. Nani wheat uje o rabe ö'a'anue. ³⁸ Ö'iramu i'e rëdijiomoromo God-hu nimadëhi ëhi nu ano'e gö gö jiobe va'ë'e.

³⁹ Röhu göho amore je'ore jovre raromaru aho majoho bövioho bise'oho nosi sino haho'oho bogo gemuoho javuo'i nu ano'e gö gö javue.

A nosi nu ano'o'oho gö javuo'i sa'are majo hesi nu ano'o'oho gö jio'i ugo hesi nu ano'o'oho gö jio'i jovo majo hesi nu ano'o'oho göje.

⁴⁰ Röhu ö'idö inömo'ho sa'a inömo'ho iae jiorove. Röhu ö'idö inömo'ho nu ano'e mabëheje röhu gö jio'amo'i sa'a inömo'ho nu ano'e mabëheje röhu gö jio'ame. ⁴¹ Maja hesi nu ano'o'oho mabëhe röhu göje. Manaero hesi nu ano'o'oho mabëhe röhu göje. Jiji mujöru'o jabesi nu ano'o'oho mabëhe röhu gö jio'ame. Jiji mujöru'o jabesi nu ano'o'oho mabëhe röhu gö gö jiorove.

⁴² Ejö uhu'e majëhijode hesi bëhoho ëhije. Sa'are inöme ö'idöre inöme bövie bise'e gö gö jio'amajëhi ëhi sa'are guavarue sinohu'o ri'ö'iröhe sinohu'o gö gö jio'amajeje. Sa'are guavarue sinoho sagohori'iröhe sine jio'i ri'ö'iröhe sinoho bogo sagohori'iröhe sinohoje. ⁴³ Sa'are guavarue sinoho nu ano'e bogo maehu jio'i ri'ö'iröhe sinoho nu ano'o ma-mabëhe ri'ö'ë'e. Sa'are guavarue sinoho darugo rumo'e jio'i ri'ö'iröhe sinoho darugo ma'e ri'ö'ë'e. ⁴⁴ Sa'are guavarue sinoho sa'are raromoromo mu vaejarue sinoho jio'i ri'ö'iröhe sinoho God-arire raromoromo aru'o'oho mu vaeröhe sinoho javuo'ë'e. Sa'are mu vaejarue sino haho'e javuë'ëro ëhu'ëro uvarueje: Aru'aho muemu vaeröhe sino haho'e iae jiaje höjo. ⁴⁵ Ehesi jöho God-are surire jajivë'eje. Nosi urimore aevo'i jiade bëhoho Adam-are jöhoje. Jajivoromo uvë'eje: Eähuro aevoromo darugoho baeromo ave sa'are hijade höjo. Ehi jajivë'eje. Röhu nosi ijore aevo'i jiade bëhoho Keriso-are jöho uvarueje: Hu ijore rovide Adam jianovajëjo. Eähuro aevoromo aru'aho'e muoho vaeromo nosi aru'ahoho darugoho bojamuadeje. ⁴⁶ Aru'aho hesi darugoho bogo urimoho baeromo raromo jijihö'i a'i ave sa'a hesi darugoho urimo baeromo raromo jijiharueje. Evare ijönö aru'aho hesi darugoho baeromo raromo jijiharueje. ⁴⁷ Röhu urimore jiade aho sa'aëro avohë'ëro sa'a sine jiadeje. Ijore jiade aho ö'idöre jië'ëro ruvebijadeje. ⁴⁸ Sa'a sino a jiadëhi no'o sa'a sino javuobe rovajeje. Ö'idöre jioromo rovide a jiajëhi u'emu ö'idö aribövioho no'o ëhi javuobe va'ë'e. ⁴⁹ Röhu sa'a sino a hesi nu ano'o baebe rovaruëhi u'emu ö'idö a hesi nu ano'o'oho ëhi baerumo'ëjo.

⁵⁰ Nasi ö mueno'e naehu jajivaje jö hesi bëhoho ave sa'a hesi sinoho no bogo ëhu'o baeromo va'o God-are öri ari'ero'ho raromo'ëjo. O sagohori'iröhe sinoho bogo ioro'io'oremuoho javuo'ë'e.

⁵¹ Gurihijë'e jöho na huruoho majëhi'ie'e here. A ioro'io'oro'ho bogo vuovavuo'ë'e. Röhu ae aho'obëhe nosi sinoho gorosovoromo ajoho bae'ëjo. ⁵² Ijo tugoho'i majare hëgöe huo'iramu baderivanovo'iramu evare ga'ëjo sinoho mami'e gorosovavuë'e jio'iramu. Hëgöe huo'iramu vuovë'e aribövioho ri'öruomo'ë'e ijönöho bogo vuovo'i ma-oro'io'oremu raromöhëro. Ri'öruomo'iröhoho no aho'obëhe gorosovavuo'ë'e. ⁵³ Ehesi bëhoho God-ro nimë'ëro ave sagohori'iröhe sinoho gorosovoromo ehuro bogo sagohori'i ma-jiemu jio'be va'oröhe sinoho javuo'ë'e. Vuovo'iröhe sinoho gorosovoromo ehuro bogo vuovo'i ma-jiemu jio'be va'oröhe sinoho javuo'ë'e. ⁵⁴ No ëhi gorosovo'iramu evare ave God-are surire jö jajivarëhi ëhi jio'ë'e. Jajivoromo uvë'eje:

Vuovavuae öroho God-ro ruahö'öromu mu'u barëjë'e höjo.

⁵⁵ Vuovavuae öri hesi darugoho dinö'e höjo.

Guomavuaaje öri hesi vöröho diae höjo.

⁵⁶ Vuovavuaaje vörö hesi bëhoho no mu sisë vaejego vuovavuaajeje. O mu sisëhu ruahö'öjavuaaje hesi bëhoho God-are jöho aharueje. ⁵⁷ Iae ëhi jie röhu God-are örire mabëhe ua'ejo. Huro nosi Bada Iesu Keriso uavë'ëro huro vuovavuaaje örohu'o mu sisë ioro'iorohu'o ruahö'ö'amajeje ëhuro no mae javuoröhego.

⁵⁸ Nasi ö mueno'e vuovavuaaje öroho barë'ië'e jiaje ëhuni nami bibivoromo God-are muohuremu avoho vaenövore. Ëhesi bëhoho jemë garomo uvarujeje: I'u'e mu Badare ihore vaejaruoho ëho no bogo ma-imo'i vaejarue höjo.

16

Jerusalem ekaresia ajëmi'i Corinth rajo ariböviehu ijo bajo gagovo'iröhe jöhoje.

¹ Röhu God-are aribövi Judea sa'are bogo eni jëvajohuni jemëhu ijo bajo gagovo'irarije jöho na majëhi'ië'e. Naehu Galatia sa'are God-are ekaresia mu bojëmibe juvodëhi jemëro ëhi jië'e muoho vaere. ² Hura börömo jië'iroho jemë ae gemuëro gemuëro ga'irarije ijo baje bövie baejë'e jëvego bövie tario bamore. O bise'e baejë'e jëvego bisemu tario bamore. Ëhi jië'oho na ö'iramu jemë ijo bajoho bogo naho'i ma-burëro baeromo bojemi'aruje. ³ Röhu ö'ë'iroho naro suri surire jajivoromo Jerusalem ekaresia a masijoho uë'ejo: Ave aribövi jabesi muoho ëhi höjo. Ëhi jajivonugoromo ë suri suriohu'o jemesi suvuorohu'o jemëhu baejëvarije aribövi jabesi örire i'imëmiromomo rëmö'ö'ejo ujuohoromo Jerusalem amore va'oröhego. ⁴ O na'o Jerusalem va'irodoho mae hö uvë'oho jabumë na'o gemu mae ö'ë'ö.

Paul-mëhu diehi ë'i uehorovare jöhoje.

⁵ Röhu Macedonia sa'are va'o juvoromo evare ö'ejo Macedonia sa'are juvo'ië'ëro jevë'ëro. ⁶ Ö'oromo nani majae bisemu ëgo'o jemë'o hi'ejo. Hesi nani'o nani buru majaho hi va'oromo barë'iramu na dinö'e va'irodire va'iramu jemëro ajemi'iramu mabëhe va'ejo. ⁷ Avevejö'e ö'oromo ma-burëro gëromomo va'ë'oho na bijönege. A'i na nege Badahu nimë'ohuro ëhuro na majae ëgobövie jemë'o gemu mae hi'irodëro.

⁸ Röhu avevejö'ocho ave Ephesus amoremu hibe va'ejo Pentecost majaho rueröhego. ⁹ Ëhesi bëhoho nasi öroho jiovehë'eje naro aviae hiromomo i'o mu'e vae'irodego. Röhu ae aho'obëhe nasi muoho aho'ië'ö. Ëhuni hiromomo muebe'ejo.

¹⁰ Röhu jö göho Timothy ö'ë'iroho avoho mueberego hu bogo juhuonivo'i jemë'o gemuoro mae hi'iro. Ëhesi bëhoho naehu Badare mu vaejajëhi hu'o ëhi jië'e muoho vaejajego ëhuni uëve. ¹¹ Nadi uvore: Hu ma-asisö'e höromomo nue huodivo'i a'i ajamiromomo nugö'öregomo nasi örire mae vuonorö'ö rue'iro. Rabëni na hiromomo muebeje Christian ö ömo'ömo rue'iröhire hu'o ë rueröhego.

¹² Röhu nosi öe Apollos-are jöho gare. Na Apollos dinamiromomo uavodeje: Christian ö ömo'ömo ioro'ioerehu Corinth amore va'ë'iroho ja'o va'onëjo. Ëhi uavodeje röhu avevejö'e jemesirire ö'iröhoho hu bogo mae bogo nimadeje. Röhu garöhe majaho eni jio'iramu gagorovo evare ö'ë'e.

Paul-are ijo tugoho'i jöhoje.

¹³ Röhu nadi momorö'ö'i öre uherihë'i raromoromo birivoromo Keriso mae uehorovore. Nadi juhuonivo'i a duvahonö'e daruge baeromo riravore. ¹⁴ Mu bövi bise'lo vaejë'iroho ae dë vövöbajo'ëro uehorovëvoromo muoho vaere.

¹⁵ Nasi ö mueno'e na negaje jö göhu'lo uë'ië'e. Stephanus'lo hesi aganohu'lo jabesi jöho jemë iae gavaruje. Greece sa'a rajoho jabumëro aevo'ioho Keriso-are jöho mae uehorovareje. Mae uehorovë'ëro jaburo God-are aribövi jabesi örire dë vövöbajo'e aho'lo uehorovëvoromo ajëmiarueje. ¹⁶ Ëhuni ëhi jïë'e aribövi jabesi jöho ejëhoromo ae rahu mue gemuoho ajëmiromomo birivoromo vaejë'oho jabesi jöhu'lo ejëhore.

¹⁷ Jemë rueromo na'lo jio'irarijoho bogo eni jëvamu Stephanus Fortunatus Achaicus ëho jabuhu jemë'lo röromo rovarohuro ëhuro na nimoroheve. ¹⁸ Ëariböviohuro jemesi dë vövöbajo'ocho sasohëhoromo nasirohu'lo sasohëhë'ejö. Ëhuni ëhi jïë'e aribövi jabesi öroro mae uehorovëvore.

¹⁹ Röhu God-are ekaresiae aho'obëhe Asia sa'are raromaruoho jaburo jemesi örire jejëmijö. O Aquila'lo Priscilla'lo Badare ihore dë vövöbajo'e aho'lo jejëmijö. Jabesi osare gagovarue ekaresiaho jabu'lo ëhi gemuoho ë'ö. ²⁰ Christian ö mueno'e aho'obëhe jemesi örire jejëmijö. God-are ariböviehu jejamirovaruëhi ëhi rajahirovoromo jejamirovore.

²¹ Ave jöho naro nasi övëro jajivo'ië'e. Paul naro jemesi örire jejëmije.

²² Ae rahumë Bada bogo ma uehorovë'ocho sisëro va'ë'ö. Bada jero ma-burëro ruene.

²³ Bada Iesuro huë baeromo jemë ajëminövo'ë'e.

²⁴ Jemë'lo na'lo Iesu Keriso-are agane gemuohuro javuë'ëro naro nasi dë vövöbajo'e aho'lo jemesi örire bojëmije. Ahia mino'e.

2 CORINTHIANS

Paul-hu Corinth ekaresia jejëmijade jöhoje.

¹ O asë'e God-are ekaresiae Corinth amore raromarujoho God-ro nimamu Iesu Keriso-are apostle jevë'ëro Paul na'o nosi öe Timothy'o noro niö'iro jemë jejëmiromo God-are aribövi Greece sa'a ioro'iorore raromarujoho jemë'o jejëmijö.

² No nague God nosi Vavuohu'o Bada Iesu Keriso'o huë baeromo ajëmijego maro raromo'irarijego.

Paul-hu huë vavaeni baeromo barëjë'ëro God rajahijade jöhoje.

³ Asë'e God hu mabëheje. Hu nosi Bada Iesu Keriso-are Börömeje o göho hesi Vavueje. Ëaho God Vavuoho hu mabëheje. Ëhesi bëhoho hu noni vavaenimo avohaje Vavuohoje. Hu sanuamuiromo ajamui avohaje A Börömohoje. ⁴ Huro gövuaje no huë vavaeni bövi bise'o baejamu gövuë'iroho sanuamuego biririvavuaajeje ëhuro huë vavaeni bövi bise'o baejë'e aribövioho no'o sanuëmijë'o ho eni javuoröhego. Sanuëmego jabu'o birire baeröhego. Huhu no sanuamuijadëhi no'o ëhi ë'oromo a ioro'ioroho sanuëmego mae jëvoröhego. ⁵ Kerisohu baejade ëhi jië'e huë vavaeni jovehu ruomanovoromo nosi örire rovajëhi ëhi Kerisohu nosi örire bojamuaje biriroho jovëro ruomanovajeje. ⁶ Noehu huë vavaeni baejarue ë hesi bëhoho jemesi jöëni baejarueje ëhuro jemë biririvëvego maro va'irarijego. O God-hu sanuamuego biriri baejarue ë hesi bëhoho gemuohoje. Jemesi jöëni baejarueje noehu baejarue ëhi jië'e huë vavaeni baejë'iroho ëhuro biririvëvego baberumi riravo'irarijego. ⁷ Röhu noro uvarueje: Noehu huë vavaeni baejarue gemuoho jemë'o baejarujëhi ëhi noehu biriri baejarue gemuoho jemë'o baejaruje hö uvoromo ëhuni uvarueje: Iae mae-ëjo. Jemë iae biririvo'arujëjo.

⁸ Röhu nasi ö mueno'e noehu Asia sa'are raromoromo huë vavaeni baejare jöho no nague jemëro avoho ga'irarijego. Huë gage marijamuiromo ijo'aho rumorëjavuoromo uehoroho barëjavuamu uvareje: Noehu vuovavuo hesi höjo. ⁹ Nosi herovoromo uvareje: Vuovavuo'iröhe jöho court-re majahuijamu hejanovë'e javuajëjo. Ëhi herovareje. Röhu ëhi herovare hesi bëhoho God-ro nimadeje noro uehorovoromo uvoröhego: Nosi sivuoho bogo eni javuo'i God-ro vuovë'e aribövioho ajëmego ri'ö'amajëro jië'ëro ëhu'ëro hesi huro ajamui'ajëjo. ¹⁰ Sisë döro vuovavuo'i höjadoho God-ro ujuohavuoromo maro ramuadeje. God-hu mare ramuadoho u'emu sisëro javuë'oho maro ramuo'ë'e. No hesi örire mae uehorovoromo uvarueje: U'emu sisëro javuo'iramu röhu maho maro ramuo'ajëjo. ¹¹ Jemëro ajamuiromo nosi jöëni God ua'iramu huro iae ëhi ajamui'ë'e. Ae aho'obëhe ëninami'iramu nosi örire huë baejavuoromo ajamui'ë'e. Ëhuni ae aho'obëhe nosi jöëni hesi örire mabëhe uaruomo'ë'e.

Paul-hu Corinth amore va'i uëromö röhu bogo va'ade ë hesi jö bëhi Paul-hu majëhijadohoje.

¹² Ave jöho no uehorovoromo nimoroharueje. Herovoromo uvarueje: Iae mae-ëjo. God-ro ajamuego no bogo ma-döëremuoho muoho vae'i nosi dë vövöbajo'o uhohu'o ma-va'orahoro a jabesi örire röhu jemesi

örirohu'o vaejēvarue hōjo. Bogo aehu ēma uvaruoho: Simano ma'e uehore hō uvaruoho bae'i a'i God-hu huē baejavuoromo bojamuaje darugoho ēho no baeromo muoho vaejarue hōjo. ¹³ Ēhesi bēhoho jemēhu sama'e adahoromo mae hejaruje jōhemu no jajivarueje. ¹⁴ Jemēro nosi bēhoho ma-bisemu hejaruje röhu na nege jemē he avohoromo uvo'irarijego: Bada Iesuare majaho rue'iramu Paul-mēhu nosi jōēni nimorohē'i uehorovo'irōhēhi noehu Paul-mesi jōēni ēhi nimorohē'i uehorovē'oho iae mae jio'a'ajējo.

¹⁵ Iae na mae uehorovoromo uvodeje: No ēhi mae garorovarue hō uvodohuni ēhuni uvodeje: Naro jemesi örire urimo ö'ejōjo ēhuro vae niō'i ö'ego huē mae bae'irarijego. ¹⁶ Urimo ö'oromo jemesirire hiromo Macedonia sa'are va'ejōjo. Macedonia va'oromo vuono bu'öromo jemesi örire röhu maho ö'ejōjo. Ö'iramu jemēro bövie bise'e ajemiromo remö'ö'iramu na mae va'oromo Judea sa'are hi'ejōjo. ¹⁷ Na ēhi ē'iro uehorovodeje röhu bogo ö'odeje. Ēhuni nani jemē ēma uvaruje: Nörö sareri'e aéro jiē'ero bogo rovade hōjo. Nani ēhi uvaruje röhu na bogo ēhi jiē'e aho jeve. O naehu ēhi ēhi ē'irode muoho uehorovē'oho bogo nasi sinohemu uehorovoromo jōho huotohuotovoromo uēvajeje: Io'ajo. Iae na ē'ejö uēvē'i uēvajeje: Bogajo. Na bogo ē'ejōjo. Na bogo ēhioho jōho huotohuotovoromo jövajeje. ¹⁸ God-hu bogo uehore gö gö bae'i ma-gemu uehorovajēhi no'o jemē jö majēhijaruoho bogo uēvarueje: Io'a uēvē'i boga uēvarueje. ¹⁹ Ēhesi bēhoho God-are Harihe Iesu Keriso-are jōho noro baeromo jemē majēhijareje naro Silas-ro Timothy-ro. Noehu jö majēhijare aho Keriso hu bogo uvē'eje: Io'a uvē'i uvē'eje: Bogajo. Keriso bogo ēhioho uvē'eje. A'i Kerisohu diehi ajamuirōhego God-hu uavadēhi huro io'a gemu uvoromo ēhi ēhi ajamuibe rovē'eje. ²⁰ Keriso bogo rovade majare God-ro mae uvobe rovadeje: Naro nasi aribövioho ēhi ēhi mae vaejēvo'ejōjo. Mae vaejēvo'ejö uvē'ego Kerisoro uvadeje: Io'a uvoromo God-hu uvade mu maho vae barējē'eje. Ēhuni Keriso-are ihoro noro God-are örire uavarueje: Jaehu mu vaejahuo'i mae uvanēhi Kerisohu ēhi vaejahuadoho iae mae-ējo. Iae mae-ē uavaruohuro ēhuro God-are ihoho börömeje. ²¹ Röhu no jemē'o gemu mae baejavuoromo Keriso'o gemuore ioro'ioremu bimuvavuoromo hesi mure bamavuade aho iae God-je. ²² Huro no hesinö ioro'ioremu baejavuoromo hesi Aru'ahoho nosi dē vövöbajo'ere bojamuijē'eje noro uvorōhego: Hu aevoromo hesi Aru'ahoho suvuore bojamuijē'ero ēhu'ero hesi suvuro vituohu'o ijönö iae bojamui'ajējo. God-ro ēhi ioro'ioremu ajamuijē'eje. Ēhi jiē'ero na'o bogo jōho huotohuotovoromo jövajeje. Amo bogo ēhunioho ö'i uēvodoho vuonugo'i hijodeje.

²³ A'i ave jōho God-ro ge'ego na mae jöve. Naehu Corinth amore ö'ie'oromo vuonugode hesi bēhoho naro ö'oromo i'ue bojēmego baejōēni ēhuni bogo ö'odeje. ²⁴ Iae na i'u bojēmi'irode jōho uēve röhu nosi mu hesi bēhoho bogo masijoho riravoromo jemesi öriroho darugo'e jöhuremu bojēmiromo uē'irōhēro: Ēhi ēhi God mae uehorovohējo. A'i no jemē'o havoromo ajēmijarue ae javue jemē dē sasohēvonövorōhego ē hesi bēhoho jemē iae eni biririvoromo God mae uehorovarujego.

2

¹ Amo ö'ie'oromo vuonugo'i hijode hesi bēhoho naro nasi uvodeje:

Na bogo röhu maho ö'oromo i'uoho huë vavaenoho bojëmi'ejöjo. ² Na jemesi örire i'u huë vavaeni bojëmijë'oho rahumëro na huë maho bojemi'ë'ö. Jemëremu huë maho bojemi'ibejarijoho röhu huë vavaene jëvo'ibejo aho bogo huë maho bojemi'ibejarije. ³ Na bogo vejö'oho ö'irögoro a'i urimo jemëhu avo'avoho uehorovo'irarije jögoru jajivoromo nugö'öjode hesi bëhoho na bijönegadeje ö'oromo jemesi mu sisë garomo huë vavaeni bae'irodoho. Jemesi jöëni huë maemu baejë'oho iae maeje. Èhuni huë vavaeni jemesi jöëni baejë'oho na bijönegamu suri surioho jajivodeje. Èhesi bëhoho naro jemë ae aho'obëhe mae uehorovëvoromo uvodeje: Jemë'o na'o mu mae gemuoho nimo avohoromo èhuro huë mae baejarue höjo. ⁴ Röhu na jajivodevare huë vavaene böröme baejë'i nurunurumë'i sisë maro nivë'i jemesi örire jajivodeje bogo èhuro jemë huë vavaenoho bae'i a'i ga'irarijeho naro jemesi örire uehorovëvo avohaje jevego. Iae èhuni jajivodeje.

Mu sisë vaejade a hesi sisë Corinth ariböviehu uehorovoromo vuonugo'iröhego Paul-hu uëvade jöhoje.

⁵ Röhu huë vavaene nasi örire barovade aho hu bogo nasi öriroho ë'i a'i ekaresiae ae aho'o jemesi örire ma-bisemu huë vavaene barovanovadeje. I'u jö uë'irodoho na bijönege. ⁶ Jemë ae aho'o ë a i'u bojamarijoho iae eni jië'teje. ⁷ I'uoho mino'e bojami'i hesi sisë uehorovoromo vuonugoromo ma-ajamiromo biririvo'iröhe jö masanu'oho majahire. Jemë bogo ëhi ë'ë'oho nani hu huë vavaene böröme bae'iramu jovëro ruomoromo taemanovo'ë'e. ⁸ Èhuni na nege jemëhu hu huë baejarujoho röjahi avohego hu garöhego. ⁹ Rabëni na urimo jöho ave hesi bëhohuni jajivodeje gë'irodëro jemë nasi jöho aho'o ejehë'e jëvego o bogo. ¹⁰ Ae rahuare sisë jemëhu uehorovoromo vuonugë'oho na'o gemuoho ë'ajeje. Mu sisë rabe na uehorovoromo vuonugodoho mu sisë uehorovoromo vuonugo'irode jië'oho Keriso-are nuniro namiromo jemesi jöëni na uehorovoromo vuonugë'e jeve ¹¹ Satan-ro sareramuiromo baejavuojöëni iae no hesi sareri sareri'le muoho mami'e gavaruëro jië'ëro.

Paul-hu Troas amore hiromo nurunurumade jöhoje.

¹² Röhu naro Troas amore va'odeje Keriso-are jö maho majëhi'irodëni. Va'oromo gavodeje Badaro nasi mu öroho mabëhe jiovehë'e jiamu. ¹³ Èhi jiamu ga'irögoro röhu gavode nasi öho Titus jemesirire ö'adoho bogo rovë'e jiamu gagorovo uehore böröme baejodeje. Uehore böröme baeromo amo rajoho jejëmiromo rëmo va'odeje Macedonia sa'are valië'ëro.

No Keriso-are gemuore javuë'ëro mu sisë huë vavaene ruahö'öjarue jöhoje.

¹⁴ Röhu no God mabëhe ua'ejo. Rabëni Kerisoro mu sisë'o no'o ruahö'öjavuë'ëro jië'ëro èhu'ëro God-ro uvajeje no Keriso'o gemu mae javuajë uvoromo söjavuo ujuoho va'ego nimorohë'i jijiharueje. Èhi'oromo huro Keriso-are jöho no bojamuijë'ëro noro ae majëhibe va'ego ridi mabëhëro rumorovanovobe va'ajeje. Rumorovanovobe va'ego aëro heruomajeje God ëhi jië'e ae jiajoho. ¹⁵ Noro Keriso-are jöho ëhi baeromo jijihego God-ro uvajeje: Èho Kerisoro nasi örire

ridi'e suvuore bojemijanovajë uvoromo vuëvajeje. Vuëvego no Keriso-are jöho ridi manö'e baeromo va'lego mare va'iröhe o sisëre va'iröhe ariböviohuro heruomajeje. ¹⁶ Sisëre va'iröhe ariböviohuro Keriso-are jöho bogo ejahego ë jöhuro ridi sisënö'e ridëmege sisërëjëvo hesije. A'i mare va'iröhe ariböviohuro heromo ejahego jöhuro ridi maëro i'ovëvanovego ëhuro maro raromo hesi jëve. Asë'e ëhi jië'e mu börömo vae'iröhoho rahuo eni javue. ¹⁷ Ae göehu göehu aho'obëhe ë'aruëhioho no bogo ëhioho sarerëmiromu uëvarueje: No eni javuajëjo. Ëhi jië'e ariböviohuro ijo bajemu uehorovoromo God-are jöho sareri sareri'oho majëhibe jijiharueje. Iae ëhuni uvarueje: No eni javuajëjo. Röhu no bogo ëhioho ë'i a'i uhohu'o maemu javuego God-ro uövuë'ëro Kerisohu nimaje muohemu vaeromo God-are nuniro atarueje.

3

Paul-mëhu God-are jögoru i'o hesi mu vaejarue jöhoje.

¹ Ëjöhö garomo nani jemëro ëma uvo'a'aruje: Paul-ro hesi arijo'ëro hesi ihohu'o hesi aribövi jabesi ihohu'o mami'e nigemadoho röhu maho ëma nigemoromo ë'ajëjo noro uvoröhego: Paul-më God-are mu vae'iröhoho eni jëvajëjo. O ëma uvo'a'aruje: A ioro'iorehu nimaruehi Paul-mëro nimaruejo jabesi mu eni jiaje jöho ae göëro jajivego no suroho garomo uvoröhego: Paul-më eni jëvajëjo. O noro Paul-mesi jöho jajivego a ioro'iorohuro suroho garomo uvoruomoröhego: Paul-më eni jëvajëjo. Nani ëhi uvo'a'aruje röhu nomë bogo ëhi jië'e suri surioho nimö. ² Ëhi jië'e suri suriohu'o röromo iae jemë jëve. Kerisoro jemesi ihoho nosi dë vövöbajo'ere jajivahuë'ëro ëhu'ëro no jemesi örire börömo mae uehorovëvarueje. Börömo mae uehorovëvaruëro javuë'ëro ëhuni uvarueje: Nosi mu eni jiaje jö jajivë'e suroho bogo naguajëjo aëro adaho garomo uvoröhego: Paul-më mu mae vaejarue höjo. Ae aho'o suroho bogo adaho ga'i a'i jemesi muohuremu garomo uvoruomol'ë'e: Corinth ariböviehu mu mae vaejarue hesi bëhoho Paul-mëro eni ajëmijë'ëro ëhu'ëro ë'aruëjo. Ëhuni Paul-mesi muoho iae eni jiajëjo. ³ Iae ae aho'obëhe gavö jemë Kerisohu jajivade suri surire jöho va'ëne jëvo'ego. Ëjöhö noro bö'areje. Röhu Keriso jöho bogo barigoho jajivo'i a'i God darugo bojamuaje a hesi Aru'ahohuro ëhuro jajivë'eje. O Moses-hu God-are jögoru munë hitahi döre jajivadëhioho bogo ëhioho rori'oho munë döroho jajivo'i a'i jemesi dë vövöbajo'ere jajivë'eje.

⁴ Noro ëhi ajëmijë'ëro Keriso-are mu jemesirire jiajohuni ëhuni God-are nunire riravoromo Keriso-are jöëni biririvoromo uehorovoromo uvarueje: Jemë noehu mu vaejarue suri ma va'ëne jëvajëjo. ⁵ Bogo nosi simanohuro darugohuro God-are mu vae'iröhoho no eni javuo'i a'i hesi God-ro avohavuë'ëro ëhuro eni javue. ⁶ Huro no avohavuë'ëro ëhu'ëro no hesi jögoru i'o hesi öroho avoho röjëhi'iröhoho no eni javue. Ëjögoru i'oho bogo jajivë'e jögoroho jio'i a'i God-are Aru'ahëhu bojamuaje jögorohoje. Jajivë'e jögoroho ahoromo vuovarueje. A'i Aru'ahohuro i'ovavuaajeje.

⁷ Munë hitahire sehoromo jajivë'e jögoru ë hesi muoho rovego aëro ë jöho ahoromo vuovajeje röhu ë jögoru barovade majare evare God-are aji böröme a nunire rovadeje. Rueromo vuorövobe va'adeje röhu Israel

rajoho Moses-are nu ano'o hesi ajoho bogo ga avoho'i ma-ga buruti-moruomadeje. ⁸ Ëhuni birivoromo uvo'a'anue: God-are Aru'aho hesi muoho rové'ëro ëhu'ëro ë mu hesi ajohuro aji mamioho iosiramiro bogo bise'o vadu'oho ruenövo'ajëjo. ⁹ Jögoru mami hesi muoho rovego aëro heromo ë jöho ahoromo jö sisë God-are nunire baejarueje. Röhu ë hesi muoho aji'e jiadeje. Ëhuni birivoromo uvo'a'anue: Jögoru i'o hesi muoho rovego aëro ë jöho ejego jabesi jö sisëho barëjhajëro jië'ëro ë mu hesi ajohuro mu mami hesi ajoho iosiramiro bövi mae höjo. ¹⁰ Aji mamioho börömo ajivadoho jaruvoho bogojianove aji i'ohuro rueromo börömo mae ajivoromo ruahö'öjë'ëro. ¹¹ Vuorövole va'oröhe muoho iae aji'e jiadeje. Ëhuni birivoromo uvo'a'anue: Ioro'ioremu jioröhe mu hesi ajoho börömo mae höjo.

¹² Mu i'ehu ioro'iore gemu jioröhego dë sasohoromo uvaruohuni ëhuni no biririvo avohoromo jöho ma-samae majëhijarueje. ¹³ Samae majëhiromo Moses-hu hesi aji gurihijadëhioho no bogo ëhioho nosi aji'e jöho gurihijarueje. Ëhesi bëhoho Moses-ro hesi nu ano'oho niögëro riogivorovoromo gurihijadeje Israel rajoho jaburo bogo muebe'öromo garöhego ajoho vuorövo va'oromo barëjego. ¹⁴ Röhu Israel rajoho hia'i biririro jabesi simanoho sisërëjhadeje. Jaruvohu'o ëhi gemuhoje. Jögoru mami adhamu hejë'iroho Moses-hu hesi nu ano'o hesi aji riogivorovadëhi jabesi uehoroho ëhi riogivorovobe rové'ejö. Ëhesi bëhoho jabumë Keriso bogo ma uehorovarueje röhu huro gemuëro riogivahuajoho jiovahuajeje. ¹⁵ Io'o. Jaruvohu'o Moses-are jögoru adahë'iroho jabesi uehoroho riogivë'e maeje. ¹⁶ Röhu jabumë ae rahu huotorovoromo Bada mae uehorovë'iroho evare uehoru riogivëhadoho iae jiovëho'ë'e. ¹⁷ Röhu Bada hesi bëhoho God-are Aru'ahoho uave. Badare Aru'ahëhu dinö'e dinö'e jië'iroho öri mare jijihö'iröhoho iae jiovahuë'eje. ¹⁸ Ëhu'ëro jië'ëro no Christian ae aho'obëhe nosi nu ano'oho bogo riogivahuë'ëro majaehu aririre bijiohego gavaruëhi ëhi Badare ajoho aririro gavanovoromo ëho uehorovo avohoromo gorosovoromo hu jiajëhi ëhi javuobe hesi ajoho gö'o gö'o baebe va'arueje. Badaro ëhi ajivavuaajeje. Bada hesi bëhoho God-are Aru'ahoho uaromo ë'e.

4

Aji mu mabëhe baejë'ëro ëhuni Paul-mëhu birivoromo mu vaejare jöhoje.

¹ Ëhi jië'e aji'e muoho God-ro noni vavaenimoromo bojamuij'eje. Ëhuni bogo u'uhoromo vuonugo hesi javue. ² Gurihijë'e javoji'e mu sisëho bijönagego bogo vaejarueje. Sareri'e muoho bogo vaeromo God-are jöho huotohuotovoromo majëhijarueje. A'i God-are jö maho sama'e huruoho majëhiromo hesi nunire riravoromo mue vaeromo nosi arijo'arije ae aho'obëhe röjahirovarueje jabesi uhure uehorovoromo uvojöro: No ma-mae javuajëjo. ³ Keriso-are jö maho noro iae sama'e majëhijarueje röhu ë jö hesi bëhi tugohëhë'oho sisëre va'iröhe aribövi jabesi örohemu tugohëhë'eje. ⁴ Ëhesi bëhoho Keriso bogo ma uehorovarue aribövioho ave sa'a hesi börömhuro jabesi uehoroho tugohëhë'eje jö ma hesi ajohuro ajivëvego Keriso-are ajoho garuomöjëni Keriso hu jiajëhi ëhi jië'ego. ⁵ Bogo nosi jöho majëhi'i a'i ae

majëhiromo uëvarueje: Iesu Keriso hu Bada höjo. Nomë Iesuare jöëni jemesi mu vaejëharue aribövie javuajëjo. ⁶ Keriso-are jö majëhijarue hesi bëhoho ni'i'ivadiroho God-ro uvade höjo: Ramoramoho ajivëjo. Èhi uvade ahuro nosi dë vövöbajo'oho ajivavuadeje noro hesi aji mahemu Keriso-are nu ano'ere garuomoröhego.

Paul-mesi sino haho'e u'uhëvadeje. Huë vavaene baejareje röhu God mae uehorovë'ëro birivoromo mue vaejareje. Èhesi jöhoje.

⁷ ÈGod-are aji maho nosirire u'uhë'e rama gagore jianovajeje èhuro noro garöhego daruge aho'o bogo nosirehu jio'i hesi God-are örire jioromo rovego. ⁸ Majae èhi huë vavaene böröme bae'i arijarueje. Röhu bogo ijumavuo barëjë'eje. Öre nahoromo uehore gö gö bae'i arijarueje. Röhu öroho iae biroharueje. ⁹ Ae aho'obëhe sisë vaejavuoruomajeje. Röhu God bogo vuororamuijë'eje. Aëro anagu'o'i arijarueje. Röhu bogo ma anaguë'eje. ¹⁰ Iesuhu vi'ehi baeromo guomadëhi majae èhi no'o sa'a sinore èhi vi'ehi baeromo vuovo'ië'obe va'arueje God-ro nimë'ëro noro garöhego Iesuare darugoho nosi sinore jiego. ¹¹ Majae èhi ave sa'are raromaruevare evare Iesuare jöëni vuovo'iröhëro raromarueje God-ro nimë'ëro noro garöhego Iesuare darugoho nosi sa'a sinore jiego. ¹² Èhu'ëro jië'ëro noehu Keriso-are jö majëhijaruoho vuovo öriro muoho vae'i a'i jemë è jöho heromo i'ovo örire jëvajeje.

¹³ Röhu God-are surire jajivoromo uövuë'eje: Na mae uehorovode höjo. Èhuni jöho jövode höjo. Èaehu jajivadëhi no'o èhi gemuoho mae uehorovë'e raromarueje. Mae uehorovoromo èhuni jöho atarueje. ¹⁴ Atarue hesi bëhoho no garomo uvarueje: Bada Iesu ajamamu ri'öjade aho God-ro no'o èhi ajamui'iramu ri'ö'ejärëjo Iesu'o gemu mae javuë'ëro. Ri'ö'iramu jemë'o gemu mae hesirire söjavuo va'a'ajëjo. ¹⁵ Èmuoho aho'obëhe nosirire rovaje hesi bëhoho èhuro God-ro ae aho'o huë baeromo ajëmiromo dë vövöbajo'e huotovëhobe va'ego ae aho'o hu rajahi avohego hesi ihoho dö maro jioröhego.

¹⁶ Èhuni no bogo u'uhoromo muoho vuonugo hesi javue. Nosi sino haho'oho sisërëjavuobe va'irögoro a'i nosi aru'ahoho majae èhi i'ovavuobe va'ajeje. ¹⁷ Nosi huë vavaenoho ma-bisemu baeromo maburëro barë'iröhoho jio'i röhu è huë vavaenohuro èhuro ijonö aji ma-mabëhe ioro'ioremu bae'ejo. Huë vavaenoho ma-bise'ego bogo uehorovo'ejo. A'i ajoho börömo mae jio'ë'e. ¹⁸ Nunehu ga'amaruoho bogo nuroho vae'i a'i nunehu bogo ga'amaruoho nuro vaejë'e raromarueje rabëni hesi bëhoho nunehu ga'amaruoho èho majae mabunemu jioromo barë'i a'i bogo ga'amaruoho èho jiemu jio hesi jië'ego.

5

Vuovavuë'oho no maro raromo'iröhe jöhoje.

¹ Iae no garomo uvarueje: Nosi sa'a sinoho ma-jahuri raromarue javu va'ënoho èho sisërë barëjë'oho God-hu nugahuade javu maho nosi jio'a'ajëjo. Bogo aho övoho avoho'i hesi God-ro bamahuë'e höjo noro èho baeromo ö'idöre ioro'ioremu raromo'iröhego. ² Avevejö'oho vavaenimoromo hara'uë'i muebejarueje ö'idöre jiaje javuoho baeromo èhuro niögunö'e aegorovo'iröhëni. ³ Niögunö'e aegorovë'oho bogo

niögu rumo'oho ëma raromo jijihanovo'ejo. ⁴ Sa'are ma-jahuri raromaruë nosi javuore raromaruevare evare vavaenimo avohoromo hara'uarueje. No vavaenaguaje hesi bëhoho bogo niögu mamioho boremi'ö'i naguajohunioho bogo ëhunioho vavaenimo'i a'i God-hu bojamui'iröhe niögu i'ohuro döre aegorovego ëhuro raromemu raromo'iröhe muohuro sisërëjavuobe va'aje muoho ruahö'öjego barë'i i'e javuoröhego. Ëhuni vavaenimarueje. ⁵ Röhu hesi God-ro no avohavuadeje noro ëhi i'e baeröhego. Avohavuoromo hesi Aru'aho maho suvuore bojamuijë'eje noro uvoröhego: Iae mae-ëjo. Hesi Aru'aho bojamuijadëhi suvuoro vituoho ëhi bojamui'iramu ma-mabëhe bae'ëjarëjo.

⁶ Ëhuni majae ëhi no dë sasohoromo biririvarueje. Rabëni no gavaruoho nosi sino haho'ere raromaruoho ëhuro Bada'o gemuoroho bogo raromarueje. ⁷ Bada mae uehorovoromo raromo jijiharuoho bogo hu garomo ëhioho ë'arueje. ⁸ Amo noro dë sasohoromo biririvarueje. Dë sasohoromo biririvë'i uvarueje: Nosi sinoroho bogo raromo'i Bada'o gemu mae raromë'oho ëho iae maho höjo. ⁹ Röhu no sinore raromë'oho o bogo raromë'oho ëho bogo uehorovo'i a'i nosi uehoroho ë gemu bamarueje noro muoho avoho vaejago Badaro göromo nimorohoröhego. ¹⁰ Huhu nimorohoröhego vaejarue hesi bëhoho no ae aho'obëhe Kerisore nunire riravo'ejo no ae gemu gemu sinehu raromoromo mu mae o sisë vaejarue ëhi jië'e manaho baebe va'iröhëni.

Kerisohu no buore vaejavuoromo God-are gemuore bamavuade jö Paul-mëhu a majëhinövare jöhoje.

¹¹ Hesi nunire riravo'iröhohuni ëhuni Bada juhuonamiromo a jabesi simanoho huotovëho gavarueje jaburo hu mae uehorovoröhego. No ëhi mae ë'aruoho God-ro no gö barëjë'eje. Röhu na uehorovoromo uve: Nani jemë'o jemesi dë vövöbajo'ëro ma-va'orahoro gövuaruje höjo. Ëhi jië'oho iae na nege. ¹² Noehu mae ë'ego God-hu gövuaje jöho uëve röhu nadi uvore: Paul hesi arijo'ëro hesi ihohu'o hesi aribövi jabesi ihohu'o mami'e nigemadoho röhu maho ëma nigemoromo ë'ajëjo noro uvoröhego: God-are mu vae'iröhoho eni jëvavëjo. A'i ë jöho jajivode hesi bëhoho ëhuro jemë nosi jöëni nimoroho'irarijago. Nimorohoromo he'irarije aehu nosi jö sisë atoruumamu hejë'oho jö mana uë'irarijoho jemesi örire jioröhego. Nosi jö sisë atoruumaje aribövioho dë vövöbajo'oho bogo nimorohë'e ato'i a'i ma-sinoremu nimorohë'i atoromo nosi jö sisëho atoruumajeje. ¹³ Aehu uvaruoho: Paul-mëro simane sisërëromo muoho vaejarue hö uvaruoho no God-ni ëhi jië'e muoho vaejarueje. O simano mae javuego mu vaejaruoho ëho jemesi jöëni ëhioho vaejarueje. ¹⁴ Ëhesi bëhoho Kerisoro no dë vövöbajo'e aho'o uehorovavuaeje. Ëhuremu no uehorovoromo bogo nosi jöënioho a'i God-are o aribövi jemesi jöëni uehorovoromo muoho vaejarueje. Iae no uehorovoromo uvarueje: Ae gemuëro ae aho'obëhëni guomade höjo. Urimo ae aho'obëhe no mu sisëmu uehorovaroho röhu Kerisohu guomadohuro ëhuro ae aho'obëhe no'o ëhi vuovavuanovamu nosi mu sisëho barëjahü'e höjo. ¹⁵ Kerisohu ae aho'obëhëni guomade hesi bëhoho no ave sa'are raromaruë ariböviohuro ijonöho bogo nosi sinemuoho uehorovoromo raromo jijihö'i noni guomoromo ri'öjade aho uehorovoromo raromo jijihö'iröhego. Iae ëhuni hu guomade höjo.

16 Ĕhi jiē'ero aehu uehorovaruēhioho no ijonoho bogo ēhioho uehorovoromo uvo'ejo: Ĕaho mae o sisē hōjo. Urimoho aehu jabesi ma-uehorovaruēhi no'o ēhi uehorovoromo uvonōvareje: Iae Keriso ēhi ēhi jiē'e ae hōjo. Rōhu jaruvoho no bogo ēhioho uehorovarueje. 17 Ĕhu'ero jiē'ero ae rahu Keriso-are ae gemuoho javuē'oho no i'e javuajeje. Mu mamioho barējahuo'i mu i'e rovē'eje. 18 Ĕmuoho aho'obēhe hesi God-ro avohahuadeje. Huro Keriso nugō'ōromo ēhuro buore vaejavuoromo hu'o no'o aevoromo maro raromareje. O mue bojamuadeje buore vaejavuade jōho majēhijego aēro heromo ejahoruomorōhego. 19 Jōho aviēhije. God-ro Keriso-are dē vōvōbajo'o uhure jioromo mue ajamiromo ēhuro ae aho'obēhe nosi sisē hesi i'uoho bogo uehorovahuo'i buore vaejavuade hōjo. Buore vaejavuoromo buore vaejavuade jōho bojamuade hōjo noro majēhibe jijihorōhego. 20 Ĕhu'ero jiē'ero no Keriso'o rōromo jō majēhijarue aribōvie javuē'ego God-ro jōho bojamuromo uōvuego no ae dinēmarueje. Keriso-are jōēni ae uēvarueje: Buore vaejavuade jōho eromo God'o gemuoro huē mae raromohējo. 21 Keriso hu mu sisēho bogojiadeje. Rōhu God-ro nosi sisēho hesi ōrire bojamamu baejadeje ēhuro no Keriso-are ae gemuhuro javuē'ero God-ro nosi ihoho avohavuego hesi nunire ma-mae riravorōhego.

6

1 No God'o gemu mae mue vaejaruēro javuē'ero no naguaje jōho jemesi ōrire majēhi'irōgoro ē'ō jemēro ēhi ē'irarijego. God-hu huē baeromo bojēmade jō maho mu maho nadi ēma baeromo boremi'ō'i ma-avoho ma'enore. 2 God-are surire jōho jajivoromo ēhi uvē'eje: God naehu huē baejēvo'irode majaho rovamu evare na jemesi jōho ejēhode hōjo.

Jemē maro bamēvo'irode majaho rovamu evare na ajēmijode hōjo.

God-ro ēhi majahuijadeje. Rōhu ē hesi bēhoho gare. God-hu huē baejēvo'i uvade majaho jaruvoje. Maro bamēvo'i uvade majaho jaruvoje.

3 Paul na'o nasi aribōviohu'o noehu God-are mu vaejaruoho ē muoho iho sisē hō uvē'oho no bijōnague. Ĕhuni nosi muoho bogo sisē'ioho vaejarueje aēro ēho garomo sisē'i uehorovoromo rireromojōēni. 4 A'i God-are mu vaejarue aribōviehu ē'aruēhi ēhi mue aho'o a nunire avoho vaejarueje. Huē vavaene mu sisē gō gō rovē'oho biririvo avohoromo riravarueje. 5 Aehu hisuebijavuē'oho savoji gagore io'amavuē'oho muorovamui'i juhijavuē'oho ma-biririvarueje. Noehu i'u'e mu vaejē'oho rōho dere bogo momorō'ōjē'oho i bogo ue'ahē'oho ma-biririvarueje. 6 Biririvoromo mu mahemu uehorovoromo Keriso-are jōho mae garomo a jabesi mu sisēho ma-ga taemoromo ae huē baejēvoromo God-are Aru'ahoho baeromo ae dē vōvōbajo'e aho'o uehorovēvoromo 7 God-are jō maho majēhiromo hesi darugoho rōjēhijarueje. Ĕhi'oromo God-are mu vaejarue aribōviehu ē'aruēhi no ēhi a nunire mae vaejarueje. Mu mae vaeromo ēhuro Satan-hu no'o muorovē'oho ōvo gōhuro tugohē'i ōvo gōhuro mana muorovamijarueje. 8 Aēro rajahuinōvo sivaguonōvarueje. Nosi ihoho ba'obuenōvo ba'ojiomonōvarueje. Aēro ma-uvarueje: Paul-mē sareri'e aribōvie

jëvájëjo röhu ma-jö maemu atarueje. ⁹ Aëro uvarueje: Paul-më iho rumo'e aribövie jëvájëjo röhu ae aho'obëhe nosi ihoho iae heruomajeje. Aëro uvarueje: Vuovëvo'ie'ajëjo röhu bogo vuovo'i iae birivoromo raromarajeje. Aëro uvarueje: Sisëni i'uoho baejarue höjo röhu bogo vuovavuaajeje. ¹⁰ Aëro uvarueje: Huë vavaene baejarue höjo röhu majae ëhi nimoroharueje. Aëro uvarueje: Bövi bise'o rumo'e jëvájëjo röhu noro ae aho'o ajëmijego Keriso-are bövi bise'o maho baejarueje. Aëro uvarueje: Rabe rabe bogojëvájëjo röhu bövie bise'e aho'o nosi örire eni jië'eje.

¹¹ Corinth amo rajomë nosi simanore dë vövöbajo'ere jöho masama'e huruoho majëhijë'e javue. Nosi dë vövöbajo'e aho'o jemesi örire bojëmijë'e javue. ¹² No jemesi öriroho bogo uehorovëvoromo vuonugë'e jemëro nosi örire uehorovavuoromo vuonugavuanovë'e jëve. ¹³ Vavuehu aboji harihu'e jö majëhijaruëhi ëhi naro jemë uëve: Jemëro mana ëhi dë vövöbajo'e aho'o nosi öroro bojamuirëjo.

Christian ariböviehu God rumo'e aribövi jabesi uehoro bogo baeromo jabu'o bimuvorovo'iröhe jöhoje.

¹⁴ God bogo ma uehorovarue ariböviohu'o gemuoroho nadi bimuvoromo uehore gemuoho baere. Jabesiroho hahagu jio'i jemesiroho hahaguje. Na mu mahu'o mu sisëhu'o mu gemuohoje o hahagu hahaguje. Hesi hahagu hahaguje. Na ajohu'o ramoramohu'o gemuohoje o hahagu hahaguje. Hesi hahagu hahaguje. ¹⁵ Na Keriso'o Satan'o jöe gemuoho uehorovarueje o hahagu hahagu uehorovarueje. Hesi hahagu hahagu uehorovarueje. Na God mae uehorovarue ariböviohu'o God bogo ma uehorovarue ariböviohu'o jöe gemuoho uehorovarueje o hahagu hahagu uehorovarueje. Hesi hahagu hahagu uehorovarueje. ¹⁶ Na God-are osa börömo'hu'o sareri'e vörö'e inömo'hu'o gemuohoje o hahagu hahaguje. Hesi hahagu hahaguje. Röhu no God darugo'o hijaje a hesi osa börömo'hu'o va'ëne javue. Ëhesi bëhoho God-are surire jöho ëhi uvë'eje:

God naro jabesirire hiromo jabu'o juvo'ejöjo.

Na jabesi Börömo'hu'o jevo'i jabumë nasi aribövie jioruomo'ajëjo.

¹⁷ Ëhuni Badaro uvajëjo: Jemëro jabumë gorëvoromo jemesi hahagu raromohëjo.

Sisëho nadi gavanovohëjo.

Ëhi ë'ë'oho naro jemë rajëhiromo baejëvo'ejöjo.

¹⁸ Baejëvo'iramu na jemesi Vavue jevo'i jemë nasi aboji harihu'e jëvo'ajëjo.

Bada mu bövi bise'o eni jië'e ahuro ëhi uëvájëjo.

7

¹ Nasi ö mueno'e God-hu ëhi mae vaejavuoröhëni uövuadohuni ëhuni mu sisë aho'obëhe vae'amego ëhuro sino haho'o dë vövöbajo'o sisërejjavuajoho ë'ego no ëho goro'i God gemu börömo'hu'o hë uehorovoromo mu mae gemu vaeromo avoho raro'mo'iro.

Corinth ekaresiaehu mu mae vaejamu Paul-hu heromo nimorohade jöhoje.

² Jemesi dë vövöbajo'e aho'o nosi öroro bojamuire. Nomë aho bogo sisë'ioho vaejëvë'e javue. Aho bogo ijumëvë'e javue. Jemesi

bövioho bise'oho bogo sarerisareriëmiromo ujuohëhë'e javue. ³ Ëjôho na bogo uëromo ë'e: Jemë a sisë jëvájëjo. Na mamile uëvodeje: Jemë nosi dë vövöbajo'ere jëvájëjo ëhuro no birivoromo raromë'oho o vuovavuë'oho jemë'o no'o gemuoro javuoröhego. ⁴ Na jemesi örire mae uehorovëvo avohajeje. Jemesi jöëni sisë maro nimoroheve. Iae no huë vavaene aho'o javue röhu na herove nasi dë vövöbajo'ere huë sanue rue avohoromo sasohevo'ego.

⁵ Iae no Macedonia sa'are rueromo uvareje: Nosi dë vövöbajo'oho sanuovavuo'ajëjo röhu bogo. A'i huë vavaene aho'o nosi örire ru-enövohijo. Gahijo anaguo biraguo'e vae'i ari'ego. Nosi uhure juhuone rojomohijo. ⁶ Röhu God-hu huë vavaeni sanuamuijaje ahuro jië'ëro Titus nugö'öjamu rovadohuro ëhuro no sanuamuamu biririvavuadeje. ⁷ Röhu bogo huhu rueromo sanuamuijadohuremu jio'i a'i Titus-hu jemesi örire huë sanu baejade jôho no hejamu ëhuro God-ro nosi dëho sanuamuijadeje. Huro rueromo uövuadeje: Corinth ariböviohuro nörö ga'i nimohijajo. Jabesi sisëni vavaenimohijajo. Nöruare örire ajami'i nimohijajo. Iae ëhuni avevejö'oho na nimorohevo avohe.

⁸ Naro urimë'i uru'ö jôho jajivoromo nugö'öjamu jemëro garomo huë vavaene baejarijeje. Iae ëhi ë'odeje röhu na bogo uehore gö baeromo uvajeje: Uru'ö jôho rabëni jajivode höjo. Röhu urimo na uvodeje: Na rabëni jajivode höjo. Na gavajoho jemë huë vavaeni baejarijoho ëho majae ma-bisemu baeromo barëjadeje. Ëhi jie röhu iae baejarijeje. ⁹ A'i jaruvo na jö jajivodoho dë mae jeve bogo vavaeni bojëmijodohuni a'i jemëhu vavaeni baeromo ëhuni huotorovoromo avoho uehorovarijohuni. God-hu nimaje ëhi jië'e vavaenoho baejarijeje. No bogo ëhuro jemë sisë vaejëvareje. ¹⁰ Ae rahu God-hu nimaje ëhi jië'e vavaeni baejë'ohuro ëhuro ja huotorovoromo avoho uehorovoromo maro hi'a'anue. Avoho uehorovoromo avoho hijë'oho bogo ë hesi jöënioho vavaenimo'anue. A'i sinemu uehorovoromo vavaeni baejë'ohuro ëhuro ma-guomo'a'anue. ¹¹ Röhu gare. God-hu nimaje ëhi jië'e vavaeni baejarijohuro ëhuro ave mu maho rovadeje. Jemesirire jiade mu sisë ma-nunëremu gavarijoho vuonugoromo aho'i uehorovarijeje. Övo uno'e ma-maemu jëvájoho röjehi'i nimarijeje. Mu sisëhuni dë vörönëgadeje. Ëhesi i'uohuni juhuonivarijeje. Nasi jöëni vavaenimarijeje. Muoho avoho'i nimarijeje. Sisë vaejade aho i'ue mana bojami'i nimarijeje. Iae no gavö jemë ë mu sisë avoharijoho mamabëhe jio'ego.

¹² Ëhu'ëro jië'ëro iae na uru'ö jôho jemëni jajivodeje röhu na mu sisë vaejade aho bogo uehorovoromo sisë baejade aho bogo uehorovoromo jajivo'i a'i naehu jajivode hesi bëhoho jemëro God-are nunire riravoromo garomo uvo'irarijego: Iae no Paul-mesi jöëni uehorovo avoharue höjo. ¹³ Jemëhu nosi jöëni uehorovarujohuro ëhuro no sanuamuijamu birire baejë'e javue.

Birire baeromo gavare Titus nimorohamu gagorovo no'o nimoroho avohareje ë hesi bëhoho jemë ae aho'o hu ajamamu hesi dë sasohahadohuni. ¹⁴ Ëhesi bëhoho urimë'i naro jemesi jöëni nimorohë'i jöe bisemu Titus-are örire majahiromo uavodeje: Corinth aribövioho mu mae vaejarue höjo. Ëhi uavamu hegorovo Titus-ro ö'oromo gavade jemë mu mae vaejamu gagorovo vuonorö'ö rueromo uevadeje: Paul

ja Corinth amo rajo jabesi jöho mae uevane höjo. Jaehu uevanëhi Corinth aribövioho ëhi jië'e mu maho vaejamu gëvode höjo. Ëhi uevamu hegorovo na javojoho bogo bae'i mae jevadeje. Noehu Corinth amo rajo jemesi örire jöe aho'o ma-maemu majëhinövarëhi ëhi Titus-are örire jö mae majahijareje. ¹⁵ O Titus-ro jemesi örire dë vövöbajo'e aho'o uehorovëvajeje. Ëhesi bëhoho hu jemë gëromo simanoro vaej'ëro uvajeje: Naro Corinth amore va'amu amo rajohuro juhuonivoromo butubutumoromo jejemiro mo ae aho'obëhe nasi jöho gemu ejehare höjo. ¹⁶ Ëhu'ëro jië'ëro na uvajeje: Naehu nimaje muoho ae aho'obëhe jemëro majae ëhi vaejaruje hö uvoromo nimoroheve.

8

Corinth ekaresiaehu rabëni öve sasohoromo bövie bise'e a bojëmi'iröhe hesi jö bëhi Paul-hu jajivadohoje.

¹ Röhu nosi ö mueno'e no nague Macedonia sa'a rajo ekaresia jabesi jöho jemëro gal'irarijogo. Macedonia sa'are ekaresia God-hu huë baeromo ajëmamumu jabuhu ë'are jöho no majëhi'ië'ö. ² Macedonia ekaresiaho jabumë huë vavaene börömo böröme baeromo sisë'i raromareje. Iae sisë'i raromareje röhu evare majare nimoroho avohareje. Nimorohoromo ëhuro bövie bise'e biseharihe jëvadoho röhu öve sasohëvamu suvuore bogo bise'o vadu'oho God-are örire i'imamijareje. ³ Jaburo rabe rabe jëvajoho i'imamiromo röhu gö'o döre mamareje. Ëhi'amu gëvë'ëro na ë jöho jemë majëhije. Jabesi nimoromo ri'öromo ⁴ dinamuiromo uövuareje: Uövuego no jemë'o bimuvoromo God-are aribövie Judea raromaruoho ajëmi'irarëjo. Ëhi uövuë'oho huë mae javuo'ajëjo. ⁵ Noro uehorovoromo uvareje: Jabumë ma-moniemu i'imamui'ajëjo. Ëhi uvareje röhu bogo ëhemuoho ë'areje. A'i urimo jabesi dë vövöbajo'oho Badare örire bojamirovoromo evare God-hu nimajëhi nosi örire bojamirovareje. ⁶ Ëhi'amu gagorovo noro Titus uavareje huhu jemë'o hiromo mu aevadëhi huro röhu maho ö'oromo ëhi ajëmego jemëro ë huë bæjarije mu mabëhoho röhu maho vaeromo barë'irarijogo. ⁷ Röhu jemë mue aho'obëhe vae avoharujeje. Jemë God mae uehorovo avoharujeje. Jöho mae ato avoharujeje. Simanëro mae ga avoharujeje. Mue bövie bise'e ajamui'i nimo avoharujeje. Nosi örire uehorovavuo avoharujeje. Ëhuni no nague jemëro ë huë bæ'irarije muoho ëhu'o vae avoho'irarijogo.

⁸ Na bogo darugo'e jögoroho jemesi öriroho bojëmi'i a'i aribövi ioro'iorehu ajëmi'i nimo avohare jöho naro majëhiromo jajivodeje gal'irodëni jemë ma-döhemu ae uehorovëvego o uhohu'o uehorovëvoromo huë baeromo ajëmijogo. ⁹ Nosi Bada Iesu Kerisohu huë baeromo ajamuade jöho iae jemë'o uehorovarujeje. Hesi örire börömo mae jiadeje röhu jemesi jöëni vuonugoromo rueromo bövi bise'o rumo'e hijadeje ëhuro hu bövi bise'o rumo'ëro jië'ëro ëhu'ëro jemëro aru'aho'e mue bövie bise'e bæ avoho'irarijogo.

¹⁰ Nasi uehoroho jemë diehi ë'ëgo marëjëvo'iröhe öroho aviëhije. Vaduni göho jemëro urimo ë suvuoro muoho aevoromo vaejamu a ioro'iorohuro ijönö aevareje. Jemëro urimo ë muoho vae'i nimamu a ioro'iorohuro ijönö nimareje. ¹¹ Jaruvoho ë mu vituoho vae barëre. Jemëhu mu aevo'i börömo bëhi nimarijëhi ëhi vae barë'i nimo avohore.

Nimoromo jemë rabe övore jëvajoho ëho bojamire. ¹² Jemë bojami'i nimoromo övore jëvamu bojamijë'oho God-ro uvajeje: Ëho suvuro mae höjo. Övore bogojëvë'oho God bogo uëvajeje: Bojemihëjo.

¹³ Na bogo uve jemëro bövi mae bojëmiromo ëhuro bogo eni jëvego huë vavaeni'e raromego a ioro'iorohuro ma-samae baeromo nimorohoröhego. Na bogo ëhioho nego'iröhego na nege ae aho'obëhe magemuoho jëvoröhego. ¹⁴ Avevejö'oho jemë moni böröme jëvo'i jabumë bogojëvë'ëro jemëro jabumë ajëmi'aruje. Ëhi jië'oho ijonöho jabumë moni böröme jëvo'i jemë bogojëvë'iroho jabumëro jemë ajëmi'ë'ö. Ëhi jië'oho jemë'o jabu'o gemuoho jëvo'ë'e.

¹⁵ God-are surire jöho ëhi gemuoho jajivoromo uvë'eje: Bövie gagovade aho i vituoho bogo rune vaejade höjo. Bisemu gagovade aho hu ie eni jiade höjo.

Titus o ae gö niö'i Corinth amore va'oromo ajëmiromo suvure gagovo'iröhe jöhoje.

¹⁶ No God-are örire huë mae uavö. Rabëni hesi bëhoho huro Titus-are dë vövöbajo'oho huotovahë'ëro noehu jemë ajëmi'i nimiruëhi Titus'o ëhi ajëmi'i nimajeje. ¹⁷ Nimë'ëro huro jemë ajëmi'oro noro ua gavamu hegoro vo ejahuadeje. Ejahuoromo röhu ajëmi'i nimo avohamu ëhuni hesi uvadeje jemesirire ö'iröhëni. ¹⁸ Röhu Titus'o gemu mae va'iröhego nosi ö göho nugö'öjö. Ëahuro God-are jö maho ma-mae majëhibe juvajeje. Ëhuni ekaresiae dinö'e dinö'e jio'amajohuro hesi örire rajahiruomajeje. ¹⁹ Röhu gö'o ekaresia ariböviohuro ë aho baeruomadeje bövi bise'o bogojië'e aribövi jabesi suvuroho noro baejëhoromo va'ego evare huro no'o gemu mae ö'oröhego. Ësuvuro mu hesi bëhoho Badare ihoho ma-mabëhe jio'i o ae aho'obëhe göröhego nomë huë baejëvo'i naguego. ²⁰ Huhu Titus'o va'iröhego noehu nugö'öjarue hesi bëhoho aëro uvojöëni: Moni böröme sisë'i muebejarujëjo. ²¹ Iae no nague muoho Badare nuniro avoho vaeromo röhu ëhi a nuniro avoho vae'iröhego.

²² Titus'o ë ö göhu'o rëmö'öromo ö göhu'o nugö'öjö ë ae niö'iohu'o gemu mae ö'oröhego. Urimë'i ë ahuro Keriso-are muoho ajëmi'i nimo'ego no gabe ruenövareje. Röhu jaruvoho hu börömo bëhe ave muohu'o jemë ajëmi'i nimajeje jemesi örire mae uehorovëvë'ëro jië'ëro. ²³ Titus hu na'o bimuvoromo jemëni mu vaejaje aeje. O nosi ö niö'ioho jabumë ekaresiaehu rëmö'öjare aho jëve. A maëro jëvë'ëro Keriso-are ihoho dö maro ajio jië'eje. ²⁴ Ëhuni ë ariböviohuro ö'ego jemëro mae rajëhijego jaburo uvo'i: Corinth aribövioho huë baejë'e aribövie jioruomajëjo. Ëhu'ëro Paul-mëro jabesi jöho mae nimironimorohë'i majahuijare höjo. Jabumë ëhi uehorovë'oho ekaresiae aho'obëhe jemesi jöho heromo uvoruomo'ë'ö: Paul-mëro Corinth aribövi jabesi jöho mae atare höjo.

9

Christian ioro'oro jabesi örire huë baejëvoromo moni bojëmi'iröhe jöhoje.

¹ God-are aribövi ajëmi'irarije muoho iae jemë gavarujeje röhu na diehi jië'e jöho jajivoromo majëhijego gare. ² Na gëvajeje jemëro ajëmi'i

nimego. Ëhuni bogo jajivo'ejo. Jemë nimarujoho naro Macedonia sa'a rajo jabesi òrìre nimorohè'i jòvoromo uèbe rovè'e jeve: Greece sa'a rajoho jaburo mami'e vaduni gòre aevoromo bövi bise'o avoharoho èhi jèvebo rovè'e hòjo. Jemesi jòho èhi uèvamu hegorovo Macedonia sa'a raje ae aho'obèhe uvareje: Corinth ariböviohuro ajèmi'i nimarüé uvoromo jabu'o ri'òromo ajèmi'i nimareje. Ëhuni ajèmi'irarije jòho na bogo jajivoromo majèhi'ejo. ³ A'i naro ò mueno'oho rëm'òlje jaburo ò'oromo ajèmego naehu Macedonia rajo uèvodèhi èhi bövie bise'e eni avoho'irarijègo noehu jemesi jò nimorohè'i majèhijaroho bëhi rumo'e jianovojòèni. ⁴ Na juhuoninege ijonò Macedonia sa'a rajehu na'o ò'è'òho ò'oromo gèvego monioho bogo gagov'èro èhu'èro ajèmi'irarijoho jemë bogo eni avohè'e jèvego na javoje baejòèni rabèni monioho gagovo'arujè uvoromo mae uehorovèv'èro. Jemesi javoji jòho bogo majèhi'ejo. ⁵ Ëhuni na uvodeje: Nasi muoho èhi hòromo ò mueno'oho uèvodeje: Corinth amoro urimo va'irarijoho jabuhu bojèmi'i uövuare suvuoroho avohorego naro ijonò ò'oromo ga'iròjo suvuoroho gagov'èle jiego. Èhesi bëhoho suvuoro urimo ajèmiromo gagovamu eni jiè'òho na ò'oromo jemesi òrìroho bogo dinèmi'iramu jemèro bogo övoho i'uhò'i dè vövöbaj'ere nimo avohoromo öve sasohoromo suvuoroho bojamui'aruje.

⁶ Bèhoho avièhije. Öve i'uhoromo suvuore ma-bisemu bamè'òho i uje bisemu öjè'èro bisemu gagovaruèhi suvuoro manaho èhi bisemu bae'a'anue. O öve sasohoromo suvuoro böröme bamè'òho i ujo böröme öromo i böröme gagovaruèhi suvuoro manaho èhi böröme bae'a'anue. ⁷ Èhu'e jiaje jemë ae gemuèro gemuèro bojèmi'i dè vövöbaj'ere uehorovarijèhi èmino'e èhi bojèmire. Suvuoro muoho nadi uvore: I'u'e hòromo bijöni bijönioho vaere. Aehu nimorohoromo huè baeromo bojèmi'è'òho èhi jiè'e aribövioho God-ro nimajeje. ⁸ Huhu bövi mae ajèmi'iròhoho iae eni jiè'eje. Ajèmego èhuro majae èhi jemë bövie bise'e eni jèvego huè bae'irarije muoho aho'o vae avoho'irarijègo. ⁹ Èhi jiè'òho suvuoro'e aribövi jiorumajèhi jemë èhi jèvo'è'e. Suvuoro'e aribövi jabesi jòho God-are surire èhi uvè'eje:

Huro suvuoroho öve sasohoromo bövi rumo'e a jabesi òrìre i'imèmibe va'aje hòjo.

Huhu mu ma vaejaje jòho èhi jiemu jiobe va'a'ajèjo.
Jemë èhi jèvo'è'e.

¹⁰ Iruno'o ujo ö'liè'iroho God-ro suvuoramuijègo öjarueje. Iruno'o ue'aho'liè'iroho God-ro suvuoramuijègo gagovoromo ue'aharueje. Iruno'o ujohu'o iruno'ohu'o suvuoramuijaje aho God-ro jemè'ò aru'aho muoho bövioho bise'òho suvuorèmi'iramu rae avohèvo'iramu jemesi mu maho bövi mae jièho'è'e. Huro èhi ajèmi'è'e. ¹¹ Ajèmiromo mae sisè rabe rabe suvuorèminövo'è'e èhuro ae huè vavaeni jèvamu gèvè'òho jemèro öve sasohoromo i'imèmi'irarijègo. Èhi jiè'òho jemèro suvuoroho nosi òrìre i'imamui'iramu noro ujuoho va'oromo suvuorèmi'iramu ae aho'obèhe ujuohoromo God-are òrìre huè mae uaruomo'è'e. ¹² Iae jemèhu ajèmiromo mae sisè i'imèmi'è'òho èhuro è God-are ariböviohuro rabe bogo eni jèvajoho eni ujuohoromo'è'e. Ujuohoromo rõhu èhuro ae aho'obèhe God mabèhe hò

ua avohoruomo'ë'e. ¹³ Jemëro ëhi ajëmi'iramu jaburo jemesi suvuoroho ujuohoromo ga'ë'ö jemë uhohu'o mae jëvo'iramu. Ëhi gëromo uvoruomo'ë'e: O Corinth amo rajohuro Keriso-are jö maho bogo majö'ëremuoho ejaho'i dë vövöbajo'o uhohu'o ejaharue höjo. Ejahoromo huë baeromo öve sasohoromo suvuoroho nosi örire i'imamuiromo ae aho'o jabesi örire i'imëmiarue höjo. Jemesi jöho ëhi uvoromo God-are ihoho döro bamoruomo'ë'e. ¹⁴ God-are ihoho döro bamoromo uvoruomo'ë'e: God-ro Corinth aribövioho huë mae bojëmi avohoromo dë vövöbajo'oho huotovëhamu öve sasohoromo ajamuiruomade höjo. Ëhi uvoromo jemesi jöëni vavaenimoromo God uaruomo'ë'e huro jemë ajëmiröhego. ¹⁵ Asë'e God hu mabëheje rabëni huro huë baejavuoromo hesi Harihoho nosi örire suvuore börömo bëhe bojamuijë'ëro jië'ëro. Suvuoro börömo bëhe jië'ëgo no ë hesi jöho bogo ato varijënoho javue.

10

A göëro sarerivoromo uvareje: Paul hu ma-u'uhoromo Keriso-are muoho vaejaje höjo. O hesi sinohemu uehorovoromo vaejaje hö uvamu Paul-hu jabesi jö mana ahëhoromo jajivade jöhoje.

¹ Röhu Paul naro nasi jöho uë'ië'e. Jemëro avo'avoho here. Keriso ma-taemorovoromo sanu'e mu vaenövade a hesi ihore jöho majëhi'ië'e. Aëro jemesi amore raromoromo nasi jö sisë sareri'e atoromo uvoruomajeje: Nöröro rueromo Corinth hijë'oho juhuoni juhuonie hi'i öre gö hijë'oho Corinth aribövi jemesi örire biriri'övoromo darugo'e jöho surire nugö'öjaje höjo. Nörö ëhi jië'e ae höjo. ² Ëhi jië'e ae jiajë uvoruomaje aho naro jemesi örire ave jöho uëve. Avo'avoho uehorovego na ö'oromo Corinth hijë'iroho bogo biriri'övoromo darugo'e jöho majëhi'iro. Darugo'e jö majëhi'irodoho na bijönego'i röhu majëhi'irodoho iae na eni jeve. Ae rahumë nasi jö sarerivoromo uëvë'oho: O Paul-më ma-sa'a hesi muohuremu uehorovoromo muoho vaejarue hö uëvë'oho ëhi jië'e aribövi jabesi örire naro biririvoromo darugo'e jöho majëhi'irodëro uehorove. ³ Jabumëro uëvarueje: Paul-më ma-sa'a hesi muohuremu uehorovoromo muoho vaejarue höjo. Iae mae. Iae no sa'are raramo jijiharueje röhu sa'a hesi muoho bogo uehorovë'te Satan'o muorovarueje. ⁴ No muorovë'oho bogo ave sa'a hesi bijo bunonö'e hesi darugoho baeromo Satan-are rejoho dadovo'amarueje. Hesi sareri'e jöho mu'uvaharueje. ⁵ Uehore rabe rabe simanore rovego ehuro döre bamorovoromo God bogo avoho gavarue ëhi jië'e uehoro aehu baro bu'öjë'oho noro aho'amarueje. Ahoromo vöröe aho'o bojamiromo a ioro'ioro jabesi simanoho huotovëharueje Keriso-are jöhemu ejaho'iröhego. Ëhi'oromo Satan'o muorovarueje. ⁶ O jemëro Keriso-are jöho ejaho barë'iramu evare ae rahu jemesirire raromoromo Keriso-are jö bogo ejahoruomaje ëhi jië'e aribövioho noehu i'u bojëmi'iröhoho eni javuo'ë'e.

⁷ Bogo gurihijë'e jemesi nunire jiajoho avo'avoho gare. Aehu hesi uehorovoromo uvajoho: Na Keriso-are mu ajamijaje ae jevajë uvajoho ë'ëgo ëhi jië'e ahuro uehorovo avohoromo uvo'iro: Na bogo nasi sivuoho Keriso-are mu ajamijaje aho jevo'i a'i na Keriso-are ae jevajëhi Paul-më jabu'o ëhi jëvajëjo. ⁸ No Keriso-are aribövie javue röhu göho Badaro darugoho bojamuijë'eje hesi muoho vaeröhego. Darugo hesi

bëhoho bogo jemë ijumëvo'i a'i ajëmego jemëro avoho birivoromo mae uehorovobe va'irarijego. Ëhuni ë mu hesi darugo hesi jöhu'o naehu nimorohë'i jövë'oho ëhu'o jö maëro jië'ëro ijönöho bogo javojego'ë'e. ⁹ Röhu nasi darugo hesi jöho na bogo uë'ejo jemëro uehorovoromo uvo-jöëni: Juhuoninaguojöro jero ëma jajivane höjo. ¹⁰ Ëhesi bëhoho aëro sarerivoromo uvoruomajeje: Paul-hu jö jajivoromo majahuijë'iroho darugo ma'o majahuijaje höjo. O rueromo no'o hijë'oho hu ma-u'uhë'e aëro jië'ëro bëhi rumo'e jöho jövego hejarue höjo. ¹¹ Ëhi sarerivoromo uvoruomaruoho nadi'ego jabumë avoho uehorovoromo uvo'iro: Paul-mëhu öre gö raromoromo darugo'e jö jajivaruëhi jaburo rueromo no'o raromoromo muoho ëhi darugo'o vae'iramu gë'ejarëjo.

¹² Röhu aëro sarerivoromo uvoruomajeje: Paul-më juhuoni'e aribövie jëvájëjo. Iae mae. Iae no juhuoni'e ae javue. Juhuoni'e aëro javuë'ëro bogo biriri'övoromo uë'ejo: Jabesi sivu uehorovoromo jabesi iho nige-marue ariböviohu'o no jabu'o masije gemuoho javuajëjo. No bogo ëhioho uë'ejo. Ëho jaburo göëro gö hesi muoho garomo jabesi arijo'arije mevorovoroumajeje ga'i mae o sisë jëvego. Ëhi jië'oho simane sisë'i uehorovoroumajeje. ¹³ Röhu no bogo ëhioho ë'ejo. Nosi mu maho no bogo iosiramiromo ruëroho numëroho ëma nimoronimorohë'ioho ato'ejo. No bogo sarerivoromo uvo'ejo: Ëho God-hu bojamuade muoho höromo nimoronimorohë'ioho ato'irögoro a'i huhu no bojamuade ë muohuremu nimorohë'i ato'ejo. Röhu ë muoho bogo öri göremuoho jio'i jemë'o ö'o baejëvë'e javue. ¹⁴ No jemë bogo baejëvë'e javuo'ibejo noehu jemë ajëmijaruohuni nimoroharuoho God-hu bamahuade ënoho iosirami'ibejo. Röhu bogo iosiramijë'e javue. Ëhesi bëhoho Keriso-are jöho noro aevo'ioho ö'oromo majëhijareje. Ëhuni no nimoroharuoho iae maeje. ¹⁵ Ae göëhu mu vaejaroho garomo no bogo uvarueje: Noro vaejare höromo nimoronimorohë'i atarueje bogo noehu vaejare muoho jië'ëgo. Röhu no uvö: Jemëro avoho birivoromo Keriso mae uehorovo'iramu evare God-hu bamahuade ëni jiajëhi ëhi nosi muoho jemesirire tutuvoromo börömo bëhe ri'ö'a'ajëjo. ¹⁶ Ri'ö'iramu noro va'o jemesi dejonörire sa'a ioro'ioro rajohu'o Keriso-are jö maho majëhibe jijih'o'ejarejo. Majëhibe jijihë'iroho God-hu ae gö mu bojëmamü vaejare öri ari'eroho no bogo va'oromo jabuhu mu börömo vaejaroho garomo uvo'ejo: Noro vaejare höromo nimoronimorohë'ioho ato'ejo. A ioro'iorehu nimoronimorohë'i ataruëhioho no bogo ëhioho ë'ejo.

¹⁷ A'i God-are surire jöho ëhi uvë'eje: Nimorohë'i ato'ië'iroho Badare jöhëmu nimorohë'i atorëjo. ¹⁸ Ëhesi bëhoho ae rahu jabesi sivu uehorovoromo ae uëvë'oho: No eni javuajë uëvë'oho bogo ëhuro God-are nuniroho maho jioruomö'ë'e. A'i ae rahu Badahu uëvë'oho: Jabumë eni jëvájë uëvë'ohuro ë ariböviohuremu God-are nuniroho maho jioruomajeje.

11

Corinth ekaresiaëro sarerivoromo uvareje: Nani Paul hu bogo apostle maho jio'i ae gö i'o rovaroho ëho apostle maho jio'amajë uvoruomamu Paul-hu jabesi uehoro ahëhoromo jajivade jöhoje.

¹ Na bisemu simano rumo'e jöho jajivanovo'ië'e. Röhu na nege jemëro nasi jöho bogo bijönimo'i ma-taemorovoromo he'irarijego.

Ma-taemorovoromo here. ² Jemëhu he'irarije hesi bëhoho sisëhu jemë baejëvojöëni God-hu avoho muebejëvajëhi naro ëhi jemë muebejëvajeje. Ëhesi bëhoho naro vavunö'e jemë muebejëvajeje. Ae gemuehu masuröhego uaromo vavuehu aboji muebejëvajëhi naro ëhi ë'ajeje jemë Keriso-are övore bojëmego hesi aribövi mae jioromo hu gemu mae uehorovo'irarijego. ³ Keriso gemu mae uehorovo'irarijego muebejëve röhu na juhuoninege jemë Keriso gemu uhohu'o uehorovar-ijoho vuonugo'i sareri'e jöho ejëhoromo simane sisërëjëvego rori'o va'ojöëni. Urimë'i sigobehu rueromo Eve sareri sareri'e jö majahijamu mae höromo ejahadëhi jemesi simanoho ëhi sisërëjëvego Keriso vuonugojöëni uëve. ⁴ Naehu ëhi juhuonivaje hesi bëhoho ae göehu ö'oromo Iesuare jö noehu majëhijaroho huotohuotovoromo majëhijego jemë bogo bijönimo'i ëho mabëhe ë'oromo ejarujeje. O God-are Aru'aho baejarijëhioho bogo ëhioho rue'i hesi aru'aho göëro ö'ego bogo bijönimarujeje. O jemë jö mae hejarijëhioho ae göëro bogo ëhioho majëhi'i hesi jöe gö majëhijego jemë ëhu'o bogo bijönimo'i ëho mabëhe ë'oromo ejarujeje. Jabesi sareri'e jö ejëharujohuni ëhuni nasi jöhu'o nadi bijönimo'i a'i ma-taemorovoromo here.

⁵ Ëhesi bëhoho jemëro sarerivoromo uvarujeje: Ëi'o rovere aribövioho apostle masijo masije jioruomo'i nöruare ihoho bogohöjo. Ëhi uvarujeje röhu na uehorovoromo uve: Jabesi ihohuro nasiroho bogo iosiramiro mo taemehë'e höjo. ⁶ Jemë uvarujeje: Nörö ave sa'a hesi vuëvo'e jöe gö gö jövo'iröhoho hu dadivaje höjo. Nani na bogo ëhi jië'e jö jövaje aho jeve röhu na nuni aji'e jöho baejë'e ae jeve. Ënuni aji'e jöho aho'o noro röjëhi'ego jemë ma-samabëhe ganövarijeje.

⁷ O nani aveho uvarujeje sisë höjo. Naro manaho bogo baejë'e God-are jö maho jemesi örire ëma majëhiromo ëhuro nasi ihoho ba'obuejë'e jeve ëhuro jemesi ihoho nigemë'e jioröhego. ⁸ Ekaresiae gö gö jabesi ijo bajoho ujuohëhoromo ëhuro hinövodeje jemë ajëmi'irodëni. ⁹ Na jemë'o hiromo gavë'oho nasi mae sisë rabe rabe bogo eni jevamu gavë'oho na bogo jemesi öriroho huë vavaenoho bojëmiromo uë gënövodeje. Rabëni hesi bëhoho rabe rabe bogo eni jevajoho Christian ö mueno'ëro Macedonia sa'are jioromo ujuohëhoromo jemesi amore rueromo ajeminövareje. Ëhi jië'ëro na jemesirire jiaje maho sisëho bogo ëninëmi'i avo'avoho mueberovonövodeje huë vavaene bojëmi'ijöëni. Ëhi gemuoho ë'onövo'ejo. ¹⁰ Keriso-are jö maho nasi dëreje. Ëhu'ëro na aveho jö mae uëve. Naehu jemesi maho sisëho bogo ujuohëhë'ëro naehu nimorohë'i jövajoho Greece sa'are raromaruje aribövioho ae gemu vadu'oho bogo ahevo'anue. ¹¹ Na rabëni ëhi jië'e jöho uëve. Na na jemë bogo uehorovëvoromo ëhuni jöve. Röhu God-hu gevajoho iae naro jemesi örire uehorovëvajeje.

¹² Jemë ajëmijahohuni na manaho bogo ujuohajëro ijönöhu'o bogo ujuohëho'ejo. Ëhesi bëhoho i'o ö'are ariböviohuro nimö a ioro'iorohuro ëma uvoröhego: Jabuhu nimorohë'i atarue jöho iae mae höjo. Jabu'o Paul-më'o masije gemuoho jëvajëjo. Ëhuni i'o ö'are ariböviehu jemesi bövi bise'o ujuohëharuëhioho na bogo ëhioho ë'ejo a ioro'iorohuro uvoröhego: Ëariböviohu'o Paul-më'o hahagu hahagu jëvajëjo. ¹³ Ëaribövioho bogo apostle maho jioruomo'i ma-sareri'e apostle

jioruome. Sareri'e mu vaejarue aribövie jioruome. Huotorovoromo ma-döhemu mu mae vaejarueje aëro gëromo uvoröhego: Iae Keriso-are apostle jëvájëjo. ¹⁴ Èhi jië'e sareri'e mu vaejaruoho gëromo no bogo majiohavue. Èhesi bëhoho Satan'o huotorovoromo ma-döhemu mu mae vaejeko aëro uvoruomajeje: Aji'e aneraëro ë'ajëjo. ¹⁵ Èhuni Satan-are mu vaejeharue ariböviohu'o huotorovoromo ma-döhemu mu mae vaejaruoho ëho bogo bërömehuje. Jabumë ë sisë vaejaruëhi ëhi sisëro va'o hesi jioruome.

Paul apostle jioromo huë vavaeni baebe juvaje jö huhu nimorohë'i jajivade jöhoje.

¹⁶ Röhu urimë'i jajivodëhi iae na ëhi gemuoho majëhi'ie'e. Nadi ae gemu vadu'oho uvore: Paul simano rumo'e ae höjo. Röhu jemëhu uvë'oho: Nörö ëhi jië'e ae hö uvë'oho iae hesije. Simano rumo'e ae höromo ma-baejevego na'o ma-bisemu rajahirovë'i jajivo'iro. ¹⁷ Na avevejë'e jajivo'ie'aje jöho bogo Badahu nimajëhi jië'e jöho jajivo'i a'i simano rumo'e aehu ataruëhi ëhi jajivo'ie'e rajahirovo'irode bëhoho na jevajë uvë'ëro jevë'ëro. ¹⁸ Ae aho'obëhe sine rajahirovë'i ataruohuni ëhuni na'o ëhi gemuoho jajivo'ëjo.

¹⁹ Röhu jemë uvë'oho: Nörö simano rumo'e ae hö uvë'oho nasi jöho ma-baere. Èhesi bëhoho jemë uvarujeje: No simano ma'e javuajëromo ë i'o ö'are simano rumo'e aribövioho mae höromo iae rajëhijë'i baejëvarujeje. ²⁰ Jemëhu jabetesi darugore raromjörö rëmaruoho jemesi mae sisë ijëharuoho sarerisareriëmiromo jemë baejëvaruoho jemë taemëvaruoho nu ano'ere hirimijëvaruoho ëhi jië'e aribövioho jemëro baejëvarujeje. ²¹ Iae mae nomë darugo rumo'ëro javuë'ëro jabuhu ë'aruëhioho no bogo ëhioho ë'arueje. Èhuni na javojego'ego uëve.

Jabuhu biriri'övoromo rajahirovë'i ataruëhi na'o biriri'övoromo ë'ëjo. Na simano rumo'e aëro jöho jövevanove. ²² Jemëro jabumë rajëhijörö uëvarueje: Nomë Hebrew sa'a raje javuajëjo. Röhu na diho raje jeve. O uëvarueje: Nomë Israel raje javuajëjo. Röhu na diho raje jeve. O uëvarueje: No Abraham-are ujo ömo'öme javuajëjo. Röhu iae na'o ëho raje jeve. ²³ Jemëro jabumë rajëhijörö uëvarueje: Nomë Keriso-are mu vaejeharue ae javuajëjo. Röhu naro jabumë iosirëmiromo Keriso-are mu maho vaejajeje. Simano sisërëjë'e ahuro jövevanove. Jabumë iosirëmiromo mu bövie vaejë'e jeve. Iosirëmiromo Keriso-are jöëni savoji gagore hi'i hijë'e jeve. Majae aho'o hisuebijevoe rovë'ëjö. Röhu jabumë bogo ëhioho hisuebijëvë'ëjö. Iosirëmiromo vörö'ere va'amu guomevo'i höjë'ëje. ²⁴ Jew rajehu vae aho'obëhe 39 hisuebijevo'i arijaroho ëho majae övo gö mine ëhi'obe rovë'ëjö. ²⁵ Majae niö'i gemu Rome rajëro na hisuebijevo'i arijë'ëjö. Majae gemu munëro vajemijë'ëjö. Majae niö'i gemu boat-re hiromo va'amu datorovo'amadeje. Boat datorovamu na majae gemu vahie gemu jovo ririre ijo ha'osi döre hetejodeje. ²⁶ Majae aho'o öre göre göre juvodevare evare jövëro baejevo'i höjë'ëje. Vajiohu'e aëro ijumevo'i höjë'ëjö. Nasi sa'a rajëro ijumevo'i höjë'ëjö. Sa'a ioro'ioro rajëro ijumevo'i höjë'ëjö. Amore hijamu ijumevo'i höjë'ëjö. Örire juvamu ijumevo'i höjë'ëjö. Sö jovore juvamu ijumevo'i höjë'ëje. Ma-döëremu agane vaejeharuhuro ijumevo'i höjë'ëjö. ²⁷ Mue vaeromo u'ue baenövodeje. Röho deroho

bogo avoho niavonövodeje. I rumo'e jovo rumo'e ma-hinövodeje. Ioho bogo uehorovë'i hinövodeje. Javu rumo'e niögu rumo'e ma-hinövodeje. ²⁸ Èhi jië'e huë vavaeni ioro'ioroho bogo uë'i ave jöhemu uë'ejo. Majae èhi ekaresiae dinö'e dinö'e jioruomajohuni na uehorovëvoromo nurunuruego avohe. ²⁹ Ae gö dë vövöbajo'e u'uhë'iroho na'o gemuoho herovajeje. Ae göehu gö hesi dëre bijiohamu sisëre beva'ë'iroho huë vavaene sisë maro jevajeje.

Paul-ro Damascus jioromo ju'ebijadeje. Èjöho Paul-ro jajivadeje noro uvoröhego: Hu darugo rumo'e jiade höjo. Èhesi jöhoje.

³⁰ Öre gö bogojevë'ego nasi jöho èma nimorohë'i jövo'ejo. Röhu rabu muehu nasi örire rovadoho aehu heromo uvaruoho: Paul darugo rumo'e hö uvaruoho èhi jië'e jöhemu nimorohë'i jajivo'ejo. ³¹ Naehu jö jajivo'ië'ajoho Bada Iesuare Börömoho o göho hesi Vavue God-ro geve na bogo sarerëmi'ego. Hesi ihoho ma-mabëhe jiemu jiobe va'ë'e. ³² Na Damascus amore hijodevare ë sa'a muebejaje ae Aretas-are uhure bamare ahuro ë amo börömo rejo hesi ojore ojore ae nugo'amadeje na va'ego guduamevoruomoröhego. ³³ Èhi'amu niomoniomo bojöre arirovodeje. Arirovamu ö'ëro beromo ma-saginiëri ö'ire ma'enë'i amo rejo sigagure ö'oho a'ohö'öjë'i ma-u'emu ba'amevamu rue je'onö ruvebi sa'are ravo'amoromo ju'ebidëgodeje.

12

God-hu mu mabëhe röjahi'ego Paul-hu nia'ovo'iraeromo ganövade jöhu'o huë vavaeni'e hijade jöhu'oje.

¹ Röhu öre gö bogojevë'ego gö'o nimoronimorohë'i jajivo'ejo. Nimoronimorohë'i jajivë'oho bogo èhuro marëjevo'ë'e. Èhi jie röhu Badahu ajemi'ego nia'ovo'iraeromo ga'amonövode jöho mu masije gö gö röjehi'ego nia'ovonö'e ga'amonövode jöho èhi jië'e jöho iae na jajivo'ië'e. ² Na Christian ae gö gavë'e jeve. Èaho God-hu baejamu aruhe ö'idö mare ajiomadeje. Ajiomoromo vuonorö'ö ruvebijadoho vadune aho'obëhe 14 barëjë'eje. Nani hu sinohu'o ajiomadeje o nani sine diboromo ajiomadeje. Na'o bogo gave. Hesi God-ro gemuëro gave. ³ Naehu gavajoho ë aho God-ro baejamu Paradise-re ajiomadeje. Röhu maho uë'ejo. Nani sinohu'o ajiomadeje o nani sine diboromo ajiomadeje. Na'o bogo gave. Hesi God-ro gemuëro gave. ⁴ Hu ajiomoromo hejadeje jö mabëhe hesi jöho bogo ato'iröhe jöho uvavamu. Hejade jö ma-aehu atë'oho sisëje. ⁵ Èhi jië'e a hesi jöho nimoronimorohë'i jövo'ejo. Röhu nasi jöho bogo jövo'ejo. Majae göro göro na bogo eni jevaje ë jöhemu nimorohë'i jövo'ejo. ⁶ Röhu nasi jöho nimoronimorohë'i jövo'ibejo èho bogo simano rumo'e jöho jio'i majö mae jio'ibejo. Röhu bogo nimorohë'ioho jövo'ejo jemëro ma-nasi jöhemu heromo uvojöëni: Paul a böröme höjo. Èhi jië'oho sisëje. O nasi mu jemesi nunehu garomo nasi jö jemesi hia'ehu heromo nöro mae hö uehorovë'oho èhemu iae maeje.

⁷ Röhu ae gö ö'idöhe ajiomoromo Paradise garomo ruvebijade ë hesi jö majëhijode hesi bëhoho nasi jöho majëhiromo ë'odeje. Röhu èhi jië'e mu masijo masijoho God-ro röjehijamu ga'amë'ëro na sisë'i uehorovoromo dëre bamorovojöëni èhuni huro huë vavaeni'ere bamevë'ëro huë

vavaene gemuëro nasi sino uhure bibëro namijevanovajeje. Ëbibëho Satan-hu nugö'öjadohoje na sisë vaejevonövoröhego. Röhu ë vavaeni rovide hesi bëhoho naro bogo sisë'ioho uehorovoromo döroho bamorovo'irodego. ⁸ Bibëro namijevanovamu hegoroovo vae niö'i gemu Bada ëninami'i hijodeje rori'o babu'öjehoröhego. ⁹ Ëninami'i hijamu uevadeje: Bogo ë'ejöjo. Naehu huë baejavoromo darugo bojamajohuro ëhuro ja eni javajëjo. Ëhesi bëhoho ae u'uhëvë'o ho nasi darugohuro ëhuro biririvëvo avohaje höjo. Ëhi uevë'ëro ëhuni rabe rabe bogo eni jevë'o ho ëhi jië'e jöhuremu na nimoronimorohë'i jövo'ejo. Ëho nimoronimorohë'i jövë'o ho nasi dë vövöbajo'o uhure ma-mabëhe jevo'ë'e ëhuro Keriso-are birirohuro na aegehoröhego. ¹⁰ Ëhu'ëro jië'ëro Keriso-are jöëni u'uhevë'o ho o aehu sivegë'o ho o naehu vörö'ere va'ë'o ho o aehu sisë vaejevë'o ho o huë vavaeni bövi bise'o baejevë'o ho iae na huë mae jevajeje. Ëhesi bëhoho u'uhevë'o ho iae evare na daruge baeromo biririvevajeje.

Paul-hu Corinth aribövi jabesi jöëni börömo bëhe uehorovoromo ëhuni jajivade jöhoje.

¹¹ Nasi arijo'ëro nasi jöho nimoronimorohë'i jövoromo ëhuro na simano rumo'e aëro jajivanovë'e jeve. Jemëro na bogo ajemijë'ëro ëhu'ëro na öre gö bogojevadeje. Bogo naehu a'i jemëro uvo'ibejarije: Paul mu mae vaejaje hö uvo'ibejarije iae mae jio'ibejo. Röhu jemë bogo ëhioho uvarijeje. Ëhuro öre gö bogojevadeje. Ëhesi bëhoho jemëro uvarujeje: Ëi'o rovere aribövioho apostle masijo masije jioruomoi' nöruare ihoho bogohöjo. Ëhi uvarujeje. Iae na bise'e jeve röhu jabesi ihohuro nasi ihoho bogo iosiramiro mo masijoho jioruomë'eje. ¹² Na jemë'o hijodevare evare apostle-ehu vaeruomaje ëhi jië'e mu masijoho bogo gavarue darugo'e mue gö gö u'urume vaenövodeje jemëro garomo uvo'irarijigo: Nörö apostle höjo. ¹³ Naro jemesi öriroho diehi sisë'i ajemijë'ëro jemë uvarujeje: Paul ekaresia ioro'iorohuremu ajëmi'i no bogo ajamuijade höjo. Jemë nani ëma uvarujeje: Paul-hu nosi mana bogo baeromo huë vavaeni bogo bojamuinövadoho ëho sisë höjo. Ëhi jië'o ho nasi sisëho uehorovoromo vuonugore.

¹⁴ Röhu aveho gare. Urimë'i vae niö'i ö'oromo hijodoho iae na röhu maho ö'ië'e. Ö'ë'o ho bogo huë vavaenoho bojëmiromo jemesiroho mu hesi manaho bae'ejo. Ëhesi bëhoho na jemesi maho sisëho bogo uehorovo'irögoro jemë uehorovëve. Jemë nasi aboji harihu'o va'ëne jëvanove. Aboji harihu'o ho bogo vëmu vavu'o jabesi jöënioho maho sisëho gagovoromo bahijëhoruomoi' a'i vëmu vavu'ohuro aboji harihu'ohuni gagovoromo bahijëhoruomajeje. ¹⁵ Naehu jemë ajëmi'irodëni nasi mae sisë bojëmi barëromo nasi arijo'arije ëhu'o bojamirovë'o ho na mae jeve. Naro jemesi örire dë vövöbajo'e aho'o uehorovëvajeje. Na ëhuni jemëro na bogo börömo ho uehorovevarujeje.

¹⁶ Nani jemë uvarujeje: Ja jö mae jövanuëjo. Jasi arijo'ëro nosiroho mu hesi manaho bogo baeromo huë vavaenoho bogo bojamuijane höjo. Iae mae-ëjo röhu ja sareri sareri'e aëro javë'ëro sareramuiromo nosi ijo bajoho ujuohahuane höjo. ¹⁷ Ëhi uvarujoho na jemëro uvö: Paul-ro sarerivoro mu'o röromo ae gö nugö'öjade höjo huro ö'oromo nosi maho sisëho vajiohuvodaguojöro. ¹⁸ Röhu na Titus sisë maro uavodeje:

Corinth amoro va'onëromo Christian ö göho nugö'öjodeje Titus'o gemu mae ö'oröhego. Ëhi è'odeje. Titus-ro ö'oromo na huro sarerëmiromo jemesi inömohego vajiohëro ujuohëhadeje. Bogo. Jemë'o uehorovore. Hu'o na'o uehore gemuoho mue gemuoho baeromo jireharueje.

¹⁹ Ave noehu jajivarue jöho nani jemëro adahobe va'oromo uvonövo'arueje: O Paul-mëhu jajivare hesi bëhoho jabumëro jabesi ihoho nosi nunire avohoröhëni ëhuni jöho jajivare höjo. Röhu no bogo jemesi nuniroho riravoromo jajivo'i Keriso-are aëro javuë'ëro God-are nunire riravoromo jöho jajivë'e javue. Nosi ö mueno'e noehu jö jajivëhë'o'oho o mu rabe vaejëhë'o'oho ë hesi bëhoho bogo nosi ihoho avohorovo'i a'i jemë ajëmego biririvëvoröhego ë'arueje. ²⁰ Na juhuoninege naro ö'oromo gejëöeni jemë ëhi mae jëvojöro negajoho gö jëvego o jemëro na gejëöeni jemë na sanu'e ae jevojöro nëgajoho gö jevego. Na juhuoninege gejëöeni jemë iro muorovo'e vaejeho o a jabesi mu mahuni dë vörönëgego o vörö'iraeromo muorovego o jemë sivu sivue uehorovego o jemëro ae göëro gö sivego o ae göëro gö hesi sisëho saginiëri atego o sivue döro bamorovego o jemesi nimarujohemu ëma vaejeho. Ëhi jië'e mu sisëho jemëro vaejeho gejëöeni ëhuni juhuoninege. ²¹ Na juhuoninege röhu maho ö'ego nasi Börömohego God-ro javoje bojëmego jemesi nunire baejëöeni. Ëhesi bëhoho na gejëöeni ae aho'obëhe jemesirire mami'e mu sisë vaejaroho bogo vuonugë'e jioruomego. Biriri'övoromo öehu jijihanovoromo bövi bise'o ëma vaejaroho bogo vuonugë'e jioruomego. Ëhi garomo huë vavaene böröme baejëöeni ëhuni juhuoninego'ego jöho jajive ajëmi'irodëro.

13

Corinth rajehu avoho raromoröhego Paul-hu majëhiromo jögoru mëmade jöhoje.

¹ Urimo vae niö'i ö'odoho röhu maho ö'ejo. Ëhi jië'o'oho vae niö'i gemu ö'ë'e jevo'ë'e. God-are surire jöho ëhi uvë'eje: Ae rahumëhu ae gö hesi sisë court-re majëhijë'o'oho ae niö'i o niö'i gemu mu sisë gavarijohuro jöe gemuoho ajamirovoromo huruoho majëhi'iramu hesi jö sisëho jio'a'ajëjo. God-are surire jöho ëhi uvë'eje. Ëhuni jemë bogo avoho raromë'o'oho naro ö'oromo jemesi jö sisëho majae niö'i gavodoho röhu maho gavëho'iramu jemesi sisëho va'orahore huruohëhë'e jio'ë'e. ² Urimë'i na ö'oromo rueromo röhu maho ö'ode majare evare jögore bojëmiromo uëvodeje: Mu sisë urimo vaejar-ije ariböviohu'o a ioro'iorohu'o naehu röhu maho rovë'o'oho bogo vuororëmi'i i'ue bojëmi'ejöjo. Jemë'o hiromo ëhi uëvodoho öre ëgo'o hiromo röhu maho ëhi gemuoho uëve. ³ Naehu jemë i'u bojëmi'irode hesi bëhoho jemë uvarueje: Ë'ego no ga'irarëjo Kerisoro Paul jöe bojëmego o bogo bojëmego huhu no majahuijajoho. Iae naro Keriso-are darugoho baeromo ö'oromo i'ue bojëmi'iramu ga'a'arueje Kerisohu na jö bojëmajoho. Kerisoro bogo ma-u'uhoromo jemesi öriroho muoho vae'i a'i darugo ma'o vaejajeje. ⁴ Iae Keriso-are sino u'uhamu korosire anamu guomadeje röhu avevejö'o'oho hu God-are darugoho baeromo biririvoromo hijajeje. Keriso-are aribövie gemuohuro javuë'ëro no'o ëhi u'uhavuajajeje. Röhu God-are darugoho baeromo Keriso'o gemu mae raromoromo biririvoromo jemesi örire ajëmi'ejöjo.

⁵ Nasi öriroho nadi bijeho ge'i a'i jemesi arijo'arije garorovoromo gare jemë Keriso uhohu'o mae uehorovëvego o ma-döëremu mae uehorovëvego. Jemë iae garomo uvarujeje: Iesu Keriso Corinth rajo nosi dë vövöbajo'ere hijaje höjo. O na jemë ma-döëremu muoho vaejarujeje. ⁶ Röhu naro uve: Jemëro garomo uvo'a'arujëjo: Paul-më bogo ma-döhemuoho muoho vaejarue höjo. Na nege jemëro ëhi uvo'irarijego. ⁷ Noro God-are örire uavarueje huro ajëmego jemë bogo rireromëvo'iröhego. Ëhesi bëhoho bogo ae aho'obëhe uvo'irarijego: Paul-mesi darugoho ruahö'öjë'e hö uvo'irarijego bogo ëhunioho no uavarueje. A'i no uavarue hesi bëhoho jemëro mu maemu vae'irarijego ëhuni God uavarueje. Röhu jemë mu mae vaejamu noehu i'u bojëmi'iröhe darugo bogo röjëhijamu aehu uvë'o'ho: Paul-mesi darugoho bogohö uvë'o'ho iae hesije. ⁸ God-are jö ma aho'iröhoho no bogo eni javuo'i ma-nigemo'iröhoho eni javue. Ëhuni jemëhu mu mahemu ejamu gëvë'o'ho no i'u bojëmi'iröhe darugoho bogo röjëhi'ejo. ⁹ Jemëhu Keriso-are darugo baeromo biririvë'o'ho o noehu Keriso-are darugo jemë bogo röjëhiromo i'u bogo bojëmamu a nunire u'uhavuë'o'ho iae nimoroharueje. Jemëro avo'avoho uehorovo'irarijego ëhuni noro God-are örire ua gavarueje. ¹⁰ Ëhu'ego na öre ëgo'o hiromo ave jö jajivaje hesi bëhoho na ö'oromo jemë'o hiromo nasi darugoho bogo baeromo vörö'e i'uoho bojëmi'irodëni. Ëdarugoho Badaro bojemadeje bogo jemë ijumëvo'i a'i ajëmego avoho biririvoromo mae uehorovobe va'irarijego.

Paul-hu ijo tugoho'i jejëmijade jöhoje.

¹¹ Nasi ö mueno'e ijo tugoho'i jöho uë'ië'e. Mae raromore. Avo'avoho uehorovoromo nasi jöho ejehore. Uehore gemu baeromo huë mae baerovore. Ëhi ë'ë'o'ho God huë ma o sanu'e jö bojamuijaje ahuro jemë'o hi'ë'e.

¹² Christian ö mueno'ehu jejamirovaruëhi ëhi jejamirovore.

God-are aribövie aho'obëhe jemesi örire jejëmijö.

¹³⁻¹⁴ Bada Iesu Kerisoro huë baejëvoromo jemë aho'o ajëminövo'i God-ro jemë aho'o uehorovëvonövo'i God-are Aru'aho Mahuro ae aho'o jemë'o gemu mae hi juvo'ë'e. Ahia mino'e.

GALATIANS

Paul-hu Galatia aribövi jejëmade jöhoje.

¹ O asë'e Galatia ekaresiaho Paul naro jemesi örire jajive. Na apostle jeve. Èhesi bëhoho bogo ma-aehu hesi uehorovoromo uevamu apostle muoho bae'i bogo God-ro ae uavamu ë ahuro rueromo uevamu apostle muoho bae'irögoro a'i Iesu Keriso'o God Vavuohu'o jaburo uevamu apostle muoho baejodeje. Iesu Keriso'o God Vavuehu Iesu ajamamu ri'öjade ë ahu'o ëho jaburo niö'iro uevamu muoho baejë'ëro ëhu'ëro na apostle jeve. Èhuni naehu majëhi'ië'aje jöho avo'avoho here. ² Röhu na'o gemuore arijarue Christian aganoho aho'obëhe na'o gemuore havoromo jemë jejëmijö ekaresiae aho'obëhe Galatia sa'are dinö'e dinö'e jëvajoho. ³ Na nege God nosi Vavuohu'o Bada Iesu Keriso'o huë baeromo ajëmijego maro raromo'irarijego. ⁴ Kerisoro God nosi Vavu hesi jöho ejahoromo nosi sisëni guomorovadeje ëhuro avevejö'e jiaje mu sisë hesi darugore javuajoho baeniahiwego maro javuoröhego. ⁵ Èhuni God-are ihoho noro mabëhe uabe va'onörovo'ejo. Iae mae.

God-are jö mae ma-gemu jio'i gö gö bogojiaje jöhoje.

⁶ Röhu jemë diehi diehi sisë'i ë'arujoho na heromo jöe barëjeve. Èhesi bëhoho God-ro Keriso-are huë mae röjëhiromo ëhuro hesinö rinëgadeje. God-hu ëhi ë'adoho jemë rabëni ma-burëroho hu vuonugo'i jö göho God-are jö maho höromo ejëhoromo baejö. ⁷ Èjöho bogo God-are jö maehuje Keriso-are jö maho gemu jio'i gö gö bogojie'ego. A'i aëro jemesi simanoho sisë vaejëhoromo Keriso-are jö maho huotuhuotovo majëhi'i nimö. ⁸ Noro urimë'i God-are jö maho majëhijareje. Noehu majëhijare jöho ae rahu vuonugo'i sarerëmiromo jöe gö majëhiromo jemë ëma uëvë'ocho: Aveho God-are jö mae hö uëvë'ocho God-are i'u börömocho baerumo'ë'e. Naehu ëhi sareri sareri ë'ë'ocho o aneraehu ö'idöre jioromo ruvebiiromo ëhi sareri sareri ë'ë'ocho o ae rahu ëhi ë'ë'ocho no God-are i'u börömocho bae hesi javue. ⁹ No mami'e jemë'o ariromo ëhi jië'e darugo'e jö majëhijaroho röhu jaruvo na jöe gemuoho majëhi'ejo. Jemëhu baejarije jö maho ae rahu vuonugo'i jemë sarerëmiromo uëvaruoho: Ave jö göho God-are jö mae hö uëvaruoho God-are i'u börömocho bae hesi jioruome.

¹⁰ Naehu avevejö'e jajivaje jöho na na ma-aëro mae uehorovevojöro ë'e o na na God-ro mae uehorovevojöro ëhuni jajive. Na na ma-aëro rajehijöro jajive. Naehu ë'odëhi na ma-aëro rajehijöro jöho majëhi'ibejo ëhuro na bogo Keriso-are mu ajamijaje aho jevo'ibejo.

Paul-hu a majëhijaje jö maho ë jöho bogo aroho bae'i Iesuaro baejade jöhoje.

¹¹ Röhu nasi ö mueno'e na nege jemëro ave jöho avo'avoho he'irarijego. Keriso-are jö ma naehu majëhijamu hejarijoho bogo ma-aehu jabesi ma-uehorovoromo na majehare jöhoje. ¹² Bogo aehu avevoromo jöho majehiromo bëhoho huruoho majëhi'irögoro a'i Iesu Kerisoro huro jöho majehijamu baejodeje.

13 Iesu Kerisoro majehi'i bogo Keriso-are ariböviehu majehijamu hejodeje. Jemë'o uehorovore. Naehu bogo Christian vaejë'e Jew rajo a mami mu vaeromo God rajahinövode majare evare naehu diehi diehi hi juvonövode jöho mami'e hejarijeje. Evare majare naro biririvoromo God-are ekaresiae aho'obëhe sisë vaejëvobe mu'u'amo'i ë'o gabe rovodeje. Ëhuni Keriso-are jöho bogo jabesi öriroho hejodeje. 14 A'i vadune gemuore jioruomade ë aribövioho nasi Jew raje gemuoho aho'o naro iosirëmiromo Jew rajo nosi hijo miono'o jabesi jögoroho nimoromo nosi Jew rajo muoho bae avohodeje.

15 Ëhi jië'e ae jevadoho röhu urimo mamu na bogo rahevë'e ma-dëre jevamu evare God-ro hesi jevojöro nijio'iraejevë'ëro ijönö huë baejevoromo hesinö ringadeje. 16 Ringoromo huhu nimadëhi hesi Harihoho röjehijadeje naro garomo Jew rajo nosi sa'aroho bogo a'i sa'a ioro'ioro rajo jemesirire Keriso-are jö maho majëhibe juvonövo'irodego. Röhu God-ro hesi Harihu röjehijadevaroho evaroho na bogo ë amoroho hiromu a jö'oroho baeromu 17 bogo Jerusalem amu börömoreho ajiomoromu urimu riravare apostle ömo'ömohu'oho jöho atoromu jö maho ë bae'irögoru a'i na ma-burëro öre gö va'oromu Arabia sa'are hijodeje. Hijë'ëro Damascus amu vuonorö'öromu rovodeje. 18 Amu röhu God-hu na hesi Harihu röjehijadoho vadune aho'obëhe niö'i gemu barëjamu evare na Peter'o jöe jörovo'i Jerusalem amu ajiomodeje. Röhu majare ma-bisemu hurae niö'i rabu'e ëhi hu'o hiromu va'odeje. 19 Peter iae naru garomu röhu Bada Iesuare öho James hu'o gavodeje. Röhu apostle ioro'ioroho bogo gëvë'e ma-va'odeje.

20 Naehu jemesi örire jajivaje jöho God-hu gevajoho na bogo sar-erëmiye.

21 Apostle ioro'ioroho bogo gëvë'e ma-va'odeje. Jerusalem amoho Judea sa'aho nugo'i va'odoho va'o Syria sa'are Cilicia sa'are hibe juvodeje. 22 Röhu Keriso-are ekaresiae gö gö Judea sa'are raromaruoho ëho jabu nasi nu ano'oho bogo gavareje. 23 Nasi nu ano'oho bogo ga'i ma-hejareje aëro uvavamu: Urimoho nöörö Christian aribövi nosi örire sisë'i vaejavuobe juvade höjo. Sisë'i vaejavuobe juvoromu Keriso mae uehorovarue mu mu'u'i ë'o gabe juvadoho röhu avevejö'oho Keriso mae uehorovo'iröhe jöho nöörö majëhibe juvaje höjo. 24 Ëhi uvamu hejë'ëro jië'ëro nasi jöëni God mabëhe uavareje.

2

Paul-hu a majëhijaje jöho Jerusalem ekaresia a masijohuru heromu uvareje: Ëho jö mae höjo. Ëhesi jöhoje.

1 Ëhi'oromu vadune aho'obëhe 14 barëjamu gagorovo naru Barnabas'o gemu mae Jerusalem amu börömore vuonorö'ö ajiomodeje. Röhu Titus hu'o hu'irae baeromu ajiomodeje. 2 Ajiomode hesi bëhoho God-ro uevë'ego ajiomodeje. Ajiomoromu ekaresia a masijoho jabu-remu na'o nosi hahagu gagovorovoromu jöho atareje. Atoromu naehu sa'a ioro'ioro rajo diehi jië'e jö majëhibe juvode jöho naru huruoho majëhijodeje ë ekaresia a masijohuru avoho heruomoröhego rabëni naehu mami'e vaebe rovode muoho jabumëro ahego bejöëni. Iae ëhuni avoho majëhijodeje. 3 Röhu nasi muoho bogo ahehareje. Bogo ahehoromu uevareje: Sa'a gö rajoho Jew rajo jögoroho röjëhi'ibejanëjo.

O na'o rovade aho Titus bogo Jew rajehu jio'i sa'a gö raje a jiajoho röhu jabumë bogo uövuareje: Titus baeromo Jew rajo muoho vaeromo sinoho tariojahego hu God-are nunire mae nami'irajo. Ëa masijoho bogo ëhi jië'e jöho uö'i a'i ⁴ hesi ae göëro nimareje Jew rajehu ë'aruëhi ëhi ë'oromo Titus-are sinoho tariojahojöro. Röhu jabumë ma-döëremu Christian aribövie jëvë'ëro ë'areje. Ma-döëremu Christian aribövie jioromo sisë'i uehorovoromo saginiëri rueromo nosi gemuore gagovareje ga'i no Iesu Keriso-are ae gemuohuro javuë'ëro no diehi jië'e sasohë'e muoho baejë'e javuego. Ëhesi bëhoho jaburo nimareje Jew rajo nosi i'u'e muoho noro röhu maho vaemu vaeröhego. Ëhuni nimareje Titus-are sinoho tariojahojöro. ⁵ Ëhi nëgamu röhu jabesi jöho no bogo mae bogo ejëhareje ëhuro noro Keriso-are jö maho avo'avoho muebejego jemëro ë jöhemu he'irarijego.

⁶ Röhu ekaresiaehu uvoruomaje a masije hö uvoruomaje aribövioho jabumë a masijoho o ininoho naro uehorovoromo uvajeje: Iae hesi höjo. Ëhesi bëhoho God-ro gövuajeje a masijoho o ininoho bogo göho göho javuo'i ma-gemuoho javuego. Röhu ë ekaresia a masijohuro naehu majëhibe juvaje jöho heromo röhu jö gö'o'oho bogo döroho bojëmijareje ëhu'o majëhijöro. ⁷ A'iro jabumëro iae mae garomo uvareje: God-hu Peter mu bojämijadëhi ëhi nörö muoho bojämijade höjo noro Keriso-are jö maho baeromo Peter-ro Jew rajo örire majëhibe juvo'i naro sa'a ioro'ioro rajo örire ëhi majëhibe juvo'irodego. ⁸ Ëhesi bëhoho God-ro Peter darugoho bojämijadeje huro apostle muoho baeromo Jew rajoho ajëmi'iröhego. God-hu Peter darugo bojämijadëhi na'o ëhi bojëmijadeje naro apostle muoho baeromo sa'a ioro'ioro rajoho ajëmi'irodego. ⁹ Ëhuni ekaresiaehu uvoruomaje masije hö uvoruomaje aribövioho James Peter John ëho jaburo garomo uvareje: God-ro huë baeromo nörö muoho bojämide höromo na'o Barnabas'o öve ma'enaguoromo uövuareje: Jemë'o no'o uehore gemuoho javuajëjo. Noro Jew rajo nosi sa'are jöho majëhibe jijiho'i jemëro sa'a ioro'ioro rajo jabesi sa'aro va'o jöho majëhibe jirehonövorëjo. ¹⁰ Sa'a ioro'ioro rajo jabesi sa'aro va'o majëhibe jirehorëjo röhu nosi aribövi inömo bogojëvajohe ëho uehorovëvonövorëjo. Ekaresia a masijohuro ëhi uövuareje. Röhu ëhi jië'e huë baejë'e muoho iae naro vae'i nimobe rovë'e jeve.

Antioch amore Peter-hu mu sisë vaejamu Paul-hu jögoru bojämide jöhoje.

¹¹ Röhu Peter Antioch amore rovamu naro hesi nuniro hu jö aho'ahamijodeje hu mu sisë vaejë'ëgo. ¹² Naehu ëhi uavode hesi bëhoho urimoho Peter-hu aevoromo Antioch rovadevare evare uvadeje: Jew rajo mu vaeromo sino tarivarue Christian aribövioho no'o Jew rajo mu bogo vaeromo sino bogo tarivarue Christian aribövioho jabu'o gemuoho javuajë uvoromo sa'a ioro'ioro rajo Christian ö mueno'ohu'o gemuoro hiromo ioho inövadeje. Gemuore hiromo i ibe rovadoho gavade Jew rajohuro James-arire jioromo ro Antioch raromamu gëgorovo uvadeje: Ësino tarivojöro nimarue ariböviehu gevë'o'ho na Jew rajo mu bogo vaejarue ariböviohu'o gemuore hijamu gevë'o'ho bijönimoruomo'ajëromo juhuonivoromo sa'a ioro'ioro

rajohu'o i ijadoho vuonugo'i rori'o va'o hijadeje. ¹³ Peter-ro juhuoniv-
 oromo èhi jiè'e sareri sareri'e muoho vaejumu gagorovo Jew rajo
 ioro'ioro jaburo sa'a ioro'ioro rajohu'o gemuore raromoromo i
 ue'aharoho vuonugo'i jabu'o èma sarere rori'o raromareje. Rori'o
 raromamu gëgorovo Barnabas-ro hu'o èma sarere va'o rori'o hi-
 jadeje. ¹⁴ Jabumëro èhi'amu gëgorovo Paul naro mae gëromo uvodeje:
 Jabumë God-are jö maho bogo avo'avoho uehorovoromo ahoriroho
 va'aruëromomo èhuni ri'öromomo Christian ae aho'obëhe jabeti nuniro
 namiromomo Peter-are örire uavodeje: Ja Jew rajo ae javajëjo röhu Jew rajo
 muoho bogo uehorovo'i sa'a ioro'iorehu raromaruëhi èhi hibe rovë'e
 javajëjo. Èhi jiè'o'ho ja rabëni sa'a ioro'ioro rajoho gorëvanuëjo. Jabu
 gorëvanuohuni dadibijiohoromo Jew rajo muoho baejöräjo.

*God-are nunire mae riravo'iröhe hesi öroho ma-gemu jie. Iesu mae
 uehorovoromo èhuro mae riravo'ejo. Èhesi jöhoje.*

¹⁵ Röhu no Jew rajo mae javue nosi hijo miono'o'ho Jew raje jiohe
 rovë'ëro. No bogo God-are jögoru rumo'e sa'a ioro'ioro rajoho javuot'i
 no Jew raje javue. ¹⁶ Röhu noro garomo uvarueje: Ae rahu rahu God-
 are nunire mae nami'i nimè'o'ho hu bogo Jew rajo nosi jögoroho ejego
 God-ro garomo hesi sisëho u'ovahego hesi nuniroho maho namijaje
 höjo. Öroho bogo èhioho höjo. A'i Iesu Keriso mae uehorovego
 God-ro hesi sisëho u'ovahego hesi nunire mae namijaje höjo. Mae
 nami'iröhe hesi öroho iae èhi höjo. Noro èhi gavë'ëro èhuni Jew rajo
 Christian aribövioho no'o Iesu Keriso mae uehorovë'e javue noro hu
 mae uehorovoromo èhuro God-are nunire mae riravo'iröhëni. No
 bijönague mu vaeröhe jögoru e'i è'o garomo èhuro hesi nunire mae
 riravo'i è'o ga'iröhoho. Èhesi bèhoho bogo ae gemu vadu'o'ho noehu
 mu vaeröhe jögoroho ejego God-ro göromo nosi sisëho u'ovahuego hesi
 nuniroho maho riravarueje. ¹⁷ Jew rajo Christian aribövioho no God-
 are nunire mae riravo'i nagujoho no bogo Jew rajo nosi jögoroho
 uehorovo'i a'i no nimarueje God-ro no Keriso'o gemu mae ramuego
 èhuro God-are nunire mae riravoröhëni. Èhi nimoromo no'o Jew rajo
 jögoru rumo'e aribövio sa'a ioro'ioro rajoho va'ëne javuanovajeje. Èhi
 jiè'o'ho na no èma uehorovoromo uvo'ejo: God-hu Jew rajo bojamuade
 jögoroho Kerisoro ajamuego ahoromo mu sisë vaejarue höjo. Bogo
 mae bogo èhioho uvo'ejo. ¹⁸ Naro mami'e uëbe rovodeje: God-are
 nunire mae riravo'ië'iroho bogo Jew rajo jögoroho ejego èhuro God-
 ro nosi sisëho u'ovahuego hesi nuniroho maho riravarue höjo. God-
 are nunire mae riravo'iröhe öroho bogo èhioho höjo. Röhu naehu
 èhi majëhinövode jöho ahoromo uë'ibejo: Jew rajo jögoroho ejego
 God-ro göromo nosi sisëho u'ovahuego hesi nunire mae riravarue hö
 uë'ibejo naro sisë'i majëhiromomo èhuro God-are jögoroho aho'ibejo. Röhu
 bogo èhioho majëhi'ejo. ¹⁹ Naro mami'e uehorovoromo uvodeje: Jew
 rajo jögoru ejë'o'ho èhuro na God-are nunire mae nami'ejöromomo Jew
 rajo jögoroho e'i sivoho gajuvo gavode bogo eni jevamu gagorovo
 uvodeje: Noehu God-are nunire mae riravo'iröhe öroho bogo èhioho
 hörömo èhi uehorovodoho vuonugodeje. Na èhi jiè'e uehoroho ioro'iore
 gemu vuonugë'e jeve. Aehu vuovoromo ioro'iore gemu va'aruëhi
 na èhi ioro'iore gemu è öroho vuonugë'e jeve èhuro na i'ovoromo

hiromo God-are muohuremu vaebe juvo'irodëni. Keriso korosire guomadevare evare na hu'o korosire ano taemevamu guomevanovadeje. ²⁰ Guomevë'ëro ëhu'ëro na bogo nasi darugoroho o nasi uehororoho hi'irögoro a'i Kerisoro nasi dë vövöbajo'ere hiromo darugoho uehororoho bojemego hijajeje. Sa'are hijajoho God-are Harihoho mae uehorovoromo ëhuro ave sa'aroho hijajeje huro na uehorovevoromo nasi jöëni guomorovë'ëro jië'ëro. ²¹ God-hu huë mae baejavuoromo hesi Harihoho suvuoroho bojamuijadeje. Ësvuoroho na bogo mae bogo juahamiromo uvo'ejo: Na bogo Keriso gemu uehorovo'i a'i Jew rajo nosi jögoroho e ga'ejöjo God-ro geromo nasi sisëho u'ovehego hesi nunire mae nami'irodëni. Na bogo ëhioho uvo'ejo. Noro Jew rajo jögoroho ejego God-ro göromo nosi sisëho u'ovahuego hesi nunire mae riravo'ibejo Keriso nosi sisënioho ma-imo guomë'e jio'ibejo. Röhu bogo ëhiohoje. Ëhuni Keriso-are suvuoroho bogo juahovoromo Jew rajo jögoroho röhu maho uehorovo'ejo.

3

God-hu nosi aru'aho ajamuaje hesi bëhoho bogo noehu mu vaeröhe jögoru ejahego God-hu göromo ajamui'i a'i noehu hu mae uehorovego ajamuijaje jöhoje.

¹ Vaevë'e Galatia sa'a rajohumë sareri simano rumo'e aribövie jëve. Diehi'amu simanoho sisërëjähë'ëro sisë'ioho uehorovarujeje. Nadi ëhioho uehorovo'ibejarije. Ëhesi bëhoho Iesu Kerisohu korosire guomade jöho naro ma-sama'e majëhijamu jemë ae aho'obëhe hejarijeje. Ëhi hejarijoho röhu diehi'oromo sisë'ioho uehorovarujeje. ² Ave jöhuremu majehirego na he'iro. God-are Aru'aho baejarije hesi öroho diehi jiadeje. Na jemë Jew rajo jögoroho eromo ëhuro Aru'ahoho mana baejarijeje. O na jemë Keriso-are jöho heromo mae uehorovoromo Aru'ahoho baejarijeje. Iae mae uehorovoromo Aru'ahoho baejarijeje. ³ Röhu jemë diehi'oromo sisë'ioho uehorovarujeje. Aevoromo Keriso-are örire jijiharijevare evare God-are Aru'aho hesi darugoho baeromo jijihonövarijeje. Ëhi jië'oho diehi'oromo öri vituoho jemesi darugohuremu jijihoi nege. ⁴ Asë'e jemë Keriso-are mu öri bae avohobe rovarijoho na ë muoho ëma sisërë'e'e. Bogo. ⁵ Iae God-ro hesi Aru'ahoho ma-mabëhe bojëmiromo darugo'e mu masijoho jemesirire vae'amajeje. Rabëni ëhi jië'e darugoho bojëmijajeje. Na jemë Jew rajo jögoroho ejë'ego ëhuni ë hesi manaho darugoho bojëmijajeje. Bogo. A'i jemëro Keriso-are jöho heromo mae uehorovë'ëgo ëhuni ë'ajeje.

⁶ Röhu Jew rajo nosi bëhoho Abraham ëhi gemuoho jiadeje. Hu'o God mae uehorovoromo ëhuro huë maho baejadeje. Ëhesi jöho God-are surire jajivoromo uvë'eje: Abraham-ro God mae uehorovamu huro ëho garomo uvade höjo: Ëhuro iae hu nasi nunire mae nami-jajëjo. ⁷ Ëhuni jemë ga'a'aruje Abraham-are ujo ömo'ömo maho ëho God mae uehorovarue aribövie jio'amoi'iramu. ⁸ Iae God-ro uvadeje: Ijonö bogo Jew rajojo gemu a'i sa'a ioro'ioro rajohu'o nasi örire mae uehorovevë'ohuro ëhuro naro jabesi sisëho u'ovëho'iramu nasi nunire mae riravouomo'ajë uvoromo ë jö mabëhoho Abraham-are örire majahijadeje. Huhu majahijade jöho God-are surire jajivoromo uvë'eje: God naro ja ajami'iramu ëhuro sa'ae dinö'e dinö'e aho'obëhe

nasi huë maho baebe va'oruomo'ajëjo. ⁹ Èhesi bëhoho Abraham-ro God mae uehorovamu God-ro hesi örire ma-mabëhe ajamijë'ëro ëhuni ae rahu God mae uehorovë'oho God-hu Abraham ajamijadëhi ëhi ma-mabëhe ajamuijajeje.

¹⁰ O ae rahu uvë'oho: No God-hu bojamuade Jew rajo jögoru ejaho'i ë'lë'oho ëhuro hesi nunire mae riravö'ëjarë uvë'oho ëhi jië'e aribövioho God-ro i'ue bojëmego bae hesi jëve ë jöho bogo e barëjë'ëgo. God-are surire jöho ëhi uvë'eje: Mu vaeröhe jögoru surire jajivo'amadoho ae rahu ë jögoru bogo e barëjë'oho God-are i'uoho bae hesi jëvøjëjo. ¹¹ Aehu hesi darugehu Jew rajo jögoru e'i ë'lë'ohuro bogo ëhuro God-are nuniroho maho riravarueje. Èjöho iae ma-va'orahoroje. Èhesi bëhoho God-are surire jöho ëhi uvë'eje: Ae rahu God mae uehorovoromo ëhuro hesi nunire mae riravë'oho ë ariböviohuremu maroho raromoruomo'ajëjo. ¹² Aehu hesi biriri baeromo Jew rajo jögoru e'iröhoho ëho mue gö jio'i mae uehorovoromo uvë'oho: Hesi God-ro ajamui'ajë uvë'oho ëho göje. God-are surire jöho ëhi uvë'eje: Ae rahu Moses-are jögoru e barëjë'ohuro ëhuro maro raromoruomo'ajëjo. Èho bogo God mae uehorovego God-hu mae ajamui'ajë uvo'iröhe jöho jio'i nosi birivoromo mu vae'iröhe jöhoje.

¹³ Röhu noro ë jögoroho ahë'ëro ëhu'ëro i'u börömoho mana bae hesi javue. Èi'u börömo bae'iröhoho Kerisoro no'o röromo ë i'uoho baeromo ëhuro noehu bae'ibejaroho tugohahuadeje. Èhesi jöho God-are surire jajivoromo uvë'eje: A ijo döre iromë'oho ë hesi bëhoho ë aho God-are i'u börömoho baejë'ëro jië'ëro ëhuni ijoroho iromaje höjo. Èhi jajivë'eje. Röhu Kerisoro ijo döre ëhi iromoromo ëhuro nosi jöëni i'u börömoho God-aro baeromo ëhuro noehu bae'ibejare i'uoho tugohahuadeje. ¹⁴ Kerisohu nosi i'u ëhi tugohahuade hesi bëhoho iae naro majëhi'ië'e. Urimë'i God-ro Abraham mae uavadeje: U'emu naro jemë mabëhe ajëmi'iramu maro raromo'arujëjo. Röhu Iesu Kerisoro noehu bae'ibejare i'uoho tugohahuadeje ëhuro God-hu Abraham-më ajëmi'iröhëni uavadëhi sa'a ioro'ioro rajoho jemë ëhi ajëmijego maro raromo'irarijego. Noehu hu mae uehorovaruhuro ëhuro God-hu hesi Aru'aho bojamui'i uövuadëhi ëhi bojamuijego noro bae'iröhego. Iae ëhuni Kerisoro noehu bae'ibejare i'uoho tugohahuadeje.

Urimo God-hu hesi aribövi ajëmi'iröhe jögoroho Abraham majahiromo ijönö mu vaeröhe jögoroho Israel rajo bojëmijade ë jögoru niö'i jabesi jöhoje.

¹⁵ Nasi ö mueno'e noehu ataruëhi jië'e jöho jövo'irögoro ë'e jemëro ëho uehorovego jö bëhoho juvo bu'ö'iröhego. Ae niö'iehu jö gemuore uehorovoromo mae uaravë'oho: Noehu jörovarue jöho iae ëhi jiemu jio'a'ajë uaravë'oho aho jö göho bogo baro nosi jö gemuoroho havö'ë'ö o aho'ë'ö. ¹⁶ Èhesi bëhoho God-ro Abraham'o hesi ujohu'o mae uëbe rovadeje: Naro jemë ajëmi'ejöjo. Röhu God-are surire jajivare jöho bogo uvë'eje: Jasi ujoho aho'obëhe ajëmi'ejö uvo'i a'i uvë'eje: Jasi ujoho ajami'ejöjo. Èhesi bëhoho a uje gemu ajami'iröhëni uavadeje. Ujoho iae Kerisö jiadeje. ¹⁷ Èhesi bëhoho naro majëhi'irögoro ë'e. Urimë'i God-ro Abraham-are örire jögoroho bojamiromo jöho majahi barëromo röhu uavadeje: Na jövode jöho bogo vuonugo'i iae na ajëmi'ejöjo. Èhi

uavë'ëro va'o va'o va'o vadune aho'obëhe 430 ëmino'e barëjamu ijonö mu vaenövo'iröhe jögoroho bojëmijadeje. Bojëmamu röhu bogo ëhuro God-hu ajëmi'iröhe jögoru Abraham bojämijadoho tugoho'i a'i God-hu ajëmi'iröhëni mae jövade jöho ëhi jïemu jiobe rovadeje. ¹⁸ Noehu mu vaenövoröhe jögoroho ejahoromo ëhuro God-are suvuoroho mana bae'ibejo no uvo'ibejo: God-ro no ajamui'i Abraham mae uavë'ëro bogo ëhunioho hesi maho bojamui'i a'i huro gavade noro mu mae vaejamu gagorovo iae ëhuni hesi suvuoroho mana bojamuade höjo. Röhu bogo ëhiohoje. God bogo Abraham-are mu maho garomo hesi suvuoroho manaho bojami'i a'i God-ro no ajamui'i Abraham uavë'ëro ëhuni hesi suvuoroho Abraham bojamadeje.

¹⁹ Noehu mu vaenövoröhe jögoru ejahamu God-hu hesi suvuoro bogo mana bojamuijë'oho hu rabëni mu vaenövoröhe jögoroho bojamuadeje. God-ro ajamui'iröhe jöho urimo bojamuijë'ëro ijonö noehu mu vaenövoröhe jögoroho bojamuijadeje noro garomo uvoröhego: No God-are jögoru aharue aribövie javuajëjo. Noehu mu vaenövoröhe jögoroho bojamuijadeje ma-jahuri hebe uehorovobe va'ojuvo God-hu ajami'iröhëni uavade aho Abraham-are uje gemu Kerisoro rovego evare noehu mu vaenövoröhe jögoroho barë'iröhego. Röhu noehu mu vaeröhe jögoru God-hu bojamui'ie'adevaroho evaroho bogo ahoriroho nosi öriroho bojamui'i a'i ë jöho anerae bojëmamu jabumëro rueromo God'o no'o jiarue ririre namiromo nosi öri avohahuonövade aho Moses bojamamu huro ë jöho baeromo no bojamuijadeje. Ëhi'adeje. ²⁰ Röhu ae göehu göehu jö mevë'oho ae göëro rueromo öroho avohëhego jöho juvo bu'öjajeje. O ae gemuehu jö bojamuijë'oho a göho bogo rueromo jö bojamui'iröhe öroho avohahuo'ë'e. Ëhesi bëhoho God-hu no ajamui'iröhe jö Abraham bojamadearoho huro sivue ë jöho Abraham bojamadeje.

Noehu mu vaeröhe jögoru God-hu bëhoho rabëni bojamuade jöhoje.

²¹ Ajamui'iröhëro God-ro Abraham jöe gö gö majahijë'ëro röhu ijonö noehu mu vaeröhe jögoroho bojamuadeje. Ëhi ë'adohuro na ëhuro urimo uavade ajamui'iröhe jögoru öroho ahadeje. Bogo mae bogo. Ëhesi bëhoho mu vaeröhe jögoroho God-ro bojamuego noro ejahoromo ëhuro daruge baeromo maro raromo'ibejo noehu mu vaeröhe jögoru ejaruohuro ëhuro God-are nunire mae riravo'ibejo. ²² Röhu God-are surire ëhi uvë'eje: Ae aho'obëhe dinö'e dinö'e raromaruoho sisëro ruahö'öjavuë'e höjo. Ëhi jajivë'eje. Ëhu'ëro jië'ëro mu sisë vuonugo'i God-are suvuoro bae'ie'iroho ë hesi öroho ma-gemu jie. Ëöroho Iesu mae uehorovo'iröhohoje. Ae rahu Iesu Keriso mae uehorovë'ohuro ëhuro iae God-are suvuoro maho baejarueje Keriso mae uehorovarue aribövioho no God-ro ajamui'i uövuë'ëro jië'ëro.

²³ Noehu Keriso mae uehorovë'oho God-ro ma-marö ramuajeje. Ëhesi majaho jaruvoje. Röhu urimoho ë maja bogo rovadevare no tövavuë'ëro jië'ëro bogo ruëroho numëroho va'i ma-jew rajehu no vaeröhe jögoru hesi ahariremu raromobe rovareje. Ëhi'obe rovaroho ijonö Keriso mae uehorovo'iröhe öroho huruorohadeje. ²⁴ Aehu asisö'o söromo avo'avoho muebejëvobe va'ego asisö'ehu ma-aharirehu va'aruëhi Jew rajehu mu vaeröhe jögoroho ëhi jiadeje. No Jew rajo jögoru ahariremu

asisö'onö'e raromobe rovamu Kerisoro sa'are rovadeje. Jögoru hesi aharire raromare hesi bëhoho öre röjahuijego noro Keriso mae uehorovoromo ëhuro God-are nunire mae riravo'iröhego. ²⁵ Röhu jaruvoho noehu Keriso mae uehorovo'iröhe majaho rovë'eje. Ëmajaho rovë'ego no bogo ë mu vaeröhe jögoru hesi ahariroho raromarueje.

²⁶ Jemë ae aho'obëhe Keriso mae uehorovoromo Keriso'o gemuore bimumvë'ëro ëhu'ëro jemë God-are aboji harihu'e jëve. ²⁷ Ëhesi bëhoho bapataeto vaejarijohuro ëhuro Keriso'o gemuoro bimumvoromo jemëro Keriso-are muoho niögu i'o va'ëne ëhi jemesi sinore io'amë'e jëve. ²⁸ Ëhuni Jew rajohu'o sa'a ioro'ioro rajohu'o jemë bogo hahagu hahaguoho jëvo'i Keriso'o gemuoro havë'e jëve. A jabesi muemu vaejëho'i arijaruje ahu'o a uno'ohu'o bogo hahagu hahaguoho jëvo'i Keriso'o gemuoro havë'e jëve. A'o magonaho'o bogo hahagu hahaguoho jëvo'i Iesu Keriso'o gemuoro havë'e jëve. Jemë ae aho'obëhe Iesu Keriso'o gemuoro jëve. ²⁹ Keriso-are ariböviëro jëvë'ëro ëhu'ëro jemë Abraham-are uje jëve. Ëhuni mami'e God-ro Abraham'o hesi ujohu'o diehi jamui'iröhëni Abraham uavadëhi iae jemë ëhi ajëmi'iramu mae jëvo'ë'e.

4

Iesuro sa'are rueromo ajamuijë'ëro ëhu'ëro no bogo ma-muemu vaemu vaejarue aribövioho va'ëne javuo'i God-are aboji harihu'e javue. Ëhesi jöhoje.

¹ Röhu ave uhu jöhu'o uëlië'e. Harihoho bise'eje röhu ijönö vavu hesi sionoho bae'ië'ëro ëhu'ëro ë vavuehu muebe'amaje inömohe hesi harihu hesi ihoro jio'ame. Ëhi jie röhu a bise'ego mu vaemu vaejarue ahuni aehu ë'aruëhi harihu hesi örire ëhi ë'arueje. ² Aëro hu jögoroho bojamibe hesi maho sisëho muebejahobe va'arueje hujeji hesi vavuehu uvade majaho rueröhego. ³ No ëhi javuadeje. Urimoho no asisö'o va'ëne javuadeje. Noro uvareje: Aru'ahe gö mue gö masijoho höromo ëma imo ëhemu uehorovoromo muoho vaejëhemu vaejëhonövareje. ⁴ Ëhi'obe rovaroho röhu majae eni jiamu gagorovo God-ro hesi Harihoho nugö'öjamu sa'are rovadeje. Rovamu magonahëro hu rahadeje. Rahamu hu Jew rajo nosi jögoru aharire jiohe rovadeje ⁵ ëhuro Jew rajo jögoru aharire sisë'i raromarohe ajamuego no mae javuoromo God-are aboji harihu'e javuo'iröhego. ⁶ Jemë hesi aboji harihu'e jëvë'ego God-ro hesi Harihu hesi Aru'ahoho nugö'öjamu nosi dë vövöbajo'ere abo hijë'ëro uvajeje: Apajo. ⁷ Ëhu'ëro jii'ëro jemë ae gemu gemu bogo ma-mu vaemu vaejaruje aribövioho jëvo'i a'i God-are aboji harihu'e jëve. Hesi aboji harihu'ëro jëvë'ëro God-ro hesi darugoho bövioho bise'oho jemë i'imëmi'iramu ujuoho'aruje.

Paul-hu Galatia ekaresia jabesi jöëni nurunurumade jöhoje.

⁸ Röhu urimoho God-are jöho bogo henövariijeje. God-are jö bogo hejarijevare evare ëma sarerivoromo uvonövariijeje: Aru'ahoho bövioho bise'oho masije höromo ëhemu uehorovoromo sisë'i raromonövariijeje. ⁹ O jaruvoho jemë iae God birohë'e jëve ë hesi bëhoho God-ro jemë birohëvë'ëro. Röhu jemë mami'e asisö'o majëhijanarue jögorohemu ejëhoromo aru'ahe gö gö masije hö uehorovarijëhi ëhi asisö'o majëhijanovarue jögoru göho ejëharujeje. Asisö'o majëhijanovarue

jögoroho ejëhoromo sarerivoromo uvarujeje: No Jew rajo mu vaeröhe jögoru ejëhë'oho ehuro God-are nunire mae riravo'ejarëjo. Röhu ejëhë'oho bogo ehuro maho riravo'aruje ë jöho bogo eni jïë'ero. ¹⁰ Ëjögöröho ejëhoromo gavarujöho majaro huraro manaeroro vaduniro rovego gagorovo uvarujeje: Ëmajaho maja masijo rue'amaje majaho höjo. Ëmajaho avo'avoho uehorovë'oho God-ro göromo rajahui'ajëjo. Röhu ëhi jïë'oho sisë'i uehorovarujeje. ¹¹ Na jemesi jöëni juhuoninegavave naehu jemëni vaebe rovode muoho sisërëjööni.

¹² O asë'e nasi ö mueno'e na jemesi jöëni vavaenego'ego uëve. Naehu majëhi'ië'aje jöho nadi bijönimore. Jemë bogo Jew rajöho jëvë'ero Jew rajo mu vaeröhe jögoröho bogo uehorovonövarijeje. Na Jew raje jeve röhu Jew rajo mu vaeröhe jögorohemu uehorovodoho vuonugë'ero jemë va'ëne jeve. Ëhuni naehu God-are nunire mae nami'iroadëro Jew rajo jögoru bogo uehorovo'i Keriso gemu mae uehorovajëhi jemë'o ëhi ë'ore. Urimoho jemë na bogo sisë'ioho vaejevonövarijeje. ¹³ Jemë'o uehorovore. Naehu jemë'o aevo'i hiromo Keriso-are jö ma majëhijode hesi bëhoho na guomo guome baegoro jemë'o aevo'i hiromo jöho majëhijodeje. ¹⁴ Nasi guomo guomohuro jemë esi'esëimanovodeje. Röhu jemë na bogo bijönegoromo nuni juhuoninioho baejarijeje. A'i ma-mabëhe rajehijarijeje. God-are aneraëro o Iesu Kerisoro jemesi örire ö'ego mabëhe rajahi'ibejarijëhi ëhi gemuoho jemëro na rajehijarijeje. ¹⁵ Rajehiromo evare majare nasi jöëni nimoröho avoharijeje. O jaruvöho bogo ëhioho nimoroharujeje. Ëhesi bëhoho rabënivo bogo nasi jöënioho nimoroharujeje. O urimoho jemë eni jëvo'ibejo ri'öromo jemesi nuni baje jahoromo bojemi'ibejarije o bövie bise'e bojemi'ibejarije. Ajemiromo ëhi'o'ibejarije. Iae na mae uëve. ¹⁶ Jemë ëhi rajehijarijeje. O jaruvo naehu jemë God-are jö maemu majëhijodoho na jemë ëhuni uvö: Nöröro nue huodaguoromo ë'ajëjo.

¹⁷ O Jew raje sareri jö röjëhijarue aribövioho ëho jaburo jemë sanuëmiromo rajëhijarueje jemëro jabesi ijore ijore jijihö'irarijigo. Röhu sisë'i uehorovoromo ëma döëremu ë'arueje. Ëhesi bëhoho jaburo nimö jemëro Paul na uehorovevarujöho vuonugo'i jabumë gemu rajëhi'irarijigo. ¹⁸ Röhu jemëro mu maemu uehorovo'irarijigo aehu jemë rajëhijë'oho ëho bogo sisëhuje. Naehu jemë'o hiromo jemë rajëhijë'oho o na jemë'oho bogojevamu ae göehu jemë rajëhijë'oho iae maeje. ¹⁹ O asë'e nasi aboji harihu'ohumë vaevë'e jëve. Magonahehu raho'i hara'uoromo huë vavaene börömo baeromo harihu baegoro evare huë ma baejaruëhi na'o ëhi jeve. Na'o jemesi jöëni huë vavaene bogo bise'oho baeje hujeji Kerisöhu uehorovajëhi jemë'o ëhi uehorovo'irarijigo. ²⁰ O asë'e avevejö'oho naro jemë'o hi'ibejo na dë mae jevo'ibejo. Jemë'o hiromo naehu uru'ö jö jajivajöho vuonugo'i jöho ma-u'emu majëhi'ibejo. Röhu na jemesi jöëni uehorovajöho bogo eni jevoromo ehuro nurunurueje.

Magonahe niö'i jabesi ihoho Hagar'o Sarah'o jabesi uhu jöhoje.

²¹ Jemë ae göëro sarerivoromo uvarujeje: Jew rajo mu vaeröhe jögoru noehu birivoromo ejahë'oho ehuro God-are nunire mae riravo'ejarëromo ë jögorohemu uehorovarujeje. Jemë ë jögoröho iae uehorovarujeje röhu hesi jöho bogo avoho hejarujeje. ²² Ëjemëhu bogo avoho hejaruje jöho naro majëhi'ië'e. Urimoho Abraham harihe

niö'i jëvade höjo. Harihu göho hesi muemu vaejahaje magonaho ihe Hagar-ro rahade höjo. Harihu göho hesi ihoho Isaac hesi mahiromo baruohu'o juvaje magonahohuro rahade höjo. ²³ Röhu harihu göho muemu vaejahaje magonahohuro hesi magonahehu ë'aruëhi ëhi'oromo dë'iraeromo hesi harihoho rahade höjo. A'i harihu göho Isaac God-ro Abraham ajami'i uavadohuro ëhuro vaboro mae dë tjojë'ohuro rahade höjo. Èhi'are höjo. ²⁴⁻²⁵ Röhu ëho bisemu uhu jöe jianove. Magonahe niö'i jabesi bëhoho iae God-hu hesi aribövi muebejavuo'iröhe jögore niö'i he'iröhoho jëve. Abraham-are muemu vaejaje magonahe Hagar-are bëhoho ëho God-hu Jew rajo mu vaeröhe jögoru bojamamu Moses-hu Arabia sa'are Sinai dahorure hiromo baeromo bojamuadeje. Èhesi bëhoho Hagar-hu avare muemu vaeromo sisë'i hijadëhi Moses-hu bojamuade jö hesi ijore ijore jijiharue ariböviohuro sarerivoromo uvarueje: Noehu nosi biririvoromo ë jö ejahë'ohuro ëhuro God-are nunire mae riravo'ejarëromo ë muohemu vae'i sivoho gavarueje. Èhu'ëro Hagar-hu avare muemu vaeromo sisë'i hijadëhi ë ariböviohuro ëhi sisë'i raromarueje. Jaruvo jiaje Jerusalem amo rajohu'o Jew rajo ioro'iorohu'o ëhi jië'e muohuremu vaeromo sisë'i raromarueje. ²⁶ A'i Jerusalem amo göho bogo sa'aroho jio'i ö'idöre jiaje amore jioruomaje ariböviohuro uvarueje: Bogo nosi biriroho baeromo God-are nuniroho maho riravo'i a'i Kerisoro ajamuego God-are nuniroho maho riravarue hö uvoromo bogo muoho sivohoromo sisë'ioho raromo'i mae raromarueje. Röhu ë amo hesi ado sirino'oho Keriso-are aribövie no javue. ²⁷ Èhesi jöho God-are surire uhu'e uvë'eje: Dë tjojë'e magonahoho jero sine sasohonëjo.

Bogo rahoromo vi'ehi baejanue magonahoho jö'e dadovoromo nimorohonëjo.

Uvonëjo: Baru'o hijaje magonahoho ado sirino'oho ma-jianovo'i

baruehu remo va'ade magonahoho ijonöho ado sirino'e marohë'e mae jevo'ajëjo.

²⁸ Nasi ö mueno'e God-hu Abraham ajami'iröhe jö bojamijadohuro ëhuro hesi vaboro mahuro Isaac rahadeje. God-hu ajami'iröhe jö Abraham bojamijadohuro ëhuro Isaac baejadëhi ëhi God-hu no ajamui'iröhëro Abraham mae uavadohuro ëhuro jemë God-are aboji harihu'e jëve. ²⁹ Röhu göho sa'are magonahehu ë'aruëhi ëhi'oromo hesi ma-rahade harihohuro ri'öromo God-are Aru'ahehu vëmu ajamamu rahade harihe Isaac huë vavaene bojaminövade höjo. Jaruvoho iae ëhi gemuohoje. Sa'are ma-raromarue ëhi jië'e ariböviohuro ri'öromo God-are Aru'ahehu ajamuijego i'ovoromo raromarue aribövioho huë vavaene bojamuiruomajeje. ³⁰ Röhu huë vavaeni bojamuijarue aribövi jabesi jöho God-are surire ëhi uvë'eje: Muemu vaejaje magonaho hesi harihohuro mae hijaje magonaho hesi harihohu'o gemuoroho bogo namiromo vavu jasi sionoho baeromo bövioho bise'oho bae'a'ajëjo. Èhuni muemu vaejahaje vëmohu'o harihohu'o babu'öjëvego rori'o va'irarëjo. ³¹ Nasi ö mueno'e Keriso-are aribövioho no bogo avare muemu vaeromo sisë'i hijade magonaho hesi aboji harihu'ehu javuanovo'i a'i vaboro maehu Abraham'o mae hiromo juvaje magonaho hesi aboji harihu'o va'ëne javuanove.

5

Röhu maho bogo sisë'ioho raromo'i biririvoromo mae raromo'iröhe jöhoje.

¹ No bogo Jew rajo mu vaeröhe hesi darugoroho raromo'i mae raromo'iröhego ehuni Kerisoro no maroho ramuadeje. Ehu'e jiaje nadi röhu maho ehi jië'e mu hesi darugoroho va'o raromo'i a'i biririvo riravoromo maro raromore.

² Röhu ave jöhuremu here. Paul naro majëhi'ie'e. Aehu jemë sarerëmiromo uëvaruoho: Jew rajehu ë'aruëhi jemë'o ae uëvego jaburo jemesi sinoho tarivëho'irarëjo ehuro jemë God-are nunire mae riravo'irarije ehi uëvaruoho nadi ejëhore. Ejëhë'oho jemë bogo Keriso gemu mae uehorovo'i Jew rajo jabesi muohu'o uehorovo'aruje ehuro God-are nunire mae riravo'irarijëro. Jemëhu ehi uehorovë'oho Kerisoro diehi ajëmi'ë'e God-are nunire mae riravo'irarijego. Bogo ajëmi'ë'e. ³ Röhu ave jö röhu maho majëhi'ie'ajoho jemesi ehuremu here. Ae rahu Jew rajo jögoru eromo uëvë'oho: Nosi sinoho tarivahuohego no God-are nunire mae riravo'irarë uëvë'oho Jew rajo jögoru vituohu'o aho'obëhe e barë'iröhoho ehi jië'e i'u'e muoho baeruomo'ë'e. ⁴ O jemë ae göëro Jew rajo jögoru hesi ijore ijore jijiharujeje ehuro God-are nunire mae riravo'irarijëro. Ehi ë'arujohuro ehuro Keriso boremi'öjë'e jëve. Keriso boremi'öromo ehuro God-hu huë baeromo jemë ajëmi'iröhe mu öroho tugohë'e jëve. ⁵ A'i no God-are Aru'ahohuro ajamuijë'ëro ehuro Keriso mae uehorovoromo uvarujeje: O mabëhe höjo. U'emu God-are nunire mae riravo'ëjarëromo ehuni huë mae raromoromo muebejö ehi javuoröhego. ⁶ No Iesu Keriso'o gemuore javuë'iroho Jew rajehu ë'aruëhi nosi sino tarivahuë'oho o bogo tarivahuë'oho iae hesije. Keriso mae uehorovoromo a huë baejëvë'oho ehemu börömochoje.

⁷ Urimoho jemë mu mabëhe vaebe rovarijeje. Röhu God-are jö ma ejahobe rovarijoho raro ahëvamu vuonugarijeje. ⁸ Bogo God-hu dinëmijadeje jemëro Keriso-are jöho vuonugojöro ë hesi bëhoho huro jemë hesinö rinëgajëro jië'ëro. ⁹ Aëro ave uhu jöho atoromo uvoruomajeje: Dë huaje osoho ma-bisemu jioromo rumorovoromo ioho börömo mae dë huaje höjo. Ehesi bëhoho mu sisëro rumorovoromo börömorijajeje. Sareri jö rjëhijarue aribövioho nadi ejëhore. Jabesi jö sisëhuro jemë rumorovëvo'ë'e. ¹⁰ Ehi jie röhu jemë'o na'o Badare gemuore javuë'ego naro jemesi örire mae uehorovoromo uvajeje: Jemë jö maho bogo vuonugoromo jö göho uehorovo'arujëjo. O jö göho naro uvajeje: Jemesi simano ijumëhaje aho nani a böröme o nani a bise'e höjo. Iae hesi höjo. Röhu ë ahuro God-are i'uoho iae bae'a'ajëjo. Na ehi uehorove.

¹¹ Nasi ö mueno'e naro urimo ae uënövodeje: Jemë God-are nunire mae riravo'ie'iroho Jew rajo nosi jögoroho eromo jemesi sinoho tarivorëjo. Sino tarivë'oho ehuro God-are nunire mae riravo'arujëjo. Ehi jië'e jö majëhinövodoho vuonugë'e jeve. Röhu aëro sareri'e atoromo uvarujeje: Nörö ë jöho bogo vuonugë'e höjo. Röhu ehi jië'e jöho majëhi'ibejo aho nasi öriroho bogo bijönimoruomo'ibejo. A'i Jew rajo jögoru ejaho'iröhe jöho na bogo majëhijajeje. Ehuni aëro Kerisohu korosire guomade jö naehu majëhijajoho bijönimoruomajeje. ¹² O jemesi simano huotovëharue aribövioho sareri aribövie jioruome. Jabumë sino

tarivo'li nimë'o'ho rabëni sinoho bogo tarivo barë naho nahovoromo ruruhö'öjarueje.

¹³ Nasi ö mueno'e God-hu hesinö rinëgade hesi bëhoho jemëro bogo Jew rajo mu vaeröhe jö hesi darugoroho raromo'i a'li mae raromo'irarijigo. Ëhi jie röhu nadi uvore: Ëmu vaeröhe jö hesi darugoroho bogo raromo'i mae raromaruëromo jemesi sinehu nimaje mu sisëho vae'li a'li göëro göho huë baerovoromo muoho ajamirovore. ¹⁴ God-hu Jew rajo bojamuijade jögoru hesi bëhoho ma-gemuje. Jaehu jasi arijo'arije rajahirovanuëhi jasi ae gemuoho ëhi rajahinëjo. ¹⁵ Röhu jemë mahehu öehu muorovanovoromo hutitimobe jijihë'o'ho gavë'i ëhi jië'o'ho ë'ore. Ëhuro ijumorovo barë'aruje.

Sinohuremu nimoromo vaejarue muohu'o God-are Aru'ahehu nosi dë vövöbajo'o huotovahuego vaejarue muohu'o ë mu niö'ji jabesi jöhoje.

¹⁶ A'li ave jöho na uëve. Ua'li ariregö God-are Aru'ahohuro jemesi dë vövöbajo'o'ho huotovëho'iro maro raromo jijihonövo'irarije. Ëhi ë'ë'o'ho jemesi sinehu nimaje mu sisëho bogo enövo'aruje. ¹⁷ Sinehu nimajohuro God-are Aru'ahehu nimajoho nijio'irae'li God-are Aru'ahehu nimajohuro sinehu nimajoho nijio'iraejajeje. Ëmu niö'iohuro ëhi umogihorovajeje. Ëhu'ëro jië'ëro jemë mu rabe vae'li nëgë'o'ho bogo eni jëve. ¹⁸ Röhu God-are Aru'aho hesi ijore ijore jijiharujoho ëhuro bogo uvo'a'aruje: Nosi biriroho baeromo mu vaeröhe jögoroho eja-horomo ëhuro God-are nunire mae riravo'ëjarëromo ë jögoroho bogo uehorovo'anue. ¹⁹ Röhu sinehu nimaje mu sisëho diehi jio'amajoho iae va'orahoro jie. Ëhi jië'e mu vaejë'iroho öëro jijihanovarueje. Va'inumi'e muoho vaejarueje. Biriri'övoromo bövie bise'e ëma ë'arujeje. ²⁰ Aehu avohare inömo sisëho masije höromo uvene aho röjahijarujeje. Iro oso'e vaejarueje. Nue huodamirovarueje. Muorovarueje. Ae gö jabesi mu mahuni dë vörönimarueje. Vörö'iraejarueje. Ae gö iosirami'iröhohuremu uehorovarueje. Bogo agane gemuoho vaerovo'li adovorovoromo uehore gö gö baejarueje. ²¹ Ae gö jabesi böviëni bise'ëni ganiganimarueje. Jove iromo simane huotorovarueje. Jove iromo simane sisërëromo bövie bise'e ë'arujeje. Ëhi jië'e mue gö gö ë'arujeje. Naehu uëvodëhi röhu maho uë'ejo: Ëhi jië'e mu vaejë'o'ho God-hu muebejaje öri ari'eroho bogo va'oromo maroho raromoruomo'ajëjo. Sinehu nimaje mu sisë hesi bëhoho ëhije. ²² A'li God-are Aru'ahehu dë vövöbajo'o ri'öjehë'ohuro ëhuro ae gö uehorovëvarueje. Nimoroharueje. Huë mae raromarueje. Ma-taemorovoromo sisëho uehorovoromo vuonugarueje. Huë baeromo ajëmijarujeje. Mu mae vaejarueje. Biririvarueje. ²³ Bogo döroho bamorovo'li ma-avoho raromarueje. Taemo raromarueje. Ëhi jië'e muoho mu vaeröhe jögorohuro bogo ahajeje. ²⁴ Ae rahu Iesu Keriso-are aribövi javuë'o'ho Kerisohu korosire ijumorovadëhi ëhi nosi uehoro sisëho o nosi sinehu bövi bise'o nimajoho ëho no ioro'ioremu ijumë'e javue. ²⁵ God-are Aru'ahohuro gemuëro darugoho bojamuijë'ëro ëhu'ëro maro raromarueje. Ëhuni hesi Aru'ahehu diehi jië'e mu nimë'o'ho ëhuremu vaebe jijihonövo'ëjo. ²⁶ No bogo nosi sivuoho uehorovoromo döroho bamorovoromo bogo ri'öromo göëro gö hesi dëho iahoromo jö göho göho ato'ëjo. O ae gö hesi mu maho garomo bogo dëho vörönimo'ëjo.

6

Ae göehu gö ajamirovoromo i'u'e mu nigemahorovo'iröhe jöhoje.

¹ Nasi ö mueno'e gal'irarije ae gemu mu sisë vaejamu gavë'oho God-are Aru'aho ejaharuje aribövioho jemëro ëhi jië'e aho ma-u'emu ajamirego hu mu sisëho vuonugo'i röhu maho avo'avoho juvo'irovo. Röhu jemesi arijo'arije avoho garorovoromo ajamire. Sisëhuro jemesi dë vövöbajo'ere bijëhego jemë'o ëhi jië'e mu sisëho vaejogo rireromëvojöëni uëve. ² Uehoro sisë huë vavaene rabe rovë'oho ajamirovoromo nigemahorovore. Ëhi ël'ë'oho Kerisohu bojamuade jögoroho ejaho'aruje. ³ O ae gö jabesi sivue uehorovoromo uvë'oho: No a masijëro javuë'ëro aho bogo ajëmi'ëjarë uvë'oho ëma sareramirovarueje. ⁴ Ae gemu gemu jemesi muoho sivu sivue mevorovoromo gare mae o sisë vaejë'e jëvego. Mae vaejë'e jëvamu gavë'oho jemesi muohuremu garomo nimorohë'i jijihö'aruje. Bogo ae gö jabesi muohu'o jemesirohu'o gemuoroho havoromo garomo uvo'a'aruje: Nosi muohuro jabesiroho iosiramijajëromo nimoroni-morohë'i jijihö'aruje. ⁵ Ëhesi bëhoho ae gemu gemu mu diehi diehi vaejaroho ë hesi manaho ëhi baeruomo'ëte God-ro ëhi bamë'ëro.

⁶ Aehu Keriso-are jö bëhi røjëhijamu jemëhu hebe va'ë'oho bövie bise'le mana ajëmiere. Ëhi jië'oho iae maeje.

⁷ Nadi sareramirovore. A vadu'oho God bogo sarerami hesi jëve. Diehi jië'e ijo bajo öjël'oho iae ëhi jië'e nu ano'e gemuoho ri'amo'iramu gagovo'amo'anue. ⁸ Ëuhu jö hesi bëhoho ëhi jie. Ja ae rahu sinehu nimajohemu ömë'oho ëhuro ijonö sisë mana baeromo guomo'a'anue. A'i Aru'aho hesi mu vaejël'oho ëhuro ijonö maior'iolemu maro hi'a'anue. ⁹ Ëhuni mu ma vaejaruoho bogo u'uvo'ejo. Bogo u'uvoromo dë vövöbajo'o sisërëovoromo mu vuonugël'oho ëho majaho rue'iramu evare mana mabëhe gagovo'ejo. ¹⁰ Ëhu'ëro jiël'ëro maja baejaruire ae aho'obëhe ajëmi'ëjo röhu nosi Christian aganoho avo'avoho ajëminövo'ejo.

Ave surire jajivade ijo tugoho'i jöhoje.

¹¹ Nasi övehu masijo jajivo'amajoho gare. ¹² Ma-sino hesi muohuni nimoronimorohë'i jijihö'i nëgaje ariböviohuro biririvoromo jemesi örire uëruomajeje: Jew rajo noehu sino tarivaruëhi ëhi jemë'o jemesi sinoho tarivorëjo ëhuro God-are aribövie jëvo'iröhe. Rabëni ëhioho uëruomajeje. Jabumë uehorovoromo uvarueje: Kerisohu korosire guomade jö noehu mae uehorovaruohuni ëhuni nosi sa'ae gemuoho Jew rajëro huë vavaene bojamuiruomo'ajëjo. Röhu noehu sa'a ioro'ioro rajo uëvël'oho: Jemë'o Jew rajo nosi muoho vaeromo sine tarivorë uëvël'oho ëhuro nosi sa'a rajohuro huë vavaenoho bogo bojamui'ajëjo. Huë vavaenoho bogo bojamui'ajëromo ëhuni sa'a ioro'ioro jemesi örire uëvarueje: Jemesi sinoho tarivorego God-are aribövie jëvo'irajo. ¹³ Röhu Jew rajo mu vaeromo sino tarivoruomaje ariböviohuro Jew rajo jögoroho bogo avoho ejëhoruomajeje. Röhu jabumë nimö jemëro sinoho tarivego jaburo nimorohë'i uvoruomo'i: Mabëhëjo. Noro ë aribövioho dinëmijamu Jew rajo nosi muoho baejë'e höjo. ¹⁴ Röhu Paul naro nosi Bada Iesu Kerisohu korosire guomade jöho ëhemu uehorovoromo nimorohë'i juvo'ejo. Mu ioro'iorohunioho bogo. Rabëni Iesu Kerisohu

korosire guomade jöho na ehuremu uehorovajeje. Ehuremu uehorovoromo naro uvajeje: Ave sa'a hesi mu sisëho korosiro ano taemë'e höjo. O sa'arohemu uehorovarue ariböviohuro uvoruomajeje: Nörö korosiro ano taemë'e höjo. ¹⁵ Noehu Jew rajo mu vaeromo sino tarivë'oho o bogo vaeromo sino bogo tarivë'oho èho iae hesije. A'i God-hu nosi dë vövöbajo'o i'ovahuë'oho ehemu börömohe. ¹⁶ Ae rahu naehu uvodëhi èhi uvoromo ijore ijore jijihë'oho God-ro vavaenimoromo ajëmi'iramu maro raromo'aruje. O God-are aribövi ioro'iorohu'o aho'obëhe ajëmi'iramu mae raromo'ë'ö. Na nege God-ro èhi ajëmijöro.

¹⁷ Röhu naehu Iesuare mu vaejamu aehu anegare batatoho sino haho'ere jevo'ame. Ehuro ae aho'o garuomajeje na hesi muemu vaejaje ae jevego. Ehuni aho nadi ijoho uehoro börömohe bojemirëjo.

¹⁸ Röhu nasi ö mueno'e nosi Bada Iesu Kerisoro jemesi aru'ahohu'o jioromo huë baeromo ajëminövo'ë'e. Ahia mino'e.

EPHESIANS

Paul-hu Ephesus ekaresia jejëmijade jöhoje.

¹ O asë'e God-are aribövi Ephesus amore raromarujoho ae rahu Iesu Keriso'o gemuore jëvego hu gemu uehorovarujohumë God-ro nimamu Iesu Keriso-are apostle jevë'ëro Paul naro jemesi örire jejëmije.

² Na nege God nosi Vavuohu'o Bada Iesu Keriso'o huë baeromo ajëmijego maro raromo'irarijego.

God-hu nosi aru'aho mae ajamui'irögoro Keriso-are jöëni huë mabëhe bojamuijade jöhoje.

³ Asë'e God hu mabëheje. Hu nosi Bada Iesu Keriso-are Börömeje o göho hesi Vavueje. Èaho God Vavuoho hu mabëheje. Èhesi bëhoho no Keriso-are ae gemuohuro javuë'ëro Vavuohuro ö'idöre jio'amaje bövioho bise'oho suvuoramui barëjë'eje èhuro nosi aru'ahoho mabëhe jiahuoröhego. ⁴ Ni'ivadire sa'a bövi bise'oho bogo bamadevare evare uvadeje no Keriso'o gemuoro javuë'ëro baejavuego no jö sisë bövie bise'e bogojavuo'i hesi nunire ma-maemu javuoröhego.

Nosi örire dë vövöbajo'e aho'o uehorovavuë'ëro ⁵ uvadeje: Ijonö Iesu Kerisoro jabumë ajëmi'iramu èhuro naro gagovëvo'ejöjo nasi aboji harihu'e jioruomoröhego. Hesi simanore nimamu èhi uvadeje. ⁶ Èhi jië'e huë mabëhe bojamuijadohuni èhuni no hesi ihoho rajahi'ejo è hesi bëhoho no hesi Harihu Mabëhi hesi agane gemuoho javuamu hu bogo nijio'irae'i ma-ajamuijë'ego. ⁷ Ajamui'irögoro hesi Harihoho nugö'öjamu köho rueromo guomadeje. Guomoromo no sisëhu tövavuadoho jiovahuoromo uehorovoromo vuonugahuë'ëro mae javue. Mae javuë'ëro no garomo uvarueje: God hu bogo bise'oho vadu'oho ajamui'i börömo mae ajamuijë'e höjo. ⁸ Börömo mae ajamuiromo hesi simanoho eni jiego bövie bise'e ga barëjajëro jië'ëro ⁹ huhu röjahui'i uvadëhi èhi röjahuijë'eje noro garöhego. Èhesi bëhoho urimë'i God-ro uvadeje: Na muoho èhi èhi vae'ejö uvoromo subivahuobe rovadoho röhu iae röjahuijë'eje no garöhego hu èhi jië'e muoho vae'i nimë'e jiego. Èmu hesi jöho huro urimë'i uehorovoromo uvadeje: Naehu nimaje mu vaejë'iroho naro Keriso ua'ejöjo ajemi'iröhego. ¹⁰ Muebejuvo majae eni jio'iramu evare è muoho avoho barë'ejöjo. Èmuoho avohoromo bövie bise'e ö'idöre sa'are jio'amajoho Keriso-are uhunö gemuoro bamo'ejöjo huro simanoho jioromo muebe'amoröhego.

¹¹ O no Keriso-are ae gemuohuro javuë'ëro Vavuohuro baejavuadeje hesi javuoröhego. Hu muoho bövioho bise'oho bogo ëma vae'i a'i hesi simanëro nimego muoho vaejajeje. Èhuni baejavuo'iröhëro mami'e simanore uehorovoromo uvadëhi èhi baejavuadeje. ¹² Èhuni Jew rajoho no aevoromo Keriso uehorovare aribövioho javuë'ego Vavu hesi iho börömohego uehorovoromo rajahi'ejo.

¹³ Röhu sa'a gö rajoho jemë'oho mue gemuoho baejarijeje. Jemëro God-are jö maho hejarijeje uëvavamu: Jemë sisëro jëvego God-ro baejëvoromo manö bamëvaje höjo. Manö bamëvaje hö uëvamu

hegorovo Keriso mae uehorovarijeje. Mae uehorovamu God-ro Keriso-are gemuere havëvoromo hesi Aru'ahoho Ma bojamui'i uövuadëhi ëhi bojëmijadeje jemëro ë Aru'ahoho baejë'ëro no ae aho'o ëho garomo uvoröhego: Iae jemë God-are aribövie jëväjëjo. ¹⁴ Hesi Aru'ahoho Maho suvuore bojamuijë'ëro uvarueje: Iae mae-ëjo. Maja viture Vavuohuro hesi aboji harihu'o nosi suvuoro vituohu'o iae bojamui'ajëjo. Suvuoro vituohu'o bojamuiromomo ëhuro mu sisëhu rabehe i'uhaguajoho jiovahuo'iramu hesi aribövioho no ma-maroro raromolejarëjo. Ëhi uvarueje. Ëhuni hesi iho börömohe uehorovoromo rajahi'ëjo.

God-hu Ephesus ekaresia ajëmi'iröhego Paul-hu ëninamade jöhoje.

¹⁵ Ëhu'ëro jïë'ëro na hejodeje aëro uvavamu: Jemëro Bada Iesu mae uehorovoromo God-are aribövioho aho'obëhe huë baejëvaruje höjo. ¹⁶ Ëhi ë'aruje hö uvamu hegorovo naehu jemesi jöëni God mae uaberovodoho bogo vuonugë'e jeve. Ëhi'oromo Vavu hesi örire jemëni ëninamijajeje. ¹⁷ Vavuohu ma-aje gemu hijë'ëgo nosi Bada Iesu Kerisoro uvajeje: Hu nasi Börömohe höjo. Vavuohu ëhi jïë'e ae jïë'ëgo naru hesi örire ëninamijajeje huro jemë ajëmi'iröhego. Ajëmiromomo uehoro mae bojëmiromomo hesi arijo'arije röjahirovego jemëro hu mae ga'irarijejo. ¹⁸ O jemesi simanohu jiovëhego garomo uvo'irarijejo: Vavuohuro no hesinö javuöjoro uövuë'ëro ëhu'ëro ijönö aji maro raromolejarëjo. O uvo'irarijejo: Vavuohuro hesi aboji harihu'ohu aji'e suvuore bogo bise'o vadu'ohu börömo bëhe bojamui'iröhëni uvajëjo. ¹⁹ O uvo'irarijejo: Hu daruge bogo bise'o vadu'ohu jïë'ëro ëhu'ëro hu ma uehorovarue aribövioho ajamuijaje höjo. ²⁰ Keriso guomamu i'ovade ëhi jïë'e daruge gemuohuro no'o ajamuijajeje. Ëdarugohuro Keriso ajamamu ri'öromomo ö'idöre ajiomë'ëro hesi övo manö hiromomo ²¹ simano vaeruomaje vörö'e aru'ahoho rabe rabe je'ore sa'are ö'idöre dinö'e jioruomajoho iosirëmiromomo iho masijo jio'amë'ohu iosirëmiromomo jaruvo majaho röhu ruëre maja i'o jioröhohu ëho ihe gö gö masijo jiorovajoho taemëvo'i hu gemu döroho jïë'eje. ²² Kerisoro ëhi böröme hijamu God-ro bövioho bise'ohu hesi uhunö bamahö barëjë'eje huro gemuëro böröme namiromomo muebe'amoröhego. Ëhi bamahoromo uavadeje huro gemuëro simane vaeromomo ekaresia nosi muohu aho'obëhe muebe barë'iröhego. ²³ Keriso hu simanohu jio'i ekaresiae no övo hörü'ohu javue. Övo hörü'ohu javuë'ëro ëhuro simanohu romoromeje. Röhu ë simanohuro ëhuro bövie bise'e ö'idöroho sa'arohu romoromoroje.

2

Nosi aru'ahoho vuovahuamu God-hu ajamuiromomo i'ovahuade jöhoje.

¹ Röhu urimohu jemesi aru'ahoho vuovëhë'e ëma raromomo jijihonövariyeje God-are jögorohu ahoromomo mu sisë vaejë'ëro jïë'ëro. ² Mu sisë vaeromomo ave sa'are öri sisëre jijihonövariyeje. Jijihoromomo God döre jio'i aruëre ahore raromarue aru'ahoho sisë ö dinö'e raromarue aru'ahoho sisë jabesi simano vaejaje ë a hesi ijore ijore jijihonövariyeje. Ëhuro God-are jö bogo eruomaje aribövi jabesi dë vövöbajo'ohu huotövëhego mu sisëhu vaeruomajeje. Ëa hesi ijore ijore jijihonövariyeje. ³ God-are jö bogo eruomaje aehu raromomo jijiharuëhi ae aho'obëhe no'o urimë'i sinehu nimego simanehu uehorovaje muohuremu vaebe nosi dajehu

nimajire biriri'övoromo ëhi jijihonövareje. Ëhi ë'obe rovë'ëro ëhu'ëro a ioro'iorehu God-are i'u mana baeröhëhi no'o ëhi bae hesi javuadeje.

⁴ No ëhi javuadeje röhu God-ro noni vavaenimo avohoromo dë vövöbajo'e aho'o uehorovavuë'ëro ⁵ ëhu'ëro gövuade no hesi jöho ahamu nosi aru'ahoho vuovahuë'e jiamu göromo bogo vuoraramu'i Keriso'o gemuore havavuamu nosi aru'ahoho i'ovahuadeje. Hu hesi ma-huë baejëvoromo jemesi örire ëhi ajëmiromomaro babamëvadeje. ⁶ Röhu God-ro Keriso'o gemuore havavuoromomaro ajamuamu vuovoromomari'öjël'ëro aru'ahoho i'ovahuë'eje. I'ovahuë'ëro Iesu Keriso'o gemuore havavuoromomari'öjël'ëro hu'o röhe gemuore raromomari'öjël'ëro mu sisëho ruahö'öjarueje. ⁷ Vavuehu ëhi ajamuijade hesi bëhohomari'öjël'ëro rovego huro röjahuijego no'o a ioro'iorohu'o garomomari'öjël'ëro va'iröhëgo: O Iesu Keriso'o gemuore havavuoromomari'öjël'ëro huë mae bojamuiromomari'öjël'ëro huhu huë baejavuajohomari'öjël'ëro mae höjömari'öjël'ëro. ⁸ Ëhesi bëhohomari'öjël'ëro huë baejëvoromomari'öjël'ëro mae bojëmijadohuro iae ëhuro jemë mae uehorovomomari'öjël'ëro maro bamëvadeje. Bogo jemesi birirohohomari'öjël'ëro ajamirovo'i a'i hesi God-ro suvuorohomari'öjël'ëro jemë mae jëve. ⁹ Hu bogo uvadeje: Jemë mu ma vaejë'o maro bamëvo'ejöjömari'öjël'ëro. O bogo vaejë'o bogajömari'öjël'ëro. Hu ëhi uvo'ibejomari'öjël'ëro aëromari'öjël'ëro nijihoromomari'öjël'ëro uvoromomari'öjël'ëro: Noro nosi ajamirovoromomari'öjël'ëro manö bamorovare höjömari'öjël'ëro. ¹⁰ A'i hesi God-ro no mae avohavuadeje. Huro Iesu Keriso'o gemuore havavuoromomari'öjël'ëro bamavuadeje ëhuro noehu vae'iröhë mu ma huhu uehorovadohomari'öjël'ëro ëho vaebe va'iröhëgo.

Kerisohu sa'a ioro'ioro rajohu'o Jew rajo ariböviohu'o gemuore gagovavuade jöhoje.

¹¹ Ëhuni jemë urimë'i sisë'i raromarijohomari'öjël'ëro uehorovore. Jemë bogo Israel rajo ariböviohu'o jëvo'i sa'a gö raje jëve. Israel rajohuro jabetesi övëromari'öjël'ëro döre muohomari'öjël'ëro vaeromomari'öjël'ëro sinohomari'öjël'ëro tarivë'ëromari'öjël'ëro uehuomari'öjël'ëro: No sine tarivahuë'e ariböviohu'o javuë'ëromari'öjël'ëro God-are ariböviohu'o javuo'i jemë sine bogo tarivëhë'e ariböviohu'o jëvë'ëromari'öjël'ëro bogo God-are ariböviohu'o jëvavëjömari'öjël'ëro. Jemë ëhi jï'e sine bogo tarivëhë'e ariböviohu'o jëvavëjömari'öjël'ëro urimomari'öjël'ëro diehi raromarijohomari'öjël'ëro uehorovore. ¹² Evare majare jemë bogo Keriso'o gemuorohomari'öjël'ëro jëvo'i Israel rajo God-hu muebejavuajirohohomari'öjël'ëro jemë bogo nosi gemuorohomari'öjël'ëro jëvo'i jemesi hahagomari'öjël'ëro raromonövarijëje. God-hu hesi ariböviohu'o ajamui'iröhëromari'öjël'ëro mae uövuade jöho jemë bogo hejë'e mae raromonövarijëje. God-hu ajamuegomari'öjël'ëro ijönömari'öjël'ëro ma raromomari'öjël'ëro jöho bogo hejë'e God rumo'e jioromomari'öjël'ëro sa'are ëma raromonövarijëje. ¹³ Urimorohomari'öjël'ëro jemë God jiaje gemuorohomari'öjël'ëro bogojëvo'i rori'o numori'o jëvadeje. Jaruvohomari'öjël'ëro Iesu Keriso-are aegemuohomari'öjël'ëro jëvë'ëromari'öjël'ëro Keriso-are köhömari'öjël'ëro rueromomari'öjël'ëro guomamomari'öjël'ëro ëhuro jemë ro God-are bëhire jëvë'eje. ¹⁴ Keriso hu noni sanu'e mu barovajëmari'öjël'ëro ahoje Israel rajohu'o sa'a ioro'ioro rajohu'o gemuore gagovavuë'ëromari'öjël'ëro. Ëhesi bëhohomari'öjël'ëro Israel rajohu'o sa'a ioro'ioro rajohu'o noni buorunö'e iromomari'öjël'ëro tugohë'ëromari'öjël'ëro gororamirovonövareje. Gororamirovamomari'öjël'ëro Kerisoro araeromomari'öjël'ëro guomomari'öjël'ëro ëhuro buore dadovanovadeje. ¹⁵ Huro guomomari'öjël'ëro Israel rajo nosi jögorohomari'öjël'ëro tugohahuadeje. Mami'e ë jögorohomari'öjël'ëro Israel rajohuro gabe rovareje jajivoromomari'öjël'ëro uvë'e jiamu: Ëhi ëhi ë'iro ëho ma-garëjömari'öjël'ëro. Ëjöhömari'öjël'ëro tugohahuadeje. Tugohahuade hesi bëhohomari'öjël'ëro urimë'i Israel rajohomari'öjël'ëro noro nosi jögorohomari'öjël'ëro e'i sa'a ioro'ioro rajohuro bogo eruomë'ëromari'öjël'ëro ëhu'ëromari'öjël'ëro

hahagu hahagu javuajoho Kerisoro nimadeje baeromo hesinö gemu bu'öjogo gemuoro raromego ma-i'e gemu javuojöro. Ëhuro Jew rajohu'o sa'a ioro'ioro rajohu'o huë baerovoromo maro raromo'iröhëgo. ¹⁶ Hu nimadeje korosire guomoromo nu huohuoho tugohahuo'i sino haho'o ho hesi gemuore havavuë'ëro God'o no'o gemuoro huë mae raromo'iröhëro. ¹⁷ Huë mae raromo'iröhëro Kerisoro rueromo ë huë ma jöho majahuijamu rori'o raromarije ariböviohu'o God-are bëhire raromare ariböviohu'o noro ëho hejareje. ¹⁸ Kerisoro söjavuë'ëro ëhuro Israel rajohu'o sa'a ioro'ioro rajohu'o noro Aru'ahe gemu baeromo Vavu hesi bëhire va'arujeje.

¹⁹ Ëhu'ëro jië'ëro urimo jemë rori'o raje aruëre anumëre ëma jji-honövarijoho jaruvoho bogo ëhioho ë'arujeje. Bogo ëhi'o'irögoro God-are aribövi nosi gemuoro jëvoromo hesi aboji harihu'e jëve. ²⁰ God-are aboji harihu'o ho javu va'ëne javue röhu jemë'o gemuoho jëve. Ëjavu hesi uhunö apostle o jö God-aro baeromo majëhijarue ariböviohuro javuoho banigojiomego Iesu Kerisoro huro munën'o ë bönoho namijego ëhuro bibivajeje. ²¹ Huro javuoho aho'obëhe ëhi ma'eno titimë'ëro javuoho marëbe va'ajeje God-are osa börömo jiajëhi no ëhi javuoröhëgo Bada'o gemuoro javuë'ëro. ²² Röhu jemë'o Keriso'o gemuoro jëvë'ëro God-ro jemë'o hesi javunö'e gemuoro bimuvëvego gemuoro riravarujeje hesi Aru'ahohuro jemë'o jië'ëro.

3

Sa'a ioro'ioro rajo ajëmiromo jabesi örire Keriso-are jö huruoho majëhi'iröhë mu Paul-hu bæjade jöhoje.

¹ God-ro jemesi örire ëhi mae vaejëvë'ego ëhuni Paul naro jemëni uehorovoromo God-are örire jöe jövajeje. Jew rajo iho bogo bæjarije sa'a ioro'ioro rajo jemesi jöëni naehu uehorovëvoromo Iesu Keriso-are jö majëhijajohuni ëhuni aëro savoji gagore ba'amevë'ëro hije. ² Iae jemë hejarijeje God-ro huë mae bæjevoromo ave muoho bojemadeje jemëhu mare raromo'irarijohuni. ³ God-hu diehi jië'e mu vaeröhëni hesi uhure uehorovadoho huro röjehijamu bæjodeje. Ëjöho ma-bisemu jajivë'e jeve. ⁴ Naehu jajivodoho jemë adahë'ohuro ëhuro garomo uvo'a'aruje: God-hu Keriso bojami'i uhure uehorovade muoho iae nöroro mae gavë'e höjo. ⁵ Ëmuoho urimoho subivahuobe rovadoho avevejö'oho God-ro hesi Aru'ahoho uavamu huro hesi apostle ömo'ömo'u'o jö hesirire baeromo majëhijarue ariböviohu'o nosi örire röjahuijamu bæjë'e javue. ⁶ God-hu uhure uehorovade mu hesi bëhoho aviëhije. Sa'a ioro'ioro rajoho jemëro Jew rajo no'o gemu mae God-are mu maho baeromo nosi sino haho'o ho ma-gemu havorovoromo God-hu Jew rajo huë mae bojamui'iröhëni uvadëhi ëhi Iesu Keriso-are ihoro jemë'o bojëmijego bæjarujeje Kerisohu ë'ade jö maho jemesiro rovë'ëro.

⁷ Ëjö ma hesi muoho God-ro darugo'ëro jië'ëro na huë bæjevoromo suvuore bojemadeje naro ë jö hesi muoho vaenövo'irodego. ⁸ God-are ae magonahe ioro'ioro masije jio'amo'i na bise'e jeve. Na ëhi jeve röhu God-ro huë bæjevoromo ë muoho bojëmijadeje ëhuro Kerisohu huë mae börömo bëhe bojamuaje jö maho sa'a ioro'ioro rajoho majëhibe juvo'irodego. Röhu ë jö hesi bëhoho bogo ga barë

hesi javue. Ējōho huro uevadeje naro ēho majēhiromo ⁹ rōjēhijego ae aho'obēhe garōhego God-hu hesi uhure uehorovade mu ēhi ēhi a nunire vaejajoho. Ēhuni ē muoho bojemadeje. Bōvi bise'o bamade aho God-ro urimo ē muoho hesi simanore uehorovobe šubivahuobe rovadeje. ¹⁰ Subivahuobe rovade hesi bēhoho ēhuro avevejō'oho anera masijohu'o daruge jiē'ero ō'idōre raromarue aribōvi ioro'iorohu'o ēho jaburo ekaresiae no gōromo uvoruomorōhego: Ojo'e God uehoro mabēhe gō gō hesi ōrire jiē'ero ēhu'ero hesi aribōvioho ajēmibe rovē'e hōjo. ¹¹ Mami gō'e ēhi'o'i uvadoho Iesu Keriso nosi Bada uavamu huhu nimade muoho vaejahoromo sa'a ioro'ioro rajoho jemē Jew rajo nosi gemuore gagovēvadeje. ¹² Gagovēvē'ero no hu'o gemuoho javuego noro hu mae uehorovaruēro jiē'ero ēhu'ero bogo juhuonivo'i uvarueje: Iae hu ajamui'ajē uvoromo God-are bēhire va'oromo nosi jōho majahijarueje. ¹³ Ēhuni naro jemē uēve: Naehu jemesi jōēni vi'ehi bōrōmo baejajoho nadi ēho uehorovoromo nasi jōēnioho vavaenimoromo u'uhore. Na vi'ehe baeje ēhuro jemē maro raromo'irarijego.

Kerisohu bōrōmo bēhe uehorovavuaje jōhoje.

¹⁴ Rōhu God-ro sa'a ioro'ioro rajoho jemē ajēmi'i uōvuē'ego ēhuni naro ague aho hiromo Vavu hesi ōrire jōe jōvajeje huro jemē ajēmi'irōhego. ¹⁵ Agane aho'obēhe ō'idōre raromarue sa'are raromarue bamavuade a hesi ōrire naro jemesi jōēni ēninamiromo uavajeje ¹⁶ hesi ajoho bōrōmo bēhēro jiē'ero huro uavego hesi Aru'ahohuro hesi darugo maho bojēmego jemesi dē vōvōbajo'oho biririvēvorōhego. ¹⁷ Naro hu uavajeje jemēro Keriso mae uehorovego huro jemesi dē vōvōbajo'ere ioro'ioremu hi'irōhego. Huro jemē ajēmego ijehu ō'ehu sa'a gagore dirume abue'amē'ero biririvajēhi o javue sa'a uhure vae abuejē'l'ero biririvajēhi ēhi jemēro ae dē vōvōbajo'e aho'o uehorovēvoromo ēhuro biririvoromo muoho mae vaebe va'irarijego. ¹⁸ O jemēro God-are aribōvi ioro'iorohu'o gemuoro avoho garomo uvo'irarijego: Kerisoro bogo bise'o vadu'oho uehorovavuo'i bōrōmo bēhe uehorovavuo avohaje hōjo. ¹⁹ Rōhu Kerisohu diehi uehorovavujajoho noehu ga barē'irōhoho bogo eni javue. Iae ēhi jie rōhu na nege jemēro uvo'irarijego huro ēhi uehorovavuaje hō uvego ēhuro God-are uehoro mahuro mu mahuro jō mahuro bōvi bise'o mahuro jemesi dē vōvōbajo'oho rarovēvo'irōhego. Na ēhi negego God-are ōrire jōe jōvajeje.

²⁰ Rōhu God-are ihoho mabēhe ua'ejo. Ēhesi bēhoho huro hesi darugoho nosi dē vōvōbajo'ere bamahuē'l'ero ēhu'ero huhu ajamuiromo mu masijo vaerōhoho hu eni jie ē hesi bēhoho noehu hu ua gavaruoho o nosi dē vōvōbajo'ere uehorovaruoho ēho ma-jianovo'i God-hu no iosiramuiromo mu bōrōmo vaeromo bōvie bise'e aho'o nosi ōrire ajamui'irōhoho hu eni jiajēro jiē'ero. ²¹ God-ro Iesu Keriso ajamiromo hesi ekaresiahu'o ajamuijē'ego ēhuni hesi ihoho mabēhe ua'ejo ēhi gemu jiemu jiobe va'irōhego.

4

Keriso-are aribōvie no hesi sino haho'e gemuoho javuaje jōhoje.

¹ God-ro ēhi jemē ajēmijē'ero jiē'ero ave jōho majēhi'iē'e. Naehu Badare jōēni savoji gagore hijajohuni ave jōho ejehore. God-hu jemē

hesi aribövi mae jëvojöro uëvadëhi ëhi mu mae vaejë'i raromo jijihore. ² Nadi döroho bamorovo'i ma-sanuovoromo ae gö jabesi sisëho ga taemoromo huë baerovore. ³ O God-are Aru'ahohuro jemë aho'o uehore gemuoho bojëmijaje ë uehoroho ma'enoromo dë vövöbajoe gemu bamoromo agane vaerovo gare. ⁴ Jemë sino haho'e gemuoho jëve. God-are Aru'ahë gemuoho baejë'e jëve. Aji'e mu börömohe gemu bae'irarijago ëhuni God-ro hesinö jëvojöro uëvadoho muebejarujeje. ⁵ Bada gemu uehore gemu bapataeto gemu jëve. ⁶ God gemu ae aho'obëhe nosi Vavueje. Huro gemuëro böröme namiromomo bövie bise'e aho'o muebejavuoromo ma'enaguo titimoromo nosi dë vövöbajoe ere hijajeje.

⁷ Röhu Kerisohu no ae gemu gemu suvuoro bojamuibe rovadëhi ëhi baebe rov'e javue ae ajëmi'iröhëro. ⁸ Èhesi jöho God-are surire jajiv-oromo uv'ejeje: Badahu ajiomadevare evare a sisëho ruahö'öjëv'ëro tövëvoromo sö ujuohoromo dö mare ajiomade höjo. Ajiomoromo suvuoroho ae suvuorëmijade höjo. Èhi jajiv'ejeje. ⁹ Èjö adaharoho ëhi uv'ejeje: Badaro ajiomade höjo. Èhesi bëhoho bogo ëma ajiomoi'ali urimo hu sa'are ruvebiromomo sa'a uhu mare abuejadeje. ¹⁰ Ruvebiromomo abuejade ae gemuohuro ajiomadoho ajio ö'idöho iosiramimoromo dö mare ajiomadeje ëhuro ö'idöho sa'aho aho'o huro rarovo barë'iröhëni. ¹¹ Èahuro aviëhi jï'e suvuore gö gö bojamuibe va'ë'ejeje ëhuro noro hesi muoho vaeröhego. A ioro'ioroho apostle mu vaeröhe suvuoroho bojamuijajeje. A ioro'ioroho jö God-aro baeromo majëhi'iröhe suvuoroho bojamuijajeje. A ioro'ioroho Keriso-are jö ma majëhibe jijihö'iröhe suvuoroho bojamuijajeje. A ioro'ioroho hesi aribövi muebejëvoromo öri röjëhi'iröhe suvuoroho bojamuijajeje. ¹² Suvuoro ëhi bojamuijade hesi bëhoho God-are aribövioho aho'obëhe noro ë suvuoroho baeromomo eni javuego göëro göho ajamirovoromo ëhuro Keriso-are sino haho'e gemuohuro javuë'ëro no uehoro mae baebe birire baebe va'öjuvo ¹³ hujeji no ae aho'obëhe uehore gemu baeromomo God-are Harihoho garomomo gemuoro javuoröhego. Èhi gemuoro javuo'iramu Keriso-are darugohuro böviëro bise'ëro rarovavuo'iramu ëhuro a duvahanö avoho raromoejo. ¹⁴ A duvahanö avoho raromoe'iramu evare ijönöho bogo asisö'ö va'ënoho javuo'ë'e. Bogo asisö'ö va'ënoho javuo'iramu aehu sareri sareri'e jö barueromomo jö huotohuotovoromo bövi bise'ö ëma ömoromomo jö sisë majahuij'ëho ijönöho bogo ejëho'ejo. Bogo ejëhoromomo burehu jovo döre rueromomo jovo hasajego vanagiehu huotoro-huotorovobe va'ajëhiöho no bogo ëhiöho ë'i ma-biririvoromomo ahörirëro va'ejo. ¹⁵ Ma-ahörirëro va'oromomo göëro göho rajahirovoromomo jö mahemu majahirovö'ejo sareri'e jöho bogo. Jö mahemu majahirovobe huhu nimaje muohuremu avoho vaebe va'ejo ëhuro Keriso nosi simanoho va'ëne jahuoröhego. ¹⁶ Hu nosi simanoho jï'ëro ruahö'öjavuego gemuore hesi uhure raromarueje hesi övo duruajö'ëro javuë'ëro. Hesi uhure raromomomo nosi sino haho'e bimuvavuadëhi ae aho'obëhe ëhi bimuvorovoromomo ëhuro hesi darugoho baeromomo no ae göëro göëro huhu bojamuade mue gö gö avoho vaeromomo göëro gö rajahirovoromomo ëhuro a duvahanö'e biririvobe va'arueje.

Keriso-are ae gemuoho javuë'ëgo mu i'ö baeröhe jöhoje.

17 Röhu naro ave jögoroho Badare ihoro darugo'o majëhi'ië'e. God bogo ma uehorovarue ariböviehu jö sareri sareri uehorovë'i raromo jijiharuëhioho ijoho nadi ëhioho raromo jijihore. 18 Èhesi bëhoho ëho jaburo simanoho ramoramovëhë'ëro uehoroho bogo-jioromo biriri'övoromo God bijönimoromo ëhuro hesi biriroho bogo bæ-jam jabesi aru'ahoho vuovëhë'eje. 19 Jabumë mu sisëni javojëgädoho vuonugo'i jabesi dë vövöbajo'e aho'o sisëro gemu bojamirovoromo ö mahunö'e va'inumi'e muoho bövioho bise'oho ëma ömarueje. 20 Röhu jemë Keriso-are jöho bogo ëhioho röjëhamu hejarijeje. 21 Hesi jöho iae mae hejarijeje. Hesi ariböviëro jëvë'ëro Iesuhu ëhi ëhi ë'oromo hibe juvade jö maho iae röjëhijamu hejarijeje. 22 Aviëhi jië'e jöho hejarijeje. Mami'e öri sisëre jijiharije ë hesi uehoro mamioho boremi'öre. Ëuehoro mamioho ejahoromo ëhuro mu sisë naguego sareramirovoromo ë muoho vaejago sisërejavuobe va'ajeje. 23 Uehoro mamioho boremi'ö'i God uarego huro jemesi dë vövöbajo'o uhoho avohëho barë'iro. 24 Ëhi uaromo uehoro i'e baere. Ëuehoro i'oho God-ro avohadeje noro hu va'ëne jioromo ma-taemo raromoromo mu maemu vaenövoröhego.

25 Èhuni no sino haho'e gemuoho javuë'e jiaje ëhuni sareri sareri'e jöho vuonugo'i göëro gö hesi öriroho ma-jö maemu majahirovore.

26 O vörönëgë'iroho nadi ri'öromo mu sisëho vaere. Nadi dë vörönimemu vörönimobe va'ego majaho beva'oromo vahiomëvo'iro. 27 A'i vöröho vuonugego Satan bogo ijumëvo'iro.

28 O ae rahu vajiohu'e mu vaejaje aho uavego ijoho nadi ëhi jië'oho ë'i hesi övëro biririvoromo i'o mu'oho ma-avoho vae'i ëhuro mae sisë eni jiego bövi bise'o rumo'e aribövi jabesi örire suvuorovo'iröhe.

29 O jö atë'iroho jö sisëho nadi ato'i ma-jö maemu atonövore. Ëhi jië'e jö atë'ohuro jemë ae ajëmi'iramu jabumë huë vavaene rabe jëvë'oho jemesi jöho heromo biririvëvo'iramu dë vövöbajo'e mae jëvo'ë'e.

30 O God-are Aru'aho Maho nadi vavaenoho bojamire. Hu jemesirire jië'ëro ëhu'ëro uvarueje: Jemë God-are aribövie jëvobe va'öjuvo hujeji ëho majaho rue'iramu sisëhu tövëvajoho God-ro jiovëho'iramu aho'obëhe ma-mae gemu jëvo'ajëjo.

31 Röhu ijoho a jabesi jö sisëho nadi uehorovo'i arire. Nadi a jabesi jöënioho vörönimemu vörönimore. Nadi ano'i vörö'iraenövore. Nadi jö sisëho uëromo giagamëhore. Nadi agëvore. Jö sisë gö gö nadi uehorovoromo ëhi jië'e muoho vae'i 32 a'i göëro göhuni vavaenimorovoromo huë baerovë'i göëro gö hesi mu sisëho uehorovoromo vuonugore. God-hu jemesi sisë Keriso-are jöëni uehorovoromo vuonugadëhi jemë'o ëhi ë'ore.

5

Aji'ere raromo jijihö'iröhe jöhoje.

1 God-ro hesi dë vövöbajo'e aho'o uehorovëvego jemë hesi aboji harihu'e jëvaje ëhuni huhu ë'ajëhi jemë'o ëhi ë'onövore. 2 Ëhi'oromo ae uehorovëvë'i raromo jijihonövore. Èhesi bëhoho Kerisoro no uehorovavuoromo nosi jöëni God-are örire suvuore bojamirovoromo guomorovadeje. Guomorovamu God-ro uvadeje: Huro mabëhe ë'ë'ëro ëhuro iae na huë mae jëvajëjo. Kerisohu uehorovavadëhi ëhi ae uehorovëvë'i raromo jijihonövore.

³ O jemë God-are aribövie jëvaje ëhuni önö'e mahunö'e muoho nadi vaeromo ae gö jabesi bövioho bise'oho nadi ujuohëho'i ë'orego ëhuro ëhi jië'e mu sisë hesi jöho jemesiroho bogojio'i. ⁴ O mu sisë jöho simano rumo'e jöho ijo ijo'e atarue jö sisëho nadi atore. Atë'oho bogo maehuje. A'i huë ma jöhemu God-are öroro atore. ⁵ Ave jö gavarujoho iae maeje. Ae rahu önö'e mahunö'e jijihë'oho o ae gö jabesi bövi bise'o ujuohëho'i ë'lë'oho Keriso'o God'o muebejarue öri ari'eroho bogo va'oruomo'ë'e. Ae gö jabesi bövi bise'o ujuohëho'i ë'arue hesi bëhoho God dejonö bamo'i inömo sisë nuninö bamarue mueje.

⁶ Ëhi jië'e mu sisëho God-are jö bijönimarue ariböviohuro vaejaruëro jië'ëro ëhu'ëro God-are i'ue mana bae hesijö. Ae göehu sareri'e jö atoromo uëvë'oho: Bogo ëhioho jio'a'ajë uëvë'oho nadi ejëhore. ⁷ Ëhuni ëhi jië'e ariböviohu'oho gemuoroho nadi jijihore. ⁸ Urimoroho jemë'o ramoramore raremonövarijeje. Jaruvoho jemë Badare ajilere raromaruje. Ëhuni ajilere raromarue ariböviehu raromo jijiharuëhi ëhi raromo jijihore. ⁹ Rabëni. Aji rovë'ohuro ëhuro mu maemu vaeromo jö maemu atoromo bövie bise'e avoho vaejarueje. Ëhuni ajilero raromore. ¹⁰ Avoho uehorovoromo gare Badahu nimaje muoho diho jiego. ¹¹ O ramoramoe mu aehu ma-imo vaejaruoho ëhi jië'e muoho nadi gavanovo'i mu mae vaejego jaburo ëho garomo uvoruomo'iro: Nosi muoho sisë höjo. ¹² Iae ëhi jië'e muoho jabesi saginiëri vae'amaruoho javoje vëmunajoho jië'ego bogo atarue jöhoje. ¹³ Jabesi sisë aho'o gurihiro jiadoho aji va'orahoro jië'oho jabesi mu diehi jiajoho ë garuomo'ë'e. ¹⁴ Mu rabe va'orahore jië'oho iae ajijeje. Ëhuni noro God uehorovoromo jöe ioromo uvarueje:

Niavanuoho ri'öjëjo.

Guomanuoho i'ovëjo.

Ëhi'o'iramu Kerisoro ja ajivavo'ajëjo.

¹⁵ Ëhuni jemë diehi jië'e mu vaeromo raromo jijiharujoho ëho avo'avoho vaere. Simano rumo'e muoho bogo a'i simano ma'e muohemu vaere. ¹⁶ Mu mae rovajoho nadi vuonugo'i hesi muoho avoho vaere jaruvoho mu sisë vaeruomaje majae jiaje. ¹⁷ Ëhuni nadi sisë'ioho uehorovo'i a'i jemëhu diehi mu vaejoro Badahu nimajoho ëho avoho garomo baere.

¹⁸ Nadi vörö'e jovoho ue'ahego simanoho huotorovëvo'i. Ëhuro sisërëjëvo'ë'e. A'i nadi'ego God-are Aru'ahohuro rarovëvego ëhuro simano mae jëvo'i. ¹⁹ Psalms surire jajivare jöho God rajahi'iröhe jöho Aru'ahuhu bojëmaje jöe gö gö iaruhohu majahirovare. Dë vövöbajoe'ë aho'o God rajahiroho ëhi jië'e jöho ionövore. ²⁰ Vae majae huë mae o huë sisë rovë'oho nosi Bada Iesu Keriso-are ihoro God Vavuoho mae uanövore.

Masurovë'e ariböviehu diehi avoho raromo'iröhe jöhoje.

²¹ Röhu Keriso mae uehorovaruje jëvaje ëhuni göëro gö hesi jöho ejahorovore.

²² Vaboroharo Badare jöëni jemesi baruoho ejëhore ²³ rabëni hesi bëhoho baruoho vaboro jemesi simane jio'amë'e jiaje. Keriso ekaresia nosi simanoho jio'i no hesi sino haho'e gemuoho javuë'ëro huro no maro bamavuë'eje. Röhu hu ekaresia nosi simano jiajëhi ëhi baruoho

vaboro jemesi simanoho jio'ame. ²⁴ Ĕhuni ekaresiaehu Keriso-are jō ejaharuēhi ēhi vaboro ōmo'ōmoho jemēro baru jabesi jōho ejēho barēre.

²⁵ O baruoharo jemesi vaboroho dē vōvōbajo'e aho'obēhe uehorovēvore. Ĕhesi bēhoho Kerisoro ekaresiaho uehorovavutoromo hesi arijo'arije bojamirovoromo guomorovadeje ²⁶ ēhuro ekaresiaho jōvēro u'ovahuoromo hesi jōho majahuiromo ma-maemu avohavutorōhēni.

²⁷ Ma-maemu avohavuego ekaresiaho aji mabēhe javuorōhego. I'o masu'irōhe magonaho va'inumi rumo'e sino haho'e bogo abuejē'e sisē rabe rabe bogojio'i ma-maemu jiajēhi ekaresiaho no ēhi ma-maemu gemu javuego huro no hesi baejavuorōhēni. Ĕhuni ekaresiaho no uehorovavutoromo ajamuijadeje. ²⁸ Iae Kerisohu ekaresia uehorovavudēhi ēhi baru ōmo'ōmoho jemēro jemesi vaboroho uehorovēvore. Uehorovēvoromo jemesi sino rajahirovarujēhi jemesi vaboroho ēhi rajēhire. Jemēhu jemesi vaboro rajēhijē'ohuro ēhuro jemesi sinohu'o rajahirovarujeje. ²⁹⁻³⁰ Aho jabesi sinoho bogo bijōnimorovo'i a'i Kerisohu ekaresiaho no hesi sino haho'e gemuoho javuajēromo muebejavuajēhi aēro jabesi sinoho ēhi avo'avoho mueberovarueje. ³¹ Vaboro'o baru'o jabesi jōho God-are surire jajivoromo uvē'eje: Ĕhu'ēro jiē'ēro aēro vēmu vavu'oho rēmō'ō'i vaborohu'o gemu mae hi'a'ajējo. Hu'o hi'iramu jabumē niō'i jēvadoho rōhu gemu jio'a'ajējo. ³² Ĕhi uvē'eje. Rōhu ē jō hesi bēhoho uhuroho jō bōrōmo bōrōmeje. Ĕjō hesi bēhoho naro uēve Keriso'o hesi ekaresia'o no gemuoho javuaje jōhoje. ³³ Rōhu jemesi jōhu'oje. Ae gemu gemu jemesi arijo'arije rajahirovarujēhi jemesi vaboroho ēhi rajēhire. O vaboro ōmo'ōmoho jemēro baruoho masijoho hō uehorovore.

6

Aboji harihu'o vēmu vavu'o diehi avoho raromo'irōhe jōhoje.

¹ O aboji harihu'oharo Badare jōēni vēmu vavu'o jabesi jōho ejēhore. Ĕhi ē'ē'oho iae maeje. ² Ĕhi jiē'e jōgoroho God-are surire jajivoromo uvē'eje: Jasi vēmoho vavuoho mae uehorovēvonējo. Ĕjōho bōrōmo maego God-ro ē hesi viture uvadeje: Jaehu ē jō ejē'oho naro mae ajami'ejōjo. ³ Ĕhesi bēhoho uvē'eje: Vēmu vavu'o mae uehorovēv'oho ēhuro maho javo'iramu sa'are majae ēgo'o hi'a'anuejo.

⁴ Rōhu vēmu vavu'oharo jemesi aboji harihu'oho nadi sisē'ioho avohēvego dē vōrōnēgo'iro. Nadi ēhioho ē'i a'i avoho muebejēvoromo Badare jōho rōjēhirego heromo avoho raromobe va'oruomo'iro.

Avare mu vaejēharue aribōviohu'o jabesi simano vaejarue aribōviohu'o diehi avoho raromo'irōhe jōhoje.

⁵ O ae gō jabesi muemu vaejēharuje aribōvioharo jemesi a masijo jabesi mu vaejē'iroho uvore: No Keriso-are mue vaejaruēromo jabesi jōho avoho uehorovoromo jemesi dē vōvōbajo'o uhohu'o ejēhonōvore.

⁶ Nadi ma-dōemuoho ejēhorego jemesi masijohuro gēromo uvo'iro: Mu mae vaejarujējo. A'i uvore: No Keriso-are mue vaejaharuēromo nadi bijōnimo'i dē vōvōbajo'e aho'o mu ōroro bojamiromo God-hu nimaje muoho vaenōvore. ⁷ Uvore: No bogo ma-a jabesi muoho vaejēho'i Badare mue vaejaharuēromo dē sasohoromo muoho vaere. ⁸ Uvore: Ae gemu gemu mu mae vaejē'oho Badaro suvuoroho mana bojamui'ajējo.

No avare muemu vaejē'oho o nosi nimoro mu vaejē'oho iae hesi hōjo. Ae gemu gemu mana bojamui'ajējo.

⁹ O simano vaejaruje aribōvioharo ēhi mu mae vaenōvore. Jemesi mu aribōvi jō sisē uēromo giagamēharujoho vuonugore. A'i uvore: Nosi mu vaejahuarue aribōvi jabesi o nosi Bōvioho iae ae gemu ò'idōre hijajējo. Huro mu aribōviohu'o no'o ma-gemuoho uehorovauaje hōjo.

Keriso-are aribōviehu ajamirovoromo niōgu biriri'oho io'amoromo bijo buno baeromo Satan'o muorovo'irōhe uhu jōhoje.

¹⁰ Rōhu aveho ijo tugoho'i jōho majēhi'iē'e. Bada'o gemu mae jioromo hesi darugo maho baeromo biririvore. ¹¹ God-hu bojamuaje muorovo inōmoho aho'o ujuohore Satan-ro sarerēmijego ēhuro birivoromo riravo'irarije. ¹² No bogo ma-a'oho muorovo'i a'i a iosiramuijē'e sisē aribōvi masijohu'o muorovarueje. Sa'ae aho'obēhe ramoramo'e mu muebejarue aribōviohu'o dōre raromarue sisē aribōviohu'o vōrō'e sisē aribōvi ioro'iorohu'o ēho jabu'o no muorovarueje. ¹³ Ēhuni God-hu bojamuaje muorovo inōmoho aho'o ujuohore maja sisē rovego Satan-ro jemē'o muorovego biririvo'irarije. Ēhi muorovojuvo majae barē'iramu birivoromo ēhi baberumi riravo'aruje.

¹⁴ Ēhuni avoho riravore. Rōhu a'o muorovo'iē'iroho gōtaho dē'ahore muoho titimo'iramu dē'ahoho bibivoromo ēhuro eni javo'ē'e. Ēhesi bēhoho mu sisē'o muorovo'iē'iroho God-are uehoro mahemu ma'eno titimorego ēhuro eni jēvo'iro.

O a'o muorovo'iē'iroho biriri'e niōgoho vinebire ba'amo'iramu ēhuro eni javo'ē'e. Ēhesi bēhoho mu maemu baeromo maemu ōmorego ēhuro eni jēvo'iro.

¹⁵ O a'o muorovo'iē'iroho hōru gudu ba'amē'ohuro ēhuro mae nami juvo'a'anue. Ēhesi bēhoho Kerisohu huē mae bojamuaje jō maho simanoro bamore avoho bibivo riravo'irarije.

¹⁶ O vēni ravē'e bijo vōsō huotovaho'iē'iroho ejoho ma'enoromo nami'iramu siroho ro ē ejore riravoromo sugigivoromo vēnoho duoroho'amo'ē'e. Ēhesi bēhoho God-ro no ajamuijaje hō uvoromo hu mae uehorovonōvore. Ēhi uehorovē'ohuro Satan-ro hesi vōrō'e bijohuro bijēho'iramu bogo ejaho'aruje.

¹⁷ O a'o muorovo'iē'iroho biriri'e simano bosōho didi'oromo simanoho tugohorovo'anue ēhuro bogo nemavo'i mae javorōhego. Ēhesi bēhoho simanēro uehorovoromo uvore: God-ro no maro ramuē'e hōjo. Ēhi uehorovē'ohuro ēhuro Satan-are sisēho tugoho'iramu jemē bogo baejēvo'ē'e.

O a'o muorovo'iē'iroho kaejō ēgoho ōvēro ma'enoromo muorovo'anue. Ēhesi bēhoho God-are jō hesi Aru'ahehu bojamuijajoho ēhi ma'enoromo Satan'o muorovore.

¹⁸ Ēhi jiē'e muoho vaejē'i majae ēhi God-are Aru'aho hesi uehoroho baeromo parie gō gō vaeromo jōe gō gō ēninaminōvore. Ēhi ē'irarije nune jioromo majae ēhi biririvore. Birivoromo God-are aribōvie aho'o jabesi jōēni uehorovore. ¹⁹ O nasi jōho ēhu'o uehorovore. Uarego naehu hesi jō a majēhi'iē'iroho huro jō maho bojemege naro bogo juhuonivē'e ma-sama'e majēhinōvo'iro ēhuro jabumē hesi gurihijē'e jō ma hesi bēhoho mae garomo heruomorōhe. ²⁰ Ējō maho ae majēhi'irodego ēhuni na God-are ihoro jō majēhijaje ae jeve.

Röhu na savoji gagore hije. Ęhuni God uarego na birire bojemego huhu bojemade muoho vaeromo bogo juhuonivo'i ě jöho ma-sama'e majëhinövo'iro.

Ave surire jajivade ijo tugoho'i jöhoje.

²¹ Röhu na diehi jevajoho o mu rabe vaejajoho ě jöho jemë'o he'irarijego ěhuni Tychicus-ro ö'oromo majëhi'iramu he barë'aruje. Tychicus hu nosi huë baerovarue öeje. Hu Badare muoho biririvoromo vaejajeje. ²² Ęaho naehu nugö'ö'ie'aje hesi bëhoho huro ö'oromo jöho majëhijego noehu diehi raromarue jöho jemëro hejego dë vövöbajo'oho mae jëvoröhego ěhuni nugö'ö'ie'e.

²³ Röhu na nege God Vavuohu'o Bada Iesu Keriso'o jaburo nasi ö mueno'oho jemë ajëmijego jemëro God mae uehorovoromo huë mae raromoromo rajahirovo'irarijego. ²⁴ Nosi Bada Iesu Keriso rajahiemu rajahijaruje aribövioho aho'obëhe God-ro huë baeromo ajëminövo'ie'e. Ahia mino'e.

PHILIPPIANS

Paul-hu Philippi ekaresia jejëmade jöhoje.

¹ O asë'e Iesu Keriso'o gemuore jëvoromo God-are ariböviero jëvë'ëro Philippi amore raromarujoho Paul na'o Timothy'o Iesu Keriso-are mu vaejharue ae niö'i noro jemesi örire jejëmijö gare. O ekaresia muebejëvaruje ariböviohu'o ekaresia ajëmijaruje ariböviohu'o jemesi örire jejëmijö.

² Na nege God nosi Vavuohu'o Bada Iesu Keriso'o huë baeromo ajëmijego maro raromo'irarijego.

Paul-hu Philippi ekaresia uehorovoromo God'o jö jövonövade jöhoje.

³ Naehu jemë uehorovëvë'iroho jemëni God nasi Börömoho huë mae uavajeje. ⁴ O jemëni God-are örire jö jövë'iroho nimorohë'i jöho majahijajeje. ⁵ Rabëni hesi bëhoho mami'e jemëhu aevo'i na'o bimuvoromo Keriso-are jö ma hesi mu ajëmijarijoho ëhi ajemibe ruejuvo jaruvohu'o ëhi gemuoho ajëmijarujeje. ⁶ Èhuni na mae uehorovoromo uvajeje: God-ro mabëhe aevoromo jemesi dë vövöbajo'o avohëvadoho iae ëhi avohëvobe va'ojuvo hujeji Iesu Keriso-are majaho rue'iramu avohëvo barë'ajëjo. ⁷ God-hu jemë ëhi avohëvobe va'a'ajë uvajoho ëho iae maeje ë hesi bëhoho jemë nasi dë vövöbajo'ere jëvë'ego. Jemë na'o gemuore mu mabëhe baejë'e jëve. God-ro mu mae bojemamu urimoho na savoji gagoroho bogo hijë'iro hesi jö ma hesi jöhuni birivoromo majëhibe rovodoho jaruvoho na savoji gagore hijë'i ëhi gemuoho majëhijajeje. Jemëro ëhi jië'e mu mabëhe na'o bimuvoromo ajemibe rovë'e jëve. ⁸ Röhu Iesu Kerisoro nasi dëre rumorovego na jemëni sisë maro vavaenegajeje. God-ro ge'lego na mae uëve.

⁹ Röhu ave jöho na jemëni ëninamijajeje. Naro uavajeje huro jemë ajëmijego jemë simane mae jioromo mue bövie bise'e garomo ae rajahuijarujoho gö'o gö'o döre ëhi'obe va'oromo ¹⁰ ëhuro rabe rabe maho jiego ga'irarijego. Èhi jië'oho Keriso-are majaho rue'iramu jemë jö sisëho bogojëvo'i uhohu'o ma-maemu jëvo'ë'e. ¹¹ O Iesu Kerisohu ajamuego vaejarue mu mahuro jemë'o rumorovëvo'ë'e ëhuro God-are ihoho dö maro ajiomoröhego.

Paul-hu hi juvonövade hesi bëhoho Keriso uehorovoromo juvonövade jöhoje.

¹² Röhu nasi ö mueno'e na nege jemëro ave jöho ga'irarijego. Na ave savoji gagore hijamu mu rabehu rabehu nasi örire rovadohuro ëhuro Keriso-are jö ma hesi muoho bogo sisërë'i marëjë'eje. ¹³ Marëjë'ëro ëhu'ëro sa'a a börömo hesi javu atovarue ariböviohu'o a ioro'iore aho'obëhe jabu'o mae garomo uvoruomajeje: Nörö Keriso-are aëro jïë'ëro savoji gagore hijajëjo. ¹⁴ O Christian ö mueno'e marohë'e maëro gevarue na savoji gagore hiromo mae biririvego geromo jabu'o daruge baeromo ëhuro bogo juhuonivë'e mabëhe birivoromo God-are jöho majëhijarujeje.

¹⁵ Èariböviohu'o a ioro'iorohuro iae nasi mu mahuni dë vörönimoromo na iosiremi'irögoro Keriso-are jöho majëhijarujeje röhu a ioro'iorohuro huë mae bojemi'i ë'arujeje. ¹⁶ Jabumë uvarujeje: God-ro nörö aviae

bamade hōjo ēhuro aēro God-are jō maho sarerile atego nōrōro aho'irōhego. Ēhuni jabumēro na mae uehorovevoromo Keriso-are jō maho majēhijarueje. ¹⁷ O ē aribōvi ioro'iorehu Keriso-are jō majēhijaruoho bogo maho uehorovoromo ē'i a'i jabesi ihohe mu uehorovoromo Keriso-are jōho majēhijarueje. Jaburo uvarueje: Noehu Keriso-are jō ae majēhijē'ohuro ēhuro a masijohuro heromo Paul savoji gagore hijajoho rōhu gō'o dōre i'ue bojami'aruēromo ēhuni Keriso-are jōho majēhijarueje.

¹⁸ Rōhu ēho hesije. Aehu ma-dōhemu uehorovo'i o uhohu'o uehorovo'i o diehi uehorovoromo Keriso-are jō majēhijaruoho rōhu aēro Keriso-are jōho iae majēhijarueje. Na ēho uehorovoromo nimorohajeje. Rōhu bogo vuonugo'i ēhi gemuoho nimorohonōvo'ejo. ¹⁹ Ēhesi bēhoho naro garomo uvajeje: Naehu ēhi sisē'i hijajoho jemēro nasi jōēni ēninami'iramu Iesu Keriso-are Aru'ahohuro ajemi'iramu ēhuro na mae hi'ejōjo. ²⁰ Ēhuni naehu ave uehorovajohuremu nego avohe na bogo mae bogo javojoho baeromo muoho vuonugo'i a'i majae aho'o rōhu avevejō'ohu'o biririvo avohoromo nasi arijo'arije aho'o bojamirovego Keriso-are ihoho dō maro jiorōhego. Na ave sa'are hijē'oho o guomevē'oho ēhi gemu jiojōro nege. ²¹ Na ave sa'are hijē'oho Keriso gemu uehorovē'i hibe juvajeje. O guomevē'oho jaruvo sisē'i hijanovajoho ijonō mabēhe hi'ejo. ²² Na ave sa'are ēgō'o hijē'oho ēhuro i'o mu'e birohonōvo'ejo. Hesi nani'o diehi ē'ejo. ²³ Na uehore niō'i jevo'ego ēho uehorovē'e hije. Iae na nege guomoromo sa'aho vuonugo'i va'o Keriso'o gemu mae hi'irodēni. Hu'o hijē'oho ēho mahoje. ²⁴ Rōhu naehu biririvoromo sa'are hijē'oho ēho bōrōmohoje jemē ajēmi'irodohuni. ²⁵ Ēho na eni gavē'e jeve. Ēhuni na garomo uve: Naro biririvoromo jemē'o hi'ejōjo ēhuro ajēmego Keriso mae uehorovobe nimorohobe va'irarijego. ²⁶ Ēhi jiē'oho naro rōhu maho ō'iramu jemēro na geromo Iesu Keriso-are ōrire mabēhe rajahi'aruje.

²⁷ Rōhu na diehi jevē'oho jemēro Keriso-are jō maho eromo raromo jijihore. Ēhuremu bōrōmohoje. Ēhi ē'ē'oho ēhuro naehu ō'oromo gēvē'oho o ōre ēgō'o hiromo ma-jemesi jōhemu hejē'oho na garomo uvo'ejo: Jemēro gemuoro riravoromo uehore gemu baeromo mue gemu nimoromo jō ma hesi muohuremu biririvoromo nigemarujējo. ²⁸ Biririvoromo nigemoromo jemesi jō bijōnimoruomaje aribōvioho bogo juhuonēmijarujējo. Bogo juhuonēmijamu gēvē'ohuro ēhuro God-ro rōjēhijajeje jabumēro garōhego maja ijonōho jabumē sisērējēvo'i jemē marojēvo'irōhoho jēvego. Iae God-ro jemē ajēmi'iramu marojēvo'ē'e. ²⁹ Jemē Keriso-are mu bōrōmoho niō'i baejē'e jēve. Gōho Keriso-are ōrire mae uehorovo'irarijoho gōho hesi jōēni vi'ehe bae'irarijoho. ³⁰ Urimo jemē iae gavarijeje na sivohoromo Keriso-are muoho nigemamu. O jaruvoho jemē hejarujeje aēro uvoruomego: Nōrōro ēhi gemuoho ē'aje hōjo. Rōhu ē mue gemuoho jemēro na'o bimuvoromo ēhi sivohoromo ōmo'aruje.

2

No bogo nosi nimaruohe mu uehorovo'i gōehu gō huē baerovo'irōhe jōhoje.

¹ Jemë aho'o Keriso-are ae gemuoho jëvajojo na jemë ëhuro hejarujeje biririvëvego. Kerisohu jemë huë baejëvajojo na jemë ëhuro hejarujeje jemesi dë vövöbajo'oho giogovëvego. Na jemë God-are Aru'ahohu'o gemuoro jëve. Na jemë göëro göhuni vavaenimoromo dë vövöbajo'e aho'o uehorovëvarujeje. ² Ëhi jëvë'e jiaje ëhuni ma-gemuoro jioromo uehore gemu baeromo huë baerovë'e muoho gemu vaerego na heromo nimoroho avoho'iro. ³ Nadi jemesi sinohemuoho uehorovoromo a ioro'ioroho ëma iosirëmiromo ihoho döroho bamorovo'i uehorovoromo muoho vae'irögororo a'i ma-u'emu uehorovoromo a ioro'ioroho masije hö uvoromo jabesi ihoho döro bamore. ⁴ A ioro'ioro jabesi ihoho döro bamoromo röhu nadi jemesi jöhemuoho uehorovo'i a'i a ioro'ioro jabesi jöhu'o uehorovore.

Kerisohu hesi nimajoho bogo uehorovo'i sa'are rueromo God-are jöhemu ejahadëhi noehu ëhi ë'tiröhe jöhoje.

⁵ Iesu Kerisohu uehorovadëhi ëhi uehorovore. ⁶ Hu God jiajëhi ëhi jië'ëro röhu bogo uvadeje: Naro biririvoromo God-hu hijajëhi ëhi hi'ejöjo. ⁷ Hu bogo ëhioho uvo'i bövie bise'e nugö'ö'amoromo mu vaejahuaje a jiajëhi ëhi jiadeje. Ma-a javuajëhi ëhi jiadeje. A nu ano'o va'ëne jioromo ae aho'obëhe nosi nunire rovadeje. ⁸ Rueromo hesi iho börömo uuehorovoromo vuonugo'i ma-God-are jöhemu ejahobe juvoromo ëhuro guomadeje. Korosire anamu guomadeje. ⁹ Ëhi ë'ë'ego ëhuni God-ro ajamamu huro dö maro ajio namijamu hesi ihohuro iho ioro'ioroho iosiramuiromo börömo bëhe jië'eje ¹⁰ ëhu'ego ae aho'obëhe ö'idöre raromarue sa'are raromarue sa'a uhure raromarue aribövioho noro Iesuare ihoho böröme höromo hu rajahiromo ague aho raromoro ¹¹ ae aho'obëhe noro huruohoromo uvoruomorohego: Iesu Keriso iae Bada hö uvoröhego. Ëhi uvo'iramu God Vavu hesi ihoho börömo bëhe jio'ë'e.

Ramoramo'ere raromarue ariböviohu'o ave sa'are raromoro noro ironö'e ajivëvo'iröhe jöhoje.

¹² Nasi ö mueno'e naehu jemë'o gemu mae hijamu jemëhu nasi jö ejehonövarijoho röhu jaruvo na öri ëgobövire hijajohu'o nasi jöho ejehonövore. Ëho börömohego. Juhuoni'o butubutu'o muoho avo'avoho vaerego jemë ma-mae jëvo'iro. ¹³ Ëhesi bëhoho God-ro jemesi dë vövöbajo'oho huotovëhajeje ëhuro huhu nimaje ëhi jië'e muoho vae'i nimoromo vae'irarijogo. Ëhuni ëhi jië'e muoho vaere.

¹⁴ Mu rabe rabe vaejë'o nadi muoho bijönimoromo jö sisëho atoromo o jöho aho'ahëmi'irögororo a'i muoho ma-vaere. ¹⁵⁻¹⁶ Ëhi ë'ë'o ho jemë jö sisëho bogojëvo'i uhohu'o ma-mae jëvo'ë'e. Sareri sareri'e aribövi sisëhu'o gemuore raromo'aruje röhu jemë God-are aboji harihu'e maemu jëvo'ë'e. A i'ovavuo'iröhe jöho röjëhiromo ëhuro jiji mujöru'ehu ramoramore ajivo'amajëhi ramoramore raromarue aribövioho ëhi ajivëvore. Jemë nahi ë'ë'o ho Keriso-are majaho rue'iramu naru uvo'ejo: O mabëhëjo. Jemë nasi jöho mabëhe ejeharije höjo. Na sa'are hiromo jöho majëhiromo muoho bogo ëma sivohoromo darugoho boremi'öjode höromo jemesi jöëni nimoronimorohë'i jöho jövo'ejo.

¹⁷ Röhu hesi nani'o nani aëro anego'iramu guomevo'ë'e. Ëhi'o'iramu nasi köho rue'iramu God-ro uvo'ë'e: Ëho na suvuore bojemijajëjo.

Röhu jemëhu hesi örire mae uehorovoromo mu vaejarujoho ëhu'o God bojamijaruje suvuoreje. Röhu nasi suvuorohu'o jemesi suvuorohu'o gemuoro jio'iramu God-ro garomo uvo'ë'e: Iae eni jiajêjo. Ëhuni aehu na ëhi anegego guomevo'iröhoho na huë mae jeve. Huë mae jevoromo jemë'o gemu mae nimoroheve. ¹⁸ Naehu ë'ajëhi jemëro huë mae jioromo na'o gemu mae nimorohore.

Paul-hu Timothy'o Epaphroditus'o rëmö'öjego Philippi amore ö'iröhe jöhoje.

¹⁹ Iae na uehorovoromo uve: Bada Iesuhu nimë'ohuro ëhuro na maburëro Timothy nugö'ö'iramu jemesi örire ö'a'ajêjo. Ëhi ë'irodëro nege. Ëhesi bëhoho ö'oromo jemëhu diehi raromaruje jöho huro vuonorö'ö barovego na heromo huë mae jevoröhego. ²⁰ Timothy-ro gemuëro na'o gemuoro uehorovoromo bogo döhemuoho a'i uhohu'o jemesi jöho uehorovajeje. Ëhi jië'e a göho bogojeve. ²¹ A ioro'iorohuro bogo Iesu Keriso-are jöho uehorovo'i jabesi muohemu uehorovarujeje. ²² Röhu jemë gavarujoho iae hu a maeje. Harihehu vavu ajëmijaruëhi huro na ëhi ajëmiromo Keriso-are jö ma hesi muoho vaebe rovë'eje. ²³ Ëhuni na uehorovoromo uve: Ga'irode nasi muoho diehi jiamu gavë'iroho hu nugö'ö'ejöjo ö'iröhego. Na ëhi nege. ²⁴ Röhu naro uve: Badahu nimë'oho majae ma-bisemu barë'iramu na'o ö'ejöjo.

²⁵ Röhu naro uvodeje: Nosi Christian öho Epaphroditus nugö'ö'ejöjo ö'öjoro. Ëhuremu iae mae höjo. Röhu avevejö'ohu na'o bimuvoromo Satan'o muorovoromo mu vaejaje aeje. Mami'e jemëro nugö'ö'jarijeje huro rueromo jemesi ihore nasi vavaenoho ajëminövo'iröhego. Röhu naro hu sionëro nugö'ö'je. ²⁶ Naehu hu nugö'ö'irode hesi bëhoho huro ae aho'obëhe jemëni vavaenime. Vavaenimoromo nurunurume jemesi jöhuni. Ëhesi bëhoho jemë hejarijeje uvavamu: Hu guomo guome baejade hö uvamu hejarijohuni ëhuni. ²⁷ Iae mae. Hu guomo guomo böröme baeromo guomo hesi jiadeje. Röhu God-ro hesi jöëni vavaenimoromo ajamijadeje. Bogo hesi jöënioho gemu vavaenimo'i a'i nani vavaenimadeje hu guomego naro huë vavaene gö'ö döre baejöëni. ²⁸ Ëhuni na nego avohe nugö'ö'jego ö'öjoro ëhuro hu ö'ego jemëro röhu maho garomo nimoroho'irarijego o ëhuro nasi nurunuruoho barëjanovoröhego. ²⁹⁻³⁰ Ëhu'e jiaje hu ö'ego Badare ihoro börömo mae nimorohoromo rajahire. Ëhesi bëhoho hu uvadeje: Philippi amo rajoho ame ëgoböviro raromoromo Paul ajamijë'ohu bogo eni jiajêjo. Ëhuni naro jahu'o röromo ë muoho vae'ejö uvoromo ëhuni hu ave sa'are hi'iröhe jöho bogo uehorovoromo guomo hesi jiadeje. Ëhuni ö'ego rajahire. O huhu ë'adëhi ae rahu jabesi sino bogo uehorovo'i Keriso-are muohuremu uehorovë'ohu ëhi jië'e aribövioho aho'obëhe rajëhinövore.

3

Noehu God-are nunire mae riravo'iröhe öroho ëho Keriso mae uehorovo'iröhe jöhoje.

¹ Nasi ö mueno'e ijo tugoho'i jöho majëhi'ië'e. Badare öroro uehorovoromo nimorohore. Röhu ave majëhi'irode jöho mami'e uëvodoho röhu maho majëhi'jë'ohu bogo u'uvevo'ë'e. O jemë röhu maho hejë'ohu ëhuro avo'avoho raromo'aruje. ² Ö sisëho va'ëne

aribövioho gëvë'i raromore. Jaburo God-are muoho sisë'i rjöhijarueje. Ëhuni gëvë'i raromore. Jaburo uëvarueje: Jemëro Jew rajo muoho vaeromo jemesi sinoho tarivorëjo ëhuro God-are nunire mae riravo'irarije. Röhu jabuhu rjöhijarue muoho bogo mu maehu jio'i ëho sino taritarivo'iröhe muoho jianove. Ëhuni gavë'i raromore. Ëhi jjië'e ariböviohuro sarerëmi'l'ëö. ³ Jaburo sarerivoromo uvoruomajeje: No sine tarivo'amë'ëro ëhu'ëro no God-are aribövie javuajëjo. Röhu jabumë ma-döhemu God-are aribövie jioruomo'i a'i no uhohu'o God-are aribövie javue. Ëhesi bëhoho noro God-are Aru'aho hesi darugoho baeromo hu rajahiro mo Iesu Keriso uehorovoromo nimorohë'i atarueje. No bogo uvarueje: Nosi muohu'o ihohu'o ave sa'are mae jiahuë'o ho ëhuro God-are nunire mae riravo'ëjarëjo. ⁴ Röhu nosi muohu'o nosi ihohu'o mae jiahuë'ego ëhuro God-are nunire mae javuo'ibejo Paul nasi muohu'o ihohu'o mae jiehe'ëro jjië'ëro uvo'ibejo: Na hesi nunire mae jevajëjo. A ioro'iorehu uvaruho: No Jew rajo maëro javuë'ëro Jew rajo muoho avo'avoho vae'ego God-are nunire mae javuajë uvaruho Paul naro ëhi uvo'ibejo iae mae jio'ibejo rabëni naro jabumë iosirëmiromo Jew rajo maho na jevë'ego. ⁵ Rahevamu hurae gemu barëjamu Jew rajo muoho vaejevoromo nasi sinoho tariojehareje. Nasi vëmu vavu'o ho Israel rajëro jëvë'ëro ëhu'ëro na'o Israel raje jeve. Benjamin-are uje gemuho jeve. Nasi hijo mino'ehu Hebrew huëhu atobe Hebrew mu vaebe rovarëhi na'o ëhi gemuho ömajeje. O mu vaeröhe jögoru ejaje ae jevadeje. Pharisee ariböviehu jögoru e avohojöro uövuaruëhi na ëhi'obe rovodeje. ⁶ O God-are mu nimode ae jevadeje. Naro uvodeje: Jew rajo muoho God-are mue höromo ekaresia aribövioho sisë vaejëvo'i hijodeje. Jew rajo nosi jögoru ejaruohuro ëhuro mae javuo'ibejo ja uvo'ibejane: Nörö mabëhi mae höjo. ⁷ Ëhi jjië'e mu mae iho mae jevamu iae marëjevajë uvodoho jaruvoho Keriso-are jöho uehorovoromo uvajeje: Ëhuro sisërëjevë'e höjo. ⁸ Naro uvajeje: God-are nunire mae nami'irögoru naehu Jew rajo mu vaejë'ohuro mu ioro'iorohu'o noehu vaejego God-are nunire mae javuoröhe ëhi jjië'e mue aho'obëhe naehu uehorovë'oho ëhuro sisërëjevo'ajëjo. Iesu Keriso nasi Börömo ga'irodoho ëhemu börömo ho höjo. Hesi jöëni mu ioro'ioroho musisi va'ëne höromo boremi'öjë'e jeve ëhuro naro Keriso bae'irodëro. ⁹ Keriso baeromo hu'o gemuoro bimuvo'irodëro. Jaruvoho bogo nasi ëma birivoromo Moses-are jögoroho eromo uvajeje: God-are nunire mae jevajëjo. Bogo. A'i na Keriso mae uehorovoromo ëhuro hesi nunire mae jeve. Ëhesi bëhoho God-ro ajamuego no mae uehorovoromo hesi nunire mae riravarueje. ¹⁰ Na nege nasi simanohuro dë vövöbajo'ohuro Keriso ga'iro hu ri'öjë'ëro hesi darugohuro ajemijego marëjevöjoro. Huhu huë vavaeni vi'ëhi baejadëhi na'o ëhi gemuho baebe va'iro. Huhu mu sisë mu'uvahuo'i guomadëhi na'o ëhi mu sisë garomo hörëro taemobe va'irodëni. ¹¹ Sisëho hörëro taemobe va'oromo ëhuro ijönö Iesuhu guomoromo ri'öjadëhi nani na'o eni jevë'ohuro nasi sino haho'ohu'o guomoromo ëhi ri'ö'irodëro. Ëhuremu nege.

Paul-hu daruge aho'o bojamiromo Keriso-are mu vaejadëhi no'o ëhi ë'tiröhe jöhoje.

¹² Na bogo uehorovoromo uvajeje: Mami'e Keriso-are muoho baejè'ëro mu sisè bogojevo'i bövie bise'e eni jevajèjo. Bogo èhioho uvo'i a'i Iesu Keriso hesi baejevè'ëgo èhuni hesi muoho bae'i birivoromo muoho vaejajeje. ¹³ Nasi ö mueno'e na bogo uvajeje: Naro Keriso-are muoho bae barèjè'e jevajèjo. Röhu ave muoho gemu uehorovajeje. Mue urimo vaebe rovodoho na bogo uehorovo'i ijönö jioröhe muohuremu bae'i sivohoromo è'o gavajeje. ¹⁴ Naehu vaejèro Kerisohu nimajoho èhemu nunire bamoromo è ahorrèro vae'i birivoromo è'o gavajeje èhuro ruahö'öromu suvorocho bae'irodèro. Èsuvuoro hesi bèhoho God-hu uevego na Iesu Keriso'o gemuoro jevè'ëro hesirire ajiomo'irodohoje.

¹⁵ Ae rahu a duvahnö'e uehorovarue aribövi javuè'o ho naehu uèvodèhi èhi uehorovonövo'ejo. O jemèhu jö gö uehorovè'iroho God-ro èho röjèhi'iramu ga'a'aruje jemè bogo eni jèvo'iramu. ¹⁶ Èhi jiè'ëgo Keriso-are jö ejahobe rovaroho èhi ejahobe va'ejo. Èhi jiè'o ho iae maeje.

¹⁷ Nasi ö mueno'e jemè gemuoro bimuvoromo naehu è'ajèhi èhi è'onövore. Noehu öri mare jijiharuèhi èhi jijiharue aribövioho gè avohoromo jemè'o èhi è'ore. ¹⁸ Röhu ave jöho majae aho'o majèhi'i hijodoho huè vavaene bogo bise'o vadu'o ho baeromo röhu maho majèhi'irögöro è'e. Ae aho'obèhe mu sisè vaebe jijihoromo èhuro Kerisohu korosire guomade jöho ahanovoruomajeje. ¹⁹ Ahanovoromo röhu noehu God börömoho hö uehorovaruèhi èhi jabumèro jabsi sinohuremu nimajoho börömoho hö uehorovoruomajeje. Javoji'e muoho vaeromo mae höromo nimoronimorohè'i jijihoruomajeje. Ave sa'a hesi muohemu uehorovoruomajeje. Èhu'ëro jiè'ëro vèni'e örire va'o hesi jioruome. ²⁰ Jabumè èhi jiè'e aribövie jioruome röhu nosi öri ari'o ho bogo aveho jio'i ö'idöre jie. Ö'idöre jiè'ëgo no raromoromo muebejarueje Bada Iesu Keriso no maro bamavuae ahuro ö'idöre jioromo rueröhego. ²¹ Rueromo mue bövie bise'e ruahö'ö'amoröhe darugoho baeromo nosi sino haho'e u'uhavujoho avohahuo'iramu gorosovoromo hesi sino haho'o mabèhe jiajèhi èhi mabèhe javuo'amo'è'e.

4

Noehu uehore gemu baeromo nimorohoromo mu maemu uehorovo'iröhe jöhoje.

¹ Èhuni nasi ö mueno'e Badare öroro èhi uehorovoromo birivoromo riravore. Na jemesi örire dè vövöbajo'e aho'o uehorovèvego jemesi jöèni vavaenegajeje. Na jemesi jöho uehorovoromo huè mabèhe jevè'ëro nimoroho avohajeje. Èhuni na jemesi örire uève: Nasi ö mueno'e birivoromo riravorèjo.

² Naro Euodia jasi örire uave. Syntyche jasi örire uave. Badare magonahe gemuoho jèvaje èhuni uehore gemu baere. ³ Röhu ja na'o mue gemuoho mae vaejanue ae javè'ëgo naro ave jöho jasi örire uave. Èmagonaho niö'ioho ajëmijego gemuoro avoho ari'iro. Èhesi bèhoho è magonahoho jaburo na'o gemu mae bimuvoromo God-are jö ma hesi muoho birivoromo vaejareje. Jaburo Clement'o na'o mu vaejarue aribövi ioro'iorohu'o èhi è'areje. Jabesi ihoho mae raromemu raromo'iröhe ö'idöre jiaje surire è jajivo'amè'eje. Èhuni è magonaho niö'ioho ajëmine.

⁴ Rõhu jemë ae aho'o Badare ae gemuoho jëvaje majae ëhi nimoro-nohonõvore. Rõhu maho uëve: Nimorohorëjo.

⁵ Ma-sanuovoromo ae aho'obëhe jabesi öroro huë mae baejëvore. Badahu ruerõhe majaho dunove. ⁶ Bövi bise'o rové'iroho nadi nurunurumo'irõgoro a'i God-hu ajëmijajoho huë mae uavë'i ëninamiromo jemesi huë vavaenoho hesi öroro majahinõvore. ⁷ Jemëhu ëhi ë'ë'oho God-are sanu'e mahuro noehu uehorovarue sanu iosiramijajohuro ëhuro jemesi uehoroho dë vövöbajo'oho duohëho'iramu sanuovëho'ële Iesu Keriso'o gemuoro jëvë'ëro.

⁸ Nasi ö mueno'e ijo tugoho'i jõho uë'i'ë'e. Aviëhi jië'e muohemu uehorovore. Jõ mae ataruohuremu a duvahonõ'e vaejarue muemu ahorirëro vaejarue muemu ajiro raromarue muemu dë vuëve'o'e muemu aji ma'e muemu huë baejë'e muemu mu rabe rabe ma-maemu jiajoho rabe rabe noehu mae uehorovaruoho ë muohuremu uehorovonõvore. ⁹ Naehu rabe rabe røjëhijamu o vaejamu jemëhu garomo heromo baejarijoho ëhi jië'e muohuremu vaenõvore. Ëhi ë'ë'oho God jõ sanu'e bojamuijaje ahuro jemë'o hi'ë'e.

Philippi ekaresiaehu huë baeromo Paul-are örire suvuro bamahamu Paul-hu mabëhe uëvade jõhoje.

¹⁰ Bada'o gemuoro jëvë'ego na nimorohevo avohe ë hesi bëhoho jemë majae bisemu ëgo'o bogo ajëmijarijoho avevejõ'e rõhu maho uehorovevoromo huë baejevarijohuni. Iae jemë na uehorovevobe rovarijeje rõhu huë baejevo'irarije öroho bogo biroharijeje. ¹¹ Na bogo uve: Jemë nasi huë vavaenoho bogo gevanovarije hõromo bogo ëhunioho jajive. A'i huë mae o huë sisë rové'oho na uvajeje: Na rabe rabe jevajoho iae eni hõjo. Ëhi jië'e uehoroho iae na avoho baejë'e jeve. ¹² Bövi bise'o bogo eni jevajoho o marohë'e mae jevajoho iae na gavë'e jeve. Eni da'uegë'oho o hõmëvë'oho bövi bise'o marohë'e mae jëvë'oho o inõmo rumo'e jëvë'oho o diehi jëvë'oho naro uehorovoromo uvajeje: Na iae eni jevajëjo. Ëhi jië'e uehoro hesi bëhoho birohë'e jeve. ¹³ Keriso biriri bojemaje ahuro ajëmijë'ëro ëhuro mae o sisë rové'oho na biririvoromo nami'irodoho eni jeve.

¹⁴ Rõhu nasi huë vavaeni ajëmijarijoho ëho iae mae ë'arijeje. ¹⁵ Rõhu Philippi amo rajohumë jemë'o iae gavarijeje. Na urimë'i aevoromo Keriso-are jõ ma majëhibe juvodevare evare naro jemesi sa'aho Macedonia vuonugo'i va'amu ekaresia ioro'ioroho bogo ajemi'i jemëremu ijo bajo suvuroho bojemiromo huë maho mana baejarijeje. ¹⁶ Rõhu jemesi sa'aho bogo vuonugo'i a'i Thessalonica amore va'o hijamu evare na bogo eni jevo'ego jemëro suvure nasi örire nugõ'õ'i arinõvarijeje. ¹⁷ Na bogo suvuroho nahoromo ëhunioho uë'i a'i na nege jemëro suvure bojemego ëhuro ijonõ God-hu suvuro mana jemesi örire bojëmi'irõhoho bövi mae jiëhorõhego. ¹⁸ Epaphroditus-ro jemesi suvuroho nasi örire barovadeje. Ëhuni uëve: Jemesi suvuroho iae na baejë'e jevajëjo. Iae eni hõjo. Marohë'e mae hõjo. Jew rajehu mi God-are örire suvuro bojami'i anoromo vënire buejaho'ego God-hu ridi heromo vuëvonõvadëhi jemesi suvuroho ëhi jie. God-ro garomo suvuroho nimoromo huë mae jiajeje. ¹⁹ Rõhu jemë rabe rabe bogo eni jëvamu gëvë'oho jemë Iesu Keriso-are ae gemuoho jëvë'ëgo nasi Vavuohuro iae ajëmi'ë'e hu daruge aje bövie bise'e bogo bise'o vadu'oho

jië'ëro. ²⁰ Röhu na nege God nosi Vavu hesi ihoho ioro'iore gemu dö maro jiobe va'oröhego. Iae mae.

Paul-mëhu ijo tugoho'i jejëmijare jöhoje.

²¹ Röhu God-are aribövie Iesu Keriso-are aganoho aho'obëhe jejëmijajë uëre. Christian ö mueno'e na'o gemu mae arijaruohuro jemesi örire jejëmijö. ²² God-are aribövie aho'obëhe jemë jejëmijö. Röhu Rome a börömo hesi osare raromarue God-are aganoho jaburo bövi maho jejëmijö.

²³ Bada Iesu Kerisoro jemesi aru'ahohu'o jioromo huë baeromo ajëminövo'ë'e. Ahia mino'e.

COLOSSIANS

Paul-hu Colossae ekaresia jejëmijade jöhoje.

¹⁻² O asë'e God-are aribövi Colossae amore raromarujohumë biririv-
oromo Keriso uehorovaruje ö mueno'e jëve hu'o gemuore bimur-
vorovë'ëro. God-ro nimamu Iesu Keriso-are apostle jevë'ëro Paul na'o
nosi öho Timothy'o noro jemesi örire jejëmijö. No nague God nosi
Vavuohuro huë baeromo ajëmijego maro raromol'irarijego.

*Paul-hu Colossae ekaresia jabesi jöëni uehorovoromo God rajahiromo
ëninamade jöhoje.*

³ Jemëni uehorovoromo pari vaejë'iroho noro God nosi Bada Iesu
Keriso-are Vavu hesi örire huë mae uavarueje. ⁴ Rabëni hesi bëhoho
iae no hejareje uvavamu: Colossae aribövioho jemëro Iesu Keriso mae
uehorovë'i God-are aribövie aho'obëhe huë baejëvaruje höjo. ⁵ Jemë
ëhi ë'aruje hesi bëhoho jemëro uvarujeje: Huë mae bae'iröhe ajoho
ö'idöre rune vaejahuë'e höromo raromoromo muebejarujeje ijönö
biroho'irarijëro. Ëhi mae biroho'irarije jöho mami'e aehu Keriso-are
jö ma hesi bëhi mae majëhijarevare evare jemë hejarijeje. ⁶ Jemesirire
jiajëhi ëhi sa'ae aho'obëhe maja rojomajire beva'ajire ë jö maho
majëhijego ae aho'obëhe ejahuobe marëbe va'ajeje. Ëhi jië'e mu maho
jemesirohu'o rumorovë'eje. Jemëhu jö heromo God-are huë ma
baeromo hesi bëhi avoho hejarije majare evare aevadeje. ⁷ Epaphras-ro
ë jö maho aevo'i jemë majëhijadeje. Epaphras noro uehorovarue aëro
jië'ëro no'o bimuvoromo Badare muoho vaejahajeje. Huro no'o röromo
jemesirire muoho biririvoromo ajëmijajeje. ⁸ Huro uövuađeje: God-
are Aru'ahëro jemesi dë vövöbajo'oho huotovëhë'ëro ae huë baejëvo
avoharuje höjo. Jemesi jöho ëhi majahuijamu hejareje.

⁹ Iae ëhuni jemesi jö hejarevare evare no aevoromo jemëni God-
are örire uehorovobe rovaroho jaruvoho ëhi gemuoho ë'obe va'arueje.
Ëhi ë'obe va'oromo noro God uavarueje huro jemë avohëvego hesi
Aru'ahëhu simano ma bojamuijaje ëhi jië'e simanoho jemë'o mabëhe
baeromo mue aho'obëhe avoho garomo ëhuro ga barë'irarijego God-hu
diehi nimajoho. ¹⁰ Ëhuro huhu nimajëhi jemëro ëhi vaejego Badaro jemë
gëromo vuëvo avoho'iröhego. O jemë mu mae bövie bise'e vaeromo
God bisemu gavarujoho gabe va'ojuvo ijönö ga avoho'irarijego. ¹¹ Röhu
God-hu aji mare hiromo bojamuijaje biriroho ëho jemëro bövi mae
bae avohoromo ëhuro huë mae huë sisë rabe rovego nimorohë'i
biririvoromo mae riravo'irarijego. ¹² Mae riravoromo Vavuoho huë
mae ua'irarijego rabëni huro jemë avohëvamu hesi ariböviehu aji'e öri
ari'ere va'o raromoromo mae baejaruëhi ëho jemë'o bae'irarijoho eni
jävë'ëro jië'ëro. Iae ëhuni no God ua gavarueje.

Keriso aho'obëhe iosiramui'amaje a hesi aharire javuaje jöhoje.

¹³ Iae mae. God-ro no ajamuiromo ramoramo hesi vöröre rarom-
maroho jiovahuoromo rinaguoromo hesi Harihu mabëhi hesi aharire
ramuë'eje. ¹⁴ Ramuë'ego hesi Harihohuro i'u'e mu sisëho tegohahuo'i
hesi sasohë'e mu maho jiovahuoromo sisëho mu'uvahuadeje.

15 Sisë mu'uvahuade aho Keriso God bogo gavarue a jiajêhi hu êhi jiê'ëro no hu garomo uvarueje: God êhi hõjo. Hu Muri-oho jiê'ëro God-hu bamade bõvioho bise'oho iosiramui'amoromo hu simanohoje. 16 Êhesi bêhoho God-ro Keriso uavamu huro bõvioho bise'oho avoho'amadeje. Ô'idõre jiajohu'o sa'are jiajohu'o nunehu ga'amaruohu'o bogo ga'amaruohu'o simano vaeruomaje aru'aho masi-johu'o vörö baeruomaje aru'aho masijohu'o aho'obêhe God-ro uavamu avoho'amo barêjadeje hesi muebe'amoröhëni. 17 Bõvi bise'o bogo bamadevaroho Keriso hu urimo jiadeje. Huro aho'obêhe mueberomo ma'eno titimajeje. 18 Hu ekaresia nosi simanohoje no ma-hesi övo duruajo'e javuê'ëro. Hu ekaresia nosi bêhohoje. Hu aevo'i guomoromo ri'õjadeje êhuro aho'obêhe iosiramui'amoromo huro urimo nuniroho jioröhëni. 19 God-ro nimamu Kerisoro hesiro daruge uehore bõvie bise'e bae barêjê'eje. 20 God-ro êhi nimê'ëro uvadeje: Na negajêjo Kerisoro aho'obêhe nasinõ sö rovego na'o huê mae jioruomorõhego. Kerisoro korosire iromoromo kõe rueromo guomego êhuro God naro buore vaeromo bõvie bise'e sa'are o ô'idõre jio'amajoho avoho'amego na'o huê mae garorovê'i raromorõhego. Na êhi negajêjo.

21 Röhu urimoho jemëro sisë'i uehorovoromo sisë vaejamu mue gö jëvê'ëro God-ariroho hahagu tariö'örovê'e jëvanovoromo God nu huodivaruje aribõvie jëvadeje. 22 Jaruvoho bogo God nu huodi-varuje aribõvioho jëvo'i a'i God-ro hesi Harihohe nugö'õjamu sino haho'e jioromo guomamu êhuro God-ro jemê buore vaejëvoromo agane vaejëvadeje êhuro jemê övövo rumo'e jö sisë rumo'e jëvo'i ma-maemu jëvego va'o hesi nunire mae riravo'irarijego. 23 Hesi nunire êhi mae riravo'i nêgê'oho mae uehorovaruje jõho êhuremu biririvoromo uehorovore. Urimo ë jö maho heromo uvarijeje: U'emu God'õ gemu mae raromo'ejarejamu huê mae jëvobe rovadeje. Êhi uehorovobe rovarijoho nadi vuonugore. Êjõ maho sa'ae aho'obêhe maja rojomajire beva'ajire aëro majêhibe jijihõ barêjê'ejõ. Röhu ë jö hesi muoho naro vaejajeje.

Paul-hu ekaresia ajëminövade jõhoje.

24 Naro jemê ajëmi'irodëni vi'ehi huê vavaeni bõvi bise'o baebe rovodoho huê mae jeve. Noehu Keriso'õ röromõ bae'irõhe vi'ehoho êho naro ajamiromo nasi sinore bae'i hirohajeje hesi sino haho'oho naehu uëvaje hesi bêhoho hesi ekaresiaho mae jëvorõhego. 25 Ekaresiae jemê mae jëvorõhego God-ro ekaresia ajëmi'irode muoho nasi õrire bojemijê'eje. Bojemiromo uevê'eje naro hesi jõho majêhi barê'irodego. 26 Majêhi'irode jõho urimo God-ro ae aho'obêhe subivêhobe rovadoho jaruvoho hesi aribõvioho rõjahuijê'eje garõhego. 27 Êjõ urimo subivahuadoho God-ro hesi aribõvioho rõjahui'i nimadeje noro garomo uvorõhego: Êjõho aji mabêhe jiê'ëro sa'a gö gö raje aho'obêhe hebe va'oromo ma-mabêhe raromoruomo'ajêjo. Êjõ hesi bêhoho Keriso jemê'o jie. Keriso jemê'o jiê'ëro êhu'ëro uvarujeje: U'emu hesi aji mare ajio raromo'ejarejõ. Jõho êhije. 28 Êhu'ëro jiê'ëro Keriso-are jõho ae aho'õ majêhijarueje. Majêhiromo simane ma-mae uehorovoromo ae aho'obêhe rõjêhibe jijiharueje jö bêhoho heromo avo'avoho uehorovoromorõhego. Avo'avoho uehorovobe va'oromo êhuro ae gemu

gemu aho'obêhe Keriso-are ae gemuoho jioromo a duvahonö'e God-are nunire riravoröhego. ²⁹ Ëhi mae riravoröhego êhuni naro Keriso-are darugo bövi maho baeromo biririvoromo mu börömo böröme vaemu vaeromo hesi jöho röhëhijajeje.

2

Sareri'le jö bogo ejêho'i Keriso-are jöhemu mae uehorovo'iröhe jöhoje.

¹ Röhu na nege jemëro ave jöho ga'irarijego. Na muoho bogo bise'lo vadu'oho vaejajeje êhuro jemë'lo Laodicea amo rajohu'lo nasi nu ano'lo bogo gevarue a ioro'iorohu'lo ajëmi'irodëni. ² Naehu mu vaejaje hesi bëhoho na nege jemesi dë vövöbajo'ohu'lo jabetesirohu'lo biririvêho'iröhego. Jemë'lo jabu'lo huë baerovoromo rajahirovo'irarijego. Jöho avoho heromo êhuro mae uehorovoromo uvo'irarijego: Jöho bogo sareri'ehu jio'i ma-mae gemu höjo. Êhuro God-hu urimo subivêhade jö hesi bëhoho Keriso-are jöho ga'irarijego. ³ Ae rahu Keriso-are bëhi gavë'oho êhuro God-are nuni aji'e uehoro maho börömo mae biroho'anue. Êhuremu jio'i biroho'irane öre gö bogoje.

⁴ Na Keriso-are jö êhi uëvaje hesi bëhoho ae göëro jemë sarerëmiromo vuëvo'e jöho majëhijego mae höromo ejëhojööni uëve. ⁵ Röhu na rori'lo hi'i röhu nasi uehoroho aho'lo jemesirire jie. Êhuro na jemë'lo jevanove. Jemë'lo hijanovoromo gavaje jemë biririvoromo gemuore riravoromo Keriso mae uehorovego gëromo nimorohajeje.

Keriso-are ae gemuohuro javuë'ëro êhu'ëro bövi bise'lo eni javuego mae raromarue jöhoje.

⁶ Röhu jemë aevoromo mae uehorovoromo uvariijeje: Iesu Keriso iae nosi börömoho höjo. Aevoromo hu mae uehorovarijëhi êhi uehorovoromo hu'lo gemu mae raromo jijihore. ⁷ Ije ö'e dirumu'ëro bibivajëhi o javu öbehu bibivo'amajëhi êhi Keriso-are jöro dirumunö'le io'amoromo bibivo riravore. Êhi'oromo röhëhijamu hejarije jöho biririvoromo mae uehorovobe hesi öröro mabêhe uabe va'ore.

⁸ Röhu aehu ëma sarerëmiromo uëvaruoho: Aveho nuni aji'e jö böröme hö uëvaruoho nadi ejëhoromo guaroho rireromanovore. Jabuhu atarue jöho ma-aëro jabetesi uehorëro avohobe rovë'eje. Ave sa'a hesi jöhemu jië'ëro êhuro Keriso-are jöho ahajeje. ⁹ Êhuni jabetesi jöho nadi ejëhore. Êhesi bëhoho God-hu diehi jiajoho iae Kerisoro hesi sino haho'ere bae barëjë'eje. ¹⁰ O aru'aho mue gö gö jemëhu baejöro God-hu nimajoho iae eni bae barëjë'e jeve Keriso-are ae gemuohuro jëvë'ëro Kerisoro simano vaeruomaje darugo'e aru'ahe gö gö aho'lo taemëvo'i huro gemuëro dö maroho jië'ëro.

¹¹ Jemë Keriso-are ae gemuohuro jëvë'ëro êhu'ëro jemesi sino sisëho tarivëhanovë'eje. Êhesi bëhoho bogo ma aehu Jew rajo muoho vaeromo sinoho tarivëhamu êhuro God-are aribövie jëvo'i a'i Kerisoro jemesi sino hesi mu sisëho tarivëhë'eje God-are aribövie jëvoröhego. ¹² Jemë bapataeto vaejarijevare evare Keriso guomamu hure bamarohuro êhuro jemesi uehoro mamioho hu'lo gemu mae guavëhë'eje ioro'ioremu barëjëho'iröhego. Röhu God-ro darugoho bojamamu Keriso guomoromo ri'öjadeje. Êdarugoho jemëro mae uehorovoromo

ëhuro Keriso'o gemu mae ri'öromo uehoro i'oho baejarijeje. Bap-ataeto vaejarijevare ëhi jëvadeje. ¹³ Urimoho jemë mu sisëhemu uehorovonövarijeje. Mu sisëhemu uehorovoromo bogo Jew rajehu jëvo'i sa'a gö rajëro jëvë'ëro God-are jögoroho bogo baejë'ëro ëhu'ëro jemesi dë vövöbajo'oho vuovëvanovadeje. Jaruvoho God-ro jemë Keriso'o gemu mae ajëmamumu i'ovoromo ri'öromo uehoro i'e baejë'e jëve. Röhu God-ro nosi sisëho aho'o uehorovoromo vuonugahuë'eje. ¹⁴ Urimo huro hesi jögoroho bojamuiromomu uövuadeje: Ëhi ëhi ë'orëjo. Bogo ë'ë'oho i'ue bae'a'arujëjo. Ëhi uöromomu gavade noro ë jögoroho ahamu gagorovo nosi ihoho jajivoromomu uvadeje: Jabumë mu sisë ëhi ëhi vaejë'ëro i'ue bae hesi jioruomajëjo. Ëhi ë'ë'ëro Keriso korosire guomadëvare God-ro nosi sisëho uehorovoromomu vuonugoromomu nosi mu sisë jö surire jiajoho Keriso'o korosire ano taemoromomu mu'uvahuadeje ëhuro mae javuoröhego. ¹⁵ Röhu majae gemuore Keriso korosire guomamumu ëhuro aru'aho sisë ihe gö gö sa'a bövi bise'o muebe'amarue jabesi darugoho God-ro ruahö'ö'amoromomu rori'o ujuoho ruruhö'öjadeje. Ruruhö'öromomu ë sisë aribövioho söromomu a nunire rovadeje ae aho'obëhe garöhego God-ro jabumë ruahö'öjëvë'e jiego.

¹⁶ Vörö'e aru'aho sisëhu ave sa'are muebejëvoruomadoho ruahö'öjëvë'e jiaje ëhuni aehu ave sa'a hesi jögorohuremu uehorovoromomu uëvaruoho: Ëioho jovoho bogave i'irarijëjo. ËJew rajo maja börömomomu vadune göro göro manaere göro göro hurae göro göro ëhi rovego ëhi ëhi vaenövorëjo. Nosi jögoru bogo ejahuë'oho sisë'rëjëvo'ajë uëvaruoho nadi ejëhore. ¹⁷ Ëhi jië'e jögorohuro ëhuro God-are mu maehu rue'iröhohomu ëho no ma-sisë'i sisë'i maja aru'ahonö'e gavarueje. A'i Keriso gavë'ohuro ëhuro ë mu ma hesi bëhohomu gavarueje. ¹⁸ Ëhuni aehu sarerëmiromomu uëvaruoho: No nia'ovo'iraeromomu mu masijo masije gavë'ëro ëhu'ëro a masije javuajëjo. Ëhuni uëvaruëjo: Jemesi ar-ijö'arije taemorovorëjo. Anerahomu uvene aho röjëhinövorëjo. Nosi jö bogo ejahuarujohuni sisëromu va'a'arujë uëvaruoho nadi ejëhore. Ëhi jië'e ariböviohuru sinehu nimajemu mu sisëho uehorovoromomu ma-döhemu nimoronimorohë'i jijihoruomajeje. ¹⁹ Bogo birivoromomu Keriso mae uehorovoromumajeje. Röhu Keriso hu simanohomu jio'i no hesi övo höru'ohomu javue. Hu simanohomu jië'ëro muebejavuego övo höru'ohomu jarömi umuogëro darugoho baerovoromomu gemuoro bimuvorovoromomu God-hu ëhi ë'ojöromu nimadëhi ëhi vaeromomu böviraëbe va'arueje. Ëhi jië'ëro Keriso nosi simanohojemu röhu ë sisë aribövioho bogo birivoromomu simanohomu Keriso'o gemuorohomu bimuvorovoruomajeje.

Keriso'o gemu mae vuovanovoromomu mu mami vuonugo'i hu'o gemu mae ri'öromomu mu i'o baejare jöhoje.

²⁰ Röhu jemë Keriso'o gemu mae bimuvoromomu vuovëvamumu ave sa'a hesi mu jöho barëjëhadöheje. Sa'a mu jö barëjëhadöheje röhu jemë rabëni ave sa'a hesi mu uehorovarijohomu bogo vuonugë'e ëhi gemuohomu raromomu jijiharujeje. Jemë rabëni aviëhi jië'e jöho ejëharujeje. ²¹ Avehomu nadi ma'enorëjo. Ëhonomu nadi irëjo. Aruërohomu nadi rëhorëjo. ²² Ëhi jië'e jögorohomu ma-i hesi jögore omu inömomu hesi jögoreje. I ijë'ohomu barëjajëje. Omu inömomu baeromomu mu vaejë'ohomu ëhuro ma-sisë'rë'amajeje. Ëhi sisë'rë'amoröhe inömomu bövi bise'o hesi jögorohomu ma-aëromu bojëmiromomu röjëhiruomajeje.

23 Røjahi'iramu uvo'a'anue: Jabesi jōho nani simano ma'e jōe hōjo. Ĕhesi bēhoho jaburo uvarueje: Uehore aho'o bojamiromo aru'aho masijoho uvene aho rōjēhinōvorējo. Arijo'arije taemorovonōvorējo. Sino haho'o ho ijumorovonōvorējo. Rōhu jabesi jōho ma-dōemu maeje. Ĕjēhē'o ho bogo ēhuro sinehu nimaje mu sisēho aharueje.

3

¹ Rōhu Keriso guomoromo ri'ōjadohu'o gemu mae ri'ōjē'e jēvaje ēhuni Kerisohu God-are övo manō bōrōme hijajire dōre jiaje muoho bövioho bise'oho ēhemu uehorovore. ² Nadi ave sa'a hesi mu sisēho uehorovo'i dōre jiajohemu ēhemu uehorovore. ³ Jemesi mu sisē hesi darugoho ioro'ioremu barējēhē'eje. Ĕhuro vuovēvanovē'eje. Jemē vuovēvanovamu Keriso'o bimumovorvē'ero jemesi darugo i'oho God-arire gurihijē'eje. ⁴ Ĕhi'obe va'ojuvo hujeji Keriso darugo bojēmijaje aho va'orahoro rue'ē'e. Rue'iramu evare jemēro hu'o va'orahoro riravoromo hesi ajoho gemu mae bae'a'aruje.

Mu mami vuonugo'i mu i'o vaenōvo'irōhe jōhoje.

⁵ Ĕhuni sinehu nimaje mu sisēho mu'ure. Ōehu jijihanovarujoho va'inumi'e mu vaejarujoho jemesi dēre uehoro sisē ri'ōjego nimarujoho ēhi jīē'e muoho mu'u'amore. Rōhu avare inōmemu nimaruje muoho mu'ure. Avare inōmemu nimarue mu hesi bēhoho God dejonō bamo'i inōmo sisē nuninō bamarue muohoje. ⁶ God-are jō bogo eruomaje aribōviohuro ēhi jīē'e mu sisēho vaeruomajego ēhuni God-are vōrōhuro jabumēni rue'ē'e. ⁷ Urimoho jemē'o ēhi jīē'e aribōviohu'o gemuore jijihoromo ēhi jīē'e mu sisēho vaenōvarijeje.

⁸ Rōhu avevejō'oho aviēhi jīē'e mu sisēho aho'obēhe vuonugore. Dē vōrōnimarujoho vōrō'iraejarujoho uehoro sisē baejarujoho ēhi ē'arujoho vuonugore. Ae gō jabesi iho ijumarujoho javoji'e jō sisē atarujoho bogave jemesi jō'oroho suorovo'i. ⁹ Nadi gōero gōho sareramirovore rabēni hesi bēhoho uehoro mami jēvo'ego mu sisē vaenōvarijoho vuonugo'i ¹⁰ uehoro i'e baejē'e jēvaje. Ĕuehoro i'oho God-ro aevoromo bojēmadeje. Bojēmijē'ero ē uehoroho huro avohēhobe va'ajeje huhu uehorovajēhi ēhi uehorovojōro ēhuro jemēro hu avoho ga'irarijego. ¹¹ Uehoro i'ero jēvē'ero jemē bogo aho adovoromo uvo'a'aruje: Jew rajoho gō javuo'i sa'a ioro'ioro rajoho gō javuajējo. Jew rajo mu vaeromo sino tarivahuē'e aribōvioho gō javuo'i sino bogo tarivahuē'e aribōvioho gō javuajējo. Huē gō aribōvioho o rori'ere aribōvioho gō javuajējo. O ae gō jabesi muemu vaejēharue aribōvioho gō javuo'i nosi nimoro mu vaejarue aribōvioho gō javuajējo. Ĕhi jīē'e muoho iae barē'i jemē ae aho'obēhe Keriso-are aribōvie gemuoho jēve. Hu ae aho'obēhe jemesirijeje.

¹² God-ro jemē hesi baejēvē'ero jemē hesi aribōvi maemu jēvego huro jemē dē vōvōbajo'e aho'o uehorovēvajeje. Ĕhuni huē baeromo a ajēm'i'irarije muoho baere. Nadi sivuoho uehorovoromo bövioho riravo'i ma-sanuovoromo muoho vaere. Ae gōehu huē sisē bojēmijē'oho birivoromo ma-nunēremu ga taemore. ¹³ Gōero gōho garomo nadi nuoho huodivorovo'i jahu'o ma-raromore. O uvē'iroho: Ae gōero mu sisē vaejade hō uvē'iroho gōero gō hesi sisēho uehorovoromo vuonugore. Badahu jemesi sisē uehorovoromo vuonugadēhi jemē'o ēhi

ë'ore. ¹⁴ Èhi jië'e muoho vaejè'i røhu ave muohuremu avoho ma'enore. Göero göho dë vövöbajo'e aho'o uehorovore. Dë vövöbajo'e aho'o uehorovè'oho mu mae aho'obèhe avo'avoho vaenövo'aruje. ¹⁵ Röhu Kerisoro ajamuijigo nosi dë vövöbajo'e mae javuego gemuoro mae raromarueje. Jemèro èhi gemuoro mae raromo'irarijigo èhuni God-ro gagovëvadeje sino haho'e gemuoho jëvojöro. Èhuni è muohuremu nunoro bamoromo uvore: No muoho èhi èhi vae'ejarèjo. O God-hu suvuoro gö gö bojëmijajoho nadi ëma nunëremuoho ga'i uvore: God-ro suvuoro mabèhe bojamuijè'e hö uvore. ¹⁶ Röhu Keriso-are jøho mabèhe jiaje è jøhuremu uehorovore. Èjøho uehorovoromo simano mae bae avohoromo øroho røjahirovoromo jøgore mamirovore. Èhi'oromo uvore: God-ro mae vaejavuajë uvè'i Psalms surire jajivare jøho God rajahi'irøhe jøho Aru'ahehu bojëmaje jøe gö gö iore. ¹⁷ Jemë jø atë'oho mu vaejè'oho o rabe rabe ë'è'oho God Vavuoho Bada Iesuare ihore huë mae uavè'i mue aho'o Bada Iesuare ihoro vaenövore.

Aehu diehi avo'avoho garorovo'irøhe jøhoje.

¹⁸ Röhu vaboroharo jemesi baru jabesi jøho ejèhonövore. Jø ejèhè'oho iae maeje jemë Badare magonahëro jëvè'ëro.

¹⁹ O baruoharo jemesi vaboroho rajèhire. Rajèhiromomo nadi sisè'ioho vaejèvore.

²⁰ O aboji harihu'oharo jemesi vëmu vavu'o jabesi jøho aho'o ejèhonövore èhi ë'è'oho Badaro nimaje jiaje.

²¹ O vëmu vavu'oharo aboji harihu'oho nadi huë sisèho bojëminövore. Huë sisè bojëmibe va'è'oho jabesi uehoroho u'uhèho'è'e.

²² Ae gö jabesi muemu vaejèharuje aribövioharo jemesi masijoho ejèhonövore. Nadi ma-døemuoho ejèhorego jemesi masijohuro jemë gëromomo mae uehorovèvo'irøgoro a'i Bada uehorovoromo jabesi øroro uhohu'o mae ejèhonövore. ²³ Ejèhoromo mu rabe rabe vaejè'oho uvore: Bogo ma-a jabesi muoho vae'i na Badare mue vaejajëromomo dë vövöbajo'e aho'o avoho uehorovoromo muoho vaere. ²⁴ Mu ma vaejè'oho Badare ariböviehu bae'irøhe suvuoroho huro jemë'o mana bojëmi'è'e. Èhuremu uehorovore. Èhesi bëhoho ae gö jabesi mu vaejè'oho èhuro Keriso jemesi bövi hesi muohu'o vaejarueje. ²⁵ O mu sisè vaejè'oho è mu sisè hesi manaho bae'a'aruje. God-ro bogo gö nimo'i gö bijønimo'i a'i ma-gemu uehorovavuajëje.

4

¹ O simano vaejarueje aribövioharo jemesi muemu vaejèhoruomaje aribövi jabesi øroro avo'avoho vaejèvore. Uvore: Bogo jabumëremu a'i no'o Simano Vaejavuajë Ae iae ø'idöre jiajèjo.

Birivoromo God-are ørيره jø jøvoromo mu avo'avoho vaenövo'irøhe jøhoje.

² Röhu God-are ørيره jø atë'iroho nadi u'uvo'i a'i birivoromomo nune jioromomo hesi øroro mabèhe uaromomo jøho atore. ³ God-are øroro jøho atoromomo röhu nosi jøëni èninamirego huro nosi øroho jio-vahuo'iro no Keriso-are jø subivahuadoho ae huruoho majèhi'irøhe. Èjø majèhijajohuni èhuni aëro savoji gagore ba'amevè'ëro hijajëje. ⁴ Èninamirego na è jø hesi bëhoho avo'avoho huruoho majèhi'iro aëro ma-mae heruomorøhe. Naehu èhi ë'è'oho iae maeje.

⁵ O Keriso-are jö bogo heruomaje ariböviohu'o gemuore raromë'iroho simanoho avoho uehorovoromo jabu'oho raromo jijihore. Jabu'o raromoromo röhu majae eni jiamu gavë'iroho nadi ëma rarom'i a'i birivoromo jabetes öroro avoho ajëmere. ⁶ Röhu jemëhu jabu'o jö atë'oho jemëro vuëvo'e jö mahemu atore. Ëhi jië'e jö atë'oho ehuro he'irarije aëro Keriso-are jö bëhoho he'i uë gëvamu hejë'oho ae gemu gemu avoho majëhibe va'a'aruje.

Ijo tugoho'i jejëmijare jöhoje.

⁷ Tychicus-ro ö'oromo naehu rabe rabe ë'aje jöho majëhi'iramu he'a'aruje. Hu nosi huë baerovarue öeje. Hu no'o bimuvoromo Badare muohemu vaejahajeje. ⁸ Ëa naehu nugö'ö'ië'aje hesi bëhoho huro ö'oromo jöho majëhijego noehu diehi raromarue jöho jemëro hejego dë vövöbajo'oho mae jëvoröhego ehuni nugö'ö'ië'e. ⁹ Röhu Onesimus-ro Tychicus'o gemu mae ö'ë'e. Onesimus nosi huë baerovarue öhuro jië'ëro birivoromo Keriso mae uehorovajeje. Hu jemesi ae gemuohoje. Tychicus'o Onesimus'o niö'iro noehu rabe ë'aruoho majëhi barë'iramu he'a'aruje.

¹⁰ Röhu na'o savoji gagore hijaje aho Aristarchus-ro jemesi örire jejëmije. O Mark Barnabas-are muenohuro jejëmije. Röhu Mark ö'ë'oho jejamiromo uare: Nosi osaro ro hijëjo. Ëjöho na mami'e bojëmamü gavarijeje. ¹¹ Röhu Joshua iho göho Justus hu'o jemesi örire jejëmije. Aristarchus o Mark o Joshua ë Jew rajoho niö'i gemu jaburo sivue na'o bimuvoromo God-hu muebejaje öri ari'o hesi muoho vaejarueje. Vaeromo ma-mabëhe ajemijë'ejö. Jew rajo ioro'ioroho bogo ajemijarueje.

¹² O Epaphras jemesi ae gemuoho Iesu Keriso-are mu vaejahaje ahuro jemesi örire jejëmije. Huro jemesi jöëni börömo mae birivoromo God-are örire ëninamijajeje huro ajëmego jemëro a duvahonö'e birivoromo riravoromo hesi jöho uhohu'o ma-mae hö uehorovoromo huhu rabe rabe nimajëhi ëhi ejaho barë'irarijego. ¹³ Ëhi ëninamiromo mu börömo böröme vaejajeje jemë'o Laodicea amo rajohu'o Hierapolis amo rajohu'o ajëmi'iröhëni. Mu böröme vaejamu gavë'ëro naro majëhije. ¹⁴ Röhu oso muebejaje ae nosi huë baerovaruoho Luke o Demas jabu niö'iro jemesi örire jejëmijö.

¹⁵ O Laodicea raromarue Christian ö mueno'ohu'o jejëmijode höre. O Nympha nasi Christian ma'ine o hesi osare ro gagovoruomaje ekaresiahu'o jejëmijode höre. ¹⁶ Röhu ave surire jö baeromo adahë'iroho suroho nugö'öromo Laodicea amo rajoho uërego jabu'o adaho'irovo. O naehu Laodicea amore nugö'öjode suroho jabuhu jemëni nugö'öjë'iroho jemë'o ëho adahore. ¹⁷ Röhu Archippus uare: Badahu bojamade muoho avo'avoho uehorovoromo vae barënjö. Ëhi uane.

¹⁸ Röhu ave jöho naro nasi övëro jajive gare. Paul naro jemesi örire jejëmije. Na savoji gagore hijaje jöho nadi rumonimore.

God-ro jemë huë baeromo ajëminövo'ë'e. Ahia mino'e.

1 THESSALONIANS

Paul'o hesi ariböviohu'o jabuhu Thessalonica amore raromarue ekaresia jabesi örire jejëmjare jöhoje.

¹ O asë'e Thessalonica ekaresiaho Paul naro Silvanus-ro Timothy-ro ave jöho bamëhö. Jemë God Vavu hesi o Bada Iesu Keriso-are ekaresiaëro jëvë'ëro Thessalonica amore raromarujoho noro jemesi örire jejëmjö. No nague God-ro huë baeromo ajëmjigo maro raromo'irarijigo.

Thessalonica ekaresia ariböviehu birivoromo God mae uehorovoromo raromare jöhoje.

² No God-are örire jö atë'iroho no jemë ae aho'obëhe uehorovoromo jemesi jöëni majae ëhi God huë mae uavarueje. ³ Nosi Vavue God-are örire ëninamijë'iroho noro ave jöho uehorovarueje. Jemëro Keriso mae uehorovoromo ëhuro mu maho vaejarujeje. O ae gö huë baejëvoromo ëhuro i'u'e muoho vaejarujeje. O birivoromo nosi Bada Iesu Keriso ga'i muebemu muebejarujeje. ⁴ Nasi ö mueno'e noro garomo uvarueje: God-ro hesi dë vövöbajo'o uhohu'o jemë rajëhijaje höjo. Rajëhijajoho hesinö jëvoröhego uvë'ëro ëhu'ëro huro jemë baejëvade höjo. ⁵ Noehu ëhi uvarue hesi bëhoho urimë'i noehu Keriso-are jö ma majëhijarevare evare no bogo ma-jö'ëremuoho ë jö maho majëhijareje. A'i no God-are darugohu'o Aru'ahohu'o baejë'ëro ëhu'ëro biririvavuamu jöho majëhijamu ma-burëro ejahuarieje. Noehu jemesirire raromoromo jemesi jöëni diehi jië'e mu vaejaroho iae jemë gavaruje. ⁶ Röhu no'o Bada'o noehu raromo jijiharëhi jemë'o ëhi gemuoho raromo jijihonövarieje. O noehu Keriso-are jö majëhijarevare jemë gavarijeje huë vavaene jemesi örire rovamu. Röhu God-are Aru'ahohuro jemesi dë vövöbajo'oho avohëhamu jemëro nimorohoromo jöho birivoromo ejahuarieje. ⁷ Nimorohoromo jöho mae ejahuamu Macedonia sa'are Achaia sa'are raromarue Christian aribövie aho'obëhe jemesi mu ma hesi jöho heromo uvoruomë'eje: È'ego no'o ëhi jië'e muoho vaejarëjo. ⁸ Èhesi bëhoho jemëro mu mae vaejë'ëro ëhu'ëro Badare jöho jemesirire jioromo jemesi sa'ae Macedonia rumorovoromo sa'a göho Achaia rumorovobe va'ë'eje. Röhu gö'o jemëhu God mae uehorovaruje jöho sa'ae dinö'e dinö'e rumorovobe va'ë'eje. Rumorovobe va'amu ae he barëjë'ego no bogo röhu maho aho majëhiromo uë'ejo: Thessalonica amo rajohuro God mae uehorovoruomaje höjo. No bogo ëhioho uë'ejo. ⁹ Èhesi bëhoho jaburo mami'e hejë'ëro jabesi ri'öromo nosi jöho ae majëhiromo uëruomajeje: Paul-mëhu Thessalonica amore aevoromo va'arevare ë amo rajohuro jabesi örire mabëhe rajëhiromo baejëvare höjo. Baejëvoromo sareri'e darugo rumo'e inömo masije höromo ëhemu uehorovoruomadoho vuonugo'i God darugo'e hijaje a ma hesi muoho aevoromo vaeruomade höjo. ¹⁰ Aevoromo God-are muoho vaeromo hesi Harihoho muebejare höjo huro ö'idöre jioromo rueröhego. Harihoho iae Iesuoje. Guomamu God-ro ajamamu ri'öjadeje. Ri'öjë'ëro huro no ajamuijajeje ëhuro vörö'e maja rovë'oho God bogo dëho vörönimoromo i'uoho mana bojamuijigo bae'i a'i mae raromo'iröhego.

2

Paul-hu Thessalonica hiromo diehi mu vaejade jöhoje.

¹ Röhu nasi ö mueno'e jemë'o gavaruje bogo noro ö'oromo Keriso-are jöho majëhijamu ë muoho sisërëjadeje. ² Urimë'i noehu jemesire bogo ö'i Philipp'i amore raromarevare evare ë amo rajohuro huë vavaene bojamuïromomo mu sisë vaejavuareje. Ëhi ë'aroho jemë iae hejë'e jëve. Ëhi'amu noro jemesire ö'amu jemesi amo rajohuro nosi jöho bijönimoromo ri'öromomo no'lo muorovo'jë'areje. Muorovo'ia'amu röhu nosi Böröme God-ro ajamuijamu no bogo vuonugo'i biririvoromo hesi jö maho jemë majëhijareje. ³ Ëhesi bëhoho aehu simano huotorovojöro mu jö majëhijë'o'ho no bogo simanoho garaeromo sareri'e jöho mae höromo jöho majëhijarueje. No bogo uehoro sisëho baeromo jöho majëhijarueje. No bogo aho sarerëmi'i nimoromo jöho majëhijarueje. ⁴ A'i God-are jöho mae majëhijarueje. Ëhesi bëhoho God-ro no göromu uvadeje: No eni javuajë uvoromo hesi jö maho nosi örire bojamuadeje noro majëhiröhego. Hesi jöho bojamuijë'ëro ëhuni noro jöho avoho majëhijarueje bogo aho heromo nimoroho'i a'i God nosi dë vövöbajo'o gövuajohuro nimorohojöro. ⁵ Noehu jemë bogo mae bogo sanu-sanuëmiromomo sareri sareri'e jö majëhijaroho jemë iae gavarujeje. No bogo nosi sinohemuoho uehorovoromo bövioho bise'o'ho bojamuijoro nimoromo jöho majëhijareje. God-ro gö'ego no jö mae uëvö. ⁶ No bogo ma-aëro rajahuijoro bogo ëhunioho jemë jöho majëhijareje bogo jemëro o a ioro'iorëro rajahuijoro. ⁷ No Keriso-are apostle ömo'ömhuro javuë'ëro hesi darugoho baejë'e javue. Hesi darugoho baejë'e javuë'ëro ëhu'ëro no masije riravoromo i'u'e muoho jemë bojëmi'ibejo iae mae jio'ibejo. Röhu no bogo ëhioho ë'i a'i noro jemë'o raromoromo masanu'e jöhemu majëhijareje. Vëmehu aboji harihu'o sanuëmiromomo muebejaruëhi noro ëhi jemesi örire ma-sanu'e jöhemu majëhiromomo muebejëvareje. ⁸ No jemëni vavaenaguo avohë'ëro ëhuni no uvareje: No bogo ma-God-are jö mahemu bojëmi'i nosi dë vövöbajo'o uhu'o bojëmi'ëjarëjo rabëni noro jemesi örire dë vövöbajo'e aho'o rajëhijë'ëro javuë'ëro. ⁹ Nasi ö mueno'e noehu jemë'o raromoromo i'u'e mu bogo bise'o vadu'o vaejaroho iae jemë'o uehorovarujeje. Noehu God-are jö ma majëhijarevaroho no bogo ëhemuoho ë'i sisone vahie majae nosi övëro biririvoromo i'u'e mue vaemu vaebe va'oromo ëhuro nosi manaho birohoromo iruno'o'ho bövioho bise'o'ho imonövareje. No God-are jö ma majëhiromomo böviëni bise'ëni mana ëninëmijë'o'ho no bijönaguadeje jemë anojëmijöëni. Ëhuni ëhi ë'areje.

¹⁰ Jemë'o God'o iae gavë'e jëve Keriso mae uehorovaruje aribövi jemesi örire noro diehi jïë'e muoho vaejëvamu. Noro God-are jöhemu uehorovoromo mu maemu vaejëvamu ëhuro jö sisëho bogojio'i jö maemu jiadeje. ¹¹ Vavuehu hesi aboji harihu'o no öri röjëhijajëhi noehu jemë ae gemu gemu ëhi röjëhijaroho ëhu'o gavarujeje. ¹² Noro jemë sanuëmijë'i jögore mëmijë'i jemesi uehoroho biririvëhojoro uënvareje God-hu nimajëhi jemëro ëhi raromo jijihö'irarijego. Ëhi uënvareje. Ëhesi bëhoho God-ro uëvajeje jemëro hesi öri ari'ere iojioromomo hesi aji mare raromo'irarijego. Ëhuni ë'areje.

¹³ Röhu noro ave jöhu'o uehorovoromo vae majae God-are örire rajahijarueje. Noehu God-are jö bö'oromo majëhijamu hejarijevare

jemë heromo uvarijeje: Ëjõho bogo ma-a jõehu jio'i God-are jõe hõ uvoromo ejaharijeje. Iae mae uvarijeje. Iae God-are jõeje. Hesi jõhuro jemë biririvëvego èhuro hesi õrire mae uehorovaruje aribõvioho mae jëvajeje. ¹⁴Nasi õ mueno'e God-are ekaresiae Iesu Keriso-are aribõviehu Judea raromoro mavaeni baejarëhi jemë'o èhi huë vavaene baejè'e jëve. Jew rajehu jabesi õrire è'arëhi jemesi sa'a rajohuro èhi sisë vaejëvo'i arijè'ejõ. ¹⁵Jew rajohuro èhi jabesi sa'a rajo ekaresiaho sisë vaejëvareje rõhu è hesi urimo jabesi hijo miono'ohuro jõ God-aro baeromo majëhinõvare aribõvioho muo'amobe ruejuvo evare è Jew rajo aribõviohuro Bada Iesu'o anareje. Bada Iesu anoromo no rarovõ'õjavuareje. Jaburo God-are õrire huë sisë bojamiromo nu huë'e muoho ae aho'obèhe nosi õrire vaejarujeje. ¹⁶Nu huë'e muoho vaeromo nosi õroho tugoho'iè'areje èhuro no bogo sa'a ioro'ioro rajoho Keriso-are jõho majëhijego bogo ejahoromo maroho va'oruomorõhego. Èhi jiè'e mu sisëmu vaebe rovaroho jaruvoho bõrõmo bèhe jio'ego iae barè'i God-ro dë võrõnimè'ero i'ue mana bojëmi'iè'e.

Paul-hu Thessalonica ekaresia rõhu maho va'o gë'i nimade jõhoje.

¹⁷Nasi õ mueno'e rõhu vaevè'e no jemë'o raromoro dirõ'o gõre rovaroho vëmu vavu'o rumo'e va'ène majae bunemu hesi uhure èhi javuanovadeje. Iae nosi uehoroho jemë'o jiadeje rõhu no jemesi nu ano'oho bogo gëvareje. Bogo gëvè'ero jemëni sisë maro vavaenaguamu õre nahareje õ'oromo jemesi nu ano'oho gë'irovo. Èhuremu uehorovareje. ¹⁸No õ'i naguamu Paul naro õre naho'i hi'ego Satan-ro nosi õroho tugohahu'ego õ'orõhoho bogo eni javuonõvadeje. ¹⁹Nosi Bada Iesu rovanu hesi nunire riravè'oho no rahumesi jõho uehorovoromo dë sasohoromo nimorohë'i uvo'ejo: No è aribõvioho mae ajëmiromo ruahõ'õjè'e javuajëjo. No bogo a ioro'ioro jabesi jõhemuoho uehorovo'i jemesi jõhuni èhu'o nimoroho'ejo. ²⁰Iae maeje. Jemë mae jëvo'iramu gëgorovo jemesi jõëni nosi ihoho dõro ri'õ'iramu nimorohoromo God mabèhe ua'ejo. Iae èhuni õ'oromo gë'i naguadeje.

3

¹Õ'oromo gë'i naguamu bogo jemë'oho gemuoroho raromojuvo bogo eni javuamu noro Silas-mu niõ'iro uvareje: È'ego nosi sivue Athens amore ari'i ²Timothy nugõ'õjego huro va'oromo Thessalonica amo rajoho gëromo jõho heromo ro majahuego herõhe hõjo. Timothy hu nosi Christian õero jiè'ero no'o bimuvoromo God-are muoho vaeromo Keriso-are jõ maho majëhibe juvaje jiè'ego èhuni noro Timothy nugõ'õjareje õ'oromo jemë ajëmego jemëro biririvoromo Keriso avo'avoho uehorovo'irarijego. ³Jemëhu Keriso uehorovarujohuni jemesi õrire huë vavaene rovego mae uehorovarujoho vuonugojõëni èhuni Timothy nugõ'õjareje. Rõhu Christian aribõvi noehu huë vavaeni bae'irõhoho God-ro bamahuadeje. Jemë è jõho iae gavarujeje. ⁴Èhesi bëhoho urimè'i noehu jemë'o raromarevare noro uëvareje: Aëro sisë vaejavuo'iramu huë vavaene bae'ejarejo. Noehu uëvarëhi iae èhi jiè'e huë vavaenoho rovanu gavè'e jëve. ⁵Rõhu jemesi jõho bogo hejè'e èma hibe rovodoho hejode bogo eni jevamu hegorovo èhuni Timothy jemesirire nugõ'õjodeje jemëhu diehi diehi Keriso mae uehorovaruje jõho he'iro. Èhesi bëhoho na juhuonivoromo uvodeje: Nani evaho

Satan-ro jemesi dëho bijioho gëvamu rireromëvë'e höjo. Èhu'ëro noehu vaejare muoho aho'o sisërë'amo'ajëjo. O diehi jio'amo'ajëjo. Èhuni Timothy nugö'öjamu jemesiroho ö'adeje.

⁶ Timothy nugö'öjamu ö'ë'ëro röhu aviavejö'e jemesi jö maho baeromo vuonorö'ö rueromo uövuadeje: Iae jemë Keriso mae uehorovoromo huë baerovaruje höjo. O jemëro no uehorovavuoromo noehu jemë gë'i vavaenimarüehi jemë'o ëhi no gö'i vavaenimaruje höjo. ⁷ Nasi ö mueno'e no huë vavaene uehore gö gö hesi uhure raromamu u'uvavuë'iro hejare jemëhu Keriso mae uehorovaruje jöho Timothy-ro barovamu heromo jemesi jöëni nosi dë vövöbajo'o'oho biririvahuadeje. ⁸ Èhesi bëhoho avevejö'o'oho jemëhu biririvoromo Bada'o gemuore raromarujohuro ëhuro no ma-mae raramarueje. ⁹ Iae no nosi Böröme God-are nuniro javuoromo jemesi jöëni sisë maro nimorohavue. Èhi jië'o'oho no rabu jöe majahiroho hesi öriroho rajahi'ejo. ¹⁰ Vahie majae jene noro hesi örire biririvoromo ua'i arijarueje huro ajamuijego ö'oromo jemesi nu ano'o'oho garomo jemëhu Keriso mae uehorovarujoho bisemu bogo eni jëvego ajëmi'iröhëni.

¹¹ Röhu no nague nosi Vavue God'o nosi Bada Iesu'o nosi öroho avohahuego maro ö'iröhëni. ¹² No nague Badaro ajëmego jemë ae göëro gö avoho rajahirovobe a ioro'iorohu'o avoho rajahuiibe va'oromo ijonö ma-mabëhe jëvoröhego. Noehu dë vövöbajo'e aho'o jemë rajëhijaruëhi jemë'o ëhi ë'irarijego. ¹³ Èhi ë'ë'o'oho Badaro ajëmi'iramu jemë biririvobe va'ojuvo hujeji nosi Bada Iesuro hesi aribövie aho'obëhe nosi gemuore rue'iramu evare jemëro nosi Vavue God-are nunire ma-mae riravo'aruje. Mae riravo'iramu jö sisë bogojëvo'i hesi aribövi maemu jëvo'ë'e.

4

God-hu nimaje mu hesi jöhoje.

¹ Nasi ö mueno'e röhu jö göho Bada Iesuaré ihore jajivo'ejo. Avo'avoho raromo jijihö'irarije jöhoje. Jöho bogo bise'o vadu'ohoje. Jemë ëho garomo avo'avoho uehorovore. Mami'e jemë hejarijeje noro uëvavamu: Èhi ëhi avoho raromo jijihorego God-ro gëromo nimoroho'irajo. Èhi jië'e jöho hejë'ëro jemë iae ejahuarujeje. Röhu no nague jemë gö'o gö'o döre avoho ejahuobe va'irarijego. ² Noehu jögore rabe rabe Bada Iesuaré ihore majëhijamu hejarijoho jemë iae eni gavarujeje. ³ God hu aviëhi jië'e muoho nime. Hu nime jemë öehu jijihanovo'irarije muoho bogo vae'i mu maemu vaenövo'irarijego. ⁴ Jemë ae gemu gemu aho'obëhe magonaho masu'ië'iroho mu maemu uehorovoromo dë vövöbajo'ohu'o rajahiroho masuromo ëhi gemuoro raromare. Èhi jië'e muoho avo'avoho gare. ⁵ Nadi Christian rumo'e God bogo gavarue ariböviehu ë'aruëhioho ë'anovoromo ma-sino hesi ganiganiöhunioho magonahoho masure. ⁶ O jasi öho nadi sareramiroho vajiohuvoromo hesi vaboroho baene. Èhi jië'e mu vaejarue aribövioho Badaro i'ue mana bojëmi'ë'e. Èjöho mami'e darugo'o majëhijamu hejarijeje. ⁷ God-ro no hesinö rinaguadeje bogo ëhuro no öëro jijihanovo'i a'i mu mahemu vaenövo'iröhëgo. ⁸ Èhuni ae rahu ëhi jië'e jögoru dejonö bu'öromo öehu jijihanovë'o'oho ëhi jië'e aribövioho jabu bogo aho no

bijönaguo'i a'i God bijönimoruomajeje. Röhu God-ro hesi Aru'ahehu mu maemu barovajoho suvuoramuijajeje. Aru'ahehu mu maemu barovajoho suvuoramuij'ëro ëhuni no ëhi gemuoho mu maemu vaebe jijjho'ejo.

⁹ Röhu jemesi Christian ö mueno'o rajahirovo'irarije muoho God-hu mami'e röjëhijadoho no rabëni röhu maho sionoho röjëhi'ejo. ¹⁰ Christian ö mueno'e aho'obëhe Macedonia jemesi sa'a börömore raromaruoho jabesi örire jemëro iae huë baejëvoromo rajëhijarujeje. Röhu nasi ö mueno'e noro uëvö jemëro ëhi jië'e muoho gö'o gö'o döre avoho vaebe va'irarijego.

¹¹ Röhu jemesi ma-jörume raromoromo jemesi muohuremu vaere. Noehu uëvarëhi jemëro ëhi'oromo jemesi övëro biririvoromo bövioho bise'oho baere. Ëhi jië'e muohuremu avoho uehorovore. ¹² Ëhi ët'ë'oho ëhuro God bogo ma uehorovarue ariböviohuro jemë gëromoma mae uehorovëvo'i jemë bövie bise'e eni jëvo'ë'e.

Iesuhu sa'are vuonorö'ö rueröhe jö noehu uehorovego huë vavaeni u'uhahuoröhe jöhoje.

¹³ Röhu nasi ö mueno'e jö göho no nague vuovë'e aribövioho diehi jioruomajoho jemë ga'irarijego ëhuro bogo vavaenëgoröhego. Hesi a ioro'iorohuro uehorovoromo uvarujeje: No vuovoromo bogo ri'ö'i ma-ioro'ioremu vuovo'ëjarëromoma sisë maro vavaenimarujeje. Jabuhu vavaenimaruëhioho jemë bogo ëhioho vavaenëgoröhego ëhuni ave jöho jajivo'ië'ö. ¹⁴ Noro mae uehorovoromo uvarujeje: Iesu guomoroma röhu i'ovoroma ri'öjade höjo. Ëhi uvaruohuni ëhuni uvo'ejo: Iesu mae uehorovoroma vuovë'e aribövioho jabu'o God-ro i'ovëvoroma Iesu'o gemu mae söjëvo rue'a'ajëjo.

¹⁵ Ëhesi bëhoho ave jöho Badahu röjahuijade jöho no jajivo'ië'ö. Bada sa'are rovë'iroho ave sa'are raromarue aribövioho noro vuovë'e aribövioho bogo iosirëmiromoma maroho jio'i a'i jabumëro urimo ri'öruomo'ë'e. ¹⁶ Ëhesi bëhoho aëro heruomo'ë'e jöe bojëmiromoma darugo'o uvavo'iramoma anera börömhuro uvavo'iramoma God-are hëgöho huavo'iramoma. Ëho hel'iramoma gavë'i evare Badaro ö'idöre jioroma ruvebi'ë'e. Ruvebi'iramoma Keriso-are aribövie vuovëvadoho urimo ri'öruomo'ë'e. ¹⁷ Ri'ö'iramoma röhu ijönö bogo vuovë'e ave sa'are raromaruoho God-ro no jabu'o gemu mae suehu'o ma-burëro baejavuoma ajiomoroma gagovavuo'ë'e noro Bada birohjöro. Ëhi'onugoroma ioro'iore gemu Bada'o gemu mae raromo'ejo. ¹⁸ Ëhi javuo'ië'e jiaje ëhuni ë jöho majahirovorego jemesi dë vövöbajo'oho mae jëvo'iro.

5

Badahu rueröhego noehu avoho mueberovo'iröhe jöhoje.

¹⁻² Röhu nasi ö mueno'e Bada Iesu divare rovego mu masije gö gö divare rue'iröhe ë hesi jöho no bogo jajivo'ejo jemë mami'e hejë'ego. Mami'e hejë'ëro ëhu'ëro iae garoma uvarujeje: Badare majaho vajiohu'e aehu vahi'e rovajëhi ëhi ma-majioho rue'a'ajëjo. ³ Keriso bogo ma uehorovarue ariböviohuro uvoruomo'iramoma: Jaruvoho muorovoho bövioho bise'oho bogojio'i ma-mae raromaruë uvo'iramoma evare God-are i'uohuro ma-majioho rueroma ë aribövioho ijumëvo'ë'e. Dë'e magonahehu ma-majioho hara'uaruëhi ë aribövioho ëhi ma-majioho

ijumëvo'iramu aho bogo huruomo'ë'ö. ⁴ Röhu nasi ö mueno'e jemë bogo ëhioho jëve. Jemë bogo ramoramoro ho raromaruje. Ramoramoro ramomo'ibejarije jemë ga'ibejarije ë majaho vajiohunö'e ma-majioho rovego tiö'ibejarije. Röhu jemë bogo ëhioho jëve. ⁵ A'i jemë ae aho'obëhe aj'i'e majare raromaruje aribövioho jëve. No bogo vahi'e ramoramoro raromaruje aribövioho javue. ⁶ Ëhuni a ioro'ioerehu mamomorö'öjaruëhioho no bogo ëhioho mamomorö'ö'i a'i nune jioromo simanoho avoho uehorovo'ejo. ⁷ Aehu momorö'öjë'iroho vahi'e momorö'öruomajeje. Vörö'e jovo ue'ahamu simano sisërëjëvë'oho ëhi jïë'oho vahi'e ë'oruomajeje. ⁸ Vahi'e ëhi ë'oruomajeje röhu no maja'ere raromaruje aribövie javuë'ego ëhuni nosi simanoho avoho uehorovoromo muoho avoho vaeromo ehuro biririvoromo riravo'ejo. Muorovo majare biririvoromo riravo'ië'iroho biriri'e niögoho vinebinö io'amoruomajeje bijo vösöho ë namiromo sugigivego biririvoromo riravo'iröhëro. Keriso-are ariböviehu ëhi biririvoromo riravo'ië'iroho noro Keriso mae uehorovoromo a ioro'ioero dë vövöbajo'ëro rajëhi'ejo ehuro biririvoromo riravo'iröhëro. O muorovo majare aehu biriri'e bosö simanore io'amoromo biririvaruëhi noehu ëhi biririvo'ië'iroho uvo'ejo: Ijonö God-ro baejavuoromo no maro bamavuo'ajë uvë'e raromo'ejo ehuro biririvavuoröhego. ⁹ God-ro hesinö baejavuadeje bogo nosi sisëhuni i'ue bojamui'iröhëro. Hu bogo ehunioho baejavuadeje. A'i huro no baejavuadeje nosi Bada Iesu Kerisoro nosi sisëho ajamuij'ëro maro bamavuo'iröhëro. ¹⁰ Huro nosi sisëho ajamui'i noni guomadeje ehuro ave sa'are biririvoromo raromë'oho o vuovavuë'oho no hu'o gemuoro raromo'iröhëgo. ¹¹ Ëhuni ajamirovoromo jö mae majahirovarujëhi ëhi ë'orego ehuro avoho biririvëvoromo mae jëvobe va'iro.

Paul-hu ijo tugoho'i jajivade jöhoje.

¹² Röhu nasi ö mueno'e jö göho majëhi'ie'ö. Ëjöho bogo nu huë'e jöho jio'i ma-sanu'e jöemuje. Aehu jemesirire mu börömo vaeromo Badare ihore jemë muebejëvoromo jögoru majëhijaruje ë aribövioho jemëro mae uehorovëvore. ¹³ Mae uehorovëvoromo jabesi muoho uehorovoromo rajëhi avohore. Röhu iro muorovo'oho nadi vae'i ma-raromoro.

¹⁴ Röhu nasi ö mueno'e ave muohu'o vaere. Mu bijöni'e aribövioho uëvego mue vaej'e raromo'i. O juhuoni'e aribövioho ajëmego dë vövöbajo'oho mae jëvo'iro. O darugo u'uhëvë'e aribövioho ajëmego biririvëvo'i. Ae aho'obëhe jabesi öroro ma-sanu'e jöhemu majëhire. ¹⁵ Avoho mueberovore. Aehu mu sisë vaejëvë'oho nadi mana mu sisëho vaere. A'i ae göëro göho huë baerovo'i o a ioro'iorohu'o huë baejëvo'i ë'ö gare.

¹⁶ O vae majae nimorohonövore. ¹⁷ God-are öroro jöe majahiemu majahinövore. ¹⁸ Mu diehi rovë'oho hesi öroro huë mae uanövore rabëni Iesu Keriso-are aribövioho jemëro muoho ëhi vaejëro God-ro nimë'e jiaje.

¹⁹ God-are Aru'ahoho vëninö'e ravajoho nadi duohore. ²⁰ He'irarije aëro uëvego: God-are Aru'ahëro jöho bojemi'ego majëhijajë uëvamu hejë'oho nadi bijönimore. ²¹ Nadi bijönimo'i a'i jöho jemesi simanëro mevoromo gare diho mae jiego diho sisë jiego. O mue aho'o ëhi mevo

gare. Mae jiamu gavë'iroho avoho ma'enore. ²² Sisë jiamu gavë'iroho aho'o vuonugore.

²³ Röhu God hu ajamuego huë mae raromarue ahoje. Ëhuni na nege huro ajëmego jemëro uehore aho'obëhe ma-maëremu hesi örire gemu bojami'irarijego. Göho na nege God-ro jemesi aru'ahe dë vövöbajo'e sino haho'e aho'obëhe muebejëvobe va'ojöro ëhuro nosi Bada Iesu Keriso rovë'iroho jemë jö sisëho bogojëvo'i ma-maemu jëvo'iröhego. ²⁴ Iae huro ëhi ajëmi'ë'e rabëni jemë hesinö rinëgade aho God hu nue gemu uehorovaje aëro jië'ëro.

²⁵ Nasi ö mueno'e jemëro nosi jöëni ëhu'o parie vaenövore.

²⁶ Christian aganehu jejamirovaruëhi aho'obëhe ëhi jejamirovore.

²⁷ Röhu Paul naro Badare ihore ave jöho darugo'o majëhiromo uëve. Ave naehu jajivode jöho adahego Christian aganoho aho'o heruomo'i.

²⁸ Nosi Bada Iesu Kerisoro huë baeromo jemë ajëminövo'ë'e. Ahia mino'e.

2 THESSALONIANS

Paul'o hesi ariböviohu'o jabuhu Thessalonica amore raromarue ekaresia jabesi örire jejëmijare jöhoje.

¹ O asë'e Thessalonica ekaresiaho Paul naro Silas-ro Timothy-ro ëhi noro jemesi örire jejëmijö jemë God nosi Vavu hesi o Bada Iesu Keriso-are ekaresiae jëvë'ego.

² No nague God Vavuohu'o Bada Iesu Keriso'o huë baeromo ajëmijego maro raromo'irarijego.

Bada Iesu sa'are rovego evare nosi mu mae o sisë jiego God-hu mevo garöhe jöhoje.

³ Nasi ö mueno'e noro jemesi jöëni God mae uanövo'ejo. Èhi jië'oho iae maeje. Rabëni. Jemë God mae uehorovobe va'ojuvo va'o ijönö börömo mae uehorovobe va'arujeje. O jemë ae gemu gemu aho'obëhe rajahirovobe va'ojuvo va'o ijönö börömo mae rajahirovobe va'arujeje.

⁴ Èhuni jemëhu mu ma vaejaruje jöho noro baeromo God-are ekaresiae gö gö nimorohë'i majëhibe jijiharueje. Majëhiromo uëvarueje: Aëro Thessalonica ekaresiaho sisë vaejëvego huë vavaene börömo mae baerumaje höjo. Èhi'oromo bogo u'uho'i biririvoromo Keriso mae uehorovoruomaje höjo. No jemesi jöho ëhi atobe jijiharueje.

⁵ Jemë huë vavaene baeromo röhu biririvoromo Keriso mae uehorovego noro ëho garomo uvarueje: God-ro nosi muoho avoho mevo göromo diehi jië'e mu vaejarëhi manaho ëhi gemuoho bojamui'ajëjo. Iae huro jemë uë'a'ajëjo: Jemë mae jëvaje naehu börömo namiromo muebejaje öri ari'oro rojo raromohëjo. Èhesi bëhoho avevejö'e God-are öri ari'o hesi mu ri'öröhego jemëhu nimoromo vavaeni baejarujohuni na ëhuni uëve. ⁶ God-ro mu maemu vaeromo jemesi örire huë vavaeni bojëmarue aribövioho mana huë vavaene bojëmi'i ⁷ huë vavaeni baejaruje aribövi jemesi örire mana huë sanue bojëmiromo no'o ëhi bojamui'ë'e. Bada Iesuhu nosi nunire rueröhe majaho rue'iramu evare God-ro ëhi jië'e muoho vae'ë'e. Bada Iesuro hesi darugo'e anera ömo'ömohu'o gemu mae ö'idöre jioromo ⁸ vëni hödu'o rueromo God bogo uehorovoromo nosi Bada Iesuare jö ma bogo ejaharue aribövioho i'ue mana bojëmi'ë'e. ⁹ I'ue mana bojëmi'iramu jabumë Badahu jiajiroho bogo raromo'i hesi ajil'eroho darugo'eroho bogo raromo'i rori'o va'oromo ioro'ioremu sisërë va'ë'ö. ¹⁰ Badahu rueröhe majare evare ëhioho jio'ë'e. Iae hu rue'ë'e hesi aribövie aho'obëhe noro hesi ihoho döro bamoröhego hu mae uehorovarue aribövioho noro hu rajahiruomoröhego. Jemë'o ëhi ë'a'aruje ë hesi bëhoho noehu majëhijare jöho jemëro mae uehorovë'ëro jëvë'lëro.

¹¹ Badare ihoho ëhi döro jioröhego ëhuni noro vae majae jemesi jöëni nosi Böröme God ëninamiromo uavarueje: God jero Thessalonica aribövioho uëvane höjo jabumë jasi aribövie jioromo mae jëvojöro. Èhuni ajëmego jaehu uëvane ëhi jië'e aribövie jioruomoi'irajo. Jasi darugohuro ajëmego jabuhu mu ma vae'i nimiruoho aho'obëhe vaeromo Keriso mae uehorovoromo vaejarue muoho aho'o vae barë'irarëjo. Noro ëhi God ua gavarueje. ¹² Jemëhu ëhi jië'e mu vaejè'oho ëhuro

nosi Böröme God'lo Bada Iesu Keriso'lo huë baejëvoromo jemë ëhi ajëmi'iramu ëhuro nosi Bada Iesuare ihoho böröme jio'li jemëro hesiro ajoho bae'a'aruje.

2

Mu ma ijumaje aehu ma-va'orahoro rueröhe jöhoje.

¹ Nasi ö mueno'e nosi Bada Iesu Kerisohu rueromo uövüego noehu hu jiajire gagovoromo gemuore raromo'iröhe jöho noro majëhi'ie'ö avoho uehorovo'irarijigo. ² Aehu sarerëmiromo uëvaruoho: Badare majaho mami'e rovë'e hö uëvaruoho ëho heromo nadi ma-burëroho tiöromo uehore gö gö baere. Ehi jië'e jö rovade hesi bëhoho nani aëro sarerivoromo uëvareje: Ejjöho God-are Aru'aho hesiro baeromo majëhijaruëjo. O nani aëro jabesi ëma uehorovoromo majëhijareje. O nani aëro sarerivoromo uvareje: Paul naro ëhi jië'e jöho jajivoromo bamëhode höjo. Nani ëhuni uvarujeje: Badare majaho mami'e rovë'e höjo. ³ Ae göehu ëhi jië'e jö atoromo sarerëmi'i ë'lo gavaruoho bogave ejëho'irarije. Badare majaho bogo ëma rue'i a'i ë hesi urimo ae aho'obëhe dë vövöbajo'e aho'lo huotorovoromo God bijönimoromo hu'lo muorovo'ië'iramu God-are mu ijumaje ahuro va'orahoro rueromo bövie nami'ë'e ijönö sisëë va'iröhëro. ⁴ Bövie namiromo jöe majahuiromo uö'ë'e: Jemëhu bövie bise'e aho'lo God höromo rajëhijarujo vuonugo'i na gemu börömo ho hö uehorovevorëjo. Ehi uöromo God-are osa börömore va'lo hiromo majahuiromo uö'ë'e: Aviae na God jevajëjo. Ehi ë'iramu ë hesi ijönö Badare majaho rue'ë'e.

⁵ Jemë'lo uehorovore. Naro jemë'lo hiromo ë hesi jöho uë'lego henövarijeje. ⁶ God-are mu ijumaje aho u'emu rue'ë'e. Avevejö'oho ë ia hesi mu sisëho ahë'jeje. Diehi'oromo ahajoho iae jemë gavarujeje. E'mu sisëho ahobe va'ojuvo majae eni jio'iramu God-are mu ijumaje ahuro va'orahoro rue'ë'e. ⁷ Röhu avevejö'oho hesi mu sisëho Satan-ro gurihoromo ae uëvego vaejarujeje. Vaejigo mu sisë ahaje ahuro ahobe va'ojuvo rori'lo bava'iramu evaroho sisëho bogo aho'ë'e. ⁸ Sisëho bogo aho'iramu evare God-are mu ijumaje ahuro va'orahoro ro nami'ë'e. Va'orahoro ro nami'iramu Bada Iesuro rueromo jö'lo ögëro hadivoromo ajoho röjahi'iramu sisëë barë'ë'e. ⁹ Röhu urimo Bada bogo rue'iröhevare evare God-are mu ijumaje ahuro Satan-are darugoho barueromo ae sarerëmiromo darugo'e muoho röjëhi'ë'e aëro ëho garomo tiöromo sisë'i uehorovoromo uvoröhego: God-are mu ijumaje aho mae höjo. ¹⁰ Darugo'e muoho röjëhiromo sareri'e mue bövie bise'e vaenövo'ë'e sisëre va'iröhe ariböviohuro garöhego. Jabuhu sisëre va'oröhe hesi bëhoho urimë'i Keriso-are jö maho bogo e'i bijönimoruomadeje. Jö maho ejaho'ibejo ëhuro iae maro va'oruomo'ibejo. Röhu bogo ejarohuro ëhuro sisëro va'lo hesi jioruome. ¹¹ Jö maho bogo ejahego ëhuni God-ro sareri'e jöho jabesi dë vövöbajo'ere bojëmijajeje jaburo ë jöho mae uehorovoruomoröhego. ¹² God-are jöho bogo ma uehorovo'i ma-mu sisëmu nimë'ëro ëhu'ëro jabumë aho'obëhe God-are nunire riravo'iramu huro uë'ë'e: Mu sisë vaejë'e aribövie jëvajëjo.

Birivoromo riravo'iröhe jöhoje.

13 Röhu nasi ö mueno'e jemë Badahu rajëhijaje aribövioho jëvo'ego noro jemesi jöëni God mabëhe uanövo'ejo. Ëhesi bëhoho urimë'i sa'a bövi bise'o bogo bamadevare evare God-ro jemesi jöëni uehorovoromo uvadeje: Naro baejëvoromo maro bamëvo'ejöjo. Nasi Aru'ahohuro jabesi dë vövöbajo'o ho mae avohëho'iramu jaburo Keriso-are jöho mae uehorovo'iramu ëhuro ëhi ë'ejöjo. 14 God-ro ëhi uvë'ëro noro Keriso-are jö maho jemë majëhijamu God-ro uëvadeje: Ëjöhö jemëro mae uehorovorego naro baejëvoromo maro bamëvo'iröjo ëhuro jemesi Bada Iesu Keriso-are aji maho baejogo ma-mabëhe jëvo'iröhe höjo. 15 Nasi ö mueno'e ëhuni biririvoromo riravore. Biririvo riravoromo noehu jö'ehu majëhiromö röhu ijönö surire jajivoromo röjëhijare jöho ëhuremu ma'ënoromo uehorovore.

16 Jemëro ëhi ë'irarijogo no nague nosi Bada Iesu Keriso'o God nosi Vavuohu'o jaburo niö'iro ajëmijöro. Ëhesi bëhoho urimë'i God-ro no uehorovavuoromo huë baejavuoromo no ioro'ioeremu birire bojamuiromö ajamuij'ëje noro nimorohë'i uvoröhego: Maro javuo'ajëjo. 17 Ëhuni no nague jabumëro jemesi dë vövöbajo'o ho biririvëhego jemëro bogo juhuonivo'i mae riravoromo mu maemu vaeromo jö maemu atönövo'irarijogo.

3

Thessalonica ekaresiaehu Paul-mesi jöëni God-are örire ëninami'iröhego Paul-hu jajivade jöhoje.

1 Nasi ö mueno'e nasi ijo tugoho'i jöho jajivo'ië'ajoho gare. Jemëro nosi jöëni God ua garego ajamuego biriri'övarue aribövi sisëho no bogo baejavuoromo sisë vaejavuo'iro ë hesi bëhoho ae göëro göëro Keriso-are jöho bogo ma uehorovarue jiaje.

3 Röhu Bada hu bogo sareri'oho jio'i maëro jië'ëro huro jemë birire bojëmiromö avoho muebejëvo'ë'e A Sisëho bogo baejëvo'iröhego. 4 Röhu huro no uehoro maho bojamuego jemesi jöho mae uehorovoromo uvarueje: Jemë nosi jö ejahuarujoho iae ëhi ejahuobe va'a'arujëjo.

5 Röhu no nague Badaro ajëmijogo jemesi dë vövöbajo'ere herovoromo uvo'irarijogo: God-ro mabëhe uehorovavuae hö uvoromo Kerisohu vavaeni baeromo biririvadëhi ëhi biririvo'irarijogo.

Övehu biririvoromo bövi bise'o baeröhe jöhoje.

6 Nasi ö mueno'e noro Bada Iesu Keriso-are ihore ave jö börömo ho majëhi'ie'ö. Ga'irarije Christian aganoho rahuro noehu bojëmijamu hejarije jöho bogo ejahuo'i mue bijönimoromo ëma raromamu gëvë'iroho gorëvore. 7 Iae jemë'o gavaruje. Noehu ë'arëhi jemë'o ëhi ë'ibejarije iae mae jio'ibejo. Noehu jemë'o raromarevaroho muoho bogo bijönimareje. 8 No jemesi ioho bövioho bise'oho bogo ëma ujuoho'i imoromo ujuohonövareje. Sisone vahie majae nosi övëro biririvoromo i'u'e mu börömo ho vaemu vaebe va'oromo nosi manaho birohoromo iruno'oho bövioho bise'oho imonövareje huë vavaene jemesi örire bojëmijöëni. 9 Noro uë'ibejo: No God-are mue vaejarue javuae bövie bise'e ma-suvuore bojamuihë uë'ibejo iae mae jio'ibejo. Röhu noehu

bogo ëhi ë'are hesi bëhoho no naguadeje jemëro ga'irarijego noehu nosi övehu biririvoromo iruno'e bövie bise'e mana baejaruoho garomo ëhi gemuoho ë'irarijego. ¹⁰Noehu jemë'o raromarevare evare ave jögoroho majëhiromo uëvareje: Ae rahu bijönimoromo mu bogo vaejë'oho ioho nadi i'imamirëjo.

¹¹Noehu ëhi jajivarue hesi bëhoho no hejarueje uövuego: Jemesi a ioro'iorohuro muoho bijönimoromo ëma raromoromo ae gö jabesi muoho ëma ahobe jijiharue höjo. ¹²Ëhuni noro ave jöho bojëmiromo Bada Iesu Keriso-are ihoro majëhijö. Ëhi jië'e aribövioho uëregö ma-u'emu taemo raromoromo jabesi övëro biririvoromo bövioho bise'oho bae'iro.

¹³Röhu nasi ö mueno'e jemëhu mu ma vaejarujoho nadi u'uhore. ¹⁴Ae rahu ave nosi surire jö bogo ejahuë'oho ëhi jië'e ahemu ga avohoromo nadi gavanovorego javoje bae'iro. ¹⁵Röhu nadi uvore: Hu no'o muorovaje ae hörömo nue huodivo'i a'i uvore: Nosi öe hörömo jögore majahijego avoho hi'iro.

Ijo tugoho'i jajivade jöhoje.

¹⁶Bada huë mae bojamuaje ae jië'ego no nague jemë mae o sisë raromë'oho huro majae ëhi huë mae bojëmi'iröhego. Huro ae aho'obëhe jemë'o jio'ë'e.

¹⁷Paul naro nasi övëro jajivoromo jemesi örire jejëmiromo bame. Na surire jö jajivë'iroho nasi övo jajoho ëhi jajivajeje jemëro garomo uvo'irarijego: Paul-ro bamahuë'e höjo. Naehu jajivaje hesi nu ano'oho ëhije.

¹⁸Nosi Bada Iesu Kerisoro huë baeromo jemë ae aho'o ajëminövo'ë'e. Ahia mino'e.

1 TIMOTHY

Paul-hu Timothy jejamade jöhoje.

¹ O asë'e Timothy Paul naro ave jöho jasi örire jajive. Na Iesu Keriso-are apostle jeve ë hesi bëhoho baejavuoromo mare bamavuafe aho God'o noehu ga'i muebejarue aho Iesu Keriso'o ëho jaburo ë muoho bojemë'ëro ëhu'ëro.

² Naro Timothy jasi örire jejamije. Naehu Keriso mae uehorovajëhi jero nasi ijore ijore juvoromo Keriso ëhi mae uehorovanuëro javë'ëro ëhu'ëro ja nasi harihu mae jave. Na nege God Vavuohu'o nosi Bada Iesu Keriso'o ëho jaburo jabesi vavaenimoromo ajamijego maro hi'iranego.

Timothy-hu sareri'e jö ahoröhe jöhoje.

³ Naehu ja'o hiromo Macedonia sa'are rue'irögoro jasi örire jö bojamijode ë jöe gemuoho majahi'irögoro ë'e. Ephesus amoro ëhi hiromo a ioro'ioroho darugo'o majëhiromo uëne: Sareri sareri'e jö röjëhijarujoho vuonugohëjo. ⁴ Hijo miono'o jabesi vavu gö gö jabesi ihe gö gö mevobe va'emu va'arujoho a mami jöe gö gö ëma uehorovoromo atarujoho ëhi jië'e jöemu uehorovarujoho vuonugohëjo. Ëhi uëne. Ëhi jië'e jöemu uehorovë'ohuro ëhuro aëro jöho ma-berohemu beroho'i God-are muoho bogo avoho baejarueje ë hesi bëhoho God-are jöhuremu mae uehorovoromo ëhuro ë muoho baejaruëro jië'ëro. ⁵ Jabuhu ëhi jië'e mu vuonugojöro jaehu majëhi'iranego uavode hesi bëhoho na negadeje jasi ariböviohuro bogo ma-döëremuoho aho uehorovëvo'i a'i mu maemu vae'i nimoromo dë maemu jëvego herovoromo uhohu'o Keriso-are jöho mae uehorovoromo ëhuro aho avoho huë baejëvoröhego. ⁶ A ioro'iorohuro ëhi jië'e mu ma hesi öroho garaeromo aruëre anumëre ëma jijihoromo jabesi jögoroho ëma berohemu beroharueje. ⁷ Jöho ëhi berohoromo nimoruomajeje mu vaeröhe jögoru hesi öri röjëhijarue ae jioruomo'iröhëro. Ëhi nimoruomajeje röhu jabumë mu vaeröhe jögoru jö atarue ë hesi bëhoho bogo avoho gavarueje. Bëhoho bogo gavë'e ëma biririvoromo jöho majëhijarueje.

⁸ Iae no gavaruoho mu vaeröhe jögoru hesi bëhi aehu avoho röjëhijë'oho ë jögorohuro ëhuro marëjavuo'ë'e. ⁹ No ave jöhëmu uehorovo'ejo. Mu vaeröhe jögoru bamade hesi bëhoho bogo aribövi mahunioho bamë'eje. A'i jögoru ahoruomajohuni hia'i biriri'övoromo jö bogo eroharuohuni o God bijönimoruomajohuni mu sisë vaejaruohuni o God-are mu ijumoruomajohuni sa'are mu sisëhemu uehorovorouomajohuni o vavu muo'amaruohuni vëmu muo'amaruohuni o a ioro'ioro muo'amaruohuni ¹⁰ o a'o magonaho'o öehu jijihanovaruohuni o a'o a'o sihami ovaruohuni o ae gö vajiohehu guduamo ujuoho va'aruohuni o sareri sareri'e jö ataruohuni o court-re riravoromo sareri jö majëhijaruohuni o mu sisë rabe rabe vaeromo God-are mu ma aharuohuni ëhi jië'e ariböviohuni jögoroho bamë'eje. ¹¹ Ëmu ma jö hesi bëhoho God huë mabëhe hijaje a hesi aji röjahuijaje jöhoje. Ëjö hesi muoho huro na bojemadeje.

God-hu Paul-ni vavaenimoromo ajamamu Paul-hu huë mae baejade jöhoje.

¹² Naro Iesu Keriso nosi Badare örire huë mae uave rabëni huhu nasi muohuni darugo bojemadoghuni o huhu na mae uehorovevoromo hesi mure bamevadoghuni. ¹³ Urimo naro Keriso-are jöho agoromo hesi aribövioho sisë vaejëvoromo biriri'övoromo hesi muoho ijumo'i ë'o gabe rovodeje röhu huro hesi muoho iae bojemadeje. Huhu nasi jöëni ëhi vavaenimade hesi bëhoho naro hu bogo mae uehorovoromo nasi mu sisë hesi bëhoho bogo gavë'ego ëhuni ë'adeje. ¹⁴ Vavaenimoromo nosi Badaro huë baejeveromo börömo bëhe ajemiromo uehoro maho huë maho bojemijadeje ë hesi bëhoho no Iesu Keriso'o gemuoro bimuvë'ëro javuë'ëro ëhi jië'e uehoro maho huë maho baejaruëro jië'ëro. ¹⁵ Iesu Kerisoro sa'are rovadeje sisë aribövioho no baejavuoromo maro ramuo'iröhëni. Ëho jö maego ae aho'obëhe mae uehorovë'o ho iae maeje. Sisë aribövi baejavuo'i rovadoho a ioro'ioroho ma-bisemu jëvanovo'i na gemu sisë maho jevë'eje. ¹⁶ Sisë mae jevamu röhu Iesu Kerisoro nani vavaenimadeje. Nani vavaenimade hesi bëhoho ijönö hu mae uehorovoromo ioro'ioremu mae raromo'iröhe aribövioho aho'obëhe jaburo uvoruomorohego: Urimë'i Paul-ro mu sisë bëhe vae'i hijade höjo röhu Iesu Kerisoro hesi sisëho garomo huni vavaenimoromo hesi vöröho ma-taemorovobe rovade höjo. Ëhu'ëro no garomo uvarue höjo: Kerisoro nosi sisëhu'o garomo noni ëhi vavaenimoromo hesi vöröho ma-taemorovaje höjo. Ëhi uvoruomorohego ëhuni huro nani vavaenimadeje. ¹⁷ Ëhu'ëro God hu mabëheje. Hu böröme namiromo bövie bise'e muebebe rovadoho ëhi muebe'amobe va'ë'e. Hu bogo guomo'i ioro'ioremu jio'ë'e. Hesi nu ano'o ho no bogo gavarueje. Hu gemu börömoheje. Hu ëhi jië'e aëro jië'ëro iho maho aji maho hesirohemu jiemu jioje va'ë'e. Iae mae.

¹⁸ Nasi harihe Timothy na ave jöho bojamiye. Urimë'i aëro jöe God-aro baeromo jasi mu jögoroho majahuijumu ja'o na'o hejareje. Ëjöe gemuoho naro ja uave ëhuro jabuhu majahuijare jöhemu uehorovoromo biririvoromo Satan'o muorovoromo jö sisëho ahonövo'iranego. ¹⁹ Satan'o muorovoromo jö sisë ahë'iroho Keriso mae uehorovoromo dë maemu jioromo ëhuro biririvoromo ëhi jië'e muoho vaene. A ioro'iorohuro bogo ëhioho dë maho jio'i a'i dëre herovoromo uehorovoromo uvareje: Ëmuoho sisë hö uvë'i röhu ëma ömareje. Ëma ömë'ëro ëhu'ëro Keriso mae uehorovare muoho maioroiore gemu ijumoromo boremi'ö barëjareje. ²⁰ A ioro'iorohu'o röhu Hymenaeus'o Alexander'o ëhi jië'e mu sisëho vaejë'ejö. Ëhi'amu naro Satan-are övore bojamijodeje huro baejëvego jaburo a'ororomo God-are ihoho bogo ijumorohego.

2

Ekaresiaehu diehi'oromo God uvene aho röjahiröhe jöhoje.

¹ Röhu jö göho. Jö majëhi'irodoho ave jöho urimo majëhi'ie'e. Ja'o jasi ariböviohu'o jemëro ae aho'o jabesi jöëni uehorovoromo ëninamijë'i böviëni bise'ëni ua gavë'i huë mae uavë'i God-are öroro jöe atonövore. ² Ua gavego ave sa'are a masijohu'o jabesi bëhire riravoromo ave sa'are mu muebejarue ariböviohu'o huro ajëmege jaburo no avoho

muebejavuego iro muorovo'oho bövioho bise'oho nosi öriroho bogo rovego no huë mae raromoromo God gemu uehorovoromo mu maemu vae'iro. ³ Ëhi ua gavë'oho mae jiego God-ro nimajeje ë hesi bëhoho hu baejavuoromo mare ramuaje ahuro jië'ëro. ⁴ Hu nime sa'ae dinö'e dinö'e raromarue ariböviohuro Keriso-are jö maho avoho uehorovoromo ëhuro ijönöho i'uoho bogo bae'i maro va'oruomorohego. ⁵ Ae aho'obëhe ëhi mare javuorohego God-hu nimaje hesi bëhoho huro gemuëro sa'ae dinö'e dinö'e raromarue aribövioho muebejavuajeje. Ae gemu Iesu Kerisoro God'o nosi ririre öroho avohahuajeje. ⁶ Öroho avohahuajëro jië'ëro ae aho'obëhe noni guomorovadeje ëhuro no sisëhu tövavuadoho jiovahuego no ae aho'obëhe mae raromo'irohego. Majae eni jiamu noni guomade hesi bëhoho noro ëho garomo mae uvorohego: God-ro no ae aho'obëhe maro ramuo'i nimajëjo. ⁷ Ëjöhö naro ae majëhi'irodego ëhuni God-ro apostle bamevadeje. Na bogo sarerami'i jö mae majahije. Huro apostle bamevadeje naro sa'a ioro'ioro rajoho röjëhiromo uë'irodego: Ave jöhö mae jiaje mae uehorovorëjo.

⁸ Ëhuni na nege dinö'e dinö'e gagovoromo God rajahijë'iroho ama'oho jaburo nu huë'e iro muorovo'e jöhö bogo uehorovo'i uehoro maemu baeromo God-are örire jöe atonövoröhego. ⁹ O na nege magonahoho jaburo simane mae uehorovoromo niögöho avoho ruhoruromo'irohego. Avoho ruhoromo bogo sinoho nimorohoromo moni böromöho bu'öromo niögöho nieniaho bövioho bise'oho aho'obëhe imo'amoromo io'amoromo sinoho simano uoho avohorovo'i a'i uehorovo avohoromo niögöho io'amoromo ¹⁰ mu mae vaeröhego nege. Magonahehu majëhiromo uëruomë'oho: No God rajahjarue magonahe javuajë uvë'oho jabuhu ëhi jië'e mu vae'iröhoho iae maeje. ¹¹ Gemuore gagovoromo God-are jö hejë'oho magonaho ömo'ömohuro jörume mataemo raromoromo ma-jöhuremu heruomo'i. ¹² O magonahehu simano vaeromo ama'i jabesi örire church-re jö röjëhijë'oho ëhi jië'e muoho Paul naro ahajeje. Jörume raromë'oho iae maeje. ¹³ Ëhesi bëhoho urimöho God-ro aevo'ioho Adam bamoromo evare ijönö Eve bamadeje. ¹⁴ Satan-ro bogo Adam sarerami'i a'i magonahoho sareramamu huro uvadeje: Mae höromo God-are jöhö ahahadeje. ¹⁵ Iae ëhi jiajeje röhu magonaho ömo'ömehu God-are örire mae uehorovoromo ae huë baejëvoromo God-hu nimaje muohemu vaeromo ma-taemo raromoromo ëhi jië'e mu ma birivoromo vaejë'oho God-ro ajëmi'ë'e. Ajëmiromo gërohe jabuhu aboji harihu'o rahamu gëvë'iroho ëhi jië'e mu ma vaejarue magonahoho baejëvoromo maro bamëvo'ë'e.

3

Ekaresia muebejëvarue aribövi jabesi jöhöje.

¹ Aëro uvarueje: Aehu ekaresia muebejëvo'i nimë'oho mu mae bae'i nimoruomaje höjo. Ëhi atoruomaje jöhö iae maeje. ² Röhu ekaresia muebe'amo'ië'iroho ëhi ë'ië'e a hesi ihoho ma-maemu jio'iro. Magonahe ma-gemu masu'iro. Simane sasohoromo mae uehorovoromo taemo hi'iro. Ae osare söjëvo va'oromo nihudëgaje ae jio'iro. Jöe avoho röjëhijaje ae jio'iro. ³ Nadi vörö'e jovoho iromo simanoho sisërë'iro. Nadi vörö'irae'i ma-u'emu jö sanu'e majëhiromo muoho vae'iro. Nadi iro muorovo'oho vae'iro. Nadi moniemuoho uehorovo'iro. ⁴ Hesi osare

raromarue aganoho avoho muebejëvo'iro. Avoho muebejëvoromo aboji harihu'oho avoho rōjëhijego jaburo hesi jōho ejahoromo mu maemu vaeruomo'iro. ⁵ O hesi osare raromarue agano bogo avoho muebejëv'oho hu diehi'oromo God-are ekaresiaho muebejëvo'ë'e. Bogo eni jio'ë'e. ⁶ O i'e aevoromo Keriso mae uehorovade aho ekaresiaho nadi muebejëvo'iro. I'e aevoromo mae uehorovade aehu ekaresia muebejëv'oho nani hu hesi sivue uehorovoromo uvo'ë'e: Na a böröme jev'ego ekaresia muebejëvaje mure bamevare hōromō Satan-are guare beva'ë'e. ⁷ A'i God-are jō bogo hejë'e ariböviehu mu bae'irōhe a mae uehorov'oho ēhi jië'e ahuro ekaresiaho muebejëvo'iro. O hesi ōrire bogo ma uehorov'ë'e ekaresia ēma muebejëv'oho hesi ihoho sisēr'iramū Satan-are guare be'ë'e. Ekaresia muebejëvarue aribövi jabesi jōho ēhije.

Ekaresia ajëmarue aribövi jabesi jōhoje.

⁸ Rōhu ekaresia ajëmiarue aribövi jabesi jōho ēhi gemuohoje. Taemo raromo'iro. O nadi jōho huotohuotovo majëhi'i. Nadi vōrō'e jovo bövioho ue'aho'i. Nadi moniemuoho uehorovo'iro. ⁹ God-hu rōjahuijade jōho uhohu'o mae uehorovo'iro. ¹⁰ Mure bamëvo'ië'iroho urimo jabesi muoho diehi jiajoho gëre. Eni jëvamu gëv'oho evare muoho aevoromo vae'iro. ¹¹ O jabesi magonahoho ēhi gemuoho mataemo raromo'iro. Nadi ae gö jabesi jō sisëho atemu ato'irōgoro a'i simane sasohoromo mue aho'o avoho mueberuomo'iro. ¹² O ekaresia ajëmiarue aëro magonahe ma-gemu masuromo aboji harihu'ohu'o jabesi osare raromarue agano ioro'iorohu'o avoho muebejëvo'iro. ¹³ Ekaresia mae ajëmijë'oho jabesi ihoho mae jëvo'iramū ēhuro biririvoromo Iesu Keriso mae uehorovarue jōho ae ma-sama'e majëhinövo'ë'ö.

Paul-hu jōgoru Timothy-are ōrire jajivade hesi bëhohoje.

¹⁴ Na nege ma-burëro ö'irovo. Rōhu naehu jajivaje hesi bëhoho ¹⁵naehu örisanuovoromo bogo vejö'oho ö'amū gevë'oho jero ë jōho adahoromo uehorovoromo uvo'iranego: Noro ēhi'oromo God-are agano ömo'ömohu'o gemu mae raromoromo muoho avoho vaejarue hōjo. Iae God-are aganoho no daruge jië'e ae God-are ekaresiae javue. God-are ekaresiae javuë'ëro dioho'o bönu'o javuo ma'enegro bibivajëhi noro God-are jō maho ēhi ma'eno titimoromo avoho muebejëgo ēhi jiemu jiajeje. ¹⁶ God-hu rōjahuijë'ëro noehu mae uehorovarue jō hesi bëhoho börömo maeje. Ae aho'o iae no ēhi uehorovarueje. Ejō hesi bëhoho aviaeje.

Hu a sine jioromo a nuniro rovade hōjo.

Hu mae jiaje jōho God-are Aru'ahohuro hu ajamiromo no rōjahuijade hōjo.

Hesi nu ano'oho aneraëro gavare hōjo.

Hesi jōho sa'ae göro göro aëro aevoromo hejare hōjo.

Hesi jōho ave sa'are ariböviohuro mae uehorovare hōjo.

Ö'idöre ajiomoromo hesi ajoho baejade hōjo.

4

Ijonö aehu Iesuare jō ma vuonugo'i sareri'e jō majëhi'irōhe jōhoje.

¹ Rōhu God-are Aru'ahohuro sama'e uövuë'eje: Majae ijönö aëro God-are jō mae uehorovaruocho vuonugo'irōgoro Satan-are

aru'aho ömo'ömhuro sarerëmi'iramu mae höromo jabesi jö sisëho ejëhoruomö'ajëjo. ² Satan-are aru'aho sisëhuro jabesi sareri'e jöho bojëmi'iramu sareri sareri'e ariböviohuro jöho baeromo sisë diehi diehi vaejaroho jabesi dë vövöbajo'o uhuroho bogo herovo'i ae ma-sarerëmiromo majëhiruomö'ajëjo. ³ Majëhiromo uëruomö'ajëjo: Nadi magonahoho masu'amorëjo. Ie gö gö nadi ue'ahorëjo. Èhi uëruomö'ajëjo röhu ë iohu'o God-ro bamadeje ëhuro Keriso mae uehorovoromo hesi jö ma gavarue aribövioho noro hesi örire huë mae uaromo ë ioho ue'aho'iröhego. ⁴ Èhesi bëhoho God-hu iruno'o bövi bise'o bamadoho iae mae jio'ame. Èhuni no bogo uvo'ejö: Sisë höromo juahovo'ejö. A'i noehu i ujuohoromo God mae uaromo ë i ijë'o ho maeje. ⁵ Èhesi bëhoho no God-are jö adahoromo gavaruohuro uvarueje: God-ro bövioho bise'o ho bamade höjo. Èhi uvoromo hesi örire jö atoromo ijë'o ho ëhuro uvarueje: God-ro bamahuë'ëro ijaruoho iae mae höjo.

Timothy-hu Keriso-are mu avoho vaeröhe jöhoje.

⁶ Èjöho Christian aganoho majëhijego heruomö'iro. Ja ëhi ë'ë'o ho Iesu Keriso-are mu vaejanue a mae javo'ë'e. Èhuro no ga'ejö noehu mae uehorovarue jö ma jaehu ebe rovanoho ja ëho uehorovoromo birire baejë'e javo'iramu. ⁷ O simano sisërëromo God bogo uehorovë'e ëma atarue jöho nadi ejëhone. Nadi ejëho'irögoro biririvoromo God-hu nimaje muoho sivohe mu sivohe va'one. ⁸ Noro sino haho'o hesi muoho sivohe avohë'i ë'o gabe va'arueje ëhuro nosi sinoho biririvavuo'iröhego. Èhi ë'ë'o ho ëhuro no ma-bisemu mae javuo'ë'e. A'iro God-hu nimaje mu sivohe avoho'i ë'o gabe va'ë'o ho ëhuro mabëhe javuo'ë'e. Èhuro jaruvoho mae raromaruëro ijönöhu'o ëhi gemuoho raromö'ejö. ⁹ Èho jö maego ae aho'obëhe mae uehorovë'o ho iae maeje. ¹⁰ Noro ëhi mae raromö'iröhëni ëhuni no biririvoromo sivohoromo God-hu nimaje muoho vaejarueje ë hesi bëhoho God darugo'e aëro jië'ëro no ajamuijoro mae uehorovaruohuni. Hu sa'ae aho'obëhe ajamuaje aeje. Mae uehorovarue aribövioho no mare bamavuaeje aeje. ¹¹ Èhi jië'e jöho ae bojëmiromo ë hesi öroho röjëhinövone. ¹² Ja a i'e jave röhu nadi simano sisërëjë'e muoho vaejego aho uvoruomö'iro: Timothy asisö'ëro jië'ëro hu muoho bogo avo'avoho vaejaje höjo. A'i jero jö mae jövoromo mu mae vaeromo ae huë baejëvoromo God mae uehorovoromo avoho taemo hijego aëro jasi muoho garomo uvo'iro: No'o ëhi ë'ëjarëjo. ¹³ Jero ëhi'oromo God-are jöho aëni adahoromo jögore mëmiromo öroho röjëhiromo ëhi ë'i hijego evare na ö'iro. ¹⁴ Mu vae'irane suvuro God-hu bojamadoho nadi u'uhö'i ma-biririvoromo muoho vaene. Èhesi bëhoho urimë'i ekaresia muebejëvarue a duvahohuro övoho simanore bama-hamu evare aëro jöho God-aro baeromo mu vae'irane jöho majahijamu ëhuro ë suvuroho baejaneje. Èhuni ëho avo'avoho mueberomo muoho vaene. ¹⁵ Èhi jië'e muohuremu uehorovoromo biririvoromo vaenövone. Èhi ë'ë'o ho ëhuro ae aho'obëhe ga'ë'ö jero muoho avoho vaebe rue'iramu. ¹⁶ Jasi arijo'arije avo'avoho mueberovoromo God-are jöho avo'avoho röjëhine. Èhemu vaenövone. Èhi ë'ë'o ho ëhuro maro javoromo jasi jö hejarue ariböviohu'o maro jëvo'ë'e.

5

Timothy-hu ekaresia ae magonahe diehi jögoru mëmi'iröhe jöhoje.

¹ Röhu ga'irane a duvahehu mu sisë'i vaejamu jaehu jögoru majëhijë'oho nadi jö giagia'oho majëhi'i ma-sanu'e vavu majaharuëhi ëhi majëhine. O a i'o jögoru mëmë'oho ö majëhijaruëhi ëhi mëmine. ² O magonaho duvaho jögoru majëhijë'oho vëmu majëhijaruëhi ëhi majëhine. O magonaho i'o jögoru mëmë'oho ma'ino majëhijaruëhi ëhi jië'e jö mahemu mëmi'i jöe gö gö nadi uehorovoromo majëhine.

Magonaho doru jabesi jöhoje.

³ Röhu magonaho doru jabesi jöho. Magonaho doru agano rumo'ëro jië'ëro huë ma baeröhe öri bogojië'oho ëhi jië'e magonaho doruoho jero rajëhiromomo ajëminövone. ⁴ A'i magonaho dorue aboji harihu'e o hijo ömo'öme jëvë'oho ë ariböviohuro ave muoho avo'avoho uehorovo'iro. Jabesi agano maho urimo avoho muebejëvoromo ëhuro jabesi vëmu vavuehu hijo ömo'ömehu ajëmarëhi ëhi jaburo mana ajëmi'iro. Jabesi mu ioro'ioroho ijönö jio'iro. Ëhi jië'e muoho God hu nime. ⁵ A'i magonaho dorue agano rumo'ëro jië'ëro jabesi sivu mueberovë'iroho ëhi jië'e magonahohuro uvoruomajeje: Hesi God-ro ajemi'ajë uvoromo ëhuni vahie majae jene God-are örire jöe jövoromo ua'i hijajeje: God jero ajemego na mae jevajo. ⁶ O magonaho doruehu jabesi sinohemu uehorovë'oho ëma jijiharuëro ije jahosi'e jiajëhi ëhi jëve. ⁷ Ëhi jië'e jöho majëhijego ejahego jö sisëho bogojio'iro. ⁸ Ae rahu hesi ö mueno'o bogo ajëmijë'oho o hesi agano mahu'o ëhu'o bogo ajëmijë'oho ëhuro God mae uehorovarue jöho vuonugoromo God-are jö bogo hejë'e aribövioho iosirëmiromomo hu sisë bëheje.

⁹ Ekaresia ariböviehu magonaho doru muebejëvo'i jabesi iho jajivo'ië'iroho vadune aho'o 60 baejë'e jabesi ihohemu jajivo'amo'iro. O barue ma-gemu masuvë'oho ëhi jië'e magonaho doru jabesi ihohemu jajivo'amo'iro. ¹⁰ O magonaho dorue mu mae vaejamu ëhuro jabesi iho mae jië'oho ëhuremu ihoho jajivo'amo'iro. Aboji harihu'e avoho muebe'amobe rovë'e jiego ae i'e rovamu ajëmiromomo nihudëgo'i arijë'e jiego Keriso-are aribövioho huë baejë'e jiego huë vavaeni'e aribövioho ajëmijë'e jiego mu mae bövie bise'e vaeruomë'e jiego ëhi jië'e magonaho doru jabesi ihohuremu jajivo'amo'iro.

¹¹ A'i magonaho i'e doru jioruomë'oho nadi ëhi jië'e magonaho jabesi ihoho jajivoromo muebejëvone. Ëhesi bëhoho magonaho i'ohuro dëre uehorovoromo ri'öromomo Keriso vuonugo'irögoro sionoho iore bamo'i nimarueje. ¹² Ëhi nimoromo ëhuro urimë'i Keriso mae uavare jöho ahego ëhuro jabesi ihoho sisërëjajeje. ¹³ Röhu göho magonaho doru i'ohuro mue bijönibijiohoromo osare osare ma-raromobe jijihajeje. Röhu bogo ëhemuoho ömo'i mu sisë gö'o döre vaejarueje. A jöho ëma atobe a muoho ëma ahobe jijihajeje. No bogo atarue jöho ë magonahoho jaburo atoroumajeje. ¹⁴ Ëhi jië'ohuni na nege magonaho doru i'ohuro röhu maho sionoho barue masu'amoromo aboji harihu'e vaeromo osaho avoho muebenövoröhego. Ëhi ë'ë'oho ekaresia bijönimarue ariböviehu jö sisë ato'iröhooho bogojio'ë'e. ¹⁵ Na ëhi uavaje hesi bëhoho magonaho doru i'o ioro'iorohuro Keriso-are jöho vuonugo'i Satan-are örire va'ë'ego ëhuni uave. ¹⁶ O Christian magonahe rahu hesirire

magonaho doru jië'oho huro ajami'iro. Ajamijë'oho ehuro ekaresia aribövioho bogo madomadëgo'iramu agano rumo'e magonaho doru ajëmi'iröhoho eni jëvo'ë'e. Magonaho doru jabesi jöho ehije.

Ekaresia muebejarue a duvaho jabesi jöhoje.

¹⁷ Röhu a duvahehu ekaresia muebejëvarue jöho jajivo'ië'e. A duvahehu ekaresia avoho muebejëvamu ekaresia jabuhu mabëhe rajëhiromo suvuoro bisemu bövie mana bojëmijë'oho iae maeje. O a duvahehu birivoromo ekaresia avoho muebejëvoromo röhu göho God-are jö majëhiromo bëhi röjëhijarue ëhi jië'e aribövioho börömo mae uehorovëvoromo mana bojëmijë'oho iae maeje. ¹⁸ Suvuoro bojëmi'iröhe hesi bëhoho ë hesi jöho God-are surire uhu'e uvë'eje: Jasi mu vaejahaje miëhu jasi mu vaejahoromo i hörehu sa'ijovobe juvë'oho hesi jö'oho nadi tugohahego hu juvoromo hesi manaho baeromo huhu hörehu sa'ijovaje i vitu vituoho ibe juvo'irajo. Ehi jië'oho miohuro ëho hesi manae bae'a'ajëjo. O God-are surire jö göho ëhi uvë'eje: Ae rahu mu vaeromo mana baejë'oho iae mae höjo. ¹⁹ O aehu ekaresia muebejëvaje a duvaho hesi jö sisë ja majahijë'iroho ae gemuehu majahamu hejë'oho nadi ejahone. A'i ae niö'i o ae niö'i gemu jabuhu a duvaho hesi mu sisë jabesi hia'ehu heromo nunehu gavë'ëro jasi örire majahijamu hejë'oho ehuremu ejëhone. ²⁰ Hu sisë jië'oho ekaresia aribövi jabesi nunoro jögore bojamego avoho uehorovo'i ehuro a ioro'iorohuro ëho garomo juhuonivoromo bogo ehioho ë'iröhe.

²¹ Ejöho börömeje. God-are nunire Iesu Keriso-are nunire God-are anera jabesi nunire naro ja uave ejeho'iranego. Ejehanuevaru mevo ga'irane a duvaho jabesi jöho diho mae diho sisë jiamu gavë'iroho nadi ma-urimoho uvone: Iaho mae höjo o iaho sisë höjo. O nadi a duvahe jasi aemo'aemoho sanu'e jöho majëhi'i a duvaho ioro'ioroho darugo'e jöho majëhi'i a'i ma-uehore gemu baeromo a duvahe aho'obëhe majëhinövone. ²² O ae göehu ekaresiaëni mu börömo vaeröhego övo simanore bamaho'ië'iroho nadi ma-majioho övoho simanoroho bama-hone. Eiahuro mu sisë vaejego ae niö'i jemesi ihoho sisërejëhojööni uave. Nadi ehioho ë'irögoro ma-avoho mueberovego sisëho bogojavo'iro.

²³ Röhu dëre guomo guomo baejavo'i hijajohuni nadi jovemuoho i'i wine jovohu'o ma-bisemu ijego ehuro dëho mae javo'iro.

²⁴ Amo jaehu ekaresia jabesi mure bamëvo'ië'iroho jabesi muoho avoho garomo evaro bamëvone. Ehesi bëhoho a ioro'iorohuro ma-va'orahoro mu sisë vaejaruëro jië'ëro jabesi mu mevo'irane ë hesi urimo ga'a'anue jabesi sisëho ma-va'orahoro jio'iramu muroho bogo bamëvo'anue. O a ioro'ioro jabesi sisëho subirö'öjë'ëro jero jabesi muoho mevo garomo evare ijönö ga'a'anue sisë jioruomoi'iramu muroho bogo bamëvo'anue. ²⁵ O mu sisë urimo gö subirö'ö'i gö va'orahoro jië'ëro ijönö aho'o ma-va'orahoro jiajëhi mu maho ëhi gemuhoje. A ioro'iorohuro mu maho ma-va'orahoro vaejarueje. O mu ma ioro'ioroho subirö'öjë'eje röhu ijönöho bogo subirö'ö varijënoho jio'ë'e.

6

A jabesi muemu vaejarue aribövi jabesi jöhoje.

¹ Röhu jö göho a masijo jabesi darugoremu raromoromo jabesi muemu vaejeharue aribövi jabesi jöhoje. Ëhi jië'e ariböviohuro a masijoho mae uehorovëvo avohoromo muoho vaejehago God-are ihohu'o Keriso-are jöhu'o aho bogo sisë'ioho ato'iro. ² O jabesi a masijoho Keriso mae uehorovarue aribövie jëvë'oho mu ariböviohuro nadi uvo'iro: Nosi a masijoho ma-Christian ö mueno'ëro jëvë'ëro bogo masijoho hö uvoromo muoho ëma sisë'i sisë'i ömo'iro. A'i uvoruomo'i: Nosi masijoho jabumë Keriso mae uehorovarue aribövie noehu rajëhijaruoho jëvajëjo. No ëhi jië'e aribövioho ajëmiarue hö uvoromo jabesi muoho avo'avoho vaejehoruomo'iro.

Keriso-are jö vuonugo'i sa'a hesi jöemu berohemu beroharue mu sisëhu'o ave sa'a hesi inömo bae'i ëhemu uehorovarue mu sisëhu'o ë mu sisë niö'i hesi jöhoje.

Ëhi jië'e jöho jero ae röjëhiromu uë'i hijego muoho avoho vaeruomo'iro. ³ Aehu jöe gö röjëhijë'oho sisëje. Jöe gö röjëhiromu nosi Bada Iesu Keriso-are jö mahu'o God-are mu diehi avoho vaejarue jöhu'o bogo ejë'oho ⁴ hu simanoho bogo uehorovë'e ëma uvajeje: Na a böröme jevajëjo. Simane sisërëromu nimajeje bëhi rumo'e jöe gö gö ëma nahoromo jö aho'ahëmi'i. Röhu ëhi jië'e jö berohemu berohamu hejë'oho ëhuro aëro sarerivoromu uvoruomajeje: Nuni aji'e jöho jabumë diehi'oromo bae'i no bogo baejare höromu jabesi örire dë vörönimoruomajeje. Dë vörönimoromo iro muorovo'e vaeromo ae göëro gö hesi örire agoromo ae göëro gö hesi örire sisë uehorovoruomajeje. ⁵ O uehoro sisë baeromo God-are jö maho vuonugo'i irovoruomajeje. Irovoromo sarerivoromu uvoruomajeje: Noehu God-are muemu uehorovo'iröhe hesi bëhoho aviëhi höjo. Noro inömo bövioho bise'oho ujuohoromo ëhuro maro raromoejarëjo.

⁶ Iae mae. God-are muemu uehorovë'oho iae maro raromarueje. Ëhesi bëhoho God-are muemu uehorovoromo röhu bogo gö'o gö'oho bae'i uehorovo'i a'i uvë'oho: No eni javuajë uvë'ohuro ëhuro maroho raromarueje. ⁷ Vëmehu rahavuare majaroho evaroho inömo rumo'e ma-övemu rovarueje. O vuovoröhe majaroho ëhu'o ma-övemu va'ejo. ⁸ Röhu iruno'e o niögu suhi'e javuë'oho ëhuro uehorovoromo uvo'ejo: No eni javuajë uvoromo bogo gö'oho bae'i ëhemu uehorovo'ejo. ⁹ A'i a ioro'iorohuro inöme bövie bise'e marohë'e mae bae'i ëhuremu uehorovoruomajeje. Ëhi jië'e aribövioho Satan-ro dinëmijego buororo rumo va'anovego buorëro taemëvanovego dë vövöbajo'ere ri'öromu simane sisë'i uehorovoromo mue gö gö nimoromo sisërërovo barëjarueje. ¹⁰ Moniemu gemu uehorovë'oho ëhuro mu sisë aho'obëhe baejarueje. Ae göëro moniemu nimo avohoromo ëhuro Keriso-are jöho rumonimobe va'ojuvo va'o vuonugo'i huë vavaene gö gö baeruomë'eje.

Timothy-hu mue gö gö vaeröhe jögoru Paul-hu jajivadohoje.

¹¹ Röhu ja God-are ae jave. Ëhuni ëhi jië'e mu sisëho nadi gavanovone. Nadi gavanovo'i ma-mu maemu vaeromo God-are muoho nimoromo hesi öroro mae uehorovoromo ae gö huë baejëvoromo biririvoromu muoho vaeromo sanu'e jöho majëhinövone. Ëhi jië'e muohuremu vae'i nimonövone. ¹² Aehu ajajovoromo göehu gö iosirëmi'i biririvaje ëhi jië'e mu maho baejë'e jave. Ëhuni God mae uehorovoromo jasi daruge aho'o

bojamiromo birivoromo mu maho vaenövone. Muoho vaejè'i ijönö ioro'ioremu maro hi'irane öroho ehuremu uehorovone. Urimè'i jaehu mae uehorovanue jö ae aho'o jabesi nunire huruoho majèhijanevare evare God-ro ja uavadeje èhi maro hi'iranego. Èjöhuremu uehorovone. ¹³ Röhu naro God-are nunire Iesu Keriso-are nunire ave jöho majahi'iè'e. God ae aho'obèhe darugo bojamuego raromarue ahoje. Iesu Keriso Pontius Pilate-are nunire namiro mo hesi jö ma-maemu huruoho majahijade ahoje. Èae niö'i jabesi nunire ave jöho majahi'iè'e. ¹⁴ Jögoru hejanoho avo'avoho ejego aho jasi jö sisèho bogo ato'iro. Èhi ebe va'one ijönö nosi Bada Iesu Keriso rovego garöhe. ¹⁵ Iae hu rue'iramu no ga'ejo A Böröme God-hu nimaje majare. God hu ma-maro hiromo huro gemuëro börömo mae namijè'ëro masijo vaeruomaje ae aho'o iosirèmiromo hu gemu dörohoje. ¹⁶ God gemu hu bogo guomo hesije. Hu aji börömo hijè'ëro hesi bëhiroho no bogo va'o hesi javue. Aho hu bogo ganövè'ëro èhi bogo ganövo'ejo. Hesi iho börömo darugoho ma-èhi jiemu jiobe va'è'e. Iae mae.

¹⁷ Röhu ave sa'a hesi bövi bise'o marohè'e mae jèvè'e aribövioho uène: Nadi jemesi inömoho bövioho bise'oho uehorovoromo döroho bamorovorène. Nadi uvorène: Na inömo marohè'e jevajohuro ehuro mae jevo'ajèjo è hesi bëhoho inömoho ma-jahuri jiaje inöme jiaje. A'i uvorène: Hesi God-ro ajemi'iramu mae jevo'ajèjo. Èhesi bëhoho huro bövie bise'e suvuoramui avohajeje huè mae javuoröhego. ¹⁸ O uènego jaburo mu mae vaerumo'i. Huè baerovarue mu hesi öroho marohè'e mae jèvo'iro. Öve sasohoromo suvuore è'iro. ¹⁹ Èhi è'è'oho suvuoro maho ö'idöre rune vae'è'ö ehuro maja viture mamaro raromo'iröhohuni. Èhuro ruaho'amoromo bogo ma-döemuoho mae raromo'i dè vövöbajo'o uhohu'o maro raromonövo'è'ö.

²⁰ Röhu Timothy God-ro hesi jöho bojamadeje jero muebe'iranego. Èhuni è jöhemu avoho uehorovoromo ae majèhinövone. A'i God rumo'e sareri sareri'e jöho nadi gavanovone. O aehu God-are jö ahoromo jö i'o barueromo sarerèmiromo uèvè'oho: Aveho nuni aji'e jöe hö uèvè'oho nadi gavanovone. ²¹ Èhesi bëhoho ae göëro èhi jiè'e jö i'oho uehorovoromo God-are jöho vuonugè'ego èhuni uave.

God-ro jemè huè baeromo ajèminövö'è'e. Ahia mino'e.

2 TIMOTHY

Paul-hu Timothy jejamade jöhoje.

¹ O asë'e Timothy Paul naro ave jöho jajivo'ië'e. God-ro hesi nimë'ëro ëhu'ëro na Iesu Keriso-are apostle jevë'eje naro ae majëhiromo uënövo'irodego: God-hu nosi aru'aho i'ovahuo'i uövuadëhi iae huro ëhi Iesu Keriso'o gemuore ramuo'iramu i'ovavuo'ajë uë'irodego. Ëhu'ëro na ëhi jië'e ae jeve.

² Naro nasi harihe Timothy jasi örire dë vövöbajo'e aho'o jejamije. Na nege God Vavuohu'o nosi Bada Iesu Keriso'o jabesi vavaenimoromo ajamijego jero maro hi'iranego.

Timothy-hu Keriso mae uehorovadohuni ëhuni Paul-hu God mae uavade jöhoje.

³ Naro God-are örire mabëhe uave. God nasi hijo miono'ehu uehorovobe rovarëhi na'o dë mae jevego herovoromo hesi muoho vaejajeje. Vahie majae jene naro jasi jöho hesi örire jövoromo hu mabëhe ua'i hijajeje. ⁴ Jasi jöëni God mabëhe uaromo naro uehorovoromo uvajeje: Jero nani vavaenimoromo nivane hö uvoromo ëhuni naro ja ga'i nego avohajeje ja garomo nasi dë vövöbajo'e nimorohevoröhego. ⁵ Na uehorovajoho ja bogo döëremuoho God mae uehorovo'i uhohu'o mae uehorovanueje. Urimë'i jasi hije magonaho ihe Lois'o jasi vëme Eunice'o jaburo uhohu'o ëhi God mae uehorovonövarajeje. Röhu na uehorovajoho jabuhu uehorovonövarëhi ja'o ëhi gemuoho God mae uehorovanueje.

Timothy-hu vi'ehe huë vavaene baeromo biririvoromo Keriso-are muemu vaeröhe jöhoje.

⁶ Ëhuni naro ave jöho ua'ië'e uehorovo'iranego. Urimë'i naro nasi övohuro jasi simanoho taemahamu evare God-ro ja darugoho bojamijadeje jero hesi aribövioho muebejëvo'iranego. Ëhuni ë darugoho vëninö'e avoho muebejego bogo duoroho'iro. ⁷ Ëhesi bëhoho God-ro hesi Aru'ahoho bojamuamu baejë'ëro ëhu'ëro bogo juhuonivo'i a'i daruge baeromo ae gö huë baejëvoromo avoho taemo raromarueje.

⁸ Ëhuni nosi Badare jö majëhijanuoho nadi ëhunioho javojimone o na savoji gagore hijajohuni ëhu'o nadi javojimone. Nadi javojimo'i God-are darugoho uehorovoromo naehu huë vavaeni baejajëhi Keriso-are jö ma hesi jöëni huë vavaeni rovë'o ho ja'o baene. ⁹ Ëhesi bëhoho no sisë javuamu God-ro no baejavuoromo maro bamavuoromo hesi ariböviemu javuojöro uövuadeje. Ëhi ajamuade hesi bëhoho hu bogo uvadeje no mu mae vaejë'e javuajë uvoromo ëhunioho hesi aribövioho javuojöro uövuadeje. A'i hesi nimë'ëro noni vavaenimoromo ë'adeje. Urimo sa'a bövi bise'o bogo bamadevare evare God-ro noni vavaenimamuvadeje ijönö Iesu Kerisoro no ajamui'iröhego. ¹⁰ Ëhi uvadoho jaruvoho mare ramuaje aho Iesu Kerisoro nosi örire rovë'ëro ëhu'ëro God-hu no huë baejavuaje muoho va'orahoroje. Ëhesi bëhoho Iesu Kerisoro nosi örire rueromo vuovo'iröhe öroho ahahuadeje. Ahoromo hesi jö maho röjahuijë'ëro ëhu'ëro no ë jöho garomo uvarueje: No

ioro'iore gemu maro raromemu raromo'ejarëjo. Kerisohu ajamuade jö maho ëhije.

¹¹ Ëjö maho naro majëhi'irodego God-ro bamevadeje. Ëhu'ëro na apostle o Keriso-are jö röjëhijaje ae jeve. ¹² Ëhi jië'e muoho vaebe juvë'ëro ëhuro na vi'ehoho huë vavaenoho baejajeje. Iae ëhi jeve röhu na bogo javojege. Rabëni. Naro God mae uehorovoromo gavajeje hu mae jiego. Ëhi gavajëro jië'ëro uvajeje: Iae mae höjo. God-ro eni jië'ëro ëhu'ëro hesi mu nasi övo döre bamehadoho huro avoho muebebe va'iramu evare ë maja börömoho rue'a'ajëjo. Ëhuni javojoho bogojeve. ¹³ Röhu naehu jö ma röjahibe rovamu hejanoho ja'o ëhi jië'e jö mahuremu ma'enone. Iesu Keriso-are uehoro maho baeromo God mae uehorovë'e ae gö huë baejëvë'e hiromo ë jöhuremu ma'enone. ¹⁴ God-hu hesi jö ma jasi övo döre bamadoho avoho muebenego aho bogo jö göho jövo'iro. God-are Aru'ahoho nosi dë vövöbajo'ere hijë'e jiaje hesi darugoho baeromo ëhuro ëhi ë'one.

¹⁵ Iae ja'o gavanue Asia sa'a raje ae aho'obëhe Phygelos'o Her-mogenes'o jabu'o nasi jöho bogo uehorovo'i remo va'oruomë'eje. ¹⁶ Röhu na nege Badaro Onesiphorus-are aganohuni vavaenimoromo ajëmi'iröhego. Ëhesi bëhoho urimë'i naro huë vavaene bae'ego Onesiphorus-ro ajemi'ego dëho sasohevonövadeje. O na savoji gagore hijamu hegorovo Onesiphorus-ro nasi jöënioho bogo javojimo'i ¹⁷ Rome amore ruenugoromo nahevemu nahevobe juvojuvo birohevadeje. ¹⁸ Ëhuni na nege Badare majaho rovego huro Onesiphorus-are jöëni vavaenimoromo ajamijego mae jioröhego. Na ëhi nege. Röhu urimë'i Onesiphorus-ro Ephesus amore hiromo muoho bövioho bise'oho ajem-inövadeje. Ja'o iae gavanueje.

2

¹ Röhu nasi harihe no Iesu Keriso'o gemuoro bimuvavuë'ego God-ro hesi nimoromo huë baejavuoromo biriroho bojamuijë'e jiaje jero ë biriroho baeromo muoho vaenövone. ² Na diehi jië'e jö ae aho'obëhe majëhijajoho iae ja henövaneje. Ëhenövane jöho baeromo a ma jabesi öro röjëhijego jaburo jöho bava'oromo a ioro'ioroho jabu'o röjëhi'iro.

³ Muoho ëhi vaeromo huë vavaeni rovë'oho nadi vuonugo'i a'i uvone: Iesu Keriso-are muorovo ariböviehu biririvoromo Satan'o muorovoromo huë vavaeni baejaruëhi na'o ëhi ë'ejö uvoromo ja'o ëhi jië'e huë vavaenoho baeromo biririvoromo Satan'o muorovone. ⁴ Röhu ë hesi uhu jö jajivo'ië'ajoho gane. Bijo bunoe baeromo sisë ariböviohu'o muorovë'iroho mu göho göho bogo gemuoroho havoromo muorovo'i ma-muorovo muohemu vaejarueje jabesi muorovo a börömohuro gëromo nimorohoröhego. ⁵ O uhu jö göho. Ajajovoromo tutuvoromo ae göehu gö iosirëmi'ië'iroho diehi ajajovarue jögoroho ejëhoromo evare tutuvarueje bogo ejahë'oho suvuoroho bogo bae-jöëni. ⁶ O uhu jö göho. Dë mu ravë'iroho biririvoromo mu vaejarue ariböviohuro urimoho ë ioho ue'aho'ë'ö. ⁷ Naehu jajivaje jöho uehorovo avohone. Jöe aho'o Badaro ajami'iramu bëhoho bae'a'anue. ⁸ Röhu Iesu Keriso uehorovonome. Keriso hu Israel sa'a muebenövade ae David-are ujeje. Huro guomoromo i'ovoromo ri'öjë'eje. Ëhi jië'e jö maho naro majëhibe juvajeje. ⁹ Ëhi jië'e jö maho naro majëhijë'ëro ëhuni Keriso

bijönimarue ariböviohuro uvoruomajeje: Nörö Keriso-are jö majahuajohuro ehuro hu a sisë höjo. Ëhi uvoromo savoji gagore ba'amevëlëro na huë vavaene baeje. Jabumëro na savoji gagore ba'amevoromo taemevareje röhu God-are jöho bogo taemë'ëro ae aho'obëhe hebe va'oruomajeje. ¹⁰ Ae aho'obëhe God-are jö hebe va'aruohuni ëhuni God-hu baejëvade ariböviohuni naro uehorovëvoromo birivoromo huë vavaene bövie bise'e baejajeje. Ëhesi bëhoho na nege ë aribövioho jabu'o Iesu Keriso-are ae gemuohuro jëvë'ëro bogo sisëroho va'i maro va'oromo ioro'ioire gemu hesi ajire raromemu raromoröhego. Ëhuni naehu birivoromo mu vaejajëhi ja'o ëhi birivoromo muoho vaene. ¹¹ Röhu noehu ato'i arijarue jöho iae jö maeje. Atoromo ëhi uvarueje: Nosi uehoro mamioho Iesu guomadëhi vuovahuë'oho hu'o gemu mae raromo'ejarëjo. ¹² No bogo u'uho'i ma-birivivë'oho hu'o masije riravoromo hesi öri ari'oho muebe'ejarëjo. Noehu hesinö deju bu'öjë'oho huro nosinö deju bu'ö'a'ajëjo. ¹³ Noehu God mae uavare jö ahë'oho röhu God-ro mae uövuade jöho bogo aho'a'ajëjo huhu uvaje jö vuonugo'iröhoho bogo eni jië'ego.

Timothy-hu mu mae God-are nunire vaeröhe jöhoje.

¹⁴ Ëhi jië'e jöho majëhijego Christian ariböviohuro heromo avoho uehorovoromo'iro. Ëhi majëhiromo röhu God-are nunoro jögoroho darugo'o majëhiromo uëne: Bëhi rumo'e jöe gö gö nadi ma-jö aho'ahamirovorëne. Ëhi uëne. Ëhi jië'e jö aho'ahamirovë'oho aho heromo bogo marë'i sisëreövarueje. ¹⁵ Röhu jero muoho birivoromo ömo gavego God-ro garomo uvo'iro: Ja eni javajëjo. God-are jö maho ma-ahorirëro majëhine. Jaehu ëhi ë'ë'oho jaehu vaejanue muoho God-hu gavë'oho ja bogo javojago'ë'e. ¹⁶ Röhu God bogo uehorovë'e ëma atarue jöho nadi enövone. Ëhi jië'e jö atë'oho aëro God rumonimobe va'oruomo'ë'e. ¹⁷ Ëhi jië'e jö sisëho iae sagoho va'ëne jio'ë'e. Sagohehu sino döre ibe va'ego rumorovoromo sino sisërejëvobe va'ajëhi jabesi jö sisëhuro ëhi rumorovo'iramu aëro sisërebe va'oruomo'ë'e. A ioro'iorohuro ëhi ë'arueje röhu Hymenaeus'o Philetus'o jaburo niö'iro ëhi jië'e jöho majëhijarueje. ¹⁸ Majëhiromo God-are jö maho vuonugoromo ae sarerëmiromo uëvarueje: No ae aho'obëhe mami'e vuovoromo i'ovoromo ri'öjëlëro javuë'ëro ë hesi majaho mami'e barëjë'e höjo. Jö sisëho ëhi jörovamu hejëlëro Christian ae göëro göëro Keriso avoho uehorovaroho vuonugë'ejö. ¹⁹ Ëaribövi ioro'ioirehu God-are jö vuonugaroho röhu God-are aribövi maho jabumëro öbunö'e bibivoromo riravarueje. Jabumë God-are javu hesi öbu va'ëne jioruome. God-are javu hesi öbu va'ëne jioruome röhu God-are javu öbu hesi ahore ave jö niö'ioho jajivë'eje. Göho uvë'eje: Badaro gëvaje höjo di aribövioho hesiroho jioruomego. O göho uvë'eje: Ae rahu uvë'oho: Na Bada mae uehorovaje ae jevajë uvë'oho ë ahuro mu sisëho vuonugo'irajo. Ëjöho jajivo'amë'eje.

²⁰ Röhu ekaresia jabesi uhu jö göho uehorovone. Osa börömore va'ë'oho ga'a'anue hevöe ramae nu ano'e gö gö jio'amo'iramu.

Ioro'ioroho inömo ma-mabëhëro avoho'amë'eje. Ioro'ioroho ma-ijëro o sa'aëro sisë'i sisë'i avoho'amë'eje. Röhu jabesi muoho gö gö jiorove. Hevö ioro'ioroho maego maja börömhuni runo'e bahi'i hevö ioro'ioroho sisëgo majae ëhi mue vaejarueje. ²¹ Èhesi bëhoho ae rahu naehu jajivaje uehoro sisë gohö'öjë'oho ë aho hevö maho va'ëne jio'ë'e. Èhi jië'e aho mae nugë'ëro hesi Börömo hesi muoho mabëhe ajami'ë'e. Mu mae rabe rabe rovamu vaejé'oho eni jio'ë'e. ²² Röhu a i'ehu sisë ömo'i nimaruoho goro'i a'i aviëhi jië'oho sivoho gane. Bada dë vövöbajo'o uhure uehorovoromo huhu ajëmijëro ua gavarue ariböviohu'o gemuoro hibe juvoromo mu mae vae'i God mae uehorovo'i a ioro'ioroho jasi dë vövöbajo'ëro rajëhi'i ë'o gane. Èhi jië'e muoho nuninö bamone. ²³ Röhu nuni ramoramovë'ëro simano sisërëromo jö aho'ahamirovarue jöho nadi ejëhone. Ja'o iae gavanue. Èhi jië'e jö aho'ahamirovë'iroho ëhuro iro muorovo'e vaejarueje. ²⁴ Röhu Badare mu vaejaje ahuro bogo iro muorovo'oho vae'i a'i ae aho'o jabesi örire huë baejëvonövo'ë'e. Ma-taemorovoromo jöho avoho röjëhinövo'ë'e. ²⁵ Ae göehu hesi jö ahë'iroho huro sanu'e jögoroho juvö'ö majëhinövo'ë'e. Juvö'ö majëhijë'oho hesi nani'o nani God-ro jabesi simanoho huotovëho'iramumu jabumë uehoro sisëho vuonugo'i jö maho avoho ga'ë'ö. ²⁶ Urimë'i ëhi jië'e ariböviohuro Satan-are guare rireromo va'oromo Satan-hu nimaje muohemu vaenövareje. Röhu jabumë jö ma avoho gavë'ohuro ëhuro avo'avoho uehorovoromo Satan-are guare jëvajoho suorovoromo maro va'ë'ö.

3

Maja viture sisë ariböviehu huë vavaeni barue'iröhoho ëhi jië'e aribövi Timothy-hu gorëvo'iröhe jöhoje.

¹ Röhu ave jöhu'o avo'avoho uehorovone. Sa'a bövi bise'o barë'iröhe majaho dunovë'iroho huë vavaene böröme rue'ë'e. ² Èhesi bëhoho ae aho'obëhe jabesi sinohuremu rajahirovo'ë'ö. Bövie bise'e gö'o gö'o döre baebe va'i nimo'ë'ö. Jö huhe ë'oromo jöe gö gö ëma ato'ë'ö. Jabesi simanëro ëma uehorovoromo uvo'ë'ö: No a ioro'ioroho iosirëmiromo masijoho javuajëjo. Jö sisë ato'ë'ö. Vëmu vavu'o jabesi jöho aho'ë'ö. Suvuoro bojëmamu baejë'oho huë ma jöho bogo uehorovo'i ma-bae'ë'ö. God-are mu maho ijumo'ë'ö. ³ Jabesi aganoho bogo huë baejëvo'ë'ö. Nue huo'i sanuëmë'oho bogo e'ë'ö. Ae gö jabesi jö sisëho sarerëmiromo ato'ë'ö. Mue bövie bise'e nimaruoho ëma ömo'ë'ö. A umijaje ö sisëho va'ëne jëvo'ë'e. Mu maho bijönimo avoho'ë'ö. ⁴ Aganoho sarerëmiromo sisë vaejëvo'ë'ö. Bogo avo'avoho uehorovë'e mu sisëho ëma vae'ë'ö. Simano bövie vaeromo uvo'ë'ö: No eni javuajëjo. God bogo nimo'irögoro sino sasohë'e nimorohë'e muohemu ëhemu nimo'ë'ö. ⁵ Ma-döëremu God uehorovoromo hesi muoho vae'i uhoho God-are darugoho bogo herovarueje. Èhi jië'e aribövioho gorëvo'iranego uave. ⁶ Èhesi bëhoho ëhi jië'e aribövi ioro'iorohuro sarerisareriëmiromo sanuëmibe osare osare va'oromo nu gö gö uehorovarue magonahoho sarerëmijego jabesinö va'arueje. Èhesi bëhoho ë magonahoho mu sisë vaebe rovë'ëro ëhu'ëro dë juhuoninëgajeje. Dë juhuoninëgego mue gö gö nimarueje. ⁷ Mue gö gö nimoromo majae ëhi jöe gö gö hebe va'arueje röhu jö ma bae'iröhoho bogo eni jëvo hesije. Èhi

jië'e magonaho ömo'ömo ho sarerëmiarueje. ⁸ Sarerëmiromo God-are jö maho aharueje. Urimë'i a ihe Jannes'o Jambres'o Moses-are jö aharëhi ë sarer'i ariböviohuro ëhi God-are jö maho aharueje. Jabesi simanoho sisërëjêvë'ëro uehoroho bogojêve. God mae uehorovaro ho rireromëvë'eje. ⁹ Röhu ë aribövi jabesi muoho bogo marë'i urimë'i Jannes'o Jambres'o jabesi mu simano rumo'e jiamu aehu gavarëhi ëhi ae aho'obëhe garuomo'ë'e ë aribövi jabesi muohu'o simano rumo'e jië'e jio'iramu.

Paul-hu hesi majae barë'ia'amu Timothy jögoru börömo bojamade jöhoje.

¹⁰ Röhu ja bogo ëhi jië'e aho jave. Na diehi diehi röjêhibe rovodoho iae ja gavë'e jave. Na diehi hibe rovode öroho iae ja gavë'e jave. Bëhoho rabëni mu vaebe rovodoho iae ja gavë'e jave. Na God diehi mae uehorovobe rovodoho iae ja gavë'e jave. Naehu bogo nu huodëgo'i ma-sanuovoromo mu vaebe rovodoho iae ja gavë'e jave. Naehu a nasi dë vövöbajo'ere uehorovëvobe rovodoho iae ja gavë'e jave. Naehu dë vövöbajo'o bogo u'uh'o'i ma-biririvobe rovodoho iae ja gavë'e jave. ¹¹ Aehu sisë vaejevo'i arijamu huë vavaene gö gö ruel'i hijamu Antioch amore Iconium amore Lystra amore sisë vaejevo'i arijamu huë vavaeni diehi baebe rovodoho iae ja gavë'e jave. Ëhi jië'e huë vavaenoho baejamu röhu God-ro ajemamu mae jevobe rovadeje. ¹² Röhu na bogo gemuoho huë vavaenoho bae'i ae rahu Iesu Keriso'o gemuore bimuvoromo God-are jöhemu ejahobe va'i nëgë'oho a ioro'lorohuro ëho garomo bijönimoromo jabesi örire sisë vaejêvo'i ari'iramu huë vavaene baenövo'ë'ö. ¹³ Aribövi mahuro huë vavaene bae'i röhu sisë ariböviohu'o sarer'i'e jö majëhijarue ariböviohu'o avevejö'e mu sisë vaejaruoho jaburo ijonö gö'o döre sisë börömo mae vaebe va'ë'ö. Sisë vaebe va'oromo ae gö sarerëminövo'ë'ö o jabu'o ae gö jabesi sarer'i'e jöho heromo mae hörömo ejëhonövo'ë'ö. ¹⁴ Jabumë ëhi sisërëjêvo'ë'e. A'i jero heromo biririvoromo mae uehorovane jöhuremu ma'eno titimoromo uehorovobe va'one. Ëhesi bëhoho ë jö röjahijare aribövioho ja iae gövuanueje. ¹⁵ Iae ja'o gavanue ja bise'o javade majare jero aevoromo God-are surire jöho hebe rovaneje. Ësurire jö gavë'ohuro ëhuro jasi simanoho ajivavo'iramu garomo uvo'a'anue: Naro ëhi'oromo Iesu Keriso mae uehorovoromo ëhuro bogo sisëroho va'i maro va'ejöjo. ¹⁶ Röhu God-are surire jöho aho'obëhe ëho God-hu bojëmamu jajivare jöhoje. Ëjö adahë'ohuro ëhuro God-hu nimego noehu vaejarue muoho marëjajeje. Ëhuro God-are muoho huruoho majëhijarueje. Mu sisëho aharueje. Juvö'ö majëhijarueje. Mu ma hesi öroho röjêhijarueje. ¹⁷ Noehu God-are surire jö adahoromo ëhi jië'e mu vaejê'oho ëhuro God-are aribövioho no uehoro mae darugo mae bövie bise'e eni javuë'ëro ëhu'ëro mu mae aho'o vaejê'oho eni javuo'ë'e.

4

¹ Röhu God-are nunire Iesu Keriso-are nunire jögore bogo bise'o vadu'oho majahi'ejo. Uvone: Iesu Kerisoro sa'are raromarue ariböviohu'o vuovavuë'e ariböviohu'o no aho'obëhe göromo mevavuo'ajëjo. Huro nosi nunire rueromo böröme namiromo aho'obëhe muebejavuo'ajëjo. Ëjöho uehorovoromo uvone: Paul-hu

Iesu Keriso-are nunire jögoru majehi'ie'ajoho böröme hö uvoromo avoho ejehone. ² God-are jöho darugo'o majehine. Ae nimë'oho o bogo nimë'oho biririvoromo majehine. Jöe majehijego avoho uehorovoruomo'iro. Mu sisë vaejë'oho ahëvone. Darugo'e jö maho majehijego heromo biririvoromo mu ma-maemu vaeruomo'iro. Nadi u'uh'o'i biririvoromo jöho røjehinövone. ³ Èhesi bëhoho rabëni. Majae ijönöho aëro God-are jö maho bijönimoruomo'ë'e. Jö maho bijönimo'i sareri sareri'e jöe gö gö he'i hia'e avohoruomo'ë'e. Hia'e avohoromo èhuni sareri sareri'e ae gö gö sö rueruomo'ë'e èhuro he'i nimarue jö bëhoho røjehijego heruomoröhëro. ⁴ Èhi jïë'e aribövioho sö rueromo jö maho vuonugo'i sareri'e jöhuremu uehorovoruomo'ë'e. ⁵ A'i jero rabe rabe rovë'iroho avo'avoho uehorovonövone. Huë vavaene rovë'oho nadi u'uh'o'i biririvone. Keriso-are jö maho majehinövone. Èmuoho ma'enone. Jasi muoho aho'obëhe avoho ma'eno titimone.

⁶ Èhesi bëhoho nasi majaho barë'irögoro ë'e. Jew rajehu God rajhiromo jovo otehoromo God bojamiaruëhi èhi nasi sino haho'oho God-are örire suvuore bojamiromo guomo'ie'e. Majae dunovo'iramu na ave sa'aho vuonugo'ejo. ⁷ Mu ma baejodoho naro nasi uehoroho darugoho aho'o bojamiromo biririvoromo vaejë'ëro èhu'ëro ruahö'öromo vae barëj'e jeve. Noehu mae uehorovarue jöho ma'enë'e jeve. ⁸ Èhu'ëro avevejë'e mu mae vaeromo ruahö'öjode hesi suvuoroho ö'idöre nugehë'eje. Badare majaho rue'iramu huro no avoho mevavuoromo gövuajëro jïë'ëro è suvuoroho bojemi'ë'e. Röhu bogo na gemuoho bojemi'i a'i ae rahu hu rovego ga'i nimarue ariböviohu'o èhi jïë'e suvuoroho bojemi'ë'e.

Paul-hu hesi jö bise'o bise'o jajivade jöhoje.

⁹ Röhu ma-burëro nasi öroro rue'i ë'o gane ¹⁰ rabëni hesi bëhoho Demas-ro sa'are muohemu nimoromo na remo'i Thessalonica amore val'irögoro Crescens-ro Galatia sa'are val'irögoro Titus-ro Dalmatia sa'are va'ë'e jiaje. ¹¹ Luke-ro gemuëro bogo va'ë'ëro huro rueromo gevajeje. O Mark mae ajamuijaje ae jiaje èhuni hu'irae rovego huro muoho ajemi'iro. ¹² Röhu naro Tychicus nugö'öjamu Ephesus amore va'adeje. ¹³ Röhu urimë'i na Troas amore hijodevare nasi runoni niögoho Carpus-are osare nugo rovë'e jeve. Èhuni ja rovë'iroho baejeho ruene. O biriri'e suri suriohemu uehorovo avohoromo ujuoheho ruene suri suri ioro'iorohu'o èhu'o.

¹⁴ Röhu copper inömo avoho'amaje ae Alexander-ro nasi örire mu sisë bëhe vaejevadeje. Èhuni hu sisë vaejevadëhi Badaro i'ue èhi mana bojami'ë'e. ¹⁵ Röhu jero gavë'i muoho vaene. Iahuro ja'o sisë vaejavö'ë'e. Èhesi bëhoho huro nosi jöho aho avohë'ego uave.

¹⁶ Röhu urimë'i na court vaejevarevaroho aho bogo na'oho riravoromo nasi jöho ajemiromo majehijareje. Ae aho'obëhe na vuororemi-jareje. Èhi jïë'e muoho sisëgo na nege God-ro jabesi sisëho uehorovoromo vuonugojöro. ¹⁷ Ae aho'obëhe vuororemi'i a'i Badaro na'o namiromo biriroho bojemadeje èhuro naro hesi muoho vae barëromo hesi jöho majehijego sa'a ioro'iro rajae ae aho'obëhe heruomoröhëgo. Èhi'oromo na vörö'e mi hesi jö'ore jevanovamu Badaro ajemiromo baejevamu èhuro sisëho bogo birohodeje. ¹⁸ Na sisë'i jevamu Badahu baejevadëhi na sisë birohevohe va'ë'oho huro èhi

baejevoromo avoho muebejevonövo'ë'e ehuro naro ö'idöre va'oromo huhu böröme namiromo muebejavuaje öri ari'ere ë hi'irodego. Hesi ihoho ma-mae jiemu jiobe va'ë'e. Iae mae.

Paul o Christian ae gö gö jabuhu Timothy'o a ioro'iorohu'o jejëmijare jöhoje.

¹⁹ Röhu Prisca'o Aquila'o jejëmiromo Onesiphorus-are aganohu'o jejëmijode höne. ²⁰ Röhu Erastus Corinth amore hijadoho iae ëhi hije. O Trophimus guomo guome baejamu Miletus amore nugo rovodeje. ²¹ Ehuni jero ma-burëro ruene. Buru börömo majaho rueromo ja rue'irane öroho tariöjöëni uave.

Eubulus Pudens Linus Claudia ö mueno'o ioro'ioroho ëho jaburo jasi örire jejamijö.

²² Badaro jasi aru'ahohu'o jioromo jemë ae aho'obëhe huë baeromo ajëminövë'e. Ahia mino'e.

TITUS

Paul-hu Titus jejamade jöhoje.

¹ O asë'e Titus Paul naro ave jöho jasi örire jajive. Na God-are mu vaejaje ae jevoromo Iesu Keriso-are apostle jeve.

Ëhesi bëhoho God-hu baejövade aho magonahoho naro ajëmijajeje jaburo God mae uehorovobe hesi jö maho garomo ejahobe va'iröhego.

² Ejahobe va'oromo muebejë'i uvoruomoröhego: Ioro'ioremu maro raromo'ejarejo. Ëhi maro raromo'iröhego mami'e sa'a bövi bise'o bogo bamade majare God-ro mae uvadeje: Iae ëhi jio'a'ajëjo God hu sareri'e jöho bogo jövajëro jië'ëro. ³ Maro raromo'iröhe jöho ëhi uvë'ëro gavade majaho eni jiamu gagorovo huhu uvade jöho hesi aribövioho sama'e majëhijadeje jaburo ae majëhiröhego. Röhu ë jöho na'o bojemiromo uevadeje: Naehu uvode ma raromo'irarije jöho ae majëhinëjo. God baejavuoromo manö bamavuaje ahuro ë muoho bojemijë'ëro ëhu'ëro hesi mu vaejaje ae jevoromo Iesu Keriso-are apostle jeve.

⁴ Röhu naro Titus jasi örire jejamije. Naehu God uehorovajëhi ja'o ëhi gemuoho uehorovanuëro javë'ëro ëhu'ëro ja nasi harihu mae jave.

Na nege God Vavuohu'o Iesu Keriso manö bamavuaje ahu'o ëho jaburo huë baeromo ajamijego maro hi'iranego.

Titus-hu Crete hiromo mu vaeröhe jöhoje.

⁵ Röhu Crete sa'are naehu ja ramoromo rovode hesi bëhoho ëhuro Keriso-are ekaresia jabesi mue rabe rabe bogo eni jëvajoho jero avohëhego mae jio'amoröhego. O naehu uavodëhi ekaresia muebe'amo'iröhe a duvahoho jero amore amore ëhi bahibe juvo'iranego. ⁶ Ekaresia muebe'amo'iröhe a duvahoho ëhi jio'amo'iro. Ëhi jië'e a duvaho hesi ihoho ma-maemu jio'iro. Hu magonahe magemu masu'iro. Hesi aboji harihu'ohuro nadi hia'e biriri'övoromo aruëre anumëre ëma jijihö'iro. Ëhioho bogojio'i a'i ma-mae uehorovarue aribövie jëvo'iro. ⁷ Iae ekaresia muebejaje aho bogo a muoho a'i God-are muoho muebejaje jiaje ëhuni hesi ihoho ma-mae jio'iro. Nadi jö giagia'e aho nadi burëro vörönimaje aho nadi vörö'e jovo iromo simano sisërejë'e aho nadi vörö ë'aje aho nadi moniemu uehorovaje aho jio'iro. ⁸ A'i osare söjëvo va'oromo nihudëgaje mu maemu nimaje taemorovaje jögore baeromo mueberovaje God avoho uehorovaje gororovaje ëhi jië'e ae jio'iro. ⁹ Noehu majëhibe rovare ëhi jië'e jö maho biririvoromo mae uehorovo'iro ëhuro eni jioromo jö mae avoho röjëhiromo mu ma vaeruomaje a jabesi uehoroho birire bojëmi'i o göho jö aho'ahovarue aribövi jabesi uehoroho huotovëho'iröhe.

¹⁰ Jö aho'ahovarue aribövioho aho'oje. Jöho bogo e'i bëhi rumo'e sareri'e jöho röjëhijarueje. A ioro'iorohu'o röhu Jew rajo Christian aribövioho jaburo ëhi ë'arueje. ¹¹ Ëaribövi jabesi jöho ahëhore. Ëhesi bëhoho jabumë sisë uehorovë'i moniemu nimoromo jabesi sareri'e jöho röjëhijego agane gö gö uvarueje: Nani mae hëromo rireromarueje. ¹² Jabesi Crete sa'a rajo jö majëhijaje a böröme gemuëro uvadeje: Crete rajoho sareri'e muoho javuobe vörö'e mi va'ëne javuobe mu bijöni'e iemu mahëro ue'ahanovobe rovë'e javuajëjo. ¹³ Huhu uvade jöho iae

maeje. Ëhi jië'e jiaje ëhuni jöho darugo'o majëhijego jaburo Keriso-are jöhemu avoho uehorovo'i ¹⁴ a'i Jew rajehu jabesi uehoro jö ëma sarerëmiromo majëhijaruoho vuonugo'i. O aehu öri ma bijönimoromo jöe gö ëma bojëmijarue jö mae uehorovaruoho vuonugo'iro. ¹⁵ Ae rahu dë vövöbajo'e ma-maemu jië'o'ho garomo uvarueje: Inöme aho'o sisë sisë bogojio'i ma-maemu jio'amajëjo. O ae rahu dë vövöbajo'o sisë jioromo Keriso bogo ma uehorovë'o'ho ëma uvarueje: Bövioho bise'o'ho sisë jio'amajëjo. Röhu jabesi uehorohu'o dë vövöbajo'ohu'o sisërëjävë'eje. ¹⁶ Jö'ëro uëvarueje: No God gavarue höjo. Röhu mu sisëmu vaejaruohuro ëhuro röjahirovego no gavarueje jabuhu ëhi atarue jöho sarere jiego. Jabumë sisë bëhe jioruome. Jöho bogo eruome. Mu maho bogo vae hesi jioruome.

2

Ekaresiaehu God-are jö avoho uehorovoromo mu avoho vae'iröhego Titus-hu röjëhi'iröhe jöhoje.

¹ Jabumë ëhi jië'e mu sisë vaejarueje röhu jero God-are jö ma jiaje ëhi jië'e muohemu röjëhijego jasi ariböviohuro ëhi vae'iro. ² Ama'i mavojoho uëne: Jemesi simanoho sasohoromo mu maemu uehorovoromo taemo raromörene. God avoho uehorovoromo ae avoho huë baejëvoromo avoho biririvorëne. A mavojoho ëhi uëne. ³ O magonaho mavojoho ëhi jië'e jöe gemuoho majëhiromo uëne: God gemu uehorovobe jijihonövorëne. Ae gö jabesi jö sisëho nadi atemu atorëne. Nadi vörö'e jovohemu iemu irëne. Mu maemu röjëhijego magonaho i'oho he'irarëne. ⁴ Magonaho mavojoho ëhi uëne. Jaburo mu mae röjëhijego magonaho i'ohuro heromo baruohu'o asisö'ohu'o rajëhi'iro. ⁵ Taemo raromo'iro. Aho bogo sihëvo'iro. Amoho avoho muebe'iro. Baru jabesi jöho ejëho'iro. Christian magonaho i'ohuro ëhi ë'iramu gëgorovo aho God-are jöho bogo agoruomo'ë'e.

⁶ O a i'oho ëhi jië'e jöe gemuoho majëhine. Uënego ma-taemo raromo'iro. ⁷ Röhu jero mu maemu vaejego ae aho'obëhe ja garomo uehorovoromo uvoruomo'iro: È'ego no'o ëhi jië'e muoho vae'irarëjo. Nadi uehore gö gö bae'i ma-taemo hiromo jöho röjëhine. ⁸ Jö maemu jövnego aho jasi jöho heromo bogo sisë'ioho atoruomo'iro. Ëhi jië'o'ho nosi jö bijönimoruomaje ariböviohuro Christian aribövi nosi jö sisë ato'iröhoho bogo eni jëvo'iramu javoje baeromo ma-raromo'ëlö.

⁹ O ae gö jabesi muemu vaejëharue aribövioho uëne: Jemesi a masijo jabesi jöho aho'obëhe ejëhego jaburo gëromo nimoroho'irarëne. A masijo jabesi jöho nadi aho majëhirëne. ¹⁰ Jabumë nadi vajiohuvodëgorëne. A'i mu maemu vaejego ae göëro gëromo uvoruomo'irajo: God-are jöho iae mae höjo. God no manö bamavuade a hesi jöho uave. Mu aribövioho ë jöho majëhine.

¹¹ Ëhi jië'e jögoru röjëhi'irane hesi bëhoho God-hu huë baejavuaje muoho ae aho'o nosi nunire rovë'eje ëhuro baejavuego maro vae'iröhego. ¹² Ëmuoho rovë'ëro ëhuro God-ro röjahuijajeje noro God bogo uehorovarue muoho sinehu nimarue mu sisëho dejonö bu'ö'i ma-taemorovë'i mu mahuremu uehorovë'i God rajahijë'i ave sa'are raromo jijihojöro. ¹³ Ëhi ë'ë'i muebejarueje ë nimoroho'iröhe maja rue'iröhire nosi A Böröme God no maro bamavuaje aho Iesu

Kerisoro aji'o rovego ga'i. ¹⁴ Iesu Kerisoro nosi jöëni guomorovadeje sisëho ruahö'öjavuadoho ahego noro maro raromoröhego. O nosi dë vövöbajo'oho u'ovahuengo no hesi aribövi maemu jioromo mu maemu vae'i nimoröhego.

¹⁵ Ëhi jië'e mu öroho röjëhinövone. Jögore mëmiromo mu sisëho ahonövone. Daruge baejë'e javaje jöho darugo'o majëhijego aho jasi jöho bogo mana aho majahi'i.

3

Christian aribövi no diehi mu vae'iröhe jöhoje.

¹ Jasi ekaresiaho uëne: Jemesi sa'are simano vaeruomaje ariböviohu'o jemesi a masijo ioro'iorohu'o nadi biriri'övoromo juahëmi'i jabesi jöho ejëhorëne. Mu mae bövie bise'e ömo varijëne jiorëne. ² Nadi ae gö jabesi ihoho ijumorëne. Nadi irovorëne. A'i ma-u'lemu raromoromo a mahu'o a sisëhu'o jabesi örire majö sanu'e majëhiromo huë baejëvonövorëne. Ëhi uëne. ³ Ëhesi bëhoho no'o uehore bogojië'e aribövie javuonövadeje. Jöe bogo e'i aruëre anumëre ëma jijihonövareje. Sinehu nimaje mue gö gö ëhuremu uehorovonövareje. A jabesi mu mahuni o böviëni bise'ëni dë vörönimoromo bijönaguonövadeje. Sisë javuo'ego aëro bijönaguonövareje. No'o göëro göho nue huodamirovonövareje. ⁴ A'i avevejö'oho God manö bamavuaje ahuro huë baeromo ajamuijamu no gavë'e javue. ⁵ Ajamuiromo baejavuoromo manö bamavuë'eje. Bogo noehu mu ma vaejarohunioho bogo ëhunioho ëhiöho ë'i a'i huro noni vavaenimoromo ëhuni manö bamavuadeje. Ëhesi öroho aviëhije. Huhu nosi sisë u'ovahuadohuro hesi Aru'ahuhu i'o baejavuadohuro ëhuro i'orëjavuadeje. ⁶ ËAru'ahoho God-ro jovonö'e otehodaguadeje Iesu Keriso no mare bamavuaje a hesi ihore. ⁷ Hu ëhi ë'ade hesi bëhoho huro huë baeromo ajamuiromo nosi sisëho mu'uvahuë'ëro noro muebejë'i uvoröhego: No hesi aboji harihu'ëro javuë'ëro Vavu hesi bövioho bise'öho baeromo ëhuro ma-ioro'ioremu maro raromo'ëjarëjo. ⁸ Ëjöho iae mae.

Na nege jero ë jöho darugo'o majëhijego ëhuro God uehorovoruomaje ariböviohuro ma-mu maemu avoho uehorovoromo vaeruomoröhego. Ëhi jië'e mu vaejë'öho iae maeje. Ëhuro ae aho'obëhe marëjëvo'ë'e. ⁹ A'i simano rumo'e jö berohemu beroharuoho bogave ejëho'irane. Hijo miono'o jabesi iho jöemu ataruoho bogave ejëho'irane. O Jew rajo nosi jöguru hesi bëhohuni jö aho'ahamirovoromo irovaruoho bogave ejëho'irane. Ëhi jië'e jöho ëho ma-jöeje. No ëho uehorovë'öho ëhuro bogo maho javuo'ë'e. ¹⁰⁻¹¹ Ae göëhu jö sisë majëhiromo ekaresia adovëvaje ëhi jië'e aho jögore majahiromo bogo ejahamu gavë'öho röhu maho majahinövone. Bogo ejahamu gavë'öho uvone: Ëhi jië'e a hesi simanoho sisë bëhe höne. Hesi sisëro jië'ëro i'ue bae'a'ajëne. Ëhi uvoromo ë a hesinö dejoho bu'öne.

Ijo tugoho'i jöhoje.

¹² Röhu naro Artemas o nani Tychicus jasi örire nugö'ö'ëjo. Nugö'ö'ëgo ö'ëgo evaro Titus jero ma-burëro Nicopolis amoro rueromo birohevone buru majare na Nicopolis hi'i uvë'e jëvaje ëhuni. ¹³ Zenas

jögoru gavaje ahu'o Apollos'o avoho gëromo ie bövie bise'e ajëmijego huë mae va'iro. ¹⁴ Na nege nosi ekaresia ariböviohuro mu maho avo'avoho vaeromo bogo eni jëvë'e aribövioho ajëminövoröhego. Ajëmijë'ohuro ëhuro jabumë bogo ëma raromol'i i'o mu'e vaejarue aribövie jëvo'ë'e.

¹⁵ Ave na'o raromarue aribövioho aho'obëhe jaburo Titus jasi örire jejamijö. O no'o gemuore Iesu mae uehorovarue aganoho naro jejemijode höne.

God-ro jemë ae aho'obëhe huë baeromo ajëminövo'ë'e. Ahia mino'e.

PHILEMON

Paul-hu Philemon jejamijade jöhoje.

¹ O asë'e Philemon nosi aemo'aeme no'o bimuvoromo mu vaejanue aho na Iesu Keriso-are jöëni savoji gagore hijaje aho Paul na'o nosi öe Timothy'o noro niö'iro jasi örire jejamijö.

² O Apphia nosi ma'inoho o no'o gemu mae Satan'o muorovaje aho Archippus o Philemon jasi osare gagovarue ekaresia aribövioho ëhu'o jejemijö.

³ Na nege God nosi Vavuuhu'o Bada Iesu Keriso'o huë baeromo ajëmijego maro raromo'irarijego.

Philemon-hu Iesu mae uehorovoromo God-are aribövi huë baejëvonövade jöhoje.

⁴ Philemon Paul naehu God-are örire jö jövë'iroho naro jasi jöhu'o jövoromo nasi God hesi örire huë mae uavajeje. ⁵ Èhesi bëhoho naro hejajeje aëro jasi jöho atoromo uvoruomego: Jero God-are aribövioho aho'obëhe huë baejëvoromo Bada Iesuare örire mae uehorovanue höjo. Èhi heromo ëhuni God mae uaromo ⁶ ëninamiromo uavajeje: God jero ajaminego Philemon no'o gemuore mae uehorovavajohuro ëhuro hesi simanoho jiororovoromo Kerisohu bojamuijaje huë maho bövioho bise'oho ga avoho'irajo. ⁷ Öho jaehu God-are aribövie aho'obëhe huë baejëvanohuro ëhuro jabesi dë vövöbajo'oho sanuovëhë'le jave. Èhuro na dë mae jevego nimoroho avohajeje.

Onesimus Philemon'o hiromo ju'ebijë'ëro sionëro ö'ëgo Philemon-hu hesi sisë uehorovoromo vuonugoromo röhu maho baeröhe jöhoje.

⁸ Ja ëhi jië'e huë baejë'e ae javë'ëgo ëhuni ave jöho ua'ie'e. Na nego'ibejo na Keriso-are ihore darugo'le jöho bojamiromo ua'ibejo: Jasi muoho vaejëjo. ⁹ Röhu bogo ëhioho ë'ëjo. A'i ja huë baejë'e ae javë'ëgo ëhuni naehu nimaje jöho ma-sanu'e majahi'ëjo. Paul na Iesu Keriso-are jö majëhijaje ae jevo'i aviavejë'e na hesi jöëni savoji gagore hijaje aëro jevë'ëro ¹⁰ ëhuni naehu huë baejaje harihu hesi jöëni naro jasi örire ave jöho uave. Naro savoji gagore hiromo ajamamu huro Keriso baejadeje. Èhuro hu nasi harihe jianove. Na Onesimus-are jöho uave. ¹¹ Onesimus-are iho hesi bëhoho ajamuijaje ahoje. Röhu hu urimo ja'o hiromo jasi muemu vaejahadevaroho evaroho jasi öriroho bogo avo'avoho ajaminövadeje. Röhu avevejö'oho Keriso baejë'ëro ja'o na'o ajamuijaje ajeje.

¹² Iae na nugö'ö'irögoro ë'e vuonorö'ö ö'oromo jasi muemu vaejaho'iröhego. Röhu hu ö'iramu nasi dë vövöbajo'le aho'o hu'o jio'ë'e.

¹³ Naro Onesimus ma'eno'ibejo ëhuro iae na mae jevo'ibejo. Keriso-are jö ma hesi jöëni na savoji gagore hijego Onesimus-ro na'o gemu mae hiromo ja'o röromo ajemi'iröhego ëhuni ma'eno'ibejodoho röhu bogo ma'eno'ëjo. ¹⁴ Ja bogo uevë'e naehu Onesimus ëma ma'enë'oho na bijönege hu jasi muemu vaejahaje aego. Èhesi bëhoho Onesimus-ro ja'o röromo ajemi'iröhego naremuëremu nimoromo hu ma'enë'oho sisë jio'i a'i jaehu nimoromo Onesimus-hu na ajëmijöro uavë'oho iae

maeje. Röhu jasi jöho bogo baejè'ëro jevè'ëro ëhuni na bogo ma'eno'i jani nugö'ö'ejö.

¹⁵ Onesimus ja'oho bogo hi'i dirö'o göro majae ma-bisemu hijadeje. Èhesi bëhoho nani hu vuonorö'ö ö'ego jero ma-ioro'ioremu bae'iranego. ¹⁶ Avevejö'oho hu bogo ma-jasi muemu vaejahaje aho jio'i a'i jasi huë baejanue ö maeje. Iae na hesi örire börömo bëhe uehorovajeje. Röhu jero na iosiremiromo börömo mae hu uehorovo avoho'anue ë hesi bëhoho hu jasi mu vaejahaje ae jioromo ja'o hu'o Badare ae gemuoho jëvè'ego.

¹⁷ Èhuni jaehu uvè'oho: Paul Philemon na'lo havaje ae hö uvè'oho ëhuro jaehu na rajehiromo baejevo'ibejanëhi Onesimus ö'ego ëhi rajahiro mo baene. ¹⁸ Huhu mami'e mu sisë vaejavadoho o jasi mae sisé'e bojami'iröhoho bogo bojamijadoho uevego naro hu'o röromo jasi örire mana bojami'iro. ¹⁹ Paul naro ave jöho nasi övëro jajivoromo uave: Iae naro manaho bojami'ejöjo. Röhu jaehu mana ajemi'irane jöho na bogo ua'ejö. Èhesi bëhoho naro ja ajamijamu jero Keriso baejè'ëro ëhu'ëro bogo sisëroho va'i maro va'lo hesi jave. Röhu ë jöho bogo ua'ejö. ²⁰ Io'lo öho naehu nimaje jöho Badare jöëni ejehego mae jevo'i. Ejehoromo ëhuro Keriso-are ihoro nasi dë vövöbajo'oho sanuovehone.

²¹ Röhu na uehorovoromo uve: Naehu nimaje jöho ejeho'anuëromo ave surire jöho jajive. Iae na garomo uve: Naehu uavaje jöho jero eromo röhu gö'lo döre vae avoho'anuëjo. ²² Röhu naehu hi'irode röhohu'lo avohëhone. Èhesi bëhoho na uehorovoromo uve: Jemëhu nasi jöëni ëninamijarujohuro ëhuro God-ro ajemi'iramu na savoji gagore jioromo höröromo jemesi örire ö'ejöjo.

Christian ae göehu göehu Philemon jejamijare jöhoje.

²³ Röhu Iesu Keriso-are jöëni na'lo savoji gagore hijaje aho Epaphras-ro jasi örire jejamije. ²⁴ O Mark Aristarchus Demas Luke ëhi na'lo gemu mae Keriso-are mu vaejarue aribövioho jabu'lo jasi örire jejamijö.

²⁵ Bada Iesu Kerisoro jemesi aru'ahohu'lo jioromo huë baeromo ajëminövo'ë'e. Ahia mino'e.

HEBREWS

God-hu uavamu hesi Harihehu jö majahuijade jöhoje.

¹ Urimoho God-ro mue gö gö majae göro göro vaebe rueromo ehuro hesi jöho röjëhi'ego jö hesirire baeromo majëhinövare ariböviohuro baeromo nosi hijo miono'oho majëhinövareje. ² Èhi'obe rovadoho avevejö'e ijo tugoho'i jioröhe majaho dunovamu God-ro uavamu hesi Harihohuro jöho majahuijê'eje. ÈHarihoho God-ro uavê'ëro sa'ae bövie bise'e bamadoho èho ijonö hesi bae barê'iröhohoje. ³ Iae hu God-are aji maho baeromo ehuro no ajivavuajeje. God jiajêhi hu èhije. Hesi darugo'e jöho jövoromo ehuro sa'aho bövioho bise'oho aho'o ma'eno titimajeje. Huro nosi sisêho u'ovahuonugoromo dö mare ajiomoromo God börömo jiaje a hesi övo manö hijadeje. ⁴ Èhu'ëro jiê'ëro anerae aho'obêhe iosirëmiromo huro dö mare hijajeje. Göho hu God-are Harihëro jiê'ëro hu iho bövi maho baejamu hesi ihohuro anera jabesiroho iosirëmijê'eje.

God-are Harihehu anera ömo'ömo iosirëmijaje jöhoje.

⁵ God-are Harihehu anera jabesi iho iosirëmiromo iho börömo baejade jöho God-are surire jajivadoho gavarueje. God-ro anerae bogo gemu vadu'oho ave jöho ua'i ma-hesi Harihoho gemu uavadeje:

Ja nasi Harihoho javajêjo.

Jaruvoho naro ja baejavê'e jevajêjo.

O God anerae bogo gemu vadu'o hesi jöho jövoromo ae uê'i ma-hesi Harihu hesi jöhemu uêvadeje:

Na hesi Vavuoho jevo'i

hu nasi Harihoho jio'a'ajêjo.

⁶ Jö göho God-hu hesi Harihu Muri sa'are nugö'öjadevare evare uvadeje: Na negajêjo God nasi aneraho aho'obêhe jaburo è aho gemu rajahiruomoröhego.

⁷ O anera bogo iho masijo jio'amaje jöho huro uvê'eje:

God naro nasi aneraho avohêvego bururae'amaje hōjo.

Nasi mu ajemijarue aru'ahoho avohêvego vëni hödurae'amaje hōjo.

⁸ Anera jabesi jöho èhi uvo'i Harihu hesi jöho èhi uvê'eje:

God ja böröme namijanuohe èhi namiemu namibe va'a'anuêjo.

Böröme namiromo jero jasi öri ari'ohe avoho muebejanue hōjo.

⁹ Ja mu maho nimo'i mu sisêho bijönimanue hōjo.

Èhuni God jasi A Börömoho naro ja baejavoromo huê mabêhe bojami-jamu

jero jasi aribövioho iosirëmijê'ëro ja börömoho javajêjo.

¹⁰ Röhu God-are Harihu hesi örire jö göho èhi uvê'eje:

Bada ni'i'ivadiroho jero sa'aho bamane hōjo.

Ö'idöhu'o jasi övëro avohane hōjo.

¹¹ Sa'ahu'o ö'idöhu'o barê'i a'i jero birivoromo hiemu hi'a'anuêjo.

Sa'ahu'o ö'idöhu'o niögëro buraerovanovo'ajêjo.

¹² Aehu niögu suhi'o muotoho bahijaruêhi èhi ö'idöho sa'aho rori'o bahi'anuêjo.

Aehu niögu jijö boremi'ö'i i'io io'amaruëhi ö'idö mamioho sa'a mamioho
ëhi mu'u'i i'e avoho'anuëjo.

A'i ja vadune manaere aho'o ëhi ma-jiemu jiobe va'a'anuëjo.

¹³ God-ro anerae bogo gemu vadu'oho ua'i ma-hesi Harihohemu
uavadeje:

Nasi övo manö ro hijego

ja'o muorovarue aribövioho naro ruahö'öjëvego

hörëro vijuvo taemo'amo'irane höjo.

¹⁴ Harihoho ëhi böröme jio'i a'i anerae aho'o jabumë ma-God-are mu
vaejharue aru'ahe jio'ame. Ëhi jio'amë'ëro God-ro rëmö'öjëgo jaburo
rueromo God-hu ijonö mare ramuo'iröhe aribövioho no ajamuijarueje.
Ëhu'ëro jië'ëro God-are Harihohuro aneraho iosirëmiromo hu börömo
mahoje.

2

*God-hu baejavuoromo mare ramuaje jö noehu avoho uehorovo'iröhe
jöhoje.*

¹ God-are Harihohuro aneraho iosirëmiromo hu böröme jië'ëgo ëhuni
noehu God-are jö hejaroho bogo rumonimo'i biririvoromo ma'eno'ëjo
jöho nugo'i öre gö va'ojöëni. ² Urimoho aneraëro Jew rajo hijo
miono'oho God-are jöho bojëmareje. Ëaneraho bogo masijehu jëvadeje
röhu jabesi jöho bogo sareri'ehu jio'i iae mae jadeje. Iae mae jië'ëro
ae rahu jö bogo ejëho'i mu gö gö vaejë'oho i'ue mana baenövareje.
³ A'i jaruvoho God-hu nosi aru'aho mare ramuaje jö bojamuijadoho
ëho jö börömeje. Ae rahu ë jö vuonugë'oho i'ue baejöëni gororomo
huruomoromo dinö'e va'ëjo. Huruomo'iröhe öroho bogoje. Ëhesi
bëhoho bogo aneraho uö'i Badaro aevoromo hesi jö'ëro majahuijamu
jö hejare aribövioho jaburo ë jöe gemuoho majahuiromo uövuareje: Iae
mae-ëjo. ⁴ Röhu bogo jabesi sivuoho ëma majahui'i a'i God-ro jabesi
jöho ajëmiromo bogo gavarue darugo'e mue gö gö vaenövadeje noro
garomo jöho mae uehorovoröhego. Darugo'e muoho vaeromo huhu
nimadëhi hesi Aru'ahoho ua'ëgo noehu mu mae vaeröhe suvuore gö
gö ëhi bojamuinövadeje noro ëhu'o garomo jöho mae uehorovoröhego.

Iesu hu baejavuoromo manö ramuade a böröme jiaje jöhoje.

⁵ Röhu ëhi jië'e mu masijoho ëho u'emu jioröhe öri ari'o i'o hesi
muohoje. Na ë hesi jöho jajive. God-ro ë öri ari'o i'o bamo'i
uehorovadevaroho bogo uvadeje: Aneraëro masije riravoromo ë öri
ari'oho mueberuomajëjo. ⁶ Bogo aneraho jaburo mueberöhego uvo'i
a'i jöe gö God-are surire uvë'ëje:

God-ajo. Sa'are aribövioho ma-bise'e javuajëjo.

Röhu jero nosi jöëni uehorovanue höjo.

Nosi ihoho bogojavuanovajëjo.

Röhu jero no muebejavuanue höjo.

⁷ Anera masijo jio'amaje jabesi bëhire sa'are aribövioho no bamavuane
höjo.

Ajohu'o iho mabëhohu'o bojamuane höjo.

⁸ Noro hörëro taemoromo muebe'amoröhego bövie bise'e nosi hörü
uhunö bahijahuane höjo.

Ëhi jajivë'eje. Bövi bise'o nosi höru uhunö bahijade jö hesi bēhoho aho noro aho'obēhe ruahö'ō'amoromo muebe barē hesi javue. Röhu avevejö'oho bövioho bise'oho nosi höru uhuroho bogojavuë'ëro ëhu'ëro aho no bogo aho'obēhe taemoromo muebe'amarueje. Ëhi jië'e muoho nosi nunoho bogo gavarueje u'emu garöhëro. ⁹ A'i noro ae gemu Iesu iae gavö. Iesu hu dōre jiadoho God-ro hesi nimoro huē baejavuoromo hu uavamu ruvebiromo anera jabesi bēhire hijadeje ae aho'obēhe noni guomorōhego. Hiromo vavaene baeromo guomamu ëhuni God-ro hu dōro bamoromo ajohu'o iho mabēhohu'o bojamamu baejadeje. Ëho iae no gavö. ¹⁰ God-ro aboji harihu'e aho'obēhe aji'ere sōjavuo ujuoho va'i nimamu ëhuni baejavuoromo mare ramuo'irōhe a bōrōmoho Iesu uavadeje huro vi'ehe baejōro ëhuro mue aho'obēhe ruaho'amoromo eni romoromemu jiego no baejavuoromo maro ramuo'irōhego. God-hu bövi bise'o avohoromo muebe'amajohuni ëhuni huhu Iesu ëhi uavadoho mae jiadeje.

¹¹ Röhu nosi sisë u'ovahuaje aho Iesuoje. Sisë javuego u'ovahuaje aribövioho iae no javue. Röhu hesi Vavuohu'o nosi Vavuohu'o gemuohoje. Vavue gemuoho javuë'ëro Iesuro bogo javojimo'i ma-uvajeje: No ö mueno'e gemuoho javuajëjo. ¹² Iesuhu uvaje no ö mueno'e gemuoho javuajë uvaje jōho God-are surire jajivoromo ëhi uvë'eje: God jasi jōho naro majëhi'iramunasi ö mueno'ohuro heruomō'ajëjo. Naro jasi ariböviohu'o gemuore hiromo jasi örire rajahiromo jōho io'ejōjo.

¹³ Röhu Iesu ae aho'o no'o gemuore jiaje jōho gö'o jajivoromo uvë'eje: Naro uvonövo'ejōjo: Hesi God-ro gemuëro ajemi'ajëjo. Röhu jōe gö'o uvë'eje: Na aviae jevajëjo. Na God-hu bojemade aboji harihu'ohu'o gemu mae hijajëjo. Iesu'o no'o gemu mae javuaje jōho ëhi jajivë'eje.

¹⁴ God-are aboji harihu'e javuajë uvadeje. Röhu aboji harihu'ohu'o no sino haho'e biroge kōe javuë'ëro ëhuni Kerisoro araeromo hu'o sino haho'e biroge kōe ëhi gemuoho baejadeje ëhuro guomoröhëro. Guomego vuovo'irōhe öri hesi vörö baejaje aho Satan hesi darugoho mu'uvaho barë'irōhego. ¹⁵ Satan-are darugoho mu'uvahëgo no vuovavuorōhe ë hesi juhuonoho barëjahuo'irōhego. Ëhesi bēhoho urimë'i vuovavuo'irōhoho uehorovoromo juhuonivobe rovarëje. Juhuoni juhuoni raromaroho diehi'oromo vuonugojöëni ëhuni sisë'i raromareje. Ëhi jië'e juhuonoho barëjahuo'irōhego ëhuni guomadeje. ¹⁶ Aveho iae mae. Iesuro bogo aneraho ajëmi'i a'i Abraham-are ujoho no ajamuijajeje. ¹⁷ Ëhu'ëro jië'ëro huro araeromo hesi ijoraje nomë va'ëne jiadeje. Ëöre gemu jiadeje ëhuro hu God-are muoho vaeromo priest bōrōme mabēhe jioröhëro. Ëhi jië'e priest jioromo noni vavaenimoromo muoho avoho vaeromo a nosi sisëho u'ovahuoröhëro. Ëhuni no va'ëne jiadeje. ¹⁸ Sisëhuro Iesuarë dëre bijiohamu vavaene baejë'ëro ëhu'ëro huro garōhe sisëhu nosi dëre bijioho gövuego huhu ajamui'irōhoho iae hu eni jie.

3

Iesuhu Moses iosiramiromo bōrōme jiaje jōhoje.

¹ Christian aganomë God-ro uëvadeje jemë'o hesinö jëvojōro. Ëhuni Iesu uehorovo avohore. Iesuro God-are ihore jōe majahuijajeje. Hu

nosi priest börömohe. Èhu'ëro noro hu mae uehorovoromo hesi jöho huruoho majëhijarueje. ² Huro God-are örire muoho baeromo ë muoho avoho vaenövadeje. Urimë'i Moses-hu God-are mu avoho vaejahoromo God-are aribövie aho'o muebejëvonövadëhi Iesuro ëhi gemuoho ë'adeje. ³ Röhu Iesuro Moses iosiramiro mo iho börömohe bajë'eje. Èhesi bëhoho Moses hu ma-God-are agane gemuoho jio'i Iesu hu God-are agano gagovade aeje. Èaganoho gagovë'ëro ëhu'ëro Iesuare ihohuro Moses-are ihoho iosiramijë'eje. ⁴ Agane gö gö bogo ëma jio'i aëro gagovoromo gemuoro nugo'amë'eje. Agano gagovoromo bövi bise'o avoho'amade aho God-je. ⁵ Moses God-are mue vaejahaje aëro jië'ëro God-are agano ioro'iorohu'o hiromo hesi muoho avoho vaenövadeje. God-are muoho avoho vaeromo God-hu ijönö majahui'iröhe jö jiajëhi jië'e jöho huro urimo ae majëhinövadeje. ⁶ A'i Keriso bogo ma-mu vaejahaje aehu jio'i hu God-are Harihe jiadeje. Hu God-are Harihëro jië'ëro God-are agano avoho muebe'amajeje. No'o God-are agane javue. God-hu maro ramuoröhe jöho bogo vuonugo'i biririvoromo nimorohë'i uehorovobe va'ë'ohuro ehuro no ëhi javue.

God-are ariböviehu nuho 'iröhe jöhoje.

⁷ Èhuni God-are Aru'aho hesi jöho avoho ejahore. Hesi surire jöho ëhi uvë'eje:

Ave jaruvore majaroho God-hu majëhijaje jö hejë'iroho

⁸ nadi hia'oho biriri'övorëjo.

Jemesi hijo miono'ehu hia'i biriri'övoromo God na'o muorovarëhioho nadi ëhioho ë'orëjo.

Jabuhu a rumo'e sa'are raromoro mo God nasi dë bijioho gavarehioho nadi ëhioho ömorëjo.

⁹ Jemesi hijo miono'ohuro nasi mu masijo gabe rovaroho ëho bogo uehorovo'i nasi dë bijioho gebe rovaroho vadune 40 barëjade höjo.

¹⁰ Èhuni God naro ë aribövi jabesi örire bijönimoro mo uvode höjo:

Majae ëhi jabumë dë vövöbajo'ere sisë'i uehorovo'i

nasi mu hesi öroho bogo avoho baeruumë'e höjo.

¹¹ Èhi uvoromo naro dë vörönegamu jöe darugo'o jövoromo uvode höjo:

Jabumë bogo na'oho ro raromoro mo nuhoruom'o'ajëjo. Bogo mae bogajo.

¹² Agonomë ëhi jajivë'e jiaje ehuni gavë'i raromoro. Jemë a ioro'iorohuro God bogo ma uehorovarue uehoro sisëho baeromo ehuro darugo'e aho God vuonugo'aruje. ¹³ A'i göëro göho jögore mamirovore.

God-are surire mami'e adahare jöho uövüë'eje: Ave jaruvore majaroho nadi hia'oho biriri'övorëjo. Èuövuade jaruvore majaho bogo

barëjë'e jiaje evaro majae ëhi göëro göho jögore mamirovore ehuro jemë a ioro'iorohuro sisëho garomo bogo simane huotorovoromo

ëhioho hia'oho biriri'övo'irarije. ¹⁴ Jögoru mamirovo'irarije hesi bëhoho noehu aevo'i biririvoromo mae uehorovarëhi jië'e uehore gemuoho

ma'eno titimobe va'ojuvo majae barëjamu bogo vuonugë'ohuro ehuro no Keriso'o gemu mae javuajaje.

¹⁵ God-are surire mami'e adahare jöho uövüë'eje:

Ave jaruvore majaroho God-hu majëhijaje jö hejë'iroho

nadi hia'oho biriri'övorëjo.

Jemesi hijo miono'ehu hia'i biriri'övoromo God na'o muorovarëhioho nadi ëhioho ë'orëjo.

¹⁶ Röhu rahumëro jöho heromo ri'öromomo God'ohomo muorovareje. Moses-hu Egypt sa'are jioromo söjëvo rovade aribövioho ae aho'o jaburo huotorovoromo God'ohomo muorovareje. ¹⁷ O God-ro rahumesi öriroho bijönimobe rovadoho vadune 40-ho barëjadeje. God-ro mu sisë vaeruomaje aribövioho bijönimadeje. Ëaribövioho sisë vaeruomë'ëro ëhu'ëro a rumo'e sa'are vuovo momorö'öbe va'oruomadeje. ¹⁸ O God-ro jöe darugo'ohomo uvadeje: Jabumë bogomo na'ohomo ro raromoromo nuhoruomoma'ajëjo. Bogomo mae bogajo. Ëho rahumesi jöho jövadeje. Jö bogomo ejahare aribövi jabesi jöho jövadeje. ¹⁹ Ëhu'ëro jië'ëro no garomomo uvö: Nosi hijo miono'ehu bogomo ma uehorovarohuro ëhuro jabesi sa'are va'ohomo nuho'iröhohomo bogomo eni jëvade höjo.

4

¹ God-ro mae uövuë'eje noro va'oromomo hu'ohomo raromoromomo nuhoröhego. Ëhuhu uövuade jöho bogomo barëjë'e jiaje ëhuni juhuonivoromomo gavë'i raromoro. Ijonö God-ro a ioro'ioro jemesi muohomo garomomo uvojöëni: Rueromomo na'ohomo nuho'irarijohomo jemë bogomo eni jëvajë uvojöëni uëve. ² No God-are jö maho hejë'e javue. Urimë'i a rumo'e sa'are jijjhoruomade ë aribövioho jabu'ohomo ë jö maho hejareje. Hejareje röhu bogomo marëjëvadeje ë hesi bëhohomo hejare jöho bogomo ma uehorovë'ëro. ³ A'i no Iesu mae uehorovarue ariböviohuro iae va'ohomo God'ohomo gemu mae raromoromomo nuharueje. Ënuho'iröhe jö God-are surire adahare jöho ëhi uövuë'eje:

Naro dë vörönegamomo jöe darugo'ohomo jövoromomo uvode höjo:

Jabumë bogomo na'ohomo ro raromoromomo nuhoruomoma'ajëjo. Bogomo mae bogajo.

Ëhi jajivë'eje röhu ë hesi urimomo God-ro sa'ae bövie bise'e bamamomo evare hesi muohomo barëjë'ëro jaruvohomo bogojë. ⁴ God-hu muo barëjade jö God-are surire jajivarohomo majae 6-ho barë'i 7 jiaje jö jajivarire ë gavarueje. Ëjöhomo ëhi uvë'eje: Majae aho'obëhe 6-ho barë'i röhu 7 jiamu gavë'i God-ro hesi muohomo aho'obëhe vuonugoma'ihomo nuhade höjo. ⁵ Röhu ave God-are surire jöhuhomo jajivoromomo uövuë'eje: Jabumë bogomo na'ohomo ro raromoromomo nuhoruomoma'ajëjo. Bogomo mae bogajo. ⁶ Ëhu'ëro jië'ëro urimë'i God-are jö maho heruomade ariböviohuro hesi jöho bogomo ejahoromomo ëhuro bogomo va'ohomo hu'ohomo gemuorohomo raromoromomo nuhareje. O ae göehu göehu va'oromomo God'ohomo raromoromomo nuho'iröhe jöho bogomo barë'i iae ëhi gemuohojë. ⁷ Ëhuni God-ro majae gö bamoromomo uvë'eje: Ave jaruvore majahajo. Ëhesi bëhohomo urimë'i hia'i biriri'övore aribövioho vuovëvadohomo va'ojuvo majae ëgo'ohomo barëjamu evare God-ro uavamomo David-ro noehu adahare jöho jajivoromomo uvadeje:

Ave jaruvore majarohomo God-hu majëhijajë jö hejë'irohomo nadi hia'ohomo biriri'övorëjo.

⁸ Urimë'i Joshua-hu Israel aribövi jabesi sa'are söjëvo va'adevare ë ariböviohuro God'ohomo raromoromomo nuhoruomoma'ibejomo majae göre nuho'iröhe jöho God bogomo bamoma'ibejomo. Röhu jabumë bogomo God'ohomo raromoromomo nuhareje. ⁹ Bogomo nuhë'ëro ëhu'ëro God-are ariböviehu nuho'iröhe jöho bogomo barë'i iae ëhijë. Urimë'i majae aho'obëhe 6-ho

barë'i majae 7 jiamu God-hu aevoromo nuhade ëhi jië'e nuho majaho God-ro noni bamahuë'je. ¹⁰ Èhesi bëhoho God-hu hesi mu vuonugo'i nuhadëhi ae rahu va'o God'o raromoromo nuhë'oho i'u'e muoho ëhi vuonugo'i nuhoruomajeje. ¹¹ Èhuni no va'o God'o raromoromo nuho'iröhoho avoho vae ga'ejo ëhuro ë hijo miono'ehu God-are jö bijönimoromo sa'are rireromarëhioho no bogo ëhioho ë'iröhëro.

¹² God-are jöho darugo ma-ma'jeje. Darugo ma-ma'ëro jië'ëro ë jöho kaejö va'ëneje. Hesi kaejö anio ruë jio vië jië'ohuro nosi dëre nure aho'obëhe ro bijioho gövuajeje. Röhu nosi kaejöhö anio rumo'e jio'amoli God-are kaejöhö anio ma-ma'jeje. Èhuni no diehi diehi nosi uhure uehorovoromo nimaruoho God-ro nosi dë vövöbajo'ere göromo hesi jöho ma-darugo'o ahorirëro majahuijajeje. ¹³ Iae ae bövie bise'e God-hu bamavuadoho hesi nuniroho bogo gurihiroho javuo'i a'i aho'obëhe God-hu gövuajoho ma-va'orahoro gemu javue. God nosi börömege noro hesi nunire riravoromo ua'ejo: Iae no ëhi ëhi vaejë'e javuajëjo. Èahuro no gö barëjë'jeje.

Iesu hu priest börömo ma jiaje jöhoje.

¹⁴ Röhu no priest börömo maho javue. Huro ö'idöre God-hu jiaje mare ë ajiomadeje. Hesi ihoho Iesuoje. Hu God-are Hariheje. Èhuni noro mae uehorovoromo huruoho majëhijarue jöho ma'eno titimo'ejo. ¹⁵ Nosi priest börömhuro gövuaje nosi uehoroho darugoho u'uhoromo mu sisë vae hesi javuego göromo hu bogo ma-nunëremuoho gövuajeje. Nosi dëre mu sisëhu rabehu rabehu bijahuo'i hijajëhi sisëhuro nosi priest börömo hesi örire ëhi gemuoho vaejadeje. Èhi gemuoho vaejamu bogo ejadeje. ¹⁶ Èhuni ë'ego no birivoromo God-hu börömo namiromo hijajire ë va'oromo nosi jöho majahinövo'iro God-hu hesi nimoro ajamuijajohuni. Noehu va'oromo jö majahijë'oho huë vavaene baejavuo'iramu evare huro noni vavaenimoromo huë baejavuoromo ajamui'iramu mae javuo'ë'e.

5

¹ Ave sa'are raromarue priest masijo jabetesi muoho aviëhije. Ae gemu ae aho'obëhe jabetesirire jiego God-ro baeromo muro bamajeje huro God-are muoho ë aribövi jabetesi jöëni vaeröhëgo. Muro bamë'ëro priest börömhuro ë aribövi jabetesi jöëni muoho vaeromo mi suvuorohu'o suvuoro ioro'iorohu'o God-are örire bojamijajeje huro jabetesi sisëho uehorovoromo vuonugëhoröhëgo. ² Ave sa'are hijaje priest börömhuro garöhe ae gö simane garaejanovamu o öre sisë'i sisë'i jijihamu gëvë'oho uvo'ë'e: Priest-oho na'o u'uhevë'ëro ëhi jië'e mu sisëhuro baejevaje höromo jögoroho ma-u'emu avoho majëhi'ë'e. ³ Ave sa'are priest börömhö u'uhë'ëro mu sisë vaejajeje. Mu sisë vaejajëro jië'ëro bogo a ioro'ioro jabetesi sisënioho gemu a'i hesi sisëhuni mi suvuoroho God bojami'ë'e huro hesi sisëhu'o uehorovoromo vuonugahoröhëgo. Bogo bojamijë'oho sisëje. ⁴ O aevoromo priest börömo mu vae'ie'iroho aho bogo sivuoho uehorovoromo döroho bamorovoromo priest börömo muoho bae'i a'i God-hu uavë'ohuro ëhuro priest muoho baejajeje. Priest börömo aevo'i jiade hesi ihoho Aaron God-hu uavamu priest mu baejadëhi God-hu uavë'ohuro priest muoho ëhi baejajeje.

⁵ God-hu uavego priest mu baejaruëhi ëhi Kerisoro hu'o bogo hesi sivuoho uehorovoromo döroho bamorovoromo priest börömo muoho bae'i a'i God-ro priest muro bamoromo Keriso uavadeje:

Ja nasi Harihoho javajëjo.

Jaruvoho naro ja baejavë'e jevajëjo.

⁶ O God-hu priest mu bojamade jö göho jajivoromo ëhi uvë'eje:

Melchizedek priest jiadëhi

ja ëhi priest jianuoho ëhi jiemu javo'ajëjo.

⁷ Iae Iesuro ave sa'are hijadevare evare uvadeje: God ajemego bogo guomevo'iröhoho iae eni hö uvoromo darugo'o uvë'i nivë'i ëninamiromo ua gavadeje ajamijöro. Iesuro God-hu nimajoho ma-u'emu ejahonövë'ëro ëhuni God-ro hesi jöho ejahadeje. ⁸ Hu God-are Harihe jiadeje röhu vi'ehe baeromo ëhuro God-are jö ejaho'iröhe öroho gavadeje. ⁹ God ejaho'iröhe öroho ganugoromo eni romorome jiamu evare öroho jiovuadeje ëhuro ae rahu hesi jö ejahë'o ho ma-ioro'ioremu maro raromoröhego. ¹⁰ O God-ro jöe majahiro mo Iesu uavadeje: Ja priest börömo ho javajëjo. Melchizedek priest jiadëhi ja ëhi javanovajëjo.

Noehu Iesu uehorovaruoho bogo vuonugo'iröhe jöhoje.

¹¹ Melchizedek-are jöho aho'obëhe majëhi'irodoho jeve. Röhu jemesi simanoho i'u'eje. Na diehi diehi jöho röjëhi'ejo. ¹² Jemë Christian vaejarijoho majae ëgobövie baejë'e jëve. Ëhuni jemëro ae gö jö röjëhi'irarijoho eni jëvo'ibejo iae mae jio'ibejo. Röhu jöho bogo avoho baejë'ëro jemë nimarujeje God-are jö aevo'i röjëhijamu hejarijoho aëro röhu maho röjëhijöro. Jemë amure asisö'oho va'ëne jëvanove. Biriri'e i ma bogo ue'aharuje aribövie jëve. ¹³ Amemu ue'ahë'e Christian aribövioho ma-asisö'o va'ënëro jëvë'ëro mu ma hesi jöho bogo ömo gavë'ejö. ¹⁴ A'i biriri'e i maho hesi a ma'ëremu ue'ahoruomajeje. Ëhi jië'e Christian ariböviohuro mami'e muoho ömo garomo simanoho avoho uehorovobe rovë'ëro ëhu'ëro gavarueje di muoho mae jiego di muoho sisë jiego.

6

¹ Asisö'ehu uehorovaruëhi ëhi uehorovaruje jëvaje ëhuni ë'ego no Keriso-are jö samaho samaho urimo hejaroho bogo ëhemuoho uehorovo'i a'i hesi jöho i'e gö'o gö'o döre uehorovobe va'i ëhuro a duvahehu uehorovaruëhi ëhi uehorovo'iröhe. Christian mu vae'iröhe jö aevoromo ae röjëhijaruoho bogo ëhemuoho jemesi öriroho röjëhi'i ari'ejo. Mu sisë vaeromo sisërëjaruoho vuonugo'iröhe jö hesi bëhoho God ma uehorovarue jö hesi bëhoho ² sisë jovehu u'ovarue jö hesi bëhoho övo simano taemarue jö hesi bëhoho ijönö vuovoromo ri'ö'iröhe jö hesi bëhoho mana mae o sisë God-aro ioro'ioremu bae'iröhe jö hesi bëhoho ëhi jië'e jö urimo röjëhijaruoho bogo ë jöe gemuohemu röjëhi'i ari'ejo. ³ A'i God-hu nimë'oho jö i'e gö gö uehorovobe va'ejo a duvaho va'ëne javuojöro.

⁴ O aehu urimo God-are nuni aji'e jö baeromo ö'idö hesi suvoro garomo God-are Aru'aho no'o gemu mae baeromo ⁵ hesi jö ma heromu vuëvëvamu ijönö bae'iröhe darugoho gö avevejö'e baebe va'ojuvo ⁶ röhu huotorovoromo Keriso uehorovaruoho vuonugo barëjë'oho ëhi

jië'oho no diehi'oromo ajëmi'ejo jabumë röhu maho sisëho vuonugo'i huotorovoromo mae uehorovo'iröhego. Öre bogoje. Rabëni ëhi jië'e aribövioho jakesi dë vövöbajolare sisë'i uehorovaruohuro ëhuro God-are Harihoho korosire röhu maho ano taemanovoruomajeje. Ano taemanovoromo ëhuro Iesuare ihoho a nuniro ijumoruomajeje.

⁷ God-are huë mae baeve va'ojuvo Keriso vuonugo'iröhe jöho naro uhunö'e i'o mu'ero bamo'ejo. Ënëro mure rue'i hiromo sa'ae sanuovego ëhuro iruno'e bövie bise'e ri'amego mu arijo'oho jaburo mabëhe gagovo bahiruomajeje. Ëhi jië'e i'o mu'oho God-ro avoho muebe'iramu ma-mabëhe jio'ë'e. ⁸ O ënehu mure rue'i hijamu röhu mure mabibë'e resu resu sisëhuremu ri'amë'oho uvarueje: Ëi'o mu'oho sisë höjo. Ëhi'ego God-ro i'o mu'oho ma-sisë'i avoho hesije vëniro bue'öromo ijumo barë nahonahovo'iröhëro.

⁹ Nasi aganomë iae na ëhi jië'e jögoroho uhu'e majëhijë'e jeve. Röhu na uehoro mae baeromo uve: Jemë bogo ëhioho jëväjëjo. Iae aji maho baejë'ëro God'o maro raromo hesi jëväjëjo. ¹⁰ God bogo sisë'ioho uehorovajeje. Jemëhu mu ma vaejarijoho hu bogo rumonimo'ë'e. O jemëhu hesi örire uehorovoromo hesi aribövi ajëmijarijoho röhu jaruvohu'o ëhi gemuoho ajëmijarujoho ëhu'o bogo rumonimo'ë'e. ¹¹ Röhu na negajoho jemë ae gemu gemu jemëhu God-are muemu nimo avoharujëhi ëhi gemuoho nimo avohobe va'ojuvo hujeji maja viture jemë nimoromo muebejarujoho bae'a'aruje. ¹² O jemëhu God-are jö uehorovarujoho u'uhëvo'iröhoho na bijönege. A'i na nege a ioro'iorehu biririvoromo God mae uehorovoromo ëhuro huhu ajëmi'i uëvadoho birohauëhi jemë'o jakesi muoho gavë'i ëhi ë'iririjego.

God-hu ajamui'iröhëro mae uövuade jö noehu biririvoromo mae uehorovo'iröhe jöhoje.

¹³ Iae God-ro Abraham ajami'i uavadeje. Röhu bogo ma-ua'i a'i darugo'e jöho majahiromo ëhi mae uavadeje. Ae gö God iosiramiro mo börömo jië'oho bogojiadeje God-hu ë a hesi iho uvoromo darugo'e jö majahi'iröhoho. Ëhu'ëro jië'ëro hesi ihoho uvoromo ëhuro hesi darugo'e jöho majahiromo ¹⁴ Abraham uavadeje: Iae naro jasi örire mae vaejavoromo a uje aho'obëhe bojamibe va'ejöjo. ¹⁵ Bojamibe va'ejöjamu Abraham-ro heromo biririvoromo uvo'i hinövadeje: Na iae bae'ejö uvoromo God-hu uavade ujoho iae birohadeje. ¹⁶ Sa'are aribövi noehu darugo'e jö majëhijë'oho ae gö hesi ihehu nosi iho iosiramuiromo hu börömo jiaje ë a hesi ihoho uvoromo darugo'e jöho majëhiromo ëhuro mae uëvarueje. Ëhi ë'ë'oho aho bogo ijönöho ë jöho aho uö'ë'ö. ¹⁷ O God-ro nimadeje hu ajamui'i uövuade aribövioho röjahuijego noro garomo uvoröhego: Iae mae-ëjo. God-ro ajamui'i nimadoho bogo vuonugo'ajë uvoröhego. God-ro ëhi nimoromo hesi iho uvadohuro ëhuro darugo'e jöho Abraham majahijadeje. ¹⁸ Ëhu'ëro jië'ëro God-hu ajami'i uvade jöhu'o hesi iho uvoromo darugo'o uvade jöhu'o ë jöe niö'ioho bogo sisërë'ë'e. Ëjöhö God bogo sareramui'ë'e. Ëhuni nomëro mami'e huruomoromo God-are burure va'ë'ëro uvo'ejo: God jö maemu jövajëromo ëhuro uehoro mae bae avohoromo biririvoromo uvo'ejo: Iae huro uövuadëhi iae ëhi maro ramuo'ajëjo. ¹⁹ Hisiehu munë beromo e' u derire ba'amego vanagi ma'enegö namijajëhi huhu

maro ramuo'iröhe jöho noro uehorovoromo nosi dë vövöbajo'oho birivoromo riravarueje. Iae uvarueje: God'lo nosi ririre urahadoho Iesuro niögunö'e babu'öromo God-hu jiajire nosi sisëhe avohahu'li va'o hijë'ëro jië'ëro iae ëhuni huro ijonö maro bamavuo'ajë uvoromo ëhuro bibivoromo riravarueje. ²⁰ Iae God-hu jiajire Iesuro nosi jöëni urimo va'ë'eje. Hu priest böröme vaejë'eje. Priest böröme vaejë'ëro Melchizedek priest jiadëhi hu ëhi priest jiajoho ëhi jiemu jio'ë'e.

7

Priest hesi ihe Melchizedek-are jöhoje.

¹ Melchizedek hu Salem amore böröme naminövade ae jiadeje. O göho hu God dö mare hijaje hesi priest böröme jiadeje. Abraham-ro a masijohu'o muorovoromo muo'amonugoromo rovamu gagorovo Melchizedek-ro hu bihoromo huë mae hi'iröhe jöho bojamadeje. ² Bojamamu Abraham-ro ujuoho rovade inömo inömoho aho'obëhe mevoromo hue aho'o 10 bahiromo 9-ho hesi bahi'li gemu God-are suvuro maho Melchizedek mamadeje. Röhu Melchizedek-are iho huotovë'oho ëho aji'e mu ma muebejaje a börömohoje. O hesi amo ihe Salem hu ë amo hesi a börömoho jiadeje. Salem amo hesi a börömo jiade ë jö hesi bëhi huotovë'oho huë baerovarue mu muebejaje a börömohoje. Melchizedek ëhi jië'e a böröme jiadeje. ³ Hesi vëmu vavu'e hijo miono'e jabesi jöho bogoje. Hu rahade guomade maja hesi jöho bogoje. Èhu'ëro God-are Harihe hu ioro'ioremu priest jiemu jiajëhi Melchizedek ëhi jianove.

⁴ Jemë'o uehorovore. Melchizedek hu a böröme jiadeje. Èhesi bëhoho Abraham hu Israel rajo nosi ni'ivade bëhoho jiadeje röhu muorovoromo ujuoho rovade inömoho ëho mevoromo hue 10 bahiromo God-are suvuro maho gemu Melchizedek-are örire mamadeje. Abraham-ro God-are suvuro maho Melchizedek mamijë'ëro ëhu'ëro no garomo uvarueje: Melchizedek-ro Abraham iosiramiro mo börömo mae jiade höjo. ⁵ O Abraham-are uje gemu Levi jiadeje. Levi-are ado sirino'e jiobe rovaje priest-oho jaburo God-are jögoroho ejahoromo Israel rajo aribövi ioro'ioro jabesi örire God-are suvuro maho ujuoharueje. Priest-ehu suvuro ujuoho'ia'amu gavë'iroho Israel rajo ioro'iorohuro jabesi inömo inöme mevoromo hue aho'o 10 bahi'amego priest-ohuro God-are suvuro maho gemu baeruomajeje. Levi rajo priest-ohuro jabesi sa'a rajo jabesi örire suvuroho ëhi baeruomajeje. Jabesi sa'a rajoho jabu'o Abraham-are agane gemuho jioruome röhu jabesi örire ëhi jië'e suvuroho baeruomajeje. ⁶ A'li Melchizedek bogo Levi rajo aganho jiadeje röhu huro Abraham-are örire God-are suvuro maho baejadeje. Baeromo huë mae hi'iröhe jöho Abraham majahijadeje. Abraham hu God-ro ajami'iröhe jöho majahijamu hejë'ëro ëhu'ëro iae hu huë mabëhe birohë'e jiadeje röhu Melchizedek-ro Abraham-are örire huë mae hi'iröhe jöho majahijadeje. ⁷ Röhu huë mae raramo'iröhe jö heruomaje aribövioho ma-jianovo'li a'i ëhi jië'e huë mae jö majëhijarue aribövioho masije jio'amajeje. Èhi jiajoho iae no ae aho'obëhe gavarueje. Èhuni Melchizedek-ro Abraham-hu huë mae hi'iröhe jöho majahijë'ëro ëhu'ëro no gavö Melchizedek-ro Abraham iosiramiro mo börömoho jië'e jio'ego. ⁸ O Levi rajo priest ömo'öme

God-are suvuoro ujuoharuoho jabumë vuovarueje. A'i Melchizedek suvuoro ujuohadoho ë a hesi jöho God-are surire uvë'eje: Hu iae hijajëjo. ⁹ Iae Levi-are ujo ömo'ömhuro God-are suvuoro maho ujuoharueje röhu Abraham-hu Melchizedek God-are suvuoro bojamadevare Levi hu'o ë suvuoroho Melchizedek bojamanovadeje. ¹⁰ Ëhesi bëhoho Levi hu bogo rahë'e hesi hije Abraham-are visöro jië'iro evare majare Melchizedek-ro Abraham birohadeje.

¹¹ Röhu Levi rajo ae Aaron'o hesi ujohu'o Jew rajo jabesi jögoroho muebenövareje. Muebejaroho jabesi muohuro ioro'ioire gemu ae ajëmi'ibejo priest göho bogo rue'ibejo. Röhu jemë'o uehorovore. Jabesi muoho bogo eni jië'ëro ëhuni God-ro priest i'e gö baejadeje. Bogo Aaron-are ujo va'ëne priest-oho bae'i a'i Melchizedek jiade ëhi jië'e priest-oho baejadeje. ¹² Levi rajo priest-oho vuonugo'amo'i priest i'e gö baejë'ëro ëhu'ëro jabuhu muebejare jögoroho ëhu'o vuonugo'i jögoru i'e rovë'eje. ¹³ Röhu nosi Bada Melchizedek va'ëne priest jioröhe hesi jö God-are surire jajivaroho ë aho bogo Levi rajo aehu jio'i hesi ae gö jiadeje hesi aganoho priest muoho bogo vaeromo God-are suvuoro bahijarue maratuoho bogo muebenövë'ëro. ¹⁴ No ae aho'o gavarueje nosi Badare agano ihoho Judah rajemu jio'amego. Röhu Moses-hu priest mu jö jövadiroho hu bogo uvadeje: Judah rajëro ë muoho vae'a'aruëjo.

Iesu Melchizedek va'ëne priest jiaje jöhoje.

¹⁵ Röhu priest gö Iesu Melchizedek priest jiadëhi jië'e priest-oho iae rovë'eje. Ëhu'ëro iae no ma-samae gavarueje priest mamiohu'o jögoru mamiohu'o barë'i i'e rovë'e jiejo. ¹⁶ Ëi'o rovade priest-oho hu bogo vavuehu mu vaejade siono harihehu baeröhe ë hesi jögoroho ejë'ëro bogo ëhuro priest muoho bae'i a'i ioro'ioiremu hi'iröhe darugoho baejë'ëro ëhu'ëro priest muoho baejadeje. ¹⁷ Ëioro'ioiremu hi'iröhe jöho God-are surire jajivoromo uövuë'eje: Melchizedek priest jiadëhi ja ëhi priest jianuoho ëhi jiemu javo'ajëjo. ¹⁸ Urimore jionövade jögoroho u'uhë'ëro jië'ëro ëhu'ëro bogo maho ajamuinövadeje. Ëhuni God-ro ë jögoru hesi öroho tugohadeje. ¹⁹ Ëhesi bëhoho ë jögoroho bogo ae gemu vadu'oho ajamui'ego ioro'ioiremu maroho javuonövadeje. A'i God-ro öri i'e jiovahuë'eje. Ëöri i'ohuro öri mamioho iosiramiromo mamabëhe jië'eje. Ëöri i'o hesi bëhoho no nimorohë'i uvarueje: Iae God-ro ajamui'iramu maro raromo'ejarëjo. Ëuehoro mabëhoho javuë'ëro God-are bëhire va'arueje.

²⁰ Röhu God-ro Iesu priest muroho bogo ëma bamo'i a'i darugo'e jöho uvoromo bamadeje. Urimoho Levi rajo priest mu bojëmi'ie'iroho aho bogo ëhi jië'e darugo'e jöho uvoromo muoho bojëminövareje. ²¹ A'i Iesuro priest muoho bae'ia'amu God-ro darugo'e jöho uvoromo bamadeje. Ejöho God-are surire jajivoromo uvë'eje:

God Badaro ave jöho darugo'o uvë'ëro
bogo vuonugo hesi höjo:

Ja priest jianuoho ëhi jiemu javo'ajëjo.

²² Iesuro priest mamioho iosirëmi'ëro ëhu'ëro God-hu muebejavuoröhe jögoru Iesuhu ma'enaje ë jögorohuro jögoru mamioho iosiramiromo ma-mabëheje.

²³ Rõhu göho Levi rajo priest-oho aho'obêhe jio'amobe rovê'eje rabëni hesi bêhoho vuovêvobe rue'ego muoho bogo ma-birivoromo vaemu vaenövä'ëro. ²⁴ A'i Iesuro ma-ioro'ioeremu birivoromo hijajëro jiê'ëro êhu'ëro a göho hesi sionoho bogo bae'i huro priest muoho ma-vaemu vaebe va'o hesije. ²⁵ Iesu priest muoho ma-vaemu vaebe va'o hesirëro jiê'ëro êhu'ëro ae rahu hesi ihore God-are bêhire va'ë'oho Iesuhu baejavuoromo ma-ioro'ioeremu mare ramuo'iröhoho hu eni jie rabëni hu bogo guomo'i majae êhi birivoromo hiromo nosi jöëni God-are örيره jöe majahijajëro jiê'ëro.

²⁶ Êhi jiê'e priest bôrômohuro iae mae ajamuajeje. Hu sisê rumo'ëro jiê'ëro hu a ma-maeje. Aribövi sisêho öre gö jio'amo'i hu öre göje. Huro ajiomoromo sa'ae ö'idöe iosirami'amoromo ajio dö maro hijê'eje. ²⁷ Levi rajo priest masijehu ê'onövarêhioho Iesuhu êhi ê'iröhoho bogoje. Majae êhi Levi rajo priest-oho jaburo God-are örيره mi suvuoroho i'imami'i arinövereje. Urimoho jabesi sisêhuni i'imaminugoromo ijoroho God-are aribövi ioro'ioro jabesi sisêhuni mi suvuoroho i'imami'i arinövereje. Iesu bogo êhioho ê'i a'i hesi arijo'arije God-are örيره bojamirovoromo guomorovê'ëro êhu'ëro hesi suvuoroho majae gemu ma-ioro'ioeremu bojamirovadeje. ²⁸ Moses-hu bojêmade jögoru hesi uhuroho ma-u'uhê'e aemu priest masije bamobe rovê'eje. A'i ê jögoru hesi ijönö God-ro darugo'e jöho uvoromo hesi Harihoho bamadeje priest bôröme jioröhego. ÊHarihoho bogo u'uhê'oho jio'i mue aho'o romoromoro ma-ioro'ioere gemu bae barêjê'eje.

8

Iesu hu nosi priest bôrömo jiaje jöhoje.

¹ Na jajivobe rovode jö hesi bêhoho aviêhije. Naehu jajivode êhi jiê'e priest bôrômoho javue. Hu ö'idöre ajiomoromo God eni jiê'e aehu bôröme namijaje a hesi övo manö hijê'eje. ² God-hu jiajire osa hesi muoho vaejajeje. Êhesi bêhoho huro God-are javu hesi priest muoho vaejajeje. Êjavuoho bogo maja aru'aho va'ëne amoho jianovo'i a'i God-are javu maeje. Bogo ma-aehu avoho'i Badaro avohê'eje. Êosa hesi muoho nosi priest bôrômohuro vaejajeje.

³ Amo priest masije aho'o muro bahijarue hesi bêhoho jaburo mi suvuore övo suvuore gö gö God bojami'iröhego. Êhuni priest muro bahijarueje. Jabesi muoho êhi jiê'ëro nosi priest bôrömo'u övo suvuore jio'ë'e God bojami'iröhego. ⁴ Rõhu Iesu sa'are hi'ibejo bogo priest-oho jio'ibejo ê hesi bêhoho hesi Levi rajo priest-ëremu ê muoho vaeromo Jew rajo jögorure jajivare suvuoroho God-are örيره bojami-jaruëro jiê'ëro. ⁵ O Levi rajo priest mu vaejaruoho êho ö'idöre jiaje muoho va'ëneje. Êmuoho ma-arua'ahonö'e jio'i bogo mahoje. Aviêhi jianove. Moses-ro God-are niögu javuoho avoho'ia'amu evare God-ro uavadeje: Gavê'iajo. Ja'o na'o dahorure ariromo naehu rõjahijamu hejanêhi bövie bise'e êhi vaenêjo. Amo priest ömo'ömohuro êhi ö'idöre jiaje mu va'ëne vaejarueje. ⁶ A'i Iesuhu baejade priest muohuro Levi rajo priest jabesi muoho iosiramiroho bôrömoje. Êhesi bêhoho Iesuro priest bôrömero jiê'ëro God'o no ae aho'obêhe nosi ririre namiromo öroho avohahuoromo God-hu muebejavuoröhe jögoroho

avohahuajeje. Ējōgoru Iesuhu avohahuajohuro Levi rajo priest jabesi jōgoroho iosiramiro mo mahoje. Ēhesi bēhoho Levi rajehu muebejarue jōgoru God-hu Jew rajo aevo'i bojēmadevare evare ma-bisemu ajēmi'i uvadeje. A'i Iesuhu avohahuaje jōgoru God-hu aevo'i bojamuadevare evare bōrōme ajamui'i uvadeje. Ēhu'ēro Iesuare jōgorohuro Levi rajo jabesi jōgoroho iosiramijē'eje.

⁷ Levi rajo priest-ehu muebejare jōgoru urimo bojamuijadoho eni jio'ibejo God jōgoru gōho bogo bamo'i uehorovo'ibejo ajamui'irōhēni. Bēhoho bogojio'ibejo. ⁸ Rōhu God-hu jōvade jō hesi aribōvi bogo eni jioruomaje jōho hesi surire jajivoromo ēhi uvē'eje:

Badaro ēhi uvajējo: Iae majae ijonōho nasi aribōvi muebejēvo'irode jōgoru i'o'ho avohoromo

Israel rajohu'o Judah rajohu'o mēmi'ejōjo.

⁹ Mami'e jabesi hijo miono'o muebejēvo'irode jōgoru mēmodēhioho bogo ēhi jiē'e jōgoroho mēmi'ejōjo.

Jabesi hijo miono'e Egypt sa'are jēvamu naehu sōjēgo rovodevare evare majare jōgoroho mēmode hōjo.

Mēmamu jaburo jōgoroho bogo biririvoromo ejeho'i vuonugare hōjo.

Ēhuni naro jabumē bogo gēvanovode hōjo. Badaro ēhi uvajējo.

¹⁰ Rōhu Badaro uvajējo: Ēmajaho barē'iramu aviēhi jiē'e jōgoroho Israel rajoho mēmi'ejōjo.

Naehu nimaje ēhi ēhi ē'onōvo'irōhe jōho jabesi simanore ba'amēho'iramu uehorovoromo'ajējo.

Jabesi dē vōvōbajo'ere jajivēho'iramu ejehoruomo'ajējo.

Ēhi'o'iramu jabumē muebejēvo'irode bōrōmoho jevo'ajējo.

Jabumē nasi aribōvi mae jioruomo'ajējo.

¹¹ Amo rajēro gōero gōho bogo rōjahirovoromo

aganēro gōero gōho bogo majahirovoromo uarovo'aruējo: Bada avoho gahējo.

A ininore ēhi va'o a masijore aho'obēhe na ge'a'aruējo.

¹² Jabuhu sisē vaejaruoho naro jabumēni vavaenimoromo

jabesi sisēho ma-iro'ioremu uehorovoromo vuonugēho'ejōjo.

¹³ Ējōgoroho i'e hō uvade hesi bēhoho urimore bojamuade jōgoroho iae mamiraejē'eje. Rōhu jōe rabe mamiraeromo sisērēbe va'ajoho ēho maburēro barē'iē'e.

9

Jew rajo a mami priest masijehu God-are örire mi kö suvuoro bojam-inōvare jōhoje.

¹ Ēurimo jōgoru hesi uhuroho God rajahi'irōhe öri hesi jōho jiadeje.

O sa'are vaejare javuoho jiadeje God ē rajahi'irōhoho. ² Ējavuoho niōgēro vaejareje. Ēosa gagoho ririro iromo tariojamu osae niō'i jēvadeje. Viēnōrīre osaroho iro bahijarue gijoho maratuoho maratu dōre bahijare God-are ioho ēhi jio'amonōvadeje. Ēosa hesi ihoho God-

are osa maho jiadeje. ³ Niōgehu iromo tugohē'e ē hesi ruēnōrīre osa gō hesi ihoho God-hu jiaje osaho jiadeje. ⁴ Ēosa'eroho ridi'e

oso buejarue maratue gold-ehu avoharoho o God-are jōgoru bamare mauaho ē inōmo niō'ioho ē dirō'ore jēvadeje. Ēmauaho hesi sinoroho

gold-ëro ruë numë havo rova'oromo taemo titimë'e jiadeje. Ëmaua gagoroho gold'e ramaho God-hu i'imëmade ie gö hesi ihoho manna aegë'o ho ë jiadeje. Göho Aaron-are ijaho sirinohijadoho maua gagore jiadeje. Göho munë ha'osire God-are jögoru jajivo'amadoho maua gagore jiadeje. Ëinömoho niö'i gemu maua gagore jio'amadeje. ⁵ O maua dönöho vivoju'e majo va'ëne aehu avoharohuro rirarovareje. Ëinöme niö'i jabesi bëhoho uvoromo ë'areje: God-are ajoho aviae höjo. Röhu nume maua döho God-hu sisë mu'unövdadoho jiadeje. Ëdirö'oho majo va'ëne jabesi vivojohuro aegahareje. Ëinömo jabesi jöho naro mabisemu jövë'ëro vituoho vuonuge.

⁶ Ëinömoho aho'obëhe ë avoho bahijë'ego evare priest ariböviohuro viënorire osare aevoromo majae ëhi va'oromo God-are muoho vae'i arinövareje. ⁷ A'i ruënorire osaroho hesi ma-priest börömhuremu vadune gemu hesi uhure majae gemu rumo va'onövadeje. Rumo va'ië'iroho bogo övemuoho va'i a'i mi köho baeromo ë osare rumo va'oromo God-are örire bojaminövadeje. Hesi sisë hesi jöhuni bojamiromo a ioro'ioro jabesi sisëhu'o röromo ëhuni bojaminövadeje. ⁸ Hesi ma-priest börömhuremu ruënorire God-hu jiaje osare va'ë'ëro jië'ëro ëhu'ëro God-are Aru'ahohuro ma-sama'e röjahuijajeje noro garomo uvoröhego: Viënonire osa hesi mu jidevaroho evaroho God-hu jiajire va'oröhe ojoho bogo jiovahuë'e jiade höjo u'emu jiovahuoröhëro. ⁹ God-hu ë niögu javuohu'o ë javu hesi muohu'o bamade hesi bëhoho jaruvo noehu God uehorovarue mu maho ëho maja aru'ahonö'e röjahui'iro ëhuni bamadeje. Ëosaroho mi suvuore o suvuore gö gö God i'imaminövareje. God-ni ëhi vaenövareje röhu bogo ëhuro herovonövareje jabesi dë vövöbajo'ere sisëho barëjëho'ego. ¹⁰ Ëhi jië'e suorovo hesi bëhoho ma-i ijaruoho jovo ijaruoho jovo eguaruoho inömo u'o'amaruoho ëhi jië'e jöhuremu jionövadeje. Ma-dajo hesi jöhemu God-ro ma-jahuri bamadeje ëhuro ëhi jiobe va'öjuvo hujeji hesi mu öri mami tugoho'i Keriso-are mu i'o jiovahuo'iröhe majaho rueröhego.

Iesuhu hesi kö God-are örire suvuoro bojamae jöhoje.

¹¹ Jaruvoho Keriso rovë'eje. Hu priest börömhuro jië'ëro avevejö'e hesi mu maho vaejajeje. Urimoho ma-aehu niögu javu börömo vaejarire priest masijohuro ë rumo va'oromo muoho vaenövareje. Avevejö'oho Keriso bogo ëhi jië'e javuoroho rumo va'ë'ëro muoho vae'i a'i javu mamabëhire rumo va'ë'ëro muoho vaejajeje. Ëjavu mabëhoho bogo aho vaejë'ëro ëhu'ëro God-hu bövi bise'o bamade noehu ga'amaruoho gö jio'amo'i ë javuoho hesi ahe göje. Ëhu'ëro ë javuohuro javu mamioho iosiramiroho börömo mahoje. ¹² Kerisoro ë javu börömore va'oromo muoho vae'irögoro bogo goat hesi köho o cow harihu hesi köho baeromo ë osaroho va'adeje God-ni bamahoröhëro. A'i hesi kö maho baeromo osare va'oromo evare God jiajire ma-ioro'iore gemu va'oromo no baejavuoromo ma-ioro'ioremu maro ramuadeje. ¹³ Röhu Jew rajehu jabesi sinore sisë baeromo ëhuro God bogo avoho rajahi'ië'iroho priest-ëro goat hesi köho o ano'e cow hesi köho baeromo hijiovodëgonövareje. O cow harihu hesi muomöho jovohu'o buarohoromo baeromo hijiovodëgonövareje. Hijiovodëgo'ego jabesi dajore jiaje sisëho barë'ego ëhuro God-are örire rajahijë'oho iae mae jëvonövadeje. ¹⁴ Mi köehu

rabehu hijiovodëgo'ego dajore jiaje sisë u'o'amonövaroho ma-jianovo'i a'i Keriso-are kö rovadoho ëho mu börömo mahoje. Ëmu hesi bëhoho Kerisoro ioro'iolemu jiaje Aru'aho hesi darugohuro biririvoromo hesi dajoho God-are örire bojamirovoromo guomorovadeje. Hu mu sisëho bogo vaejë'ëro ëhu'ëro huro suvuoro mabëhe vaeromo hesi arijo'arije bojamirovadeje. Bojamirovamu köho rovë'ëro ëhu'ëro mu sisë vaeromo nosi dë vövöbajo'o ijumorovaruoho u'ovahuo'iramu herovo'ejo sisëho barëjahuo'iramu. Sisëho barëjahuo'iramu ëhuro God mae hijaje a hesi muoho noro avoho vaenövo'ejo.

Iesu kö rueromo guomë'ëro ëhuro God-hu muebejavuo'iröhe jögoru i'o marëjade jöhoje.

¹⁵ Ëhuni Kerisoro God'o nosi ririre jioromo God-hu hesi aribövi muebejavuo'iröhe jögoru i'o hesi öroho avohahuajeje. Jögoru i'o hesi öri avohahuaje hesi bëhoho ëhuro God-hu hesinö uövuade aribövioho noro ioro'iolemu jioröhe mu mae gö gö Vavu hesi örire bae'amoröhego huro bojamui'i uövuë'ëro ëhuni avohahuajeje. Mu mae baeröhe hesi öroho aviëhije. Keriso guomadeje. Guomamu ëhuro noehu jögoru mami hesi uhure raromoromo mu sisë vaebe rovere ë hesi jö sisëho iae u'ovahuo barëjë'eje. Sisëho u'ovahuo barëjë'ëro ëhu'ëro Vavuehu bojamui'i uövuade mu maho no baejarueje.

¹⁶ Keriso guomë'ëro noehu mu ma baejarue jöho uhunö'e bamo'ejo ga'irarijego. Ave sa'are vavu ömo'ömhuro vuovego rahuhu inömo ujuoho'iröhe jöho surire jajivoruomajeje. A'i jabesi aboji harihu'ehu bövi bise'o ujuoho'ië'iroho ae aho'obëhe garöhe vavuho vuovo'iramu bövioho bise'oho evare ujuoho'ë'ö. O bogo vuovë'iroho bogo ujuoho'ë'ö. ¹⁷ Vavu bogo vuovo'i raromë'o ho jabuhu jajivare jögoroho ëhi ma-momorö'öjajeje. A'i vuovëvego evare vavuehu uvoruomadëhi ëhi ujuoharueje. ¹⁸ Ëhesi bëhoho God-hu Jew rajo muebejëvonövo'iröhe urimore jögoroho bogo ëma jio'i urimo mioho bijuëmamu vuovoromo köho rovamu evare God-ro aevoromo Jew rajo aribövioho avoho muebejëvadeje. O mioho bogo muo'amego ëhuro köho bogo rue'ibejo ë jögoroho bogojio'ibejo. Jew rajo aribövioho God-are ahariroho bogo raromo'ibejo. ¹⁹ A'i God-hu Jew rajo muebejëvo'iröhe jö hesi muoho Moses-ro avoho'irögoro jögoru jöho ae aho'obëhe majëhi barënugoromo evare cow harihu jabesi köho baeromo jovohu'o buarohoromo sheep hesi u kavuë'e avoharoho ujuohoromo hyssop ahore huhohoromo ë kö'o jovo'o buaroharire sheep uoho ë io'amadeje rumorovoröhego. Rumorovamu ioromo jögoru jajivo'amade suri suriohu'o ë ariböviohu'o kö'e jovohuro hijiovodëgadeje. ²⁰ Hijiovodëgoromo uëvadeje: Ave hijiovodëgaje köhuro ëhuro God-hu bojëmë'ëro ejaho'irarije jögoroho marëjajëjo. ²¹ Ëhi majëhiromomo God-are javu börömo niögehu vaejarohu'o God rajahi'amarue inömo inömo'u'o aho'obëhe ë köhuro hijiovodivo'amadeje. Ëhi'adeje. ²² Iae Moses-are jögoru hesi uhuroho aëro köho baeromo bövie bise'e u'o'amo'ego ëhuro ë inömo hesi sisëho barënovadeje. Inöme ma-gemu gemu bogo ëhioho ë'onövareje. O aehu mu sisë vaejë'iroho mi muo'amamu kö rovë'ohuro ëhuro God-ro mu sisëho uehorovoromo vuonugonövadeje. O mi bogo muo'amamu kö bogo rovë'oho jabesi sisëho bogo barëjëhonövadeje.

Iesu kō rueromo guomē'ëro ehuro nosi sisē u'ovahuaje jōhoje.

²³ ĒGod rajahijarue inōmo inōmoho ma-maja aru'ahemu sa'are jio'amadoho ēho jabesi sisēho mi kōeremu u'o'amonōvareje. Ōre gö bogojiadeje. Röhu ē inōmo inōmoho ō'idōre inōmo ma rōjahuijajoho jianovadeje. O ō'idōre inōmo maho ma-mi kōeremu u'o'irōhoho bogo eni jie. Mi kō God-are ōrire suvuoro bojami'irōhoho bogo eni jio'i a'i suvuoro göehu ē mi suvuoro iosiramiro mo ma-mabēhe jīē'oho ehuro ō'idōre inōmo ma jabesi sisēho u'o'irōhoho eni jie. ²⁴ Ēsuvuoro mabēhi hesi bēhoho ō'idōre God-hu jiaje ōri ari'o va'ēne ma-aehu vaejare osaroho Keriso ēho bogo rumo va'i a'i God-hu jiaje ō'idō mare va'adeje. Ō'idōre va'ē'ero God-are nunire hiromo nosi muoho avohahuajeje. ²⁵ Röhu Jew rajo priest bōrōmohuro bogo hesi kōho bae'i mi kōe baeromo God-hu jiaje osare vadune göro göro va'i hinōvadeje. Röhu Keriso bogo ēhioho ē'adeje. Ō'idōre va'adevaroho majae gö gö God-are ōriroho suvuoroho bogo bojamirovoromo guomorovo'i hirōhēro bogo ēhunioho va'adeje. ²⁶ God-are ōrire suvuore bojami'i hi'ibejo sa'a bövi bise'o bamadevare aevoromo vi'ehē baebe rue'ibejo. Röhu bogo ēhioho vi'ehoho baebe rue'i a'i sa'ae bövie bise'e barē'i dunovamu gavē'i Kerisoro a nunire ioro'iore gemu rovē'eje God-are ōrire bojamirovoromo guomorovoromo nosi sisēho u'ovahuorōhēro. ²⁷ God-ro bamē'ero no ae aho'obēhe ma-vae gemu vuovavuo'irōhohoje ijōnō hesi nunire riravorōhego. ²⁸ Ae aho'obēhe ma-vae gemu vuovavujēhi Keriso ēhi ma-vae gemu guomadeje. Hu ma-vae gemu suvuore bojamirovoromo guomorovadeje ae aho'obēhe nosi sisēho u'ovahuorōhēro. Ijōnō röhu maho a nuniro vuonorō'ō rue'ē'e bogo mu sisēho avohahuo'i a'i hu ruerōhego muebejarue aribōvioho no baejavuoromo maro bamavuorōhēro.

10

Jew rajo a mami priest-hu mi bijuēmoromo God suvuoro bojami'ego ē suvuoro hesi darugoho bogo eni jīē'ero dē vōvōbajo'ere sisē bogo u'ovēhonōvade jōhoje.

¹ Röhu Jew rajo jōgoru urimo jiadoho ehuro God-are mu maho bövioho bise'o ho no bogo avoho ga'i God-are mu maehu ijōnō rovadoho ēho no ma-sisē'i sisē'i maja aru'ahonō'e gavarueje. Ēhesi bēhoho aēro Jew rajo jōgoroho ejēhoromo mioho vadune göro göro bijuēmoromo God-are ōrire ēhi jīē'e suvuore gemuoho i'imamiemu i'imamibe rovarueje. Röhu ēhi jīē'e suvuoro ujuohoromo God-are bēhire va'i arijaruoho jabesi uhoho bogo mae bogo marējēho'ē'e. ² ĒGod rajahijarue aribōvi jabesi uhoho marējēho'ibejo ehuro jabumē herovo'ibejo jabesi dē vōvōbajo'oho mae jēvavego mi bijuēmoromo God-are ōrire suvuoro i'imami'i arijaruoho vuonugo'ibejo. ³ Röhu bogo ēhioho jio'i a'i vadune göro göro mi bijuēmoromo God i'imamijaruohuro ehuro jabesi sisēho vadune göro göro ēhi gemuoho uehorovobe va'arueje ⁴ ē hesi bēhoho cow ano'o hesi kōhu'o goat kōhu'o mu sisē u'orōhoho bogo eni jīē'ero.

⁵ Mi kōho bogo eni jīē'ego ehuni Kerisoro sa'are rue'irōgoro God uavadeje:

Mi bijuēmoromo jasi ōrire i'imamijē'oho ja bogo nimanue hōjo. A'i jero na sino haho'e avohevane hōjo.

⁶ Mi bijuëmoromo jani vënire aho'o huo barëjê'oho o mu sisë u'o'iranego mi bijuëmoromo jasi örire suvuoro i'imamijê'oho ja bogo maho uehorovanue höjo.

⁷ Evare na uavode höjo: God na aviae jevajêjo.

Nasi jö jasi jögoru surire jajivarëhi jaehu nimanue muoho ëhi vae'i abuejajêjo.

⁸ Ejö hesi bëhoho no uehorovo'ejo. Urimo Kerisoro God uavade höjo: Mi bijuëmoromo suvuoro i'imami'i o mi jani vënire huo barë'i o mu sisë u'o'iranego mi bijuëmoromo jasi örire suvuoro i'imamijê'oho ëhi jiê'oho ja bogo nimoromo bogo maho uehorovanue höjo. Bogo maho uehorovanue hö uavadoho Moses-hu bojëmijade jögoroho ejahoromo Jew rajoho jaburo ëhi jiê'e mi suvuoroho God-are örire bojaminövareje. Röhu Kerisoro uavadeje: Ehi jiê'e suvuoroho ja bogo nimanue höjo. ⁹ Röhu evare ijönö Kerisoro God uavade höjo: Na aviae jevajêjo. Jaehu nimanue muoho vae'i abuejajêjo. Ejö hesi bëhoho mi bijuëmoromo God-are örire i'imami'i arijare muoho God-ro aho'i Kerisohu bojamirovoromo guomorovo'iröhe muoho bamadeje. ¹⁰ God-ro ëhi jiê'e muoho bamamu ëhuni Iesu Kerisoro God-are jöho ejahoromo hesi sino haho'oho ioro'ioire gemu suvuore bojamirovoromo guomorovadeje. EGod-hu nimade muoho vaejê'ëro ëhu'ëro nosi sisëho u'ovahuë'eje.

Iesu kö rueromo guomamu ë suvuoro hesi darugoho eni jiê'ëro sisë u'ovahuaje jöhoje.

¹¹ Ehi jie röhu Jew rajo priest-oho aho'o jaburo majae ëhi riravoromo God-are muoho vaejarueje. Mioho bijuëmoromo ëhi jiê'e suvuore gemuoho God-are örire i'imamibe va'arueje. Ehi ë'arueje röhu ëhi ë'i arijaruoho ehuro mu sisë u'o'iröhoho bogo mae bogo eni jëve. ¹² A'i Kerisoro vae gemu God-are örire suvuore bojamirovoromo guomorovadeje mu sisëho ioro'ioire gemu u'ovahuoröhëro. Ehi'onugoromo ajiomoromo God-are övo manö hijadeje. ¹³ Hijê'ëro avevejê'oho hiromo muebeje hu'o muorovarue aribövioho God-ro hesi höru uhunö bahijego vijuvo taemo'amo'iröhëro. ¹⁴ Ehesi bëhoho huro vae gemu God-are örire suvuore bojamirovoromo guomorovë'ëro ëhu'ëro sisë u'ovahuë'e aribövioho no ioro'ioire gemu ma-maemu raromemu raromo'ejo.

¹⁵ Noehu mae raromemu raromo'iröhe jöho God-are Aru'ahohu'o ëhi gemuoho majahuiromo God-are surire uvë'eje:

¹⁶ Röhu Badaro uvajêjo: Eëmajaho barë'iramu aviëhi jiê'e jögoroho Israel aribövioho mëm'ejöjo.

Naehu nimaje ëhi ëhi ë'onövo'iröhe jöho jabeti dë vövöbajo'ere ba'amëho'iramu ejehoruomo'ajêjo.

Jabeti simanore jajivëho'iramu uehorovoruomo'ajêjo.

¹⁷ Röhu ë jö hesi vituoho God-are Aru'ahohuro ëhi uvë'eje: Jabuhu nasi jö ahoromo mu sisë vaejaruoho na ma-ioro'ioiremu uehorovoromo vuonugêho'ejöjo. ¹⁸ Ehi majahuiromo mu sisëho uehorovoromo vuonugê'ego ëhu'ego ijönöho no suvuoroho God-are öriroho bogo bojami'ejo huro mu sisëho u'ovahuoröhego.

Noehu God mae uehorovoromo hesi bëhire va'iröhe jöhoje.

¹⁹ Aganomë Iesuare kõho rovë'ego no bogo juhuonivo'i biririvoromo God-hu jiajire va'arueje. ²⁰ Ëhesi bēhoho Iesuro noni öri i'oho iogorahuë'eje huro bogo guomo'i hiromu ë sõjavuo va'ego noro God-hu jiajire va'iröhego. Urimë'ioho God-hu jiaje osare rumo va'arue ojoho niögëro urahonövareje. Jaruvoho Iesuare sinoho ijumahamu guomamu niögu va'ëne urahade ojoho dadovoromo jiovahuë'ëro noro God-hu jiajire ë va'arueje. ²¹ Röhu göho nosi örire priest böröme jie. Huro God-are aganoho no muebejavuajeje. ²² Ëhuni ë'ego no God-are bēhire va'oromo nosi jöho majahi'iro. Nosi dë vövöbajo'oho sisërëjavuoromo i'uhaguamu Keriso-are kõhuro u'ovahuo'i nosi sino haho'oho ajivo barëj'e'ë jovohuro u'ovahuë'e jiaje ëhuni ë'ego no biririvoromo nosi dë vövöbajo'oho uhohu'o mae uehorovoromo God-are bēhire va'oromo jöho majahi'iro. ²³ O no ae huruoho majëhiromu uvarueje: Majae ijönö God-ro ajamui'ajëjo. Ë'ego no biririvoromo ë jöhuremu mae uehorovobe va'iro rabëni hesi bēhoho hu ajamui'i uövüadëhi iae hu ëhi ë'ië'e jiaje. ²⁴ O ë'ego noro göëro göhuni uehorovoromo dë iahorovoromo ëhuro ae huë baejëvoromo mu mae vaenövo'iro. ²⁵ O ae göëhu göëhu God rajahi'i gemuore gagovoromo vuonugaruëhioho ë'ego no bogo ëhioho ë'i a'i no ajamirovoromo jögore mamirovo'iro ëhuro biririvo'iröhe. Ëhesi bēhoho jemë'o gavarujeje Badare majaho rue hesi jiego gavarujohuni ëhuni ë muoho avoho uehorovo'ejo.

Noehu God-are Harihu bogo dejonö bamoröhe jöhoje.

²⁶ Noehu ëhi ajamirovo'iröhe hesi bēhoho noehu Keriso-are jö ma baeromo röhu ijönö nosi nimoromo biriri'övoromo mu sisëmu vaejë'iroho nosi sisë u'ovahuo'iröhe suvuore gö bogojio'i ²⁷ ma-i'u sisëhemu muebe'iröhohoje. God-ro a sisëho mevëvo'iramu hu'o muorovarue aribövioho vëni vöröro ravëvo'ë'e. ²⁸ Urimoho Moses-hu bojëmade jögoroho ae rahu ahoromo musisinö'e bu'öjamu ae niö'iehu o ae niö'i gemuehu ë a hesi sisë garomu huruoho majëhijë'oho hesi öriroho bogo vavaenimë'e ma-anonövareje. ²⁹ Moses-are jögoroho ahoromo ëhi jï'e'ë i'uoho baenövareje. Ëhuni ae rahu God-are Harihu sivë'oho ë iaho diehi jio'ë'e. O Harihu hesi kõhuro ëhuro God-are jöguru i'oho marëjadeje. Ëhuro ë ia hesi sisë u'ovahadoho röhu huhu huotorovoromo uvë'oho: Ëköho bëhi rumo'e hö uvë'oho ë iaho hu diehi jio'ë'e. O God-are Aru'ahëhu huë baejavuaje hesi örire sisë vaejë'oho ë iaho diehi jio'ë'e. Moses-are jöguru ahare ariböviehu i'u börömo baeruomadoho ëho ma-jianovo'i a'i ëhi jï'e'ë aho i'uoho bogo bise'lo vadu'oho bae'ë'e. Ëhi jï'e'oho iae maeje. ³⁰ Ave jöho God-are surire jajivoromo uvë'eje: I'u bojëmi'irodoho ëho nasi mue höjo. Naro i'ue mana bojëmi'ejöjo. Ëjö jövade aho iae no gavö. O ave jöho jajivoromo uvë'eje: Badaro hesi aribövioho gëromo mevëvo'ajëjo. ³¹ Iae God darugo'e aëro jï'ëro huhu i'u bojamuamu baejë'oho ë muoho juhuoni ma'eje.

Noehu biririvoromo God mae uehorovo'iröhe jöhoje.

³² Röhu urimore majare jemëhu diehi ë'arijoho uehorovore. Keriso-are ajëhu jemë aevoromo ajivëvadevare evare jemë huë vavaene böröme baeromo sivojojüvo biririvarijeje. ³³ Majae göro jemë Keriso nimë'ëro aëro a nuniro jö sisë bu'ö'ego henövariyeje. Mu sisë

vaejēvo'ego ganōvarijeje. Majae gōro Christian a ioro'iorohuro ēhi jiē'e huē vavaenoho bae'ego garomo jemēro jabu'o havoromo rabe rabe ajēminōvarijeje. ³⁴ Christian aribōviehu savoji gagore raromarue jabesi ōrire huē vavaene baenōvarijeje. O aehu jemesi mae sisē vajoiehu ujuohēho va'aroho jemē nimorohē'i uvonōvarijeje: Ēho iae mae hōjo. Nosi inōmo maho ō'idōre hōjo ma-ioro'ioeromu bae'irōhoho. Ēvajoiehu baejare inōmoho iosiramiro mo bōrōmo mae hōjo. ³⁵ Ēhuni Iesuare jō biririvoromo mae uehorovarujoho nadi vuonugore. Biririvē'ohuro ēhuro manaho ma-mabēhe bae'a'aruje. ³⁶ Jemēro u'urume vaenōvore ēhuro God-hu nimaje muoho vaeromo huhu bojēmi'i uēvade suvuoroho bae'irarije. ³⁷ Iae God-are surire jōho jajivoromo uvē'eje:

Majae ma-bunemu barē'iramu
evare rue'irōhe aho iae rue'a'ajējo.

Bogo ōrisanuovo'ajējo.

³⁸ Rōhu God nasi aribōvi mahuro na mae uehorovevoromo ēhuro biririvoromo raromoruomo'ajējo.

A'i ae rahu juhuonivo'i nasi ōri vuonugē'oho
na jabesi jōēnioho bogo nimoroho vadē'ejōjo.

³⁹ Rōhu nomē bogo juhuonivoromo Keriso-are mu vuonugo'i sisēre va'arue aribōviehu javuoi'a'i no God mae uehorovoromo maro va'arue aribōvie javue.

11

Noehu God mae uehorovo'irōhe ē hesi bēhi hesi jōhoje.

¹ Mae uehorovarue hesi bēhoho aviēhije. Noehu mae uehorovē'iroho ēhuro no biririvoromo uvarueje: No ijōnō maro raromo'irōhe jōho ēho mae hōjo. Rabe rabe jio'amaje noehu nunehu bogo ga'amaruoho iae jio'amajē uvarueje. ² Nosi a mamiehu God mae uehorovarohuro ēhuro jabesi ihoho God-are nunire mae jēvadeje.

³ Noehu God-are jō mae uehorovaruohuro ēhuro garomo uvarueje: God-ro jō'ēro jōvamu ēhuro ō'idōrohu'o sa'arohu'o jiade hōjo. Noehu nunehu bogo ga'amarue inōmoho God-ro ujuohoromo ēhuro ga'amarue inōmo inōmoho avoho'amade hōjo.

A mami ae Abel Enoch Noah ēho jabuhu God mae uehorovare jōhoje.

⁴ Iae Abel-ro God mae uehorovē'ēro ēhu'ēro hu God-are ōrire suvuoro maho bojamadeje. Ēsuvuorohuro Cain-hu God bojamadoho iosiramijadeje. Mae uehorovamu gagorovo God-ro Abel-are suvuoroho mae hō uvoromo baejadeje. Baeromo rōjēhijē'eje aēro uvorōhego: Abel hu a mae hōjo. Amo Abel-hu God mae uehorovadohuro ēhuro jaruvoho hu guomē'eje rōhu hu jōe jōvajeje.

⁵ O Enoch-ro God mae uehorovē'ēro ēhu'ēro bogo guomē'e God-ro ma-ba'ojiomoromo hesirire nugadeje. Aēro hu nahareje rōhu bogo birohareje God-ro hu mami'e ba'ojiomē'ēro. God-hu Enoch bogo ba'ojiomade majare evare God-ro hu garomo nimorohade hōjo. Ējōho God-are surire ēhi jajivē'eje. ⁶ Rōhu God-ro nomē bogo ēma gōromo nimoroho'i a'i garōhe noehu hesi ōrire mae uehorovamu gavē'oho nimorohajeje. Ēhesi bēhoho noehu God-are bēhire va'oromo jō ma-jahi'iē'iroho mae uehorovoromo uvo'ejo: God iae jiajējo. Ae rahu hu

biroho'i nahë'o'oho ajamui'ajëjo. Bogo ëhi uehorovë'o'oho hesi bëhiroho bogo va'ejo.

⁷ O Noah-ro God mae uehorovadeje. Mae uehorovë'ëro hejade God-ro uvamu: Ëhi jië'e i'uo'oho sa'are ö'a'ajë uvamu hegorovo huro ë i'uo'oho bogo gavë'e God ma-ejahadeje. Ejahoromo boat börömo'oho avohadeje ëhuro hu'o hesi aganohu'o jovoho bogo baejëvego va'o maro raro-moröhëro. Mae uehorovoromo boat-oho avohë'ëro ëhu'ëro no garomo uvarueje: Noah-mëremu maho jëvo'i a ioro'ioroho aho'o sisë ë'ë'ëro i'u baeromo vuovëvadoho mae höjo. A'i Noah-ro God mae uehorovamu God-ro garomo uvadeje: Hu nasi örire mae uehorovajohuro ëhuro hu mae höjo.

Abraham-hu God mae uehorovade jöhoje.

⁸ O Abraham-ro God mae uehorovadeje. Mae uehorovoromo huro dirö'o göro va'ojöro God-ro uavamu iae ejahadeje. Ejahoromo dinö'e va'iröhoho bogo gavë'e hesi sa'aho nugo'i ëma va'adeje God-hu u'emu bae'iröhego uavade sa'are hörö'iröhëro. ⁹ God mae uehorovadohuni ëhuni God-hu bojami'i uavade sa'are va'o ë hijadeje. Ehijadeje röhu ae gö jabesi sa'aro ma-jahuri hijanovadeje. Hiromo bogo javu maho vae'i ma-niögu javuoremu hibe juvonövadeje. Ijonö hesi uje Isaac'o Jacob'o God-hu Abraham uavade sa'ae gemu'oho bae'iröhoho jëvadeje röhu jabu'o ë sa'aroho niögu javuoremu raromobe jijihonövareje. Jabuhu ë'arëhi Abraham-ro urimoho ëhi ë'onövadeje. ¹⁰ Ehësi bëhoho Abraham-ro uehorovë'e hijadeje ioro'io'oremu jioröhe amo börömo God-hu uehoro baeromo avohadire ë va'o hi'iröhëro.

¹¹ Röhu Abraham-ro God mae uehorovoromo ëhuro a ujo jioröhe darugoho baejadeje. Vaboroho Sarah dë tiojë'e jio'i baru'oho Abraham mami'e mavojiraeromo harihu bae'iröhe darugo barëjahë'e jiadeje röhu hu uvadeje: God-hu harihu bojemi'i uevadëhi iae bojemi'ajëjo. Ëhi uehorovoromo harihu bae'iröhe darugoho iae baejadeje. ¹² Abraham hu ma-ae gemu jio'i urimo hesi darugo barëromo u'uhanovadeje röhu a ujo jioröhe darugoho röhu maho baejamu hu bëhoho jioromo hesi ado sirino'oho jiji mujöru'o va'ëne aho'obëhe jio'amobe sö jovo riröre jio'amaje nie'u va'ëne ëhi bogo adaho varijënnoho jio'amobe rovadeje.

¹³ Abraham Isaac Jacob jabumë God-are örire mae uehorovë'e raro-mobe ruejuvo vuovëvadeje. God-hu ajëmi'i uëvadëhioho bogo ëhioho bae'irögoro mae bae'iröhoho ma-ëgo'o riravoromo gavanovoromo uvareje: O ë mu'oho mabëhe rue'a'ajëromo ëhuni va'orahoro a nuniro uvareje: Noehu ave sa'are raromaru'oho ae göehu ave sa'are ma-jahuri raromarue aribövioho javuanovajëjo. ¹⁴ Ëhi jië'e jö uvaroho ëho no garomo uvarueje: Jabuhu uvarëhi ëhi uvarue ariböviohuro ioro'io'oremu raromo'iröhe sa'a maho nëgego ëhuni ëhi uvoruomaje höjo. ¹⁵ Röhu jabesi sa'a mare jioromo rovaroho ëho bogo uehorovareje. Ëho uehorovo'ibejo ë vuonorö'o va'iröhe öroho jiëho'ibejo. ¹⁶ Röhu jabesi sa'a mare jioromo rovaroho bogo uehorovo'i a'i sa'a gö sa'a ma-mabëhe ö'idöre jiajoho ëho nimareje. Ëho nimë'ëro God-ro ëho garomo jabesi jöënioho bogo javojimo'i ma-samae uvareje: Iae na jabesi A Börömo'oho God jëvavajëjo. Iae God-ro amo börömo'oho avohëhë'eje jaburo ë va'o raromo'iröhego.

17-18 Rõhu Abraham-ro God mae uehorovadohuni ëhuni hejade God-ro hesi dëre bijioho gavamu hegorovo God-are jõho ejahoromo Isaac baeromo God-ni ano'irõgoro hesi maratuore bamahadeje. Urimë'i God-ro Abraham jõ mae majahiro mo uavadeje: Na bogo a gõho ajami'i ma-Isaac gemu ajami'iramu ëhuro jasi ihoho jiobe va'a'ajëjo. Iae God-ro ëhi mae uavamu hejadeje rõhu Abraham-ro hesi harihu gemu'oho Isaac God-are õrire bojami'irõgoro ë'adeje. ¹⁹ Ëhesi bëhoho Abraham-ro uehorovoromo uvadeje: A vuovamu ri'õjõro ajëmijë'oho God hu eni hõjo. Rõhu iae ëhi jianovadeje. Abraham-ro uvadeje: Isaac guomo'ië'ajëjo rõhu gavade God-ro ajami'ego bogo guomamu sionëro baejadeje.

Isaac Jacob Joseph ëho jabuhu God mae uehorovare jõhoje.

²⁰ O Isaac-ro God mae uehorovadohuni ëhuni hesi harihe niõ'i Jacob'lo Esau'lo ijono huë mae ari'irõhe jõho majëhijadeje.

²¹ O Jacob-ro God mae uehorovadohuni ëhuni guomo'irõgoro Joseph-are harihe gemu gemu huë mae ari'irõhe jõho majëhijadeje. Majëhiromo guduoduhoro bëdumo hiromo God-are õrire rajahijadeje.

²² O Joseph-ro God mae uehorovadeje. Mae uehorovë'ëro ëhu'ëro guomo'irõgoro evare ae uëvadeje: Ijonoõho Israel rajo ujo õmo'õmohuro ave Egypt sa'are jioromo va'oruomo'ajëjo. Va'irõgoro nasi ijo'ahoho ujuoho va'oromo ë va'lo raromo'irõhe sa'are guavo'aruëjo.

Moses-hu God mae uehorovade jõhoje.

²³ O Moses-are vëmu vavu'ohuro God mae uehorovareje. Mae uehorovë'ëro ëhuni Moses rahonugoromo gavare hu a harihu mamabëhe jiamu gagorovo sa'a a bõrõmo hesi jõgoru sisë aho'irõhoho bogo juhuonivareje. Bogo juhuonivo'i Moses baeromo gurihi bamo nugaroho manaere niõ'i gemu barëjadeje.

²⁴ Ëhi ë'ë'ëro Moses-ro bõviraeromo hu'lo God mae uehorovadeje. Mae uehorovë'ëro iae Egypt sa'a a bõrõmo hesi abojohuro Moses hesi muohoromo uvadeje: Nasi harihe hõjo rõhu Moses-ro ae uënövadeje: Nadi uvorëjo: Nõrõ Egypt sa'are a bõrõmo hesi aboji hesi harihe hõjo.

²⁵ Ëhesi bëhoho huro uvadeje: Na mu sisë vaeromo ëhuro huë ma majahuri baejë'oho ëho bogo maho jio'i a'i na God-are aribõvioho jabu'lo gemuore bimuvoromo huë sisë baejë'oho ëho iae maho hõjo. ²⁶ Huro uvadeje: Egypt sa'are jio'amaje inõmo inõme marohë'e mae naehu ujuohë'oho ëho ma-jianovo'i a'i bõrõme namiromo ajamui'irõhe a hesi mu naehu vaejamu aehu sivegë'oho iae mae hõjo. Ëhesi bëhoho huhu u'emu bae'irõhe suvuorohemu uehorovë'e hijadeje.

²⁷ Rõhu Moses-ro God mae uehorovadohuni ëhuni Egypt sa'a a bõrõmo hesi võrõho bogo juhuonivo'i huhu hijade sa'aho ma-vuonugo'i va'adeje. Va'oromo God noehu bogo gavarue aho hu gemu uehorovajëro jjë'ëro biririvadoho bogo vuonugadeje. ²⁸ Rõhu Moses-ro God mae uehorovadohuni ëhuni Israel rajo aribõvioho aevo'i uëvadeje: God-hu Võrõ Tugoho'irõhe Sõrõho irëjo. O mi kõe javu ojoro hijiovo-divo'amorëjo ëhuro a muo'amo'irõhe anerahuro ëho garomo jemesi harihu murioho bogo bijuëmo'i vuonugo va'irõhe hõjo.

Jew rajo ae göehu göehu God mae uehorovare jõhoje.

²⁹ O Israel rajoho jaburo God mae uehorovareje. Mae uehorovoromo gavare Kavü'e Sö Jovoho jovo ihoho Kavü'e tarioromo ruhëhi va'lo numëhi va'oromo riroho sinihoromo ma-sa'aemu jiamu gagorovo va'oromo ioro'ioro gönö jëvamu iojiomoruomadeje. Iojiomamu gavë'i Egypt sa'a rajoho jaburo siho baejëvo va'oromo iojiomo'ia'amu gavë'i jovohuro ro döe garaejëvamu vuovëvadeje.

³⁰ Röhu Israel rajohuro God mae uehorovoromo ëhuro Jericho amoho bae'irögoro rueromo gavare amoho munë rejo ëgoböviëro iromo rova'ë'e jiamu gagorovo God-are jöho mae uehorovoromo amoho majae gemu vae gemu rova'lo rojomonövoreje. Ëhi'obe va'ojuvo majae aho'obëhe 7 barëjamu rejoho aho'obëhe ahoromo sa'are ruvebijamu amoho baejareje. Amo ë ariböviohuro God mae uehorovamu ëhuro amo rejoho ahoromo ruvebijadeje. ³¹ O Rahab ae ma-gë'amaje magonahohuro God mae uehorovadeje. Mae uehorovoromo gavade sa'a bae'iröhëni möe rueruomaje Israel rajoho rovamu gëgorovo huë baeromo ajëmadeje. Ajëmijë'ëro ijonöho God-are jö bogo eruomade ariböviohu'oho i'uoho bogo gemu maho baeromo guomo'i mae hijadeje.

³² Na rabëni jöe gö'oho majëhi'ejo. Gideon-hu ë'ade jöho o Barak-hu Samson-hu Jephthah-hu ë'obe rueruomade jöho o David-hu Samuel-hu o jö God-aro baeromo majëhinövore aribövi ioro'iorehu ë'obe rueruomade jöho na jajivo'ibejo majaho barë'ibejo. ³³ Ëariböviohuro God mae uehorovoromo ëhuro sa'a ioro'ioroho ruahö'ö'amareje. Mu maho nigemareje. God-hu bojëmi'i mae uëvadoho baejareje. Vörö'le mi jabesi jö'oho tugohëho'amareje. ³⁴ Vörö'le vënoho duohareje. Kaejö ëgehu muo'amëvo'i hõjaroho mae rovereje. U'uhëvadoho daruge baejareje. Muorovoromo biririvareje. Biririvoromo sa'a göëro jabu'lo muorovamu gagorovo sihö'öjëvareje. ³⁵ Vëmu ömo'ömohuro God mae uehorovoromo gavare jabesi aganoho vuovoromo ri'öjamu sionëro ujuohareje. Iae ëhi jiadeje.

Al'i God mae uehorovarue a ioro'ioroho aëro jabumë vi'ehi böröme bojëmamu hara'uoromo vuovëvadeje. Jabumë God-are jöho vuonugo'ibejo vi'ehoho bogo bae'irögoro va'oromo jabesi nimoro raromo jijihö'ibejo. Röhu ëhi ë'oröhoho bijönimareje ëhuro ijonö i'ovoromo ma-mabëhe raromö'iröhëro. ³⁶ O God mae uehorovarue a ioro'ioroho aëro sivëgoromo hisuebijëvamu huë vavaene böröme baeruomadeje. Röhu göho a ioro'ioroho aëro tövo'amoromo savoji gagore io'amareje. ³⁷ O God mae uehorovarue a ioro'ioroho aëro munëro vajëmijamu a ioro'ioroho aëro huruvo'amamu a ioro'ioroho kaejö ëgohuro bijio'umamu vuovo'amadeje. God mae uehorovarue a ioro'iorohuro mi sino niögu sisëho io'amoromo iruno'lo rumo'le bövi bise'lo rumo'le raromonövoreje. Aëro anëgo birëgo'ego ëma jijihonövareje. ³⁸ Röhu jabesi sa'a rajo sisë aribövie jio'i jabumë a maemu jëvadöhuni ëhuni a sisë jabu'lo gemuore raromë'oho ëho bogo maehu jiadeje. A rumo'le sa'are sa'are dahorure dahorure munë gagore sa'a gagore ëma raromobe jijihonövareje.

³⁹ Ëho jaburo ae aho'obëhe God mae uehorovobe rovë'ëro ëhu'ëro iho ma-mabëhoho God-are örire baeruomë'eje. Iae ëhi jie röhu God-hu bojëmi'i uëvadoho bogo baeruomadeje. ⁴⁰ Bogo baeruomade hesi bëhoho God-ro noni uehorovoromo uehoro ma-mabëhe baeromo

uvadeje jabumë bogo urimoho maho jëvo'i hujeji ijonö jabu'o no'o gemu mae ma-mae javuoröhego.

12

Noehu Iesu gemu uehorovoromo biririvo'iröhe jöhoje.

¹ Ëhi jï'e ae aho'o siri va'ënehu God mae uehorovoromo mae jiamu gabe rovaroho ëho jabesi jöho gavarueje. Ëhuni jabesi jöho uehorovoromo mu göehu göehu hutitimavuajoho ëho rori'o babu'öromo uehoro sisëhu simanore badirohavuajoho ëho dibo bu'ö'irögoro God-hu bojamuade muohuremu biririvoromo vaenövo'ejo. ² Iesuaro nunoho bamë'i muoho ëhi vaebe vae'ejo ë hesi bëhoho huro God mae uehorovarue öroho aevoromo röjahuiromo va'o ijo tugohoi mae uehorovo'iröhe öroho röjahuij'ëgo. Sa'are hiromo uvadeje: Vi'ehe baenugoromo huë mabëhe biroho'ejö uvoromo javoji vëmunajo baeröhoho bogo uehorovë'e biririvoromo korosire guomadeje. Ëhi ë'ë'ëro jaruvoho God böröme namijaje hesi övo manö hije.

God-hu öri ma röjahui'iröhëro i'u bojamuaje jöhoje.

³ Röhu jemëro Iesu uehorovore. A sisëho jaburo nue huodivoromo hesi muoho aho'ia'amu huro biririvadeje. Ëaho uehorovoromo nadi dë vövöbajo'oho u'uhohe va'oromo muoho vuonugore. ⁴ Jemë mu sisë aho gabe rovarujoho bogo ëhuro köho rueromo vuovëvë'eje. ⁵ God-ro jemë hesi aboji harihu'e jëvajëromo hesi jögoroho majëhij'ë'eje jemesi dë vövöbajo'ere avoho biririvo'irarijego. Na jemë ë jöho rumonëg'eje o diehi jëve. Ëjöho God-are surire jajivoromo ëhi uëvë'eje: Nasi harihohajo. Jaehu avoho hijöro Badahu röjahiromo i'u bojamamu gavë'oho nadi juahovonëjo.

O jögoru darugo'o majahij'ë'oho nadi u'uhonëjo.

⁶ Badahu ae rahu uehorovavuë'oho ë ariböviohuro avoho raromojöro i'ue bojamuijaje höjo.

Ae rahu hesi harihe javuojöro baejavuë'oho ë aribövioho hisuebijavuaje höjo.

⁷ Huë vavaeni rovamu baej'iroho uvore: God-ro no röjahuijajëromo biririvore. Ëhesi bëhoho God-ro jemë hesi aboji harihu'e jëvajëromo ëhi'ëvajeje. Röhu di aboji harihu'oho vavuoho jaburo bogo i'uoho bojëmë'ejö. Ae aho'obëhe iae baejarueje. ⁸ No ae aho'obëhe i'u baejaruëhi jemë'o i'u bogo baej'ë'oho bogo God-are aboji harihu'o maho jëvo'i a'i öbie jëve. ⁹ Ave sa'are vavu ömo'ömohuro i'ue bojamui'ëgo noro mae uehorovëvonövareje. Ëho ma-jianovo'i a'i aru'aho muebejavuaje Vavue God-hu i'u jö röjahuijajoho ëho avoho ejahoromo maro raromo'ejo. ¹⁰ Ave sa'are vavu ömo'ömohuro jabesi simanehu ëma diehi diehi maho hö uvaroho ëhi majae ma-bisemu röjahuibe ruenövareje. Ëho ma-jianovo'i a'i God-hu röjahuijaje hesi bëhoho nosi jöënije hu mae jiajëhi no'o ëhi gemuoho javuoröhego. ¹¹ O God-hu no röjahuiromo i'u bojamuajevare evare no uvarueje: Ëmuoho bogo huë ma'oho jio'i huë sisë baejarue muoho höjo. Röhu God-ro röjahuijego no i'ue baebe va'ojuvo eni jiego evare noro God-are mu maho avoho vaejego dë sasohavuajeje.

Noehu avoho biririvoromo darugo'o riravo'iröhe jöhoje.

12 Ëhuni övo hörü'e u'uhëvë'oho avoho biririvore. 13 Öroho ahorirëro iogororomo ëhuro maro jijihore hörü sisërëjëvadoho bogo rireromoromo hurönivëho'i marëjëvo'iröhe.

14 Ae aho'o jabu'o ma-gemuoro huë mae raromo'i ë'o gare. Mu mahuremu vaebe jijiholi'ëhu'o ë'o gare. Aehu bogo ëhi ë'lë'oho Bada'oho bogo mae bogo raromo'ë'lö. 15 Avoho mueberovore. Aëro God-hu huë baejëvaje öroho vuonugojöëni uëve. O aëro oso sisë bojëmego ae gö gö jemesi dë vövöbajo'oho ijumëvego ae aho'obëhe sisërojëvojöëni uëve. 16 O aëro önö'e muoho vaejöëni uëve. O Esau-hu ë'adëhi aëro ëhi ë'ojöëni uëve. Esau-ro God rumonimoromo ave sa'are bövie bise'ohuremu uehorovadeje. Hu harihu murioho jiadeje röhu bogo ëho uehorovoromo muri hesi suvuoroho bae'i a'i majae ma-gemu hesi iohuni hesi suvuoro maho ioro'ioyemü vuonugadeje. 17 Iae jemë'ö gavaruje. Ijonö hu vuonugade suvuoroho vuonorö'ö bae'irögoro nivë'i nahadoho bogo eni jiadeje.

Noehu huë mae baejarue jöhoje.

18 Israel rajo a mamiehu rovarëhioho jemë bogo ëhioho rovë'le jëve. Ëho jaburo garomo heromo rëharue dahoru ihe Sinai ë rovarëje. Rueromo gavare vëni böröme ravoromo ramoramovoromo sue baduno'e jioromo buru böröme rovamu gavë'i 19-20 hejareje hëgöe huo'ego jöho ma-darugo'o uvavavamu. Uvamu hegorovo hejare uëvamu: Bogo aho gemu a'i miehu rabehe ave dahoru ro rëhë'oho munëro vajamirego guomo'ira uëvamu ë jöho heromo bogo eni jëvamu hegorovo dinamiro mo Moses uavareje: God uavego nadi gö'oho uvego no he'irarëjo. 21 Iae ëhi jië'e juhuoni'e muoho garomo Moses-ro uvadeje: Asë'e na butubutuegoromo juhuoninegavajëjo.

22 Jemë bogo ëhi jië'e dahoruroho rueromo ga'i a'i Zion dahorure rovë'le jëve. God darugo'le jië'e a hesi amo börömore ö'idöre jiaje ame Jerusalem ë rovë'le jëve. Anerae aho'obëhe raromoruomajire ë rovë'le jëve. 23 God-are aribövi jabesi iho ö'idöre jajivo'amë'e God-are harihu muri ömo'ömehe gagovoromo nimoro bamaruire ë rovë'le jëve. God ae aho'obëhe mae o sisë javuego gövuaje a hesi örire rovë'le jëve. Mu mae vaenövare aribövie God-hu avohëvamu mamabëhe ruahöl'öjëvë'e ëho jabesi aru'aho ömo'ömo jabesi örire rovë'le jëve. 24 Iesuare örire rovë'le jëve. Hu God-hu muebejavuaje jögoru avohahuade ahoje. Sisë u'ovahuoröhego Iesuhu kö hijiovö'öjadire rovë'le jëve. Ëkö hesi jö bëhohuro Abel-are kö hesi bëhoho iosiramiro mo maeje. Abel anamu kö rueromo guomade hesi bëhoho God-hu ae gö i'u mana bojami'iröhohö jio'i a'i Iesu anamu kö rueromo guomade hesi bëhoho God-hu huë baejavuoromo sisë u'ovahuo'iröhohöje. Iae Iesuhu kö hijiovö'öjadire ë rovë'le jëve. Iae mabëhe rovë'le jëve.

Noehu avoho mueberovo 'iröhe jöhoje.

25 Ëhuni avoho mueberovore. God-hu jö bojamuijajohö nadi bijönimore. Sa'are hijade aehu God-are jö majëhijadohö Israel ariböviohuro heromo bijönimë'ëro i'uohö bogo huotovahareje. Ëho ma-jianovo'i a'i ö'idöre hijaje aehu majahuijaje jö nomë heromo vuonugë'ohö diehi diehi huruomö'ejö. 26 Urimë'i God-ro Sinai dahorure jöe jövamu ëhuro sa'aho hijiohijiovadeje. Avevejö'ohö huro

mae majahuiromo uövuë'eje: Majae gemu röhu maho na sa'aho hijiovo'ejōjo. Röhu bogo sa'ahuremu hijiovo'i ö'idöhu'o sa'ahu'o hijiohijiovo'ejōjo. ²⁷ Majae gemu röhu maho hijiovo'ejō uövuade hesi bëhoho huhu avoho'amade bövioho bise'oho hijiohijiovoromo ujuoho va'iramu bogojio'amo'ë'e. Ëhi jio'iramu bogo hijiohijiovoröhoho ma-ioro'iore gemu bibivoromo nami'ë'e.

²⁸ God-hu böröme namiromo muebejaje öri ari'oho bogo hijiohijiovo varijënohoje. Ëho nosije. Ëhuni God-are örire huë mae ua'ejo. Mae uaromo huhu nimajëhi noro hesi ihoho bövie hö uehorovoromo avoho rajahi'ejo ²⁹ ë hesi bëhoho nosi Böröme God sisë vënehu buel'öjanovaje aho jië'ego.

13

God-hu nimorohoröhego noehu vae'tiröhe mu hesi jöhoje.

¹ Röhu Christian ö mueno'e göehu gö huë baerovaruje muoho ëho avoho ma'enore. ² Ëhi'oromo ga'irarije ae gö jemesi amore i'e ö'amu gavë'iroho uënövore: Nosi osaro ro raromohëjo. Urimoroho a mamiohuro gavare ae i'e rovamu uvareje: Ma-a maëremu rovaruëromo ajëmijareje. Röhu bogo aehu rueruomamu ajëmi'i aneraëro rueruomamu ajëmijareje. Ëhuni ae i'e ö'ego ajëmi'irarije muoho nadi rumonimore. ³ Iesuare jöëni savoji gagore raromaruë ariböviohuni uehorovore. Uvore: Jabuhu savoji gagore raromaruoho no'o gemu mae raromaruëromo ëhi huë vavaene baere. O vi'ehi baeruomaje ariböviohuni uehorovore. Uvore: Jabuhu sino vi'ehi baejaruoho no'o gemu mae baejaruëromo jablesi jöëni huë vavaene baere.

⁴ Röhu masurovarue muoho ae aho'obëhe maë uehorovore. Baruhu'o vaborohu'o jemesi arijo'ëremu garorovore. Önö'e jijihë'oho o goho'amë'ohö ehuro God-ro i'ue mana bojëmi'ë'e.

⁵ O nadi moniohemu bae'i uehorovo'i a'i uvore: Noehu bövi bise'oa baejaruoho iae eni höjo. Rabëni God-ro no uövuë'eje: Na bogo mae bogo ja vuororamiromo ramo va'ejōjo. ⁶ Ëhuni no biririvoromo uvo'ejo: Badaro na ajëmijaje höjo.

Ajemijajego na bogo juhuonivo'ejōjo.
Aho diehi'oromo na ijumevo'aruëjo.

⁷ Jemesi ekaresia a masijoho uehorovore God-are jö aevo'i majëhijaroho. Jabuhu avoho raromo jijihöjuvo ma-mae vuovëvade jöho uehorovoromo jabuhu God mae uehorovarëhi jem'ë'o ëhi gemuoho God mae uehorovore. ⁸ Ëhesi bëhoho Iesu Keriso hu urimo jiadoho jaruvohu'o ijönöhu'o ëhi ma-gemuohemu jiemu jio'ë'e. ⁹ Ëhuni aehu sareri'e jöe gö gö barueromo röjëhijë'iroho nadi ëho uehorovoromo öri mare va'arujoho vuonugo'i ione aho bu'öromo öri göroho va'ore. Noehu uvë'oho: God-ro hesi nimoromo ajamui'iramu nosi aru'ahoho biririvahuo'ajë uvë'oho ëho mahoje. A'i noehu uvë'oho: I i'iröhe jögoru rihromë'ohuro ehuro nosi aru'ahoho biririvahuo'ajë uvë'oho ëho bogo maehuje. I ijarue jögoru ejarue aribövioho bogo ehuro marëjëvajeje.

¹⁰ Nosi sisë mu'uvahuoröhego suvoro maho God-are örire bo-jamijë'eje. Sisë mu'uröhe suvorocho Jew rajo priest niögu javu hesi mu vaejaruoho bogo i'ë'ö. ¹¹ Jew rajo priest börömohuro mi köho baeromo God-hu jiaje osare ë rumo va'oromo hesi örire suvoro bojaminövadeje

sisëho mu'u'amoröhego. A'i mi maho bogo amoroho nugo'i a'i amore jioromo ujuoho va'o rori'o vëniro huonövadeje. ¹² Rori'o huonövadëhi aëro ëhi Iesu bogo amoroho nugo'i a'i amo börömore jiamu rori'o bava'areje. Bava'amu vi'ehe baeromo guomadeje ëhuro hesi kö maho rovego hesi aribövi nosi sisëho u'ovahuoröhego. ¹³ Iesu amore jiamu rori'o bava'amu guomë'ego ëhuni no'o amo rajehu sisë'i uehorovarue bogo jabesi gemuoroho uehorovo'i a'i Iesuare jöëni i'ue baeromo hu'o gemuore riravo'ejo. ¹⁴ Rabëni ave sa'aroho noehu ioro'ioyemuraromoiröhe amoho bogojavue. A'i ijönö jioröhe amohemu ëhuremu uehorovö. Ëhuni amo rajehu sisë'i uehorovarue jabesi gemuoroho no bogo uehorovo'i Iesu'o riravo'ejo. ¹⁵ Hu'o riravoromo mi suvuoroho bogo a'i Iesuare ihore God rajahiromo ëhuro suvuoroho hu bojaminövö'ejo. Ësuvuoro hesi bëhoho noehu hesi iho a huruoho majëhijë'oho ëho noro jö'o öge i va'ëne ëhi God-are örire suvuore bojamarueje. ¹⁶ O huë baerovoromo ajamirovarujoho nadi rumonimore. Ëhi jjië'e mu vaejë'oho God-ro uvajeje: Jabumë ëhi ë'aruoho ëho mi suvuoro mabëhe bojamaruëjo.

¹⁷ Röhu ekaresia muebejëvarue aribövioho jabuhu jö bojëmijaruoho nadi aho'i ma-ëjëhore. Rabëni jabumë jemesi dë vövöbajo'oho muebejëharueje ijönö God-are örire majahiromo uaruomoröhëni: Iae no jasi aribövioho ëhi ëhi muebejëhare höjo. Jemëhu jabesi jö ejëhë'ohuro ëhuro jabumë bogo huë vavaenoho baeromo ëma muebejëvo'i jabesi dëho sasohëvo'iramu muebejëvo'ë'ö. O bogo ejëhë'oho jahu huë vavaene bae'ë'ö röhu ëma muebejëvo'ë'ö. Ëhuro jemë bogo marëjëvo'ë'e.

¹⁸ Röhu jemëro nosi jöëni parie vaenövore. Ëhesi bëhoho noehu uehorovaruoho majae ëhi mu maemu vae'i naguoromo ëhuro no dë sasohavue. Ëhuni parie vaenövore. ¹⁹ Na nego avohe jemëro ëhi ë'ojöro ëhuro God-ro remö'öjogo na jemesi örire ma-burëro ö'iro.

²⁰ Röhu na nege huë mae bojamaue aho God-ro jemë ajëmego mae jëvojöro. Ëhesi bëhoho sheep muebejavuaje a böröme Bada Iesu God-ro ajamijamu guomoromo ri'öjadeje. God-hu Iesu ajamade hesi bëhoho Iesu köe rueromo guomamu ëhuro God-hu no ioro'ioyemur muebejavuoiröhe jögoroho jiadeje. Ëhuni Iesu ajamamu ri'öjadeje. ²¹ Amo na nege God-ro jemë inömo maho mu maho aho'o ajëmego huhu nimaje muoho vae avoho'irarijego o huro nosi dë vövöbajo'oho mae avohahuego noro mu mae vaejego huro göromo dë mae jioröhego. Huro Iesu Keriso-are jöëni ëhi ajamuijöro nege. Keriso-are ihoho ma-dö maro jiemu jio'ë'e. Iae mae.

Ijo tugoho'i jöhoje.

²² Aganomë naro ave jö harihoho jajivoromo bamëhe jemëro adahoromo dë vövöbajo'oho biririvo'irarijego. Jemëro nadi u'uvo'i mahere. Jöho bogo ëgehuje. ²³ Röhu ave jöho uë'ië'e jemëro he'irarijego. Nosi öho Timothy savoji gagore hijadoho jiovo nugö'öjë'eje. Hu burëro rovamu gavë'oho ëhuro na hu'o gemu mae ö'oromo gë'ejo. O hu bogo burëro rovë'iroho nara sivue ö'ejo.

²⁴ Jemesi ekaresia a masijohu'o God-are aribövi ioro'iorohu'o jejëmijode höre. Italy sa'a rajo ekaresiaho jaburo jemesi örire jejëmijö.

²⁵ God-ro ae aho'obëhe jemë huë baeromo ajëminövo'ë'e. Ahia mino'e.

JAMES

James-hu God-are aribövi jejëmijade jöhoje.

¹ God-are mu vaejahaje o Bada Iesu Keriso-are mu vaejahaje aho na James jeve. God-are ariböviehu jemesi sa'a vuonugo'i sa'a göre göre va'o raromarujo naro jemesi örيره jejëmiye.

Birivoromo God mae uehorovo'iröhe o hesi örيره uehoro mae bae'iröhe jöhoje.

² Nasi ö mueno'e huë vavaenehu böviehu bise'ehu burunö'e rueromo anëgë'oho uvore: Ma-nimoroho'iröhe muoho rovë'e höjo. ³ Iae jemë'o gavaruje burunö'e rueromo anëgamu God mae uehorovoromo riravë'oho ehuro u'urume vaejë'i biririvobe va'arujeje. ⁴ Röhu u'urume vaejë'i birivoromo va'onövore ehuro ruahö'ö'irarije. Ehi ë'ë'oho ehuro a duvahanö'e raromo'iramu ma-ëhi gemu jëvobe va'ë'e. ⁵ Röhu ja rahuaro uehoro bogojavë'oho God uavego uehoro mae bojami'iro. Ua gavë'oho God-ro iae ejahö'ë'e hu bogo nijio'irae'i ma-huë mae bojamuijaje aëro jië'ëro. ⁶ Röhu ua gavë'iroho nadi uehore niö'i bae'i ma-God gemu mae uehorovoromo ua gane. Bogo ma uehorovë'oho buru buruehu anego jovehu hasaromo ajiomobe abuebe va'ajëhi jasi uehoroho ehi ruëre numëre jiobe va'ë'e. ⁷⁻⁸ Ehi javë'oho uehore niö'i baeromo öroho dadivoromo ëma juvo'a'anue. Ehi jië'e uehoro baejë'oho nadi uvone: Badaro bojemi'iramu bae'ejöjo. Hu bogo mae bogo bojami'ë'e.

Bövi bise'o rumo'e ariböviohu'o bövi bise'o marohë'e ariböviohu'o ehi jië'e aribövi jabesi jöhoje.

⁹ Röhu Christian öe bövi bise'o rumo'e javë'oharo ga'irane jasi ihe sa'are jiajoho God-ro nigemahamu gavë'oho nimoronimorohë'i juvone. ¹⁰ O Christian öe bövi bise'o marohavë'oharo ga'irane jasi iho döre jiajoho sa'are bejahamu gavë'oho ja'o nimorohë'i juvone. Ehesi bëhoho resu inehu sahorijajëhi bövi bise'o marohëvë'e aribövioho ehi sisërë'amo'ë'e. ¹¹ Majaëro rojomoromo birebire'e bamoromo resu ahore ravego rudoho sahojajeje. Inoho rireromajeje. Mabëhe gavaruoho sahorijego iae barëjajeje. Sahori barëjajëhi bövi bise'o marohëvë'e ariböviohuro mue vaebe va'ojuvo röhu maja ahë'o sisërë'amo'ë'e.

Huë vavaene rueromo nosi dëre bijahuaje jöhoje.

¹² Röhu huë vavaeni bövi bise'o rueromo dëre bijaho gavamu jaeu birivoromo hijë'iroho huë mae javajeje. Birivoromo ruahö'öjë'iroho maro hi'irane röhoho iae bae'a'anue. Eërohoho God-ro uövuaedeje: Na uehorovevaruje aribövioho bojemi'ejöjo. ¹³ Röhu sisëhu ro dëre bijëho gëvë'oho nadi uvore: God-ro sisëho nugö'ö'ego bijahuajëjo. Nadi ehioho uvore. Rabëni hesi bëhoho God-are dëroho sisëho bogo bijohajeje. O God bogo sisëho nugö'öjego nosi dëroho bijahuajeje. ¹⁴ Bogo ehioho jie. A'i ae gemu gemu dëre bijahuaje hesi bëhoho nosi sinohuro mu sisëho nimoromo jagu barovego ehuro sisëhuro ro bijahuajeje. ¹⁵ Mu sisë vae'i nimobe va'ojuvo evare mu

sisêho vaejarueje. Mu sisêho vaebe va'ujuvo ijonö bejavuo'iramu evare iae barêjavuo'ê'e.

¹⁶ Nasi ö mueno'e êhuni nadi jemesi arijo'arijoho sareramirovoromo uvore: God-ro sisêho nugö'öjego dère bijahuaje höjo. Hu bogo êhioho ê'ajaje. ¹⁷ A'i suvuoro mabêhe aho'o hesi örire gemu jioromo rovajeje. God hu bövie bise'e jiji mujöru'e manaere majae nosi örire ajivavuo'iröhego avohade ahuro aji mahuremu iae bojamuijajeje. God bogo gorosovo'i bogo ramoramovo'i ma-êhi gemuohemu ajivavuobe va'ajaje. ¹⁸ Huro hesi nimoromo hesi jö maho nugö'öjadeje nosi örire rovego noro heromo nosi aru'ahoho i'ovahuego hesi aboji harihu'e javuoröhego. Hesi aboji harihu'e javuego êhuro inömo inömo bövi bise'o avoho'amadoho noro iosirêmiromo hesi nunire aribövioho javuoröhego.

God-are jö bogo ma-hia'êremu he'i a'i avo'avoho ejahoromo mu vaeröhe jöhoje.

¹⁹ Nasi ö mueno'e avehuremu uehorovore. Ae aho'obêhe jemëro jöho ma-burëro hia'êremu henövore. Nadi ma-burëroho jöho majêhiromo ma-burëroho vörö'iraere. ²⁰ Aehu vörö'irajê'o'oho bogo êhuro God-hu nimaje mu maho ri'ö'ê'e. ²¹ Êhuni va'inumi'e mu sisê aho'o vae'i arijarujoho uehorovoromo vuonugo'i God-hu dë vövöbajo'ere bamêhaje jöho ma-u'emu sanuovoromo ejahore. Ejahê'o'oho jöho darugo'ëro jiê'ëro êhuro jemesi dë vövöbajo'oho i'ovëvo'iramu mae jëvo'ê'e.

²² Nadi sareramirovoromo God-are jöho ma-hia'êremuohu here. A'i jöho ejahoromo huhu uëvajêhi muoho êhi vaere. ²³ God-are jö bogo e'i ma-hia'êremu hejê'o'oho aririre garomo ²⁴ vuonugo'i va'oromo nu ano'o bogo avohorovo'i rumonimarüehi ma-hia'êremu hejarue aribövioho êhi jëvo'ê'e. ²⁵ A'i ae göehu aririre nu ano'o ga avoharuêhi êhi God-are jögoru ga avohoromo uvê'o'oho: Ma-maëro jiê'ëro ejaruhuro bogo tövavuê'e maro raromo jijiharue höromo biririvoromo ma'enoromo bogo ma-hia'êremuohu heromo rumonimo'i a'i ejahoromo mu vaejê'o'oho êho iae mae jio'ê'e. Êhuro rabe rabe ê'ê'o'oho God-ro ê aribövioho ajêmiromo huê mae bojêminövo'ê'e.

²⁶ Röhu ae göëro göëro uvarueje: No God mae uehorovoromo hesi muoho ma'ënarue hö uvo'i röhu bitaroho bogo taemê'e atarueje. Êhi ê'aruoho jabumë ma-sareramirovoromo uvarueje: No mu mae vaejarue hö uvoromo ma-döhemu God uehorovoromo hesi muoho vaejarueje. ²⁷ A'i God Vavuohuro uvajeje: Aviêhi jiê'e muoho bogo ma-döëremu na uehorovevarue muoho jio'i dë vövöbajo'o uhohu'o vaejarue mue höjo. Öbi asisö'ohu'o magonaho doruohu'o huê vavaeni baejaruoho noro jabumë ajêmiromo avoho muebejêvo'ëjo. O no ave sa'a hesi mu sisêho bogo gavanovo'i ma-mu maemu vae'ëjo.

2

Noehu ae aho'obêhe ma-gemuoho hö uehorovo'iröhe jöhoje.

¹ Nasi ö mueno'e nosi Bada Iesu Keriso hesi aji'e hijajoho mae uehorovarueje jëvaje nadi ma-dajemuoho garomo aribövioho adovoromo ioro'ioroho rajêhi'i ioro'ioroho bijönimore. ² Êhesi bêhoho jemêhu God rajahi'i ro gagovarueje osare ae niö'iro rovö. Göhuro inömo'e aëro jiê'ëro maho io'amoromo rue'i göhuro inömo rumo'e aëro jiê'ëro sino sine

io'amoromo rove. ³ Ĕhi'oromo rovamu gavë'o'ho niögu mae io'amë'e aho jemëro garomo rajahiro mo ua'a'aruje: Isi ro röho maro hijëjo. A'i niögu sisë'e aho garomo bijönimoromo ua'a'aruje: Janioho röhe bogojië'e jiaje ĩhi ma-namijëjo. O ua'a'aruje: Janioho arëte bogojië'e jiaje ave sa'aro nasi höru bëhohuro ro hijëjo. ⁴ Ĕhi uëvë'o'ho jemesi aribövioho adovoromo inömo rumo'e jïë'o'ho ruëhi nugo'i inömo börömo jïë'o'ho viëhi nugarujeje. Ĕhi'oromo sisë'i uehorovoromo mevarujeje.

⁵ Röhu nasi ö mueno'e ave jöhuremu here. Ave sa'are ariböviehu garuomajoho inömo rumo'e ariböviero jëvë'ëro sisë'i raromarujeje. Sa'are sisë'i raromaruoho ë aribövioho jabumë God-ro baejëvadeje jaburo bogo sisë'ioho uehorovo'i avo'avoho hesi örire ma-avo'avoho uehorovo'iröhego. Mae uehorovoromo hesi öri ari'ere va'ego muebejëvo'iröhëni. Ĕhesi bëhoho mami'e God-ro uëvadeje: Ae rahu na uehorovevë'o'ho naro ajëmi'ejöjo nasi öri ari'ere rovego muebejëvo'irodëni. Ĕhuni iae ë inömo rumo'e aribövioho ĩhi ajëmi'ë'e. ⁶ God-ro inömo rumo'e aribövioho ĩhi ajëmijajeje röhu jemëro jabesi ihoho ijumëharujeje. Ĕhi ë'arujoho röhu rahumëro jemë iosirëmiromomo i'u'e muoho bojëmiruomajeje. Inömo ma'e ariböviohuro ë'arujeje inömo rumo'o'ho bogo. O rahumëro guduamëvoromo court-roho va'o bahijëvoruomajeje. Inömo ma'e ariböviohuro ĩhi ë'arujeje inömo rumo'o'ho bogo. ⁷ Jemë Keriso-are iho baejarijeje röhu ë inömo ma'e ariböviohuro Keriso-are ihoho ijumoruomajeje. Ĕhuni nadi inömo ma'e aribövioho rajëhi'i inömo rumo'e aribövioho bijönimore.

⁸ Röhu jögoru börömo börömoho God-are surire jajivoromo uövuë'eje: Jaehu jasi arijo'arije rajahirovanuëhi jasi ae gemuoho ĩhi rajëhinëjo. Jemëhu ë jögoru ejahë'o'ho iae maeje. ⁹ Röhu jemë dajohemu garomo ioro'ioroho rajëhi'i ioro'ioroho bogo rajëhijë'o'ho ëho jemëro sisë ë'oromo jögoroho ahë'ëro i'ue bae hesi jëve. ¹⁰ God-are jögoru ejahobe va'oromo röhu jögore gemu ahë'o'ho ëhuro hesi jögoroho aho'obëhe sisë vae'iramu övövo'e ae javo'ë'e. ¹¹ Ĕhesi bëhoho God-ro uövuadeje: Nadi goho'amonëjo. Röhu ë ae gemuohuro jö göhu'o uövuadeje: Nadi ae gö anonego guomo'irajo. Ĕhuni ja bogo goho'amo'i röhu ae gö anë'o'ho God-are jö ahanue ae javo'ë'e. ¹² Ĕhuni uvonövore: God-are jögoru ejahë'o'ho ëhuro mu sisëhu tövavuadoho jiovahuego maro raromaruë höjo. Ĕjögoro'ho God-ro ijönö garomo nosi muoho mevo ga'a'ajëjo no ejahë'e o bogo ejahë'e muoho vaejë'e javuo'iramu. God-ro hesi jögoroho garomo ĩhi mevo gö'a'ajë uvoromo jemëro ëho uehorovë'i jöho atobe muoho vaebe jijihore. ¹³ God-ro mevavuo'ajë uvo'irarije ë hesi bëhoho God-hu mevavuë'iroho gö'iröhe huë bogo baejëvare aho hesi nunire ro riravamu gövuë'o'ho bogo huëho baejavuo'i mana i'ue bojamui'ë'e. O huë baejëvare aho hesi nunire ro riravamu gövuë'o'ho God-ro i'ue bojamui'i ë'oromo vuonugo'i huë baejavuo'ë'e.

No bogo ma-döhuremu God mae uehorovo'i uhohu'o God mae uehorovoromo hesi jö ejahoromo mu vaeröhe jöhoje.

¹⁴ Nasi ö mueno'e aehu uvë'o'ho: Iae na God mae uehorovaje hö uvoromo röhu God-hu nimaje mu bogo vaejë'o'ho ĩhi jïë'e aho God masimanëremu mae uehorovajeje. I'o mu bogo vae'i God uehorovoromo

ëma hijë'oho God-ro bogo maroho bamo'ë'e. ¹⁵ Èhesi bëhoho jasi Christian ö ma'ino'e iruno'e niögu suhi'e bogo eni jëvamu gëromo ¹⁶ röhu bogo mae bogo ajëmi'i ma-jöemu uëvé'oho: Maro va'onëjo. Va'oromo niögu mae ujuohoromo io'amoromo i mae ujuohoromo iromomo hinëjo. Röhu jabesi sinehu nimiruoho bogo ajëmë'e ma-majëhijë'oho na ëho eni jio'ë'e o bogo. Èho bogo eni jio'ë'e. ¹⁷ Ma-jöemu majëhijë'oho bogo eni jiajëhi ëhi God-hu nimaje muoho bogo vae'i God ma-dajëremu uehorovë'oho ëho ma-bëhi rumo'e muohoje.

¹⁸ Röhu aëro ue'ë'e: Ae göëro God mae uehorovaje höjo. Ae göëro mu mae vaejaje höjo. Èhi ue'iramu naro ua'ejo: Röhu aho diehi'oromo God mae uehorovoromo muoho bogo vaejaje höjo. Röhu naro mue vaeromo ëhuro ja röjahi'iramu ge'a'anuëjo na God mae uehorovaje ae jevo'iramu. ¹⁹ Röhu ja simanëremu uehorovoromo uvanueje: God gemu jiajëjo. Mabëhe. Satan ajamijarue aru'ahoho jabu'o uvoruomajeje: God gemu höjo. Èhi uehorovoromo ma-juhuonibijiohoromo butubutumoruomajeje. Èhuni ma-simanëremu God uehorovë'oho bogo eni jie. ²⁰ Uehoro bogojië'e ae jave. God-hu nimaje muoho bogo vae'i ma-God uehorovë'oho ëho bëhi rumo'eje. Èhi jië'e jöho na ja nage naro röjëhijego ga'iro. Aveho hene. ²¹ Nosi hijo miono'e Abraham diehi'amu hesi ihoho God-are nuniroho maho jiadeje. God-hu nimade muoho huro vaeromo hesi harihoho Isaac baeromo God-ni suvuro buejarue maratu döre God-ni bamadeje. Èhi'amu ëhuro hesi ihoho God-are nunire maho jiadeje. ²² Ja'o gane. Abraham-ro God mae uehorovoromo o God-hu nimade muoho vaeromo mue niö'i havëvoromo vaejajeje. God-hu nimade muoho vaejë'ëro ëhu'ëro God uehorovadoho iae eni jiadeje. ²³ Èhi jië'ëro God-are surire jö uövuadëhi iae ëhi jiadeje. Jöho jajivoromo uövuë'eje: Abraham-ro God mae uehorovamu gavë'ëro God-ro uvade höjo: Abraham-are ihoho iae mae höjo. Èhi'amu aëro uvoruomajeje: Abraham God-are aemo'aeme höjo. ²⁴ Èhu'ëro jië'ëro jemëhu gavarujoho God-are ihohemu ëma uehorovë'oho bogo ëhuremu nosi ihoho God-are nuniroho maho javuajeje. A'i God uehorovoromo röhu hu nimaje mu vaejë'ohuro ëhuro nosi ihoho God-are nunire mae javuajeje.

²⁵ Röhu jö göho naro ua'ejo bëhoho avoho ga'iranego magonahehu mu ma vaejamu ëhuro hesi iho God-are nunire ma jiade jöho. Magonahe gemu hesi ihoho Rahab-ro iae hijade höjo. Hu ae siho'amaje magonahe jiade höjo. Röhu hesi ihoho God-are nunire mae jiade höjo. Diehi'oromo ëhioho jiade höjo. God-hu nimade muoho huro vaejamu ëhuro ëhi jiade höjo. Huro gëvade Jew rajëro God-are ihore rovamü gëgorovo ajëmiromomo osare hu'irae bæjëvo rueromomo röhu öri göro rëmö'öjade höjo mae va'iröhego. Èhi ë'amu hesi ihoho God-are nunire mae jiahade höjo.

²⁶ Èhi jië'ëro ave uhu jöho majëhije. Nosi sino haho'ere aru'aho bogojië'oho nosi sinoho ëma imo javuo'ë'e. Èhesi bëhoho no God uehorovo'i röhu huhu nimaje mu bogo vaejë'ohoho no ëma imo sinohuremu God uehorovarueje.

Jö maemu ato'iröhe jöhoje.

¹ Nasi ö mueno'e God-are jö röjêhjarue muoho majêhi'iê'e. Nadi ae aho'obêhe God-are jö röjêhi'irarije muoho êma baere. Rabêni hesi bêhoho jemê'o iae gavarujeje Christian a ioro'ioroho God-ro iae mevêvo'i rôhu hesi jö ae röjêhjarue aribövi nosi muoho God-ro ga avohoromo darugo'o mevavuo'ê'e. ² No ae aho'obêhe mue aho'obêhe garaejarujeje. Rôhu ae rahu bogo bitaro garae'i jö maemu atê'oho êhi jiê'e aribövioho ma-maemu jioruomajeje. Jabesi bitaro jö'o taemê'oho êhuro jabesi sino haho'e aho'obêhe taemorovoromo mu maemu vaeruomajeje. ³ Êhesi bêhoho horse jö'oho uehorovore. Horse jö'ore ö'oho ruaharujeje êhuro ö'i vitunö vitunö jaguvego jaguvaruinö ë va'iröhego. Horse jö'ore ruahê'ëro êhu'ëro horse dajo haho'e aho'obêhe ri'öjego no naguajinö ë va'ajeje. Êhi nosi jö'oho taemê'oho nosi sino haho'e aho'obêhe taemorovoromo mu maemu vaejarujeje. ⁴ O boat jöho uehorovore. Boat-oho bôrömeje. Buru bôrömëro hesi niögu ba'uorimarire namiromo biduoho baeromo va'ajeje. Boat bôröme jio'i buru bôröme jio'i rôhu damu bise'oho ma'enoromo hunuovego dinö'e va'i nimê'iroho ë va'ajeje. ⁵ O nosi bitaroho iae gemuohoje. Boat damu bise'o jiajêhi nosi bitaroho iae êhi inömo bise'eje. Inömo bise'o jiajoho rôhu damuehu boat bôrömo hunuovajêhi êhi nosi bitarohuro mu bôrömo hesi jöho êma jö huhe atarueje.

Rôhu aveho uehorovore. Vêni hödu biseharihohuro êhuro je'ö bôrömo ravo barê'ê'e. ⁶ Bitarehu jö sisê ataruoho êho vëni sisêho va'ëneje. Sisê bövie bise'e uehorovaruocho vaejaruoho bitarëro atarueje. Bitaroho nosi sino haho'ere jiê'ëro êhuro nosi uhoho aho'obêhe sisêrëromo rumorovobe va'ajeje. Jö sisê atê'iroho mue aho'obêhe ijumaje vënohuro ravanovajeje. Êhesi bêhoho Satan-are öri ari'ere jioromo ro nosi muoho aho'obêhe ijumo'amajeje. ⁷ Uge sigobe je'ö maje jovo maje ihe gö gö aruëre anumëre jijihoruomajoho rôhu aëro ahego êhi ê'aruoho vuonugo'i ma-jabesi rôhoremu raromarujeje. Êhi ê'iröhoho aho no eni javuajeje. Êhi ê'ê'e javue. ⁸ Rôhu jö aruëre anumëre ataruoho ahorovoromo êhi ê'aruoho vuonugo'i ahorirëremu ato'iröhoho a vadu'oho bogo eni javuo hesije. Nosi bitaroho sisê vörö'e sigobu jabesi bitaro va'ënëro jiê'ëro ae gö êhi jö sisê bojëmego sisêrërovarujeje. ⁹ Bitarohuro êhuro nosi Vavuoho Bada mae uavarujeje. Rôhu ë God mae uavarue bitarohuro êhuro God va'ëne avoho'amade a jabesi örire jö sisê uëvarujeje. ¹⁰ Jö'e gemuore jioromo rôhu jö mahu'o jö sisêhu'o jovonö'e rovajeje. Nasi ö mueno'e êhi jiê'oho sisêje. ¹¹ Jovo mahu'o sisêhu'o sa'a gage gemuoroho bogo suorovajeje. ¹² Nasi ö mueno'e ijo bajo ihe gö gö bogo gemuoroho rae'i ö'i bajoho bogo ijo bajohu'o gemuoroho rae'ê'e rabêni köe gö gö jiê'ëro. Sö jovohu'o jovo mahu'o bogo gemuoroho vuo'a'anue. Êhu'ëro jö mahu'o jö sisêhu'o bogo vaerovo'ëjo.

Uehoro mae niö'i göho ave sa'a hesi uehoroho ma-döhemu mae jio'i göho God-hu bojumuaje uehoroho uhohu'o mae jiaje jöhoje.

¹³ Rôhu romorome uehorovê'e a o nuni aji'e a jemesirire jëvê'oho êhi jiê'e ahuro hu diehi ê'ê'e. Hu avo'avoho hibe juvoromo mu maemu vaeromo ma-u'emu taemo hiromo simano mae uehorovê'ê'e. Êhi ê'ê'oho no garomo uvo'ëjo: Êaho simano mae gavê'e ae höjo. ¹⁴ Rôhu

jemë ae gö jabesi mu mahuni dë vörönimoromo nu huodivo'i jemesi ihohe mu döre bamorovo'i nimë'oho nadi nimoronimorohoromo jö huhe ë'oromo o jö sareroho atoromo God-are jö maho ijumore. ¹⁵ Jemë ëhi jië'e uehoro baejë'oho nani jemë uvarujeje: Ëhi jië'oho simano ma'e uehore höjo. Röhu ëho bogo ö'idöroho jioromo ruvebi'i a'i ave sa'a hesi uehoroho jio'i ma-nosi sinemu uehorovaruoho jio'i Satan-are aribövieu uehorovaruohoje. ¹⁶ Dinö'e dinö'e ae göehu gö hesi mu mahuni dë vörönimoromo jabesi sinemu uehorovoromo döre bamorovë'oho ëhi jië'ire aëro iro muorovo'e vaeromo bövie bise'e gö gö vaejarujeje. ¹⁷ Sa'a hesi uehoroho ëhije. A'i ö'idöre jioromo ruvebijaje uehoroho göje. Ëhi jië'e uehoro ma baejë'oho mu ma-mae uehorovarujeje. Mu mae uehorovoromo gemuoro mae raromoromo muoho ma-u'emu vaeromo ma-sanuovoromo jöho ejahorovarujeje. Jöho ejahorovoromo huë baerovoromo muoho avoho vaejarujeje. No bogo ruëroho numëroho uehorovo'i ma-jöe gemu uehorovarujeje. Bogo ma-döemuoho mu maho vae'i a'i avoho uehorovoromo dë vövöbajo'o uhohu'o vaejarujeje. ¹⁸ God-hu nimaje mu rueröhego nimë'oho urimo ma-u'emu sanuovoromo huë baerovo'iramu evare ëhi jië'e muoho börömorae'ë'e.

4

Ave sa'a hesi mu sisë bogo uehorovo'i God gemu uehorovo'iröhe jöhoje.

¹ Röhu jemë ae göehu göehu iro muorovo'e vaejaruje hesi bëhoho rabeje. Sinohe mu nimarujëro jië'ëro ëhu'ëro ë'arujeje. Ae göëro göëro jemesi sivu sivu sinohuni bae'i nimoromo uehore göëro göëro gemuore umogihoromo ëhuro ë'arujeje. ² Ëhesi bëhoho jemë bövie bise'e bae'i nimoromo röhu bogo baejarujeje. Bogo baeromo ae muo'amo'irögöro ë'arujeje. Muo'amo'irögöro röhu ganiganimoromo bae'irarije öroho bogo birohogöro iro muorovo'e vaejarujeje. God bogo ua gavarujohuro ëhuro bogo baejarujeje. ³ O God ua gavë'oho ëhu'o bogo baejarujeje. Rabëni hesi bëhoho jemë sisë'i uehorovoromo mae sisë ëma ua gavarujeje ëhuro baeromo jemesi sinehu nimarujohuni bu'ö'irarijëni. Ëhuni bogo baejarujeje. ⁴ Sareri aribövieu jëve. Mag-onahehu bogo baru uehorovoromo taemo hi'i ma-juvajëhi jëvanove. Ëhesi bëhoho jemë bogo God gemu uehorovoromo taemo raromo'i ave sa'are mu sisëhu'o uehorovarujeje. Jemë diehi'oromo bogo garomo uvarujeje: Ave sa'are mu sisëho böröme hö uehorovë'oho ëhuro God bijönimarue höjo. Ëhuni ae rahu ave sa'arohemu uehorovo'i nimë'oho hu God bijönimaje aeje. ⁵ Iae God-are surire jöho uvë'eje: God-ro bojamuade aru'ahohuni vavaenimoromo uehorovavuaje höjo noro hu gemu uehorovo'iröhego. God-are jöho ëhije. Röhu nani jemëro uvarujeje: Ëho ma-jöe höjo. ⁶ Röhu iae hu nime noro hu gemu uehorovo'iröhego. Röhu God-ro hesi nimoromo huë baejavuoromo ajamui avohajeje noro ëhi ë'iröhego. Ëhi ajamuijaje jöho God-are surire jajivoromo uövü'eje:

Biriri'övoromo masije javuajë uvarue aribövioho God-ro ahëvaje höjo. Ma-u'emu taemo raromarue aribövioho God-ro hesi nimoromo huë baejëvoromo ajëmijaje höjo.

⁷ Ĕhuni God-are jōho ejahore. Satan rov'ē'oho ahore. Satan ah'ē'oho jemesirire jiajoho ju'ebīromo va'ē'e. ⁸ God-are bēhoro va'ore. Hesi bēhire va'ē'oho huro jemesi bēhire rue'ē'e. Jemē sis'ē'e aribōvie jēvaje ōvoho u'orovore. Vaji vaji'e aribōvie jēvaje dē vōvōbajo'oho avohorovore. ⁹ Huē vavaene bōrōmoho baere. Jemē ma-ijo'ijovoromo nimoronimoroharujoho vuonugo'i ma-nierusuburu'e bamoromo raro-more. ¹⁰ God-are nunoro uvore: Nasi ihoho abuejē'e hōjo. Ĕhi uv'ē'oho God-ro jemesi ihoho dōro bamēho'ē'e.

Noehu bogo masijo riravoromo ae gō jabesi jō sisē ato'irōhe jōhoje.

¹¹ Nasi ō mueno'e nadi gōero gō hesi jō sisēho atore. Ō mueno'lo jabesi jō sisē jōv'ē'oho o dōre bamorovoromo uv'ē'oho: Ō mueno'oho sisē hō uv'ē'oho ē hesi bēhoho God-are jōgoroho sis'ē'i jōvoromo dōro bamorovoromo uvo'a'anue: A jabesi sisē bogo ato'irōhe jōgoru God-hu bojamuadoho iae hesi hōjo. God-are jōgoroho iae hesi hō uv'ē'ohuro ēhuro ja hesi jōgoroho bogo ejaho'i a'i hesi jōgoroho iosiramiro mo mevo ga'a'anue ga'i God-hu bojamuade jōho diho mae jiego diho sisē jiego. ¹² Jōgoru bamade aho gemuje. Nosi sisē mevahuaje aho gemuje. Ĕaehu mare bamavuē'oho o sisēre bamavuē'oho hu eni jie. Ĕhuni diehi'oromo uvanueje: Na bōrōme jevo'i God bise'e hōromo ēhuni dōro bamorovoromo jasi a hesi jō sisē mevanueje.

Bogo nosi sivuoho eni javuajē uvoromo ma-dōhemu nimoronimoroh'ē'i ato'irōhe jōhoje.

¹³ Rōhu ave jōho majēhi'iē'e here. Jemē a ioro'iorohuro uvarujeje: Jaruvo ē amore iae no va'ejarējo. O uvarujeje: Nēri ē amore iae no va'ejarējo. Va'irōhoho va'lo vadune gemu hesi uhure ē raromoromo mue vaeromo moni bōvie bae'ejarējo. ¹⁴ Ĕhi uvarujoho rōhu nēri diehi jēvo'irōhoho dadivēve. Ĕhuni vadune gemu ēhi jēvo'irōhoho ēhu'lo dadivēvajeje. Ĕhesi bēhoho jemē sue va'ēne jēve. Sueho majae bisemu nomoromo evare dadovo va'oromo barējajēhi ēhi jēvo'ē'e. ¹⁵ Ĕhuni nadi uvo'ibejarije: Ĕhi ē'ejarējo. A'i uvo'ibejarije: Hesi Badahu nim'ē'ohuro no biririvoromo raromoromo ēhi ēhi ē'ejarējo. Ĕhi uvo'ibejarije iae mae jio'ibejo. ¹⁶ A'i jemēro uvarujeje: Ĕhi ēhi ē'irōhoho nosi sivuoho iae eni javuajēromo ma-dōhemu nimoronimoroh'ē'i atarujeje. Ĕhi jiē'oho bogo maehuje.

¹⁷ Ĕhu'ēro jiē'ēro ae rahu mu ma vae'irōhoho garomo rōhu bogo vaejē'oho ēho mu sisē vaeruomajeje.

5

Bōvi bise'lo maroh'ē'e mae aribōviehu avo'avoho uehorovo'irōhe jōhoje.

¹ Rōhu inōmo maroh'ē'e mae jiē'e aribōviahumē aveho here. Nierusuburu'e bamo avohore huē vavaene bōrōmo bōrōme jemesi ōrire rue'iē'e jiaje. ² Bōvi bise'lo bōrōmo bēhi jēvajoho sagohoriromo muduhi'amo barē hesije. Giresasaēro jemesi niōgoho tarivo'amo hesije. ³ Jemesi mae sis'ē'lo maho dē'irae'amo hesije. Dē'irae'amo'iramu ēhuro jemesi nigoji ōroho va'orahoro jio'i jemē vēnēro ravēvanovo'ē'e. Ave maja bar'ē'iē'aje majare jemē inōmo inōmo bōvi mae bahi avoh'ē'e

jëve. ⁴ Aveho gahe. Jemesi mu ariböviohuro jemesi mure va'oromo iruno'oho tarivoromo gagovëhë'ejö. Jemesi muoho ëhi vaejëhamu jemëro bogo manaho i'imëmi'i jemesi vajiohëro bahijë'e jëve. Vajiohëro bahijë'ëro ëhuni jaburo darugo'o uvoruomajeje: Nosi a masijoho rabëni nosi manaho bogo i'amamarue höjo. Ëhi atarue jöho God bövi bise'o muebe'amaje aho hu iae hejajeje. ⁵ Jemë ave sa'are raromoro mahunö'e raromobe sinehu nimaje muohemu uehorovobe rovë'e jëve. Mahehu i ue'ahoromo masijorijaruëhi ëhi ë'obe rovarijoho mahunö'e muo'amëvego vuovo'irarije majaho rovë'eje. ⁶ Mu sisë rumo'e aribövioho jemëro sarerisareriëmiromo court vaejëvoromo uëvarijeje: Sisë'e jëvaje öri sisëro va'ohëjo. Ëhi'oromo muo'amëvarijeje. Röhu jabumë vörö rumo'ëro jëvë'ëro jemë bogo ahëvarueje.

Badahu rueröhego birivoromo taemo raromoro muebe'iröhe o God-are örire ëninami'iröhe jöhoje.

⁷ Röhu ö mueno'e birivoromo ma-taemo raromoro muebejego Bada rue'iro. Jemë'o uehorovore. Nimarue iruno'o gagovo'ië'iroho öjë'ëro iruno'oho bogo burëroho gagovo'amarueje. Urimo birivoromo muebejuvo urimore niohijo majaho rovego muebejuvo ijo tugoho'i niohijo majaho rovego birivoromo muebejuvo ijönö iruno'e mabëhe rijego evare gagovo'amarueje. ⁸ Iruno'o riröhego birivoromo muebejaruëhi jemëro ëhi dë vövöbajo'oho birivoromo muebere Bada vuonorö'ö rue'ië'e jiaje.

⁹ Nasi ö mueno'e huë vavaene rovego baejarujoho nadi göëro göënioho dë vi'ehimoromo ëma nibejahirovoromo uarovore: Jero ë'ane höjo. Ëhi'amu gavë'oho God-ro mevëvoromo i'ue mana bojëmi'ë'e. Gare. No mevavuo'iröhe a hesi majaho dunove. ¹⁰ Nasi ö mueno'e a mamioho uehorovore. Badare ihore jö majëhinövare aribövioho uëve. Jabumë huë vavaene baeromo röhu ma-birivoruomadeje. Jabuhu birivarëhi jemë'o ëhi birivore. ¹¹ Ae gö gö huë vavaeni baeromo röhu birivarohuni ëhuni no uvarueje: God-hu mabëhe ajëmijadoho jioruomajëjo. Ëhuremu uehorovore. Röhu a mami ae Job-hu huë vavaeni baeromo röhu birivade jöho iae jemë'o hejarijeje. Job-hu birivobe rovamu ijönö Badahu mabëhe ajamijade jöho ëhu'o gavarujeje. Iae Badaro bogo bise'o vadu'oho vavaenimoromo huë baejavuaje ahuro jïë'ëro ëhu'ëro Job ajamijadeje. Ëhuni jemë huë vavaene baeromo birivë'oho God-ro jemë'o ajëmi'ë'e.

¹² Nasi ö mueno'e ave jögoru börömo börömoho here. Jemëhu jö atë'iroho nadi ö'idö ihoroho o sa'a ihoroho o bövi bise'o ihoroho atorego darugo'e jöho jio'iro. Nadi ëhioho ë'i a ejaho'ië'iroho ma-uvore: Io'ajo. O bogo ejaho'ië'iroho ma-uvore: Bogajo. Ëhemu uvore. Ëhemu uvë'oho ëhuro God-ro bogo mevëvoromo i'uoho mana bojëmi'ë'e.

¹³ Röhu jemë ae gö huë vavaeni baejë'oho ë ahuro God-are örire ëninami'iro. Ae gö dë sasohë'oho huro jöe ioromo God-are örire rajahi'iro. ¹⁴ Ae gö guomo guomo baejë'oho huro ekaresia muebejarue a duvahohuni jöe nugö'öjego rue'iro. Rueromo jaburo God-are örire ëninamiro Badare ihore ijo bajo'e jovoho otehaho'iro. ¹⁵ God mae uehorovoromo ëninamijë'oho ëhuro Badaro guomo guomo'e aho ajami'iramu marëromo i'ovo'ë'e. O mu sisë rabe rabe vaejë'oho God-ro uehorovoromo vuonugaho'ë'e. ¹⁶ Ëhuni mu sisë vaejë'oho ae göëro

gö huruoho majahirovonövore. Ĕhi'oromo göëro göho uehorovoromo God-are öroro Ĕninamirego guomo guome o sisë rabe rabe jëvajoho marëjëvo'iro. A maehu Ĕninamijë'oho God-ro börömo mae ajëmi'ë'e. ¹⁷ Ĕhesi bëhoho jö God-aro baeromo a majëhinövade ae Elijah no va'ëne ae jiadeje. Röhu God-are örire birivoromo Ĕninamijadeje ënoho barëjöro. Ĕninamijamu ëni sa'are bogo rovadoho vadune aho'obëhe niö'i gemu röhu manaere aho'obëhe 6 ëhi barëjadeje. ¹⁸ Barëjamu röhu maho God-are örire uavamu huro ënoho nugö'öjamu rovamu sa'are iruno'oho marë'amadeje.

¹⁹ Nasi ö mueno'e jemë ae göehu God-are öri ma vuonugo'i aruëre anumëre ma-va'amu gagoro ae göehu ajamijamu öri mare sionehu rovamu gavë'oho ²⁰ jemëro uvore: Ae öri sisëre juvajoho ae rahuhu ahoromo mu mae röjahijë'oho ëhuro ë a hesi aru'ahoho ajami'iramu bogo guomo öriroho va'a'ajëjo. O ëhuro God-ro mu sisë aho'obëhe mu'u'amo'ajëjo. Ahia mino'e.

1 PETER

Peter-hu God-are aribövi jejëmade jöhoje.

¹ Iesu Keriso-are apostle Peter naro jemesi örire jejëmije. God-hu hesinö baejövade aribövioho jemë jemesi sa'aho vuonugo'i Pontus Galatia Cappadocia Asia Bithynia ë sa'are ma-jahuri raromobe va'aruje aribövie jëve. ² God Vavuohuro hesi nimë'ëro jemë baejëvamu hesi Aru'ahohuro jemë avohëvadeje ëhuro jemëro hesi aribövi maemu jioromo Iesu Keriso-are jöho ejaho'irarijego o hesi köhuro jemë u'ovëvo'iröhego.

Na nege God-ro huë baejëvoromo ajëmi avohego maro raromonövo'irarijego.

Mae javuoröhego noehu biririvoromo muebejarue jöhoje.

³ Asë'e God hu mabëheje. Hu nosi Bada Iesu Keriso-are Börömeje o göho hesi Vavueje. Ëaho God Vavuoho hu mabëheje. Ëhesi bëhoho huro nosi jöëni börömo mae vavaenimë'ëro Iesu Keriso ajamamu guomoromo ri'öjadohuro ëhuro no'o ajamuamu i'ovoromo mu i'oho baejë'ëro nune jioromo biririvoromo muebejarueje mae javuoröhego. ⁴ Noro muebejarueje Vavuehu hesi aribövi no bojamui'iröhe suvuoro mae gö gö baeröhëni. Ësuvuoroho ö'idöre jemëni nugëhë'eje u'emu bae'irarijego. Eö'idöre jiaje suvuoroho bogo sagohori'i bogo sisërë'i ma-maemu jiobe va'ë'e. ⁵ Iae jemëhu God ma uehorovarujohuro ëhuro God-ro hesi darugohuro burunö'e aegëhobe va'ajeje ijo tugoho'i majaho rovego evare maro bamëvo'iröhe öroho mami'e avohëhë'ëro evare röjëhijego ga'irarijego.

⁶ Huhu maro bamëvo'iröhe öroho uehorovoromo nimoroho avoharujeje. Iae jaruvoho God-hu nimë'öho jemëro huë vavaene bövie bise'e baeromo ëhuro majae ma-bunemu vavaenimë'e raromarujeje. Ëhi jie röhu iae nimoroharujeje. ⁷ Huë vavaeni baejaruje hesi bëhoho jemë'o no'o ga'iröhëni jemesi uhohu'o biririvoromo God mae uehorovego. Ëhesi jöho na uhu'e uëtië'e. Gold mae avoho'ië'iroho vëniro buejarueje. Vëniro buejego ravoromo va'inumoho si'urë barë'i ma-aji mae jiajeje. Röhu gold-ho bogo ioro'iolemu jio'irögoro jemëhu God mae uehorovaruje muoho ma-jiemu jiobe va'ë'e. Ëhi jië'ëro God uehorovaruje muohuro gold-ho iosiramiro mo ma-mabëheje. Röhu vënehu gold buejego ravajëhi huë vavaenohuro jemesi örire ëhi vëninö'e ravëvajeje. Röhu gold vëniro buejego ravoromo sisë si'urë barë'i aho'o ma-maemu jiego gavaruëhi jemë ëhi huë vavaenoho baejarujeje ëhuro jemëhu God uehorovarujoho biririvego jemë'o no'o garomo uvoröhëni: Jemë huë vavaene baeromo biririvoromo God mae uehorovobe rovë'ëro ëhu'ëro jemesi uhohu'o God maemu uehorovaruje höjo. Ëhi uvego Iesu Kerisoro a nuniro rovego evare God-ro jemesi ihoho döro bamëhoromo rajëhiromo mabëhe uëröhego. Ëhu'ëro jemë huë vavaenoho baejarujeje. ⁸ Amo Iesu Keriso rue'iramu jemesi ihoho ëhi ma-maemu jiëho'ë'e. Avevejö'öho jemë hu bogo gavë'e jemesi dë vövöbajo'o uhure hesi örire uehorovarujeje. Jemë hu bogo nunoho gavarujeje röhu hu mae uehorovoromo nimoroho avoharujeje. Nimoroharuje jöho börömo bëhe

jië'ego ë hesi jöho bogo ato varijënoho jëve. ⁹ Jemëro uehorovoromo uvarujeje: Noehu Keriso mae uehorovarue hesi bëhoho ijonö God-ro nosi dë vövöbajo'oho maro bamahuo'iramu iae mae javuo'ajë uvoromo huë mabëhe jëvego nimoroharujeje.

¹⁰ Urimo Keriso bogo rovadevare evare God-hu jemë mare bamëvoröhe jöho jö hesirire baeromo majëhinövare a mamiohuro majëhinövareje. Majëhiromu röhu ë jö hesi bëhoho avo'avoho nahareje ga'i ë muoho diehi jiego. ¹¹ Kerisohu vi'ehi baeromo guomoromo ijonö aji bae'iröhe jöho Keriso-are Aru'ahohuro jabumë röjëhijamu simanore baeromo bëhoho nahoromo uvoruomadeje: Ëhi jië'e muoho divare diehi jio'a'ajëjo. ¹² Bëhoho nahamu God-ro röjëhijamu garomo uvareje: Noehu jajivarue mu mabëhoho jaruvo ave sa'are raromaruoho no bogo ga'i ijonö raromoruomoröhe ariböviohuro garuomo'ajëjo. Ëjöhö God-ro röjëhijamu baejareje. Röhu avevejö'oho ë muoho jemë iae hejë'e jëve. God-hu ö'idöre jiamu noni nugö'öjädë Aru'aho hesi uehoroho baeromo aëro ë mu ma hesi jöho huruoho majëhijamu hejarijeje. Ëmu ma hesi bëhoho aneraho jabu'o he'i nimoruome röhu bogo eni jëve.

Noehu mu sisë bogo gavanovo'i mu maemu vaeröhego God-hu uövuade jöhoje.

¹³ Ëhuni nune jioromo mue vae'i avo'avoho uehorovore. Iesu Keriso a nuniro rue'iramu God-are aji maho bae'a'aruje. Ëjöhuremu avo'avoho uehorovë'e raromore. ¹⁴ Ëhi uehorovë'e raromoromo God-are jöhuremu ejahonövore. Mami'e God-are jö bogo hejarije majare jemesi sinehu nimajohemu vaejarijoho ëhi jië'e mu öriroho nadi jiji-hore. ¹⁵ Nadi ëhioho jijihö'i a'i mue bövie bise'e vaejë'iroho dë vövöbajo'ohuhu'o ma-mae jioromo raro mu jijihonövore. God-hu jemë hesinö jëvojöro uëvade aho hu ma-maemu jiajëhi ëhi jiore. ¹⁶ Ëhesi bëhoho God-are surire jöho uvë'eje: God na ma-maemu jevë'e jiaje ëhuni jemë'o ma-maemu jiorëjo. Ëhuni ëhi ë'onörovore.

¹⁷ God-ro bogo nue gö gö uehorovoromo gö'i a'i ma-gemu göromo nosi muoho diehi jiego garomo mae o sisë uövuajeje. Ëhi jië'e aho jemë Vavuoho hö uavarujeje. Ëhuni ave sa'are ma-jahuri raromaruoro God börömoho hö uehorovë'i raromore. ¹⁸ Ëhesi bëhoho jemesi hijo miono'ohuro Keriso bogo uehorovë'ëro bëhi rumo'e muoho röjëhibe rovamu jemëro ëhemu ejëhoromo sisë hesi darugoremu raromonövarijeje. Ëhi jëvë'ëro God-hu nimaje muoho bogo vae varijënoho jëvadeje. Ëhi jëvamu God-ro ajëmijë'ëro mae jëve. Röhu jemë'o iae gavarujeje. God-ro jemë ajëmi'irögoro ijo bajoho o bövi bise'o maho bogo ëho bu'öromo ëhuro ajëmijadeje ëhi jië'e inömo ma-jahuri inöme jië'ego. ¹⁹ A'i Keriso-are kö maho bamoromo ëhuro mae ajëmijadeje. Ëhesi bëhoho urimoroho Jew rajëro God-ni suvuoro bamaho'ië'iroho sheep harihe ma-mahuremu muo'amoromo suvuoro bamahonövareje. Keriso ëhi jië'e suvuoro maemu jiadeje. Ëhi jiamu God-ro hu bamadeje jemëni guomoröhego. ²⁰ Jemëni guomoröhego sa'ae bövie bise'e bogo bamadevare God-ro hu baejadeje. Amo ave ijo tugohö'i majare jemesi jöëni God-ro hu nugö'öjamu a nuniro rovadeje. ²¹ Rueromo jemë ajëmijë'ëro ëhu'ëro jemëro God mae uehorovarujeje. God-ro Keriso ajamamu ri'öromo aji maho baejë'ëro

ëhu'ëro jemëro God gemu uehorovoromo uvarujeje: Iae huro no'o ajamui'ajëjo.

²² Röhu God-are jö maho ejahoromo ëhuro mu sisë uehorovarijoho vuonugë'e jëve. Vuonugo'irögoro Christian ö mueno'oho bogo ma-döemuoho a'i dë vövöbajo'o uhohu'o uehorovëvë'e jëve. Ëhuni göëro göho dë vövöbajo'e aho'o uehorovëvo avohore ²³ ë hesi bëhoho jemë Christian vaeromo ëhuro harihu aboji'e i'e rahëvanovamu i'oro aevoromo biririvë'e jëvaje. I'o rahëvade hesi bëhoho vuovëvo'iröhe vëmu vavu'o jabesi ujoho bogo bamëvo'i a'i God ioro'ioeremu hijaje a hesi ujoho bamëvadeje. God-are ujo hesi bëhoho iae God-are jöeje. Hesi jöho darugo bojëmijaje ioro'ioeremu jioröhe jöhoje. ²⁴ God-are surire jöho ëhi gemuoho uvë'eje:

Ae aho'obëhe garasi va'ëne jio'amajëjo.

Inöme bövie bise'e mabëhe hö uehorovaruocho ëho resu resu ino va'ëne höjo.

Röhu garasioho sahori'amaje höjo.

Resu inoho rireromaje höjo.

²⁵ A'i Badare jöho ëhi jiemu jiobe va'aje höjo.

Ëjöho iae Keriso-are jö ma aehu majëhijamu hejarijohoje.

2

Bada Iesu hu munë va'ëne jiaje jöhoje.

¹ Jemë i'e rahëvanovë'e aribövie jëvë'e jiaje ëhuni mu sisëho aho'obëhe vuonugore. Sareri sareri'e muoho döeremu mae vaejaruje muoho vuonugore. A jabesi mu mahuni dë vörönëgajoho vuonugore. Jö sisëho vuonugore. ²⁻³ A'i jemëro mami'e herovarijeje Badaro jemë huë baejëvamu. Huë baejëvamu herovë'e jëvaje ëhuni i'e rahëvë'e asisö'ehu amu rihu ue'aho'i nimoruomajëhi ëhi dë vövöbajo'o hesi amu maho ue'aho'i nimonörovore. Ëhi jië'e amu ue'ahë'oho jemesi aru'ahoho biririvobe va'ojuvo ijönö a duvaho va'ëne jioromo maro raromo'aruje. ⁴ Röhu jemëro Bada Iesuarinö ruere. Hu hesi darugoremu hiromo darugo bojamuijaje ahoje. Hu munë va'ëneje. Ëmunëho aëro sisë hö uvoromo vuonugamu God-ro maego hesi baejadeje. ⁵ Röhu jemëro Iesuarinö darugoho baejë'e jëvaje hesi öroro rovego God-ro jemë munë gagovëvanovoromo hu'o havëvoromo javu böröme vaejëvanovo'iro jemë gemuoro jëvego hesi Aru'ahohuro ë va'o hi'iröhe. Ëosa börömore jemë ë rumo va'oromo priest muoho vaenövo'aruje. Jew rajo priest-ehu God-are osa börömore rumo va'oromo God-ni suvuro bahijaharëhi jemëro ëhi priest muoho vaeromo jemesi dë vövöbajo'o suvuroho Iesu Keriso-are jöeni God-are örire bojaminövo'aruje. Ëhi jië'e suvuro bojämijë'oho God-ro garomo nimajeje. ⁶ Ëhesi jöho God-are surire jajivoromo uvë'eje:

Ëhuro gahëjo. God naro munë va'ëne aho Zion bamajëjo

huro munëno'e biriri'e bönu mabëhëro namijego ëhuro javuoho bibivoröhego.

Ae rahu ë aho mae uehorovë'oho bogo javojimo ga'a'ajëjo.

⁷ Mae uehorovaruje aribövioho jemëro uvarujeje: Ëmunëho iae mabëhe höjo. A'i bogo ma uehorovarue aribövi jabesi jöho God-are surire jajivoromo uvë'eje:

Munë javue vae'irögoro munë gemu bijönimoromo vuonugare höjo. Vuonugaroho jaruvoho ë munëhuro javuoho nigemo'ego bibivoromo mae namijajëjo.

⁸ Röhu jabesi jö göho jajivoromo ëhi uvë'jeje:

Aëro ë munë va'ëne are ro biberovo'aruëjo.

Hesirire ro rireromo'aruëjo.

Biberovarue hesi bëhoho God-are jöho juahobijioharueje God-ro ëhi jïë'e i'uoho bamëhë'ëro.

No God-are aribövie javuajë jöhoje.

⁹ A'i jemë God-ro baejëvë'e aribövie jëve. Hu'o masije riravaruje priest ömo'öme jëve. Ma-maemu jëvë'e aribövie jëve. Hesiremu jëvaje hesi bëhoho jemëro hesi mu mabëhi hesi jöho ae majëhi'irarijego rabëni jemë ramoramore raromamu huhu baejëvoromo hesi aji mare bamëvadohuni ëhuni ae majëhi'irarijego. ¹⁰ Urimoho jemë iho rumo'e aribövie jëvadeje. Jaruvoho God-are aribövie jëve. Urimoho God-are huë maho bogo baejarijeje. Jaruvoho hesi huë maho baejë'e jëve.

No God-are muemu vaejarue aribövie javuajë jöhoje.

¹¹ Aganomë na jögore bojëmi'irögoro ë'e. Jemë ave sa'are raromaru-joho sa'a göre ma-jahuri raromarue aribövioho va'ëne jëvanove. Ëhuni uëve jemesi sinehu mu gö gö nimoromo aru'ahohu'o umogihajoho nadi gavanovore. ¹² A'iro God bogo uehorovarue ariböviohu'o raromoromo mu maemu vaebe va'ore. Ëhi ë'ë'oho jabumëro jö sisë bu'öromo jemë sisë vaejaruje hö uëvaruoho röhu gë'iröhe jemë mu mae vae'iramu gëgorovo va'o ëho majaho rue'iramu God-are ihoho mae ua'ë'ö.

¹³ Röhu Badare jöho uehorovoromo aehu masijo bahi'amare aribövioho aho'obëhe jabesi jöho ejëhore. Aehu böröme namiromo nosi sa'ae aho'obëhe muebejavuajoho ejahore. ¹⁴ A börömo hesi bëhire raromoromo sa'are mu muebejëvaruoho ejëhore. Ësa'are a börömhuro jabumë rëm'öjë'jeje mu sisë'e aribövioho i'ue bojëmi'i mu ma'e aribövioho mae uëröhego. ¹⁵ Jemëhu a masijo ejëho'irarije hesi bëhoho God hu nime jemëro mu mae vaejego sisë'i uehorovarue ariböviohuro ëho garomo simano rumo'e jöho vuonugoröhego. ¹⁶ Röhu aehu a gö jabesi darugoremu raromoromo jabesi muemu vaejaruëhioho nadi ëhioho raromo'i mae raromo jijihore. Ëhi'ore röhu nadi uvore: No bogo a darugoremuoho raromo'i iae no nosi mae raromo jijiharuëromo ëhuni ri'öromo mu sisëho vaere. A'iro uvore: No God-are darugoremu raromoromo hesi muemu vaejarue aribövie javuajëromo mae raromo jijihore. ¹⁷ Ëhi'oromo ae aho'obëhe rajëhire. Christian ö mueno'oho dë vövöbajo'e aho'o uehorovëvore. God böröme hö uehorovore. Sa'are böröme namiromo muebejavuajoho rajahire.

Kerisohu huë vavaeni baejadëhi no'o ëhi huë vavaeni baeröhe jöhoje.

¹⁸ O ae gö jabesi darugoremu raromoromo mu vaejëharuje aribövioharo jemesi mu simano vaejarue aribövioho masije hö uehorovoromo jöho ejëhonövore. Jemesi a masijehu a mae jioromo sanu'e jöemu majëhijë'oho ejëho'i röhu vörö'e aribövioho jahu'o ejëhonövore. ¹⁹ Ëhi jïë'e sisë aribövi ejëho'irarije hesi bëhoho jaehu God-are jö uehorovanuohuni aehu huë vavaeni ëma bojamamu ma-herovë'i taemorovoromo hijë'oho God-are huë maho bae'a'anue. ²⁰ O jemë mu

sisë vaejamu aehu muo'amëvamu jemëhu ma-taemorovë'oho no rabëni uvo'ejo: Jemë taemorovarujohuro jemesi ihoho ajiomë'e hōjo. A'i jemë mu mae vaejë'iro huë vavaeni bojëmamu ma-taemorovë'oho ëhuro God-hu gavajoho maeje. ²¹ Rabëni hesi bēhoho God-ro ëhi jjië'e huë vavaeni'e muoho jemesi örire bojëmijë'eje. Keriso hu'o jemesi jöëni huë vavaene baejadeje. Huë vavaene baeromo ëhuro jemëhu diehi ë'irarije muoho rōjēhijadeje huhu ë'adëhi jemë'o ëhi ë'irarijeko. ²² Hu mu sisëho bogo vaejadeje. Sareri'e jōho bogo jövadeje. ²³ Aehu sivohijaroho bogo mana sivëgonövohijo. Aehu vi'ehi bojamihijaroho hu bogo jō darugo'oho mana majëhinövohijo. A'i hesi arijo'arije God-are övo döre bamorovadeje hu mae mevoromo gavaje aego. ²⁴ Ëhi'oromo huro nosi sisë hesi i'uoho hesi sino haho'ere baeromo korosire guomadeje ëhuro no vuovanovoromo öri sisëho ioro'iore gemu vuonugo'i i'ovoromo öri maremu jijihoröhego. Huhu vi'ehi baejadohuro ëhuro jemë sisë'i raromarijoho marëjävë'eje. ²⁵ Sheep-ehu sidövanovoromo jijiharijoho jaruvoho sheep o jemesi aru'aho muebe'amaje a hesiro vuonorö'ö rovë'e jëve.

3

Vaboro'lo baru'lo diehi ë'iröhe jöhoje.

¹⁻² Röhu vaboroharo jemesi baru jabesi jōho ëhi ejëhore. Ejëhorego baruehu God-are jō bogo ma uehorovë'oho vaboro jemesi Christian jōho bogo hejë'e jemesi muohemu garomo ga'iro jemëro God bōröme hō uehorovoromo mu ma-maemu vaejeko gëromo huotorovoromo Keriso mae uehorovoruomo'iro. ³ Röhu jemë mae jëvego baruehu gëjōro nimë'oho nadi sinemuoho rajahirovoromo ijo bajo bōrömo bu'ōromo ëhuro simano uoho avohorovoromo nieniaho niōgoho bövioho bise'oho imoromo io'amego mae jëvego gë'iro. ⁴ Nadi sinemuoho uehorovo'i a'i dë vövöbajo'lo uhohu'lo avohorovego gë'iro jemesi muoho mae jiego. Sino avohorovë'oho mavojirojevö'iramu sisërëjävö'ë'e. O dë vövöbajo'lo avohorovë'oho gë'l'ö mae jëvemu jëvobe va'iramu. Dë vövöbajo'lo avohorovo'irarije hesi bēhoho ma-u'emu taemo raromo'irarije jöhoje. Jemë ma-u'emu taemo raromë'oho God-ro gëvajeje jemë ma-mabëhe jëvego. ⁵ Urimore God gemu uehorovonövare magonaho ömo'ömehu jabesi dë vövöbajo'lo avohorovarëhi jemë'o ëhi avohorovore. Jabu ëhi ma-u'emu taemo raromoromo avohorovoromo jabesi baruoho ejëhonövareje. ⁶ Ëhi jjië'e magonahe gemu Sarah-ro hesi barue Abraham-are jōho ëhi ejahoromo hesi örire uanövadeje: Nasi böviohajo. Jemë bogo nurunurumoromo juhuonivo'i a'i mu mae vaemu vaejë'oho ëhuro jemë Sarah-are aboji ömo'ömoho va'ëne jëvanovo'ë'e.

⁷ Röhu baruoharo jemesi vaborohu'lo gemuore raromarujevaro ëhi avo'avoho uehorovoromo raromere. Uvore: Ama'i nosirire jiaje darugoho ëhi jjië'e darugoho magonaho jabetesiroho bogohöjo röhu jabu'lo no'lo God-are harihu aboji'ëro javuë'ëro huro no ajamui'iramu ioro'ioremu hu'lo maro raromo'ejarëromo vaboroho rajëhire. Vaboro rajëhijë'oho ëhuro jemëhu God-are örire jō ataruje muoho bogo sisërë'ë'e.

Noehu mu ma vaejeko aehu bijönimoromo huë vavaeni bojamuijarue jöhoje.

⁸ Rõhu jõe gemu ijo tugoho'ioho majëhi'iramu iae barë'ë'e. Jemë ae aho'obëhe jõe gemu uehore gemu baeromo ö mueno'ehu rajahirovaruëhi ëhi huë baeromo rajahirovoromo ma-taemo raromare. ⁹ O ae göehu sisë vaejëvë'iroho nadi mana jabesi öriroho sisë vaejëvore. O jö sisë uëvë'iroho nadi mana jabesi öriroho jö sisëho uë'i a'i jemëro God uavego huro jabumë mae vaejëvo'iro. Ëhesi bëhoho God-ro jemë hesinö jëvojöro uëvadeje ëhuro jemë mae vaejëvego maro raromo'irarijego. Ëhuni jemëro hu uavego a ioro'iorohu'o mae vaejëvo'iro. ¹⁰ Jemëhu ëhi ömo'irarijoho God-are surire uvë'eje:

Ae rahu mae hi'ië'iroho

sine sasohoromo juvo'ië'iroho

bitare taemoromo jö sisëho nadi bu'önëjo.

Jö'e tugohoromo nadi jöho ruëroho numëroho ma-jövonëjo.

¹¹ Mu sisë vaejanuoho gororomo mu maemu vaenëjo.

A'o mae avoho hi'i sivoho avohonëjo

¹² rabëni hesi bëhoho Badare nunoho ma aribövi jabesiroho bogo ahoro'i

ëninamijaruoho hejëho'i

sisë aribövioho deje bojëmaje jiaje.

¹³ Jemë mu mae vae'i ëhemu uehorovë'oho rahuro jemesi öriroho sisë vaejëvo'ë'e. Aho bogo sisë vaejëvo'ë'ö. ¹⁴ Rõhu jemëhu mu mae vaejamu aehu bijönimoromo huë sisë bojëmamu baejë'ohuro ëhuro jemë maroho jëvo'ë'e. Nadi aho juhuonëmiromo nurunurumo'i ¹⁵ dë vövöbajo'o uhoro uvore: Keriso börömëro jië'ëro Bada hö uvoromo hu gemu mae uehorovore. Hu gemu mae uehorovoromo he'irarije God-are jö bogo heruomë'e ariböviehu jemë uëvamu: Mu maehu rueröhego uehorovaruje hesi bëhoho majahuihego hejarë uëvamu hejë'oho simane sasohoromo bëhoho røjëhire. ¹⁶ Rõhu ma-u'emu sanu'e jöhemu røjëhiroho mu maemu vaerego ëhuro jemesi dë vövöbajo'oho marëjëvo'i ëhuro jemëhu Keriso-are ijore ijore jijihoromo mu mae vaejarujoho ëho aehu sivëgë'oho jaburo jemesi muoho garomo javoje bae'iröhe. ¹⁷ Mu sisë vaeromo vi'ehi baejë'oho sisë jio'i a'i mu ma vaeromo God-hu nimamu vi'ehi baejë'oho ëho iae maeje. ¹⁸ Keriso hu'o a maëro jië'ëro sisë'e ariböviohuni uehorovoromo ma-gemu guomadohuro ëhuro jemesi sisëho ma-ioro'ioeremu mu'uvëhadeje ëhuro jemë God-are örire söjëvo va'oröhëni. Hesi sino haho'oho guomo'i rõhu hesi aru'ahoho i'ovadeje. ¹⁹ Hesi aru'ahohuro i'ovoromo va'o aru'aho ioro'ioeremu savoji gago va'ënire sisë'i raromaruire ë va'oromo jöho majëhijamu heruomadeje. ²⁰ Rõhu ë hesi urimo Noah-hu hijadevaroho evaroho ë aribövioho bogo vuovë'e sa'are raromareje. Sa'are raromoromo God-are jöho bogo ejahonövareje. Jöho bogo ejaho'ego Noah-ro boat börömoho vae'ego God-ro ëhi ma-hiromo muebejëvonövadeje ë ariböviohuro avoho uehorovoruomöjoro. Muebejëvamu jöho bogo ejahareje. Bogo ejahamu ae ma-vemino'e ae aho'obëhe 8 boat-rerumo va'amu jovo döre jëvoromo ëhuro mae jëvadeje. ²¹ Ëjovehu uhu'e ë'adoho jovehu bapataeto vaejaruëhi ëhi jianove. Ëhesi bëhoho jemë bapataeto vaejë'oho sisë'i raromego God-ro jemë baejëvoromo maro rëmeho mae jëvajeje. Bapataeto hesi bëhoho bogo sinore jiaje va'inumoho diböjoro bogo ëhunioho jovoho eguo'i a'i bapataeto hesi bëhoho bapataeto vaeromo jemë God uavarujeje: Nosi dë vövöbajo'oho

avohahuego no uvo'irarējo: Nosi sisēho iae u'ovahuē'e hōjo. Rōhu bapataeto vaeromo jemē bogo sisēroho va'i mae raromarujeje rabēni Iesu Kerisoro guomoromo ri'ōjē'ero ēhu'ero. ²² Iae Iesu Kerisoro ri'ōnugoromo ō'idōre raromōrōmō darugo baejē'e aru'aho ioro'iorohu'o jabesi ōrire huro jōho bojēmego hu gemu ejahoruomajeje.

4

Sinehu nimaje mu vaejaruoho vuonugo'i God-hu nimaje mu vaerōhe jōhoje.

¹ Kerisoro hesi sino haho'ere vi'ehe baejadeje. Vi'ehi baeromo mae uehorovadēhi jemē'o ēhi gemuoho uehorovoromo ēhuro avoho biririvore. Ae rahu jabesi sino bogo uehorovo'i Keriso-are jōēni vi'ehi jabesi sino haho'ere baejē'o ho ēhi jiē'e aribōvioho mu sisēmu vae'i nimaroho vuonugē'ejō ² ēhuro sa'are raromō'irōhe maja vitur-oho sinehu nimajohemuoho bogo uehorovo'i a'i God-hu nimajohemu uehorovē'e raromō'irōhēro. ³ God-are jō bogo heruomaje aribōviehu ōmō'i nimoruomajēhi jemēhu urimo ēhi ōmonōvarijoho iae eni jiē'eje. Urimoho jemēro ōēro ē'anovoromo dēre ri'ōjēvego bōvie bise'e ēma ōmonōvarijeje. Jovo sisē iromo simane sisērēnōvarijeje. Mahēro gemuoro uruvanovo'amonōvarijeje. Sōrōro raromanovoromo vōrō'e jovemu ue'ahonōvarijeje. Uehore sisē'i baeromo uvonōvarijeje: Inōme gō gō aru'aho'e hōromo uvene aho rōjēhinōvarijeje. ⁴ O jaruvo ho jemē God rumo'e aribōviohu'oho bogo gemuoroho sisēho vaeromo bōvioho bise'oho ēma ē'oromo ruēroho numēroho ēma jijiharujeje. Jemē bogo ēhioho ē'ego gēromo ē aribōviohuro uvarueje: Noehu ē'aruēhioho jabumē rabēni bogo ēhioho ē'arue hōromo tiōjarueje. Tiōromo jemesi ihoho ijumēharueje. ⁵ Ijumēharuoho ijonō mu sisē rabe rabe ē'aruoho God-are ōrire huruoho majēhi'ē'ō huro ave sa'are raromarujeje aribōviohu'o mami'e vuovade aribōviohu'o mevavuo gō'irōhēro muebejavuoromo hijajego. ⁶ Ēhuni vuovē'e aribōvi jabesi ōrire Keriso-are jō majēhijamu hejare hesi bēhoho ēhuro ma-ae hu sisē hesi mana nosi sino haho'ere baeromo vuovaruēhi jabu'o ēhi sisē hesi mana sino haho'ere baeromo vuovēvadoho God-hu biririvoromo hijajēhi jabesi aru'ahoho ēhi mae raromōrōhego.

Mu vaerōhe suvuoro God-hu bojamuijajoho avoho mueberōhe jōhoje.

⁷ Bōvi bise'o barē'irōhe majaho dunove. Ēhuni taemorovoromo avoho mueberovē'i parie vaenōvore. ⁸ Rōhu aveho bōrōmoho jiaje ēhuremu uehorovore. Gōēro gōho dē vōvōbajo'e aho'o uehorovo avohore rabēni huē baerovaruohuro mu sisē aho'o mu'uvahuaje jiaje. ⁹ Rōhu ga'irarije Christian ō mueno'e vejō'e i'e rovamu gavē'iroho uēre: Nosi osaro ro raromōhēre. Nadi i'uhō'i dē vōvōbajo'e sasohoromo ēhi jiē'e muoho vaere. ¹⁰ Rōhu God-ro hesi nimoromo suvuore gō gō ae gō gō bojamuibe va'aje jiaje ēhuni God-hu diehi jiē'e suvuoro bojēmamu baejarijoho avoho muebejahoromo ē suvuorohuro gōēro gōho ajamirovore. ¹¹ Jō majēhi'irarije suvuoro baeromo God-are aribōvi majēhi'iē'iroho God-are jōhemu majēhire. A ajēmi'iē'iroho God-hu bojēmaje darugoho baeromo ē muoho vaere. Mue bōvie bise'e avo'avoho vaejego aēro gēromo uvo'iro: Jemē Iesu Keriso-are aribōviēro jēvē'ero ē'arujē

uvoromo God-are ihoho dö maro bamoruomo'iro. Aji maho darugo maho hesiremu ioro'ioemu jiemu jiobe va'ë'e. Iae mae.

Keriso'o bimuvoromo huë vavaeni baeröhe jöhoje.

¹² Aganomë huë vavaenoho jovëro ruomanovajeje God-ro gëröhego jemë biririvego o bogo. Huë vavaeni baejarujoho nadi uvore: Diehi'ego ë'ajëromo tiö'i ¹³ ma-uvore: Kerisohu huë vavaeni baejadëhi no'o ëhi gemuoho baejaruëromo nimorohore. Ëhi jië'o'oho ijönö Kerisoro hesi ajoho röjëhi'iramu garomo jemë nimoroho avoho'aruje. ¹⁴ Aehu Keriso-are jöëni jemë sivëgë'o'oho huë mae jëvajeje rabëni God-are ajile Aru'ahohuro jemë aegëhë'ëro. ¹⁵ Röhu jemëhu a anamu guomë'o'oho o vajiohehu baejë'o'oho o mu sisë gö gö vaejë'o'oho o ae gö jabesi mu ëma ahobe jijihë'o'oho ëho sisëje. Nadi ëhi jië'e muoho vaeromo ëhuro huë vavaenoho mana baere. ¹⁶ O Christian jëvamu aehu bijönëgoromo huë vavaeni bojëmamu baejë'o'oho nadi javojoho bae'i Keriso-are ihoho baejë'e jëvaje ëhuni God-are öröro huë mae uare.

¹⁷ Noehu vi'ehi baejarue hesi bëhoho God-hu mevavuo'iröhe majaho mami'e aevë'eje. Iae hesi aribövire bëhe vaeromo mevavue. No rabe gavaruoho ma-i'e aevajoho röhu va'ojuvo ijönöho God-are jö ma bijönimarue aribövioho diehi jëvo'ë'e. ¹⁸ God-are surire jöho ëhi gemuoho jajivoromo uvë'eje:

Mu mae vaejarue aribövioho bogo ëma maroho va'i huë vavaenëro anojamuijuvo

ë hesi ijönö evare maroho va'o hesi javuajëjo.

Ëhuni God dejo bojamiromo mu sisëmu vaejarue aribövioho diehi jëvo'ajëjo.

¹⁹ Ëhuni God-hu nimajëhi huë vavaeni baejë'o'oho uvore: No ave sa'are bamavuade ahuro ajamui'i uvadëhi ëhi ajamuijajëromu mu mae vaeromo jemesi arijo'arije hesi övo döro bamorovore.

5

A duvahehu God-are ö mahu'o avoho muebe'amo'iröhe jöhoje.

¹ O God-are ekaresia muebejëvaruje a duvahoharo nasi jögoru harihoho gare. Na'o ekaresia muebejëvaje a duvahe jeve. Naro gavodeje Kerisoro huë vavaene baejamu. Röhu u'emu Kerisohu hesi aji ma röjahujjë'iroho huro nasi örire bojemi'iramu na'o hu'o gemu mae ajoho bae'ejo. Na ëhi jië'e aëro jevë'ëro ëhuni ave jöho majëhi'ië'e. ² God-ro hesi sheep-oho bojëmijadeje jemëro muebejaho'irarijego. Ëhuni jemëhu hesi sheep muebejëvë'iroho nadi ë muoho bijönimë'i muebejëvo'i a'i God-hu nimajëhi ëhi muoho nimoromo hesi sheep-oho muebejëvore. Nadi moniemuoho uehorovoromo muebejëvo'i a'i muoho dë vövöbajo'e aho'o nimo avohoromo God-are aribövioho muebejëvore. ³ God-hu jemesi övore bamëvade aribövioho nadi masije jëvajë uvoromo i'ue gö gö bojëmi'i a'i mu mae vaeromo öroho röjëhirego jaburo gëromu ëhi ë'irovo. Ëhi muebejëvore. ⁴ Ëhi ë'lë'o'oho Sheep Muebejavuaje A Börömëhu rovë'iroho ioro'ioemu jioröhe ajile suvuoroho bae'a'aruje.

⁵ O a'l'oharo a duvaho jabesi jöho ejëhore. Röhu ekaresiae aho'obëhe jemëro ma-u'emu taemorovoromo huë baerovoromo ajamirovore. God-are surire jöho ëhi gemuoho uvë'eje:

Biriri'övoromo masije javuajë uvarue aribövioho God-ro ahëvaje höjo.

Ma-u'emu taemo raromarue aribövioho God-ro hesi nimoromo huë baejëvoromo ajëmaje höjo.

⁶ Èhuni uvarujoho: No masije javuajë uvarujoho vuonugo'i uvore: God-ro gemuëro darugo'ëro jië'ëro böröme namirromo no muebejavuajë höjo. Èhi uvë'o ho majae eni jio'iramu huro ajëmi'iramu jemesi ihoho döro ajiomö'ë'e. ⁷ Röhu nurunuruëgajoho aho'o God-are öroro bojamire hu jemesi jöëni uehorovaje jiaje.

⁸ Röhu nune jioromo gavë'i raromore. Satan hu jemë'o muorovaje aeje. Vörö'e miehu darugo'o uvobe mi ja'ihö'i nahobe juvajëhi Satan-ro jemesi örire èhi ë'ajeje. ⁹ Satan-hu èhi ë'ë'o ho birivoromo God mae uehorovoromo èhuro ahore. Ahoromo uvore: Nosi Christian ö mueno'e aho'obëhe sa'ae dinö'e dinö'e raromoruomajoho èhi jië'e huë vaenoho baeruomaje höre. ¹⁰ Jemë majae ma-bisemu huë vavaene baebe va'oromo majae ijönö God-ro ajëmiromo jemesi dë vövöbajo'oho avohëhoromo daruge bojëmi'iramu èhuro ma-mae jioromo munënö'e birivoromo riravo'aruje. God-ro huë baejavuoromo bövie bise'e ajamuajeje. Huro uëvadeje jemëro Keriso'o gemu mae jioromo hesirire ioro'ioiremu jiaje ajoho bae'irarijego. Èhuni iae ajëmi'ë'e mae jëvoröhego. ¹¹ Hesi daruge jiajoho èhi gemuoho jiemu jiobe va'ë'e. Iae mae.

Peter-hu ijo tugoho'i jajivoromo jejëmijade jöhoje.

¹² Silas-ro na ajëmiromo ave surire jö harihoho jajivë'e javue. Na uehorovoromo uvajeje: Hu Christian ö mae höjo. Röhu na jajivode hesi bëhoho jemëro adahego dë vövöbajo'e mae jëvoröhego. O göho naro gavë'ëro èhuro majëhiromo uë'irodëni: God-are huë ma'e öroho èhi höjo. Èöroho bogo sareri'ehu jio'i iae mae höjo. Birivoromo ë örohuremu jijihorëjo. Èjöho majëhi'i negamu ave suroho jajivë'e jeve.

¹³ Babylon amore raromarue ekaresiahuro jemesi örire jejëmijareje God-ro jemë'o jabumë'o baejëvamu hesi aribövie jëvë'ego. O nasi Christian harihe Mark-ro jemë jejëmijadeje. ¹⁴ Keriso-are aganehu rajahirovaruëhi èhi jejamirovore.

Keriso-are aribövie aho'obëhe jemëro God-are huë maho baeromo raromore. Ahia mino'e.

2 PETER

Peter-hu Keriso-are aribövi jejëmijade jöhoje.

¹ Simon Peter na Iesu Keriso-are muemu vaejahaje ae jevoromo hesi apostle jeve. Keriso mae uehorovaruje aribövioho naro jemesi örire jajive. Noehu Keriso mae uehorovoromo aji'e mu ma baejarëhi jemë'o mae uehorovoromo aji'e mu ma gemuoho baejarijeje. Èhesi bëhoho gemu börömëro jië'ëro namiromu muebejavuoromo mare bamavuaaje aho Iesu Kerisoro avoho uehorovoromo jemë'o no'o gemuoho gövuajëro jië'ëro èhuni no mu ma bojamuijadëhi jemesi örire èhi bojëmamu baejarijeje. Èhuni naro jemesi örire jejëmiye.

² Na nege jemëhu God'o Iesu nosi Bada ma gëvarujohuro èho jaburo huë baejëvo avohoromo ajëmego jemë maro raromonövo'irarijejo.

No muoho avoho vaenövo'ejo èhuro uvoröhëni: Iae God-ro no baejavuade höjo. Èhesi jöhoje.

³ God-are darugoho hesiro jië'ëro Kerisoro mue aho'o ajamuij'eje èhuro hesi örire avoho jijih'o'iröhego. Èhesi bëhoho God-ro urimë'i no uövuaedeje noro hesi aji'e mu maho baeröhego. Èhi uövuaemu noro hu mae gavareje. Gavë'ëro èhu'ëro huro ajamuij'eje noro huhu nimaje muoho vaeromo öri mare jijihoröhego. ⁴ Èhi ajamuiromu èhuro mu börömo börömoho röjahuij'eje noro uehorovoromo uvoröhego: Iae mae höjo. Ijonö mue gö gö ma-mabëhe ajamui'ajëjo. Ijonö mae ajamui'iröhe jö hesi bëhoho jemëro èho uehorovoromo sa'arohemu uehorovarue ariböviehu jabesi sinehu nimiruoho ömoromo sisërëjaruèhioho jemë bogo èhioho ömoromo sisërërovo'irögoro a'i God-are muoho baejeho hu jiajëhi èhi jëvo'iröhego. ⁵ Èhuni avièhi jië'e muoho avo'avoho vae'i è'o gare. Jemëhu Keriso mae uehorovarujoho mu mae barueromo Keriso uehorovaruje muohu'o gemuoro havore. Mu ma vaejë'ohu God-are öroho avoho garomo mu ma vaejaruje muohu'o gemuoro havore. ⁶ God-are öri gavë'ohu taemo raromoromo God-are öri gavaruje muohu'o gemuoro havore. Taemo raromë'ohu biririvoromo riravoromo taemo raromaruje muohu'o gemuoro havore. Biririvoromo riravë'ohu God-hu nimaje muohemu uehorovoromo biririvoromo riravaruje muohu'o gemuoro havore. ⁷ God-hu nimaje mu uehorovë'ohu huë baerovoromo God-hu nimaje mu uehorovaruje muohu'o gemuoro havore. Huë baerovë'ohu ae gö jabesi öroro dë vövöbajo'e aho'o uehorovëvoromo huë baerovaruje muohu'o gemuoro havore. Èhi jië'e muohuremu uehorovore. ⁸ Jemëhu èhi jië'e mu vae avohë'ohu èhuro bogo ëma imo nosi Bada Iesu Keriso garomo muoho vae'i a'i hu garomo muoho vaeromo rae avoho'aruje. ⁹ A'i aehu èhi jië'e mu bogo vaejë'ohuro nune sisërëjëvego öri ègoroho bogo uheriho'irögoro ma-sa'a hesi muohemu garuomajeje. Mu sisë mami'e vaejamu God-hu u'övëhadoho èho rumonëgë'eje.

¹⁰ Aganomë èhu'e jiaje avoho biririvoromo God-hu nimaje muoho vaenövore èhuro uvo'irarije: Iae mae-ëjo. God-ro hesinö javuojöro nimoromo uövüë'e höjo. Èhi jië'e mu vaejë'ohu sa'aroho bogo mae bogo

rireromo'aruje. ¹¹ Bogo rireromo'irögoro a'i nosi Bada Iesu Kerisohu no mare bamavuaje aehu ioro'ioyemu muebejaje öri aril'ere jemëro mabëhe va'iramu huro jemë rajëhi avoho'ë'e.

¹² Èhu'ëro jië'ëro ëhi jië'e jöho iae na majëhi'li hinövo'ejo jemë rumonëgojööni. Iae jemë ë jöho mami'e hejë'ëro God-are jö maho eni baeromo biririvoromo ma'eno titimarujeje. Röhu maho majëhinövo'ejo jemëro heromo uehorovonövo'irarijego. ¹³ Bogo guomevo'i naehu ave sa'are hibe va'ajevare ëhi jië'e jöho majëhiromo jemesi uehoroho avohëhonövo'ejo. Na uehorovoromo uve: Èhi jië'o'ho ëho nasi mue höjo. ¹⁴ Èhesi bëhoho na gavajoho ave sa'aroho bogo ëgoho hi'li guomo hesi jeve nosi Bada Iesu Kerisoro ëhi ma-va'orahoro röjehijë'ëro. ¹⁵ Na jöho ma-avo'avoho jajivo'ejo na guomevego jemëro adahoromo uehorovonövo'irarijego.

Peter-mëhu Keriso-are aji nunehu gavare jöhoje.

¹⁶ Nosi Bada Iesu Keriso darugo'e a jiaje jöhu'o huhu rueröhe jöhu'o noehu jemë majëhijarevare bogo aho ëma uehorovoromo sareri sareri jöho mae avohoromo majahuijama heromo mae höromo jemë majëhi'li a'i nosi nunëro hesi aji böromoho gavë'ëro jöho majëhijareje. ¹⁷ Kerisoro God Vavu hesi örire iho böromohu'o aji böromohu'o baejadire noro hu'o riravareje. Riravamu aji böromo jiajire ë a huëro Iesuni uvavohijo: Ave aho nasi Harihu mabëhe höjo. Na hu garomo nimorohevajëjo. ¹⁸ Èhuëho ö'idöre uvamu noro nosi hia'ëro hejareje hu'o gemuore maemu jiaje dahorure riravare majare.

¹⁹ Èhi jië'e jöho hia'ëro heromo muoho nunëro gavë'ëro ëhu'ëro jö God-aro baeromo majëhinövore a jabesi jö surire jajivaroho jemë'o no'o adahoromo mae uehorovo avoharueje. Èhuni jabuhu God-are jö jajivaroho jemëhu avo'avoho ejëhë'o'ho iae mae jëvo'ë'e. Uvore: Surire jöho ramoramovego irehu öri röjahuijego ë va'aruëhi ë surire jöho ëhi höromo ejahobe va'ejarëjo hujeji Bada Iesuare majaho rue'li dunovego evare nosi dë vövöbajo'ere garöhëni sisonuvo'ie'lego mujörehu rojoromomo ajivavuajoho. Èhi ë'ë'o'ho jemë iae mae jëvo'ë'e. ²⁰ God-are surire jöho ejahoromo avehu'o uehorovo avohore: Jö God-aro baeromo majëhiromo jajivare jö hesi bëhi he'li naguë'o'ho bogo nosi sivu sivuoho jö bëhoho ëma morijovo ga'ejo. ²¹ Rabëni hesi bëhoho bogo aho jabesi ëma nimoromo jöho God-aro baeromo majëhiromo jajivo'li a'li God-are Aru'ahëro jabesi simanoho huotovëho'lego God-hu bojëmaje jöho majëhinövoreje.

2

Keriso-are jö huotohuotovoromo majëhijarue aribövi jabesi jöhoje.

¹ God-hu bojëmade jöho mae majëhinövoreje röhu ae göëro göëro ëma sarerëmiromo uënövoreje: No jö God-aro baeromo majëhijarue ae javuajëromo sareri sareri'e jöho majëhinövoreje. Jabesirire jionövadëhi jemesirire ëhi jië'e sareri'e aribövioho jioruomo'ë'e. Jioruomoromo ma-döëremu jö mae atanovoromo Iesuare jöho huotohuotovo majëhinövo'ë'ö. Majëhijama mae höromo ejëhë'o'ho sisërëjëvo'ë'e. Bada Iesuro hesi köëro imëvoromo jabumë baejëvadeje hesi darugoro raromöjoro. Èhi ë'adeje röhu jaburo hu deje bojamiruomajeje.

Ëhu'ëro jië'ëro sisë hesi manaho ma-majioho baeromo sisërëruomo'ë'e.
 2 Bogo ë'arue javoji'e mu sisëho vae'iramu ae aho'obëhe jabeti ijore ijore jijihonövo'ë'e. Ëhi'o'iramu God-are öri ma hesi ihoho sisërë'ë'e.
 3 Monie jabetesiremu bae'i nimoromo sareri sareri'e jöho jabeti sivue ëma uehorovoromo majëhiruomo'ë'e jemëro heromo mae hëromomo ijo bajoho mana bojëmi'irarijeho. Ëaribövioho God-ro mevëvoromo sisëre rëmö'ö'iröhoho mami gö'e aevoromo uehorovobe rovë'ëje. Hu nune jiajäro i'uoho iae bojëmi'ë'e.

4 Rabëni anera ioro'ioerehu mu sisë vaejaroho God-ro bogo manunëremuoho gë'i a'i tövo'amoromo sisëro nugö'ö'amadeje jabumë ë ramoramö'ere va'ö raromego huhu mevo gë'iröhe majaho rueröhego.
 5 O mami gö'e sa'are raromo jijihonövare aribövi jabeti sisëho God-ro bogo manunëremuoho gë'i a'i hu bijönimoruumamu gëgorovo jovocho nugö'öjamu börömo bëhe rojomoromo ae aho'o baeniägëgädeje. A'i a ihe Noah mu ma hesi jö majëhinövade ahu'o röhu a ioro'ioroho aho'obëhe 7 ë ariböviohemu i'uoho bogo bojëmi'i avoho muebejëvadeje.
 6 O Sodom'o Gomorra'h'o amo masije niö'i God-ro i'ue bojëmiromomo vënëro buel'öjëvamu ravoromo ma-muomöe jëvadeje. Ëhi ë'lade hesi bëhoho God bijönimoruumaje ariböviohuro uvoruomoröhogo: Ëhi jië'e i'uoho God-ro no'o bojamui'ajëjo. Iae ëhuni ëhi jië'e i'uoho bojëmijadeje. 7 Ëamo rajo a ioro'ioroho i'uoho ëhi bojëmi'i a'i a maho Lot ajamamu hu Sodom amore jioromo mae rovadeje. Ëhesi bëhoho urimo Lot-ro amore hiromo ganövadeje amo rajoho jögoroho bogo e'irögoro ma-biriri'övoromo öëro ë'anovoruumo'ego gë'i hiromo bijönimo avohonövadeje. 8 Ëaho a maëro jië'ëro ë amo rajohu'o gemuore hiromo majae ëhi heromo gëromomo jabumëro mu sisë vae'ego bijönimoromo dë vövöbajo'e sisërëjadeje hu a maëro jië'ëro. Ëhi'amu God-ro amoho ijumo'irögoro Lot ajamamu mae rovadeje. 9 God-ro sisë aribövioho ëhi ijumëvo'i a maho ëhi ajamijë'ëro ëhu'ëro hu uehorovarue aribövioho vavaeni'ere rireromavuo'ië'ego ajamui'iröhoho hu eni jie. A'i sisë'e aribövi taemëvo'iröhoho eni jie i'uoho baemu bæjuvo hujeji mevëvoromo i'u ioro'ioeremu bojëmi'iröhe majaho rueröhego. 10 Sisë'e aribövioho aho'obëhe jabeti örire ëhi ë'ë'e röhu garöhe aehu jabeti sinehu sisë nimajoho ömoro mo öehu jijihanovoromo va'inumi'e mu vaeromo jögoru masijo bijönimamu gëvë'öho huro ë ariböviohu'o taemëvoromo i'ue bojëmijadeje.

Ëhi jië'e jö sareri röjëhijarue aribövie jemë'o raromaruohuro biriri'övoromo uvarueje: Noremuëremu masije javuajëjo. Masije javuajëromomo bogo juhuonivo'i aji'e aribövie ö'idöre raromarue jabeti jöho sisë'i atarueje. 11 Ëhi ë'arueje röhu anera ma jabeti darugohuro jö sareri röjëhijarue aribövi jabeti darugoho iosiramiromomo börömo bëheje. Ëhi jie röhu ë aneraho bogo Badare nuniroho riravoromo anera sisëho agëvoromo jabeti jö sisëho majahijarueje. 12 Bogo ëhioho ë'irögoro a'i ë jö sareri röjëhijarue aribövioho mahu urejo va'ëne jioruome. Urejoho bogo uehorovanövë'e jabeti ëma jijihogo aëro rinovoromo muo'amoromo ujuoho va'arueje. Ëjö sareri röjëhijarue aribövioho ëhi jio'ame. Jabu'o bogo uehorovë'e jabeti ëma jijihoromo bogo ma hejarue gavarue jöho sisë'i atarueje ijönö mahu urejonö'e

sisërë'amoröhëro. ¹³ Mu sisë vaejarohuni ëhuni i'ue mana bae'ë'ö. Jabumë uvarueje: Dë vövöbajo'lo vuëvavuaje hesi bëhoho maja'e a nunire mahehu uruvanovë'oho ëhuro vuëvavuo'ajëromo ëhi ë'arueje. Mahëro uruvanovoromo jabesi sareri sareri'e muoho nimo avohoromo jemesi gemuore ö'oromo ioho ue'ahëgo evare niögu suhi'ere va'inumi jiajëhi jabesi aru'ahoho ëhi va'inumi'e jëvajeje. ¹⁴ Mu sisë vae'i öëro ë'anovoromo magonahoho majae ëhi ërimëharueje. Ëhi jië'e mu sisë vuonugo'ië'oho bogo eni jëve. O mu göho ë sisë ariböviohuro garöhe bogo biririvoromo mae uehorovarue aribövioho raromamu gevë'oho jaburo jö sisë røjëhiromo rinëgoromo sö ujuoho va'ëgo guaro rireromanovajeje. Bövie bise'e ma-bae taemo'i nimoromo vajiohu mu biririvoromo ë'o gabe rovaroho jaruvoho ë muohuro ruaho'amëvë'eje. Ëaribövioho God-ro sisë bojëmi'ë'e. ¹⁵ Öri ahorirehu jijiharoho vuonugo'i aruëre anumëre ëma jijihë'ejö. Ëma jijihoromo a ihe Balaam Bosor-are harihoho Balaam-hu juvade öri sisëre va'ë'ejö. Ëhesi bëhoho Balaam jö God-aro baeromo majëhinövade ae jiadeje röhu hu mu sisë hesi manaho ijo baje bae'i nimadeje. ¹⁶ Ëhi nimamu God-ro ë a hesi uehoro sisëho ahahadeje. God-hu Balaam-are uehoro sisë ahahade hesi jöho aviëhije. Balaam-ro mu sisë vae'irögoro mi ihe donkey döro hiromo örire va'adeje. Va'amu God-ro ë donkey-oho uehoro maho bojamamu ë jö bogo jövajohuro ri'öromo a huëno'e jöe jövamu hegorovo ë jö God-aro baeromo majëhijaje ahuro simano rumo'e muoho vae'ië'oromo vuonugadeje. God-ro Balaam-are uehoro sisëho ëhi ahahadeje. Balaam-hu öri ma vuonugadëhi ë jö sareri'e røjëhijarue ariböviohuro ëhi ë'oromo mu sisë vaeromo ijo baje bae'i nimarueje.

¹⁷ Röhu ë sisë aribövioho jovehu sa'a gagore rojomoromo sinihajëhi jabumë muoho ëhi sisë'i sisë'i ömarueje. O buru börömëhu rueromo sue huosihego arue anume va'oromo öri ari'e tugohego bogo gavaruëhi jaburo mu maho ëhi tugohahuego bogo gavarueje. Jabumë ëhi jëvë'ëgo ëhuni God-ro röhe nugëhë'eje jaburo ramoramomo sisë ma jië'ire ë va'ö raromoröhego. ¹⁸ Jö huhe ë'oromo simano rumo'e jöho ëma atarueje. Ëma atoromo öëro jijihanovoromo mu sisë ae røjëhiromo rinovo'amego ëhuro biriri rumo'e ariböviohuro sisë aribövi ioro'ioro jabesi öri avevejö'e vuonugaroho uvarueje: Jö mae höromo ejëhoromo röhu maho vuonorö'ö va'oromo ëhuro rireromarueje. ¹⁹ Jemë'ö raromarue sisë ariböviohuro ae sarerëmiromo uëvarueje: Noro jemë ajëmi'iramu jemë bogo tövanovë'e aribövioho jëvanovo'i a'i jemë rabe rabe ömo'i nëgë'oho ëma ömonövo'arujëjo. Ëhi uëvarueje röhu jabumë tövëvanovë'eje. I'u'e mu hesi darugore jëvë'ëro mu sisëmu vaemu vaejarueje. Ëhesi bëhoho di mu sisëhu ruahö'öjavuë'ohuro ëhuro tövavuanovë'eje. ²⁰ Ëhi tövëvanovoromo sisë bëhe jëvajeje. Ëhesi bëhoho nosi Bada Iesu Keriso no mare bamavuaje aho ae rahuhu mae garomo ëhuro sa'a hesi mu sisëmu vaejaroho vuonugo'i mae va'öjuvo röhu huotorovoromo sareri'e jöho mae höromo miehu viöre aeganovoromo sisërëjëvë'oho ëhi jië'e aribövioho urimo sisë jëvadoho majae ijönö rireromoromo sisërë'amo barë'ë'e. ²¹ Jabumë mu ma hesi öroho bogo ga'ibejo jabumë sisë jio'i röhu bisëmu ma'e jëvanovo'ibejo. Röhu mu ma hesi öroho iae garomo God-are jögoroho bojëmamumu vuonugë'ëro ëhu'ëro sisë mae jëvë'eje.

22 Simano ma'e jõe niö'i urimë'i uhunö'e jajivaroho huotovë'o'ho ëho ëhi jië'e aribövi jabesi jõeje. Jöho ëhi uvë'eje: Öhuro ëgubijiohadire vuonorö'ö rovaje höjo. O jö göho jovo eguahë'e mahohuro vuonorö'ö va'oromo sa'osa'o'ho muomorovaje höjo. Ëaribövi jabesi muoho ëhije.

3

Bada Iesuhu sa'are vuonorö'ö rue'iröhe jöho bogo sarerehu jio'i iae mae jiaje jöhoje.

¹ Aganomë urimo na surire jö jajivoromo jemëni nugö'öjodoho röhu maho jõe nugö'öje. Ëjö niö'i jabesi bëhoho urimo hejarije jöho röhu maho majëhiromomo jemesi simanoho avohëhe jemëro bogo rumonimo'i ma-maemu uehorovo'irarijeko. ² Iesu bogo rovadevare jö God-aro baeromo majëhinövare a maehu God-are surire jajivë'e jiamu gavarije jöho o Bada Iesu mare bamavuaje aehu jemesi apostle aribövie no bojamuamu noehu jemë majëhijamu hejarije jöho ë jöho jemëro avo'avoho uehorovo'irarijeko ëhuni jajive. ³ Röhu ave jöhuremu avo'avoho uehorovore. Ijo tugoho'i jioröhe majaho dunovo'iramu evare aëro rueromo jabesi sinehu sisë nimajohemu ëma ömobe jijjhoromo jemë sivëgo'ë'ö. ⁴ Sivëgoromo uë'ë'ö: Iahuro uëvade höjo: Naro va'oromo vuonorö'ö rue'ejöjo. Hu rue jö uvarujoho hu diae rovë'e höjo. Hu va'adoho bogo rovë'e nosi hijo miono'o'ho vuovëvobe rovë'e höjo. Urimë'i ni'i'ivadire aevoromo bövi bise'o jiove rovadoho bogo barë'i ëhi ma-gemuohemu jio'amajëjo. ⁵ Ëhi uëvarueje röhu ave jöho jabesi nimoromo bogo gavanovarueje. Ni'i'ivadire God-ro jõe jövamu ëhuro ö'idöho sa'aho ëma jio'amadeje. Sa'aho jovore jioromo rojomamu jovoho ruë numë jio'i sa'aho ririre jio'amadeje. ⁶ Ëhi jiadeje röhu ijönö jovohuro rojomoromo sa'ae aho'obëhe baeniagivamu evare majare ë sa'are jiade bövioho bise'o'ho ijumo barëjadeje. ⁷ Amo God-ro jöho röhu maho jövë'ëro ëhu'ëro jaruvo jiaje ö'idöho sa'aho ëhi nugo'amë'eje u'emu vënëro buejeko ravo'amoröhego. Ö'idöho sa'aho nugo'amajeje God bogo uehorovarue ariböviohuro hesi nunire riravoromo jabesi jö sisëho heromo i'ue baeromo sisëro va'oruomego evare aho'o vënëro ravo barë'iröhego.

⁸ Röhu aganomë ave jöho gemu avo'avoho uehorovore. Kerisohu uövuade muoho iae rue'ë'e. Sa'are raromarue ariböviohuro uvarueje: Vadune aho'o barëjë'e höjo röhu Keriso bogo rovë'e hö uvaruëhioho Bada bogo ëhioho uvajeje. Hu bogo uvajeje: Majae vadune ëmine ëmine jioromo barëjaje hö uvo'i a'i uvajeje: Majae gemu ëho vadune aho'obëhe mae jianovo'i vadune aho'obëhe mae ëho majae gemu jianovajëjo. Ëhuni bogave uvo'irarije: Majae ëge barëjë'ëro ruel'i uvadoho bogo rovë'ëro ëhuni bogo ruel'a'ajëjo. ⁹ Hesi aëro Badare jöho sareri'e uehorovoromo uvoruomajeje: O hu ëhi ëhi ömo'i uövuajoho ëma hiromo örisanuovaje höjo. Röhu Bada bogo ëma örisanuovo'irögoro a'i huro jemesi jöëni uehorovoromo ëhuni ma-taemorovoromo hije. Aehu sisëre va'ë'o'ho hu bijönimo'i a'i hu nime ae aho'obëhe sisëho vuonugoröhego. Ëhuni muebeje.

¹⁰ Röhu Badare majaho iae ma-majioho vajiohu'e aëro rovanovo'ë'e. Ma-majioho rue'iramu evare ö'idöho darugo'o tögömoromo ëma bogojio va'oromo ë inömo ho majaho manaerohö jiji mujöru'oho ravo barëromö sa'aho sa'a hesi i'o mu'oho sisërë barë nahonahovo'ë'e. ¹¹ Bövi bise'o ëhi sisërë barë'iröhohuni ëhuni avevejö'oho jemë diehi jië'e mu vaejaruje aribövie jiore. Jemë God gemu uehorovoromo ma-maemu raromö jijihö'irarije aribövie jiore. ¹² Ëhi jië'e aribövie jioromö mueberomö raromögo God-are majaho rue'iro. Ëhi ë'ë'i muohö biririv-oromö avo'avohö vaejögö ë majaho ma-burëro rue'iro. God-are maja rovë'irohö ö'idöho ravo barëromö ö'idöre jio'amaje inömo ho ravoromö disoruvo barë'ë'e. ¹³ Ëhi'ö'iramu God-ro uövuadëhi ëhi ö'idö i'ohö sa'a i'ohö bamö'ë'e. Ö'idö i'ohö sa'a i'ohö bamö'iramu ma-mu mahuremu ë jio'amö'ë'e. Ëhi jio'iröhögö no raromöromö muebejaruje.

¹⁴ Aganomë ëhi jioröhögö muebejarujöhö biririv-oromö God'ö gemuorö huë mae raromöromö hesi nunorö mu ma-maemu vae'i ë'ö gare. ¹⁵ Nosi Badahu bogö burëro i'u bojëmi'i ma-taemorovoromö hiromö muebejëvähö ëhö avo'avohö uehorovoromö uvore: Hu ma-taemorovoromö hiromö muebejavuajöhuro ëhuro majaho bogö barëjë'e iae jiahuaje höjögö noehu hu ua gavögö mare bamavuo'iröhöhö. Ëhi jië'e jöhö nosi ö mae Paul hu'ö simano mahö God-are örire baeromö jemesi örire jajivadeje. ¹⁶ Ëhi jië'e jögö suri göre göre aho'obëhe jajiv-oromö majëhi'i nimë'ohö hu'ö jögö gemuohö jajivadeje. Röhu Paul-are surire jöhö jögö gö gö anoji'eje. Jögö anoji'e jiamu gavë'ohö simano rumö'ehu bogö biririv-oromö riravarue ariböviohuro God-are surire jögö iorö'iorö sisë'i huotovarüehi ëhi Paul-are jöhü'ö sisë'i sisë'i huotovoromö ëhuro ijönöhö sisërëjëvo'ë'e.

¹⁷ Aganomë ëhi jioröhe jöhö jemë iae hejë'e jëve. Ëhuni avo'avohö mueberovore. Jögöru ahoruomaje a sisë jabesë ijögö ijögö jijihö'aruje. Amö ëhuro biririv-oromö riravarujöhö vuonugö'i baradore rirerömëvo va'ë'e. ¹⁸ Avo'avohö mueberovoromö nosi Bada Iesu Kerisö mare bamavuaje a hesi huë mahö avo'avohö baebë hesi mu mahö avo'avohö ga'amobe va'ore. Jaruvohö hesi ihöhö mabëhe uaromö ëhi iorö'iorömu mabëhe uabë va'ejo. Iae mae. Ahia minö'e.

1 JOHN

God-are Jö jumuvë'e ahuro daruge bojamuiromo i'ovavuaeje. Röhu ë aehu sino haho'o baeromo sa'are rovamu John-mëhu gavare jöhoje.

¹ Ni'i'ivadiroho ae gemu jië'e jiadeje. Jiadoho iae ëhi ma-jiemu jioje rové'eje. Noro ë a hesi jöho heromo hu nosi nunëro garomo muebe'i arïromo hesi dajoho nosi övëro rëhë'ëro javuë'ëro ë a hesi jöho jajivo'ie'ö. Hu God-are Jö jumuvë'e i'ovavuaeje daruge bojamuijaje aeje. ² Èi'ovavuaeje darugoho va'orahoro huruohamu noro gavë'ëro ëhu'ëro jemë mae majëhiromo uëvarueje: Èahuro darugoho ioro'ioyemu bojamuijaje höjo. Huro Vavuohu'o gemu mae hijë'ëro nosirire rueromo ë darugoho iae röjahuijade höjo. ³ Noehu garomo hejare a hesi jöho majëhijö jemëro heromo jemë'o no'o agane vaerovo'iröhëro. Noehu Vavuohu'o hesi Harihe Iesu Keriso'o agano vaerovaruëhi jemë'o no'o ëhi agane vaerovo'iröhëro. ⁴ Jemë'o no'o ë'oromo ëhuro no nimoroho avoho'iröhëro ëhuni jajivö.

Noehu mu sisë vaejaruoho vuonugoromo ëhuro God-are ajire raromo'iröhe jöhoje.

⁵ Ave jöho God-are Harihohuro majahuijumu hejë'ëro noro jemë majëhijö. God hu ma-ajemu höjo. Ramoramoho hesiriroho bogohöjo. ⁶ God hu ma-aj'ëmu jië'ëro ëhu'ëro no uvë'o'ho: No God'o agane vaerovarue hö uvoromo röhu ramoramore raromo jijihë'o'ho ëho no sareri sareri jöe atoromo sareri sareri mue vaejarueje. ⁷ A'i God-hu aj'i'ere hijajëhi noehu ëhi aj'i'ere raromo jijihë'o'ho ëhuro no göëro göhu'o iae agane vaerovarueje. Agane vaerovego hesi Harihe Iesu hesi köhuro nosi sisëho u'ovahuo barëjajeje.

⁸ No uvë'o'ho: No sisë bogojavujä uvë'o'ho ëho simane garaejego God-are jö maho dë vövöbajo'eroho bogojavuaeje. ⁹ A'i noehu nosi sisë God-are örire huruoho majahijumu hejë'o'ho huro birivoromo ma-maemu uehorovoromo muoho ma-maemu vaejajëro jië'ëro ëhu'ëro nosi sisëho uehorovoromo vuonugoromo u'ovahuo barëjajeje. ¹⁰ O no uvë'o'ho: No bogo sisëho vaejë'e javuajë uvë'o'ho ëho noro uvoromo ë'arueje: God-hu uövuajoho: Jemë mu sisë vaejarueje hö uövuajoho hu ma-sareramuiromo ë jöho jövaje höjo. No ëhi uvë'o'ho God-are jöho nosi dë vövöbajo'eroho bogojajeje.

2

¹ Nasi aboji harihu'e ave jö naehu jemesi örire jajivaje hesi bëhoho jemë mu sisëho bogo vae'irarijego ëhuni jajive. Röhu mu sisë vaejë'o'ho Iesu Keriso a maëro jië'ëro nosi sisëho ajamuijajeje. Ajamuiromo Vavu hesi örire jöe majahijajeje. ² Hu guomadohuro ëhuro nosi sisëho mu'uvahuoromo God-are vöröho sanuamijego God-ro nosi sisëho uehorovoromo vuonugajeje. Röhu bogo nosi sisënioho gemu guomo'i sa'ae aho'obëhe dinö'e dinö'e raromarue aribövi jabesi sisëni guomadeje.

God-hu bojamuade jögore aho'o röhu ö mueno'e uehorovëvo'iröhe jögoru ejahoromo ehuro ajire raromo'iröhe jöhoje.

³ Röhu ave jöho uehorovoromo ehuro uvarueje: No God gavarue höjo. No huhu bojamuade jögoru ejahë'ohuro ehuro iae no hu gavarueje. ⁴ Ae rahu uvë'oho: Iae na God gavaje hö uvo'i röhu God-are jögoru bogo ejahë'oho ëho hu ma-sarerivoromo ehioho uvajeje. God-are jö maho hesi dë vövöbajo'eroho bogoje. ⁵ O God-are jö ejahë'oho ehuro hu God-are örire hesi dë vövöbajo'e aho'o uehorovo avohajeje. Röhu ave jöho uehorovoromo ehuro uvarueje: No God'o gemuoro javuajëjo. ⁶ Ae rahu uvë'oho: Na God'o gemuoro jevajë uvë'oho Iesuhu hibe juvadëhi ëhi hi'ë'e.

⁷ Aganomë na jemesi öriroho bogo jögoru i'oho jajivo'i a'i jögoru mamioho jajivo'ie'e. Aevoromo Keriso-are jöho heromo ave jögoroho hebe rovarijeje. Ejjögoru mamioho ëho noehu majëhijamu hejarije jöhoje. ⁸ Naehu jajivo'irode jögoroho mamieje röhu i'eje. Ejö hesi muoho Kerisohu vaejadoho jemë'o vaejarujeje. Noro ë muoho garomo uvarueje: Ejöho iae mae höjo. Ehesi bëhoho ramoramo'e muoho rori'o va'anovo'i aji mahuro aevoromo ajjavuë'ego ehuni uvarueje: Ejöho iae mae höjo.

⁹ Ae rahu uvë'oho: Na God-are aj'i'ero hijaje hö uvo'i röhu hesi Christian ö mueno'o nu huodëgë'oho ramoramo'ere hibe rovadoho jaruvohu'o ëhi gemuoho hijajeje. ¹⁰ O hesi Christian ö mueno'o hesi dë vövöbajo'ere uehorovëvë'oho God-are aj'i'ero hiromo uehore ma-maemu jië'ëro ae gö bogo iëmi varijënoho jiajeje. ¹¹ O hu hesi Christian ö mueno'o nu huodëgë'oho ramoramo'ere hiromo ramoramo'e muoho vaebe juvajeje. Ehi'ego ramoramëro nunoho ramoramovahë'ëro öroho sidövajeje.

Ave sa'a hesi mu sisë bogo uehorovo'iröhe jöhoje.

¹² Nasi aboji harihu'e God-ro Keriso-are jöëni uehorovoromo jemesi sisëho uehorovoromo vuonugë'ego ehuni na jemesi örire jajive. ¹³ A duvahohumë jemë aevo'i jiobe rovade aho gavë'e jëvo'ego ehuni na jemesi örire jajive. A i'ohumë jemëro A Sisëho ruahö'öjë'e jëvo'ego ehuni na jemesi örire jajive.

¹⁴ Nasi aboji harihu'e jemë Vavuoho gavë'e jëvo'ego ehuni na jemesi örire jajive. A duvahohumë jemë aevo'i jiobe rovade aho gavë'e jëvo'ego ehuni na jemesi örire jajive. A i'ohumë jemë biririvoromo God-are jöhuremu jemesi dë vövöbajo'ere uehorovoromo A Sisëho ruahö'öjë'e jëvo'ego ehuni na jemesi örire jajive.

¹⁵ Ave sa'a hesi mu sisëho bövioho bise'oho nadi uehorovore. Ave sa'a hesi mu sisë uehorovë'oho jemesi dë vövöbojo'eroho Vavuoho bogo uehorovo'aruje. ¹⁶ Sisë rabe rabe nosi sinehu nimaruocho rabe rabe nosi nunehu garomo nimaruocho o noehu ave sa'are raromoromo rabe rabe uehorovoromo döre bamorovaruoho ëho ave sa'a hesi mu sisëje. Ehi jië'e muoho aho'o bogo Vavu hesirire jioromo rovade muoho jio'i a'i ave sa'a hesi mueje. ¹⁷ Sa'a hesi mu sisëho sa'are nimarue bövioho bise'oho barë hesi jio'i a'i ae rahu God-hu nimaje mu vaejë'oho bogo barë'i ma-ioro'ioremu raromarueje.

Keriso'o muorovarue aribövi jabesi mu sisë avoho goro'iröhe jöhoje.

18 Nasi aboji harihu'e sa'a bövi bise'o barë'iröhe majaho dunove. Ëhesi bëhoho jemë hejarijeje uëvamu: Bövi bise'o barë'iröhe majaho dunovo'iramu Keriso'o muorovaje aho rue'a'ajëjo. Röhu avevejö'oho Keriso'o muorovarue aribövioho aho'obëhe rueruomë'eje. Ëhu'ëro jjië'ëro no garomo uvarueje: Bövi bise'o barë'iröhe majaho dunovajëjo. 19 ËKeriso'o muorovarue ariböviohuro nosi ekaresiaho ramuo va'areje. Röhu urimo jabu no'o raromonövadevaroho jabumë bogo nosi aribövi maehu jioruomadeje. Jabumë nosi aribövi mae jioruomo'ibejo jabumë no'o ëhi raromoruomo'ibejo. Röhu jabuhu va'arohuro ëhuro no garomo uvarueje: Jabumë bogo ae gemu vadu'oho nosi aho jjië'ëro ëhu'ëro va'oruomade höjo.

20 A'i jemë Keriso-are Aru'ahoho baejël'ëro ëhu'ëro jemë ae aho'obëhe God-are jö maho gavarujeje. 21 God-are jö maho gavarujego ëhuni na bogo uve: Jemë jö maho dadivëvajeromo ëhunioho röjëhiromo jajive. A'i naehu jajivaje hesi bëhoho jemë jö maho iae gavarujeje. Garomo uvarujeje: Sareri'e jöho bogo God-are jö ma hesi gemuoroho jioromo rovaje höjo. Iae ëhuni jajive.

22 Sareri sareri ma'e aribövioho rahumëje. Ae rahu jö majahuiromo uövuë'oho: Iesu hu bogo bövie namiromo ajamuaje aho hö uövuë'oho ëhi uövuaruë aribövioho Keriso'o muorovarue aribövie jioruome Vavu'o Harihu'o bijönëgaruëro jjië'ëro. 23 Ae rahu Harihu bijönimë'oho Vavuohu'o bijönimoruomajeje. O ae rahu Harihu ejahë'oho Vavuohu'o ejahoruomajeje.

24 Keriso-are jö aevoli hebe rovarije jöho uehorovoromo ma'eno titimore. Ëhi ë'ë'oho Harihu'o Vavu'o jabesi gemuore raromo'aruje. 25 Röhu Kerisoro ave suvuroho bojamui'i mae uövuadeje. Huro uövuadeje: Naro ajëmi'iramu jemë ioro'iore gemu maro raromo'arujëjo.

26 Jemë sarerëmi'i ë'o gavarue aribövi jabesi jöho naro jemesi örire jajive. 27 A'i jemë Kerisoro hesi Aru'ahoho bojëmamu jemesi dë vövöbajo'ere abuejël'ëro jemë'o hijajeje. Hijë'oho a göho rabëni jemë öroho röjëhi'ë'ö. Bëhe bogoje. God-are Aru'ahohuro hesi muoho bövioho bise'oho jemë röjëhijajeje. Röjëhiromo bogo sareri'e jöho röjëhi'i jö mae röjëhijajeje. Ëhu'e jiaje jemëro hesi Aru'aho hesi jöho ejahoromo Keriso'o gemuoro raromore.

28 Io'o nasi aboji harihu'ohumë hu'o gemuoro raromore. Ëhi ël'ë'oho hu rue'iramu no bogo javojimo'i biririvoromo hesi nunire mae riravo'ejo. 29 Jemëro garomo uvarujeje: Keriso iae a mae höjo. Ëhuni uvo'a'aruje: Ae rahu mu mae vaejël'oho God-are aboji harihu'e javuajëjo.

3

Noehu mu sisë vaejaruoho vuonugoromo ëhuro God-are aboji harihu'ehu raromaruëhi ëhi raromo jjiho'iröhe jöhoje.

1 Asë'e Vavuohuro no mabëhe rajahuijël'eje. Ëhi rajahuiromo huro no aboji harihu'e uövuë'eje. Hesi aboji harihu'e uövuadoho iae no javue. God-are aboji harihu'e javuajoho ave sa'are mu sisëhemu uehorovarue ariböviohuro God bogo avoho gavë'ëro ëhu'ëro no'o bogo avoho göruomajeje. 2 Aganomë avevejö'oho no iae God-are aboji

harihu'e javue. Ijonö ëhi javuoröhoho bogo røjahuijè'ëro no bogo avoho gavö. Röhu no iae garomo uvarueje: No ëhi javuoröhoho røjahui'iramu gatorovo Keriso hu diehi jiajoho iae no ga'ejarëjo. Garomo ëhuro hu jiajèhi no'o ëhi javuo'ajëjo. ³ Ae rahu uvè'oho: Kerisoro no ajamui'iramu hu jiajèhi no'o ëhi javuo'ajë uvè'oho ëhuro Keriso maemaemu jiajèhi ëhi jio'i ë'o gavajeje.

⁴ Ae rahu mu sisë vaejè'oho ëho God bijönimoromo hesi jöho ahajeje. Mu sisë hesi bëhoho ëho God bijönimoromo hesi jö ahaje muohoje. ⁵ Röhu jemë'o iae gavarujoho Keriso rovade hesi bëhoho nosi sisëho rori'o bava'ego bogojioröhego ëhuni rovadeje. Röhu hesiroho sisëho bogoje. ⁶ Èhu'ëro jiè'ëro ae rahu Keriso'o gemuore jiè'oho bogo birivoromo mu sisëho vaejajeje. Birivoromo mu sisë vaejè'oho hu Keriso bogo ga vadè'ëjeje.

⁷ Nasi aboji harihu'ohumë ae göehu sarerëmijè'oho nadi ejëhore. Ae rahu mu mae vaejè'oho Keriso mae jiajèhi ëhi jiajeje. ⁸ O mu sisë birivoromo vaejè'oho ëho Satan-are aeje Satan-ro aevo'i sisë vaebe rovè'ëro. Sisë vaebe rue'i God-are Harihehu rovade hesi bëhoho Satan-are muoho mu'u'iröhëro ëhuni rovadeje.

⁹ Ae rahu God-are aboji harihu'e jëvè'oho Vavu örëro jëvè'ëro ëhu'ëro jabumë bogo mu sisëmuoho vaejarueje. God-are aboji harihu'ëro jëvè'ëro mu sisëmu vae'iröhoho jabumë bogo eni jëve. ¹⁰ No ave muoho garomo uvarueje: Èaho God-are harihe o aboje höjo. Èaho Satan-are harihe o aboje höjo. Ae rahu bogo mu ma vaejè'oho o ö mueno'o bogo dë vövöbajo'ere uehorovëvè'oho ëho bogo God-are aboji harihu'oho jioruome.

God-hu bojamuade jögore aho'o röhu ö mueno'e uehorovëvo'iröhe jöguru ejahoromo ëhuro hesi aboji harihu'ehu raromaruëhi ëhi raromo'iröhe jöhoje.

¹¹ Ave jöho jemëhu aevo'i hebe rovarije jöhoje. Noro göëro göho dë vövöbajo'e aho'o uehorovëvo'ëjo. ¹² Cain-hu è'adèhioho no bogo èhioho è'ëjo. Hu A Sisë hesi aëro jiè'ëro hesi öho ano bamadeje. Rabëni èhioho è'adeje. Hu mu sisëmu vae'i hesi öho mu maemu vaejajego ëhuni è'adeje.

¹³ Aganomë ave sa'are mu sisëmu uehorovarue ariböviehu jemë gëromo bijönëgaruoho nadi tiöromo uvore: Diehi'oromo è'aruëjo. ¹⁴ No ave jöho uehorovoromo ëhuro garomo uvarueje: No vuovo öroho vuonugè'ëro i'ovo öriremu javuajëjo ë hesi bëhoho noro Christian ö mueno'oho dë vövöbajo'e aho'o uehorovëvaruëro jiè'ëro. A'i ae rahu a bogo uehorovëvè'oho vuovo örire jijihadoho ëhi jijihajeje. ¹⁵ Ae rahu ö mueno'e gëromo bijönimè'oho a muo'amarue a jabesi dë vövöbajo'o val'ëne jëvanovajeje. Jemë'o iae garomo uvarueje: A muo'amaje aho bogo i'ovo öriroho jiè'ëro bogo ioro'ioremuoho maho hi hesi höjo. ¹⁶ No ave jöho uehorovoromo ëhuro uvarueje: Göehu gö dë vövöbajo'e aho'o uehorovarue hesi bëhoho ëhi höjo. Kerisoro hesi dë vövöbajo'ere börömo bëhe uehorovavuoromo sinoho bogo juhuonivo'i ajamui'i guomade höjo. Èhuni no'o Christian ö mueno'ëro göëro göho uehorovëvoromo sinoho bogo juhuonivo'i ajëmi'i vuovo'ëjo o diehi'o'ëjo. Èhi jiè'oho iae maeje. ¹⁷ Ae rahu inöme maroh'ë jio'i ga'iröhe hesi Christian ö mueno'o bövie bise'e bogojëvamu gatorovo

ma-nunëremu gëvë'oho hu diehi'oromo uvo'ë'e: Na God nasi dë vövöbajo'ere uehorovaje höjo. ¹⁸ Nasi aboji harihu'ohumë ë'ego no bogo ma-jö'ëremuoho aho sarerëmiromo uë'iro: Naro jasi örire dë vövöbajo'e aho'o uehorovavaje höjo. A'i ë'ego no ae uehorovëvoromo huë baejëvoromo ajëmi'iro.

¹⁹ Göehu gö dë vövöbajo'e aho'o uehorovëvë'oho ëhuro no garomo uvo'ejo: No jö ma ejarue aribövie javuajëjo. Ëhi uvoromo God-are nunire riravoromo juhuonivo'i nosi dë vövöbajo'oho sanuamirovo'ejo. ²⁰ Jö sisë javuë'ëro dë vövöbajo'ere juhuonivë'oho no uvarueje: Nosi arijo'arije ma-bisemu garorovo'i God-ro no iosiramuiromo aho'obëhe gö barëjaje höjo. ²¹ Aganomë nosi jö sisëhuni nosi dë vövöbajo'ere bogo juhuonivë'oho God-are nuniro javuoromo biririvoromo mae riravarueje. ²² Mae riravoromo rabe rabe ua gavë'oho iae hesirire baejarueje rabëni hesi bëhoho hu bojamuade jöho ejahoromo huhu nimaje muoho vaejaruëro jië'ëro. ²³ Huhu bojamuade jöho aviëhije. Huro uövuadeje noro hesi Harihe Iesu Keriso-are ihoho mae uehorovoromo huhu uövuadëhi ëhi göëro göho dë vövöbajo'e aho'o uehorovo'iröhego. ²⁴ Ae rahu God-are jöe gö gö ejahë'oho God'o gemuoro jio'i God-ro hesi dë vövöbajo'ere hijajeje. Ave jöho uehorovoromo ëhuro uvarueje: God-ro nosi dë vövöbajo'ere hijaje höjo hesi Aru'ahoho bojamuijë'ëro ëhu'ëro.

4

Keriso'o muorovarue aribövi jabesi mu sisëhu'o ave sa'a hesi mu sisëhu'o avoho goro'iröhe jöhoje.

¹ Aganomë ae göëro göëro sarerivoromo sa'ae dinö'e dinö'e majëhibe jijihoromo uvoruomajeje: No God-are Aru'ahohuro jöho bojamuego majëhijarue höjo. Ëhuni ae göehu ëhi uëvë'oho avoho gëromo gare jabumë mae God-are Aru'ahe baejë'ëro uëvego o hesi aru'ahe gö baejë'e jioruomego. ² Ave muoho garomo uvo'a'aruje: God-are Aru'ahëro jöho bojëmego majahuijarue höjo. Ae rahu ae huruoho majëhiromo uëvë'oho: Iesu Keriso a nosi sino jiajëhi ëhi rovë'e hö uëvë'oho God-hu bojamuaje Aru'ahoho baeromë'eje. ³ O ae rahu Iesuarë jö bogo ëhi huruoho majëhijë'oho ëho bogo God-are Aru'ahoho baeromo majëhi'i a'i Keriso'o muorovaje a hesi aru'ahoho baeromo majëhijarueje. Jemë mami'e hejarijeje uëvamu: Keriso'o muorovaje ahuro rue'a'ajëjo. Röhu avevejö'oho ë a hesi sareri sareri'e muoho ave sa'are vaeruomajeje.

⁴ Hesi sareri sareri'e muoho vaeromo Keriso-are jöho sisë'i majëhijarueje. Iae ëhi ë'arujeje röhu nasi aboji harihu'e jemë God-are ariböviero jëvë'ëro Keriso-are jö sisë'i majëhijarue aribövi jabesi muoho ruahö'öjë'e jëve. Ëhesi bëhoho jemëro God-are Aru'ahoho bae'i sa'a hesi mu sisë uehorovarue ariböviohuro Satan-are darugoho baeromë'eje. Röhu God-are Aru'aho hesi daruge jemesirire jiajohuro Satan-are daruge jebesirire jiajoho iosiramijë'eje. Ëhu'ëro jië'ëro jemëro Keriso-are jö sisë'i majëhijarue aribövi jabesi muoho ruahö'öjë'e jëve. ⁵ Ëaribövioho jabu ave sa'a hesi mu sisë uehorovarue aribövie jioruome. Ëhi jië'ëro ave sa'a hesi jö sisëho atego ave sa'a hesi mu sisë uehorovarue ariböviohuro ejëhoruomajeje. ⁶ A'i no ma-God-are aribövieu mu javue. Ëhi javuë'ëro ae rahu God gavë'ohuro ëhuro nosi

jöho ejahuarueje. Ae rahu bogo God-are aribövi jëvë'oho nosi jöho bogo ejahuarueje. No garöhe di ariböviohuro God-are jö ejahuamu o ave sa'a hesi jö sisë ejëhamu gavë'oho ëhuro uvarueje: Ëho God-are Aru'ahëro jöho bojëmego majahui'i ëho sareri'e aru'aho sisëhuro bojëmego majahuijarue höjo.

No göehu gö dë vövöbajo'e aho'o uehorovo'iröhe jöhoje.

⁷ Aganomë ë'ego no göëro gö dë vövöbajo'e aho'o uehorovo'iro. Noehu göehu gö ëhi uehorovë'oho ëho God-ro hesi uehoro maho nosi dë vövöbajo'ere bojamuego ë'arueje. God-are aboji harihu'ëro javuë'ëro God mae gavarueje. ⁸ O ae rahu ae gö dë vövöbajo'ere bogo uehorovë'oho God bogo ma gavarueje rabëni God-ro dë vövöbajo'e aho'o uehorovemu uehorovavuaje aëro jië'ëro. ⁹ Huhu uehorovavuaje muoho aviëhi röjahuijadeje. Harihe gemu'oho sa'are nugö'öjadeje huro i'ovavuego mae raromol'iröhego. ¹⁰ Göehu gö dë vövöbajo'e aho'o uehorovarue mu hesi bëhoho diehije. Noehu God dë vövöbajo'ere uehorovaroho ëho ma-bise'eje. Ëhuni göehu gö uehorovarue mu hesi bëhoho bogo ëhiohoje. A'i God-ro hesi dë vövöbajo'e aho'o no uehorovavuoromo hesi Harihoho nugö'öjadeje guomego nosi sisëho uehorovoromo vuonugo'iröhëni. Ëho böviohoje. Ëhuni God-hu ëhi no uehorovavuadoho ëho göehu gö uehorovarue mu hesi bëhohoje.

¹¹ Aganomë God-ro börömo bëhe uehorovavuoromo ëhi ajamuijadeje. Ëhuni no göëro göho ëhi uehorovo'ejo. ¹² Ae gö nosi nunoho God bogo gavë'e javue. Röhu göehu gö dë vövöbajo'ere uehorovë'oho God-ro nosi dë vövöbajo'ere hiromo hesi uehoro maho bojamuego nosi dë vövöbajo'oho rarovavuajeje.

¹³ Ave jöho uehorovoromo ëhuro garomo uvarueje: No God'o gemuoro javuo'i hu nosi dë vövöbajo'ere hijaje höjo. Huro hesi Aru'ahoho bojamuij'ëro ëhu'ëro. ¹⁴ No God-are Harihoho iae nosi nunëro gavë'e javue. Gavë'ëro noro mae majëhiromo ae uëvarueje: Vavuohuro hesi Harihoho nugö'öjade höjo sa'ae dinö'e dinö'e raromarue aribövioho baejëvoromo maro bamëvo'iröhego. ¹⁵ Ae rahu huruoho majëhiromo uëvë'oho: Iesu iae God-are Harihe hö uëvë'oho ëhi jië'e aribövi jabesi dë vövöbajo'ere God hi'i jabumë God'o gemuoro jëvajeje. ¹⁶ Röhu iae no'o garomo mae uehorovoromo uvë'e javue: God-ro no mabëhe uehorovavuaje höjo.

God hu dë vövöbajo'e aho'o no uehorovavuaje ahoje. Ëhuni ae rahu ae gö dë vövöbajo'ere uehorovo'i hijë'oho God'o gemuoro jio'i God-ro hesi dë vövöbajo'ere hijajeje. ¹⁷ God-hu hesi uehoro ma nosi dë vövöbajo'ere bojamuego rarovavuaje hesi bëhoho hujeji Kerisohu nosi mu mevo gövuamu no hesi nunire riravë'oho no bogo juhuonivo'i a'i uvoröhego: Keriso jiajëhi no'o sa'are raromoromo ëhi jiobe rovë'e javuajë uvoromo ëhuni avoho biririvoröhego. Ëhuni God-ro hesi uehoro maho bojamuego nosi dë vövöbajo'ere rarovavuajeje. ¹⁸ No herovoromo uvë'oho: God-ro hesi dë vövöbajo'e aho'o uehorovavuaje hö uvë'oho no bogo hesi öriromo juhuonamijarueje. No herovë'oho God-are uehoro maehu rueromo nosi dë vövöbajo'ere rarovavuamu hejë'oho God juhuonamijaruoho vuonugo'i mae uehorovarueje. Ëhesi bëhoho no God juhuonamijë'oho no uvarueje: God-ro i'ue bojamui hesi

höjo. Ae rahu hu juhuonamijë'oho ëhi jië'e aribövioho God-are uehoro maho jabesi dë vövöbajo'eroho bogo rarovëvajeje.

¹⁹ God-hu urimo nosi örire dë vövöbajo'ere uehorovavuadohuro ëhuro no hu'o ae gö'o dë vövöbajo'ere uehorovëvarueje. ²⁰ Ae rahu uvë'oho: Iae na God-are örire dë vövöbajo'ere uehorovaje hö uvo'i röhu hesi ö mueno'o gëromo bijönëgë'oho ëho hu ëma sarere uvajeje: Na God uehorovaje höjo. Hesi ö mueno'e nunehu gëvajoho bogo uehorovëvë'oho ëhuro God uehorovo'iröhoho bogo eni jie hu God bogo nunoho gavajëro jië'ëro. ²¹ Ëhu'ëro God-ro ave jöho bojamuiromo uövuë'eje: God nasi örire uehorovëvë'oho jemesi ö mueno'ohu'o dë vövöbajo'oro uehorovëvorëjo.

5

God-are Harihu mae uehorovo'iröhe jöhoje.

¹ Ae rahu mae uehorovoromo uvë'oho: Iesu hu böröme namiromo ajamuaje ae hö uvë'oho ëhi jië'e aribövioho God-are aboji harihu'e jioruome. Ae rahu vavu dë vövöbajo'ere uehorovë'oho ë vavu hesi aboji harihu'ohu'o dë vövöbajo'ere uehorovëvo'anue. ² Ëhuni no ave jöho uehorovoromo ëhuro iae garomo uvarueje: No God-are aboji harihu'oho dë vövöbajo'ere uehorovëvarue höjo. No God dë vövöbajo'ere uehorovoromo hesi jögoru ejahë'ohuro ëhuro no garomo uvarueje: Hesi aboji harihu'ohu'o uehorovëvarue höjo. ³ God dë vövöbajo'ere uehorovë'oho ëhuro iae no God-are jögoroho ejaharueje. God-are jögoru ejahë'oho ëho bogo i'u'ehuje. ⁴ God-are aboji harihu'e aho'obëhe sa'are mu sisëho biririvoromo ruahö'öjarueje. Ruahö'ö'iröhe hesi öroho no Iesu mae uehorovaruhuro ëhuro ruahö'öjarueje. ⁵ Diehi jië'e ariböviohuro sa'are mu sisëho ruahö'öjarueje. Ae rahu uvë'oho: Iesu hu God-are Harihe hö uvë'ohuro ëhi jië'e ariböviohuremu sa'are mu sisëho ruahö'öjarueje.

God-hu jö mae majahuijigo no heromo ëhuro Keriso mae uehorovarue jöhoje.

⁶ Röhu sa'are rovade aho iae Iesu Keriso jiadeje. Ëahuro rueromo jovo maëro bapataeto vaejamu köho rueromo guomadeje. Bogo rueromo ma-bapataeto vaejadohemuje. A'i hu jovo maëro bapataeto vaejamu ijönö hesi köho rueromo guomadeje. Huhu ëhi ë'ade jöho God-are Aru'ahohuro iae mae majahuijajeje ë Aru'ahoho sareroho bogojio'i ma-maemu jië'ëro. ⁷ Jöe niö'i gemu no heromo Keriso mae uehorovarueje ⁸ Aru'ahuhu majahuijaje jöho jovehu bapataeto vaejade jöho kö rovade jöho. Ëjöho niö'i gemu bëhe gemuhoje. Ëho heromo mae uehorovarueje. ⁹ Ma-aëremu jö ma majahuijamu hejë'oho noro ëho mae uehorovarueje. Röhu a jabesi jöho ma-bise'e gio'i God-hu jö mae majahuijajoho ëho börömohoje. Röhu God-ro hesi Harihu hesi jöho ëhi ma-mae majahuijë'eje. ¹⁰ Ae rahu God-are Harihu mae uehorovë'oho ëhuro dë vövöbajo'ere uehorovoromo uvarueje: God-hu hesi Harihu hesi jö majahuijadoho iae mae höjo. O ae rahu God-hu majahuijade jö bogo ma uehorovë'ohuro ëhuro uvoruomajeje: God hu jö sarere jövaje ae höjo. Ëhesi bëhoho God-hu hesi Harihu hesi jö majahuijadoho jaburo bogo ma uehorovarüero jië'ëro ëhioho uvoruomajeje. ¹¹ God-hu hesi Harihu hesi jö mae majahuijade hesi bëhoho aviëhije. God-ro darugoho

bojamuijē'eje noro baeromo nosi aru'ahoho i'ovoromo ioro'ioremu mae raromo'irōhego. Ĕdarugoho God-are Harihu hesirire jie. ¹² Ĕhu'ēro ae rahu Harihohu'o gemuore bimuvē'oho ē darugoho baeromo hu'o gemuore mae hijajeje. O bogo God-are Harihohu'o gemuore jiē'oho bogo ēhioho maho hijajeje.

Ioro'ioremu mae raromo'irōhēro gavarue jōhoje.

¹³ Naehu jemesi ōrire jajivaje hesi bēhoho jemēro garomo uvo'irarijego: Iae no maro raromaruoho ēhi ioro'iore gemu raromobe va'ejarē uvo'irarijego. God-are Harihu mae uehorovarue aribōvioho jemē uēve. ¹⁴ Ave jōho uehorovoromo ēhuro no birivoromo hesi nunire riravoromo jōho majahijarueje. God-hu rabe rabe bojamui'i nimajoho noehu ua gavē'oho iae hu ejahuajeje. ¹⁵ Noehu ua gavē'oho iae ejahuaje hō uvaruero jiē'ēro ēhu'ēro no uvarueje: No ua gavē'oho bojamuego baejarue hōjo.

¹⁶ Ae rahuaro ga'irane Christian ō mueno'ehu mu sisē vaeromo bogo sisēroho va'o hesi jioruomamu gēvē'oho jero God ua ganego huro jabesi sisēho ajēmiromo daruge bojēmego maro raromo'iro. Na uaromo ē'e mu sisē vaeromo bogo sisēre va'o hesi jio'amaje aribōviahuni God ua ganējo. A'i mu sisē gō vaejē'oho sisēro va'o hesi javue. Na bogo uave: Jero ēhi jiē'e aribōviahuni God ua ganējo. ¹⁷ God-hu bijōnimaje muoho aho'obēhe vaejē'oho ēho sisēje. Rōhu mu sisē gō vaejē'oho no bogo ēhuro sisēroho va'o hesi javue.

¹⁸ No garomo uvarueje: Ae rahu God-are aboji harihu'e javuē'oho mu sisēho bogo vaemu vaejarue hōjo. God-are Harihohuro tugohahuego A Sisēho nosi ōriroho bogo ijumavuaajeje.

¹⁹ No garomo uvarueje: No God-are aboji harihu'e javuo'i sa'are mu sisē uehorovarue aribōvie aho'o jabumē A Sisē hesi darugoro raromarue hōjo.

²⁰ O no garomo uvarueje: God-are Harihohuro rueromo uehoro maho bojamuijē'e hōjo ēhuro noro God garōhego God gemu hu mae jiajoho. No hu'o gemuoro javuoromo hesi Harihe Iesu Keriso'o gemuoro javue. Ĕaho gemu God mahoje. Huro ajamuego no ioro'iore gemu mae raromarueje.

²¹ Nasi aboji harihu'e avoho mueberovore. Nadi uvore: Inōme bōvie bise'e masije hōromo nuninōho bamo'i God dejonōho bamore. Ahia mino'e.

2 JOHN

Aëro uvoruomajeje: Jö jabesi örire jajivade ekaresiaehu ame gemuore raromarue jöho John-ro huotovoromo uhu'e magonahehu aboji harihu'e söromo gemuore raromaruëhi ëhi jajivade höjo. O verse 13-re John-hu hijade amore ekaresia jabesi jöho huotovoromo uhu'e uvade magonaho hesi ö hesi aboji harihu'o jönö'e ëhi jajivade höjo.

¹⁻² O asë'e aboji harihu'e gagovoromo gemuore raromaruje magonahoho God-ro hesinö javojöro baejavë'e magonahe jave. Ekaresia jabesi a duvahoho naro jemesi örire jejëmije. Jemë'o no'o God-are jö maho uehorovoromo ëhi gemu uehorovobe va'ejo. Ëhuni na bogo madöëremuoho uehorovëvo'i dë vövöbajo'e aho'o uehorovëvajeje. Bogo na gemuoho a'i God-are jö ma gavarue aribövioho aho'obëhe jabu'o ëhi gemuoho uehorovëvarueje.

³ Noro God-are jö maho ejahoromo göëro gö dë vövöbajo'e aho'o uehorovëvo'iramu God Vavuohu'o hesi Harihe Iesu Keriso'o noni vavaenimoromo ajamuiromo huë mae bojamui'ë'e.

God-are jö mahemu ejahoromo dë vövöbajo'e aho'o uehorovo'iröhe jöhoje.

⁴ Na hejodeje uevamu: Vavuehu uövüadëhi jasi aboji harihu'o ioro'iorohuro God-are jö mahemu ëhi ejaharue höjo. Ëhi hegoro nimoroho avohodeje. ⁵ Ma'ino röhu ave jögoru jajivo'ië'ajoho bogo i'ehu jio'i mami'e aevo'i hebe rovere jögorohoje. Naro uëve: Ë'ego no ae aho'obëhe göëro göho dë vövöbajo'ere uehorovo'irarëjo. ⁶ Göehu gö dë vövöbajo'ere uehorovo'iröhe hesi bëhoho ëho God-are jögoroho ejahë'e raromo'ejo. O God-are jögoru hesi bëhoho ëho mami'e aevo'i hebe rovarijëhi ëhi jemë göehu gö uehorovë'i raromo'irarijohoje.

⁷ Röhu a sarerëmijarue aribövie aho'obëhe sa'ae dinö'e dinö'e sareri jöho majëhibe jijihoromo uëvarueje: Iesu Keriso bogo a maho rue'i aru'ahëro rovade höjo. Ëhi majëhijarue aribövioho Keriso'o muorovoromo ae sarerëmijarue aribövie jioruome. ⁸ Ëhuni avo'avoho mueberovore. Sareri'e jö bogo ejëhë'o ho ëhuro mu vaebe rovarije suvuoroho bogo boremi'ö'i bae barë'aruje.

⁹ Ae rahu Keriso-are jö bogo ma'eno titimo'i aruëre anumëre ëma jijihë'o ho ëhi jië'o ho God rumo'e aribövie jioruome. O ae rahu Keriso-are jö ma'eno titimë'o ho God Vavuohu'o Harihohu'o jaburo niö'iro ëhi jië'e ariböviohu'o gemuore jiarueje. ¹⁰ Ae göehu jemesirire ö'oromo Keriso-are jö jiajëhi bogo ëhi majëhijë'o ho nadi uëre: Ruehëjo. O nadi jejëmire. ¹¹ Ae rahu jejëmijë'o ho ëhuro iae jemë jabu'o bimuvoromo jabesi mu sisëho vae'a'aruje.

Ijo tugoho'i jöhoje.

¹² Na jöe aho'obëhe jajivo'irodoho röhu bogo jajivo'ejo. Na nege ö'oromo jemë'o na'o jöho majahirovoröhëni. Ëhi jië'ohuro ëhuro jemë'o na'o sisë maro nimoroho'ejo.

¹³ God-hu baejade magonahe jasi öe hesi aboji harihu'o ho jaburo jasi örire jejämijö. Ahia mino'e.

3 JOHN

¹ O asë'e nasi isio Gaius God-are ekaresia jabesi a duvahoho naro jasi örيره jejamije. Na bogo ma-döëremuoho uehorovavo'i nasi dë vövöbajo'e aho'o uehorovavajeje.

² Isio na nege jasi sino haho'ohu'o muohu'o ma-mabëhe javojöro. Iae na gave jasi dë vövöbajo'oho avevejö'oho mae javo'ego. ³ Èhesi bëhoho Christian ö mueno'ëro rueromo uevareje: Gaius hu God-are jö mahemu ejahaje hö uevamu heromo nimoroho avohodeje. Èho iae maeje. Majae èhi ja God-are jö maho ejahë'e raromanueje. ⁴ Mu göëni göënioho na ma-bisemu nimoroho'i aehu uevë'oho: John jasi Christian aboji harihu'ohuro God-are jö maho ejahë'e raromaruë uevamu hejë'oho na nimoroho avohajeje.

Gaius-hu mu mae vaejamu John-hu rajahijade jöhoje.

⁵ Isio jero mabëhe birivoromo Christian ö mueno'oho ajëmijanueje. Öre gö jioromo rovare Christian ariböviohu'o huë mae bojëmijanueje. ⁶ Èariböviohuro rueromo ekaresiae aho'o uövuareje: Gaius-ro nosi örيره huë mabëhe bojamuijade höjo. Röhu God-hu nimajëhi jaehu bövi bise'o jabumë ajëmiromo rëmö'öjamu örيره va'ë'oho èho iae mae jio'ë'e. ⁷ Èhesi bëhoho God bogo ma uehorovarue aribövi jabesiroho suvoroho bogo ujuohë'e èma ri'öromo va'ë'ejö Keriso-are jöho baeromo jijihö'iro. ⁸ Èhuni Christian aribövioho noro jabumë ajëmi'ejö èhuro no jabu'o bimuvoromo jö ma majëhijarue hesi muoho vaeröhëni.

Diotrephes'o Demetrius'o ë ae niö'i jabesi jöhoje.

⁹ Naro jasi ekaresia jabesi örيره jö harihe jajivodeje. Jajivodoho Diotrephes hu böröme vae'i nimë'ëro nosi jöho bogo ejahuaajeje. ¹⁰ Èhu'ëro jië'ëro na ö'ë'oho huhu vaejaje mu sisëho huruoho majëhi'ejö ekaresiae aho'o heromo uehorovoruomoröhego. Huro nosi jöho huotovoromo uëvajeje: John-mëro èhi jië'e mu sisëho vaejarue höjo. Hu bogo èhemuoho è'i Christian ö mueno'ehu ö'ë'oho bogo rajëhiromo baejëvajeje. O ae göehu ajëmi'i nimë'oho huro ahëvoromo uëvajeje: Jemë ë aribövioho ajëmi'ië'e jëvaje rori'o va'ohëjo. Va'oromo nadi ijoho Keriso rajahijarue osaroho ruerëjo.

¹¹ Isio aehu mu sisë vaejaruëhioho nadi èhioho vae'i a'i mu ma vaejaruëhi èhi vaene. Ae rahu mu mae vaejë'oho èho God-are aribövie jioroume. O ae rahu mu sisë vaejë'oho jabu God bogo gavë'ejö.

¹² Röhu ae aho'obëhe uvoruomajeje: Demetrius hu a mae höjo. Iae hu mu mae vaejaje aeje. Ae aho'o hu garomo èhi uvarueje. Iae no'o uvarueje: Hu a mae höjo. Röhu ja'o gavanueje no jö maemu majëhijego. Èhu'ëro Demetrius-are jö majëhijaruoho èhu'o iae maeje.

Ijo tugoho'i jöhoje.

¹³ Na jöe aho'obëhe jajivo'irodoho röhu bogo jajivo'ejö. ¹⁴ Na nege ma-burëro ö'oromo ja garomo ja'o na'o jöho majahirovoröhëni.

¹⁵ Huë mae hine. Ja huë baejavarue aganoho jaburo jasi örيره jejamijö. O nasi aganoho aho'o gemu gemu jejemijode höne. Ahia mino'e.

JUDE

¹ Iesu Keriso-are mu vaejahaje aho James-are öe Jude naro jemesi örire jejëmiye. God Vavuohuro jemë hesinö jëvojöro uëvë'ëro jemë dë vövöbajo'e aho'o uehorovëvoromo Iesu Keriso-are burure rëmë'eje.

² Na nege God-hu jemëni vavaenimoromo huë mae bojëmiromo rajëhijaje muoho jemë herovo avoho'irarijego.

Sareri'e jö rjëhijarue aribövi jabesi jöhoje.

³ Aganomë God-hu mare bamavuade jöho jemë'o na'o gemuoho uehorovarueje. Èhesi jöho na jajivo'i nego avohadeje. Èhi negamu röhu uvodeje: Èjöho vuonugo'i jögoru gö jajivë'o ho iae mae höjo öre gö bogojevë'ego. Èhesi bëhoho God-ro hesi aribövioho jöho röjahuijadeje noro ioro'ioemu mae uehorovo'iröhego. Röhu ë jöho a ioro'iorëro huototuotovoromo rjëhijö. God-are jö huototuotovoromo rjëhijaruohuni ëhuni jabesi sareri'e jöho biririvoromo aho'irarijego jajivo'irögoro uvodeje. ⁴ Èhesi bëhoho aëro jabesi mu sisëho gurihi'i ekaresia jemesi gemuore ro buarohoruomë'eje. Jemë'o buarohoruomë'ëro God bogo ma uehorovo'i a'i sareri'e jöho majëhiromo uëvarueje: Jemë öehu jijihanovë'o ho iae mae höjo God huë baejëvaje ae jië'ego. Èhi uëromo Iesu nosi Bada hu gemuehu böröme vaejavuaje ë aho jabumëro bijönimoruomajeje. Èhi jië'e aribövioho i'ue baeromo sisëro va'oruomoröhego God-are surire jöho ëhi uvë'eje.

⁵ Ave jö naehu jajivo'ie'ajoho jemëro he barëjë'e jëve. Röhu na maho uë'i nege jemëro avoho uehorovo'irarijego. Israel aribövioho Egypt sa'are sisë'i raromamu Badaro ajëmiromo mare sö ujuoho rovade höjo. Èhi ë'ade höjo röhu ijönöho ae rahu bogo ma uehorovaro ho huro i'ue mana bojëmamu sisë'rëjëvade höjo. ⁶ O anera jabesi jöhu'o uehorovore. God-hu bojëmade muoho anera ioro'iorohuro bogo biririvoromo muebe'irögoro jabumë raromo'iröhe röho ho vuonugo'i jabesi mue gö baejare höjo. Èhi'amu God-ro ioro'ioemu tövëvoromo ramoram'o'ere taemëvo rëmë'e höjo maja börömo ho rovego uëröhëro: Sisë jëvaje sisëro va'ohëjo. ⁷ O Sodom amohu'o Gomorrah amohu'o jabesi bëhire jiaje amo ioro'iorohu'o ëho jabesi jöhu'o uehorovore. Jabu'o mu sisë bëhe vaeruomade höjo. Mu sisë vaeromo öëro jijihanovoromo a'o a'o sihorovoromo mue gö gö vaeruomade höjo. Èhi'amu God-ro i'ue mana bojëmiromo vënoho nugö'öjamu ioro'ioemu rav'o'amade höjo aëro garomo uvoröhego: God-ro ëhi jië'e i'uoho sisë'e aribövioho bojamui'ajëjo.

⁸ Èhi jie röhu jemë'o gagovarue ariböviohuro ëhi jië'e mu sisë gemuoho vaejarueje. Jabumëro uvarueje: Nia'ovo'iraeromo gavaruëhi ëhi ömë'oho mae höromo va'inumi'e muoho vaeromo jabesi sino haho'oho ijumorovarueje. Jögoru masijoho bijönimarueje. Aji'e aribövie ö'idöre raromarue jabesi jöho sisë'i atarueje. ⁹ Jabu ëhi sisë'i atarueje röhu urimo Michael anerae börömo namijajoho bogo ëhioho sisë'ioho jövadeje. Èhesi bëhoho Moses guomamu Michael'o Satan'o ëhi di aehu Moses-are sino bae'iröhe jöho aho'ahamirovareje. Jöho

aho'ahamirovoromo Michael bogo biriri'övoromo jö sisëho majahiromo nibejahi'irögoro ma-uavadeje: Na jöho bogo ua'ejöjo. Jaehu sisë ë'anue jöho hesi Badaro majahi'ajëjo. ¹⁰ Ëhi jië'e sanu'e jö jövadoho röhu jemë'o gagovarue ariböviohuro bogo ëhioho ato'i a'i bogo ma hejarue gavarue jöho ëma sisë'i atarueje. Sisë'i atoromo simano rumo'e mahu urejehu jijiharuehi jabumëro ëhi bogo uehorovë'e jabesi nimarue muoho ëma vaebe jijihoromo ëhuro sisë'ërovarueje. ¹¹ Jabuhu i'u bae'iröhe majaho iae ruel'ë'e. Jabumë a mamie niö'i gemu urimo raromarohe va'ëne jëve. A mami ae Cain-hu hesi nimoromo ëma ë'adëhi jaburo öre gemuore jijiharueje. O Balaam-hu moniemu uehorovoromo sareri'e mu a röjëhijadëhi jaburo ëhi jië'e muohuremu vaejarueje. O Korah-hu biriri'övoromo God-are jö ahamu guomadëhi jaburo God-are jöho ëhi aharaueje u'emu vuovëvoröhego. ¹² Jemëhu huë baerovo'i gemuore gagovoromo i ue'ahë'iroho ë aribövioho jabu'o rovarueje. Rueromo bogo juhuonivo'i ma-biriri'övoromo nimorohë'i ioho jovoho mahunö'e ue'aharaueje. Ëhi jië'e sisëho ë'ego ëhuro niögu suhi'ere va'inumi jiajëhi jabesi aru'ahoho ëhi va'inumi'e jëvego huë sisë baejarueje. Jabumë ae gö bogo ajëmi'i jabesi sivue ajamirovarueje. Jabumë ëni rumo'e sue burehu bava'ego sa'a bogo rihu bojamaoho va'ëne jëve. Jabumë ijo saho va'ëne jëve. Ijo saho jabesi bajo rae maja rové'iroho bogo raejarueje. Bogo raejogo aëro umoromo dirumohu'o jahego ioro'ioremu sisë'rëjajeje. Jemë'o gagovarue aribövioho ëhi jëve. ¹³ O jovehu va'inumi gatogato hasaromo ionire a nunire bu'öjajëhi jabesi sisëho ëhi a nuniro ma-va'orahoro vaejarueje. O ara'ehu vëni ioromo bio baeromo va'ajëhi jabumë ëhi jëvanove. God-hu nugëhade ramoramo sisë mare jië'ire ë rireromoromo ioro'ioremu raromo'ë'ö.

¹⁴ Jemë'o gagovarue ëhi jië'e a sisë jabesi jöho Enoch-ro ae majëhijadeje. Adam-are ujehu jiohe rovadoho ro iae Enoch hu number 6-ho jiadeje. Enoch-ro sisë aribövi ijonö diehi jëvoröhe jöho urimo ae majëhiromo uëvadeje: Jemë'o garëjo. Badaro hesi anera maho aho'obëhe mae jabu'o gemuore ruel'a'ajëjo ¹⁵ ae aho'obëhe mevavuo'iröhëni gö'i mae o sisë javuego. Mevavuoromo God bijönimoruomaje ae aho'obëhe uëröhëni: God nasi örire bijönegoromo ëhi jië'e mu sisëho vaejëvarije höjo. Na bijönegoromo nasi jöho sisë'i bëhe atarije höjo. Ëhuro jemë sisë'e aribövie jëvaje sisëro va'ohëjo. Ëhi mevëvo'iröhëni Bada ruel'a'ajëjo.

¹⁶ Röhu jemë'o gagovarue ariböviohuro nibejëhiromo a jöho aruëre anumëre ëma vaerovarueje. Jabesi sinehu nimajëhi ëhi jijiharueje. Jabesi sivue uehorovoromo dö mare bamorovoromo jö huhe atarueje. Ae gö sanusanuëmijarueje ëhuro jabuhu nimaruehi ëhi ë'oruomojöro. Ëaribövioho ëhi jië'e aribövie jëvë'eje.

Avo'avoho biririvoromo raromo'iröhe jöhoje.

¹⁷ Röhu aganomë jemëro ave jöho uehorovore. Nosi Bada Iesu Kerisore apostle ariböviohe mami'e majëhinövore jöho uëve. ¹⁸ Majëhiromo uëvareje: Ijo tugoho'i jioröhe majaho dunovo'iramu aëro rueromo God-are jöho sivoromo hu bogo uehorovë'e jabesi sinehu nimajohemu vaebe jijihoromo'ajëjo. ¹⁹ Ëjabuhu uëvare ëhi jië'e ariböviohuro ëhi'oromo jemesi ekaresiaho adovëvarueje hahagu hahagu jëvojöro. God-are Aru'ahoho bogojëvë'ëro jabesi sinehu nimarue muohemu

uehorovarueje. ²⁰ A'i aganomë jemëro God-are jö mahuremu uehorovarujoho biririvoromo gö'o gö'o mae uehorovobe va'oromo God-are Aru'aho hesi uehoroho baeromo God-are öroro jöe atonövore. ²¹ Hu jemesi örire huë baejövaje jiaje ëhuni nadi vuonugo'i hu'o gemu mae raromore. Raromoromo muebere nosi Bada Iesu Kerisoro jemesi jöëni vavaenimoromo ajëmego ëhuro ioro'ioeremu maro raromo'irarije.

²² Ae göëro uvoruomajeje: Na Keriso-are jöho mae höjo o ëma jöe höjo. Ëhi jië'e ariböviohuni vavaenimoromo ajëmire. ²³ Sisëre va'arue örire ae göehu jijijhoromo vënire ravorovanovamu gëvë'oho ma-burëro baejövorego mae jëvo'i. Ae göehu mu sisë vaejamu gëvë'iroho vavaenimoromo ajëmirego jabesi sisëho vuonugoruomo'iro. Röhu ëhi ajëmijë'oho gavë'i ajëmiromomo jabesi sisëho goro avohore. Jabuhu ömarue muoho iëmijego jemë'o ëhi ömojöëni uëve.

God mabëhe rajahijarue jöhoje.

²⁴ Iae God eni jië'e aego mabëhe ua'ejo. Jemë guare bejëvo va'ojöëni ma'enëgoromomo sōjëvo va'oromo huhu hijaje aji mare rëmege nimoroho avohë'i ma-maemu riravo'irarijoho hu eni jie. ²⁵ Hu A Börömoho God gemuje. Hu no maro bamavuaeje aeje. Ëhuni no Iesu Keriso nosi Badare jöëni rajahiromomo hesi örire ua'ejo: Jasi ihoho dö maro höjo. Daruge eni javë'e ae javajëjo. Böröme namiromomo jasi darugëro bövie bise'e aho'o mae muebe'amanue höjo. Ëhi jiemu jiobe rovanoho jaruvo ëhi javajoho ëhi jiemu jiobe va'a'anuëjo. Iae mae. Ahia mino'e.

REVELATION

Aevo'i jajivare jöhoje.

¹ Aveho urimo subivahuadoho Iesu Kerisohu huruohoromo röjahuijade jöhoje. Eröjahuijade jöho God-ro Iesu bojamadeje huro hesi mu vaejaharue aribövioho röjahuijego noro garomo uvoröhego: God-ro nimo'ego majae ijönö ähi ähi jië'e muohuro nosi örire rue'ie'ajëjo. Eijönö rueröhe mu hesi jöho Kerisoro nosi örire röjahui'i nimoromo hesi aneraho uavamu huro barueromo John God-are mu vaejahaje aho röjahijadeje. ² God-hu jövade jö Iesu Kerisohu mae röjahijamu John-hu gavadoho aho'o huhu mae jajivo barëjadoho aviaje. ³ Ae rahu ave surire jö adahë'ocho o ave God-are örire jioromo rovade jö heromo rabe rabe jajivadoho ëho ejahë'ocho iae huë mae bae'a'anue maja börömocho dunovë'ëro.

John-hu God-are ekaresiae amo göre göre raromaruoho jejëmijade jöhoje.

⁴ O asë'e ekaresiae aho'obëhe 7 Asia sa'a hesi uhure amo göre göre raromobe rovarujohumë John naro jemesi örire jejëmi. Na nege God mami'e ähi jië'ëro hiemu hibe rovë'ëro jaruvohu'o ähi hijaje röhu ijönö ähi gemu hiemu hibe va'iröhe ë ahuro jemë huë baeromo ajëmijego maro raromo'irarijego. O na nege God-hu döre hijaje röho hesi nuninö raromaru Aru'ahe aho'obëhe 7 ëho jabu'o ähi gemuoho jemesi örire ajëmi'iröhego. ⁵ O na nege Iesu Kerisoro Vavu hesi jöhuremu ma-mae majahuibe rovë'ëro guomoromo huro aevö'ioho ri'öromo hijë'ëro a masijo ioro'ioro ave sa'a muebejaruoho iosirëmiromo böröme namiromo muebejëvaje ë aho hu'o ähi gemuoho ajëmi'iröhego.

Keriso hu mabëheje. Huro nosi örire uehorovavujëro jië'ëro hesi köho otehoromo guomorovoromo ehuro nosi sisëho u'ovahuadeje. ⁶ U'ovahuoromo ajamuiromo nosi ihoho döro bamahuamu ehuro no masije riravoromo priest muoho baejë'e javue noro Keriso-are Böröme o Vavue God-are muoho vaenövoröhëni. Ähi ajamuijë'ego ehuni uvo'ejo: Hesi ihoho gemu börömocho höjo. Daruge aho'o hesiriremu höjo. Ae aho'obëhe no ähi uvemu uvobe va'ejarëjo. Iae mae.

⁷ Gare. Iae hu suehu'o gemu mae ruvebi'ie'e. Ruvebi'iramu ae aho'obëhe röhu hu anare aribövioho jabu'o nunëro garuomö'ë'e. Garomo sa'ae aho'obëhe nierusuburu'e bamoruomö'ë'e. Ejöho iae mae. Iae ähi jio'ë'e.

⁸ Bada God-ro uëve: Na urimo ni'i'ivevadoho röhu ijo tugohö'ioho ähi gemuoho jevo'ajëjo. Mami'e jiobe rovadoho röhu avevejö'ocho ähi jioromo röhu ijönöhu'o ähi jiobe va'iröhe aho daruge aho'o jië'e aho God-ro ähi uëve.

John-hu nia'ovo'iraeromo Keriso gavade jöhoje.

⁹ Röhu John na jemesi agane gemuoho jeve. Jemë'o na'o Iesuare ae gemuohuro javuë'ëro na jemë'o havoromo huë vavaene baeromo God-are aharire jiajëro hesi ajoho baeromo baberumi namijajeje. Na motumotu hesi ihe Patmos ë remë'ejö rabëni God-hu jövade jö Iesuhu ma röjahuijadoho naehu majëhijajöhuni. ¹⁰ Naro Patmos sa'are

hiromo hura börömo Bada uehorovarue majaho rovamu iae God-are Aru'ahohuro rumorovevoromo uehore bojemamu hi'i hejodeje nasi dejonö jö'ö ögohuro hëgö va'ëne ma-darugo'o rovavamu. ¹¹ Jö'ö ögohuro ma-darugo'o rueromo uevavohijo: Mue gö gö ga'amanuoho suri surioro jajivonëjo. Jajivoromo ekaresiae aho'obëhe 7 jabesi öroro nugö'önego adahego hebe va'irarëjo. Ephesus amo rajo ekaresiae Smyrna amo raje Pergamum amo raje Thyatira amo raje Sardis amo raje Philadelphia amo raje Laodicea amo raje ëho jabumëro adahobe hebe va'irarëjo.

¹² Ëhi jövamu hejë'i hunuorovodeje rahuhu na'o jöe jövajoho ga'i. Ë'i gavodeje iro bahijarue gije aho'obëhe 7 gold-ehu avoho'amë'oho ë momorö'öjamu ¹³ o iro bahijarue gije riravaje ririre a ma va'ëne aho niögu ëgobövi ba'amamu hörohu'o utahë'e gold-ehu avohë'e hisioho vinebire muoho taemë'e ëhi namijamu. ¹⁴ Ëa hesi simanohu'o simano uohu'o ajivoromo sa buse jahanovë'e jiohijo. Hesi nunoho vënëro höduvanovohijo. ¹⁵ Hesi höroho ajanie vënëro ravoromo ajivanovohijo. Huhu jö jövajoho jovëro ruomanovoromo ma-darugo'o uvavohijo. ¹⁶ Hesi övo mare jije aho'obëhe 7 jio'amohijo. Hesi jö'ore kaejö ëge anie ruë jio vië jië'e anio ma-ma'e jiohijo. Hesi nu ano'oho majaeu höröromo ajivego gavaruëhi ëhi ajivë'e jiohijo. ¹⁷ Ajivë'e jiamu gavë'i juhuonivoromo hesi höru'ere bejevoromo hesi bëhire ae guomë'ohuro raromanovodeje. Raromamu hesi övo mahuro nasi sinore bamehoromo uevadeje: Nadi juhuonivëjo. Na aevo'i jevodoho röhu ijo tugoho'i jevo'ajëjo. ¹⁸ Na birivoromo hijaje ae jevajëjo. Urimo na guomevade höjo. Röhu gevëjo. Na ioro'ioremu hiemu hijajëjo. Ioro'ioremu hiromo darugoho baejë'ëro ëhu'ëro naehu uëvë'ohuro aëro vuovoromo vuovë'e ariböviehu va'o raromaruire ë va'o raromarue höjo. O bogo uëvë'oho bogajo. Na ëhi jië'e eni jevë'e ae jevajëjo. ¹⁹ Ëhuni jaruvo jiaje muohu'o ijönö rueröhe muohu'o jaehu ga'amanuoho ëho jajivo'amonëjo. ²⁰ Röhu jije aho'obëhe 7 nasi övo mare jio'amamu gavane hesi jö subivahadoho o gold-ehu avoho'amë'e iro gije aho'obëhe 7 ga'amane ë hesi jö subivahadoho ë jöe niö'i jabesi bëhoho ma-sama'e huruoho majahi'ië'ajëjo. Jije aho'obëhe 7 jabesi bëhoho ekaresiae 7 jabumë muebejëvobe va'arue anerae jio'amajëjo. O iro gije 7 jabesi bëhoho ë ekaresia 7-ho jiobe va'ajëjo.

2

Iesuhu Ephesus amore raromarue ekaresia jabesi örire nugö'öjade jöhoje.

¹ Röhu Ephesus amore raromarue ekaresia jabu'o hiromo muebejëvaje anera hesi öroro ave jöho jajivonego ekaresiae aho'o he'irarëjo. Jajivoromo uënëjo: Nörö böröme namiromo jije 7 övo mare ma'eno'amë'e iro gije 7 jabesi ririre hi juvaje aho nöröro jöe majëhi'irögöro ë'ajëjo. Uënëjo: Nöröro uvajëjo: ² Jemesi muoho iae na gëvajëjo. I'u'e mu masijoho u'urume vae'ego gëvajëjo. O sisë aribövioho jemëro bogo ma-nunëremuoho gë'i ahëvo'ego gëvajëjo. Aëro jemë sarerëmiromo uëvare höjo: No apostle javuajë uëvaroho jemëro jabesi muoho mevoromo gëvarije höjo jabumë bogo apostle maehu jëvamu. ³ U'urume vaejë'e jëvajëjo. Nasi jöëni vavaeni böröme baejë'e

jëvavëjêjo rôhu bogo u'uvëvë'e hôjo. ⁴ Èhi jëvohijajo rôhu avehuremu gë'ihôromo na bijônegajêjo. Rabëni jemë aevo'i rajehi avoho'ego gënôvodëhioho avevejô'oho bogo ëhioho ë'ego gëvavëjêjo. ⁵ Urimo dë vövôbajô'e aho'o rajehinôvarijoho avevejô'oho u'uhëhanovajoho ëho uehorovoromo sisëho vuonugo'i huotorovoromo urimo ë'onôvarijëhi ëhi ë'onôvorëjo. Bogo ëhi ë'ë'ô'oho naro ô'oromo jemesi iro gijoho rori'o bava'ejôjo. Bogo huotorovoromo avoho rajehijë'ô'oho iae na ëhi ë'ejôjo. ⁶ Iae ëhi hôjo rôhu aviëhi ë'arujoho iae mae hôjo. Nicolaus-are ijore ijore jijiharue aribövi jabesi mu sisë naehu bijônimajëhi jemë'o ëhi gemuoho bijônimaruje hôjo.

⁷ Ae rahu ja God-are jô hejanue ae javë'ô'oho nasi Aru'ahëhu ekaresia majëhibe rovaje jôho heromo avoho uehorovonëjo.

Ae rahu biririvoromo mu sisë ruahô'ôjamu gavë'ô'oho Iesu naro ja ua'ejôjo a i'ovëvo'irôhe ije God-are mure namijaje hesi bajoho i'iranego. Ahia mino'ëjo.

Iesuhu Smyrna amore raromarue ekaresia jabesi ôrيره nugô'ôjade jôhoje.

⁸ O Smyrna amore raromarue ekaresia jabu'o hiromo muebejëvaje anera hesi ôroro ave jôho jajivonego ekaresiae aho'o he'irarëjo. Jajivoromo uënëjo: Aevo'i jiadoho ijo tugohô'i jiorôhe aho guomadoho rôhu maho i'ovade aho nôrôro jôe majëhi'irôgoro ë'ajëjo. Nôrôro uvavëjêjo: ⁹ Jemesi huë vavaenoho iae na gëvavëjêjo. Jemë ave sa'a hesi mae sisë bogojëvajohu'o gëvavëjêjo. Rôhu dë vövôbajô'ô'oho uhure bövi mae baejë'e jëvavëjêjo. Amo jemë agëvarue aribövi jabesi jô sisëho ëhu'o gavavëjêjo. Jaburo uvarue hôjo: No Jew raje javuavëjêjo rôhu Jew rajehu God-are aribövi jiaruëhioho jabumë bogo ëhioho jio'i Satan-are aribövie jioruomajëjo. ¹⁰ Jemë vi'ehe huë vavaene bae'ië'arujoho nadi juhuonivorëjo. Gahëjo. Iae Satan-ro ae uë'a'ajëjo jaburo jemë ae gö gö savoji gagore ba'amëvego huro jemesi dëho bijioho gërôhëro. Èhi'o'iramu huë vavaene baebe va'ojuvo majae ma-bisemu barë'iramu barëjëho'ajëjo. Rôhu biririvemu biririvamu vuovëvë'iroho ioro'ioeremu raromo'irarije suvorocho naro bojëmi'ejôjo ruahô'ôjarijohuni.

¹¹ Ae rahu ja God-are jô hejanue ae javë'ô'oho nasi Aru'ahëhu ekaresia majëhibe rovaje jôho heromo avoho uehorovonëjo.

Ae rahu biririvoromo mu sisë ruahô'ôjë'ô'oho sinoho guomavo'iramu ijônôho aru'ahoho bogo guomavoromo sisëroho va'i maro hi'a'anuëjo. Ahia mino'ëjo.

Iesuhu Pergamum amore raromarue ekaresia jabesi ôrيره nugô'ôjade jôhoje.

¹² O Pergamum amore raromarue ekaresia jabu'o hiromo muebejëvaje anera hesi ôroro jajivonego ekaresiae aho'o he'irarëjo. Jajivoromo uënëjo: Kaejô ëge anie ruë jio vië jië'e anio ma-ma'e jô'ore jië'e aho nôrôro jôe majëhi'ie'ajëjo. ¹³ Vaevë'e diehi jië'e amore raromarujoho iae na gëvavëjêjo. Satan hu ë amore a bôröme vaeromo muebejëvaje hôjo. Èhi hôjo rôhu nasi ekaresia aribövioho jemëro biririvoromo nasi ihoho ma'ënaruje hôjo. Urimë'i Antipas-ro nasi jôho mae majëhijamu hegorovo ë Satan-hu hijajire raromarue amo rajohuro hu anamu guomade hôjo. Guomamu rôhu jemëhu nasi ôrيره mae uehorovevarijoho bogo vuonugarije hôjo. ¹⁴ Èhi hôjo rôhu avehuremu

bogo maehu jio'i sisë höjo. Jasi ekaresia aribövie göëro göëro Balaam-hu mu sisë vaejadëhi ëhi gemuoho vaejarue höjo. Ëhesi bëhoho urimë'i Balaam-ro a börömo hesi ihe Balak røjahiromo uavade höjo: Jero ëhi'oromo Israel rajoho sarerëminego sisëro revo'irajo. Balaam-ro jö sisëho ëhi røjahijamu hegoroero rue a börömhuro ejahoromo Israel rajoho dinëmijamu jaburo God-are jöho ahoromo uvare höjo: Inöme gö gö aru'aho'e höromo rajahiromo mioho ë inömo inömhuni bahijëhoromo vituoho ue'ahoromo öëro jijihanovoruomade höjo. Balaam-ro ëhi jië'e mu sisëho røjahade höjo. ¹⁵ Balaam-hu mu sisë urimo røjëhijadëhi jaruvoho ëhi jië'e mu sisëho Nicolaus-ro røjëhijego ae gö jemesirire raromaruohuro hesi ijore ijore jijihoromo mu sisë vaejarue höjo. Mu sisë vaejego jemëro ma-raromoromo nunëremu gëvaruje höjo. ¹⁶ Ëhi jië'e mu sisë ma-nunëremu gëvarujoho vuonugo'i ë mu sisëho ahëvohëjo. Bogo ahëvë'oho naro ma-burëro ö'ejöjo. Ö'oromo nasi jö'ore jiaje kaejöhö baeromo ë sisë ariböviohu'o muorovo'ejöjo.

¹⁷ Ae rahu ja God-are jö hejanue ae javë'oho nasi Aru'ahëhu ekaresia majëhibe rovaje jöho heromo avoho uehorovonëjo.

Ae rahu biririvoromo mu sisë ruahö'öjamu gavë'oho naro suvuore bojami'ejöjo. Suvuoro hesi bëhoho urimë'i God-are aribövieuho a rumo'e sa'are jijihamu God-hu muebejëvoromo ö'idöre jiaje i i'imëmijadëhi naro ja ëhi muebejavoromo gurihijë'e ö'idöre jiaje ioho i'imami'ejöjo i'iranego. Ö'idöre jiaje ioho i'imamiromo ajivë'e munëho bojami'ejöjo. Ëmunë hesi döre iho i'e jajivë'e jio'a'ajëjo. Ëihoho jasi sivue ga'a'anuëjo. A göho bogajo. Ahia mino'ëjo.

Iesuhu Thyatira amore raromarue ekaresia jabesi örire nugö'öjade jöhoje.

¹⁸ O Thyatira amore raromarue ekaresia jabu'o hiromo muebejëvaje anera hesi öroro jajivonego ekaresiae aho'o he'irarëjo. Jajivoromo uënëjo: God-are Harihe nunire vënehu höduvanovoromo hörure ajani vënehu ravoromo ajivanovaje aho nöröro jöe majëhi'ie'ajëjo. ¹⁹ Iae na gavajoho jemë mu mae vaejaruje höjo. Jemë na'o a ioro'iorohu'o rajahuïromo na mae uehorovevoromo nasi muoho vaejehoromo muoho u'urume vaejë'i biririvaruje höjo. Urimoho mu mae ma-bisemu vaejarujoho jaruvoho börömo bëhe vaejaruje höjo. ²⁰ Iae ëhi gavajëjo röhu avehuremu gë'ihöromo na bijönegajëjo. Magonahe gemu Jezebel-hu urimë'i hiromo mu sisë barovadëhi magonahe gemuëro jemë'o hiromo mu sisëho ëhi gemuoho barovaje höjo. Mu sisëho barovego jemëro bogo aho'i ma-nunëremu gavaruje höjo. Ma-nunëremu gavego ë magonahuro jemë'o hiromo sarerëmiromo uëvaje höjo: Na jö God-aro baeromo majëhijaje magonahe jevajëromo Iesu nasi mu vaejeharue aribövioho sareri sareri'e jöho røjëhiromo uëvaje höjo: A'o magonaho'o ëma sihamirovë'oho iae mae höjo. O inöme gö gö aru'aho'e jio'amajëromo jabumëni bahijëhare mi ue'ahë'oho iae mae höjo. Ëhi jië'e sareri'e jöho majëhijego nasi aribövi ioro'iorohuro uvarue höjo: Hesi jöho mae höromo ejarhue höjo. ²¹ Ëhi ë'ë'e höjo röhu Iesu naro bogo burëroho i'uoho bojami'i ma-muebejë'e jevajëjo huro uehoro sisëho vuonugo'i uehoro mae baeröhego. Röhu önö'e mu sisë røjëhijajoho vuonugo'iröhoho bijönimajëjo. ²² Bijönimë'ego ëhuni iae Iesu naro i'ue

mana bojami'iramu guomo guome baeromo röhoremu raromo'ajëjo. Raromo'iramu ë magonahohu'o önö'e jijihaje aribövioho jabu'o ëhi vi'ehe böröme bae'a'aruëjo. Jabumë ë magonaho hesi jö ejaho'i bogo vuonugë'oho ëhi jië'e vi'ehi börömoho bojëmi'ejëjo. ²³ O ë magonaho hesi ijore ijore jijiharue aboji harihu'oho Iesu naro muo'amo'iramu vuovëvo'ajëjo. Vuovëvo'iramu gagorovo ekaresiae aho'obëhe amo göre göre uvobe va'oruomo'ajëjo: Nöröro ae aho'obëhe nosi simanoho dë vövöbajo'oho mevavuo barëjaje höjo gö'i mae o sisë javuego. Mevavuo göromo nosi mu diehi vaejarue hesi manaho ëhi bojamui'ajëjo. Ekaresiaëro ëhi uehorovoruomo'ajëjo.

²⁴ Röhu Thyatira amo rajo a ioro'ioroho jemëro ë magonaho hesi jö sisëho bogo ejaharuje höjo. O hesi ariböviohu uëvaruoho: Satan-are uhu jö hesi bëhoho no baejaroho jemë'o baerë uëvaruoho jemë bogo ejëharuje höjo. Bogo ejëharujohuni ëhuni Iesu naro jemesi örire ave jöho uë'ië'ajëjo. Jemë mu böröme baejë'ego ë hesi döroho muoho bogo gö'oho bojëmi'ejëjo. ²⁵ Röhu ë mu baejarijoho biririv-oromo ma'enegro Iesu na ö'iröjo. ²⁶ Ae rahu mu sisë ruahö'öromo biririvoromo nasi mu ma'enobe va'ojuvo jasi maja barëjë'oho naro ja daruge bojami'iramu sa'ae aho'o muebejëvo'anuëjo. ²⁷ Sa'ae gö gö muebejëvoromo aehu rama anoromo hahovarühi jero ëhi ha'itoho baeromo vörö'o muebejëvo'anuëjo. Naehu ëhi'oromo sa'ae gö gö muebejëvo'irodego nasi Vavuehu uevadëhi naro ja ëhi ua'ejëjo sa'ae gö gö vörö'o muebejëvo'iranego. ²⁸ Naro ëhi uaromo sisonu'e gavarue mujöru hesi ajoho bojami'ejëjo.

²⁹ Ae rahu ja God-are jö hejanue ae javë'oho nasi Aru'ahehu ekaresia majëhibe rovaje jöho heromo avoho uehorovonëjo. Ahia mino'ëjo.

3

Iesuhu Sardis amore raromarue ekaresia jabesi örire nugö'öjade jöhoje.

¹ O Sardis amore raromarue ekaresia jabu'o hiromo muebejëvaje anera hesi öroro jajivonego ekaresiae aho'o he'irarëjo. Böröme namiromo God-are Aru'ahe aho'obëhe 7 o jije aho'obëhe 7 baejë'e aho nöröro jöe majëhi'ië'ajëjo. Jemëhu mu vaejarujoho iae na gavajëjo. Na gavajoho ae aho'obëhe uvoruomaje höjo: Sardis ekaresiaho jemëro God-are daruge baeromo mae raromaruje höjo. Jemesi jöho ëhi atarue höjo. Röhu jemë bogo ëhioho jëvo'i jemesi aru'ahoho God-are darugo rumo'ëro jiëh'ëro vuovëh'e höjo. ² Ëhuni ri'ö nune dadovohëjo. Vëni duoroho'ië'ajoho mueberomo huego avoho ravo'irajo. Duoroho barëjëho'ajëjo. Na gavajoho nasi A Börömoho God-ro uvaje höjo: Jemesi muoho bogo maehu höjo. ³ Ëhuni Christian jö rabe majëhijamu hejarijoho avo'avoho uehorovoromo eromo uehoro sisëho vuonugohëjo. Bogo ri'ö nuni dadovoromo avoho uehorovë'oho naro vajiohëro ö'ejëjo. Naehu ö'irode majaho bogo mae bogo ga'a'arujëjo. ⁴ Jemë ëhi jëvavëjo röhu jemesi Sardis amo raje ae gemu gemu jabesi niögoho avo'avoho muebejë'ëro va'inumoho bogojëhajëjo. Ëaribövioho maëro jëvë'ëro ëhuni ajivë'e niögoho io'amoromo na'o gemu mae jijihö'aruëjo. ⁵ Ae rahu biririvoromo mu sisë ruahö'öjë'oho ajivë'e niögoho ëhi ba'amo'anuëjo.

O jasi ihoho mae raromemu raromo'iröhe aribövi jabesi surire jajivodoho na bogo mu'uvaho'ejöjo. Bogo mu'uvaho'i a'i naro nasi Vavu hesi nunire o anera jabesi nunire namiromo jasi ihoho ma-samae majëhiromo uë'ejöjo: Ave aho nasi a maho höjo.

⁶ Ae rahu ja God-are jö hejanue ae javë'oho nasi Aru'ahehu ekaresia majëhibe rovaje jöho heromo avoho uehorovonëjo. Ahia mino'ëjo.

Iesuhu Philadelphia amore raromarue ekaresia jabesi örire nugö'öjade jöhoje.

⁷ O Philadelphia amore raromarue ekaresia jabu'o hiromo muebejevaje anera hesi öroro jajivonego ekaresiae aho'o he'irarëjo. Jajivoromo uënëjo: Bogo sisëho bogo sareri'oho jio'i ma-maëremu jiaje aho nöröro jöe majëhi'ie'ajëjo. David-hu böröme namiromo God-are öri aril'ere va'iröhe öroho muebejadëhi naro ëhi muebejaje höjo. Naehu öri jiovë'iroho ae göehu tugoho'iröhoho bogo eni höjo. O naehu tugohë'iroho ae göehu jiovo'iröhoho bogo eni höjo. Èhi jië'e a börömoho Iesu naro jöe majëhi'ie'ajëjo. ⁸ Jëmëhu mu vaejarujoho iae na gëvajëjo. Hehëjo. Naro mu öroho jemëni jiovëhë'e jevajëjo. Jiovëhë'ëro ae göehu tugohëho'iröhoho bogo eni höjo. Iae na gavajoho jemesi darugoho bogo bövioho jië'e jemëro nasi jöho ejehoromo nasi ihoho ae aho'o jabesi nunire huruoho majëhiromo uëvë'e jëvajëjo: Iae no Iesuare aribövie javuajëjo. ⁹ Iae Satan-are ariböviohuro jemesi amore raromoromo uvoruomaje höjo: No Jew raje javuajëjo. Röhu Jew rajehu God-are aribövi jiaruëhioho jabumë bogo ëhioho God-are aribövioho jio'i Satan-are aribövie jioruomajëjo. Röhu hehëjo. Naro jabumë ruahö'öjëvo'iramu jaburo ö'oromo jemesi hörunö ague aho raromoromo gëromo uvoruomo'ajëjo: Jemë Iesuhu rajëhaje aribövie jëvajëjo. ¹⁰ Nasi örohuni jemë u'urume vaejë'i biririvonövo'irarijago uëvode höjo. Èjöho jemëro ma'enë'e jëvo'ego ëhuni naro jemë ma'enëgo'ejöjo. Ma'enëgo'iramu huë vavaene sa'ae dinö'e dinö'e rueromo ae aho'o jemesi dëre bijiohë'iroho jemë mae riravo'arujëjo. ¹¹ Naehu rue'irode majaho dunovajëjo. Èhuni jemëhu baejarije mu maho nadi vuonugo'i ma-avoho mueberëjo ëhuro aho bogo iosirëmiromo jemesi suvuoroho baejëho'iröhe höjo. ¹² Ae rahu biririvoromo mu sisë ruahö'öjë'oho naro baejavoromo nasi A Böröme God-are osare bamavo'iramu bönunö'e bibivoromo namijanovo'anuejo bogo ijoho rori'o va'iranëro. O nasi A Böröme God-are ihoho jasi sinore jajivaho'ejöjo ja hesiremu javoröhego. O nasi A Böröme God-are amo hesi ihoho sinore jajivaho'ejöjo. ÈJerusalem amo i'oho nasi A Böröme God-hu hijajire ö'idöre jioromo ruvebi'iröhoho ë amo hesi ihoho uavajëjo. O nasi iho i'ohu'o jasi sinore jajivaho'ejöjo.

¹³ Ae rahu ja God-are jö hejanue ae javë'oho nasi Aru'ahehu ekaresia majëhibe rovaje jöho heromo avoho uehorovonëjo. Ahia mino'ëjo.

Iesuhu Laodicea amore raromarue ekaresia jabesi örire nugö'öjade jöhoje.

¹⁴ O Laodicea amore raromarue ekaresia jabu'o hiromo muebejevaje anera hesi öroro jajivonego ekaresiae aho'o he'irarëjo. Jajivoromo uënëjo: Mae jövaje aho na jevë'ego God-are jöho maro maro huruoho majëhijaje aho na jevajëjo. God-hu bövi bise'o bamadoho uevamu

avoho'amode aho Iesu naro jõe majëhi'ie'ajëjo. ¹⁵ Jemesi muoho iae na gëvajëjo. Jemë naniho bogo nëgo avohaje hõjo bogo bijõnëgo avohaje hõjo. Nëgo avoho'ibejajo o bijõnëgo avoho'ibejajo na mae jevo'ibejajo. ¹⁶ Rõhu bogo nëgo avoho'i bogo bijõnëgo avoho'i uehore ma-ririre jëvajokuni ëhuni sabonõ'e ijuhõ'õjëvo'ejõjo. ¹⁷ Jemëro uvaruje hõjo: Nosi sivue bövie bise'le eni javuajëjo. Marohë'e mae javuajëjo. Böviëni bise'ënioho bogo vavaenoho baejarue hõjo. Ëhi ataruje hõjo. Rõhu jemesi uhuroho bogo ëhioho jëvajëjo. Jemë vaevë'e huë vavaeni'e bövi bise'o rumo'e nuni sisë'e ma-sinëremu raromaruajëjo. Ëhi jëvajokho ëho bogo gavarujëjo. ¹⁸ Ëhuni ave õri avoho røjëhi'ie'ajõho avoho herëjo. Nasi gold ma-mabëhe ajivë'o'ho nasiro imoromo jemesi ujuohorego marohë'e mae jëvo'irajo. Ajivë'e niõgoho nasiro imoromo io'amego sinëremu raromoromo a nunire javoji'e mu vaejarujõho tugohego mae jëvo'irajo. Nuni hesi osoho imoromo rue jemesi nuni maro buerovego jemesi simanoho ajivëvego avoho uehorovo'irarije hõjo. ¹⁹ Rõhu naehu huë baejëvaje aribövioho i'ue bojëmiromomo avo'avoho røjëhijaje hõjo sisëho vuonugo'i ma-avoho jijihõ'irarijego. Ëhuni jemëro nimo avohoromo huotorovoromo uehoro maemu baerëjo. ²⁰ Hehëjo. Naro osare õ'irõgoro amonõ namiromomo jemesi ojore ano'anovajëjo. Ae rahu nasi huë heromo ojo jiovehë'o'ho naro rumo õ'oromo ja'o hiromomo gemuoro ioho i'ejarëjo. ²¹ Ae rahu biririvoromo mu sisë ruahõ'õjë'o'ho urimo naehu biririvoromo sisë ruahõ'õromomo ajiomoromo nasi Vavu hesi rõho mare hu'o' gemu mae hijë'ëro bövi bise'o' muebejëvajëhi naro ëhi ja ua'iramu nasi rõho mare õ'oromo na'o gemu mae hiromomo na ajemiromomo bövioho bise'o'ho muebe'amo'anujëjo.

²² Ae rahu ja God-are jõ hejanue ae javë'o'ho nasi Aru'ahëhu ekaresia majëhibe rovaje jõho heromo avoho uehorovonëjo. Ahia mino'ëjo.

4

Õ'idõre raromoromo God rajahiruomaje jõhoje.

¹ Ëhi'lamu naro gal'i gavodeje õ'idõre va'arue ojõho jiovo nugë'e jiamu. Jiovo nugë'e jiamu gagorovo hejode hëgõehu uvanovaje urimo jõ majehijade ahuro rõhu maho ma-darugo'o jõe majehiromomo uevavamu: Avehuro rojomego ijõnõ mu diehi diehi jio'irõhõho na røjahijõjo. ² Ëhi uevamu hejë'i God-are Aru'ahõhuro na avohevoromo simanoho huotoveho barëjamu gavë'i naro õ'idõre muoho garomo gavodeje a bõrõmehu hijaje rõhõho õ'idõre jiamu. Ëhi jio'ego ae gemu ë hihijo. ³ Hi'ego munë mabëhe gö gö kavuë'e ajivë'e jio'amoromo jinojino'irae'amajëhi hesi nu ano'o'ho ëhi jinojino'irahijõ. Rõhu nuogëro rõhõho numohijõ. Munëhu mabëhe rõvajëhi nuogohuro numoromo ëhi rõvohijõ. ⁴ Ërõho maho ririre jio'i a duvahe aho'obëhe 24 ruë numë gemu gemu rõho mare raromo rova'oruomohijõ. Ajivë'e niõgoho io'amoruomë'e a masijehu didi'aruëhi jì'e bosõe gold-ehu avoho'amaroho simanore didi'oruomë'e ëhi raromohijõ. ⁵ Rõhu ririre rõhore baderivo'ego varuru vajeri'e vae'i hijavohijõ. O ë rõho ma hesi nuninõ iro bunõ'irae'amadõho aho'obëhe 7 kavuo'amohijõ. Ëiro jabesi bëhõho God-are Aru'ahë aho'obëhe 7-hoje. ⁶ O rõho ma hesi nuninõho jovo e' du deri va'ëne ajivo avohë'e bõrõmo bõrõme jiohijõ.

O röhoho ririre jio'i God rajahijarue maje 4-ho ioni göre ioni göre dejonö nuninö ëhi riravo rova'oruomohijo. Nu ano'e ruë numë manunemu jioruehijo. ⁷ Ëmajoho göho lion va'ëne jio'i göho cow ano'e harihu va'ëne jio'i göho ma-a nu ano'o va'ëne jio'i göho buruhehu hetejeho gavaruëhi hesi nu ano'o ho ëhi jiohijo. ⁸ God rajahijarue maje 4-ho gemu gemu vivoje aho'obëhe 6 6 jio'amohijo. Jabesi vivoju uhohu'o dönöhu'o sino haho'o ho aho'o ma-nunemu jio'amohijo. Röhu majae vahie sisone bogo vuonugë'e ma-jöe iemu ioromo uvarueje: Bada God maemu maemu maemu jio'i daruge aho'obëhe hesirohemu höjo.

Mami'e jiobe rovadoho jaruvo jiajoho röhu ijönö jio'iröhoho höjo.

⁹ God rajahijarue majohuro God ëhi ma-mabëhe rajahiromo jöho iarueje röho mare hiromo ioro'ioremu hibe va'aje a hesi ihoho dö maro jioröhego. ¹⁰ Ëmaje 4-ehu ëhi rajahiromo jö ië'iroho rue a duvahoho aho'obëhe 24 jaburo röho mare hijaje a hesi nuninö ague aho raromomo hesi örire rajahijarueje hu ioro'ioremu hibe va'aje jië'ego. Rajahiromo jabesi a masijehu simanore didi'arue bosöho God-hu hijaje nuninö rideho bahijarueje. Bahiromo uavarueje:

¹¹ Nosi Bada God jero bövie bise'e bamane höjo.

Jero nimoromo avohë'ëro jio'amajëjo.

Ëhuro ja mae javë'ego iho böröme aje aho'o daruge aho'o jasi gemu höjo.

5

Huhohë'e sure God-are Sheep Harihe Iesu gemuehu jiovo varijëne jöhoje.

¹ Ëhi'amu gavodeje röho mare hiromo muebejavuaje aho God-ro hesi övo mahuro huhohë'e suroho ma'enë'e jiamu. Ësuroho ruë jajivo vië jajivoromo huhohoromo sivaëro aho'o 7 ëmino'e suroho badihi taemo'amë'e jiohijo. ² O gavodeje darugo'e anerahuro madarugo'o uvamu: Rahu a böröme javë'o ho badihi taemo'amade sivahogoho'amoromo suri jiovo'iranoho eni javajëjo. ³ Ëhi uvamu röhu ö'idöre sa'are sa'a uhure ëhi jië'e a börömoho nahoromo bogo mae bogo birohareje huhu ë suri jiovoromo adaho'iröhoho. ⁴ Ëhi jië'e aho bogo birohamu ëhuni na sisë maro nivodeje. ⁵ Nivamu a duvahe gemuëro uevadeje: Nadi nivo'i ave jöho hejëjo. A böröme gemu iae eni jiajëjo. Lion-hu mi ioro'ioro iosirëmiromo darugo'e jiajëhi huro Judah rajo ioro'ioroho ëhi iosirëmiromo darugo ma'e höjo. David urimo hinövade a hesi ujo böröme höjo. Ëahuro sisëho ruahö'öjël'ëro sivae 7 goho'amoromo suri jiové'o ho hu eni höjo.

⁶ Eni höjamu hejë'i gavodeje Sheep Harihoho namijamu. Mami'e aëro anamu guomë'ëro sinore batato'e jië'e ëhi namijamu. A duvahoho ruë numë riravo rova'ego God rajahijarue maje 4-ho ruë numë riravo rova'ego ë Sheep Harihoho riri mare God-are röho ma hesi ririre namihijo. ËSheep-oho dane aho'obëhe 7 o nune aho'obëhe 7 ëhi jio'amohijo. Ënune aho'obëhe 7 jabesi bëhoho God-are Aru'ahe 7 sa'ae dinö'e dinö'e rëmö'öjadohoje. ⁷ Amo ë Sheep Harihohuro rueromo röho mare hijaje aho God hesi övo mare jiaje suroho baehijo. ⁸ Suroho bae'ego God rajahijarue maje 4-ho a duvahe aho'obëhe 24-ho jaburo

Sheep Harihu hesi nuninö sa'are ague aho raromohijo. Jabumë gemu gemu gita övore ujuohë'e gold'e ramare ridi'e buejarue vëni u'oho ujuohë'e jiohijo. Ridi'e buejarue vëni u'i hesi bëhoho God-are ariböviehu hesi örire atarue jö'o ögohoje. Gita'o ramare vëni u'ohu'o ujuohë'e ague aho raromoromo ⁹ jö i'oho ioromo uaruomohijo: Ja maëremu javë'ëro ëhuni suri baeromo siva goho'amë'oho eni javajëjo.

Aëro anagamu jasi köho otehoromo guomane höjo. Guomoromo ëhuro ae ajëmijane höjo.

Agane gö gö huë gö gö sine gö gö sa'ae dinö'e dinö'e sisë'i raromaro ho jero guomoromo ëhuro imëvoromo baejëvoromo God-arinö rëmane höjo.

¹⁰ God-arinö rëmoromo jabesi ihoho döro bamëhamu

ëhuro jabumë masije riravoromo priest muoho baejare höjo

nosi A Böröme God hesi muoho vaenövoröhëni.

Priest muoho baejë'ëro ijönö masije vaeromo

sa'are ae muebejëvoruomola'ajëjo.

¹¹ Ëhi uaruomamu naro garomo hejodeje anerae aho'obëhe mae bogo adaho varijënoho uvoruomamu. God-are röho maho o God rajahijarue majoho o a duvahoho ëho ririho jio'amo'i ë aneraho aho'obëhe ruë numë raromo rova'oruomohijo. ¹² Raromo rova'oromo ma-darugo'o uvoruomohijo:

Anamu guomade Sheep-oho mae höjo.

Ëhu'ëro darugo maho inömo inöme aho'o uehoro maho vörö maho

iho maho aji maho ma-hesiro gemu höjo.

Noro hu gemu rajahi'ëjarëjo.

¹³ Ëhi uvoruomamu hegorovo hejodeje God-hu bamade bövie bise'e ö'idöre sa'are sa'a uhure jovo gagore raromaruoho ëho jaburo aho'obëhe uvoruomavamu:

God röho mare hijaje ahu'o Sheep Harihohu'o

iho maho aji maho darugo maho ma-jabesiro gemu höjo.

Ëhi jiemu jiobe va'ië'ego jabumë gemu rajëhiemu rajëhinövo'ëjarëjo.

¹⁴ Ëhi uvoruomamu hegorovo rue God rajahijarue maje 4-ho jaburo uvoruomohijo: Ëjöho iae mae-ëjo. O a duvahoho jaburo sa'are ague aho raromoromo God'o Sheep Harihohu'o rajëhiruomohijo. jöhoje.

6

Suri badihi taemë'e siva dadovobe va'ade

¹ Ëhi'oruomamu gagorovo gavodeje surire sivae 7 badihijaroho gemu Sheep Harihohuro aevoromo gohamu. Gohamu evare hejodeje God rajahijarue maje 4-ho röhu gemuëro varurehu anajëhi ëhi uvavamu: Rovëjo. ² Rovëjamu hegorovo ga'i gavodeje sino ajivë'e horse jiamu. Röhu ë horse hesi döre hijade aho pevare ma'enhijo. Mami'e muorovoromo ruahö'öjë'ego bosö mabëhoho hesi simanore didi'ahohijo. Didi'aho'ego va'ohijo muorovoromo huro muorove aho'o ruahö'ö'amo'iröhëni.

³ Ëhi'ego Sheep Harihehu urimo surire sivae gemu gohadoho röhu number 2-oho gohohijo. Jiovamu evare hejodeje God rajahijaje majo göhuro uvavamu: Rovëjo. ⁴ Rovë'ego ae sino kavuo avohë'e horse-re ruehijo. Rueromo vöröe bojami'ego baehijo ëhuro sa'ae gö gö huë mae

baerovarue muoho ijumëhego ae göero göho muo'amo'iröhego. Ëhi ë'iröhego muorovarue kaejõ ëgoho hesi örيره bojamihijo.

⁵ Ëhi'ego Sheep Harihehu urimo surire sivae niõ'i gohadoho röhu number 3-oho gohohijo. Gohamu evare hejodeje God rajahijaje majo göhuro uvavamu: Rovëjo. Rovëjamu naro ga'i gavodeje ae rövë'e horse-re hiromo i'u gavarue inõmoho baejë'e rovamu sa'a hesi iruno'oho ga'iröhëro i'ue dimino'e jiego. ⁶ Ae rövë'e horse-re hiromo i'u gavarue inõmoho baejë'e rovamu hejodeje God rajahijarue majo jabesi ririre jioromo aëro jövanovoromo sino rövë'e horse-re rovade a hesi örيره uavavamu: Jero sa'a iruno'e ijumo'anuejo. Ijumo'iramu iruno'oho sisërëromo bogojianovo'ajëjo. Ioho bogojianovo'iramu ëhuro hesi manaho ajiomu'ajëjo. Ajiomu'iramu aehu i imo'ië'iroho majae gemu hesi mu vaejare manaho bu'õ barëromo ëhuro majae gemu hesi iruno'o maho o majae niõ'i gemu hesi iruno'o sisëho ujuoho'aruëjo. Suvuoroho ëmino'e ajiomu'ajëjo. Röhu jaehu iruno'o ijumë'oho olive ijo bajohu'o grape ö'i bajohu'o bogave ijumo'iranëjo.

⁷ Ëhi'ego Sheep Harihehu urimo surire sivae niõ'i gemu gohadoho röhu number 4-ho gohohijo. Gohamu evare hejodeje God rajahijaje majo göhuro uvavamu: Rovëjo. ⁸ Rovëjamu hegorovo ga'i gavodeje ae sino jio'ajivë'e horse-re rovamu. Jio'ajivë'e horse-re rovade a hesi ihoho A Vuovëvo'iröhe Aho jiadeje. O ae gö hesi ijore ruehijo. Hesi ihoho Vuovë'e Aribövi Raromarue Öri ari'oho jiadeje. Jabu niõ'i vöröe bojëmi'ego baehijo sa'ae aho'obëhe tariojego ëhi niõ'i ëhi niõ'i jiego jaburo gemu baeröhëni. Gemu baeromo ijumëvego göero göhu'o muorovoromo vuovoröhego. Ie barëromo vuovoröhego. Guomo guomo sisë baeromo vuovoröhego. Je'o miëro umijego vuovoröhego.

⁹ Ëhi'ego Sheep Harihohuro urimo surire sivae 4 gohadoho röhu number 5-ho gohohijo. Gohamu evare gavodeje vuovëvë'e a jabesi aru'ahoho God-ni suvuoro bahijarue maratu bëhire sa'are raromamu. Ëraromare hesi bëhoho urimoho ë ariböviohuro God-are jöho ue-horovoromo biririvoromo majëhinövareje. God-are jöho biririvoromo majëhijamu gagorovo aëro muo'amamu vuovëvadeje. Muo'amamu vuovëvë'ëro ëhu'ëro jabesi aru'ahoho ë raromohijo. ¹⁰ Raromoromo ma-darugo'o uvoruomohijo: O asë'e Bada ja darugo eni jië'e ae javajëjo. Ja mu sisëho bogo vaejanue o sareri'e jöho bogo jövanue a ma-maemu javajëjo. Röhu ë sa'are raromarue ariböviohuro no bijuëmavuare höjo. Ëhuni ja majae dimino'e ma-nunëremuoho gëbe va'oromo evare ë jabesi mu sisëho mevo gëromo i'uoho mana bojëminëjo. ¹¹ I'uoho mana bojëminëjamu ajivë'e niõgu ëgoho ë aribövioho suvuorëmi'ego ujuohoruomohijo. Ujuohoromo hejareje uëvavamu: Majae ma-bisemu ëgo'o nuhanovorëjo hujeji jemë muo'amëvarëhi jemë'o nasi mu vaejarue ö mueno'o aehu muo'amego vuovoröhe aribövi ioro'ioroho rue barëjego evare i'uoho mana bojëmi'irode höjo.

¹² Ëhi'ego Sheep Harihehu urimo surire sivae övo gö mine gohadoho röhu number 6-ho gohohijo. Gohamu evare gavodeje sa'aho börömo böröme hijiohijiovamu. Sa'aho hijiohijiovo'ego niõgu sisë rövë'e ji-ajëhi maja nunohuro ëhi rövo'ego manaerohuro kö va'ëne kavuohijo. ¹³ Manaerohuro kavuo'ego buru börömehu rueromo meso hijiovego meso böso i'ehu rireromo ruvebijajëhi jiji mujöru'ohuro ëhi sa'are

rireromo ruvebihijo. ¹⁴ Rireromo ruvebi'ego aehu suri huhohego bogo gavaruēhi ö'idöhuro ēhi arorovoromo sisērē va'ohijo. Dahore aho'obēhe o sa'a dirö dirö'e jovore jio'amajoho aho'obēhe arua anumiae va'ohijo. ¹⁵ Arua anumiae va'ego sa'are a masijo masijoho a duvaho ioro'ioroho muorovo a masijoho inömo marohē'e aribövioho darugo'e aribövioho a jabesi muemu vaejarue aribövioho jabesi nimoro mu vaejarue aribövioho ēhi ae aho'o huruomo va'oromo juju gagore dahorure munē burure gurihirovo barēhijo. ¹⁶ Gurihirovo barēromo uvoruomohijo: Dahoroho munēho jemēro ahoromo urahahuego ēhuro röho mare börömo hijaje ae God bogo gö'irajo. O Sheep Harihu hesi vöröho no bogo baejavuo'irajo. ¹⁷ Ēhesi bēhoho vörö majaho rovē'e hōjo. Raro ē vöröho uraho nami'a'ajējo.

7

God-hu hesi aribövie 144,000 avoho muebejēvade jōhoje.

¹ Ēhi'amu gavodeje anerae 4 riravamu. Sa'ae aho'o dinö'e dinö'e jiajoho ririre jio'i jabumē aruhiae anumiae aruae aviae riravo rova'ohijo. Riravo rova'oromo anerae gemuēro gemuēro burehu rovajoho gemu gemu tugohohijo buroho bogo rueromo sa'aho jovoho ijoho huosihoröhego. ² Buroho ēhi tugohamu gagorovo na gavodeje anerae göero aruhe maja rojomajire jioromo rojomamu. Rojomoromo God darugo'ehu hijaje hesi jajivarue inömohe hesi övëro baejē'e ruehijo ēhuro God-are aribövi jabesi sinore taemēhego jaji'e jio'amo'iröhego. Rueromo ma-darugo'o uvohijo rue anerae 4-ho jaburo hejōro mami'e sa'a'o sō jovo'o ijumo'iröhe vöröho God-aro baeruomē'ëro. ³ Uvoromo uvohijo: Jemēro sa'aho jovoho ijoho nadi vejö'oho ijumo'amohējo. Hujeji God-are mu vaejarue aribövi jabesi varijore God-are soroho jajivēhego evare jemēro ē jajoho garomo uvo'irarijego: God-ro tugohē'e hōromo jemēro jabumē bogo ijumēvo'i öri ari'ohemu ijumo'irarije hōjo. ⁴ Ēhi uvavamu hejē'i hejodeje aëro uevamu: God-are soru varijore baejare aho 144,000 ėmino'e hōjo. Israel hesi agane 12 aho'obēhe baebe va'ē'e hōjo. ⁵ Judah'o hesi ujoho 12,000. Reuben hesiroho 12,000. Gad hesiroho 12,000. ⁶ Asher hesiroho 12,000. Naphtali hesiroho 12,000. Manasseh hesiroho 12,000. ⁷ Simeon hesiroho 12,000. Levi hesiroho 12,000. Issachar hesiroho 12,000. ⁸ Zebulun hesiroho 12,000. Joseph hesiroho 12,000. Benjamin hesiroho 12,000. Ēaribövioho 144,000 jaburo God-are soroho baeruomade hōjo.

God-are aribövie ae aho'obēhe riravoruomade jōhoje.

⁹ Ēhi'amu naro ga'i gavodeje ae aho'obēhe mae riravamu. Bogo adaho varijēnoho jiohijo. Sa'ae dinö'e dinö'e agane gö gö sine gö gö huē gö gö aribövioho ajivē'e niögu ėgoho io'amē'e juva hanoho ujuohē'e God-are röho ma hesi nuninö Sheep Harihu hesi nuninö riravohijo. ¹⁰ Riravoromo ma-darugo'o uvoruomohijo: God röho mare hiromo muebejavuajohu'o Sheep Harihohu'o jaburo niö'iro mabēhe ajamuiromo manö babamavuē'e hōjo. ¹¹ Ēhi uvoruomamu God-are röho maho riri mare jio'i God rajahjarue maje 4-ho ruē numē riravo rova'i röhu majo jabesi dejonö a duvahoho ruē numē raromo rova'i röhu a duvaho jabesi dejonö ē aneraho aho'obēhe ruē numē riravo

rova'ohijo. Ĕhi riravoromo rōho ma hesi rirōre ague aho raromoro God rajahiruomohijo. ¹² Rajahiromo uvoruomohijo: Aveho iae mae-ējo. Aji maho uehoro maho iho maho darugo maho vōrō maho nosi Bōrōme God-aremu jiajoho Ĕhi ma-jiemu jiohe va'a'ajējo. Ma-jiemu jiohe va'ie'ego noro hu gemu rajahiromo huē mabēhe uanōvo'ejarējo. Iae mae-ējo.

¹³ A duvawe 24-ho rōhu gemuēro ri'ōromo na uehijo: Ĕajivē'e niōgu ēgo io'amē'e aribōvioho rahumē jioruomajējo. Dinō'e jioromo rueruomade hōjo. ¹⁴ Rueruomade hōjamu naro uavodeje: Na bogo gavajējo. Jasi jero gavanuējo. Jasi jero gavanuē'ego rue a duvahohuro uehijo: Ĕajivē'e niōgu io'amē'e aribōvioho ēho bogo vuovēvē'e sa'are raromamu evare Iesu bijōnimarue aribōviohuro jabesi ōrire huē vavaene bōrōmo bēhe bojēmamu baeruomade hōjo. Baeromo rōhu iae mae rueruomade hōjo. Jabumēro God-are Sheep Harihu hesi kōhuro jabesi niōgoho u'oruomamu jabesi sisēho barējēhē'ero niōgoho ma-ajemu jiēho'amajējo. ¹⁵ Ĕhu'ero jiē'ero jabumē God-hu hijaje rōho ma ē hesi nuninō riravoromo hesi osare vahie majae ma-hesi muohemu vaemu vaejahoruomaje hōjo. Vaejaho'iramu rōho mare hijaje ahuro jabu'o gemu mae hiromo mu sisēho raboho tugohēho'iramu munē bururo raromanovoruomo'ajējo. ¹⁶ Munē bururo raromanovoruomo'iramu ijonōho vadunoho bogo hōmēvonōvo'ajējo. Huēho bogo girihēvonōvo'ajējo. Majaho bōvioho bise'oho bogo ravēvo'iramu sinoroho vōrō'iraeromo birebirēgonōvo'ajējo. ¹⁷ Rabēni hesi bēhoho God-are Sheep Harihe rōho ma hesi ririre hijaje ahuro ē aribōvioho hesi Sheep ōmo'ōmego gagovēvoromo muebejēvonōvo'ajējo. Muebejēvoromo sō ujuohoromo a i'ovēvo'irōhe jovore ē va'onōvo'ajējo. Ĕhi'o'iramu God-ro jabesi nuni jovoho miorēho'iramu jabesi huē vavaenoho aho'obēhe barē'ajējo.

8

Suri badihi taemo'amare sivae 6 gohobe rovadoho ijo tugoho'i number 7-ho gohade jōhoje.

¹ Ĕhi'ego Sheep Harihehu urimo surire sivae ōvo gō mine ōvo gōre gemu gohadoho rōhu ijo tugoho'i number 7-ho gohohijo. Goho'ego evare ō'idōho jōrumoraebe va'ojuvo half hour rabu'e barējadeje. ² Ĕhi'amu evare anerae 7 God-are nuninō riravaruoho naro gēvodeje. Riravoromo hēgōe aho'obēhe 7 bojēmi'ego gemu gemu ujuohohijo.

³ Ujuoho'ego anerae gōero gold'e hevōho baeromo riehijo ose ē bamoromo vēnēro buejego ridi'e vēni u'ohuro God-ni ajiomorōhego. Hevōho baeromo God-ni suvuro vēnehu buejarue maratue gold-ehu avohare ē hesi bēhire rueromo ē namihijo. Nami'ego aēro ose aho'obēhe bojami'hijo huro God-hu hijajire nuninōrire maratuore ē bamoromo buejego God-are aribōviohuro ēninamijego ēninamaruohu'o ridohu'o gemuoro havoromo God-arire ajiomorōhego. ⁴ Osoho bojami'ego anerahuro ōvēro ma'eno'ego God-are aribōviehu ēninamaruohu'o ridohu'o gemuoro havoromo God-arire ajiomohijo. ⁵ Ĕhi'ego anerahuro ridi'e hevōho baeromo God-ni suvuro vēnehu buejarue maratu dōre ravē'e vēnoho aegoromo irijiomohijo vēnoho

suovoromo io'amo'ego sa'are rireromo abuehijo. Rireromo abue'ego baderivoromo vajeri varuru'e vaeromo sa'aho hijiohijiovohijo.

Aneraehu hëgö huobe rovere jöhoje.

⁶ Ëhi'ego rue anerae aho'obëhe 7-ho hëgöe gemu gemu ujuohë'ëro huo'i jö'ore bamohijo.

⁷ Jö'ore bamoromo anerae number 1-ohuro hëgöho huohijo. Hëgöho huo'ego ënëro direjohijë'e masijohu'o vëni'o kö'o buarohë'o'oho otehö'ö'ego ö'idöre jioromo sa'are rireromo abuehijo. Rireromo abue'ego sa'ae aho'o ije aho'o niö'i gemu tariojaroho gemu ö'idöre jioromo rireromo abuejade vënohuro ravo barëhijo. O garasi rude rövë'e ma-maho aho'obëhe ravo barëhijo.

⁸⁻⁹ Ëhi'ego anerae gemuehu hëgö huadoho röhu number 2-ohuro hëgöho huohijo. Hëgöho huo'ego evare dahoru böröme vënehu ravanovë'ohuro ahoromo sö jovo e'ure abuehijo. Abue'ego sö jove aho'o jovo mie aho'o boat aho'o niö'i gemu tariojaroho jovëro dirö'e gemu köraehijo jovo mie ë dirö'e gemuore vuovohijo boat ë dirö'e gemuore dadorovo'amohijo. Röhu dirö'e niö'i bogo.

¹⁰ Ëhi'ego anerae niö'iehu hëgö huaroho röhu number 3-ohuro hëgöho huohijo. Hëgöho huo'ego jiji böröme ö'idöre jioromo vënëro ravanovë'e be'abuehijo. Be'abuero rova'o'amë'e jove aho'obëhe sa'a gagore rojomo'amaje jove aho'obëhe niö'i gemu tariojaroho dirö'e gemu taemohijo. ¹¹ Taemamu jovoho ajuovadeje jiji hesi ihoho Ajuo'ëro jië'ëro. Ajuovo'ego ae aho'obëhe ë jovoho ue'ahoromo ajuomo'amoromo vuovohijo. ¹² Ëhi'ego anerae aho'obëhe niö'i gemuehu hëgö huaroho röhu number 4-huro hëgöho huohijo. Hëgöho huo'ego majae manaere jiji mujöru'e ha'ose aho'obëhe niö'i gemu tariojaroho gemu sisërëhijo. Sisërëromo ramoramovohijo. Ramoramovë'ëro ëhu'ëro majaehu sisonu'e jeni'e maja'e ajivo'iröhe majae bamo'iröhoho niö'i gemu tariojaroho gemu bogo ajivo'i ramoramovohijo. O man-aerehu jiji mujöru'ehu vahi'e ajivo'iröhe majae niö'i gemu tariojaroho gemu bogo ajivo'i ramoramovohijo.

¹³ Ëhi'amu naro ga'irögoro ëlamu gavë'i evare hejodeje buruhuro döre biojë'i uvavamu: O vaevë'e vaevë'ëjo. Sa'are raromaruje aribövioho anera ioro'ioroho niö'i gemu jaburo hëgöho huobe va'iramu jemë sisërëjëvo'ajëjo.

9

¹ Ëhi'ego anerae ëhi niö'i ëhi niö'iehu hëgö huaroho röhu number 5-huro huohijo. Huamu gavode jijoho ö'idöre jioromo sa'are be'abuejë'e jiamu gagorovo gavodeje gua gago ëgobövi ma ë hesi ojo jiovarue key-oho aëro jiji hesi örire bojami'ego baejamu. ² Gua hesi ojo jiovarue key-oho baenugoromo gago ëgobövi hesi ojoho jiovohijo. Jiovo'ego vëni börömo böröme gua gagore jioromo u'ivoromo rojomohijo. Ro-jomoromo majaho tugoho'ego öri ari'oho aho'obëhe ramoramovohijo. ³ Ramoramovo'ego guaevisgaeviëro vëni u'ire jioromo sa'are ruve-biruomohijo. Ruvebiromo ë guaevisgaeviohuro niani'ö hesi vörö va'ënoho baejareje ae ijumo'amoröhëni. ⁴ Vöröho baeromo röhu heruomadeje uëvavamu: Garasie ije ö'e iruno'e resu resue rabe rabe

sa'are jiajoho bogave ijumo'irarijējo. God-are soru varijore bogojjē'ohemu ijumēvorējo. ⁵ Ijumēvē'oho jabumē nadi muo'amēvo'irōgoro niani'ōehu umijego vi'ehēgaje ēhi jiē'e vi'ehoho manaere ōvo gō mine bojēmibe va'orējo. Ēhi uēhijo. ⁶ Ēhi uēvadēhi ē manaere ōvo gō mine hesi uhure ē ijumēvē'e aribōvioho vuovo'i nēgo'ē'e. Vuovo'i nēgo'iramu vuovo'i ōroho bogobiroho'ē'ō.

⁷ Rōhu ē guaevisuaevi jabesi sino haho'oho muorovo'irōgoro avohēhare horse-oho va'ēne jio'amohijo. O jabesi simanore gold'e bosō va'ēnoho didi'ēho'amē'e jiohijo. O jabesi nu ano'oho a nosi nu ano'ovo va'ēne jio'amohijo. ⁸ O jabesi simano uoho magonahe simano rudu'e jabesi u jiajēhi ēhi jiohijo. O jabesi anoho vōsō'e lion jabesi ano va'ēne jiohijo. ⁹ Rōhu aehu muorovo'irōgoro biriri'e niōgehu vinebi tugohoromo io'amarue ēhi jiē'e biriri'e niōgeho vinebire io'amē'e jiohijo. O vivojehu diohodihovoromo huosihē'oho ēho muorovo'i va'i horse-ehu maratu jagu ujuohoromo darugo'ovo va'ego garahōrō'e baejeho hejaruēhi ēhi jiafovohijo. ¹⁰ Rōhu jabumē uho'e jio'amohijo. Jabesi uoho vōrō'e niani'ō uho va'ēne jio'amohijo. Vōrōho uhore jiē'ēro ē uhohuro manaere ōvo gō mine umibe va'ē'ō. ¹¹ Rōhu ē guaevisuaevi jabesi bōrōmo vaeromo muebejēvaje aho gua gago ēgobōvi muebejaje anera sisēhoje. Ēanera hesi ihoho Hebrew jōero uvarueje: Abaddon-ajo. O Greece jōero uvarueje: Apollyon-ajo. Ēiho hesi bēhoho bōvi bise'ovo ijumo'amajohoje.

¹² Guaevisuaevi rueruomade vavaeni'e muoho iae barē'i rōhu buruhehu uvade vavaeni'e muoho niō'i gō'ovo rue'ē'e.

¹³ Iae anerae ōvo gō minehu hēgō huaroho rōhu number 6-huro hēgōho huohijo. Hēgōho huamu hejodeje God-are nuninō namijaje gold'e maratu osore osore jioromo uvavamu. ¹⁴ Uvoromo ē vejō'e hēgō huaje aneraho uavavohijo: Nume anerae ēhi niō'i ēhi niō'i Euphrates jovo bōrōmore tōvēvaroho jiovo nugō'ō'amējo. ¹⁵ Jiovo nugō'ō'amējamu rue hēgō huade anerahuro ē anerae ēhi niō'i ēhi niō'i tōvēvaroho jiovo nugō'ō'amohijo ae aho'obēhe sa'are raramaruoho niō'i gemu tarioromo niō'i nugo'i gemu muo'amo'irōhego ē aneraho ēhi niō'i ēhi niō'i God-ro tōvēvoromo bamēvē'ēro ē majaho ē manaeroho ē vadunoho rovego jiovo nugō'ō'amego ē sa'are aribōvioho muo'amēvorōhego. ¹⁶ Rōhu ē anerae 4 jabesi horse-re va'arue muorovo aribōvioho iae 200 million jiadeje. Ējōho iae na hejodeje. ¹⁷ Rōhu ē muorovo'irōhe horse jabesi o horse va'arue muorovo aribōvi jabesi nu ano'oho nia'ovoro gavodeje. Jabesi vineboho biriri'e niōgehuro tugohoromo io'amē'e jiohijo. Rōhu biriri'e niōgu jabesi nu ano'oho kavuē'e vēni hōdu va'ēne rōvē'e vēni u'i va'ēne o hōvē'e munē ravoromo hōdu hōvē'e jiajēhi ēhi jio'amohijo. Rōhu horse jabesi simanoho lion jabesi simano va'ēne jio'amohijo. Rōhu vēni hōde vēni u'e o hōvē'e munē ravoromo hōdu hōvē'e jiajēhi jiē'oho ēho jabesi jō'ore jioromo suorovohijo. ¹⁸ Horse jabesi jō'ore jioromo suorovoromo vēni hōdoho o u'oho o hōvē'e munē hōvē'e jiajēhi jiē'oho ē mu sisēhuro ae aho'obēhe sa'are raramaruoho niō'i gemu tariojaroho niō'i rēmo'i gemu ravēno barējadeje. ¹⁹ Rōhu ē horse jabesi vōrōho jabesi jō'ore o jabesi uhore jiohijo. Jabesi uoho simano'e jiohijo ēhuro ae ijumo'amo'irōhēni. Jabesi uoho simano'e

jië'ëro ëhu'ëro ë uho jabesi nu ano'o'ho sigobu sisë jabesi nu ano'o va'ëne jiohijo.

²⁰ Ëmu sisëhuro ëhi rueromo ijumëvo'ego a ioro'ioroho vuovëvo'i ioro'ioroho bogo vuovëvohijo. Bogo vuovëvadeje röhu inömo sisë jabesi övehu avohoromo uehorovaruoho bogo uehorovoromo vuonugo'i a'i inömo sisë gold-ehu o silver-ehu o copper-ehu o munë göehu göehu o ijehu avoho'amaroho sarerivoromo uvoruomohijo: Ëho aru'aho'e höromo uehorovemu uehorovoruomohijo. Röhu ëhi jië'e inömo'ho bogo uheriharueje. Bogo hejarueje. Bogo jijiharueje. Ma-momorö'öjarueje. Ëhi jië'e inömo'hu'o aru'aho sisëhu'o uehorovaruoho bogo vuonugo'i ëhi ma-uehorovoruomohijo. ²¹ Ëhi ma-uehorovoromo a muo'amarue muoho bogo vuonugoromo iro oso'e muoho bogo vuonugoromo önö'e muoho bogo vuonugoromo vajiohu'e muoho bogo vuonugo'i ma-vaemu vaeruomohijo.

10

Aneraehu suri bise'o John bojamamu ijade jöhoje.

¹ Ëhi'amu gavodeje anera göho hesi darugoho bövi maho jië'ëro suëro numë'e simano döre nuoge ba'amë'e sa'are ruvebijamu. O hesi nu ano'o'ho maja va'ëne ajivë'e jio'i hesi höroho vëni hödu ëgobövi va'ëne jiohijo. ² Röhu huhoharue suri bise'o'ho jiovë'e ë anerahuro övëro ma'ënohijo. O hesi höru maho sö jovo döre bamo'i hesi höru adoho sa'a döre bamoromo ëhi namihijo. ³ Ëhi namiromo lion-ehu uvaruëhi ëhi ma-vöröëremu uvohijo. Uvo'ego vajero'ho aho'obëhe övo gö mine övo göre niö'i ano'amoromo dirö'e göre göre ëhi uvobe va'ohijo. ⁴ Vajero'ho anoromo uvobe va'amu hejë'i ë vajerehu uvare jöho naro jajivo'irögoro ë'odeje. Jajivo'i ë'irögoro hejodeje jöe ö'idöre uevavamu: Vajere övo gö mine övo göre niö'i uvaroho nadi jajivo'i subivëhonëjo.

⁵ Röhu höru gö sö jovore bamo'i höru gö sa'are bamë'e namijamu gavode anerahuro övo maho ö'idöre nugojiomohijo. ⁶ Nugojiomoromo God-are ihore darugo'e jöho majëhiromo uvohijo: Ioro'io'oremu hijaje aho God ö'idö sa'a jovo bövi bise'o avoho'amade ahuro ge'ego na ave jöho majëhi'irögoro ë'ajëjo. Ijonöho bogo muebe'irögoro ⁷ a'i anera göhuro hëgöho huo'iramu evare God-hu mami'e subivahuade mu jioröhe jö God-hu hesi mu vaeromo jö majëhijarue aribövi uëvadoho ë muoho iae jio barë'ajëjo.

⁸ Ëhi uvamu röhu urimo ö'idöre uevavamu hejode ahuro jöe gö majëhiromo uevavohijo: Rue anera höru gö jovore bamo'i höru gö sa'are bamo namiromo jiovë'e suri övehu ma'ënajoho ë suroho jero va'oromo baejëjo. ⁹ Ëhi uevamu hegorovo naro va'oromo aneraho uavodeje: Suri bise'o'ho bojemijëjo. Suri bise'o'ho bojemijëjamu uevadeje: Më suroho baeromo ijëjo. Baeromo i'iramu jö'ore vuomëro rihuamanovo'i röhu dë vi'ehago'ajëjo. ¹⁰ Vi'ehago'ajëjamu naro baeromo ijamu vuomëro rihuamanovoromo hejodeje dë vi'ehëgavamu.

¹¹ Vi'ehëgamu aëro uevareje: Röhu maho ri'öromo sa'ae dinö'e dinö'e sine gö gö huë gö gö sa'are a masije gö gö ëho jabesi jö God-hu jövajoho jero majëhinego ae aho'obëhe he'irarëjo. Jasi muoho ëhi höjo.

11

God-are jö majëhijare ae niö'i jabesi jöhoje.

¹ Ëhi ue'ego aëro guduodo va'ëne vahu baejarue ijahe memiromo uevavohijo: Ri'ö va'oromo God-are javu börömo hesi vahuoho o God-ni mi suvuoro buejarue maratu hesi vahuoho baeromo ganëjo dimino'e jiego. O osare raromoromo God rajahijarue aribövioho adahoromo ganëjo dimino'e jiego. ² Röhu God-are javu hesi vahu baejè'oho rirönöho nadi baenëjo. Ëhesi bëhoho javu riröho Jew rajoho bogo a'i sa'a gö raje God-are jö bogo heruomaje aribövi jabesi örire bojëmijè'e höjo. Jabesi örire bojëmijè'ëro jabumëro rueruomoromo God-are amo börömocho Jerusalem manaere 42 hesi uhure hörü duruajo'ëro vaeruomo'ajëjo. ³ Hörü duruajo'ëro vae'i è'iramu evare nasi jö majëhijarue ae niö'i naro uè'iramu jabumëro niögu sisëho io'amoromo nasi jöho majëhibe va'iröhoho è manaere 42-ho barè'ajëjo. Ëhi uevavohijo.

⁴ Ëae niö'ioho èho sa'a muebejaje a God-are nunire rirarovarue olive ije niö'ioho va'ëne o hesi nunire rirarovarue iro niö'ioho va'ëne jëve. Ëhesi bëhoho è olive ijo niö'i jabesi jovo baeromo buejego ajivajëhi o è ire niö'i buejëvego ajivajëhi è ae niö'iohuro èhi God-are darugoho baeromo ajoho barue'è'ö. ⁵ Röhu aehu è ae niö'i jabesi örire ijumëvo'iè'iroho vënëro è ae niö'i jabesi jö'ore jioromo rueromo nu huodëgarue aribövioho ravëvo barè'è'e. Ae rahu jabumë ijumëvo'iè'oho iae èhi vuovëvo'è'e. ⁶ Röhu è ae niö'ioho jaburo vöröho bae'è'ö èhuro God-are jö majëhijarue majaho rovego evare ènoho tugohego bogo ruejuvo jöho majëhi barëjego evare rueröhego. O vöröho bae'è'ö èhuro jabesi divare nëgè'iroho jove gö gö ijumo'amego kö'irae'amoröhego o uvego sa'are aribövioho guomo guomo sisë gö gö bae'amoröhego.

⁷ Amo jabesi jöho majëhibe va'ojuvo barè'iramu vörö'e majo sisëhuro gua ègobövire jioromo rojomoromo ae niö'iohu'o muorovo'è'e. Jabu'o muorovoromo ruahö'öjëvoromo anëgo'iramu vuovëvo'è'e. ⁸ Vuovëvo'iramu jabesi sinoho amo börömo hesi öri börömore èhi raromëvo'è'e. Ëamoho sisëgo èhuni uvarueje: Ëamoho Sodom o Egypt höjo. Röhu urimë'i è ae niö'i jabesi A Börömocho aëro guduamoromo è ame gemuore korosire anareje. Amo è ame gemuore jabesi sinoho raromëvo'è'e. ⁹ Raromëvo'iramu sine gö gö agane gö gö huè gö gö sa'ae dinö'e dinö'e aribövioho èho jaburo rueromo è ae niö'i jabesi sinoho èrimëhoromo uarovonövo'è'ö: Bogo guavëvo'ëjarëjo. ¹⁰ Ëhi uarovoromo sa'are raromarue ariböviohuro uvoruomo'è'e: Ëae niö'iohuro huè vavaene aho'obëhe nosi örire bojamuinövare höjo. Röhu vejö'oho vuovëvè'e höromo nimoronimorohoromo suvuoramirovo'è'ö. Ëhi'ojuvo majae niö'i gemu röhu ma-bisemu hesi ijore barè'è'e. ¹¹ Ëmajaho barè'iramu God-ro jö'o ögëro jabesi nu gagore huosihëho'iramu vuovëvadoho i'ovoromo ri'öromomo döro rirarovo'è'ö. Döro rirarovo'iramu ae aho'obëhe jabumë gëromomo juhuonivo avoho'è'ö. ¹² Juhuonivo'iramu è ae niö'iohuro he'è'ö ö'idöre jöe uvo'iramu: Avehuro rojomohëjo. Avehuro rojomohë'iramu evare jabumë nu huodëgarue ariböviohuro ga'è'ö è ae niö'ioho ö'idöre suëro numëvobe ajiomo'iramu. ¹³ Ö'idöre ajiomo'iramu evare sa'aho hijiohijiovo'è'e. Sa'aho hijiohijiovo'iramu amo taritarivaroho dirö'e

10 jië'ëro dirö'e 9 mae jio'i dirö'e gemu ijumo barë'ë'e. Dirö'e gemu barë'iramu ae aho'obëhe 7,000 vuovëvo'ë'e. Vuovëvo'iramu a ioro'iorohuro juhuonivoromo uvo'ë'ö: Asë'e ö'idöre hijaje ae God hesi ihohe böröme höjo. Ëhi jioröhoho naro nia'ovoro gavodeje.

¹⁴ Vavaeni'e mue niö'i buruhehu uvadoho iae barë'i röhu number 3-oho ma-burëro ruel'ë'e.

Anerae hu hëgöe 6 huobe rovaroho ijo tugoho'i number 7-ehu huade jöhoje.

¹⁵ Iae anerae övo gö mine övo göre gemuehu hëgö huaroho röhu ijo tugoho'i anerae number 7-huro hëgöho huohijo. Hëgöho huo'ego ö'idöre darugo'o uvoromo uvoruomavohijo; Jaruvoho nosi Bada God'o God-hu uavë'ëro böröme namiromo ajamuijaje aho Keriso'o jabu niö'iro darugoho baej'e höjo bövie rirarovoromo sa'ae aho'obëhe muebe'amoröhëni. Darugoho baej'ëro God-ro böröme namiromo muebemu muebebe va'onövo'ajëjo. ¹⁶ Ëhi uvavamu hegorovo a duvahe aho'obëhe 24 a masijehu raromarue röho mare God-are bëhire raromaruohuro ri'öromo ague aho raromoromo God rajahiruomohijo. ¹⁷ Rajahiromo uvoruomavohijo:

O asë'e Bada God daruge aho'o baej'e ae javajëjo.

Urimë'i jiobe rovanoho jaruvohu'o ëhi gemuoho hiemu hijanue ae javajëjo.

Jasi darugo börömo baeromo dö mare hiromo aevoromo aho'obëhe muebejavuë'ego

ëhuni rajahijaruëjo.

¹⁸ Urimoho sa'ae dinö'e dinö'e raromarue ariböviohuro vörö'iraej'ë'e raromonövre höjo.

Jaruvoho jero jabesi örire vörö'iraejanuëjo.

Majaho rovë'e höjo vuovëvë'e aribövi mevëvoromo gë'iranoho mae o sisë jëvego.

Gëromo jasi mu vaejahoromo jö baeromo majëhijarue aribövi jabesi mana bojëmi'iranoho

jasi aribövi ma jabesi mana bojëmi'iranoho

jasi iho mae uehorovarue aribövioho ininore va'o masijore jabesi mana bojëmi'irane ë hesi majahu'o

sa'are bövi bise'o ijumaruoho mana ijumëvo'irane ë hesi majahu'o rovë'e höjo.

¹⁹ Ëhi uvo'ego God-are osae ö'idöre jiajoho jiovohijo. Jiovo'ego God-are jögoru jiaje maua va'orahoro jiohijo. Va'orahoro jio'ego baderivoromo vajeri varuru'e vaeromo sa'aho hijiohijiovoromo ënëro direjohijë'e masije darugo'o ruvebihijo.

12

Sigobu böröme hu magonaho sihade jöhoje.

¹ Ëhi'amu gavodeje bogo gavaruëhi jië'e mu böröme gö ö'idöre jiamu. Ëmu hesi bëhoho magonahe gemu jiohijo. Majae niögu va'ëne ba'amë'e jiohijo. O höroho manaerore bamë'e jiohijo. O hesi simanore jije aho'obëhe 12 inovoromo bosö va'ëne didi'ahë'e jiohijo. ² Röhu hu dë'ëro jië'ëro raho'irögoro vi'ehe böröme baeromo hara'uoromo darugo'o jö'e dadovavohijo.

³ Ĕhi'ego bogo gavarue mu bōrōme gō'o ò'idōre ruehijo. Ĕmu hesi bēhoho kavuē'e sigobu bōrōmo bōrōme jiohijo. Vōrō'e mae jiohijo. Hesi simanoho aho'o òvo gō mine òvo gōre niō'i jio'amohijo. O hesi danoho aho'obēhe òvo gō mine òvo gō mine jio'amohijo. O sigobu simanoho gemu a masijehu io'amaruēhi jiē'e bosōhuro didi'o'amē'e jio'amohijo. ⁴ Rōhu jije aho'obēhe ò'idōre jio'amajoho niō'i gemu tariojaroho dirō'e gōnō niō'i nugo'i dirō'e gōnō gemu sigobu hesi uhohuro sa'are ujuoho io'amohijo. Ujuoho io'amoromo ē harihu raho'iē'aje magonaho hesi nuninō raromoromo muebehijo rahego harihoho i'iro. ⁵ Raromoromo muebe'ego rue magonahohuro harihoho rahohijo huro ijōnō hujejo ha'itoho baeromo sa'ae dinō'e dinō'e raromarue aribōvioho vōrō'o muebejēvego jaburo hu gemu ejahorōhego. Amo harihoho raho'ego ē aho ma-majioho ba'ojio God-hu rōho mare hijajire ē nugohijo. ⁶ Evare vēmohuro ju'ebiro mo arue a rumo'e sa'are va'ohijo God-hu avohahade òri ari'ere ē hijego God-ro ajamiromo muebebe va'ego majae aho'o 1260 barē'irōhego.

⁷ Ĕhi'ego ò'idōre muorovohijo. Anera bōrōme Michael'o huhu muebejēvaje anerahu'o ēho jaburo ri'ōromo sigobohu'o muorovoruo-mohijo. Muorovo'ego sigobohu'o sigobu hesi anera òmo'ōmohu'o mana muorovēmihijo. ⁸ Muorovēmi'ego rueho jaburo sigobohu'o hesi aribōviohu'o taemēvohijo. Taemēvoromo uēhijo: Ave ò'idōho ioro'ioremu vuonugo'i va'ohējo. ⁹ Ĕhi uēnugoromo ē sigobu bōrōme ò'idōre jiajoho baba'amohijo. Ĕsigoboho ni'i'ivadire jiobe rovadoho hesi ihoho Devil o Satan jiohijo. Sa'ae dinō'e dinō'e raromarue aribōvi sareramuike juvaje ahoje. Hu'o hesi anera sisē òmo'ōmohu'o sa'are baba'amēvohijo.

¹⁰ Baba'amēvamu hejodeje ò'idōre darugo'o uvavamu: Jaruvoho nosi Bōrōmoho God-ro hesi darugoho rōjahuiromo bōvi mae namiromo sisēho noni ruahō'ōjahuē'e hōjo. O jaruvoho God-hu uavē'ēro bōrōme namiromo ajamuaaje aho Kerisoro no muebejavuaaje darugoho rōjahuijē'e hōjo. Ĕhesi bēhoho jō sisē majahijaje aho baba'amē'e hōjo. Huro God nosi A Bōrōmo hesi nunire namiromo vae majae nosi ò mueno'o jabesi jō sisēho sareramiro mo majahinōvade hōjo. Rōhu jaruvoho baba'amē'e hōjo. ¹¹ Nosi Christian ò mueno'ohuro uvare hōjo: God-are Sheep Harihoho kōe rueromo guomē'ēro mae javuajē uvoromo hesi jōho ae sama'e majēhiromo ēhuro sisēho ruahō'ōruomade hōjo. Jabesi sinoho bogo uehorovo'i uvare hōjo: No Keriso-are jōēni vuovē'oho iae hesi hōjo. ¹² Ĕhuni ò'idōho mabēhe hōjo. Ò'idōre jiaruje aribōvioho mabēhe jēvaje nimorohohējo. A'i sa'ahu'o jovohu'o vaevē'e hōjo ē hesi bēhoho Satan hu ē abuejē'ego. Abuejē'ēro garomo uvaje hōjo: Nasi majaho barē'irōgoro ē'ajēromo vōrō'iraejē'e hōjo. Ĕhi uvoruomohijo.

¹³ Ĕhi'ego rue sigobohuro gavade baba'amē'ēro sa'are jiamu gagorovo aharihu rahade magonahoho ijumo'i siho baeromo va'ohijo. ¹⁴ Siho baeromo va'ego buruhi bōrōmo hesi vivojoho niō'i magonahohuro God-aro baehijo ēhuro bioromo a rumo'e sa'are va'oromo hesi rōhore hirōhēni. Hijego God-ro muebejego sigoboho ē magonahuhu hijaje òri ari'eroho bogo va'ego vadune aho'obēhe niō'i gemu rōhu ma-bisemu hesi ijore barērōhego. ¹⁵ Ĕhi'ego sigobohuro jovo

böröme hesi jö'ore otehö'öhijo ë jovohuro ruomoromo ë magonahehu jiajire va'oromo ë magonahoho bava'ojöro. ¹⁶ Jovoho otehö'ö'ego jovohuro magonahoho bae'i rue'ego sa'ahuro magonahoho ajamiromo tögöromog'ego jovohuro ë gagore va'o barëhijo. ¹⁷ Va'o barë'ego ë sigobohuro magonaho hesi örire vörö'iraeromo va'oromo magonaho hesi aboji harihu'o ioro'iorohu'o muorovo'i va'ohijo. Röhu ë aboji harihu'o jabesi bëhoho God-are jögoru ejahoromo Iesuare jö biririvoromo mae uehorovarue aribövioho jioruome. Ëariböviohu'o sigobohuro muorovo'i va'ohijo. ¹⁸ Ëhi'oromo ë sigobohuro va'oromo sö jovo riröre raromohijo.

13

Vörö'e mi niö'tiehu rueromo mu sisë vaejare jöhoje.

¹ Sigobohuro sö jovo riröre raromamu naro gavodeje vörö'e mi sisë sö jovore jioromo rojomamu. Hesi simanoho aho'obëhe övo gö mine övo göre niö'i jiohijo. O hesi danoho aho'obëhe övo gö mine övo gö mine jiohijo. O a masijehu didi'aruëhi jië'e bosöho dane gemu gemu jio'amobe va'ohijo. O simane gemu gemu God agarue iho sisëho gemuohemu jajivo'amë'e jiohijo. ² Röhu ë vörö'e mi sisë hesi nu ano'o leopard nu ano'o va'ëne jiohijo. O hesi höroho bear höru va'ëne jiohijo. Hesi jö'oho lion jö'o va'ëne jiohijo. Röhu rue sigobohuro darugo börömëro jië'ëro ë darugoho vörö'e mi sisëho bojamiromo uahijo: Na'o röromo röho maro ajio hiromo nasi öri ari'oho aho'o muebejehonëjo. ³ Röhu ë mi sisëho hesi simanoho gemu aëro anamu guomoromo i'ovë'ëro batato'e jiohijo. Guomoromo i'ovë'ëro batato'e jiamu ae aho'obëhe ëho garomo tiötiövoromo simane sisë'i uehorovoromo uvareje: Ëho mae höromo hesi ijore ijore jijihoromohijo. ⁴ Hesi ijore ijore jijihoromo uvoruomohijo: Sigobohuro vörö'e mioho hesi darugoho mabëhe bojamijade höromo ëhuni sigoboho rajahiruomohijo. Sigoboho rajahiromo vörö'e miohu'o rajahiruomohijo. Rajahiromo uvoruomohijo: Ëvörö'e mioho darugo ma'e höjo. Rahuaro ëhi jië'e darugoho höjo. Rahuaro ë vörö miohu'o muorovo'ajëjo. Ëhi uvoruomohijo.

⁵ Ëhi'ego God-ro ë vörö'e mi hesi öroho bogo tugohahohijo huro nimoronimorohë'i jö sisë jövoromo hesi nimoromo bövie bise'e muebebe va'ujuvo manaere aho'obëhe 42 barë'iröhego. ⁶ Öroho bogo tugohahë'ëro vörö'e mi sisëhuro ri'öromo God agoromo hesi ihoho ijumoromo God-hu hijaje öri ari'oho sivoromo God'o gemu mae ö'idöre raromarue aribövi jabesi sisëho sarerivoromo ëma jövohijo. ⁷ Jö sisëho ëhi jövo'ego God-ro ë vörö'e mi hesi öroho bogo tugohahohijo huro God-are ariböviohu'o muorovoromo ruahö'öjëvo'iröhego. Ruahö'öjëvoromo vöröho baeromo agane gö gö sa'ae dinö'e dinö'e huë gö gö sine gö gö aho'obëhe muebejëvo'iröhego. ⁸ Ae aho'o sa'ae dinö'e dinö'e raromaruoho jaburo ë vörö'e mi sisëho iae uvene aho röjahiruomö'ë'e. Uvene aho röjahi'iröhe hesi bëhoho urimo God-hu ö'idö sa'a bogo bamadevare evare God-ro a ioro'ioro jabesi ihoho hesi Sheep Harihu anego guomoröhe hesi surire jajivo'amadeje hu'o maro raromemu raramo'iröhego. A ioro'ioro jabesi ihoho suriroho bogo jajivo'amadeje bogo ëhioho maroho raramo'iröhego. Röhu iho bogo jajivo'amë'e sa'are raromarue ariböviohuro vörö'e mi sisëho rajahiruomö'ë'e.

⁹ God-are jö hejaruje aribövioho ave jöho hehëjo. ¹⁰ Aehu jemë guduamëvoromo savoji gagore ba'amëvo'ië'o'ho iae savoji gagoro ba'amëvo'ë'ö. O aehu muo'amëvamu vuovëvo'ië'o'ho iae vuovëvo'ë'e. Ëhi jië'e mu sisë rue'iröhohuni ëhuni God-are aribövioho jemëro biririv-oro God gemu uehorovobe va'ore.

¹¹ Ëhi'amu gavodeje vörö'e mi sisë gö'o sa'a gagore jioromo rojo-mamu. Ëmi hesi danoho niö'i sheep harihu hesi dano jiajëhi ëhi jëvohijo. A'i huhu jö jövajoho ë sigobu börömehu jövajëhi ëhi ma-darugo'o jövohijo. ¹² Ijore rovade vörö'e mi sisëhuro urimore rovade mi sisë hesi vöröe gemuoho bae barëromo huni röromo muoho vaehijo. Urimore rovade mi hesi muoho vaeromo sa'are raromarue aribövioho uëhijo jabumëro urimore rovade mi sisëho uvene aho röjahi'iröhego. Aehu hesi simanoho gemu anahamu guomoromo i'ovade ë hesi batato'e simano jië'e mioho rajahi'iröhego muoho vaehijo. ¹³ Ijore rovade miohuro urimore rovade mi hesi muoho vaeromo no bogo gavarue vörö'e mu masijoho vaehijo. Mu masije gö gö vaeromo röhu ae aho'obëhe jabesi nunire namiromo uvo'ego vënohuro ö'idöre jioromo sa'are ruvebihijo. Ëhu'o ë'ohijo. ¹⁴ God-ro hesi öroho bogo tugohahë'ëro ëhu'ëro ijore rovade miohuro urimore rovade miohuni röromo ëhi jië'e vörö'e muoho vaeromo ëhuro sa'are raromarue aribövioho sarerëmhijo. Sarerëmiromo uëhijo jabumëro urimore rovade mioho rajahi'i munë o rabe sehoromo inöme hesi nu ano'o va'ëne avohoröhego. Hesi simanoho gemu anahamu guomoromo i'ovade ë hesi batato'e jië'e mi hesi nu ano'o va'ëne avohoröhego. ¹⁵ Urimore rovade mi hesi nu ano'o va'ëne inömo avoho'ego God-ro öroho bogo tugohahë'ëro ëhu'ëro ijore rovade miohuro ë mi nu ano'o va'ëne inömo hesi nu gagore jö'o ögëro huosihohijo mi nu ano'o va'ënohuro daruge baeromo jöe jövoromo garöhe ae rahu hesi öriroho bogo uvene aho röjahijego muo'amo'iröhego. ¹⁶ Ëhi'oromo ë ijore rovade miohuro a masijoho a ininoho inömo marohë'e aribövioho inömo rumo'e aribövioho a jabesi muemu vaejarue aribövioho jabesi nimoro mu vaejarue aribövioho ae aho'obëhe mae jöe bojëmiromo uëhijo: Ë'ego no jemesi övo manö o varijore jajivëharëjo. Jajivëharëjamu ejëho'ego jajivëhohijo. ¹⁷ Bogo ejëho'ibejo mi sisëhuro öroho tugohëhego iruno'o'ho bövioho bise'o'ho bogo imo'ibejo. Ëjajivëharoho mi hesi iheje.

¹⁸ Ëhesi bëhoho avoho uehorovore. Ae rahu simano ma'e jëvë'o'ho ë mi hesi iho hesi bëhoho nahoromo birohore. Hesi ihoho 666-je. Ëihoho avoho adahë'o'ho a ihe biroho'anue.

14

God-are aribövie 144,000 jabuhu jö i'o ioruomade jöhoje.

¹ Röhu naro ga'i gavodeje God-are Sheep Harihoho Zion dahorure nami'ego ae aho'obëhe 144,000 Sheep Harihu hesi ihohu'o hesi Vavu hesi ihohu'o varijore jajivo'amë'e hu'o rivavamu. ² Röhu hejodeje ruhe ö'idöre uvavamu. Jovehu ruomoromo uvego hejaruëhi o vajerehu anego hejaruëhi o aehu gita bejogo heromo vuëvavuajëhi jöho ëhi jjavavamu. ³ Ëhi uvoromo God-hu hijaje röho ma hesi nuninö hu rajahjarue maje 4 jabesi nuninö a duvaho jabesi nuninö riravoromo jabesinö nu ano'o'ho nugoromo jö i'oho ioruomohijo. Ae aho'obëhe

sa'are sisë'i raromaruoho röhu ae 144,000 ëmino'e God-hu baejêvadoho ë ariböviohuremu ë jö i'o io'iröhoho eni jêvadeje. A ioro'ioroho bogo. ⁴ Ëaribövioho magonaho'oho mu sisëho bogo vae'i ma-mae raromarueje. God-are Sheep Harihehu dinö'e dinö'e va'ë'iroho jabu'o hesi ijore ijore jijiharueje. A ioro'iore aho'obëhe jio'amajoho röhu God-ro i'u'e muoho baeromo ëhuro ë ariböviohuremu hesi baejêvadeje. Ëaribövioho God'o hesi Sheep Harihohu'o jabuhu aevo'i ma-mabëhe baejêvaroho jêve. ⁵ Jabumë bogo sareri jöho atamu aho he'irögoro jabumë ma-maemu jêve.

Anerae niö'i gemu jabuhu uvare jöhoje.

⁶ Ëhi'amu gavodeje anerae gö döre bioromo va'amu. Ëanerahuro God-are jö maho baejê'ëro sa'are raromarue aribövioho majëhiromo uë'irögoro ë'ohijo: Ioro'ioemu jioröhe muoho ëhi ëhi höjo. Ëjö maho sa'are raromarue aribövie aho'obëhe sine gö gö agane gö gö huë gö gö sa'ae dinö'e dinö'e raromaruoho majëhi'i va'ohijo. ⁷ Va'oromo jöho ma-darugo'o majëhiromo uëhijo: Jöe hehëjo. God-are öroro avo'avoho uehorovoromo uvohëjo: Hu gemu börömoho höjo. Huhu ae aho'o mevëvo'iröhe majaho rov'e höjo. Ëhuni ö'idö sa'a sö jovo sa'a gagore suorovaje jovo bamade aho God hesi öroro uvene aho röjahihëjo.

⁸ Ëhi uvo'ego anerae number 2-ohuro ijore rueromo uëvavohijo: Jöe hehëjo. Iae amoho bejê'e höjo. Iho'e amo böröme Babylon vejö'oho barëjê'e höjo. Ëhesi bëhoho urimë'i Babylon amo rajohuro mu sisë röjëhinövareje. Magonahehu ae mu sisë röjëhiromo vörö'e jovo i'imëmego ue'ahoromo simano sisërëromo önö'e jijiharuëhi ëhi Babylon amo rajohuro sa'ae dinö'e raromarue aribövioho mu sisëho röjëhijamu simane sisërëromo mu sisë sisë vaeruomë'e höjo. Ëhu'ëro Babylon rajohuro God-are i'uoho baeruomë'e höjo.

⁹ Ëhi uvo'ego anerae niö'i rueromo jö majëhijaroho röhu number 3-ohuro jabesi ijore rueromo uëhijo: Jöe hehëjo. Ae rahu mi sisë o hesi nu ano'o va'ëne avoharoho uvene aho röjëhiromo hesi iho varijore o övore baejê'oho ¹⁰ ë ariböviohuro God-are i'uoho baeruomo'ajëjo. Aehu vörö'e jovo bogo sanuovë'e ma-ue'ahoromo hara'uarue ëhi jië'e i'uoho God-ro vörö'iraeromo bojëmi'iramu baeruomo'ajëjo. Baeromo God-are anera jabesi nunire God-are Sheep Harihu hesi nunire raromoromo vënohu'o vënehu ravoromo girosijiomë'e munëhu'o ravëvo'iramu hara'uoruomo'ajëjo. ¹¹ Hara'uo'iramu ë aribövi ravëvaje vënoho bogo duorohoti ma-u'ivemu u'ivonövo'ajëjo. U'ivo'iramu ae rahu mi sisë o mi hesi nu ano'o va'ëne avoharoho uvene aho röjëhijë'oho o mi hesi iho sinore baejê'oho ëhi jië'e aribövioho jabesi vi'ehoho bogo u'uho'i vae majae ma-jiemu jiobe va'a'ajëjo. Anerahuro ëhi uvavohijo.

¹² Ëhi jië'e huë vavaeni rue'iröhohuni ëhuni God-are ariböviehu hesi jögoru ejahoromo Iesu gemu uehorovarujoho jemëro biririvoromo ëhi gemu vaebe va'orëjo.

¹³ Ëhi'amu hejodeje ö'idöre uevavamu: Jajivoromo uvonëjo: Badare muohuni avevejö'e o ijönö vuovëvë'oho jabumë huë mae baebe va'a'aruëjo. God-are Aru'ahohuro jöe gemuoho jövoromo uvajëjo: Io'ajo. Iae huë mae baeromo mu masijehu u'uvëvadoho vuonugo'i nuho'aruëjo. Nuhë'i ga'a'aruëjo jabuhu vaejarëhi ëhi mae jio'iramu.

Anerae göehu aribövi ma gagovoromo avoho bahi'i anerae göehu sisë aribövi gagovoromo i'u bojëmade uhu jöhoje.

¹⁴ Röhu naro ga'i gavodeje a ma va'ëne aho ajivë'e sue döre hijamu. A masijehu didi'aruëhi jië'e gold'e bosöho simanore didi'ë'e jiohijo. O anio ma'e siravaho övore jiohijo. ¹⁵ Röhu anera göhuro God-are osa börömore jioromo höröromo ruehijo. Rueromo suere hijaje a hesi örire ma-darugo'o uahijo: Iruno'o gemuore bahijarue majaho rovë'e höjo. Jasi siravahuro tarivoromo avoho bahijëjo. Sa'are jiaje iruno'oho mami'e mavoromo eni jië'e höjo. ¹⁶ Ëhi uvavamu hegorovo sue döre hijaje ahuro ë siravahuro sa'are jiaje iruno'o maho tarivoromo avoho bahihijo.

¹⁷ Ëhi'ego röhu anera göhuro God-are osa böröme ö'idöre ë jioromo anio ma'e siravaho baejë'e höröromo ruehijo.

¹⁸ Ëhi'ego anerae gö vëni muebejaje anerahuro God-ni suvuoro vënehu buejaharue maratu bëhire jioromo ruehijo. Rueromo anio ma'e sirava ma'enaje anera hesi örire ma-darugo'o uahijo: Sa'are jiaje grape ö'i bajoho mavë'e jiaje jasi siravahuro tarivoromo ujuohëjo. ¹⁹ Ëhi uvo'ego rue anerahuro hesi siravahuro sa'are jiaje ö'i bajoho tarivoromo munë guorötore ujuoho bahihijo sa'ijosajovoröhëni. Sa'ijosajovo'iröhe hesi bëhoho God-hu vörö'iraeromo a i'u bojëmi'iröhohoje. ²⁰ Munë guorötore ujuoho bahijaroho bogo amo börömoroho jio'i hesi rori'o jiohijo. Röhu ë ö'i bajoho sa'ijosajovohijo. Sa'ijovo'ego ehuro ë kavuë'e ijo bajo jovohuro kö va'ëne sa'are oterohoromo e'u va'ëne ruhibe rojomojuvo a buno gëvaruëhi ë jovo hesi ëgoho ëmino'e jiohijo. O hesi börömo 300 kilometre jiohijo.

15

Ijo tugohoi majare God-are i'u sa'a rajo bojëmi'iröhëro anerae 7 jabuhu rama ujuohare jöhoje.

¹ Ëhi'amu gavodeje noehu bogo gavaruëhi jië'e mu börömo böröme ö'idöre jiamu. Ja'o ga'ibejane tiö'ibejane. Ëhesi bëhoho anerae aho'obëhe 7 jaburo a bövi bise'o ijumo'amo'iröhe inömo sisëho ujuoho ruehijo. Ëinömo sisëho rue'iramu ehuro God dë vörönimobe rovadoho barë'ë'e. Ëhuni ë inömo sisëho ijo tugohoi a bövi bise'o ijumo'amo'iröhe inömoho jiohijo.

² Ëhi jio'i röhu gavodeje jovo e'u deri va'ëne börömo böröme jiamu. Ëe'u va'ënire vënëro ravanovoromo kavuhijo. O ë e'u va'ëne hesi riröre ae riravohijo. Urimoho ë ariböviohuro birivoromo mi sisëhu'o hesi nu ano'o va'ëne inömo'u'o ëho jabesi muoho jöho bogo ejëhoromo mi sisë hesi ihoho sinoroho bogo bae'i ruahö'öjareje. Ëariböviohuro God-hu i'imëmade gitaho ujuohë'e e'u va'ëne ë hesi riröre riravohijo. ³ Gitaho ujuohë'e riravoromo God-are mu vaejahaje ae Moses-are jöho ioromo God-are Sheep Harihu hesi jöhu'o ioromo uvoruomohijo:

Bada God ja daruge aho'o baejë'e ae javajëjo.

Jasi muoho masije ma-mabëhe höjo.

Ja böröme namiromo sa'ae aho'o muebejavuanue ae javajëjo.

Jasi muoho bogo sareri'ehu jio'i ma-maemu jio'amajëjo.

⁴ Bada raro ja bogo böröme hö uehorovo'ajëjo.

Raro jasi ihoho bogo döroho bamo'ajëjo.

Ja gemu ma-maemu javajëjo.

Sa'ae aho'obëhe rueromo jasi örire rajahiruomo'ajëjo

jasi mu ma va'orahoro jio'amajohuni.

⁵ Ëhi'amu gavodeje ö'idöre God-hu jiajire niögu javu maho jiovë'e jiamu. ⁶ Jiovë'e jiamu gagorovo naehu avevejö'e uëvode aneraho 7 ë osare jië'ëro ma-mabëhe ajivë'e sanu'e niögoho io'amë'e vinebire gold-ëro muoho taemo'amë'e suorovoromo ruehijo. ⁷ Rue'ego God rajahijarue maje 4-ho röhu gemuëro anerae 7 jabesi örire gold'e hevöho 7 ëhi anerae gemu gemu bojëmibe va'ohijo. Ëhevö gagoho God-hu a i'u bojëmi'iröhe vöröhuro irijiomu'amë'e jiohijo God ioro'ioremu hijaje a hesi vöröhuro. ⁸ Röhu God-are ajohu'o darugohu'o ë hesi u'ohuro God-are osa mare u'ivoromo rumorovohijo. Ae gö ë God-are osa maroho bogo rumo va'o varijënoho jiohijo. Hujëji anerae 7-ho jaburo a bövi bise'o ijumo'amo'iröhe mue 7-ho vae barë'iramu evare va'oruomo'ë'e.

16

Anerae 7-ehu God-are vöröe ramare jio'amajoho otehö'öjamu sa'are raromarue ariböviehu huë vavaeni sisë baebe rovamu John-hu gavade jöhoje.

¹ Ëhi'amu hejodeje God-are osa mare anerae aho'o 7 jabesi örire ma-darugo'o uëvavamu: Va'oromo God-are vöröe ramae 7-re jiajoho sa'aro otehö'öhëjo.

² Ëhi uvo'ego anerae 1-ohuro va'oromo hesi övore ramare vöröho sa'are otehö'öhijo. Otehö'ö'ego mi sisë hesi iho sinore jajivëhoromo mi sisë hesi nu ano'o va'ëne inömo rajaharue aribövioho vi'ehi'e sagoho sagoho sisëho baeruumohijo.

³ Sagoho sagohoho baeruumamu urimo anerae gemuehu ramare vörö otehö'öjadoho röhu number 2-ohuro ramare vöröho sö jovore otehö'öhijo. Otehö'ö'ego sö jovoho vuovë'e a jabesi kö va'ëne jio'amohijo. Jovoho kö va'ëne jio'ego jovore jijiharue majoho aho'o vuovo barëhijo.

⁴ Vuovo'ego urimo anerae niö'iehu vörö otehö'öjaroho röhu number 3-ohuro ramare vöröho otehö'öhijo. Otehö'ö'ego rova'o'amë'e jovohu'o sa'a gagore rojomaje jovohu'o körae'amohijo. ⁵ Ëhi'amu naro hejodeje jovo muebejaje anerahuro uavavamu: O asë'e God urimë'i jiobe rovanoho avevejö'oho ëhi javajëjo. Ja a maemu javajëjo. Jaehu a gëromo ëhi jië'e i'u mana bojëmijanuoho iae mae höjo. ⁶ Nume aribövi sisëhuro jasi jö baeromo majëhijarue ariböviohu'o jasi aribövi ma ioro'iorohu'o muo'amamu jabesi köho rovade höjo. Jabumëro jasi aribövioho muo'amamu köho rovë'ego ëhuni jero jabesi örire köe mana bojëmijane höjo ue'aho'iröhego. Jabumë sisë'i ë'arohuni ëhuni ëhi jië'oho iae mae höjo. ⁷ Ëhi ua'ego God-ni suvuro vënehu buejहारue maratuore uavavohijo: Io'ajo. Bada God ja daruge aho'o baejë'e ae javajëjo. Jaehu a gëromo i'u mana bojëmijanuoho ëho bogo mu sisëho vae'iro iae mu mae vaejanue höjo.

⁸ Ëhi uvo'ego urimo anerae niö'i gemuehu vörö otehö'öjaroho röhu number 4-huro ramare vöröho maja nunire otehö'öhijo. Otehö'ö'ego God-ro maja nuni hesi öroho bogo tugohohijo majaëro vörö'iraeromo

ae aho'o jabesi sino haho'oho vënëro ravëvanovoröhego. ⁹ God-ro maja nuni hesi öroho bogo tugohë'ëro majaëro sisë maro nijëmiromo vënëro ravëvanovo'ego ë i'u nugö'öjade aho God agoruomohijo. Jabumë jabesi mu sisëho bogo vuonugoromo bogo uvoruomohijo: God-are ihoho böröme höjo.

¹⁰ Èhi'ego urimo anerae èhi niö'i èhi niö'iehu vörö otehö'öjaroho röhu number 5-huro mi sisëhu börömo vaeromo hijaje hesi döre ë ramare vöröho otehö'öhijo. Otehö'ö'ego ë mi sisëhu muebejaje öri ari'oho ramoramovohijo. Ramoramovo'ego ae aho'obëhe hara'uoromo anëro bitaroho ja'ihorovo'amohijo. ¹¹ Anëro bitaroho ja'ihorovo'amë'ëro jabesi vi'ehohu'o sagoho sagohohu'o uehorovoromo ö'idöre hijaje aho God hesi örire agoruomohijo. Jabumë mu sisë vaeruomadoho bogo uehorovoromo vuonugoruomohijo.

¹² Èhi'ego urimo anerae övo gö minehu vörö otehö'öjaroho röhu number 6-huro ramare vöröho rova'ë'e jovo böröme Euphrates-are döre otehö'öhijo. Otehö'ö'ego jovoho sinihohijo èhuro ruhe maja rojomajinö jioromo rueröhe a masijo jabesi öroho jiovëveho maro rueromo muorovoruumoröhego. ¹³ Èhi'amu naro gavodeje aru'aho sisë niö'i gemu vahuno va'ënoho göhuro sigobu börömo hesi jö'ore jioromo göhuro mi sisë hesi jö'ore jioromo göhuro sareri'e aru'aho'e jö majëhijaje a hesi jö'ore jioromo suorovoromo rueruomamu. ¹⁴ Èaru'aho sisëho jabumë Satan-are anera sisëro jioruomë'ëro bogo gavarue darugo'e muoho vaeruomajeje. Darugo'e muoho vaeromo sa'ae dinö'e dinö'e va'arueje sa'are masijo vaejarue aribövioho aho'obëhe gagovëvego daruge aho'o baejë'e aho God-are maja börömoho rovego muorovoruumoröhego.

¹⁵ Röhu Iesuro uve: Jöe hehëjo. Naro vajiohu'e aëro ö'anovo'ië'ajëjo. Èhuni ae rahu nune jioromo niögu avo'avoho mueberovë'oho iae mae jioruomö'ajëjo. Èhi jië'oho bogo ma-sinëremuoho a nuniroho jijihoromo javojoho baeruomö'ajëjo. Iesuro èhi uve.

¹⁶ Amo ë aru'aho sisë niö'i gemu jaburo sa'a muebejarue a masijoho sö ujuohëvo rueromo öri ari'o ihe Hebrew jöehu uvaruoho Armageddon ë gagovëvohijo.

¹⁷ Gagovëvo'ego urimo anerae övo gö mine övo göre gemuehu vörö otehö'öjaroho röhu number 7-huro ijo tugoho'i ramare vöröho sa'anö otehö'öhijo. Sa'anö otehö'ö'ego God-are osa börömore jiaje röho mare uvavohijo: Iae barëjë'e höjo. ¹⁸ Iae barëjë'e hö uvo'ego baderivoromo vajeri varuru'e vaeromo sa'aho sisë maro hijiohijiovohijo. Aevoromo aehu sa'are raromobe rovaroho sa'aho bogo èhioho darugo'e maho hijiohijiovo'i ma-bisemu jiobe rovadeje. ¹⁹ Sa'aho hijiohijiovo'ego amo börömoho niö'i gemu tariorovobe va'ohijo. Tariorovobe va'ego ame gö gö sa'ae dinö'e dinö'e jio'amajoho sisërë'amohijo. Röhu God-ro amo böröme Babylon hesi sisëho bogo rumonimo'i vörö'iraeromo i'uoho amo rajoho bojëmihijo èhuro aehu vörö'e jovo ue'ahoroma hara'uaruëhi ë i'uoho baeromo èhi hara'uoruumoröhego. ²⁰ Èi'uoho bojëmi'ego sa'a dirö dirö'e jio'amajoho dahore aho'obëhe sisërëromo èhi va'o barë'amohijo. ²¹ Röhu ënëro direjohi'amë'e masijo masije ruvebihijo. Èhesi i'uoho gemu gemu 50 kilo rabu'e jio'amë'ëro èhuro ruvebiromo

ae taemo'amoromo ijumëvohijo. Sisë maro ijumëvo'ego jaburo God agoruomohijo.

17

Önö'e juvaje magonaho börömo hesi jöhoje.

¹ Ëhi'ego anerae aho'obëhe 7 rama ujuoharoho röhu gemuëro rueromo uehijo: Rovego na röjahego önö'e juvaje magonaho börömehu i'u baejajoho gavëjo. Ëmagonahoho ruë numë jovemu jië'e öri ari'ere hijaje höjo. ² Urimë'i a masije aho'obëhe sa'ae dinö'e dinö'e muebejaruoho ëho jaburo ë magonahoho sihonövare höjo. O ae aho'obëhe sa'ae dinö'e dinö'e raromaruoho ëho jaburo hesi jöho ejahoromo hesi vörö'e jovoho ue'ahoromo simane sisërëromomo hu'o mu sisëho vaenövare höjo. Ëhuni rovego na röjahego huhu i'u baejajoho gavëjo.

³ Ëhi uenugoromo God-are Aru'ahohuro nasi simanoho huotovehamu ë anerahuro na baejevoromo a rumo'e sa'are ruehijo. Baejevoromo rovamu naro gavodeje magonahoho sino kavuë'e mi sisë hesi döre hijamu. Röhu mi sisë hesi sinore iho sisë God agaruoho jajivo'amë'e jiohijo. Hesi simanoho aho'obëhe 7 jio'amohijo. Hesi danoho aho'obëhe 10 jio'amohijo. ⁴ Röhu ë magonahohuro kavuë'e niöge nu ano'e gö gö jië'oho ruahë'e gold mabëhero aji'e munë mabëhero nieniae gö gö mabëhero ëhuro gurasijiomoromo avohorovë'e hihijo. Hiromo gold'e enatuoho övëro ma'enohijo. Ëenatu gagoho ë magonahëhu va'inumi'e mu gö gö vaejaje ë hesi va'inumohuro irijiomë'e usihö'e sisë bëhe jiohijo. ⁵ O magonaho hesi ihoho hesi varijore uhu'e jajivoromo uvë'e jiohijo: Ave magonaho hesi bëhoho amo börömohe Babylon höjo. Önö'e jijiharue mu gö gö vaejarue sa'ae dinö'e dinö'e raromarue aribövi jabesi vëmoho höjo. ⁶ Röhu na gavodeje ë magonaho hesi simanoho huotorovoromo sisërëjë'e jiamu ë hesi bëhoho huro God-are ariböviehu Iesuarë jö biririvoromo majëhijaroho muo'amoromo jabesi köho ibe rovë'ëro. Ëhu'ëro jië'ëro simanoho sisërëjë'e jiohijo.

Simane sisërëjë'e jiamu gagorovo na tiötiöevadeje. ⁷ Tiötiöevamugogorovo rue anerahuro uehijo: Ja rabëni tiöjanuëjo. Ëmagonaho hesi uhu jöho o magonahëhu döre hijaje mi sisë simane 7 o dane 10 jiajoho ë mi hesi uhu jöho huruoho majahi'ië'ajëjo. ⁸ Jaehu gavane mioho urimo namijade höjo. Röhu avevejö'oho bogohöjo. Röhu u'emu gua ëgobövi sa'a gagore jio rojomoië'ajëjo ijonö sisëro va'iröhëro. Rojomoi'iramu sa'are raromarue ariböviohuro tiöromomo jöe barëjëvo'ajëjo. Urimë'i ö'idö sa'a bogo bamadevare evare God-ro maro raromemu raromoi'röhe surire a ioro'ioro jabesi ihoho jajivo'i a ioro'ioro jabesi ihoho bogo jajivo'amade höjo. Jabesi iho bogo jajivo'amade ariböviohuro ë mi sisëho garomo tiöruomo'ajëjo. Ëhesi bëhoho ë mioho urimo namijadoho avevejö'oho bogojajoho röhu ijonö röhu maho jio'a'ajëjo. Iae ëhuni tiöruomo'ajëjo.

⁹ Röhu ae rahu ave jöho avo'avoho uehorovoromo simano mae baeromo bëhi nahë'oho ave nasi uhu jö hesi bëhoho biroho'arujëjo. Ëjövode mi sisë hesi simane 7 ëho jabesi bëhoho dahore aho'obëhe 7 hesi jöho höjo. Ëmagonahohuro ë dahore aho'o 7 jië'e hesi döre hijanovaje höjo. Röhu simane 7 jabesi bëhoho gö sa'are masijo vaejarue ae 7 jabesi

jōho hōjo. ¹⁰ Ōvo gō mine rireromadoho gemu avevejō'oho daruge jioromo hi'i rōhu gemu gō'o bogo rovē'e hōjo. Rovē'iroho iae majae ma-bisemu hi'a'ajējo. ¹¹ Rōhu mi sisē urimo namijē'ero jaruvo bogojiaje hesi bēhoho a masije 7 jabesi jō uavode rōhu ē hesi ijore number 8-ehu ruerōhe hesi jōho hōjo. Rōhu ēho urimo riravobe rovarue a masije 7 jabesi ae gemuoho jio'a'ajējo. Rōhu hu sisēro va'a'ajējo.

¹² Rōhu mi hesi dane 10 gavanoho ē hesi bēhoho sa'a muebejarue a masije 10 jabesi jōho hōjo. Rōhu avevejō'oho mueberuomo'irōhe ōri ari'oho bogo baeruomē'e hōjo. U'emu bae'a'aruējo. Jabesi muebe'irōhe ōri ari'o baejē'iroho evare a muebejēvo'irōhe darugoho bae'a'aruējo mi sisēhu'o gemu mae masije riravoromo ae muebejēvego majae ma-bisemu jioromo evare ē darugoho barējēhorōhego. ¹³ Ēa masije aho'obēhe 10 ēho jaburo uehore gemu bae'a'aruējo. Uehore gemu baeromo jabesi darugoho aho'o mi sisē hesi ōrire gemu bojamiromo ajaminōvo'aruējo. ¹⁴ Mi sisēho ajamiromo ri'ōromo God-are Sheep Harihohu'o muorovo'aruējo. Muorovo'iramu Sheep Harihohuro mana muorovēmiromo jabumē ruahō'ōjēvo'ajējo ē hesi bēhoho huro masijo vaeruomaje ae aho'o iosirēmiromo hu gemu dōroho jiē'ero. O huhu baejēvo'i uehorovēvoromo hesi baejēvade aribōviehu hu gemu birivoromo uehorovarue ē aribōvioho jaburo Sheep Harihohu'o gemuoro bimumoromo muorovoromo sisēho ruahō'ōjēvoruomo'ajējo.

¹⁵ Anerahuro ēhi ueromo uehijo: Ōnō'e juvaje magonahehu ruē numē jovemu jiē'ire hijamu gavane jovo hesi bēhoho ae aho'obēhe sine gō gō huē gō gō sa'ae dinō'e dinō'e raromarue aribōvi jabesi jōho hōjo. ¹⁶ Rōhu mi sisēhu'o hesi dane aho'obēhe 10 ga'amanoho ēhu'o jaburo huotorovoromo ē ōnō'e juvaje magonahoho nue huodivoromo ijumo'aruējo. Ijumoromo niōgu siri'oho jahaho'amo'iramu dē'ahobatēremu jio'iramu ēhi nugoruomo'ajējo. Dē'ahobatēremu nugonugoromo hesi sino ioro'ioroho ue'aho'i ioro'ioroho vēniro huoruomo'ajējo. ¹⁷ Ēhi ē'irōhe hesi bēhoho God-ro uehore ē danoho simanore bojēmijade hōjo ēhuro huhu nimaje muoho vaejahoruo-morōhego. Huhu nimaje muoho jabumēro vaejahoromo simane gemuoho uehorovoromo mi sisēho jabesi darugoho aho'o bojamiromo ajamijego ē mi sisēhuro bōvie namiromo ōri ari'oho muebebe va'ego evare God-hu rabe rabe uēvadēhi ēhi jiorōhego.

¹⁸ O jaehu gavane magonaho hesi bēhoho iho'e amo bōrōmoho hōjo. Ēamohuro sa'ae dinō'e dinō'e muebejarue a ioro'ioroho muebe'amarue hōjo.

18

Amo sisē Babylon ma-ioro'ioremu sisērē barē'irōhe jōhoje.

¹ Ēhi'amu gagorovo gavodeje anerae gō ō'idōre jioromo ruvebijamu. Hu darugo bōrōme baejē'ero ruvebi'ego hesi ajohuro sa'ae aho'obēhe ajivo'amohijo. ² Sa'ae aho'obēhe ajivo'amo'ego ma-darugo'o uvohijo: Amoho barējē'e hōjo. Iho'e amo bōrōmoho Babylon vejō'oho barējē'e hōjo. Avevejō'oho ē amoho Satan-are anera jabesi ame hōjo. Aru'aho sisē jabesi ōri ari'e hōjo. Va'lnumi'e ugo sisē ihe gōero gōero ē raromo jijiharue hōjo. ³ Ēhesi bēhoho ēhi hōjo. Aehu magonaho hesi vōrō'e jovo iromo simane sisērōromo hu'o ōnō'e vaejarue ēhi jiē'e mue gemuoho ē

amo rajoho jaburo sa'ae aho'obêhe røjehijare hōjo. Aehu magonaho'ōnō'e mu vaejaruēhi sa'are a masijo ōmo'ōmohuro ē amo gemuore bimuvoromo javoji'e mue gō gō vaejare hōjo. O Babylon amo rajohuro mahunō'e raromoromo bōvie bise'e imo'i nimare hōjo. Ēhi nimē'ēro inōmo imo'amarue aribōviohuro sa'ae gōro gōro jioromo rueromo ē amore jabesi inōmoho imoromo ēhuro moni ma'e jēvade hōjo.

⁴ Ēhi uvavamu hejē'i hejodeje ō'idōre huē gō uvavamu:

Nasi aribōvioho ē amore raromarujo vuonugo'i ruehējo
ēhuro ē amo rajo jabesi gemuoroho bogo bimuvoromo mu sisēho
vae'irarije hōjo.

O jabuhu i'u baeruomajoho jemē bogo bae'irarije hōjo.

⁵ Ēamo rajehu mu sisē bōrōmo bēhe vaebe rovaroho

God iae uehorovajējo i'ue bojēmi'iro.

⁶ Amo rajehu mu sisē vaeruomadēhi

jemēro i'uoho mana ēhi bojēmiromo
rōhu gō'o dōro bōrōmo bēhe bojēmirējo.

Jabuhu a ioro'ioro vōrō'e jovo bojēmanovamu ue'ahoromo ijumor-
ovarēhi
jemēro ēhi mana bojēmirējo.

Rōhu vōrō ma-ma'e jovoho bojēmego ue'ahoromo ijumoro-
avoho'irarējo.

⁷ Urimo amo rajehu nimoronimorohē'i jijihoromo mahunō'e raro-
marēhi

i'uoho mana ēhi bojēmego hara'uoromo huē vavaene baeruomo'irajo.

Magonahehu sarerivoromo uvajēhi: Na magonaho bōrōmēro jevē'ēro
dō maro hijaje hōjo.

Na bogo doruoho hijaje hōjo.

Bogo mae bogo huē vavaenoho bae hesi jevajē uvajēhi

ē amo rajohuro ēhi gemuoho sarerivoromo uehorovoromo uvoruomaje
hōjo:

No masije javuajējo.

⁸ Ēhuni majae gemuore jabesi i'uoho aho'obêhe ma-majioho rue
barē'iramu sisērējēvo'ajējo.

Ae guomo guomo sisē baeromo vuovēvo'ajējo.

Huē vavaene bōrōme jabesi ōrire rue'a'ajējo.

Hōmo majae rue'a'ajējo.

Vēnēro ravēvo barē'ajējo

ē hesi bēhoho jabumē mevo gēromo i'u bojēmaje aho Bada God-are
darugoho bōrōmēro jiē'ēro.

⁹ Rōhu sa'a gō gō a masijohuro ē amo rajohu'o bimuvoromo javoji'e
muoho vaeromo hesi inōme marohē'e mae ujuohoromo mahunō'e
raromē'ēro garōhe amoho vēnēro ravoromo u'ivo ajiomō'iramu
garuomoromo amo hesi jōēni vavaenimoromo nierusuburu'e
bamoruomō'ē'e. ¹⁰ Nierusuburu'e bamoromo ē amore huē vavaeni
bōrōmo baejaruoho garomo juhuonivoromo rori'o ēgobōviro riravo'ē'l'ō.

Riravoromo uvoruomō'ē'e:

Babylon vaevē'e amo bōrōmohajo.

E-e vaevē'e biriri'e amohajo.

Jemesi i'uoho ma-majioho baejē'e jēvajējo.

11 Ĕhi uvoruomol'iramu sa'ae dinö'e dinö'e raromoromo inömo imoromo moni mana ujuoharue ariböviohuro è amo hesi jöeni vavaen-imoromo nierusuburu'e bamoruomol'ë'e. Ĕhesi bëhoho urimë'i è amo rajehu imo'amarue a jabesi inömo imo'amoromo moni bojëminövaroho è i'u baeröhe majare evare iae barë'ë'e. Barë'iramu ae bogojië'ëro jabumë inömo bogo imo'amoromo monioho bae'ë'ö. 12 Jabesi gold silver munë gö gö maho nienia maho bogo imo'amoromo monioho bae'ë'ö. Sanuovë'e niöge kavuë'e nu ano'e gö gö ëhu'o bogo imo'amoromo monioho bae'ë'ö. Ridi'e ije nu ano'e gö gö ëhu'o bogo imo'amoromo monioho bae'ë'ö. Inömo inömo mi danehu avoho'amaroho ijo maehu avoho'amaroho rövë'e munë maehu ajaniehu munë nu ano'o göehu göehu avoho'amaroho ëhu'o bogo imo'amoromo monioho bae'ë'ö. 13 Rihu'e i maho ridi'e oso ihe gö gö vëniro buejego ridivajoho o sino avohorovuoho o mu rabe rabe vaejaruoho ëhu'o bogo imo'amoromo monioho bae'ë'ö. Wine jovoho olive ijo bajo jovoho flour-ho wheat-ho cow-ho sheep-oho horse-oho ëhu'o bogo imo'amoromo monioho bae'ë'ö. Maratu mabëhe horse-ehu jagu bava'aruoho ëhu'o bogo imo'amoromo monioho bae'ë'ö. Ae magonahe aru'aho'e jioruomajeje röhu mahu mi'o ë'aruëhi ëhi guduamo'amoromo imo'amarueje ae gö jabesi muemu vaeröhego. Ae magonahe mi va'ëne imo'amaruëhioho ëhioho bogo imo'ë'ö. Ijonöho aho bogo imo'amol'iramu ëhuni imo'amarue ariböviohuro nierusuburu'e bamoruomol'ë'e. 14 Nierusuburu'e bamoromo uvoruomol'ë'e: Vaevë'e amoho ijo baje gö gö i'i ganiganiëgajoho iae barëjëhë'e höjo. Jemë inöme marohë'e mae o bövie bise'e ajivë'e ma-mabëhe jëvadoho sisërëjëhë'e höjo. Dinö'e röhu maho birohorejo. 15 Iae è inömo amo rajo jabesi örire imo'amoromo mana marohë'e ma ujuoharohuro è amo rajehu huë vavaeni vi'ehi börömo baejaruoho gëromo juhuonivë'ëro rori'o ëgoböviro riravo'ë'e. Ĕgoböviro riravoromo huë vavaene baeromo nierusuburu'e bamoruomol'ë'e. 16 Nierusuburu'e bamoromo uvoruomol'ë'e:

E-e vaevë'e vaevë'e amo börömhajo.

Sanuovë'e niögu mabëhe kavuë'e ma-mabëhe io'amonövarije höjo.

Nieniae gold-ehu inömo göehu göehu avoho'amaroho gurasijiomoromo avohorovonövarije höjo.

17 Jaruvoho jemesi inömo marohë'oho ma-majioho ijumëhë'e höjo.

Boat muebe'amarue aribövioho boat ma'enarue aribövioho boat-re raromoromo mu vaeromo moni baejarue aribövioho boat-re va'arue a ioro'ioroho ëho jaburo rori'o ëgoböviro riravoromo 18 garöhe Babylon amoho vënëro ravoromo u'ivo ajiomol'iramu garuomoromo madarugo'o uvoruomol'ë'e: Sareri amo börömo böröme jiade höjo. Ĕhi jjë'e amoho urimoho bogojiade höjo. 19 Ĕhi uvoruomoromo vavaenimorovoromo tohotohoho jabesi simanore bulödivorovoromo nierusuburu'e bamoromo uvoruomol'ë'e:

E-e vaevë'e vaevë'e amo börömhajo.

Boat baeromo sö jovore va'arue ae aho'o noro è amo rajore nosi inömo imëvoromo manaho marohë'e mae ujuohë'e javuajëjo.

Jaruvoho ma-majioho sisërëjë'e höjo.

Ĕhi uvoruomol'ë'e.

²⁰ Rõhu õ'idõ rajoho apostle õmo'õmoho jõ God-aro baeromo majëhijarue aribõvioho God-are aribõvi ioro'ioroho jemëro nimorohore. Ëamo rajehu jemesi õrire sisë'i vaejëvaroho God-ro ëho gëromo ë hesi i'uocho mana bojëmijë'eje.

²¹ Rõhu darugo'e anerae gemuëro munë ha'osi bõrõmo bõrõmoho banigojiomoromo sõ jovore bu'õ'ego jovo gagore be'abuehijo. Jovo gagore be'abue'ego anerahuro uvavohijo: Ëmunëhu e'ure be'abuejë'ëro ijonõ bogo gavaruëhi amo bõrõmo bõrõme Babylon i'ue baeromo ëhi ma-oro'ioremu beva'oromo sisërë'iramu ijonõho bogo ga'a'anuëjo. ²² Gita bejaruoho jõ iaruocho virikõ huosiharuoho hëgõ huaruoho ë hesi huëho ë amoroho ijonõho bogo he'a'anuëjo. Inõmo javuo bõvi bise'o avoho'amarue aribõvioho ë amoroho ijonõho bogo birohëvo'anuëjo. I sa'ijovaje munë hunuohunuovo'ego garahõrõ'e baejajoho ë amoroho ijonõho bogo he'a'anuëjo. ²³ Iro buno'irae'ego ajivajoho ë amoroho ijonõho bogo ga'a'anuëjo. A'o magonaho'o masurovoromo nimoronimoroharuoho ë amoroho ijonõho bogo he'a'anuëjo. Rõhu amo rajomë urimo jemesi moni mu vaejarue aribõviohuro sa'a ioro'ioroho iosirëmiromo masije jëvade hõjo. Jemëro sareri sareri'e muoho vaeromo sa'ae aho'o jabesi uehoroho ijumëharije hõjo.

²⁴ Rõhu jõ God-aro baeromo majëhijarue aribõviohu'o God-are aribõvi ioro'iorohu'o ë amore o dinõ'e dinõ'e raromaruoho muo'amamu vuovëvë'õho ë amo rajo jabesi sisë hõjo. Iae ëhuni ë amoho sisërë'ajëjo. Anerahuro ëhi uvohijo.

19

¹ Ëhi'amu hejodeje ae aho'o õ'idõre ma-darugo'o uvoruomavamu: God mabëhëjo. Huro gemuëro maroho bamavuaaje hõjo. Iho bõrõmoho darugo maho nosi God hesiriremu hõjo. ² God-ro ae mae o sisë jëvego gë'i avoho mevëvaje hõjo. Ëhesi bëhoho ë õnõ'e juvaje magonaho bõrõmehu sa'ae aho'o javoji'e mu røjëhiromo ijumëvadohuni ëhuni huro mevoromo uavade hõjo: Sisë javo'ego sisëro va'a'anuëjo. Ëmagonahehu God-are mu vaejarue aribõvi muo'amëvadohuni ëhuni i'ue mana bojamijë'e hõjo. ³ Ëhi uvoruomoromo rõhu maho uvoruomohijo: God mabëhëjo. Ëamo bõrõmoho vënehu ravaje u'õho ëhi ma-ajiomemu ajiomõ'ajëjo. ⁴ Ëhi uvoruomo'ego rue a duvahe aho'obëhe 24-ho o God rajahijarue maje 4-ho jaburo sa'are ague aho raromoromo God-hu rõho mare hijajoho rajahiromo uaruomohijo: Ëjõho iae mae-ëjo. God mabëhëjo.

Masu'irõhe sõrõ God-are Sheep Harihehu bae'irõhe jõhoje.

⁵ Ëhi uvoruomo'ego God-are rõho mare uvavohijo: Nosi Bõrõmoho God mabëhe uarëjo. Hesi mu vaejharuje hu uehorovaruje aribõvi masijohu'o ininohu'o aho'o hesi õroro huë mae uarëjo. ⁶ Ëhi uvoruomamu hejë'i naro hejodeje ae aho'obëhe uvorovaruëhi jovehu ruomoromo uvajëhi varurehu anego hejaruëhi ëhi uvoromo uvavamu: God mabëhëjo. Bada nosi God daruge aho'o baejë'e ahuro bõrõme namijajëjo. ⁷ Ëhuni e'ego no huë mae baeromo nimoroharëjo. Hesi ihoho mabëhe uavarëjo. Ëhesi bëhoho God-are Sheep Harihehu masu'irõhe majaho rovë'e hõjo. Huhu masu'irõhe magonahohuro avohorovë'e

höjo. ⁸ God-ro sanuovë'e ajivo avohë'e niögoho bojамamu ba'amë'e höjo. Ëhi uvoruomavohijo. Röhu sanuovë'e niögu hesi bëhoho God-are aribövïehu mu ma vaejarue hesi jöhoje.

⁹ Ëhi'ego ë anerahuro uehijo: Ave jöho jajivoromo uvonëjo: Ae rahu hejë'oho uëvamu: God-are Sheep Harihehu masu'iröhe söröho ro ihë uëvamu hejë'oho huë mabëhe jioruomoa'ajëjo. Ëhi uenugoromo uehijo: Ave jö hejanuoho God-are jö maho höjo. ¹⁰ Anerahuro ëhi uevamu hejë'i naro hu uvene aho röjahi'irögoro hesi höru'ere ague aho hijodeje. Hiromo rajahi'irögoro ë'amue gegorovo uehijo: Bogave ëhioho ë'iranëjo. Jaehu God-are mu vaejanue ëhi jië'e mu vaejaje ae jevajëjo. O jasi ö mueno'ohu'o Iesuare jö mae uehorovoromo majëhijaruoho jabuhu Badare mu vaejaruëhi na'o ëhi ë'aje ae jevajëjo. Ëhuni nadi na rajehi'i God gemu rajahijëjo. Ëhesi bëhoho Aru'aho gemuohuro jöe bojëmë'ego aëro ijönö jioröhe jöho majëhinövare höjo o avevejö'oho Iesuare jöho majëhijarue höjo.

Mu Ma Uehorovaje Aehu sino ajivë'e horse-re hiromo va'oromo sisë aribövïohu'o muorovade jöhoje.

¹¹ Ëhi uevamu gavodeje ö'idöho jiovë'e jiamu. Jiovë'e jiamu gagorovo gavodeje ae sino ajivë'e horse-re hijamu. Ëa hesi ihoho Birivoromo Mu Ma Uehorovaje Ahoje. Hu mevoromo gövuaje a mae o sisë javuego gövuajoho ëho huro mae uehorovoromo ë'ajeje. O muorovajoho ëhu'o huro mae uehorovoromo ë'ajeje. ¹² Röhu hesi nunoho vënëro höduvanovohijo. O hesi simanore a masijehu didi'aruëhi jië'e bosöho aho'obëhe didi'o'amë'e jiohijo. Röhu hesi sinore ihe jajivë'e jiohijo. Ae gö ë iho hesi bëhoho bogo ga'i hesi huro sivue gavajeje. ¹³ Hu köëremu jië'e niögoho ba'amë'e jiohijo. Röhu hesi ihoho God-are Jö jumuvë'ohoje. ¹⁴ Röhu ö'idöre jioruomaje muorovo aribövïohuro aji buse jië'e sanuovë'e niögoho io'amoruomë'e sino ajivo'amë'e horse-re raromoruomohijo. Raromoromo ë a börömo hesi ijore ijore jijihoruomohijo. ¹⁵ Röhu ë a hesi jö'ore anio ma'e kaejöho jiohijo ëhuro God bogo uehorovarue aribövi sa'ae dinö'e dinö'e raromaruoho ruahö'öjëvoröhëro. Ruahö'öjëvoromo hujejo ha'itoho baeromo vörö'o muebejëvo'ë'e jaburo hu gemu ejahoruomoröhego. Muebejëvoromo aehu kavuë'e ö'i bajo munë guorötore hörehu taemotaemovoromo sa'ijovo'amaruëhi huro sisë aribövïoho ëhi hörëro taemotaemovo'amo'ë'e. Ëhesi bëhoho daruge aho'o baejë'e aho God-hu dë vörönimego vörö röjëhiromo i'u bojëmijaje jöhoje. ¹⁶ Röhu hesi ahionö niögu döre ihoho jajivoromo uvë'e jiohijo: Masijo vaeruomaje ae aho'o iosirëmiromo hu gemu döroho höjo. Ëhi jajivë'e jiohijo.

¹⁷ Ëhi'amu gavodeje anerae gemu maja nunire namijamu. Namiro mo döre bioromo va'arue ugoho aho'obëhe ma-darugo'o uehijo: God sörö böröme bamajëjo. Rueromo gemuoro gagovohëjo ¹⁸ ëhuro sa'are masijo vaejarue a jabesi birogoho iromo muorovo a masijo jabesi birogoho darugo'e a jabesi birogoho horse jabesi birogoho horse-re va'arue aribövi jabesi birogoho mae o sisë'i raromarue aribövi jabesi birogoho a masijo o a inino jabesi birogoho ëho i'amo'irarije höjo. Ëhi uehijo.

¹⁹ Röhu gavodeje urimo gavode mi sisëho o sa'ae dinö'e dinö'e masijo vaeruomaje aribövïoho o jabesi muorovo aribövïoho ëho jaburo

ë sino ajivë'e horse-re hijaje a börömo'u hesi muorovo ariböviohu'o muorovo'i gemuoro gagovë'e jiamu. ²⁰ Muorovo'ego horse-re hijaje a börömo'u hesi muorovo ariböviohu'o ëho jaburo mi sisëhu'o mi sisë hesi sareri'e aru'aho jö majëhijaje ahu'o ëhi guduamo baejëvo va'ohijo. Urimë'i ë jö sareri'e majëhijaje ahuro mi sisë hesi jöho ae sarerëmiromo darugo'o majëhiromo mi sisëhuni röromo noehu bogo gavarue darugo'e muoho vaenövadeje. Darugo'e muoho vaeromo ëhuro aho sarerëmi'ego ae rahu mi sisë hesi iho sinore baeromo hesi nu ano'o va'ëne inömo avoharoho uvene aho röjahijë'oho guaro rireromo va'onövareje. Amo ë sareri'e aru'aho jö majëhijaje ahu'o mi sisëhu'o guduamëvoromo bogo anëgo'i ma-babu'öjëvo'ego vënehu munë ravoromo girosijiomoromo e'u börömo va'ëne jiajire ë bejëvo va'ohijo. ²¹ Bejëvo va'ego jabesi muorovo aribövi sisëho horse-re hijaje a börömo hesi jö'ore jioromo höröjade kaejöhuro muo'amohijo. Muo'amo'ego uge aho'obëhe ë aribövi jabesi birogoho ue'ahë'ëro dë bajo'e jio'amohijo.

20

Satan gua gagore vadune ëgobövie hi'iröhego tövoromo gua gago ëgobövire ba'amamu John-hu gavade jöhoje.

¹ Naro gavodeje aneraho ö'idöre jioromo gua ëgobövi hesi ojo jiovarue key'o biriri'e ö'ohu'o övëro ömëvë'e ruvebijamu. ² Ruvebiromo ë anerahuro ni'i'ivadire jioje rovade sigobu börömo hesi ihoho Devil o Satan ë sigoboho guduamoromo tövohijo ëhi jioje va'ojuvo vadune aho'o 1,000 barë'iröhego. ³ Tövoromo ë gua ëgobövire ba'amo'ego beva'ohijo. Beva'ego ojoho tugohoniagivoromo sivaëro badihi taemohijo ëhuro hu bogo höröromo urimo ë'adëhioho sa'ae dinö'e dinö'e raromarue aribövioho sarerëmime va'ego vadune aho'o 1,000 barë'iröhego. Röhu vadune aho'obëhe 1,000 barë'iramu evare ojoho jiovaho'iramu iae höröromo hibe juvoromo majae ma-bisemu barë'iramu evare barë'ë'e. Ëhi jio'ë'e.

⁴ Ëhi'amu gavodeje a masijoho röho mare raromamu. God-ro urimo uëvamu darugoho baerumadeje ae mevëvoromo gëröhëni mae o sisë jëvego. Ëaribövioho röho mare raromoruomohijo. O gavodeje a ioro'ioro jabesi aru'ahoho jio'amamu. Urimë'i ë ariböviohuro sa'are raromoromo God-are jö Iesuhu majëhijadoho ae majëhibe jijhamu gagorovo aëro ë mu maho bijönimoromo sönöe tarivëhamu vuovëvadeje. Vuovëvë'ëro ë aribövi jabesi aru'ahoho gëvodeje. Urimë'i ë aribövioho jaburo mi sisëho o ë mi hesi nu ano'o va'ëne avohare inömo bogo uvene aho röjëhijareje. Ëmi sisë hesi ihoho varijore o övore jajivëho'iröhoho bijönëgamu bogo baejareje. Bogo baejë'ëro vuovoromo i'ovë'ëro Keriso'o gemu mae masije vaejuvo vadune aho'obëhe 1,000 barëhijo. ⁵ A ioro'ioroho bogo i'ovo'i ma-vuovo momorö'öjuvo vadune aho'obëhe 1,000 barë hesije. A'i naehu gëvode aribövioho i'ovoromo ri'öjë'e raromoruomohijo. Jabuhu i'ovoromo ri'öjare hesi bëhoho urimo ri'ö'iröhe majahoje. ⁶ Urimo i'ovoromo ri'ö'iröhe aribövioho huë mae jëvo'ë'e. God-are aribövi maho jëvo'ë'e. Urimo vuovëvadoho röhu maho bogo vuovoromo sisëroho va'i a'i God-are o Keriso-are priest muoho vaeromo Keriso'o gemu mae masije vae'iramu vadune aho'obëhe 1,000 barë'ë'e.

Satan ruahö'öromo vëni ravajire ë bu'ö'iröhe jöhoje.

⁷ Vadune aho'obëhe 1,000 barë'iramu Satan jiovo nugö'ö'iramu höröromo va'ë'e. ⁸ Hörö va'oromo Gog sa'are Magog sa'are sa'ae dinö'e dinö'e ae sarerëmime muorovojöro gagovëvobe va'ë'e. Sarerëmime gagovëvobe va'iramu ae aho'obëhe muorovo'i gagovo'iramu nie'u va'ëne jio'ë'e. ⁹ Nie'u va'ëne jië'ëro sa'ae bövioho ruë numë tagavoromo God-are aribövie hesi amo börömore riravaruoho muorovëmi'i numëvo'ë'e. Numëvo'iramu vënëro ö'idöre jioromo ruvebiromomo ravëvo barë'ë'e. ¹⁰ Ravëvo barë'iramu Satan ë aribövi sarerëmiromomo gagovëvade aho babu'ö'iramu vënehu munë ravoromomo girosijiomoromo e'u börömo va'ëne jiajire be'abue'ë'e. Urimo mi sisëhu'o hesi sareri'e jö majëhijaje ahu'o ba'amëvego abo rireromomo'iröhire ë be'abue'ë'e. Be'abueromomo mi sisëho o sareri'e jö majëhijaje aho o Satan ëho jaburo vae majae hara'uemu hara'uobe va'ë'ö.

Ae aho'obëhe God-are nurire riravego jabesi muoho mae o sisë jiego God-hu ma-ioro'ioeremu mevoröhe jöhoje.

¹¹ Ëhi ë'ë'ö. Röhu gavodeje a masijehu raromarue ëhi jië'e ajivë'e röho börömore ae gemu hijamu. Hi'ego aehu huruomomo va'aruëhi sa'ahu'o ö'idöhu'o ëhi arua anumiaa va'ego röhu ijoho bogojiohijo. ¹² Ëhi'amu gavodeje vuovëvë'e aribövioho ininore va'o masijore ë röho ma hesi nunire riravamu. Riravo'ego suri surioho jiovo'amohijo. Röhu suri suri göho ëho maro raromemomo raromomo'iröhe aribövi jabesi iho jajivo'amë'e suroho jiovohijo. O suri suri ioro'ioroho ëho ae aho'o mu vaebe rovere jöho jajivo'amë'e jiohijo. Ëröho mare hijaje ahuro suri surioho adahohijo ga'i di ahuro mu maho vaejë'e jiego di ahuro mu sisëho vaejë'e jiego. Ëho garomomo uëhijo: Mu mae vaejë'e javaje manö va'ëjo. Mu sisë vaejë'e javaje sisënö va'ëjo. ¹³ Vuovare aribövi ioro'iorohuro sö jove iromomo vuovo momorö'öjë'ëro jië'ëro rojomoromomo ioro'iorohuro vuovë'e ariböviehu raromaruire ë jioromomo ri'öromomo rueruomohijo. Rue'ego röho mare hijaje ahuro ae gemu gemu mevo garomomo mu mae vaejadoho o mu sisë vaejadoho manaho ëhi bojami'ego baebe va'ohijo. ¹⁴ Röhu vuovarue vöröhu'o a vuovego bahijarue öri ari'ohu'o ëhu'o ma-ioro'ioeremu bu'ö'ego vënehu ravoromomo e'u börömo va'ëne jiajire ë abue'ego ijönöho vuovarue öroho bogojiohijo. Röhu vënehu ravoromomo e'u börömo va'ëne jiaje hesi bëhoho ae rahu sisë vaejë'ëro vuovoromomo ri'öjë'ëro röhu maho vuovoromomo ë e'u va'ënire abueröhe jöhoje. ¹⁵ Ae rahu mae raromemomo raromomo'iröhe surire hesi iho bogojë'öho ëhi jië'e aribövioho ujuoho ruruhö'ö'ego e'u va'ëne vënehu ravajire ë rireromohijo.

21

God-hu ö'idö sa'a bövi bise'o i'o avoho'iröhe jöhoje.

¹ Ëhi'amu gavodeje ö'idö i'ohu'o sa'a i'ohu'o jiamu ö'idö mamiohu'o sa'a mamiohu'o sisërë barëjë'ëro. Sö jove urimo jiadoho bogojiohijo. ² Ëhi garomomo gavodeje God-are amo böröme hesi ihoho Jerusalem amo i'e ö'idöre God-hu hijajire jioromomo ruvebijamu. Magonahehu masu'irögöro baruohuro gajöro sino avohorovaruehi ë amo i'oho ëhi avohë'e jiohijo. ³ Ëhi jiamu gagorovo hejodeje röho mare ma-darugo'o

uvavamu: Jõe hehëjo. Avevejö'oho God-are javu maho a ririro jië'ëro huro a'o gemu mae hinövo'ajëjo. Jabumë hesi aribövie jëvo'i huro jabu'o gemu mae hiromo muebejëvonövo'ajëjo jabesi Börömëro jië'ëro. ⁴ Muebejëvoromo nuni jovoho miorëho'ajëjo. Ijonöho aho bogo vuovëvo'i bogo nivo'i huë vavaenoho vi'ehoho bogo baeruomo'ajëjo mu mamioho mami'e barëjë'ëro jië'ëro.

⁵ Ëhi uvo'ego röho mare hijaje ahuro uvavohijo: Jõe hehëjo. Naro bövie bise'e i'ëremu bamajëjo. I'ëremu bamajë uvonugoromo uehijo: Ëjëho bogo sareroho jio'i iae jö mae hōjo. Ëhuni suroro jajivonëjo. ⁶ Ëhi ueromo uehijo: Muoho iae barëjajëjo. Na urimo ni'i'ivevadoho röhu ijo tugoho'ioho ëhi gemuoho jevo'ajëjo. Mue aho'o aevodoho ëhi vae barë'irodoho jevajëjo. Ae rahu huë girihëvë'oho naro sa'a gagore rojomaje jovoho vuoromo suvuore bojëmi'ejōjo ue'ahëgo i'ovëvo'irōhego. ⁷ Ae rahu mu sisë ruahö'öjë'oho aviëhi jië'e huë maho nasi örire bae'a'ajëjo. Na hesi Börömoho God jevo'i hu nasi harihe jio'a'ajëjo. ⁸ A'i juhuonivoromo mu vuonugarue aribövioho sareri sareri'e aribövioho mu sisë gö gö vaejarue aribövioho a muo'amarue aribövioho önö'e jijiharue aribövioho iro oso'e vaejarue aribövioho inömo sisë aru'ahö'e hōromo uvene aho röjahi'amarue aribövioho jö sareri'e atarue aribövioho aho'obëhe ëhi jië'e aribövi jabesi öri ari'oho e'u börömo va'ëne munë vënehu ravoromo girosijiomajire ë jio'a'ajëjo. Ëhesi bëhoho ë aribövioho mami'e vuovëvadoho röhu maho vuovoromo ë va'o raromoruomo'ajëjo.

Jerusalem amo i'o hesi jōhoje.

⁹ Röhu urimo anerae 7 ramare vöröho 7 otehö'öjamu evare bövie bise'e ijo tugoho'i sisërë'amadeje. Mami'e ëhi ë'are anerae aho'obëhe 7 röhu gemuëro rueromo uehijo: Rovego na röjahijego Sheep Harihu hesi vaboro i'e masuvajoho gavëjo. ¹⁰ Ëhi uenugoromo God-are Aru'ahohuro nasi simanoho huotoveho'ego ë anerahuro baejevoromo dö mare ajiomoromo dahuro börömo ëgobövire ë ruehijo. Baejevo rueromo röjehijamu gavodeje God-are Amo Böröme hesi ihoho Jerusalem ö'idöre God-hu hijajire jioromo ruvebijamu. ¹¹ Ëamohuro God-are ajoho baejë'ëro ëhu'ëro ajivohijo. Ajivoromo ma-mabëhe ajivo barëjë'e jiohijo. Munë mabëhe hesi ihe jasper ajivajëhi ëhi ajivohijo. ¹² Röhu ë amo hesi rejoho ëgo ëgobövi mae jiohijo. Rejo hesi ojoho aho'obëhe 12 jio rova'ohijo. Anerae aho'obëhe 12 oje gemu gemu riravo rova'ohijo. Israel rajo jabesi agane 12 jabesi ihoho gemu gemu ojo ahore jajivo'amo va'ë'e jiohijo. ¹³ Maja höröjajinöho oje aho'o niö'i gemu jiohijo. Maja beva'ajinöho oje niö'i gemu jiohijo. Ruënöho niö'i gemu viënöho niö'i gemu ëhi jiohijo. ¹⁴ Ëamo rejo hesi uhuroho munë aho'obëhe 12 ruhë'e jië'ëro ëhu'ëro rejoho bibivoromo namihijo. Ëmunë ruho va'are ahore God-are Sheep Harihu hesi apostle ömo'öme 12 jabesi ihe gemu gemu jajivo'amo va'ë'e jiohijo.

¹⁵ Röhu na'o jö jövaje anerahuro gold-ehu avohare vahu baejaruoho övoro baejë'e jiohijo amo bövi hesi vahuoho o amo rejohu'o ojohu'o ëho jabesi vahuoho bae'iröhëro. ¹⁶ Röhu ë amo börömoho ioni göho ioni göho ruhënöho numënöho vahuvojadoho hesi vahuoho ma-gemuoho jiohijo. Anerahuro gold ahoho bava'oromo amo börömo hesi vahuoho vahuvo garomo gavadeje amo hesi ëgoho 2,400 kilometre jio'i hesi

bunohu'o döre ajiomadohu'o jabesi vahuoho gemuoho jiamu. ¹⁷ O anerahuro amo hesi reju vahuoho vahuvo garomo gavadeje reju döre ajiomadoho 60 metre jiamu. Jabuhu vahuvo gavaruëhi ëhi gavadeje. ¹⁸ Röhu amo rejoho munë nu ano'o mabëhëro vaejë'e jiohijo. Munë hesi ihoho jasper-je. O amo bövioho ma-gold-ëremu avohë'ëro ma-ajëro jië'ëro ruënörire öri ari'ohu'o ga'a'anue. ¹⁹ Röhu amo reju bibivo'iröhego reju uhure bahijare munëho munë mabëhe nu ano'e gö gö avohoromo bahijë'e jiohijo. Munë number 1 hesi ihoho jasper ajivë'e ma-mabëhe jiohijo. Munë number 2 hesi ihoho saphire nuogu'e ma-mabëhe jiohijo. Munë number 3 hesi ihoho agate mahu guho'e jiohijo. Munë number 4 hesi ihoho emerald rövë'e ijo hano va'ëne jiohijo. ²⁰ Munë number 5 hesi ihoho onyx hesi nu ano'e gö gö kavuë'e jionövo ajivë'e jionövohijo. Munë number 6 hesi ihoho carnelian kavuë'e jiohijo. Munë number 7 hesi ihoho quartz hövë'e jiohijo. Munë number 8 hesi ihoho beryl ijo hano va'ëne jiohijo. Munë number 9 hesi ihoho topaz hövo avohë'e jiohijo. Munë number 10 hesi ihoho chalcedony rövoromo hövanovë'e jiohijo. Munë number 11 hesi ihoho turquoise nuogu'e jiohijo. Munë number 12 hesi ihoho amethyst rövoromo kavuanovë'e jiohijo. Munë aho'obëhe 12 jabesi nu ano'e gö gö ëhi jio'amohijo. ²¹ Röhu reju oje aho'obëhe 12 jabesi tugoharuoho ëho nienia ha'ose aho'obëhe 12 jiohijo. Oje gemu gemu nienia ha'ose gemu gemu ëhi jiohe va'ohijo. Röhu amo hesi öri börömoho ma-gold-ëremu avohë'ëro ma-ajëro jië'ëro ruënörire öri ari'ohu'o ga'a'anue.

²² Röhu gavodeje God rajahjarue javu börömoho bogojiamu. Bada God daruge aho'o baejë'e ahu'o hesi Sheep Harihohu'o ëho jabu bëhi maro jëvë'ego ëhuni bogo osaremuoho rajëhi'i dinö'e dinö'e God'o hesi Sheep Harihohu'o ë rajëhiruomohijo. ²³ O bëhoho rabëni majahu'o manaerohu'o ë amoroho bamoromo ajivojëro. God-are ajohuro amoho ajivoromo God-are Sheep Harihohuro iro va'ëne amoho ajivajeje. ²⁴ Ajivo'iramu sa'ae dinö'e dinö'e raromarue aribövioho ë amo hesi ajire jijihonövo'ë'ö. Sa'are masije rirarue ariböviohuro jabesi bövie bise'e nu ano'o mabëhe gavaruoho ë amore ujuoho rue'ë'ö. ²⁵ Ëamoroho vahioho bogojio'ë'e. Majae vahie bogojio'i ma-majae jiemu jio'iramu amo reju ojoho bogo tugohonövo jiovonövo'i ma-ëhi jiovo nugo'ë'ö. ²⁶ Sa'ae dinö'e dinö'e raromarue ariböviohuro jabesi mu maho inömo maho ë amore ujuoho rueruomo'ë'e. ²⁷ Va'inumi'e muoho bogo mae bogo barueruomo'ë'e. Mu sisë gö gö vaejarue aribövioho o sareri'e jö atarue aribövioho bogo ë amoroho rueruomo'i a'i mae raromemu raromo'iröhe aribövi jabesi iho Sheep Harihu hesi surire jajivo'amade ë ariböviohuremu ë amoroho rueruomo'ë'e.

22

¹ Ëhi'amu iae ë anerahuro röjehijamu gavodeje a i'ovëvoröhe jovoho ajivo barëjë'e rova'amu. Jovoho God'o hesi Sheep Harihohu'o jabuhu arijarue röho mare jioromo ruehijo. ² Röho mare jioromo rueromo amore öri börömo hesi ririre rova'ohijo. Jovoho ririre rova'i a i'ovëvo'iröhe ijoho ionire ionire riravobe va'ohijo. Vadune gemu gemu röhu vae 12 12 bajoho ëhi raejajeje manaere gemu gemu. Ëijo hano hesi bëhoho sa'ae dinö'e dinö'e raromarue aribövi marëjëvo'iröhoho jiohijo. ³ A'i God-hu bijönimaje bövioho bise'oho ijönöho ë dirö'oho bogojio'ë'e.

God'o hesi Sheep Harihohu'o jabuhu masijo vaeromo arijarue rōho maho ē jio'ē'e. God-are mu vaejharue aribōviahuro hu ē rajahinōvo'ē'ō. ⁴ Rajahiromo hesi nu ano'o'oho ganōvo'ē'ō. Hesi ihoho jabesi varijore jajivo'amē'e jio'ē'e. ⁵ Rōhu vahioho ijonōho bogojio'ē'e. Iro hesi ajohu'o maja hesi ajohu'o ajivēvo'irōhe bēho'ho bogojio'ē'e. A'i Bada God-are ajohuro ajivēvonōvo'ē'e. Ajivēvo'iramu jabumēro ioro'io'oremu masije riravoromo ōri ari'o'oho muebebe va'oruomo'ē'e.

Iesu ruerōhe jōhoje.

⁶ Rōhu ē anerahuro uehijo: Ave jōe aho'o hejanuoho iae mae-ējo. Bogo sarero'ho hōjo. Bada God hesi Aru'aho a jabesi simanore bamēhego ae jō majēhijarue aho God-ro hesi aneraho na remō'ōjade hōjo naro rueromo rōjēhijego hesi mu vaejharuje aribōviahuro garomo uvo'irarijego: God-ro nimo'ego majae ijonōho ēhi ēhi jiē'e muohuro nosi ōrire rue'iē'ajējo. Ēhi uehijo.

⁷ Rōhu Iesuro uve: Jōe hehējo. Na ma-burēro ō'iē'ajējo. God-are jō bōrōmoho ave surire jajivē'e hōjo. Ēhuni ae rahu ejē'o'oho huē mabēhe jioruomo'ajējo. Ēhi uve.

⁸ Rōhu naehu jajivode jō hesi muoho aho'obēhe John naro heromo gavē'e jeve. Heromo ganugoromo ē mu rōjehijade aneraho naro uvene aho rōjahi'irōgoro hesi hōru'ere ague aho hijodeje. ⁹ Ēhi'o'ego uehijo: Bogave ēhioho ē'iranējo. Jaehu God-are mu vaejanue ēhi jiē'e muoho vaejaje ae gemuoho jevajējo. O jasi ō mueno'ohu'o jō God-aro baeromo majēhijaruoho o jaehu jajivanue surire jō ejaho'irōhe aribōvioho jabuhu God-are mu vaejaruēhi na'o ēhi ē'aje ae gemuoho jevajējo. Ēhuni nadi na rajehi'i God gemu rajahijējo. ¹⁰ Ēhi uenugoromo uehijo: Ijonō jiorōhe mu hesi jō ave suri surire jajivanuoho nadi subivēhonējo ē hesi majaho dunovē'e jjae. ¹¹ Ae rahu mu sisē vaejaruoho ēhi vaemu vaebe va'oruomo'ajējo. Ae rahu va'inumi'e mu uehorovaruoho ēhi uehorovemu uehorovobe va'oruomo'ajējo. Ae rahu mu ma vaejaruoho ēhi vaemu vaebe va'oruomo'ajējo. Ae rahu God gemu uehorovaruoho ēhi uehorovemu uehorovobe va'oruomo'ajējo.

¹² Rōhu Iesuro uve: Jōe hehējo. Na ma-burēro ō'iē'ajējo. Jemesi mu hesi suvuoroho ujuohoromo ō'ejōjo mu diehi diehi mae o bisemu sisē'i sisē'i vaejarijēhi ae gō gō suvuorōho ēhi bōvie o bise'e bojēmi'irodēni. ¹³ Na urimo ni'i'ivevadoho rōhu ijo tugoho'ioho ēhi gemuoho jevo'ajējo. Na aevo'i jevadoho rōhu ijonō jevo'ajējo. Mue aho'o aevodoho ēhi vae barē'irodoho jevajējo.

¹⁴ Ae rahu niōgu u'o'amaruoho huē mabēhe jioruomajējo. Ēhi jiē'e aribōvioho naro uē'iramu a i'ovēvo'irōhe ijo hesi bajoho iromo amo reje hesi ojoho ruahoromo amo bōrōmore rueruomo'ajējo. ¹⁵ A'i mu sisē gō gō vaejarue aribōvioho iro oso'e vaejarue aribōvioho ōnō'e jijiharue aribōvioho a muo'amarue aribōvioho inōmo sisē aru'aho'e hōromo uvene aho rōjahi'amarue aribōvioho sareri'e mu nimoromo vaejarue aribōvioho ēhi jiē'e aribōvioho ave amoroho bogo rueruomo'i ma-rori'o jioruomo'ajējo.

¹⁶ Iesu naro nasi aneraho nugō'ōjē'e jevajējo ē jōho huruoho majēhijego ekaresiae gō gō he'irarijego. Na a bōrōme David-are ujoho jevajējo. Sisonuvego ajivaje mujōroho va'ēne jevajējo. Iesuro ēhi uve.

¹⁷ Röhu God-are Aru'ahohu'o Sheep Harihehu i'e masuvade mago-nahohu'o jaburo niö'iro uvö: Ruehëjo. O ave jö he'irarije aribövioho jemë'o uvore: Ruehëjo. O ae rahu huë girihëvë'oho jemëro ruehe. Nimë'oho rueromo a i'ovëvo'iröhe jovoho ma-ire. Manaho bogojio'ë'e.

Ijo tugoho'i jöhoje.

¹⁸ Röhu John naro God-are jö börömohe ave surire jajivë'e jeve. Ëhuni naehu jajivode jö he'irarije ariböviohumë ave jö majëhi'ie'ajoho avoho here. Naehu jajivode jöho ae rahu gö'o döre ëma jajivë'oho ave surire jajivode i'uoho God-ro ë aho bojami'ë'e. ¹⁹ O ae rahu uvë'oho: John-hu jajivade jö ë hesi vituoho sisë höromo dodure bu'öjë'oho God-ro uvo'ë'e: Ëhi jï'e aho sisë höromo dodure bu'ö'ë'e. Dodure bu'ö'iramu ave surire jajivode a i'ovëvo'iröhe ijo bajoho bogo i'ë'e. O ave surire jajivode God-are amo börömoroho bogo va'ë'e.

²⁰ John naehu jajivode jö mae hö uvaje Ahuro uve: Iae na ma-burëro ö'ie'ajëjo. Bada Iesu iae mae uvanue. De je rove.

²¹ Bada Iesuro jemë aho'o huë baeromo ajëminövo'ë'e. Ahia mino'e.